


AIREPA VAE REO  
OVOI



The New Testament in the Rotokas Language of Papua New  
Guinea

**AIREPA VAE REO OVOI**  
**The New Testament in the Rotokas Language of Papua New**  
**Guinea**  
**Nupela Testamen long tokples Rotokas long Niugini**

copyright © 1982 Wycliffe Bible Translators, Inc.

Language: Rotokas

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-20

---

PDF generated using Haiola and XeLaTeX on 11 Nov 2022 from source files dated 9 Oct 2020  
1713bce3-5a15-5918-82c1-6b80c12df3bb

## Contents

Airepa Vae Reo Ovoi . . . . .	1
MATYU . . . . .	3
MAK . . . . .	71
LUK . . . . .	109
JON . . . . .	184
APOSEL . . . . .	237
ROM . . . . .	300
1 KORIN . . . . .	337
2 KORIN . . . . .	372
GALESIA . . . . .	396
EFESAS . . . . .	409
FILIPAI . . . . .	421
KOLOSİ . . . . .	430
1 TESALONAIKA . . . . .	439
2 TESALONAIKA . . . . .	446
1 TIMOTI . . . . .	451
2 TIMOTI . . . . .	461
TAITAS . . . . .	468
FAILIMON . . . . .	473
HIBRU . . . . .	476
JEMS . . . . .	503
1 PITA . . . . .	513
2 PITA . . . . .	524
1 JON . . . . .	531
2 JON . . . . .	540
3 JON . . . . .	542
JUT . . . . .	544
REVELESEN . . . . .	547
Bible reading . . . . .	584
REOARA VITUARO . . . . .	596

**Airepa Vae Reo Ovoi**  
**The New Testament in the Rotokas language of**  
**Papua New Guinea**  
**Nupela Testamen long tokples Rotokas long Niugini**

*Airepa Vae Reo Ovoi*

The New Testament in the Rotokas language of Papua New Guinea  
 [roo]

Translation by Wycliffe Bible Translators

© 1982 Wycliffe Bible Translators, Inc.

Print publication, 1982 by Bible League International

Web version

© 2014, Wycliffe Bible Translators, Inc.

<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-No Derivative Works).

https:

[creativecommons.org/licenses/by-nd/4.0/](https://creativecommons.org/licenses/by-nd/4.0/)

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

**Tok Orait**

Dispela Buk Baibel i kam wantaim tok orait na lo bilong Creative Commons Attribution-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Na tu, **yu no ken senisim Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/4.0/legalcode>.

Sapos yu gat askim long dispela, **plis askim mipela.**

## MATYU

### Irapa Reoro Vo Vukuo Iava

Iravu disaipel irara iava rera ro Matyu. Ira-ia ovaisivu toupaveira vao oiso, Livai. Uva oearovu tarai irara oearoa oiso purapaaveira, Ira vo vuku rigatoreva aue-ia 60 o 70 yia Jisas vo kavauaro isivaaro iava. Ovusa oearovu oiso purapaaveira aue-ia 80 o 90 yia Jisas vo kavauaro isivaaro iava oa rigatoreva.

Ro Matyu Jiu-pato, riro oirao pie vovouto-a rutu. Osa-a eisi osa iava Jiu vo rugugooroaro ora voea vo tarairoaro sirova vo vukuo rigatoreva. Uva voari tuariripa vuuta-ia uva oisoa rerare tuepaave, oiso ra voeao Jiu tuvutuvereve Pauto vo Saraaro-ia koatasa. Eva-a oa vituaro iava Matyu Jisas iava rigatoreva, uvare rera raga ita arureva Pauto, oisore ra oirara rutu tuvutuvepareve Pauto vaoro Reo Ovoi oirao piepaoro. Ora oreorovu oureva Olpela Testamen iava varao oara Jisas iava oisoa tavipape. Eisi osa iava uvuipaai ra Jiu-pa irara ora voea vo reoro raga-ia Jisas eveiive oiso, O ita, Pauto reraoro rutu ro Mesaia.

Jisas riroara ruu reoro vatepareva oirara siposipopaoro. Uva vara rigatoreva Matyu oara Pauto vo Saraaro iava oisoa tavitavipape (Mt 13:1-52).

1. Jisas Kraiss kavauaro iava vo Betlehem urui-ia, ora rera aao iraraaro vaisiaraaro, 1:1–2:23.
2. Jon Baptais ira pievira oirarapa siposiporeva, 3:1-12.
3. Jon Jisas baptaisreva vo uukova Jodan. Oa iava avaroepa Jisas raaka tapi iare vo uva kokarapato Seten rera-ia kokaraparoepa, 3:13–4:11.
4. Jisas Galili taere sovara-ia virireva rera vo kovoroaro ravoto kovoro purapaoro, 4:12–18:35.
5. Jisas Galili iava avaroepa oaravu kovoara purapaoro vore Jerusalem-ia, 19:1–20:34.
6. Turarovira koataroepa Jisas Jerusalem urui-ia ovoioipa wik-ia toupasa, ouruia-ia oevu rera kotoiva evao parikou-ia, 21:1–27:66.
7. Jisas tova tapi iava vorevira toreroepa. Oa iava disaipel irara iare ora karekeroepe. Uva voea arureva vorarore Vearo Siposipo kosi piepasa, 28:1-20.

#### *Jisas Kraiss Aao Iraraaro Vaisiara-o Voeao*

*(Luk 3:23-28)*

<sup>1</sup> Voea-a voeao Jisas Kraiss aao iraraaro. Uva vaiterei-a vaitereo Ebrahim vaio ora Devit rera aautoareiara ro Jisas.

<sup>2</sup> ✧ Oire uva Ebrahim-a Aisak aitearo. Ari Aisak-a Jekop aitearo. Uva Jekop-a Juda aitearo ora araoko irara oaro.

<sup>3</sup> ✧ Ari Judas-a Peres aitearo ora Sira vo araorei. Uva aakova oaesia o-ia Tema. Uva Peres-a Hesron aitearo. Uva Hesron-a Ram aitearo.

<sup>4</sup> Ari Rama-a Aminadap aitearo. Uva Aminadap-a Nason aitearo. Ari Nason-a Salmon aitearo.

<sup>5</sup> Uva Salmon-a Boas aitearo. Ari aakova-a o-ia Rehap. Uva Boas-a Obet aitearo ari aakova o-ia Rut. Uva Obet-a Jesi aitearo.

<sup>6</sup> Ari Jesi-a King Devit aitearo. Uva Devit-a Solomon aitearo. Oire uva Solomon aakoaro-a Yuraia vatuavaaro tuariri.

<sup>7</sup> ✧ Uva Solomon-a Riaboam aitearo. Ari Riaboam-a Abaisa aitearo. Uva Abaisa-a Esa aitearo.

<sup>8</sup> Ari Esa-a Jehosafat aitearo. Uva Jihosafat-a Joram aitearo. Uva Joram-a Asaia aitearo.

<sup>9</sup> Ari Asaia-a Jotam aitearo. Uva Jotam-a Ehas aitearo. Uva Ehas-a Hesekaia aitearo.

<sup>10</sup> Ari Hesekaia-a Manasa aitearo. Uva Manasa-a Emos aitearo. Uva Emos-a Josaia aitearo.

<sup>11</sup> Ari Josaia-a Jekonaia aitearo ora oavu araoko irara oaro. Oire uva vo vuuta vao oa-ia vo arao touiva Jekonaia arao osa Babilon vata Isrel-pa irara ouiva voea tovoa vo tauai vego-ia Babilon-ia.

<sup>12</sup> ✧ Uva voa Babilon-ia toupaooro Jekonaia Sialtiel kavaueva. Oa iava Sialtiel-a Serababel aitearo.

<sup>13</sup> Uva Serababel-a Abaiat aitearo. Ari Abiata-a Elaiakim aitearo. Uva Elaiakim-a Eso aitearo.

<sup>14</sup> Ari Eso-a Sedok aitearo. Uva Sedok-a Ekim aitearo. Ari Ekim-a Elaiat aitearo.

<sup>15</sup> Ari Elaiat-a Eliesa aitearo. Uva Eliesa-a Matan aitearo. Uva Matan-a Jekop aitearo.

<sup>16</sup> Ari Jekop-a Josep aitearo. Uva Josep-a Maria watuatoaaro, o-ia iria Jisas kavaueva. Uva rera-a ro ira vaisiiva oiso, Krai.

<sup>17</sup> Oire uva Ebrahim isivaaro iava katai tau vo resura (14) aao ora kavakavauaepa. Oa iava Devit-ia aue pura piropa katai tau vo resura (14) aaroo. Uva rera vo vuutaoro isivaaro iava ora kavakavauaepa. Oa iava oavu ita katai tau vo resura (14) aaroo ora puraaepa, voeao oea vo karekeepa vao-ia ovuuta-ia touiva vo Babilon-ia. Uva voa toupaooro Babilon-ia oavu ita katai tau vo resura (14) aaroo ora kavakavauaepa. Uva vo sara-a eva oa isivaaro iava Krai kavauroepa.

### *Maria Jisas Kavaueva* (Luk 2:1-7)

<sup>18</sup> Oire uva va-a vao Jisas Krai kavauaro iava vo siposipo. Uva aakova-a o-ia Maria iria reesiiva, oiso ra oira oureve Josep. Uva rera ou asavira toueva osa vagevagevira kakae kovu-ia taraiopa ora oira-ia vao oa purareva Tugoropato Uraurato.

<sup>19</sup> ✧ Uva rera ro oira oiratoaaro torevoko vovouto. Ira viapau oiso rugooparoepa ra reo goru sirova Maria arii piereve. Uva oiso ruipaparoepa ra oisivi raga oira kavureve. Reasiparoepa ra riro irara oira-ia taraiave.

<sup>20</sup> Oire uva va-ia Josep rirovira rugorugoo iraparoepa, osa purapurapato enselto Turaro reraoro urioroepa aue-ia urusia rera iare. Uva oiso puraroepa purapurapato, "Josep, Devit aaoatoaaro-a vii. Opeita uriripau riakova oara ou arapa Maria. Vo reo uvuri! Ari kakaeto karekeroi oira kovuaro-ia. Eera ira vateravorao Tugoropato Uraurato oirapa. <sup>21</sup> ✧ Uva kakaeto kavauevere, ra rera vaisiri oiso Jisas. Eake iava? Uvare oirara oaro rutu iava vuriara verarevera vara opesi pieoro, ra ora rerapa voea oureve vorevira vova vuria iava."

<sup>22</sup> Vara rutu-a varao oiso karekeepa profet vo reoaro oirao piesa. Oreoa vaterava Turaro profet gisipoaro-ia oiso, <sup>23</sup> ✧ 'Uvuta! Oiso iriavu iria viapau oiratoa valva uusiopa iria oiso kakaeto kavaueve. Oa iava rera vaisiiverea Emanyuel.' Uva vo vaisio oa vituaro oiso toupai, Pauto vigei tapo toupaveira. <sup>24</sup> Oire uva Josep uusua iava toreroepa. Oa iava oiso piereva osa Turaro purapurapatoaaro rera tavireva. Oa iava oira oureva Maria. <sup>25</sup> ✧ Uva viapau oiso oira tapo oisoa uusiparo vore osa kakaeto kavaueva. Oa iava oiso rera vaisireva, Jisas.

## 2

*Tarai Irara Uriaoepa Jisas Kekesa*

1 ✨ Maria Jisas kavaueva Betlehem urui-ia vo Judia taere-ia, vo osa voa oisoa Herot turaroparo. Oire uva vo vuuta-ia eva oevu riro tarai irara aaviikoara-ia oea taraioro uriaoepa Jerusalem iare tauai iava, vo uva ravireo kae uviroparoveira. 2 ✨ Uva oiso akeiva, “Ovu-ia kakaeto kavauroe ro Turaro oae Jiu? Igei aaviiko sirova utuie iria rera reesipae. Iria kae oviro vova uvava ravireo kaeparo viroveira. Oa iava urioiei rera-ia vuurapa vaisi purasa.” 3 Oire uva King Herot vo reo uvureva. Oa iava rikerikeparoepra rirovira uriripaoro ora voea rutu voeao Jerusalem urui sovara-ia. 4 Uva Herot va iava reipa irara gurureva voeao pris irara oea oisoa tauopaave, ora riro tarai irara oea oisoa taraipaave aue-ia Reo Taisi. Oa iava voea akepareva oiso, “Aa vo uruio-ia kavaurovere Kraisi?” 5 Uva rera taviiva oiso, “Ari Betlehem urui-ia vo Judia taere-ia osa profet irara voari tuariri Pauto vo reoaro rigatoiva oiso,

6 ✨ ‘Vii vao vo Betlehem urui-a vo rasio-ia vo Judia taere-ia. Viapau oiso gare vaisi urui-a vii vo Judia taere sovara-ia. Uvare vii sovara iava iravu reito karekeroverea. Ira ragai voeaaro tuvutuvereverea voea tokioro voeao Isrel.’

7 Oire uva oisi-a eisi osa iava Herot oavu iare vataua paua riro tarai irarare keeraroepa voeao oea oisoa aaviikoara-ia taraipaave. Oa iava oiso voea akereva, “E ovirovu voki putevoiva, o-ia taraitae vo osa kaeo viro?”

8 Oa iava voea arureva Betlehem iare. Uva oiso voea tavireva, “Kasikasi pievira rutu rerare taraasa avata. Ra rera keketaavora, ragai tavisa voreta. Ra ragai tapo rera-ia vuurapa vaisi puraa.”

9 Oire uva King Herot vo reoaro uvuiva. Uva avaaepa. Oa iava oira eira aaviiko kekeiva oira raga iria keke rovoiva, iria vova kaeo viropa uva ravireo kaeparo viroveira. Uva vo kepao aivaro rueva uvavi-ia kakaeto toupaveva. 10 Oire uva aaviiko kekeoro voeare vovouisiro roru iraova rutu.

11 ✨ Uva koataaepa vo kepa-ia kakaeto kekesa ora rera aakovaara Maria. Oa iava voa kokoto rekuoro takua viropa rera-ia vuurapa vaisi puraoro. Oa iava moni tagiro oaive karuiva. Oire va iava rerapa oaravu vatevateara vateiva auero gol, ora frankinsens avuo geesi ovi, ora oavu mer vearo geesia iisi ovi. 12 Uva urusia-ia Pauto oiso voea vosireva, “Teapi vorepata Herot iare.” Oire uva va iava oraivavu raga gaero kareaepa voea vo taerearo iare.

*Josep Aao Avaapea Isip Iare*

13 Oire uva kareaepa vo aao kavuoro. Oa iava enselto Turaro reraaro Josep iare karekeroepa urusia-ia. Uva oiso puraroepa rerare, “Toreu ra ovii avareti oarava tapo avau torioro Isip iare. Uva voa toupatavere Isip-ia ragai vo reoaro tupaoro. Oa-ia vii taviavere ra kareu vovevira vo avaregiva, uvare Herot kakaeto uposa rerare taraaparevere.” 14 Uva va-va vao oa iava Josep aao ora vaseaepa vokiara Isip iare. 15 ✨ Uva voa touiva osa Herot kopiropoepa. Uva oisi-a oiso osa pura piropa profetato vo reoaro oirao piesa oiso osa vo reo vaterava Turaro Pauto tuariri oiso puraoro, ‘Ragai oviiitoa oaare keeraraepa Isip-ia kavusa.’

*Herot Voea Tavireva Kakae Vure Uposa*

16 Herot oiso tarairoepa, Voeao aaviikoara-ia taraipa irara ragai keaivora. Oa iava rirovira rutu kasipu iraoparoepa. Uva oevu arureva vo kakaero



rutu uposa oea vo peva ivaro-ia tugura asavira toupai va vo Betlehem urui-ia, ora vo uruiro ouruiroa tutuu pie visivi oisoa toupai ve. Aue iava uvare vaore rugooroepa osa tarai irara aaviiko iava rera taviiva oiso, Tuariri o aaviiko kaeo viropa. <sup>17</sup> Oire uva oiso osa varao puraiva Jeremaia vo rearo oirao pieoro ro profet. Uvare oisi puraroepa voari tuariri oiso,

<sup>18</sup> ✧ ‘Gau guruko uvuivoi Rama urui-ia, sirao pie guruko rutu. Ovusa Resel gau irapoaveoi ovii irarapa. Uva viapau irai uvuiparoi ra oira vovouaro sisireve, uvare ovii vure rutu viapau toupai. Oea rutu kopiiae.’

### *Josep Ovii Avaorei Tapo Isip Iava Vorevira Kareeroepa*

<sup>19</sup> Uva Herot vo kopiario isivaaro iava Turaro Pauto reraaro enselto Josep iare karekeroepea urusia-ia, vo osa Isip-ia toupaveva. <sup>20</sup> Uva oiso puraroepa, “Toreu! Ra ovii avaorei oarava ora vaseu Isrel iare. Ari ro kopiioera ira kakaeto uposa aueparoera.” <sup>21</sup> Oa iava Josep ovii avaorei tapo avaroepa Isrel rasi iare. <sup>22</sup> ✧ Uva voa pou virooro Akeleas iava uvureva, uvare aitato Herot vo tavukiaro oureva. Uva Judia taere-ia turaroparoepa. Eva-a oa iava Josep rirovira uririparoepa voa tou arapa. Uva Pauto oavu-ia urusia Josep ravaavira tavireva. Oa iava Galili taere iare avaroepa <sup>23</sup> ✧ voa tousa atoia Nasaret urui-ia. Oire uva eisi osa pierева oiso osa va puraiva profet irara voari tuariri. Oreoa oirao pierева oisi voa touoro, uvare oiso puraaepa, ‘Ira vaiiiverea oiso, Nasaret-pato.’

## 3

### *Jon Baptais Reoa Kosi Piereva (Mak 1:2-8; Luk 3:1-18; Jon 1:18-19)*

<sup>1</sup> Uva vo voki-a vao oa-ia Jon Baptais urioroepa raaka tapi tousa oiso Judia-ia. Uva voa oiso siposipo rovoroepea. <sup>2</sup> Oa-ia oiso puraroepa voeare, “Sopaura oavisii poreta, ra vuri vovouro kavuta. Uvare Pauto vo Saraaro tutuu pievoi, ra karekepe vova vuvuiua iava.” <sup>3</sup> ✧ Rera ro Jon ira iava taviroepa profet Aisaia ira oiso puraroepa, ‘Iravu ira keeraparoi vo raaka tapi oiso purapa, Turaro vo raivaaro vatatopopata va ravaaoro oa-ia pouro virovorea.’

<sup>4</sup> ✧ Oire uva Jon apota visivi tupaoro aue kamel oruaro iava oisoa rera-ia kuvuparo kuvupato ora takipa iro aue iava bulmakau rakari. Uva aio oaro-a vao-ia siiko ora kosi. <sup>5</sup> Uva vo voki-a vao oa-ia voeao Jerusalem vata, ora voea rutu vova Judia distrik, ora voeao vova Jodan taere-ia rutu urioaepa rera iare Jon. <sup>6</sup> ✧ Oa iava vuri vovouro oaive kosi pieiva rera iare. Osa iava Jon voea-ia Tugoropa Sisu Baptais purareva vo uukova-ia o Jodan.

<sup>7</sup> Oire uva Jon riro irara kekereva lotua-ia irapa irara voeao Farisi-pa irara ora oearovu Sadyusi-pa irara, oeara rutu urioaepa Baptais ousa. Oa iava voeare oiso puraroepa, “Visii vao rakoru ovii iraraaro vuri irara. Irouto visii vosipare, oa iava toripata Pauto vo kasipuaru asavira?” <sup>8</sup> Visii iava sopaura poreta, ra vuri vovouro oavisii kavuta. Oa iava oirao pie vovou oavisii poeravira karekepere oearovupa. <sup>9</sup> Opeita oiso vovouputa ora visii raga vovouaro-ia, Ebrahim-a igei aitearo oa iava igei-a Pauto oiraraaro rutu. Easi Pauto raga uvuipa vo avekero iava kakae vure purareve. Ra oiso pieive, Ebrahim ovii iraraaro. <sup>10</sup> Torara eira iriaei ravaavira evaova

✧ 2:18: Jer 31:15 ✧ 2:22: Lu 2:39 ✧ 2:23: Ais 11:1 ✧ 3:3: Ais 40:3 ✧ 3:4: Sek 13:4  
✧ 3:6: Ap 19:4, 18

vituario-ia. Oire vo evaro oiso toupai osa visii, varao oara viapau oiso vearovira kuepape oara rutu taru toepaiverea vara vikipasa tuitui kasi-ia.

11 “Ragai visii baptaispaavoi uukoa raga-ia visii reesioro visiigoa vovouisiro oavisii poretavora. Ari ro ira ragai sirova uturovere, ira vo goruaro ragai vo goruaro-ia putevere, uvare rei vaisito-a. Uva viapau uvuiparai ra rera vaaro tasipa kaea, uvare akukuto-a ragai. Ari rera visii vaterevere vao baptaisa Tugoropato Uraurato vaaro visii reesipaoro Tugoropato Uraurato vo goruaro-ia ora tuituia vo goruaro. 12 ✧ Ira vururua-ia pitupare wit ragipasa oira rakariaro verapaoro. Oa iava oira aioaro orirurevere vo aio kitupa tapi oira rakariaro vikioro tuitui kasi-ia vao roko asa kasi.”

### *Jisas Baptaisreva Jon* (Mak 1:9-11; Luk 3:21-22)

13 ✧ Vo voki-a vao oa-ia Jisas Galili-ia kavureva uuko ovi iare avao vo Jan, oiso ra baptaisa oureve Jon vavaeoro-ia. 14 Osa Jon rerare korokoruparoepa oiso purapaoro, “Ae, apeisi ragavira ragai iare uriouei? Easi ragai uvuiparai ra vii ruvara-ia Baptaisa oua?” 15 Oire Jisas rera vo reoro pukoreva oiso puraoro, “Eagara, oisi va purave Pauto vo vovouaro sirova utuoro.” Oa iava Jon rerapa vasereva.

16 ✧ Oire Baptaisa oureva Jisas. Uva ikavira uuko ovi iava veraro viropa osa vuvuiua karu piropa. Uva Pauto rearo Tugoropato Uraurato kekereva osa oiso vararoepa osa kurue. Uva Jisas-ia pitusa rerereva. 17 ✧ Oa iava reoreoa varaepa vuvuiua iava oreoa-ia oiso puraroepa Pauto, “Rera-a eera Oviitooa oaa. Ira kavikopaaveira rutu rera-ia rorupaoro.”

## 4

### *Seten Kokaraparoepa Jisas-ia* (Mak 1:12-13; Luk 4:1-13)

1 Vo Tugoropato Uraurato Jisas siporeva kuvau rasi iare vo uva viapau oirara vai toupave. Uva voa Seten rera-ia kokara ragaparoepa. 2 ✧ Uva Jisas oisoa aio kavuvira toupaveve varao-ia vo resura tau (40) vokiyo ora vo resura tau (40) ruparo. Oa iava ogoeroepa. 3 Uva rera ruvara iare kokarapato tutuu piereva oiso purasa, “Vosa vii Pauto Oviitooaro rutu, oire ore aveke reou ra opovira ora poreo.” 4 ✧ Uva Jisas rera aatoreva rera vo reoro tuuro oiso, “Tugoropa Reo oiso purapai, ‘Viapau oiso opoa raga tootooa vatepai oiratoapa. Ari oirato uvuiparoi ra tootooa oupareve vo reoro-ia oara vatepareveira Pauto.’”

5 Uva va-a vao oa iava Seten rerava avaroepa ouruivu iare Jerusalem urui Rovopa Kepa Tugoropa Kepa kukuearo-ia rera tovosa viara-ia rutu. 6 ✧ Uva rera tavireva, “Vosa vii Pauto Oviitooaro rutu, oire ora vikiu vova rasiuaarore. Aue iava uvare Tugoropa Reo oisi purapai, ‘Ari ita, ensel irara oaro arurevere Pauto, ra vii pituive vo ora voea vavaeoro-ia. Ra viapau vii iava kokotoa tatu piro avekeara-ia.’”

7 ✧ Uva Jisas rera tavireva ita oiso, “Tugoropa Reo oiso purapai, ‘Opeita Turaro Pautoa oavisii-ia kokarapata.’”

8 Oire va iava Jisas oureva aia ita Seten oavu iare pukuia-ia riro kaekae pukui. Uva voava varao rutu-ia osararovu rutu Jisas kareke piepareva Seten, varao kekekeke pie sararo vo rasio iava. 9 Uva va iava oiso puraroepa

✧ 3:12: Mal 3:3 ✧ 3:13: Jo 1:31-34 ✧ 3:16: Ais 11:2, 42:1 ✧ 3:17: Sam 2:7 ✧ 4:2: Eks 34:28 ✧ 4:4: Diu 8:3 ✧ 4:6: Sam 91:11-12 ✧ 4:7: Diu 6:16

Seten, “Vosa ragai-ia vuurapa vaisi purari ragai iare taku virooro, oire eva-  
a oa iava vii vateavere osararovu rutu.” <sup>10</sup> ✧ Osa iava rerare oiso puraroepa  
Jisas, “*Verau Seten! Tugoropa Reo oiso purapai,*  
*’Pautoa raga-ia vuurapa vaisi purapata eera visii reraaro Turaro. Rara rera*  
*raga vo kovoaro purapata eera Kataitoa raga.’*”

<sup>11</sup> Uva oisi-a eisi oia iava Seten rera kavureva. Oa iava oearovu enselpa  
irara urioaepa Jisas tauvasa.

*Jisas Kovo Rovoroepa Vo Galili-ia*  
*(Mak 1:14-15; Luk 4:14-15)*

<sup>12</sup> Uva Jisas Jon iava uvureva osa rera tovoiva tuukepa kepa-ia. Oa  
iava Galili taere iare avaroepa. <sup>13</sup> Oire uva voava Nasaret-ia kavureva  
Kapaneam-ia toupasa. Uva voa vo Kapaneam urui oa Galili rovu ruvara-  
ia toupaveira. Oiso ragavira Sebyulan Distrikrei sovara-ia ora Naptalai.  
<sup>14</sup> Vo taererei iare avaooro profetato Aisaia vo reoaro oirao piereva oreoa-ia  
oiso puraroepa Jisas iava,

<sup>15</sup> ✧ “Vo rasio Sebyulan ora vo rasio Naptalai vo raivao-ia vore toko rovu  
Jodan-ia toapaoro Galili-ia rupa vovou irara voaoro. <sup>16</sup> ✧ Voeao oirara  
rutu oea rupa pitupitu-ia oisoo toupave oea riroa aviavia kekeiverea.  
Ora voeao-ia roroverea riroa aviavia, oea vo urauraaro kopiivira  
toupaveira vo ovusa rupa rugoovira toupaveira.”

<sup>17</sup> Vo voki-a vao oa-ia Jisas ora rera vo siposipoaro rovoreva. Va  
poerapaoro oiso puraroepa, “*Poreta viro vuriara oavisii iava. Ari Pauto vo*  
*Saraaro vova vuvuiua oa tutuu pievoi!*”

*Vo Jisas Keeraroepa Vo Resurare Oira Atari Oupa Irara Oiso Ra Rera*  
*Sirova Utupaave*  
*(Mak 1:16-20)*

<sup>18</sup> ✧ Jisas vokapareva toko rovu vatuaro-ia vao vo Galili. Uva voa vo  
araoreo kekereva Saimon araorei, ro ira oisoo oiso vaisipaive Pita ora  
araokoto Andru. Vo osa kuverava vikivikipasiva toko rovu-ia, uvare vo  
kovo purapatoarei-a aue atari. <sup>19</sup> Uva vaiterei tavireva Jisas oiso, “*Ragai*  
*sirova utusi, ra vei siposipoa oira ivupasa ragai iare.*” <sup>20</sup> Uva ikauvira  
kuverava kavusiva rera taveosa utuoro.

<sup>21</sup> Oire gare visivi vokaoro avaroepa. Oa iava vo araoreo-ia pouro  
viropa Jems araorei ora Jon, Sebedi oviitoareiaro. Osa oavu sovara-ia  
toupaiava uvuoa ora ro aitetoto Sebedi. Uva voa kuverava torevokopaiva oira  
rekorekopaoro. Uva voa vo araorei kekeoro vaitereire keeraroepa. <sup>22</sup> Oa  
iava ikauvira uvuoa kavusiva ora aitetoto tapo Jisas sirova utuoro.

*Jisas Oirara Siposipopareva Ora Voea Tapo Porete Piepareva*  
*(Luk 6:17-19)*

<sup>23</sup> ✧ Voraro rutu virireva vo taereo-ia vao vo Galili vo oirara rutupa  
siposipopaoro Reo Taisi Uvupa Keparo-ia aue Sinagog voea varaaro. Uva  
voeapa Vearo Siposipo kosi piepareva aue iava Pauto vo Saraaro. Oa iava  
oupiarovu iava oirara porete piepareva, ora orekerovu rutu varao oara  
oisoo varaura vuri piepaive oirara rutu iava. <sup>24</sup> ✧ Siposipoara rutu viriva  
rera iava voraro ruture Siria taere sovara-ia. Uva va-a eva vituaro iava vuri  
upia irara rutu sipopaiva rera iare osasararovu rutuva aue upia, ora voearo  
oearoa-ia oisoo vuri tugararo toupave, ora voearo oearoa koakoapeko  
upiarova oisoo toupave, ora voearo oearoa oisoo kerau upiarova toupave.

✧ 4:10: Diu 6:13 ✧ 4:15: Ais 9:1-2 ✧ 4:16: Ais 42:7 ✧ 4:18: Jo 1:35-42 ✧ 4:23: Mk 1:39  
✧ 4:24: Lu 2:2

Oa iava voea rutu porete piereva. <sup>25</sup> Uva riro irara rutu vova Galili taere, Dekapolis uruïro, Jerusalem-ia, ora Judia-ia, ora vova uukova Jodan ivirovira oearoa rutu rera sirova utupaapa.

## 5

### *Vo Jisas Voeapa Siposiporeva Pukuia-ia Kukuearo-ia Toupaoro*

<sup>1</sup> Uva riro irara kekereva. Oa iava iparoepa pukuia-ia. Uva voa rera utuoro ora guruaepa rera voeaaro disaipel. Oa iava voea rutupa voa siposiporeva pauvira toupaoro.

### *Jisas Siposiporeva Vao Iava Oiraopa Roru (Luk 6:20-23)*

<sup>2</sup> Oïre uva Jisas voea vatepareva reoa oïso purapaoro voeare,

<sup>3</sup> “Oïre voeao oea apotavira toupaveira oea roruiverea. Aue iava rara oïso ora voea-ia taraipaave, Igei apota irara Pauto vo taraiaropa evoea oea Pauto vo Saraaro-ia toupaveira.

<sup>4</sup> ✧ “Ari voearo oearoa gaupaive siraopaoro, oearoa roruiverea, aue iava rara Pauto voeapa gavaurea vatereve.

<sup>5</sup> “Ari voearo oearoa kave vovouvira toupaveira, oearoa roruiverea. Aue iava rara voeapa vara rutu vatereve Pauto varao oarare voeapa reo ovoi purareva vara vatesa ora rera vo Saraaro iavirava.

<sup>6</sup> ✧ “Ari voearo oearoa ovovourovu rutupa torevoko vovouro ruipa irapaave, oïso osa ro ira ogoeparo auepa aio ora rogepareve auepa uuko, evoearo oearoa roruiverea. Uvare Pauto voea vo ruiparoaro uvui pieoro vateroverea voeapa.

<sup>7</sup> “Ari voearo oearoa oearovupa siraopaave oea roruiverea, rara Pauto voeapa siraoro.

<sup>8</sup> “Ari voearo oearoa airerei vovouvira toupaveira, oearoa roruiverea, rara Pauto kekeive.

<sup>9</sup> ✧ “Ari voearo oearoa gavaure vovou kataia goru piepaiveira vo oïrara rutu ruvara-ia, oearoa roruiverea. Oeare oïso puraroverea Pauto, Ragai ovii iraraaro visii.

<sup>10</sup> “Ari voeao oea Pauto vo ruipaaro sirova toupaveira, oïre va iava vuria oupaiveira voeao ruvara-ia oea viapau oïrao pie vovouro vai, oea taru roruiverea, uvare Pauto vo Saraaro-ia toupaveira.

<sup>11</sup> “Ari vosa visii kekepaive vo osa ragai sirova utupataveira. Oïre visii takaupaive ora visii vuri piepaive, ra oreoreorovu rutu purapaive kuuvu vaisiro visiire ragai iavirava, visiigoa rorutaverea. Oïre vo osa oïsi eisi visii piepaive visii vuri piepaoro, ra roru iraopata. <sup>12</sup> ✧ Uvare riroa toupai voria visii vaoro vuvuiua-ia. Ari ita, voari tuariri uva oïso ragavira profet irara oïsoa tariopaive voea-ia vuri pitupituro purapaoro, voeao profet irara oea visiiipa oïsoa irapaave.

### *Ro Oïrao Pie Vovouto Ira Oïso Toupare Osa Avaka Ora Aviavia (Mak 9:50; Luk 14:34-35)*

<sup>13</sup> “Oïre visii vao oïso toupata osa avaka voeapa vo rasio-ia. Ari vosa avaka vo sipeiaro opesipe, ra apesi ragavira vorevira avaka vo sipeiaro vorepe? Ari vosa oïsi pieive vovueooro, ra viapau kovoa vaiaro va vao avaka. Oa iava va vikipaive, ra voava va-ia tasiapaive oïrara rutu.

14 ✨ “*Visii-a vao visii goa oiso toupata osa aviavia rasito vaaro. Oire vosa oai riro urui vai toupave pukuia vai kukuearo-ia, ra viapau vao utopape.* 15 Vosa iravu vuravu rukuereve, oire ra viapau oiso oira tovoreve baket sopaaro-ia. Ari uvuipa ra oira tovoreve viaevira tebol ivara-ia. Ra voava kepa rutu sopaaro-ia roropaeve voea rutupa aviavia vatepaoro. 16 ✨ Eisi osa aviavia oavisii roro piepata vo oirara rutu osireiario-ia. Ra vearo kovo oavisii kekepaive vao oa purapata. Oa iava Aite oavisii vaisiario kae piepaivere ro vova vuvuiua.

### *Pauto Vaaro Iava Reo Taisi*

17 ✨ “*Opeita oiso rugoopata, Ragai uriorai Reo Taisi verasa vao Moses vaaro ora voeao profet irara. Viapau! Easi, va uvui piesa uriorai vo reoro rutu oirao pieoro.* 18 Oiraopavira rutu visii tavipaa, Oa-a vao Reo Taisi oa vo tugurasa oia auero rutu karekeperea varao oara Reo Taisi sovara-ia toupaveira. Uva vuvuiua opesiperea ora rasito, ari viapau oavi gare rigatovi vai opesiperea vova Reo Taisi Pauto vaaro. 19 ✨ Oire vosa ro ira oavivu gareavi putepareve vao iava Reo Taisi, ora vosa oearovu tarai piepareve oisi piepasa, ira vaisiario gareroverea vo Pauto vo Saraaro-ia. Ari vosa ro ira vearovira Reo Taisi sirova utuparoveira oirara rutu tarai piepaoro oisi piesa, ira riro vaisi ourevere vo Pauto vo Saraaro sovara-ia vao vo vuvuiua. 20 Visii tavipaavo oiso, Vosa torevoko vovouro oavisii viapau Farisi vo vovouroaro-ia puteve varao torevoko vovouro ora voeao Reo Taisi-ia tarai irara, oa iava viapau uvuipatai ra Pauto vo Saraaro-ia koatata.

### *Kasipua Vo Pitupituario Iava* (Luk 12:57-59)

21 ✨ “*Oire vo reo uvutavora oreoa ouiva aao irara oavi oa oiso purapai, ‘Opeita oira upopau. Oire vosa iravu visii iava iravu uporeve, uva rera-a eera ira kortua-ia kosiro viroverea.’* 22 ✨ Ari ita, visii tavipaavo oiso, Ro ira araokotoaarore kasipuparo ira rovirieia-ia kosiro virovere. Ora ro ira araokoto oaro takaupareve eera-a ira rovopatoa-ia kosiro virovere kaunsel. Ora ro ira oiso puraro, Vii-a kokoropatoa rutu, ira tuitui kasi iare avaroverea vo kasio oa viapau rokopaive.

23 “*Oire vosa rovopa kue oavisii vatesa tapo auepata Pautoa iare roru vaisi purapaoro, oire araokotoa oavisii rugoo rovota, uvare rera-ia reoai visiire kasipua.* 24 Oire rovopa kuero oavisii tovo rovota rera va ora reo rovosa. Ra kasipua opesi pie rovota. Oire ra voreta taru rovopa kue oavisii vatesa.

25 ✨ “*Vosa iravu visii tovosa aueparo kortua-ia, oire uva uvuipatai ra ikauvira rera tapo ora agiagi rovota. Teapi rera visiiva avaro reo rovirieipato vavaeoro-ia visii tovosa. Oa iava visii vaterevere polis irarapa. Oire evoea visii tovoive tuukepa kepa-ia.* 26 Visii tavipaavo oiraopavira oiso, Vosa vao visii vaaro voria vo osa tuukepa kepa-ia toupata. Ra viapau va rutu opesi pieta ropa reo rovirieipato, ra viapau oiso tuukepa kepa iava kosi uvirota.

### *Otopa Pitupituario Iava*

27 ✨ “*Visii vao vo reo uvutavora oa oiso purapapeira, ‘Opeita ora oupa oaesii vuri piepasi.’* 28 ✨ Ari ita, oiraopavira oiso visii tavipaavo, Vosa iravu iriavu kekereve riakova, ra rerare sopaua ora sitape oirava garagarakooro. Oire ra va raga rerapa vo vovou purave oirare o riakova. Uva va-a eva oa-ia reo goru gasire vad ora oupa taisi vaaro.

29 “Vosa ro oirapapato osireito vii kove piereve vuria iare, oire rera tateri rera-ia vikisa. Vearopai vosa orekerovu vova varaua opesipe. Ra viapau oiso ita vii iava varaua oara rutu vikiive vore tuitui kasi vao oa viapau rokopaive. 30 Ora vosa oirapapa vavae vii kove pieve vore vuria, oire vo vavae tokori va-ia vikisa. Vearopai vosa orekerovu vova varaua oara opesipe, ra viapau oiso vii iava varaua oara rutu vikiive vore tuitui kasi vao oa viapau rokopaive.

*Ora Oupa Vo Pitupituario Kavuaru Iava*  
(Matyu 19:9; Mak 10:11-12; Luk 16:18)

31 ✧ “Tuariri vo reo karekeepa oiso, ‘Vosa iravu oirato iriavu kavureve riakova, oire oira vatereve oavu pepa vao oa-ia reo goru iava oreovu toupave, oiso ra viapau oira oureve vorevira.’ 32 Ari ita, visii tavipaa oiso, Vosa ro ira riakova oaro takau pierevoi reo goru-ia vao ora oupa. Oire ra iravu oueve. Osa iava rera tapo ita reo goru gasirevoi ora oupa.

*Reo Ovoi Vo Pitupituario Iava*

33 ✧ “Oire oavu reoa vao oa ouiva aao irara oavisii tuariri oa iava va uvutavora. Oa oiso purapai, ‘Opeita vii vaaro reo ovoi puteri. Ari varao purari rutu oarare reo ovoi purarivora Turaropa vara purasa.’ 34 ✧ Ari ita, visii tavi iraopaa oiraopavira oiso, Opeita viara-ia vaisi ragapata reo ovoi purapaoro. Viapau rutu uvuipatai ra vuvuiua vaisi ragapata oreorovu goru pie ragapaoro. Eake iava? Uvare paupa tugoropa Pauto vaaro aue vuvuiua. 35 ✧ Ora opeita rasitua tapo vaisi ragapata vo oreorovu goru pie ragapaoro. Oavu eva garea paupa oaro Pauto vo rasitua uva tasipareveira. Ora viapau uvuipatai ra Jerusalem-ia vaisi ragapata vo oreorovu goru pie ragapaoro. Uvare rei-a urui Turaro vo uruiaro. 36 Ora opeita ora visii kukuearaaria rei piepata oreorovu ora visii vo rugooaro-ia. Aue iava uvare viapau rutu uvuipatai ra kukue iava oavu orua popote pieta, eke voua rupa pieta. Viapau rutu. 37 O ita, uvuipatai oiso purapasa, Iu ita! ora Viapau rutu! Ari vosa ovaisivu outavere ita uvavuva va siguvasa va vao Iu ora Viapau, ra oiso purape, Seten vaaro.

*Ora Tuutuukopa Pitupitu Iava*  
(Luk 6:29-30)

38 ✧ “Ari ita, visii vo reo uvutavora oreoa tuariri karekeepa oiso, ‘Vosa iravu vii osireiaro vuri piereve, oire vii ita rera osireiaro vuri pieri. Ari vosa iravu vii reuriaro vuri piereve, oire ita vii ita rera reuriaro vuri pieri.’ 39 ✧ Ari ita, oiraopavira visii tavipaavo oiso, Opeita voearova ora tuutuukopata oea visii-ia vuria pura rovopaive. Vosa iravu visii tautauaraaro tapareve, oire rerapa ita ovaratavu poreta aia. 40 Ari vosa iravu visii tovo vovouparo kortua-ia, ra visii reraaro oureve siglis, oire vo popota rutu vateta ora kuvupato. 41 Ari vosa irouto riroto visii kae piereve orekevu-ia, oiso ra katai vuuta-ia va kaepaoro vokata. Oire rera tavita oiso, Erao vuuta-ia viipa va kaepaio. 42 ✧ Ari vosa ro ira visii arepareve orekevure, oire rera vateta. Ora vosa ro ira visii ruvara-ia ou ragasa aueparo, opeita rerare isivapata.

*Keripa Irara Tapo Ora Agiagipasa*  
(Luk 6:27-28, 32-36)

43 ✧ “*Ari ita, vo reo uvutavora oa tuariri karekepa oiso, ‘Vii vao voeaopa siraopau ora vii vate iraraaro. Oire ra voeao raga tapo ora kasipupau oea viiva ora keripaave.’* 44 ✧ Ari visii oiso tavipaa, Katai vovou purapata voeaopa siraopaoro oearoa visiiva ora keripaave. Oire Pautoa iare variripata ra voea taupapareve voeao oea visiire vuri vovoupaave. 45 Eisi osa iava oiso uvuipatai oiso kareketa, Aite ovii iraraaro visii ro ira vuvuiua-ia toupaveira oirara rutupa siraopaoro. Oiso osa ravireo kae piepareveira voeaopa vuri irara ora vearo irara. Ora aue tapo kokeva kove piepareveira voeaopa torevoko irara ora voeaopa tapo riro vakuvaku irara. 46 Vosa voeao ragapa siraopata oea visii tapo ora agiagipaaveira, ra eake vori outa rera ruvara-ia Pauto va iava vao? Easi voeao vuri irara takis oupa irara oea vai pasi viapau oisi vai piepaiveira tapo oiso, raa? 47 Ari vosa vate irara oavisii raga tapo ora reopata, ra va iava rei vaisi outaverea, raa? Viapau. Uvare voeao rupa vovou irara tapo oisi piepaiveira oiso. 48 ✧ Oisi vo vovou purapaveira osa vo vovou purapaveira Aite oavisii ro vuvuiua-ia touto torevoko vovoutoa rutu.

## 6

### *Oearovivu Tauvapasa*

1 “*Oire visii vao-ia vatatopo iraopata. Teapi taavoko ragapata oearovu osireiario-ia visii varaaro purapaoro vearo pitupituro. Vosa oisi piepatavere, ra viapau voria vai oavisii outa vo Aite oavisii ruvara-ia vo vuvuiua-ia.*

2 ✧ “*Vosa apota irarapa orekerovu vatepata voea taupapasa, ra opeita va kareke piepata oirara rutu osireiario-ia. Uva va-a eva osa voearo toupaveira riro kuuvu irara oearoa oiso vara-ia utavepaaveira vo Reo Taisi Uvupa Kepa aue Sinagog vo raivara sirova ora voea vaisiario rei piepaoro. Uva oisi-a eisi osa oiraopavira rutu visii tavipaa oiso, Voea-a evoea riro kuuvu irara oea voria oaive ou ovoivora ora voea vaaro.* 3 Oire vosa apota irara taupapata, ra viapau oiso voearo tavitavipata va iava vate irara oavisii vao iava oa purapata voeapa vatauvira. 4 ✧ Oa-ia taraipa Aite oavisii osa eisi vara purapatavoi rera osireiario-ia. Oa iava va-ia voria outavere Pauto ruvara-ia.

### *Variripa Pitupitu Iava* (Luk 11:2-4)

5 “*Oire vosa visii oiso variria purapata, ra viapau oiso va purapata osa voeao riro kuuvu irara. Oearoa tore ruipapaaveira, ra variripaave vo Sinagog Keparo sovara-ia. Ora vo raivara sirova, oiso ra voea kekepaive. Uva oiraopavira rutu visii tavi iraopaa oiso, Voea evoea riro ratarataa vovou irara oea voria oaive ou ovoivora vo osa oirara raga rei vaisi pieivora.* 6 ✧ Oire vosa variri vovoupata, ra tugiaravi iare koatapata rataoara tupapaoro vao variripasa Aite oavisii iare. Ira vo toupaveira vatau urui. Eera Aite oavisii ira visii-ia taraiparoveira osa vatauvira variripata. Oa iava vara-ia voriaro outaverea.

7 ✧ “*Ora vosa variripata, opeita riroara rutu purapata reo akukuro oiso rutu osa voeao rupa vovou irara. Oea oiso rugoopaa riro reoreoro vai rutu purapaive ra Pauto voea uvupareve.* 8 Opeita voeao vo pitupituroaro sirova utupata. Pauto Aite orekerovu rutu-ia taraipa vara-ia oarapa ruipapataveira. Vara-ia oara-ia viapau rera arepata oara-ia taraiparoi.

9 ✧ “*Visii uvuipatai ra oiso variripata,*

*Igei Aitearo eisi toupári vuvuiua-ia, víi vaisiaropa avivikepaiei víi vaisiario kae piepaoro rutu.*

<sup>10</sup> *Vii vo Saraaro urio pieri. Vii vo vovouro puraive eisi vuvuiua, oiso osa raga igei uvui irapoeaiei ra va sirova utuio vo rasito.*

<sup>11</sup> *Vo vokie igei vateri aioa vao vo vokie iare.*

<sup>12</sup> *Igei varaaro vuri vovouro verari, vo rara oeavu iava oaravu vuriara vera rovopaio voeao oea igei vuri piepaiveira.*

<sup>13</sup> ✨ *Opeita igei tovopari kokara-ia. Vara asavira igei vatatopo piepari kokarapatoapa tugarato Seten.*

<sup>14</sup> *“Oire uvuta. Vosa oearovivu iava vuri vovouro vera rovopataveira varaooara purapaiveira visii-ia, osa iava Aite oavisii visii iava vuri vovouro oavisii verapareve. <sup>15</sup> Ari vosa viapau oisi eisi piepata, ra ita viapau Aite oavisii visii iava vuri vovouro verapareve.*

### *Aio Kavupa Pitupitu Iava*

<sup>16</sup> ✨ *“Oire vosa aio kavupata rugooara oavisii vatepasa Pautoa-pa, ra opeita ora sirakoi piepata oiso osa voeoro riro kuuvu irara. Aio kavupaoro ora sirao keke piepaaveira, oisore ra va iava taraipaave oirara oiso, Eari aio kavupai. Uva oiraopavira rutu visii tavipaa oiso, Oea-a evoea riro ratarataa vovou irara oea voria oaive ou ovoivora, vo osa oirara raga rei vaisi pieivora.*

<sup>17</sup> *Ari vosa aio kavupata rugoo vatepaoro rerapa. Oire korovo tovo rovopata vo ora visii kukueoro-ia, ora puaura oavisii tapo sisu rovopata. <sup>18</sup> Oire evaa oa iava oearovu viapau oiso taraipaavere oiso, Voeao aio kavupai. Ari ita, Aite oavisii raga vara-ia taraiparovere. Eera Aite ira visii-ia taraiparoveira osa vatauvira aio kavupata. Oa iava vara-ia voria outavere rera ruvara-ia.*

### *Vearopara Gurupa Pitupitu Iava*

*(Luk 12:33-34)*

<sup>19</sup> ✨ *“Visii vao viapau oiso uvuipatai ra vearopara gurupata vo-ia vo rasio-ia. Ari ita, vo rasio-ia atarike kare orekerovu vuri piepaiveira ora aue asikauru. Uva aue tapo kavirupa irara kovokovoara kasuraara tokopaiveira orekerovu kavirupasa. <sup>20</sup> ✨ Ari vosa vearopara gurupata vo Pauto vo uruvaro sovara-ia, uvare voa viapau atarike kare toupaveira, ora viapau varaoo asikauruara, ora viapau voeao kavirupa irara oea kasuraara tokopaiveira orekerovu kavirupasa. <sup>21</sup> Oire vo uva vearopara oavisii toupaverea, vo-a vo uva visii varaaro rutu rugorugooara oavisii toupaveira varaore rugoopasa vearopara.*

### *Osireito-a Aviaviaro Varaua*

*(Luk 11:34-36)*

<sup>22</sup> ✨ *“Oiso-ia osireitoarei-a aoa auepa sopaua. Vosa osireiara oavisii roroioara, oire sopaura oavisii rutu tapo roriovira aviavivira toupaveira.*

<sup>23</sup> *Ari vosa osireiara oavisii vuriara, oire oisi raga ita sopaura oavisii rupavira toupaveira. Eisi osa raga ita oiso vosa vo aviavio visii sopaaro-ia rupavira toupaveira, oire ra voava rirope rutu vo rupa veoro vovou rakusa.*

*Vaiterei Iava Tokipatoarei, Uva Irai Viapau Uvuiparoi Ra Vaiterei Roaropa Kovopareve*

*(Luk 16:13)*

<sup>24</sup> *“Viapau irai uvuiparoi ra aitereipa kovo tokipatoarei vai kovopareve. Ra ita iravure vuri vovoupaoro iravu ragapa vearovira kovopareve vo iravupa*



reasipaoro. Oire visii vao-ia viapau rutu uvuipatai oiso ra kasi pievira rugoopata vaiteiri rutu vo kovoreiarore oiso-ia, Pauto vo kovoaro-a vao, ari monito vo kovoaro-a vao.

**Pauto-ia Rugorugoopasa Rutu Rera-ia Raripaoro**  
(Luk 12:22-31)

<sup>25</sup> ✧ “Eisi osa iava oiso visii tavipaavo, Opeita rirovira rugorugoopata vo ora visii varaarore aue aioara ora uukoara oavisii varao oara visiipa vearo tou vatepaiveira. Ora varao varoara varaura oavisii oritopasa. Eake-a vao rovopa rutu, tootoa eke aioa vore varaua? Ora eake-a vao rovopa rutu, varaua eke varoa varaua oritopasa? <sup>26</sup> ✧ Oire uva kokio kare kekepataveira oea viapau oiso kukara paupaiveira. Ora viapau oiso aio gurupaiveira, ra vo tovopaive aio gurupa keparo-ia. Ari ita, Aite oavisii ro vova vuvuiua-ia voea aio piepareveira. Easi pasi Aite vo tokiaro visiipa kokio kare vaaro-ia putepaiveira vaopa oa vatepareveira visiipa? <sup>27</sup> ✧ Oire iroutoa vai ei visii iava ira uvuiparoi ra ivaara vai sigusiguvareve ora rera vo tootoaro uvuioro, vo rara rirovira rutu rugorugooparo ora rera tootoarore?”

<sup>28</sup> “Visii vao eakere tuuparare rirovira rutu rugorugoopataveira? Vearovira rutu rugoopata auere kokookoara oara ratau tou ragapaiveira. Ari ita, viapau oiso ora varapa kasivaripapeira ora tuupara vaire taraapaoro.

<sup>29</sup> Ari ita, visii tavipaa aue iava King Solomon riro orekerovu rutu-ia pituto ira ora rera raga ora oritoroepa. Uva viapau oiso vearo oritoa vaiaro rera oaiaro oiso osa vao-ia vearoo rutu kokookoa. <sup>30</sup> Iu, isiso kouro toupai varuparo. Oire uva vokitavira vo kouro tateivere vara vikisa tuitui kasi-ia. Uva vara evara okouroa oritopareveira Pauto. Oire uva apeisi-a? Uva viapau uvuiparoi Pauto ra oisi visii tapo oritopareve? Ari ita oiraopavira, viapau oiso uvuivira rutu raripatai rera-ia! <sup>31</sup> Eisi ra opeita rirovira rugorugoopata oiso, Eake vai aiopere, o eake vai-a ukaioviovere, o eakero vai-a ora tuupaviovere? <sup>32</sup> [Ari ita, rupa vovou irara oisi eisi rugorugoopaveira varare varao.] Oara rutu-ia taraiparoveira Aite oavisii ro vova vuvuiua varao oarapa ruipapataveira. <sup>33</sup> Oire vearovira rutu rugorugoopata, ra vo rugoo-ia tagau rovopata Pauto vo Saraarore rugoo rovopasa ora rera vo ruipaarore tapo. Ra va iava Pauto visii-ia osireoparoverea. Oiso-ia osa iava viapau uvuipatai ra rera vo tokiaropa apotavira toupataverea. <sup>34</sup> Eisi osa iava visii viapau uvuipatai ra vo vokiore rugorugoopata vokitavira. Ovokia-ia tavaka uvuivira toupai. Teapi vo vokio iava vo tavakao takuvupata vo vokio iavapa ora vokitavira.

## 7

**Oearovu Vo Rugorugooaro Rovirieipa Pitupitu Iava**  
(Luk 6:37-38, 41-42)

<sup>1</sup> ✧ “Opeita oirara togapata ikauvira reoara-ia. Uva va-a eva osa Pauto visii tapo ikauvira togareverea visii rovirieioro. <sup>2</sup> Uva vo pitupitu-a vao oa purapataveira oearovu-ia oirara voea toga ragapaoro reoara-ia ora voea rovirieipaoro, evo pitupitu purareverea Pauto visii rovirieioro. Vao oa purapataveira oirara-ia voea rovirieipaoro, uva va-a eva oa kareke piereverea Pauto visiipa. <sup>3</sup> Eakere koroto kekepaoro rera sisiropari eera araokoara osireiaro-ia? E viapau ora vii osireiaro-ia evo keposire rugoo rovo asapau? <sup>4</sup> Keposiu-a evoua vii osireiaro-ia. Uva apeisi ragavira uvuipau ra araokoara

taviri oiso, Araoko, oiso ruipaparai ra koroto veraa eera vii osireiario-ia?  
<sup>5</sup> Uva vii-a eva riro kuuvuto. Viigoa ora vii iava evo keposi vera rovoroi oa vii osireiario tupapai. Oa iava utupavira araokoara osireiario-ia vuravurarivere veavovira ra koro verau.

<sup>6</sup> ✱ “Oire opeita orekerovu vatepata kaakau karepa varao iava oara tugoropapeira. Vosa oisi voeapa vara iava piepata, oa iava visii sirova utuavere visii aiosa. Opeita vearopara tapo varao aasiara vikipata koie karepa. Teapi vara-ia tasiapave vara uverepaoro ora vo kare tasiario-ia.

*Oirato Uvuiparoi Ra Kasivarivira Variriparo*  
 (Luk 11:9-13)

<sup>7</sup> “Arieri variria-ia, ra viipa vatereve oa arepari. Ora taraari, ra va kekeri. Ora rataoa totori, ra viipa karureve Pauto. <sup>8</sup> ✱ Voea rutu voveao oea Pautoapa variripaave oea orekerovu oupaive. Ora ro ira orekerovue taraapareve, ira vara kekepareve. Ora ro ira rataoa totoreve, irapa karureve Pauto.

<sup>9</sup> “Vosa oviitoo vaiaro irai aitetoa vai visii iava, ra irai arepareve oiso purapaoro, Aite, opoa vai ragaipa. Oire ra aveke vai vatereve? <sup>10</sup> Ora vosa aiteto ruvara-ia atari arero, ra rerapa vuriva vai rakoru vai vatereve, raa? <sup>11</sup> Eisi osa toupai oiso, Vosa visii vuri irara oaravu veopara vatevateara vatepata ovii kakaero oavisiipa, uva va-a eva oa iava ro vearotoa rutu Pauto orekerovu vearopara rutu vateparevere pute pievira voeapa oea rerare variripaaveira.

<sup>12</sup> ✱ “Ovovourovu rutupa ruipapata oiso ra vara purapaive oirara visiipa. Oire vo vovouro raga pura rovopata voeapa, uvare va-a vao Reo Taisi rutu vituaro ora vao profet irara vo siposipoaro vituaro.

*Gare Rataovi Tootoopa*  
 (Luk 13:24)

<sup>13</sup> “Visii vao-ia koatapatai gare rataovi-ia. Ari vao raiva vore opesipa tapi riroa rutu ora riro paraka. Oa sirova utupaaveira riro irara oirara. <sup>14</sup> Ari vao raiva oa riaaro pipigovira toupaveira vavagisia rutu vore Tootoopa ratao-ia. Oire uva kataipa iraravi raga va vao pipigo raiva gaeivera pasi vao koatasa.

*Visii Vao Ora Vatatope Iraopata Profet Irarapa Voeao Riro Kuuvu Irara*  
 (Luk 6:43-44, 13:25-27)

<sup>15</sup> ✱ “Oire voeapa vatatopopata riro kuuvu irara profet irara. Oea visii iare uriopaavere sipsip rakariro-ia ora kuvupaoro visii keasa oiso, Vearo pitupitu igei vaaro. Uva oiraopavira rutu vara sovara-ia oiso rutu toupavere osa vavarai kare kaakau kare vo kareo vuri kare. <sup>16</sup> ✱ Uva voea eveipatavere varao iava voea vo kueroaro. Ari ita, viapau uvuipatai ra vearoara vai oupata aioara vai vo evaro iava rokarokapa ovaro. <sup>17</sup> Eisi osa raga vearo ova aio kuero purapaiveira vearopara, ora vao oava vuri kuero purapaiveira vuri ova. <sup>18</sup> Oire vao vearo ova oa viapau uvuipai ra vuri kue vai purave. Ora vosa vao vuri ova oa viapau uvuipai ra vearo kue vai purave. <sup>19</sup> ✱ Oeva toeivere va-ia vikisa tuitui kasi-ia. <sup>20</sup> Uva voea eveipatavere varao iava voea vo kueroaro, ra vara iava oiso taraipata voea-ia, Riro kuuvu irara voeao-ia profet irara.

*Viapau Vii-ia Taraiparai*

✱ 7:6: Pro 9:7-8 ✱ 7:8: Jer 29:12-13 ✱ 7:12: Ro 13:8-10 ✱ 7:15: Jer 23:16; Re 16:13  
 ✱ 7:16: Je 3:12 ✱ 7:19: Jo 15:2, 6

21 ✨ “Visii rutu vao-ia oirara viapau ra oiso rugorugoopata, Oirara rutu ragai vaisipaoro keerapaaveira oiso, Turaro, Turaro, oisore ra koataave Pauto vo Saraaro-ia. Viapau rutu. Ari voeao raga oea ragai Aitearo vo ruipaaro sirova utupaaveira ro vo vuvuiua, oea raga rera vo Saraaro-ia koataavera. 22 Ari ita, riro irara rutu vo voki-ia vao oa urioperea utupau ragaire oiso puraavera, Turaro, Turaro. Igei-a vao igoa vii vaisiario sovara-ia Pauto vo reoaro vatepaioveira. Ora oearovu tapo iava vuri tugararo kosi piepaioveira vii vaisiario raga-ia, uvare riro gorutoa vii. Ora oaravu rutu ravoto kovoro oara tapo purapaioveira. 23 ✨ Oire uva vo voki-a eva oa-ia voea tavavera oiso, Viapau visii-ia taraiparai. Voreta ragai ruvara iava. Visii-a riro vuri pitupituro purapa irara.

*Vaitereo Iava Kepa Paupatoarei*  
(Luk 6:47-49)

24 ✨ “Ro ira ragai vo reoaro uvureve ra va sirova uturo, eera-a ira oiso toupaveve, Ira-ia vearo rugorugoo toupai. Oa iava kepa oaro paureva avekeara ivara-ia. 25 Ra vosa kokeva koveopa, ora vosa pirutupe aue uuko, ora vosa kiuvu vsireve goruava, oire vara rutu goruaro evara vo kepa-ia ora iupe, ra viapau oiso kovepe. Aue iava uvare simen votopaoi avekeara-ia vo rasito sovara-ia. 26 Ari vosa ro ira ragai vo reoaro viapau uvureve, ora viapau va sirova uturo, ira oiso toupave, Rera-a eera kokoropato. Ira kepa oaro paureva rogara raga ivara-ia. 27 Uva kokeva urioopa koveoro. Uuko oviro tapo pirutupe, ora kiuvu tapo vsireve goruava, oire vara rutu evara goruaro vo kepa gugiugiva. Oa iava kove ovoiepa vuri ovoioro.”

*Pauto Vo Goruaro Iava Oisoa Siposipopareve*

28 ✨ Oire uva Jisas vo siposipo opesi pierivoiva, riro irara rutu oirara tavetave iraopaiva vo reo-ia vao rera vaaro. 29 Eake iava? Uvare viapau oiso voeapa siposiporeva osa voeao tarai irara vao-ia Reo Taisi. Ari oiso rutu toupai, Goruava voeapa siposiporeva.

## 8

*Oirato Porete Piereva Jisas Ira-ia Oisoa Lepra Upia Toupave*  
(Mak 1:40-44; Luk 5:12-14)

1 Oire uva pukui iava vararoepa, oa iava riro irara rutu rera sirova utuaepa. 2 Uva iravu ira-ia oisoa lepra upia toupave Jisas iare tutuu piereva. Oa iava kotupiuarei rekuoro takuro viropa rera ruvara-ia oiso puraoro, “Turaro. Vosa ruipapau, ra ragai porete pieri.” 3 Uva Jisas rera-ia vavaea taku pieoro oiso puraroepa, “Oiso ruipaparai, ra sisigarueu.” Osa-a eisi osa iava lepra upia opesi ovoiepa. Oa iava sisigaruoepa. 4 ✨ Uva Jisas rera tavireva oiso, “Vearovira rutu ora vatatopo iraopavei. Opeita irai taviparivere. Viapau. Ari varaua oara karekesa avapau pris irarapa. Ra tauoa vai purari oiso osa Moses tuariri puraroepa. Oa iava oirara rutu taraiavere oiso, Upia rutu vii iava opesiepa.”

*Rom Amiaro Reitoaaro Kovopatoaaro Ira Porete Piereva Jisas*  
(Luk 7:1-10)

5 Vo Jisas Kapaneam urui-ia koataroepa. Uva iravu ami viurupa irara katai vovoto (100) oirara reitoaaro urioroepa rera goruvira rutu aresa. 6 “Turaro. Ragai reraaro kovopato upiaparoi. Uva reraei kepa-ia. Ira iava

✨ 7:21: Hos 8:2; Ro 2:13 ✨ 7:23: Sam 6:8 ✨ 7:24: Je 1:22-25 ✨ 7:28: Mk 1:22, 6:2; Jo 7:46

✨ 8:4: Lev 14:3-4, 10

keruara rutu kopiiepa aue-ia kerau upia.” <sup>7</sup> Uva Jisas rera tavireva oiso, “*Ira porete piesa urioravere rara.*” <sup>8</sup> ✧ Oire uva rera ro viurupa irara reitooaro rera vo rearo pukoooro oiso puraroepa, “Turaro. Viapau oiso vearoto-a ragai ra ragai vo kepaoro-ia ora kiuu. Ari oiso raga ruipaparai ra vo raga touoro rerere reoreou osa poretero. <sup>9</sup> Ari ita, ragai tapo ro reoroarovi toupaaivoi ira reesiiva kepten rutu ragai tokipasa. Uva ragai raga oearovuva toupaaivoi viurupa irara katai vovoto (100), oea ragai reoroarovi ita toupai. Oire uva oiso-ia vosa irai arua voea iava oiso, Avau, ra avaro. Oire ita, iraire keerara oiso, Uriou, ra urioro. Ra ita kovopatoa oaa ragai reraaro tavia oiso, Vao purari, oire oai purareve.” Oiso puraroepa ami reitooaro. Uva evo reo oa kosi pieva Jisas vo goruaro. <sup>10</sup> Oire uva Jisas varao rutu uvureva rera ruvara-ia. Oa iava rirovira rutu vara-ia rugorugoo iraoparoepa. Uva voeao tavireva oea rera sirova utupaaepa oiso, “*Oiraopavira rutu visii tavipaavoii oiso-ia, Viapau oiso irai kekeavora Isrel-ia oiso osa ro-ia amipa irarapa irapato ira-ia oirao pie vovou toupai.*”

<sup>11</sup> ✧ “*Oire vo reore rugoopatai oiso, Riro irara oirara oisova uriopaavere uvarovu rutuva vo uvava ravireo kaeparo viroveira ora vova uva roko- pareveira. Vo uva aueva Ebrahim pauaverea aioa-ia ora Aisak ora Jekop vo vuvuiua Pauto vo Saraaro-ia.* <sup>12</sup> Ari ita, oirara rutu voeao Jiu-pa irara rera voeaaro oea reesireva ora rerapa, oea iava oevu kosi piereverea vore rupa tapi voea signoro ora rera vo tokiaro sovara iava. Oea vurivira gaupaiverea ora voea reuriaro kuripaoro ora voeapa siraopaoro.”

<sup>13</sup> Oire uva Jisas viurupa irara reitooaro tavireva oiso, “*Kareu vaviopavira. Vii vaaro oirao pie vovou oa oiraopavira karekepere viipa.*” Oa iava vo vuuta raga-ia eva porete ovoiroepa rera kovopatoaaro.

### *Pita Aigevaaro Iria Porete Piereva Jisas* (Mak 1:29-31; Luk 4:38-39)

<sup>14</sup> ✧ Jisas koataroepa Pita vo kepaoro-ia. Voa Pita aigevaaro kekereva osa vo kukue upia iava urua-ia gerevira toupavea. <sup>15</sup> Oa iava oira vavaeoro-ia pitureva. Oire uva kukue upia oira kavu ovoiva. Oa iava voava porete ovoiooro Jisas-pa aioara vatatopo ovoieva.

### *Jisas Oirara Rutu Ora Riakora Porete Piepareva* (Mak 1:32-34; Luk 4:40-41)

<sup>16</sup> Uva ovaiaoro riro irara rutu oirara ora riakora sipopaiva rera iare Jisas voeoro oearoa-ia oisooa vuri tugararo rutu toupave. Oa iava voa voeare reoreoparoepa tugara voea sigupaoro voeao vuri tugararo rutu. Uva voea rutu upiapa irara vorevira poretepaapea. <sup>17</sup> ✧ Uva oisi-a eisi osa vara purapareva vo reo oirao piepaoro oa purareva Pauto Aisaia gisipoaro-ia ro profetato oiso puraoro, ‘Eera ira upiara rutu vo vavataaro kaereverea vara verapaoro vigei iava.’

### *Voeao Oea Jisas Sirova Utusa Ruipa Ragapaave* (Luk 9:57-60)

<sup>18</sup> Jisas riro irara oirara kekereva oea ora guruaepa rera kovokovopaoro. Oa iava ora rera voeaaro disaipel tavireva oiso, “*Vova iviropaviei vavo varata iare.*” <sup>19</sup> Oire uva iravu riro taraito Reo Taisi-ia urioroepa oiso rerare purasa, “Tisato. Vosa ragaipa ruipapau, oire ra vegei rutu avave vo uruiro iare uvaroare avapau.” <sup>20</sup> Uva Jisas rerare ora rera iavirava oiso puraroepa, “*Ari ita, Akau kare vo tavukiroaro toupai uusipa tavukiro rasiuaaro, ora*

*kokio kare oea vo epitaroaro toupai. Ari ropa Oirato Oviitoaaro Ro Ropoto viapau oiso tavukia vaiei rerapa kukuearo vasepasa.”* <sup>21</sup> Oa iava iravu disaipelto Jisas tavipareva oiso, “Ragai ava rovoparai aite tova rovosa, eke?” <sup>22</sup> ✨ Oa iava Jisas oiso rerare puraroepa, “*Eagara, voeaope kopii rugoo irara, oea raga ora tovapaavere osa ragai sirova utuu.*”

*Jisas Riroto Kiuvu Rite Piereva*  
(Mak 4:36-41; Luk 8:22-25)

<sup>23</sup> Jisas uvua sovara-ia koataroepa. Oa iava disaipel irara rera sirova utuaepa voa. <sup>24</sup> Oire rirova purepava kiuvuva toko rovu ivara-ia urioopa. Oa iava rirovira rutu uvua petopetopaiva toru kouro osa voa Jisas uusiparoepa. <sup>25</sup> Oire uva va-a vao oa iava disaipel urioaepa rera tore piesa oiso puraoro, “Turaro. Igei tauvari! Easi opesipaviei.” <sup>26</sup> ✨ Uva voeare oiso puraroepa, “*E apeisi iava uriripatai? Easi gare visivi raga raripatai ragai-ia.*” Uva voava toreroepa purepava kiuvuva rakote pie ovoisa ora uuko ovi vara ruture reoro. <sup>27</sup> Oa iava ora voea raga va-ia tavetavepaoro oiso ora reopaaepa, “Avoeao, eaketo-a irao ro oirato ira gisipoaro uvu ovoivoi vo vatakore kiuvu ora uuko ovi?”

*Oiratoarei Iava Aiterea Iava Vuri Tugararo Verareva Jisas*  
(Mak 5:1-17; Luk 8:26-37)

<sup>28</sup> Jisas ovaratavu iava toko rovu-ia pouro viropa vo Gadara vase vaaro. Oire uva voa aitereivu oiratoarei rerava aivarosiva raivaaro aiterea-ia oisoa vuri tugararo toupai. Oa iava vavaraisiepa tova uruiro-ia uusipaoro. Uva eisi osa iava oisoa oirara ora riakora vo raiva vao viapau oisoa gaepaive vaiterei asavira. <sup>29</sup> ✨ Uva rirovira rutu oivepaoro vaiterei iava keerapaepa oiso purapaoro, “*Vii Pauto Oviitoaaro! Apeisi vai igei piesa uriouei? Vuuta igei vaaro tugura asavira toupai ovi ovisa igei rirovira upia piesa vagevagevira uriouei.*” <sup>30</sup> Ovusa oavu koie ragui tauaivi toupai aipoaoro. <sup>31</sup> Uva voea voeao vuri tugararo goruvira rutu Jisas arepaiva oiso purapaoro, “*Vosa igei kosi piepari, ra vavore igei sipori koie ragui sovara-ia.*”

<sup>32</sup> Uva va-a vao oa iava voea tavireva oiso, “*Avata!*” Uva vaiterei kavuoro koie ragui-ia koatasa avaaepa. Uva voava vo ragui riro varivarivira rutu ikauoro varaepa oavu-ia ora vikisa vagapa toko rovu sovara-ia. Oa iava voa gisiaepa kopii ovoioro.

<sup>33</sup> Uva koie tokipa irara toriiva riro urui-ia kare uvirosa. Uva voa toupaooro voeapa siposipopaiva varaoro iava oara rutu karekeepa vaiterei-ia tapo aiterea-ia oisoa vuri tugararo toupai. <sup>34</sup> ✨ Oire uva oirara rutu voeao vo uruia iava Jisas-va aivarosiva avaaepa. Oa iava rera kekeoro rerare oiso puraepa, “*Vova igei vo rasiaro iava avau uvai ragare.*”

## 9

*Jisas Iravu Oirato Porete Piereva Ira-ia Oisoa Keruu Upia Toupai*  
(Mak 2:1-12; Luk 5:17-26)

<sup>1</sup> Jisas uvua sovara-ia koataroepa ovaratavu iare vovesa voa vo toko rovu-ia. Uva voava vorevira karero viropa vore rera vo uruiaro torevokoaro-ia. <sup>2</sup> ✨ Uva iravu upiapato kaepaoro urioaepa rera iare ira iava keruara rutu kopiepa. Oire uva Jisas rera vurareva peperava uru ivara-ia osa voa gerevira toupaveva. Oa iava voea varaaro eveioro rari vovouro oiso

puraroepa rerare, “*Sopaua oara kavepe viire. Vuria oara vera ovoiaivoi vii iava.*”

<sup>3</sup> Evo reo uvupaoro voeao tarai irara aue-ia Reo Taisi oiso rugorugooapaepa, Easi ro Pauto toviparevoi.

<sup>4</sup> ✱ Ari ita, vo ovusa Jisas voea varaaro-ia tarairoepa rugorugooara. Oa iava oiso puraroepa voeare, “*Eakere eisi ora visii vovouoroaro ragaire vurivira rugorugooatai?*” <sup>5</sup> Ari aa vo reo irao-a oa avekatapai rutu ragaipa, ra va-ia oiso purara, Vuria oara vera ovoiaivoi vii iava, eke oiso purara, Toreu ra vokari? <sup>6</sup> Oa-a vao-ia oa purapaavoivi visiipa ro vearo pieoro. Oire va kekepaoro oiso purapata ragai lavirava, Oirato Oviitoaaro Ro Ropoto vo goruaro vao-ia oiraopa. Oa-a vao *uvuipai vuriara rutu verapasa oirara iava voeao rasitua-ia tou irara.*” Oire uva va-a vao oa iava rerare upiapato oiso puraroepa Jisas, “*Toreu, ra uruara kaepaoro kareu vii vo kepaaro iare.*” <sup>7</sup> Uva oisi-a eisi osa iava avaroepa tore ovoiooro rera vo kepaaro iare. <sup>8</sup> ✱ Oa iava oirara rutu va vao kekeoro va-ia tavetave iraopaiva. Uva taraipaaepa oiso, Pauto vo goruaro iava vo karopo vao-ia oa vatereva oirarapa. Oa iava Pauto vaisiario kae pieiva.

*Vo Jisas Matyu-re Keeraroepa  
(Mak 2:13-17; Luk 5:27-32)*

<sup>9</sup> Jisas vokapaoro iravu kekereva osa pauparoepa moni oupa kepa-ia gavman vo kepaaro. Rera vaisiario Matyu. Oa iava voa rerare oiso puraroepa, “*Matyu, ragai sirova utuu.*” Uva rera sirova utu ovoisa toreroepa.

<sup>10</sup> Oire uva kepa-ia toupaveva voa aiooro. Uva voa riro irara rutu takis oupa irara ora riro irara vuri irara oearea rutu rera tapo aiosa urioaepa. Oa iava voea tapo aiopaveva ora rera voeaaro disaipel. <sup>11</sup> ✱ Oire uva Farisi va vao kekeiva. Oa iava disaipelre oiso puraapea, “*Uva apeisi visii reraaro tuvetevepato voea tapo takis oupa irara ora voeao vuri vovou irara aiopare?*”

<sup>12</sup> Uva Jisas vo reo uvuoro oiso puraroepa, “*Voeao upia asa irara viapau oiso ra avapaave ruvarupatoa iare. Viapau. Ari voeao raga oea-ia upiara toupave, oea raga uvuipaai rera iare avapaave ruvarupato.*” <sup>13</sup> ✱ Visii vao-ia taraia ousa avata vo reo porearo-ia, oreoa Tugoropa Vuku sovara-ia toupaveira oiso, ‘*Vaopa reasiparai tauo purapa pitupitu. Ragoa vaopa ruipaparai tauva vatepa pitupitu.*’ Oire viapau oiso voeaore keerasa urioraera torevoko vovou irara. Viapau. Ari voeaore keerasa urioraera rupa vovou irara vuri irara, oiso ra ora voea varaaro iava vuriara oaive poreo viro.”

*Jisas Akepaiva Vo Aio Kavupa Pitupitu Iava  
(Mak 2:18-22; Luk 5:33-39)*

<sup>14</sup> Uva vo vuuta-a eva oa-ia Jon voeaaro disaipel urioaepa oiso purasa rerare, “*Uva apeisi iava igei rutu vao-ia aio kavupaioveira ora Farisi-pa irara osa vii voeaaro disaipel viapau oisi pieapeai?*”

<sup>15</sup> ✱ Oa iava Jisas voea tavireva oiso, “*Vosa irai oiratoa vai pitu pie asavira toupaveve vo raga sara irara ruvara-ia, ra viapau oiso vovousopaave aioa purapaoro vao ora ousapa aio. Aue iava uvare utupauavi ora voea iava rera veraivere vo osa riako ouro. Oire ra viapau ita voea tapo sara irara toupaveve. Uva vo vuuta-a eva oa-ia oisoa aio kavupaave taru voea sara*

✱ 9:4: Lu 6:8, 9:47, 11:17 ✱ 9:8: Ap 4:21, 11:18, 21:20 ✱ 9:11: Ga 2:15 ✱ 9:13: Hos 6:6; 1 Ti 1:15 ✱ 9:15: Ap 13:2-3, 14:23

*irara rerapa siraopaoro, uvare tauaipa voea arova. Osa eisi ragai voeaaro toupaivoi. Oa vituaro iava viapau aio kavupaiveira vo ragai tapo tupaoro.*

<sup>16</sup> “Viapau rutu irai uvuiparoi ra ruta vai varoa vai taporeve voava airepa. Vosa oisi pieive, ra ita rutapa karikari piro airepa arova. Ra karia ita riro iraope. <sup>17</sup> Uva viapau irai uvuipa ra tuariripa rakari vai sovara-ia wain ovi vai airepa vai kuvureve. Vosa oisi piereve, ra meme rakariaro kari piro. Ra wain koko viro ovusa va tapo meme rakari opesi ovoipe. Ari vosa aue raga-ia airepa kuvupaave, ra vearovira raga oriruvira toupai vea-ia.” Eisi osa voea vo akearo aatoreva Jon voeaaro disaipele.

*Jisas Reito Jiu Oviivaaro Porete Piereva Ora Iriavu Iria Rera Vaaro-ia Vaaro Pitueva*

*(Mak 5:22-43; Luk 8:41-56)*

<sup>18</sup> Oire uva Jisas vo reo raga vao purareva, ovusa ro reito urioroepa kokoto rekusa rera ruvara-ia. Oa iava oiso puraroepa, “Vo vokie raga-ia oviiva oaa kopiioi. Uva oiso ruipaparai ra uriou oira-ia vavaea tovosa, ra vovovira tooo.” <sup>19</sup> Uva va iava Jisas rera sirova tutoroepa ora disaipele irara tapo.

<sup>20</sup> Uva voa-a evoa uva iriavu riakova toupavea iria-ia oisoa kekira koveparo vokiara rutu-ia. Uva oisi raga tupaoro katai tau erao (12) ivaro-ia tuguraopa. Oire uva oira o rera isivaaro-ia urioopa varoa vaturo-ia pitusa rera vaoro Jisas. <sup>21</sup> Uvare ora vovouaro raga-ia oiso rugorugooapa, Vosa rera vaoro-ia varoa pitua, ra va iava vearovira poreteoro. <sup>22</sup> Oire uva Jisas ora poreroepa oirare oiso purasa, “Oviiva oaa. Vii iava sopaua varaape kaveoro. Ari vii vaoro oirao pie vovou oa vii ravotovira porete pievoi.” Uva vo vuutavi raga-ia eva varaa ovoiope porete ovoiro.

<sup>23</sup> Oa iava Jisas voa vo pouro viropa reito vo kepaaro-ia ovusa pupipaiva ora riroa gau guruko purapaiva oirapa gaupaoro. <sup>24</sup> Uva oiso puraroepa Jisas voeare, “Verata vova. Viapau oiso o kopiioe kakaeva. Iria uusi ragapaioi.” Oa iava rera agesipaiva. <sup>25</sup> Oire uva oirara rutu veraiva. Oa iava koataroepa Jisas oira vo tugiario-ia oira vavaeoro-ia pitusa. Oa iava tore ovoiope. <sup>26</sup> Uva vo tavitavi vao vokava voraro vo taere-ia vo rasio-ia.

*Jisas Voosito Vaio Veoro Piereva Ora Iravu Vaaruuto*

<sup>27</sup> ✧ Uva voava vo urui kavureva Jisas. Oa iava voosito vaio rera sirova keerapaoro utupasiepa oiso purapaoro, “Vii Jisas vegei aautoaaro, Devit Oviitoaaro. Vegeivipa sirao.” <sup>28</sup> Oa iava koataroepa oavu-ia kepa. Uva voa vaierevo voosito vaio Jisas iare uriosiepa. Uva vaiereire oiso puraroepa, “Easi ragai vai-ia raripasiei, oiso ra vao puraa?” Uva oiso purasiepa, “Iu, Turaro!” <sup>29</sup> Uva vavaerei toveve vaiereire osirearo-ia aarovira oiso puraoro, “Va-a vao oa reivira karekepere vei vaarova oirao pie vovou.” <sup>30</sup> Oire uva vaiereire osireiara karu piropa. Uva va iava Jisas vaiereipa riro goru reo vatereva oiso puraoro, “Opeita irai tavipasi vao iava.” <sup>31</sup> Oa iava voava kosi virooro rera iava Jisas siposiposa kosisi viropa. Uva voraro rutu viriva vo taereo-ia vo rasia vao.

<sup>32</sup> Oire uva voava avasieiva, iravu ita sipoiva kapuu gisipoto rera iare ira-ia oisoa vurito tugarato toupaveve. <sup>33</sup> Oa iava rera ro vurito tugarato kosi piereva rera iava. Uva voaviva vorevira reoroepa. Uva va iava vao-ia rirovira rutu tavetave iraopaiva oiso purapaoro, “Viapau rutu oiso oai karekepa Isrel-ia oiso osa vao-ia.” <sup>34</sup> ✧ Oa iava Farisi oiso ora reopaepa, “Easi eera tugara kare reitoaaro vo goruaro iava varao purapare ro Jisas.”

### *Jisas Oirara Rutupa Siraoparoepa*

<sup>35</sup> Uva voava Jisas voraro rutu virireva riropa uruiro-ia ora garepa uruiro-ia Vearo Siposipo kosi piepaoro Pauto vo Saraaro iava. Ora oupiarovu rutu tapo iava voea porete piepareva ora ovovourovu iava raveraveara. <sup>36</sup> ✧ Oire uva voa-a evoa uva oevau riro irara oirara kekeoro siraoroepa voeapa. Eake iava? Uvare voea varaaro rugorugooara piro piropaepa. Oa iava vurivira rutu toupaiava oiso rutu osa sipsip ragui voeao oea viapau tokipatoa vai oaive. <sup>37</sup> ✧ Uva eisi osa iava oiso disaipelre puraroepa, “*Riroara rutu aioara vioroe oara oiso toupai osa oirao pie asa irara vo ragai-ia Jisas. Osa viapau kovopa irara vai vo voea tavitavipasa.*” <sup>38</sup> Eisi osa iava uvuipatai ra rora Turaro Pauto variri irapatai ira ruvara-ia toupaiaveira vo kovo. Ra va iava kovopa irara vai siporeve vo kovo aioaro gurus.”

## 10

### *Katai Tau Erao (12) Aposel Vaivaisiaro* (Mak 3:13-19; Luk 6:12-16)

<sup>1</sup> Jisas katai tau eraore keeraroeapa voea iava oea oisoa rera sirova utupaave aue disaipel, auere voeapa goruaro karutusa vuri tugararo kosi piepasa, ora aue okopiiovu rutu iava voea porete piepasa, ora oaravu rutu raverave vovouro verapasa vova varaura.

<sup>2</sup> Oire uva voea katai tau erao (12) vaivaisiaro-a voeao aposel irara oiso-ia, rovopato-a ro-ia Saimon, uva ovaisivu-a vao rera raga-ia aue Pita, ora araokoto aue Andru, ora Jems ro Sebedi oviitoaaro, ora ro araokoto Jon. <sup>3</sup> Ora Filip, ora Batolomyu, ora Tomas, ora Matyu ro moni oupato, ora Jems Alfias oviitoaaro, ora Tadias. <sup>4</sup> ✧ Ora Saimon Selot, ora Judas Iskariot ro ira Jisas kosi piereva keripa irara vavaearo iare.

### *Jisas Katai Tau Eraopa Aposel Kovo Vateroeapa* (Mak 6:7-13; Luk 9:1-15)

<sup>5</sup> ✧ Oire uva Jisas voea voeao katai tau erao siporeva vao kaepasa Vearo Siposipo. Uva voeapa reo vatereva oiso, “*Visii vao opeita ratau toupa irara iare avapatavere aue Jentael. Ora opeita tapo Sameria uruiro-ia ora kiupatavere.*” <sup>6</sup> ✧ Ari visii vao voeao raga iare Isrel-pa irara avapatai oea opesikoaepa rutu oiso rutu osa sipsip ragui voeao oea opesikopaaveira. <sup>7</sup> Ari ava irapatai ra oiso ragavira siposipota, Pauto vo Saraaro vao vova vuvuiua tutuuvoi. <sup>8</sup> Uva oearovu porete piepatavere upiapa irara, ora oearovu kopiipa irara rutu vorevira tore piepatavere, ora voearo tapo leprapa irara sisigarue piepatavere, ora oearovu iava vuri tugararo tapo kosi piepatavere. Oire vo goru vao oa outavoi oa-ia viapau oiso voria vai. Uva oisi raga ita voea vatetavere akukuvira, ra viapau oiso vori oupata ita va-ia.

<sup>9</sup> “*Viapau oiso uvuipatai ra moniara vai kaeoro avata vo resipotara oavisii-ia.*” <sup>10</sup> ✧ Visii vao viapau uvuipatai ra oapara vai-ia pitupaoro tapo avatavere varao vokapa oaparo ora aue kuvupara vai. Ari katakataivira oaraiva avatavere ora aue tasipara aue tapo tooroara. Oire vosa ro ira vearovira rutu kovoparevere, ira aioa vatea ouparevere voeao ruvara-ia oea taupaparevere, aue iava uvare voea vaaro-a rerare rugoopasa rera tokipaoro.

✧ 9:36: Esi 34:5; Sek 10:2 ✧ 9:37: Jo 4:35 ✧ 10:4: Jo 13:26; Ap 1:13 ✧ 10:5: Ap 8:5, 25

✧ 10:6: Esi 34:5 ✧ 10:10: 1 Ko 9:7



11 “Vosa visii vao ouruivou-ia riropa uruiro karepata virovere, eke ouruivou garepa uruiro, oire vearovira rutu oirara eveipatavere oiso, Aa ro avuo-a vearo vovouto kovu taraa vovouto. Oire rera tapo touta vo tугураса uva vo urui arova ita avata. 12 Vosa okepavu-ia koatata, oire vearo voki purata oirarava ora riakora voeao vo kepa-ia tou irara. 13 Vosa vearo vovou irara vai visii ora aatopaavere, oire ra voeapa ita kave vovouro oavisii vatepata. Ari vosa viapau visii aatopaive, oire visii iare ita vorevira visii vararo kave vovouro vorepape varao torevokoara. 14 ✧ Ora vosa ouruivu iava visii reasipaave vo visii uvu arapa ora reasipaave visii tapo paupa arapa, ra voa ita kavuta. Ra kokotoara tovetove rovota auere rasi voare voea vo vuriaro reesipaoro. 15 Oiraopavira rutu oiso osa visii tavipaavo oiso, Vo vokia vao oa-ia oirara rovirieireverea Pauto, ovokia-ia vo siitoka oa ouverea vo uruivou Sodom ora Gomora urui, ouruivou oisoa vuri pitupitu purapaive vo tuariri. Oa-ia puteverea vo urui vo vavataaro oa-ia visii pa reasipaave.

### *Okasipurovu Rutu Karekepere*

16 ✧ “Uvuta! Visii sipopaavo oiso rutu osa sipsip ragui akau kare vuutaaro iare, riro sipsip aio kare. Eisi osa uvuipatai ra kasivarivira rutu rugoo rovopata oiso osa o rakoru riro kasivari rugorugooa, ora oiso osa ro-ia kurue kave vovouto, aiterea vo pitupituro sirova utupata. [Ra viapau vuri rugorugooora vai purapata.] 17 Oire vatatopo iraopatavere voearo oarovu oea visii sipopaivere Kaunsel irara iare, ra visii rovirieipaive visii ragipaoro voea vo keparaoora sovara-ia varao Reo Taisi Uvupa Keparo, Sinagog. 18 Ari ita, oiso purapaavere, Oari Jisas voearo-a evoea. Oa iava oiso visii oupaive vore gavman irara oaive vavaeoro-ia, ora vore turaro irara oaive vavaeoro iare tapo. Oisore ra voea rutupa ora voeao ratau tou irara tavitavipata ragai vaisiara iava. 19 Uva visii kosi piepaiverea kortua iare, ra opeita uriripata oiso rugorugooaoro, Apeisi purapai? O Apeisi ragavira vo reo purapai? Viapau. Ari evo vuuta raga-ia visii pa Pauto rera vo rugooora vateparevere. 20 Ra viapau oiso ora visii urugooora iava tavita. Viapau. Ari Tugoropatoaaro Aite oavisii ira raga reoreoparovere visii gisipoaro-ia.

21 “Oearovu voeoro oea araoko irara oaive oiso vatepaiverea vore gavman vavaeoro iare, oiso ra voea kopii piepareve. Ora oearovu oea ovii irara oaive kosi piepaivere gavman vavaeoro iare. Ora tapo oiso-ia ovii irara aite irarava ora keripaavere ora aako riako, ra voea vatepaivere gavman vavaeoro iare, ra voea kopii piepareve. 22 ✧ Vo vuuta-ia vao riro irara rutu visiire vuri vovou irapaavere. Eake iava? Uvare ragai vaisiara-ia toupata. Ari vosa ro ira goruvira rutu Pautoa-ia rugooa tovopareve vo tугураса Ovoipa Vokia, eera-a ira taru ouverea Pauto ora rera vo Saraa iare. 23 Ari vosa visii-ia oai puraive vuria vai vo ourui-ia riro urui vai, oire visii vao torioro ita avata ourui iare ita. Ari ita, oiraopavira rutu visii tavipaa, Asi viapau oiso kovoara oavisii potu pietavere vo uruiara rutu-ia varao vo Isrel-ia vo osa Oirato Oviitoaaro ragai vorevira vorera vore rasito.

24 ✧ “Voeao tarai taraapa irara viapau oiso uvuipaa ra tarai vatepatoa-ia putepaive ro voea reraaro. Ora kovopa irara tapo viapau uvuipaa ra reito oaive-ia putepaive. 25 Vosa tarai taraapato oiso toupareve osa ro-ia tarai vatepato rera reraaro, uva vearovai oisi. Ari vosa kovopato oiso toupareve osa ro reito rera reraaro, uva oisi vearovai ita. Vosa vo vaisio vateive

*ragaipa visii reitoaaro, Bielsebul [ovaisio porearo vao oiso purapai, Seten], ra va iava vearovira taraipata oiso, Visii-a ragai voeaaro visiigoa tapo vurivira rutu takaupaivere.*

*Opeita Vigei Iavapa Irarapa Uriripata  
(Luk 12:2-7)*

<sup>26</sup> “Visii vao viapau uvuipatai rutu ra uriripata voeaopa oirara. Ari ita, orekerovu rutu vatauara poeravira karekeperea utupaua. Ora vara rutu varao vatau reoro oara rutu poeravira karekeperea ra vara-ia taraiave oirara. <sup>27</sup> Vo reo-a vao oa puraavoi visiipa rupa-ia, oreoa taru vatepatavere vo ravireo-ia roroiiovira. Ora vo reo oa ogaoga visivi raga oa uvutavoi vao-ia, oreoava uvuipatai ra ora reopa tapiro-ia toupaooro vo reo-ia riropavira reopata. <sup>28</sup> ✧ Ra visii vao opeita uriripatavere voeaopa oea visii varaaro vuri piepaivere. Ari ita, ra ratarataavira kopiipata osa urauraara oavisii viapau kopiipape. Viapau. Ari ro raga Pauto irapa uvuipatai ra avivikepata. Ro ira uvuipa ra visii iava varaura rutu ora urauraara oavisii opesi piereve vo vuri tapi.

<sup>29</sup> “Garetoareivi voripaiveira kokiotoarei katai toea-ia akukutoarei. Ari vosa aite oavisii reasiparo, ra viapau oiso kataitoavi kokioto kove ragaro vore rasito. <sup>30</sup> ✧ Ari ita, visii kukuearo-ia oruara oavisii vieirevora Pauto Aite oavisii. <sup>31</sup> Eisi osa iava viapau uvuipatai ra uriripata vaopa, uvare viapau oiso toupataveira osa kokio kare akuku kare vo Pauto osireiario-ia.

*Ro Ira Jisas Vaisiaro Iava Tavitaviparo  
(Luk 12:8-9)*

<sup>32</sup> ✧ “Ro ira ragai vaisiaro iava tavitavirovere oirara rutu osireiario-ia, ira iava ita taru taviraverea Aite osireiario-ia ro vo vuvuiua. <sup>33</sup> Ari ro ira ragaire isivaroverea vo oirara rutu osireiario-ia, ragai tapo ita irare isivaraverea vo Aite osireiario-ia.

*Vo Jisas Upoa Kareke Piesa Urioroepa  
(Luk 12:51-53, 14:26-27)*

<sup>34</sup> “Visii vao viapau oiso ra oiso rugoopata, Ragai vo upo vo rasito opesi piesa urioraera. Viapau. Ora oiso tapo viapau oiso gavaurea vaiva urioraera, ari aue ragava toorio urioraera upo purapasa. <sup>35</sup> ✧ Ari vao purasa urioraera ora keripa pitupitu oiso ra, ‘Ovii irara aite irara tapo ora upopaave. Osa ita ovii riakoro aako riakoro tapo ora upopaave, ovusa vaireo aako riakoro taato riakoro tapo ora upopaave.

<sup>36</sup> Ari ita, katai kepa raga-ia oa-ia tou irara ora voeava upoaverea.’

<sup>37</sup> “Oire vosa irouto aitetoarei ragapa siraoparo, ra viapau ragaipa oisi sirao rovoparo rutu, eerapa ira viapau oiso vaisiaverea oiso, Vatetoa oaa. Ora vosa irouto ovii vavuatareiario ragapa siraoparo, ra viapau oiso ragaipa sirao rovoparo rutu, eera ita-a ira viapau oiso vaisiaverea oiso, Vatetoa oaa. <sup>38</sup> Ari ro ira rera vaoro riro vavata siitoka viapau oiso oureva va kaesa ragai sirova utuoro, eera-a ira viapau vaisiaverea oiso, Vatetoa oaa. <sup>39</sup> ✧ Ari vosa ro ira ora tootooaro ragare taraapareve kovopaoro, ira vaoro tootooa taru opesiperea. Ari ro ira ragai raga-ia rugoopaooro rera vaoro tootooa eakapareve, ira oiraopa tootoo rutu ourevereera taru.

*Ro Iava Ira Vearoa Voria Oureverea  
(Mak 9:41)*

<sup>40</sup> ✧ “Ari ro ira visii veaopareve, eera-a ira ragai tapo veaopare. Ari vosa ro ira ragai tapo veaopareve, ira Pautoa tapo veaopare ro ira ragai siporeva. <sup>41</sup> Ari ro ira profetato veareve aue iava uvare Pauto reraaro-a, ira voria oureverea oiso rutu osa vao profet irara ro voriaro. Ari vosa ro ira iravu veaoreve torevoko vovouto, aue iava uvare torevoko vovou-a rera vaaro oa purapareveira, ira-a eera voria oureverea oiso osa torevoko vovou irara vo voriaro. <sup>42</sup> ✧ Ari vosa irouto voeao iava ragai voeaaro iravivu vatereve uukoa rera ukaio pieoro, uvare rera-ia taraiparo oiso, Ro Jisas sirova utuparoveira, oire uva oiraopavira oiso visii tavipaavoi ro iava oirato, Ira vao voria rutu ou iraoreverea taru.”

## 11

*Jon Oearovu Disaipel Irara Rera Voeaaro Arureva Jisas Iare  
(Luk 7:18-35)*

<sup>1</sup> Jisas vo reo vatereva kovoara purasa auepa katai tau erao (12) disaipel rera voeaaro. Vao isivaaro iava vo uruio kavuoro avaroepa vo uruiro iare tutuu pie uruiro vao voeapa siposiposa.

<sup>2</sup> Vo osa Jon tuukepa kepa-ia toupaooro Kraiss vo kovoaro iava uvureva. Oa iava oevu arureva rera voeaaro iava disaipel rera iare Jisas. <sup>3</sup> Uva rera-ia pou viropaoro rera akepaiva oiso, “Esa vii-a vao viigoa iava taviroepa Jon oiso, Iravu uriorovere? Eke aa ro-a irare tuepaiei, eke irai raga?”

<sup>4</sup> Oire uva Jisas voea vo reoaro pukooro oiso puraroepa, “Vorepata Jon tavisava varao iava orekerovu rutu oara uvuta ora vara keketa oiso-ia, <sup>5</sup> ✧ Voosi irara vorevira vuraivoi. Ora voeoro oearoa iava kokotoara oisoa kopiipape oia tapo vorevira vokaivoi. Ora voeoro oea-ia lepra upiaoro toupaveira oea tapo sisigarueai. Ora voeoro uvagi irara oea tapo reo uvuai vorevira. Ora voeoro kopii irara rutu oea vorevira tootoopai. Ora voea tapo apota irara oeara Vearo Siposipo puraavoiva, va uvuivoi. <sup>6</sup> ✧ Ari vosa irouto ragai goruvira oirao pieparevere rutu, eera-a ira taru rorupareve!”

<sup>7</sup> Oire uva va iava Jon voeaaro disaipel vorevira kareeapa ovusa Jisas voea isivaaro iava oirara rutu tavitavireva Jon iava. Oiso puraroepa voea akeoro, “Eake-a vao kekesa avataera vo raaka tapi vo vokie-ia oa-ia Jon iare avataera? Esa pito isiva-ia aisia va ratesa avataera ovusa kiuvu vaisi vurevureparevora, raa? Viapau. Uvare Jon viapau oiso raveravea vaiva siposipoparevora oiso osa pito isi. <sup>8</sup> Visii vao eake kekesa avataera? Easi pasi irai vaiva oiratoa vai ratepasa avataera osa veaortoia vai-ia kuvuparoera kuvutoa vai? Voeoro iava, pasi, irai oirara oearoa veaopara-ia kuvupaooro kepaara raga sovara-ia toupaveira reipa irara vo keparaooro. <sup>9</sup> Ari eake irao-a oare avataera? Irai vai profetatoa vai kekesa, eke? Iu. Visii tavipaavoi oiso, Eera profetato Jon ira oearovu rutu-ia putepareveira profet irara. <sup>10</sup> ✧ Aue iava uvare rera iava taviepa Tugoropa Vuku oa-ia oiso puraepa,

‘Uvuta! Ro sipopaavoi reo kaepato. Ira viipa irarovere, eera ira raiva oara vatatoporevere va ravaaoro viipa.’

<sup>11</sup> Visii tavipaa oiraopavira oiso, Jon Baptais kataito ira oirara rutu-ia putereva voeoro oea karekeapa vo rasio-ia. Ari ita, vosa aa ro avuo-a ro ira

*Pauto vo Saraaro-ia akaipavira toupaveve, eera-a ira Jon-ia putepare rei vaisi oupaoro.*

<sup>12</sup> “*Voea riro kasipu irara oea rirovira kaureopaaveira Pauto vo Saraarore, uvare oiso ruipapaaveira ra Pauto vo Saraaro-ia pituive rutu va vuri piepaoro. Voea vo pitupituaru vao oa rovoiva rutu vo Jon Baptais vo vokiaro-ia. Uva touvira vo vovou voka piepaivoi vo vokie iare.* <sup>13</sup> *Varao voeao rutu profet irara ora vao Reo Taisi Moses vaaro oearoa rutu Pauto vo Saraaro iava oisoa tavitavipaave vo tugurasa Jon Baptais vo vuutaaro-ia.* <sup>14</sup> *Oire vosa vo reo uvu ruipapata, ra oiso ragavira taraita, Jon eera-a Ilaija, ira vo urioaro iava tavitaviepa vo reo.* <sup>15</sup> ✧ *Ro ira-ia kokito toupaveve, oire uvureve!*

<sup>16</sup> “*Uva aa voeao-a voeao oea uvuipaai ra voeao tapo ora areiiave vo vokie iavapa irara? Uva voea-a evoea oea oiso toupavoio osa kakae vure, oea paupaai vo uupa tapi okakaerovure keerapaoro.* <sup>17</sup> *Oiso purapaoro, Igei visiipa pupiara-ia pupi ragapaio osa reasipatai roru arapa. Ora vo osa gau guruko tapo pura ragapaio osa reasipatai gau arapa.*

<sup>18</sup> *Jon urioroepa aio kavuvira ora viapau ukaioparoepa aue-ia wain ovi vai aue korovo. Oa iava oiso puraapea, Ira-ia eera tugarato vurito toupave.* <sup>19</sup> *Oire uva Oirato Oviitoaaro ragai urioraepa oearovu tapo aiopasa ora ukaiopasa. Oa iava oiso purapaaepa, Rera keketa riro aioto ora riro ukaioto riroara-ia aue wain oviro korovo. Eera-a takis oupa irara vatetoaaro ora voeao vuri irara. Ari ita, Pauto vo goruaro-a vegei vo kovoaro vituaro ora Jon. Eva-a oa iava vegei vo kovoaro kuearo eveipaivere.”*

### *Siraovira Rutu Ouruiovu-ia Varao Oara Viapau Sopaura Oaive Porepai (Luk 10:13-15)*

<sup>20</sup> *Oire ouruiovu-ia uva Jisas riroara purareva ravoto kovoro oirara porete piepara. Uva viapau oiso oearovu iava sopaura oaive porepa piropa. Uva vo voki-a vao oa-ia Jisas voeare kasipuroepa oiso puraoro,* <sup>21</sup> ✧ *“Siraovira rutu visiipa vao Korasin urui, ora siraovira rutu visiipa Betsaida urui. Vosa ragai oai ravoto kovo vai puraavori Taia uruireipa ora Saidon urui voari rutu tuariri oiso osa vao-ia oa puraavora visii ruvara-ia, oa iava tuariri vuri irara Taia vata ora Saidon vata oearoa rutu vuri varorovi raga-ia tuupaaeri ra vo tuurova gavutara raga ivara-ia paupaave vuri vovouro oaiveva ariipaoro. Uva va-a eva oa iava vo vovouro evara tavario pirori.*

<sup>22</sup> *Oiraopavira rutu oiso osa visii tavipaavoio oiso, Vo vokie vao oa-ia oirara rovirieireverea Pauto ovokia-ia vo siitoka oa ouverea vo uruio Taia ora Saidon urui, oarea-ia puteverea vo tavaka visii vaoro.* <sup>23</sup> ✧ *Ari ita, visii vao Kapaneam vata visiigoa kaeta viroverea vuvuiua iare ora rei vaisipaoro, eke? Viapau. Easi visii oiso vara pieverea vuri tapire. Vosa ragai oai ravoto kovo vai puraavori Sodom urui-ia voari rutu tuariri oiso osa vao-ia oa puraavora visii ruvara-ia, oire ra vo vokie-ia vearovira toupave Sodom urui.* <sup>24</sup> *Oiraopavira rutu oiso osa visii tavipaavoio oiso, Vo vokie vao oa-ia oirara rovirieireverea Pauto ovokia-ia vo siitoka oa ouverea vo uruio Sodom urui, oa-ia puteverea rutu vo siitoka visii vaoro.”*

### *Ragai Iare Uriota Reareaa Ousa (Luk 10:21-22)*

<sup>25</sup> ✧ *Vo voki-a vao oa-ia Jisas oiso puraroepa, “Aite, vii reipau vo vuvuiua-ia ora vo rasito. Vearovira rutu, uvare varao rutu vatauriva voeao asavira riro*

*tarai irara, oa iava voeaopa vara karekeparivorao akaipa irara.* <sup>26</sup> Iu ita Aite, vii vo ruipaaro oisi raga toupai oiso osa va puraparivoi.

<sup>27</sup> *“Ragai Aitearo vara rutu vasereva ragai vavaearo-ia. Uva viapau irai taraipa Oviitoo-ia, ari Aitetoa raga kataito ira raga taraipa ragai-ia. Ora viapau oiso irai taraipa Aitetoa-ia, ari Oviitoo raga ragai taraiparai rera-ia, ora voeao oirara oeapa Aite oaa kareke piesa aueparai.*

<sup>28</sup> ✱ *“Oire visii vo raverave vovou irara orekerovu vavataara kaepaoro visiigoa rutu uriota ragai iare ra visii vatea reareaa.* <sup>29</sup> ✱ *Ragai vo siposipoaro-a oiso osa evaova kaepa ova vao oa ragai vutuoaro-ia toupai vo. Oa outa ra va kaeta vo ora visii vutuoaro-ia, ra ragai ruvara-ia tarai outa. Eake iava? Uvare ragai raga gavaure vovou purapaa vo oirara, uvare ora gare pieparai ragai raga. Auere ra visii vao reareaa outa ora visii varaaro-ia urauraara.* <sup>30</sup> *Vao kae ova ragai vaaro oa tovopaa visii vutuoaro-ia vearoa rutu, oa-ia visii vutuo piepaavo oia-ia viapau oiso vavataa vaiei. Uva vao rutu-a Vearo Siposipo oia-ia visii kae piepaa varaata.”*

## 12

### *Kovo Arapa Tugoropa Pitupitu Sabat-ia* (Mak 2:23-28; Luk 6:1-5)

<sup>1</sup> ✱ *OVokivu-ia Sabat voki utupavira Jisas vokapareva kukara kovo sovaria-ia rera voeaaro tapo disaipel ogoevira tupaoro. Oa iava vo kovo iava tueaepa aue kukara. Uva vara aioiva voea raga disaipel irara.* <sup>2</sup> *Uva va vao kekeiva Farisi. Oa iava rerare oiso puraaepa, “Kekeri vo pitupituo oa purai voeao disaipel oapa tugoropapeira vo vokie Sabat voki.”* <sup>3</sup> ✱ *Uva Jisas voea akereva oiso, “Easi viapau pasi vo siposipo vieipataveira vao iava osa tuariri rutu Devit ogoevira touvea ora rera voeaaro tapo?”* <sup>4</sup> *Oa-a vao oa iava Pauto vo kepaaro-ia koataeapa oavu bret aiosa. Oa-ia oisoa Pauto-ia vuurapa vaisi purapaive. Oa iava oisoa tugoropape rutu voeaopa akuku irara raga. Uva oisoa pris irara raga va aiopaive.* <sup>5</sup> *Easi pasi viapau vo siposipo vieipataveira oa vo vukuo-ia toupaveira oa-ia Reo Taisi toupaveira vao Moses vaaro? Oa voeao iava tavipapeira pris irara oea oisoa Tugoropa Kepa-ia tauo koko vatatopapaive. Uva oisi eisi kovopaoro Sabat vokiro rufu-ia oisoa Reo Taisi-ia tagaupave. Uva va iava viapau vuria vai voea-ia.* <sup>6</sup> *Visii tavipaavo oiso, Orugoovuei oa vo rugoo-ia putepaivoi orugooa purapataveira vore Tugoropa Kepa aue Tempel.* <sup>7</sup> ✱ *Ari vosa vearovira rutu vo reore rugoo rovota oreoa oiso purapai, ‘Ragai reasiparai auepa tauo, ragoa kaviko vovou ragapa ruipaparai oirara ruvara iava.’ Ra va iava viapau voea-ia kasipua tovopata oea-ia viapau vuria vai.* <sup>8</sup> *Easi Oirato Oviitooaro raga ira uvuiparoi vo oirara rutu vo pitupituroaro rovirieipasa, varao opitupituroa purapaiveira vo Sabat voki-ia.”*

### *Vo Sabat-ia Jisas Vuri Vavaeto Porete Piereva* (Mak 3:1-6; Luk 6:6-11)

<sup>9</sup> *Uva voa vo kavureva Jisas Reo Taisi Uvupa Kepa iare aue Sinagog avaoro voea Jiu vo kepaaro.* <sup>10</sup> ✱ *Uva voa toupaveira iravu vuri vavaeto ira iava vavae keruepa. Oa iava oearovu oiso vovoupaepa ra Jisas tavatavaeive. Oa iava rera akeiva oiso, “E vearpai ra Sabat vokiaro-ia vo kovo purapape oirara ruvarupaoro, eke?”* <sup>11</sup> *Oa iava Jisas oiso voeare puraroepa, “Vosa irai visii iava iriaiaro sipsip vai rikui vai-ia koveo Sabat voki-ia, ra va iava oiso taraipavio rera-ia, Easi pasi ro viapau oiso sipsip kae pieparoveira vorevira*

*rikui iava, raa?* <sup>12</sup> Easi viapau sipsip ragui voriaro oirato vo voriaro-ia putepaiveira? Viapau. Oire uva va-a eva oa iava uvuipatai ra oirara tapo *tauvapata Sabat voki-ia Reo Taisi oavisii sirova utupaoro.* <sup>13</sup> Oa iava oiso rera tavireva rera ro puko vavaeto, “*Vavaea oara irairari va torevokooro.*” Uva oisi va pierewa. Oa iava oiso pieva osa ovavaevu vearo ovoipaoro. <sup>14</sup> Uva va-a vao oa iava Farisi voava vo toreoro avaaepa ora reosa, oiso ra rera upoive.

### *Kovopatoa Rutu Jisas Pautoa-pa*

<sup>15</sup> Vosa Jisas vo reo-ia vao tarai ovoiroepa, oire va iava voa kavuoro avaroepa. Uva riro irara oirara rera sirova utupaaepa. Uva voa-a vo uva riro irara upiapa irara ravotovira porete piepareva. <sup>16</sup> Oa iava oiso voea tavipareva voea vosipaoro, “*Opeita vao iava tavipatavere ragai iava poeravira.*” <sup>17</sup> Eisi osa iava vo reo purareva Pauto profetato gisipoaro-ia Aisaia vao oirao pieoro oa purareva Jisas,

<sup>18</sup> ✧ ‘Ro-ia ragai reraaro kovopato ira ropoavora rera reesioro. Ira kavikopaaveira rutu vovouisi-ia rera-ia rorupaoro. Ira-ia ragai reraaro Tugoropato Uraurato tovo pieavere. Ira vao kosi pierewe ragai vaaro oirara rovirieipa pitupitu vo ratau tou irarapa.

<sup>19</sup> Eera ira viapau kaureoparoverea ora viapau oiso rirovira keera-paroverea takatovira reopaoro vo raivaro.

<sup>20</sup> Aisivu pito isi aisia vikopi. Uva viapau oiso ra vaisi sigu pierewe voava. Iravu wik vuravu iava ira gavagavaruvira rovapa. Oire ra va iava rera viapau oiso roko pierewe rutu. Oire kovopareveira vo tupaoro vo tugurasa uva ovovourovu rutu vo pitupituroaro-ia rera vaaro torevoko pitupitu puteve.

<sup>21</sup> Uva oearovu osararovu iava ratau tou sararo rera-ia raripaavere rerare tuepaoro.’

### *Uva Jisas Vaisiiva Oiso, “Bielsebul Vo Goruaro-ia Kovopareveira”* (*Mak 3:20-30; Luk 11:14-23, 12:10*)

<sup>22</sup> Uva vo voki-a vao-ia oa-ia iravu sipoiva oirato ira-ia oisoa toupaveve vurito tugarato. Ira iava osireitoarei voosisiepa, ora gisipo tapo rera iava tupao viropa. Oa iava Jisas rera ravotovira porete pierewa. Uva vorevira vurareva ora reoreoroepa tapo. <sup>23</sup> Oire uva va-a vao oa-ia voeao riro irara tavetave iraopaiva. Oa iava oiso puraaepa, “Easi pasi Devit Oviitoaaro-a ro-ia ira roporeva Pauto, eke?” <sup>24</sup> Uva va iava Farisi va uvuoro oiso puraaepa, “Easi oiso ragavira vao vituaro toupai. Oa vituaro iava tugara vera purapareveira aue vo goruaro iava Bielsebul tugara kare turaroro.”

<sup>25</sup> Ari ita, tuariri tarai rovoroepe voea varaaro-ia rugurugooara. Oa iava voeare oiso puraroepa, “*Vosa oevu oirara oavu katai sara ora roopa pieave, oire ora upoave ra va iava ora opesi pie ovoivave. Ora vosa oevu katai urui iava eke katai kepa iava, ra ora roopa pieave vo sararei puraoro, oire ra ora upoave ra vo urui eva eke vo kepa eva viapau toupave, ora opesi pie ovoivave.*” <sup>26</sup> Ari vosa Seten voeao sigureve ora rera voeao tugara kare, oire ra va iava rera vo saraoro pute ovoireve. *Ra apeisi ragavira rera vo saraoro goruvira toupave?* <sup>27</sup> ✧ Vosa oiraopavira Bielsebul ragai tavareve vo tugara kosi piepaoro, oire ra irou voeao oea visii tavupaiveira vatepaive gorua tugara kosi piepasa? Oire voea evoea visii raga voeao oea raga oiso visii vo vovouroaro ratarataa vovouro oavisii oiso kareke pieive, Visii-a vakuvakupaavere. <sup>28</sup> ✧ Ari ita, vosa Pauto reraaro Uraurato ragaipa gorua

vatepareveira, oire ra rera vo goruaro-ia tugara kosi piepaa. Ra va iava oiso taraipata, Pauto vo Saraaro pou pirora visii iare osa viapau va eveitavora.

<sup>29</sup> “Apeisi-a uvuipa irai oiratoa vai ra riro varivaritoa vai kepaa vaiaro-ia koataro vore, ra auero vaiaro kavirusa? Easi viapau uvuipai. Ari vosa rera tuuke rovoreve iroiro-ia, oire va iava orekerovu rutu rera varaaro kavirureve.

<sup>30</sup> “Vosa irouto ro ira viapau oiso ragai tapo kovopareve, ira-a eera ragaire isivapa. Ora vosa irouto ro ira viapau ragai iare oirara gurupareve, uva rera-a eera ira oirara sikasikapareveira ragai arova.

<sup>31</sup> “Uva eisi osa iava visii tavipaavoio oiso, Pauto vuriara rutu verarevere ora orekerovu rutu takau reoro varao oara purapaiveira oirara rutu. Ari vosa ro ira Tugoropato Uraurato takaupareve rera akai piepaoro, eva-a oa-ia viapau Pauto uvuipa ra va verareve rera iava va vao vuria oaro. <sup>32</sup> Vosa ro ira oavu purareve takau reo ragai-ia, oa-ia uvuipa Pauto ra va verareve. Ari vosa ro ira Tugoropato Uraurato takaupareve, oa-ia viapau uvuipa Pauto oiso ra va verareve rera iava. Eva rera vaaro vuria oava touparevereia vo vokio ora vo vokiri utupavira rutu. Viapau va-ia opesia vaiei.

### *Vo Vuri Ova Kuearo Iava Toupai*

*(Luk 6:43-45)*

<sup>33</sup> “Vosa vearo ova, oire vo eva kuearo tapo vearovira toupave. Ari vosa vuri ova, oire vo eva kuearo tapo vurivira toupave. Oire ra va iava vearovira vo evarei eveipari oiso, Vearo ova vao oa kuearo oiso toupai, ari vuri ova vao oa kuearo oiso toupai. <sup>34</sup> Visii vao-ia rakoru ovii iraraaro. Visiigoa uvuipatai vearo reo purasa, raa? Apeisi ragavira? Uvare vuri irara visii! Eake iava? Uvare eakero epao visii sopaaro-ia evara oara raga visii gisipoaro iava kosipa piroveira. <sup>35</sup> Ro vearoto oirato ira sopaaro-ia vearopa rugorugooro toupave. Oire ra oisi raga ita vearo reoro kosi piepareve. Ari ro vurito ira sopaaro-ia vuri rugorugooro toupave. Ra ita oisi raga ita vuri reoro kosi piepareve.

<sup>36</sup> “Ari ita, oiso visii tavi iraopaa, Varao reoreo akukuro raga oara purapaiveira oirara rutu, oarare Pauto voea rutu akerevereia vo vokio-ia oa-ia oirara rutu rovirieirevereia. <sup>37</sup> Oire uva va-a vao osa ragavira Pauto visii oirara eveipaoro visii rovirieirevereia oiso, Vearoto-a ro ari vurito-a ro vara iava varao oara gisipoara oavisii iava kosipapi.”

### *Vo Oearovu Oirara Jisas Akepaiva Ravotoara Kekepasa*

*(Mak 8:12; Luk 11:29-32)*

<sup>38</sup> \* Uva vo voki-a vao oa-ia tarai irara Reo Taisi-ia oiso puraaepa ora oearovu Farisi-pa irara, “Tisato. Igei oiso ruipapaiei ra oai purari ravotoa vai, ra oai kekeio.”

<sup>39</sup> Oa iava oiso puraroepa, “Oirara voeao vuri irara oirao pie asa irara vo vokio iava oea taraa ragapaiveira oiso, Eake ravoto reesi vai kekeoro oirao pieve? Ari ita, ragai arepata, uva viapau oiso ra visiipa va puraa. Ari vao raga vao oa keketavereia oiso osa piereva Jona ravotovira. <sup>40</sup> \* Vo tuariri uva Jona vo peva-ia voki toureva ora vo peva-ia rupa riroto atarito sopaaro-ia. Uva eisi osa ragai ro Oirato Oviitoaaro vo peva-ia voki touavereia ora vo peva-ia rupa vo rasito sovara-ia.” Uva Jisas ora rera iava vo reo tavipareva voeapa oiso, <sup>41</sup> \* “Utupaua Pauto oirara rovirieirevereia vo vokio-ia oa-ia voeao Niniva kortua-ia toreavereia. Oire ra vo vokio iavapa irara togaive reoara-ia. Eake iava? Uvare Jona vo reoaro uvuiva vao oa-ia voea tavireva. Oa iava sopaura oaive poreiva. Ari ita, vo toupare ro ira Jona-ia putepare

vo osa viapau rera vo reoaro uvupata vovouisiro oavisii poresa. <sup>42</sup> ✧ Vo osa vo voki-a vao oa-ia Pauto oirara rovirieireverea ovusa kwin o oisova Siba rovirieia-ia toreoverea. Oire ra voeao vo vokia iavapa irara togaeverea reoara-ia. Eake iava? Uvare oira o kwin tauai rutuva urioopa Solomon vo taraiaro uvusa, uvare riro taraito-a. Ari ita, uva vo touparevoi ro ira Solomon-ia puteparevoi.” [Jisas ora rera raga iava voea tavipareva.]

*Vurito Tugarato Voreeroepa*  
(Luk 11:24-26)

<sup>43</sup> ✧ “Vo osa iravu iava kosiro viro ro-ia tugarato rera kavuoro vore avaoora raaka tapi voa ora rerapa toua vaire taraasa reareaa taraapaoro. Oire ra taraa ragaparevora. <sup>44</sup> Oiso puraro, Voreparai vo kepao iare uva tou rovopaavora tuariri. Oire vorero vo kepa kekesa vo rara vo kepa viouive, ra vo kepa-ia viapau irai. <sup>45</sup> ✧ Oire uva va-a vao oa-ia oisova oavau erao vatara tugarata tuvutuvepareve ora rera iare, voeao oea vo vovouroaro vuri vovouro oisova rera vo vovouroaro-ia putepaive rutu. Oire uva voea rutu tapo koataro vorevira voea tapo toupasa voa. Ra va iava rera vo touaro ro oirato vuri iraope rutu vo touo-ia puteoro oa-ia rera ro rovopato tugarato oisova rera sopaaro-ia tou rovopareve. Uva oisi raga ita voeao toupavireva vuri irara vo vokia iavapa irara.”

*Jisas Aakoora Ora Rera Araoko Iraraaro Urioape Rerare*  
(Mak 3:31-35; Luk 8:19-21)

<sup>46</sup> ✧ Jisas touvira oirara vatepareva reoara osa aakova urioopa ora araoko irara, oisore ra rera tapo ora reoave. Uva ratau toupaiava. <sup>47</sup> Oa iava iravu rera tavireva oiso, “Aako oara uvuri ora araoko irara oara vo avao ratau torepaa. Oea vii kekesa auepaai.” <sup>48</sup> Oa iava Jisas rerare oiso puraroepa, “*Trouva aako? Ora irova irara araoko irara oaa?*” <sup>49</sup> Oire uva ora rera voeaaro-ia disaipel pirooro oiso puraroepa, “*Aako keketa ora araoko irara oaa.*” <sup>50</sup> ✧ Vosa irouto Aite vo vovouaro sirova utuparo ro ira vuvuiua-ia toupare, eera araokotoa oaa ora taataava oaa ora aako.”

## 13

*Vo Toupai Reo Ruu Oiratoa Iava Ro Aio Takuraro Vikipato Varuparo*  
(Mak 4:1-9; Luk 8:4-8)

<sup>1</sup> Uva vo voki raga-ia Jisas kepa iava kosiro viropa toko rovu ruvara-ia pausa. <sup>2</sup> Uva riro irara rutu oirara ora guruaepa rera ruvara-ia. Oa iava oavu-ia uvua kaero viropa voa pausa ovusa oirara rutu rogaraua-ia torepaaepa. <sup>3</sup> Uva riroara rutu reoara purareva voeapa voa aue-ia ovoovo reo. Oa-ia oiso puraroepa voeare, “*Iravu iava uvupata ira avaroera wit kokoro vikisa varuparo.*”

<sup>4</sup> “*Uva vikivikiparoera aue wit osa oaravu vo kovepaera raivaaro osa kokio kare voa vara aiopasa uriopaaera.*” <sup>5</sup> Osa oaravu vo kovepaera avekeara ivara-ia vo uva viapau riroa vai rasia vai toupaiave. Uva eisi-a osa iava ikauvira kova ragapaera. <sup>6</sup> Vo osa ravireo kaeparo viro vara raverave piesa vara erako pieoro, aue iava uvare viapau vavurupara vai vara piepaivora vara wit kovaro. Oa iava kopiipaera. <sup>7</sup> Ari oaravu vo kovepaera kokopa kouro sovara-ia varao rokarokapara. Oa iava vara ururao papatapaivora rokarokapa kouro vara ruupasa. <sup>8</sup> Vo osa oaravu wicara vo kovepaera veoro rasi-ia, uva voa rirovira rutu wicara kuepaera oiso, oaravu katai vovoto (100) kuero, ari oaravu katai vatara tau (60) kuero, ari oaravu vo peva tau



(30) kuero. <sup>9</sup> Vosa irai-ia kokitoa vai karuvira toupave, vearopai ra va uvureve, uvare uvupatoa ita kokito.”

*Jisas Vo Pitupituario Vo Reo Ruuro Purapasa  
(Mak 4:10-12; Luk 8:9-10)*

<sup>10</sup> Uva disaipel irara rera voeaaro urioaepa oiso purasa rerare, “Eakere reo ruuro purapariveira voeare?” <sup>11</sup> Oa iava voeare oiso puraroepa, “Ari ita, Pauto visii kareke pierevora aue iava vatau reoro vituario varao Pauto vo Saraaro-ia oara toupaveira. Ari voeao, viapau. <sup>12</sup> Vosa iravu orekerovu-ia pitupareve. Ra ita Pauto oaravu ita vaterave, ra riroara rutu pura piro rerapa. Ari vosa ro ira oaravu-ia garearavi pitupareve oara evara opesi ovoiperea rera arova. <sup>13</sup> ✧ Ari ita, ragai reo ruu vituario iava voeapa oiso ragavira puraparai. Uva vura ragapaivo osa viapau vo reo vituario eveipaivo. Ora va uru pie ragapaivo osa viapau va-ia taraipapai. <sup>14</sup> ✧ Oire voea-a evoea oea-ia vo reo oirao pievira karekepai oa purareva Aisaia profetato oiso puraoro,

“Visii vao reoara uvu ragapata oa iava viapau taraipatai vara vituario-ia. Vara vura ragapata uva viapau orekevu avu vai eveipatavo.

<sup>15</sup> ✧ Aue iava uvare voea ita iava rugorugooara vavagisepa ora kokiara voea iava uvagiepa, uvare voea raga ora uvagi pieaepa. Ora osireiara oaive voea iava aauepa, uvare voea raga ora voosi pieaepa. Aue vituario vosa viapau oisi eisi ragavira toupave, ra va iava vearovira vurapaive ora voea varaaro iava osireiara. Ora vearovira tapo uvupaive voea varaaro iava kokiara vo rara tapo voea vaaro rugorugooara karuvira toupave. Ra va iava ragai iare ora goripaave, ra voea porete piepaa vorevira.

<sup>16</sup> “Ari ita, visii vao rorupata, uvare visii varaaro osireiara uvuipai orekerovu kekepasa, ora kokiara visii varaaro uvuipai oreorovu uvupasa. <sup>17</sup> ✧ Oiraopavira rutu oiso osa visii tavipaa oiso, Tuariri riro irara profet irara oa oarovu torevoko irara oea oisoa ruipapaave orekerovu Pauto vo Saraaro iava vara kekepasa, ra va iava viapau vara kekepaive varao oara kekepatavo vo vokie. Ora varapa ruipapaave vara uvupasa varao reoara raga ita viapau vara uvupaive, varao-ia oara oupatavo ragai ruvara-ia vo vokie.

*Reo Ruu Vituario Aviavi Piereva Jisas Aue Iava Ro Aio Takuraro Vikipato  
(Mak 4:13-20; Luk 8:11-15)*

<sup>18</sup> “Visii uvuta ro iava oirato ira-ia reo ruu vituario toupai aue iava wit takuraro varao oara vikiparevora varuparo. <sup>19</sup> Oire vo osa oisoa oirara rutu voeao vo Pauto vo Saraaro-ia reoara rutu oisoa uvupaive, ra viapau roroioapaave vara-ia. Uva va-a eva oa-ia oiso toupai osa takuraro kove ragapapeira raivara. Oire ra Seten ikaureve vo takuraro verasa varao oara oisoa pau ragapareve Pauto voea sopaaro-ia. <sup>20</sup> Uva oaravu wit takuraro kovapaepa vo uva rirovira toupave avekeara. Oa oiso toupai, Ro ira ikauvira Pauto vo Saraaro iava vo reo uvureve, ra va iava rorupareve rutu. <sup>21</sup> Osa viapau rera sopaaro-ia oriruvira toupave vo reo oa uvupareve. Oreoa oiso toupai osa ikopito ro ira viapau avekeara rutu-ia goruvira pitupare rokopaoro. Oire utupauavi oarovu Pauto vo reoaro tekipasa opitupiturovu purapaive ro oirato vuri piepaoro. Oa iava rera vaaro rari vuku viapau uvupai ra gorupe vo osa va kavureve. <sup>22</sup> ✧ Oire vo osa oaravu

wit takuraro kovepaepa vo uva kokopa kouro toupai uva va-a eva oiso ragavira toupai, Ro ira Pauto vo rearo uvu ragareve varaore rirovira vovousopaoro vo rasio-ia oiso osa varao orekerovu varaura oritopasa ora auero moniara. Uva vara-a evara oara oisoa Pauto vo rearo vuri piepave vo rera sopaaro-ia, ra viapau aio kue vai rera-ia karekepe. <sup>23</sup> Ari vao wit oa kovepe vo vearo rasia oa oiso toupai, Ro ira reo uvuro vo rara rerapa aviavive, oire ra vare rugoopaoro. Oa iava rerapa kuepe oiso, katai vovoto (100), ora katai vatara tau (60), ora vo peva tau (30).”

*Reo Ruu Aue Iava Isiso Kou Vuri Kou Vao Oa Karekepapeira Varuparo*

<sup>24</sup> ✧ Oire uva Jisas oavu reo ruu vatereva ita voeapa oa-ia oiso puraroepa, “Pauto vo Saraaro oa oiso toupai, Iravu oirato vearo takuraro wit takuraro vikipareva varuparo vo rera voaro. <sup>25</sup> Ari ita, vo osa oirara rutu uusiave osa rera ro keripato urioro. Oire ra vuri takuraro isiso takuraro vikireve wit takuraro sovara-ia. Oa iava vorero. <sup>26</sup> Oire uva wit kovo kovaepa. Oa iava kuesa aupeaepa. Uva vuriva isiso kekeiva vo kovo sovara-ia. <sup>27</sup> Oa iava kovopa irara avaaepa ro iare ira vo kovoaro-a. Uva rerare oiso puraepa, Turaro. Igei oiso rugoopaiei, Vearoara rutu wit takuraro vikirivora varuparo. Uva eake iava vuri kou isiso kou karekei?”

<sup>28</sup> “Oire uva oiso voeare puraroepa, Easi keripatoa va-ia eera ira eisi evo kovo pierervo. Oa iava kovopa irara oiso rerare puraaepa, Uva apeisi vovoupau? Ra avao oira aruosa eira vuriva isiso? <sup>29</sup> Uva voeare oiso puraroepa, Viapau. Teapi aruopaoro isiso kou vuri kou sovara-ia wit tapo tatepata. <sup>30</sup> Vairei rutu eakata, ra vaierei rutu riroere vo tugurasa uva vaierei kuearo tokopere. Oire ra visii tavia visiigoa vo kovoaro-a. Ra oira vuriva isiso guru rovtavere oira tutuukeoro vo tuukero kasisa. Oa isivaoro iava wit kuearo gurutavere ragai vo kepaaro-ia aio orirupa kepa.”

*Vo Toupai Mastet Kuearo Iava Ora Yis Reo Ruu*

*(Mak 4:30-32; Luk 13:18-21)*

<sup>31</sup> ✧ Jisas voea vatereva oavu reo ruu oa-ia oiso puraroepa, “Sara vao Pauto vaaro oa oiso rutu toupaveira, Oavu aioa oa oiso vaisipaiveira, mastet. Uva iravu oirato oaravu oureva vara pausa rera vo kovoaro-ia va kuearo iava. <sup>32</sup> ✧ Gare isivi rutu aisia-ia putepaiveira orekerovu rutu kuearo. Uva vosa kovape, ra kovaoro ipape, ra vara rutu-ia puteve evaora riropavira rutu rao puraoro. Ra virata kokioro uriopaave epitapasa voa.”

<sup>33</sup> ✧ Oire uva oavu ita kosi piererva reo ruu voeapa oa-ia oiso puraroepa, “Vao Sara Pauto vaaro oa oiso rutu toupaveira osa yis. Vosa iriavu riakova va oueve va tapo uveresa aue tapo plaua, oire va iava va vao plaua kae piro riropaoro.”

*Jisas Tavitaviparoepa Reo Ruu Raga-ia*

*(Mak 4:33-34)*

<sup>34</sup> Vo reoro rutu varao oara-ia Jisas voeapa oirara rutu oiso siposipopareva ruuvira. Uva viapau oiso oai-ia voeapa aviavi pievira taviparoepa. Ari ruuvira raga voeapa siposipopareva. <sup>35</sup> ✧ Uva eisi-a osa vo reoa vao oa iava siposiporeva voeapa vo reo oirao piesa oa vatereva profetato. Oa-ia oiso puraroepa, ‘Ragai gisipo karuavere ruuvira reoro. Ora vo reoro iava taviravere vatau reoro, oreoroa oisoa toupave vova vo rasio rovoaro.’

### *Reo Ruu Vituaro Aviavi Piereva Jisas Vuri Kou Iava Isiso Kou*

<sup>36</sup> Oire uva Jisas voea arova oirara avaroepa kepa iare. Oa iava voa rera iare rera voeaaro disaipel irara utuaepa oiso rerare purasa, “Igei taviri vao iava reo ruu aue iava isiso kou vao oa karekeepa vo varuparo. Va vituaro kosi pieri igeipa.”

<sup>37</sup> Uva voea vo reoaro pukooro Jisas oiso puraroepa, “*Ro oirato ira vearo takuraro vikireva eera-a Oirato Oviitoaaro Ro Ropoto.*” <sup>38</sup> ✧ Uva va-a vao kovoa vo-ia rasitoo rutu-ia. Ari aue-ia vao-ia wit takuraro kuearo, voea oirara oea Pauto vo Saraaro sovara-ia toupaveira. Uva isiso vuriva oiso osa oearovu vuri irara Seten voeaaro. <sup>39</sup> ✧ Eera ro-ia keripato ira oisoo isiso takuraro vikipareve, ira-a vuriara aue Seten. Oire uva vo voki-a vao-ia aio kovo aioaro gurupa voki, vao-ia ovoioipa vuuta oa-ia aioara guruiverea voea-ia purapurapa irara ensel. <sup>40</sup> Ovokia-ia taru vuriva isiso guruiverea oira vikisa tuituia-ia. Eisi raga osa pieiverea Ovoioipa Vuuta-ia vao vo rasitoo-ia. <sup>41</sup> Uva Oirato Oviitoaaro enselpa irara siporeverea ora rera voeaaro. *Ra orekerovu rutu ouive varao oara oirara oirao pie vovouroaro vuri piepaveira ora voea tapo oirara oearoa vuri pitupituro purapaveira. Oea vova veraiverea Pauto vo Saraaro-ia.* <sup>42</sup> Uva vo voea vikiiverea riroa-ia tuitui kasi. Uva vo kasi-a vao-ia tuitui kasi oa-ia vurivira gaupaiverea siraovira ora reuriara oaive kuripaoro. <sup>43</sup> Oire uva vo voki-a vao oa-ia voea Pauto voeaaro oirara torevoko irara sisikorepaveira aviavipaoro oiso rutu roropaoro osa ravireo vo Aiteto oaive vo Saraaro sovara-ia. Ari ita, ro ira-ia kokito toupaveve oire vo siposipo orirureve.

### *Reo Ruu Ro Iava Oirato Ira Moni Bokis Kekereva*

<sup>44</sup> ✧ “*Vao-ia Pauto vo Saraaro oa oiso rutu toupaveira osa moni bokis vao oa oisoo vataupape varuparo kovoa-ia. Uva iravu va kekereva. Oa iava va vataureva ita vorevira. Uva va-ia rorupaoro kareroepa oaravu rutu-ia moni ousa ora rera varaoro. Uva vara voriiava rera ruvara-ia. Oa iava vo moni-ia vo rasi vorireva ora rerapa.*”

### *Reo Ruu Vao-ia Aue Iava Aasi Isi Riro Vori Isi Rutu*

<sup>45</sup> “*Vao-ia Pauto vo Saraaro oa oiso rutu toupaveira osa ro iravu oirato ira oisoo aasi isirore taraapareve vaisiro voripasa.*” <sup>46</sup> Oire uva aisivu kekereva vearo isi rutu. Oa iava orekerovu rutu-ia ora rera varaoro monia ousa avaroepa. Oa iava vaisi vorireva vaisio vearo isi rutu aasi isi.

### *Reo Ruu Kuverava Iava*

<sup>47</sup> ✧ “*Pauto vo Saraaro oa oiso rutu toupaveira osa kuverava o iria oisoo vikipave toko rovu-ia. Oire ra oira-ia osasararovu rutu kuverapave aue atari.*” <sup>48</sup> Oire vosa agasio kuverava, ra oira ivuoro oira vera pieve. Ra pauave vearopa kare rovirieisa voea guruoro atari kare. Ra vo kareo tovoive vearopa kare vo pekuri-ia vo kareo vuri kare vikipaoro. <sup>49</sup> Eisi osa toupai vao-ia Ovoioipa Vuuta osa pieiverea vo rasio-ia voea enselpa irara. *Oea urioaverea vearopa irara sovara iava vuri irara roporopopaoro* <sup>50</sup> voea vikipasa tuitui kasi-ia. Oire uva voa-a evoa uva vurivira siraopaaverea gaupaoro ora reuri oaive raga kuripaoro.”

### *Oirato Ro Ira Airepara Ora Rutaara Oupaveira*

<sup>51</sup> Uva Jisas oiso voea akereva, “*Asi visii vai taraipatai varao vituaro-ia reoara?*” Uva oiso rera taviiva, “*Iu.*” <sup>52</sup> Oa iava Jisas voea oiso puraroepa, “*Oire vo osa voea voea tarai irara Reo Taisi-ia vao Moses vaoro oea uvuipaai*”

ra Pauto vo Saraaro-ia tapo tarai oupaave. Oea oiso toupaiivoi osa ro ira kepa tokipareve rera vaaro kotokoto gurupa kepa. Oire ra voa koataro oaravu ousa airepara ora rutaara, ra vara rutu kosi piereve.”

*Vo Jisas-re Isivaaepa Nasaret Vata  
(Mak 6:1-6; Luk 4:16-30)*

53 ✨ Oire uva Jisas reo ruuro pura rovorevoiva, vo urui kavuoro avaroepa. 54 Uva voare avaroepa vo ora rera vo taerearo rutu-ia voa Pauto vo reoaro vatesa oirarapa Reo Taisi Uvupa Kepa Sinagog. Uva va-a vao oa iava ora sitaaepa. Oa iava rirovira tavetave iraopaiva oiso purapaoro, “Vo tarairo-ia ora varao ravotoara, ovu irao vara ourevorao rera ro-ia? 55 ✨ Esa kepa paupatoa avu oviitoaaro-a ro-ia, eke? Easi viapau oiso Maria oviitoaaro-a ro-ia? Ora viapau oiso rera araoko iraraaro-a voeao-ia, Jems vase ora Josep, ora Saimon, ora Judas evoea? 56 Ora vairo taataa riako rutu airoa vigei tapo toupaveira? Oire uva ovu rutu-a vo uva varao ou iraorevorao?” 57 Oa iava Jisas voeare oiso puraroepa, “Ari ita, profetatoapa avivikepaaveira vo uruiara rutu. Ari vo ora rera vo uruiaro rutu uva viapau avivikea vaii rerapa ora vo rera vo kepaoro rutu-ia.” 58 Uva va-a vao oa iava viapau uvuuparoepa ra riroara vai rutu purareve ravotoara vai vo urui-ia vao rera vaaro. Aue iava uvare viapau rerapa avivikepaepa ora oisoa rera vo reoroaro reroaropaive.

## 14

*Jon Baptais Kopiroepa  
(Mak 6:14-29; Luk 3:19-20, 9:7-9)*

1 Oire uva vo vuuta-a vao oa-ia Herot ro Galili vata turaroaro Jisas iava uvureva. 2 Oa iava ora rera voearo kovopa irara tavireva oiso, “Jon Baptais eera ira tova tapi iava toreroi ravotopa goru ouoro.” Oire oiso-ia osa ragavira iava Jon-ia rugooroepa. Aue vituaro iava uvare 3-5 ✨ Herot ira Herodias oueva rera araokotoaaro Filip vatuaavaoro. Iriapa oisoa Herot-re oiso puraparo Jon, “Viapau uvuipai ra araokotoara riakovaaro ouri. Viapau oisi torevokopapeira.” Oa iava Herot Jon-ia rovorovosiparoepa, oiso ra rera uporeve. Uva aue ragapa uririparo Jiu-pa irara, oa iava viapau vao rera uporeva. Aue iava uvare voeao Jiu-pa irara oiso rugorugooapaepa, Profetato ro-ia Jon. Oa iava Herot Jon raureva rera tuukesa sen iro-ia. Uva rera tovoreva tuukepa kepa-ia.

6 Oire uva vo voki-a vao oa-ia Herot kavaueva aakova ovokia-ia aioa purareva vo voki-a rugorugoooro vao oa-ia rera kavaueva. Uva oearovu rutu tapo pauroepa vo aio-ia vao-ia. Uva vo aio aiopaiva osa Herodias oviivaaro urioopa vearovira rekurekusa rauraupaoro voea rutu osireiario-ia. Oa iava oira vurapaoro rirovira Herot rorupareva rutu ovusa rekurekupaeva. 7 Uva reo ovoi purareva oirare oiso puraoro, “Vosa eakepa ruipapau, oire ragai taviri, ra vii vatea oai.” 8 Uva aakova Herodias oirapa orugoovu vateeva oa-ia oiso puraopa, “Jon Baptais kukuearo tokopari. Ra ragaipa oira tovoru tauo vai-ia.”

9 Uva eisi-a osa puraioiva, King Herot sopaaro vavataroepa. Oire uva vorevira vo reore rugorugoooro ita oa purareva voea osireiario-ia oiso puraoro, “Vosa eakepa ruipapau, oire ragai taviri, ra vii vatea oai.” Oa iava oira vo rugooaro iava pura ovoi piropa. 10 Oa iava iravu arureva tuukepa kepa iare Jon Baptais kukuearo tokosa. 11 Uva rera kukuearo sipoiva iriavu-ia tauo. Uva oira vateiva o tavauruva vo koko. Oa iava vo koko siposa

avaopa aakovapa. <sup>12</sup> Uva voeao Jon voeaaro disaipel oea urioaepa varaua ousa rera iava voua tovasa. Uva rera tovaivoiva Jon, avaaepa Jisas tavisas.

*Jisas Ravoto Aio Purareva Vo Vavae Tukupa (5,000) Aue Oira*  
(Mak 6:31-44; Luk 9:10-17; Jon 6:1-13)

<sup>13</sup> Jisas vo reo uvurevoiva, vo uruio kavuoro avaroepa oavu-ia uvuoa ipasa uvavure avasa kuvau tapi uva viapau oirara vai toupaveira. Rera raga voare avaroepa. Oire uva rera iava uvuoro oirara rutu uruiara oaive kavuoro rogaraua-ia utuaepa toko rovu sirova rera iare. <sup>14</sup> Uva voava Jisas veraro viropa. Oa iava riro irara rutu kekereva oirara. Uva voeapa siraoroepa. Oa iava voea iava oearovu upiapa irara porete piereva ravotovira.

<sup>15</sup> Uva vokiaprovi rera voeaaro disaipel urioaepa rera iare oiso purasa, “Kuvau tapi-a vo-ia uva viapau oirara vai toupaveira. Uva apeisi viapau voeao arupari, ra avaae aioara vai vorisa ora voeapa voraro uruiara vo vuutavio-ia? Teapi ogoevira voeare vokipe.” <sup>16</sup> Oa iava Jisas voeare oiso puraroepa, “Eake iraore avaaere? Visii raga voea vateta aioara vai.” <sup>17</sup> Uva oiso puraaepa rerare, “Viapau oiso igei aioa vaiei vo-ia. Ari vo vavaevi raga aue bret oava toupavo ora kataitoarei atari.” <sup>18</sup> Uva voeare oiso puraroepa, “Varaviva uriota vore ragai iare.”

<sup>19</sup> ✧ Uva oirara tavireva ora riakora oiso, “Pauta evoa isiso kou ivara-ia.” Oa iava vo vavae oureva breteara ora ataritoarei. Uva vara-ia pitupaoro vuvuiua-ia vurareva vearo vaisi puraoro. Oa iava breteara rekarekareva disaipel vatesa. Uva oirara vatevateiva vara. <sup>20</sup> Voea rutu aioiva, oa iava vukuaepa. Oire uva ururukoara guruguruiva varao oara arova vukuaepa. Uva oisi raga disaipel irara katai tau erao (12) agasi pieiva aue pekuri. <sup>21</sup> Uva voea voeao oirara oea rutu vo aio aioiva vao vo vavae tuku rutu (5,000). Ari ita, viapau riakora vieiiva ora kakae vure.

*Jisas Toko Rovu Ivava-ia Vokapareva*  
(Mak 6:45-52; Jon 6:15-21)

<sup>22</sup> Uva Jisas rera voeaaro disaipel tavireva oiso, “Uvuoa-ia irata vavo oisore ivirova varata toko rovu iava.” Oire uva oiso ruipaparoepa ra oirara ruture kororu, ra voreave kareoro uruiara oaive iare. <sup>23</sup> ✧ Uva rera raga oavu-ia pukuia-ia iparoepa voa varirisa. Oire uva voa toupaveira osa rerare ovaiaepa. <sup>24</sup> Osa tauai rutu avaaepa uvuoa-ia disaipel irara raga. Oa iava vo rovu toko rovu vuruvuruoro rutu-ia ora tovoaepa. Uva vo riroto kiuvu voeare vusireva. Oa iava toruva uvuoa sisiputapaeva voa voeava. <sup>25</sup> Uva avipaepa ovusa Jisas voea iare uturoepa toko rovu ivara-ia vokapaoro voea ruvara-ia pou virosa, ovusa ravireo kae viro asavira toupaveira. <sup>26</sup> Oa iava rera tueiva osa vokapaoro urioparoepa toko rovu ivara-ia voea iare disaipel. Uva rirovira rutu rikerikepaoro oivepaoro uriripaepa rera asavira. Oa iava oiso puraaepa, “Avoeao, asi tugarato-a ro!” <sup>27</sup> Uva ikauvira Jisas voeare oiso puraroepa, “Opeita uriri ragapata. Sopaura oavisii goru pieta. Easi ragai-a vao ragoa uturai.”

<sup>28</sup> Uva Pita rerare oiso puraroepa, “Vosa vii-a vao Turaro, oire ragaire keerau. Ra vii iare oisi eisi vokaoro uriora vo vao ivara-ia rovu.” <sup>29</sup> Uva Jisas oiso puraroepa, “Uriou.” Oa iava Pita uvuoa iava rere ovoioro voka rovoparoepa uuko rovu ivara-ia Jisas iare. <sup>30</sup> Uva kiuvu sovooro uririroepa. Oa iava roko rovosa auepaoro osa oiso puraroepa, “Turaro! Ragai-ia pituri!”

<sup>31</sup> Oire ikauvira Jisas vavaea tovoreva Pita-ia pituoro. Uva oiso puraroepa, “*Gareavi raga-a eva raria oava touparivoi. Eakere vo rugorugoorei rutuva toupari?*” <sup>32</sup> Oire uva voava kaesi viropa uvua oia iare osa kiuvu rakote ovoiroepa. <sup>33</sup> ✧ Osa voeao oea uvua-ia toupaiava oea oiso purapaaepa rera-ia vuurapa vaisi purapaoro, “Oiraopatoa rutu vii Pauto Oviitoaaro.”

*Jisas Riro Irara Upiapa Irara Porete Piereva Genesaret Uru-ia  
(Mak 6:53-56)*

<sup>34</sup> Uva toko rovu ivirooro rereiva Genesaret iare. <sup>35</sup> Uva voea voeao voava vo-ia rera eveiiva oiso, Eari Jisas-a ro-ia. Oa iava reo vikiaepa uruiara rutu iare varao Genesaret taere sovara-ia. Oa iava upiapa irara rutu sipoiava rera iare. <sup>36</sup> ✧ Osa iava rirovira rutu rerare oiso purapaaepa, “Jisas, igeipa vaseri eera iava kuvupato, ra rera raga vatuario-ia pitupaoro poretepaio.” Uva va iava oisi voeapa rera iava ora vaseroiva, rera vatuario-ia pitupaoro porete ovoipaaepa voea rutu.

## 15

*Pauto Vo Siposipoaro Aao Irara Vo Siposiporoaro-ia Putepaveira  
(Mak 7:1-13)*

<sup>1</sup> Oire uva vo vuuta-a vao oa-ia Farisi ora oearovu Reo Taisiro-ia tarai irara oea Jerusalem iava urioaepa Jisas iare. Uva oiso puraaepa, <sup>2</sup> “Apeisi iava voeao disaipel Reo Taisi-ia tagau iraopaiveira vigei aao iraraaro varaaro? Aue-ia vosa aiosa auepaave, ra viapau oiso vavaeara sisu rovoave Tugoropa Reo Taisi sirova utupaoro.”

<sup>3</sup> Oa iava Jisas voea vo reoaro pukooro oiso puraroepa, “*Apeisi ragavira iava ora visii raga vo pitupituroaro sirova utupataveira Pauto vaaro-ia tagaupao Reo Taisi?*” <sup>4</sup> ✧ Pauto oiso puraroepa, ‘Aitetoarei oarapa ora aakoara ora avivikepai. Ari vosa ro ira aitetoarei takaupareve, eera-a ira kopii pieivere oearovu.’ <sup>5-6</sup> ✧ Uva visii oiso purapataveira oirara siposipopaoro, Aako ora aite viapau uvuiparai ra vei vatea varao vei tauvapa. Uvare vara rutu varao vate rovoavara Pautoa-pa. *Vosa eisi oirara tavitavipata oiso, Eagara, uvuipatai ra oisi eisi aite irara oavisii piepata. Oire eva-a oa-ia Pauto vaaro Reo Taisi akaipa piepatavere visii vo pitupituroaro rigaoro ora visii iare.* <sup>7</sup> ✧ Visii vao-ia riro ratarataa vovou irara, visii goa reesireva Aisaia vearovira rutu oiso puraoro,

<sup>8</sup> *‘Voea rutu ragai vaisiario kae pie ragapai gisipoara raga iava osa voea sopaaro tauaipai rutu ragaipa.*

<sup>9</sup> ✧ *Oea oirara varaaro reo goruro iava tavipaaveira. Uva viapau oiso vo reo-a eva Pauto vaaro. Eisi osa iava ragai-ia vuurapa vaisi pura ragapaiveira.’”*

*Varao Oara Oirara Vuri Piepaiveira  
(Mak 7:14-23)*

<sup>10</sup> Oire uva Jisas oirara ruture keeraroepa ora rera iare. Uva oiso puraroepa voeare, “*Visii uvuta vearovira rutu, ra vare rugoopata.*” <sup>11</sup> Viapau oiso vo oa aiopare oirato oa rera sopaaro vuri piepaivoi. Ari varao-a oara rera sopaaro iava kosipa piroi, evara oara oirato vuri piepaivoi.”

<sup>12</sup> Uva vo voki-a vao oa-ia urioaepa disaipel rera tavisa oiso, “Farisi vii vo reoaro uvuivo. Oa iava vuri vovoupai. E pasi va vai-ia taraiuei vao?”

✧ **14:33:** Sam 2:7; Ap 8:37; Ro 1:4 ✧ **14:36:** Mt 9:20; Mk 3:10 ✧ **15:4:** Eks 20:12; Diu 5:16

✧ **15:5-6:** Eks 21:17 ✧ **15:7:** Ais 29:13 ✧ **15:9:** Kl 2:18-22

13 ✨ Uva Jisas oiso puraroepa, “*Aite toupere eisi vuvuiua ira auero rutu ketoo piepareveira. Ari varao oara viapau ketoo piereve oara rutu evara tateraveira iroara tapo.*” 14 ✨ Voea eakata uvare voea-a voosi irara oea raiva purapai oearovupa voosi irara. Ari ita, vosa vaiterei raga voositoarei ora tufetuvepaoro avapasi raiva-ia, ra kovesi rikui-ia vaiterei rutu.”

15 Uva Pita Jisas aatoreva, “Oire vo reo vituaro karuri vao-ia reo ruu. Ra va uvuiio.” 16 Uva Jisas oiso puraroepa, “*E avoeao, visii tapo viapau rugorugooara vaiei?*” 17 Easi visii viapau taraipatai auero rutu-ia varao oara gisipo-ia rokopaiveira vore sare. Oire ra sare vo vikieve vore gare kepa. 18 ✨ Ari vao oa gisipo iava kosipa piroveira vovouisi rutu iava, oa-a eva oirato vuri piepaiveira. 19 ✨ Oire uva vo rugooro-a varao vuri rugooro oara kosipa piroveira oirato sopaaro iava, oira upo, otopa pitupituro, kaakau kare vo pitupituro, kaviru, keakea reo, reo toga. 20 Oara rutu oirara vuri piepaiveira. Ari vosa ro ira vavae sisu asavira aioa-ia pitureve, viapau oiso eva-ia vuria vai epao.”

### *Riakova Kenan Iava Oira Iria Oisoa Jisas-ia Rari Iraopao (Mak 7:24-30)*

21 Jisas vo uruiio iava avaroepa vo taereo iare oa-ia oisoa vo uruireo toupave Taia urui ora Saidon urui. 22 ✨ Uva iriavu riakova Kenan iava ratau tou irara iava oira, iria oiso keeraopa rerare, “Turaro vii-a Devit Oviitoaro viigoa roporeva Pauto. Ragaipa siraou. Vurito tugarato kakaeva oaa vuri piepareveira.” 23 Uva viapau Jisas oira vo reoaro aatopareva. Oa iava disaipel urioepa rera tavisa oiso, “O riakova keerapaoro vigei sirova utupaoui. Oirare koruu.”

24 Uva Jisas voeare oiso puraroepa, “*Pauto ragai siporevora voeao raga iare Jiu, oea oiso toupaveira osa sipsip ragui voeao vova Isrel-ia oea opesikoepa.*” 25 Uva riakova urioopa rekusa ora taku virosa rera ruvara-ia oiso puraoro, “Turaro, ragai tauvari!” 26 Uva Jisas oirare oiso puraroepa, “*Teapi aioara oupe kakae vure varaaro kaakau karepa vara vikisa.*” 27 Uva oiso puraopa, “Turaro, oiraopavira eisi purauei igeiore ratau tou irara. Ari ita, kaakau kare ururukoara aiopaiveira varao oara tebol iava kovokovepapeira.” 28 ✨ Oa iava Jisas oiso puraroepa, “*Ae auoo, vii vaaro riroa rutu varia. Oapa ruipapauai, oiso ra vii-ia karekepe.*” Uva vo vuuta raga-ia eva voaviva porete ovoioapa kakaeva.

### *Jisas Riro Irara Utiapa Irara Porete Piepareva Ravotovira (Mak 7:31-37)*

29 Uva voa vo kavuoro avaroepa Jisas toko rovu ruvara iare vao vo Galili. Uva voa pukuia-ia iparoepa pausa. 30 ✨ Uva riro irara oirara ora riakora urioepa rera ruvara iare ora gurupasa vuri kokoto irara sipopaoro rera iare, ora voosi irara, ora regorepa keru irara, ora voeao oea iava oisoa gisipoara kapuvira raga toupave, ora oearovu rutu oearoa tapo urioapaepa rera kokotoaro ruvara-ia voea tovopasa. Uva voava voea porete piepareva ravotovira. 31 ✨ Uva rirovira rutu tavetave iraopaiva. Aue iava uvare reoreo asa irara reoreoepa, ora voeao regorepa keru irara oea tapo veoropaaepa vorevira, ora voeao vuri kokoto irara oea tapo vorevira vokapaiva, ora voeao voosi irara oea tapo vorevira vuravuraiva. Uva eisi osa iava Pauto vaisiario kae pieiva rera-ia vuurapa vaisi puraoro ro Jiu reraoro.

*Jisas Vo Resura Tuku Rutu (4,000) Aio Piereva Ravotovira  
(Mak 8:1-9)*

<sup>32</sup> ✧ Uva Jisas disaipelre keeraroepa. Oa iava oiso puraroepa voeare, “Sirao iraoara *vai voeapa oirara, uvare vo peva rutu-ia voki ragai tapo toupai*o aio asavira. Uva reasiparai ra ogoevira voea arua. Teapi osireiara voeare avavaoapape raveravepaoro ogoetoa iava raivaaro karepaoro.*”*

<sup>33</sup> Oa iava disaipel rera akeiva oiso, “Uva ovu opoara vai toupai voeapa, ra voea aio piepe? Ari raaka tapi raga vo-ia.” <sup>34</sup> Uva Jisas voea akereva oiso, “*Visii ovirovua toupai aue bret?*” Uva rera taviiva, “Ari erao vatara (7) aue bret oarava toupai*o ora garearavi atariara.*”

<sup>35</sup> Oa iava Jisas oirara rutu tavireva oiso, “*Pauta evoa rasiuaaro.*” <sup>36</sup> ✧ Uva erao vatara-ia bret ora aue atariara vearo vaisi purareva Pautoa-ia. Oa iava voava vara rekarekareva. Uva disaipel vatevateva. Oa iava evoea oirara rutupa vara vatevateiva. <sup>37</sup> Uva voea rutu vukuaepa. Oa iava aio opesiaepa. Uva urukuora guruguruiva. Oa iava erao vatara (7) pekuri agasi pieva. <sup>38</sup> Uva voea rutu vieiara-a voeao oirara vo resura tuku (4,000) rutu. Uva viapau oiso riakora tapo vieiiva ora kakae vure. <sup>39</sup> Oa iava Jisas voea aru ovoiro kaero viropa uvuoa-ia avaro Magadan taere iare.

## 16

*Ravotoara Kekepasa Rirovira Ruipapaaepa Rutu  
(Mak 8:11-13; Luk 12:54-56)*

<sup>1</sup> Vo Farisi urioaepa voearei ora Sadyusi-pa irara Jisas-ia kokarasa, oiso ra voea osireiara-ia ravotoa vai purareve Pauto vo goruaro-ia karekeoro.

<sup>2</sup> Ari Jisas voea vo reoaro pukooro oiso puraroepa, “*O ita, visii vao visiigoa oiso purapataveira vo ovalarovi, Vuvuiua revasivira kekepi. Ari vokipavira raipipere.*” <sup>3</sup> Oa vokipaua oiso purapataveira, Rukuta rupapa*o. Oa iava vuvuiua revasipai. Uva kiuvu visirevere ora kokeva koveovere vo voki-ia. Iu ita, visii ita vuvuiua vo reesiara kekepataveira. Oire vearovira rutu vara rovirieipata. Ari varao kekepataveira oara vo vuuta vao reesipaiveira osa viapau vara eveipata.* <sup>4</sup> ✧ Oiraopavira, oirara voeao vuri irara oirao pie asa irara voeao vo vokio iava oea taraa ragapaiveira oiso, Eake ravoto reesi vai kekeoro Pauto oirao pieve? Ari ita, ragai arepata, uva viapau oiso ra visiipa va puraa. Ari vao raga oa keketaverea oiso osa piereva Jona vo peva voki-ia ora vo peva rupa peva.” Uva Jisas voea arova avaroepa.

*Reo Ruu Vao-ia Aue Iava Yis Farisi Ora Sadyusi Vaaro  
(Mak 8:14-21)*

<sup>5</sup> Oire voeao-ia disaipel oea toko rovu iviropaoro uriopaepa auere bret ovaupaoro. <sup>6</sup> Uva Jisas oiso puraroepa voeare disaipel, “*Visii vao-ia uutuvira rutu toupata vaore yis Farisi ora Sadyusi vaaro.*” <sup>7</sup> Oa iava oiso ora voea raga ora reopaepa, “Ari eake-a viapau aloara vaiva urioviei, oa iava oiso vigeire reopa?”

<sup>8</sup> ✧ Oire uva Jisas voea-ia tarairoepa. Oa iava oiso puraroepa, “*Uva eakere oiso ora reopatai, Vigeire reopa aio arapa varao oarave ovavie*o uriooro?* Ari ita, visii vao gareavi ragava toupata*o vavi raria.*”*

<sup>9</sup> Easi pasi ragai vo goruaroa sopaivira toupata, raa? E viapau vaore rugoopatai bret vavae oa vateavora voeapa vo vavae tuku (5,000) rutu aue oira, eke? Ora ovirovua pekuri oara agasi pietavora aue-ia aio ururukoro?

<sup>10</sup> Ora pasi viapau vaore erao vatara breteara rugoopatai oara vateavora



vo resura tuku (4,000) rutupa aue oira? Uva ovirovua pekuri oa agasi pietavora? <sup>11</sup> Apeisi iava viapau oiso taraipatai, Viapau visii tavipaavo aue iava bret? Visii vao ora vatatopo iraopata uutupaoro vaore yis Farisi ora Sadyusi-pa irara vaoro.”

<sup>12</sup> Oire uva va iava oiso taraiapa, O asi viapau oiso vigeire reoparoi ra vaopa vatatopopavio yis vao plaua kae piepa. Viapau. Ari vaopa Farisi ora Sadyusi vo siposipoaro oapa vigei vatatopo pieparevoi.

*Pita Jisas Vaisireva Oiso, Krai*

*(Mak 8:27-30; Luk 9:18-21)*

<sup>13</sup> Jisas oiso ragavira avaroepa Sisaria taere Filipai-ia. Uva vo vuuta-a vao oa-ia disaipel akereva oiso, “Apeisi ragavira ragai vaisipaiveira oirara?” <sup>14</sup> \* Uva oiso puraaepa, “Ari oearovu oiso vii vaisipaiveira, Jon Baptais, ovusa oearovu oiso, Ilaija, ari oearovu oiso, Jeremaia, ora oearovu oiso purapaai, Vii iravu voea iava profet irara.” <sup>15</sup> Uva Jisas oiso voea akereva, “Ari apeisi visii raga ragai vaisipata?”

<sup>16</sup> Uva Saimon Pita rerare oiso puraroepa, “Vii-a Krai Pauto Oviitoaaro, ro Tootoo Ovoi ira vii arureva vore.”

<sup>17</sup> \* Oa iava Jisas oiso puraroepa rerare, “Saimon, Jona oviitoaaro roruri, uvare viapau oiso vo rasitoa iava irai vii tavirevoi vo vaisio iava. Viapau. Ari Aite raga ro ira toupaveira vuvuiua-ia ira vo vaisio iava vii tavirevoi oiraopa. <sup>18</sup> Uva vii tavipaa oiso, Pita, oiso toupai osa aveke o peka pie asava. Lotua vituaro aveke-ia iria-ia vo Lotu pauavere. Uva kopiia vo goruaro viapau uvuipai oiso ra vo Lotu opesi pieive. <sup>19</sup> \* Uva viipa ki vateavere karupava o iria-ia uvuipau ra karuri Pauto Saraaro-ia oearovu oirara koata piepasa. Vosa eake pitupituro-ia taraipau vova rasito, oire ra vara iava o pitupiturovere korokorupau, oarare korokurovere vuvuiua-ia. Ari vao oa iava vaseri vo rasito, oa iava vaserevere Pauto vova vuvuiua.” <sup>20</sup> Uva Jisas goruvira rutu voeare oiso puraroepa voeao disaipel, “Opeita irai tavipatavere oiso ragai vaisipaoro, Ro Krai Pauto reraoro vigei Tuvetuvepato.”

*Jisas Vo Ora Rera Iava Disaipelpa Ravaa Reo Vateveva Oiso Voea Tavioro, Ragai Kopiravere Ora Vorevira Toreravere*

*(Mak 8:31–9:1; Luk 9:22-27)*

<sup>21</sup> \* Oire vo vuuta-a vao oa iava vo vokia Jisas ora rera iava roorio pievira disaipel tavitavireva voea vosipaoro. Oiso puraroepa, “Jerusalem iare avaravere turaro irara iare voea rutu, ora voeao pris, ora voeao oea Reo Taisi-ia taraipaa, oiso ra voa riroara vai siitokaara ouavere vo osa ragai upove. Oire ra vo peva voki-ia vorevira torera.”

<sup>22</sup> Uva Pita rera auauoro avaroepea vatuarore rerare oiso pura rovosa, “Turaro. Easi viapau vao vii-ia karekeperei!” <sup>23</sup> Uva Jisas ora poreroepa Pita-re oiso purasa, “Seten. Ragai isivaaro-ia ora tovou. Eragai-ia kokarapau ragaire korupaoro Pauto vo ruipaaro pura arapa? Eva vii vaoro rugorugooa, viapau oiso Pauto vaoro-a. Oirara raga vo rugooaro eva.”

<sup>24</sup> \* Oa iava voeare disaipel oiso puraroepa, “Vosa irai ragai sirova utu vovoupari, oire ra ora rera iava vaisia vara pie rovovere. Ra ora rerapa vavata siitoka kaeoro uturo ragai sirova, vo vavata vao oa oiso toupai osa evao parikou. <sup>25</sup> Ro ira tootooa virivaripareve, oava eva opesirovorea tootooaro. Ari ro ira tootooaro vateveve vo oearovupa ragai vo ruipaaro

\* 16:14: Jo 1:21 \* 16:17: 1 Ko 15:50; Ga 1:16 \* 16:19: Jo 20:23 \* 16:21: Lu 17:25

\* 16:24: Jo 12:25

*sirova utupaoro, eera-a ira tootooaro tapo virivariavere taru.* <sup>26</sup> Aa vao-a vearoa oa ourevereia oirato vo rasio-ia vo rara auero rutu vo rasio iava oureuve, vo osa tootooa oaro rutu viki ragapareve rasito oaraaro-ia rugorugooapaoro? Eake vai ourevereia vorevira tootoo oaro-ia tavariovira? Viapau oavu avu vaiei rerapa. <sup>27</sup> ✧ Oirato Oviitoaaro Ro Ropoto kerariava vorerovereia Aiteto vaaro. Ora aue tapo enselpa irara oirara vorisa kovoara oaive uvuioro oiso osa uvuivira kovoivora. <sup>28</sup> ✧ Oiraopavira visii tavipaa oiso, Oearovuei vo-ia visii iava oea viapau tuguraavereia kopiia-ia oea tootoovira toupavereia osa ragai Oirato Oviitoaaro turarovira urioravereia osa ragai kekeive.”

## 17

### *Vo Sisikorevira Karekeepa Jisas Iava Varaua* (Mak 9:2-13; Luk 9:28-36)

<sup>1</sup> Uva katai vatara (6) aue voki putevoiva, Jisas vo Pita vase oureva, ora Jems araorei ora Jon. Uva voea tapo iparoepa oavu-ia riro pukui, uva voa raga toupaiava. <sup>2</sup> Uva Jisas iava varaua ora tavarioepa vo voea osireiario-ia. Oa iava sisikorevira kekero viropa osa rera iava kagave aviavieva sirusiruoro rutu oiso osa ravireo. Varoara tapo rera varaaro popotevira keke piropa oiso osa aviavia. <sup>3</sup> Uva voa-a evoa uva Moses vaio ora Ilaija Pauto ruvara iava ora karekesiepa Jisas iare vo pukuia kukuearo-ia. Uva voa rera tapo ora reopasiepa osa voea disaipel vo peva siituepaiva. <sup>4</sup> Uva va-a vao oa kekereva aue Pita. Oa iava Jisas-re oiso puraroepa, “Turaro, vearovira rutu vo touei vigei rutu vao. Apeisi vovoupauei ra kepa peva vai pauio oiso, vii okepai, ari Moses okepai, ari Ilaija okepai?”

<sup>5</sup> ✧ Uva oisi raga puraoepa osa rukuta popoteva voea tavurusa urioopa riro aviaviva. Uva oavu reo guruko karekeepa ruruta sovara-ia. Uva oavu reo guruko karekeepa rukuta sovara-ia oa-ia oiso puraroepa Pauto, “Eera-a ira Oviitoa oaa, ira kavikopaaveira rutu rera-ia rorupaoro. Ira vo reoaro uvuta!”

<sup>6</sup> Uva voea disaipel vo reoreo vao uvuoro takua viropa rasiuaaro, uvare va uvuoro rirovira rutu uriri iraoaepa. <sup>7</sup> Uva Jisas urioroepa voea ruvara iare. Oa iava-ia pituoro oiso puraroepa, “*Opeita uriripata. Toreta.*” <sup>8</sup> Oa iava vuravuraiva. Uva viapau oiso irai kekeiva oiratoa vai. Ari Jisas raga. <sup>9</sup> Oire uva pukuia iava varapaoro touvira Jisas oiso goruvira rutu voea vosipareva oiso purapaoro, “*Vao-ia oa keketavoi opeita va iava tavipatavere. Ari vo raga osa ragai tova urui iava vorevira tore rovoravereia.*”

<sup>10</sup> ✧ Uva disaipel oiso rera akeiva, “Apeisi ragavira iava tarai irara Reo Taisiro-ia oiso purapaaveira, Ilaija urio rovorovereia, ra rera sirova uturo Pauto reraoro vigei tuvetuvesa?”

<sup>11</sup> Uva oiso puraroepa, “*Ari ita, oiraopavira Ilaija urio rovorovereia orekerovu rutu torevoko rovosa.*” <sup>12</sup> ✧ Uva visii tavipaavoi oiso, Ilaija urio rovorora uva ora voea-ia rera goguivora. Oa iava rera-ia oiso vo pitupituro puraivora eisi raga ita osa ragai pieivereia ragaipa siitoka vateoro ita.” <sup>13</sup> Uva oisi-a eisi osa Jisas puraroepa. Oa iava disaipel rugorugooaepa oiso, O! Ari Jon Baptais iavirava Ilaija vaisirevo.

*Jisas Iravu Viovokoto Ravotovira Porete Piereva Ira-ia Oisoa Vurito*  
*Tugarato Oisoa Toupaveve*  
(Mak 9:14-29; Luk 9:37-42)

✧ 16:27: Ro 2:6 ✧ 16:28: Je 5:7 ✧ 17:5: 2 Pi 1:17; Ais 42:1 ✧ 17:10: Mal 4:5-6 ✧ 17:12: Mt 11:14, 14:3, 10

14 Oire uva oirara rutu ruvara iare avaaepa. Oa iava voa rera ruvara-ia rekusa urioroepa iravu oirato <sup>15</sup> ✧ oiso puraoro, “Turaro. Siraou ragai oviitoaaropa. Ira kokopeko upia tapo purapareveira. Oa iava varaua rerare vurivira toupaveira. Ari ita, vokiara rutu-ia koveparoveira tuitui kasiro iare. Ora vokiara rutu-ia tapo uuko oviro iare koveparoveira tuutuusipaoro. <sup>16</sup> Rera sipoavorao oevu iare disaipel vii voeaaro. Uva viapau oiso uvuiaerao oiso ra rera porete pieve.”

<sup>17</sup> Uva Jisas oiso puraroepa, “*Ae! Visii vao-ia visiigoa-ia viapau oirao pie novou vai toupai. Visiigoa viapau torevoko novou vaiet. Uva ovirovu-ia vuuta visii tapo toupaveira? Ora ovirovu purapaaveira visii vo vovouaro-ia kasikasipaoro, osa viapau goruvira ragai vaaro-ia pitupata? Rera sipota ragai iare!*” <sup>18</sup> Uva Jisas rerare ro tugarato kasipuvira reoroepa rera kosi pieoro viovokotoa iava. Oa iava rera iava upia opesi ovoiepa.

<sup>19</sup> Oire uva voea raga disaipel urioaepa Jisas iare rera akepasa oiso, “Apeisi ragavira iava viapau uvuipaiei tugara kosi piepasa?”

<sup>20</sup> ✧ Uva voea tavireva oiso puraoro, “*Raria oavisii garepai oa iava viapau uvuipatai. Iu, oiraopavira eisi osa visii tavipaa, Vosa rari vukuro vai toupave oiso osa mastet kuearo garepa takurarovi rutu, oire va iava vo pukuiore oiso purata, Toreu ra vova avau uvaire. Ra avape. Vosa oisi eisi visii varaaro rariara oisi toupave, oa iava uvuipatai osasararovu rutu purasa kovo oisi eisi.*” <sup>21</sup> [Uva viapau oraivai epao tugara kosi piepa raiva vai. Ari vao raga vosa aio kavu rovopata variria purapasa katai rugoo raga-ia.]”

*Jisas Erao Pievira Ora Rera Iava Taviroepa Oiso, Kopyiravere Ra Vorevira Torera*

(Mak 9:30-32; Luk 9:43-45)

<sup>22</sup> ✧ Uva avaaepa Galili iare. Oa iava voa Jisas disaipel vosireva oiso puraoro ora rera iava, “*Tutuu pievoi ra Oirato Oviitoaaro Ro Ropoto tovoive oirara vavaeoro-ia.*” <sup>23</sup> Ra rera upoive rera kopii pieoro. Oire voava vo pevapa vokia vorevira torerovere.” Oa iava disaipel vovouaro rirovira vavataaepa.

*Jisas Moni Vikireva Lotupa Kepa-ia Takisoro*

<sup>24</sup> ✧ Oire uva Kapaneam-ia pou virosa avaaepa. Uva voeao moni oupa irara urioaepa Pita ruvara-ia oiso akesa, “E visii tuvetuvepatoaaro avu moniara vai vikipareveira vo kepa-ia Rovopa Kepa Tugoropa Kepa takis voripaoro, eke?”

<sup>25</sup> Uva Pita oiso puraroepa, “*Iu.*” Oa iava koataroepa kepa-ia. Uva Jisas reo rovoroepa oiso rera akeoro, “*Saimon. Apeisi rugoopau voeao-ia turaro irara vo rasio tokipa irara. Irou ruvara-ia oisoo moni oupaave, ora voea raga vo ovii irara oaive ruvara-ia, eke oearovu raga voeao tauai irara?*”

<sup>26</sup> Oire uva va-a vao oa iava Pita oiso puraroepa, “*Ari voeoro ruvara-ia oisoo moni oupaave tauai irara iava voea.*” Oa iava Jisas oiso puraroepa, “*O ita, oa vituaro-a vao oa iava voeao ovii irara oaive viapau moni vikipaveira takispaoro. Osa ita viapau uvuiparai ra monia vai vatea takisoro vo kepa-ia Aite oaa vo kepaoro.*” <sup>27</sup> ✧ Ari ita, teapi voea kasipu piepe. Uva oiso vii tavipaa, Avau toko rovu iare ataritoa vai kaa piesa. Uva rovotoa vai kaa pierivere, ra irai gisipoaro gaari. Ra monia vai ouri. Oire ra oaiva voreu vegeipa takis vorisa Tugoropa Kepa-ia vao uvui pieoro vegei vaaro.”

✧ 17:15: Mt 4:24 ✧ 17:20: Lu 17:6; 1 Ko 12:9 ✧ 17:22: Lu 18:31, 24:6-7 ✧ 17:24: Eks 30:13, 38:26; Ro 13:7 ✧ 17:27: Jo 6:61

## 18

*Disaipel Jisas Akeiva Oiso, Irou Riropai Sara-ia Vao Vova Vuvuiua?*  
(Mak 9:33-37; Luk 9:46-48)

<sup>1</sup> Uva vo vuuta-a vao oa-ia disaipel urioaepa Jisas iare oiso akesa, “Irou vai oearovu rutu-ia putepai vo Sarao-ia Pauto vaaro?”

<sup>2</sup> Oire va iava Jisas iravure kakaeto keeraroepa. Oa iava rera tore pierева voea vuutaaro-ia. <sup>3</sup> ✧ Uva oiso voeare puraroepa, “*Visii tavi iraopaavo iiraopavira oiso, Vosa visii vovouisiro oavisii iava viapau poreta viro, ra viapau oiso Pauto vo Saraaropa ruipapata osa ro-ia kakaeto vapa ruipaparoveira, uva viapau uvuuta koatasa vo Pauto vo Saraaro-ia. Viapau rutu!* <sup>4</sup> Vosa ro ira ora akaipa pieparo ra oiso karekero osa ro-ia kakaeto, ira oearovu rutu-ia putepare Sara-ia Pauto vaaro.

<sup>5</sup> ✧ “*Ari vosa irai visii iava ragai vaisiarore rugoopaoro oiso irai tauvareve kakaetoa vai, ira-a eera ira ragai tauvapore.*

*Vuri Pitupitu Oa Oirato Vaaro Vuri Piepaiveira Raria*  
(Mak 9:42-48; Luk 17:1-2)

<sup>6</sup> ✧ “*Ari ita, vosa irai oiratoa vai ira kakaeto raria vaiaro vuri piereve voeao iava kakae vure oea ragai-ia raripaaveira, uva vearopai oiso ra oei rera-ia riroa vai aveke vai tuuive rera okoearo-ia rera roko piesa avakava vuruvuruaro-ia.*

<sup>7</sup> “*Siraovira rutu oirara-ia voeao vo rasio-ia oea oearovu kove piepaiveira vuri vovou-ia. Oiraopavira rutu vao-ia vuri pitupitu oa karekeperea. Ari ita, uva siraovira rutu-a ropa ira voea kove piepareveira vuria-ia.* <sup>8</sup> Oire vosa ovavaevu visii kove pieve ora okokotovu, vearopai va tokooro va-ia vikiu, ra katai vavae ragava ora katai kokoto toupari. Oa iava uvuipau ra vearo tootoo-ia ouri. Teapi vo vavaerei rutuva ora vo kokotoarei rutuva touparivora, vara rutuva vii vikiiverea tuitui kasi iare okasia viapau rokoe vai vo vuri tapi. <sup>9</sup> ✧ Ari ita, vosa osireito vii kove piereve vuri vovou-ia, oire rera tateri rera vikisa, ra kataitoa ragava toupari. Oa iava uvuipau ra tootooa rutu-ia karekeu. Teapi vaiterei rutuva touparivora, vaitereiva vii vikiiverea vo tuituia-ia vao oa viapau rokopaive.

*Reo Ruu Aue Iava Sipsip O Iria Opesikooa*  
(Luk 15:3-7)

<sup>10</sup> ✧ “*Visii vao vatatopo iraopata. Teapi oiso keapata voeao vuutaaro-ia kakae vure akaipa irara raga. Visii tavi iraopaavo oiso, Vo vuvuiua uva enelpa irara epao voeao oea kakae vure tokipaiveira oea vokiara rutu-ia Aite puaro kekepaiveira ira touparevoi vo vuvuiua-ia.* <sup>11</sup> ✧ [Eake iava uvare ragai-a vao Oirato Oviitoaaro Ro Ropoto urioraera oirara ousa vorevira voeao oea opesikoaepa, ra va iava voea vorevira vorea Pautoa-re.]

<sup>12</sup> “*Apeisi vai rugurugoopatai? Vosa irai oiratoa vai katai vovoto (100) sipsip ragui tokipareve. Oire vosa iriavu opesikoo, ra viapau oirare taraapareve, eke? Iu! Ra ita aue raga kavu piro vo resura vatara tau vo resura vatara (99) pukuia-ia vo uva vo ragui tokipareve, ra oirare kataiva rororo. Ra voava oirare taraasa avaro o iria opesikoo.* <sup>13</sup> Oiraopavira visii tavipaavo oiso, Vosa vorevira oira oureve o iria opesikoo, ra rirovira rorupareve rutu. Vo roruo-ia pute pievira oa tou rovopaive vao-ia vo resura vatara tau vo

✧ 18:3: Mt 19:14; 1 Pi 2:2 ✧ 18:5: Lu 18:17 ✧ 18:6: Lu 17:1-2; 1 Ko 11:19 ✧ 18:9: Mt 5:29

✧ 18:10: Sam 34:7; Ap 12:11 ✧ 18:11: Jo 3:16

resura vatara (99) sipsip vo rara vovevira oira oureve vo ragui iare. <sup>14</sup> Eisi osa raga vao toupai Aite oavisii vo vovouaro ro vova vuvuiua. Ira vaopa reasiparoveira, opeita iravu opesikoro voveao iava garepa kakaerovi.

*Araokoto Torevokopa Pitupitu Ro Ira Vuria Purapareve*

<sup>15</sup> ✧ “Oire vosa araokotoa vai oavisii vuria purareve visii-ia, oire avata rera iare, ra rera tapo pauta rera aviavi piesa. Ra rugooro vaore vuria oa purareve visii-ia. Uva oiso rutu toupai, Rera agiagita vo rara visii vo rearo uvureve.

<sup>16</sup> ✧ Ari vosa viapau visii uvureve, oire aitereivu outa ra visii peva rutu avata rera iare. Uva eva oiso toupai, Vaiterei evaiterei o vo peva oea rutu katai reo purapaoro vii vo rearo oirao piepai, oiso osa purapapeira Tugoropa Vuku. <sup>17</sup> Ari vosa viapau visii vo rearo uvureve, oire oirao pie vovou irara gururi vovea tavisa va iava vao-ia voveao lotupa irara. Oire ra vosa vova vosa viapau visii rutu uvureve, ra oiso rerare purata, Auoro, oirao pie asato rutu vii kaviruto, takis oupato.

<sup>18</sup> “Oiraopavira oiso osa visii tavipaa oiso, Auero rutu varao oarare korukorupatai vo rasio-ia, Pautoa tapo oarare korukorurovere vo vuvuiua-ia. Ari varao oara rutu tapo vasepata vo rasito, Pautoa tapo-a oara vaseparevere vo vuvuiua-ia visiipa.

<sup>19</sup> ✧ “Uva vovevira ita aia visii tavipaavoi oiso, Vosa visii iava aiterei katai vovou purasi ora vaiterei-ia vo orekevu avu vai-ia, oire varirisi. Ra Aite oisi va purareve vaitereipa. <sup>20</sup> Iu, vosa vaiterei o vo peva ragai vaisiarore rugoo rovoave, oire uvavivu ora guruave, ra vova vovea vuutaaro-ia toua vovea tapo.”

*Reo Ruu Kovopatoa Iava Ro Ira Varao Ou Ragaara Kavuu Ragapareve*

<sup>21</sup> ✧ Oire uva vo voki-a vao oa-ia Pita Jisas iare urioroepa. Oa iava vova oiso rera akereva, “Vosa ovirovu purareve araokotoa oaa vuriara ragai-ia, oire ra ovirovu-ia vuuta rera iava vara veraa? Erao vatara (7) vuutaro-ia?”

<sup>22</sup> ✧ Oa iava Jisas rerare oiso puraroepa, “Easi viapau oiso eisi vii tavipaa oiso, Erao vatara vuutaro-ia. Ari oiso vii tavipaavoi, Erao vatara tau vuutaro-ia ora erao vatara vuutaro (77).

<sup>23</sup> “Uva oisi-a eisi osa Sara vao vova vuvuiua oisi toupaveira oiso, Uva iravu turaro oiso ruipaparoepa ra ou ragaaro torevokoreve kovopa irara varaaro voveao rera voveaoro. <sup>24</sup> Oa iava rovroepa vara torevokopaoro. Uva rera iare iravu sipoiva oirato ira varaaro oiso uvuipaepa katai tau ipu kina (K10,000) rutu-ia. <sup>25</sup> ✧ Ari ita, osa viapau monia vai toupaveira rera ruvara-ia kovopato. Oa iava turaro rerare oiso puraroepa, Vearopai vii-ia voriparai ora riakova oara ora kakae vure rutu voveao vii voveaoro ora orekerovu rutu varao vii varaaro oara rutu vatepaa irapa. Oire ragaipa visii voriaro vaterere irai vao opesi piesa osa ragai ruvara-ia monia vo ragariva. <sup>26</sup> Oire uva oisi-a oiso-ia osa iava rera ro kovopato takuro virope vo rasia vao oiso puraoro turarore, Turaro reito ragaivipa siraou tue rovooro ragaire. Oara rutu vore piepaa varao. <sup>27</sup> Oa iava turaro rerapa siraoroepa. Uva vara eaka ragareva varao ou ragaara.

<sup>28</sup> “Uva rera kovopato kosiro virope iravu iare kovopato ira tapo oisoa kovopareve. Oa iava rerare oiso puraroepa rera okoeoro-ia pituoro, Auoro! Ragai vaaro vore pieri erao vovoto kina (K200) rutu.

<sup>29</sup> “Oa iava rera eera ira oisoa tapo kovopareve ira takuro virope rerare oiso puraoro, Ragaivipa siraou tue rovooro ragaire. Oa vore piepaavere rara

✧ 18:15: Lev 19:17 ✧ 18:16: Diu 19:15; 2 Ko 13:1 ✧ 18:19: 1 Jo 5:14 ✧ 18:21: Lu 17:4

✧ 18:22: Kl 3:13 ✧ 18:25: 2 Kin 4:1

viipa. <sup>30</sup> Vo osa roari reasiparoepa. Oa iava rera tovoreva tuukepa kepa-ia, oiso ra voa toureve aue vore piepaoro vao oa ou ragareva.

<sup>31</sup> “Oire uva va vao kekeiva kovopa irara. Oa iava rirovira kasipuaepa rutu. Uva vara rutu varao rera vo vovouroaro karekesa avaaepa turaro oaivepa. <sup>32</sup> Oa iava turaro rerare keeroepa ro kovopato rera akesa oiso, E vii-a vao vurito viigoa vao purarivo? Ari ita, riroara rutu eaka ragaavorao vii vore pieoro, uvare ragaire ora sirao pieuerao. <sup>33</sup> Oa iava ita viipa siraoraerao. Uva apeisi iava viapau eerapa ita siraouerao vii tapo kovopato? <sup>34</sup> Uva va-a vao oa-ia rirovira rutu kasipuroepa ro rera reitooaaro. Oa iava rera vatereva voeao vavaeoro iare riro upia vate irara, oiso ra voa toureve vao rutu vore pieoro oa ou ragareva.” <sup>35</sup> ✧ Oire uva vo reo opesi pieoro Jisas oiso puraroepa, “Vosa viapau oisi oiso araoko irara oavisii iava viapau vuriara verapata, ra oisi raga ita Aite ro vova vuvuiua visii oisi pieparevereva oiso-ia.”

## 19

### *Jisas Vao Iava Reoroepa Ora Oupa Pitupitu Putearo* (Mak 10:1-12; Luk 16:18)

<sup>1</sup> Oire uva Jisas vo reoara rutu opesi piereva. Oa iava Galili-ia kavureva Judia taere iare oiso ragavira ivirovira Jodan. <sup>2</sup> Uva riro irara rutu oirara rera sirova utupaepa. Uva voa voea iava upiara rutu porete piepareva ravotovira.

<sup>3</sup> Oa iava vo Farisi rera tavatavaesa urioaepa oiso rera akepaoro, “Vosa oirato ora rera vo ruipaaro-ia riakovaaro kavu ovoireve, uva apeisi-a Reo Taisi vai pasi oisi purapai, Oiso vearopai oisi?”

<sup>4</sup> ✧ ✧ Oa iava vo reo pukooro Jisas oiso puraroepa voeare, “E viapau vo siposipo vieipataveira oa toupaveira Tugoropa Vuku-ia vao rovoa iava? Oa-ia Pauto oiratoarei pura rovoreva ora riakova ora oupa pitupitu iava <sup>5</sup> ✧ oiso purapaoro,

‘Vosa oirato aitetoarei kavureve ora aakova. Ora vosa riakova tapo rera oiraaro ra kataito purasi ora vaiterei-ia.’

<sup>6</sup> Eisi osa iava viapau uvuiipasiei ra oiso toupasi, Vaiterei. Viapau. Ari oiso piesivoi kataiua varaua. Eisi osa va vao Pauto otavosia purareva oa-ia viapau uvuiparoi irai ra va sikareve.”

<sup>7</sup> ✧ Oire uva Farisi rerare oiso puraaepa, “Ari eakere Moses igei vatereva vao Reo Taisi oiso, Vo osa oirato reo ovoi rigatooro riakova vatereve, ra oira sigurve?”

<sup>8</sup> Uva Jisas voeare oiso puraroepa, “Riro kaureo irara visii visiigoa vo rugooroaro paivuruvira toupaveira. Oa iava Moses visii vaipa va vao karureva, oiso ra riakora sigupata. Osa viapau rutu tuariri rutu vo pitupitu oisoa toupave. <sup>9</sup> Ari ita, visii tavipaa oiso, Vosa ro ira riakovaaro kavureve o iria viapau otopa pitupitu purapaeve, eera-a ira ora oupa vo taisiario-ia tagaure vo osa iriavu riakova oureve ita.”

<sup>10</sup> Va-a vao oa iava disaipel rerare oiso puraaepa, “O ita, vosa Reo Taisire rugooro irai vao ora oupa taisi oiso, Riro gorua rutu-a vao ora oupa taisi. Eerapa vearopa-a ira viapau ousa vo pitupitu purarevori rovoa-ia.”

<sup>11</sup> ✧ Oa iava Jisas voeare oiso puraroepa, “Ari ita, viapau oiso oirara rutupa-a vo reoa vao-ia ora riakora. Viapau. Ari voeao raga vaaro-a

✧ 18:35: Je 2:13 ✧ 19:4: Jen 1:27 ✧ 19:4: 1 Ko 14:20; 1 Pi 2:2 ✧ 19:5: Jen 2:24; Ef 5:31

✧ 19:7: Diu 24:1-4 ✧ 19:11: 1 Ko 7:7-9

*oeapa va vatereva Pauto.* <sup>12</sup> Aue iava uvare oearovu kavupaiveira aako riakoro oisi raga, ra viapau va iava riakova vai oureve, ora voearo oearoa kakae pura arapa reasipaoro ora itakorepaaveira, ora voearo oearoa vaore rugoopaaveira Pauto vo Saraaro vova vuvuiua. Ari vosa aa ro avuo ro ira vo reo vao sirova utu ruipaparo, oire rera eakata, uvare rera vo reasiaro-a vao riako ou arapa.”

*Jisas Garepa Kakaero Viraaakoreva  
(Mak 10:13-16; Luk 18:15-17)*

<sup>13</sup> Va-a vao oa iava garepa kakaero sipoiva rera iare. Oa iava oiso ruipapaepa ra voea kukuearo-ia ora rera vavaearo tovoreve varirioro, ovusa disaipel voeare korupaaepa. <sup>14</sup> Uva Jisas oiso puraroepa, “*Kakae vure eakata, ra urioave ragai iare. Opeita voeare korupata. Ari Pauto vaaro Sara voea vaaro oiso osa voeao garepa kakaero.*” <sup>15</sup> Oire uva voea kukuearo-ia vavaearei tovoreva. Uva va eva purarevoiva, voea arova avaroepa.

*Vo Viovokotoa Iava Toupaivoi Ro Riro Kotokoto Guruto  
(Mak 10:17-31; Luk 18:18-30)*

<sup>16</sup> Iravu viovokoto Jisas iare urioroepa oiso purasa, “Tisato. Eake vai puraa vearo pitupitu vai, ra oai iava Tootoo Ovoi oua?”

<sup>17</sup> Oa iava Jisas oiso rerare puraroepa, “*Eakere ragaire eisi purauei? Ari kataitoa raga-a vearotoa rutu Pauto. Vosa rera vaaro Reo Taisi rutu sirova utuu vearovira, oire va iava vo Tootoo ouri.*”

<sup>18</sup> ✧ Oa iava oiso Jisas akereva, “Aa vao-a Reo Taisi?” Uva Jisas oiso puraroepa, “*Vao-ia Reo Taisi oiso-ia, Opeita oira upopau, opeita otopau, opeita kavirupau, opeita kuuvupau oearovu iava,* <sup>19</sup> *aiteara vaiopa avivikepau ora aakoara, ora oearovu rutupa siraopau oiso osa ora viipa siraopaveira.*”

<sup>20</sup> Oa iava viovokoto oiso puraroepa, “Otaisiroa rutu varao Reo Taisiro sirova utuparaveira. Uva eake vai ragapa potepaavoi?”

<sup>21</sup> Oa iava Jisas oiso rera tavireva, “*Ari ita, vosa vearo vovou rutu purasa auepau, oire auero rutu-ia vii varaaro vori rovov. Oa iava uvuipau vara voriaro vaterivora voearopa apota irara, ra ragai sirova utuu. Eva oa iava viipa varao pere vuvuiua-ia vearopara.*”

<sup>22</sup> Uva vo reo uvureva rera ro viovokoto. Oa iava rerare sopaua vavataepa. Uva avaroepa, uvare riroara rutu-a orekerovu rera varaaro.

<sup>23</sup> Oire uva va iava Jisas ora rera voeareore disaipel oiso puraroepa, “*Ari ita, vavagisipapeira rutu voeaopa riro kotokoto guru irara vore ora kiupa arapa Pauto vo Saraaro sovara-ia.* <sup>24</sup> *Uva ita, vavagisipai vao tavaatoa iava vo rito vo osa rirova vai vo kare iava kamel kare iriai voa koatasa auepao. Uva oisi rutu rirovira vavagisi iraopai ropa riro vori guruto vore koatapasa Pauto vo Saraaro-ia.*”

<sup>25</sup> Uva tavetave iraopaiva rera-ia. Oa iava oiso puraaepa, “Uva apeisi-a? Iroutoa vai-a ira uvuipa Tootoo Ovoi ousa?”

<sup>26</sup> ✧ Oa iava Jisas voeava vurapareva tuupavira. Uva oiso puraroepa, “*Viapau uvuipa oirato. Ari Pautoa raga uvuiparoi irai oisiri avu pieredora, rera vo Saraaro iare koataro.*”

<sup>27</sup> Uva Pita rerare oiso puraroepa, “Ari ita, igei auero oaio rutu kavuiovora vii sirova utupasa. Uva va iava eake vai ouioverea?”

<sup>28</sup> ✧ Uva Jisas voeare oiso puraroepa ora rera iava, “*Oiraopavira visii tavipaavoi. Vo utupaua orekerovu rutu isivaaro iava varao oara airepavira karekepaperea osa varao vo rasitoo-ia torevoko rovorevea*

*Pauto, ovuutaroa-ia oiso Oirato Oviitoaaro Ro Ropoto kerariava pouro viroverea paupa-ia vao king vo vuutaaro. Eva-a oa-ia visii tapo pautaverea aue katai tau erao (12) paupara, visiigoa ragai sirova utupataveira. Oire katai tau erao (12) aue sara vova Isrel oea taavataverea voea rovirieioro. <sup>29</sup>Voead oirara ora riakora oea ragai vaisiarore rugoopaoro orekerovu rutu kavuivora oiso-ia, araoko irara, ora taataa riako, ora aite irara, ora aako riako, ora kakae vure, ora voea varaaro rasiara, oea vara-ia varao pute pievira rutu oaravu rutu ouiverea taru aue tapo Tootoo Ovoi. <sup>30</sup>Ari ita, uva voead oea visii sirova oisoa utupaave, evoad oea visiipa iraverea vo Pauto vo Saraaro sovara iare. Ovusa voead oea visiipa oisoa irapaave, oea taru visii sirova utuaverea.*

## 20

### *Wain Kovo-ia Kovopa Irara*

<sup>1</sup> *“Iu, Pauto vo Saraaro oa oiso toupaveira osa iravu oirato ira vaaro-a riroa rasia. Oire vokiipaua rutu ovokivu-ia avaroepa oearovu kovopa irara ousa wain kovo-ia kovosa rera vaaro. <sup>2</sup>Uva oearovu tapo kovopa irara ora reoparoepa katai vovou raga-ia, oisore ra katai vovou raga puraive. Ra katakataivira katai voki voriaro oupaive katai kina. Oa iava voea arureva voa kovosa wain kovo-ia. <sup>3</sup>Oire vo peva vuuta isivaaro-ia avaroepa ita oearovu kekesa vo uva oisoa aivaropaive osa tou ragapaiva voa. <sup>4</sup>Oa iava oiso voea tavireva, Visii tapo avata wain kovo-ia kovosa, ra va iava uvuivira visiipa monia vai vateavere. <sup>5</sup>Uva avaaepa. Oire ravireo vuuta-ia ora ovaiaro avaroepa ita. Uva oisi raga ita piereva.*

<sup>6</sup> *“Oire vokiarovi vo vavae vuuta-ia avaro oearovu ita kekereva osa touiva. Uva oiso puraroepa voeare, Eakepa tou ragapatavoi vo-ia ro rutu-ia ravireo? <sup>7</sup>Uva rerare oiso puraaepa, Ari aue iava uvare viapau irai igei vatepare kovoa vai. Oa iava oiso voeare puraroepa, Oire visii tapo avata, ra kovota wain kovo-ia.*

<sup>8</sup> *“Oire uva vokiepa voeare. Oa iava rera ro ira vo kovoaro-a wain kovo ira tokipato tavireva oiso, Kovopa irarare keerau voea vorisa. Uva voead iava rovouvere utupa irara voead-ia rekasipasa irapa kovo irara.*

<sup>9</sup> *“Oire uva voead oea vo vavae vuuta-ia kovo rovoepa oea karea viropa katai kina raga ousa katakataivira. <sup>10</sup>Uva voead oea irapavira rutu kovo rovoiva oea karea viropa ita. Uva oiso keapaaepa, Vigei riroa vai pute pievira oupai, osa viapau. Ari oisi raga ita katai kina katakataivira ouaepa voea rutu. <sup>11</sup>Oire uva oisi-a oiso osa ouaiva, vara agarupaiva rerare reoparo ro ira vo kovoaro-a. <sup>12</sup>“Oiso puraaepa, Evoad oea utupavira kovoivo oea katai vuutavi raga-ia kovoivoi. Uva voea vo voriaro vaearivo rutu igei vaarova uvuipai. Ari ita, igei vao riro vavata kovoro rutu pura rovoipaivo rirotoa-ia ravireo.*

<sup>13</sup> *“Oa iava oiso puraroepa iravure oirato voea iava rera, Vatetoea oaa. Katai reo puravevo, oisore ra katai kina raga oupata visii rutu katakataivira. Uva viapau visii vuri pieavoi. <sup>14</sup>Vii vaaro voria oui, ra vava kareu, uvare ragai vo ruipaaro-a, oa iava oisi raga eisi voead voriaivoi utupa irara rutu oiso osa vii vo voriaro. <sup>15</sup>“Apeisi ragavira? Ra vosa orekevu avu vai purasa auepara vao-ia monia ragai vaaro, uva viapau oisi uvuiparai, eke? Vearo pitupitu puraaivoi, uva va-ia agarupari.” <sup>16</sup>Oire uva vo reo opesi pieoro voea iavirava oiso puraroepa, “Ari ita, uva voead oea visii sirova oisoa*



*utupaave, evoea oea visiipa iraaevere vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaevere.”*

*Jisas Ora Rera Iava Vo Pevapa Tavi Purareva Oiso, Kopiiiravere Ra Vorevira Torera*

*(Mak 10:32-34; Luk 18:31-34)*

<sup>17</sup> Jisas Jerusalem iare ipasa aueparoepa. Oa iava disaipel ragare keeraroepa, uvare voea raga tapo ora reo ruipaparoepa vo vokapaoro raivaaro. Uva oiso puraroepa voeare, <sup>18</sup> ✧ “*Uvuta! Ipaviei Jerusalem iare uva Oirato Oviitoaaro Ro Ropoto tovopai reipa irara vavaearo-ia pris irara ora voeao tarai irara Reo Taisi-ia. Oea rera tovopai kortua-ia. Ora reo goru puraivere rera kopii piesa.* <sup>19</sup> ✧ Ra rera vateive oearovupa ratau tou irara iava. Ra rera tovipaive rera ragipaoro. Oire rera tapaive evao parikou-ia. Uva taru vo pevapa vokia torerovere kopiiia iava tootooro vorevira.” Eisi osa voea tavireva ora rera iava.

*Jems Araorei Ora Jon Oiso Vovoupasiepa Ra Reipasi*

*(Mak 10:35-45)*

<sup>20</sup> ✧ Vo vokio-ia aakova vaiere oviitoarei sipooro Sebedi oviitoareiario, rekueva rasiuaaro Jisas areoro orekerovure. <sup>21</sup> Oa iava Jisas oira akereva oiso, “*Eake vaipa ruipapauiei?*” Uva oiso Jisas tavieva, “Oiso ruipaparai ra reo ovoi purari vaiereopa oviitoarei oaa. Ra oiso pausivere utupaua, iravu vo paovoreva oirapapa varata, ari iravu vo koike varata vo osa turarou.”

<sup>22</sup> Uva Jisas oiso puraroepa vo araorei iare ovoovovira, “*Viapau taraipasiei vao-ia oare akepasi. E uvuipasiei ra o-ia kap ukaiosi iria-ia ukaioravere, iria agasioi aue iava tavaka?*” Oa iava oiso rera tavisiva, “*Iu, uvuipaveiei.*”

<sup>23</sup> ✧ Oa iava Jisas vaiereire oiso puraroepa, “*Oiraopavira rutu. O-ia kap iria-ia ukaiosivere ragai oiraaro. Uva irouto-a ira vo oirapapa varata-ia ora koike varata ragai sirova paovovere? Uva vo reoa vao viapau oiso ragai vo reoaro-a. Viapau. Ari varao-ia paupara oara ravaarevora Aite oearovupa oirara voeao oea reesireva.*”

<sup>24</sup> Uva vo reoa vao uvuiva voea katai tau (10) disaipel. Oa iava vo araoreire aveavepaaepa. <sup>25</sup> Uva va-a vao oa iava Jisas voeare keeraroepa ora rera iare. Uva oiso puraroepa voeare, “*Taraipatai oearovu-ia reipa irara oea ratau tou irarapa turaropaai, oea-ia kae pievira oearovupa toupaveira uvare pute pievira goruava toupaveira. Oire ita, oearovu reipa irara rutu voea-ia pute pievira rutu toupave.* <sup>26</sup> Uva vo pitupitu-a vao-ia oa viapau uvuipai ra visii vuutaaro-ia toupave. Viapau. Ari ro ira oisi ora rei pieparo vo visii vuutaaro-ia ira oiso toupavereva kovopato visii tavapaoro. <sup>27</sup> Ari vosa ro ira visiipa rei ruipaparo ira oiso tourevereva, Visii reraaro kovopato. <sup>28</sup> ✧ Oiso rutu osa ragai ragoa urioraera vore. Uva viapau oiso ruipaparaveira ra oearoi ragai kovopaive oirara vai. Ragoa urioraepa kovoa purasa voea tauvaoro. Ora ragai vaaro tapo tootooa vatesa va iava vaseoro oirara rutuva voea oriruoro.”

*Jisas Voositoarei Porete Piereva Ravotovira*

*(Mak 10:46-52; Luk 18:35-43)*

✧ 20:18: Mt 16:21 ✧ 20:19: Ap 2:23, 3:13 ✧ 20:20: Jo 9:38 ✧ 20:23: Ap 12:2; Re 1:9

✧ 20:28: Fl 2:7; Ais 53:10

<sup>29</sup> Oire uva Jeriko iava avaroepa. Oa iava oirara rutu Jisas sirova utuaepa.  
<sup>30</sup> \* Uva voa vaiterei voositoarei raiva vatuaro-ia pausiepa, vo osa rera iava uvusiva Jisas osa vokapareva. Uva oiso puraoro rerare keerapasiepa, “Turaro. Vii-a Devit Aaotoaaro. Vegeivipa siraou.” <sup>31</sup> Oa iava riro irara vaitereire korukorupaepa oiso purapaoro, “Avaitereo, ora tape piesi!” Osa gausiva ita rirovira rutu. Uva oiso purasiepa ita, “Vii-a Devit Aaotoaaro. Vegeivipa siraou!”

<sup>32</sup> Oa iava Jisas voavi toupaooro vaiterei aatooro oiso puraroepa, “Eake vai-a oapa ruipapasiei ra oai puraa veipa?”

<sup>33</sup> Uva oiso rera tavisiva, “Turaro. Vegei oiso ruipapaveiei ra vegei osireiario karuri.”

<sup>34</sup> Oa iava Jisas vaitereipa siraoroepa. Uva vaiterei osireiario-ia vavaea tovoreva. Uva va iava vorevira vurasiva. Osa iava rera sirova utusiepa.

## 21

### *Jisas Turarovira Koataroepa Jerusalem-ia* (Mak 11:1-11; Luk 19:28-40; Jon 12:12-19)

<sup>1</sup> Oire Jerusalem iare avapaoro Betfasi urui iare tutuu pieivoiva, Oliv Kovo Pukui varataaro-ia aitereivu disaipeltoarei ira piereva vaiterei aruoro oiso, <sup>2</sup> “Vo urui-ia kareu virosa irasi. Ra voa donki kekesi ovusa variaua riararia toupavee ovittoa tapo oira reraaro. Uva vo avaoarei rutu karusivere ra vaitereiva vorei ragai iare. <sup>3</sup> Oire ra vosa irai vei akepareve oiso, Eakere evaiterei avaoarei upasi? Ra oiso tavisiva, Iria-ia Turaro vo kovoaro toupavoi. Oai iare vaitereo oupavevoi. Ra vaiterei iava vasereve ikauvira veipa.”

<sup>4</sup> Vo reo oirao piesa vao karekei oreoa purareva profetato oiso,

<sup>5</sup> \* ‘Vii Saion vata taviuvereava oiso, Eera visii reraaro King ira urioparoi visii iare gavaure vovouto. Ira donki kakae ivara-ia paupaoro urioparo.’

<sup>6</sup> Oire uva vaiterei vaitereo disaipeltoarei oisi vaiterei piesiva donki avaoarei vaitereiva voreoro oiso osa Jisas vaiterei tavireva. <sup>7</sup> Oa iava varoara tovosiva vaiterei ivara-ia oara ivara-ia popotapavira pauparoepa Jisas. <sup>8</sup> Uva riro irara oirara ora riakora ora voea varaaro varoara parakapaoro vara tovopaiva raivaaro. Osa oearovu evaoara tosipaoro vara tovopaiva voa raga raivaaro. <sup>9</sup> \* Uva voea oirara ora riakora pিরeripaoro rerava irapaepa, osa oearovu utupaaepa kaku piepaoro oiso purapaaepa, “Hosana Devit aaotoaaro-ia Pauto rera viraakoreve, ro-ia ira uriopa Turaro vasiario sovara-ia! Hosana vore viara-ia Pauto!”

<sup>10</sup> Oire uva Jisas Jerusalem urui-ia koataroepa. Oa iava oirara rutu ora riakora voeao vo urui-ia tou irara oea rera kekeoro paripariiva rutu oiso purapaoro, “Avoeao! Iroutoa rutu-a ro-ia?”

<sup>11</sup> \* Oa iava oirara ora riakora vokapaoro oiso puraaepa rerare, “Profetato ro-ia Jisas, Nasaret iava rera vo Galili taere sovara-ia.”

### *Vo Jisas Oirara Sigureva Tempel Sovara Iava* (Mak 11:15-19; Luk 19:45-48; Jon 2:13-22)

<sup>12</sup> Uva Jisas Rovopa Kepa-ia aue Tempel koataroepa. Oa iava voava oirara rutu sigureva vo osa voa ora voripaaepa vo kepa sovara-ia. Uva voa tebolara petopetoreva oara-ia orekerovu-ia moniara ora tuutuukopaaepa, ora varao paupara oara-ia paupaoro ora tuutuukopaaepa kurue kare-ia.

<sup>13</sup> \* Uva oiso voeare puraroepa, “Tugoropa Vuku oiso purapapeira, ‘Ragai

vo kepaaro-a vao-ia oa vaisipaiveira oiso, Variripa kepa.' Uva oiso rutu va piepatavoi, vataupa tapi kavirupa irara voaro."

<sup>14</sup> Uva voa toureva Tempel sovara-ia osa oearovuva uriopaepa voosi irara ora kotupipa irara rera iare voa. Oa iava voea ravotovira porete pie ovoipareva. <sup>15</sup> Uva reipa irara pris ora oearovu tarai irara Reo Taisi-ia vo ravotoa kekeiva. Oa iava kakaie vure uvuiva osa kaku piepaiva Tempel sovara-ia oiso purapaoro, "Hosana Devit Aaotoaaro-ia!" Osa-a eisi osa iava vuri vovou iraopaaepa rutu rirovira kasipupaoro. <sup>16</sup> ✧ Uva oiso puraaepa rerare, "E pasi vo reo uvurivoi oa purai viire?" Oa iava Jisas voeare oiso puraroepa, "Iu. Oa uvuavo. Esa viapau vo reo vieipataveira oa oiso purapai, 'Vii garepa kakaero oiso pieriva ora voeao sikeo irara roroara-ia tou irara ra vii-ia vuurapa vaisi purapaive?'"

<sup>17</sup> Oire uva voea kavuoro kosiro viropa uruia iare vao Betani voa tousa vo rupa-ia vao.

*Vo Jisas Reoroepa Oa Iava Fik Ova Erakoepa  
(Mak 11:12-14, 20-24)*

<sup>18</sup> Oire uva vokipaua rutu Jisas voreroepa riro urui iare. Uva voa rirovira rutu ogoeroepa. <sup>19</sup> Oa iava oevavu kekereva fik ova raivaaro. Uva vo eva iare avaroepa. Uva viapau oiso kuea vai kekereva voa. Ari guruvara raga toupai va voa. Uva vo evare oiso puraroepa, "Viapau oiso ra kuepauverea ita." Oa iava ikavira erako ovoiepa.

<sup>20</sup> Uva disaipel va vao kekeiva. Oa iava tavetave iraopaiva oiso puraroepa, "Apeisi iava fik ova ikavira erako ovoiei?"

<sup>21</sup> ✧ Uva Jisas voea vaoro pukoreva oiso, "Ari ita, oiraopavira visii tavipaa oiso, Vosa oirao pie vovou rutu purapata vakuvaku asavira, oire ra oiso piepata osa vo evaore fik ova pieavo iava erakoei. Ari ita, ra viapau oiso va raga vao purapata. Ari uvuipatai ra vaore pukuia tapo oiso purata, Toreu ra ora vikiu vore avakava-ia. Oire ra oisi pieive. <sup>22</sup> ✧ Uva vo osa raripaoro rutu variripata orekerovupa ruipapaoro, oa iava uvuipatai ra vara oupata."

*Jisas Akeiva Oiso, Irou Vaore Vii Reesiva  
(Mak 11:27-33; Luk 20:1-8)*

<sup>23</sup> ✧ Uva Tugoropa Kepa-ia aue Tempel koataroepa Jisas. Oa iava oirara rutu siposiporeva voa. Uva reipa irara pris ora oearovu Isrel iava oearoa rutu urioaepa rera akesa, "Eake reesia vao vii vaoro oa iava vo kovo purapari? Irou vii vateva vo reesi?"

<sup>24</sup> Oa iava Jisas voea aatooro oiso puraroepa, "Ragai tapo ita visii akepaavo oavure. Vosa ragai gisipoaro pukota, oire ra ragai tapo ita visii aatoa visii tavioro ragai vo reesiara iava. <sup>25</sup> Oire vo baptaiso Jon oa puraparevora, ovuva vo karopoa oa urioera Pauto ruvara-ia, eke vova oiratoa raga? Ra ragai tavita!" Uva ora rugorugoo piepaaepa oiso, Apeisi avu purapaviei? Vosa oiso puravio, Vova Pauto, ra oiso purarovere, Uva apeisi viapau va oirao piepata? <sup>26</sup> ✧ Ari vosa oiso puravio, Oirato vaoro, uva riro irarapa uriripaviei, uvare oirara rutu oiso rugorugooapai oiso, Jon-a profetato rutu. <sup>27</sup> Oa iava oiso purapaaepa, "Viapau taraipaiei." Uva Jisas voea tavireva, "Ragai tapo ita viapau visii tavia vo reesi iava oa iava vo kovo purapaavora."

✧ 21:16: Sam 8:2 ✧ 21:21: Mt 17:20; Je 1:6 ✧ 21:22: Je 5:16 ✧ 21:23: Ap 4:7, 7:27

✧ 21:26: Mk 6:20

### *Reo Ruu Iravu Oviitoareiaro Iava*

<sup>28</sup> “Apeisi rugoopatai? Iravu oirato ira oisoa oviitoareiaro toupasi. Oa iava avaiotoa iare avaroepa oiso rera arusa, Oviitoa oaa avau wain kovovia kovosa vo vokie. <sup>29</sup> Uva rera vo rearo pukooro oiso puraroepa avaioto, Reasiparai. Oire va isivaro iava vovouisi poreoro ita avaroepa kovosa. <sup>30</sup> Oire uva kikootoa iare avaroepa aiteto oiso raga ita rera tavisa. Oa iava oiso puraroepa, Iu aite. Avaparai! Uva viapau oiso avaroepa <sup>31</sup> ✧ Oire uva vaierei-a vaitereo oviitoarei, uva aa ro aiteto vo rearo sirova uturoepa?” Oa iava oiso puraaepa, “Ari avaioto.”

Uva Jisas voeare oiso puraroepa, “Oiraopavira rutu visii tavi irapaa oiso, Voeao kavirupa irara takis oupa irara ora vairo otopa riako oea Pauto vo Saraaro-ia koata rovoaverea iraro visiipa. <sup>32</sup> Eake iava? Uvare Jon torevoko pitupitu kareke rovosa urio rovoroepe visiipa. Uva viapau rera oirao pietava ovusa voeao takis oupa irara ora otopa riako rera oirao pieiva. Ari ita, uva va keketava oa iava viapau oiso vovouisiro oavisii poretava rera oirao pieoro.

### *Reo Ruu Vao Voeao Iava Vuri Irara Oea Oisoa Wain Kovo Tokipaive*

*(Mak 12:1-12; Luk 20:9-19)*

<sup>33</sup> ✧ “Reo ruu uvuta vao oa oiso purapai, Iravu wain kovo paureva. Uva vo kovo rirore kasura purareva. Oa iava vao rikui tekareva auere gerepara pigipato masin. Uva vao uutupa kepa paureva vo kovo ruvara-ia. Oa iava oiso oeavu kovopa irara tavireva, Vo kovo toki ragapatavere ragai vo kovoaro monia purapaoro ragai vaoro. Voea tavirevoiva, voea tovo pieoro vo kovovia otaerevu iare avaroepa. <sup>34</sup> Uva oivavu sovara-ia oeavu arureva kovopa irara rera voeao vo kovo iare, oiso ra vo kovo kuearo iava oarai ouive rerapa voea ruvara-ia voeao oea oisoa vo kovo tokipaive. <sup>35</sup> Oire uva voeao oea arureva rera kovopa iraraoro oea ouiva voeao wain kovo tokipa irara. Oa iava voea iava iravu ragipaiva, ari iravu kopii pie ovoiiva, ari iravu vurokoiva aue-ia aveke. <sup>36</sup> Uva rera ro ira vo kovoaro-a oeavu ita arureva kovopa irara rera voeao riro iraravi rutu. Oa iava oisi raga ita voea pieiva. <sup>37</sup> Oire uva ovoio kuvira rutu rera oviitoaoro rutu siporeva voea iare oiso rugoopaoro, Ira vai-ia taru gisipoaro uvuivere ragai rutu oviitoaoro. <sup>38</sup> ✧ Oa iava oiso ora reoepa voeao wain kovo tokipa irara, Rera-a ro-ia turaro oviitoaoro rutu. Irare ra rera upoera, rera varaaro rutu oupe. Ra oisi iavirava kovoa tokipe ora vigeipa. <sup>39</sup> Uva va iava rera-ia pituiva vo kovo sovara-ia. Oire voava rerava kosia viropa vo kovo vatuaro-ia rera kopii piesa. <sup>40</sup> Uva apeisi vai rugorugopatai vo siposipo uvupaoro? E utupavira urioroverea ro ira vo kovoaro-a? Ra eake vai-a vao oa purasa urioroverea voea-ia voeao vo kovo tokipa irara, raa?”

<sup>41</sup> Oa iava Jisas-re oiso puraaepa, “Ari voea rutu taru uporeverea voeao vuri irara. Ra oeavu raga ita tovo pierave vo kovo-ia. Uva vo aio oupa vuutaaro-ia vo kovo iava oupaoro rerapa vatepaaverea torevokovira.”

<sup>42</sup> ✧ Uva voeare oiso puraroepa Jisas, “Esa pasi vo reo vaio vieipataveira Tugorova Vuku-ia oa oiso purapapeira,

‘O-ia aveke iria veraiva voeao kepa paupa irara oira-ia kepa paupa arapa, eira rutu ita-a avekeva rovpava rutu kukuuvu tuuta oa eisi pierave Pauto Turaro. Uva evo kovo purareva oa vigei osireiaro-ia ravotovira toupaveira.’

✧ **21:31:** Lu 7:29, 50   ✧ **21:33:** Ais 5:1-7   ✧ **21:38:** Sam 2:8; Hi 1:2   ✧ **21:42:** Sam 118:22-23; 1 Pi 2:7

<sup>43</sup> *Ari ita, Pauto rera vo Saraaro-ia visii Jiu rui piereverea oevu raga vatesa voeao oea vearo kue purapaiveira va-ia.* <sup>44</sup> [Ari vosa ro ira kovero oira ivara-ia o-ia aveke ra ora pegepegeoro ita. Ari vosa oira o aveke koveo irai ivara-ia, oire ra garepa visivi rutu rera taritaoro koveo.]

<sup>45</sup> Oire uva voea voeao pris ora Farisi va vao reo ruu uvuiva oa purareva Jisas. Oa iava rera oriorisioro oiso puraapea, “Asi vigeire oiso puraparo!”

<sup>46</sup> Uva va-a vao oa iava oiso vovou ragapaaepa ra rera-ia pituive. Uva rirovira rutu uriripaaepa ita oirara rutupa voeao oea oisoa oiso purapaave rerare, Jisas profetato.

## 22

### *Reo Ruu Vao Riako Oupa Aio Iava Vao-ia Rei Voki* (Luk 14:16-24)

<sup>1</sup> Oire uva oavu ita purareva reo ruu voeare oa-ia oiso puraroepa, <sup>2</sup> \*  
“*Vao Pauto vo Saraaro oa oiso rutu toupai osa iravu reito king, ro ira oiso vo pitupitu purareva vo osa oviitoaaro riako ousa aueparo rei voki-ia. Oire riroa aioa purareva rera ro reito,* <sup>3</sup> *uvare oearovu oisoa reesi rovopareve oiso, Voeaore kaokaoravere rara vo aio iare. Oire pura piro vo voki vao oa-ia vo aio purareve. Oa iava rera voeaaro arureve, Voeaore keerasa avata. Ari vo osa reasipaave vo aio iare urio arapa.* <sup>4</sup> *Oa iava oisoa oevu arupareva ita rera voeaaro kovopa irara oiso puraoro, Visii avata ita voeare keerasa ita oea keera ragaraerao. Ra oiso voea tavita, Uvuta. Ragai vaaro vatatopoei aioa, varao-ia oa puraavo oiso-ia bulmakau kare ora voeao taoropa kare. Ragai vo karearo oea upoavo. Oa iava vara rutu-ia vatatopoavo. Ari uriota va iare vao riako oupa aio.*

<sup>5</sup> “*Uva eisi-a osa kaokaosa avaaepa voea voeao kovopa irara voeare, osa reasipaapea ita vo kaokao uvu arapa. Uva voava ora sikasikaaepa oiso oearovu ora voea vo kovoroaro iare vikuiva, osa oearovu ora voea vo kovoroaro purapasa sara kovoro avaaepa.* <sup>6</sup> *Osa oevu kovopa irara rauiva reito voeaaro voea vuri piesa voea kopii pieoro.* <sup>7</sup> *Uva oisi-a oiso osa iava rera ro reito rirovira rutu kasipuoro rera voeaaro arureva viurupa irara. Oa iava avaaepa voea opesi piesa voeao oea kovopa irara upoiva. Oa iava voea vo uruiaro-ia tapo piuaepa.*

<sup>8</sup> “*Uva va-a vao oa iava reito rera voeaaro kovopa irara tavipareva oiso, Aioa vao oa vatatopoe tuariri. Oa iare voeare keera ragarae oea reesi rovoavora. Uva viapau uvuipaa ra urioave, uvare viapau uvuivira toupai voea vo rugorugoroaro.* <sup>9</sup> *Oa iava visii tavipaa oiso, Vusita riro raiva iare voa siituepasa oearoire oirara vai ora riakora vai. Ra oeaire keerapaoro oiso purapata, Uriota riako oupa aio iare.* <sup>10</sup> *Uva eisi-a osa puraroepa, oa iava avaaepa kovopa irara riro raiva iare oirara rutu gurusu ora riakora voearo tapo vuri irara ora voeao vearo irara. Oa iava voea rutu pausa urioaepa kavatao kepa-ia. Uva agasiepa voea iava.*

<sup>11</sup> \* “*Oire uva voa paupaepa oirara rutu vo aio-ia osa reito koataroepa voea kekesa. Oa iava voea sovara-ia iravu kekeveira ira viapau vearovira oritooro urioroepa vo vokia eva riako oupa aio-ia.* <sup>12</sup> *Oa iava rerare oiso puraroepa reito, Vatetoa oaa. Apeisi iava viapau vearotoa vai-ia kuvutoa vai kuvuoro uriouei vo aio iare? Osa viapau rera aatopareva.* <sup>13</sup> *Oa iava rera voeaaro tavireva oiso, Rera vavaearo tuuketa ora kokotoarei tapo. Ra oisi rera pieoro rera kosi pieta vova eisire rupa-ia. Ra voa rupavira*

toupaoro ora reuriaro kuripareve ora rerapa siraopaoro. <sup>14</sup> Uva oisi-a eisi osa Pauto kaokaoparoveira riro irarare. Ari katakataipa irara raga ora rerapa reesipareve koatapasa rera vo Saraaro-ia.”

*Vo Jisas Akeiva Takis Moni Vatesa Sisa-pa*  
(Mak 12:13-17; Luk 20:20-26)

<sup>15</sup> Oire uva Farisi oiso vo reo purasa avaaepa, “Eake reo vai-ia rera tavatavaepe, ra oa iava rera piro piepe ro Jisas?” <sup>16</sup> Osa iava Herot aruiva disaipel tapo voeao Farisi voeaaro. Oa iava Jisas iare avaaepa oiso purasa, “Tisato, igei vii-ia taraipaiei oiso, Vii-a oiraopa reotoa rutu. Uva oiraopa vovou rutu vii vaoro oa iava oirara rutupa siposipopariveira Pauto vo pitupituaro iava. Uva viapau oiso oearovure rugoopaveira oiso, Teapi ragaire vuri rugoo puraive. Viapau. Ari katai reoa raga purapariveira oirara rutupa. <sup>17</sup> Uva oisi-a eisi osa iava igei tavipari, Apeisi rugoopaei? E torevokopai ra rerapa Sisa takisvio moni vateoro ro gavman vigei reitooaro, eke viapau?”

<sup>18</sup> Uva Jisas voea vo reoro oriorisioro oiso puraroepa, “*Visii vao riro ratarataa vovou irara. E ragai tavatavaepata?* <sup>19</sup> Ragai roro pie rovota oai iava takispa moni vai.” Oa iava oavuva urioaepa rera vatesa Jisas. <sup>20</sup> Uva oiso voea akereva, “*Irouto puaaro-a ro-ia? Ora irouto vaisiara-a?*”

<sup>21</sup> ☆ Oa iava oiso puraaepa, “Ari Sisa.” Uva oiso puraroepa, “*Vosa Sisa vaaro, oire rera vateta Sisa. Ari vosa Pauto vaaro, oire Pautoa-pa va vateta.*”

<sup>22</sup> Uva vo reo-a vao oa uvuoro rirovira rutu va-ia rugorugoo iraoaepa. Oa iava rera arova avaaepa.

*Jisas Akeiva Oiratoa Iava Ro Ira Kopiuro Ra Vorevira Torero*  
(Mak 12:18-27; Luk 20:27-40)

<sup>23</sup> Oire uva vo voki raga vao oa-ia reipa irara Sadyusi-pa irara vova lotua Jisas akesa urioaepa. [Evoea oea oisoa kopiipa irarare oiso purapaave, “Viapau oiso torepaaaverea vorevira kopii tapi iava.”] <sup>24</sup> ☆ Uva oiso rerare puraaepa, “Tisato, Moses oiso puraroepa, Vosa iravu kakae pura asavira kopiuro riakovapa, oire ra araokoto ita oira oureva. Oire rerapa ro kopiito oira-ia kakaeto purareve araokoto. <sup>25</sup> Oire vo tuariri erao vatara (7) rutu oaraovu oea oiso igei ruvara-ia toupave. Oea iava iravu avaioto iriavu arova riakova kopiuroepa kakae pura asavira. Oa iava kikooto ita aia oira oureva. <sup>26</sup> Uva eraopato ora vo pevapato oisi raga ita piesiva oira arova. Oa iava vo arao rutu vo rekasiaepa erao vatara rutu-ia oirapa kakae asavira raga kopiipaoro. <sup>27</sup> Oire uva vo arao rutu opesiaepa kopiuro. Oa iava vo arao isivaoro iava kopiioa ita oira. <sup>28</sup> Uva vo vokio-ia oa-ia oirara rutu torevareva vova kopiia-ia. Uva irouto vo arao iava oira ourevareva. Aue iava uvare vo arao rutu oisoa oira oupaive oira arova kopiipasa.”

<sup>29</sup> Oa iava Jisas oiso voea vo reoro pukoooro oiso puraroepa, “*Viapau oiso taraipatai Tugoropa Vuku vo rigatoaro-ia. Ora viapau tapo taraipatai Pauto vo goruaro-ia tapo. Eisi osa kokoropavira ora reopatai.* <sup>30</sup> Oire vo vokio oa-ia oirara rutu kopiia iava vorevira torevareva oa-ia viapau oiso voreria vaieli riako ou vai. Ari oiso raga toupasa vorevira torevareva osa purapurapa irara ensel voeao vuvuiua.

<sup>31</sup> “*Uva vo reo-a vao oa iava visii akepa voea iava voeao kopii irara oea torepaaaverea. Asi viapau pasi vo reo vieipataveira oreoa iava Pauto visii tavireva? Oa-ia oiso puraroepa,* <sup>32</sup> ☆ ‘Ragai-a Pauto oaive Ebrahim, ora Aisak, ora Jekop voeao oea urauraaro tofoovira toupaveira.’ Ari ita, uva

va-a vao vituaro iava oiso purapai, Viapau oiso kopii irara reraaro-a Pauto. Ari Pauto-a voea reraaro oea tootoopai.”<sup>33</sup> Oire uva voea voeao oea vo reo uvuoro vao-ia ora sitaaepa va-ia tavetavepaoro.

*Vo Toupai Reo Taisi Vao Rovopa Rutu Pauto Vaaro*  
(Mak 12:28-31; Luk 10:25-28)

<sup>34</sup> Uva voa-a vo uva Sadyusi-pa irara tape piereva Jisas voea vo reoaro tuoro. Oa iava Farisi va iava uvuoro urioaepa. Oire voava voearei rutu ora guruaepa rera ruvara-ia. <sup>35</sup> Uva voearei rutu iava iravu riro reo kerisito Reo Taisi-ia toupaveva. Ira oiso vovouparoepea ra Jisas tavatavaereve rera akeoro. <sup>36</sup> Uva oiso puraroepa, “Tisato. Aa vao-a reo goru oa vara rutu-ia reo goruro pute iraopai?”

<sup>37</sup> ✧ Oa iava Jisas vo akeo aatooro oiso puraroepa, “*Reito Pauto vii reraaro irapa sopaava oara rutu vateri, ora rugorugooara rutu, ora taraiara rutu varao vii varaaro rera ragapa vateri.*” <sup>38</sup> Va vao-ia reo goru oa reipai rutu ora rovopa rutu. <sup>39</sup> ✧ Uva eraopa oa vava areiivira raga oiso purapai, Ora vii sopaaro rutu vatepari voeaoepa oea vii ruvara-iavi toupaveira, oiso rutu osa ora viipa siraopaveira. <sup>40</sup> Vo taisireo Reo Taisi rutu vituaro varao Moses vase ora profeta irara varaaro.”

*Jisas Farisi Akereva Ora Rera Iava Kraisi*  
(Mak 12:35-37; Luk 20:41-44)

<sup>41</sup> Vo uvuru raga-ia toupaveira Farisi osa Jisas oiso voea akereva, <sup>42</sup> “*Apeisi rugorugooatai Kraisi-ia. Irou aautoaaro?*” Oa iava oiso rera taviiva, “Ari Devit aautoaaro.”

<sup>43</sup> Uva oiso puraroepa voeare, “*Uva apeisi iava Devit vatereva Tugoropato Uraurato vo rugoo oa iava Kraisi-ia Turaro vaisi tovoreva oiso puraoro,*

<sup>44</sup> ✧ “*Turaro Pauto ragai reraarore Turaro oiso puraroepa, Vo paupaveira oirapapa varata-ia vo tugurasa ovokia-ia voeao vii voeaoro keripa irara tovoaveira vii kokotoaro reoaro.*”

<sup>45</sup> Ari ita, Devit raga turarovira Kraisi vaisireva. Uva apeisi ragavira? Uvare Devit aautoaaro-a ro Kraisi ira Devit sirova kavauroepa.”

<sup>46</sup> Oa iava viapau oiso irai uvuiparoepa vo reo pukosa Jisas vaaro. Uva voa-a evoa uva rovoaepa uriripaoro rera ake arapa vorevira.

## 23

*Tisa Irara Vo Pitupituroaro Aue-ia Reo Taisi Voearei Ora Farisi*  
(Mak 12:38-39; Luk 11:43, 46, 20:45-47)

<sup>1</sup> Utupavira Jisas oirara rutu tavireva ora voeao rera voeaoro disaipel. <sup>2</sup> ✧ Uva oiso puraroepa, “*Voeao tisa irara tarai irara Reo Taisi-ia voearei ora Farisi oearea reesiiva ojavu oavu-ia paupa vo uva oisoa Moses varaaro Reo Taisi aviavi piepaive.*” <sup>3</sup> Uva oisi-a eisi osa vao oiraopa reo rutu va vatepaiveira visipa. Uva uvuipatai ra va uvupata, ra va sirova utupata. Ari vao voea vo pitupituroaro, viapau oiso vao Reo Taisi sirova utupaaveira oa-ia voeao oirara siposipopaiveira. Eva-a oa vituaro iava viapau rutu oiso ra voea vo pitupituroaro sirova utupata. <sup>4</sup> ✧ Ora riro vavatapa ruuro tuukepaiveira oirara vutuaro-ia vara tovopasa, vo osa ora voea raga viapau varavi-ia pitupaive sipareoaravi raga iava voea tauvapaoro oea

✧ 22:37: Diu 6:5 ✧ 22:39: Lev 19:18; Ro 13:9; Je 2:8 ✧ 22:44: Sam 110:1; Ap 2:34; Hi 1:13, 10:13 ✧ 23:2: Esr 7:6, 25; Nie 8:4 ✧ 23:4: Ga 6:13

vara kaepaive. <sup>5</sup> ✱ Uva vara rutu purapaiveira oiso ra oirara vara kekepaive. Iu. Riropa pakoro oara oisoa purapaive Tugoropa Reo-ia pakopasa vara-ia. [Oire varava riro kaekaepavira variripaave.] Ora aue tapo papaapa varoro oara-ia oisoa oritopaave, oara oisoa kokotoara rutu iare vara piepaive. [Oire ra vara vituaro-ia riro paraka turua purapaive va iava ora reesipasa, oiso ra oirara rutu vara iava oiso auepaave vara kekepaoro, O, riro tarai irara voeao Tugoropa Reo-ia.] <sup>6</sup> Ora oisoa rovopa tavukipa ruipapaave paupa vo aiopa vokia. Ora vao tapo paupa vo Reo Uvupa Kepa-ia Sinagog oa-ia oisoa paupaave reipa irara. <sup>7</sup> Ora oiso tapo ruipapaave ra oirara rutu voeapa ora avivikepaoro oiso voeare purapaave, Vearo voki, vo uruiara rutu sovara-ia. Ora oiso tapo purapaave, ra oiso voea vaisipaive, Tisa irara.

<sup>8</sup> “Uva oiso ruipaparai ra viapau oisi visii vaisipaive oiso, Tisa irara. Viapau. Ari kataitoa raga, visii reraaro Tisato. Ari visii rutu-a katai arao rutu. <sup>9</sup> ✱ Uva vo rasio-ia viapau uvuipatai ra irai rei piepata irai vaisipaoro oiso, Vigei aitearo. Viapau. Ari kataitoa raga Aite oavisii ira oiso toupave vuvuiua-ia. <sup>10</sup> Ora viapau tapo ra oiso visii vaisipaive, Turaro. Viapau. Ari kataitoa raga visii reraaro, Ragai ita Krai. <sup>11</sup> Ari vosa ro ira visiipa reiparo, ira-a eera uvui iraopa ra ora vaisiro oiso, Visii reraaro kovopato. <sup>12</sup> Ari ro ira ora vaisiario raga kae piepareve, ira-a eera vaisiario akaipa pierevere Pauto. Ovusa ro ira ora rera vaisiario vara piepareve, ira vaisiario kae pierevere utupaua Pauto.

### *Jisas Tisa Irara Ora Farisi Tavireva Vao Iava Vuri Pitupitu Oa Oisoa Purapaive*

*(Mak 12:40; Luk 11:39-42, 44, 52, 20:47)*

<sup>13</sup> “Oire visii vao tarai irara Reo Taisi-ia ora visii Farisi visiigoa vatatopo iraopata riro kuuvu irara rutu visii. Visiigoa rataoa tupapataveira vao Pauto vo Saraaro iava vo oirara rutu osireiario-ia. Ora visii ruture tupapataveira vo osa oearovu koata ruipa ragapaave. Oire ra visii raga vo vovouroaro-ia paipaipaive oearovu rara visii raga voeare tupapata.

<sup>14</sup> “[Visii vao tarai irara Reo Taisi-ia ora visii Farisi visiigoa vatatopo iraopata riro kuuvu irara rutu visii. Ora riro raro riakore vo keparoaro ou raga irara. Visiigoa vao oirara osireiario-ia riro kaekaepa variriro purapataveira vuriara oavisii vataupaoro. Oire uva va-a eva oa vituaro iava vuria rutu oupataverea riroa voria vuria.]

<sup>15</sup> “Visii vao tarai irara Reo Taisi-ia ora visii Farisi visiigoa vatatopo iraopata, riro kuuvu irara rutu visii. Visiigoa avakava-ia viripataveira ora voraro vo rasio rutu-ia kataitoa ragare taraapaoro disaipelto, oiso ra visiipa doraro vo vovouroaro sirova uturo ita oiso osa vara sirova utupataveira visii. Uva va iava eva visii vo voriroaro-ia vuriara rera vo voriaro vuria rutu pute pievira karekepe.

<sup>16</sup> “Visii vao-ia visiigoa oearovu tuvutuvepataveira raivara-ia oiraravoosi-paoro. Visiigoa vatatopo iraopata. Visiigoa ora visii vo siposiporoaro vatepataveira oearovupa. Oire ra oiso voeare purapata, Vosa irouto Tempel vaisi ragapaoro reo ovo purareve, ra oiso puraparo, Oiraopavira rutu, oa oiso toupavoi kiuvu reo raga eva. Ari vosa irouto ro ira gol vaisiario reo ovo purareve vao oa Tempel sovara-ia toupaveira, oire ra viapau uvuipa ora rera raga vo reoaro gasireve.

<sup>17</sup> ✱ “Visii kokoropa irara ora voosi irara. Eake vai-a vao oa reipai? Gol pasi



oa reipai, eke Tugoropa Kepa aue Tempel oa gol tugoro pievira karekepapeira, ra va iava rei vaisipape? <sup>18</sup> Ora vao tapo osa ora visii vo siposiporoaro iava oaravu vatepataveira oearovupa. Uva voeare oiso purapata, Vosa irouto eravao raga vaisipaoro oiso puraro, Oiraopavira rutu, oa oiso toupai kiuvu reo raga eva. Ari vosa irouto tauoa eravao-ia toupaveira oiso puraro, Oiraopavira rutu, oire ra viapau vuuiipa ora rera raga vo rearo gasireve. <sup>19</sup> \* Visii vao voosi irara. Eake vai reipai? E pasi tauoa reipapeira, eke eravao tauoa rei piepaiveira. Oa iava tugoropavira karekepapeira, eke? <sup>20</sup> Uva eisi osa iava oisoa oirato eravao oirao piepaoro oiso puraparo, Oiraopavira rutu, ora orekerovu rutu varao oara oira ivara-ia toupaveira. <sup>21</sup> Ari vosa ro ira Tempel vaisioro oisi puraro oiso, Oiraopavira rutu, oire uva rera-a eera ira voa Pauto tapo vaisire. Eake iava? Uvare Pauto voa toupaveira Tugoropa Kepa vao Tempel. <sup>22</sup> \* Ari vosa ro ira vuvuiua-ia vaisioro oisi puraro oiso, Oiraopavira rutu, oire uva rera-a eera ira Pautoa tapo vaisire voa. Eake iava? Uvare Pauto voa pauparoveira.

<sup>23</sup> “Visii vao tarai irara Reo Taisi-ia ora visii Farisi riro kuuvu irara. Visii vao garepa aiorovi iava akuku aioro katakataivira vara vatevate ragapataveira varao iava tautauara rutu iava. Oiso osa varao aiorovi taraipara utuuva geesi piepataveira aue-ia geesi kouro Pautoa-pa tauoa purapasa. Ovusa varaore reipara ovaupataveira rutu oiso osa varao-ia oira rovirieipa pitupitu oiraopa, ora oirarapa siraopa pitupitu, ora oirao piea vo pitupituro. Oire rovopa vao-ia vosa varao purapata, ra viapau oiso gareparavire tapo ovaupata vara purapa arapa. [Oiso osa vao-ia taraipa aioro utuuva geesi piepa.] <sup>24</sup> Visii toupata oiso rutu osa voosi irara. Visiigoa oisore auepataveira ra oirara tuvetuvepata vo raivao-ia oa-ia auere ora kasivaripataveira kuvikivi kare veraverapaoro roviara iava. Ari vosa koie ra oira rutu kopata.

<sup>25</sup> “Visii vao tarai irara Reo Taisi-ia ora visii Farisi riro kuuvu irara visii. Visiigoa kap iava varaua raga sisupataveira ora dis, ovusa vara sopaaro agasipape varao iava kavirupa pitupituro ora varao ora aio piepa pitupituro visii raga varao. <sup>26</sup> Vii Farisi voosito! Viigoa kap sopaaro sisigarue pie rovopari, ra oira varaaro tapo sisigarue epao.

<sup>27</sup> \* “Visii vao tarai irara Reo Taisi-ia ora visii Farisi riro kuuvu irara. Visiigoa vatatopo iraopata. Visiigoa oisi rutu toupataveira osa tova urui. Oa ivara-ia vatoe kerarire vearo kekepapeira vo ragava ivara-ia. Ovusa rikuara sovara-ia riroara oira eruro keruara toupaveira, ora oaravu rutu eruara. <sup>28</sup> Eisi osa visii iava varaura sopaaro toupaveira. Oire ra oearovu rutu oirara visii varaaro kekepaoro oiso keapaave, Torevoko irara, ovusa visii iava sopaura oavisii agasipape varao iava ratarataa vo pitupituro ora varao tapo Reo Taisiva kaureopa pitupituro.

### *Jisas Voea Rutu Tisa Irara Tavireva Oiso, Vuri Vori Outaverea*

*(Luk 11:47-51)*

<sup>29</sup> “Visii tarai irara Reo Taisi-ia ora visii Farisi riro kuuvu irara. Visiigoa vatatopo iraopata. Visiigoa tova uruiro oritopataveira vo uruiro uva voeao tovaiva torevoko irara ora profet irara. <sup>30</sup> Oire oiso purapataveira, Vosa voari rutu toupaiovori igei ao iraraaro vo vuutaaro-ia tuariri, oire ra viapau voea tavupaio profet irara upopaoro. <sup>31</sup> \* Uva eva reo oa purapatavoi ora visii iavirava oa-ia vaisipatavoi oiso, Igei ao iraraaro oea oisoa profet irara upopaive. <sup>32</sup> \* Visii vo pitupitu vao ovoii pie iraopata,

oa rovoiva visiipa aao irara oavisii voari tuariri. <sup>33</sup> Visii rakoru kare, ora rakoru kare ovii iraraaro. Apeisi-a oiso osa rugorugoopatai vao-ia reesia vore Vuri Tapi? Viapau visii ouverea, raa? Uva ovu rutu iare toritaverea?

<sup>34</sup> “Uva va-a eva oa vituaro iava voeao siposa aueparai visii vuvuvuruaro iare riro tarai irara profet irara, ora tisa irara. Oea iava oearovu upopataverea, vo rara kare uviropaave visii vuvuvuruaro iare. Ari oearovu tapapataverea evao parikouro-ia voea iava, ora oearovu ragipataverea Tugoropa Keparo sovara-ia. Ora voea tapo iava oearovu sigupataverea ouruirovu iava, ora voea tariopataverea ra avapaave ouruirovu iare. <sup>35</sup> ✧ Uva eisi-a osa iava vo visii-ia karekeperea oa puraiva visii aao iraraaro voeao-ia vo rasio-ia. Ari ita, torevokoto Ebel ira kopii pieiva rera upooro. Oire rera-ia rovoaepa oa iava Sekaraia-ia pou piropa vo pitupitu raga eera Berekaia oviitoaaro. Uva voea-a evoea oea upoiva Tempel iava vo tugi vuutaaro-ia ora eravao. Uva evoea-a oea-ia eva puraiva ovuria eva oa vorevira visii-ia kare piereverea Pauto. <sup>36</sup> Oiraopavira oiso visii tavipaavoivo iava oa puraiva voari tuariri oa voriaro vuriaro ouiverea voeao vo vokio iavapa irara.”

*Jisas Gaureva Jerusalem-iapa*  
(Luk 13:34-35)

<sup>37</sup> ✧ Oiso puraroepa, “Ae! Visii vao Jerusalem vata! Ae, visii Jerusalem vata! Visiigoa profet irara upopataveira voea vurutokopaoro aveke-ia. Pauto kovopa irara oaro oea sipo ragapareveira vokiara rutu-ia. Ari ita, visii kakae vure oaa guru ragapaaveira oiso osa kokootu aakova ovii irara rakupaaveira putaeuarei-ia, osa ragaire korukorupata ora visii-ia. <sup>38</sup> Oire oiso visii tavipaavoivo, Uruia oavisii vao kuvaupai rara. <sup>39</sup> ✧ Uvare oiraopavira visii tavipaa, Viapau oiso ragai keketavere vorevira vo rekasisa utupaua, vo vuuta-a eva uva oiso purataverea, Pauto viraakoa vateri ropa ira urioroi Turaro vaisiario-ia.”

## 24

*Jisas Tugoropa Kepare Reoroepa Oiso Ra Opsi Ovoipe*  
(Mak 13:1-2; Luk 21:5-6)

<sup>1</sup> Uva kosiro viropa vova Rovopa Kepa-ia Tempel osa disaipel rerare ravaaepa, vo osa voava urioparoepa. Oa iava Tugoropa Keparore rerare oiso puraepa, “Auoro, vo keparo kekeri Tugoropara.” <sup>2</sup> ✧ Oa iava Jisas voeare oiso puraroepa, “Iu! Oara kekepata evara reipa keparo. Uva oiraopavira rutu oiso visii tavipaavoivo, Viapau iriai aveke vai eakave iriai ivara-ia aveke vai osa toupave. Oara evara kururu piroverea koveoro.”

*Jisas Voea Tavireva Aue Iava Riroa Tavaka*  
(Mak 13:3-13; Luk 21:7-19)

<sup>3</sup> Uva vo tou-ia vao-ia pauroepa vo pukuia-ia Oliv Kovo-ia. Oa iava vora rera iare urioaepa disaipel. Uva vora rera eripaiva rera akepaoro oiso, “Igei taviri oiso, Aa vo vuutao-a vao oa-ia evara karekeperea? Uva eake vai-a vao oa iava vo vuuta eveiioverea oiso, Vao vii vo vokiario vao oa-ia kareuveira, ari vao ovoioapa vuuta?”

<sup>4</sup> ✧ Oa iava Jisas voeare oiso puraroepa, “Visii ora vatatopo iraozata, teapi irai visii kearevere. <sup>5</sup> Riro irara uriopaaverea ragai vaisiario raga-ia ora vaisiario, ra oiso purapaave, Ragai raga-a vao Krai. Uva riro

✧ 23:35: Jen 4:8; Sek 1:1 ✧ 23:37: 2 Kro 24:21 ✧ 23:39: Sam 118:26; Mt 21:9 ✧ 24:2: Jo 2:19 ✧ 24:4: Jer 29:8; 2 Te 2:3

irara rutu oirara ora riakora keakeapaiverea. <sup>6</sup> Uva oiso upoa gurukoaro uvutaverea, ora va iava siposipo ovusa uvavu toupave. Ra opeifa rirovira rugorugoopata ora sitapaoro vo osa va vao kosi piro. Aue iava uvare va-a eva oa kareke rovoperea, ra vovio vo utupaua ovoioipa voki karekeperea rara. <sup>7</sup> ✧ Oiso-ia oearovu oirara upoa kosi piepaiverea oearovu-ia oirara, ovusa osararovu osararovuva ora upoaverea. Ovusa ogoe vuutaro kosi piroverea voraro rutu ora ravurikeara. <sup>8</sup> Uva varao oiso rutu toupaveira osa riakova oisoa kakaetoava upia rovopao rera kavausa.

<sup>9</sup> *“Vo vuuta-a vao-ia oa-ia visii oupaiverea visii vao kovopa irara oaro Pauto vatepasa upia ora kasipua visii upopaoro tapo. Uva osararovu rutu iava oiso visii vuri vovoupaaverea rutu. Eake iava? Uvare vaisia oaa visii-ia toupai.* <sup>10</sup> Uva vo vuuta-a vao oa-ia oearovu voea varaarore ovauaverea oirao pie vovouro. Ra araoko irara oaive iava gasipaive keripa irarapa ora voeare kasipupaoro rutu. <sup>11</sup> Riro irara rutu tapo profet irara oea karekeaverea oirara rutu keakeasa. <sup>12</sup> Oiso-ia vuri pitupituro rutu karekeperea riro irara-ia. Oa iava ora voeapa siraopa vovouro oaive kavuiverea. <sup>13</sup> ✧ Ari vosa ro ira viapau raveraveparo vo tugurasa ovoioipa vuuta iava vo voki-ia, uva rera-a eera ira ourevere Pauto ora rera iare. <sup>14</sup> ✧ Ari ita, oearovu Vearo Siposipo kosi piepaivere Pauto vo Saraaro iava siposipopaoro voraro rutu rasitoo rutu-ia. Ra va iava oirara rutu vo siposipo-ia taraipaave vao-ia. Oa isivaaro-ia karekeperea vao-ia ovoioipa voki.

*Vuri Siitoka Rutu Karekeperea  
(Mak 13:14-23; Luk 21:20-24)*

<sup>15</sup> ✧ *“Oire uva va-a vao riroa rutu vuria oa keketaverea. Eva-a oa vituaro iava vo reo purareva Daniel tuariri voa toupaooro vo Tugoropa Tapi. [Ari ita, ro ira vo reo vieireve vao-ia, oire ra vearovira vare rugoopaoro.]* <sup>16</sup> Uva vo vuuta-a vao-ia oa-ia oirara rutu Judia-ia touivere, ra uriripaoro voava tori iraoive pukuia iare. <sup>17</sup> Ari vosa ro ira kepa ivara-ia kiuvu oupaoro uvuruparoverea, ra viapau oiso voava rerereve auero rutu gurusa varao rera varaaro. <sup>18</sup> Ari vosa ro ira varuparo tourevere, oire ra viapau oiso voava ora porero kuvuparare rugooro varao rera varaaro. <sup>19</sup> Siraovira rutu vairoviopa taruko riako, ora vairo airoa sikeo kakaero roro piepaiverea vo voki-ia vao. <sup>20</sup> Variripatavere tuepaoro. Teapi torita vo kiuvupa vuuta eke vao-ia Tugoropa Voki ra Reo Taisi oaro Pauto gasita vokaoro Tugoropa Voki iava vo reo. <sup>21</sup> ✧ Aue iava uvare vo vuuta-ia eva riroa rutu toupaveira tavaka. Uva viapau oiso oai va-ia putepai vao iava oa pura piropa voari tuariri oa vao vo voki-ia tugurapai. Va rutu vao isivaaro iava viapau oiso otavakai perea voari rutu utupaua oiso osa va vao-ia. <sup>22</sup> ✧ Ari vosa Pauto viapau vo vuuta vao poteku piepareve, ra oirara rutu opesiave. Ari ita, voeao ragare rugooro vo vuuta poteku pierevere oea reesireva ora rerapa.

<sup>23</sup> *“Vo vuuta-ia vao oire vosa irai visii tavipareve oiso, Kraisa ro vo-ia ira keketa. Eke oiso puraro, Varo vavo-ia, oire ra viapau rera vo rearo oirao piepata.* <sup>24</sup> ✧ Ora oearovu keakea irara kraisa irara ora oearovu profet irara oearoa rutu toreaverea karekeoro riropara rutu purapaoro ravotoara. Ora oaravu pisipisa kovoro oara tapo ravovira puraiverea. Ari ita, vosa uvuipaave, oire ra oirara rutu ivuive ora voea iare voeao oea reesireva Pauto ora rerapa. <sup>25</sup> Uvuta! Vao iava visii vosiavoivaava, ra uutupata.

<sup>26</sup> “Eisi vosa visii tavipaive, Rera keketa varo ira vavo toupare kuvau tapi. Oire ra viapau voea vo reoaro uvupaoro voare avapata. Ora vosa oiso visii tavipaive, Ro-ia kepa sovara-ia ira vataupa. Oire ra viapau oiso voea vo reoroaro oirao piepata. <sup>27</sup> Taraipataveira varakeotoa-ia ira parakaupaoro voraro rutu aviavipareveira vuvuiua-ia. Eisi osa parakauro voreraverea Oirato Oviitoaaro Ro Ropoto vo oirara rutu oisireiario-ia.

<sup>28</sup> “Uva osa-a eisi osa vatau asavira ruela kare ora gurupaaveira eru karero aiopasa.

*Utupaua Oirato Oviitoaaro Urioroverea*  
(Mak 13:24-27; Luk 21:25-28)

<sup>29</sup> ✧ “Vo osa vo voki vao tavakapa voki isivaaro iava ravireo ruparoverea, ora kekira tapo oiso viapau rororeverea. Aaviikoara kovekoveperea vova vuvuiua iava. Orekerovu rutu goruara vova vuvuiua ravurikeperea. <sup>30</sup> ✧ Uva vo vuuta-a vao oa-ia ragai vo reesiario vuvuiua-ia karekeperea. Oire uva oirara rutu vo rasio-ia va kekeoro gauivera, vo rara ragai Oirato Oviitoaaro tueivera ovusa rukuta sovara-ia uriora riroa rutuva gorua ora keraria ragai vaaro. <sup>31</sup> ✧ Oire utaveoro varapaaverea vo rara ragai voeaaro aruave enselpa irara, ra voea guruive voeao oea ropoava voraro rutuva vo rasito rekasiario-ia.

*Fik Ova Oa Aue Reesipaiveira Vuuta Vao Rovirieipa Pitupitu Iava*  
(Mak 13:28-31; Luk 21:29-33)

<sup>32</sup> “Visii uvuipatai ra vao-ia fik ova tarai oupata vo rara airepa guruvaro kosi pieve. Oire ra va iava oiso taraita, Uukoa toupai vai-ia, oa iava poretevera toupaivoi. Ra va iava oisi ragavira taraipata raipipa vuuta tutuu piepai oa-ia ravireo rororovere. <sup>33</sup> ✧ Eisi ragavira ita osa iava uvuipatai ra ragai iava taraipata oiso, Reraei ira ratao riaaro-ia ora tovoroi koatasa. <sup>34</sup> Oiraopavira rutu visii tavi irapaavo oiso, Oirara rutu voeao vo vuuta-ia eva viapau oiso voea rutu kopiiaverea vosa vara rutu evara kareke rovporepa. <sup>35</sup> ✧ Oire oiso-ia vuvuiua opesiperea ora rasito. Ari ragai vo reoaro viapau rutu oiso opesiperea.

*Viapau Irai Taraipa Vuuta-ia Ora Vo Vokio Oa-ia Voreroverea*  
(Mak 13:32-37; Luk 17:26-30, 34-36)

<sup>36</sup> “Uva viapau irai taraiparoi vo voki-ia ora vo vuuta-ia, ora purapurapa irara voeao ensel oaro tapo voeao vo vuvuiua oea viapau taraipai, ora Oviitoaaro tapo viapau taraipa. Ari Aitetoa raga taraipa Pauto. <sup>37</sup> ✧ Vo pitupituro oara puraiva vo Noa vo vuutaaro-ia osa raga eisi osa ita pieivera vo vuuta-oa-ia voreraverea Oirato Oviitoaaro Ro Ropoto. <sup>38</sup> Voari tuariri uva rirova pirutuva kareke asavira toueva ovusa vo vuuta-ia vearovira aiopaiva, ora vearovira ukaiopaepa osa oearovu vo vuuta-ia vearopavira raga riako oupaaepa. Oire vo tugurasa urioaepa oisi raga piepaoro uva Noa uvuoa sovara-ia koataroepa, va vaisiario, aka. <sup>39</sup> Ari ita, viapau oiso oisi rugoopaaepa. Oa iava akukuvira raga toupai va osa rirova pirutuva urioopa voea rutu oirara ora riakora turosa. Uva oisi raga ita-a eisi osa pieivera vosa Oirato Oviitoaaro vorero vo uva viapau rera vearore rugorugooaave. <sup>40</sup> Ari vo osa aiterei toupasivera vapurapo vai. Oire uva vaiiterei iava iravu oureverea Pauto iravu arova voa raga. <sup>41</sup> Ari vo osa airei riakorirei vai plaua purapaeverea auere bret, osa Pauto vaierei iava iriavu oureve iriavu arova voa raga. <sup>42</sup> Uva eisi osa iava vearovira rutu uutupata.

✧ 24:29: Ais 13:10; Esi 32:7 ✧ 24:30: Dan 7:13 ✧ 24:31: Sek 9:14 ✧ 24:33: Je 5:9 ✧ 24:35: Mt 5:18 ✧ 24:37: Jen 6:5, 7:6-23

Viapau oiso taraipataveira vo vokio-ia oa-ia Turaro oavisii voreroverea. <sup>43</sup> ✨ Vare vao rugoo irapata. Oire rovovira rutu ro ira vo kepaaro-a kepa oiso rugorugoo, Esa vokiario vai urio viarovere kavirupato, ra uutuparo. Ra viapau oiso rera eaka ragapareve ovusa rera vo kepaaro tatepareve koatasa. <sup>44</sup> ✨ Uva visii tapo vao-ia vatatopata tuevira vokiara rutu-ia vaore rugoo paoro oa-ia Oirato Oviitoaaro voreroverea. Vo ovuutai-ia viapau oiso ra oiso rugoopata, *Uriorovere rara. Oire uva vo vuuta-a vao oa-ia oirara rutu rerapa vovou vakuvakuvira touivere oiso purapaoro, Viapau oiso vo vokio uriorovere. Ovoki-a eva oa-ia voea sita piereverea.*

*Vo Toupai Oiratoarei Iava Kovopatoarei Oiso Iravu-a Vearoto, Ari Iravu-a Vurito*

(Luk 12:42-46)

<sup>45</sup> ✨ “Oire irouto-a ro kovopato ira oisoa toupave, Eera vearo rugorugooto ora vearo kovo purapato. Oare rera tovoreva reito ro rera reraaro oearovu-ia kovopa irara vuravurapasa voea tokipaoro ora aio vatepasa vo ora rera vo vuutaroaro-ia. <sup>46</sup> ✨ Oire utupaua reitoa ro voreroverea, ra rera kekereve ro kovopato ovusa vo kovo purapareve oiso osa vare rera tavireva, ra va-ia rera ro kovopato rorureve. <sup>47</sup> ✨ Uva oiraopavira rutu visii tavipaavo oiso, Auero rutu rera varaaro tokipasa rera tovoreva kovopato. <sup>48</sup> ✨ Ari vo osa ro kovopato vurito ora rera raga ora kepaoro oiso purapaoro, Ragai reraaro reito viapau vuupu ra ikauvira urioro. <sup>49</sup> ✨ Oire rovoro ora rera voeaaro upoaporo kovopa irara aue raga purapaoro ukaio ora aue tapo aio oearovu tapo oirara. <sup>50</sup> ✨ Oire rera ro vurito kovopato reraaro reito voreroverea vo vokio-ia ovokia-ia viapau oiso rerare tuero. Viapau oiso rrare tueroverea viapau rera-ia taraipaoro osa urioro. <sup>51</sup> ✨ Ra kovopato oaro vurivira rutu uporeve rera ragipaoro. Ra voava rera tovoreve voea ruvara-ia riro kuvu irara. Ra voea rutu voa ora reuri oaive kuripaive ora voeapa siraopaoro evoa opesipa tapi.

## 25

*Reo Ruu Vao Katai Tau (10) Iava Tavauru Riako*

<sup>1</sup> ✨ “Vo vuuta-a eva oa-ia Pauto vo Saraaro iava oiso karekeperea osa vairoo tavauru riako katai tau (10) rutu. Airoa vuravuara oaive ouoro avaaepa rova aivarosa ira reesiiva oiso ra riakova oureve. <sup>2</sup> ✨ Uva ovavaevu-a vaaruu vovou riako vairo raga iava, ari ovavaevu-a vearo rugorugoo riako. <sup>3</sup> ✨ Oire uva vairoo vaaruu vovou riako vuravuara ragava avaaepa osa viapau aue kerasina vai vara iare auere vosa vara iava ita opesipe, ra ovuva ita oarai tovoive vara-ia? <sup>4</sup> ✨ Ovusa vairoo vearo rugoo riako kersin oviro tapo ora vairo varaaro kaeiva vuravuara. <sup>5</sup> ✨ Uva rera ro riako oupato viapau urioroepa ikauvira. Oa iava ruraiva. Uva va iava uusiaepa.

<sup>6</sup> ✨ “Uva vo voki vuuta-ia oavu keera urioepa vairore oiso purasa, Rera ro riako oupato ira urioro. Avata rerare korotosa. Ra rerava aivarooro rerava uriota! <sup>7</sup> ✨ Oire va iava vuravuara vatatopopaiva. <sup>8</sup> ✨ Uva vairoo vaaruu vovou riako oiso puraepa vairore vearo rugorugoo riako, Ae, igeipa kerasinara vai vateta. Ari igei varaaro iava opesiei. <sup>9</sup> ✨ Oa iava vairoo vearo rugorugoo riako vo riako aatooro oiso puraepa, Viapau varao kersinara vigei rutuva uvuipai. Oara igei raga varaarova uvuipai. Ari avata evoraro voripa kepa vai-ia oarai vorisa. <sup>10</sup> ✨ ✨ Uva avaaepa kersin vorisa ovusa riako oupato

urioroepa. Osa vairo airoa vatatopoaepa airoa raga rera tapo koataaepa kepa-ia rera tapo pausa riroa-ia aioa vao ora oupa aio. Uva rataoa voea ururao tupa piropa.

11 ✧ *“Oire uva utuaepa vairo airoa uutupaaepa. Oa iava voa pou virooro oiso puraapea, Turaro, turaro, igeivire karuri!* 12 *Oa iava vairo vo keeraaro uvuoro vairore oiso puraroepa, Oiraopavira rutu visii tavipaavoi, viapau taraiparai visii-ia.”* 13 ✧ *Uva reo ruu opesioro oiso puraroepa Jisas ora rera iava, “Eisi osa toupai oiso, Vearovira rutu uutupata. Viapau taraipatai vuuta-ia ora voki-a vao oa-ia urioroverea Oirato Oviitoaaro.*

*Reo Ruu Kovopa Irara Iava Voeao Oea Moni Ruuro Ouiva  
(Luk 19:11-27)*

14 *“Vao Pauto vo Saraaro oa oiso rutu toupaveira osa ro iravu oirato ira uvavu vokasa aueparoepa. Oa iava rera voeaarore keeraoepa kovopa irara voea vavaearo-ia varao tovosa rera varaaro, oiso ra vara purapaive vara tokipaoro.* 15 *Oire vo voki-a vao oa-ia voea vo pitupituarove rugorugoo rovoroepa ora voea varaaro tapo goruara voea kovopa irara katakataivira. Oa iava monia roo piereva voeapa oiso, iravu vatereva vo vavae tuku kina (K5,000), ari iravu vatereva erao tuku kina (K2,000), ari iravu vatereva katai tuku kina (K1,000). Uva oiso va puraoro voeapa avaroepa vokasa.* 16 *Uva avaroepa osa rera isivaaro iava ro ira vo vavae tuku kina oureva, ira va-ia eva oavu sara kovo purareva. Oa iava oavu ita kareke piereva oisi va-ia kovooro pute piea vo vavae tuku.* 17 *Ari ro ira erao tuku kina oureva ira va-ia eva oavu sara kovo purareva. Oa iava oavu ita kareke piereva oisi va-ia kovooro pute piea erao tuku.* 18 *Ovusa ro ira katai tuku kina oureva, oa iava vare rikui tekareva va tovasa rasiuaaro. Uva voo-a vo uva rera reraaro reito vo moniaro vataureva.*

19 *“Oire uva riro kaekae vuuta rutu puteva. Oa iava va isivaaro iava reito oaive voea iare kovopa irara urioroepa vorevira. Uva oiso rugoopaeroepa ra voea tapo reoa torevokoreve varao iava moniara oara-ia voea pitupitu piereva.* 20 *Uva ro ira vo vavae tuku kina oureva, oa iava oavu ita karekereva vo vavae tuku kina va sipooro. Uva oiso puraroepa, Reito, ragai vaterivora vo vavae tuku kina (K5,000). Va kekeri vao-ia oa-ia sara kovo puraavora. Uva oavu ita ouvora vo vavae tuku kina pute piea.* 21 *Oa iava rera ro reito oaro oiso rerare puraroepa, Vii vearoto-a rutu kovopato. Viigoa vearoa purarivorao ora vearovira kovoa tokirivorao. Oire varavi tapo gareparavi kasivarivira tokipariveira, uva eisi osa iava vii tovopaa riropaara rutu orekerovu tokipasa. Uriou ra roruri ragai tapo.*

22 *“Ari ro ira erao tuku kina (K2,000) oureva, ira tapo urioroepa. Oa iava oiso puraroepa, Reito, ragai vaterivora erao tuku kina. Va kekeri vao-ia oa-ia sara kovo puraavora. Uva oavu ita ouvora erao tuku kina pute piea.* 23 *Oa iava reito oiso rera tavireva, Vearoto ita vii kovopato. Viigoa vearoa purarivorao ora vearovira kovoa tokirivorao. Oire varavi tapo gareparavi kasivarivira tokipariveira, uva eisi osa iava vii tovopaa riropaara rutu orekerovu tokipasa. Uriou ra roruri ragai tapo.*

24 ✧ *“Uva ro tapo urioroepa ira katai tuku kina (K1,000) oureva. Ira oiso puraroepa, Reito, vii-ia taraiparai riro kasivarito vii, viigoa vo kovoro tatepariveira oara viapau oiso paupariveira. Ora varao tapo oara vikipaveira oearovu vara paupaoro kukaraara vo rasio-ia. Oire uva vara*

*tapo ou ragapariveira.* <sup>25</sup> Uva eisi osa iava uririraepa. Oa iava vao vatauava katai tuku kina vo rasito. Va kekeri vao-ia vii vaaro!

<sup>26</sup> *“Uva reito oaro rerare oiso puraroepa, Vurito-a rutu vii kovopato riro reasito. Uva pasi taraipauveira ragai-ia oiso, Ragai vo kovoro tatepaaveira oara viapau oiso paupaaveira. Ora vao tapo oara vikipaiveira oearovu vara paupaoro kukaraara. Uva evara tapo ou ragapaaveira?”* <sup>27</sup> Uva eakepa ragai vaaro monia tovo asariva beng-ia? Oa iava vao va iava pute piea tapo ouavori? <sup>28</sup> Oire rera ruvara iava va outa ro vatesa ira vo vavae tuku kina-ia (K5,000) pitupareva. <sup>29</sup> Eake iava? *Uvare oirara rutu vao raga-ia pitupai uva oavu ita vatepaa voepa tauvavuvira pute piea. Ari ita, vosa iravu viapau orekerovu-ia pitupareve, oire gareavi raga-ia pitupareve eva o-ia rera itoavere rera ruvara iava.* <sup>30</sup> ✧ Uva oiso voea tavireva rerare vurito kovopato, Rera siguta evoare rupa-ia. Ra vao toupaooro ora rera raga iava reuriara kuripareve ora rerapa siraopaoro.

### *Oirato Oviitoaaro Oirara Rutu Rovirieireverea Utupaua*

<sup>31</sup> *“Utupaua turarovira urioraverea aueva keraria voea tapo enselpa irara. Uva va iava paupa-ia uvuraverea vao king paupaaro.* <sup>32</sup> ✧ Oirara rutu vova rasito ragai ruvara-ia ora guruaverea, ra voava voea rovirieiaverea oiso osa sipsip ragui ora meme ragui toupaveira oiso, sipsip ragui uvavu, meme ragui uvavu. <sup>33</sup> Eisi osa voeao sipsip ragui tovoaverea vo ora ragai vaaro-ia oirapapa varata, ovusa meme ragui oisova tovoave koike varata-ia. <sup>34</sup> ✧ Oa iava voea-a voeao oirara oea toupai oirapapa varata-ia oea taviaverea oiso, Visii viraakoreva Aite oaa. Visiigoa uriota ra va outa Sara oa puraava visiipa voari rutu rasito rovoaro-ia. <sup>35</sup> ✧ Eake iava? Uvare vo tuariri oisova ogoevira toupaa osa ragai aio vatepata. Ora vosa uuko regapara, ra ragai vatepata uukoara. Ragai ita vao ouruivu raga iava taveteto ragoare oisova keerapata vorarore ora visii vo keparoaro-ia. <sup>36</sup> Vosa tapo oisova varo apotapara, ra ragai vatepata varoara. Ora vosa tapo oisova upiapara, ra ragai ruvarupata. Ora vosa tapo oisova tuukea-ia toupaa, osa vao ragai kekepasa uriopata.

<sup>37</sup> *“Uva oisi-a eisi osa iava voeao torevoko irara ragai aatooro oiso puraaverea, Turaro. Aa vo vokio vii kekeiovora osa ogoepauera uva vii vateiovora aioara? Ora aa vo vokio uuko regapauera oa iava vii vateiovora aue uuko?”* <sup>38</sup> Ari aa vo vokio-ia vii kekeoro oiso puraiera, Uriou, vii-a taveteto ouruivu raga iava vore igei vo kepaaro? *Ora aa vo vokio-ia apotapauera auepa varo oa iava viipa vaaro vateiera?* <sup>39</sup> Ari aa vo vokio-ia vii kekeiovora osa upiapauera, ora tuukea-ia toupavira, uva aaviopavira vii kekesa urioiera?

<sup>40</sup> ✧ *“Uva oiso voeare puraverea, Ragai visii tavipaavoio oiraopavira oiso, Varao oara oisova purapata ro-ia akaipato ragai araoko iraraoro iava rera, uva ragai-ia ita rera ragoa-ia vara puratavora.*

<sup>41</sup> *“Oa iava voeao taviaverea oea koike varata-ia toupai oiso, Opesi irara visii. Visiigoa ragai kavupata tuitui kasi iare avaro vao oa viapau opesipape. Okasia tovoreva Aite auepa Seten ora voeao purapurapa irara ensel Seten voeaoro.* <sup>42</sup> Eake iava? Vosa oisova ogoevira toupaa, osa viapau ragai vatepata aioara vai voari tuariri. Ora vosa oisova uuko regapara tapo, uva viapau oisova ragai ukaio piepata. <sup>43</sup> Ari ita, ragai-a taveteto ouruivu raga iava, uva viapau oisova ragaire keerapata vorarore ora visii vo keparoaro iare. Ora vosa oisova varo apotapara, osa viapau ragai vatepata varoara vai.

Ora vosa oisoa upiapara, ora vosa oisoa tuukea-ia toupaa, osa viapau ragai kekepasa uriopata.

<sup>44</sup> “Uva eisi osa iava voea tapo ragai vo rearo pukopaiverea oiso purapaoro, Turaro. Aa vo vokio-ia vii keke ragapaiovora osa ogoevira tavetivora, ora vosa uuko regapauera, ora vosa ouruivu raga iava vii-a taveteto, ora vosa varo apotapauera, ora vosa upiapauera, ora vosa tuukea-ia toupavivora osa voa viapau vii tavvapaiovora?”

<sup>45</sup> “Uva voea aatoaverea oiso puraoro, Oiraopavira visii tavi iraopaavo, Ari ita, varao oara oisoa viapau purapata ropa akaipatoavi voeao iava ragai araoko irara oaro rera, oire uva ragai-a ita rera ragoapa oisoa reasipata oisi vara purapa arapa. <sup>46</sup> Uva eisi osa ragavira iava voeao oirara vuria oaive voriaro ouiverea aue-ia upia ora siitoka ora voeapa vokiara rutu-ia. Osa voeao torevoko irara Tootoo Ovoi ouive vao oa viapau opesipape.”

## 26

### *Turaro Irara Reipa Irara Reo Goru Puraiva Jisas Uposa* (Mak 14:1-2; Luk 22:1-2; Jon 11:45-53)

<sup>1</sup> Oire uva Jisas rera vo siposiporoaro opesi piereva. Oa iava rera voearo disaipel tavireva oiso, <sup>2</sup> ✨ “Visii taraipatai oiso ragavira vo vokirei isivaaro iava Tagausapa Vurei Pasova pura pirovere, ra ragai kosi pieivere ragai vuri piesa evao parikou-ia.”

<sup>3</sup> Uva vo voki raga-ia Rovopato Pristo tauo purapato vo kepaaro-ia ora guruaepa Kaiafas voearei rutu pris irara ora reipa irara vova Isrel. <sup>4</sup> Uva oiso ragavira Jisas-re reo goru puraiva ra rera tuve pieive. Oire ra voava kaviruvira rera rauive, ra rera kopii pieive. <sup>5</sup> ✨ Uva oiso puraepa ora voea ragare, “Avoeao, asi viapau uvuipaviei ra vao purape vao-ia vo vokio-ia oa-ia riroa aioa purapapi. Teapi oirara rutu ora sitaoro upoa vai kosi pieive.”

### *Riakova Riro Geesia Ovi Sanda Ovi Petoeva Jisas Kukuearo-ia* (Mak 14:3-9; Jon 12:1-8)

<sup>6</sup> ✨ Jisas Betani-ia toureva leprapato vo kepaaro-ia Saimon. <sup>7</sup> Uva iriavu riakova urioopa aueva korovo ovi sanda aue-ia popotepa tou veoroa Alabasta, oiso osa aveke. Uva vo ovi kokoeva Jisas kukuearo-ia rera rei pieoro osa tebol-ia pauparoepa. <sup>8</sup> Oa iava oearovu disaipel irara va tueoro oiso ora reopaaepa, “Avoeao, uva apeisi o vao pire ragapae korovo ovi? <sup>9</sup> Ari ita, vosa oira vateeri iraiapa, oire va iava oira-ia riroa vai voria vai vaterere vigeipa irai. Oire ra oai vatepe voeopa apota irara.”

<sup>10</sup> Oa iava Jisas voea vo vovouaro-ia tarai ovoiroepa. Oa iava oiso puraroepa voeare, “Eakere o vovouaro vavata pie ragapata? Iria vearo pitupitu purae ragai-ia! <sup>11</sup> ✨ Easi apota irara visii tapo toupavivora vokiara rutu-ia. Ari ragai viapau oiso visii tapo toupavivora. <sup>12</sup> Ari o riakova iria o petoe sanda ragai varaaro-ia tova iare, oa puraevoi ragai-ia ravaavira. <sup>13</sup> Oiraopavira visii tavipaavo oiso, Vo uvarovu rutu ora Vearo Siposipo kosi piepaiverea rasitao rutu-ia, ra va-ia vao tapo ora reopaaeve vare rugoopaoro oa puraevoi o-ia riakova ragai-ia.”

### *Judas Reo Ovoi Purareva Jisas Iava Vearo Vaisi Puraoro Turaro Irarapa* (Mak 14:10-11; Luk 22:3-6)

<sup>14</sup> Vo vuuta-a vao oa iava vo vokia avaroepa iravu voea iava katai tau erao (12) disaipel. Rera vaisiario, Judas Iskariot. Ira avaroepa reipa irara



iare pris <sup>15</sup> \* oiso purasa, “Eake vai vate ruipapatai ragaipa, ra visii riarā iare rera karekea?” Oire uva va iava rera vateiva vo peva tau (30) aue silva moniro. <sup>16</sup> Uva voava rovoroepea rerare raiva taraapaoro oiso, Aa vo voki avuo-ia Jisas kosi piepaa voea vaveaaro iare?

*Jisas Ovapa Aio-ia Vao Tagausapa Vurei Pasova Disaipel Tapo Aioreva*  
(Mak 14:12-21; Luk 22:7-14, 21-23; Jon 13:21-30)

<sup>17</sup> Uva vo rovo vokiaro-ia Yis Asa Aio aue bret oa-ia disaipel urioaepa Jisas akesa, “Ovu-ia viipa ravaavira aioa vai puraiovere aue Pasova Vurei vai?” <sup>18</sup> Oa iava oiso voea tavireva, “Kareta viro evoare Jerusalem urui sovā-ia irai iare. Ra oiso irai tavita, Tisato oiso puraroi, Ragai vo vuutaaro tutuu pievoi. Uva Pasova Vurei aiosa ruipaparai voea tapo disaipel vo vii vo kepaaro-ia.” <sup>19</sup> \* Oire voea disaipel oisi va puraiva oiso osa voea tavireva Jisas-pa va ravaaoro Pasova Vurei.

<sup>20</sup> Oa iava ovaiarovi tebol-ia pauroepa voea tapo katai tau erao (12) disaipel rera voeaaro. <sup>21</sup> Uva aiopaiva ovusa oiso puraroepa, “Oiraopavira visii tavipaa, Iravu visii iava ira ragai kosi pieparevoi rara.” <sup>22</sup> Oa iava vovouisiro rutu vavataepa voeare siraooro. Uva voava rovoaepa rera-ia ora veraoro rera akeoro oiso, “Turaro, esa ragai-a?” <sup>23</sup> \* Uva voea aatoreva oiso, “Easi eera ira bretea rupe piere tapi rovu-ia va aiosa ragai tapo, ira-a eera ira ragai kosi pierevere. <sup>24</sup> Iu. Oirato Oviitoaaro avapa kopiia-ia oiso osa Tugoropa Vuku taviepa ragai iava. Ari ita, siravira rutu rerapa ro ira Oirato Oviitoaaro kosi pierevere. Vearopai vosa viapau aakova rera kavauevori?” <sup>25</sup> Uva Judas rera kosi piesoto ira rera akereva oiso, “Tisato. Esa ragai-a pasi?” Oa iava Jisas oiso puraroepa, “Iu ita, vii raga-a eva viigoa eisi purauei.”

*Vo Jisas Kovukovu Aio Komunion Vātereva Disaipelpa*  
(Mak 14:22-26; Luk 22:15-20; 1 Korin 11:23-25)

<sup>26</sup> \* Uva voa-a vo aiopaiva uva Jisas bret oureva va-ia vuurapa vaisi purasa Pautoa-ia. Oa iava va puteputereva voeapa disaipel va vatevatesa. Uva oiso puraroepa, “Va-a eva ragai varaaro oa ouri ra va aiori.” <sup>27</sup> Oa iava kap-ia wain karo oureva. Oa iava Pautoa-ia vuurapa vaisi purareva va-ia. Uva voava voea vateoro oiso puraroepa, “Ieta, visii rutu vao-ia ukaiota. <sup>28</sup> \* Eira revasiva oaa iria paruevere ragai iava osa kopiira oirara rutu iava vuriara veraoro Pauto vaaro Reo Ovoi oirao pieoro. <sup>29</sup> \* Ragai oiso visii tavipaa, Vo vuutao iava vo vokia vo utupāua uva viapau ukaioravere wain karova-ia. Ari ita, vo raga uva airepa karova-ia ukaioraverea utupāua visii tapo Aite vo Saraaro sovā-ia.”

<sup>30</sup> Oa iava iriavu-ia eraaepa erava. Uva voava kosia viropa Oliv Kovo Pukui iare avasa.

*Jisas Vo Pita-re Oiso Puraroepa, Ragaire Isivauvere Rara*  
(Mak 14:27-31; Luk 22:31-34; Jon 13:36-38)

<sup>31</sup> \* Oa iava Jisas oiso voeare puraroepa, “Visii rutu varaaro oirao pie vovouro vuripai ragaipa vo rupao-ia vo rara ragai arova torita. Ari ita, aue iava uvare Tugoropa Vuku oiso purapapeira, ‘Pauto sipsip ragui tokipato uporevere, ra rerare rorooro sikaa viro sipsip ragui.’ <sup>32</sup> \* Uva vorevira toreravere kopiia iava, ra va iava visiipa irara Galili iare.” <sup>33</sup> Oire Pita rerare

\* 26:15: Eks 21:32; Sek 11:12    \* 26:19: Diu 16:5-8    \* 26:23: Sam 41:9; Dan 9:26    \* 26:26: 1 Ko 10:16    \* 26:28: Eks 24:6-8    \* 26:29: Ap 10:41    \* 26:31: Jo 16:32; Sek 13:7    \* 26:32: Mt 28:7, 10

oiso puraroepa, “Ari ita, vosa voea rutu varaaro oirao pie vovouro vuripere viipa, eagara osa ragai vaaro oirao pie vovou viapau oiso ra vuripe!” <sup>34</sup> Oa iava Jisas Pita aatoreva oiso purapaoro, “Pita, oiraopavira vii tavipaa oiso, Vo vokiario vo osa kookai gau asavira tourevere ovusa vo peva purari ragai vaisiario taeapaoro.” <sup>35</sup> Uva Pita oiso puraroepa rerare, “Viapau rutu. Asi vii tapo kopiravere vo rara viapau vii vaisiario taeaa.” Oa iava voea rutu disaipel oisi aga puraaepa.

*Jisas Variriroepa Getsemani-ia*  
(Mak 14:32-42; Luk 22:39-46)

<sup>36</sup> Oire uva Jisas voea tapo avaroepa uvavure uva oiso vaisipaive oiso, Getsemani. Oa iava voeare disaipel oiso puraroepa, “Vovio toupatavora, osa vavoviore avara voa varirisa.” <sup>37</sup> Oa iava Pita vase oureva ora Sebedi oviitoareiaro. Uva voea tapo avaroepa. Oire uva rerare sopau rirovira rutu siraoepa. <sup>38</sup> ✧ Uva voa oiso voea tavireva, “Ragaire sopau rirovira rutu vavatae siraooro, osiraoa vao oiso rutu sovoa oa iava kopiirai vao-ia. Vo touta ragai tapo uutupaoro, ra ragai vo vavataaro sovota.” <sup>39</sup> ✧ Oire voava gare visivi avaooro kopukopua ivara-ia gerevira koveroepa. Oa iava voa variri ovoiroepa oiso puraoro, “Aite. Vosa ruipapau ra ragai iava o kap verari iria agasioi rutu aue iava siraoa vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>40</sup> Uva voreroepa Pita vase kekesa osa uusipaaepa. Oa iava oiso puraroepa Pita-re, “E viapau uvuipatai ra ragai tapo uututa katai vuutavi vai raga-ia, raa?” <sup>41</sup> ✧ Uutupaoro variripata. Teapi kokarapa vovou visii iare uriope visii kove piesa. Ari ita, vovouisiro oavisii ruipapai oiso ra ragai tapo touta, ovusa varauraro oavisii raga visii iava raveravepai.”

<sup>42</sup> Oire uva voreroepa ita erao pie vuuta-ia voare ita varirisa oiso, “Aite. Vosa o-ia kap viapau oiso uvuipauei ra oira verari ragai arova, iria-ia ukaioparai, uvare vii vo ruipaaro-a oa purasa-a.” <sup>43</sup> Oa iava voreroepa ita voea iare osa uusipaaepa, uvare voeare rurapaiva osireiara. <sup>44</sup> Uva voava voea arova voreroepa ita vo peva pie vuuta-ia varirisa oiso raga osa variri rovoreroepa rovvovira.

<sup>45</sup> Oa iava voava voea iare urioroepa disaipel. Uva voeare oiso puraroepa, “E tovovira uusipatai reareapaoro? Oire uvuta! Vuuta vao tugurarei oa-ia Oirato Oviitoaaro kosi piepai vo vuri vovou irara vavaeoro iare.” <sup>46</sup> Toreta ra avavio. Rera keketa! Ro-ia ira ragai kosi pierevoi. Ira-a ro ira urioroi.”

*Judas Jisas Kosi Piereva Keripa Irara Vavaeoro Iare*  
(Mak 14:43-50; Luk 22:47-53; Jon 18:3-12)

<sup>47</sup> Oire uva vo Jisas tovovira reoreoparoepa, ovusa Judas pouro virope voea iava rera voeao katai tau erao (12). Ira riro irara tuvetuveoro urioroepa oea toorioara kaepaoro urioaepa ora aue kakuara voeao oea aruiva pris irara voearei rutu ora reipa irara vova Isrel. <sup>48</sup> Uva rera ro ira rera kosi piereva voeapa ira oavu reesia tovoveva voeapa oiso puraoro, “Vosa rerava uugaaravere, oire ra rera-ia pitu ovoita.” <sup>49</sup> Uva voava ikavira urioroepa Jisas iare oiso puraoro, “Vearo rupa Tisato.” Uva rerava uugaa ovoiroepa. <sup>50</sup> Oa iava Jisas oiso puraroepa rerare, “Vatetoa oaa, vao oare uriovei oire va pura ovoiri ikavira!” Uva evo reo isivaaro iava tupe ovoiaepa rera rauoro Jisas.

51 Iravu ro ira Jisas tapo toupaveva ira toorio gororeva. Oa iava Rovopato Pristo kovopatoaaro uvareoaro pakoreva rera toeoro. 52 ✧ Oa iava Jisas rera tavioro oiso puraroepa, “*Toorio vore pieri eera rera vo tavukiaro-ia, uvare oirara rutu toorioara-ia ora upopai, oara-a evara voea upoverea voea varaaro vuria oaive kare pieoro.*” 53 ✧ Easi pasi vii viapau taraipauvei oiso osa ragai uvuiparai vosa oisi oai purasa ruipapara, oire ra Aite area, ra va iava ragai vatereve riro tuku (tausen) vai rutu aue enselpa irara vai ragai-ia tuesa. 54 ✧ Ari vosa oisi oai purasa auepara, ra apeisi ragavira Pauto vo reoaro oiraopavira karekepe, vo reo oa oiso puraepa, Oiso ragavira oiso pieri?”

55 Uva vo vuuta-a vao oa-ia voeare oiso puraroepa Jisas, “*E ragai ousa uriotai evarava toorioara ora evara ragi vurukoro? Ari ita, oisopai rutu visiipa, Kavirupato ira tuukesa uriotai. Vokiara rutu-ia oirara rutu oisoo siposipopaa Tugoropa Keparo-ia osa eakepa vao ragai rau asapata?*” 56 Ari ita, profeta irara vo rigatoroaro ragai iava oirao piesa ragai-ia oara rutu varao kareke piepaa.” Oa iava disaipel rera arova tori ovoilva.

*Jisas Rovirieiiva Kaunsel Irara Osireiario-ia*  
(Mak 14:53-65; Luk 22:54-55, 63-71; Jon 18:13-14, 19-24)

57 Oire rera rauoro rerava avaaepa Rovopato vo kepaaro iare Pristo Kaiafas vo kepa, oa-ia voeao rutu toupaveva Reo Taisi-ia tarai irara ora reipa irara. 58 Uva evoa tauaiivi Pita rera sirova utuoro riro sitavi-ia kasura-ia rekasiroepa vao Rovopato Pristo vo kepaaro kasuraaro. Oa iava vao koataroepa pausa oevau ruvara iare polis irara. Aue iava uvare oiso ruipaparoepa ra vao kekereve oa purapai rera-ia Jisas.

59 Oire uva reipa irara pris ora Kaunsel irara oea rutu oiso ora reopaaepa, ra irai oiratoa vai reesiive. Ra irai rera iava Jisas kuuvuro kortua-ia vo kuuvu-ia. Ra oa iava rera upoive. 60 ✧ Oire uva va iava oearovu riro irara uriopaaepa. Oa iava oaravu-ia kuuvu reoro rera toga ragapaiva. Aue iava uvare viapau oiso oai vituaro oiraopavira kekepaiva, oisore ra oai iava rera kopii pieive. Uva va-a vao isivaaro iava aitereivu poui viropa 61 oreovuva rera iavirava vo reo oa purareva. Uva oiso purasiepa, “Easi ro oiso puraroepa, Ragai uvuiparai ra Pauto vo kepaaro Rovopa Kepa Tugoropa Kepa pakoa. Ra ita vorevira vo peva raga-ia voki vo kepa paua ita.”

62 Oire uva Rovopato Pristo toreoro Jisas-re oiso puraroepa, “E reasipauvei vo reo eva aato arapa, raa? Apeisi vo reo-a eva oa-ia vii togapaivoi?” 63 ✧ Osa viapau Jisas reoparoepa. Uva Rovopato Pristo rerare oiso puraroepa ita, “Ragai vii ake iraopaavoi Pauto vaisiarore ro Tootoopato, ra lgei tavi iraori oiso, E vii-a Kraisi Pauto Oviitoaaro, viigoa vigei Jiu-pa irara tuvetuvepasa uriouera, eke?”

64 ✧ Uva Jisas rera aatooro oiso puraroepa, “*Eisi osa purauei. Uva visii tavipaavoi oiso, Vo vuutao iava vo vokia vo utupaua uva ragai-a vao Oirato Oviitoaaro keketavereva, ovusa paupara vo oirapapa varata-ia vao Pauto, ro ira goruara rutuva toupaveveira. Uva rukuta sovara-ia tapo vorevira urioravereva vova vuvuiua-ia.*”

65 ✧ Oire uva oisi-a osa puraroiva Jisas, Rovopato Pristo ora rera iava kuvupato karikarioro kasipuroepa oiso puraoro, “Pauto toviparevoi! Uva viapau ita uvuipaviei ra oeaire keeravio rera vo reoaro rovirieisa. Ira ro

Pauto tovipare! Ari ita, rera uvutavoi ita! <sup>66</sup> Uva apeisi vai rugoopatai?" Oa iava oiso puraapea rerare, "Ira-a eera uvuipa ra kopiuro. Ira-ia vuria epao!"

<sup>67</sup> Oa iava rera kagavearo-ia ruipaaepa oearovu rera tapatapapaoro.

<sup>68</sup> Uva oiso rerare puraapea, "Vosa oiraopato-a vii profetato, oire igei taviri, Irouto vii tapare?"

*Pita Jisas Taareva Oiso Puraoro, Viapau Taraiparai Eera-ia  
(Mak 14:66-72; Luk 22:56-62; Jon 18:15-18, 25-27)*

<sup>69</sup> Uva Pita ratau pauparoepa kepa kasuraaro sovava-ia osa voa iriavu kovopava rera iare urioopa oiso purasa, "Vii tapo-a ita iravu viigoa oisoa Jisas tapo toupai ro vova Galili." <sup>70</sup> Oa iava Pita oiso puraroepa voea rutu osireiari-ia, "Easi viapau eva-ia taraiparai osa purapaei." <sup>71</sup> Oire uva Pita kosiro viropa rataoa riaro iare. Oa iava voa iriavu ita kovopava oiso puraopa rera kekeoro voeao tavioo oea voa toupai, "Easi iravu-a ro ira oisoa Jisas tapo toupave ro vova Nasaret." <sup>72</sup> Oa iava Pita taearoepa ita erao pievira oiso puraoro, "Oiraopavira rutu vavo oiso viara-ia, viapau taraiparai rera-ia eera." <sup>73</sup> Oa iava oearovu ita utupauavi toreoro ita oiso rerare puraapea, "Oiraopavira rutu. Easi iravu-a ita vii voea iava. Viigoa eveipaio reoa iava vii vaoro." <sup>74</sup> Oire uva ovoioa reo-ia oiso voeava kaureopaoro oiso puraroepa, "Avoeao! Oiraopavira rutu viapau rera-ia taraiparai eera. Vosa viapau oiraopa reo vai purapaavori, ra va iava Pauto ragai vuri piereve rutu." Oire oisi reoroiva, kookai gaureva. <sup>75</sup> ✧ Osa iava Pita vo reore rugooroepa vao oa-ia Jisas rerare oiso puraroepa, "Vo osa kookai gau asavira tourevere, ovusa vo peva purari ragai vaisiario taepaoro." Oa iava kosiro viropa Pita rirovira gaupasa.

## 27

*Jisas Sipoiva Pailat Iare  
(Mak 15:1; Luk 23:1-2; Jon 18:28-32)*

<sup>1</sup> Oire uva avia sikereva ovusa reipa irara pris ora turaro irara voeao vova Isrel ora reopaepa, oiso ra rera upoive Jisas. <sup>2</sup> ✧ Oa iava rera tuukeiva iroiro-ia reava avapaoro rovopatoa iare Pailat Rom gavman iava rera.

*Judas Kopiroepa  
(Aposel 1:18-19)*

<sup>3</sup> Oire uva rera ro Judas ira Jisas kosi piereva, ira rera-ia voea tuereva osa rera Jisas ivaoiva kopii-ia. Oa iava rerare vovouisi ora poreepa. Uva oiso vovouparoepa ra silva moni vo peva tau (30) vore piereve voeapa voeao reipa irara pris ora turaro irara. <sup>4</sup> Oa iava oiso puraroepa, "Ari ita, ragai vao ragoa vuria puraavo, uvare ro kosi pieavo oirato ira-ia viapau vuria vaiei. Ira ivaoivo kopii-ia." Oa iava oiso puraapea, "Viapau oiso igei vaoro-a. Vii raga vaoro-a vao vuria." <sup>5</sup> ✧ Uva va iava Judas monia vikireva Tempel sovava-ia. Uva voava voea arova avaroepa iroiro-ia ora kaasa.

<sup>6</sup> Oire uva voeao reipa irara pris irara vo moni vao silva ouoro oiso puraapea, "Oira upo voriaro vao-ia oa-ia viapau uvuipavei ra vao tapo va takuvupe Tugoropa Kepa-ia tou moni." <sup>7</sup> Oa iava vo moni-ia oreovu goruiva vao. Oa iava iravu vo rasiaro voriiiva katai vovou raga-ia, ira oisoa pitoka puraparo. Oire va iava vo rasi ouiva voeopa tauaipa irara, auere ra voea tovapaive voa. <sup>8</sup> Uva oiso vo rasi vaisiiva, Revasi Tova rasi. Oire uva touvira vo vaisiei toupai vo voki voa. <sup>9</sup> ✧ Eisi osa oreovu toupaveira Pauto

oreoa purareva profet Jeremaia gisipoaro-ia. Uva oisi-a eisi osa oiraopavira karekeepa vao-ia oa oiso purapai,  
 ‘Vao ouiverea vo peva tau (30) aue silva moni Isrel-pa irara oa reesiiva oiso ra ro voriiive oirato. <sup>10</sup> Ro vo rasiaro vorisa pitoka purapato. Eisi osa ragai tavireva Turaro.’

*Pailat Jisas Akepareva*

(Mak 15:2-5; Luk 23:3-5; Jon 18:33-38)

<sup>11</sup> Jisas tore pieiva reito gavman osireiario-ia. Oire uva rera-a eera rovopato gavman ira rera akepareva oiso, “E vii-a Jiu reraaro king, raa?” Uva Jisas oiso puraroepa, “Vii raga ita-a eva viigoa eisi purauei.” <sup>12</sup> ✧ Oa iava reipa irara pris ora turaro irara rera togapaiva oaravu-ia reoara. Osa viapau oarai pukopareva vo reoro iava. <sup>13</sup> Uva va iava Pailat rerare oiso puraroepa, “Easi pasi viapau vo reoro vaio rutu uvupari oara-ia vii togapai?” <sup>14</sup> ✧ Uva viapau rutu oiso Jisas oreoi aatoreva vo Pailat-pa oreoiaro. Uva va-a eva oa iava ro rovopato gavman tavetave iraopareva.

*Pailat Taviroepa Jisas Tapasa*

(Mak 15:6-15; Luk 23:13-15; Jon 18:39–19:16)

<sup>15</sup> Uva vo ivara rutu-ia uva oisoa ro rovopato gavman oiratoa vai kosi piepareve tuukepa kepa iava vo vokia vao oa-ia oisoa Tagausapa Vurei Pasova aiopaive, vo rara oirara rutu irai arepaive. <sup>16</sup> Uva vo voki-a vao oa-ia iravu oirato vuritoo rutu toupareva tuukepa kepa-ia rera vaisiario, Barabas. <sup>17</sup> Uva oirara rutu ora guruaepa. Oa iava Pailat oiso voea akereva, “Aa ropa ruipapatai ra visiipa rera kosi piea Barabas eke Jisas ro ira vaisipaiveira oiso, Krais?” <sup>18</sup> Ari ita, Pailat voeao-ia tarairoepa oiso osa oisoa rera riiriipaive. Oa-a eva oa iava rera kosi pievora kortua iare.

<sup>19</sup> ✧ Pailat paupa-ia pauparoepa vo kepa-ia oa-ia oisoa oirara rovirieipareve. Oire uva voea eva uva toureva ovusa vatuava rerare oavu tavia ava pieeva oiso puraoro, “Viapau oiso uvuipau ra orekevu avu vai purari eera-ia torevokoto. Vo vokiario ira kekeavo urusa-ia. Uva riroa rutu sovoavo vavata vo rera kekeoro.”

<sup>20</sup> Uva voea reipa irara pris ora voea turaro irara oeara oirara rutu vovouaro tore pieiva, oiso ra Pailat arepaoro oiso puraave, “Barabas eakaoro Jisas kopii pieri!” <sup>21</sup> Oire uva ro rovopato gavman oiso voea akereva ita, “Iroutoapa ruipapatai vaitereo iava, ra rera vorevira eakaa visiipa?” Oa iava oiso puraapea ita, “Ari Barabas!” <sup>22</sup> Oire uva oiso puraroepa Pailat, “Ari apeisi ro piepaavoi Jisas ira vaisipaiveira oiso, Krais?” Oa iava oiso puraapea raga pieoro, “Rera kotori evao parikou-ia!” <sup>23</sup> Uva Pailat oiso voea akereva, “Eake rutupa? Eakea vuri-a oa purarevora?” Oa rirovira rutu raga piepaoro oiso raga purapaaepa oiso, “Rera kotori evao parikou-ia!”

<sup>24</sup> ✧ Uva Pailat ora rera-ia oiso aueroepa, Easi viapau uvuiparai ra oavu vai purasa rera-ia. Teapi riroa rutu karekepe upoa. Eisi osa iava uukoa oureva ora rera iava vavaea sisusa voea rutu osireiario-ia oiso puraoro, “Viapau vuria vaiei oiso ra oai iava rera upoa. Ari aue oavisi-a visi raga.” <sup>25</sup> Oa iava voea rutu oiso puraapea, “Oa-a eva vuria uvuipai ra va kekepaioverea ora voea igei aao kakaeroaro!” <sup>26</sup> ✧ Eisi osa iava Pailat Barabas iava vasereva voeapa. Oire uva Jisas iava vasereva voeapa upo pura irara, oiso ra rera raga rovopato rera tapaive vo evao parikou-ia.

✧ 27:12: Mt 26:63 ✧ 27:14: 1 Ti 6:13 ✧ 27:19: Ap 12:21 ✧ 27:24: Diu 21:6-8; Sam 26:6

✧ 27:26: Ais 53:5

*Jisas Tovipaiva Upo Pura Irara*  
(Mak 15:16-20; Jon 19:2-3)

<sup>27</sup> Oire uva voeao upo pura irara oaro ro Pailat oea Jisas koata pieiva gavman vo kepaaro-ia. Oa iava vo rerare voea rutu voeao upo pura irara ora guruaepa. <sup>28</sup> Uva voa rera iava kuvupara veraiva iravu raga tavari pieoro revasito rera reesioro oiso, Vii-a king. <sup>29</sup> ✧ Uva oavu kukuvaipa puraiva rokarokapa iro iava. Oa iava va tovoiva rera kukuearo-ia. Uva pito isi-ia rera tooro pieiva oisova oirapapa vavae-ia. Oa iava rerare kokoto rekupaoro oiso purapaaepa, “Jiu reraaro king! Vearo voki rutu!” rera tovipaoro. <sup>30</sup> ✧ Uva rera-ia ruipaaepa. Oire voava vaisi pito isi ouoro rera kukuearo ragaiva vaisi-ia. <sup>31</sup> ✧ Uva rera tovi rovopaivoiva, kuvupato veraiva rera iava. Uva voava ora rera reraaro-ia kuvupato rera kuvuiva vorevira. Oa iava rerava avaaepa rera tapasa evao parikou-ia.

*Jisas Tapaiva Evao Parikou-ia*  
(Mak 15:21-32; Luk 23:26-43; Jon 19:17-27)

<sup>32</sup> ✧ Oire uva voa-a vo uva rera tapo avapaaepa. Oa iava voa avapaoro iravu kekeiva oirato Sairini iava, rera vaisiara, Saimon. Oa iava voa rera aruiva goruvira rutu Jisas vaaro kaesa evao parikou.

<sup>33</sup> Oa iava uvavu poua viropa opukuivu-ia, va vaisiara, Golgota. Oa poreoro oiso toupaveira, Kukue Pukui [aue iava uvare oiso kekepa piroveira osa kukue keru]. <sup>34</sup> ✧ Uva voa rera vateiva wain ovi va uvareoro oavu tapo itakopa ovi. Oire uva vava reasiparoepa ukaio arapa, uvare vo gisipo raga-ia vo ovi sovoreva itakovira. <sup>35</sup> ✧ Oa iava rera tapaiva evao parikou-ia. Uva rera varaaro-ia kuvupara satu visiko purapaiva vara roo piepaoro ora voeapa. <sup>36</sup> Uva voa toupaiava rera-ia uutupaoro. <sup>37</sup> Vo rera kukuearo isivaoro uva vo reo rigatoiva oreoa-ia rera togaiva tavaa iare. Uva oiso vo reo rigatoiva, KING OAIIVE JIU.

<sup>38</sup> ✧ Oire uva voa-a vo uva rera ruvara-ia Jisas aitereivu tapaiva riro kavirutoarei oiso iravu vova oirapapa varata, ari iravu vova koike varata. <sup>39</sup> Uva oirara rutu ora riakora voa rera tovipaoro putepaiva rerare kukue pikupikupaoro oiso purapaaepa, <sup>40</sup> “Vii-a vao Tugoropa Kupa pakopato. Vo peva raga-ia voki vo kepa paupasa vorevira! Oire ora vii avu raga ora tauvau ita, uvare vii-a Pauto Oviitoaaro. Evoava evao parikou-ia rereri!” <sup>41</sup> Uva voea tapo voeao reipa irara pris ora turaro irara oea tapo rera akaipa piepaiva oiso purapaoro, <sup>42</sup> “Ari oearovu raga oisoa tauvaporeve. Uva viapau uvuipa ra oisi ora rera raga ora tauvaro? E rera ro Isrel reraaro king? Uva eakepa ra evao parikou kavureve, ra va iava rera-ia oiraovio!” <sup>43</sup> ✧ Ira ro oisoa Pauto oirao piepareve oiso purapaoro, Ragai-a Pauto Oviitoaaro. Uva eakepa ra Pauto rera tauvareve, vo rara rera-ia vovoupari!” <sup>44</sup> Oire uva vaiere-ia vaiereo oira upopatoarei ora kavirupatoarei aitera tapo kotoiva evao parikourei-ia uva Jisas vuvuvuru-ia siva. Ari ita, vaiere-ia apo akaipavira vo reo raga purapasiva rerare Jisas.

*Jisas Kopiioepa*  
(Mak 15:33-41; Luk 23:44-49; Jon 19:28-30)

<sup>45</sup> ✧ Oire uva ravireo vuuta-ia ravireo utoroiva, rupa rovoepa vo rasitoo rutu-ia. Uva vo peva rutu-ia vuuta (3 klok) rekasiapa vo rupa. <sup>46</sup> ✧ Uva vo peva vuuta ruvara-iavi Jisas koikoioeva oiso puraoro, “Eli, Eli, lema

✧ 27:29: Sam 69:19; Ais 53:3 ✧ 27:30: Ais 50:6 ✧ 27:31: Ais 53:7 ✧ 27:32: Hi 13:12  
✧ 27:34: Sam 69:21 ✧ 27:35: Sam 22:18 ✧ 27:38: Ais 53:12 ✧ 27:43: Sam 22:8 ✧ 27:45: Amo 8:9 ✧ 27:46: Sam 22:1

*sabaktani?”* Oa oiso ragavira porearo toupai, *“Pautoa oaa, Pautoa oaa, Eakere ragaivi kavupari?”* <sup>47</sup> Oa iava voearo oea rera ruvara-ia toupai oea rera uvuoro oiso puraaepa, *“Easi profetatoare keerapa ro Ilaija.”* <sup>48</sup> ✧ Uva iravu ikaureva pupupua ruvu piesa aue-ia uureopa ovi viniga ovi. Oa iava evao rao-ia vo ovi vatepareva rerapa Jisas. Osa oearovu oiso puraaepa, <sup>49</sup> *“Tue rovou, ra Ilaija rera rere piesa urio rovoru, pasi.”* <sup>50</sup> Oire Jisas rirovira koikoioro vovoua vikireva kopii ovoioro.

<sup>51</sup> Uva vo voki raga-a vao oa-ia riroua varoua vo rataoa-ia touua Pauto vo topisiaro iava oua vo Tugoropa Kepa-ia aue Tempel vuritavira kari piropa vo rutuva viara-ia vo ruture rasiuaaro. Vouao oua kari piropa, oiso ra oirara rutu Pauto ruvara iare tutuu pieive. Ovusa rasito tapo rikerikeroepa. Oa iava riropa avekero tapo poroporo piropa. <sup>52</sup> Osa tova urui tapo karu piropa vo uva voeao Pauto voeaaro oea oisoa tovapaive toreaepa totoooro vorevira. <sup>53</sup> Uva voea-a voeao oea tova urui iava toreaepa vo voki isivaaro iava oa-ia toreroepa Jisas. Oa iava voea rutu karea viropa Tugoropa Urui iare Jerusalem. Osa iava voa voea rutu kekeiva oearovu. <sup>54</sup> Uva voa reito oaive tapo viurupa irara toupai Jisas-re uutupaaro. Uva vao kekeiva osa rasito rikerikeroepa ora orekerovu rutu varao oara rutu karekeepa. Oara rutu kekeoro rirovira rutu uriripaaepa. Oa iava oiso puraaepa, *“Oiraopavira rutu rera ro Pauto Oviitoaaro!”*

<sup>55</sup> ✧ Voa riro riako toupai vairo airoa Jisas sirova utuaepa Galili-ia kavuoro rera tauvapaaro. Uva vairo-a evairo airoa tauaivi toreaepa rera siituepaiva <sup>56</sup> oiso-ia, iriavu-a o-ia Maria Makdala iava, ora iriavu ita Maria, Jems araarei aakoaro ora Josep. O tapo Sebedi oviitoareiaro aakoaro, ora airorovu tapo.

*Aveke Rikui-ia Jisas Tovoiva*  
(Mak 15:42-47; Luk 23:50-55; Jon 19:38-42)

<sup>57</sup> ✧ Uva vo ovaiarovi iravu Arimatia iava rera riro monito, rera vaisiario, Josep ira urioroepa. Uvare iravu Jisas disaipeltoaaro rera-a. <sup>58</sup> Ira Pailat-ia pouro viropa Jisas kopiire rera aresa. Oa iava Pailat rera voeaaro tavireva, *“Vo kopii vatesa rerapa.”* <sup>59</sup> Uva Josep vo kopii oueva rera tavurusa airepa-ia varoa popotea. <sup>60</sup> ✧ Oa iava rera tovoreva aveke rikui-ia rera vaaro oa ravaavira teka ragaiva iriavu-ia aveke. Uva vo rikui iare iriavu rirova aveke perireva vo riku riaaro ivitasa oira-ia. <sup>61</sup> Ovusa Maria vaio o Makdala iava ora iriavu Maria airea paupareiepa vo tova ruvara-ia.

*Pailat Uutupa Irara Tovoreva Tova-ia Uutusa*

<sup>62</sup> Uva aio ravaapa voki putevoiva vao Sabat iare. Oa iava vo voki isivaaro iava avaaepa reipa irara pris voearei ora Farisi oearoa rutu ora guruaepa rera ruvara-ia Pailat. <sup>63</sup> ✧ Oire uva vao oiso puraaepa rerare, *“Oreovu vao-ia oare rugooie Jisas vo reoaro. Oa-ia oiso puraroepa rera ro riro kuvvuto, Vo pevapa voki isivaaro iava vorevira toreravere, vo osa touvira toupaveva vo.”* <sup>64</sup> Uva eisi osa iava vii rugoo piepaiovoi, ra taviu va iava. Oire ra vii voeaaro upo purapa irara toveri vo tova-ia uutupasa vo peva rutu-ia voki. Auepa teapi rera voeaaro disaipel rera kavirusa urioave, ra oirara rutu tavitaviive va iava kuvvuvira oiso, *Vorevira toreroe tova urui iava. Teapi vo kuvvu-ia rovopa puteve vo kuvvu utupa.”* <sup>65</sup> Oa iava Pailat oiso voea tavireva, *“Oire uutupa irara vai tavita, ra avata avukivira rutu vo tova rukusa oiso osa ruipapatai.”* <sup>66</sup> ✧ Uva va iava avaaepa vo tova-ia uutupasa. Oa iava

pisikui reesivira tovoiva o ivara-ia aveke iria taku pievira tovoiva vo tova-ia. Oisore ra va-ia oovaupaave [auepa teapi irai vo tova kavirureve.]

## 28

### *Jisas Vorevira Toreroepa Tova Iava (Mak 16:1-10; Luk 24:1-10; Jon 20:1-18)*

<sup>1</sup> ✧ Oire uva Sabat voki topekakao vo putevoiva, ravireo sikerereva vo vokio iava wiki-ia vituaro vo voki. Oa iava vaireo urioereiepa Maria Makdala ora o iriavu Maria vo tova kekesa. <sup>2</sup> Vo osa rasito ravurike ovoiroepa rirovira rutu. Uva Turaro reraaro purapurapato ensel vuviuia iava varoepa aveke vera ovoisa oira peka pieoro. Oa iava voava oira ivara-ia pauparoepa. <sup>3</sup> ✧ Uva rera iava varaua rutu sisikorepaiva aviavipaoro. Ora varoa kuvupara rera iava oisi raga popotevira rutu toupaooro roropaiva. Viapau oiso oai aviaviaro uvuipa ra rera vo aviaviario-ia puteve. <sup>4</sup> Uva va-a vao oa iava voeao uutupa irara rirovira rutu rope kopii puraiva rirovira rutu uriripaoro. Uva oiso paaepa rutu, Voeapa kopiipai.

<sup>5</sup> Oa iava enselpato Maria vaiore oiso puraroepa, “Teapi uriripaere. Taraiparai vei-ia veigoa urioereie Jisas-re vurasa ro ira kotoivoroao evao parikou-ia. <sup>6</sup> ✧ Viapau oiso vo touparevoi. Ira toreroi vorevira oiso osa puraroera voviri. Ari ita, urioereiei vo tavukio raga kekesa uva toupaiivo vo kopii. <sup>7</sup> Ra ikauvira voreere disaipel irara tavisia oiso, Vorevira toreroe tova iava. Ira visiipa iraroi Galili iare. Rera kekesa utupatai. Uva vo reoa vao ragai vo reoaro oa vateavoi veipa oare rugoopaerevere.” Oiso osa puraroepa enselto.

<sup>8</sup> Oa iava vaierei riakorirei rirovira rutu uriripaereiepa ora rirovira tapo rorupaereva. Uva ikauvira rikui raga ruvara iava vaereiepa disaipel tavisia. <sup>9</sup> ✧ Uva voa-a vo uva Jisas vaierei iare pouro viropa raivaaro. Oa iava vaierei kekeoro oiso puraroepa, “*Vearo voki rutu.*” Oa iava rera iare tutuu pieereva rerapa avivikepaoro rera kokotoaro-ia pitusa. Uva rera-ia vuurapa vaisi puraereva. <sup>10</sup> Oire uva Jisas vaiereie oiso puraroepa, “*Opeita uriripaere. Avaere araoko irara oaa tavisia, ra Galili iare avaave uva ragai kekeivere.*”

### *Vo Uutupa Irara Vo Reoaro-a Vao-ia*

<sup>11</sup> ✧ Oire touvira avapaereiepa osa oearovu voea iava vo tova-ia uutupa irara karea viropa vo Jerusalem urui iare reipa irara pris tavitavisia varao rutu iava orekerovu oara karekeepa voa. <sup>12</sup> Uva va-a vao oa iava voea rutu ora gurauepa pris irara ora turaro irara. Oire vo pau-a vao oa-ia oavu reoa goruiva. Oa iava riroa monia vateiva voeaopa vo tova-ia uutupa irara <sup>13</sup> oiso voea vosipaoro, “Teapi eisi tavitavipatavere. Ari oiso raga purapatavere, Rera voeaaro disaipel urioae voava rera kavirusa osa uusivira toulovo. <sup>14</sup> ✧ Ari ita, vosa rovopato gavman vo reo iava vao uvurevere, oire ra rera vovouaro poreio. Ra va iava viapau visii-ia vuria utai karekepe.” <sup>15</sup> Uva eisi osa iava monia-ia pituoro voea vo reoaro sirova vataepa. Oa iava oisi raga vo reo sikataiva Juda taere iare. Oa iava oisi va purapaiivoi vo vokio-ia tapo.

*Jisas Ora Karekeroepa Disaipel Irara Iare Voea Tavisia, Avata Oirara Siposipopasa  
(Mak 16:14-18; Luk 24:36-49; Jon 20:19-23)*

✧ 28:1: Mt 27:56 ✧ 28:3: Dan 7:9, 10:6 ✧ 28:6: Mt 12:40, 20:19 ✧ 28:9: Jo 20:14-18

✧ 28:11: Mt 27:65-66 ✧ 28:14: Mt 27:2



16 ☆ Vo katai tau katai (11) disaipelel irara vokapaoro avaaepa Galili iare. Oa iava vo pukuio-ia poua viropa oare Jisas voea tavireva oiso ra voare avaave. 17 Uva voa-a vo uva rera kekeiva Jisas. Oa iava rera-ia vuurapa vaisi puraiva. Ari ita, vosa oearovu voea iava viapau oiso rera oirao piépaiva. 18 ☆ Oa iava Jisas voea iare tutuu piereva. Oire voava voea tavireva oiso, “*Pauto vo goruro rutu vuvuiua iava ora vo rasito vatereva ragaipa.*” 19 ☆ Oiso osa iava uvuipatai ra oirara rutu vo rasitoa-ia disaipelel pieta ragai voeaaro. Voea baptaisoro voea reesita Aite vaisiario-ia, ora Oviito, ora Tugoropato Uraurato. 20 Rara voea siposipopata vo reoro rutu iava oara vateavora visiipa. Oire ra vearovira rutu vara sirova utupaave. Ragai uvu iraopata! Ragoa visii tavipaa oiraopavira rutu oiso, Visii tapo tupaaverea vokiara rutu-ia vo tugurasa vo rasio vo vuutaaro opesiario-ia.”

## MAK Irapa Reoro Vo Vukuo Iava

Ro ira vo vukuo rigatoreva ira oisoa vaisipaive Jon Mak. Rera raga ita ira oisoa Pol vaio ora Pita tauvapareve Pauto vo kovoaro purapaoro (Ap 13:5, 13 ora 1 Pita 5:13). Oearovu oiso rugorugooapaaveira, Ira raga ita ro ira torireva viurupa irara asavira vo osa Jisas ousa urioaepa Oliv Kovo sopaaro-ia (Mk 14:51-52). Uva vo vuku rigatoreva 60 o 70 yia Jisas vo kavauaro isivaaro iava.

Mak rigatoreva voeaopa Rom-pa irara oea oisoa ruipapaave ra vo siposiporo uvupaive oara oirato vo goruaro iava oisoa tavipape. Eva-a oa iava rirovira tavitaviroepa Mak varao iava riro goru kovoro ravoto kovoro oara oisoa purapareve Jisas vo Pauto vo goruaro iavirava.

Uva vo vukuo sovara-ia Jisas vaisireva oiso, Pauto Oviitoaaro (Mk 1:1 ora Mk 15:39), ora oiso tapo Oirato Oviitoaaro Ro Ropoto. Ari kataitoa raga-a, Jisas ira riro siitoka ou rovorevoiva, vorevira voreroepa Pauto Aite iare. Uva vo utupavira voreroverea oirao pie vovou irara rera voeaaro ou piesa ita (Mk 8:38; Mk 13:26, ora Mk 14:62).

1. Jon Baptais iava vo osa Vearo Siposipo kosi piereva raiva puraoro oa-ia pouro viropa Jisas, 1:1-13.
2. Jisas Galili taere sovara-ia virireva rera vo kovoroaro ravoto kovoro purapaoro, 1:14–9:50.
3. Jisas vova avaroepa Galili-ia vore Jerusalem, 10:1-52.
4. Turarovira koataroepa Jisas Jerusalem urui-ia ovoioapa wiki-ia toupasa, ouruia-ia oavuu rera kotoiva evao parikou-ia, 11:1–15:47.
5. Jisas vorevira toreroepa vova kopiia-ia, 16:1-8.
6. Vorevira toreroepa Jisas vo pevapa voki-ia, oa iava ovokivu-ia disaipel irara iare ora karekeroepa ora oearovu iare tapo, 16:9-20.

### *Jon Baptais Vo Siposipoaro*

*(Matyu 3:1-12; Luk 3:1-9, 15-17; Jon 1:19-28)*

<sup>1</sup> Rovoaro Vearo Siposipo Jisas Kraisi iava, Pauto Oviitoaaro.

<sup>2</sup> ✧ Oa iava oiso va rigatoreva profetato ro reo topa piepato, Aisaia. Oreoa oiso purapai,

‘Uvuri. Ro iava ira ira pieavoi vii iare reo kaepato. Ira raiva oara vatatopoparevere va ravaaoro viipa.’

<sup>3</sup> ✧ ‘Iraivu ira keeraparoi vo raaka tapi oiso purapa, Turaro vo raivaaro vatatopopata va ravaaoro oa-ia pouro viroverea.’

<sup>4</sup> Uva vo reo-a vao oirao pieoro karero viropa Jon baptais vatepato vo raaka tapi. Uva voeaopa siposipopareva Jon, oiso ra poreva viro ra baptaisa ouive, vo rara Pauto voea iava vuriara verareve. <sup>5</sup> Uva voea rutu avaaepa rera iare voea raute voveo vova Judia taere ora vova riro urui Jerusalem. Uva vuriara oaive kosi piepaoro vo vuuta raga-ia baptaisa ouiva Jon ruvara-ia vo uukova Judan.

<sup>6</sup> ✧ Uva Jon aue kamel oruaro iava oisoa rera-ia oiso kuvuparo kuvupato, ora takipa iro bulmakau rakari. Uva rera vo aioaro-a vao-ia siiko ora koiisi. <sup>7</sup> Uva oisi siposipopareva, “Ro ira utuparoi ira ragaipa reipa. Uva viapau uvuipara ra rerapa akaipa kovo vai pura ragaa, oiso osa vao rera vaaro tasipa oa-ia viapau uvuiparai ra va akaipavira vera ragaa. <sup>8</sup> ✧ Uva

visii baptaispaavoi aue-ia uukoa. Ari rera visii baptaisrevere Tugoropato Uraurato vo goruaro-ia visii reesipaoro rutu.

*Jon Jisas Baptaisreva  
(Matyu 3:13-17; Luk 3:21-22)*

<sup>9</sup> Ovuuta-a eva isivaaro iava Jisas Nasaret iava Galili-ia urioroepa. Oa iava Jon rera baptaisreva vo Jodan sir. <sup>10</sup> ✨ Oa iava veraro viropa voava uukova sirova. Uva voava vuvuiua kekereva osa karu piropa. Uva Tugoropato Uraurato oiso vararoepa osa kokue rera-ia pitusa. <sup>11</sup> ✨ Uva reoreoa varaepa vuvuiua iava oa oiso puraepa, “Vii-a ragai Oviitoaaro rutu. Viigoa-ia roru iraopaavoi rutu vii kavikopaoro.”

*Seten Jisas-ia Kokaraparoepa  
(Matyu 4:1-11; Luk 4:1-13)*

<sup>12</sup> Uva ikauvira Tugoropato Uraurato rerava avaroepa raaka tapire vo uva viapau oirara vai. <sup>13</sup> ✨ Uva voa toureva aue-ia vo resura tau (40) voki, osa Seten voa rera-ia kokara ragaparoepa. Uva okarerovu rutu tapo toupaveva vavarai kare, osa enselpa irara voa rera tokipaiva.

*Jisas Ora Rera Vo Kovoaro Rovoreva Galili-ia  
(Matyu 4:12-17; Luk 4:14-15)*

<sup>14</sup> Oire uva Jon tovoiva vo tuukepa kepa-ia. Oa isivaaro-ia Jisas urioroepa vore Galili. Uva voa siposipopaveva Pauto vaaro iava Vearo Siposipo. <sup>15</sup> ✨ Uva oiso puraroepa, “Vo vuuta vao-ia oa pou piroi oapa tutuu piei ra karekepe vo vuutao iare oa-ia Pauto ora rera vo Saraaro tokirevere. Poreta viro, ra Vearo Siposipo oirao pieta.”

*Vo Jisas Ataripa Resua Roporeva  
(Matyu 4:18-22; Luk 5:1-11)*

<sup>16</sup> Jisas Galili rovu vatuaro-ia vokareva. Uva Saimon vaio kekereva vaiterei ora Andru vo araorei, ovusa varuerepasiepa. Uvare vaiterei-a pakupatoarei moni oupasa. <sup>17</sup> Uva Jisas vaitereire oiso puraroepa, “Ragai sirova utusi, ra vei siposipoa oira sivupasa ragai iare.” <sup>18</sup> ✨ Oa iava ikauvira raga kuverava kavusiva rera sirova utuoro.

<sup>19</sup> Uva oisivi vokaoro Jems-ia pouro viropa Sebedi oviitoaaro vo araorei ora Jon, vo osa uvuoa-ia kuverava murupaoro toupasiva. <sup>20</sup> Uva vaitereire keeraroepa. Oa iava Sebedi aiteto kavusiva uvuoa-ia ora kovopa irara utupaoro rera sirova.

*Jisas Vurito Tugarato Veraveva Oiratoa Iava  
(Luk 4:31-37)*

<sup>21</sup> ✨ Uva Kapaneam-ia karea viropa. Uva voa-a vo uva Sabat Voki-ia Reo Taisi Uvupa Kepa-ia Sinagog koataroepa. Uva voa oirarapa siposiporeva. <sup>22</sup> ✨ Oa iava rera vo siposipoaro-ia tavetaveiva, uvare rera vo reoaro-ia gorua tupaiva. Viapau oiso rera-a osa voeao oea Reo Taisi iava siposipopaiveira.

<sup>23</sup> Uva voa toureva Sinagog sovara-ia evoa uva toupaveva iravu oirato irava oiso toupaveve tugarato. <sup>24</sup> ✨ Uva-a vo uva oirato iava tugarato oiveoro oiso puraroepa, “Eake vai purari igeire vii Jisas vova Nasaret? Vii uriouei igei opesi ovoi piesa, eke? Ari ita, taraiparai vii-ia. Vii-a Torevokotoa rutu vova Pauto.” <sup>25</sup> Uva Jisas rerare koruoro oiso puraroepa, “Ora tape pieu, ra

*eera arova kosiu viro.*" <sup>26</sup> Oa iava voea tugara rera-ia taketokoaeapa rera rikerike pieoro, osa rirovira oiveroiva, rera iava kosia viropa. <sup>27</sup> Uva voea rutu tavetaveiva. Oa iava voea raga ora akeakepaaeapa oiso, "Eake irao vao-ia? E airepa siposipo-a oa karekei vo goruova oa iava tugara rera uvui?" <sup>28</sup> Osa iava ikauvira rera iava vo siposipo viriva voraro rutu vo Galili taerero sovara-ia.

*Jisas Pita Aigevaaro Porete Piereva*  
(Matyu 8:14-15; Luk 4:38-39)

<sup>29</sup> Uva Jisas tapo kosia viroiva Sinagog iava. Oa iava koataeapa voeao disaipel ora Jems vaio ora Jon, vo kepa-ia Saimon vaio vo kepaaro ora Andru. <sup>30</sup> Uva-a vo uva Saimon aigevaaro kukue upia puraiva. Oa iava oira iava Jisas taviiva. <sup>31</sup> Uva avaroepa oira-ia pitusa vavaea-ia oira tore pieoro. Oa iava kukue upia oira kavu ovoiva. Oa iava voeapa aioara vatatopo ovoieva.

*Riro Irara Porete Piereva Jisas Ovaiarovi*  
(Matyu 8:16-17; Luk 4:40-41)

<sup>32</sup> ✧ Uva vo ovaiarovi ravireo ovusa rokoreva uva rera iare oearovu upiapa irara siposa urioaeapa, ora oearovu tugara upo irara. <sup>33</sup> Oirara rutu voeao vo uruio iava vao riroa oea vo uvuruaro kepa rataoaro tupaiva. <sup>34</sup> ✧ Uva-a vo uva oirara iava oupirovu rutu ruvarureva, ora oearovu oearoa iava vuri tugararo kosi piereva. Uva tugarare koruroepa oiso ra ora tape pieave, uvare rera-ia taraipaaepa.

*Jisas Siposipopaaro Virireva Galili-ia*  
(Luk 4:42-44)

<sup>35</sup> ✧ Vo vokipakou rutu-ia Jisas toreroepa. Oa iava voava kosi virooro avaroepa varirisa kuvau tapi. <sup>36</sup> Uva Saimon vase ora voeao oea rera tapo vokapaiva oea rerare taraapaoro utupaaepa. <sup>37</sup> Oa ava rera kekeoro rera taviiva oiso, "Oirara rutu viire taraapaivoi. <sup>38</sup> ✧ Oa iava voeare oiso puraroepa, *Irata. Ra voraro tutuu pievira ourui iare avavio, ra oa-ia voo siposipoa vao iava oa vituaro rutu iava vore urioraera.*" <sup>39</sup> ✧ Uva oiso ragavira avaaepa Galili-ia. Uva voo siposiporeva Sinagog sovara-ia Jiu vaaro, ora tugara kosi pie tapo purareva voraro rutu vo Galili taerero sovara-ia.

*Jisas Iravu Lepra Sisigarue Piereva*  
(Matyu 8:1-4; Luk 5:12-16)

<sup>40</sup> ✧ Uva rera iare Jisas urioroepa iravu ira-ia oisoa lepra upia toupave. Ira rera areoro rerare rekureva oiso puraoro, "Vosa apeisi vovoupau ra ragaivi porete pieri." <sup>41</sup> Uva Jisas rerapa siraoroepa rutu. Oa iava rera-ia pitureva vavaea tovooro. Uva rera tavireva oiso, "*Ruipaparai ra sisigarueu.*" <sup>42</sup> Uva va-a eva lepra upia rera kavuva. Oa iava vearoroepa. <sup>43</sup> Uva goruvira rera vosipareva rera arupaoro. <sup>44</sup> ✧ Osa iava rerare oiso puraroepa, "*Opeita irai taviparivere. Viapau. Ari varaua oara karekesa avapau pris irarapa. Ra tauoa vai purari oiso osa va iava visii taviva Moses vo rigatoaro. Oire ra oearovu rutu taraiavere oiso, Upta rutu vii iava opesiei.*" <sup>45</sup> ✧ Ari ita, avaroepa voraro rutu siposipopaoro. Osa-a eisi vituaro iava Jisas viapau uvuiparoepa ra avaro ouruorovu iare. Ari ratauro raga toupaveva kuvau tapiro-ia. Osa iava rera iare urioaeapa oirara vova voraro rutu.

✧ **1:32:** Mk 4:24 ✧ **1:34:** Mt 4:23; Ap 16:17-18 ✧ **1:35:** Mt 14:23 ✧ **1:38:** Ais 61:1 ✧ **1:39:** Mt 4:23-25 ✧ **1:40:** Mk 10:17 ✧ **1:44:** Lev 13:49, 14:2-32 ✧ **1:45:** Jo 6:2

## 2

*Jisas Kerauto Porete Piereva  
(Matyu 9:1-8; Luk 5:17-26)*

<sup>1</sup> Uva ovokirovu isivaaro iava vo Kapaneam-ia pouro viropa. Uva voa rera iava tavia avaepa vo osa kepa sovara-ia toupaveva voa. <sup>2</sup> Uva riro irara rutu ora guruiva, agasiepa. Uva viapau oiso oavi viapaa vai touva vo kepa rataoaro-ia. Uva-a vo uva voeapa siposiporeva va iava vao Vearo Siposipo. <sup>3</sup> \* Uva oresuravu iravuva kerauto kaepaoro urioaepa. <sup>4</sup> Ari ita, viapau uvuiaepa vo kaeva koatasa, uvare riroa ita uvuru. Osa iava kepa kukuuvuaro tokoiva Jisas aivarova. Oa iava vo kae vara pieiva. <sup>5</sup> Uva Jisas voea varaaro oirao pie vovouo kekereva. Oa iava kerautore oiso puraroepa, “*Oviitoa oaa. Vii vaaro vuria verapi.*”

<sup>6</sup> Vo osa oearovu voavi paupaaepa Reo Taisi-ia tarai irara, oea oiso ora rugorugoo piepaaepa ora voea raga vovouaro-ia. <sup>7</sup> \* Eake vituaro iava eisi puraro rera ro-ia? Ira Pauto toviparevoi rera reroaropaoro. Irou vai uvuipai vuriara verapasa. Easi Pautoa raga. <sup>8</sup> Uva Jisas voea soveveva ora rera iava sopaua-ia. Oa iava voea oiso akereva, “*Eakere eisi ragaire vurivira rugorugooatai ora visii raga sopaaro-ia?*” <sup>9</sup> E aa vo reo irao-a oa avekatapai rutu ragaipa, ra va-ia oiso purara, Vuriara oara verapi, eke oiso, Toreu ra urua vii vaaro kaeri, ra vava kareu vokapaoro? <sup>10</sup> Ari ita, ragai-ia taraipatai ragoa ro arua oiso, Urua kaeri ra vava kareu vokapaoro, auere ra va kekepaoro oiso purapata ragai iavirava, Oirato Oviitoaoro Ro Ropoto vo goruaro vao-ia oiraopa. Oa vao uvuipai vuriara verapasa oirara iava voeao vo rasitoo-ia tou irara.” <sup>11</sup> Oire kerauto tavireva oiso, “*Vii tavipaavo, Toreu, ra urua oara kaeoro ra kareu vii vo kepaoro iare.*” <sup>12</sup> \* Uva tore ovoiroepa urua oaro kaesa. Uva kareroepa ora karekesa voeare. Oa iava rera-ia tavetavepaiva. Uva Pautoa-ia vuurapa vaisi puraiva oiso puraoro, “*Viapau oiso oai kekeiova oiso-ia.*”

*Vo Livai Oureva  
(Matyu 9:9-13; Luk 5:27-32)*

<sup>13</sup> \* Uva vorevira pouro viropa toko rovu rogaraaro-ia. Uva riro irara rutu oirara ora guruavepa voa rera iare. Oa iava voa voeapa siposiporeva. <sup>14</sup> \* Uva Jisas voava avapaoro Livai kekereva, Alfias oviitoaaro, vo osa vo pauparoepa takis oupa kepa-ia moni vikipa tapi. Uva rera tavireva oiso, “*Ragai sirova utuu.*” Oa iava toreoro rera sirova utu ovoiroepa.

<sup>15</sup> Uva aiosa avaroepa Jisas voavi pauoro Livai vo kepaaro-ia. Uva riro irara voeao moni oupa irara ora voeao vuri vovou irara, oea tapo toupaveva, ora disaipel irara voeao rera voeao. Aue iava uvare riro irara rutu rerare utupaaepa. <sup>16</sup> \* Uva voeao Reo Taisi-ia taraipa irara Farisi iava voea oea rera tueiva osa vuri vovou irara tapo aiopaveva ora takis oupa irara. Uva voea disaipel akeiva, “*Uva apeisi moni oupa irara tapo aiopare ora vuri vovou irara?*” <sup>17</sup> \* Uva Jisas va uvureva. Oa iava oiso puraroepa voeare, “*Voeao upia asa irara viapau oiso ra avapaave ruvarupatoa iare. Viapau. Ari voeao raga vuri vara irara. Ari ita, voeare torevoko vovou irara viapau oiso keerasa urioraera. Ari voeao-a vuri vovou irara, oiso ra vuriara oaive iava poreva viro.*”

*Aio Kavupa Pitupitu Iava  
(Matyu 9:14-17; Luk 5:33-39)*

18 Uva Jon voeaaro disaipel ora Farisi urioaepa voeao aio kavu irara. Oa iava oevu Jisas akeiva oiso puraoro, “Uva apeisi Jon voeaaro disaipel voearei ora Farisi voeaaro aio kavupai, oiso ra vearovira lotu purapaive, vo osa vii voeaaro disaipel viapau oiso aio kavupaaveira?” 19 Uva Jisas voea akereva, “E vosa voeao oea saratoaaro riakoparo, oea vuuipaai ra aio kavuave rera tapo touoro, eke? Asi viapau, uvare toupave voo tapo. 20 ✧ Ari ita, ovokivu oa urioepere oa-ia ora voea iava rera veraivere vo osa riako ouro. Oire evo voki oa-ia oiso aio kavuavere siraopaoro.”

21 Uva vo reo-a vao oa iava oiso puraroepa, “Viapau rutu irai uvuiparoi ra ruta vai ora airepa varoa vai taporeve. Vosa oisi piereve, ra ita ruta karikari piro airepa arova. Ra karia ita riro iraope. 22 Oire vosa airepa ovi wain ovi ora riro piepe, ra viapau rutu irai uvuiparoi ra va vao airepa ovi wain ovi kuvureve ruta tou-ia aue iava meme rakariaro, auepa uvare tuakaka. Vosa oisi va piereve ra poko piro vo oviva, ra va iava vuri ovoipe. Ari vosa airepa ovi raga kuvureve airepa tou-ia, ra oriruvira toupave.”

### *Disaipel Kukara Tueiva Sabat Voki-ia (Matyu 12:1-8; Luk 6:1-5)*

23 ✧ Uva poua viropa kukara kovo-ia Sabat voki-ia. Uva rera voeaaro disaipel kukara tuepaoro rovoaepa vo kovo sovara-ia vokapaoro. 24 Uva rerare oiso puraaepa Farisi, “Kekeri. Uva apeisi iava oiso piepai Sabat voki-ia oa-ia viapau uvuipaai, uvare Reo Taisi putepaivoi?”

25 Oa iava voea akereva Jisas, “E viapau va vieipataveira vao iava osa piereva Devit tuariri rutu, ira ogoevira toureva ora voeaoivo oea tapo toupaveva? 26 ✧ Oa-ia ita koataroepa Pauto vo kepaoro-ia vo vuutao-ia oa-ia Abaiata prisparoepa. Uva bret aioreva vao oa-ia viapau uvuipa akukutoa vai ra va aioreve. Va vao bret oa oisoa vatepaive Pauto-pa ra va kekepareve. Pris irara raga uvuipaai va aiopasa. Uva rera voeao vatereva oea tapo oisoa toupaveva?”

27 ✧ Uva voea tavireva, “Sabat voki oirato tauvapasa pura piropa. Viapau oiso oirato puraro viropa Sabat vokipa oiso ra rera tokipaive. 28 Easi Oirato Oviitooaro raga ira uvuiparoi vo oirara rutu vo pitupituroaro rovirieipasa varao opitupituroa purapaiveira vo Sabat voki-ia.”

## 3

### *Jisas Pakoeto Ruvatureva (Matyu 12:9-14; Luk 6:6-11)*

1 Uva voava ita vo ovokivu-ia uva vorevira koataroepa Reo Taisi Uvupa Kepa-ia Jiu vaaro, osa vao toupaveira iravu oirato kopii vavaeto. 2 ✧ Uva rera-ia siituepaepa oiso vosa rera porete piereve vo Sabat voki-ia, ra rera iava gasiive oai iava. 3 Uva rera pakoeto tavireva, “Toreu ra uriou vore.” 4 Oa iava voea akereva Reo Taisi iava oiso puraoro, “Apeisi torevokopai vao Sabat voki veaoro purapasa, eke vuria purapasa? Oira porete piepasa, eke oira upopasa?” Oa iava ora tape pieaepa ita. 5 Uva kasipuvira poreroepa voeare, uvare voea iava sopaura vavagisipaepa. Oa-a vao oa iava rerare vovouisi vavataepa. Uva rera pakoeto tavireva, “Vavaea irairari va torevokooro.” Uva va irairareva. Oa iava rerare vavaea vore ovoiepa. 6 ✧ Uva Farisi ora reosa avaaepa voeao tapo King Herot tauvapa irara oiso, “Apeisi vai iava rera upoep?”

✧ 2:20: Lu 17:22 ✧ 2:23: Diu 23:25 ✧ 2:26: 1 Sml 21:1-6; 2 Sml 8:17 ✧ 2:27: Eks 23:12

✧ 3:2: Lu 14:1, 20:20 ✧ 3:6: Mk 12:13

*Riro Uvuru Touva Toko Rovu Vatuario-ia Rogaraua-ia  
(Matyu 12:15-21)*

<sup>7</sup> ✧ Jisas rera voeaaro tapo disaipel vararoepa vore toko rovu. Oa iava voeareo vova Galili-ia ora Judia-ia oeara rutu rera sirova utupaepa. <sup>8</sup> Ora voeao Jerusalem iava ora vova Idumia, ora vova ivirovira Judan ora voeao Taia-ia vatuario ora Saidon-ia. Ogururoa rutu-a voeao oea rera iare urioaepa, uvare riro-a Jisas vo kovoaro oa iava uvuiva. <sup>9</sup> Osa iava voea tavireva disaipel irara oaro, oiso ra uvuoa vai ravaaive. Teapi oirara urioave ra rera tavuruoro ora guruave. <sup>10</sup> Uvare voa riro irara rutu porete pie rovorevoiva, oearovu oupiarovuva vo uvuru ugapaoro koatapaepa Jisas-ia rirupasa. <sup>11</sup> ✧ Uva tugarapa irara rera kekeiva. Oa iava rerare takua viropa oiveoro oiso puraoro, “Vii-a Pauto Oviitoaaro.” <sup>12</sup> ✧ Oa-a eva oa iava voea vosireva riro goruvira oiso puraoro, “*Opeita ragai iava tavipatavere poeravira.*”

*Katai Tau Erao (12) Roporeva Jisas  
(Matyu 10:1-4; Luk 6:12-16)*

<sup>13</sup> ✧ Uva Jisas iparoepa pukuia-ia, uvare oiso ruipaparoepa ra oeai reesireve. Oa iava voeare voeao keeraroepa. <sup>14</sup> Uva katai tau erao (12) roporeva oiso ra rera tapo toupave. Oa iava voea vaisireva oiso, Aposel irara. Ra va iava voea siporeve oearovu rutupa siposipopasa. <sup>15</sup> Uva gorua voeapa karoporeva vaore, oiso ra va iava tugar kosi piepaive. <sup>16</sup> ✧ Voea-a voeao katai tau erao oiso, Saimon-a ro ira-ia vo vaisio tovoreva, Pita. <sup>17</sup> Ora Jems Sebedi oviitoareiaro ora Jon, vo araorei vaisireva oiso, Boanesis. Va vituario iava uvare riro varakeo reotoarei-a. <sup>18</sup> Andru ora Filip, ora Batolomyu, ora Matyu, ora Tomas. Jems oviitoaaro Alfias ora Tadias ora Saimon Selot. <sup>19</sup> Ora Judas Iskariot, ro ira Jisas kosi piereva keripa irara vavaeoro iare.

*Vo Jisas Vaio Vo Reoaro Toupai Ora Bielsebul  
(Matyu 12:24-32; Luk 11:14-23, 12:10)*

<sup>20</sup> Oire uva Jisas kepa-ia koataroepa. Oa iava vova rera iare vorevira ita ora guruaepa oirara rutu. Osa-a eisi osa iava viapau uvuiaepa oiso ra aioive, uvare riro uvuru rutu-a. <sup>21</sup> ✧ Uva Jisas sara iraraaro va iava vao uvuiva. Osa iava urioaepa rera ou piesa, uvare oevu oirara oiso puraepa, “Easi ro kokoropa.”

<sup>22</sup> Uva voea Reo Taisi-ia tarai irara urioaepa Jerusalem iava varaoro. Uva oiso puraaepa, “Ira-ia pouparo viroveira tugarapa reipato rera vaisiaro, Bielsebul. Ira vo goruaro iavirava tugar kosi piepareveira.” <sup>23</sup> Oa iava Jisas voeare keeraroepa ruu reo purasa voeapa oiso, “*Apeisi ragavira ra Seten uvuipa ra ora siguro?*” <sup>24</sup> Vosa osarai ora aveavepaave, ra viapau vearovira toupave. <sup>25</sup> Ora vosa oaoi ora sikaave katai kepa vai ora upooro, uva viapau uvuipaai ra oisi iava vearovira touive. <sup>26</sup> Ra vosa Seten ora vuri pieparo, ra viapau goruvira toupave. Ra rera vo saraaro toko ovoiro, ra oisi iava opesi ovoiro.”

<sup>27</sup> ✧ Uva vo reo-a vao oa-ia oiso puraroepa, “*Viapau irai uvuipa ra koata ragaro vo goruto vo kepaaro-ia rera varaaro kavirusa. Ari vosa rera tuuke rovoreve iroiro-ia ro goruto, oire ra rera varaaro kavirureve.*”

<sup>28</sup> “Oiraopavira rutu visii tavipaa oiso, Pauto vuriara rutu verarevere ora orekerovu varao takau reoro varao oara purapaiveira oirara. <sup>29</sup> Ari vosa ro ira Tugoropato Uraurato takaupareve rera akaipa piepaoro, eva-a oa-ia viapau Pauto uvuipa ra va verareve rera iava va vao vuriā oaro. Oa tovira rera vuri piepaivereā vokiara rutu-ia.” <sup>30</sup> Uva Jisas oiso puraroepa uvare oearovu oiso purapaepa, “Ira sopaaro-ia ro tugarato touparevoi.”

*Jisas Aakoaro Iava Ora Araoko Iraraaro*  
(Matyu 12:46-50; Luk 8:19-21)

<sup>31</sup> Uva aakova ora araoko irara oavaoa karea viropa ratau tousa uvava aruaepa rerare, oiso ra vo avao iare urioro. <sup>32</sup> Ari ita, riro uvuru rutu Jisas tavurupaiva. Uva rera taviiva oiso puraoro, “Kekerī. Aakoara ora vii araoko iraraaro oavaoa oiso torepaaī ratau. Oea vii kekesa auepaai.” <sup>33</sup> Oa iava voea vo rearo pukooro oiso voea akereva, “Irouva aako ora irou irara araoko irara oaa?” <sup>34</sup> Uva ora poreroepa voea iare oea rera tapo toupai va voeare oiso purasa, “Visii-a aakoa vase ora visii-a vao ragai araoko iraraaro. <sup>35</sup> Uvare ro ira Pauto vo vovouaro sirova utuparo, ira ita-a eera araokotoa oaa ora taataava oaa ora aako.”

## 4

*Vo Oirato Vuruara Vikipareva Kovoa-ia*  
(Matyu 13:1-9; Luk 8:4-8)

<sup>1</sup> ✧ Uva vorerivira ita voea siposipopaoro rovroepa vo toko rovu-ia Galili-ia. Uva riro uruiro rera tavuruiva. Oa iava kaero viropa uvuo-ia voa pausa, osa toko rovu ivara-ia toupavea. Uva va-ia pauroepa ovusa vo uvuru rogaraua-ia toupai va. <sup>2</sup> Uva voava voea siposiporeva riroara rutu-ia ovoovo reoro oara-ia oiso puraroepa voeare,

<sup>3</sup> “Uvuta. Iravu oirato avaroera wit koko vikisa varuparo. <sup>4</sup> Uva vara vikiparevora osa oaravu vo kovepaera raivaaro. Uva kokio kare vara aiopasa uriopaaera. <sup>5</sup> Ovusa oaravu avekepa tapiro kovepaera vo uva viapau rirovira toupai va rasia vai vearoa vai. Oa iava ikauvira raga kova ovoiera. <sup>6</sup> Uva ita, ravireo kaero viro vara raverave piesa vara erako pieoro. Aue-ia ita uvare viapau vavurupatoa vai ita. Oa iava raveraveera. <sup>7</sup> Ari oaravu kovepaera kokopa kouro sovara-ia varao rokarokapara. Uva kokopa kou varare tavuruoro riroera. Oa iava viapau kueera ita. <sup>8</sup> ✧ Ari oaravu koveera vearo rasi-ia. Oa iava vearovira raga kovaera. Uva vearovira kueera rirovira. Oaravu aue-ia uvuipaera peva tau (30), ari oaravu aue-ia katai vatara tau (60), ari oaravu aue-ia uvuipaera katai vovoto (100).” <sup>9</sup> Uva oiso puraroepa, “Vosa irai-ia kokitoa vai karuvira toupaveve, vearopai ra va uvureve, uvare uvupatoa ita kokito.”

*Vo Ovoovo Reo Vituaro Toupai*  
(Matyu 13:10-17; Luk 8:9-10)

<sup>10</sup> Uva oearovu oirara Jisas arova kareaepa ora katai tau erao (12) disaipel. Ora oearovu oea rera tapo toupai va, oea rera akeiva vo reoro porearore varao ovoovo reoro. <sup>11</sup> ✧ Oa iava voea raga tavireva oiso, “Vo reo vao oa vataupai, oa vituaro iava visii tavirevora Pauto ora rera vo Saraaro iava. Ari ita, voeao oea ratauvira toupai va ragai vo vovouaropa, oepa vo siposipo puraavoī ovoovovira. <sup>12</sup> ✧ Ari ita,



*‘Vura ragapaivo osa viapau vo reo vituaro eveipaivo. Ora va uru pie ragapaivo osa viapau va-ia taraipai oisopa, Teapi porea viro ra vuriara oaive vera piro voea iava.’”*

*Ovoovo Reo Aue Iava Wit Koko Vikipato Aviavi Piereva Jisas  
(Matyu 13:18-23; Luk 8:11-15)*

<sup>13</sup> Uva Jisas voea tavireva, *“Vosa viapau vao-ia taraipata ovoovo reo, uva apeisi ragavira oreorovu-ia taraipatavere ovoovo reoro? <sup>14</sup> Wit koko vikipato ira oiso toupave osa ro ira Pauto vo reoaro paupare. <sup>15</sup> ✧ Uva varao oara kovapai raiva-ia, uva evoa ora paupai reoa. Ovusa uvupaive ra Seten ita urio ovoiro vo reo kaviru ovoisa vao oa oisoa voea sopaaro-ia toupave. <sup>16</sup> Ari varao oara ora paupape avekepa tapiro oa oiso toupai, Oea-a vo reo uvuivoi. Oa iava va ou ovoivoi roruvira raga. <sup>17</sup> Vo osa viapau ikopitoa vai va-ia, vo osa ovurirovu rutu sasarao pou piro vare vao Pauto vo reoaro. Oire ra va iava ikavura vo reo kavuive. <sup>18</sup> Ari oearovu oiso toupai, Oea vuutaaro-ia wit koko kovapai rokarokapa kou sovara-ia. Evoea ita oea vo reo uvuivoi. <sup>19</sup> Ari ita, rirovira rutu rugorugopaai varao ruture vo rasio iava vara, uvare oiso rugopaai ra riroara vai rutu gurupaive moniara vai ora orekerovu rutu riiriipaive. Oara rutu evara oara Pauto vo reoaro tavurupaiveira. Eisi osa vituaro iava viapau vo reo eva kuea vai voea sopaaro-ia. <sup>20</sup> Ari ita, oearovu oiso toupai osa vearoa rasia, oa iava voa vearovira ora pauepa. Uva voa vo reo tokiiava va sirova utuoro. Oa iava rirovira kuepa oiso, oaravu uvuipaeva peva tau-ia (30), ari oaravu katai vatara tau-ia (60), ari oaravu uvuipai katai vovoto-ia (100) uvuiepa.”*

*Vuravu Vatauiva Baket Reroaro  
(Luk 8:16-18)*

<sup>21</sup> Uva voea akereva, *“E vuravu kaepatavoi ra oira tovota baket sopaaro-ia, ora uruara ita reroaro oira tovota voa? Viapau. Easi tebol ivara-ia oira tovopata. <sup>22</sup> ✧ Ari ita, orekerovu rutu vatauvira toupaveira oara rutu poerarevera kosi piroverea. Ora varao oara rakupareve, oara rutu poerarevera rara utupaua. <sup>23</sup> Vosa irai-ia kokitoa vai karuvira toupaveve, vearopai ra va uvureve, uvare uvupatoa ita kokito.”*

<sup>24</sup> ✧ Uva voeare oiso puraroepa, *“Vearovira rutu uvupata. Vosa gare visivi uvupata, eva-a oa iava gare visivi taraipatavere. Ari vosa rirovira rutu uvupata, osa iava uvuipatai ita ra taraipatavere rutu. Vosa vearovira rutu vo reo sirova utupata, eisi osa iava vo reo-ia vearovira tarai iraopatavere. <sup>25</sup> ✧ Vosa vo taraio kovo piereve, ira ita uvuiparoi ita vorerivira ourovorea. Ari vosa ro ira viapau garea vai-ia pitureve, ira uvuiparoi ita apotaroverea rutu.”*

*Ovoovo Reo Aue Kovaaro Iava Wit Koko*

<sup>26</sup> ✧ Uva oiso puraroepa voeare, *“Pauto vo Saraaro oiso rutu toupai osa oirato ira wit takuraro vikiparoi vo rasioa-ia. <sup>27</sup> Uva kareroe vokiaro uusisa. Uva avitoa-ia eraoroe osa kovae. Osa viapau vara-ia taraiparoe. <sup>28</sup> Rasito raga iava kovapapeira varao witara. Uva rovvira rovopa vakipa kae rovo piro. Ari va isivaaro iava kuepe viorosa. <sup>29</sup> ✧ Uva vioroepa vo kue. Oa iava rotureva, vo uvare rotupa vuuta-ia tuguraepa.”*

*Ovoovo Reo Mastet Vuruaro Iava  
(Matyu 13:31-32; Luk 13:18-19)*

<sup>30</sup> Uva ita oiso akereva, “*Aa vao oiso toupai Pauto vo Saraaro? Ora aa vo reo ovoovo reo vava ovoovopai, oa iava uvuipatai oai iava ra va-ia roroiopata?*” <sup>31</sup> Oiso rutu toupai voi osa oavu aioa oa oiso vaisipaiveira, mastet. Oeva iava oisoa aisivu pauive ra kovape. Ra rirovira rirope. Gare isivi rutu aisia-ia putepaiveira orekerovu rutu kuearo. <sup>32</sup> Uva vosa kovape, ra kovaro ipape. Ra vara rutu-ia puteve evaora riropavira rutu rao puraoro. Osa iava virata kokioro pitupaive vuavuapasa vao, ora vao epitapaave tapo.”

*Jisas Siposipopaoro Ovoovo Reo Purareva*  
(Matyu 13:34-35)

<sup>33</sup> ✧ Oire uva vo reoro-ia ovoovo reoro voea tavitavireva, oiso ra uvuiave vara uvusa. <sup>34</sup> ✧ Uva ita, viapau oiso voeapa vo reoro aviavi piereva varao ovoovo reoro. Ari vara disaipel irara oaro raga tapo oisoa toupave, ra voea ragapa orekerovu rutu aviavi piepareve.

*Purepa Kiuvu Rite Piereva Jisas*  
(Matyu 8:23-27; Luk 8:22-25)

<sup>35</sup> Ovaiarovi vuri evevei-ia voea disaipel tavireva oiso, “*Irata, ra ouruiara ivirovio ovarata-ia.*” <sup>36</sup> ✧ Uva vo uvuru arova kaea viropa uvuoa-ia rera tapo Jisas. Vo osa oaravivu garepa uvuoro oara voea sirova utuepa. <sup>37</sup> Uva vusireva riroto kiuvu. Oa iava sigato kaero viropa uvuoa sovara iare ora va ivara-ia. Uva gareavi raga kavu piropa, ra agasio uukova uvuoa-ia. <sup>38</sup> Vo osa rera oira vituaro-ia uusiparoepa orave ivara-ia kukue otarapaoro. Uva rera eraopaiva oiso purapaoro, “*Tisa, e viapau vao sovoparivoi oa iava viapau igeipa siraopau? Oa-ia igeipa tutuu pievoi ra kopiio.*” <sup>39</sup> Oa iava Jisas erao ovoiroepa. Uva kiuvu rakote piesa reoroepa ora rirova toruva tavireva, “*Varau ra ora siroi pieu.*” Uva kiuvu rerereva riteoro. <sup>40</sup> ✧ Oa iava Jisas voea akereva oiso, “*Eakepa uriripatai? Ari ita, vosa raria vai tupaive, oire ra viapau uriripata.*” <sup>41</sup> Osa uriri iraopaoro ora voea raga oiso puraaepa, “*Easi iroutoa rutu-a ro, uvare kiuvu rera uvu ovoire ora uukova?*”

## 5

*Tugara Kosi Piereva Oiratoa Iava Gerasa Taere-ia*  
(Matyu 8:28-34; Luk 8:26-39)

<sup>1</sup> Uva Jisas ora rera voeaoro disaipel rereiva ivirovira rovua iava vao Gerasa taere-ia sovara-ia. <sup>2</sup> Oire vosa uvuoa iava rereiva uva oiratoava aivaroivoiva, ira tova urui iava kosiro viropa. Ro ira-ia oisoa tupaive tugara. <sup>3</sup> Uva vao raga oisoa toupave tova urui-ia. Uva viapau oiso ra oiratoa vai uvuoro rera tuukesa vao aue-ia sen iro vai. <sup>4</sup> Ari ita, vokiara rutu-ia oisoa rera vavaearaoro tuuke ragapaive sen iroro-ia. Ora oaravu oara-ia oisoa rera kokotoaro taki ragapaive, ovusa vara rutu tokotokopareve. Viapau rutu irai uvuiparo ra rera tuukereve rera tarai piesa. <sup>5</sup> Oire vo osa vokiara rutu-ia aue-ia aviaviaroro ora vo vokiaroro uva oisoa toupave vo pukuia ora vo tova uruiro. Ra gaupareve ora rera raga ora upopaoro vorarova varaua iava aue-ia aveke ora tatupaoro.

<sup>6</sup> ✧ Uva Jisas tuepaoro tauai ikaureva rerere taku virosa. <sup>7</sup> ✧ Oa iava rirovira oivepaoro oiso puraroepa, “*Apeisi vai ruipapauei ragaire vii Jisas? Pauto Oviitoaaro ro oiso rutu viara-ia. Ragaibe. Vii arepaavo vo Pauto*

✧ 4:33: Jo 16:12 ✧ 4:34: Jo 16:25 ✧ 4:36: Mk 5:2, 21 ✧ 4:40: Mk 16:14 ✧ 5:6: Mt 4:9

✧ 5:7: Ap 16:17; Hi 7:1

vaisiaro sovara-ia oiso, Opeita ragai tekipari.”<sup>8</sup> Oiso puraroepa oiso-ia uvare Jisas rerare oiso puraroepa, “*Oiratoa iava kosi virou eera vii tugarato.*”<sup>9</sup> Oa iava Jisas rera akereva oiso, “*Trouto-a vii vaisiaro?*” Uva rera tavireva, “Vaisia oaa Riro Irara, uvare riro irara igei tugara.”<sup>10</sup> Uva tuupavira oiso raga rera akepareva oiso puraoro, “Opeita igei sigupari tauai vaire.”

<sup>11</sup> Uva oisoa koiempa tapatapa toupave pukuia-ia vatuaro-ia. Oa oisoa aiopaive. <sup>12</sup> Uva Jisas akeiva oiso puraoro, “Igei siguri ra koiie kare sopaaro-ia rokoio.” <sup>13</sup> Uva voea iava vasereva. Oa iava voea tugara kosia viropa vo koiie kare-ia koatasa. Uvava koiie kare ikauoro varaaepa vaesia-ia ora vikisa rovu-ia. Oa iava kopiiapava uuko ovi sovara-ia. Voee rutu uvuiaro erao tuku (2,000).

<sup>14</sup> Uva koiie tokipa irara toriiva vorarore uruiara-ia ora uvarovu tapo tavitavipasa. Oa iava urioaepa aue kekesa vao oa purareva. <sup>15</sup> Uva urioaepa Jisas iare. Oa iava rera kekeiva ira-ia oisoa toupave riro irara tugara, osa varo tuuava pauparoepa ora torevoko rugoo tapo. Oa iava uririaepa. <sup>16</sup> Oire voea-a voeao oea ruvara-ia tugara kosi piereva rera iava ro-ia, oea oearovupa siposipopaiva vao iava, uvare oisoa tugara rera-ia toupave ora aue iava koiie ragui. <sup>17</sup> Oire eva-a oa iava Jisas aruiva, oiso ra uruia oaive iava avaro.

<sup>18</sup> ✧ Osa-a eisi osa iava koataroepa uvua-ia. Uva rera ro ira-ia oisoa toupave tugara ira ruipaparoepa oiso ra rera sirova utuparo. <sup>19</sup> Uva Jisas rerare korooro rera tavireva oiso, “*Avau vore uruia oara ora sara irara oara iare. Ra voea taviri aue iava siraoa oa-ia vo kovo purare Turaro vii-ia.*”<sup>20</sup> Oire eva avaroepa vo uruiro iare Dikapolis oa porearo oiso vaisipaiveira, Katai Tau Uruiro. Uva voo vao iava tavitaviroepa riro kovo oa purareva Jisas rera-ia. Osa iava uruiara rutu tavetaveiva va iava.

### *Vo Jisas Reito Oviivaaro Porete Piereva Ora Iriavu Riakova Iria Rera Varoaro-ia Pitueva*

*(Matyu 9:18-26; Luk 8:40-56)*

<sup>21</sup> Oa iava Jisas iviroroepa ovaratavu iare. Uva riro irara ora guruaepa rera iare. Uva vo raga toureva uuko ovi vatuaro. <sup>22</sup> Uva Jiu vaaro Reo Taisi Uvupa Kepa tokipato urioeroepa. Rera vaisiaro ro-ia, Jairas. Uva Jisas kekeoro takuro viropa vo rera kokotoaro-ia rekuoro. <sup>23</sup> Oa iava oiso puraroepa rirovira rutu rera areoro, “Kakaeva oaapa tutuu piepai ra kopiiio. Vii arepaavoi ra vavaea oara toveri oira-ia, ra va iava poreteo ora tooo vorevira.”<sup>24</sup> Oire eva Jisas rera sirova uturoepa. Uva riro irara vaiterei sirova utuaepa. Oa iava tutututuu piepaiva.

<sup>25</sup> ✧ Uva iriavu riakova iria-ia oisoa kekira koveparo vokiara rutu-ia. Uva oisi raga tupaoro katai tau erao (12) ivaro-ia tuguraopa vo upia purapaoro. <sup>26</sup> Uva riro irara rutu iare oisoa ava ragapao, oiso ra oirapa vo ruvaru purapaive, ra opesipe vo kopii. Uva oisoa voeapa ora vori via pie ragapao. Vo ovusa vo kopii oirare riropape rutu, ovusa ora apota pie ragapao. <sup>27</sup> Uva Jisas iava uvueva, oa iava riro uvuru sovara-ia rera iare koataopa, oiso ra oira porete piereve. Uva varoa vatuaro-ia pitueva vao rera vaaro. <sup>28</sup> Aue iava uvare oira raga oiso ora rugoopaopa, Vosa rera vaaro-ia pitua varoa, ra vearora poreteoro. <sup>29</sup> Uva vo vokia-a eva opesiepa upia. Uva varaua sovoeva uvare varaaepa. <sup>30</sup> ✧ Oisi-a eisi osa iava varaua sovoreva Jisas oiso, Easi iravu iare avai gorua ragai iava. Oa iava ora poreroepa voeare oiso

puraoro, “*Irou varoa-ia pituvoi?*” <sup>31</sup> Uva rera voeaaro disaipel rera akeiva oiso, “E vo uvuruo vurapari oea vii iare tutuu piepai. Uva apeisi iava oiso akepari, Irou to ragai-ia piture?” <sup>32</sup> Oa iava voea vuravurapareva oiso ra ro kekereve ira rera-ia piturevoi. <sup>33</sup> Osa riakova raga va vao ravaeva oa oira-ia karekepa. Oa iava rikerikepaopa uriripaoro. Uva rekuve rera kokotoaro-ia. Oa iava oiraopavira rera tavieva. <sup>34</sup> ✱ Uva Jisas oiso puraroepa oirare, “*Oviiva oaa. Vii vaaro oirao piea vii porete pievoi ravotovira. Avau gavaurea-ia, ari vearouei.*”

<sup>35</sup> Uva eisi puraparoepa ovusa Sinagog tokipato voeaaro poua viropa oiso tavisa, “*Vii oviivaara kopiioi.* Uva uvuipau ra rerere koruu eera Tisato. Ra oirape iria kopiioi.” <sup>36</sup> Uva Jisas voea uvupaoro rera tavireva Sinagog tokipato oiso, “*Opeita uriripau. Ragai oirao pieri.*” <sup>37</sup> Uva voeare koruroepa. Oa iava voea raga oureva oiso-ia, Pita-a ro, ora Jems, ora Jon araokotoaro Jems. <sup>38</sup> Uva karea viropa vao vo Jairus vo kepaaro-ia. Oa iava gauara uvuiva. Uva voea kekereva vo ovusa siraopaaepa gau irapaoro rutu. <sup>39</sup> ✱ Uva Jisas koataroepa. Oa iava voeare oiso puraroepa, “*Eake iraopa gaupata? Ari o kakaeva viapau oiso kopiioi. Iria uusipaai.*” <sup>40</sup> Oire uva rera agesipaiva rutu. Oa iava voea kosi piereva. Uva aitetoarei ora kakaeva aakoaro rera sirova utuaepa, ovusa koataroepa vo uva toupavea kakae kopii. <sup>41</sup> Oire oira vavaeoro-ia pituoro vo reo purareva, “*Talita kumi.*” Oa porearo oiso purapai, “*Tavauruva, ragai vii tavipaa oiso ra toreu.*” <sup>42</sup> Oire uva oira-a eira tavauruva vaviopavira raga toreopa voka ovoisa. Oa iava oira-ia tavetave iraoiva rutu. Oira uvuiaro riroaro aue-ia uvuipaai katai tau erao (12) ivaro. <sup>43</sup> Uva Jisas voea vosireva va iava vao-ia oa purareva oiso, “*Teapi irai uvureve oira iava. Oire ra aioa vai vateta oirapa ra oai aioeve.*”

## 6

### *Viapau Jisas-pa Oisoa Avivikepaave Vo-ia Nasaret-ia (Matyu 13:53-58; Luk 4:16-30)*

<sup>1</sup> Uva Jisas vao kavureva vore rera vo taerearo rutu iare. Oa iava rera sirova utuaepa rera voeaaro disaipel. <sup>2</sup> ✱ Uva Sabat voki tuguraepa. Uva avaroepa siposiposa vo Reo Taisi Uvupa Kepa-ia. Uva tavetave iraoipaiva rera vo siposipoaro uvupaoro. Osa iava oiso puraaepa, “*Ovu irao ro vo pitupituro ourevora? Iroutoa vai rera vaterevora vo tarairo? Ora vao ravoto kovo, oa purapare ora rera vavaeoro-ia?*” <sup>3</sup> ✱ Easi viapau oiso kepa paupato rera ro-ia Maria oviitoaaro, raa? Uvare oiratoa raga-a ro-ia. Ari ita, araoko irara voeao Jems vase ora Josis, ora Judas, ora Saimon, ora taataa riakoaro vairo airoa vigei tapo toupaveira.” Uva rerere kasipuaepa. <sup>4</sup> ✱ Uva Jisas voeare oiso puraroepa, “*Vosa oearovu voeao ouruiovu raga iava, evoea-a oea profetatoara avivikepaaveira. Ari viapau oiso voeao rera vo taerearo rutu-ia tou irara rerapa avivikepaaveira, ora sara irara oaro, ora voeao oea vo aao vo kepaaro-ia toupaveira.*” <sup>5</sup> Osa iava viapau uvuipa ra riropa ravotoaro vai purapareve vao. Ari uvuipa ra vavaea raga tovopareve voearovio-ia upiapa irara voea porete piepaoro. <sup>6</sup> Uva Jisas tavetave iraoipareva vao vo vovouroaro-ia varao oirao pie asa vovouro. Vo osa avaroepa siposiposa uruiara rutu-ia oirarapa.

### *Jisas Katai Tau Eraopa Disaipel Kovo Vateroepa (Matyu 10:5-15; Luk 9:1-6)*

7 ☆ Uva voea voeao katai tau erao (12) oeare keeraroepa. Oa iava voea arureva toatoa pievira. Uva voeapa gorua karoporeva auere ra va iava tugara kosi piepaive. 8 Uva goruvira voea tavireva oiso, “*Teapi oaravu avu vai kaepatavere vokapaoro. Ari aue raga tooroara vai. Viapau aue breteara vai ora oapara vai ora moniara vai.*” 9 Ari aue raga tasipara. Ora viapau oiso ra vaiterei kuvupatoarei, ari kataitao raga. 10 Vosa ourui-ia kareta virora, uvuipatai ra koatata katai kepa vai-ia. Evoa uva toupaooro uvuipatai ra oirara-ia kovopata uruia sovara-ia. Oire voava visii rutu ita kosita viro ita ra avata. 11 Vosa ourui visiipa reasipape visii uvu arapa, ra voa kavuta ora visii iava kokotoara iava poupou tovotoveoro, voea vo kaureoroaro reesiro.” 12 ☆ Uva avaaepa siposiposa oiso ra oearovu rutu iava sopaua poreive. 13 ☆ Uva riro irara rutu iava tugara kosi piepaiva. Uva gorua ovoovopaooro korovo oviro tovopaiva voeao-ia oea upiaarava toupaiava. Oa iava porete ovoipaaepa.

### *Jon Baptais Kopiiroepa*

*(Matyu 14:1-12; Luk 3:19-20, 9:7-9)*

14 Uva King Herot uvureva varao iava, uvare uvarovu rutu Jisas vaisiario virireva. Osa iava eisi oearovu oiso puraapaaepa, “Easi pasi Jon Baptais vai-a eera, ira vorevira tootooro. Ira uvuipa ra evo kovoro ravoto kovoro purapareve ita.” 15 ☆ Vo osa oearovu oiso purapaaepa, “Easi Ilaija-a eera profetato.” Osa oearovu oiso purapaaepa, “Profetatoa rutu-a eera oiso rera osa tuariripato.”

16 Oa iava Herot oiso puraroepa, “Easi Jon vai-a eera ro ira tokoavora, ira vorevira toreroe.” 17-19 ☆ Vao iava osa Herot voea arureva tuaririvi oiso ra rera rauive aue Jon. Ra rera tuukeive vo tuukepa kepa auepa Herodias riakovaoro Filip araokoto iria ita oureva Herot. Uva Herodias aveave irapaopa rirovira rerare, uvare Jon Herot-re kasipuroepa oiso puraoro rerare, “Vuria purari ora vii araokotoaaro riakooro. Viapau oisi torevokopapeira. Oa iava Herodias oiso ruipapaopa ra Jon kopiuro. Uva viapau uvuipaopa. 20 Vo osa Herot avivikeparoeapa Jon-pa, uvare rera-ia taraiparoepa oiso, Vearo vovouto ora vearo sopato. Oa iava vearovira rera tokipareva. Oire vosa uvureva, oa iava ruruvutuepa rugoooro rerare. Oa iava oiso ruipaparoepa ra rera rutu tuu pievira rera uvureve.

21 Uva pou piropa vo vuutao oa iava vo vokia kavauroepa Herot, ovokia-ia uvuiopa oiso ra oira vo ruipaaro kosi pieeve. Uva vo vokia voeapa aioa purareva reipa irara oaro, ora ami iava ofisa irara, ora oira vasi irara vava Galili. 22 Oire uva koataopa Herodias oviivaoro rekurekusa. Osa iava eisi Herot vearovira rutu oira vo rekurekuaro tuereva ora voeao oea rera tapo paupaaepa. Uva reito king oira tavireva tavauruva, “Vosa eakepa ruipapau, ra vii vatea va.” 23 ☆ Uva oiso puraroepa oirare reo ovoi puraoro, “Vao oa areri ragai ruvara-ia oa-ia uvuiparai ra viipa va vatea. Eagara vosa eake vatea ragai varaaro iava oara tokipaaveira, oara-ia pute piepa vai rutu-ia uvuiparai ra vii vatea oai.”

24 Oire uva va iava avaaepa aakova akesa oiso, “Eake vai arepaa?” Uva aakova oira tavieva, “Ari Jon Baptais iava kukue.” 25 Oa iava ikauvira rutu voreopa vore reito. Uva oiso puraopa, “Vao-ia oapa ruipapara. Ra va vateri ragaipa Jon Baptais iava kukueva, ra rera kukuearo tovoru aue-ia tauo vai.” 26 Uva rerare sopaua vavataepa rutu, uvare viapau oiso uvuiparoepa ora rera vaoro reo ovoi gasireve, vao oa purareva oira uvuru osireiario-ia.

<sup>27</sup> Oa iava iravu arureva voeao iava viurupa irara rera voeaaro. Uva rera tavireva oiso ra Jon kukuearova urioro. Uva avaroepa rera tokosa tuukepa kepa-ia. <sup>28</sup> Uva vo kokova voreroepa tauo-ia. Oa iava vo kokoa vatereva oirapa tavauruva. Uva vo kokova avaopa aakova vatesa.

<sup>29</sup> Uva disaipel irara voeao Jon voeaaro rera iava uvuoro urioaepa vo kopii ousa. Oa iava rera tovaiva vo tova urui.

*Jisas Riro Irara Rutu Aio Piereva Vo Vavae Tuku Rutu (5,000)*  
(Matyu 14:13-21; Luk 9:10-17; Jon 6:1-13)

<sup>30</sup> Uva aposel irara vorevira kareaepa Jisas iare rera tavitavisa varao iava oara puraiva ora varao oara iava siposipoiva. <sup>31</sup> ✧ Uva oirara rutu ora voreripaaepa. Oa iava Jisas-pa ora rera voeaaro aposel viapau vuutaa vai toupaiiva oiso ra oai-ia aioive. Eisi osa iava Jisas voea tavireva oiso puraoro, “Oire irata ra vigei raga avavio uvavire kuvau tapi vai, ra voa reareata gare visivi.” <sup>32</sup> Oa iava ipaaepa uvuoa-ia. Oa iava rera tapo avaaepa uvavure kuvau tapi.

<sup>33</sup> Uva riro irara rutu voea tueiva vo uva avaaepa. Oa iava taraiiaepa voea-ia. Uva rovoaepa ikaupaoro vova atoiaro oaive. Osa iava Jisas-re vage rovopaoro voa poua viropa. <sup>34</sup> Oa iava Jisas vera uviroroepa rogaraua iare, vo osa riro irara rutu kekereva. Oa iava oiso voeapa siraroepa, uvare oiso rutu paepa voeapa osa sipsip kare, voeao oea viapau tokipatoa vai. Oire uva Jisas rovoroeapa voea siposipopaoro riroara rutu iava. <sup>35</sup> Uva ravireo rokosa aueparoeapa, oa iava disaipel irara urioaepa rera iare rera tavisa oiso, “Voavi-a vo-ia kuvau tapi. Uva vokiei vigeire. <sup>36</sup> Voea aruri ra avaaave uvaire ora ouruiroi iare, ra aioara vai voriiie ora voeapa.” <sup>37</sup> ✧ Oa iava voea tavireva oiso, “Voea vateta aioara vai.” Uva rerare oiso puraepa, “E apeisi-a, ruipapau ra vaova avaiio vao-ia erao vovoto kina (K200) bret vorisa voeapa, eke?” <sup>38</sup> Uva voea akereva, “Aa voviroa aue bret, oara epao visii ruvara-ia?” Oire uva va iava rera taviiva oiso, “Easi vo vavaevi raga aue bret ora kataitoarei ataritoarei.”

<sup>39</sup> Uva voea tavireva oiso ra voea pau pieive isiso kou-ia. <sup>40</sup> Uva pauaepa guruvira roopavira. Oeavu aue-ia uvuipaaepa katai vovoto (100), ari oeavu aue-ia uvuipaaepa vo vavae tau (50). <sup>41</sup> Uva bret vavae oureva ora ataritoarei. Uva viara-ia vurareva vo vuvuiua vuurapa vaisi puraoro. Oa iava vara puteputereva. Uva vara vatereva disaipelpa, oiso ra voea roo pieive vara rutu-ia. <sup>42</sup> Oa iava voea oirara rutu aiooro vukuaepa. <sup>43</sup> ✧ Oa iava vara ururukoaro guruguruiva. Uva aue-ia uvuiiepa katai tau erao (12) pekuri. <sup>44</sup> Voea uvuiaro voeao oirara raga ouvurua bret aioiva aue-ia uvuipaaepa vo vavae tuku (5,000) oirara.

*Jisas Toko Rovu Ivava-ia Vokareva*  
(Matyu 14:22-23; Jon 6:15-21)

<sup>45</sup> ✧ Uva Jisas voea disaipel aru ovoireva uvuoa iare, oiso ra iraaave eisire Betsaida iare voea iava vaseoro oirara. <sup>46</sup> Oa iava voeava tavariooro varirisa iparoepa pukuia-ia. <sup>47</sup> Uva vokiepa rerare osa uvuoa touvira vokapaiva toko rovu vuutaro-ia, vo osa Jisas raga touvira vo pukuia-ia toupaveva. <sup>48</sup> ✧ Uva voea tuereva Jisas osa ora takau piepaaepa tuaapaoro kiuvu iare. Oa iava voea iare vokipaua rutu vokiroepa vo osa ravireo kae viro asavira toureva. Uva avaroepa vo toko rovu ivava-ia

vokapaoro voeava aivarosa. <sup>49</sup> Uva rera siituepaiva osa uuko rovu ivara-ia vokapaoro urioroepa. Uva oiso keapaaepa, Rera urauraaro. Uva rerapa uriripaaepa gaupaoro. <sup>50</sup> ✧ Vao iava uvare rera vurapaoro rirovira rutu uriri iraopaaepa. Oa iava voeare reoroepa oiso puraoro, “*Ora tape pieta. Opeita uriri ragapata. Easi, ragai-a vao,*” osa puraroepa Jisas voeare. <sup>51</sup> Uva vo osa iparoepa uvuoa-ia, uva kiuvu opesiroepa. Osa-a eisi osa iava rera-ia tavetave iraopaiva. <sup>52</sup> Ari ita, uvare viapau roroioepaaepa vo kovo-ia oa purareva bret-ia. Osa iava eisi rera eveivori rera vo goruaro iavirava. Ari voeare vavagisivira raga toupaiava rugooara.

*Upiapa Irara Porete Piereva Jisas Genesaret-ia*  
(Matyu 14:34-36)

<sup>53</sup> ✧ Uva iviroaepa. Oa iava veraa viropa vo Genesaret urui-ia. Oire uvuoa tuuiva vo toko rovu vatuario-ia. <sup>54</sup> Uva vera uviroaepa, oa iava rera evei ovoiiiva. <sup>55</sup> Uva tariripaaepa voraro rutu upiapa irara kaepaoro rakorako ururo-ia rera iare. Uva ouruurovu iava uriopaaepa Jisas iava uvupaoro vore uva toupaveva. <sup>56</sup> ✧ Oire oa iava Jisas uvarovure oisoa avaparo garepa ururovu iare ora riropa uruiro. Uva oisoa upiapa irara tovopaive vo uupa tapiro. Uva rera arepaiva oiso ra varoa vatuario-ia pitupaive ra porete ovoipaave. Oa iava va-ia pitupaiva, uva porete ovoipaave voea rutu.

## 7

*Pauto Vaaro Reo Taisi Oisoa Voea Aao Iraraaro Vo Taviaro-ia Putepaive*  
(Matyu 15:1-9)

<sup>1</sup> Uva Farisi rera ruvara-ia ora guruaepa ora Reo Taisi-ia tarai irara, oea vova urioaepa Jerusalem-ia. <sup>2</sup> ✧ Oa iava eva disaipel irara tueiva rera voearo osa aiopaiva vavae sisu asavira raga, vo pitupituo Farisi vaoro gasipaoro. <sup>3</sup> Uva Farisi-pa irara ora Jiu-pa irara vo pitupituro-a vao-ia vosa viapau vavaeara sisu rovoive, ra viapau uvuipai ra aioive. Aue iava aao irara vo siposipoaro oisoa sirova utupaave. <sup>4</sup> Ora vosa aivaropa tapirova kareave, ra viapau vavae sisuave, ra ita viapau aioive ita. Uvare vo pitupituro rutu-a varao voea aao iraraaro varaaro oisi, vao kap sisupa, ari vao pitoka sisupa, ora tauoara varao oara oisoa purapaive bras-ia. <sup>5</sup> Uva Farisi ora Reo Taisi-ia tarai irara rera akeiva oiso, “Uva apeisi iava vii voearo disaipel viapau vigei aao iraraaro vo pitupituroaro sirova utupaai? Uva viapau vavae sisuai, oa iava aioivoi.” <sup>6</sup> ✧ Uva Jisas voeare oiso puraroepa, “*Oiraoei ravaa reo vao profetato Aisaia oa-ia torevokovira rutu visii reestoro va rigatoreva riro ratarataa vovou irara visii.*

*‘Voea rutu raga vaisiaro kae pie ragapai gisipoara raga iava, osa voea sopaaro tauaipai rutu ragaipa. 7 Oirara raga vo siposipoaro iava siposipopaiveira, ra oiso purapaave, Va vao-ia Pauto vo reoaro. Eisi osa iava ragaipa akukuvira rutu lotu ragapaaveira.’*

*Eisi osa puraroepa Aisaia. 8 Oa ita kavutava Pauto vaaro Reo Taisi oirato raga vo siposipoaro sirova utupasa.”*

<sup>9</sup> Uva voea tavireva, “*Pauto vaaro Reo Taisi gasi iraopatavoi, oisore ra ora visii vo pitupituro raga tokipata. 10* ✧ Uvuta! Moses oiso puraroepa, *‘Aako oarapa ora avivikepau ora aiteara. Ari ro ira aiteoarei takaupareve, eera-a ira kopii pieivere oearovu.’*

✧ 6:50: Mt 9:2 ✧ 6:53: Jo 6:24-25 ✧ 6:56: Mt 9:20 ✧ 7:2: Lu 11:38 ✧ 7:6: Ais 29:13

✧ 7:10: Eks 20:12; Diu 5:16; Lev 20:9

11-12 *Vo osa visii oiso purapataveira, Aako ora aite viapau uvuiparai ra vei vatea varao, uvare Pautoa-pa vara rutu vate rovoavora.* <sup>13</sup> Vosa oisi piepata eisi, oire eva-a oa-ia Pauto vaaro Reo Taisi akaipa piepataveira visii vo pitupituroaro rigapaoro oearovu iare. Uva riroara rutu-a oara purapataveira.”

*Varao Iava Toupai Oara Sopaura Vuri Piepaiveira*  
(Matyu 15:10-20)

<sup>14</sup> Uva Jisas voeare keeraroepa ita. Oa iava voeare oiso puraroepa, “Visii rutu uvuta! Ra roroiota vao-ia. <sup>15</sup> Viapau oiso vao oa aiopare oirato oa rera sopaaro vuri piepaivoi, ari vao-a oa rera sopaaro iava kosipa piroi. Evara-a oara oirato vuri piepaivoi. <sup>16</sup> [Vosa irai-ia kokitoa vai karuvira toupaveve, vearopai ra va uvureve, uvare uvupatoa ita kokito.]”

<sup>17</sup> ✧ Uva koataroepa kepa-ia oirara rutu arova ratau. Oa iava vao disaipel rera voeaaro rera akeiva vao iava ruu reo. <sup>18</sup> Oa iava voeare oiso puraroepa. “E viapau taraia vaiei visii-ia oiso osa evoea oearovu? Uva viapau vara eveipatavoi varao oirato sopaaro-ia ora kiupai. Uva viapau rera vuri piepaivoi. <sup>19</sup> ✧ Ari ita, aue iava uvare viapau ora kiupai sopaua-ia, ari vo raga sare-ia. Ra vorevira vusive.” Uva vo reo-a vao oa-ia aioara ruture oiso puraroepa, “Vearoara varao aioara rutu aiopasa.” <sup>20</sup> Uva va-a vao oa iava oiso puraroepa, “Ari vaoa-ia vuri vovou oa oiratoa iava kosipapi oa rera vuri piepai. <sup>21</sup> Ari ita, vo vuri rugooro-a varao oara kosipapi oirato sopaaro iava vuri rugorugooro oiso-ia, otopa pitupituro, kaviru, oira upo, riako riirii, <sup>22</sup> ✧ Oearovu vaaro riirii, vuri vovou, keakea reoro, getegete, roruoru, reo toga, egaega, ora kokoropa vovou. <sup>23</sup> Evara rutu oara kosipa piroveira visii sopaaro iava oara oirara vuri piepaivoi.”

*O-ia Finisia-pava Iria Jisas Oirao Pieva Rutu*  
(Matyu 15:21-28)

<sup>24</sup> ✧ Uva evoava ita toparo viropa Jisas aue iare avaro Taia-ia. Uva vao okepavu-ia voea asavira koataroepa. Ari ita, viapau oiso uvuiparoepa ra tou ragareve rera raga. <sup>25</sup> Oa iava vo voki raga-ia eva iriavu rera iava uvuoro rera iare urioopa, iria oisoa oviivaaro-ia tugara toupaveve. Oa iava rera kokotoaro-ia Jisas rekueva. <sup>26</sup> Oire uva osaravu raga iava oira, vo sarao vo-ia Finisia oea oisoa Siria taere-ia toupaveve. Iria Jisas areeva oisore ra tugara kosi piereve oviiva iava. <sup>27</sup> Uva oiso oira tavireva, “Kakae vure aio pie rovopai. Viapau oiso vearopai ra kakae vure vo kurooro aio kurooro oupe vava vikisa kaakau karepa.”

<sup>28</sup> “Oiraopavira ita Turaro,” osa puraopa riakova, “Uvare kaakau kare uvuipaai ururukoara raga aiopasa varao oara kovepapeira vova tebol iava kakae vure vaaro.”

<sup>29</sup> Oa iava Jisas oiso oirare puraroepa, “Kareu ari tugarato kosirovi oviiva oara iava, uvare vearo reo purari.” <sup>30</sup> Uva pouo viropa oira vo kepaaro-ia. Oa iava oviiva kekeeva urua ivara-ia uusivira, vo uvare tugarato oira iava kosiro viropa.

*Jisas Uvagito Vaaruuto Vearo Piereva*  
(Matyu 15:29-31)

<sup>31</sup> Oire va-a eva oa iava vorevira virireva Taia taere iava vore Saidon-ia putesa aue iare Galili Rovu. Ora aue-ia tapo putereva Katai Tau Uruiro-ia, Dekapolis. <sup>32</sup> ✧ Uva iravuva urioaepa uvagito vaaruuto. Oa iava Jisas areiva



oiso ra rera-ia vavaea tovoreve. <sup>33</sup> ✧ Oa iava voea arova rerava avaroepa kuvau tapire. Uva voa sipareo tovoreva rera kokiario-ia ora ruiroepa. Oa iava aia ita arevuotoa-ia pitureva. <sup>34</sup> Uva vuvuiua-ia vurareva. Uva vovou iparoepa rerare oiso puraoro, “*Efata.*” Oiso ragavira oa porearo toupai, “*Auero rutu karu piroi.*” <sup>35</sup> ✧ Uva karu ovoiro viropa kokito rerare, osa arevuoto tapo vase ovoireva. Osa-a eisi osa iava torevokovira reo ovoiroepa. <sup>36</sup> ✧ Uva Jisas riro goruvira rutu voea vosi ragareva va iava vao oiso ra viapau iraiapa taviave. Ari ita, riro goruvira rutu voea vosi ragapareva vo osa ora gorupaaepa rutu va iava vao siposipopaoro. <sup>37</sup> Uva tavetaveiva rutu oiso purapaoro, “*Avoeao, vearoa rutu purarevo ro-ia voeao uvagi irara oea uvu piepaoro, ora vaaruu irara reoreo pierevo,*” eisa osa purapaaepa.

## 8

### *Jisas Vo Resura Tuku Rutu (4,000) Aio Piereva (Matyu 15:32-39)*

<sup>1</sup> Uva vo vokia-a vao oa-ia riro uvuru toupaiava. Viapau aioa vai voeapa. Uva voeare keeraroepa rera voeaoro disaipel voea tavisia oiso, <sup>2</sup> ✧ “*Siraoparai voeaopa uvare vo peva-ia voki tuivoi vigei tapo. Uva viapau aiopaivo.*” <sup>3</sup> Vosa voeare koruvio, ra voreave vorarore ora voea vo uruiroaro. Ra raveraveave vo raivaaro, uvare oearovu riro kaekae tapirova uriopaaerao.” <sup>4</sup> Oa iava disaipel rera akeiva oiso, “*Uva ovu vai voea aio piepai. Ari raaka tapi raga-a vo.*” <sup>5</sup> ✧ Eisi osa iava oiso voea akereva, “*Ovirovua bret oa epao visii ruvara-ia?*” Oa iava oiso puraaepa, “*Ari erao vatara.*”

<sup>6</sup> Uva voea pau piereva vo rasito. Oa iava aue oureva erao vatara (7) bret. Uva vara-ia vearo vaisi purareva vara puteputeoro. Osa iava vara vatereva rera voeaaropa disaipel, oiso ra voea vatevateive taru. <sup>7</sup> ✧ Uva toupaiava atari kare gare karevi raga. Uva vo kare-ia ita aia vearo vaisi purareva. Oa iava voea tavireva oiso, “*Voea vateta atari kare.*” <sup>8</sup> Uva voea aioivoiva, vukuaepa. Oa iava ururukoara guruiva erao vatara pekuri agasi pieoro vara-ia. <sup>9</sup> Uva voea rutu uvuiaro-a voea oiso toupaiava, vo resura tuku (4,000). <sup>10</sup> Oa iava voeare koruroepa. Uva rera tapo voeava tavari ovoiro uvuoa-ia ipa ovoiroepa ora disaipel irara tapo vore avasa vo Dalmanuta taere.

### *Vo Oearovu Jisas Arepaiva Oiso Ra Ravotoara Vai Kekeive (Matyu 16:1-4; Luk 12:54-56)*

<sup>11</sup> ✧ Uva Farisi-pa irara urioaepa rera akesa oiso, “*Ruipapaiei ra ravotoa vai purari vo goruo kareke pieoro vuvuiua iava.*” Oisi-a eisi osa kokarapaaepa. <sup>12</sup> Oa iava Jisas-re sopaua vavataepa. Osa iava oiso puraroepa, “*Eake vaire voeao vo vuutao iavapa irara ravoto arepaai? Oiraopavira rutu oiso visii tavipaavo, Viapau rutu uvuiapai ra ora ragai vo ravotoaro vituaro kareke piepaa visiipa.*” <sup>13</sup> Oa iava voea arova voa kae viroroepa uvuoa iare. Uva avaroepa ivirosa ovaratavu iare.

### *Jisas Ovoovoa Purareva Yis-ia Vao Farisi-pa Irara Ora Herot (Matyu 16:5-12)*

14 Uva disaipel ovauaepa auere bret ora voeapa osa kataiavi raga toupaiua vo uvuoa. 15 ✨ Osa-a eisi osa iava Jisas voeare oiso puraroepa ovoovovira, “*Vaopa yis vatatopopatai Farisi-pa irara vaaro ora ro Herot.*” 16 Uva oiso puraaepa ora voea raga, “Aue iava ita oiso vigei tavirevoi, uvare viapau bretea vaiiei.” 17 ✨ Uva Jisas vo reo sovoreva, oa iava oiso puraroepa, “*Apeisi iava eisi ora reopatai oiso, Viapau vigei bretea vaiiei? E viapau sovopata ora viapau taraipatai? E sopaura oavisii vavagisipai?*” 18-19 ✨ Ari ita, osireiara oavisii epao, uva viapau vara iava vurapataveira. Ora kokiara oavisii, uva viapau vara iava uvupataveira. E viapau vaore rugoopatai oa-ia vo vavae tukupa (5,000) vo vavaea bret puteputeavora. Uva ovirovua pekuri oara agasi pietavora?” Oa iava rerare oiso puraaepa, “Katai tau erao (12) aue pekuri.” 20 Eisi osa iava voeare oiso puraroepa, “*Ari ita, ovokivu-ia resura tuku (4,000) vao aioivora erao vatara bret. Uva ovirovua aue pekuri oa agasi pietavora aue-ia bret ururukoro?*” Oa iava oiso puraaepa, “Erao vatara.” 21 ✨ Osa iava eisi voea akereva oiso, “*E tovira vo kovo vituaro iava taraitavere vao-ia, raa?*”

### *Jisas Voosito Vura Piereva Betsaida-ia*

22 ✨ Uva Betsaida urui-ia poua viropa. Oa iava iravu sipoiva rera iare voosito. Uva Jisas erapeiua oiso ra rera-ia pitureve. 23 ✨ Oa iava Jisas rera vavaearo-ia pituoro rerava kosiro viropa uruia iava. Uva Jisas rera osireiara-ia ruiroiva, rera-ia vavaearei tovoreva. Oa iava oiso rera akereva, “*E oavu avu vai vurapari?*” 24 Uva voosito vurareva viara-ia oiso puraoro, “Ari ita, oirara siituepaavoi oea vokapaivoi. Uva voeapa oisi pai evaora oara vokapaivoi.” 25 Uva Jisas voverivira ora rera iava vavaearei rera-ia ita tovoreva. Oa iava rera ro voosito tuupavira vurareva. Uva porete ovoiroepa roroiavira vuravura ovoiro. 26 ✨ Osa iava eisi Jisas rera aruoro oiso puraroepa, “*Kareu vii vo kepaaro iare. Ra opeita vo uruio iare vorevira voreu.*”

### *Pita Jisas Vaisireva Oiso, Kraisi* (*Matyu 16:13-20; Luk 9:18-21*)

27 ✨ Uva Jisas avaroepa rera voeaaro tapo disaipel vo urio iare vo Sisaria voa raga Filipai. Uva voare avapaoro voea akereva oiso, “*Apeisi oirara ragai vaisipaiveira?*” 28 Uva oiso rera taviiva, “Ari oearovu oiso purapaaveira, Jon Baptais eera, osa oearovu oiso purapaave, Ilaija eera ro profetato. Ari oearovu oiso purapaaveira, Vii iravu voea iava profet irara.” 29 ✨ Oa iava voea akereva, “*Ari apeisi visii raga ragai vaisipata?*” Oa iava Pita oiso puraroepa, “Ari vii-a Kraisi ro Ropoto viigoa arureva Pauto vore.” 30 Uva voea vosireva oiso, “*Opeita eisi ragai iava oearoipa tavipatavere.*”

### *Ravaavira Voeapa Tavitaviroepa Ora Rera Vaaro Iava Kopii Jisas* (*Matyu 16:21-28; Luk 9:22-27*)

31 Va vao isivaaro iava voea siposipooro rovrovepa ora rera iava oiso, “*Oirato Oviitoaaro riroara siitokaara ourevere. Irare isivaavere taru oira vasi irara, ora pris irara voeao reipa irara, ora Reo Taisi-ia tarai irara, ora rera upoivere. Ra vo peva pie voki-ia torero vorevira.*” 32 ✨ Uva poeravira eisi voea tavirevoiva, Pita rera-ia pituoro Jisas oureva rera tape piesa oiso puraoro, “Opeita oiso purapau.” 33 Uva voeao disaipel vuraso ora

✨ 8:15: Lu 12:1 ✨ 8:17: Ais 6:9-10 ✨ 8:18-19: Jo 6:13 ✨ 8:21: Mk 6:52 ✨ 8:22: Mt 11:21  
 ✨ 8:23: Mk 7:33 ✨ 8:26: Mt 8:4 ✨ 8:27: Jo 6:66-69 ✨ 8:29: Jo 6:69, 11:27 ✨ 8:32: Jo 18:20

poreroepa. Osa iava Pita vo rugoaro torevokopasa oiso puraroepa, “*Seten, ragai sivaaro-ia ora tovou. Viapau rutu rugoopauei Pauto varaarore. Ari varao ragare rugoopau oirato varaaro,*” osa puraroepa Jisas.

<sup>34</sup> ✧ Oa iava oirara ruture keeraroepa ora disaipel irara ora rera iare. Uva voeare oiso puraroepa, “*Vosa ro ira vovouparo ra ragai sirova uturo, oire ra ora rera iava vaisia vara pie rovovere. Oa iava uvuipa ra ora rerapa vavata siitoka kaereve, oiso osa vao evao parikou ragai sirova utupaoro vokiara rutu-ia.*” <sup>35</sup> Ari ro ira tootooa virivaripareve, oava eva opesiroverea tootooaro. Ari ro ira tootooaro vatereve vo oearovupa ragai vo ruipaaro sirova utupaoro ora vao iava Vearo Siposipo eera-a ira tootooaro tapo virivarivere taru. <sup>36</sup> Aa vao-a vearoa oa ourevera oirato vo rasio-ia, vo rara auero rutu varao vo rasio iava oureve, ovusa tootooa oaro rutu viki ragapareve? <sup>37</sup> Uva eake vai ourevera vorevira tootooaro-ia tavariovira? <sup>38</sup> ✧ Ro ira ragaipa ariiro ora ragai siposipoaropa tapo vo oearovu osireiario-ia voeao iava riro otopa irara ora voea vuri vovou irara, irapa ita eera utupaua Oirato Oviitoaaro ariiroverea vo vokio-ia oa-ia voreravere vo Aiteto vaarova keraria, ora voeao tapo tugoropa irara ensel irara.”

## 9

<sup>1</sup> ✧ Uva Jisas voea tavireva oiso, “*Oiraopavira visii tavipaavoi, Oearovuei visii iava oea toupai vo-ia oea kopii asavira toupaoaro Pauto vo Saraaro keke rovopaivere, vo osa goruvira karekepe.*”

*Jisas Iava Varaua Sisikorevira Karekeepa*  
(Matyu 17:1-13; Luk 9:28-36)

<sup>2</sup> ✧ Uva katai vatara vokiro putevoiva, Jisas Pita vase tapo iparoepa ora Jems ora Jon pukuia iare riro pukui vo uva varaua rera iava ora tavarioepa. <sup>3</sup> Varoara tapo oara sisikoreva. Uva viapau oiso irai vo rasio iava ra oisi eisi sisikoreve osa evara varoara. <sup>4</sup> Uva Ilaija vaiou ora Moses ora karekesiepa. Uva vaiiterei siituepaiva ovusa Jisas tapo ora reopasiepa. <sup>5</sup> Oa iava Pita Jisas-ore oiso puraroepa, “*Tisa, vo toupai vearovira. Uva igei uvuipaiei ra kepa peva vai pauio oiso, viipa okepai, ari Moses okepai, ari Ilaija okepai aue guruva keparo vai.*” <sup>6</sup> Oisi-a eisi osa pura ragaroepa Pita uvare rirovira rutu uririparoepa. Oa-a eva oa iava viapau vearovira rutu reoroepa. <sup>7</sup> ✧ Uva rukuta voea ruueva, osa oavu reo guruko karekeepa rukuta sovara-ia, oa-ia oiso puraroepa Pauto, “*Eera rutu ragai Oviitoaaro ira kaviko iraopaaveira rutu. Ira uvu iraopata.*” <sup>8</sup> Osa iava ora vura ragapaapepa. Uva viapau oiso iravu avu vai kekepaiva, ari Jisas raga.

<sup>9</sup> Uva vo osa varapaapepa pukui iava, uva Jisas voea vosipareva oiso ra viapau oearoi tavipaivere vao iava oa kekeivoi. Ari vo raga osa Oirato Oviitoaaro tore rovorovere kopii tapi iava. Uva oisi-a eisi osa ora rera raga iava voea tavireva. <sup>10</sup> Uva vo tavi uvu ovoiiva, oiso ragavira ora akepaapepa, Eake rutu-a torea vituaro porearo? <sup>11</sup> ✧ Oa iava rera akeiva oiso puraoro, “*Uva ari eakere Reo Taisi-ia tarai irara oiso purapaaveira, Ilaija ira urio rovorovere?*” <sup>12</sup> ✧ Osa-a eisi osa iava voea tavireva oiso, “*Oiraopavira ita oiso osa ragaipa irarovere Ilaija, ira auero rutu torevokoreve. Ari apeisi vo rigato oa oiso purapapeira, Ro-ia Oirato Oviitoaaro ira taru siitoka ourevera, ora rera akaipa piepaiveira?*” <sup>13</sup> Ari ita, visii tavipaavoi oiso, Ilaija ira urioeroa voviri. Uva oirara oisoa ora voea raga vo ruiparoaro sirova

✧ 8:34: Mt 10:38; Lu 14:27 ✧ 8:38: Mk 13:26 ✧ 9:1: Mt 24:30; Lu 22:18 ✧ 9:2: Mk 5:37  
✧ 9:7: Mk 1:11; 2 Pi 1:17-18 ✧ 9:11: Mt 11:14 ✧ 9:12: Sam 22:6; Fl 2:7

oisoa utupaave. Eisi osa vara sirova utuaiva, opitupiturovu rutu puraiva rera-ia oiso osa Tugoropa Vuku purapai.”

*Jisas Viovokotoa Iava Tugarato Kosi Piereva  
(Matyu 17:14-21; Luk 9:37-43)*

<sup>14</sup> Oire uva vo peva evoea disaipel iare poua viropa. Uva voa riro irara rutu oirara kekeiva osa voa ora gurupaaepa voeao tapo Reo Taisi-ia tarai irara, oea disaipel irara tapo ora reopaaepa ora kaureopaoro. <sup>15</sup> ✧ Ora iava voea rutu Jisas kekeiva rera-ia tavetavepaoro. Uva ikauiva rerava ora reosa. <sup>16</sup> Uva voea disaipel akereva Jisas, “*Eake-ia evoea tapo ora reopaoro voeava ora kaureopatai?*”

<sup>17</sup> Uva iravu voea iava Jisas iare urioroepa. Oa iava rerare osa puraroepa, “Tisa, ragai oviitoaro vaaruoto ira vaaru piepareveira vurito tugarato. Irava uriorai vii iare. <sup>18</sup> Ovuutarovu rutu-ia vurito tugarato rera-ia goruvira rutu pitupaoro rera-ia vikipareveira rasiuaarore. Oa iava ruiruisoara karekepapeira rera gisipoaro-ia, ora tapo vo osa ora rera iava reuriara aiopareveira. Vo osa ora rera iava varaua rutu tuukaue. Uva eva-a oare vii voeaoro ake ragaavora disaipel. Uva viapau oiso uvuipaerao ra rera kosi pieve tugarato.”

<sup>19</sup> Uva Jisas vo reo uvurevoiva, voeare oiso puraroepa, “*Avoeao! Visii vao-ia visii goa viapau oirao pie vovou vai toupai. Ovirovuro-ia vuuta uvuiparai ra visii tapo toupaa. Ora ovirovuro-ia vuuta uvuiparai ra visii ateate piepaoro ragai eisi piepata? Viovokotoava uriota eera ragai iare.*” <sup>20</sup> ✧ Uva rera iare rerava avaaepa. Uva Jisas vurareva tugarato, oa iava kakaeto tuutuusi piereva. Oa iava koveroepa rasiuaaro vereverekooro ruiruisopa akutaoro.

<sup>21</sup> Uva Jisas aitetoto akereva oiso, “*Ovirovua voki oa-ia oiso tourevora?*”

<sup>22</sup> Oa iava Jisas tavireva aitetoto oiso, “Ari ita, riroara rutu vokiara ora-ia oisi raga rovoroepea, osa rera tovopareveira tugarato eto kasiro-ia ora vo uuko oviro-ia, oiso ra rera kopii pieveve. E uvuipauei oavu avu vai purasa ra vegeivipa siraou vegei tauvasa?” <sup>23</sup> ✧ Eisi osa iava oiso Jisas rera akereva, “*Eakere eisi puraei oiso, E uvuipau? Ari ita, ro ira oirao piepareve rutu, irapa uvuipa ra oaravu rutu oiraopape rerapa.*” <sup>24</sup> Uva aitetoto rirovira gauoro oiso puraroepa, “Ragai oirao pie iraopaaveira. Uva oiso ruipaparai ra ragai vo oirao pieoro vao-ia riro pieri.” <sup>25</sup> Uva Jisas uvurua kekereva osa ora guru ovoiaepa. Oa iava tugaratoare oiso puraroepa, “*Vii tugarato vaaruuto uvagito, viire goruvira reoparai ra kosiu viro rera varaua iava. Ra opeita vorevira ita voreu rera iava varaua iare.*” <sup>26</sup> Oa iava oiveroepa tugarato kakaeto rirovira tuutuusi pieoro. Oire uva rera iava ovoivira kosi ovoiro viraopa. Uva oiso paepa kopiito kakaeto. Oa iava oearovu oiso purapaaepa, “Kakaeto kopii ovoiroi.” <sup>27</sup> Eisi osa iava Jisas rera vavaeoro-ia pitureva rera tore piesa. Oa iava tore ovoiroepa rera ita.

<sup>28</sup> Uva Jisas koataparoepea osa oiso rera akepaiva disaipel, “Eake rutu vituaro iava viapau uvuipaerao tugara verapasa?” <sup>29</sup> Uva voea tavireva, “*Viapau oiso oavu avu vai-a oa uvuipai. Ari variria raga-ia.*”

*Jisas Vorevira Voea Tavireva Ita Ora Rera Vaoro Iava Kopii  
(Matyu 17:22-23; Luk 9:43-45)*

<sup>30</sup> Oire uva evo urui kavuiva, oa iava Galili-ia puteoro avaaepa. Uva oiso rugoopaoroepa, Teapi vo voka-ia taraiave oearoi, <sup>31</sup> ✧ uvare rera voeaoro raga disaipel ora rera iava siposiposa ruipaparoepea. Uva voeare oiso

<sup>32</sup> ✧ <sup>9:15:</sup> Mk 14:33 ✧ <sup>9:20:</sup> Mk 1:26 ✧ <sup>9:23:</sup> Mk 11:23; Lu 17:6; Jo 11:40 ✧ <sup>9:31:</sup> Mt 16:21; Mk 8:31

puraroepa, “*Iravu Oirato Oviitoaaro kosi pierevere oirara vavaearo iare, oiso ra rera upoive. Vosa kopiïrovere, ra torerovere ita vorevira vo pevapa voki-ia.*” <sup>32</sup> ✧ Uva viapau roroïpaaepa vo siposipo-ia. Oa iava rerapa uriripaaepa rera ake arapa va iava.

### *Irouto-a Rutu Rovopato Oirara Rutu Iava?*

*(Matyu 18:1-5; Luk 9:46-48)*

<sup>33</sup> Uva Kapaneam-ia poua viropa. Oa iava koata ovoïroepa kepa-ia. Uva voa disaipel akepareva, “*Eake-ia ora reopatae eisi raivaaro?*” <sup>34</sup> ✧ Uva viapau reopaaepa, uvare ora reopaoro vokapaiva vo raivaaro vao-ia oiso, Irou vai oiso rovope voeapa. <sup>35</sup> ✧ Uva Jisas pauroepa katai tau eraore (12) keeraoro disaipel. Oa iava oiso voea tavireva, “*Vosa irai ira vovouparo ra ita ira pievira rutu ora tovoru, eera-a ira oirara rutupa kovorevere oiso osa ovoïkuto akaipato.*” <sup>36</sup> Oa iava iravu oureva kakaeto kovare tore piesa voea vuutaoro-ia. Uva rera kaverukooro rera-ia pitureva oiso puraoro voeare, <sup>37</sup> ✧ “*Oire vosa irai tauvareve kakaetua vai vo ragai vaisiario-ia, ira ita-a eera ira ragai tauvapare. Uva viapau oiso ragai raga, ari ro tapo ira ragai siporeva.*”

### *Ro Ira Viapau Vigeiva Keriparo Ira Vigeiva Tavosivira Toupare*

*(Luk 9:49-50)*

<sup>38</sup> ✧ Uva Jon rera tavireva oiso puraoro, “*Tisa, iravu kekeïovora ira vuri tugarao kosi pieparevorao vii vaisiario-ia. Uva rerare koruierao uvare viapau oiso vigei iava rera-a.*” <sup>39</sup> Oa iava Jisas voeare oiso puraroepa, “*Opeita rerare korupata. Vosa irai vao ravoto kovo purapareve vo ragai vaisiario sovara-ia, oire ra viapau rutu oiso ra ragai takaupareve.*” <sup>40</sup> Ari ro ira viapau vigeiva keriparo, ira-a eera vigeiva tavosivira toupare. <sup>41</sup> ✧ Oiraopavira visii tavipaavoi. Vosa irouto voeao iava ragai voearo iravivu vatereve uuoka vai rera ukaïo piepaoro, aue iava uvare ragai vaisiario-ia Kraï kovopareveira ira vo vorio ou iraorevere taru Pauto ruvara-ia.

### *Vo Kokara Toupai Auere Vuri Vovou Purapasa*

*(Matyu 18:6-9; Luk 17:1-2)*

<sup>42</sup> “*Vosa iroutua vai vo kakaëo kove piereve ragai-ia kavusa okakaea ragai oirao piepaiveira, uva ita vearopai vosa oiso vo vovou purasa aueparo, oire voea rutu rera-ia rirova vai aveke vai kotoive iriai tuuoro rera okoëaro-ia rera roko piesa riku rovu-ia.*” <sup>43</sup> ✧ Ari vosa vii iava vavaea raga vii kove pieve vurea, oire vo vavae tokori. Oa iava vearopai ra vava avau vao katai vavaea vore uva tootooa viapau opesipape. Oa iava viapau oiso avauvorea vore opesipa tapi eto kasi-ia vo vavaerei rutuva. <sup>44</sup> [Vo uva aviko kare viapau opesipaave varaura aiopaoro, ora viapau rokopaive eto kasi voava.] <sup>45</sup> Ari vosa vii iava kokoto vii kove pieve vurea purasa, ra va poturi. Oa iava vearopai ra katai kokotova avau vore uva tootooa viapau opesipape. Oa iava viapau vii vikiiverea vore opesipa tapi vo eto kasi-ia. <sup>46</sup> [Vo uva aviko kare viapau opesipaave varaura aiopaoro, ora viapau rokopaive eto kasi voava.] <sup>47</sup> Ari vosa iravu vii iava osireito vii kove piereve vurea purasa, oire vearopai ra rera tateri. Oa iava vearopai ra kataitoava koatau vo Pauto vo Saraaro sovara-ia. Oa iava viapau vii vikiiverea vore opesipa tapi eto kasi-ia. <sup>48</sup> ✧ Vo uva aviko kare viapau opesipaave varaura aiopaoro, ora viapau rokopaive eto kasi voava.

49 ✧ “Oire uva oirara rutu ruuvereve eto kasi oiso osa aioara ruupaiveira avakara vara vearo piepaoro. 50 ✧ Vearoa rutu avaka aioara vearo piepa. Ari vosa opesipe sipeia va iava, ra apeisi ragavira vorevira va sipei pieta ita. Oire oisi ita toupata visii vao-ia oiso osa avaka sipei vuutaaro. Osa ragavira ora vovou oavisii tokita kavevira visii rutu vearoa puraoro oiso osa avaka (sol).”

## 10

### *Jisas Sipsiporeva Aue Iava Ora Oupa Pitupitu* (Matyu 19:1-12; Luk 16:18)

1 Jisas vo uruio kavuoro avaroepa Judia taere iare. Oa iava uukova Jodania iviroreva. Uva riro irara vorevira voreaepa rera iare, oa iava voea rutu sipsiporeva, uvare rera vo pitupituaro-a oirara rutu sipsiposa.

2 Uva Farisi-pa irara urioaepa rera-ia kokarasa oiso puraoro, “E vearopai oiso-ia vao-ia Reo Taisi, vosa iravu vatuava vaiaro kavu ovoireve?” 3 Oire uva voea vo rearo pukooro oiso puraroepa, “Ari aa vo reo goru reo vatereva Moses visiipa?” 4 ✧ Oa iava rera aatoiva oiso puraoro, “Moses oiso puraroepa, Uvuiapai vosa riakova kavuoro oavu rigatoreve reo ovoi, ra va-ia oira sigureve.” 5 Oa iava Jisas oiso voea tavireva, “Ari ita, riro kaureo vovou irara visii, oa iava vo taisi vao reo taisi rigatoreva. 6 ✧ Ari ita, vo rasito rovo oaro-ia, uva Pauto oirato purareva ora riakova.

7 ✧ “Oire vearopai vosa viovokoto aitetoarei kavureve riako ouoro. 8 Ra kataivira rutu tupaoro vo tou-ia kataiua varaua purasi.”

Osa-a eisi osa iava viapau oiso toupasi vaiterei, ari oiso piesivoi kataiua-ia varaua toupasivoi. 9 Vosa vaitereo aiterea pitu piereve Pauto vaiterei aivaro pieoro, uva viapau irai uvuipa ra vaiterei vorevira sikareve.”

10 Uva vorevira koataaepa kepa sovara-ia ita. Oire uva voa disaipel rera akeiva vo reo iava. 11 ✧ Uva voea tavireva oiso, “Ro ira riakova oaro kavu ovoireve iriavu raga ousa, uva va-a eva oa-ia otopa pitu purare iriavuva ita. 12 Ora vosa iriavu riakova oirato kavu ovoieive iravu ousa, eva-a oa-ia rerava otopa pitupitu purapaevoi.”

### *Jisas Kakae Vure Viraakoreva* (Matyu 19:13-15; Luk 18:15-17)

13 Uva vao isivaaro iava kakae vureva urioaepa oiso ra voea-ia pitureve. Uva disaipel irara voeare korupaaepa. 14 Oa iava Jisas voea kekeoro kasipuroepa. Uva oiso puraroepa, “Voea eakata oea kakae vure sipopai ragai iare. Opeita voeare korupata. Pauto vo Saraaro-a vao oa tupaivoi voeapa oiso osa voeao kakae vure. 15 ✧ Oiraopavira rutu visii tavipaavo, vosa irouto viapau oiso vo ruipaaro tupaive osa ro kakaeto ira vaopa ruiparoveira Pauto vo Saraaro, oire uva rera-a eera ira viapau uvuipa oiso ra Pauto vo Saraaro sovara-ia toupaveve.” 16 ✧ Oa iava kakae vure oureva voea kaverukooro. Uva voea viraakosa voea rutu-ia vavaeareiaro tovoreva.

### *Viovokotoa Iava Ro Riro Kotokoto Guruto* (Matyu 19:16-30; Luk 18:18-30)

17 ✧ Vo osa Jisas voka rovporeva vo raivaaro uva iravu rera iare ikaureva. Uva rekuoro rerere oiso puraroepa, “Tisa Vearoto. Eake vai puraa, ra

✧ 9:49: Lev 2:13 ✧ 9:50: Ro 12:18 ✧ 10:4: Diu 24:1-4 ✧ 10:6: Jen 1:27, 5:2 ✧ 10:7: Jen 2:24; 1 Ko 6:16 ✧ 10:11: Ro 7:3 ✧ 10:15: Mt 18:3; 1 Pi 2:2 ✧ 10:16: Mk 9:36 ✧ 10:17: Lu 10:25

Tootoo Ovoi oua?" <sup>18</sup> Uva Jisas rera akereva oiso, "Apeisi iava ragai vaisipari oiso, Vearoto? Asi viapau irai ei vearotoa vai. Ari kataitoa raga Pauto Vearotoa rutu. <sup>19</sup> \* Taraipau vao-ia Reo Taisi Pauto vaaro oa oiso purapai, 'Opeita otoupau, opeita oira upopau, opeita kavirupau, opeita oearovu iava kuuvupau, opeita oearovu keakeapari orekerovu karutupaoro, ora aiteara vaio ora aakoarava avivikepau.' "

<sup>20</sup> Uva oiso Jisas tavireva, "Tisa, easi varao rutu oisoa tokipaa vova rovoaro osa kakaevira oisoa toupaa." <sup>21</sup> Oa iava Jisas rera-ia vurareva rerapa siraooro. Uva rerare oiso puraroepa, "Ari ita, vosa vearo vovou rutu purasa auepau, oire auero rutu-ia vii varaaro vori rovou vara-ia moni ouoro apota irarapa oarai vatesa. Eva-a oa iava uvuipau ra vearoa ouriverea vo vuvuiua. Oire ra uriou ragai sirova utuoro." <sup>22</sup> Uva vo reo-a vao oa-ia rera tavaka pierewa. Oa iava rerare vovouisi vavataepa. Osa iava avaroepa, uvare riro vori guruto-a.

<sup>23</sup> Uva Jisas voeava vurapaoro ora poreroepa rera voeaaro disaipel tavisia oiso, "Ari ita, vavagisipapeira rutu voeaopa riro kotokoto guru irara vore ora kiusa Pauto vo Saraaro sovara iare." <sup>24</sup> \* Uva disaipel irara vo reo iava rera-ia tavetave iraoapaiva. Oa iava Jisas oiso voeare puraroepa, "Kakae vure oaa oirara. Vavagisipai rutu voeaopa oea moni raga-ia rugorugooapaaveira vore koatapasa Pauto vo Saraaro-ia. <sup>25</sup> Ari ita, vavagisipai vao tavaatoa iava vo rito vosa rirova vai vo kare iava kamel kare iriai vao koatasa auepao. Ari ita, uva oisi rutu rirovira vavagisi iraoapai ropa riro vori guruto vore koatapasa Pauto vo Saraaro-ia." <sup>26</sup> Uva tavetave iraoapaive rera-ia. Oa iava oiso puraapea rerare, "Uva apeisi-a. Iroutoa vai-a ira uvuipa Tootoo Ovoi ousa?" <sup>27</sup> \* Oa iava Jisas voeava vurapareva tuupavira. Uva oiso puraroepa, "Viapau uvuipa oirato, ari Pautoa raga uvuiparoi irai oisiri avu pieredora, rera vo Saraaro iare koataro."

<sup>28</sup> Uva Pita rerare oiso puraroepa, "Ari ita, igei auero oaiou rutu kavuiovora vii sirova utupasa." <sup>29</sup> Uva Jisas rera vo reoaro pukooro oiso puraroepa, "Oiraopavira rutu visii tavipaavo oiso, Viapau irai oaravu avu vaiaro rutu kavupare. Ari ita, vosa oiso-ia irai vara rutu kavureve oiso, kepa-a vao, ari araoko irara, ari taataa riako, ora aitetoaerei ora aakova, ora kakae vure oaro, ora rasiara oaro rutu vo ragai tauvasa utuoro aue-ia tapo Vearo Sipoipo, <sup>30</sup> rera-a eera ira riroara pute pievira rutu ouereve kepaara, ora araoko irara ora taataa riako, ora aite irara, ora rasiara oaro rutu, ora varao sirova tapo tavakaara vo voki-ia uva utupaua taru Tootoo Ovoi ouparevewa. <sup>31</sup> Ari ita, uva voearo oea visii sirova oisoa utupaave, voea oea visiipa irava verea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea."

***Voea Ita Tavireva Ora Rera Vaaro Iava Kopiiia Vo Peva Pievira Jisas***  
(Matyu 20:17-19; Luk 18:31-34)

<sup>32</sup> \* Uva vokapaoro raivaaro ipapaaepa Jerusalem iare vo osa Jisas voeapa iraparoepa. Oa iava rirovira tavetave iraoapaiva disaipel irara, vo osa oearovu uriripaaepa oea tapo rera sirova utupaaepa. Oa iava rera voeaaro ragapa disaipel rovoroeapa siposipooro varao iava oara karekepape utupaua rera-ia. <sup>33</sup> Uva oiso puraroepa, "Uvuta! Ipaviei vore Jerusalem-ia. Uva voea ragai-a vao Oirato Oviitoaaro Ro Ropoto tovopaivere reipa irara vavaeoro-ia pris irara ora voeao Reo Taisi-ia tarai irara. Oea reo

\* 10:19: Eks 20:12-16; Diu 5:16-20    \* 10:24: Sam 52:7    \* 10:27: Jer 32:17    \* 10:32: Mk 8:31, 9:31; Lu 9:22

ovoï puraivere oiso, Rera kopii pieta. Oa iava voeaopa ragai kosi pieivere osararovu iava voea. <sup>34</sup> ✧ Ra ragai akaipa piepaive, ora ragai-ia ruipaave, ora ragai ragipaive, ora ragai upoive. Oire vosa vo peva voki puteve, ra toreravere vorevira.”

*Vaitereo Vo Ruipaaro Iava Jems Vaio Ora Jon  
(Matyu 20:20-28)*

<sup>35</sup> Uva Sebedi oviitoareiaro Jems araorei ora Jon uriosiepa oiso purasa, “Tisa, vaopa ruipapaveiei ra va purari vegeipa oa arepave vii ruvara-ia.”

<sup>36</sup> Oa iava oiso vaiterei akereva, “Eake-a vao oapa ruipapasiei ra va puraa veipa?”

<sup>37</sup> ✧ Uva oiso purasiepa, “Vegeipa vase ra irai pauro vo oirapapa varata oara-ia, osa irai vo koike varata oara-ia vovio uva tokipauveira turaropaoro vii vo goruaro-ia.”

<sup>38</sup> ✧ Uva Jisas oiso puraroepa vaitereire ovoovovira, “Viapau taraipasiei vao-ia oare arepasi. E uvuipasiei ra tavakao ousi oa oupaa o-ia ukaioro kap iria agasipaoui aue iava siitoka? E uvuipasiei ra koatasi vo tavakao-ia oa-ia koataparai?”

<sup>39</sup> ✧ Oa iava oiso purasiepa, “Uvuipaveiei.” Uva Jisas oiso puraroepa, “O ita. Ukaiosivere o-ia iria-ia ukaioparai. Ora vo tavakao-ia tapo koatasivere oa-ia koataparai. <sup>40</sup> Uva viapau oiso ragai vaoro-a ra vei pau piea vare-ia oiso, iravu oirapapa varata iava, osa iravu koike varata iava. Ari Pauto auearo-a ira aitereivu reesirevora, oa iva tavukiarei vatatoporevora vaitereipa.”

<sup>41</sup> Oire vosa katai tau disaipel va iava vao uvuiva, uva kasipuaepa vaitereire Jems araorei ora Jon. <sup>42</sup> Uva Jisas keeraroepa voeareire oiso puraro, “Taraipatai voeao-ia ratau tou irara oea vo kovoaro oiso toupaveira, Oearovu oirara tokipasa. Oea ora rei vaisi piepaaveira voeare. Ora voea iava oearovu riro goruva toupaveira oea oirarapa kovo vatepaaveira. <sup>43</sup> ✧ Ari visii viapau oisi eisi toupatavere osa evoea. Ari ro ira ruipaparo oiso ra rera raga ora rei piero visiire, eera-a ira taru visii tauvapaoro kovorevere. <sup>44</sup> Ari ro ira iraparo visiipa, eera-a kovopato oavisii vo utupaua. <sup>45</sup> Oiso rutu osa urioraera vore. Uva viapau oiso kovopa irara vai ousa ora ragaipa, ari kovoa purapasa oevu tauvapaoro. Ora vaore tapo ragai vo tootoaro vatepasa voea rutupa oirara voea vorevira voripaoro vuri vovou sovava iava.”

*Voositoa Batimias Ira Vura Piereva Jisas  
(Matyu 20:29-34; Luk 18:35-43)*

<sup>46</sup> Va isivaaro iava Jeriko-ia poua viropa. Oire vo osa vo uruio kavureva disaipel irara tapo, ora oearovu riro irara, uva iravu voosito Batimias ro oviitoaaro Timias ira raivaaro pauroepa arepaoro. <sup>47</sup> ✧ Uva Jisas ro vova Nasaret ira iava uvureva. Oa iava rerare keeraroepa oiso purapaoro, “Jisas Devit Oviitoaaro. Ragaipa siraou.” <sup>48</sup> Oa iava riro irara rerare reopaaepa oiso purapaoro, “Auoro, ora tape pieu,” osa keeraroepa ita rirovira rufu. Uva oiso puraroepa ita, “Vii Devit Oviitoaaro. Ragaivipa siraou.” <sup>49</sup> Oa iava Jisas voka tuuke piereva oiso puraoro, “Rerare keerata.” Uva rerare keeraepa voosito oiso, “Toreu, ra roruri, uvare viire keerapa.” <sup>50</sup> Osa iava varo rakuraku veraoro tokaoro toreroepa Jisas iare uriooro. <sup>51</sup> ✧ Oa iava

✧ **10:34:** Mt 26:67, 27:30; Mk 14:65 ✧ **10:37:** Mt 19:28 ✧ **10:38:** Jo 18:11 ✧ **10:39:** Ap 12:2; Lu 22:25-27 ✧ **10:43:** Jo 13:14 ✧ **10:47:** Mt 9:27 ✧ **10:51:** Jo 20:16



Jisas rera akereva oiso, “Eake vaipa ruipapau ra oai puraa viipa?” Uva oiso puraroepa, “Tisa, ragaivi vura pieri vorevira.” <sup>52</sup> ✧ Uva Jisas rera tavireva, “Ora poreu ra avau. Aue iava uvare vii raga vaaro oirao piea vii vorevira ravotovira porete pie ovoivoi.” Oa iava vearovira vura ovoirevoiva, Jisas sirova utu ovoiroepa raivaaro.

## 11

### *Jisas Turarovira Koataroepa Jerusalem-ia (Matyu 21:1-11; Luk 19:28-40; Jon 12:12-19)*

<sup>1</sup> ✧ Uva tutuu pieiva vokapaoro Jerusalem iare. Oa iava Betfasi urui-ia poua viropa ora Betani-ia vo uva Oliv Kovo Pukui toupaveira. Oa iava Jisas voava aitereivu arureva voea iava voeao katai tau erao (12) disaipel. <sup>2</sup> Uva oiso vaiterei tavireva, “Vavo oiso avasi vavo uruio-ia. Vosa karesi virovere voa, ra gareva vai kekesi donki iria tuu iro riara-ia toupaveoi, o iria-ia viapau irai vokapareva uvare koruova. Ra oira karusi, ra oira ivupaoro uriosi. <sup>3</sup> Vosa irai vei akepareve oiso, Eakere purapasi? Ra rera tavisi oiso, Iria-ia Turaro vo kovoaro. Iria vore pierevere rara.” <sup>4</sup> Oa iava avasiepa. Uva oira donki kekesiva kakaeva osa tuu iro-ia toupaveva kepa rataoaro riaaro-ia vo raivaaro. Oire uva oira karusiva. <sup>5</sup> Vo ovusa oevu voa toupaooro vaiterei akepaiva oiso, “Eakere eira donki karupasi?” <sup>6</sup> Uva voea tavisiva oiso osa Jisas vaiterei tavireva. Osa iava vaiterei iava vaseiva vorevira. <sup>7</sup> Oa iava oirava voriesiepa donki vore Jisas. Oa iava oira ivara-ia varoara tovoiva varao oara-ia pauroepa. <sup>8</sup> Uva vo voki-a vao oa-ia riro irara rutu varoara oaive-ia urupaiva raiva-ia, osa oearovu evaora tosipai va goaro vara tovopasa raivaaro rera-ia rorupaoro. <sup>9</sup> ✧ Oire uva oearovu irapaaepa osa oearovu ita utupaaepa. Oearea rutu rerava rorupaoro kaku piepaiva oiso purapaoro,

“Hosana! Vigei Kae Pietoaro! ‘Pauto ira viraakopare ro-ia ira uriopa vo Turaro Pauto goruaro sovara-ia.’ <sup>10</sup> Rera-ia vuurapa vaisi purape, eera ira turarorovere oiso rutu osa Devit ro vigei aautoaro ira turaroroepa. Vuurapa vaisi purape Pautoa-ia, Reitoa rutu. Hosana vore viara-ia Pauto!”

<sup>11</sup> Uva Jisas karero viropa vo Jerusalem. Uva voa koataroepa Rovopa Kepa-ia Tugoropa Kepa Tempel. Uva voa orekerovu rutu vuravurareva. Oa iava vorevira Betani iare katai tau erao (12) disaipel tapo kareroepa, uvare ravireo rokosa aueroepa.

### *Fik Ova Vao Oapa Kasipuroepa Jisas (Matyu 21:18-19)*

<sup>12</sup> ✧ Oa iava vokiaepa Betani iava voreoro. Uva vo voka-a vao oa-ia ogoeroepa. <sup>13</sup> Uva oevavu fik ova evaova kekereva tauaivi, riro guruva ova rutu. Oa iava vo eva iare urioroepa oiso ra voava kueara vai oureve. Uva vo evao-ia pou virooro kasikasiroepa vura ragaoro, oiso ra kuea vai kekereve osa guruvara raga oisoa voa toupave. Aue iava uvare kuepa vuuta-ia viapau tuguraaepa. <sup>14</sup> Oa iava Jisas vo evare oiso puraroepa, “Viapau irai vii kuearo aiopareverea vokiara rutu-ia.” Vo osa rera voeaoro disaipel rera uvuiva.

### *Orekerovu Vuriara Sigureva Jisas Tempel Iava (Matyu 21:12-17; Luk 19:45-48; Jon 2:13-22)*

✧ 10:52: Mt 9:22; Lu 7:50, 8:48, 17:19 ✧ 11:1: Mt 21:17 ✧ 11:9: Sam 118:26 ✧ 11:12: Lu 13:6-9

<sup>15</sup> Uva urioaepa vore Jerusalem-ia Tempel-ia koatasa. Uva oevu oirara sigureva osa uupaaepa voa orekerovu-ia ora tuutuupaaro vo Tugoropa Kepa sovara-ia. Uva tebolara petopetoreva voeare oea ora tuutuupaaepa aue-ia moni, ora paupara oaive voeao oea kurue kare-ia ora tuutuupaaepa.

<sup>16</sup> Uva voeare korukoruoro rutu goruvira oiso puraroepa, “*Viapau rutu oiso ra ora visii varaarova oapara oavisii vo Tugoropa Kepa sovara-ia ora putepata.*” <sup>17</sup> ✧ Uva va isivaaro iava voea siposiporeva oiso puraoro voeare, “*Tugoropa Vuku oiso purapapeira, Ragai vo Kepaaro-a vao oa oiso vaisipaiveira, Variripa Kepa.*’ Ari visii vo kepao oiso piepata, vataupa tapi kavirupa irara vaaro.”

<sup>18</sup> ✧ Uva voeao pris reipa irara ora voeao Reo Taisi-ia tarai irara oea vo reo uvuiva. Oa iava raiva taraapaaepa oiso ra rera upoive. Aue iava uvare rera uriripaiva, uvare oearovu rutu tavetavepaiva rera vo siposipoaro-ia.

<sup>19</sup> Oire vo osa vokiaroviepa voeare, oa iava kosia viropa voava vo riro uruia-ia.

*Fik Ova Iava Vao Raverave Ova Vao Oare Reoroepa Jisas*  
(Matyu 21:20-22)

<sup>20</sup> ✧ Oire uva vokipaua avaepa. Uva voa avapaoro fik ova kekeoro puteva osa raveraveepa vo eva vavurupaaro tapo. <sup>21</sup> Oa iava Pita Jisas vo reoarore rugoooro oiso puraroepa, “Tisa. Vao kekeri fik ova oevare ovoievira reouerao. Oa iava erakoerao.” <sup>22</sup> Oa iava Jisas rera vo reoaro pukooro oiso puraroepa, “*Pautoa-ia oirao pie vovouro oavisii tovota.*” <sup>23</sup> ✧ Oiraopavira rutu visii tavipaa, Vosa oirao pie vovou rutu purapata vakuvaku asavira, oire ra vaore pukua oiso purata, Toreu ra ora vikiu eisi avakava. Oire ra oisi pieive, vo rara evo reo oirao piepata rutu. <sup>24</sup> ✧ Osa-a eisi osa iava visii tavipaa oiso, Vosa variripata orekerovure arepaoro, oire ra vara oirao piepata, ra vara oupata.

<sup>25</sup> ✧ “*Oire vosa torepata variripasa, ari vosa iravuva ora aveaveu, oire va eaka pie rovori. Oisore ra vii vaaro vuri vovou verareve Aite oavisii ro vova vuvuiva.*” <sup>26</sup> [Ari ita, vosa viapau oiso iravu iava viapau oiso vuri oaro vera rovori, ra viapau vii Aitearo vii iava vuri oara verareve ro ira vuvuiva-ia toupaveira.]”

*Oevu Jisas Akepaiva Rera Vaarore Reesia*  
(Matyu 21:23-27; Luk 20:1-8)

<sup>27</sup> Uva va vao isivaaro iava voreaepa Jerusalem iare. Uva voa Tempel sovara-ia vokapaoro urioaepa Jisas iare voeao Reo Taisi-ia tarai irara, ora pris reipa irara, ora oira vasi irara. <sup>28</sup> Oa iava oiso rera akeiva, “Eake reesi-a vao vii vaaro oa iava vo kovo purapari? Irou vii vateva vo reesi?”

<sup>29</sup> Oire uva Jisas voeare oiso puraroepa, “*Visii akea ra ragaipa vo reo vituaro pukota. Ra visii tavia ita vo reesi iava oa-ia varao purapaa.*” <sup>30</sup> Oire e baptaisa vao Jon oa puraparevora, ovuva vo reesia oa urioera Pauto ruvaria, eke vova oiratoa raga? Oire ita ragai tavita.”

<sup>31</sup> Uva ora rugorugoo piepaaepa oiso, Apeisi avu purapaviei. Vosa oiso puravio, Vova Pauto, ra oiso purarovere, Uva apeisi viapau va oirao piepata?

<sup>32</sup> ✧ Ari vosa oiso puravio, Oirato vaaro. Uva ora voea ragapa uriripaaepa, uvare voea rutu oirara oisi taraipaaepa oiso, Rera-a ro profetatoa rutu.

<sup>33</sup> Oa iava oiso purapaaepa, “Viapau taraipaei.”

✧ **11:17:** Ais 56:7; Jer 7:11 ✧ **11:18:** Mt 21:46, 7:28 ✧ **11:20:** Mt 21:19 ✧ **11:23:** Mt 21:21

✧ **11:24:** Mt 7:7; Jo 14:13-14, 15:7 ✧ **11:25:** Kl 3:13 ✧ **11:32:** Mt 14:5

Uva Jisas voea tavireva oiso, “*Ragai tapo ita, viapau oiso ra visii tavia vo reesi iava oa-ia vo kovo purapaavora.*”

## 12

### *Ovoovo Reo Wain Kovo Iava Ora Vo Kovo Tokipa Irara Iava Tapo (Matyu 21:33-46; Luk 20:9-19)*

1 ✧ Uva rovoroepea voeapa siposipopaoro aue-ia ovoovo reoro oiso, “*Travu wain kovo paureva. Uva vo kovo rirore kasura purareva. Oa iava rikui tekareva auepa pigipava masin gerep. Uva voa kepa paureva uutupa kepa vo kovo-ia. Uva oevu kovopa irara tavireva auere ra vo kovo tokipaive moni oupaoro ora rerapa. Oire uva va-a vao oa iava avaroepa otaerevu iare uvavu.* 2 Uva oivavu-ia iravu kovopato rera reraaro siporeva, oiso ra kovoa iava kuearao vai oureve voea ruvara-ia vo kovo tokipa irara. 3 Oa iava rera rauiva. Uva rera ragipaivoiva, viapavira rera siguiva vorevira. 4 Oire uva iravu ita ava pierewa ita. Oa iava rera kukuearo gagoagoiva rera tapatapaoro. Uva rera vuri pieiva. 5 Oa iava iravu ita arureva ita. Osa iava rera kopii pie ovoiiva. Uva oisi raga oisoa piepaive oiso oearovu oisoa raga ragapaive, ari oearovu oisoa kopii pie ovoipaive. 6 Uva kataitoviei ira toupere rera oviitoaaro, ira oisoa kavikopareve rutu. Oa iava ovoiokevira rera utu pierewa ita voea iare oiso rugoopaoro, *Ira vai-ia taru gisipoaro uvuivere oviitoa oaa.* 7 Oa iava oiso ora reoaepa voea voeao oea oisoa kovoa tokipaive, Rera ro-ia reito oviitoaaro rutu. Irare ra rera upope. Ra rera vaoro ouoro vo kovo vao tokipe ora vigeipa. 8 Oa iava rera rauiva rera kopii pie ovoisa. Oire wain kovo sovara iava vo kopii kosi pieiva.”

9 Uva vo reo-a vao ovoovo reoa oa iava oiso akereva Jisas, “*Uva eake vai purarevere ro ira vo kovoaro-a vao-ia wain kovo? Oire uva ro ira uriorovere voeao vo kovo tokipa irara opesi piesa voea rutu kopii pieoro. Oire ra ita oevu raga ita tovo pierewe vo kovo tokipasa ita.* 10 ✧ E viapau vo reo veitavora Tugoropa Vuku-ia oiso, ‘*O-ia aveke iria veraiva voeao kepa paupa irara oira-ia kepa pau arapa, eira rutu ita avekeva rovopava rutu kukuuvu tuuta.* 11 Easi, vo kovo purareva Turaro, oa vigei osireiario-ia ravotovira toupaveira?’”

12 Uva oiso ruipa ragapaaepa ra Jisas ouive rera kortusa voeao reipa irara Jiu iava. Ari ita, oevu ragapa oirara uriripaaepa, uvare oiso taraipaaepa, Asi vao ovoovo reo vigei togapare vo-ia. Uva rera kavuoro avaaepa.

### *Jisas Akeiva Takis Moni Iava (Matyu 22:15-22; Luk 20:20-26)*

13 ✧ Uva va-a vao oa iava oevu Farisi ora voeao tapo King Herot tauvapa irara oea sipoiva rera iare oiso ra ora rera oaiaro-ia ora rera raga ora kove piero. 14 Uva evoearei rutu urioaepa. Oa iava rerare oiso puraepa, “*Tisa, taraipaiei vii-ia, uvare vii-a oiraopa reotoa rutu. Ari vaeavira rutu voea rutu siposipopari vo Pauto vo pitupituaru iava. Oire uva apeisi-a? E torevokopai ra Sisa-pa takisvio moni vateoro, eke viapau?’”*

15 Ari ita, tarai ovoiroepa voea vo kuuvaro-ia. Uva voea akereva, “*Eakere ragai-ia kokarapatai? Oire ragai vateta moni isi vai ra aisi eveia.*” 16 Uva aisivu vateiva. Uva voea akereva oiso, “*E irou puaroo-a vao-ia vo kiro-ia?’*” Uva rera taviiva, “*Ari Sisa.*” 17 ✧ Oire va iava oiso puraroepa, “*Vosa*

✧ 12:1: Ais 5:1-7 ✧ 12:10: Sam 118:22-23; Ap 4:11; 1 Pi 2:7 ✧ 12:13: Mk 3:6; Lu 11:54

✧ 12:17: Ro 13:7

*Sisa varaaro, oire Sisa-pa vara vateta. Ari vosa Pauto varaaro, oire Pautoa-pa vara kare pie iraota.”* Oa iava vo reo iava rirovira rutu rugorugoo iraoapaepa.

*Jisas Akeiva Oiratoa Iava Ro Ira Kopiuro Ra Vorevira Torero  
(Matyu 22:23-33; Luk 20:27-40)*

<sup>18</sup> Uva Sadyusi-pa irara urioaepa rera iare voeao oea oisoa viapau kopiia torearo iava oirao piepaive. Oa iava oiso rera akeiva, <sup>19</sup> \* “Tisa, Moses oiso igeipa rigatoroepa, Vosa irai araokotoa vaiaro kopiuro, vo osa riakovaaro toupavee kakae pura asavira raga. Ra ita araokoto oira oureve rerapa ro kopiito oira-ia kakaeto purasa. <sup>20</sup> Uva erao vatara oaraovu oea oisoa toupave. Oea iava avaioto riakoparoepa. Oa iava oira arova kopiuroepa osa viapau kakaetoa vai. <sup>21</sup> Uva ro kikooto oira ita ouveva. Uva kopiuroepa ita, osa ita viapau kakaetoa vai. Uva peva piepato oisi raga pie ragareva ita. <sup>22</sup> Uva oisi raga piepaoro oira arova opesiaepa vo arao rutu erao vatara, osa viapau kakaetoa vai kavaupaive. Uva utupaua vo arao isivaaro iava kopii ovoioipa. <sup>23</sup> Oire uva vo vokio-ia oa-ia oirara rutu toreaverea vova kopiia-ia, uva irouto vo arao iava oira ourevere? Uvare voea voeao erao vatara rutu oea oira ouiva.”

<sup>24</sup> Oa iava Jisas voeare oiso puraroepa, “*Rugorugooara oavisii pirovira avapai. Aue iava uvare viapau taraipatai aue-ia Tugoropa Vuku vo rigatoaro ora goruaro Pauto.* <sup>25</sup> \* Vo kopiia iava torea-ia viapau oiso riako ou vai, uvare viapau ora oupaaverea. Viapau. Ari oisi rutu oiso toupaverea osa enselpa irara vo vuvuiua-ia.

<sup>26</sup> \* “*Oire ari voeao-ia kopii irara vosa toreave vorevira, uva viapau voea iava vieipataera vo siposipo-ia oa-ia gare kairi evaoa rovaepa. Osiposipo-ia Moses tavireva Pauto oiso, ‘Ragai-a Pautoaaro Ebrahim, ora Pautoaaro Aisak, ora Pautoaaro Jekop?’* <sup>27</sup> Oire vo Pauto vo rugorugooaro vuraaro-ia voeao tootoovira toupai oea kopiiaepa. Oa-a vao oa iava oiso puraroepa, Ragai Pauto oaive voeao oea tootoopai. Ari rugorugooara oavisii viapau oiso torevokopai.”

*Rovopa Rutu Reo Taisi  
(Matyu 22:34-40)*

<sup>28</sup> Oire uva iravu urioroepa Reo Taisi iava siposipopato voea uvusa osa ora akepaaepa. Uva Jisas vo reoaro eveireva osa voea vo reoaro pukopareva. Osa iava rera akereva oiso, “*Aa vao-a rovopa rutu Reo Taisiro rutupa?’* <sup>29</sup> \* Oa iava Jisas rera vo reoaro pukoreva oiso puraoro, “*Vao-ia rovopa rutu Reo Taisi oa oiso purapapeira,*

*‘Israel-pa irara uvuta. Ro-ia Turaro Pauto oavi, rera raga ira turaroparoveira.* <sup>30</sup> *Ira-ia sopaura oavisii rutu tovota, ora rugorugooara oavisii rutu, ora taraiara oavisii rutu, ora goruara oavisii rutu.’*

<sup>31</sup> \* *Ari erao piepa vao-ia oiso,*  
*‘Voeaopa oea vii ruvara iavi toupaveira siraopau rutu, oiso rutu osa ora viipa siraopauveira.’*

*Viapau oiso oarai Reo Taisiro vai vareo-ia putepaiveira.”*

<sup>32</sup> Uva Reo Taisi-ia taraito rera tavireva, “*Oiraopavira Tisa. Ari kataitoga raga Turaro Pauto. Uva viapau irai ei turaro vai oiso osa ro-ia.* <sup>33</sup> \* Uva vosa rera-ia vii iava sopaua rutu tovoru, ora rugorugooara rutu, ora vii vaaro gorua rutu, ora vao tapo-ia oiso ra iravupa siraopau oiso osa

\* **12:19:** Diu 25:5    \* **12:25:** 1 Ko 15:42, 49, 52    \* **12:26:** Eks 3:6    \* **12:29:** Diu 6:4    \* **12:31:** Lev 19:18; Ro 13:9; Ga 5:14; Je 2:8    \* **12:33:** Hos 6:6

ora viipa siraopauveira, oire uva vara-a varao oara koruoupa pitupitu-ia putepaiveira, opitupitua-ia oisoa koruoupa kare riipu piepaiveira.”

<sup>34</sup> Uva Jisas rera-ia tarairoepa uvare vearovira rera vo rearo pukopareva. Oa iava rera tavireva oiso, “*Viapau oiso tauaipaei Pauto vo Saraaropa.*”

Osa-a eisi osa iava voea rutu uriripaaepa Jisas ake arapa vorevira.

*Vo Devit Oviitoaaro Iava Akea Toupai*  
(Matyu 22:41-46; Luk 20:41-44)

<sup>35</sup> Vo osa Jisas siposiporeva Tugoropa Kepa-ia Tempel, uva oiso puraroepa, “*Easi eake iava Reo Taisi-ia tarai irara oiso purapaai, Asi Krais Devit aaotoaaro ro vo rasio raga iava.*” <sup>36</sup> ✧ Aue iava ita uvare rera raga Devit vatereva Tugoropato Uraurato vo rugoo oa iava oiso puraroepa, “*Turaro Pauto ira oiso puraroepa rora ragai Turaroaro, Pauu vo oirapapa varata vao-ia vo vuutaore tuepaoro oa-ia vii voeaaro keripa irara tovoaverea vii kokotoaro roaro, vo rara voea-ia puteri.*”

<sup>37</sup> ✧ Ari ita, Devit raga ira turarovira Krais vaisireva. Uva apeisi-a, Krais rera aaotoaaro Devit ira Devit sirova kavauroepa?” Uva riro uvuru rera vo rearo roruvira uvuiva.

*Reo Taisi-ia Tarai Irara Vo Pitupituroaro*  
(Matyu 23:1-36; Luk 11:37-54, 20:45-47)

<sup>38</sup> ✧ Uva voea siposipopaoro voea tavireva oiso, “*Ora vatatopopata evoeapa Reo Taisi-ia tarai irara oea vearovira-ia kuvupaa kuvupara varoara, ora oiso uvare vaopa tapo ruipapaaveira, oiso ra oearovu oirara voeapa ora avivikepaoro oiso purapaave, Veoro voki voeare vo aivaropa tapi.*” <sup>39</sup> Ora oiso tapo osa varaopa ruipapaaveira rovopara paupara varao Reo Taisi Uvupa Keparo sovara-ia touara. Ora varaopa tapo vasivasi tapiro roro pie visivi vo vureipa vokiro-ia. <sup>40</sup> Evoea oea auero ou ragapaiveira raroe riako varaaro, ra kuuvuvira riro kaekaepavira variripaaveira ita. Evoea ita oea riroa siitoka ouiverea. Va-a eva vuri oaive voriaro oearovu rutu varaoro-ia oara putepaverea rutu.”

*Raroeva Sirao Vatea Moni isi Vikieva*  
(Luk 21:1-4)

<sup>41</sup> ✧ Uva ipa pie visivi pauroepa Jisas vo moni oupa tapi. Uva voea siituepareva osa moni vikipaaepa voa. Uva voeao riro moni irara oea tapo riropara moniara vikipaiva. <sup>42</sup> Osa-a eisi osa iriavu urioopa raroeva apotavavi. Uva aisireivivu vikieva moni isirei gare isireivi bokis iare. Uva ora takuvuepa, uva aue raga-ia uvuipaepa katai tau toea (10t). <sup>43</sup> ✧ Uva disaipel irarare keeraroepa ora rera iare. Oa iava voea tavireva oiso, “*Oiraopavira rutu vikioi apotavavi ita voeao-ia puteoro oea riropa moni vikipai.*” <sup>44</sup> Ari ita, voea rutu vikieva riroara iava ita, osa oiravi ita iria ora oira iava sopaua rutu tapo vikievo oa-ia oearovu rutu-ia puteevoi.”

## 13

*Jisas Voea Ravaavira Tavitavireva Tugoropa Kepa Tempel Opeziaro Iava*  
(Matyu 24:1-2; Luk 21:5-6)

<sup>1</sup> Uva kosiro viropa vova Tempel, osa iravu voea iava disaipel rerare oiso puraroepa, “*Tisa kekeri. Vearovira-ia avekeara ora veoro keparoa-ia.*” <sup>2</sup> ✧

Oa iava Jisas voeare oiso puraroepa, “O ita, oara kekepata riropa keparo. Ari viapau iriai aveke vai eakave iriai ivara-ia aveke vai osa toupave. Oara rutu evara kururu piroverea koveoro.”

*Vo Siitoka Rovoaro Iava Toupai Oa Karekeperea Vo Ovoio Voki  
(Matyu 24:3-14; Luk 21:7-19)*

<sup>3</sup> ✧ Uva-a vo uva pauparoepa Jisas vo pukuio-ia Oliv Kovo Pukui aueva Tempel tuuravira pauparoepa, osa rera akepaiva vatau visivi voeao Pita vase, ora Jems, ora Jon aue tapo Andru. <sup>4</sup> “Igei taviri. Aa vo vokia ora purapere vara varao, ora eake ravaa reesiro-a oara ora purapere vara-ia?”

<sup>5</sup> ✧ Uva Jisas oiso puraroepa voeare, “Vatatoopata. Teapi visii piro piereve oiratoa vai. <sup>6</sup> Riro irara rutu uriopaaverea ragai vai siaro-ia, ra oiso puraave, Ragai-a vao Krai. Ra riro irara vai keakepaive oirara vai.

<sup>7</sup> “Vo osa upoara siposipoaro iava uvutavere varao oara tauai toupave visiipa ora tutuu pievira visiipa, ra viapau oiso uriripata. Uvare vara-a varao oara pou piroverea taru. Uva viapau oiso vara varao opesiapa tutuu piepai, ari orekerovu urio rovopapere <sup>8</sup> oiso-ia, osararovu osararovuva ora upoaverea. Ari gavman tapo ora rera ragava aia ita gavman ora uporoverea. Ravurikepaperea otaererovu-ia, ora ogoepa vokiro oara poupa piroverea voraro rutu. Uva vara rutu-a varao oara-ia siitoka rovoaro pura piroverea.

<sup>9</sup> ✧ “Voeaopa vatatopo iraota oea visii vateivera auepa Kaunsel irara oea visii ragipaivera vo keparo-ia Sinagog keparo. Ora oiso tapo osa visii tore piepaivera vo reipa irara osireiaro-ia, ora vo king irara osireiaro-ia, uvare ragai sirova utupataveira. Uva voea-a voeao turaro irara oepa tavitavitavere ragai vo kovoaro iava. <sup>10</sup> Ari ita, vo osa Vearo Siposipo uvu rovoivera oirara rutu osararovu rutu iava. Oa isivaaro iava taru Opesi Voki pou piro. <sup>11</sup> Vosa visii sipopaivera voeapa oea visii rovirieipaivera kortua-ia. Oire uva opeita uriripata oiso rugorugooaoro, Apeisi purapaiei voea vo reoroaro pukopaoro. Rera raga visii vatereverea eva oa iava tavitavitavere. Viapau oiso visii-a visiioga reoreotavere, ari Tugoropato Uraurato vo visii gisipoaro-ia. <sup>12</sup> ✧ Oiso-ia tapo, iravu araokoto vatereverea vore gavman vavaeoro iare, oiso ra rera kopii pierevere. Ora aiteti oviito vatereverea iravupa ra rera kopii pierevere. Ari ovii irara aite irarava keriaivera ra voea upoive. <sup>13</sup> Ari ita, oirara rutu visiire vuri vovou irapaaverea, uvare ragai vai siaro-ia toupaverea. Ari ro ira goruvira rutu Pautoa-ia rugooa tovpavei vo tugurasa Ovoipa Voki-ia, eera-a ira taru oureverea Pauto ora rera vo Saraaro iare.

*Vuria Rutu Karekepere Vo Utupaua  
(Matyu 24:15-28; Luk 21:20-24)*

<sup>14</sup> ✧ “Vosa vao keketaverea oa uvuipai riroa vuria pura iraopasa aue-ia Tugoropa Tapi, oire ra uriripaoro torita visii vao Judia-ia tou irara pukuiara iare. [Ari ro ira vao vieipareve, oire tarairo va-ia vao]. <sup>15</sup> Ro ira kepa ivara-ia toupave, viapau oiso uvuipa ra vararo oavu avu vai ousa vo kepa oaro-ia. <sup>16</sup> Ro ira toupaveve varuparo, viapau uvuipa ra ora rakurakupaarore vorero varoa. <sup>17</sup> ✧ Ari vo riakovio airoa tarukovira toupaverea, oriakoa sirao iraoaverea tavaka ouoro, ora vairo sikeo kakaero roroopa riako vo voki-ia. <sup>18</sup> Variripata. Oa iava viapau pou piroverea vo tavakaro varao

✧ 13:3: Mk 5:37 ✧ 13:5: Ef 5:6; 1 Te 2:3 ✧ 13:9: Mt 10:17 ✧ 13:12: Mai 7:6; Mt 10:21

✧ 13:14: Dan 9:27, 11:31, 12:11 ✧ 13:17: Lu 23:29

vo kiuvupa vuuta-ia. <sup>19</sup> ✧ Oire vo vokio-ia oa-ia rasito rovoreva Pauto vo vokio-ia pou virosa vao-ia, uva varei sovara-ia vareo viapau oiso oavu avu vai tavaka vai vareo sovara iava oai vo tavakao-ia putepai oa urioperea utupaua riroa rutu. Oire ita vara isivaaro iava varao viapau oiso otavakai ita urioperea oiso osa vo tavaka vao-ia. <sup>20</sup> Vosa viapau rugorugooeroeri Pauto vo vuutao poteku piesa, ra viapau oiso iraipe tootoovira toupaoro. Ari voea ragare rugoooro vo vuuta poteku piereverea voeao oea roporeva ora rerapa.

<sup>21</sup> “Vosa irai visii tavipareve oiso, Ro keketa Pauto reraaro Ropoto. O ita, Rera keketa ro, oire ra viapau oiso rera vo rearo oirao piepata. <sup>22</sup> Riro irara rutu kraisi irara kuuvu irara oea urioaverea. Ora riro irara profet irara kuuvu irara oea ravaavira oreorovu puraiverea ora ravoto kovoro. Oara-ia voeao piro pieverea vosa uvuipaave voea oea roporeve Pauto. <sup>23</sup> Ari ita, visii vatatopo piepaa varao iava visii tavitavi rovopaoro.

*Pauto Reraaro Iava Ropoto Vorearo Iava*  
(Matyu 24:29-31; Luk 21:25-28)

<sup>24</sup> ✧ “Uva tavakapa vuuta isivaaro iava ravireo ruparoverea ora kekira tapo. <sup>25</sup> Aaviikoara kovekoveperea vova vuvuiua iava. Orekerovu rutu goruara vova vuvuiua ravurikeperea. <sup>26</sup> ✧ Vo voki-a vao oa-ia ragai Oirato Oviitoaaro tueiverea oirara rutu, ovusa iriavu rukuta sovara-ia uriora riroa rutuva gorua ora riroa ragai vaaro keraria. <sup>27</sup> Uva voea aruaverea enselpa irara oaa, ra voea guruive voeao oea roporeva ora rerapa voraro rutuva vo rasito rekasiaro-ia.

*Fik Ova Iava Voea Tavireva*  
(Matyu 24:32-35; Luk 21:29-33)

<sup>28</sup> “Oire uva vo evao fik ova taraitavere rara rovovira airepa guruvaro kosi pieve rovo guruvaro. Ra oiso taraita, Raipipa vuuta tutuu piepai oa-ia ravireo rororovere. <sup>29</sup> Ari ita, visii tapo varao iava taraitaverea vara kekeoro, ra oiso aueta, Ragaipa karepa vuuta tutuu pievoi. <sup>30</sup> ✧ Oiraopavira visii tavipaavo, Oirara rutu voeao vo vuuta-ia eva viapau oiso voea rutu kopiaverea vo osa vara rutu evara kareke rovoperea. <sup>31</sup> Oire oiso-ia vuvuiua opesiperea ora rasito, ari ragai vo rearo viapau rutu oiso opesiperea.

*Viapau Oiso Oiratoa Vai Taraipa Karepa Vuuta-ia*  
(Matyu 24:36-44; Luk 17:26-30, 34-36)

<sup>32</sup> ✧ “Uva viapau irai taraiparoi vo voki-ia ora vo aua-ia. Ora enselpa irara tapo voeao vo vuvuiua oea viapau taraipaai. Ora Oviitoaaro tapo viapau taraipa. Ari Aitetoa raga Pauto ira karepa voki rutu-ia taraipa.

<sup>33</sup> ✧ “Vearovira rutu uutupata. Uvare viapau taraipatai vo vuuta-ia vao oa-ia urioperea. <sup>34</sup> Oiso rutu osa iravu aapaapuroepa ouruivu iare kepaaro kavuoro. Uva kovoara rovirieireva kovopa iraraaropa. Uva goruvira rutu ratao tokipato tavireva oiso ra vara rutu tokipareve. <sup>35</sup> Oire visii vao vatatopo iraopatai tuepaoro, uvare viapau taraipatai rera-ia era reito ira voreroverea rera vo kepaaro kekesa ovaiaro eke voki vuuta-ia, eke vosa kookai kare gaupaive, eke vokipaua. <sup>36</sup> Teapi visii sita piesa urioro visii kekeoro osa uusipata. <sup>37</sup> Uva va-ia vao visii tavipaa ravaavira ora oearovu rutu, ra ora vatatopopata rutu.”

✧ 13:19: Dan 9:26, 12:1; Joe 2:2 ✧ 13:24: Sef 1:15 ✧ 13:26: Dan 7:13; 1 Te 4:16; 2 Te 1:7, 10  
✧ 13:30: Mk 9:1 ✧ 13:32: Ap 1:7 ✧ 13:33: Ef 6:18; 1 Te 5:6; Kl 4:2

# 14

## *Reipa Irara Ora Reoaepa Oiso Ra Jisas Upoive (Matyu 26:1-5; Luk 22:1-2; Jon 11:45-53)*

1 ✱ Oire uva reipa irara pris irara ora Reo Taisi-ia tarai irara oea raiva taraapaaepa ora voea-ia, oisore ra oa-ia kaviruvira rera rauive. Ra rera upoive vo vokirevo isivaaro iava, ovokirea-ia aioa pura pirovere Pasova Vurei ora oaiorovu Yis Asa Aioro aue Bret. 2 Oire uva vo voki-ia rugoopaoro oiso ora reopaaepa, “Teapi vo vokiro raga-ia varao oara-ia aioara purapa pirovere rera-ia pituera, oearoi ora sitaoro kasipuaave vigei uposa.”

## *Iriavu Sanda Ovi-ia Rera Atoatoeva Vo Betani Urui-ia (Matyu 26:6-13; Jon 12:1-8)*

3 ✱ Uva Jisas toureva Betani-ia ro leprapato vo kepaaro-ia Saimon. Uva voa pauraepa aiopaoro ovusa iriavu riakova urioopa aueva korovo ovi sanda, oovia vaisipai oiso, nad. Oa oisoa purapaive aue iava airepa ruu piero. Oa toupaiava aue-ia popotepa tou vearoa Alabasta oiso osa aveke. Ipa pie vori ovi oava urioopa. Uva vo ovi keeva, oa iava va kokoeva Jisas kukuearo-ia. 4 Uva oearovu oiso ora reopaaepa kasipupaoro, “Apeisi o vao ropi ragapae korovo ovi? 5 Ari uvuipaoi ra va-ia monia vai ueve korovo ovi vo peva vovoto kina (K300), ra oai vateeve voeaopa apota irara.” Uva ora reopaaepa rirovira rutu oirare kasipupaoro. 6 Oa iava oiso puraroepa Jisas, “*Oirape, ra va puraeve. Eakere oira vovouaro vavata pie ragapata? Vearo pitupitu rutu purapae ragaipa.* 7 ✱ Ari ita, apota irara oea toupaiaveira touvira rutu visii tapo vokiara rutu-ia. Vosa oisi voeopa oaravu tauvaara purasa ruipapata, uva uvuipatai oisi eisi purapasa. Ari ragai viapau oiso visii tapo toupaaevere touvira. 8 Oira o iria va puraevoi oiso osa uvuioi va purasa. Iria ita ragai iava varaua atoato rovevo ravaavira korovo ovi-ia, auere vava ragai tovasa. 9 Oiraopavira rutu visii tavipaavoi, Vo uvarovu rutu uva Vearo Siposipo kosi piepaivere vo rasio-ia, ra va-ia vao tapo ora reopaaeve vare rugoopaoro oa puraevoi o-ia riakova ragai-ia.”

## *Reo Ovoi Purareva Judas, Oiso Ra Jisas Kosi Piereve Keripa Irarapa (Matyu 26:14-16; Luk 22:3-6)*

10 ✱ Uva iravu voea iava katai tau erao (12) disaipel ro Judas Iskariot ira avaroepa reipa irara iare pris voea ravaavira tavisa, “Visiipa Jisas kosi pieavere.” 11 Uva Judas vo rearo uvuoro roruiva rutu. Oa iava ovoivira rera taviiva aue iava moni. Osa-a eisi osa iava ora rerapa raiva taraaroepa, oiso ra Jisas kosi piereve voea vavaearo iare.

## *Jisas Tagausapa Vurei Aioreva Rera Voeaaro Tapo Disaipel (Matyu 16:17-25; Luk 22:7-14, 21-23; Jon 13:21-30)*

12 ✱ Uva vo rovo vokiara-ia Yis Asa Aio aue Bret oa-ia sipsip kakae-ia korouoa oisoa puraive. Oa iava vo vokia vao disaipel irara Jisas akeiva oiso, “Ovu-ia viipa ravaavira aioa vai puraiovere Tagausapa Aio Pasova Aio vai?” 13 Uva disaipeltoarei arureva oiso, “*Karesi viro urui iare. Vosa iravuva aivarosivere osa uuko ovi vai kaepareve rirova-ia pitokava, ra rera sirova utusi.* 14 Uva iravu vo kepaaro koatarovere. Oire ro ira vo kepaaro- a irare oiso purasi, Ro-ia Tisato ira oiso puraroi, Ovu-ia ragai vo tugiaro epao tavete tugi uva Pasova Vurei aioavere disaipel irara oaa tapo? 15 Uva vei kareke pierevere riro tugia oa toupai ravaavira vo viara-ia. Uva voa aioara ravaasivere vigei rutupa.” 16 Uva disaipeltoarei karesi virova urui

✱ 14:1: Mk 11:18 ✱ 14:3: Lu 7:37-39 ✱ 14:7: Diu 15:11 ✱ 14:10: Lu 22:3-4; Jo 6:71  
✱ 14:12: Eks 12:11



iare. Uva va kekesiva vao oare Jisas taviroepa. Oa iava voa Pasova Vurei vatatoposiva.

<sup>17</sup> Uva vokiarevi pouro viropa Jisas ora katai tau erao disaipel. <sup>18</sup> ✧ Oa iava aiopaiva osa Jisas voeare oiso puraroepa, “*Oiraopavira visii tavipaa, Iravu visii iava ira ragai kosi pierevere oearovupa.*” <sup>19</sup> Oa iava vovouisiro rutu vavataepa voeare siraooro. Uva voea rutu oisi raga puraaepa, “Easi viapau ragai-a?” <sup>20</sup> Oa iava oiso voea tavireva, “*Ro katai tau erao iava disaipel, ira vavae roko piere breteva tapi rovu viipaoro va-ia ragai tapo, eera-a ira ragai kosi pierevere.*” <sup>21</sup> Iu, Oirato Oviitoaaro avapa kopiia-ia oiso osa Tugoropa Vuku taviepa ragai iava. Ari ita, siravira rutu rerapa ira ragai kosi pierevere. Vearopai ita vosa viapau aakova rera kavau rovoevori.”

*Vo Jisas Komunion Aio Vatoreva Disaipelpa*  
(Matyu 26:26-30; Luk 22:15-20; 1 Korin 11:23-25)

<sup>22</sup> ✧ Oire vo osa aiopaiva uva Jisas bret oureva va-ia vearo vaisi purasa. Uva va puteputeoro vara vatoreva voeapa oiso puraoro, “*Ieta, vao outa ragai iava varaua.*” <sup>23</sup> ✧ Oa iava kap-ia wain karo oureva va-ia vearo vaisi purasa. Uva voea vatoreva va. Oa iava voea rutu ukaioaepa oira iava. <sup>24</sup> ✧ Uva oiso voea tavireva, “*Eira ragai iava revasiva iria paruevere ragai iava vo osa kopiira voea rutupa oirara Pauto vaoro Reo Ovoi oirao pieoro.*” <sup>25</sup> Oiraopavira ita visii tavipaavo, Viapau oiso ra vorevira ita vao-ia wain ovi ukaioravere. Ari vo raga uva airepa karova-ia ukaioravere utupau vo Pauto vo Saraaro-ia.”

<sup>26</sup> Uva iriavu-ia eraeapa erava. Oa iava ipaaepa Oliv Kovo Pukui iare.

*Jisas Pita Tavireva Oiso, Ragai Taearivere*  
(Matyu 26:31-35; Luk 22:31-34; Jon 13:36-38)

<sup>27</sup> ✧ Uva Jisas voeare oiso puraroepa, “*Ragai arova toritavere ragai raga kavuoro, uvare oisi ita va iava rigatoiva vo Pauto vo rearo-ia oiso, ‘Pauto sipsip ragui tokipato uporevere ra rerare rorooro sikaa viro sipsip ragui.’*”

<sup>28</sup> ✧ *Vo osa kopiia oaa iava toreoro visiipa iraravere Galili iare.*” <sup>29</sup> ✧ Uva Pita rerare oiso puraroepa, “Vosa voea rutu varaaro oirao pie vovouro vuripere viipa, eagara osa ragai vaoro oirao pie vovou viapau oiso ra vuripe.” <sup>30</sup> Uva Jisas rerare oiso puraroepa, “*Oiraopavira rutu vii tavipaavo, Vo osa kookai touvira erao piepa gau purarevere vo vokiaro, ovusa vo peva purari ragai vaisiara ora taeapaoro.*” <sup>31</sup> Uva oisi-a oiso osa iava Pita goruvira rutu rera tavitavipareva oiso, “Viapau rutu. Asi vii tapo kopiiravere, vo rara viapau vii vaisiara taeaa.” Uva voea rutu disaipel oea oisi raga puraaepa oiso osa puraroepa Pita.

*Jisas Vaoro Variria Oa Purareva Getsemani*  
(Matyu 26:36-46; Luk 22:39-46)

<sup>32</sup> Uva avaepa aue iare Getsemani-ia. Oa iava rera voeaaro disaipel tavireva oiso, “*Vovio pautara osa avara variri rovosa.*” <sup>33</sup> Uva Pita vase tapo avaroepa voea Jems ora Jon. Oa iava vovoroepa rirovira rutu siraooro osa vovouisi rerare vavataepa rutu. <sup>34</sup> ✧ Uva voea tavireva ita oiso, “*Ragaire sopau rirovira rutu vavatae siraooro. Osiraoa vao oisi rutu sovoa, oa iava kopiirai vao-ia. Vo tou rovopaoro uutupata.*” <sup>35</sup> Uva gare visivi avapaoro

✧ 14:18: Mk 14:44-45 ✧ 14:22: Mk 6:41, 8:6; 1 Ko 11:23-25 ✧ 14:23: 1 Ko 10:16 ✧ 14:24: Eks 24:8; Hi 9:20 ✧ 14:27: Sek 13:7 ✧ 14:28: Mk 16:7 ✧ 14:29: Jo 13:37-38 ✧ 14:34: Jo 12:27

gerevira koveroepa rasiua arore. Uva voa variriroepa oiso ra rera-ia puteve vao tavaka vuuta. <sup>36</sup> ✧ Uva oiso puraroepa, “Aite. Vosa ruipapau ra ragai iava o kap verari iria agasioi rutu aue iava siraoa vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>37</sup> Uva voreroepa voea kekesa osa uusipaaepa. Uva Pita-re oiso puraroepa, “Saimon. Eari uusipauvei? E viapau uvuipauvei ovuutavi-ia tokisa? <sup>38</sup> ✧ Uutupata ora variripata. Teapi kokarapa vovouro visii iare uriope visii kove piesa. Ari ita, vovouisiro oavisii ruipapai oiso ra ragai tapo touta, osa varauraro oavisii raga visii iava raveravepai.”

<sup>39</sup> Uva voreroepa ita varirisa. Oa iava oiso raga ita variriroepa. <sup>40</sup> Uva ita voreroepa voea kekesa osa uusipaaepa, uvare rura iraopaiva rutu. Uva viapau reoavi vai ra oai iava rera aatoive.

<sup>41</sup> Uva ita, vo peva piepa vuuta-ia voreroepa rera ita. Uva voea tavireva, “Touvira uusipatai reareapaoro? Oire uvuta! Vuuta-a vao tuguraei oa-ia Oirato Oviitoaaro kosi piepai vo vuri vovou irara vavaeoro iare. <sup>42</sup> Toretara avavio. Ro keketa ira ragai kosi pierevoi. Ira-a ro ira urioroi.”

*Jisas Kosi Piereva Judas Keripa Irarapa Oiso Ra Rera Kortuive*  
(Matyu 26:47-56; Luk 22:47-53; Jon 18:3-12)

<sup>43</sup> Uva Jisas touvira reoreoparoepa, ovusa pouro viropa Judas, iravu ita voea iava voeao katai tau erao (12). Ira riro irara tapo urioroepa auerova kakuara ora toorioara, voeao oea aruiva rovopa irara pris irara ora Reo Taisi-ia tarai irara, ora oira vasi irara. <sup>44</sup> Uva oisi-a oiso osa voea ravaavira tavireva oiso, “Ro irava uugaaparai, ira-ia pitu ovoita rerava avasa.”

<sup>45</sup> ✧ Uva urioroepa Judas rera iare ava ovoioro oiso purasa, “Tisa.” Oa iava rerava uugaa ovoiroepa. <sup>46</sup> Oa iava rera-ia pituiva rera rauoro.

<sup>47</sup> Uva iravu ruvara-ia toupaveva ira toorio gororeva. Uva Rovopato Pristo reraaro kovopato iava uvareoua pakoreva voua toero. <sup>48</sup> Uva Jisas voeare oiso puraroepa, “E oiso rutu ragaire taraapata osa kavirupato? Oa iava toorioara kaepata ora aue kakuara vo ragai-ia pitusa? <sup>49</sup> ✧ Ari ita, siposipopaavora vokiara rutu-ia visiipa vo Tugoropa Kepa-ia. Uva eakepa viapau voa ragai-ia pitu asatavora? Oire uva va-a eva oa iava vearopai ra va vao Tugoropa Rigato oirao pieve vao oa pura piropa vo ragai-ia.” <sup>50</sup> ✧ Oa iava voeao disaipel rera arova tori ovoiiva.

*Vo Viovokoto Torireva Gapuvira*

<sup>51</sup> Uva iravu viovokoto Jisas sirova uturoepa ira varoa-ia tuuparoepa. Uva rera-ia pituiva. <sup>52</sup> Oa iava varoa iava vase ovoioro gapuvira raga torireva rera ita.

*Jisas Rovirieiiva Kaunsel Irara Osireiaro-ia*  
(Matyu 26:57-68; Luk 22:54-55, 63-71; Jon 18:13-14, 19-24)

<sup>53</sup> Uva Jisas-va avaaepa Pristoa iare ro Rovopato, vo uva ora gurupaaepa pris irara voea reipa irara, ora voeao oira vasi irara, ora Reo Taisi-ia tarai irara. <sup>54</sup> ✧ Uva tauaivi Pita rera sirova uturoepa. Oa iava rera tapo koataroepa vo Rovopato vo tugiara, oa roeroarova oisoa toupaive rera vo kepaaro-ia Pristo. Uva polis irara tapo pauparoepa eto kasi-ia tuituipaoro.

<sup>55</sup> Oire uva reipa irara pris irara oearovu reipa irara Jiu iava oearea ora reoreopaaepa oiso ra Jisas togapaive oara iava reoara vai, auere ra rera

✧ 14:36: Ro 8:15; Ga 4:6; Jo 5:30 ✧ 14:38: Lu 11:4; Ro 7:23; Ga 5:17 ✧ 14:45: Mt 23:7 ✧ 14:49: Ais 53:7; Lu 19:47 ✧ 14:50: Sam 88:8; Mk 14:27 ✧ 14:54: Jo 18:18

kopii pieive oara iava. Uva taraa ragapaiva. <sup>56</sup> Ari ita, oearovu riro irara rera togapaiva oreorovu-ia kuuvu reoro rera vo kovoaro iava. Uva viapau oiso vaea reoro-a. Osa-a eisi iava viapau oreoi puraiva vao oiraopa reo vai rutu. <sup>57</sup> Uva va-a vao isivaoro iava oearovu torepaaepa oiso kuuvupasa oiso-ia, <sup>58</sup> ✧ “Easi oiso rera uvuiova osa oiso puraroepa, *Avoeao, vao Tempel pakoavere oa puraiva vavaeara iava. Ra vorevira vo kepa paua ita vo pevavi raga-ia voki. Vo kepaoo oa viapau uvuipaoo ra vavae-ia oira paureve.*” <sup>59</sup> Uva ita, viapau vaea reorovi-a varao oara purapaiva rerare.

<sup>60</sup> Uva Rovopato Pristo toreroepa vaea vuutaro-ia. Oa iava Jisas akereva oiso, “E reasipauei vo reo eva aato arapa, raa? Apeisi vo reo-a eva o-ia iava vii togapaivoi?” <sup>61</sup> ✧ Ora uru pie ragapaoro viapau oiso rera vo reoro pukopareva.

Oa iava Jisas akereva rera ita Rovopato Pristo, “Easi vii avu-a Ropoto Krai Pauto Reraaru rutu. Ro Oviitoaaro ira-ia vuurapa vaisi purapaioveira?” <sup>62</sup> ✧ Oa iava Jisas rera vo reoro pukooro oiso puraroepa, “*Ragai rutu vao-ia. Uva Oirato Oviitoaaro ragai ragoo kekeriverea osa paura vo oirapapa varata-ia Pauto vaaro ira-ia riroa gorua toupaveira. Ora vo osa rukuta kouro sovara-ia voreraverea vova vuvuiua.*” <sup>63</sup> Oire uva oisi-a eisi osa puraroiva Jisas, Rovopato Pristo ora rera iava kuvupato karikarioro kasipuroepa rutu oiso puraiva, “Uva aa vo reore taraapai toga reo? <sup>64</sup> ✧ Ari rera uvutavo oiso Pauto tovipare! Uva apeisi vovoupatai?” Oa iava vaea rutu katai reo puraoro rera iava vaseiva oiso ra rera kopii pieive.

<sup>65</sup> Uva oearovu rerapa rui vikipaaepa. Uva rera puaaro tavuruoro rera tapatapapaoro rerare oiso purapaaepa, “Taviu, irouto vii tapare?” Oire uva va-a vao oa iava polis irara rera taparakopaiva.

### *Pita Jisas Taeareva*

*(Matyu 26:69-75; Luk 22:56-62; Jon 18:15-18, 25-27)*

<sup>66</sup> Uva Pita otugivivu-ia toupaveva reoroarovi. Uva Rovopatoapa Pristo oiraoro kovopava urioopa <sup>67</sup> ✧ Pita kekesa osa tuituiparoepa. Oa iava rerava vuraapaoro rerare oiso puraopa, “Easi vii vai tapo-a iravu Jisas reraaro ro vova Nasaret-ia.” <sup>68</sup> Oa iava taeaparoepa oiso purapaoro, “Viapau taraiparai vao-ia oare oisi purapauai.” Oa iava kosiro viropa rataoa riaaro iare. Uva kookai kokorokureva. <sup>69</sup> Oa iava ita rera kekeoro voeao tavieva oira o kovopava oea rera ruvara-ia toupaveva, “Easi iravu-a ro vaea iava.” <sup>70</sup> ✧ Oa iava ora taearoepa ita.

Oire uva gare visivi rerare Pita oiso purapaaepa, “E auoro. Easi vii-a iravu vaea iava, uvare vii-a ita Galili iava.” <sup>71</sup> Oa iava ora rerare vuri reo purareva goruvira rutu ora takauoro oiso puraoro, “Avoeao, viapau rutu taraiparai eera-ia ira iava ragaire eisi purapatai.” <sup>72</sup> Uva kookai erao pie gau purareva. Oa iava Pita ora rugoo pieroepa Jisas vo reoroaro, vo reo oa iava rera tavireva Jisas, “*Kookai touvira erao piepa gau purarevere vo vokiario ovusa vo peva purari ragai vaisiario taeapaoro.*” Uva ora rugoo piero vo reore Pita gau ovoireva rirovira rutu.

## 15

*Jisas Sipoiva Pailat Ruvara Iare Ro Rom Gavman Iava Rera*  
*(Matyu 27:1-2, 11-14; Luk 23:1-5; Jon 18:28-38)*

✧ 14:58: Jo 2:19; Ap 6:14 ✧ 14:61: Ais 53:7 ✧ 14:62: Dan 7:13 ✧ 14:64: Lev 24:16  
✧ 14:67: Mk 1:24 ✧ 14:70: Ap 2:7

1 ✨ Uva vokipakou rutu ora reopaaepa reipa irara pris irara, ora Reo Taisia tarai irara, ora oira vasi irara, ora voeao rutu Kaunsel irara ora reoaepa. Oa iava Jisas tuukeiva. Uva voava rera ivuoro avaaepa Pailat iare Jisas vatesa rerapa. 2 Uva Pailat rera akereva, “E vii-a Jiu reraaro king, raa?” Uva Jisas rera aatoreva, “*Tu. Eisi osa purau.*” 3 Osa iava riroara rutu-ia reoara Jisas togaiva pris irara. 4 Oa iava Pailat vorerivira ita rerare oiso puraroepa, “E reaspau voea aato arapa? Oire uvuri. Easi riro reoro-ia vii togapaivoi.” 5 ✨ Osa Jisas viapau reoparoepa. Oa iava Pailat tavetave iraopareva.

*Vo Jisas Vatoreva Rera Kopii Piesa*  
(Matyu 27:15-26; Luk 23:13-25; Jon 18:39–19:16)

6 ✨ Vo osa Tagausapa Vurei vao Pasova pura piro ra oisoa iravu tuukepato karupareve Pailat voeapa ro irapa ruipapaave rera kosi piesa. 7 Oire uva iravu ro-ia Barabas ira toupareva oevu tapo tuukepa irara voeao-ia oea gavman oaiveva ora upopaoro iravu kopii pieiva. 8 Uva poua viropa Pailat ruvara-ia rera aresa oiso, “Vo pitupitu purari oiso osa vara purapariveira.” 9 Uva Pailat oiso puraroepa, “E oiso vovoupatai ra rera karua visiipa ro Jiu reraaro king?” 10 Ari ita, rera Pailat voeao-ia tarairoepa oiso osa oisoa Jisas vo goruaro riiriipaive. Oa iava Pailat-pa rera vateiva Jisas. 11 ✨ Uva reipa irara pris irara oearovu rutu vovouaro kasipu piepaiva, oiso ra aue Barabas karureve voeapa. 12 Oa iava Pailat voea akereva ita, “Eake vai purapaa visiipa ro-ia ira vaisipata oiso, Jiu reraaro king?” 13 Uva rirovira ora reoaepa, “Ae! Rera tapata evao parikou-ia!” 14 Uva Pailat oiso puraroepa, “Eake rutupa? Eakea vuri-a oa purarevora?” Oa iava ita voea rutu rirovira ita oiso puraaepa, “Ae! Rera tapata evao parikou-ia!” 15 ✨ Uva Pailat oiso vovouaroepa ra voea rutu vovouaro roru pierve. Oa iava ro Barabas karureva voeapa. Oire uva Jisas vatoreva oearovupa. Oa iava rera raga rovopaoro rera iava taru vasereva voeapa, oiso ra rera tapave vo evao parikou-ia.

*Vo Upo Pura Irara Jisas Akaipa Pieiva*  
(Matyu 27:27-31; Jon 19:2-3)

16 ✨ Oa iava upo pura irara rerava koataaepa gavman vo kepaoria, okepa oisoa vaisipaive oiso, Pretoriam. Uva voa ora guruaepa voea rutu upo pura irara. 17 Uva Jisas tuuiva varoa-ia revasipa varo, ora kukuvaipa puraiva rokarokapa iro iava. Oa iava rera kukuvaiva va-ia rera turaro pieoro kuuvuvira. 18 Uva rerare oiso puraaepa avivikevira, “Riro kaekaevira turarovira touri vii vao Jiu reraaro king!” 19 Oa iava aue-ia pito tapoko rera ragaiva rera kukearo. Osa ita rera-ia rui vikipaaepa rerare taku viropaoro kuuvuvira. 20 Uva voa rera tovi rovopaivoiva, revasipa varo veraiva rera iava. Oa iava rera vaaro rutu-ia rera tuuiva vorevira. Uva rerava avaaepa rera tapasa.

*Jisas Tapaiva Vo Evao Parikou*  
(Matyu 27:32-44; Luk 23:26-43; Jon 19:17-27)

21 ✨ Oire uva Saimon ro vova Sairini, Aleksanda vaio ora Rufus aitearo ira urioroepa uvavuva. Uva rera aruiva goruvira evao parikou kaesa vao Jisas vaaro.

22 Uva avaaepa uvavure voo vaisiaro Golgota-ia. Oa porearo oiso toupaveira, Kukue Keru Pukui. 23 Oa iava rera vateiva wain ovi va

✨ 15:1: Mt 5:22; Jo 18:28 ✨ 15:5: Ais 53:7 ✨ 15:6: Mt 27:15; Jo 18:39 ✨ 15:11: Ap 3:14  
✨ 15:15: Jo 19:1, 16 ✨ 15:16: Ap 10:1 ✨ 15:21: Lu 23:26; Ro 16:13

uvereoro oavu tapo itakopa ovi, oiso ra ovirei rutu-ia ukaioro. Vo osa vo ovipa reasiroepa. <sup>24</sup> ✧ Oa iava rera tapaiva evao parikou-ia, vo osa rera vararo-ia varoara ora roo pieaepa ora voeapa. Oa iava varare satu visiko purapaiva.

<sup>25</sup> Aue-ia vo resura vatara vuuta-ia (9 klok) vokipaua, ovuuta-ia rera tapaiva. <sup>26</sup> Oa iava vo vaisio rigatoiva oa vituaro iava rera tapaiva oiso puraoro, JISAS KING OAIIVE JIU. <sup>27</sup> Uva rera tapo aitereivu tapaiva kavirupatoarei oiso-ia, iravu oirapapa varata iava, ari iravu koike varata iava. <sup>28</sup> [Va vao Tugoropa Vuku iava vo rigato oa oirao pieiva rera-ia va karekeoro, uvare oiso purapapeira, ‘Oa-ia oiso rugooaepa, Iravu ro vuri irara iava rera.’]

<sup>29</sup> ✧ Oire vo osa oearovu rera-ia putepaoro rerare kukue pikupiku-paoro oiso purapaepa, “Aika, ari vii-a vao viigoa Tugoropa Kepa pakosa auepauera. Oire vo kepa vorevira paupari vo peva-ia aue voki! <sup>30</sup> Oire ora tauvau ra evao parikou iava varau!” <sup>31</sup> ✧ Uva pris irara reipa irara, ora Reo Taisi-ia tarai irara tapo rera akaipa piepaiva rerare oiso purapaoro, “Ia, ari oearovu oisoa tauvapareve. Uva viapau oiso ra oisi ora rera raga ora tauvaro. <sup>32</sup> Oire vosa vii oiraopatoa rutu Ropoto Krai Pauto reraaro vii Isrel reraaro King, oire varau evoava evao parikou. Ra vii oirao pieio va iava!” Vo osa vaitereo tapo aiterea tapo rera tapaiva rera akaipavira reopasiepa.

### *Jisas Kopiiroepa*

*(Matyu 27:45-56; Luk 23:44-49; Jon 19:28-30)*

<sup>33</sup> Oa iava ravireopa vuuta-ia (12 klok), ravireo utoroiva, rupa rovoepa voveare aue-ia rekasisa vo peva vuuta (3 klok) vokiariovi vo taere rutu-ia vao. <sup>34</sup> ✧ Oa iava vo peva vuuta-ia rirovira oiso puraroepa Jisas, “*Eloi, Eloi lama sabaktani.*” Oa vao porearo oiso purapapeira, “*Pautoa oaa, Pautoa oaa. Eakere ragaivi kavuri?*” <sup>35</sup> Oa iava rera oisi uvuiva voveao oea toupaiava rera ruvara-ia. Oire uva oiso puraaepa, “Uvuta. Keeraroi Ilaija-re.” <sup>36</sup> ✧ Uva iravu ikaureva iruta rupu piesa aue-ia uureopa viniga ovi. Oa iava evao rao-ia vo ovi vatepareva rerapa Jisas oiso purapaoro, “Tue rovota osa Ilaija rera rere piesa urio rovoro pasi.” <sup>37</sup> Uva Jisas rirovira gauoro vovouisi vikireva kopii ovoiro.

<sup>38</sup> ✧ Osa riroua varoua Tempel rataoa-ia kotovira touua, oua vurita piropa varee puraoro vova Pauto vo topisario viara iava rovoepa vore rasiuaaro. <sup>39</sup> Oa iava ro ira oisoa katai novoto (100) viurupa irara tokipareve rera Jisas eveireva vosa kopii ovoiroepa. Oa iava oiso puraroepa, “Oiraopavira! Oviitoaaro Pauto eera-al!”

<sup>40</sup> ✧ Uva riakora tapo toupaiava voa rerava vurapaoro tauaiava. Uva aue tapo toupavea vao Maria aue iava Makdala ora iriavu ita Maria Jems aakoaro ro avaioto, ora Josis, ora Salomi. <sup>41</sup> Uva vovea-a voveao oea rera oisoa sirova utupaave rera tokipaoro vo osa toupaveve Galili, ora airovu riro riako rutu airoa tapo rera sirova utuaepa Jerusalem iare.

### *Aveke Rikui-ia Jisas Tovoiva*

*(Matyu 27:57-61; Luk 23:50-55; Jon 19:38-42)*

<sup>42</sup> ✧ Uva vo ovaiariovi vo vokio ovokia oisoa vaisipaive, Aio Ravaapa Voki vo vokio iare Sabat voki. <sup>43</sup> ✧ Ovokia-ia urioroepa Josep vova Arimatia

✧ 15:24: Sam 22:18 ✧ 15:29: Sam 22:7; Jo 2:19 ✧ 15:31: Sam 22:8 ✧ 15:34: Sam 22:1  
 ✧ 15:36: Sam 69:21 ✧ 15:38: Hi 10:19-20 ✧ 15:40: Sam 38:11; Jo 19:25 ✧ 15:42: Diu  
 21:22-23 ✧ 15:43: Ap 13:50, 17:12; Lu 2:25, 38

ro torevoko vovouto Kaunselto. Ro ira oisoa Pauto vo Saraarore tapo rugorugooparo vare tuepaoro. Ira Pailat iare uriri asavira avaroepa. Uva Jisas kopiire rera arepareva. <sup>44</sup> Oa iava Pailat rirovira rugorugooroepa, uvare ikauvira kopii ovoiroepa Jisas. Uva ro ira oisoa katai vovoto (100) viurupa irara tokipareve rerare keeraroepa Pailat. Oa iava rera akereva, “E kopiioe Jisas?” <sup>45</sup> Uva viurupa irara tokipato vo taviaro uvureva oiso, Kopiiroe. Oa iava Jisas iava varaua vatereva Josep-pa. <sup>46</sup> Oa iava rera Josep ouavu vorireva varoua popoteua. Oa iava Jisas rere piereva rera tavurusa va-ia varoa popotea. Oa iava rera tovoreva aveke rikui-ia, oa ravaavira teka ragaiva rirova-ia aveke. Uva vo rikui iare iriavu rirova aveke perireva iria-ia vo riku riaro ivitasa. <sup>47</sup> Uva vao isivaaro iava Maria Makdala vairei ora iriavu ita Maria Josis aakoaro airea tapo vao kekeereva vo uva Jisas tovoiva.

## 16

### *Jisas Vorevira Toreroepa Tova Iava* (Matyu 28:1-8; Luk 24:1-12; Jon 20:1-10)

<sup>1</sup> ✧ Oire uva Sabat voki isivaaro iava Maria Makdala, ora Maria aue Jems aakoaro ora Salomi airoa vearo geesipara voriiva, oiso ra varava avaave Jisas varaaro kipusa. <sup>2</sup> Vo vokipakou rutu-ia vo vokio-ia rovopa voki wik iava oa-ia avaaepa tova urui iare. Vo ovusa ravireo kaeparo viropa. <sup>3</sup> ✧ Oa iava ora akeakepaaepa vao oiso, “Esa, irou vai vigeipa vao aveke veravere vova rikui riaro iava?” <sup>4</sup> Uva voava vurapaiva tuupavira. Oa iava ore rirova aveke vura ragaiva iria voava peri ovoio viropa. <sup>5</sup> Uva koatapaaepa rikui-ia. Uva vao iravu kekeiva viovokoto ira oirapapa varata-ia pauparoepa popotettoa-ia kuvupaoro. Oa iava ropeaepa.

<sup>6</sup> Uva vairo tavireva oiso puraoro, “Opeita uriripata. Jisas ro vova Nasaret-ia, ro ira kopii pieivora, irare taraapatavoi ita, ira vorevira toreroi. Viapau oiso vo toupaveoi. Keketa. Vo uva ita rera tovoivorao. Uva viapau. <sup>7</sup> ✧ Oire voreta disaipel tavisia rera voeaaro Pita tapo. Ira ita iraroe eisi Galilia. Uva vao rera keketavere oiso osa visii tavirevora.”

<sup>8</sup> Uva rikui iava torioro voreaepa osa rikerikepaoro ora ropepaoro tapo. Uva viapau oiso oearoiva ora reopaaepa, uvare rirovira uriripaaepa.

### *Jisas Ora Karekeroepa Maria Iare O Vova Makdala* (Jon 20:11-18)

<sup>9</sup> ✧ Uva toreroepa Jisas vokipakou-ia avitoava rovopa voki rupaaro iava vo wik iava. Oa-ia Maria o vova Makdala iriare ora karekeroepa rovovira. O iria iava erao vatara sigureva aue tugara. <sup>10</sup> Oa iava voea tavitavisia kareopa voea oea oisoa rera tapo toupave. Vo osa gau eraro-ia gaupaoro gaupaiva. <sup>11</sup> Oire vo osa oisi uvuiva oiso, Vorevira tootooro toreroi, oa iava rera kekeeva. Uva viapau oiso oira vo reoro oirao piepaiva.

### *Jisas Ora Karekeroepa Disaipeltoarei Iare* (Luk 24:13-35)

<sup>12</sup> Oire va isivaaro iava vaitereore ita ora karekeroepa pisavira aiterea raiva-ia vokapasiva. <sup>13</sup> Oa iava va iava voeapa tavitavisia karesiepa. Uva ita, viapau oiso vaiterei vo reoroaro oirao piepaiva.

### *Jisas Katai Tau Katai Siporeva Voraro Ruture Aueva Rera Vo Goruaro* (Matyu 28:16-20; Luk 24:36-49; Jon 20:19-23)

<sup>14</sup> ✧ Oire uva voea-ia katai tau katai (11) iare ora karekeroepa osa

✧ 16:1: Lu 23:56; Jo 19:39 ✧ 16:3: Mk 15:46 ✧ 16:7: Jo 21:1-23 ✧ 16:9: Jo 20:11-18

✧ 16:14: Lu 24:36-38; Jo 20:26

aiopaiva. Oa iava voeare aveavevira reoroepa aue-ia kaureo rugoo oaive ora aue vavagisi vovouro oaive. Aue iava uvare viapau voeao rearo oirao piepaiva oea rera kekeiva vo osa toreroepa. <sup>15</sup> Uva voea tavireva oiso puraoro, “*Avata voraro ruture vo rasio-ia Vearo Siposipo iava tavitavisa oirara rutupa.*” <sup>16</sup> Ro oirato ira ragai oirao pierevere ra baptaisa oureve, ira-a eera ira ourevere Pauto ora rera iare. Ari ro ira viapau oirao pieparevere ira iava viapau oiso opesipaperea rera vaaro vuri vovou. <sup>17</sup> Uva varao ravaa reesirō toupavere voeao-ia oea oirao piepaiveira oiso-ia, Taraiavere tugara kare sigupasa vo raga ragai vo goruaro-ia, ora pisa reoro-ia ora reopaaverea. <sup>18</sup> Oea rakoru-ia pituivere, ora itakopara-ia ukaiavere. Uva varei rutu evarei uvuipai oirato kopii pieve. Ari ita, viapau oiso voea vuri piepaivere ita vareo. Oea ita vavaeara oaive tovopaivere voeao-ia upiapa irara voea porete piepaoro.”

*Jisas Iparoepa Vuvuiua Iare*  
(Luk 24:50-53; Aposel 1:9-11)

<sup>19</sup> ✧ Oire uva vo tavitavia vao isivaaro iava Pauto rera ipa pie ovoireva Turaro Jisas vuvuiua iare vo uva pauparoveira oirapapa varata iava Pauto vaaro. <sup>20</sup> ✧ Uva va-a vao oa iava ava ovoiaepa voraro ruture rera iava siposiposa. Vo osa Turaro voea vo siposiporoaro oirao piereva aue-ia ravoto kovoro.

## LUK

### Irapa Reoro Vo Vukuo Iava

Rera-a ro Luk ira oisoa dokta kovo purapareve. Voea iava rera ro Jentael-pa irara. Uva rera vo rigato purareva aue-ia 60 o 70 yia Jisas vo kavauaro isivaaro iava.

Luk oisoa vokapareve Pol tapo vo vuutao-ia oa-ia oisoa Pol tapo toupaveve vo Troas urui-ia (Ap 16:10-41). Uva vo vuku-a vao oa rigatoreva Pol tapo toupaooro vo tuukepa kepa-ia (Ap 27:1-28:16).

Oa iava vo siposipo oa rigatoreva Jisas iava, oa-ia oiso puraroepa, Jisas ira oiso rutu oisoa toupaveve vo rasio-ia oiso osa oirara. Ira siraoa vo vavataaro sovoreva oiso rutu osa vigei oirara. Ira rirovira voeao rutupa oisoa siraparo voeao oiso-ia, kakae vure, ora vairo raroe riako, ora voeao apotapa irara, ora voeao upiapa irara, ora oearovu rutu tapo oirara. Luk riro reoro rigatoreva variria vo pitupituario iava (Lu 3:21, 5:16, 6:12, 11:1, 22:32, 23:24-26), ora aue iava Tugoropato Uraurato vo kovoaro iava tapo (Lu 4:1-14, 10:21, 24:49).

1. Ira pie reo vao iava oa ora karekepere, 1:1-4.
  2. Vaiterei kavauaro iava Jon Baptais vaio ora Jisas, ora vo osa riroparoepa Jisas, 1:5-2:52.
  3. Jon Baptais voraro virireva oirarapa siposipopaoro, 3:1-20.
  4. Jon Jisas baptaisreva vo uukova-ia Jodan. Oa iava avaroepa Jisas raaka tapi iare vo uva
- kokarapato Seten rera-ia kokaraparoepa, 3:21-4:13.
5. Jisas Galili taere sovara-ia virireva rera vo kovoroaro ravoto kovoro purapaoro, 4:14-9:50.
  6. Jisas Galili iava avaroepa vore Jerusalem iare Jeriko urui-ia puteoro, 9:51-19:27.
  7. Turarivira koataroepa Jisas Jerusalem urui-ia ovoioipa wiki-ia toupasa, ouruia-ia oevu rera kotoiva evao parikou-ia, 19:28-23:56.
  8. Vorevira toreroepa Jisas vo pevapa voki-ia, oa iava ovokivu-ia disaipel irara iare ora karekeroepa ora oearovu iare tapo, 24:1-53.

#### *Luk Vo Siposipo Rigatoreva Auepa Tiofilas*

<sup>1</sup> Reito Tiofilas, vo tuariri uva oearovu rovoaera siposipoara rutu rigatooro varao rutu iava oara karekerea Pauto igei rutu vuutaaro-ia. <sup>2</sup> ✱ Uva voeao gisipoaro sirova utuaera oea Jisas vo kovoaro kekeiva ora voea osireiario iava voari rovoa-ia ora vo vokiara rutu-ia tapo. Aue iava uvare voea oea oisoa oiso toupaveve, Pauto vo reoro kosi piepa irara. Uva voea-a evoea oea igei vateivora vo siposiporo varao. <sup>3</sup> ✱ Uva oisi-a eisi osa iava ragai tapo ita vo siposipo rigatopaavo, oiso ra viipa reito Tiofilas va sipoa, vo rara vara rutu vituarore taraa rovopaavo vearovira. Ra va iava torevokovira vara rigatoa oiso rutu osa tuariri karekepa. <sup>4</sup> Eisi osa iava uvuipau ra vara-ia vearovira taraiu oiso, Oiraopara varao oara-ia vii siposipoivora Jisas vo kovoaro iava.

#### *Vo Sekaraia Tavireva Enselto Jon Iava Ira Kavauoreve*

<sup>5</sup> ✱ Vo osa King Herot reiparoepa ro vova Judia taere-ia, osa vo vuuta-ia oisoa iravu koruou purapato pristo toupaveve. Rera vaisiario, Sekaraia voeao iava pris irara Abaisa voeao. Ari o-ia tapo Ilisabet vatuava vo



sarao iava oira pris irara voeao Eron voeaaro. <sup>6</sup> ✧ Aiterea vaitereo oisoo torevokovira rutu oisoo toupasi Pauto osireiario-ia. Uva varao Reo Taisiro rutu oara oisoo oirao piepasi, ora varao Pauto vo reoroaro. Oa-a vao oa iava viapau vuria vai vaiterei-ia. <sup>7</sup> Vo osa viapau vaiterei oviitoa vaiaro, uvare Ilisabet-a asaova. Oa iava viapau oiso kakae kavaupao. Uva avuka ragasiapa kakae kavau asavira.

<sup>8</sup> Oire uva ovokivu-ia Sekaraia pris kovo purareva Pauto osireiario-ia vo vuutao-ia oa-ia oisoo rera voeaaro pris kovo purapaive. <sup>9</sup> ✧ Uvare oisi rera reesiiva voea vo pitupituario sirova utupaoro, oiso ra Tugoropa Tugi-ia koataparo vao Turaro Pauto vaaro, aue koruou kuparero purapasa. Otugia-a vao oa Rovopa Kepa Lotupa Kepa Tempel sovara-ia rutu oisoo toupave. <sup>10</sup> ✧ Oire uva vo vuuta vao koruou kupare purapa vuuta oa-ia riro irara rutu Jiu ora guraepa varirisa ratauva. <sup>11</sup> Uva Sekaraia purapurapato enselto kekereva eravao vatuario-ia oirapapa varata iava, uvare voa rera ruvara iare karekeropa. <sup>12</sup> Oa iava voa rera kekeoro rirovira ora sitaroepa. Uva uririparoepa. <sup>13</sup> Uva enselto rerare oiso puraroepa, “Sekaraia. Teapi uriripau. Ari Pauto vii vaaro variria uvurevoi. Uva vii tavipaavo oiso, Vii vatuaavaoro Ilisabet veipa oviito oaesii kavavevere. Oa iava oiso rera vaisirivere rara, Jon. <sup>14</sup> Osa iava vii iava sopaua vearovira touvere ora tapo rorurivere. Ra riro irara tapo rorurivere rera-ia ovusa kavauro. <sup>15</sup> Ira rei vaisirovere kovopaoro vo Turaro Pauto osireiario-ia. Uva viapau rutu oiso ukaioparovere varao-ia riro gorupara aue wain oviro, vo oviro oara uvuipai oirara kokoro piepasa. Ira-ia goruvira toupavevere Tugoropato Uraurato rera iava sopaua uvui piepaoro vo vuutao-ia vao vo osa aakova kovuaria toupavevere, ora vo osa kavauro. Uva vukuparovere Tugoropato-ia Uraurato. <sup>16</sup> Ira riro irara roroiovira soporeparevere voeao vova Isrel-ia. Ra Turarore poreave ro voea reraaro Pauto oaive. <sup>17</sup> Ira-ia Tugoropato Uraurato ora gorua toupavevere, ro Uraurato ora vo goruo oarea oisoo Ilaija-ia toupave vo osa Pauto vo rearo kosi piepareve voari tuariri. Ra iraparo Reitoapa Turaro. Eera oviitoara ira vo aaro rutu vovouaro porerevere ra ora agiagiave ora voeao tapo riro kaureo irara. Oire ra va iava vearo rugoo ouive voeao torevoko vovou irara vaaro. Ora voea tapo oirara rera voeaaro ravaarevere ra Reitoare Turaro tuevira toupave rera vo kovoaro purapasa.”

<sup>18</sup> Uva va-a vao oa iava Sekaraia rerare enselto oiso puraroepa, “Uva eake iava oiso puraravere, Oiraopa reo vao-ia? Easi ragai avukaraerao vegei rutu ora riakova oaa.”

<sup>19</sup> ✧ Oire oa iava enselto oiso rera aatoreva, “Ragai-a Gebriel ragoo Pauto ruvara-ia torepairaveira. Ari ita, uva Pautoa raga-a ira ragai arurevoi oa iava uriorai vii tavisia vao iava vearo sipsisipo vii oviitoaaro iava. <sup>20</sup> ✧ Oire uvuri! Vii iava gisipo kapuevoi, uvare viapau ragai vo rearo oirao pieparivoi. Ra viapau reopau vo rutu rekasisa, uva vara rutu varao karekepere ragai vo reoroaro oirao pieoro.”

<sup>21</sup> Oire uva voea rutu oirara rerare tue ragapaaepa Sekaraia oiso purapaoro, “Eake vai karekei Tugoropa Tugi-ia rerare oa iava viapau vigei tavisia kosiro viroi?” <sup>22</sup> Uva va isivaaro iava kosiro viropa. Oa iava viapau voeapa reoara vai vateveva. Uva va iava oiso taraiapaa, Easi oavu avu rutu kekerevoi evoa Tugoropa Tugi sovara-ia. Uva vavaea raga-ia voeare reoreoparoepa uvare gisipo rerare kapueva. <sup>23</sup> Oa iava Sekaraia vo kovoaro vao koruou purapa kovo opesiepa. Uva vorevira kareroepa ora

rera vo uruiaro iare. <sup>24</sup> Oire uva va-a vao osa kakae kovu pura piropa oira kovuaro-ia Ilisabet. Oa iava oisoa toupaeve vo kovuva vo raga oira vo kepaaro raga sovara-ia vo vavae rutu sovara-ia aue kekira. Oa iava oiso puraopa, <sup>25</sup> “Ari ita, kakae kavau asava ragai. Uva Turaro Pauto ragaipa siraoroi. Oa iava oiso ragai pierveoi ariia veraoro ragai iava oirara rutu osireiario iava.”

### *Enselto Maria Tavireva Jisas Iava Ira Karekerovere*

<sup>26</sup> ✧ Uva katai vatara-ia (6) kekira kakae kovuva toupaeva Ilisabet-ia, ovusa Pauto purapurapato Gebriel arureva ouruivu iare vo uruio Galili taere-ia. Va vaisiario, Nasaret. <sup>27</sup> Osa iava avaroepa iriavu iare tavauruva riakova iria reesiiva oiso ra oirato oira oureve. Rera vaisiario, Josep, King Devit aao iraraaro iava rera. Uva oira vaisiario-a, Maria o-ia iria viapau oiratoa vaiva uusio. <sup>28</sup> ✧ Oa iava Gebriel oira iare avaroepa. Uva oirare oiso puraroepa, “Vearovira Maria. Pauto vii viraakopare viipa siraoro. Oa iava Turaro vii tapo toupareveira vii tavapaoro.”

<sup>29</sup> Oire uva Maria vo reo vao uvuevoiva, oirare sopau vavataepa rirovira rutu oiso rugorugopaoro, Apeisi raga reo-a vao-ia?

<sup>30</sup> Oa iava purapurapato enselto oiso oira tavireva, “Maria. Opeita uriripau. Pauto vo vovouaro vearopa vii-ia. <sup>31</sup> ✧ Uvuri! Kakae kovu purapapi vii-ia rara, ra iravu kavauri kakaeto ira vaisirivere oiso, Jisas.

<sup>32</sup> ✧ “Ira turarovira toupareveira. Oa iava oiso rera vaisiiverea, Pauto Oviitoaaro ro oiso viara-ia. Oa iava Pauto turarovira rutu rera tovoreveera oiso rutu osa rera aautoaaro King Devit. <sup>33</sup> ✧ Ira taru Jekop voeaaropa Jiu-pa irara turaroparoveera vokiara rutu-ia. Ra rera vaaro tokia viapau oiso opesiperea.”

<sup>34</sup> Oa iava Maria rerare enselto oiso puraopa, “Uva apeisi ragavira karekepere va vao-ia, uvare oira ou asavira toupavaoi.”

<sup>35</sup> Oire uva enselto oira vo reoaro pukooro oiso puraroepa, “Ari! Tugoropato Uraurato ira vii iare uriopa, vo osa Pauto vo goruaro vii ruuve. Eisi osa iava rera reraoro kakaeto kavaurivere rara utupavira. Uva va-a eva vituaro iava oiso rera vaisipaivere oiso, Roroio Vovoutoa Rutu Pauto Oviitoaaro.

<sup>36</sup> “Uvuri! Easi Ilisabet sarava oara iria avukaopa rutu. Iria-ia kakaetoa epao oira kovuaro-ia. Iriare tuariri oisoa oiso purapaave, Viapau uvuipaori ra kakaetoa vai kavaveve. Ovusa vo voki-ia oira kovuaro-ia kakae kovuei. Ari ita! Katai vatara (6) kekira oira vaaro oa putevoi. <sup>37</sup> Pauto uvui iraopa auero rutu purapasa.” Uva oisi-a eisi Maria tavireva enselto vo osa vaierei reesipereva vaiereo airea kakaetoarei kavausa auepaeriepa.

<sup>38</sup> Oa iava Maria rera vo reoaro aautooro oiso puraopa, “Ari ita! Ragai-a Turaro oiraaro kovopava. Ira uvuipa ra ragaipa oisi va purareve oiso osa purauei.” Oa iava enselto oira arova avaroepa.

### *Maria Ilisabet Kekesa Avaopa*

<sup>39</sup> Oire uva vo vuuta iava vao vo vokia Maria toreoro ikavivira avaopa ouruivu iare pukuiara vuutaaro-ia vo Judia taere-ia. <sup>40</sup> Oa iava Sekaraia vo kepaaro-ia koataopa. Uva voa Ilisabet-va vearo voki puraeva. <sup>41</sup> Uva Ilisabet Maria uvueva osa oirava vearo vokieva. Ovusa kakaeto oira kovuaro-ia toupareva Ilisabet. Uva voa toritoripareva. Oa iava Tugoropatoa-ia Uraurato agasiopa Ilisabet. <sup>42</sup> ✧ Oa iava rirovira rutu goruvira reopa oiso puraoro, “Vii-ia riroa viraakoa toupavoi Pauto vaaro. Oa vituaro iava vii vo

✧ 1:26: Mt 2:23 ✧ 1:28: Dan 9:23 ✧ 1:31: Ais 7:14 ✧ 1:32: Ais 9:6-7 ✧ 1:33: Hi 1:8

✧ 1:42: Het 5:24

roruaro oriakorovu rutu vo roruroaro-ia putepaivoi. Uva eera tapo kakaeto vava touparevoi iraei vii kovuaro-ia. <sup>43</sup> ✧ E apeisi vai ragai iare taveteveoi Turaro aakoaro. Asi viapau riro vaisivavi-a ragai? <sup>44</sup> Ari ita! Vii uvuavoivi ovusa ragaiva vearo vokirivoi vo pou virooro. Oa iava kakaeto ro iraei ragai kovuaro-ia vo uvava ora sitaoro rorurevoi. <sup>45</sup> Vii-a vao riakova viigoa roruava touparivoi vo rera vo rearo oirao pieoro oiso osa vii tavirevo. Uva oisi oiraopavira vii-ia karekepere.” Eisi osa puraopa Ilisabet oirare Maria.

### *Erava Maria Oiraaro*

<sup>46</sup> ✧ Maria oiso puraopa,

“Ragai iava sopaua oaa Turaro vaisiario kae piepaivoi. <sup>47</sup> ✧ Oa iava ragai reraaro uraurato Pautoa-ia roruparevoi ro ira ragai virivaripareveira. <sup>48</sup> ✧ Ragai-a vao rerapa kovopava. Ragai akaipavavi raga ragoapa siraoroi. Vo vokie ora vo utupaua uva oirara rutu ragai iava oiso purapaaverea, Pauto oirapa riroa vaterevoi rorua. <sup>49</sup> ✧ Aue iava uvare riro gorua rutu purare ragai-ia. Rera raga ro Tugoropa Vaisitoa Rutu, ira riro kovo purapareveira. <sup>50</sup> ✧ Ira vaaro siraoa voeapa toupai oea rera rei piepaiveira rerapa avivikepaoro. Oire uva oisi raga ita voeapa tapo siraoparoverea ovii irara ovii iraraaro. <sup>51</sup> Ira iava vavae-a riro goru kovo purava. Ora voea sikasikareva voea siguoro voeao riro kaureo irara oea oisoa ora rei vaisi piepaave ora voea raga. <sup>52</sup> Ira reipa irara vaisiario vara piereva voeao vaisiario kae pieoro akaipa vaisi iraravi. <sup>53</sup> Ira voeao sopaaro vuku piepareveira oea iava sopaura ogoepapeira veaorapapa. Vo osa voeao vore piereve riro kotokoto guru irara, vo osa viapau oarai ouive rera ruvara-ia.

<sup>54</sup> ✧ Uva rerapa kovopa irara tauvarevo vigei vao Isrel, uvare rera vaarore siraoa rugooroe. <sup>55</sup> Oiso osa puraroepa vigei aao iraraarore oiso, Ebraham-pa siraoparaverea ora rera voeaaoro utupa irara voari rutu tugurasa utupa vokiro rutu-ia.”

<sup>56</sup> Maria vo peva-ia kekira Ilisabet tapo toupavea. Oa iava vorevira ora oira vo uruiaro iare kareopa.

### *Ilisabet Jon Kavaveva*

<sup>57</sup> Oire uva oira vo vuutaaro pou piropa. Oa iava oviiito kavaveva Ilisabet. <sup>58</sup> ✧ Uva voeao oira vo uruiaro-ia tou irara ora sara irara oea rutu vo siposipo iava vao uvuiva. Vo uvare Turaro Pauto oirapa siraoroepa rutu. Uva va-a eva oa iava oira tapo rorupaiva.

<sup>59</sup> Uva vo peva vatarapa voki (8) pou piropa. Oa iava vo voki-ia urioaepa rera kakaeto iava rakari verasa rera-ia vo vaisio tovooro, Sekaraia, aitetovo vaisiario. <sup>60</sup> Vo osa aakova oiso puraopa, “Viapau. Ari vao iava oiso rera vaisipai, Jon.” <sup>61</sup> Uva oirare oiso puraepa, “Uvare saratoa vai oara oisi ovaisiei oa oisi toupai, oa iava oisi ruipapauei? Viapau!” <sup>62</sup> Oire oa iava vavaeara raga-ia Sekaraia akeiva oiso, “Aa vo vaisio-a vao oa iava rera vaisipai ro-ia vii oviiitoaaro?” <sup>63</sup> Uva slet pero arereva. Oa iava vo vaisi vao Jon-pa rigatoreva va-ia voeapa. Uva rirovira rugorugooapaepa. <sup>64</sup> Oire uva vo vuuta raga-ia Sekaraia iava gisipo karu ovoivo viropa. Oa iava arevuoto rera iava vorevira veaoroepa. Uva va iava Pautoa-ia vuurapa vaisi pura ovoireva. <sup>65</sup> Uva voeao rera vo uruiaro-ia tou irara uririaepa. Oa iava vara rutu iava varao vo siposipo viriva vo Judia pukuiro vo taerearo rutu-ia. <sup>66</sup> ✧

✧ **1:43:** Lu 2:11 ✧ **1:46:** 1 Sml 2:1-10; Sam 34:2-3 ✧ **1:47:** Sam 35:9 ✧ **1:48:** Sam 138:6  
 ✧ **1:49:** Sam 71:19, 111:9 ✧ **1:50:** Sam 103:17 ✧ **1:54:** Sam 98:3 ✧ **1:58:** Jen 19:19 ✧ **1:66:**  
 Lu 2:19, 51; Jen 39:2; Ap 11:21

Uva va iava oirara rutu vo siposipo vao uvuoro rirovira rutu tavetavepaiva rugorugopaaro vo ora voea iava sopaura-ia. Uva oiso puraaepa, “Esa apeisi vai ragavira utupaua toupavevere rera ro kakaeto?” Ari ita! Uvare taraipaaepa oiso, Pauto vo goruaro toupai rera-ia.

### *Sekaraia Oiraaro Erava*

<sup>67</sup> ✧ Oire uva Tugoropato Uraurato Sekaraia sopaaro-ia koataroepa rera vuku pieoro ro kakaeto aitetoaaro. Oa iava ravaa reo purareva oiso puraoro,

<sup>68</sup> ✧ “Turaro vaisiario-ia vuurapa vaisi purape, ro Pauto Isrel reraaro. Ira vigei oirara tauvasa urioroi ora rera voeaaro. Uvare vigeipa oraivavu purareva oraiva iavirava uvuipaviei ra virivirivira toupape. <sup>69</sup> ✧ Uva vova rera kovopatoaaro Devit ira sara iraraaro iava iravu riro goruto oirato tore pierevoi vigei oupasa vorevira ora rerapa vova vuria iava. <sup>70</sup> Eisi osa siposiporeva voari tuariri profet irara gisipoaro-ia voeao torevoko vovou irara. <sup>71</sup> Oa-ia oiso puraroepa, Vigei viriviripareverea voeao vavaeoro iava oea vigeiva keripaaveira, ora voeao tapo vavaeoro iava oea vigeire vuri vovoupaaveira rutu. <sup>72</sup> Ira vigei aao iraraarore oiso puraroepa, Visii tauvapaaveira. Oire uva va-a vao Reo Ovoi oare rugoooro va oirao piere vigeipa. <sup>73-75</sup> ✧ Eisi osa puraroepa rere vigei aotoaaro Ebrahim va vao Reo Ovoi puraoro oiso, Vigei vorevira vore ovoireverea voeao vavaeoro iava vigeiva keripa irara. Ra va iava rera vo kovoaro purape uriri asavira. Rara avivikepavio rera osireiario-ia aue torevoko vovou purapaoro vokiara rutu-ia.

<sup>76</sup> ✧ “Oire uva vii-a vao kakaeto viigoa vaisiiverea oiso, Profetato Pauto reraaro ro oiso rutu viara-ia. Viigoa irauvere Turaropa raiva vatatopopaoro. <sup>77</sup> Uva oirara rutu siposiporivere voeao rera voeaaro. Oire ra vo reoro iava taralave oiso, Ira taru voea iava vuri vovouro verapaveverea voea vorevira oupaoro ora rerapa. <sup>78</sup> Aue vituaro iava uvare rirovira vigeipa siraopa vovou purapavevira Pauto ro vigei reraaro. Osa oiso piepareverea ro ira ora rera iava aviavi piea vatepareverea vigeipa. <sup>79</sup> Osa iava voeaopa aviavia vatepareverea oea kopii vo goruaro sovara-ia toupaveira voeao rupa vovou irara. Uva vigei kokotoaro torevokoreverea vigei tuvetuvepaoro. Ra va iava gavaure vovou vo raivaaro-ia vokape.”

Eisi osa puraroepa Sekaraia.

<sup>80</sup> Oire uva riroroepa rera kakaeto. Uva rera iava varaua ora uraurato goruvira karekeepa. Oa iava vo toureva raaka tapi vo tugurasa uva ora karekeroepa Isrel-pa irara osireiario-ia ro aue Jon.

## 2

### *Maria Jisas Kavaveva (Matyu 1:18-25)*

<sup>1</sup> ✧ Vo vuuta-ia vao oa-ia King Sisa Ogastas oavu reo ovoi purareva, oiso ra vo voki-ia oirara rutu vieiario vaivaisiario ouive. <sup>2</sup> Oire uva rovopa voki rutu-a va vao oa-ia vaisi oupaapea oirara rutu iava. Ovusa aue Sairinias voa reiparoepa gavmanpaoro vo Siria-ia vo vo voki-ia eva. <sup>3</sup> Uva oisi-a eisi osa iava voea rutu oirara vo urui iare eva voea rutu vo uruiaro torevokoaro avaaepa, oiso ra voea rutu vaivaisiario vieiario ouive voa. <sup>4</sup> ✧ Ari

ita, Josep-a Devit sara iraraaro iava rera. Oa iava ora rera vo uruiaro iava gare urui avaroepa vao Nasaret vo Galili taere-ia. Oa iava voare vo Judia avaroepa vo King Devit vo uruiaro-ia uva oisoa vaisipaive oiso, Betlehem-ia. <sup>5</sup> Uva oira tapo Maria avaroepa voare o iria reesiiva rerapa, oisore ra vaiterei rutu vaisiaro tapo ouive vao. Vo osa kakaie kovuva toupaveva Maria. <sup>6</sup> Uva vo urui raga-ia vao Betlehem urui touvira toupasiva. Oa iava voa kakaeto kavausa aueopa. <sup>7</sup> Oire uva bulmakau kare vo kepaaro-ia tupaaro rera eera avaiotoa rutu ira kavaveva vao, uvare tavetepa irara vo kepaaro agasiepa. Oa iava voa rera ruueva varoa-ia. Uva voa rera uusi pieeva bokis-ia o iria-ia oisoa bulmakau kare aiopaive.

### *Purapurapa Irara Ensel Sipsip Tokipa Irara Taviiva*

<sup>8</sup> Uva voa-vo vo uva oearovu sipsip tokipa irara toupaiava vo urui vatuaro-ia voea vo raguiroaro tokipaoro vokiario. <sup>9</sup> ✧ Uva Turaro reraaro ensel voea iare urioroepa. Uva voa Turaro vaaro keraria voeare sisikorevira aviaviva. Oa iava rirovira rutu uririaepa. <sup>10</sup> Uva enselto oiso puraroepa voeare, “Opeita uriripata. Uvuta! Ragai visiipa Vearo Siposipo sipovoi vao oa oirara rutu roru pie iraovere. <sup>11</sup> ✧ Vo voki-a vao oa-ia iriavu riakova kakaeto kavavevoi vo King Devit vo uruiaro sovara-ia. Ro ira visii ouereve vorevira vova vuria iava. Eera Krais Turaro ira Pauto oiraraaro tuvetuveparevarea. <sup>12</sup> ✧ Uva ora visii vo reesiroaro iava rera vo kavauaro-ia taraitai eisi osa. Uva rera kakaeto keketavere ira ruuevo varoa-ia rera uusi piesa bulmakau kare aiopavaaro-ia bokis.”

<sup>13</sup> Oire uva voavi ragava riro irara rutu vuvuiua-ia tou irara poua viropa vuvuiua iava vo toupasa enselto ruvara-ia. Oa iava Pautoa-ia vuurapa vaisi purapaoro oiso purapaaepa erapaoro, <sup>14</sup> ✧ “Pauto vaisiaro-ia vuurapa vaisi purata vo vuvuiua rutu-ia. Ra gavaure vovou rutu outa vo rasitoa-ia tupaoro visii vao visiigoa-ia rorupareveira Pauto.”

### *Sipsip Tokipa Irara Jisas Kekesa Avaaepa*

<sup>15</sup> Oire uva enselpa irara voea arova voreaepa vuvuiua iare. Oa iava voeao sipsip tokipa irara ora reoaepa oiso “Irata, ra avavio voare Betlehem-ia. Ra va avu kekepe vao oa karekei vao oa iava Turaro Pauto vigei tavirevoi.” <sup>16</sup> Oa iava ikauvira avaaepa. Uva vaiterei Maria vaio ora Josep kekeiva vao osa vao toupasiva. Ovusa kakaeto bulmakau kare aiopavaaro-ia bokis uusiparoepa. <sup>17</sup> Uva rera kekeivoiva, vo reo vao taviiva oa uvuiva rera iava ro-ia kakaeto vo enselto ruvara-ia. <sup>18</sup> Oire uva voea rutu oirara vo reo uvuiva sipsip tokipa irara ruvara-ia, oea vo reo-ia rirovira rugugooapaepa. <sup>19</sup> ✧ Vo osa Maria vo reoro rutu varao ora oira sopaaro-ia orirupaeva. Oa iava voa varare rugooapa rutu. <sup>20</sup> ✧ Uva sipsip tokipa irara vorevira kareaepa Pautoa-ia vuurapa vaisi purapaoro. Oa iava rirovira rutu rorupaiva Pautoa-ia vara-ia varao oara rutu uvuiva, ora vara rutu tapo kekeiva oiso osa enselpa irara voea taviiva.

### *Jisas Vateiva Vaisia*

<sup>21</sup> ✧ Uva vo peva vatarapa voki (8) pou piropa, oa iava Jisas rakari veraiva rera-ia vo vaisio tovo ovoiooro, Jisas-pa vaisi. Ari ita, vo osa vo kovutoa-ia pou viro asavira toureva, ovusa enselto vo vaisi iava rera vaisireva.

### *Simion Vaio Ora Ana Jisas Kekesiva Lotupa Kepa Sovara-ia*

22 ✨ Oire uva vo vuuta-a vao oa pou piropa vo avareiri rutu sisigarue piesa oiso osa Moses vaaro Reo Taisi puraepa. Oa iava aitato avukarei vo kakaeva avasiepa Jerusalem iare Pauto Turaro vatesa rera. 23 ✨ Oiso osa oisoa rigatoo purapape vo Turaro vaaro-ia Reo Taisi oiso, ‘Vosa avaiio kakaie kavaueve aakova, oire ra Turaropa Pauto rera vateive rera reesioro rerapa.’

24 Oa iava oiso ruipapasiepa tapo ra pristo koruoua vai tapo purareve vaiereiri vo vovouaro sirova. Oiso osa puraepa Turaro vaaro-ia Reo Taisi oiso,

‘Viovokotoarei kurue vaiio, eke tavaururireiri vai uruvaurireiri.’

25 Oire uva iravu oirato Jerusalem-ia toupaveva rera vaisiario Simion. Torevokotoa rutu ora tapo riro aviviketo Pautoa-pa. Ira oisoa rerere ro tueparo ira Isrel-pa irara vorevira ourevera ora rerapa vova rera iava. Vo osa Tugoropato Uraurato oisoa Simion sopaaro-ia toupaveve.

26 ✨ Ari ita, Tugoropato Uraurato rera tavireva ravaavira oiso, ‘Viapau ikauvira kopiuvivere. Viapau. Ari Kraisi keke rovorivere, ira arureva Turaro Pauto vore rasitoo-ia rera voeaaro tuvetuvepasa.’ 27 Uva Tugoropato Uraurato Simion tuvetuvepaoro koataroepa Rovopa Kepa Lotupa Kepa Tempel sovara-ia, vo osa aitato ora aakova Jisas kakaeva uriosiepa vo pitupitoo purasa osa oisoa purapape Reo Taisi. 28 Oire uva Simion Jisas kavaureva ora rera vavaearo-ia. Oa iava Pautoa-ia vuurapa vaisi purareva rerava oiso puraoro,

29 ‘O Turaro Pauto. Ro iava vii reraaro kovopato vaseri ra vova avaro, uvare ragai vo vovouaro gavaurevira toupai. Ra va iava vii vo reoaro oirao pieri oreoa purariva voari tuariri. 30 ✨ Aue iava uvare ragai iava osireitoarei oaa vao kekesivoi oa purarivoi auere vorevira igei ora viipa ousa vova vuria iava. Va-a eva oa iava kopiisa vovouparai.

31 Vii vao ravaarivora oirara rutu osireiario-ia 32 ✨ eva aviavia. Oa-a vao aviavia vatepareverea vo osararovu rutu vo rugorugooaro karupasa, oiso ra vii vo raivaaro-ia taraiave. Ra va iava vii voeaaro Isrel riro vaisi ouive.’

33 Aitatoarei ora aakova rirovira rutu rera-ia Simion tavetave iraopasiva vo reo iava vao oa purareva. 34 Oire uva Simion voea vatereva viraakooa. Oa iava Maria tavipareva oiso,

‘Uvuri! Ro-ia kakaeto rira oearovu rutu Isrel-pa irara kove pierivere ora riro irara tapo tore pierivere tapo. Ra oiso toupaveve, Reesia Pauto vaaro. Uva riro irara rutu rera takaupaivere rara. 35 Eisi osa iava riro irara varaaro rugorugooara roroiovira karekepere, [Uva iravu toorio ira avuavaro oiso toupaveve osa siraoa ira vii sopaaro togarevere.]’

36 Oire uva iriavu profetava riakova toupaveva voo. Oira vaisiario, Ana o-ia Fanyuel oviivaaro ro vova Asa-pa irara. Iria erao vatara (7) ivaro-ia vatutoo tapo toupaveva. Oa iava kopiivoira, rera isivaaro-ia avukaopa rutu raroevira. 37 Uva vo peva vatara tau vo resura (84) ivaro-ia oira vaaro oa-ia tuguraopa. Uva viapau oisoa Tugoropa Kepa Tempel kavupaveve. Ari ita, oisoa aioara kavupao katai rugoo purapasa variripaoro, uvare oisoa Pauto vo kovoaro-ia pitupaveve vo vokiario ora tapo riraaro-ia. 38 Oire uva vo vuuta raga-ia vao urioopa Pautoa-ia vearo vaisi purasa. Oa iava oira tapo siposipoveva rera iava ro kakaeto voeapa oirara voeao oea oisoa Pautoa-re tuepaave, oiso ra Jerusalem vore pieriveve ora rerapa.

### *Josep Nasaret Iare Kareroepa Vorevira*

<sup>39</sup> Oire uva vara rutu varao puraiva oiso osa Pauto vaaro Reo Taisi puraepa. Oa iava ora voea vo uruiaro iare vorevira kareaepa vao vo Galili taere-ia gare uruivi Nasaret-ia. <sup>40</sup> ✧ Uva kakaeto riroroepa goruoro rutu. Oa iava vearopa tarairo rera-ia karekeepa. Uva Pauto vaaro tapo viraakoa toupaiava rera-ia.

### *Viovokovira Toupaooro Jisas Lotupa Kepa Tempel Sovara-ia Toupareva*

<sup>41</sup> ✧ Jisas aitearo avukarei ipasiepa ovokivu-ia Jerusalem iare, vao iare Tagausapa Vurei aue Pasova, oa oisoa purapa piro vo ivara rutu-ia katakataivira. Ra Pauto vaarore siraoa oisoa rugorugooapaave vorevira vo osa voea tauvareva Isip iava voea kosi pieoro. <sup>42</sup> Uva Jisas katai tau erao (12) ivaro-ia uvuiroepa. Oa iava vo voki vao vo pitupituario sirova utuaepa Pasova Aio purapa voki. <sup>43</sup> Uva vo vokiropa varao Pasova Aio purapa vokiropa oara opesieiva, vorevira kareaepa. Ovusa Jisas viovokoto vao raga tovira toupareva Jerusalem-ia. Uva aifetoarei viapau rera-ia taraipasiepa vo osa tovira vao toupareva. <sup>44-45</sup> Uva oiso keapasiepa, Oearoi tapo vokapare. Oa iava riro sita rutu purasiva rera kavuoro. Oire uva va iava voeao vuruvuru-ia vate irara oaesii ora sara irara vuravura ragasiva rerare. Uva taraa ragapasivoiva rerare, katai voki rutu isivaaro iava vorevira voriesiepa Jerusalem iare rerare taraasa vao. <sup>46</sup> Uva vao raga rerare taraapasiva vo peva rutu-ia voki peva. Oa iava vao rera kekesiva Tempel atoaro, osa vao pauparoepa tisa irara vuutaro-ia vo voea varaaro reoara uru piepaoro. Uva toupareva, ora voea tapo akepareva vorevira vara iava. <sup>47</sup> ✧ Vo ovusa rera vo reoroaro uru piepaiva. Uva rera-ia rirovira rutu tavetave iraopaiva aue iava rera vaaro taraia rutu, ora vo reo vearovira oa purareva voea aatooro. <sup>48</sup> ✧ Oa iava aifetoarei vao rera kekeoro ora sitasiepa rutu. Uva aakova rerare oiso puraopa, “Ae kakaeto. Eakere vegeivi oiso pierivoi oa iava viire taraa raga vasipavevoi?” <sup>49</sup> Uva oira vo reoaro pukooro oiso puraroepa, “Ari eakere ragaire taraa rovo asasivo Aite vo kepaoro-ia? Uva kasikasi ragapasiei ragaire taraa ragapaoro?” <sup>50</sup> Oa iava vo reo-ia vavagisipasiepa eva oa purareva vaiitereire.

<sup>51</sup> Uva va-a vao oa iava vaiiterei tapo kareroepa. Oa iava Nasaret-ia karea viropa. Uva vao oisoa vokiara rutu-ia vaiiterei gisipoaro sirova utuparo. Ari ita, uva aakova vara rutu varao-ia orirupaeva oara kekeeva vo rera ruvara-ia. <sup>52</sup> ✧ Oire uva Jisas riroroepa. Oa iava taraia rera vaaro vearovira rutu karekeepa. Uva Pauto ora oirara rutu rerare vearo vovouaepa rutu.

## 3

### *Jon Baptais Siposiporeva*

*(Matyu 3:1-12; Mak 1:2-8; Jon 1:19-28)*

<sup>1</sup> ✧ Taibirias Sisa Rom-pa irara tokireva katai tau vo vavae (15) ivaro sovara-ia. osa Pontias Pailat gavmanpaoro toupareva Judia-ia. Uva vo vuuta-a vao oa-ia aue Herot reiparoepa Galili taere-ia, ovusa voraro araokoto Filip reiparoepa Ituria taere ora Trakonaitis, vo osa ro Laisenias Abilin taere-ia reiparoepa. <sup>2</sup> Vo osa Anas vaio ora Kaiafas pris kovo-ia reipasiepa. Vo vuutao-ia oa-ia Jon Sekaraia oviitoaaro vo rasitao-ia toupareva kuvau tapi. Uva Pauto vo reoaro urioepa rera iare vao. <sup>3</sup> Uvava-a eva oa iava voraro rutu avaroepa Jodan oirara rutupa siposipopaoro, oiso ra sopaura oaive poreive. Ra va iava baptaisa ouive rara Pauto voea iava

✧ **2:40:** Lu 1:80, 2:52 ✧ **2:41:** Eks 23:15; Diu 16:1-6 ✧ **2:47:** Mt 7:28 ✧ **2:48:** Mk 3:31-35

✧ **2:52:** 1 Sml 2:26 ✧ **3:1:** Mt 27:2

vuri vovouro vera rovovere. <sup>4</sup> ✱ Oiso osa profet Aisaia vo vukuaro-ia oisoa rigatoa toupai, 'Iraavu ira keeraparoi vo raaka tapi oiso purapa, Turaro vo raivaaro vatatopopata va ravaaro oa-ia pouro virovera. <sup>5</sup> Oiso ra goreara rutu agasi pieive pukiara erioro vara vaeao. Regorepa raivaro tapo torevokoo ra torevokope. Ora varao tapo vuri raivaro oara vearo pieive rara. <sup>6</sup> Ra va iava oirara rutu vo kovo vao kekeive Pauto oa purapare vigei vorevira ousapa vuriara iava.'

<sup>7</sup> Oire uva riro irara rutu oirara urioaepa Jon vavaeoro-ia baptaisa ousa. Oa iava oiso voeare puraroepa. "Visii vao rakoru ovii iraraaro! Irouto visii vosipare, oa iava toripata Pauto vo kasipuaroo asavira?" <sup>8</sup> Visii iava sopaura poreta, ra vuri vovouro oavisii kavuta. Oa iava oirao pie vovouro oavisii poeravira karekepere oearovupa. Opeita ora visii raga vo vovouaro iava oreorovu kareke piepata oiso purapaoro, Ebrahim-a igei aitearo. Oa iava igei-a Pauto oiraraaro rutu. Ari ita, visii tavi iraopaavo, Pautoa raga uvuipa vo avekero iava kakae vure purapasa. Ra oisi pieive, Ebrahim ovii iraraaro. <sup>9</sup> Torara eira iriaei ravaavira eavo va vituaro-ia. Oire vo evaro oiso toupai oia visii. Varao oara viapau oiso vearo kuero vai kaepaive oara rutu taru toepaivera vara vikipasa tuitui kasi-ia." Eisi osa puraroepa Jon.

<sup>10</sup> ✱ Uva voea rutu Jon akeiva oiso puraoro, "Eake vai puraio?" <sup>11</sup> ✱ Oa iava oiso puraroepa voea aatooro, "Ro ira vaiterei kuvupatoarei, oire iravu vatereve ropa apotato. Ari ro ira aioara toupai, oire oisi raga ita pierve iravupa oaravu vateoro," <sup>12</sup> Uva oearovu tapo takis oupa irara urioaepa, oiso ra voea tapo baptaisa ouive rera ruvara-ia. Oa iava rerere oiso puraepa, "Tisa. Eake vai purapaio?" <sup>13</sup> Oa iava voeare oiso puraroepa, "Ari moni oupatai oiso osa gavman visii tavirevora. Oire ra viapau vo reesi iava ita pute pievira oarai ita ou ragapata." <sup>14</sup> Uva oearovu tapo ita viurupa irara rera akeiva oiso, "Eake vai purapaio?" Oa iava oiso voeare puraroepa, "Viapau oiso ra oira upopata ora viapau oiso ra kuuvuvira voea rovirieipata kortua-ia voea varaaro ivu ragapasa moniara. Ari voriaara oavisii raga rekasiaro reesiara-ia rorupata."

<sup>15</sup> Oire uva voeare vovouisiro riro varivarivira toreepa. Oa iava rirovira rugorugooapaepa oiso puraoro, "Easi, Jon-a ro-ia Kraisi, eke?" <sup>16</sup> Uva va iava Jon voea vo rearo pukoreva oiso purapaoro, "Visii baptaispaavo uukoa raga-ia visii reesioro visiigoa vovouisiro oavisii poretavorao. Ari ro ira ragai sirova uturovere, ira vo goruaro ragai vo goruaro-ia putevere uvare riro vasitoo-a. Uva viapau oiso uvuiparai ra rera vaaro tasipa kaea, uvare akukutoavi raga-a ragai. Ari rera visii vaterevere vao baptaisa Tugoropato Uraurato vaaro visii reesiapaoro aue-ia Tugoropato Uraurato vo goruaro-ia ora eto kasi vo goruaro-ia. <sup>17</sup> ✱ Ira vururu-ia pitupare wit ragipasa oira rakariaro verapaoro. Oire ra oira aioaro gurureve rera vo kepaaro-ia wit kepa vo aio kitupasa vao. Oa iava oira rakariaro kasirevere vao-ia tuitui kasi-ia oa viapau rokopaive."

<sup>18</sup> Jon oreorovu rutu tapo purareva voea iava sopaura tore pieoro. Uva vo pitupitu-a vao oa purareva vearo siposipo purapaoro oirara rutupa.

### *Vo Herot Jon Tuukereva*

<sup>19</sup> ✱ Oire uva Jon tuu pievira Herot tavireva rera vaaro iava vuria, ro voea rearo rovopata gavman. Aue iava uvare vuria purareva aue-ia Herodias araokoto vatuavaaro ouoro. Ora opitupiturovu rutu tapo-ia oara oisoa purapareve rera Herot. <sup>20</sup> Uva varao vuriara oara oisoa purapareve rera



Herot uva vo vuria vao puteva rutu, uvare vao riroa rutu vuria purareva Jon tovooro tuukepa kepa-ia.

*Jon Jisas Baptaisreva  
(Matyu 3:13-17; Mak 1:9-11)*

21 ✧ Uva vo vuuta-a vao oa-ia oirara rutu baptais rovopaaepa. Oa iava voa raga ita Jon Jisas tapo baptaisreva. Oire voa baptaisroiva, variri ovoiroepa voa. Uva vuvuiua karu piropa. 22 ✧ Oa iava Tugoropato Uraurato varoepa. Uva oiso rera kekeiva osa kurue. Uva Jisas-ia pitusa rerereva. Oa iava vuvuiua iava Pauto vo reoaro varaepa oa oiso puraepa, “Vii-a ragai Oviitoaaro rutu viigoa kaviko irapaaaveira. Uva vii-ia rorupaaveira rutu.”

*Jisas Aao Iraraaro Vaisiario  
(Matyu 1:1-17)*

23 ✧ Jisas ora rera vo kovoaro rovoreva vo peva tau (30) ivaro-ia uvuivira tupaaro. Uva oirara rutu rerere oiso puraepa, “Eera-a Josep oviitoaaro.” 24 Oiso-ia Josep-a Hilai oviitoaaro, ari Hilai-a Matat oviitoaaro, ari Matat-a Livai oviitoaaro, ari Livai-a Melkai oviitoaaro, ari Melkai-a Janai oviitoaaro, ari Janai-a Josep oviitoaaro, 25 ari Josep-a Matataias oviitoaaro, ari Matataias-a Emos oviitoaaro, ari Emos-a Neam oviitoaaro, ari Neam-a Eslai oviitoaaro, ari Eslai-a Nagai oviitoaaro, 26 ari Nagai-a Meat oviitoaaro, ari Meat-a Matataias oviitoaaro, ari Matataias-a Semen oviitoaaro, ari Semen-a Josek oviitoaaro, ari Josek-a Joda oviitoaaro, 27 ✧ ari Joda-a Joanan oviitoaaro, ari Joanan-a Resa oviitoaaro, ari Resa-a Serababel oviitoaaro, ari Serababel-a Sialtiel oviitoaaro, ari Sialtiel-a Nerai oviitoaaro, 28 ari Nerai-a Melkai oviitoaaro, ari Melkai-a Edai oviitoaaro, ari Edai-a Kosam oviitoaaro, ari Kosam-a Elmadam oviitoaaro, ari Elmadam-a Er oviitoaaro, 29 ari Er-a Josua oviitoaaro, ari Josua-a Eliesa oviitoaaro, ari Eliesa-a Jorim oviitoaaro, ari Jorim-a Matat oviitoaaro, ari Matat-a Livai oviitoaaro, 30 ari Livai-a Simion oviitoaaro, ari Simion-a Juda oviitoaaro, ari Juda-a Josep oviitoaaro, ari Josep-a Jonam oviitoaaro, ari Jonam-a Elaiakim oviitoaaro, 31 ✧ ari Elaiakim-a Melia oviitoaaro, ari Melia-a Mena oviitoaaro, ari Mena-a Matata oviitoaaro, ari Matata-a Netan oviitoaaro, ari Netan-a Devit oviitoaaro, 32 Devit-a Jesi oviitoaaro, ari Jesi-a Obet oviitoaaro, ari Obet-a Boas oviitoaaro, ari Boas-a Salmon oviitoaaro, ari Salmon-a Nason oviitoaaro, 33 ari Nason-a Aminadap oviitoaaro, ari Aminadap-a Atmin oviitoaaro, ari Atmin-a Anai oviitoaaro, ari Anai-a Hesron oviitoaaro, ari Hesron-a Peres oviitoaaro, ari Peres-a Juda oviitoaaro, 34 ✧ ari Juda-a Jekop oviitoaaro, ari Jekop-a Aisak oviitoaaro, ari Aisak-a Ebrahim oviitoaaro, ari Ebrahim-a Tira oviitoaaro, ari Tira-a Neho oviitoaaro, 35 ari Neho-a Serak oviitoaaro, ari Serak-a Reu oviitoaaro, ari Reu-a Pelek oviitoaaro, ari Pelek-a Ebe oviitoaaro, ari Ebe-a Sela oviitoaaro, 36 ari Sela-a Kenan oviitoaaro, ari Kenan-a Apaksat oviitoaaro, ari Apaksat-a Siem oviitoaaro, ari Siem-a Noa oviitoaaro, ari Noa-a Lamek oviitoaaro, 37 ari Lamek-a Metusala oviitoaaro, ari Metusala-a Inok oviitoaaro, ari Inok-a Jaret oviitoaaro, ari Jaret-a Mahalalel oviitoaaro, ari Mahalalel-a Kenan oviitoaaro, 38 ✧ ari Kenan-a Inos oviitoaaro, ari Inos-a Set oviitoaaro, ari Set-a Adam oviitoaaro, ari Adam-a Pauto oviitoaaro.

✧ 3:21: Lu 5:16 ✧ 3:22: Sam 2:7; Ais 42:1; Ap 10:38 ✧ 3:23: Jo 8:57 ✧ 3:27: Mt 1:12  
✧ 3:31: 1 Kro 3:5 ✧ 3:34: Jen 11:24, 26 ✧ 3:38: Jen 5:1-2

## 4

*Jisas-ia Kokaraparoepa Seten  
(Matyu 4:1-11; Mak 1:12-13)*

<sup>1</sup> Vo Tugoropato Uraurato iava vukuroepa Jisas. Oa iava uukova iava veraro viropa Jodan. Oire voava voreroiva, Tugoropato Uraurato rera tuvetuvepaoro avaroepa kuvau tapirore. <sup>2</sup> ✧ Oa iava resura tau (40) vokiro rutu-ia toureva. Uva voa Seten rera-ia kokara ragaparoepa,

Oire uva vo vuuta-a vao oa-ia oisoa aio kavuvira toupave. Oa iava vo vokiro varao opesieiva, ogoeroepa rera Jisas. <sup>3</sup> Osa iava Seten rera tavireva oiso, “Vosa vii Pauto Oviitoaaro rutu, oire o taviri aveke ra opovira ora poreo.” <sup>4</sup> ✧ Uva Jisas rera aatoreva oiso puraoro, “*Viapau. Uvare Pauto vo reoaro oiso purapai, ‘Opoa raga viapau uvuipai ra oiratoapa tootooa vatepaive.’*”

<sup>5</sup> Oire uva voaviva Seten rera ipa piereva. Oa iava osasararovu ruture voava rera kareke piereva varao vo rasitoo-ia katai vuutavi raga-ia. <sup>6</sup> ✧ Uva va iava rera raga Seten oiso Jisas tavipareva, “Vo goruro rutu-a varao oara vatepaavoi viipa, ora vao tapo riro vaisi vo vara iavirava, uvare vara rutu-a evara ragai varaoro. Uva oiso toupai, Vosa irai vate ruipapara vara, oire ra irai vatea vara. <sup>7</sup> Vosa ragai-ia vuurapa vaisi purapaoro taku virou, oire ra vii ragapa vara rutupe varao.” <sup>8</sup> ✧ Uva Jisas oiso puraroepa, “*Pauto vo reoaro oiso purapai,*

*‘Pautoa raga-ia vuurapa vaisi purapata eera visii reraaro Turaro. Rara rera raga vo kovoaro purapata eera kataitoa raga.’*”

<sup>9</sup> Uva voa-a vo uvava rerava Jisas avaroepa Seten Jerusalem iare Rovopa Kepa Lotupa Kepa kukuearo-ia rera tovoa viara-ia rutu. Oire uva voa rera tavipareva oiso, “Vosa vii-a Pauto Oviitoaaro rutu, oire vo toreu ra voava ora vikiu. <sup>10</sup> ✧ Uvare vo rigato toupai oa oiso purapai, ‘Pauto voeao arurevere enselpa irara ra vii tokiive vii-ia uutupaoro.’ <sup>11</sup> Uva oreovu oiso purapai, ‘Oea vii-ia pituivere ora voea vavaeoro iava. Ra viapau oiso avekeara vai-ia ora upou kokotoa iava.’”

<sup>12</sup> ✧ Oire uva Jisas oiso puraroepa, “*Easi, oreovu oiso purapai, ‘Opeita Turaro Pauto oavisii-ia kokarapata.’*”

<sup>13</sup> Vo kokaraara rutu purareva Seten rera-ia. Uva voa Jisas kavureva Seten ovokivure ita tueoro.

*Jisas Ora Rera Vo Kovoaro Rovoreva Galili-ia  
(Matyu 4:12-17; Mak 1:14-15)*

<sup>14</sup> ✧ Oire uva Tugoropato Uraurato vo goruaro iavirava vorevira voreroepa Jisas Galili iare. Uva voa rera iava vo siposipo viriva voraro rutu vo taere-ia vao-ia. <sup>15</sup> ✧ Uva oisoa oirara rutu siposipopareve voea vo kepararo-ia, Reo Taisi Uvupa Keparo Sinagog. Oa iava oirara rutu rera-ia rei vaisi purapaiva.

*Nasaret Vata Isivaaeapa Rerare Jisas  
(Matyu 13:53-58; Mak 6:1-6)*

<sup>16</sup> Oire uva Jisas Nasaret iare avaroepa. Ari ita, kakaevira oisoa vo urui-ia toupave. Oa iava voa tupaoro riroroepa. Uva Sabat voki-ia voa Sinagog-ia koataroepa ora rera vo pitupituaru sirova utuoro. Uva voa toreparoepa

✧ **4:2:** Eks 34:28 ✧ **4:4:** Diu 8:3 ✧ **4:6:** Jo 12:31 ✧ **4:8:** Diu 6:13 ✧ **4:10:** Sam 91:11-12  
✧ **4:12:** Diu 6:16 ✧ **4:14:** Mt 9:26 ✧ **4:15:** Mt 9:35, 11:1

Pauto vo reoaro vieipasa. <sup>17</sup> Uva oisi-a eisi osa iava profet Aisaia vo vukuaro vateiva rerapa. Oa iava va-ia vo rigato kekereva oa oiso purapapeira, <sup>18</sup> ✧ *‘Turaro Pauto reraaro Uraurato ira epao ragai-ia. Ira ragai reesirevora rera vo reoaro iava siposiposa voeaopa apotapa irara. Eera ira ragai arurevora voeaopa tuukepa irara siposipopasa, oiso ra tuukea iava kosipaa viro. Ora voeaopa siposipopasa voosi irara, oiso ra vorevira vuravurapaive. Ora oearovu rutu tauvapasa voeao oea riro vavatapara rutu siitokaara kaepaiveira. <sup>19</sup> ✧ Ora voea rutu oirara tavitavipasa vo vuutao iava Turaro vaaro, ro ira ora rera voeaaro ourevereava vorevira ora rerapa.’*

<sup>20</sup> Oire Jisas vukua kapu piereva. Oa iava uutupatoapa va vatereva. Uva va isivaaro iava pauparoepa voa Sinagog-ia, ovusa voeao oea tapo voa toupaiava oea rerava tuupavira rutu vurapaiva.

<sup>21</sup> Uva voa rovoroepea voea tavitavipaaro oiso, *“Oiraopavira rutu vo rigato-ia Pauto vaaro. Oa oiraaoe vo vokio vo osa vo reo uvutavoi.”* <sup>22</sup> ✧ Uva va iava rera egaegaiva rutu, uvare vo reoro iare rugoopaaepa veoro reoro oara karekereva ora rera gisipoaro iava. Oa iava oiso puraaepa, *“Apeisi ragavira? Easi pasi viapau Josep oviitoaaro ro-ia?”*

<sup>23</sup> Uva oiso voeare puraroepa, *“Oiraopavira rutu! Osa ita vo reo purata-vere ragaire oiso, Ruarupato ora vii raga iava varaua porete pieri. Ora oiso puratavere, Eva-ia ravoto kovo oa purarivora Kapeneam-ia evoa oa uvuiovora, osa raga ita eisi osa va purarivere vo ora vii vo uruiaro rutu-ia.”* <sup>24</sup> Uva oiso puraroepa, *“Oiraopavira rutu visiire oiso puraparai, Oirara viapau uvuipaa ra irai profetatoa vai gisipoaro uvupaive vo ora rera vo uruiaro rutu-ia. Ari ita, voa rera reroaropaive.”* <sup>25</sup> ✧ Uva ita, oiraopavira oiso puraparai, Voeao Ilaija vo vuutao iava oea iava riro riako toupai Isrel-ia airoa vatua iraraaro kopiiiaepa. Vo vokio-ia oa-ia vuvuiua tupa piropa rutu. Oire uva viapau kokeva vai vo peva ivaro rutu-ia ora katai vatara kekira vai-ia. Uva voava riroto ogoeto karekeroepa voraro rutu. <sup>26</sup> Ari ita, oiso-ia viapau oiso Ilaija arureva Pauto iriai iare riakova vai vova Isrel oira tauvasa. Viapau. Ari o ratau touva tauvasa rera arureva iria vo kavauopa Sarefat urui-ia. Iria oisoa raroevira toupave vo Saidon-ia. <sup>27</sup> ✧ Oiso osa tapo voari tuariri vo vuutao-ia oa-ia profet Ilaisa epao. Oa-ia riro irara leprapa irara oisoa toupave Isrel-ia. Oire uva viapau voea iava irai porete piereva Ilaisa. Ari aue raga Neman ro vova Siria ratau touto ira veoro piereva.” Jisas evo reo purareva vo Jiu iavirava voeao riro reo uvu asa irara.

<sup>28</sup> Oire uva Reo Taisi Uvupa Kepa-ia toupaoaro vo reo uvuiva rerere kasipu iraopaaro. <sup>29</sup> Uva voava vusiiva rera sitasa. Oa iava rera ivupaaro kosia viropa vo urui isivaaro iava oa oisoa pukuia-ia kukuearo-ia toupave. Uvare oiso vovoupaapea ra voava Jisas-ia vikiave vara pievira. <sup>30</sup> Osa voea raga sovara-ia vokaaro avaroepa voea gogu pieoro.

### *Jisas Iravu Vurito Tugarato Verareva Iravu Iava Oirato* (Mak 1:21-28)

<sup>31</sup> ✧ Uva Kapaneam urui iare avaroepa vo Galili taere sovara-ia. Oa iava voa Sabat vokio-ia oirara rutu tarai piepareva voea siposipoaro. <sup>32</sup> Uva rera vo siposipoaro uvuivoiva, vovouisiro oaive rirovira rutu ipaepa. Uvare rera vo reoaro-ia gorua toupaiava. <sup>33</sup> Oire uva voa Sinagog-ia iravu oirato toupaveva. Ira-ia vurito tugarato oisoa toupaveve. Oa iava voa toupaoaro

✧ 4:18: Ais 61:1-2 ✧ 4:19: Lev 25:10 ✧ 4:22: Sam 45:2 ✧ 4:25: 1 Kin 17:1, 8-16 ✧ 4:27: 2 Kin 5:1-14 ✧ 4:31: Mt 4:13

rirovira rutu oiveoro keeraroepea oiso puraoro, <sup>34</sup> ✨ “Auoro Jisas Nasaret iava! Eake purasa uriouei igei-ia? Igei opesi ovoi piesa, eke? Vii-ia taraiparai, Tugoropato Pauto reraaro.”

<sup>35</sup> ✨ Oa iava Jisas rerare koruroepa oiso puraoro, “*Eakau! Eera iava kosi virou.*” Oa iava rera tugarato oiratoa-ia vikiroepa rasiua arore. Uva voa koveroepea voea vuutaaro-ia. Osa iava rera arova ava ovoiroepa rera tugarato. Vo osa viapau vuria vai purareva rera-ia oirato. <sup>36</sup> Oa iava voea rutu ropeaepa. Oire ora voea vovouro arova taavi iraopaiva oiso ora reopaoro, “Avoeao! Apeisi raga reo irao-a vao-ia oa iava voeaore vuri tugararo reoroi? Easi ro vai-ia reesia vai ei ora gorua vai. Oa iava rera uvu ovoipaiveira ra oirara arova ava ovoipaave?” <sup>37</sup> Uva oisi-a eisi osa iava rera iava Jisas viriva vo siposipo vao-ia voraro rutu vo taere-ia vao-ia.

*Jisas Pita Aigevaaro Porete Piereva*  
(Matyu 8:14-15; Mak 1:29-31)

<sup>38</sup> Uva Sinagog iava kosiro viropa Jisas. Oa iava Saimon vo kepaaro-ia koataroepea. Vo osa vao Saimon vatuaaaro aakoaro riro upia-ia kukue upia toupavea. Uva vo-a eva oa iava rerare Jisas keeraaepa vo oira porete piesa. <sup>39</sup> Uva voa oira ruvara-ia toresa urioroepea vo upia iare reosa. Uva oira iava opesi ovoiepa vo upia. Oire voava vearo ovoiro rerapa aioara vatatopo ovoieva.

*Jisas Riro Irara Porete Piereva Ravotovira*  
(Matyu 8:16-17; Mak 1:32-34)

<sup>40</sup> ✨ Uva vo ovaiarovi ovusa ravireo rokopareva, uva rera iare oearovuva vuri vara irara urioaepa, ora voeoro tapo tudara oearoa oisoa upopaive. Oa iava voea rutu porete piereva ravotovira voea-ia vavaearei tovopaoro. <sup>41</sup> ✨ Oire uva riro irara rutu iava kosia viropa. Uva voea evoea vuri irara tudara oea rirovira oiveoro oiso puraoro, “Vii-a Pauto Oviiotoaro.” Osa iava voeare koruparoepea rera iava oreoi pura arapa, uvare taraipaaepa oiso, Rera ro-ia Krai.

*Jisas Kovopaoro Virireva Uruiaara Rutu-ia*  
(Mak 1:35-39)

<sup>42</sup> Oire uva avitoava eraoroepa Jisas. Oa iava rokoreva uvavure kuvau tapi voa varirisa. Uva voa-a evoa uva toureva osa rerare taraa ragapaiva. Oa iava rera kekeoro voa oiso rugoopaaepa ra ora voea raga iare rera voreive. <sup>43</sup> Oa iava voeare oiso puraroepa, “*Oiso ruipaparai ra Veoro Siposipo iava siposipoa aue iava Pauto vo Saraaro voraro ouruivou-ia tapo. Aue vituaro iava uvare Pauto ragai arurevora okovoa purasa vao-ia.*” <sup>44</sup> ✨ Oa iava voa Judia Distrik-ia riro keparo-ia Reo Taisi Uvupa Keparo siposiporeva va iava vao Veoro Siposipo voeapa.

## 5

*Jisas Pita Tavireva Oa Iava Rirovira Atariroepa*  
(Matyu 4:18-22; Mak 1:16-20)

<sup>1</sup> Oire uva ovokivu-ia rogaraua-ia toreparoepa vo toko rovu vatuaoro-ia vao vo Genesaret. Uva ovaisivu-a vao-ia oiso Galili. Uva voa oirara rutu Jisas tapo tupaiva ora voea-ia paipaoro vo reo vao Pauto vo reoro uvupasa. <sup>2</sup> Uva voa uvuoarei kekereva uvuoarei rogaraua-ia vo toko rovu-ia. Uva voa voeao atari oupa irara vo uvuoarei iava veraa viropa kuverara

✨ 4:34: Sam 16:10; Dan 9:24 ✨ 4:35: Mt 8:26 ✨ 4:40: Mk 5:23; Mt 4:23 ✨ 4:41: Mt 4:3

✨ 4:44: Mt 4:18-22; Jo 1:40-42

sisupasa. <sup>3</sup> ✧ Oire uva vo uvuoarei iava oavu-ia kaero viropa aue Saimon vo uvuoaro. Oa iava Jisas rera tavipareva oiso, “*Vo uvuo gare visivi topari rogaraua iava rovua iare.*” Oire uva vo uvuo-ia paupaoro Jisas voeapa siposipopareva oirara.

<sup>4</sup> ✧ Uva voeapa siposiporevoiva, rera Saimon tavireva oiso, “*Uvuoa viru pieri favore uva riro rokopai. Ra voava kuverava roko pieta. Ra atari kare vai ivuta.*” <sup>5</sup> Uva Saimon oiso puraroepa, “*Turaro. Easi igei kasivarivira rutu kovo ragaiovo vo rupao-ia. Uva viapau okarei ivuiovo aue atari. Ari ita, vii uvuavoi osa ragai tavitaviri. Uva oisi va purapaavoi.*” <sup>6</sup> Oa iava oisi oira pieiva. Uva riro kare atari kare ivuiva. Oa iava kuverava toko rovoopa. <sup>7</sup> Oisi-a eisi osa iava oearovure puepueiva ora voea raga iava, voeao oea ouvuovu raga-ia toupaiava. Oiso ra urioave voea tauvasa. Oa iava urioaepa. Uva voea rutu vo uvuoarei agasi pieiva vo kare-ia atari kare. Uva roko rovoepa vo uvuoarei rutu vo kare vavatapaoro. <sup>8</sup> Uva va-a vao oa kekerevoiva Saimon Pita, Jisas kokotoaro ruvara-ia kokoto rekuoro pauroepa oiso puraoro, “*Turaro, ragai ruvara iava avau. Ari ragai-a vurito.*” <sup>9</sup> Uvare vo kare evoea atari kare kekereva okarea ivuiva. Oa iava rirovira rutu roperoepa. Ora voeao oea rera tapo toupaiava oea tapo ropeaepa. <sup>10</sup> Aue oviitoareiaro tapo Sebedi, Jems araorei ora Jon aiterea rera tapo oisoa kovopasi aue Saimon, aiterea tapo ora sitasiepa. Uva va-a vao oa iava Jisas Saimon-re oiso puraroepa, “*Teapi uriripau. Ari utupaua oiso oirara ivurivere rara ragai iare.*” <sup>11</sup> ✧ Oa iava uvuoarei rere pieiva rogaraua iare, vo osa auero rutu voea varaaro kavuiva rera sirova utuoro.

*Jisas Iravu Oirato Sisigarue Piereva, Ira-ia Oisoa Lepra Upia Toupaiave (Matyu 8:1-4; Mak 1:40-45)*

<sup>12</sup> ✧ Vo riro urui-ia toureva Jisas. Uva voa-a evoa ouruia-ia iravu oisoa toupareve oirato ira-ia oisoa lepra upia toupaiave. Oa iava Jisas kekeoro kokotoarei-ia rekureva varirioro rerare. Oiso puraroepa, “*Vosa ragaipa ruipapau ra ragai porete pieri.*” <sup>13</sup> Oa iava Jisas rera-ia vavaea tovooro oiso puraroepa, “*Oiso ruipaparai ra sisigarueu.*” Oa iava vaviopavira raga rera iava vo upia eva lepra upia opesiepa. <sup>14</sup> Uva Jisas riro goruvira rutu rera vosireva oiso puraoro, “*Opeita irai ita taviparivere. Viapau. Ari avapauei ora vii iava varaua karekesa auempa pris korouua vai puraoro oiso osa purapapeira Reo Taisi vao Moses vaoro. Ra va iava oirara rutu oiraopavira oiso taraiave, O ari vii-a vao viigoa iava upia opesie rutu.*” <sup>15</sup> ✧ Vo ovusa vara iava vo siposipo viripaoro avaepa varao oara rutu purareva Jisas voea-ia. Oire uva va-a eva oa iava riro irara rutu urioaepa rera vo rearo uvusa. Ora oiso tapo ra upiara iava voea tapo porete piepareve varao voea varaaro. <sup>16</sup> ✧ Oire uva voea arova rera raga avaparoepa uvavure kuvau tapivi voa variripasa.

*Jisas Iravu Oirato Porete Piereva Kerauto (Matyu 9:1-8; Mak 2:1-12)*

<sup>17</sup> ✧ Ovokivu-ia oirara tarai piepareva ovusa oearovu ratarataa vovou irara aue Farisi ora tisa irara tapo voeao Reo Taisiro-ia tarai irara, oea tapo paupaaepa voa voeao oea vo uruiro iava urioaepa oiso-ia, Galili-ia vo, ari Judia-ia, ora Jerusalem-ia. Vo osa Pauto vo goruarova Jisas toupaveva ogorua iava oirara porete piepareva. <sup>18</sup> Uva oresuravu iravu-ia kaepaoro urioaepa. Ira-ia keruu upia oisoa toupaiave keruara rutu-ia. Oire uva oiso

✧ 5:3: Mt 13:1-2 ✧ 5:4: Jo 2:16 ✧ 5:11: Mt 19:29 ✧ 5:12: Lu 17:11-19 ✧ 5:15: Mt 9:26

✧ 5:16: Mk 6:46 ✧ 5:17: Mt 15:1

ruipapaaepa ra rera kaepaoro urua-ia koataave Jisas iare atoaro voa rera tovosa. <sup>19</sup> Vo osa oirara rutu iava tupapaa piropa. Oa iava oiso auepaaepa ra apeisi vai ragavira rera koata pieive rera iare voa atoaro. Oire uva va iava vo kepa ivara iare rera kaepaoro ipaaepa. Oa iava kukuuvua veraiva voava iroi-ro-ia rera vara piesa urua tapo voa vo voea rutu oirara vuutaaro-ia. Oa iava rera tovoiva vo uva Jisas toupareva. <sup>20</sup> ✨ Uva Jisas voea varaaro oirao pie vovouro eveirevoiva, rerare oiso puraroepa, *“Vatetoa oaa, vii iava vuri vovouro veraavoi.”*

<sup>21</sup> ✨ Oire uva va-a vao oa iava voeao riro tarai irara Reo Taisi-ia ora voeao Farisi oearoa rutu ora voea raga ora reopaaepa. Oa iava voea iava oearovu riro irara oiso puraaepa, *“Avoeao! Iroutoa rutu-a ro-ia ira vao tovi reo purare Pautoa-ia? Irou vai vuupai vuriara verapasa? Easi Pautoa raga.”*

<sup>22</sup> Uva Jisas voea vo rugorugooroaro-ia tarai ovoiroepa. Oa iava voeare oiso puraroepa, *“Eakere eisi ragaire vurivira rugorugoopatai ora visii raga sopaaoro-ia?”* <sup>23</sup> Ari aa vo reoa-a vao oa-ia avekata vaiei ragaipa ra oa-ia oiso purara, *Vii iava vuri vovou veraavoi? Eke oiso, Toreu ra vokari?* <sup>24</sup> Uva oiso ruipaparai ra oiraopavira rutu taraita oiso, *Oirato Oviitooaro Ro Ropoto ragai raga goruava toupaaaveira vo rasio-ia. Vao oa iava vuuparai varao verapasa vuri vovouro. Eisi osa iava oiso purarai rore ira iava keruara rutu kopiiepa, Toreu, ra vii vaaro ouri urua, ra avau vore vii vo kepaoro iare.”*

<sup>25</sup> Oire uva va-a vao oa iava voea rutu oirara osireiario-ia toreroepa urua ouoro vao oa-ia uusiparoepa. Uva rera vo kepaoro iare vava avaroepa. Oa iava voa Pautoa-ia vuurapa vaisi purareva karepaoro. <sup>26</sup> ✨ Oire uva oirara rutu ropeaepa ora sitaoro. Oa iava Pautoa-ia vuurapa vaisi puraiva rerapa avivikeoro. Osa iava oiso puraaepa, *“Vo vokie rutu-ia oavu raga ravotoa rutu kekei.”*

### *Jisas Livai-re Reoroepa (Matyu 9:9-13; Mak 2:13-17)*

<sup>27</sup> Uva utupavira Jisas vokapaoro avaroepa. Oa iava iravu oirato kekereva ovusa takis oupa kepa-ia pauparoepa. Rera vaisiario ro-ia, Livai. Uva rerare Jisas keeraroea oiso puraoro, *“Uriou ragai sirova utusa.”* <sup>28</sup> Oire tore ovoiroepa rera varaaro rutu kavuoro, osa toupai va vo Jisas sirova utuoro.

<sup>29</sup> ✨ Uva rera Livai oavu riroa aioa purareva rerapa Jisas ora rera vo kepaoro-ia. Oa iava oearovu riro irara takis oupa irara va iare urioaepa ora oearovu tapo vuri irara. Oea rutu vaierei tapo paupaaepa aiopao.

<sup>30</sup> ✨ Uva va-a vao oa iava Farisi ora Reo Taisi-ia tarai irara iava voeare kasipupaoro oiso purapaaepa disaipel ruvara-ia voeao Jisas voeaaro, *“Uva apeisi iava takis oupa irara tapo voeao kavirupa irara aiopatavoi ora oearovu voeao vuri vovou irara?”* <sup>31</sup> Oa iava Jisas voea vo reoaro pukooro oiso puraroepa, *“Ari ita! Voeao upia asa irara oea viapau oiso ruvarupatoa iare avapaaaveira. Viapau. Asi upiapa irara raga oea ruvarupatoa iare avapaaaveira.”* <sup>32</sup> ✨ Ari ita, viapau oiso voeao keerasa urioraera torevoko vovou irara. *Viapau. Easi voeao keerasa vuri vovou irara urioraera, oiso ra sopaura oaive iava porepaa viro vova vuria.”*

### *Vo Toupai Aio Kavupa Pitupitu (Matyu 9:14-17; Mak 2:18-22)*

<sup>33</sup> ✨ Oire uva Jisas taviiva oiso, *“Voeao Jon voeaaro disaipel oea oiso aio arapa kavupaive rirovira rutu variripaoro vo riro vuutaro rutu-ia. Ora*

✨ 5:20: Lu 7:48-49 ✨ 5:21: Ais 43:25 ✨ 5:26: Lu 7:16 ✨ 5:29: Lu 15:1 ✨ 5:30: Ap 23:9

✨ 5:32: 1 Ti 1:15 ✨ 5:33: Lu 7:18; Jo 3:25-26

voeao Farisi vo disaipelaro oea tapo oisi raga oisoa piepaive. Ari vii voeaaro disaipel oea aioara rutu aiopaiveira ora ukaiopaaveira.” <sup>34</sup> Oa iava Jisas voeare oiso puraroepa, “Easi visii uvuipatai vai pasi ra vova sara irara vai aio kavu piepata oea iava rera sarato riako ousa ueparao, vo osa voea raga ruvara-ia toupaveve, eke? Ari viapau uvuipai. <sup>35</sup> ✧ Oire uva utupavira ora voea iava rera veraive oearovu vo osa riako ouro. Ra va iava tauavira toupaooro viapau oiso vorerivira voea tapo toupaveve evoea sara irara. Oire uva vo voki-a vao oa-ia aio kavuave taru rerapa siraopaoro. Osa eisi ragai voeaaro tapo toupavoi. Oa vituaro iava viapau aio kavupaaveira vo ragai tapo toupaooro.”

<sup>36</sup> Uva Jisas voeapa oavu reo ruu tapo vatereva. Oa-ia oiso puraroepa, “Viapau oiso irai uvuiparoi ra airepatoa vai kuvupatoa vai karireve, ra rutatoa vaiva oai turureve karia vai-ia. Oire vosa irai oisi oai piereve, ra rera raga airepato vuri piereve. Ra va iava va vao airepa varoa viapau oiso areivira kekepa piro vao tapo ruta. <sup>37</sup> Ora viapau irai uvuipa ra airepa wain ovi vai kuvureve ruta rakari vai-ia aue meme. Oire vosa irai oisi oa-ia piereve airepa wain vai kuvuoro, ra ita va vao ruta rakari karikari piro vo osa rirópape airepa wain. Ra va vao wain ovi rasiua arore koko piro. Oire ra ita meme rakari tapo vuri ovoipe. <sup>38</sup> Uva oirato uvuiparoi ra airepa rakari-ia airepa wain kuvureve. <sup>39</sup> Ari ro ira rutapa-ia ukaioro wain, ra ita viapau oiso auepa airepa ruipaparo. Oire ra oiso puraro, Va vao vearopai uvare airepa-ia putepai aue wain!”

## 6

### *Jisas Akeiva Tugoropa Voki Iava (Matyu 12:1-8; Mak 2:23-28)*

<sup>1</sup> ✧ Ovokivu-ia Sabat voki Jisas wit kovo sovara-ia vokapareva. Vo osa voa rera voeaaro disaipel okokorovu ouiva aue wit. Oa iava vara ruviruviiva ora voeapa vara aiosa. <sup>2</sup> ✧ Uva oavu ratarataa vovou irara Farisi-pa irara oiso puraaepa, “Easi varao tugoropapeira Sabat voki-ia. Uva apeisi iava oiso pieivoi?” <sup>3</sup> ✧ Oa iava Jisas oiso puraroepa, “Easi pasi, viapau vao vieipataveira osa tuariri rutu Devit ora rera voeaaro tapo ogoeroepa?” <sup>4</sup> Uva Devit Pauto vo kepaoro-ia koataroepa bret ousa pristo tuvara-ia, vao oa oisoa Pauto osireiáro-ia toupaveve. Va-a vao tugoropa bret oa oisoa aiopaive kóruou purapa irara raga pris irara. Ari ita, uva Devit va aioreva rera voeaaro tapo Reo Taisi-ia gasiáro. Osa-a eisi osa ragai voeaaro tapo viapau oiso vuria vai purapavoi wit aiopaoro vo voki-ia.” <sup>5</sup> Oa iava oiso puraroepa ora rera iava Jisas voea ruture, “Oirato Oviitoaaro raga ira uvuiparoi vo oirara rutu vo pitupituroaro rovirieipasa varao opitupituroa purapaveira vo Sabat voki-ia.”

### *Jisas Sabat Voki-ia Iravu Vuri Vavaeto Ravotovira Porete Piereva (Matyu 12:9-14; Mak 3:1-6)*

<sup>6</sup> ✧ Vo oavu-ia Sabat voki Reo Taisi Uvupa Kepa-ia Sinagog koataroepa. Oa iava voa oirara tarai piepareva siposipopaooro. Uva voa iravu oirato toupaveve ira iava oirapapa vavae vuriepa kopiáoro. <sup>7</sup> Uva riro tarai irara Reo Taisi-ia voearei ora Farisi oearea rerava siútepaapea Jisas. Uvare oiso ruipapaaepa ra oai iava rera tavatavaeive. Vo rara taraiave rera-ia oiso, Ari Sabat voki-ia va purarevoi upiapa irara porete piepaoro. <sup>8</sup> ✧ Uva rera raga

✧ 5:35: Lu 9:22, 17:22 ✧ 6:1: Diu 23:25 ✧ 6:2: Eks 20:10, 23:12; Diu 5:14 ✧ 6:3: 1 Sml 21:6

✧ 6:6: Lu 13:14, 14:3; Jo 9:16 ✧ 6:8: Mt 9:4

voea oriorisi ovoioro voea vo vovouaro-ia tarai ovoiroepa. Oa iava rera tavireva ira iava vavaea kopiiepa oiso, “Uriou. Ra vo-ia torevira toupári.” Oa iava toreroepa. <sup>9</sup> Uva Jisas voeare oiso puraroepa, “Visii akea oiso, Apeisi purapai vao Reo Taisi vigei vaoaro, ra vuria purapape, eke vearoo purape oirara-ia vo Sabat voki? Ora oirato porete piepe, eke rera kopii piepe?” <sup>10</sup> Uva voea rutu-ia vuraoro rera tavireva oiso, “Vavaea irairari va torevokoro.” Uva oisi va piereva. Oa iava rera iava vavaea torevoko ovoiepa vorevira. <sup>11</sup> Oire uva rirovira rutu kasipu iraopaaepa. Oa iava voea raga ora reopaoro oiso purapaaepa, “Avoeao! Eake vai purapere ro-ia Jisas?”

*Jisas Katai Tau Erao Reesireva Aue Aposel  
(Matyu 10:1-4; Mak 3:13-19)*

<sup>12</sup> ✧ Uva vo vuuta-a vao oa-ia Jisas iparoepa pukuia-ia varirisa Pautoa iare. Oa iava avia-ia rekasiroepa variripaoro. <sup>13</sup> ✧ Uva ravireo kaero viroiva, voeare keeraroeapa disaipel voea rutu oea oisoa rera sirova utupaave. Uva voea iava katai tau erao (12) reesireva. Oa iava voeapa aposelpa vaisi vatereva voeao reo kaepa irara rera voeaaro. <sup>14</sup> Uva voea katai tau erao vaivaisiaro-a voeao-ia, Saimon [uva Jisas rera-ia Pita-pa vaisi tovoreva], ari Andru, Saimon araokoaro, ora Jems araorei ora Jon, ora Filip, ora Batolomyu. <sup>15</sup> Ari Matyu, ora Tomas, ora Jems aue Alfias oviitoaoro ora aue Saimon, rera raga aue Selot. <sup>16</sup> ✧ Ora Judas, Jems oviitoaoro, ora Judas Iskariot ro ira Jisas kosi piereva keripa irara vavaeoro iare.

*Jisas Oirara Rutu-ia Kovoreva  
(Matyu 4:23-25)*

<sup>17</sup> ✧ Uva Jisas katai tau erao (12) tapo vararoepa tuuria iare voa toresa oearovu tapo riro irara disaipel rera voeaaro. Oa iava voa riro irara rutu voea tapo toupai va vorarova voea Judia Distrik ora Jerusalem ora voraro tapova avakava sirova aue ruvara-ia Taia-iarei ora Saidon-ia. <sup>18</sup> Oea rutu urioopaaepa rera vo rearo uvupasa. Ora oiso tapo ra voea iava upiara verapave. Ora voea ro oea-ia oisoa vuri tugararo toupai oea tapo urioaepa. Oa iava Jisas voea rutu ravotovira porete pie ovoipareva vo tugararo kosi piepaoro. <sup>19</sup> ✧ Uva voea rutu oirara rera-ia vavaeara tovo ruipapaaepa. Aue iava uvare rera vo goruaro ava ovoipaepa oirara porete pie ovoipaoro.

*Vo Taviroepa Voeaore Oea Rorupaive Ora Oea Gaupaive  
(Matyu 5:1-12)*

<sup>20</sup> Oire uva Jisas ora rera voeaaro-ia disaipel vuraoro oiso puraroepa, “Visii vao apota irara Pauto vo taraiaropa visiigoa roruta, uvare visii-ia Pauto vo Saraaro-ia toupataveira.

<sup>21</sup> ✧ “Ora visii vao visiigoa ovovourovu rutupa torevoko vovouro ruipa iraopata oiso osa ro ira ogoeparo auepa aio visiigoa rorupata. Uvare Pauto visii vo ruiparoaro uvui pieoro vaterovere visiipa.

“Ora visii vao visiigoa gaupataveira visiigoa tapo roruta. Aue iava uvare utupaua taru agesitavere rorupaoro aue-ia Pauto vaaro kaviko vovou.

<sup>22</sup> ✧ “Vo utupaua oirara rutu visii vuraivere osa ragai sirova utupata. Ra va iava visiire rirovira rutu vuri vovou iraopaave. Oire ra vurivira rutu visii vaisiaro akaipa piepaive visii tovipaoro. Oa-a eva oa-ia uvuipatai ra rorupata. <sup>23</sup> ✧ Vosa oisi visii piepaive, ra va-ia rorupata vearo vovoupaoro



rutu. Uvuta! Riroa rutu epao voria visii vaaro vuvuiua-ia. Ari ita, voeao aao irara oaive oea oisi raga eisi oisoa profet irara piepaive voari tuariri.

24 \* *“Ari visii vao-ia riro moni guru irara visiigoa ora vatatopo iraopata. Eake iava? Uvare visii roru piepaiveira varao oara-ia pitupataveira varao vo rasio iava. Oara rutu opesipere visii arova vo utupaua.*

25 \* *“Visii vao visiigoa aiopatavoi oa iava vukupatai, visiigoa ora vatatopo iraopata rutu. Visiiigoa taru ogoetavere utupaua.*

*“Ora visii vao visiigoa agesipataveira, visiigoa ora vatatopo iraopata. Visiiigoa gautavere utupaua, ra visii osireiario-ia gau oviro varape. 26 \* Ora vatatopo iraopata. Teapi visii vaisiario-ia vuurapa vaisi pura ragapaive oiso rutu osa oisoa voari tuariri voea aao iraraaro piepaive oearovu iava profet irara riro kuvvu irara. Aue vituaro iava uvare oisoa oearovu roru pie ragapasa oreorovu raga kuvvu reo oisoa purapaive.*

*Vo Keripa Irarava Ora Agiagipa Pitupitu Toupai  
(Matyu 5:38-48)*

27 \* *“Ari ita, visii tavipaavoi vao visiigoa ragai vo rearo uvutavoi, oiso ra voearova agiagipata oea visiiva ora keripaaveira. Ora voea tapo ora vearo vovoupata oea visiiva ora vuri vovoupaaveira. 28 \* Ora voeaopa tapo vearo vovou vatepata oea visii vuri piepasa oreorovu purapaiveira. Ra tapo variripata voea tauvapasa voeao oea visii tovipaive. 29 Vosa irai vii tautauaro fapareve, oire ofautauvu ita poreri rerapa, ra va tapareve ita. Ora vosa irai vii kuvupatao vaiaro itopareve, opeita rerare korukorupau. Rera vate vo popota rutu ora siglis. 30 \* Vosa irai vii arepareve orekevu avu vaire, rera vateri oai. Ora vosa irai vii oavu avu vaiaro oure, oire ra viapau oiso va voreri vorevira rera ruvara-ia. 31 \* Ari vosa vo vovouroa vo oarapa ruipapata oiso ra oirara vara purapaive visiipa, oire ra visii tapo oisi vara pura rovopata voeapa.*

32 *“Ora vosa voea ragapa sirao vovouro oavisii vatepata voeao oea visiipa sirao vovouro oaive vatepaive. Ra eake vai vearoa outa Pauto ruvara-ia, raa? Ari ita! Oiraopavira voeao vuri irara oea oisi raga ora voeapa sirao vovouro oaive vatepaiveira voeaopa oea voeapa sirao vovouro oaive vatepaive. 33 Ora vosa voeaopa vearo vovou purapata oea visiipa vearo vovou purapaive. Oire ra eake-a vearoa oa outa Pauto ruvara-ia? Oiraopavira, voeao vuri irara oea oisi raga ora voeapa sirao vovouro oaive vatepaiveira voeaopa oea voeapa sirao vovouro oaive vatepaive. 34 Ari vosa voeapa orekerovu vatepata ra oisi rugoopata, Vorevira visiipa vara kare piepaive. Oire aa vao-a vearoa oa outavere Pauto ruvara-ia va-ia vao, raa? Ari ita, voea tapo vuri irara orekerovu vatepaiveira voearo oearovu vuri irara oisore ra kataia raga oupaive vorevira. 35 Voeao agiagipata oea visiiva ora keripaaveira, ora voea-ia vearo vovou purapata, ora voeapa orekerovu vatepata. Ra viapau varare vorevira rugoopata oiso ra oarai kare piepaive visiipa vara iava. Oire vosa oisi oiso piepata, ra va iava riroa rutu voria visii vaaro. Uva voeapa sirapaoro oea viapau vearo vaisi purapaiveira visii-ia, uva oiso purapaoro oiso rutu toupata, Pauto ovii iraraaro ro oiso viara-ia. Uvare ro Aite ira voeapa sirapaoveira oea viapau rera-ia vearo vaisi purapaive. Ora voeao vuri irara oea ora voea raga-ia rugorugooapaaveira, oea tapopa vereopa vovou purapareveira. 36 Oirarapa sirapata oiso osa Aite oavisii sirapaoveira.*

*Vo Oirara Rovirieipa Pitupitu Toupai Oiso Osa Jas  
(Matyu 7:1-5)*

<sup>37</sup> ✧ “Opeita oirara vo vovouaro rovirieipata oiso osa jas, eva-a oa iava viapau ita Pauto visii rovirieirevera. Ora vosa viapau oirara toga ragapata oreorovu-ia, oa iava ita Pauto viapau visii ita togarevera vo utupaua. Ari oiso ruipaparai ra oirara iava vuriara vera ragapata, oa iava ita Pauto visii iava vuri vovouro verarevere. <sup>38</sup> ✧ Orekerovu avu vai vatepata oearoipa. Oa iava Pauto visiipa ita oarai vaterevere oisi ragavira ita osa vao, osa visiipa vavaeara agasi pierevere rutu Pauto pute pievira visiipa vateoro. Vo uvuio-ia oa-ia oearovupa oaravu vatepata, oire uva vo uvui raga-a eva oa-ia visii vaterevere ita Pauto.”

<sup>39</sup> ✧ Oire uva Jisas oavu tapo reo ruu vatereva voeapa oa-ia oiso puraroepa, “Easi pasi, voositoa vai uvuipa ra irai voositoa vai tuvetuvepareve raiva vai-ia pasi, eke? Uva viapau. Ra ita vaiterei rutu kovesi vo rikui-ia. <sup>40</sup> ✧ Viapau oiso tarai taraapato rera reraaro-ia puteparevoi tisato. Ari vorara tarai rovoru, oire ra rera tisato oaro areireve.

<sup>41</sup> “Eakere korotoava vurapari eera araokoara osireiario-ia, osa viapau riro perore rugoo rovopau eva vii osireiario-ia? <sup>42</sup> Uva apeisi ragavira uvuipau ra araokoara taviri oiso, Araoko, ragai oiso ruipaparai koroto veraa eera vii osireiario iava. Vorara viapau ora vii iava evo keposi riroa rutu viapau vera rovoru, vao vuri vovou oa vii tupapai? Ari ita, riro rataratava vovoutoa rutu vii. Viigoa riro pero rutu vera rovoru eva vii osireiario iava. Viigoa ora osireiaria sisiro rovoru vearovira. Oa iava araokoara osireiario sisirorivere rara. Oire ra va iava vearovira vuravurapaoro koro verauvere araokoara osireiario iava.

*Vo Vuri Ova Iava Toupaveira Vao Oa Vuri Kue Purapaveira  
(Matyu 7:17-20, 12:33-35)*

<sup>43</sup> ✧ “Vao vearo ova oa viapau oiso vuri kuero vai purapaveira. Eisi osa raga ita vao vuri ova oa viapau oiso vearo kuero vai purapaveira. <sup>44</sup> ✧ Oire uva oirara oisoa vo eva kuearo keke rovopaive auere tarai rovosa vearovira oiso, O vearo ova, eke vuri ova. Oirara viapau oiso ra rokarokapa iroiro-ia fik ova kuearo oupaive. Ora viapau oiso ra kapuasisi kouro sovara-ia wain kuearo oupaive. <sup>45</sup> ✧ Ari ita, ro vearoto oirato ira-ia vearo rugorugoo rutu tupaive vo rera sopaaro-ia, eva-a oa vituaro iava vearo pitupituro ita purapaveira. Ari vosa ro ira-ia vuri rugorugoo tupaive, oire ra oisi raga ita vo pitupituro kosi piepareveira varao oara iava rera iava sopaua agasipapeira, vo rara vova rera gisipoaro-ia kosipa piro reoara.

*Kepa Paupa Pitupiturei Iava  
(Matyu 7:24-27)*

<sup>46</sup> ✧ “Eakere ragai vaisipatavoi oiso, Turaro, Turaro. Vo osa viapau ragai sirova utupaveira varao-ia oara-ia visii tavipaaveira? <sup>47</sup> ✧ Ari ro ira ragai iare urioparo ragai vo rearo uvupasa ora ragai vo rearo purapasa, ira-a eera oiso toupave osa ro ira iava visii tavipaavoi. <sup>48</sup> Ro-ia oirato ira kepa paureva. Oire uva riro kaekaevira rikui teka rovoreva. Oa iava voava aue simen tovoreva rirova-ia aveke oira voto pie rovooro rutu vo rasito sovara-ia. Ra oira ivara-ia vo kepa tore piereva o-ia aveke. Uva utupaua pitutupa urioopa. Oa iava viapau uvuiova vo kepa tatesa. Ari va vurevure ragapaeva.

*Eake iava? Uvare vearovira rutu vo kepa paureva goruvira.* <sup>49</sup> Ari ita, ro ira ragai vo rearo uvu ragareve ra viapau va sirova uturo, oiso osa ro oirato ira rasito raga-ia kepa paureva. Uva viapau simen tovo rovoreva vo rasito sovara-ia. Oa iava pirutuva vo kepa-ia ora vikiopa ovusa ikauvira peka ovoi piropa. Oa iava vuri ovoiepa rutu.”

## 7

### *Jisas Rom Ami Keptentoaro Kovopatoaaro Porete Piereva Ravotovira (Matyu 8:5-13)*

<sup>1</sup> ✧ Oire uva Jisas vo reo oirarapa vaterevoiva, Kapaneam-ia kare uvirosa avaroepa. <sup>2</sup> Ovusa voa Rom ami keptentoaro toupaveva ira roeroaro katai vovoto (100) viurupa irara oisoa toupave. Ira reraaro kovopato toupaveva ira oisoa kavikopareve rutu. Uva upiaparoepe kovopato. Oa iava tutuu pieepa rerapa rutu oiso ra kopiuro. <sup>3</sup> Oire uva rera kepten Jisas iava uvureva osa toupaveva. Osa iava oearovu tuvetuvepa irara Jiu iava voea arureva rera ou piesa, oiso ra urioro rera ro kovopato porete piesa. <sup>4</sup> Uva rera-ia poua viropa Jisas. Oa iava goruvira rutu rera kegipaoro oiso purapaepa, “Vearotoa rutu ira reraaro-ia uvuipau ra rera vearo pieri rera tauvaro. <sup>5</sup> Ira vigeipa sopaua rutu vatepareveira vigei vao Jiu. Uva rera raga vigei vo kepaoro paurevora vao Reo Taisi Uvupa Kepa Sinagog.”

<sup>6</sup> Oire uva Jisas voea tapo voreroepa. Oa iava kepa iare tutuu piereva. Uva rera ro kepten oearovu arureva ora rera vate iraraaro rera tavisa Jisas oiso, “Turaro. Viipe. Teapi ora reasi pie ragau. Ari ita, viapau oiso vearotoa ragai, ra uriou ragai vo kepaoro-ia koatasa. <sup>7</sup> Uva oisi-a eisi oia rugoorai oiso, Viapau vearotoa ragai, ra vii iare uriora. Uva oiso ruipaparai ra evoa ragava reou, ovusa ro ragai reraaro kovopato porete ovoiro vorevira. <sup>8</sup> Eake iava? Uvare ragai tapo ro ita roeroarovi toupaveva ira ragaipa kovo vatepareveira. Ari ita, ragai raga oevuvu toupaa viurupa irara oea ragai roeroarovi toupaveira. Oa iava oiso voea piepaaveira. Vosa irai arua voea iava oiso, Avau. Oire ra irai avaro. Ari vosa iraire voea iava keerara oiso, Uriou. Ra ita irai urioro. Ari vosa ragai kovopatoaaro tavia oiso, Vo kovo purari. Oire ra oai purareve.” Oiso puraroepa kepten. Uva evo reo oa kosi pieva Jisas vo goruaro.

<sup>9</sup> ✧ Uva Jisas vo reo vao uvuoro rirovira rutu rugorugoo iraoparoepa rerare ro oirato. Oire voava ora poreroepa voeaore riro irara oiso purasa, “Oiso visii tavipaavoi, Oiraopavira rutu, Viapau oiso irai oirao pie vovoutoa vai kekeavora Isrel-ia oiso osa ro-ia Rom amipa irara irapato.” <sup>10</sup> Oa iava vora oea arureva rera kepten oea vorevira voreaepe kepa iare. Uva voa rera kovopato kekeiva osa porete ovoiroepa ravotovira.

### *Jisas Viovokoto Porete Piereva Nen Iava Rera*

<sup>11</sup> ✧ Uva utupa visivi Jisas ouruivu iare avaroepa vo urui vaisiaro vao-ia, Nen. Uva rera voeaaro disaipel ora riro irara rutu oea rutu rera tapo avaaepa. <sup>12</sup> Oire uva riro ratao iare tutuu piereva vao vo urui vo rataoaro, ovusa iravu oirato kaepaoro kosia viropa kopiito. Uvava aakova oisoa raroevira toupave ro raga tapo kataito oviito. Iria sirova utupaaepa riro irara oirara vo kae sirova.

<sup>13</sup> Uva Turaro oira o riakova kekereva. Oa iava rera iava sopaua siraoepa rutu. Osa iava oirare oiso puraroepa, “Auoo. Opeita gaupari.” <sup>14</sup> ✧ Oire uva vo kes ruvara iare avaroepa va-ia pitusa vao urua peperava uru. Uva voea oea vo kes kaepaiva oea voavi torepaepa. Oa iava Jisas oiso puraroepa,

“*Viovokoto. Vii tavipaa oiso, Vorevira toou, ra toreu.*” <sup>15</sup> Oa iava rera ro ira kopiiopepa ora porete ovoioro toreroepa voa paupasa. Oire voava rovoroepepa reoreopaoro. Oa iava Jisas aakovapa rera vatereva. <sup>16</sup> ✧ Uva oisi-a eisi osa iava oirara rutu rirovira rutu ropeaepa. Oa iava Pautoa-ia vuurapa vaisi puraiva oiso puraoro, “Iravu ro-ia reito profetato. Ira vigei vuutaaro-ia pouro viroi.” Uva aia ita oiso puraaepa, “Pauto ro-ia ira vo pouro viroi rera voeaaro oirara tauvasa.” <sup>17</sup> Uva rera iava Jisas vo siposipo viriva oiso Judia Distrik sovara-ia ora uvarovu rutu.

*Jon Baptais Disaipeltoarei Arureva Jisas Iare  
(Matyu 11:2-19)*

<sup>18</sup> Uva vara rutu iava voeao Jon voeaaro disaipel rera taviiva. <sup>19</sup> Oa iava voea iava aitereivure keeraroepepa disaipeltoarei. Uva vaiterei arureva Jon oreovu siposa Turaropa. Oa-ia oiso puraroepa, “Tuariri oevu oirara oisoa oiso purapaave, Iravu oirato ira urioroverea Pauto reraaro. Easi vii vai-a vao viigoa uriovei? Eke iravu raga-a irare tuepaioveira?” <sup>20</sup> Uva Jisas iare uriosiepa aitereivu. Oa iava oiso purasiepa, “Jon Baptais vegei arurevoi vii iare ira oiso puraroe, Easi vii vai-a vao viigoare tuepaiei osa uriovei. Eke irai raga-a irare tuepaiei?”

<sup>21</sup> Oire uva vo vuuta-a vao oa-ia Jisas riro irara ravotovira porete piepareva oea-ia oupiarovu rutu oiso toupaive oiso-ia, oearovu-ia oisoa vuri tugararo toupaive, ari riro irara voosi irara oearoa tapo vorevira vuravura piepareva. <sup>22</sup> ✧ Uva oiso puraroepa vaitereire, “*Voresi Jon tavisa varao rutu iava oara kekesivoi ora varao oara uvusivoi oiso-ia, voosi irara vorevira vuravuraivoi. Ora voeao vuri kokoto irara oea tapo vorevira vokaivoi. Ora voeao leprapa irara oea tapo vorevira sisigarueai. Ora voeao uvagi irara oea tapo reo uvuai. Ora kopii irara oea tapo vorevira torei. Ora voeao apotapa irara oea tapo Vearo Siposipo uvuivoi.*” <sup>23</sup> Ari ita, ro ira ragai goruvira oirao pieparevere rutu ira uvuipa ra viraakoa ouoro rorupareve vo ragai.”

<sup>24</sup> Oire uva Jon vaitereiaro disaipeltoarei karesiepa. Oa iava oirara rutu tavireva Jisas Jon iava oiso puraoro, “*Eaketo-a ro ira kekesa avataera vo raaka tapi vo vokio-ia oa-ia Jon iare avataera? Esa pito isi vai-a aisia va ratesa avataera, ovusa kiuvu vaisi vurevureparevora, raa? Viapau. Uvare Jon viapau oiso raverave vaiva siposiporevora oiso osa pito isi.*” <sup>25</sup> Eke eake-a oa kekesa avataera voa. Easi pasi visii vai irai vai kekesa avataera osa vearopara vai-ia kuvupara vai kuvuparoera voa? Eke viapau? Oearoi pasi oea vai-ia vearopa kuvuro vaiva toupaihora voa ora varao vearopara voea varaaro-ia, varao oarava toupaihora king irara vo voea vo keparoaro-ia. <sup>26</sup> Ari eake irao-a oa kekesa voa avataera? Easi irai vaia eera profetato? Iu. Ragai visii tavipaa oiso, Eera profetato Jon ira oearovu rutu-ia profet irara puterevora rei vaisi oupaoro. <sup>27</sup> ✧ Voari tuariri uva Jon iava Pauto Tugoropa Vuku-ia taviroepa oiso, “*Ragai Pauto iravu sipopaa reo kaepato. Ira viipa iraparoverea viipa raiva vatatoposa.*”

<sup>28</sup> Uva oiso visii tavipaavoi, Jon voeao rutu-ia puterevora oea vo toupaihora rasioa-ia. Ari ro ira Pauto vo Saraaro-ia ora akaipa pieparoi, ira ita Jon-ia puterevora rei vaisi oupaoro.”

<sup>29</sup> [Oire uva vo reo-a vao oa uvuiva Jisas oa purareva. Oa iava voea rutu ora reopaaepa ora voeao takis oupa irara oea rutu oiso puraaepa, “Iu.

Ari Pauto vo pitupituario-a torevokoa.” Oreoroa varao voea varaaro oirao piepaoro baptaisa oupaiva Jon vavaeoro-ia. <sup>30</sup> ✧ Vosa voeareo ratarataa vovou irara Farisi ora voeao riro tarai irara Reo Taisi-ia oearea viapau oiso baptaisa ouiva Jon ruvara-ia. Eva-a oa vituario iava isivaaepa vaore vearo raiva Pauto vaoro.]

<sup>31</sup> Uva va-a vao oa iava Jisas voeare oiso puraroepa, “Uva eake vai-a vao oa visii vao vo vokio iavapa irara reesiavere oiso apeisi raga irara? <sup>32</sup> Visii vao visiigoa oiso rutu toupatavoi osa voeao kakae vure oea uruia vuutaaro-ia paupaaepa okakae vure keerapaoro. Oiso purapaaepa,

*Ari ita, ipei visiipa pupiara-ia pupi ragapaio, osa kovaa arapa reasipatai. Ora visiipa gau eraro-ia kovaa ragapaiei, osa gau arapa reasipatai tapo.*

<sup>33</sup> Uva Jon Baptais urioroera. Uva viapau breteara vai aioparevora. Ora tapo viapau wain oviro vai-ia ukaioparoera. Oa iava eva oisoo oiso purapata rerare, Vuri tugararo ira-ia toupaveira ro-ia Jon. <sup>34</sup> ✧ Oire uva Oirato Oviitoaro ragai urioraera aiopasa ora ukaiopasa tapo aue-ia wain. Oa iava oiso purapataera, Rera keketa eera riro aioto ora riro ukaioto riroara-ia aue wain oviro. Takis oupa irara vatetoaaro ora voeao vuri irara. Eisi osa ragaire purapataveira visii.

<sup>35</sup> Pauto vo taraiaro-a vegei vo kovoaro vituario ora Jon. Eisi osa vegei vo kovoaro kuearo eveipaveire.”

### *Iriavu Riakova Jisas Kokotoaro Iisieva Aue-ia Korovo Ovi*

<sup>36</sup> ✧ Oire uva iravu Farisi-pato Jisas-re keeraroepa rera tapo aiosa. Oa iava rera iare avaroepa. Uva pauroepa aiosa. <sup>37</sup> Uva voa iriavu vo urui-ia vuriva riakova toupavea. Oa iava voa toupaooro rera iava Jisas uvueva ovusa rera tapo Farisi-pato aiopareva vo rera vo kepaaro. Oa iava oira o riakova oavu vearo ovi rutu sanda ovi ouoro urioopa, oovia popotepa tou-ia aveke tou sovara-ia toupavea. <sup>38</sup> Uva Jisas isivaaro iare avaoora rera kokotoaro ruvara iare. Oa iava gaupaeva, vo osa oira osireiario iava gau oviro kovekovepaepa rera kokotoaro iare Jisas. Oa iava ora oira oruaro-ia vara posiposi piepaeva rera kokotoaro iava. Oire vo osa rerapa avivikepaoro rera kokotoarova uugaapaoro rera kokotoaro kipupaeva aue-ia sanda ovi.

<sup>39</sup> Uva va-a vao oa kekereva rera ro Farisi-pato, ira rerare Jisas oiso rugorugooparoepa ora rera raga sopaooro-ia, Vosa oiraopatoa rutu rera ro profetato, oire ra va iava oira-ia tarairo iria rera-ia vavaea tovosa uriooi. Ora varao-ia tapo oira vovouroaro tarairo vara eveioro. Ra oiso auero, Vuriva o-ia otopava.

<sup>40</sup> Uva Jisas Farisi-pato vo rugooroaro pukoreva oiso puraoro rerare, “Saimon. Ragai reo-a vao oava oiso ruipaparai ra vii vatea va.” Osa iava Saimon rerare oiso puraroepa, “Oire Tisato vo reo kosi pieri.” <sup>41</sup> ✧ Oa iava Jisas oiso puraroepa, “Aitereivu oiratoarei aiterea iravu vaoro moni ore ragasiva oiso, iravu aue uvuiaro vo vavae vovoto kina (K500), ari iravu aue vo vavae tau kina raga (K50). <sup>42</sup> Oire uva viapau oiso uvuisiepa oiso ra varei kare piesi vorevira rerapa ro oirato. Oa iava vaitereipa varei eaka ragareva. Oire uva iroutoa vai ei vaiterei iava ira pute pievira rorupaoro ora rera iava sopava vaiaro vaterevere rerapa ro oirato?”

<sup>43</sup> “Ari ro oirato ira riroa rutu ore ragareva,” osa puraro Saimon. Oa iava Jisas oiso puraroepa, “Ari ita, torevokovira oisi rugoouei eisi.”

<sup>44</sup> ✧ Oa iava oirare ora poreroepa o-ia riakova oiso purasa rerare Saimon, “E oira kekeri o-ia riakova? Ari ita, vii vo kepaaro-ia koatasa uriorae.

✧ 7:30: Mt 22:35 ✧ 7:34: Lu 5:29, 15:1-2 ✧ 7:36: Mt 26:6-13; Jo 12:1-8 ✧ 7:41: Mt 18:28

✧ 7:44: Het 19:21

*Uva viapau ragai vaterivo uukoa vai kokoto sisusa vao ragai iava vigei vo pitupituario sirova utupaoro. Osa o riakova ragai kokotoaro sisuevoi ora oira osireiario iava gau ovi-ia. Oa iava ora oira iava orui-ia vo ovi posiposi pieevoi.* <sup>45</sup> Ora viapau oiso ragaiva uugaaue. Ari ita, vosa koatarae uva oisi raga ita oiso osa toupaaovi vaviopavira. Oa iava oira o-ia riakova iria ragai kokotoarova uugaapaovi touvira ragaiva avivikepaoro. <sup>46</sup> ✧ Ari ita, ragai kukuearo viapau iisirivo korovo ovi vai-ia. Ari o riakova ragai kokotoaro iisievoi vao-ia korovo ovi aue sanda. <sup>47</sup> Oire uva oisi-a eisi osa iava vii tavipaavoi oiso, Oira-a o riakova iria ora oira iava sopaua rutu vate iraoevoi ragaiva, uvare oira varaaro-a riroara vuriara, oira verarevora Pauto. Ari ita, Pauto oavivu garea vuria verareve iravu iava oirato, oire ra oisi raga ita ro oirato ora rera iava gare visivi sopaua vatereve iravupa oirato.” <sup>48</sup> Oa iava Jisas o riakova tavireva oiso, “*Vii iava vuriara veraavoi.*” <sup>49</sup> Uva rera tapo paupaaepa oirara tebol-ia voeao oea vao rovoaepa rerare oiso puraoro, “*Avoeao! Iroutoa rutu-a ro-ia ira vuriara verapare?*” <sup>50</sup> ✧ Uva Jisas oirare oiso puraroepa, “*Ari ita, ragai oirao pierivoi, oa iava vii iava vuriara veraavoi. Avau, ra kave vovouvira toupavi.*”

## 8

### *Vo Airorovu Riakora Jisas Sirova Utuaepa Rera Tapo Vokapaoro*

<sup>1</sup> Oire uva utupa visivi riropa uruiro-ia virireva Jisas ora garepara-ia tapo voraro vokapaoro. Uva Vearo Siposipo vao Pauto vo Saraaro iava voeapa oirara oisoa siposipopareve. Uva voea disaipel katai tau erao (12) rera tapo vokapaiva. <sup>2</sup> ✧ Ora airorovu riakora airoa iava tuariri tugara verapareva Jisas ora oupiarovu rutu. Airoa-a vairo oriakora rera tapo vokapaiva oiso-ia, iriavu o-ia Maria [iria vova Makdala urui iava]. Iria iava Jisas erao vatara (7) aue tugara verareva. <sup>3</sup> Ora aue Joana rera Susa vatuaavaaro, ro ira Herot vo kepaoro-ia oisoa tokipareve. Ora o-ia Susana, ora airorovu rutu tapo rera tapo avapaaepa airoa Jisas tauvapaiva ora voea disaipel aue-ia moniara varao vairo varaaro.

### *Reo Ruu Vao Oirato Iava Ira Wit Takuraro Vikipareva Varuparo (Matyu 13:1-9; Mak 4:1-9)*

<sup>4</sup> Uva oirara rutu urioaepa ora gurusa Jisas iare voeao vova uruiara rutu iava. Oa iava voea vatereva oavvu ruu reo. Oa-ia oiso puraroepa, <sup>5</sup> “*Uva iravu oirato avaroera wit takuraro vikisa varuparo. Oa iava vava vikiparevora. Uva oaravu raivaro kovepaera. Oa iava vava vara-ia tasi-asipaivora oirara. Uva kokio kare vara aiopasa uriopaaera vava.*” <sup>6</sup> Uva oaravu wicara kovepaera vo uva avekeara toupavira. Oa iava vava kova ragapaera osa viapau aue uukoa vai. Uva vorevira kopii ovoipaera vava erako ovoipaoro. <sup>7</sup> Ari oaravu wicara vo kovepaera vo kokopa kouro sovaria varao rokarokapara. Oa iava vava vo kovaro ururao papatapaivora vava ruupaoro wicara. <sup>8</sup> ✧ Ari oaravu wicara vo kovepaera vearopa rasiro-ia. Oa iava vava rirovira rutu kupaera oiso, oaravu katai vovoto (100) kuero puravora.” Uva Jisas oisi oiso puraroepa. Oa iava rirovira oiso ita puraroepa, “*Ro ira-ia kokito toupareve, oire vo siposipo orirureve va kuverapaoro ora rera sopaoro-ia.*”

### *Jisas Vo Pitupituario Reo Ruu Purapasa (Matyu 13:10-17; Mak 4:10-12)*

<sup>9</sup> Oire uva rera voeaaro disaipel va vituarore vao reo ruu rera akeiva. <sup>10</sup> ✧ Oa iava oiso puraroepa Jisas, “Pauto raga visii tavipare vao vatau reo vituaro iava rera vo Saraaro iava vo reo. Ari oearovupa oirara reo ruuro raga vatepaaveira, oiso ra osireiara voea iava vura ragapaive, vo osa viapau vo reoro vituaro eveipaive. Ora vo reoro tapo uvu ragapaive, osa viapau taraipaive vara vituaro-ia.

*Vo Toupai Wit Takuraro Vituaro Iava Vao Reo Ruu  
(Matyu 13:18-23; Mak 4:13-20)*

<sup>11</sup> ✧ “Vao reo ruu vituaro oiso toupai, Vao-ia wit takuraro oara oiso toupai, Eva Pauto vo reoro. <sup>12</sup> Oaravu wicara vo kovepaepa raivaro oa oiso toupai, Oirara vo reoro uvupaiva, oa iava Seten urioparoepa vo reoro verapasa voea sopaaro iava. Uvare oiso rugorugoparoepa, Teapi vo reo oirao pieive, ra va iava Pauto voea vorereve vorevira ora rerapa. <sup>13</sup> Ari oaravu vo kovepaepa uva rirovira avekeara toupai, Vao-ia oirara oea ikauvira Pauto vo Saraaro iava vo reoro uvupaaro vara oupaiva vara-ia rorupasa rutu, osa viapau voea iava sopaura-ia oriruvira toupai vo reo. Oreoa oiso toupai osa ikopito ro ira viapau avekeara rutu-ia goruvira toupai o pitupare. Oire utupauavi oearovu Pauto vo reoro tekipasa opitupiturovu purapaive voea oirara vuri piepaaro. Oa iava voea vaoro oirao pie vovou viapau uvuipai ra gorupe vo osa va kavuive. <sup>14</sup> Ari varao wicara oara kokopa kouro-ia kovepaepa oa vituaro oiso toupai, Oirara evoea oea reora uvu ragapaaro vokapaiva vo osa orugorugoorovu rutuva toupai vo ora voea vo touaro iava, ora orekerovu rutuva rugorugopao moniara oaive, ora varao veaopara rutu oara-ia oisoa rorupaive. Oire uva vara-a varao oara Pauto vo reoro oisoa vuri piepaive rutu vo voea iava sopaura. Ra viapau aio kue vai voea-ia karekepe. <sup>15</sup> Vo osa varao veaopa rasiro-ia kovepaepa wicara oara vituaro oiso toupai, Evoea oirara oea reo uvupaaepa, oa iava vara goruvira orirupaiva ora voea iava sopaura varao veaopaura. Oa iava kuepaepa voea vo osa goro vovouvira toupai.

*Vo Aviavi Iava Toupai Oa Vatauiva Baket Sovara-ia  
(Mak 4:21-25)*

<sup>16</sup> ✧ “E oirara vuravu rukuepaiveira ra oira vataupaive baket sovara-ia, eke uruara reroaro, raa? Viapau! Asi oirara vuravu tovopaiveira tebol ivara-ia viaevira. Oire ra voava roropaeve osa vo aviaviva vurapaaro koatapaavere voea oea vo kepa-ia toupai. <sup>17</sup> ✧ Ari ita, varao oara vatauvira toupai oara rutu poeravira ora karekeperea. Ora varao rutu varao oara tavurupareve oirato, oara rutu tapo oiso utupau poeravira ora karekepe. Oire ra va iava oirara vara-ia taraiave.

<sup>18</sup> ✧ “Ora vatatopo iraopata visii vao-ia ra vearovira reo uvu iraopata. Vosa irai oiratoa vai oisi vo reo-ia vao pitureve, oire ra ita Pauto aviavi pievira oreorovu ita vatereve rerapa. Ari ro ira oiso kearo, Vo reo ou ovoiavo va-ia orirusa. Oire uva rera-a eera ira iava vo tarai va verarevere Pauto.”

*Jisas Aakoaro Iava Ora Rera Araoko Iraraaro  
(Matyu 12:46-50; Mak 3:31-35)*

<sup>19</sup> Vo vuutao iava vo vokia aakova ora rera araoko iraraaro urioaepa Jisas iare, vo osa riro irara rutu ora gurupaaepa. Oa iava viapau uvuipaaepa

✧ 8:10: Ais 6:9-10; Jer 5:21; Esi 12:2 ✧ 8:11: 1 Te 2:13; 1 Pi 1:23 ✧ 8:16: Mt 5:15; Lu 11:33

✧ 8:17: Mt 10:26 ✧ 8:18: Mt 13:12, 25:29; Lu 19:26

ra rera iare tutuu pieive. <sup>20</sup> Uva oearovu rera taviiva oiso, “Aakoara vase-a ora araoko irara oiso torepaa ratau. Oea vii kekesa auepaai.” <sup>21</sup> ✧ Uva voea vo rearo pukooro oiso puraroepa, “*Ro oirato ira Pauto vo vovou sirova utuparo eira-a ragai aakoaro ora ragai araokotoaaro.*”

*Jisas Kiuvu Rakote Piereva*  
(Matyu 8:23-27; Mak 4:35-41)

<sup>22</sup> ✧ Ovokivu-ia Jisas oavu-ia kaero viropa uvuoa disaipel iraraaro tapo. Oa iava voeare oiso puraroepa, “*Oiso ragavira ivirovira toko rovu avapaviei.*” Osa iava voare avaaepa. <sup>23</sup> Uva uvuoa ikauvira avaaepa vo osa Jisas uusiparoepa va-ia. Oire uva riroto kiuvu vusireva voeare uuko rovu-ia. Uva tutuu piepa voeapa oiso ra opesiave. <sup>24</sup> ✧ Oa iava Jisas tore piesa avaaepa oiso puraoro rerare, “Reito! Rokosa tutuu piei.” Oa iava toreroepa kiuvu rakote piesa ora rirova toruva. Oa iava vo vatako rutu rakote ovoiepa vao kiuvu ora toruva. Oa iava uuko rovu viapau oiso ora vurevurepaepa. <sup>25</sup> Uva voeare disaipel oiso puraroepa, “*Ovu-ia visii varaaroi oirao pie vovouro?*” Osa iava rirovira rutu rugorugooapaoro voea raga ora reopaaepa oiso purapaoro, “Avoeao! Irouto-a ro-ia ira vo vatakore kiuvu ora uuko ovi reoroi, oa iava rera gisipoaro uva ovoivoi?”

*Jisas Iravu Iava Kokoropato Vurito Tugarato Verareva*  
(Matyu 8:28-34; Mak 5:1-20)

<sup>26</sup> Oire uva Gegesa-ia poua viropa Galili-ia vo toko rovu isivaaro-ia. <sup>27</sup> Oa iava Jisas uvuoa iava rerereva, osa iravu oirato vo urui iava vao urioroepa rera iare, ira-ia oisoo vuri irara tugara toupave. Ari ita, riro kaekavira rutu oisoo varo tuu asavira toupave. Ora tapo viapau kepaara vai-ia toupave. Viapau. Ari tova urui raga-ia oisoo toupave. <sup>28</sup> ✧ Uva Jisas kekereva rera ro. Oa iava rirovira rutu oiveoro koveroepa rasiua areore rera kokotoaro ruvara-ia Jisas-pa avivikepaoro. Oa iava voava rerare riro akutaroepa oiso puraoro, “Jisas. Vii-a Pauto Oviitoaro ro oiso rutu viara-ia. Viire variriparai oiso ra viapau ragai vuri pieri.”

<sup>29</sup> Uva oisi-a eisi osa puraroepa tugarato Jisas-re, uvare Jisas tugarato kosi piesa aueparoepa oiratoa iava. [Aue iava uvare oisoo oiratoa-ia toupaooro rera varivari piepareve. Ra va iava sen tokopareve ora hankap, vorara vara-ia rera tuuke ragapave. Oa iava oisoo rera tuvetuvepaoro vorarore kuvau tapiro rerava avaparo tugarato uva viapau oisoo oirara vai toupave.]

<sup>30</sup> Uva oisi-a eisi osa iava Jisas rera akereva oiso, “*Trou vaisito-a vii?*” Uva oiso puraroepa, “Ragai-a, Riro Irara.” Aue iava uvare riro irara rutu tugara irara oea koataepa rera sovara iare. <sup>31</sup> ✧ Oa iava voeao vuri irara tugara rirovira rutu Jisas-re oiso purapaaepa, “Teapi igei sigupari vuri tapi vaire rikui vai sovara iare.”

<sup>32</sup> Uva oavu koue ragui oa pukuia-ia ororoaro-ia aiopaoro voa toupave gare pukui raga. Uva va-a eva oa iare Jisas kegi iraopaiva oiso purapaoro, “Igei tariori vavore koue ragui-ia koatapasa.” Osa iava voea sipo piereva voare. <sup>33</sup> Oa iava voeao vuri irara tugara rera iava ro oirato kosia viropa. Uva avaaepa koue ragui-ia koatasa. Oa iava vo ragui vao riro varivarivira ikauoro varaaepa vagapa-ia ora vikioro toko rovu-ia rokosa. Uva voa gisi ovoiaepa kopiioro.

<sup>34</sup> Oire uva va vao kekeiva voeao oea oisoo vo ragui tokipave. Oa iava toriiva oirara rutu tavitavisa voeao oea riro urui-ia oisoo toupave ora

✧ 8:21: Lu 11:28; Jo 15:14 ✧ 8:22: Mk 6:47-52; Jo 6:16-21 ✧ 8:24: Lu 5:5, 4:39 ✧ 8:28: Mk 1:24 ✧ 8:31: Ro 10:7; Re 20:1, 3



uvarovu rutu tapo. <sup>35</sup> Uva oirara rutu va vao kekesa urioaepa. Oa iava Jisas ruvara-ia poua viropa, ovusa rera kokotoaro ruvara-ia pauparoepa varoa-ia tuupaoro, rera ro ira iava tugara kosia viropa. Uvare rera iava rugorugooara rorioepa vorevira. Uva va vao kekeoro rirovira rutu voea iava vovouisiro uririepa Jisas vo goruaro asavira. <sup>36</sup> Oire uva voeao oea va vao kekeiva opitupitua purareva Jisas. Oa iava siposipopaiva va iava vao oa purareva ro oirato ira-ia tuariri vuri tugararo oisoa toupave. <sup>37</sup> ✧ Oa iava oirara rutu voeao vorarova Gegesa oea Jisas-re oiso puraepa, “Vo kavuoro ava iraopauei,” uvare uriripaepa. Oire uva va-a vao oa iava Jisas uvuoa-ia kaero viropa vorevira karesa. <sup>38</sup> Uva rera ro ira kavuiva tugara Jisas kegipareva rutu oiso purapaoro, “Ruipaparai ra vegei rutu kareve.” Oa iava Jisas vorevira rerare koruroepa oiso puraoro, <sup>39</sup> “Voreu atoiare vo vii voaaro. Ra voa siposipori varao iava Pauto oara purare vii-ia.” Oa iava voare kareroepa voea rutupa oirara siposiposa vo rera vo uruiaro vara rutu iava varao Jisas oara purareva rera-ia.

*Jisas Reito Oviivaaro Ravotovira Porete Piereva Ora O Iria Rera Iava Varoa-ia Pitueva*  
(Matyu 9:18-26; Mak 5:21-43)

<sup>40</sup> Oire uva Jisas vorevira kareroepa uuko rovu iviropaoro. Oa iava oirara rutu rera-ia rorupaiva. Uvare rerare tuepaaepa voea rutu, osa vorevira kareroepa voea iare. <sup>41</sup> Oa iava iravu pouro viropa rera vaisiario, Jiras reito Reo Taisi Uvupa Kepa iava rera. Ira urioroepa Jisas kokotoaro ruvara-ia rekusa. Oire uva voava goruvira rutu rerare oiso puraparoepa, “E uvuipauei ra urio iraou vore ragai vo kepaaro-ia?” <sup>42</sup> Ira oviivaaro kataivavi raga. Iria katai tau erao (12) iva-ia uvuipaopa. Oire uva tutuu piepa oirapa oiso ra kopiio. Oa iava voare Jisas avaroepa.

Uva riro irara rutu oirara rera kovokovoiva vao rerare ora guruoro. <sup>43</sup> Uva voa-a evoa uva iriavu riakova voea tapo toupave. Iria-ia kekira oisoa koveparo vokiara rutu-ia. Uva aue rutu uvuiaro-ia toueva rera ragava kekira katai tau erao (12) ivaro vo osa oira oupareve. Uva va-a eva oia oia oisoa riroara moniara viki ragapave riro rera rutupa ruvarupa irara, vo rara oira ruvarupaive. Osa viapau irai oisoa oira iava vo upia opesi piepareve. <sup>44</sup> Oire uva urioopa rera isivaaro iare tutuu pieoro Jisas. Uva voaviva rera iava varoa vaturo-ia pitueva. Oa iava vagevagevira raga revasi upia opesi ovoiepa oira iava posiposi ovoio. Uva viapau oiso vorerivira ita oira oupaiva vo upia eva. <sup>45</sup> ✧ Uva Jisas ora rera-ia oira sovooro oiso puraroepa, “Irouro ragai-ia piture?” Oa iava voea rutu taepaepa oiso puraoro, “Ae, igei viapau.” Uva Pita oiso puraroepa rerare, “Reito. Easi voeao vaio-a riro irara rutu oea vii kovokovoivoi viire ora guruoro.” <sup>46</sup> ✧ Uva iava Jisas oiso puraroepa, “Iravu iri ragai-ia piturevoi. Oa iava oavure gorua rororai, oa avaei ragai iava irai vearo piesa.” <sup>47</sup> Oire uva oira o riakova iria taraiopa. Uva viapau oiso uvuipaopa ra rerare vatauo. Oa iava rerapa uriripaoro rirovira rikerikepaopa. Uva rera ruvara-ia rekusa urioopa vo oirara rutu osireiario-ia. Oa iava voea rutupa tavitiavipa vao vituaro iava oa iava vavaea tovoeva Jisas-ia pituro. Uva oiso puraopa, “Ragai iava ikavivira raga upia opesi ovoiei.” <sup>48</sup> Oa iava Jisas oiso oirare puraroepa, “Oviiva oaa, vii vaaro oirao pie vovouaro oa vii ravotovira porete pie ovoivoi. Avau. Ra vii iava sopaua gavaevira toupave.”

<sup>49</sup> Oire uva tovira reoreoparoepa, ovusa iravu oirato ro Jiras vo kepaaro iava urioroepa rera tavisa oiso, “Vii oviivaaro kopiioi rutu. Teapi

touvira Tisato pugu piepari va iava vao.”<sup>50</sup> Oire uva Jisas va vao uvureva. Oa iava rera vo rearo aatooro oiso puraroepa, “Eakepa uriripaei? Ragai oirao pieri. Oviiva oara ravotovira poretepaoi vorevira tootooro.”<sup>51</sup> Oa iava Jisas avaroepa Jairas vo kepaaro iare. Uva voa voea rutu kosi piereva. Vo osa voeao raga tapo voare koataro Pita vase ora Jon, ora Jems, ora aiteto avukarei, vaitereo uvava oviiva.<sup>52</sup> ✧ Ovusa oirara rutu oirapa kakaeva gaupaiva. Uva va-a vao oa iava Jisas voeare oiso puraroepa, “Opeita gaupata. Viapau oiso kopiioi rutu. Easi eira uusi ragapaai.”<sup>53</sup> Oire uva rera agesipaiva rutu. Eake iava? Uvare oiso taraipaaepa, Iria o kopiioe rutu.<sup>54</sup> ✧ Oa iava Jisas oira vavaeoro-ia pituoro oirare oiso puraroepa, “Kakaeva toreu.”<sup>55</sup> Oa iava tootooa oira iava kakaeva vorevira vorepa oira iare. Uva ikauvira vaaraa ovoioapa. Oa iava Jisas oiso voea vovireva, “Oirapa aioara vai vateta.”<sup>56</sup> ✧ Uva aitetoarei rirovira rope iraopasiepa. Oa iava Jisas goruvira rutu oiso vaiterei tavireva, “Opeita irai tavipasivere.”

## 9

### *Jisas Kovoa Vatereva Katai Tau Eraopa Aposel (Matyu 10:5-15; Mak 6:7-13)*

1 ✧ Oire uva voeare katai tau erao (12) disaipel keeraroepa. Oa iava voea vatereva riroa gorua ora reesia tapo voeapa aue rei vaisi, oisore ra va iavirava vuri tugararo kosi piepaive, ora oaravu rutu tapo upiara.<sup>2</sup> ✧ Uva voea arureva Pauto vo Saraaro iava siposipopasa ora upiapa irara tapo porete piepasa.<sup>3</sup> Oire uva oiso voea tavipareva, “Viapau oiso ra oaravu avu vai rutu kaepatavere vokapaoro. Ora viapau oiso ra tooroara vai-ia pitupatavere vokapaoro, ora opara vai, ora opo, ora moniara vai. Ora viapau oiso ra eraeraovira kuvupara vai-ia pitupata tapo ora visiipa. Uvare voea auearo-a visii tokipasa voeao oea tauvapasa avapatai.”<sup>4</sup> Vosa okepai-ia koatata, oire ra vo kepa raga-ia touta vo tugurasa uva vo kepa-ia toupaooro ouruivu iare topa uvirosa auepata ita.<sup>5</sup> ✧ Ari vosa viapau visii oupaive vore ora voea vo kepaoro-ia, oire ra vo urui eva kavuoro avata. Ra ora visii iava kokotoaro iava rasiara tovetoveta voare voea vo vuriaro reesipasa. Ra va iava ora voea vo pitupituroarore evara rugooave.”<sup>6</sup> Uva va-a eva oa iava avaaepa Vearo Siposipo purapasa vo uruiara rutu-ia. Uva upiapa irara rutu tapo ravotovira porete piepaiva vorevira.

### *King Herot Jisas Java Uvureva (Matyu 14:1-2; Mak 6:14-16)*

7 Oire uva King Herot Galili iavapa irara reitoaaro ira vara rutu iava varao uvureva. Oa iava vavagisiparoepa rutu. Eake iava? Uvare oearovu oiso purapaaepa, “Jon eera ira tova tapi iava vorevira toreroi.”<sup>8</sup> ✧ Osa oearovu oiso purapaaepa, “Easi llaija eera ira vorevira ora karekeroi.” Vo osa oearovu oiso purapaaepa, “Easi reo topa piepato-a profetato eera tuariripato ira vorevira toreroepa.”<sup>9</sup> ✧ Oa iava ro Herot oiso puraroepa, “Jon kukuearore ragai voearo aruavora. Ari iroutoa rutu-a ro ira iava siposipopaivoi oirara?” Oire uva va-a vao oa iava oiso ruipaparoepa ra Jisas kekereve rutu.

### *Jisas Vo Vavae Tuku (5,000) Aio Piereva (Matyu 14:13-21; Mak 6:30-44; Jon 6:1-13)*

✧ 8:52: Jo 11:11, 13 ✧ 8:54: Jo 11:43 ✧ 8:56: Lu 9:21 ✧ 9:1: Mk 3:13-14 ✧ 9:2: Lu 10:1, 9 ✧ 9:5: Ap 13:51 ✧ 9:8: Mt 16:14 ✧ 9:9: Lu 23:8

<sup>10</sup> Uva vorevira rera voeaaro aposel irara kareaepa Jisas iare. Oa iava rera tavipaiva varao rutu iava oara puraiva. Osa iava voea raga roporeva voea ouoro oirara rutu sovara iava. Uva ouruivu iare voea tapo avaroepa, oiso ra reareaave. Vo urui vaisiario, Betsaida urui. <sup>11</sup> Uva va iava uvuivoiva, voea sirova utuaepa. Uva viapau oiso Jisas voeare koruroepa. Uva voea rutupa Pauto vo Saraaro iava siposipopareva. Ora oearovu rutu tapo upiapa irara ravotovira porete piepareva. <sup>12</sup> Ovaiarovi katai tau erao (12) Jisas iare urioaepa rerare oiso purasa, “Voeao taviri ra evoraro uruiara vai-ia uusisa auaave. Ora voeapa aioara vai voripaive voraro. Ari kuvau tapi-a vo-ia uva toupai. Uva viapau oirara vai toupai.” <sup>13</sup> ✧ Oa iava Jisas voea tavireva oiso, “*Visii raga voeapa aioara vai vateta.*” Uva oiso puraaepa, “*Viapau riroara vai ei vo igei vara. Ari vo vavaevi raga vao-ia bret ora kataitoarei ataritoarei oaravia rutu-a varao toupai. Esa oiso vai o ruipapauei ra voeapa aioara vai vorisa avai o, eke?*” <sup>14</sup> [Aue rutu vao vo vavae tuku (5,000) rutu uvuiaro oirara, vo osa viapau riakora ora kakae vure vievieiiva voea oea toupai.]

Uva Jisas rera voeaaro disaipel tavireva oiso, “*Voea totoevira pau pieta oiso, oeavu vo vavae tau (50) uvavivu, ra oeavu vo vavae tau uvavivu pauave, osa oeavu ita vo vavae tau uvavivu pauave.*” <sup>15</sup> Oa iava disaipel oisi voea roorookavira paupau pieiva. Osa iava voea rutu oirara rutu pau pieiva. <sup>16</sup> ✧ Oire uva Jisas bret vavae ouoro ora ataritoarei vara rutuva vuvuiua-ia vurareva vearo vaisi puraoro. Oa iava vara puteputeoro voeapa disaipel vara vatereva, oiso ra vara vateive voeapa oirara. <sup>17</sup> Uva voea rutu uvuvira aioiva. Oa iava ururukoara guruiva varao oara kavu piropa. Oara-ia katai tau erao (12) aue pekuri agasi pieiva.

*Pita Jisas-pa Taviroepa Oiso, Vii-a Krai*  
(*Matyu 16:13-19; Mak 8:27-29*)

<sup>18</sup> ✧ Ovuutavu-ia rera raga Jisas variroepa vo osa disaipel irara rera tapo toupai. Oa iava voa oiso voea akereva, “*Apeisi ragai vaisipaiveira oirara?*” <sup>19</sup> ✧ Oa iava rerare oiso puraaepa, “*Ari oearovu oiso vii vaisipaiveira, Jon Baptais, osa oearovu oiso, Ilaija ira oisoa reo topa piepa kovo purapareve voari tuariri. Ari oearovu oiso, iravu tuariripato profetato roari ira vorevira toreroepa.*” <sup>20</sup> ✧ Oa iava oiso ita voea akereva, “*Ari apeisi visii raga ragai vaisipata?*” Oa iava Pita oiso puraroepa, “*Ari vii-a Krai ro Ropoto viigoa arureva Pauto vore.*”

*Jisas Ora Rera Iava Taviroepa Oiso, Kopyiravere Ra Vorevira Torera*  
(*Matyu 16:20-28; Mak 8:30-9:1*)

<sup>21</sup> ✧ Oire uva vo reo-a vao oa iava Jisas goruvira voea vosireva oiso, “*Opeita oisi ragai iava irai tavita.*” <sup>22</sup> Oa iava topa pievira oiso voea tavireva ora rera iava. “*Oirato Oviitoaaro oiso riroara vai siitokaara vai oureve. Uva lotupa irapa irara, ora reipa irara pris, ora voea Reo Taisi-ia tarai irara rerare isivaavere. Uva rera upoivere, ra vo pevapa voki-ia vorevira torerovere.*”

<sup>23</sup> ✧ Oa iava oiso voeare puraroepa, “*Vosa ro ira ragai sirova utu ruipaparo, oire ra ora rera iava vaisia vara pie rovoreve. Oa iava uvuipa ra ora rera vo vavataaro kaereve, oiso osa vao evao parikou ragai sirova utupaoro vokiara rutu-ia.*” <sup>24</sup> Ro ira tootooaro virivaripareve, oava eva opesirovorea tootooaro. Ari ro ira tootooaro vatereve vo oearovupa ragai vo ruipaaro

sirova utupaoro eera-a ira tootooaro tapo virivariavere taru. <sup>25</sup> Vosa irai sara kovo vai purareve, ra auero rutu oureve varao vo rasio-ia, vo osa eisi piepaoro ora vuri piero, oire aa vao-a *vearoa oa ourevereia oirato vo rasio-ia?* <sup>26</sup> \* Vosa irai ragaipa ariiparo vo oearovu osireiario-ia ora ragai vo siposipoaropa tapo. Uva oisi-a eisi osa rerapa ita ariiraverea ragai vao Oirato Oviitoaaro, vo osa ragai vaarova keraria vorera. Ora vao Aiteto, ora voeao tugoropa irara enselpa irara vaaro keraria, oea rutu osireiario-ia rerapa eera ariiraverea rara. <sup>27</sup> \* Oiraopavira rutu visii tavi iraopaavoi oiso, Ari ita, oearovu oirara visii iava tootoovira toupavereia oea viapau tuguraaverea kopii-ia. Oea Pauto vo Saraaro keke rovoivere taru.”

*Jisas Java Varaua Avokorivira Karekeepa*  
(*Matyu 17:1-13; Mak 9:2-13*)

<sup>28</sup> \* Jisas vo reo purareva, oa iava utupavira vo peva vatara vokiro isivaoro iava vo peva vao oureva oiso, Pita, Jon, ora Jems. Uva voea tapo iparoepa oavu-ia riro pukuia oiso ra vao variriro. <sup>29</sup> Voa variriparoepa. Uva rera iava puaua avokorivira karekeepa, osa rerare kuvupara tapo popoteepa rutu oiso sisikoreoro osa aviavia. <sup>30</sup> Oa iava vao aitereivu oiratoarei rera iare ora karekesiepa voava Pauto vo uruiaro. Uva evaiterei Jisas tapo ora reopasiepa Moses vaio ora Ilaija. <sup>31</sup> \* Aiterea Pauto vaario karekesiepa keraria eva aviavia. Uva vao ora reopasiepa aue tapo Jisas varao iava oara purarevere Jerusalem-ia kopiioro Pauto vo vovouaro sirova utuoro. <sup>32</sup> Oire uva Pita vase iava osireiara rurava. Oa iava oiso ruipapaaepa ra uusiave, osa viapau oiso uusipaaepa. Oa iava vovevira voea iava osireiara pariiva Jisas vaoro keraria kekesa, ora vaitereo tapo aiterea rera tapo torepasiepa. <sup>33</sup> \* Oire uva va-a vao oa iava Jisas arova avasa auepasiepa ovusa Pita Jisas-re oiso puraroepa, “Reito. Igei-a vao vo tupaio vearopai ra kepa peva vai pauio oiso, Vii okepai, ora Moses okepai, ora Ilaija okepai.” [Aue iava uvare Pita viapau vearovira taraiparoepa va-ia vao oa iava oisi eisi puraroepa.]

<sup>34</sup> Oire uva tovovira raga vo reo vao purapareva osa iriavu rukuta voea ruueva. Oa iava rirovira rutu uriri iraoaepa. <sup>35</sup> \* Oira sovara-ia o rukuta oreovu Pauto vo reoro oiso puraepa, “Eera-a ragai Oviitoaaro ira reesiavora rera ropooro. Ira uvu iraoa.” <sup>36</sup> Uva oisi-a oiso osa puraeiva vo reo vao, vao rera raga kekeiva osa toreparoepa. Oa iava ora tape pieaepa. Uva viapau irai tavipaiva va iava vao oa kekeiva vao.

*Jisas Ravotovira Iravu Viovakoto Porete Piereva Vurito Tugarato Veraoro*  
(*Matyu 17:14-21; Mak 9:14-29*)

<sup>37</sup> Vokipavira pukuia iava vokiaepa voava vaaroro, osa oavu riro irara rera iare Jisas urioaepa raivaoro rerava aivarosa vao. <sup>38</sup> Uva iravu oirato voea iava Jisas-re keeraoro oiso puraroepa, “Tisato, goruvira rutu vii arepaavoi oiso ra oviitoa oaa kekeri kataitoavi raga. <sup>39</sup> Ira-ia pitupareveira iravu vurito tugarato. Oa iava rirovira oivepaoro ikaupavira kove ovoiparoveira vurivira rutu. Ra popotevira rera gisipoaro-ia kosikosipa piro aue ruiuiso. Ari ita, rera iava varaua vuri pie iraopareveira. Ra va iava viapau oiso ikauvira rera eakapareveira. <sup>40</sup> Oa iava vii voeaarore gau ragapaavorao disaipel, oiso ra rera ro vurito tugarato kosi pieive. Osa viapau uvuipaerao.”

\* 9:26: 2 Ti 2:12; 1 Jo 2:28 \* 9:27: Jo 21:22 \* 9:28: Lu 3:21 \* 9:31: 2 Pi 1:15 \* 9:33: Lu 5:8, 8:24, 45 \* 9:35: 2 Pi 1:17-18

<sup>41</sup> Oa iava Jisas rera aatooro oiso puraroepa voeare, “*Ae visii vao-ia oirara vo vokia iava. Viapau oiso oirao pie vovou vaiei visii-ia. Vuri sopa irara rutu-a visii. Ovirovu-ia vuuta visii tapo toupaaaveira? Ora ovirovu purapaavere visii vo vovouaro-ia kasikasipaoro, osa viapau goruvira ragai vaaro-ia pitupata?*” Uva va-a vao oa iava rerare ora poreoro oiso puraroepa, “*Oviito oarava uriou.*” <sup>42</sup> Oire uva rera raga kakaeto urioroepa. Oa iava rera vurito tugarato rera-ia vikiroepa rasiua arore rera sisiputaoro rutu vurivira. Osa iava Jisas rerare tugarato kasipuroepa rera kosi pie ovoioro rera iava ro kakaeto. Oa iava vorevira aitato vatereva rera. <sup>43</sup> ✱ Oire uva voo-a vo uva oirara rutu vao riroa Pauto kerariaro vo goruaro kekeiva. Oa iava ora sitaepa rutu va-ia tavetavepaoro.

*Jisas Erao Pievira Ora Rera Iava Taviroepa Oiso, Kopiiravere  
(Matyu 17:22-23; Mak 9:30-32)*

Oa iava rirovira rutu vara iava rugorugoo iraopaaepa varao oara pureveva. Oa iava Jisas voea disaipel tavireva oiso, <sup>44</sup> “*Vearovira rutu ora visii iava kokiara gereta, ra vo reo uvuoro va oriruta. Uvare utupauavi Oirato Oviitoaro vateivere keripa irara vavaeoro iare.*” <sup>45</sup> ✱ Osa iava viapau vo reo vituaro-ia taraipaaepa vao vatau reo oa pureveva ora rera iava voeare. Oa iava viapau vo reo-ia taraipaaepa vearovira. Uva vo reore ake arapa uriripaaepa rera asavira.

*Irouto-a Reito?  
(Matyu 18:1-5; Mak 9:33-37)*

<sup>46</sup> Uva voea raga disaipel reoa-ia ora upopaaepa oiso ora reopaoro, Iroutoa rutupa ro ira vigei iava reiparoi? <sup>47</sup> Uva Jisas voea vo rugorugooaro-ia tarairoepa vao oa toupaiava voo voea iava sopaura. Oa iava iravu oureva kakaeto garetoavi ora rera ruvara-ia rera tore piesa. <sup>48</sup> ✱ Uva voeare oiso puraroepa, “*Ro ira ro kakaeto tauvapareve vo ragai vaisiario-ia, rera-a eera ira ragai tauvapare. Ora ro ira ragai tauvapare, ira ita ro tauvapare ira ragai arureva vore. Ari ita, ro ira gare visivi rutu toupere akaipavira visii rutu vao-ia vuutaaro-ia, ira-a eera rovopatoa rutu visii rutupa vo Pauto osireiario-ia.*”

*Ro Ira Viapau Visiiva Keriparo Uva Rera Eera Vatetoa Oavisii  
(Mak 9:38-40)*

<sup>49</sup> Jon oiso puraroepa, “*Reito, iravu oirato kekeiovo osa vuri tugararo kosi piepare vii vaisiario-ia. Ari ita, vo osa viapau vii sirova utuparoveira oiso osa igei vii sirova utupaioveira. Uva va-a eva oa vituaro iava rerare koruie.*” <sup>50</sup> ✱ Uva Jisas rerare oiso puraroepa, “*Eakere rerare korutae? Ari ita, ro ira viapau vigeiva ora keriparo, eera-a ira vigeiva tavosivira toupere.*”

*Vo Sameria-pa Irara Ora Voea Vo Uruiaro-ia Korukorupaoro Jisas Siguiva*

<sup>51</sup> ✱ Vo vuuta-a vao oa tutuu pieiva oa-ia Pauto oiso ruipaparoepa ra Jisas kae pierere vorevira vuvuiua iare. Oire uva vo vuuta iava vo vokia rovroepa rera vo ruipaoro tovooro, oiso ra Jerusalem iare avaro. <sup>52</sup> ✱ Osa iava oevu ira piereva vo reova vao ora rera iava. Uva ouruivu-ia karea viropa Sameria vo uruiaro. Oa iava rera varaaro vatatoposa aueaepa. <sup>53</sup> Vo osa voea voeao vo uruia vao rerapa Jisas reasi iraopaaepa vova ora voea vo uruiaro-ia. Aue iava uvare oiso taraipaaepa rera-ia, Ari ro-ia Jiu ira Jerusalem iare avaparoi, osaravu rutu iava rera. <sup>54</sup> ✱ Uva va vao kekesiva

✱ 9:43: 2 Pi 1:16 ✱ 9:45: Lu 2:50, 18:34 ✱ 9:48: Mt 10:40; Jo 12:44, 13:20; Mt 23:11-12  
✱ 9:50: Mt 12:30 ✱ 9:51: Lu 13:22 ✱ 9:52: Mt 10:5; Jo 4:4 ✱ 9:54: 1 Kin 1:10, 12

vaitereo Jems vaio ora Jon. Oire oa iava Jisas-re oiso purasiepa, “Turaro, apeisi vovoupauei ra tuitui kasire keeravio. Ra voeao oirara kasisa varape vova vuvuiua iava?” <sup>55</sup> Uva Jisas vaitereire kasipuoro vaiterei tape piesa ora poreroepa. <sup>56</sup> Oa iava ouruivu raga iare topaa viropa ita.

*Irouto Ro Ira Jisas Sirova Utu Ruipaparo  
(Matyu 8:19-22)*

<sup>57</sup> Oire uva raiavaaro vokapaoro avapaaepa. Uva voa iravu oiso Jisas tavipareva, “Voraro ouruuroa rutu-ia vokapaoro avapauvere, uvaroa vii sirova utuparavere.” <sup>58</sup> Uva oirato vo vovouaro rutu kareke piesa oiso puraroepa rerare, “Aakau kare varaaro rikuara toupaveira rasiuaaro. Ora kokio kare oea tapo varaaro epitara toupaveira. Ari ragai Oirato Oviitoaaro viapau oiso oai epao tavukia vai ragaipa ora ragai iava kukue uusi piepasa.”

<sup>59</sup> ✱ Uva va-a vao oa iava Jisas oiso iravu tavireva, “Ragai sirova utuu.” Oa iava rera ro oiso puraroepa, “Vearopai ra ragai iava vase rovori. Ra aite tova rovosa vore rovora, vo rara kopiuro.” <sup>60</sup> Uva Jisas rerare oiso puraroepa, “Eagara, voeape evoea kopii rugoo irara ra ora voea raga ora tovapaave. Osa vii Pauto vo Saraaro iava siposiposa avau.”

<sup>61</sup> Uva iravu ita rera tavipareva oiso, “Turaro, oiso ruipaparai ra vii sirova utupara. Uva apeisi vovoupau? Ra ragai iava vase rovori auere ra sekan rovosa vore rovora ragai voeaarova.” <sup>62</sup> Oire uva Jisas rerare oiso puraroepa, “Ro ira ora rera vo kovoaro-ia pitu rovoreve, oire ra voava orugorugoorovu ita porero utupavira, ra apeisi ragavira rera vo kovoaro vearovira rutu karekepe? Ira-a eera viapau uvuiparoi vo kovo-ia pitureve Pauto vo Saraaro-ia okovoa toupaveira.”

## 10

*Jisas Erao Vatara Tau Erao (72) Siporeva Rera Vo Kovoarova*

<sup>1</sup> ✱ Vo utupavira Turaro erao vatara tau erao (72) reesirevoiva, voea eraeraopavira siporeva. Uva iraaepa rerapa uruiara rutu iare, varao reipa uruiuro ora garepa uruiuro tapo. Uva utupavira rera raga avasa aueparoepe vo uruiuro iare varao. <sup>2</sup> Oire uva Pauto vo kovoaro reesiroo oiso puraroepa voeare, “Riroara aioara vioroe, oara oiso toupai osa oirao pie asa irara vo ragai-ia Jisas. Osa viapau kovopa irara vai vo voea tavitavipasa. Eisi osa iava variripatavere rore ira vo kovoaro-a. Ra va iava kovopa irara vai siporeve rerapa aioara gurusa aue oirara.

<sup>3</sup> “Uvuta! Visii sipopaavo i oiso osa sipsip kakaero aakau kare vuutaaro iare, okarea vo kakaero aiopaveira. <sup>4</sup> Opeita moni oaparo vai kaepatavere, ora ogataara vai, ora aue tasipa su. Teapi ora visii vo vuutaroooro pute pie ragapata ora reoreo ragapaoro oearovu tapo voraro raiavaaro. <sup>5</sup> Oire vosa oai-ia kepa vai koatasa auepata, oire ra oisi pura rovota, Visii vao vo kepa iava kave vovouvira touta. <sup>6</sup> Vosa irai kave vovoutoa vai vo kepa-ia toupaveve, oire ra va vao kave vovou tovota rera-ia. Ra rera iare vira piro. Ari vosa viapau oisi irai, oire ra visii vaoro kave vovou vao oa vateta oa visii iare ita vorevira vorepere, vo rara irai viapau va oupareve. <sup>7</sup> ✱ Oire ra voa katai kepa raga-ia toupata. Ra vo kepa raga-ia aiopata ora ukaiopata tapo varao oara vatepaive visiipa voa. Aue iava uvare ro ira Pautoa-pa kovopaveve oirara tauvapaoro, irapa torevokopai oiso ra tauvaa oupareve oearovu ruvara-ia, voeao oea tauvapeve voea tokipaoro. Ari ita, viapau

uvuipatai ra okeparovu iare ora sikasikapata. Ari uvuipatai ra katai kepa raga-ia toupata.

<sup>8</sup> “Oire vosa ourui-ia kare uvirota, ra voa visii ouive vorarore ora voea vo keparoaro-ia. Oire ra aioara aiopata varao oara visiipa vatepaive. <sup>9</sup> Upiapa irara porete piepata voa vo urui-ia. Ra oisi voea tavipata tapo, Pauto vo Saraaro tutuu piepaivoi visii iare. <sup>10</sup> Ari vosa ourui-ia kareu virota vao oa-ia visiire korukorupaave, oire ra vo urui vuutaaro-ia toresa avata voava voea siposiposa <sup>11</sup> oiso puraoro, Ae! Poupou rasiro igei kokotoaro-ia votoei. Oire uva visiipa Pauto vo kasipuaro kareke piepaivoi vara vovovira tovetoaveoro ora igei kokotoaro iava. Ra va iava oiso vearovira taraita, Ari ita, Pauto vo rearo visiire keera ragapai osa va uvu ragapatavo. [Ari ita, tutuu pie ragavoi Pauto vo Saraaro ovusa vava reasipatai]. <sup>12</sup> ✧ Oire uva visii tavipaa vao iava Ovoioipa Voki oa-ia Sodom vata voeao oea oisoa vuri pitupitu purapaive, oea vo siitokaaro ouiverea, oa-ia visii vo siitokaaro puteverea riroa rutu.

*Siraovira Rutu Vo Uruiroa Oara-ia Viapau Ora Voea Iava Sopaura Oaive Porepaive*  
(Matyu 11:20-24)

<sup>13</sup> ✧ “Siraovira rutu visiipa vo Korasin urui. Ora siraovira rutu visiipa Betsaida urui. Vosa ragai oai ravoto kovo vai puraavori Taia uruireipa ora Saidon voari rutu tuariri, oiso osa vao-ia oa puraavora visii ruvara-ia, oa iava tuariri vuri irara Taia vata ora Saidon vata oeara rutu vuri varorovi raga-ia tuupaaeri. Ra vo tuurova gavutara raga ivara-ia paupaave vuri vovouro oaiveva aripaoro. Oa iava sopaura oaive voea iava pore pirori vova vuriara oaive iava. <sup>14</sup> Oiraopavira rutu oiso osa visii tavipaavo oiso, Vo vokia vao oa-ia oirara rovirieireverea Pauto ovokia-ia vo siitoka ouverea vo uruireo Taia uruirei ora Saidon, oa-ia puteverea rutu vo tavaka visii vaoro. <sup>15</sup> Ari visii Kapaneam vata visiigoa kae viro ruipapataveira vuvuiua iare, oiso ra rei vaisipata, raa? Ari viapau. Easi visii vara pierereverea vuri tapire.”

<sup>16</sup> ✧ Oa iava oiso Jisas rera voeaaro disaipel tavireva, “Ro ira visii gisipoaro uvureve, oire uva rera-a ita eera ira ragai gisipoaro uvurevoi. Ari ro ira visiire isivaro, eera-a ita ragaire isivaroi ora ro tapore Pauto ira ragai arurevora vore.”

*Erao Vatara Tau Erao (72) Kovopa Irara Oea Vovovira Kareaeapa*

<sup>17</sup> Oire uva utupa visivi erao vatara tau erao (72) vovovira kareaeapa. Oa iava rorupaiva oiso puraoro, “Turaro, igei vii vaisiara iavirava voeare reopaive vuri irara tugara. Oa iava igei vo rearo uvupaivo rutu, vo osa oearovu iava voea kosi piepaio. <sup>18</sup> ✧ Oa iava Jisas oiso voeare puraroepa, “Seten tueava osa oiso vararoepa osa parakauoro vuvuiua iava koveoro, vo uvare viapau gorua vai epao rera oaiaro. <sup>19</sup> ✧ Uvuta! Ragai visiipa gorua vatepaavo. Oa iava ro-ia putetavere ira vigeiva keriparoveira Seten. Ra va iava vo kareo rutu-ia tapo puteta voea-ia fasiooro rakoru kare ora siikopi kare. Ra va iava viapau visii vuri pierere ro vurito. <sup>20</sup> ✧ Opeita rorupaoro oiso purapata, Vuri tugararo igei vo reoroaro uvupaiveira. Viapau. Ari Pautoa-ia roru iraopata ira visii vaivaisiara rigatoreva rera vo uruiaro-ia oiso puraoro, Ragai voeaaro-a visii.”

✧ **10:12:** Mt 10:15, 11:24 ✧ **10:13:** Lu 6:24-26 ✧ **10:16:** Mk 9:37; Jo 13:20 ✧ **10:18:** Jo 12:31; Re 9:1, 12:8-9 ✧ **10:19:** Ap 28:5 ✧ **10:20:** Sam 69:28; Dan 12:1; Hi 12:23; Re 13:8, 21:27

*Jisas Rorupareva Rutu Oa iava Vearo Vaisi Purareva Pautoa-ia Aiteto (Matyu 11:25-27, 13:16-17)*

21 ✧ Vo vuutao-ia Tugoropato Uraurato rorua kareke pierewa Jisas sopaaro-ia. Oa iava oiso puraroepa, “Aite, vii Reito Turaro vuvuiua-ia ora vo tapo rasitao-ia. Vii-ia vearo vaisi puraavo. Uvare viigoa varao rutu vatauriva voeao asavira oirara oea-ia taraiara toupai vo ora voea vo rugorugooaro-ia. Oa iava voeao raga kareke pieriva oea oiso toupaveira osa garepa kakaero. Iu ita. Aite, vii raga vo ruipaaro osa oiso vearovira toupaveira.

22 ✧ “Aite ragai vavaeoro-ia varao rutu tovoreva. Uva viapau irai oiratoa vai taraipa rutu ragai-ia Oviito. Ari Aite raga kataito. Ira ragai tarai iraopa ragai-ia. Ora viapau irai Aite-ia taraipa rutu. Viapau. Ari ragai raga rera-ia tarai iraoparai, ora voeao oea-ia Aiteto kareke piepareveira Oviito ora rera vo ruipaaro sirova.”

23 Oire uva voea raga disaipel Jisas tapo toupaveira. Oa iava voea iare ora poreroepa oiso puraoro, “Oearovu oirara roruive vosa oarai kekepaive varao oara kekepatavoi vo vokia ragai ruvara-ia. 24 ✧ Ari ita, visii tavipaavo oiso, Voari tuariri uva riro irara profet irara ora king irara oearoa orekerov rutupa varao oisoa ruipapaave, oiso ra vara kekepaive varao Pauto vo Saraaro iava oara kekepatavoi. Uva viapau oisoa vara kekepaive. Ora vara tapopa ruipapaave oiso ra vara uvupaive varao oreoroa ragai iava. Uva viapau vo reo oisoa uvupaive.”

*Vo Sameria-pato Ora Rera Keripatoaaropa Siraoroepa*

25 Oire uva iravu taraito Reo Taisi-ia toreroepa Jisas-ia kokarasa rera tavatavaeoro. Ira oiso puraroepa, “Tisato. Eake vai-a uvuiparai ra oai puraa. Ra va iava Tootoo Ovoi oua vao oa opesi asavira toupai?” 26 Oa iava Jisas rerare oiso puraroepa, “Oavu rigato-a oa toupai Reo Taisi-ia. Oire uva apeisi ragavira rugorugoopau va vieipaoro?” 27 ✧ Uva Jisas vo rearo aatooro oiso puraroepa, “Turaro eera-a vii reraaro Pauto. Ira ragapa vii iava sopaua rutu vateri, ora vii vaaro rutu tapo rugorugooara rutu, ora gorua, ora taraiara rutu rera ragapa. Ora eisi osa ropa siraopau ira vii ruvara-iavi toupaveira, oiso rutu osa ora viipa siraopaveira.” 28 ✧ Oa iava Jisas oiso rera tavireva, “O ita! Torevokovira vo reo aatori. Uva oisi-ia eisi osa iava uvupauei ra va iava Tootoo Ovoi rutu ouri.”

29 Ari ita, ovusa rera ro riro taraito oiso ruipaparoepa ra ora rera raga vaisiaro raga vearoreve. Oa iava Jisas-re oiso puraroepa, “Iroutoa irao-a ira ragai ruvara-iavi toupaveira?” 30 Oa iava Jisas rera vo rearo topa piepaoro oiso puraroepa,

“Iravu oirato ira Jerusalem iava vararoepa Jeriko iare. Uva vuri irara riro kaviru irara rerava aivaroiva raivaaro. Oa iava auero rutu rera varaaro ouiva voa rera vurivira rutu upooro. Oa iava kopii ragaroepa rutu. 31 Oire uva iravu koruou purapato pris ira vo raiva gaepareva. Oa iava voa rera vatavatareva vo raiva vatuaoro-ia avaro. 32 Uva iravu ita Livai ira oisoa Tugoropa Kepa-ia kovopareve, ira ita oisi raga rera kekeoro rera vatavatareva.

33 “Oire uva iravu Sameria-pa irara iava rera, voeao oea oisoa voeava Jiu ora keripaave, ira voa rera kekeoro rerapa rirovira rutu siraoroepa. 34 Oa iava rera ruvara iare tutuu pierewa. Uva voa rera-ia aue wel petoreva. Ora



wain ovi tapo oa ro iava kokoroepa vorarore kapuara-ia, oiso ra opeisipe. Oa iava rera kae pierewa ora rera oiraaro iare donki. Osa iava rerava avaroepa rera tovosa oavu-ia tavete uusi piepa kepa. Oire uva voa-a evoa uva vearovira rutu rera tokireva. <sup>35</sup> Vokipavira moni erao kina (K2) vatereva ropa ira vo kepaaro-a va vao tavete uusi piepa kepa. Uva oiso rera tavireva, Vearovira rera tokipari. Ari vosa vii oaiaro-ia rera tokirivere, oire vosa vorevira vorera ra viipa oai kare piea vorevira. <sup>36</sup> Oire ra apeisi rugorugooapai? Iroutoa vai-a vo pevao iava ira oisi eisi rera pierewa vo uvare rera ruvara-iavi toupave, ro ira vuri pieiva kavirupa irara?" <sup>37</sup> Uva va-a vao oa iava rera ro Reo Taisi-ia taraipato oiso puraroepa, "Ari ro oirato ira rerapa siraoroepa rera tauvaoro." Uva Jisas oiso puraroepa rerare, "O ita, uva oisi raga piesa avapauei."

### *Vo Mata Vaio Iava Toupai Ora Maria*

<sup>38</sup> ✧ Oire uva vokapaoro avaparoepa raivaaro disaipel iraraaro tapo. Oa iava ouruivu-ia karea viropa. Uva iriavu riakova, oira vaisiario, Mata iria rera ou pieeva ora oira vo kepaaro iare, oiso ra aioa vai vateeve rerapa. <sup>39</sup> ✧ Uva oira Mata taevaaro toupavea Maria. Oa iava urioopa Maria rera Turaro kokotoaro ruvara iare. Uva voava rera vo reoaro uru piepaeva. <sup>40</sup> Vo osa Mata riro kovo rutu purapaeva aioara ravaapaoro rerapa. Oa iava oirare rugorugooara viriva rutu. Uva Jisas iare urioopa oiso purasa, "Turaro. Asi ragai taevaaro ragai arova avaoi. Oa iava ragai raga varao-ia virikasiparai vara vatatopopaooro aioara. Oire uva apeisi vai-a vao rugorugooapai? Oiso ruipaparai ra oira aruri ragai tauvasa." <sup>41</sup> Oire uva oira aatooro oiso puraroepa ro Turaro, "Mata. *Eakere riro rugorugoooro rutu purapari ora vii iava sopaua vavata pie ragapaoro?*" <sup>42</sup> ✧ Ari ita, kataia ragapa poteparivoi oa vearopai viipa. Oa-a vao oa purasa oira vo vovouaro tovopaevio Maria, oiso ra ragai vo reoaro uru piepaeva. Ari ita, viapau uvuipaveiei ra va vao vearo ruipa verave oira iava."

## 11

### *Vo Toupai Variripa Pitupitu Iava (Matyu 6:9-15, 7:7-11)*

<sup>1</sup> ✧ Oire uva uvavu variripaoro toureva Jisas. Oa iava variri opesiroiva, iravu disaipelto rerare oiso puraroepa, "Vearopai Turaro ra igei tarai pieri variria vo pitupituaro iava, oiso osa Jon ora rera voeaaro tarai pierewa disaipel." <sup>2</sup> Osa iava Jisas oiso voea tavireva, "Vosa variripata, ra oiso purapata,

*Aite. Vii vaisiaropa avivikepaiei va kae piepaoro rutu, uvare Tugoropa Vaisito-a vii.*

*Vii vaaro Sara urio pieri poeravira.*

<sup>3</sup> Vo vokio igei vateri aioa vao vo vokio iare.

<sup>4</sup> ✧ Igei varaaro vuri vovouro verari, vo rara oearovu iava oaravu vuriara vera rovopaio voeao oea igei vuri piepaiveira.

*Ora vosa kokarapara igei iare tutuu piepaive, oire varapa igei vatatopo piepari oiso, teapi vara-ia koveiovere."*

<sup>5</sup> Uva Jisas oiso puraroepa, "Easi pasi, visii iava irai epao ira vatetoo vaiaro epao. Uva eera ovokivu-ia voki vuuta-ia avaroepa rera tavisa oiso, Ragaipa bret peruva vai vateri vatetoo oaa." <sup>6</sup> Ari iravu ragai saratoaaro urioparoi

raivaaro ragai iare. Uva viapau aioa vaiei oa vateavere rerapa. <sup>7</sup> Oire uva rera ro ira kepa sovara-ia toupaveva ira rerare oiso puraroepa, Auoro tupavo. Viapau uvuipauvei ra ragai pugu pie ragari uusi arapa. Ari ita, kakae vure uusiai ragai tapo urua-ia. Uva viapau uvuiparai viipa oavu avu vai vatesa! Oire uva apeisi-a? <sup>8</sup> Visii tavipaavoi, Vosa taraiparoeri oiso, Ragai vatetoaaro ro-ia, oire ra viapau rerapa aioa vai vatereva. Uva kasivarivira rutu rera arepareva. Uva va-a vao vituaro iava rera vatereva aioara. <sup>9</sup> ✧ Osa iava oiso visii tavipaavoi, Pautoa-pa variripata arepaoro, ra va iava visiipa vara vatepareve. Taraapata, ra vara kekepata. *Rataoa totota, ra Pauto visiipa karureve.* <sup>10</sup> Ari ita, voeao oirara oea Pautoa-pa variripaave, ra va iava orekerovu oupaive. Ari ro ira orekerovure taraapaveve, ra rera ita vara kekepareve. Ari ro ira rataoa totoreve, irapa eera Pauto karurevere, vo rara rera vaaro uvureve variria.

<sup>11</sup> “*Oire vosa irai oviitoo vaiaro visii iava irai aitetoa vai arepareve oiso purapaoro, Aite. Ragaipa ataritoo vai vateri, ra irai aioa. Uva apeisi-a? Ra aiteto rakoru vai vatereve rerapa, raa? Viapau.* <sup>12</sup> Ora vosa rera oviito rera aiteto arepareve, oiso ra rera vatereve aue takura vao va aiosa. Ra pasi vuritoo vai vatereve aue siikopi? Easi eva tapopa viapau. <sup>13</sup> Oire visii vao vuri irara visiigoa veaopara vatapataveira ovii irara oavisiipa. Uva oisi-a eisi osa iava vearovira rutu taraipavio va-ia vao, Osa ragavira Aite veaotoa rutu ro vova vuvuiua-ia Tugoropato Uraurato pute pievira vatapataveira voeaopa oea rera arepaiveira rerare variripaoro.”

*Vo Oiso Puraaeapa, Jisas Bielsebul Tapo Kovopare  
(Matyu 12:22-30; Mak 3:20-27)*

<sup>14</sup> ✧ Oire uva Jisas iravu vurito tugarato kosi piereva iravu iava oirato ira iava gisipo kapuueva. Uva rera iava rera ro tugarato avaroepa. Oa iava ro kapuu gisipoto vorevira reoreoroepa. Uva va-a vao oa iava tavetave iraopaiva rirovira rutu rugorugooapaoro. <sup>15</sup> Ovusa oearovu oiso purapaaepa, “Easi ro voeao vuri irara tugara kosi piepare aue Bielsebul vo goruaro iava, ro vuri irara tugara turarotoaaro.” <sup>16</sup> ✧ Vo osa oearovu oiso purapaaepa rera arepaoro, “Ravotoa vai purari. Ra oai iava vii-ia taraiio oiso, O oiraopavira vii vao arureva Pauto vuvuiua iava.” Uva va-a vao oa-ia oiso ruipapaaepa ra va iava vao rera tavatavaeive. <sup>17</sup> ✧ Ari ita, osa voea vo vovoudoro-ia tarai rovroepa. Oa iava oiso voeare puraroepa, “*Vosa oevau oirara oavu katai sara ora roopa pieave, oire ora upoave. Ra va iava ora opesi pie ovoiaive. Ora vosa oevau katai kepa iava, ra ora roopa pieave vo keparei puraoro. Oire ra ora opesi pie ovoiaive ita.* <sup>18</sup> Vosa Seten rera raga ita Bielsebul ira vo saraaro ora sikaave, ra apeisi ragavira gorua oupaive ora voea-ia? Eisi osa ragaire purapatai oiso, Aue Bielsebul vo goruaro iava vuri tugararo kosi pieparevo. Asi viapau oiso uvuipaa ra voea raga ora kosi piepaave. Uvare voea raga ita-a. <sup>19</sup> Oire vosa Bielsebul oiraopavira ragai tauvapaave vo osa vuri irara tugara verapaa, oire ra irou visii voeaaro tauvapaive vuri tugararo verapasa, raa? Uva voea-a voea visii raga voeaaro oea visii vo vuriaro karekeivere poeravira rara. <sup>20</sup> ✧ Ari vosa Pauto vo goruaro ragai tauvapaive voea vuri irara tugara kosi piepaoro, oire ra va iava oiso taraita, Pauto vo Saraaro pou pirora visii iare osa viapau va eveitavora.

<sup>21</sup> “*Vosa riro varivaritoo vai ora irai okepaiaro-ia uutuparo togava vaiva, ra va iava vearovira rutu vara rutu rera varaaro oriruvira toupave.* <sup>22</sup> Oire

✧ 11:9: Je 1:5-8; 1 Jo 5:14-15 ✧ 11:14: Mt 9:32-34 ✧ 11:16: Mt 16:1; Mk 8:11 ✧ 11:17: Jo 2:25 ✧ 11:20: Eks 8:19

ra irai riro varivaritua vai karero viro rera iare. Ra rera-ia putereve varao rutu itooro rera ruvara-ia togara ora toorio varao upo purapara oara-ia rariparo. Ra va iava vara rera varaaro roo piereve oearovu rutupa.

23 ☆ *“Vosa irouto ro ira viapau oiso ragai tapo kovopareve, ira-a eera ragaire isivapa. Ora vosa irouto ro ira viapau ragai iare oirara gurupareve, ari ita uva rera-a eera ira oirara sikasikapareveira ragai arova.*

### *Vurito Tugarato Vorevira Voreroepa (Matyu 12:43-45)*

24 *“Vosa iravu iava kosiro viro ro-ia tugarato vore avaooro raaka tapi vog ora rerapa toua vaire taraasa rearea taraapaoro. Oire ra taraa ragaparevoiva, oiso puraro, Voreparai vo kepao iare uva tou rovopaavora tuariri. 25 Oire vorero vo kepa kekesa, vo rara vo kepa viouive va rekooro.*

26 ☆ *Uva va-a vao oa-ia oisoa oevu erao vatara tugaro tuvetuvepareve ora rera iare, voeao oea vo vovouroaro vuri vovouro oisoa rera vo vovouroaro-ia putepaive rutu. Oire ra voea rutu tapo koataro vorevira voea tapo toupasa voa vo oirato sopaaro-ia. Ra va iava rera vo touaro ro oirato vuri iraope rutu vo touo-ia puteoro oa-ia rera ro rovopato tugarato oisoa rera sopaaro-ia tou rovopareve.”*

### *Vo Rorua Rutu Oupa Pitupitu Iava Toupai*

27 ☆ *Jisas vo reo purareva ovusa riro irara toupaiava. Oea vuruvuru-ia iriavu riakova toupaeava. Iria oiso puraopa keeraoro, “O-ia iria vii kavaueva ora vii roro pieeva iria rirovira rorupae, uvare viraakoava toupaevoi.” 28 ☆ Vo osa Jisas oira vo reoaro aatooro oiso puraroepa, “Viapau. Asi voeao-a oea Pauto vo reoaro uvupaoro va sirova vearovira utupaave, oea roruive.”*

### *Oearovu Ruipapaaepa Oiso Ra Ravotoa Vai Kekeive (Matyu 12:38-42; Mak 8:12)*

29 ☆ *Uva rirovira ora gurupaepa. Oa iava oiso voea tavireva, “Visii vao vo vokia iavapa irara vuri irara. Visiigoa ragai arepata oiso ra ravoto reesi vai puraa ora ragai reesipasa. Ra oai keketa. Osa viapau oiso ra visiipa va puraa. Ari vao raga-a vao oa keketaverea oiso osa piereva Jona ravotovira. 30 Vo tuariri uva Jona ro reo topa piepato profetato vao reesia karekereva voeopa Niniva, vo osa ravotovira vo pevapa voki-ia vova atarito sopaaro iava vorevira toreroepa oirara vuutaaro-ia. Oire uva oisi-a eisi osa pieaverea ravotovira visiipa va vao reesia karekeoro visiigoa vo vokia-ia toupatavoi. 31 ☆ Uva vo osa vo vokia-a vao oa-ia Pauto oirara rovirieireverea, ovusa kwin o oisova Siba rovirieia-ia toreoverea aue kort. Oire ra voeao vo vokia iavapa irara togaeverea reoara-ia. Eake iava? Uvare oira o kwin tauai rutuva urioopa Solomon vo taraiaro uvusa, uvare riro taraitoa. Ari ita, uva vo toupaevoi ro ira Solomon-ia putepare. Vo osa viapau rera vo reoaro uvupata vovouisiro oavisii poresa. 32 ☆ Utupaua Pauto oirara rovirieireverea vo vokia-ia oa-ia voeao Niniva kortua-ia toreaverea. Ra vo vokia iavapa irara togaive reoara-ia. Eake iava? Uvare Jona vo reoaro uvuiva vao oa-ia voea tavireva. Oa iava sopaura oaive poreiva. Ari ita, vo toupae visii vuutaaro-ia ro ira Jona-ia putepare.” Eisi osa puraroepa Jisas ora rera iava tavipaoro.*

*Varaua Vo Aviaviaro  
(Matyu 5:15, 6:22-23)*

33 ✨ Uva oiso puraroepa, “Viapau vuravuara rukuepaiveira, ra vara tovopaive rikuara sovara-ia vo kepaara sovara-ia, eke vo baket vai roeroaro. Viapau. Asi vo tebol ivara-ia oira tovopaiveira. Ra voeao oea koatapaave vo aviavi kekepaoro vao-ia aviavia. 34 ✨ Oiso-ia osireitoarei-a aoa auempa sopaua. Vosa osireiara oavisii roroiovira toupave, oire sopaura oavisii rutu tapo roroiovira ita aviavivira toupave. Ari vosa osireiara oavisii tapo rupavira toupave, oire oisi raga ita tapo sopaura oavisii rupavira toupave. 35 Oisi-a eisi osa raga ita ora vatatopopata. Teapi eva aviavia oa visii sopaaro-ia toupai rupape. Ra va iava viapau vearo rugooro eveita. 36 Oire vosa visii iava rugorugooara rutu aviavivira toupave, ra viapau oa visii vara iava rupapape. Oire ra oiso aviavipaive osa vuravu o iria roropaive visii rutu-ia.”

*Vuri Pitupitu Puraiva Farisi Voearei Ora Tisa Irara  
(Matyu 23:1-36; Mak 12:38-40; Luk 20:45-47)*

37 ✨ Vo reo-a vao oa purareva Jisas. Oa iava iravu ratarataa vovouto Farisipato rerare keeroepa oiso ra rera tapo aioreve. Osa iava Jisas koataroepa tebol-ia pausa. 38 Oire uva rera ro Farisipato rerava vurapareva osa voa pauparo aiopareva, uvare viapau vavaea sisu rovoreva Reo Taisi sirova utupaoro. Oa-a vao oa iava rirovira rutu rugorugoo iraoparoepa. 39 Uva Turaro oiso rerare puraroepa, “Visii vao-ia Farisi visiigoa kap iava varaua raga sisigarue piepataveira ora aue dis, osa visii iava sopaura oavisii agasipape varao iava kavirupa vovouro ora varao vuri pitupituro. 40 Visii vao evao kukue irara. E Pauto auero iava vaurara raga purareva, uva viapau tapo vara soparo purareva, raa? 41 Ari ita, vao oa visii sovara-ia toupave oa-ia uvuipatai ra va-ia voeao apota irara tauvata. Oire vosa oisi oiso piepata, ra va iava visii iava auero rutu sisigaruepape.

42 ✨ “Visii vao-ia Farisi visiigoa ora vatatopo iraopata. Visiigoa vao garepa aiorovi iava akuku aioro katakataivira vara vatevate ragapataveira varao iava tautauara rutu iava. Oiso ra utuuva geesi purapata Pautoa-pa koruou puraparo. Uva eisi osa piepaoro torevoko pitupitu vatavata iraopataveira ora varao visii varaaro Pautoa-pa siraopa vovouro. Eisi osa vo pitupituro purapata koruou purapasa. Oire ra viapau opitupiturovu varao reipara kavupata. Ra va iava visiipa torevokopape.

43 “Visii Farisi ora vatatopo iraopata. Visiigoa oirara rutu osireiaro-ia pau ruipapataveira Reo Taisi Uvupa Keparo sovara-ia vo rovopara-ia paupa tavukiro. Ora riro oiso ruipa irara visii ra oirara rutu visiiva vearo voki purapaive visiipa ora avivikepaoro voraro uupa tapirovi.

44 “Visii vao-ia ora vatatopo iraopata. Visiigoa oiso rutu toupataveira osa tova vao oa rasito sovara-ia toupaveira. Oire ra oirara viapau va-ia taraipaoro va ivara-ia tasisipaoro vokapaive vo eruro ivara-ia. Eisi osa visii iava sopaura toupaveira vao iava vuri vovouro.”

45 Oire uva iravu riro taraito Reo Taisi-ia ira rera vo reoaro aatooro oiso puraroepa, “Tisato. Asi vii eisi puraparo igei tapo toviparivoi.” 46 Oa iava Jisas oiso puraroepa, “Visii vao tarai irara Reo Taisi-ia visiigoa ora vatatopo iraopata. Visiigoa riro vatatapa ruuro-ia oirara ogata piepataveira varao

visii raga varaaro reo goruro. Vo osa ora visii raga tapo viapau varavi-ia pitupata sipareoaravi raga iava voea tauvapasa oea vara kaepaive.

47 ✧ “Visii ora vatatopo iraopata, uvare voari tuariri aao irara oavisii oisoa profet irara upopaive. Oa iava voea vo tova uruiroaro oritopataveira. 48 Oire uva oisi raga-a oiso osa piepaoro visii vo rugorugooroaro karekepatavorao oiso purapaoro, Vearo pitupitu-a vao oa puraiva voeao igei aao iraraaro voeao profet irara upooro. Uva va-a vao oa iava voea vo tovaroaro oritopataveira. 49 ✧ Aue iava uvare Pauto ora rera taraiaro-ia riroa oiso puraroepa, Voea iare profet irara sipoaverea ora voeao aposel irara. Oa iava voea iava oearovu tariopaiverea voea upopasa. Ra oearovu tapo voea iava vuri piepaive. 50 Uva va-a eva oa-ia voeao vo vokio iava voea vo vuriaro vo voriaro ouivere. Aue iava uvare profet irara upopaiva voari tuariri rutu. Uva vo vokio-ia tugurasa urioi oisi raga piepaoro oiso. 51 ✧ Osa raga ita voari tuariri uva Ebel uporeva araokoto ro torevoko vovouto. Oire ira-ia rovoepa. Uva Sekaraia-ia pou virosa vo pitupitu raga urioepa. Uva oearovu tapo ita oea upoiva Tugoropa Kepa iava vo tugi vuutaaro-ia ora eravao. Uva voea-a evoea oea iava eva puraiva ovuria oiso eva oa vorevira visii-ia oiso kare piererevarea Pauto.

52 “Visii riro tarai irara Reo Taisi-ia visiigoa ora vatatopo iraopata. Aue iava uvare ki veratavara o tarai oupava. Oa iava Tugoropa Vuku karupataveira ovukua-ia taraiia toupaveira. Oire uva va-a vao oa-ia ora visii ruture raiva tupatava. Vo osa oearovu oiso ruipa ragapaave ra koataave. Oa-a eva oa-ia visii raga vo vovouroaro-ia paipaipaiveira oearovu, aue iava rara visii raga voeare tupatava.”

53 Oire uva Jisas vo kepa iava kosiro viropa. Oa iava voearei voeareo Farisi ora Reo Taisi-ia tarai irara kasipu iraoaepa. Oa iava rera togapaiva oreorovu-ia. Vo osa oaravu rutu akeara purapaiva rera akepaoro, 54 oiso ra rera tavatavaeive. Oire ra oreoi uvuivora rera gisipoaro iava rera iava gasiive kortua iare.

## 12

### *Ora Vatatopo Iraopata Vaopa Kuuvupa Pitupitu* (Matyu 10:26-27)

1 ✧ Riro tukuro rutu (tausen) oirara ora guruaepa. Oa iava voea iava tupa piropa rutu. Oire uva vo vuuta-a vao oa-ia Jisas ora rera voeareo disaipel reo rovoroepea. Uva oiso puraroepa, “Avoeao. Vaopa kuuvu pitupitu ora vatatopo iraopata. Oa oiso rutu toupaveira osa vao yis Farisi vo pitupituaro voeao riro ratarataa vovou irara. 2 ✧ Ari ita, varao oara rutu vataupapeira, oara karekepere utupaua poeravira vore viaea-ia. Uva ita, tavuruvira oisoa toupave, oire ra utupaua oirara vara-ia taraipaave. 3 Oire vo reoro oara purapataveira vo rupa-ia, oreoroa uvuivere vo ravireo-ia. Ari vo reo oa-ia ogaogavira ora reopataveira vo kepaara sovara-ia, oarava torepaveire oearovu voraro ora reopa tapiro vara iava siposipopaoro.

### *Oirato Uvuipa Ra Uririparo Kataitoa Ragapa* (Matyu 10:28-31)

4 ✧ “Vate irara oaa, visii tavipaavo oiso, Opeita voeao ragapa uriripata oea visii iava varaura raga kopii piepaiveira. Uva voea evoea viapau uvuipaai ra utupaua oavu avu vai ita puraive vo visii-ia. 5 ✧ Ari visii tavi iraoapaavo

rutu ro iava irapa uvuipatai ra rerapa uriri iraopata. Ro-ia Pauto irapa uriri iraopata. Ira uvuiparoi ra oirato kopii pie ovoireve. Uva toupai tapo rera vaaro gorua vore utupaua uva oirara vikirevere vore vuri tapi. Iu, eisi osa visii tavi iraoapaavo oiso, Eera irapa uriri iraoapata.

6 “Ari ita, taraipatai oiso, Oirara vo vavae kokio kare garepa kare voripaiveira aue-ia erao toea (2t). Osa Pauto viapau oisi iravire ovauparo eisi. 7 ✧ Ari ita, visii tokipaaro visii kukuearo iava oruara rutu vieireva. Uva va-a eva oa iava viapau uvuipatai ra uriripata. Visii vaaro voria vo kareo voriaro-ia putepaiveira garepa kare kokio kare. Eva-a oa vituaro iava Aite vearovira visii tokipareveira.

*Vo Jisas Iava Siposipopa Pitupitu Toupaiivoi  
(Matyu 10:32-33, 12:32, 10:19-20)*

8 ✧ “Visii tavipaavo oiso, Vosa irai ragai vaisiaro iava taviro vo oirara rutu osireiaro-ia oiso puraoro, Eera-a ragai reraaro Turaro. Oire uva ira-a eera vaisiaro iava taviraverea ita, ragai Oirato Oviitoaaro vo enselpa irara osireiaro-ia voeao Pauto voeao. 9 Ari ro ira ragaire isivaro vo oirara rutu osireiaro-ia, ragai tapo ita irare taru isivaraverea vo Pauto voeao enselpa irara osireiaro-ia.

10 “Ari ita, ro ira ragaire oavu takau vaisi purareve vuria, oa-a eva verarevere Pauto rera iava. Ari vosa ro ira Tugoropato Uraurato-ia takau vaisi purareve, uva va-a eva oa-ia Pauto viapau rutu oiso uvuipa ra evo vuri verareve rera iava.

11 ✧ “Oire vosa visii rovirieisa kortua-ia visii sipopaivere vorarore voea vo keparoaro-ia Sinagog. Ora vosa vorarore gavman irara osireiaro-ia ora reipa irara kort purasa visii sipopaivere uvare ragai sirova utupaveira, oire ra viapau oiso uriripata voeapa oiso rugorugooaaro, Apeisi ragavira reoara pukopaiovere? 12 Uvare vo vuutavi raga-ia Tugoropato Uraurato visii tavirevere vo reo iava oa-ia voea vo reoroaro pukosa auepata.”

*Reo Ruu Vao-ia Riro Monitoa Iava Oirato Ira Kokororoepa*

13 Oire uva iravu voea iava oirara ira Jisas-re oiso puraroepa, “Tisato, oiso ruipaparai ra araokotoa oaa taviri. Ra auero roo pierave varao aite varaaro. Oire ra ragaipa oarai vatereve.” 14 ✧ Oa iava Jisas rerare oiso puraroepa, “Irouto ragai reesirevora vei rovirieisa. Ora veipa auero roo piesa vei aitearo varaaro?” 15 Oa iava voeare oiso puraroepa, “Avoeao. Ora vatatopo iraopata. Ra vearovira rutu uutupata. Opeita orekerovu riiripata. Ari ita, ro ira riroara rutuva toupaveve orekerovu, oire uva uvuipa ra vara-ia riro kaekae tootoo tapo oupareve? Easi viapau!”

16 Uva voeapa oavu reo ruu vatereva Jisas. Oa-ia oiso puraroepa, “Aio kovo iravu riro monito oirato vaaro, okovoa rirovira aio puraera. 17 Osa iava ora rera raga sopaaro-ia oiso rugorugooaaroera, Eake vai puraa? Viapau oiso kepa vai ei ragai oaiaro oa uvuipai varao aioara gurusu oa-ia vara oriruoro. 18 Uva oiso puraroepa, Oiso ragavira va purapaavo. Vara rutu varao aio kitupa keparo pakopaavo vara rigaaro. Oire ra riroa rutu puraa va-ia vao. Ra va iava vara rutu witara guria voa ora varao vearovira ragai varaaro vo kepa-ia. 19 ✧ Ra ora ragai raga ora tavira oiso puraoro, Riroara rutu vearovira vii varaaro. Oara vearovira touvora riroara rutu-ia ivara voarire utupaua tapo uvuivira. Oire reareau aioparo,

✧ 12:7: Mt 12:12; Ap 27:34 ✧ 12:8: Mk 8:38; 2 Ti 2:12; 1 Jo 2:23 ✧ 12:11: Mk 13:11; Lu 21:14

✧ 12:14: Mai 6:8; Ro 2:1, 3 ✧ 12:19: Ekl 11:9; Je 5:5

ora ukaiopaoro tapo, ora roruvira touri. <sup>20</sup> ✧ Oa iava Pauto oiso puraroepa rerare, Auoro. Kokoropato-a vii, viigoa kopiipauvei vo rupao raga-ia. Osa vara rutupe varao oara vatatorivo. Oire uva iroutoa vai vii varaaro ourevere? <sup>21</sup> Eisi osa ragavira ita oearovu orekerovu rutu vo rasio raga iava voea varaaro gurupaiveira ora voeapa vo Pauto osireiario-ia. Vo osa Pauto voea vaisipareveira oiso, Apota irara raga voea.”

*Pautoa Raga-ia Raripasa  
(Matyu 6:25-34)*

<sup>22</sup> Oire uva Jisas ora rera voeaarore disaipel oiso puraroepa, “Osa-a eisi osa iava visii tavipaavo oiso, Opeita ora visii varaarore rugorugoopata rutu tootooara oiso purapaoro, Eake vai aiopaio? Ora eake vai-ia varaura oaio rakurakupaio? <sup>23</sup> Aioarei ora varoa viapau oiso uvuipai ra visiipa vearo tootoo vai vatepaive. <sup>24</sup> ✧ Oire voeaore kokio kare rugoopata oea viapau wit taraapaaveira, ora tapo viapau oiso aio gurupaaveira. Uvare viapau voea kepaa vaiaro aio gurupasa ora orekerovu oaive tovopasa. Ari ita, Pauto voea vatepareveira aioara. Oire uva visii oirara voriaro vo kare vo voriaro-ia putepaiveira rutu. Oa iava Pauto pute pievira visii tokipareveira. <sup>25</sup> ✧ Iroutoa vaiei visii iava ira uvuiparoi ra ivara vai sigusiguvareve ora rera vo tootoaro uvuio, vo rara rirovira rutu rugorugooparo ora rera tootoarore? <sup>26</sup> Oire vosa viapau uvuipatai ra oiso oavi gareavi vai purata ivara siguvapaoro, ra eakere riroara ruture vovousopata?”

<sup>27</sup> ✧ “Vearovira rutu rugoopata auere kokookoara oara ratau tou raga-paiveira. Ari ita, viapau oiso ora varapa kasivaripapeira kovopaoro ora rakurakupara vai turupaoro. Ari ita, visii tavipaa aue iava King Solomon riro orekerovu rutu-ia pituto, ira oisoa ora rera raga ora oritoparo tuariri rutu. Uva viapau oiso vearo oritoo vaiaro rera oiario vearoara rutu oiso osa varao-ia kokookoara. <sup>28</sup> Iu, isiso kouro toupai varuparo. Uva vokipavira vo kouro tosiivere vara vikisa tuituia-ia. Uva vara-a evara okouroa oritopareveira Pauto. Oire uva apeisi-a? Easi uvuiparoi Pauto ra oiso visii tapo orito iraopareve? Ari ita, oiraopavira viapau oiso uvuivira rutu raripatai rera-ia. <sup>29</sup> Eisi ra opeita rirovira rugorugoopata oiso, Eake vai aiopere, o eake vai-ia ukaioviovere? Ra varare taraapata. <sup>30</sup> ✧ Ari ita, rupa vovou irara oisi eisi oiso rugorugoopaveira varare varao. Va-ia vao taraiparoveira Aite oavisii ro vova vuvuiua oiso, Vosa viapau aioara vai, ra ogoepaoro kopiitavere. <sup>31</sup> Easi uvuipatai ra vao ruture rugorugoo iraopata Pauto vo Saraaro vare taraapasa. Ra va iava vara tapo evara vatereve visiipa.

*Vearopara Gurupasa Vo Vuvuiua-ia  
(Matyu 6:19-21)*

<sup>32</sup> ✧ “Opeita uriripata sipsip ragui ragai voeaaro. Ari Aite oavisii reo ovoi purareva rera vo Saraaro vatesa visiipa, oiso ra va iava oearovu oirara tokitavere voeapa reipaoro Pauto tapo toupao. <sup>33</sup> ✧ Ari auero rutu vateta oearoipa. Ra vara voriive. Oire voeao vateta vo moni oea apotapaaveira voea tavupaoro. Ra vaore moni bokis taraata oa viapau vuripapeira. Oire ra va-ia vearopara guruta vo vuvuiua varao oara viapau opesipape vo vuvuiua-ia. Aue iava uvare kavirupa irara viapau voare tutuu piepaiveira. Ora viapau rivute kare vara vuri piepaiveira voa. <sup>34</sup> ✧ Oire uva vo tavuki-a vao visii vaaro oa-ia visii varaaro vearopara toupavere, uva vo tavuki-a eva oa-ia visii vo vovouoaro toupavere veaoparare rugoopaoro.

✧ 12:20: Jer 17:11; Sam 39:6 ✧ 12:24: Jop 38:41 ✧ 12:25: Sam 39:5 ✧ 12:27: 1 Kin 10:4-7  
✧ 12:30: Mt 6:8 ✧ 12:32: Jo 21:15-17 ✧ 12:33: Mk 6:20 ✧ 12:34: Mt 6:21

### *Kovopa Irara Iava Voeao Oea Vatatopopaai Utupaoro*

<sup>35</sup> “Goruvira tuuta aue-ia takipa iroro. Oire ra vuravuara rukueta vatatopovira tuevira tousa. <sup>36</sup> Ra oiso rutu tuepaoro touta, Oea rore reito tuepaoro toupaivoi. Ira riroa iava riako oupa aio kareparoi. Oa iava rerare tuepai vo osá voava kareparo. Ra voava tupa totosa pouro viro. Oire ra rerapa karuive ikauvira. <sup>37</sup> Ra voava kareoro voea iare pouro viro osa torevira raga tupaive voea kovopa irara. Oire ra va iava rirovira rutu roruive. Ari ita, oiraopavira visii tavipaavoio oiso, Ora rera raga vaisiara vara piepaoro ro reito tuu iro goruvira takirevere. Oa iava voava voea tavirevere pausa tebol-ia. Ra rera raga voa voeapa aioara vatevatevere. <sup>38</sup> Ari vosa voki vuuta rutu-ia pou virooro urioro, eke vo osa rovo gau purapareve kookai, ra voea kekereve osa viapau uusipaave. Oire ra va iava roruive voea kovopa irara.

<sup>39</sup> ✧ “Vaore rugoopata vao-ia. Vosa rera ro ira vo kepaoro-a tarairo oiso, Vo voki-ia kavirupato urioparoi. Oire ra viapau oiso rera eaka ragaparevori osa vo kepai tateoro kavirusa koataparo. Viapau. <sup>40</sup> ✧ Oire uva visii tapo vatatopopatavere tuevira. Aue iava uvare Oirato Oviitoaro vo voki-ia uriorovere oa-ia viapau taraipata oiso, Vo voki-ia uriorovere.”

### *Veartoa Iava Kovopato Ora Iravu Vurito Kovopato (Matyu 24:45-51)*

<sup>41</sup> Oire uva Pita oiso puraroepa, “Turaro. Easi vii vao reo ruu vatepari igei ragapa, eke oirara rutupa tapo?” <sup>42</sup> ✧ Oa iava Jisas oiso puraroepa, “Easi, aa ro-a ro tokipato ira toupave vearo rugorugoo vaiva, ra va iava osivu avu rutu ora rera vo kovoroa tokipareve? Vosa ro ira oisi ragavira oiso-ia toupaveve, oire uva rera-a eera ira reesirevere reito rera voeaoro kovopa irara tokipasa. Ora voeapa aio vatepasa vo voea vo vuutaroaro-ia aiopa vuutaro. <sup>43</sup> Oire ra utupavira rera reitoaro vorevira vorero. Uva rera reraoro kovopato kekerevere, vo osa varao rutu purareve oiso osa rera tavireva voari tuariri. Oire ra va iava rorureve rera ro kovopato. <sup>44</sup> Oiraopavira visii tavipaavoio oiso-ia, Reito oaro oiso rera tovoreve auero rutu tokipasa varao rera varaaro. <sup>45</sup> Oire ra pasi ora rera raga sopaoro-ia rera ro kovopato oiso rugorugoo, Viapau uvuiparoi ragai reraoro reito, ra vorevira vorero ovoki-ia ikauvira. Oire ra va iava rovororo oearovu kovopa irara upopaoro. Ora aiarovu kovopa riako tapo upopaveve. Ra va iava rovororo aioa raga purapaoro, ora aue ukaiio spak vuri reoreoro raga purapaoro. <sup>46</sup> Oire vosa oisi piepareve osa rera ro reito vorevira vorero ovokivu-ia, ovusa vo voki-ia rera ro kovopato viapau rerare tuero. Vo voki-a vao oa-ia oisoa viapau rerare rugorugoo paoro toupaveve. Oire ra va iava rera ro reito rera vuri piereve rutu. Ra va iava vo vuri tapi rera tovoreve voea ruvara-ia oea viapau vearovira ora voea vo kovoroa tokipaive.

<sup>47</sup> ✧ “Kovopato oiso taraiparo rutu rera reraoro reito vo vovouaro-ia. Uva viapau rerare tuevira vatatoporoi, uvare viapau rera vo vovouaro sirova utuparoveira. Oire uva rera-a eera ira vurivira rutu uporevere taru reito. <sup>48</sup> ✧ Ari ro kovopato raga ira viapau oisoa taraipa vo reito vo ruipaoro-ia, oire ra oiso raga ita tarai asavira viapau vearo kovo vai purareve. Oire ra va iava oisivi raga ita gare visivi rera uporeve reito. Ora iroutoa rutu-a ro ira vearo taraiva toupaveve, ira ita uvuiparoi ra vearo kovo purareve rera vo taraiaoro oirao pieoro vo oearovu osireiario-ia. Ora vosa Pauto irai ruvara-ia

✧ **12:39:** Mt 24:43; Re 3:3, 16:15 ✧ **12:40:** Mt 24:44; Mk 13:33 ✧ **12:42:** Lu 7:13 ✧ **12:47:** Nam 15:30; Diu 25:2 ✧ **12:48:** Lev 5:17



oisi oiso oai riro kovo vai tovoreve oiso ra va purareve, oire ra utupavira Pauto oiso ruiparo ra vearoa vai kekereve vo kovo-ia vao oa tovoreva.

*Jisas Vo Kovoaro Oa Oirara Roo Pieva  
(Matyu 10:34-36)*

<sup>49</sup> “Urioraera tuituia kasisa vo rasitoa-ia. Uva oiso ruipaparai ra ikauvira vuvuoro vuriara rutu rovape vo rasio iava. <sup>50</sup> ✧ Oa vituaro iava oiso ruipa iraoaparai ra ikauvira baptaisa vai oua, ra vo tavakao opesipe vao oa ragaipa siitoka vatepaiveira. Obaptaisa iava sopau rirovira rutu ragai iava sirape. Ra vo tugurape uva opesipere vo sirao utupaua. <sup>51</sup> Esa pasi oiso vaio keapatai, Varao rutu upoara opesi piesa urioraera vo rasio-ia, raa? Viapau. Easi oiso oiraopavira visii tavipaavoi, Ragoa voea oirara oisi piesa urioraera, ra ora voea iava voearei puraive ora tokopaoro. Oa iava oeavu ragai vo rearo uvuive osa voea-ia oeavu raga viapau. <sup>52</sup> Vo voki-a vao oa-ia oira vavae toupavere katai kepa-ia. Oire uva voava ora voea-ia voearei puraivere ora voea-ia tokooro oiso, operuvavu aitereivuva ora upoave ragai iavirava. Osa ita aitereivu vo peruvava ora uposi ita. <sup>53</sup> ✧ Ora vo osa aite irara ovii irarava ora upoavere. Ovusa ita voea-ia ita ovii irara aite irarava ora upoavere. Osa ovii riako aako riakova ora upopaave. Ovusa aako riako ovii riakorova ora upoave. Ovusa oirato aakovaaro taatovava ora upopao. Ovusa oirato vatuavaaro oirava ita taatova oira ita ora upopao.”

*Vo Pitupituo Varao-ia Taraipasa Oara Karekesa Auepape  
(Matyu 16:2-3; Mak 8:11-13)*

<sup>54</sup> Oire uva Jisas oirara ruture oiso puraroepa, “Rukuta kekepataveira vo osa uriopaoi vova uva ravireo rokopareveira. Oire ra va iava ikauvira oiso purata, Kokeva kovesa auepaoi. Ari oiraopavira iria kovepaoi rara. <sup>55</sup> ✧ Oire uva oisosa kiuvu tapo sovopaooro oiso purapata, Ravireo rirovira kasiraoparoi rara. Ari ita, uva oiraopavira osa karekeparoveira eisi. <sup>56</sup> ✧ Avoeao! Riro ratarataa vovou irara rutu visii. E vearovira rasito vo reesiaro kekepataveira ora vuvuiua, raa? Oire uva apeisi iava viapau vo vokio vo reesiaro eveipata varao iava oara purapaavorao.

*Vo Toupai Ora Agiagipa Ro Tapo Irai Vii Iava Gasisa Aueparo  
(Matyu 5:25-26)*

<sup>57</sup> “Oire eakere visii raga vearovira rutu rugurugoo rovo asapataveira. Ra va iava viapau torevoko rugooro rovirieipata varao purapaoro? <sup>58</sup> Vosa tovira raivaaro vokapaoro avapasi ro tapo ira vii iava gasireve, oire ra raivaaro raga tousi. Oire uva vo vuuta-a eva oa-ia uvuipau ra rera tapo vorevira ora agiagiu. Teapi rera eera viiva avaro reo rovirieipato vavaeoro-ia vii tovosa. Oa iava vii vatevere polis irarapa. Oire evoea vii tovoive tuukepa kepa-ia. <sup>59</sup> ✧ Oiraopavira visii tavipaavoi, Viapau rutu uvuipauei oiso ra ikauvira tuukepa kepa iava kosi virou. Ari vo raga rara varavio rutu garepa pitupituro vuriara vori rovori. Ora varao riropara varao rutu oara voriaro opesi pie rovorivere rutu.”

## 13

*Ro Ira Iava Sopau Viapau Pore Piro Ira Opesirovere*

1 ✨ Oire uva ovokivu-ia oevu oirara toupaiava oea Jisas tavipaiva oevu iava Galili iava, oea uporeva Pailat voea iava revasiva karasa. Oa iava oira uverereva varao tapo oara-ia Pautoa-pa koruoua purasa auepaaepa voeao Jiu-pa irara. 2-3 ✨ Uva Jisas voea vo rearo aatooro oiso puraroepa, “O ita, oiso rugoopataveira, Voeao raga pute pievira vuri vovou purapaiveira oea rirovira tavaka siraoro oupaiveira oiso rutu osa voeao oea uporeva Pailat. Ovusa oevu oea vearovira toupaveira viapau vuri vovou purapaiveira. Uva visii tavipaavo, Viapau torevokopai evo rugorugoo, uvare vaeapai voeare rutupa. Oa vituaro iava uvui iraopaai ra vovouisi oaive poreive Pautoa iare. Oa vituaro iava vosa viapau visii vao sopaura oavisii poreta vova vuri vovouro oavisii iava, oire uva va-a eva oa vituaro iava visii rutu opesitaverea taru oisi raga ita eisi. 4 ✨ Oire voeao-ia katai tau vo peva vatara (18) rutu oirara voeao-ia oea rakuva riro kaekae kepa koveoro vo uuko rovu vaturo-ia vao Siloam, oa iava kopiiiaepa. Oire uva apeisi rugoopatai? Voea vo vuriaro oearovu vo vuriaro-ia putepaivoi voeao oea epao Jerusalem-ia, uvare oisi raga kopiiiaepa, raa? 5 Torevokovira visii tavipaavo oiso, Viapau rutu. Ari ita, vosa viapau visii vao sopaura oavisii poreta vova vuri vovouro, oire uva va-a eva oa vituaro iava visii rutu opesitaverea taru oisi raga ita eisi.”

### *Reo Ruu Vo Evaio Iava Oa Viapau Aio Kuero Vai Purapaive*

6 ✨ Oire uva oavu reo ruu kosi piereva oa-ia oiso puraroepa, “Travu oirato varuparo fik ova paureva wain kovo-ia rera vaaro. Uva utupavira urioroepa vo eva kekesa, oiso ra aio kue vai kekereve vo osa viapau oiso kuepape vo eva. 7 ✨ Oa iava rera roari vo kovo tokipato tavireva rera ro reito oiso puraoro. Uvupari? Vo peva rutu-ia aue iavaara oara sovara-ia oisoa urio ragapara vo eva ivia ragapasa, osa viapau aioara vai vo eva-ia. Oire uva vii taviipaavo ra vo eva toeri. Eake iava? Uvare rasia goruaro opesi pie ragapaiveira. Osa viapau aioara vai vo evao iava toupai. 8 Oa iava ro kovo tokipato oiso puraroepa, Reito, eaka vovou. Ra vo eva vituaro eri rovoavere bulmakau opokoaro tovo rovoosa vao gorua vatepasa. 9 Easi pasi, uvuipai ra oiva-ia kuepe vo eva vao. Vosa viapau, oire ra vo eva tateri.”

### *Iriavu Riakova Iria Ravotovira Porete Piereva Jisas Sabat Voki-ia*

10 Jisas ovokivu-ia Sabat voki voeapa siposiporeva Reo Taisi Uvupa Kepa Sinagog sovara-ia, 11 ovusa voa iriavu riakova toupaveira iria-ia vurito tugarato oisoa toupaveira. Oire uva oira-ia oisoa tupaoro oirapa riroa upia rutu oisoa vatepareve katai tau vo peva vatara (18) ivaro rutu sovara-ia. Uva va-a vao oa iava oira iava avuava puko piropa. Osa iava viapau oisoa torevokovira torepao. 12 Oire uva Jisas oira kekereva. Oa iava oirare oiso puraroepa, “Vii iava upia opesi pieavo.” 13 ✨ Uva oira kukuearo-ia vavae toveveva. Oa iava ravotovira raga torevokovira tore ovoioapa. Osa iava Pautoa-ia vuurapa vaisi pura ovoieva. 14 ✨ Vo osa ro ira oisoa Sinagog-ia reiparo rirovira rutu kasipu iraoparoepa, uvare Jisas vo voki-ia vao oa puraveva oira ravotovira porete pieoro. Oa iava oiso puraroepa reito voeare, “Ari katai vatara (6) voki-ro toupai visiipa kovopasa, ovokiroa-ia uriopata ruvarupa tauva oupasa. Uva viapau uvuipatai ra vore uriopata varao purapasa vo vokio-ia vao Sabat voki.” 15 ✨ Oa iava reito vo rearo pukooro oiso puraroepa Jisas, “Avoeao! Riro ratarataa vovou irara rutu visii.

✨ 13:1: Mt 27:2 ✨ 13:2-3: Jo 9:2-3 ✨ 13:4: Lu 11:4 ✨ 13:6: Mt 21:19 ✨ 13:7: Mt 3:10, 7:19; Lu 3:9 ✨ 13:13: Mk 5:23 ✨ 13:14: Eks 20:9; Lu 6:7 ✨ 13:15: Lu 7:13

*Easi Sabat Vokiro-ia avapataveira bulmakaupa kepa iare vo karere karupasa voeaore bulmakau kare, ora aue donki kare tapo auere vo kare ukaio piepasa, eke?* <sup>16</sup> ✧ Ari o-ia riakova eira iriavu aue Ebrahim aovaaro Jiu-pava, iria tuukereva Seten aue rutu uvuiaro-ia katai tau vo peva vatara ivaro (18). Oire uva va-a eva oa iava oira iava vo tuuke karuavo oira porete piepaoro vo vokio sovara-ia vao Sabat voki. Uva apeisi-a? Oira-ia vuria puraavo?" <sup>17</sup> Oire uva oisi-a eisi osa puraroepa. Oa iava voeao rerava keripa irara rirovira ariiaepa rutu. Osa oirara rutu rirovira roru irapoai va varu rutu-ia varao vearopara oara oisoa purapareve.

*Reo Ruu Mastet Kuearo Iava Ora Aue Yis*  
(*Matyu 13:31-33; Mak 4:30-32*)

<sup>18</sup> Uva va-a vao oa iava voea oirara akereva Jisas oiso, "Aa vao oiso toupai Pauto vo Saraaro?" <sup>19</sup> Oa-a eva oiso rutu toupaveira, Oavu aio kue oa vaisipaiveira oiso, mastet. Oa iava aisivu oureva gare isivi rutu iravu oirato vaisi pausa varuparo vo ora rera vo kovoaro-ia. Oa iava voa rirovira rutu riroepa oiso osa evaova. Uva va iava oisoa kokio kare vo eva raoaro-ia pitupaoro epitapasa uriopaave voa."

<sup>20</sup> Oire uva Jisas oiso ita puraroepa, "Apeisi ragavira vai uvuiparai ra Pauto vo Saraaro ovoovoa? Eake vai-ia?" <sup>21</sup> Oa oiso toupai osa aue yis. Vao yis oa oueva iriavu riakova aue tapo plaua dram va uveresa. Oa iava utupavira va vao plaua kae piropo riropaoro."

*Gareavi Rataoa*  
(*Matyu 7:13-14, 21-23*)

<sup>22</sup> ✧ Oire uva Jisas vokapaoro avaroepa ouruirovu-ia reipa uruiro ora varao tapo garepa uruiro. Oirara rutu tarai piepaoro vokapaoro avaparoepa. Uvare oiso vovouparoepe ra Jerusalem-ia kare uviroro. <sup>23</sup> Oa iava iravu oirato oiso rera akereva, "Turaro. Esa Pauto katakataipa iraravi vai vorevira ourevera ora rerapa pasi, raa?" Oa iava Jisas oiso rerere puraroepa, <sup>24</sup> ✧ "Ora visii vo vovouaro goru pie iraota. Oa iava uvuipatai ra vaovio gare ratao-ia koatata Pauto vo Saraaro iare taru. Visii tavi irapoavoi oiso, Riro irara rutu oiso ruipapaave oiso ra koataave, vo osa viapau uvuipaa. <sup>25</sup> Ari ita, vo utupaua uva ro ira vo kepaoro-a ira rataoa tuparevera. Oire ra ratau torepasa uriota vo ratao totopaoro. Uva oiso purapataverea, Reito. Rataoa karuri igeipa. Osa iava oiso visii akerevera, Ovu iava visii? Viapau visii-ia taraiparai. <sup>26</sup> Oire ra oiso purapata, *Easi igei vii tapo aioiovora ora ukaioiera, vo uva igei vo uruiaro vuutaaro-ia torepao igeipa siposipoparivora.* <sup>27</sup> ✧ Oire uva visiire oiso puraroverea, Avoeao! Ovu iraova visii? Viapau visii-ia taraiparai. Visii-a riro vuriera pura irara. Visiigoa ragai ruvara iava vova avata. <sup>28</sup> ✧ Oire uva voeao Ebrahim vase ora Aisak ora Jekop, ora voea rutu reo topa piepa irara profeta irara oea rutu keketaverea, ovusa Pauto vo Saraaro-ia toupave. Ovusa visii raga ratau toupata ora visiipa vuvivira rutu gaupaoro, ora visii iava reuri oavisii raga kuripaoro siraovira. <sup>29</sup> Vo osa oirara rutu vorarova rutu vo rasio-ia ora aivaro piesa urioaverea pauoro vo Pauto vo Saraaro sovara-ia aiopara vearotoa-ia tebol. <sup>30</sup> Ari ita, uva voeao oea visii sirova oisoa utupaave, evoea oea visiipa iraverea vo Pauto vo Saraaro sovara iare. Ovusa voeao oea visiipa oisoa irapaave, oea taru visii sirova utuaverea."

*Jisas Gaureva Jerusalem-pa  
(Matyu 23:37-39)*

<sup>31</sup> Oire uva vo vuutavi raga oa-ia torevokovira urioaepa Farisi oiso rera tavisia, “Avau vova uvai ragare. Ari King Herot vii uposa aueparoi.” <sup>32</sup> ✧ Oa iava Jisas oiso voea tavireva, “Voreta oiso rera tavisia Herot ro ira vuri rugoo purapareveira kaakau aakauto. Uvuri! Vo vokia-ia ora vokipavira uva vuri irara tugara kosi pieavere, ora upiapa irara porete piepaavere. Oire uva vo pevapa voki-ia ragai vo kovoaro opesi pieavere. <sup>33</sup> Ari ita, vo vokio ora vokipavira ora vo vokipari-ia utupa uva vokapaoro avaravere Jerusalem iare. Aue iava uvare voeao vo kovoaro-a profet irara upopasa oea Jerusalem-ia toupaiuveira. Teapi oeai raga ragai upoive ourui raga-ia.

<sup>34</sup> ✧ “Ae! Visii vao Jerusalem vata! Ae, Visii Jerusalem vata! Visiigoo profet irara upo iraopataveira. Ora voeao vuroko iraopataveira aue-ia avekeara Pauto oea sipo ragapareveira visii iare. Visii ovii iraraaro-ia guru ruipa ragapaaveira oiso osa kokootu ovii irara tavurupaaveira putaeuarei-ia. Vo osa visii vao reasipataveira ragaipa. <sup>35</sup> ✧ Uvuta! Pauto visii vo uruiaro kavurevoi. Uva oisi-a eisi osa iava visii tavipaavo, Viapau oiso ragai keketaverea vorevira vo rekasisa utupaua, uva oiso purataverea ragaire ragoa roporeva Pauto, Pauto vearoo viraakoa vatereva ropa ira urioroi Turaro vaisiario-ia.”

## 14

*Iravu Oirato Ira Iava Varaua Rutu Tuvuupepa Ira Vorevira Porete Piereva Jisas*

<sup>1</sup> ✧ Uva ovokivu-ia Sabat voki Jisas aiosa avaroepa iravu vo kepaaro iare ro Farisi reraaro reito. Osa voa Jisas siitueiva kasikasi pievira. <sup>2</sup> Oire uva iravu oirato ira iava varaua tuvuupepa rera ruvara-ia toupaveira. <sup>3</sup> ✧ Uva Jisas rera kekeoro voeao Reo Taisi-ia tarai irara akereva voearei rutu ora ratarataa vovou irara Farisi oiso, “E pasi, uvuipaviei ra Sabat voki-ia upiapa irara ruvarupape, eke viapau?” <sup>4</sup> Uva ora tape pieaepa. Osa iava rera oureva. Uva rera vorevira ravotovira porete piereva. Oa iava rera iava vasereva. Uva avaroepa. <sup>5</sup> ✧ Oire uva oiso voeare puraroepa, “Vosa irai oviitoa vaiaro visii iava, eke bulmakau vai kove rikui vai-ia uukopava vai, oire ra viapau pasi ikauvira rera vorevira kae piereve vo voki-ia vao Sabat voki, raa?” <sup>6</sup> Oa iava ariipaoro viapau rera vo reoaro vao aatoiva.

*Ro Ira Ora Rera Raga Ora Akaipa Pieparo*

<sup>7</sup> Oire uva Jisas voea siituepareva, ovusa vo aio iare urioaepa varao raga-ia rovopara paupasa paupara. Osa iava voeapa oavu reo ruu vatereva. Oa-ia oiso puraroepa, <sup>8</sup> ✧ “Vosa irai viire keeraro kaokaooro, oire ra avau vao iare riako oupa aio. Ra viapau oiso paupau vao-ia rovopa paupa. Auepa teapi rera ro iravure ita keerarovere, ro rei vaisitoa rutu ro ira vii vaisiario-ia pute pievira toupaveira. <sup>9</sup> Oire ra rera ro ira veire keeraro ira urioro oiso puraoro viire, Evoava rovopa-ia paupa verau eerapa. Ra va iava rirovira rutu ariioro vuria-ia pausa rereri. <sup>10</sup> Ari vosa irai viire keeraro, oire ra avau vo aio iare. Ra isivauaro rutu pauu. Oire vosa oisi pieri, ra rera ro ira viire keeraro urioro viire oiso purasa, Vatetoa oaa, uriou vo pausa viara-ia ragai ruvara-ia. Oire ra oisi vii piereve oiso-ia. Oa iava uvuipau ra riro vaisi rutu

✧ **13:32:** Hi 2:10, 7:28 ✧ **13:34:** Mt 23:37-39; Lu 19:41 ✧ **13:35:** Sam 118:26; Mt 21:9 ✧ **14:1:** Mk 3:2 ✧ **14:3:** Mt 12:10; Mk 3:4 ✧ **14:5:** Eks 23:5; Lu 13:15 ✧ **14:8:** Pro 25:6-7

ouri vo oirara rutu osireiario-ia voeao oea tapo aiopari. <sup>11</sup> ☆ Ari ita, vosa ro ira ora rera raga vaisiario kae piepareve, uva rera-a eera Pauto ira vaisiario akaipa piepareve. Osa ro ira ora rera vaisiario akaipa piepareve, eera-a Pauto ira vaisiario kae piepareve taru.”

### *Oirarare Kaokoapa Vo Aioa Iare*

<sup>12</sup> Oire uva Jisas oiso puraroepa rerare ro ira rerare keeraroepa vo aio iare, “Vosa oai aioa vai purarivere, ra viapau oiso ora vii vate iraraarore keerau, ora araoko irara vai oara, ora vii sara irara vaiaro, ora oearoi vii iavapa irara vai voearo riro moni irara. Auepa teapi vorevira viire keeraave, ra avau voea vo kepaaro iare aiosa. Oire ra vo aio vao vii vaaro kare pieve viipa vorevira. <sup>13</sup> Viapau. Ari vosa oai riroa vai purari aioa vai. Oire ra voeare apota iraravi keerau, ora voeao vuri vara irara, ora voeao vuri kokoto irara, ora voeao voosi irara. <sup>14</sup> Oire uva voea-a evoea oea viapau uvuipai ra viipa oaioi puraive vo aio kare pieoro oa purarivora voeapa. Ari ita, uva oisi-a eisi osa iava uvuipau ra roru iraopari. Eake iava? Uvare Pauto viipa vo aio vao purarevira vo vokio-ia oa-ia voeao torevoko irara torevoreva vova tova urui-ia.”

### *Reo Ruu Vao Riroa Iava Aioa (Matyu 22:1-10)*

<sup>15</sup> ☆ Uva va isivaaro iava iravu voea iava voeao oea rera tapo aiopaiva ira vo reo vao uvureva. Oa iava rerare Jisas oiso puraroepa, “Ro ira Pauto vo Saraaro sovara-ia paupaoro aioparevira, ira uvuipa ra roru iraopareve.”

<sup>16</sup> Uva Jisas rerare oiso puraroepa, “Iravu ira riroa aioa purasa aueparoepa. Oire uva va iare riro irarare keeraroepa kaokoaro vo aio iare oiso ra urioave. <sup>17</sup> ☆ Oire uva vo vuuta rutu-a vao vo aio vaaro oa karekeepa. Oa iava voeare rera voearo arureva kovopa irara, oiso ra voeare avaaave oearo kaokaoa pura rovopareva. Oa iava oiso voeare puraepa, Uriota aiosa. Ari auero rutu vatatopoe. <sup>18</sup> Uva voea rutu vaea reo raga ita purapaiva oiso, Viapau uvuipai oiso ra evo aio iare avavio. Oire uva va-a vao oa-ia iravu oiso puraroepa, Oavu aio kovo voriaivo. Vearovira rutu ari viapau uvuiparai ita ra evo aio iare uriora. Uvare oiso ruipaparai vo kovo keke rovosa ava rovora. <sup>19</sup> Ari iravu oiso voea tavireva, Ari ita, katai tau voriaivo aue bulmakau kovopa kare. Oire uva oiso vovouparai ra voea akeakesa avara. Vearovira kaokaoa-ia. Ari viapau uvuiparai oiso ra evo aio iare uriora. <sup>20</sup> ☆ Uva ita, iravu voeare oiso puraroepa, Ari ita, vaviopavira raga riako ourai. Oa iava viapau uvuiparai ra uriora evo aio iare.

<sup>21</sup> “Oire uva oisi-a eisi osa iava kovopa irara vorevira reito tavisa va iava vao-ia. Oa iava rera ro ira vo kepaaro-a rirovira rutu kasipuparoepa. Uva oiso kovopa irara tavireva, Ikauvira avata oiso ragavira riropa raivaro iare, ora varao garepa raivaro varao vorarore riropa urui sovara-ia. Voeaore avata apota irara rutu, ora voeao vuri vara irara, ora voosi irara, ora voeao vuri kokoto irara. Oire ra voea rutu koata piesa uriota vo ragai vo kepaaro-ia. <sup>22</sup> Oa iava voea voeao kovopa irara oiso puraepa, Ari ita, reito vii vo rearo puraiovara. Ari touvira oaravu-a varao paupa tavukiro viapavira.

<sup>23</sup> “Oa iava ita rera ro reito voea tavireva oiso, Avata vorarore riropa raivaro, ra vao kasuraara gaeta varao aio kovoro. Oire ra voava voea rutu ivuoro voreta voea koata piesa vo-ia ragai vo kepaaro. Uvare oiso ruipaparai ra ragai vo kepaaro agasipe rutu. <sup>24</sup> ☆ Uva oiso visii tavi iraopaavoi, Voeao

iava oeare keera ragaraerao oea viapau rutu uvuipai ra vo aio ouive ragai vaoro.”

*Vearovira Rutu Rugorugoo Rovoparo Ra Jisas Sirova Uturo  
(Matyu 10:37-38)*

<sup>25</sup> Riro irara rutu Jisas tapo vokapaiva. Uva voeare ora poreoro oiso puraroepa, <sup>26</sup> “Oire vosa ro ira ragai sirova utu ruipaparo, oire ra aیتوآرهیره isiva rovoro ora aakova, ora riakovaaro, ora kakae vurearo, ora araako iraraaro, ora taataa riakoaro, ora vao tapo rera vo tootooaro raga. Vosa viapau oisi pie rovoreve ragaire pute pievira rugoopasa, oire uva viapau oiso rera-a eera ragai reraaro-a disaipelto. <sup>27</sup> ✧ Ora ro tapo ira viapau ragai sirova utuoro ora rerapa evao parikou aue siraoa vo tavakaaro kaereve. Oire uva rera-a ita eera viapau oiso ragai reraaro-a disaipelto.

<sup>28</sup> “E apeisi-a? Vosa irai visii iava riro kaekae kepa vai pausa aueparovira viara-ia ruture. Oire ra pau rovoparo vo kepa voriarore vearovira rutu rugoo rovopasa oiso rugooparo, Esa ragai vo moniaro uvuipai avu ra va-ia vo kepa vao opesipe, eke viapau? <sup>29</sup> Vosa viapau oisi vo kepa pie rovoreve, ra va iava utupavira simen tovoreve. Oire ra viapau oiso ikavira vo kepa opesi pierere. Ra ita, riro irara rutu rera agesipaoro rera tovipaive. <sup>30</sup> Ra oiso puraave, E rera-a ro ira vo kepa rovorevoro? Uva apeisi viapau vo kepa opesi pierervo?

<sup>31</sup> “Ora vosa irai king vai irava ita king vai ora uposa avaro. Oire ra oiso pau rovoro vearovira rutu rugorugoo rovosa. Aue iava uvare rera voeaaro-a katai tau tuku rutu (10,000) viurupa irara voeao rera voeaaro. Vo osa roari iravu erao tau tuku rutuva (20,000) urioro voeao rera voeaaro viurupa irara. Uva va-a eva oa iava vearovira rutu oiso ora rugorugoo pie rovosa pauro oiso, Esa pasi uvuiparai ra rera roari king upoa rera siuro, eke viapau?

<sup>32</sup> Ari vosa oiso rugooparo, Viapau uvuiparai. Ra va iava rerava keripatoapa tauavira toupave. Oire ra va iava oearovu arupareve rera iare roari rera arepasa, oiso ra vearo reoa vai purasi vo upo opesi piesa.

<sup>33</sup> ✧ “Osa raga ita oiso-ia, vosa irai visii iava vearo rugoo-ia varao ruture rera varaarore isiva rovoparo vara iava vase rovoparo, oire ra oiso toupave, Ragai reraaro disaipelto.

*Vo Toupai Avaka Iava Uvakoa  
(Matyu 5:13; Mak 9:50)*

<sup>34</sup> “Avaka vearoa rutu. Ari vosa va vo sipeiaro opesipe, ra uvuipai ra oai purape vare? Ra oai iava vovira sipeipe, raa? <sup>35</sup> ✧ Vo avaka vao-ia oiso-ia, oa-ia viapau uvuipaviei ra va tovopape varuparo aue tapo hulmakau eekoaro vao uvereparo, auere gorua vatepasa rasiapa. Oire ra va iava avaka vera ovoiiive. Ari vosa ro ira-ia kokito toupave, oire vo siposipo orirureve va kuvereparo ora rera sopaaro-ia.”

## 15

*Reo Ruu Sipsip Iava O Iria Opesikoopa  
(Matyu 18:12-14)*

<sup>1</sup> ✧ Takis oupa irara ora oearovu vuri irara oearea rutu Jisas iare urioaepa rera vo siposipoaro uvusa. <sup>2</sup> ✧ Uva va-a vao oa iava ratarataa vovou irara Farisi ora voeao tarai irara Reo Taisi-ia oearea rutu rirovira kasipu

✧ **14:27:** Mt 16:24; Mk 8:34; Lu 9:23 ✧ **14:33:** Fl 3:7; Hi 11:26 ✧ **14:35:** Mt 11:15 ✧ **15:1:** Lu 5:29 ✧ **15:2:** Mt 9:11

iraopaaepa oiso purapaoro, “Rera-a ro-ia vuri irara vatetoaaro. Ira voea tapo aiopareveira.”

<sup>3</sup> Uva oisi-a eisi osa iava vao reo ruu vatereva Jisas voeapa. <sup>4</sup> “Vosa irai visii iava oaiaro aue katai novoto vai (100) sipsip. Oire vosa iriai voava opesikoo. Oire ra rera ro ira vo raguiaro-a aue raga kavureva vo resura vatara tau vo resura vatara (99), ovusa aiopaive toupaooro uvavivu. Osa avaro oirare o taraasa sipsip iria opesikoo. Osa iava oirare voraro kasivarivira taraapareve. Ra vova oira oureve vorevira. <sup>5</sup> Oire vo osa oira ouro, ra oira kaverukopaooro vorevira karero oira-ia rorupaoro. <sup>6</sup> Oire ra ora rera vo kepaaro iare urioro oirava. Ra voava ora rera iavapa irarare keeraro voeao rera vate iraraoro. Ra voava urioave ora gurusu. Oa iava voa voea tavireve oiso, Ragai tapo rorupata. Uvare iriavu sipsip ragai oiraoro opesikoora virataoro. Oa iava oirare taraaavo vorevira oira ousa. <sup>7</sup> ✧ Uva oisi-a oiso osa visii tavipaavo, Oiso osa raga ita vuvuiua-ia rorupaiveira oearovu-ia oirara oiso, Voea torevoko vovou irara vo resura vatara tau vo resura vatara (99). Aue iava gareara voea varaaro vuri vovouro. Oire uva vara iava vorevira porepaa virove sopaura oaive iava. Ari ita, vosa irai vuritoa vai iava sopaua vai oisi oiso vorevira pore piro, oire ra va iava riroa rutu rorua karekepe pute pievira vuvuiua-ia.

### *Reo Ruu Moni Iava Vao Oa Opesikoepa Voraro*

<sup>8</sup> “Vosa iriai riakova oaiaro katai tau (10) aue monia vai. Oire ra utupaua aisivu voava monia-ia opesikope. Ra vaisire vuravu rukueeve vo aviavia kepa iava vearovira rutu viousa vuravurapaoro. Oire uva vaisire taraapaeve vo tugurasu uva vaisi kekeoro vaisi oueve vorevira. <sup>9</sup> Oire vaisi ouoro keerao oearovure voeao oira iavapa irara. Ra va iava urioave oira ruvara-ia ora gurusu. Ra voa voea tavieve oiso puraoro, Ragai tapo rorupatavoi. Uvare aisivu moni isi ragai vaisiario opesikoera. Uva taraaavo vaisire, oa iava vorevira vaisi kekeavo. <sup>10</sup> Uva oisi-a eisi osa raga ita Pauto voeao purapurapa irara ensel rorupaiveira, vo rara kataitoavi raga vuritoavi vorevira ora rera iava sopauaoro poreveve.”

### *Viovakoto Ira Aiteto Kavureva*

<sup>11</sup> ✧ Jisas oiso puraroepa, “Iravu oirato ira-a vaiterei oviitoarei. <sup>12</sup> ✧ Uva kikooto oiso puraroepa, Aite. Ragai vateri varao oara iava ragai taviriva oiso, Veipa oiso varao roo piea vovio utupauavi. Oire ra ragai oai oua, rara ragai vateri oai. Uva vearo vaisi purareva aiteto. Oa iava vara rutu roo piereva vaitereipa. <sup>13</sup> Ikauvira raga rera ro kikooto auero rutu gurureva ora rerapa. Oa iava varava ouruivu iare tauai rutu avaroepa. Osa iava vara rutu moniara oisoo viki ragapareve opitupiturovu rutu-ia vuriara. Uva oisi-a eisi osa oisoo piepareve rera ro kikooto. <sup>14</sup> Oire uva vara rutu moniara varao vikireva. Uva va-a vao oa iava ogoeto karekeroepa voa vo taere sovara-ia. Uva viapau monia vai rerapa vao rera tauvapasa. <sup>15</sup> Osa iava iravu ruvara-ia kovo ousa avaroepa voava rera vo taere-ia. Uva vuri kovovi raga iare rera siporeva vo ora rera vo rasiaro iare, oiso ra koie ragui tokipare voa. <sup>16</sup> Uva oevavu kuearo iava eva ova vo ragui oisoo aio piepareve, uvare vo ragui raga vaaro-a aioa. Oire uva oisoo rera tapo oiso ruipaparo ra vo ragui tapo aiopareve. Uvare viapau irai rerapa aio vatepasa.

<sup>17</sup> “Uva va-a vao oa iava rera rugorugooa karu piropa. Oa iava oiso puraroepa, Aite voeao kovopa irara oea riroa rutu aioara aiopaooro toupaveira. Ari vo uva toupavao uva vuri iraorai ogoetoa iava. <sup>18</sup> Eagara,

uvava vo kareparai aite iare. Ra oiso rerare purara, Aite, asi Pautoa-ia vuria puraavora ora vii-ia tapo. <sup>19</sup> Uva viapau oiso vearoto-a ragai, ra oiso ragai vaisipari, Vii oviitoaaro ragai. Viapau. Ari ragai tovopari oiso, Iravu ragai viipa kovopato. <sup>20</sup> ✱ Oire uva voava kareroepa rera iare aiteto.

“*Oa iava tauai rutu urioparoepa, osa aiteto rera tuereva. Uva va-a vao oa iava aitetoa iava rirovira rutu sopaua sirao iraepa. Uva voava ikaureva oviitoa-ia pitu ovoisa. Oire uva rerava uugaa ovoiroepa.* <sup>21</sup> ✱ Oa iava oviito oiso rerare puraroepa, Aite. Ragai Pautoa-ia vuria puraavora ora vii-ia tapo. Uva viapau oiso vearoto-a ragai, ra oiso ragai vaisipari vii oviitoaaro ragai. <sup>22</sup> Oa iava aiteto rera voeaaro kovopa irara tavireva oiso, Roari rovopato kuvuto ragai reraaro ouoro uriota ikauvira, ra rera-ia rera kuvuta. Ring vai tapo rera sipareoaro-ia tovopatavoi. Ra va iava vorevira reesia oureve oiso, Ragai oviitoaaro-a rutu. Ora tasiparei vai rera kokotoaro-ia tapo tovopatavoi. <sup>23</sup> Ra taoropa koruou vai bulmakau upooro oaiva tapo uriota. Ra oai aiopaoro rera tapo *rorupe.* <sup>24</sup> ✱ Eake iava? Uvare rera ro ira opesikoroepa oiso rutu osa kopiito ragai oviitoaaro. Oire uva vo vokie vorevira ita ira tootooroi. Ira-a ro opesikoroepa. Oa iava vorevira rera kekeoro rorupai ita. Osa iava rovoaepa rera tapo aiopaoro rorupaoro.

<sup>25</sup> “*Vo ovusa avaioto varuparo toupaveva kovoa-ia. Uva voava kareparoepa. Oa iava kepa iare kare uviro tutuuroepa. Uva voava pupi guruko uvureva ora aue raurauara.* <sup>26</sup> Uva va-a vao oa iava iravure kovopato keearoepa oiso rera akesa, Eake-a vao oa purapai? <sup>27</sup> Uva oiso kovopato rera tavireva, Ari vii araokotoaaro ira vorevira karero viroi. Oa iava aiteara taoropa koruou uporevo aue bulmakau. Uvare rera iare vorevira voreroe oviito, osa viapau oiso oavu avu vai vo rera varaaro-ia. <sup>28</sup> Uva va-a vao oa iava avaioto rirovira rutu kasipu iraoparoepa. Osa iava reasiparoepa koata arapa. Oa iava aiteto kosiro viropa rera vovuaro vuavua piesa rerare kavevira ora reoro. <sup>29</sup> Uva aiteto vo reoaro pukooro oiso puraroepa avaioto, Ari ita, riroara rutu-ia ivara vii vo kovoaro-ia pitu ragapaaveira oiso rutu osa ro kovopato akukutoavi. Osa viapau ovokivi-ia vii varaaro-ia reo goruro tagaupaa vara gasipaoro. Uva va-a eva oa iava viapau ragaipa oavi meme kakae vai vatepariveira, oiso ra ragai voeaaro tapo vate irara oaa rorua oai aiooro. Osa viapau rutu. <sup>30</sup> Vo osa eera oviito oara vii varaaro rutu opesi pie ragaparevora vairoropa otopa riako. Oa iava vorevira kareroi. Uva rerare rugooro rerapa taoropava bulmakau uporivoi.

<sup>31</sup> “*Oa iava aiteto rerare oiso puraroepa, Oviitoa oaa. Vokiara rutu-ia toupaveira vegei rutu. Osa iava auero rutu-a varao vii varaaro vo ragai vo kepaaro sovara-ia.* <sup>32</sup> Uva vo vokie-ia roru iraopai, auere ra vigei iava sopaura vearope rorupaoro rera-ia ro araokotoa oara. Ira opesikoroepa rutu oiso rutu osa kopiito. Oa iava tootooroi. Osa iava vorevira rera kekepai ita.”

## 16

### *Tokipatoa Iava Ira Oisoa Vuri Kovo Purapareve*

<sup>1</sup> ✱ Oire uva Jisas ora rera voeaaro disaipel tavireva oiso, “*Iravu riro monito ira reraaro kovo tokipato oisoa toupaveve. Uva oearovu rera iare ro riro monito urioaepa. Oa iava rera ro kovo tokipato togapaiva oaravua-ia reoara. Varao oara-ia oiso purapaaepa, Eera vii reraaro kovo tokipato ira*



*auero rutu viki ragapareveira.* <sup>2</sup> Oa iava rerare keeroepa ro kovo tokipato. Uva oiso rera akereva, Auoro. Apeisi ragavira vii iava uvuavo? Avau auero rutu torevokovira veisa, varao oara oisoa oupari oevu ruvara-ia, ora varao oara oisoa vikipari oaravu voripaoro ragai varaaro. Uva viapau rutu uvuipauei oiso ra vorevira kovo tokipau.

<sup>3</sup> “Oire uva rera ro kovo tokipato ora rugorugoo pie iraoparoepa vo ora rera raga vovouaro-ia. Oa iava oiso puraroepa ora rera ragare, Esa eake vai purapaavo? Uvare reito ragai sigurevoi vao iava kovo tokipa kovo. Viapau rutu ragai-ia gorua vaiei vo aio kovo vai purapasa. Ora rirovira rutu arii iraoparai oearovu goruvira are arapa auere aioara vai. <sup>4</sup> Oire oavure rugoorai. Vosa va puraa vao-ia, ra va iava ragai ou piepaive vorarore ora voea vo keparoaro-ia, vo rara reito ragai verareve. <sup>5</sup> Oa iava katakataivira voea ruture keeroepa voeao oea oisoa orekerovu rutu ou ragapaive rera ruvara-ia ro-ia reito. Oire uva iravu kovo tokipato iare urioroepa. Oa iava oiso rera akereve, Ovirovui varao oara oisoa ou ragapari ragai reraaro ruvara-ia reito? <sup>6</sup> Uva oiso puraroepa, Katai vovoto (100) auero wel dramro. Oa iava oiso puraroepa, Ie, tiket oa-ia reo goru purarivora vara ouoro. Oire vara rutu vievieiro vara iava vo vavae tau (50) raga rigatori ikau visivi vara vieiario tavarioro. <sup>7</sup> Oire uva iravu ita rera iare urioroepa. Oa iava rera ro kovo tokipato oiso rera akereva, Aa voviroa varao akuku ouara vii varaaro? Uva oiso puraroepa, Ari katai vovoto (100) auero wit bekro. Oa iava oiso rera arureva. Vao ouri tiket. Ra vii vaaro tavariori varao vieiario rigatooro vo peva vatara tau raga (80).

<sup>8</sup> ✧ “Oire uva va-a vao oa iava ro reito rera reraaro vurito kovopato oiso tavireva, Auoro, kasivarivira rutu vii vo kovoaro purarivo oirara varaaro gare piepaoro varao oara oisoa ou ragapaive ragai ruvara-ia. Uvare eisi piepaoro voea roru pierivo ora vii-ia.

“Ari ita, oiraopavira voeao oirara oea vo rasio raga-ia rugorugooaaveira oea kasivarivira rugorugooaaveira ora voea vate iraraaro roru piepasa, oea raga ita vo pitupituario oearovu vo pitupituroaro-ia putepaveira voeao torevoko vovou irara. Aue iava uvare voeao torevoko vovou irara kasivari rugoo asavira voea vo kovoaro purapaiveira ora voea voeaaro vate irara taupasa.

<sup>9</sup> “Oire uva visii tavipaavo vao iava moni vo rasio-ia vuria, vo osa vuri rugooro-ia osivu ragavira va kovo piepata. Uva vara moniara vearovira kovo piepata. Ra vara-ia visii voeaaro vate irara roru piepata. Oire vosa opesipe moni ou vo rasio iava ora orekerovu rutu, ra visii vo pitupituario iavirava visii oureve Pauto vo ora rera vo uruiaro iare, oa-ia toupaivoi Tootoa opesi asa vo vokiara rutu-ia.

<sup>10</sup> ✧ “Vosa irai orekerovi garepara vai vearovira tokipareve, oire ra ita oisi raga reipara vearovira rutu tokipareve. Ari ro ira viapau torevokovira kovopareve varavi-ia garepara, oire ra ita oisi raga viapau oiso reipara-ia torevokovira kovopareve tapo. <sup>11</sup> Vosa viapau va-ia vao vuri moni vearovira va kovo piepatavere vo rasio-ia, ra irou rutu visii vatepaive oiraopara vai? Ra oarai tokipata vearovira, raa? <sup>12</sup> Vosa viapau vearovira oearovu varaaro tokipata, ra irou visii vatepaive orekerovu avu vai, oiso ra oarai-ia pitupata, raa?

<sup>13</sup> ✧ “Viapau kataitoa vai kovopatoa vai uvuiparoi ra aiterei rutupa reitoarei vai okovoreiario-ia pitupareve. Oire vo osa iravure vuri vovoupaoro iravu

*ragare vearo vovouparo, eke rerapa ruipaparo rutu roaripa reasipaoro. Ari ita, visii vao viapau uvuipatai ra vo rugoorei rutu sirova ututa oiso, Pauto-a ro, ari vao moniapa.”*

### *Vo Toupai Reo Taisi Iava Ora Pauto Vo Saraaro*

14 ✨ Voeao Farisi oea moniapa ruipa iraopaaveira rutu vare rugoo iraopaoro. Oa iava vo reoro rutu uvuiva Jisas oreoroa purareva. Oire uva rera tovipaiva va iava vao. 15 ✨ Uva Jisas oiso puraroepa voeare, “Ari ita, visii oiso ruipapataveira ra ora visii vo pitupituroaro vearopa vovouro karekepata oirara rutu osireiario-ia. Vo osa Pauto visii vo vovouroaro-ia taraiparoveira torevokovira. Oire ra oirara visii vo pitupituroaro kekepaoro oiso purapaave, Torevoko vovouro rutu varao. Vo osa Pauto osireiario-ia vuivuvira rutu kekepa piro.

16 “Reo Taisi vo reoroaro Moses vaaro ora profet irara vo reoroaro oara rutu oisoa toupave oirarapa torevoko rugoo vatepasa. Oa iava vo rutu tugurasa urioepa Jon Baptais vo vuutaaro-ia. Oire uva Jon vo vuutaaro isivaaro iava Pauto vaaro Vearo Siposipo rera vo Saraaro iava vo uruiara rutu-ia kare pirorao. Osa iava oirara rutu kasivarivira kovopai, oiso ra Pauto vo Saraaro-ia koataave.

17 ✨ “Utupaua vuvuiua ora rasito oiso opesiperea taru, ovusa Reo Taisi iava viapau oavi gare rigatovi vai opesiperea vao Pauto vo reoro.

### *Jisas Reoroepa Riako Kavupa Pitupitu Iava (Matyu 5:31-32, 19:9; Mak 10:11-12)*

18 ✨ “Vosa oirato riakova kavureve iriavu raga ousa, oire ra va-ia ora oua vuri piereve otopa pitupitu purapaoro. Ora vosa ro ira oira oureve o iria kavu rovoreve roari, uva rera-a eera ira ora oupa vo taisiario vuri pierevoi otopa pitupitu purapaoro.

### *Lasaras Iava Vao Apotatoavi Ora Ro Riro Monito Ira Viapau Oisoa Sopauaaro Porepareve Vo Pauto-ia Rugoopasa*

19 “Tuariri iravu riro monito ira oisoa toupaveve. Uva oisoa vokiara rutu-ia vearopa kuvuro-ia kuvuparo revasipara. Ora vokiara rutu-ia vearo aio rutu oisoa tapo aiopareve riro rorua oupasa ora rerapa. 20 ✨ Ovusa rera vo kepaaro rataoaro ruvara-ia iravu apotato oirato toupaveve. Rera vaisiario, Lasaras riro kapukapuato vova varaua-ia. 21 Oa iava oisoa rurukopara kavopareve rera ro riro monito reraaro tebol roeroaro. Oire ra varavi-ia ora reravi iava kovuto vuku pie ragapareve. Uva voa oisoa kaakau kare rera kapuaaro veaveapasa uriopaave ora voea arevuoaro-ia.

22 ✨ “Oire uva rera ro apotatoavi kopiioepa. Oa iava enselpa irara rera kaeiva Ebrahim ruvara-ia rera tovoa, uva oisoa rera tapo toupaveve. Oire uva rera isivaaro iava rera ro riro monito kopiioepa. Oa iava rera tovaiva. 23 Uva vo toupave vuri tapi riro siitoka oupa tapi rutu. Uva voava taraapavira tuupavira aue Ebrahim vaio vurapareva, ovusa Lasaras rera sirova torepareoepa, ovusa tauaivira toupasiva rerapa. 24 ✨ Oire uva voa-va vo uvava rera ro riro monito keeraroepa oiso puraoro, Aite Ebrahim. Ragaivipa sirarou. Lasaras aruri, ra sipareo rupu pieoro urioro ragai iava arevutoa-ia oira tovoa. Ra rera vuavua piereve gare visivi. Ari ita, vurivira rutu upia sovo iraopaavoivo vo kasio-ia.

✨ **16:14:** 2 Ti 3:2; Lu 23:35 ✨ **16:15:** 1 Sml 16:7; Pro 21:2 ✨ **16:17:** Ais 40:8; Mt 5:17-18

✨ **16:18:** Mt 5:31-32, 19:19; Mk 10:11; 1 Ko 7:10-11 ✨ **16:20:** Ap 3:2 ✨ **16:22:** Jo 13:23

✨ **16:24:** Mt 25:41

25 ✧ “Vo osa Ebrahim oiso puraroepa rera aatooro, Oviitoa oaa. E rugoopaei voarire tuariri uva tootoovira touparivora vearopara aiopaoro, ora vara oupaoro ora viipa? Osa ro-ia Lasaras ora rerapa vuriara oisoa oupareve. Uva va-a eva oa iava rerare sopaua vearovira toupavoi vo uruio-ia, osa vuri siitoka ouparivoi ita vii. 26 Ora oavu tapo vo vigei vuutaaro-ia oa tovoreva Pauto vigeipa tugivira rirova apui. Eira iria-ia viapau voeao uvuipaai ra oira iviropaoro visii iare uriopaave. Ora voea tapo ita eisiva viapau uvuipaai ra oira-ia iviropaoro vore uriopaave igei iare.

27 “Oa iava riro monito oiso puraroepa, Ari ita, aite Ebrahim. Oiso viire keeraparai ra Lasaras aruri. Ra aite vo kepaoro iare avaro. 28 Okepa-ia toupai vo vavae voeao ragai araoko iraraaro. Oire uva oiso ruipaparai ra goruvira rutu Lasaras voea tavirevere auepa, teapi voea tapo ita vore urioave riro-ia siitoka. Vo osa viapau voea iava sopaura pore rovo piro vova vuri vovou.

29 ✧ “Ari Ebrahim rera aatooro oiso puraroepa, Ari ita, reoreoara toupaveira voea ruvara-ia, oreoa rigatoiva tuariri rutu Moses ora voeao profet irara. Uva vii voeaaro araoko irara uvuipaai ra evo reoreo sirova utupaave. 30 Uva riro monito oiso puraroepa, Viapau aite Ebrahim. Viapau oiso evara uvuipai. Ari vo raga osa irai kopiitoa vai tovaa vai iava toreoro voea iare avaro. Oa iava uvuipaai ra sopaura oaive iava poreia viro vova vuri vovou. 31 Uva va-a vao oa iava Ebrahim oiso rera tavireva, Ari ita, vosa viapau Moses ora profet irara viapau vo reoroarore rugoopave, oire ra apeisi ragavira ita irai oreoiaro oirao pieve, vo rara tova tapi vai iava vorevira vorero voea tavisá?”

## 17

### Vuri Pitupitu Iava Oa Oirato Vaaro Oirao Piea Vuri Piepaiveira (Matyu 18:6-7, 21-22; Mak 9:42)

1 ✧ Jisas ora rera voeaaro disaipel tavireva oiso, “Oiraopavira rutu, oaravu rutu vo vokie kareke iraopapeira oirara rutu kove piepasa, oiso ra vuri vovouro purapaive. Ari ita, uva siravira ropa ira oisi vo pitupituro kareke pieparevoi vo vokie oirara kove piepasa. 2 ✧ Vosa irai oiratoa vai irai raverave vovoutoa vai oirao pie vovouaro vuri pierere voeao iava raverave vovou irara oea ragai-ia raripaaveira, oire uva vearopai oiso ra oeai rera-ia rirova aveke vai tuuive rera okoearo-ia rera roko piesa avakava vuruvuruaro-ia.

3 ✧ “Ora vatatopo iraopata. Vosa araokotoa oara vuria purareve, oire rera tarairi. Oire vosa ora rera iava sopaua vorevira porereve vo rara vii vo reoaro uvureve, ra va iava rera iava va vuria verari. 4 Ari vosa vii-ia voreripavira vuria purareve rirovira vo katai voki-ia, oire ra katakataivira vara rutu isivaaro iava vii iare urioparo oiso purapasa, Ragai iava sopaua pore piroi vova vuria oa puraavo vii-ia. Oire ra va iava uvui iraopauei ra rera iava vara rutu evara vuriara verapari katakataivira.”

### Oirao Pie Vovou

5 ✧ Uva aposel irara Turarore oiso puraaepa, “Igei varaaro oirao pie vovouro riro pieri rutu.” 6 ✧ Uva Turaro oiso voeare puraroepa, “Eagara ita, vosa visii varaaro oirao pie vovouro oisivi raga toupave oiso osa mastet kuearo garepa takurarovi rutu, oire ra va iava evare rirova eva oiso purata,

Vavurupara rutu iava tate uviro, ra avau vavore avakava sovara-ia. Ra voa ora pauu ita. Oire ra va iava visii gisipoaro sirova utupe ita. Aue iavirava visii varaaro oirao pie vovouro.

### Vao Kovopato Vo Kovoaro

<sup>7</sup> “Vosa visii iava irai kovopatoa vai varuparo vai gaaripareve rasia porepaoro, eke sipsip ragui vai tokipareve. Oire ra voava karero viro kepa iare. Ra pasi, rera reitooaro rerare keeraro oiso, Uriou ikauvira pausa ra aiori? <sup>8</sup> ✧ Viapau. Ari oiso vaio rera tavireve, Varoa tavario rovori. Ra ragaipa aioara ravaari. Oa iava varava uriou. Ra aio rovoa ora tapo ukaio rovora. Oa iava utupavira aiorivere ukaiooro tapo. <sup>9</sup> Ra apeisi-a? E rera-ia roru vaisi purareve ro kovopato vo rara rera gisipoaro sirova vearovira utuparo, raa? Ari viapau rutu. <sup>10</sup> Oire uva oisi-a eisi osa iava visii tapo uvuipatai vosa orekerovu rutu kovoara opesi pie rovopata oiso osa Pauto visii tavireve, oire ra va iava oiso purata, Igeivi-a viapau vearo irara kovopa irara, ra va iava vearo vaisi ouio reito ruvara-ia. Igoa vo kovo raga purapaioveira. Ari viapau oaiei.”

### Katai Tau Leprapa Irara Oea Sisigarue Piereva Jisas

<sup>11</sup> ✧ Oire uva Jisas vo raivao Jerusalem iare gaeoro avaroepa. Oa iava Sameria-iaiei vuruvuruaro-ia vokapaoro avaroepa ora Galili-ia. <sup>12</sup> ✧ Uva voa ouruivu-ia karero viropa. Oire voava katai tau leprapa irara urioaepa rera iare raivaaro. Uva voava tauaivi torepaaepa <sup>13</sup> keerapaoro oiso, “Jisas, Reito. Igeipa siraou!” <sup>14</sup> ✧ Oa iava Jisas voa voea vuraoro oiso voeare puraroepa, “Avata ora visii iava varaura karekesa koruou purapa irarapa pris irara.” Oa iava vokapaoro avapaaepa. Uva voa voeare varaura sisigarue ovoiepa. <sup>15</sup> Uva voa voea iava iravu ora rera iava varaua kekereva uvare sisigarueepa. Oa iava voreroepa. Uva rirovira Pauto vaisiario-ia vuurapa vaisi purapareva. <sup>16</sup> ✧ Uva voa Jisas ruvara-ia kokotoaro rekureva rera-ia vearo vaisi puraoro. Ro Sameria iava rera. <sup>17</sup> Uva va-a vao oa kekereva Jisas, oa iava oiso puraroepa, “Eari keaparai oiso katai tau rutu sisigaruei. Uva ovu-ia avaa vo resura vatara? <sup>18</sup> Easi pasi, viapau irai voreparoi Pauto-ia vuurapa vaisi purasa? Ari ita, ro-ia kataitoavi raga uvavu ragava rera ratau touto.” <sup>19</sup> ✧ Oire uva Jisas oiso rerare puraroepa, “Toreu ra avau. Vii vaaro oirao pie vovou vii ravotovira porete pievoi vorevira.”

### Pauto Vo Saraaro Oa Karekeperea (Matyu 24:23-28, 37-41)

<sup>20</sup> ✧ Uva Farisi oiso Jisas akeiva, “Aa vo vuutao-ia Pauto vo Saraaro karekeperea?” Oa iava voea aatooro oiso puraroepa, “Vosa Pauto vo Saraaro karekepere, oire ra oirara viapau oiso va kekeive ora voea osireiario iava. <sup>21</sup> Ra viapau irai oiso purarovere, Keketa va vao vo-ia. Eke, Asi va vao-a vavo oiso. Oire uvuta! Pauto vo Saraaro epao visii vuutaaro-ia.”

<sup>22</sup> ✧ Uva va-a vao oa iava Jisas ora rera voeaoro disaipel tavireva oiso, “Easi utupaua oiso ruiipa ragapatavere ra ragai Oirato Oviitooaro kekesa katai vokivi vai raga-ia, osa viapau. <sup>23</sup> Oire uva oearovu visii tavitavipaivere oiso, Keketa. Asi ro-a vo-ia toupere. Eke, Varo vavo-ia. Oire ra viapau rutu uvuipata ra voea sirova utupata. <sup>24</sup> E varakeotoa-ia taraipataveira? Ira

✧ 17:8: Lu 12:37 ✧ 17:11: Lu 9:51-52 ✧ 17:12: Lev 13:46 ✧ 17:14: Lev 13:2, 14:2 ✧ 17:16: Mt 10:5 ✧ 17:19: Mt 9:22; Mk 5:34 ✧ 17:20: Lu 19:11 ✧ 17:22: Mt 9:15; Mk 2:20

parakaupareveira voraro ruture vuvuiua-ia roropaaro. Oire uva oisi-a eisi osa ragai Oirato Oviitoaaro pieoro karekeraverea vo oirara rutu osireiario iare katai vuutavi raga-ia. <sup>25</sup> Ari ita, riroara vai siitokaara vai kae rovopaa. Oa iava voea vo vuutao iava voea ragaire isivapaavere.

<sup>26</sup> ✧ “*Vo pitupituro-ia oara puraiva vo Noa vo vuutaaro-ia. Oire uva oisi raga ita eisi osa pieiverea vo ragai Oirato Oviitoaaro vo vuutaaro-ia.*

<sup>27</sup> Uva voea rutu oisoo aiopaive, ora ukaiopaave, ora vearovira raga riako oupaave. Oa iava voa vo rekasisa urioaepa oisi raga piepaaro uva Noa sip uvuo-ia koataroepa vo tuariri rutu. Osa iava rirova pirituva karekeopa. Uva oirara rutu gisiaepa oira-ia. <sup>28</sup> ✧ Osa raga ita-a eisi pieiva vo Lot vo vuutaaro-ia tapo voari tuariri. Uva oisoo aiopaive, ora ukaiopaave, ora orekerovu voripaive, ra oearovupa vara sipopaive moni oupasa. Ora aio kovoro paupaave, ora kepa paupaave. <sup>29</sup> Oire uva Lot Sodom-ia kavuoro avaroepa. Uva vo voki raga vao oa-ia tuitui kasi karekeepa, oa-ia vitavokovira kovekoveoro vuvuiua iava oiso osa kokeva. Oa iava oirara rutu kopii pieva voa. <sup>30</sup> Uva oisi raga ita eisi osa pieiverea vo vokio-ia oa-ia Oirato Oviitoaaro karekeroverea poeravira ragai raga ita.

<sup>31</sup> “*Uva vo voki raga-ia ro ira kepa ivara-ia toupavereva, vo osa rera varaaro vo kepa sovara-ia toupave, ira viapau oiso voava rere rovoreve vara ou rovosa rera varaaro, uvare viapau vuutavi toupave. Eisi osa ro ira varuparo toupavereva ira viapau oiso voava karero ora rera vo kepaaro iare rera varaaro ousa.* <sup>32</sup> Vearovira rutu rugoopata Lot vatuvavaarore. Iria porepaaro kopii ovoioapa. <sup>33</sup> ✧ *Ari vosa ro ira ora rera tootooaro ragare taraapareve kovopaaro, oa taru rera iava opesi ovoipere. Ari vosa ro ira ragai-ia vovoupaaro ora rera iava tootooa eaka ragapareve, ira-ia Oiraopa Tootoo rutu toupaveira.*

<sup>34</sup> “*Visii tavipaavo oiso, Vo voki iava vo rupa-a vao oa-ia aiterei atarapavereva katai uru vai-ia. Oire ra voava Pauto irai raga ourevereva vaiterei iava iravu kavuoro vo osa toupave.* <sup>35</sup> Ari airei riakorirei vai plaua purapaerevereva auere bret, osa Pauto iriavu raga ita oureve vairei iava iriavu arova voa osa toupave. <sup>36</sup> Ari aiterei oiratoarei vai varuparo vai toupasiverea osa Pauto vaiterei iava iravu raga ita oureve iravu arova voa raga osa toupave.” <sup>37</sup> Uva va vao uvuoro oiso puraaepa disaipel, “Turaro, ovu-a vo uva va eva karekepereva?” Oa iava Jisas ruuvira raga voea tavireva oiso, “Ari vo uva okareroovu rutu kopiipaaveira, uva ruega kare ora gurupasa rerepaiveira eru karero aiopasa.”

## 18

### *Reo Ruu Vao Vo Osa Riakova Reo Rovirieipatoare Keeraopa Oira Tauvasa*

<sup>1</sup> ✧ Oire uva Jisas oavu reo ruu vaterava voeapa voea tarai piepaaro, oiso ra variripaave vokiara rutu-ia reasi asavira. <sup>2</sup> Uva oiso puraroepa, “*Ouruivu-ia iravu reo rovirieipato oisoo toupave ira viapau Pautoa-pa uririparo ora avivikepaaro. Ari viapau oiso ra oirarare vearo vovoupaaro.* <sup>3</sup> Uva iriavu raroeva riakova oisoo toupave vo urui-ia uvava vatuated kopiiroepa. Oire uva vokiara rutu-ia oisoo uriopao rera ro reo rovirieipato tavipasa oiso, Keripato ragai vuri piesa aueparoi. Oiso ruipaparai ra ragai tauvari va-ia vao-ia kort puraoro torevokovira! <sup>4</sup> Uva voari rovovira viapau oiso vovoupaaroepa ra oira tauvareve rera ro reo rovirieipato. Uva

✧ 17:26: Jen 7:1-24 ✧ 17:28: Jen 18:20-33, 19:24-25 ✧ 17:33: Lu 9:24 ✧ 18:1: Lu 11:5-8; Ro 12:12

utupavira oiso puraroepa ora rerare, Oiraopavira rutu viapau oiso Pautoapa uririparai. Ora tapo viapau oiso oirarare rugorugooaparaveira voeapa avivikepaoro. <sup>5</sup> \* Ari ita, oira o-ia raroeva ragai pugu pie iraopaaveira. Oire ita, eagara ra oira tauvaa kort puraoro oirapa. Teapi ora voreri vasipao. Ra va iava ragaire varaua reasipe rutu.” <sup>6</sup> Oa iava Turaro Jisas voeare oiso puraroepa, “*E vo reo vao uvutavoi, oreoa purarevora ro-ia vurito reo rovirieipato, raa?*” <sup>7</sup> \* Uva apeisi-a voea-ia oirara Pauto oea reesipareveira ora rerapa, oea rerare gaupaiveira arepaoro vo aviaviaro ora vo vokiario tapo? Oire uva apeisi-a? Ra viapau Pauto voea tauvareve, raa? Ra ateate piepaoro toupaveve? <sup>8</sup> Ari ita, ira uvuipa ra ikauvira voea tauvapareve. Uva va-a eva oare rugooapaoro visii akepaavoio oiso, Ovirovua vao oirara voeao oea goruvira ragai-ia raripaaveira oea perea ovusa vovevira vorera ragai Oirato Oviitoaaro rara?”

### *Reo Ruu Farisi Iava Ora Takis Oupa Irara*

<sup>9</sup> \* Oearovu oea ora voea raga-ia raripaaveira oiso, Igei torevoko irara, ovusa oevure oiso purapaave, “Vuri irara voeao.” Oire uva voea-a evoea oearo Jisas oavu reo ruu purareva. <sup>10</sup> Uva oiso puraparoepa, “*Aitereivu oiratoarei aiterea oiso ruipapasiepa ra varirisi. Oa iava Rovopa Kepa Tempel iare ipasiepa oiso, iravu-a ratarataa vovouto Farisi-pato, ari iravu-a takis oupato.*” <sup>11</sup> \* Oire uva rera ro Farisi-pato toreroepa ora rera sopaua raga iava oiso variripasa, Pauto, ragai viapau oiso osa oearovu vuri irara voeao oea kavirupaaveira, ora varao tapo kuuvu pitupituro purapaaveira, ora riakorava otopa pitupituro tapo purapaaveira. Ora viapau oiso toupaavoio osa ro-ia takis oupato. Eisi osa iava vii-ia vearo vaisi purapaavoio. <sup>12</sup> Ari ita, vo wikiara rutu-ia eraeraovira vo vokirei-ia aio kavuparaveira vii ragare rugooapaoro. Uva vara rutu varao oara oupaaveira oara iava katai taupara putepaaveira viipa oavu vatepasa voava. <sup>13</sup> Oire ro takis oupato ira tauaiviva toreparoepa reasipaoro vuvuiua vura arapa taraaoro. Ira ora kopukopuaro raga tapatapapareva siraopaoro. Uva oiso puraparoepa, Pauto, ragaivi vurito ragoapa siraou.

<sup>14</sup> \* “*Oire uva visii tavipaavoio oiso, Ro-ia takis oupato ira iava vuriara verareva Pauto. Osa iava rera vaisireva oiso, Torevokoto ro-ia oirato. Oa iava vovevira kareroepa ora rera vo ruuiaro iare. Vo ovusa ro Farisi-pato ora rera varaarova vovevira kareroepa, oiso osa raga ita varava vuriara urioroepa. Aue vituaro iava uvare ro ira ora rera raga vaisiario kae piepareve, ira vaisiario akaipa pierevere Pauto. Ari ro ira ora rera vaisiario akaipa piepareve, ira taru vaisiario kae pierevere utupaua Pauto.*”

### *Jisas Kakaevure Viraakoreva (Matyu 19:13-15; Mak 10:13-16)*

<sup>15</sup> Oire uva garepa kakaero sipoiva Jisas iare. Uvare oiso ruipapaaveira ra voea-ia vavaaeariario tovoreve varirioro. Uva disaipel irara voea tueoro voeare korupaaepa. <sup>16</sup> Oa iava Jisas ora rera ruvara iare voeare kakaevure keeraroepa oiso puraoro, “*Kakaevure eakata. Ra urioave ragai iare. Opeita voeare korupata. Ari ita, Pauto vo Saraaro oa oiso voea-ia toupaveira oea oiso purapaa viroveira osa voeao-ia garepa kakaero.*” <sup>17</sup> \* Oiraopavira rutu visii tavi irapaavoio oiso, Voeao-ia kakaevure riro rari irara rutu ragai-ia. Vosa irouto viapau oiso vo ruipaoro toupaveira osa ro kakaeto ira vaopa

\* 18:5: Lu 11:8 \* 18:7: Re 6:10; Ro 8:33; Kl 3:12; 2 Ti 2:10 \* 18:9: Lu 16:15 \* 18:11: Mt 6:5 \* 18:14: Mt 23:12; Lu 14:11; 1 Pi 5:6 \* 18:17: Mt 18:3

ruipaparoveira Pauto vo Saraaro, oire uva rera oirato ira viapau uvuipa oiso ra Pauto vo Saraaro sovara iare koataro.”

*Iravu Reito Riro Kotokoto Gurupareve  
(Matyu 19:16-30; Mak 10:17-31)*

18 ✨ Oire uva iravu Jiu-pato reito oiso rerare puraroepa, “Vearoto Tisato. Eake vai-ia uvuiparai ra oai puraa, ra Tootoo Ovoí oua?” 19 Oa iava Jisas oiso rerare puraroepa, “*Eakere eisi ragai vaisipari oiso, Vearoto? Vo osa kataitao raga-a vearoto Pauto.*” 20 ✨ Ari ita, aue-ia taraipaeui vao-ia Reo Taisi Moses vaaro. Oa oiso purapapeira, Opeita otopau. Ora opeita oira upopau. Ora opeita kavirupau. Ora opeita oearovu iava kuuvupau. Aiteara vaiopa ora aakoara tapo avivikepau.” 21 Oa iava ro reito oiso puraroepa, “Ari ita, vo osa kakaevira oisoa toupaa, uva va eva Reo Taisi oisoa uvupaa va tokipaoro.” 22 Uva Jisas rera vo reoaro uvuoro oiso puraroepa, “*Ari oavivu ragapa tovira poteparivoi vao-ia oiso-ia, Auero rutu-ia vii varaaro vori rovovere vara-ia moni ouoro apotapa irarapa oarai vatesa. Vosa oisi pieri oiso, ra va iava vearoa ouri vuvuiua-ia. Oire ra ragai sirova utuu.*” 23 Osa vo reo uvuoro vao vovouisi vavatareva rutu rera ro reito. Eake iava? Uvare riro monitoa rutu-a.

24 ✨ Oa iava Jisas rera-ia vurapaoro oiso puraroepa, “*Oiraopavira ita. Voeapa voeao riro kotokoto guru irara vavagisi iraopapeira varaova ora kiu arapa vore Pauto vo Saraaro-ia.*” 25 Ari ita, vavagisipai vao tavaatoa iava vo rito, vosa rirova vai vo kare iava kamel kare iriai voa koatasa auepa. Uva oisi rutu rirovira vavagisi iraopai ropa riro moni guruto vore koatapasa Pauto vo Saraaro-ia.” 26 Oire uva va vao uvuoro oearovu oiso puraepa, “*Vosa oisi eisi, uva iroutoa vai uvuiparoi ra va eva Tootoo Ovoí oureve?*” 27 ✨ Oa iava Jisas voeare oiso puraroepa, “*Ari ita, vao oa viapau purapareve oirato, Pauto oa-ia uvuiparoi ra va purareve.*”

28 Uva va iava Pita oiso puraroepa rerare, “*Uvupari? Igei varaaro uruiara kavuiova vii raga sirova utuoro.*” 29 Oa iava Jisas oiso voeare puraroepa, “*Oiraopavira visii tavi iraopaavo oiso, Voea rutu oea Pauto vo Saraarore rugoopaoro orekerovu rutu kavupaiveira oiso-ia, kepaara varao, ari vatua riakoro, ari arako irara, ari aite irara, ari kakaevure voea voeaoro.*” 30 Oeapa riroara rutu vatepare Pauto vo vokio-ia voea varaaro-ia pute pievira. Oire va iava utupavira Opesi Asa Tootoo oupaiveera.”

*Jisas Vo Peva Piepa Tavi Purareva Ora Rera Iava Oiso, Kopii Ravere Ra Vorevira Torera  
(Matyu 20:17-19; Mak 10:32-34)*

31 ✨ Oire uva voea katai tau erao (12) oureva disaipel. Oa iava oiso voeare puraroepa, “*Uvuta vao. Vo vokio-ia ipapaviei Jerusalem iare. Oire ra vo reoro rutu oiraope profet irara vo reoroaro oara rigatoiva ragai iava ro Oirato Oviitoaoro.*” 32 Uvare ragai vateivere voeao vavaeoro iare osararovu iava voea. Oire ra va iava ragai tovipaive, ora ragai vuri piepaoro ragai-ia ruipaave tapo. 33 Ra ragai ragipaive ragai kopii piepaoro. Ra vo pevapa voki-ia vorevira torera voava kopii tapi tootopaoro.” 34 ✨ Oa iava voeao disaipel viapau oiso vo reo-ia vao aviavipaaepa oreoa ruureva voeare. Uva va-a vao oa iava viapau oiso vearovira taraipaaepa vo reo vituaro-ia.

✨ 18:18: Lu 10:25 ✨ 18:20: Eks 20:12-16; Diu 5:16-20; Ro 13:9 ✨ 18:24: Pro 11:28 ✨ 18:27: Job 42:2 ✨ 18:31: Lu 9:51; Sam 22 ✨ 18:34: Mk 9:32; Lu 9:45

*Jisas Iravu Voosito Porete Piereva Riro Oira Areareto  
(Matyu 20:29-34; Mak 10:46-52)*

<sup>35</sup> Oire uva Jisas Jeriko urui ruvara-ia karero viropa vo uva iravu voosito oisoa raiva vatuaro-ia pauparo. Uva oisoa moni areparo oirara rutu ruvara-ia. <sup>36</sup> Uva voava riro irara iava uvureva, ovusa vokapaoro uriopaaepa voare. Oa iava oiso voea akepareva, “Eake purapaivoi?” <sup>37</sup> Uva oiso rera taviiva, “Ari Jisas ro vova Nasaret-ia ira vokapaoro vigei-ia puteparevoi.” <sup>38</sup> ✨ Oa iava rirovira oiso puraroepa, “Jisas! Vii-a Devit aaotoaaro. Ragaivipa sirau!” <sup>39</sup> Oire uva irapa irara rerere kasipupaaepa oiso purapaoro, “Auro! Ora tape pieu.” Ovusa rirovira rutu keera iraparoepa oisi raga purapaoro oiso, “Vii-a Devit aaotoaaro! Ragaipa sirau.” <sup>40</sup> Uva Jisas voari toresa urioroepa. Uva voava voea tavireva oiso, “Voea tavita ra rera sipoive ragai iare.” Uva tutuu pieoro rera iare urioroepa. Oa iava Jisas rera akereva, <sup>41</sup> “Eake vaipa ruipapau, ra oai puraa viipa?” Uva oiso puraroepa, “Turaro. Oiso ruipaparai ra vuraa.” <sup>42</sup> ✨ Oa iava Jisas rerere oiso puraroepa, “Vorevira vurari. Uvare vii raga vaaro oirao piea vii vorevira ravotovira porete pie ovoivoi.” <sup>43</sup> ✨ Oire uva oisi-a eisi oia iava vorevira vurareva. Oa iava Jisas sirova utu ovoiroepa. Uva Pautoa-ia vuurapa vaisi pura ovoireva, osa oirara rutu va vao kekeiva. Oa iava voea rutu Pautoa-ia vuurapa vaisi puraiva.

## 19

*Vo Toupai Sakias Iava Vo Siposipo*

<sup>1</sup> ✨ Jisas Jeriko iare vokapaoro karero viropa. <sup>2</sup> Oire uva vo urui eva kavupasa aueroepa, vo osa iravu oirato voa toupaveva rera vaisiario, Sakias rera ro takis oupa irara reitoaaro. Uva rera-a riro monito. <sup>3</sup> Uva oiso ruipaparoepa ra Jisas-ia tarairo oiso, Iroutoa rutu-a? Ari viapau oiso uvuiparoepa ra rera kekereve, uvare riro irara rutu Jisas utopaiva. Uvare ita potekuto-a rera Sakias. <sup>4</sup> ✨ Oa iava ikauvira iparoepa oevaovu-ia riro ova, uvare oiso rugoepa ra Jisas kekereve rutu. Ari ita, oiso taraiparoepa, Vo raivao-ia vokapaoro uriorovere Jisas. <sup>5</sup> Oire uva Jisas voavi pouro viropa. Uva voa vo viara-ia vurareva. Oa iava oiso puraroepa rerere, “Sakias. Ikauvira varau evoava. Ari vo vokio-ia vii vo kepaaro-ia toupaa.” <sup>6</sup> Uva oisi-a eisi osa iava ikauvira vararoepa, uvare rera iava sopaua rirovira rutu roruva. Oa iava rera tapo Jisas avaroepa ora rera vo kepaaro iare. <sup>7</sup> Oire uva oirara rutu va vao kekeoro aveavevira reoreopaaepa oiso purapaoro, “Uva apeisi vurito vo kepaaro-ia koataro rera tapo tousa?” <sup>8</sup> ✨ Ari toreroepa rera Sakias oiso purasa, “Reito. Oiso ruipaparai ra ora ragai varaaro rutu roo piea oiso, oavu voeaopa apota irara. Ora varao tapo kare piea oara oisoa ou ragapaa kuuvuvira oearovu ruvara-ia katakataivira. Uva voeapa oiso vara kare piepaavere iravu vaaro rekasiaro-ia oresuravu tovoa rerapa pute pievira.” <sup>9</sup> ✨ Oire uva Jisas rerere oiso puraroepa, “Vo vokio-ia Pauto voeao oea vo kepa-ia toupaveira oea vorerevoi ora rerapa vova vuritara oaive iava. Ari ita, uvare vii tapo-a iravu Ebrahim aaotoaaro. <sup>10</sup> Ragai-a vao Oirato Oviitoaaro ragoa oirara ousa urioraera voeao oea opesikoepa, ra va iava voea vorevira vorea Pautoa-re.”

*Katai Tau Iava Kovopa Irara Voeao Oea Moni Ouaepa*



11 ✨ Oire uva vo reo-a vao oa uvuivoiva, oavu reo ruu vatereva voeapa. Eake iava? Uvare tutuu piereva Jerusalem iare. Vo osa oiso keapaaepa, Vo voki raga-ia Pauto vo Saraaro roroiovira ora karekepai. 12 ✨ Oa iava oiso puraroepa, *“Iravu reito ira oiso ruipaparoepa ra tauai ruture avaro, oisore ra voa rera king pieve. Ra va iava vovevira karero.* 13 Uva katai taure kovopa irara keeraroepa rera voeaaro. Oa iava voeapa katakataivira erao tau kina (K20) vatereva. Uva oiso voea tavireva, Vao-ia sara kovoro vai puratavere vore tuepaoro uva vovevira voreravere.

14 *“Vo osa rera vo uruiaro iava voea rerare vuri vovoupaaepa. Oa iava voea arova avaroepa. Uva voeao rera iavapa irara oearovu aruiva ora voea raga iava rera sirova utupasa. Oa iava oiso purasa utuaepa, Igei reasipaiei ra ro igeipa kingparo turaropaoro.*

15 *“Oire rera king pieivoiva, voava vovevira voreroepa vore rera vo uruiaro-ia. Oa iava oiso puraroepa, Oirarare keerata voeao oeapa moniara vateav-ora. Aue iava keeraparai voeare uvare oiso ruipaparai ra taraira oiso, Aa voviro kareke pievora katakataivira vara rutu iava moniara.*

16 *“Oire uva iravu iraroepa oiso purasa, Reito, vii vaaro-ia monia sara kovo puraavora aue rutu erao tau kina (K20). Oa iava va-ia pute piea ouavora aue rutu erao vovoto kina (K200) rutu.* 17 ✨ Uva va iava king oiso rera tavireva, Vii vearotoa rutu kovopato. Viigoa vearovira gareparavi-ia vurapariveira vara vearovira rutu tokipaoro. Oire uva va-a eva oa iava vii vatepaavoi oavu reesia. Ra va iava katai tau rutu tokipari aue riropa uruiro (10 taun).

18 *“Oire uva erao pieto ita rera iare pouro viropa oiso purasa, Reito, vii vaaro-ia erao tau kina sara kovo puraavorao. Oa iava aue katai vovoto kina (K100) pute piea ouavorao va-ia ita.* 19 Osa iava king oiso rera tavireva, Vii tovopaavoi, ra vo vavae tokipari riropa uruiro (5 taun).

20 *“Oire uva iravu ita kovopato rera iare pouro viropa. Oa iava rerare oiso puraroepa, Reito, vii vaaro-a vao erao tau kina vo-ia. Oa ruuava aue-ia varoa va oriruoro. Oa iava vo toupaveira.* 21 Eake iava? Uvare vii-ia oisoo taraipara, Riro kasivaritoo rutu varao ou ragapaoro oara tovopaivora oearovu. Ora varao aioara oara paupaiveira oearovu raga, oara tapo tatepariveira vii raga. Eisi osa iava viipa oisoo uriripara varao moniara kovó pie arapa.

22 ✨ *“Oa iava rera ro king rerare kovopato oiso puraroepa, Vii vurito kovopato. Viigoa iava gasipaavoi vii raga vo reoaro-ia. Ari ita, ragai-ia oiraopavira oisoo taraipau oiso, Riro kasivarito ragai varao ou ragapaaveira oara tovopaivora oearovu raga. Ora varao tapo tatepaaveira oara paupaiveira oearovu raga.* 23 Ari apeisi iava viapau va vao ragai vaaro moni tovo asariva beng-ia? Oa iava voreraeri voava va ousa aue tapo pute piea vai interes. 24 Oire uva oiso puraroepa voeaore oea tutuu pievira rera ruvara-ia toupaiava. Vao outa eva erao tau kina. Ra eera vateta ira erao vovoto kinava toupaveoi.

25 *“Oa iava oiso rerare puraaepa, Reito. Easi rera erao vovoto kina pura piroi.*

26 ✨ *“Uva oiso puraroepa, Oiraopavira rutu oiso visii tavipaavoi, Oirara rutu oea oisi vara-ia pitupaivoi, uva voeapa ita oarai vaterevere Pauto pute pievira. Ari vosa viapau oisi oai-ia pitupareve irai, oire ra gareavi raga-ia pitupareve, eva-a oa verarevere rera ruvara iava Pauto.* 27 Ari evoea

✨ 19:11: Ap 1:6 ✨ 19:12: Mt 25:14-30; Mk 13:34 ✨ 19:17: Lu 16:10 ✨ 19:22: 2 Sml 1:16

✨ 19:26: Lu 8:18

oea oiso purapaaaveira ragaire, Reasipaiei rerapa oiso ra igeipa kingparo turaropaoro. Oire uva voea evoea ragaiva keripa irara. Uva voeava uriota vore ragai osireiario-ia voea uposa.”

*Jisas Turarovira Jerusalem-ia Karero Viropa  
(Matyu 21:1-11; Mak 11:1-11; Jon 12:12-19)*

28 ✨ Oire uva Jisas vo reo vao purareva. Oa iava vokapaoro iraroepa vo raivao gaepaoro oa-ia oisosa Jerusalem iare ipapaave. 29 Oa iava Betfasi urui ruvara-ia pouro viropa vo uruirei ora Betani-ia vo pukuio-ia oa oisosa vaisipaive oiso, Oliv Kovo Pukui. Oire uva voava aitereivu disaipeltoarei ira piereva vo uruiri iare oa oiso oisiriva pute pievira vo pukuio-ia toupave. 30 Uva oiso vaiterei reesiresireva, “*Vo uruiri iare irasi, ra vo urui-ia kareu virosi. Oire ra voa gareva kekesivere donki, osa variaua riara-ia toupave, iria-ia viapau oisosa irai pauparo voari tuariri uvare koruova. Oire ra voava oira karuoro oirava voresivere.*” 31 Vosa irai vei akepareve oiso, Eakere eira donki karupasi? Oire ra oiso ragavira irai tavisu, Iria-ia Turaro vo kovoaroiei.”

32 ✨ Oire uva Jisas vaiterei arureva. Oa iava avasiepa. Uva oisi vara rutu kekesiva oiso osa vaiterei tavireva. 33 Uva oira iava iroiuro karupasiva o-ia donki. Oa iava voea-a voeao oea oiraaro-a oea oiso vaiterei akeiva, “Eakere eira koruova donki karupasivoi?” 34 Uva va-a vao oa iava oiso voea tavisiva, “Iria-ia Turaro vaarooi kovo.”

35 Uva oirava koruova donki voriesiepa rera iare Jisas. Uva vaiterei varaaro varoara tovosiva oira ivara-ia. Uva vara ivara-ia Jisas pau piesiva. 36 ✨ Uva oira ivara-ia pauparo avaroepa, ovusa voea rutu oirara varoara-ia uruiva parakavira raivaaro vo raiva oritopasa. 37 Oire uva voava tutuu pieoro avaroepa vo raivao-ia vova varapaoro Oliv Kovo Pukui iava. Oa iava riro irara rera voeaaro disaipel irara rovoaepa rorupaoro. Uvare varao ruture rugooaepa ravotoara oara oisosa kekepaive, vorara vara purapareve. Oa iava rirovira rutu raga pieiva Pautoa-ia vuurapa vaisi puraoro. 38 ✨ Oiso purapaoro kaku piepaiva,

“Reito king vaisiario rei piepe. Ira urioroi Turaro Pauto vaisiario-ia. Uvare Pautoa iava sopaua vearooi vigeipa oirara, uvare kasipua opesiei. Oire ra Pauto vaisiario rei piepe ro oiso vuvuiua-ia viara-ia rutu.”

39 Oire uva oearovu ratarataa vovou irara Farisi iava voava vo uvuru vao sovara-ia toupave, oea Jisas-re oiso purapaaepa, “Tisato! Evoea disaipel tapetaperi vii voeaaro. Opeita eisi piepaive.” 40 ✨ Oa iava voeare oiso puraroepa, “*Ari ita, visii tavipaavo oiso, Vosa voea varaaro gisipoara tuupaive, oire ra varao avekeara raga kaku piepaive vuurapa vaisi puraoro.*”

*Jisas Jerusalem-ia Paureva*

41 ✨ Oire uva tutuu piereva Jisas voare vo Jerusalem urui-ia. Oa iava vo urui kekeoro siraovira gaureva 42 oiso puraoro, “*Vosa vo vokio raga-ia vao-ia vo pitupituo-ia vearovira taraitai oa oiso toupai, Visiipa gavaure vovou vatepai, ra va iava vearota. Ari ita, vo vokio-ia opitupitua vao vataupai. Ra viapau va keketa.*” 43 ✨ Uvuta! Vo utupaua uva ovuutavu karekeperea oa-ia visii voeaaro keripa irara uutuva purasa urioaverea, o ora upopava visii ururao visii kovokovooro voraro rutu. 44 ✨ Oire uva visii kepikapiiverea visii vuri pieoro rutu. Vii urui ora ovii irara oara voeao oea epao vii urui sovara-ia oea toupai. Uva viapau oiso vii iava iriai aveke vai eakaiverea,

✨ 19:28: Mk 10:32; Lu 21:37 ✨ 19:32: Lu 22:13 ✨ 19:36: 2 Kin 9:13 ✨ 19:38: Sam 118:26

✨ 19:40: Hab 2:11 ✨ 19:41: Lu 13:34-35 ✨ 19:43: Ais 29:3; Jer 6:6 ✨ 19:44: Mt 24:2; Mk

oiso ra iriai toupaeve vo iriai ivara-ia ita. Eake iava? Uvare viapau vo vuutao eveitavoi oa-ia Pauto urioroi visii tauva ragasa visii oriruoro.”

*Jisas Voea Sigureva Osa Ora Tuutuupaaepa Ora Voripaoro Tugoropa Kepa Sovara-ia*

*(Matyu 21:12-17; Mak 11:15-19; Jon 2:13-22)*

<sup>45</sup> Uva Rovopa Kepa-ia Tugoropa Kepa Tempel koataroepa. Oa iava rovoroepa voava voea sigupaoro, ovusa sara kovoro purapaiva voa Tempel sovara-ia. <sup>46</sup> ✧ Uva oiso voeare puraroepa, “Tugoropa Vuku oiso purapai, ‘Ragai vo kepaaro eakata eva oa oiso toupai Variripa Kepa ragai vaaro.’

Oa oiso rutu piepatavoi,  
‘Vataupa tapi uva visii vao kavirupa irara vataupaaveira sara kovoro oavisii purapaoro.’”

<sup>47</sup> ✧ Oire uva vokiara rutu-ia voea tarai piepaoro voa toureva vo kepa sovara-ia vao Tempel. Oa iava voeao reipa irara pris ora voeao tarai irara aue-ia Reo Taisi, ora voeao tapo oirara rutu reipa irara oea rerare raiva taraapaaepa, oiso ra oai iava rera upoive. <sup>48</sup> Vo osa oirara rutu goru iraopaaepa rera vo rearo uvupaoro. Oire uva oisi-a eisi osa iava voeao reipa irara viapau oiso uvuipaaepa oiso ra oraivai kekeive rera uposa.

## 20

*Jisas Akeiva Oiso, Irouto Vii Vateveva Vo Reesi?*

*(Matyu 21:23-27; Mak 11:27-33)*

<sup>1</sup> ✧ Ovokivu-ia Jisas voea siposipopareva Rovopa Kepa Tempel Tugoropa Kepa sovara-ia Vearo Sipoipo-ia. Uva voea reipa irara koruou purapa irara pris ora voeao Reo Taisi-ia tarai irara, ora voeao tuvutuvepa irara Jiu iava oea urioaepa rera iare Jisas. <sup>2</sup> ✧ Oa iava rerare oiso puraaepa, “Igei taviri oiso, Eake reesi-a vao oa iava varao kovoara puraparaveira? Uva irou-a vao oa vii vateva vo reesi eva?” <sup>3</sup> Oa iava voea aatooro oiso puraroepa, “Ari ita, uva ragai tapo ita visii akepaavoi oreovu iava, ra ragai tavita. <sup>4</sup> Irouto-a ro ira Jon vateveva vo kovo oa iavirava oirara baptaisreva, Pauto eke oirara raga?” <sup>5</sup> Oire uva voea raga ora reopaaepa oiso purapaoro, “Vosa oiso puravio, Pauto ruvara iava va, ra ita oiso puraro, Uva apeisi viapau va oirao piepata? <sup>6</sup> ✧ Ari vosa oiso puravio, Ari oiratoa raga vaaro, oire ra oirara rutu va iava vigei vurokoive aue-ia aveke voeao oea goruvira rutu Jon oirao piepaiveira oiso purapaoro, Profetato Jon.” <sup>7</sup> Oire uva oisi-a oiso osa iava rera vo rearo aatooro oiso puraaepa, “Viapau oiso igei eva-ia Jon vo baptaisaro taraipaiei oiso, Ovu iava karekeepa.” <sup>8</sup> Oa iava Jisas voeare oiso puraroepa, “Ragai tapo ita viapau uvuiparai ra visii tavia vo reesi iava oa iava vo kovo purapavora.”

*Vuri Irara Iava Reo Ruu Oea Oisoa Wain Kovo Tokipaive*

*(Matyu 21:33-46; Mak 12:1-12)*

<sup>9</sup> ✧ Uva oisi-a oiso osa puraroiva, voepa reo ruu vateveva oiso puraoro, “Iravu oirato ira wain kovo paureva. Oa iava vo kovo-ia kovopa irara tovoreva, oiso ra vo kovo-ia sara kovo paureva. Vo osa rera ouruvu iare avaroepa tauai rutu voa toupasa. <sup>10</sup> Oire uva aio oupa vuuta-ia vo kovo iava iravu kovopato rera reraaro arureva voea iare voeao oea oisoa vo kovo-ia kovopaive vao wain kovo. Uvare oiso ruipaparoepa ra rera vateive oarai

✧ 19:46: Ais 56:7; Jer 7:11 ✧ 19:47: Mt 26:55; Jo 7:19 ✧ 20:1: Mt 26:55; Lu 8:1 ✧ 20:2: Jo 2:18; Ap 4:7 ✧ 20:6: Mt 14:5; Lu 7:29 ✧ 20:9: Ais 5:1-7; Mt 25:14

aioara vai vo kovo iava. Vo ovusa voeao oea oisoa vo kovo-ia kovopaive rera ro upopaoro viapavira rera siguiva vovevira. <sup>11</sup> Oa iava iravu ita kovopato voea iare arureva reito. Oire uva rera upooro rera vuri pieiva. Oa iava oisi raga akukuvira rera sigu ragaiva ita. <sup>12</sup> Oa iava vo peva piepato arureva voea iare. Uva rera upooro rera kosi pieiva rera-ia vikioro rataure. <sup>13</sup> Osa iava rera ro ira vo kovoaro-a oiso vovouparaopea, Eake vai puraa? Oire ra ro ragai oviitoaaro rutu arua ira kavikopaaveira rutu. Ira vai-ia taru gisipoaro uvuivere. <sup>14</sup> *Oa iava voeao oea oisoa vo kovo-ia kovopaive rera tueiva. Uva voea raga ora reopaaepa oiso, Rera-a ro ira utupaua auero rutu varao aiteto varaaro orevere. Avoeao! Rera upope. Ra va iava vigei raga vo kovo-ia pitupere.* <sup>15</sup> Osa iava vo kovo iava rera kosi pieoro rera-ia vikiaepa rataure vo wain kovo vatuario-ia rera kopii pieoro. Oire uva ro ira vo kovoaro-a wain kovo, eake vai purarevere voea-ia? <sup>16</sup> ✨ Ira uriorovere taru voea kopii piesa voeao oea oisoa vo kovo-ia kovopaive vao wain kovo. Oire ra va iava oearoi raga vaterere vo kovo.” Uva vo siposipo uvuiva oa purareva Jisas. Oa iava oiso puraaepa, “Ae! Teapi eisi vai piereverea.”

<sup>17</sup> ✨ Oa iava Jisas voeava vurapaoro oiso puraroepa, “*Eake-a vo reo vituario vao oa toupai Tugoropa Vuku-ia?* ‘O-ia aveke kovopa irara iria veraiva, iria oiso karekeopa o aveke rovopava rutu kepa iava kukuuvuva.’

<sup>18</sup> ✨ *Oirara rutu oisoa o-ia aveke ivara-ia kovepaave ora tarita ovoipaoro. Ari vosa oira o aveke irai ivara-ia koveoverea, oire ra irai tarita ovoieve garepa visivi oiso rutu osa poupu.*”

<sup>19</sup> Oire uva voea voeao Reo Taisi-ia tarai irara ora reipa irara pris oiso taraiapa, Easi Jisas vigei togaparevoi vao-ia reo ruu. Uva va-a eva oa iava oiso vovoupaapea ra voa raga rera-ia pitu ovoiive. Uva oirara ragapa uriripaapea rera-ia pitu arapa.

*Jisas Akeiva Sisa-pa Takis Vatesa*  
(Matyu 22:15-22; Mak 12:13-17)

<sup>20</sup> Oire uva rera siituepaiva. Oa iava oeavu tagorovira aruiva rera iare. Uva kuuvuvira oisoa torevoko pitupitu pura ragapaive rera ruvaria, vo osa rera siituepaiva. Uvare oiso rugoopaepa ra ora rera raga vo reoaro-ia rera iava gasiive auepa reito gavman. Ra gavman vavaearo-ia rera tovoive. <sup>21</sup> ✨ Oisi-a eisi osa rerare oiso puraaepa, “Tisato, vii vo reoaro-a torevokoa oa vatepariveira oirara rutupa. Uvare viapau oiso rei vaisi irarapa uriripaaveira. Viapau. Ari vaeavira rutu oirara rutu tarai piepariveira Pauto vo pitupituario-ia. Oa uvupaiveira oiso purapasa, Oiraopavira rutu! <sup>22</sup> Uva apeisi vai vovoupauei vao-ia vigei vaoro Reo Taisi? E torevokopai ra Sisa-pa takispaviei?” <sup>23</sup> Vo osa Jisas vo kuuvu-ia tarairoepa va eveioro. Oa iava oiso puraroepa voea tavioro, <sup>24</sup> “Oire oa-ia monia vai ragai kareke pieta. Vao oa-ia irou puaro toupai? Ora irou vaisiaro toupai vo va varaaro-ia?” Uva oiso puraaepa, “Ari King Sisa!” <sup>25</sup> ✨ Oa iava Jisas oiso puraroepa, “Oire rera vaoro Sisa oa rera vateta Sisa. Ari vao Pauto vaoro, oire ra Pauto vateta va.” <sup>26</sup> Oire uva va-a eva oa iava viapau oiso rera rauiva vao-ia rera vo reoaro vo oirara osireiario-ia. Oa iava rirovira rutu rugorugoo iraopaaepa vo reo-ia vao oa pukoreva voeare. Osa iava ora tape pieaepa rutu.

✨ 20:16: Lu 19:27; Ro 3:4, 6, 31

✨ 20:17: Sam 118:22-23

✨ 20:18: Ais 8:14-15

✨ 20:21: Jo

3:2 ✨ 20:25: Ro 13:7; Lu 23:2

*Jisas Akeiva Rore Ira Kopyiro Ra Ita Vorevira Torero  
(Matyu 22:23-33; Mak 12:18-27)*

<sup>27</sup> ✧ Oire uva Sadyusi-pa irara iava oevu urioepa rera iare Jisas [oea oisoa oiso purapaave, “Voeao kopii irara, viapau uvuipai ra vorevira torepaaive.”] <sup>28</sup> ✧ Oa iava rerare oiso puraaepa, “Tisa, Moses oreovu rigatoreva vigeipa oiso, Vosa iravu kakae pura asavira kopyiro riakovapa, oire ra araokoto oira ita oureve. Oire ra rerapa ro kopiito oira-ia kakaeto purareve araokoto. Eisi osa toupai Reo Taisi. <sup>29</sup> Uva oevu erao vatara rutu (7) oaraovu oea oisoa tupaive. Uva avaioto vo arao iava riakova oureva. Oire uva kakae kavau asavira kopyiroepa oira arova. <sup>30</sup> Uva kikooto ita oira oureva o-ia riakova. <sup>31</sup> Oire uva vo pevapato ita oisi raga oira oureva ita. Uva oisi raga-a eisi osa vo arao rutu voeao oira oisoa oupaive. Oa iava kakae kavau asavira raga oira arova vo arao rutu oisoa kopiipaave. <sup>32</sup> Uva vo arao isivaaro iava utupavira kopiiopa. <sup>33</sup> Oire uva vo vokio-ia oa-ia kopii irara oiso vorevira toreaverea, uva iroutopa oira perea o-ia? Ari ita, vo arao voeao erao vatara (7) oea oisoa oira oupaive. Oa iava voea rutu vatuavaaro-a.”

<sup>34</sup> Oa iava Jisas voeare oiso puraroepa, “Voea-ia oirara ora riakora vo vokio iava, voea-a oea ora oupaaveira. <sup>35</sup> Ari voeao oirara Pauto oeare oiso puraroverea, Uvuipatai ra vorevira tootoota toreoro, voeao oea viapau oiso ora oupaaverea. <sup>36</sup> ✧ *Oea viapau uvuipai ra kopiiave ita. Oea oiso raga ita tupaiverea oiso osa purapurapa irara ensel, vo rara Pauto voea vorevira tore piereve kopii tapi iava. Oire ra oiso tupaive rera ovii iraraaro Pauto.* <sup>37</sup> ✧ Ari ita, Moses tapo roroio pievira rutu vigei tavireva oiso, Kopii irara vorevira torepaaivere kopii tapi iava, vo siposipo oa-ia gare kairi evaoa rovaepa. Oa-ia ita oiso puraroepa Pauto, Ragai-a Pautoaaro Ebrahim, ora Pautoaaro Aisak, ora Pautoaaro Jekop. Voeao oea urauraaro totoovira tupaiverea. <sup>38</sup> ✧ Ari ita, viapau oiso kopii irara reraaro-a Pauto. Viapau. Ari voeao reraaro oea tootoopaai rutu vo rera osireiario-ia.”

<sup>39</sup> Oire uva oisi-a eisi osa puraroiva, oearovu riro tarai irara iava Reo Taisi-ia oiso puraaepa, “Tisato. Vearovira rutu eisi osa reouei.” <sup>40</sup> Oire uva va-ia vao oa iava uriripaaepa vorevira Jisas ake arapa.

*Jisas Farisi Akereva Auere Kraisi-pa Vaisi Vituaro Iava  
(Matyu 22:41-46; Mak 12:35-37)*

<sup>41</sup> Oire uva oiso voea akereva, “Apeisi iava oiso purapataveira, Asi Kraisi Devit aaotoaaro ro vo rasio raga iava? <sup>42</sup> ✧ Uvare vao-ia Sam Vuku Devit raga voari tuariri oiso puraroepa Kraisi iava, ‘Turaro Pauto rora ragai reraaro Turaro oiso puraroepa, Vova pauu ragai vaaro-ia oirapapa varata <sup>43</sup> vo tугurasa uva voeao viiva keripa irara tovoaverea taru vii kokotoaro reroaaro.’

<sup>44</sup> Oire uva rera raga Devit turarovira Kraisi vaisireva. Uva apeisi ragavira ita oiso purapataveira, Kraisi Devit aaotoaaro, ira Devit sirova kavauropo?”

*Jisas Voea Vosireva Voeaopa Oea Reo Taisi Iava Siposipopaveira  
(Matyu 23:1-36; Mak 12:38-40; Luk 11:37-54)*

<sup>45</sup> Oirara rutu tovira tupaiva Jisas vo rearo uvupaaro. Oa iava disaipelre oiso puraroepa, <sup>46</sup> ✧ “Vearovira rutu Reo Taisi-ia tarai irarava siitueti. Evoea riro oiso ruipa irara, ra riro kaekaepa kuvuparo-ia kuvupaave

oritopaoro. Ra varava vokapaive. Evoea oea rirovira oiso ruipapaaveira ra voeava oirara oiso purapaave avivikepaoro, Vearo voki, voraro uupa tapiro. Ora oiso tapo ruipapaaveira ra rovopa tavuki-ia paupaave vo Reo Tāisi Uvupa Keparo sovara-ia. Ora riro varaopa ruipa irara rovopara paupara vo vurei aiopa voki-ro-ia. <sup>47</sup> Oea vo riakoro vo keparoro-ia koatapaaveira vairo varaaro ou ragapasa vairo keakeapaoro raroe riakora. Oire ra vo pitupituro vataupaoro riro kaekaepa variriro purapaive. Uva oisi-a eisi osa iava voea vaaro voria riroa rutu ouiverea siitoka vavata.”

## 21

### *Apotava Riakova Iria Tauoa Vateeva Pautoa-pa (Mak 12:41-44)*

<sup>1</sup> ✧ Oire uva Jisas voeava vurapareva vo Rovopa Kepa Tugoropa Kepa sovara-ia toupaooro, ovusa voa sirao vate vikipaiva bokis-ia moni tovopaooro o Pauto oiraaro. <sup>2</sup> ✧ Oa iava iriavu apotava raroeva tuereva Jisas, ovusa gare isirei-ia vikiopa moni isirei bokis iare. <sup>3</sup> Uva va-a vao oa iava Jisas oiso puraroepa, “Oiraopavira visiire oiso puraparai, O-ia apotapava raroeva iria gare isireivi vikievoi ora oira iava sopaua rutu tapo, oa-ia oearovu rutu-ia puteevoi. <sup>4</sup> Osa voeao oea riroara moniara toupavoi oara iava oaravui sirao vate viki ragapavoi Pautoa-pa. Ovusa o apota iraopaovi rutu. Oa iava ora oira vaaro rutu viki ovoievoi moni-ia. Uva viapau oai ora oirapa aio voripasa.”

### *Vo Jisas Oiso Puraroepa, Tugoropa Kepa Opesi Ovoiperea (Matyu 24:1-2; Mak 13:1-2)*

<sup>5</sup> ✧ Uva oea vu oirara ora reopaepa Rovopa Kepa-ia Tempel oiso, uvare vo kepa oritoiva vearopara-ia avekeara ora varao sirao vafero oara oisoo vatepaive Pautoa-pa. Oa iava Jisas oiso puraroepa, <sup>6</sup> ✧ “Vara-a oara kekepatavoi. Ari vo vuutao-ia vao oa urioperea, ra viapau iriai aveke vai eakave iriai ivara-ia aveke vai osa toupave. Oara rutu evara kururu piroverea koveoro. Vo osa vara rutu-ia vikiavere voraro voeao keripa irara.”

### *Jisas Riroa Iava Siraoa Ora Tavaka Disaipel Tavireva Oarea Karekeperea (Matyu 24:3-14; Mak 13:3-13)*

<sup>7</sup> Uva rera akeiva oiso puraoro, “Tisa, aa vo vuutao-a oa-ia va vao vuria karekeperea? Uva eake iava va reesioovere, ra va iava oiso va eveiio, O, ari va-a vao oa karekesa tutuuvoi?” <sup>8</sup> ✧ Oa iava Jisas oiso puraroepa voeare, “Voeaopa ora vatatopo iraopata vearovira. Teapi visii keaive. Riro irara rutu uriopaaverea ragai vaisiara-ia ora vaisipaoro, oiso purapaaverea, Ragai raga-a vao-ia Kraisi. Uva oiso tapo purapaaverea, Vo vuuta-a vao-ia oa tutuu pievoi. Oire ra viapau oiso voea sirova utupata. <sup>9</sup> Ari ita, utupaua uva riroara iava tatuara upoara uvutaverea taru. Oire ra viapau oiso rikerikepata uriripaoro. Oara-a evara kareke rovoperea, ovusa Ovoioipa Voki kareke asavira touve.”

<sup>10</sup> ✧ Uva oiso voea tavireva, “Osaravu oa osaravu tapo ora upoaverea. Ovusa iravu king voeaaro iravu king voeaaro tapo ora upoaverea. <sup>11</sup> Uva riroara aue ravurikeara karekeperea vo rasitoo-ia, ovusa uvarovu rirovira ogeopaave. Ora riroara upiara karekeperea, ovusa vuvuiua-ia riroara reesiara keketaverea ora osasararovu rufu, varaoo oara visii uriri pieverea ora karekepaoro.

✧ 21:1: Mk 12:41-44 ✧ 21:2: Mk 12:42 ✧ 21:5: Mk 13:1 ✧ 21:6: Lu 19:44 ✧ 21:8: Lu 17:23 ✧ 21:10: Ais 19:2

12 ✨ “Oire uva vara-a varao oara ora kareke asavira toupavereea, ovusa visii ragai voeaaro visiigoa oiso raupaive visii vuri piepasa. Ora tapo visii iava gasipaivereea Reo Taisi Uvupa Keparo sovara-ia visii rovirieipasa kortua-ia. Oa iava visii tovopaivereea tuukepa keparo-ia. Aue iava uvare oiso novoupaavereea ra ragai vaisiara akaipa piepaive eisi piepaoro. Ora king irara puaro iare visii sipopaivereea ora gavman irara oisore ra ragai iava siposipopata. 13 Oire uva va-a vao visii vo raivaaro vao iava Vearo Siposipo tavitavipaoro. 14 ✨ Uva oisi-a eisi osa iava uvui iraopatai ra rugorugooara oavisii rukupata. Auepa teapi oraivaroi vatatopo rovopata ravaavira, oa-ia voea aatotavereea reoreoara oavisii-ia. 15 Ari ita, ragai raga visii gisipoaro-ia reoparavereea visiiipa vearoa taraia vatepaoro. Oire ra voeao oea visiiva keripaave, viapau oiso uvuipaave ra visiiva ora kaureopaave vo reo-ia vakupaoro vao oa vatepaa visiipa.

16 “Ora voeao tapo aite irara oavisii, ora aako riakoro oavisii tapo, ora araoko irara, ora taataa riakoro oea tapo visii tovopaivereea vo visiiva keripa irara vavaeoro-ia. Oire ra visii iava oearoi upopaivereea. 17 ✨ Ora oirara rutu tapo oea visiire vuri vovu iraopaavereea. Eake iava? Uvare ragai vaisiara toupavereea visii-ia. 18 Ari ita, ra viapau oiso visii kukuearo iava ouai orua vai opesiko ragape, vo rara virivarivira toupatavereea Pauto vavaeoro-ia. 19 ✨ Goruvira rutu toupatavereea. Ra va iava visii vaoro Oiraopa Tootoro outavereea vorevira.

### *Jisas Jerusalem-re Oiso Puraroepa Ra Opesi Ovoipereea (Matyu 24:15-21; Mak 13:14-19)*

20 ✨ “Ari ita, vo utupaua uva viurupa irara keketavereea, ovusa Jerusalem-ia kovokovovereea. Oire ra va iava vo vuuta eveita oiso, Uruia vuri piepa vuuta vao-ia oa tutuu pievoi. 21 Uva vo voki-a vao oa-ia Judia-ia tou irara uriri iraopaavereea, ra toriivereea pukuiara iare. Ovusa voeao oea Jerusalem urui sovara-ia toupaveira oea uvui iraopaai ra va kavuivereea uvai ragare avaooro. Ovusa voeao oea vo urui vatuaoro-ia toupaveira viapau oiso uvuipaai ra karea viro vo urui sovara iare. 22 ✨ Uvare vo voki-a eva oa-ia Pauto vuriara vorevira kare pierevereea. Oire ra oisi iava vo reo oa epao Tugoropa Vuku-ia oiraope rutu. 23 Uva siraovira rutu-a vairopa taruko riakovi, ora vairopa tapo airoa sikeo kakaero roro piepaivereea vo vuuta-ia eva. Ari ita, riroa rutu siraoa oa vo rasio-ia karekeperea. Uva va-a eva Pauto vo kasipuaoro oa voea-ia voeao oirara karekeperea. 24 ✨ Uva aue-ia toorioara voea toepaivereea. Ra va iava keripa irara voea tuukeive. Oire voava voea ouoro voeava avaave osararovu sovara iare. Ra voa toupave, ovusa osararovu raga iava Jerusalem-ia tasive vo urui upooro. Oire ra oisi raga toupave vo vuuta rutu-ia rekasisa, oa-ia oearovu vova ratau tou irara iava oea osararovu iava opesiavereea.

### *Oirato Oviitoaaro Ira Vorerovereea (Matyu 24:29-31; Mak 13:24-27)*

25 ✨ “Uva oaravu rutu reesiara karekeperea taru aue-ia ravireo ora kekira ora aaviikoara. Ora vo rasitoo-ia uva oirara rutu vovouaro vuriavereea rutu uririoro auepa toruva gurukoaro uvuoro, ovusa pokoo viro avakava-ia. 26 Oirara rutu varao iava rirovira rugorugooapaavereea oara vo rasio-ia karekeperea. Oire ra va iava voeare vovuuisiro rirovira uriri iraopape

✨ 21:12: Jo 16:2 ✨ 21:14: Lu 12:11-12 ✨ 21:17: Mt 10:22 ✨ 21:19: Re 2:7 ✨ 21:20: Lu 19:43 ✨ 21:22: Ais 63:4; Dan 9:24-27 ✨ 21:24: Dan 8:13, 9:27, 12:7; Re 11:2 ✨ 21:25: 2 Pi 3:10, 12

rutu. Ra avavaraopaoro osireiara iava kovopaaverea. Eake iava? Uvare aaviikoara ora tavariopaoro vuvuiua-ia rikerikepaperea. <sup>27</sup> ✧ Vosa va vao karekeperea, oire uva ragai Oirato Oviitoaaro tueiverea oirara rutu, ovusa iriavu rukuta sovara-ia uriora riroa rutuva gorua ora riroa ragai vaoro keraria. <sup>28</sup> ✧ Oire uva vara-a evara oara rovpaperea karekapaoro. Uva vo vuuta-a eva oa-ia toretaverea ora visii iava torevokovira kukueara kae pieoro taraasa. Uvare vo vuuta-a eva Pauto vaoro visii vorevira ousa, oa pou virosa tutuu piepai.”

*Fik Ova Oa Vo Pitupituro-a Vuutara Rovirieipasa*  
(*Matyu 24:32-35; Mak 13:28-31*)

<sup>29</sup> Oire uva va-a vao oa iava oavu reo ruu vatereva Jisas voeapa. Oa-ia oiso puraroepa, “*Fik ova kekepataveira ora oearovu tapo.* <sup>30</sup> Oire vosa vo evao keketa ovusa aruapaive airepa guruvaro purapaoro, oire ra va iava taraita oiso, Raipipa vuuta tutuu piepai oa-ia ravireo rororovere. <sup>31</sup> ✧ Eisi raga ita-a oiso osa vara keketaverea varao ovusa karekepape. Oire ra vara iava vearovira taraita oiso, Pauto vo vuutaaro tutuu pievoi. Vao oa-ia ora rera voearo vorevira ouparevoi rara ora rerapa voea tokipasa.

<sup>32</sup> “*Oiraopavira rutu oiso osa visii tavipaavo, Oirara rutu voeao vo vuutao iava oea kopii asavira toupaveira, ovusa vara evara karekeperea.* <sup>33</sup> ✧ Vuvuiua ora rasito oara rutu opesiperea, vo osa ragai vo reoaro viapau rutu oiso opesipe.

*Disaipel Irara Vearovira Rutu Utupaave Ora Vatatopopaoro*

<sup>34</sup> ✧ “*Ari ita, vearovira rutu uutupata. Teapi aio ragapata vo vokiara rutu-ia spak ragapaoro. Ora viapau oiso ra varao ragare rugorugopata tapo varaura vo ruiparoaro. Uvare vo pitupituro-a evara oara vuvuiua ra visii vuri piepaive. Ovusa vao Turaro vo vokiara ravotovira raga visii iare pou piro. Oiso rutu osa kuverava atari kare-ia poupa voveira voea kuverapaoro sita pievira.* <sup>35</sup> Oire uva vo voki-a vao oa voeao oirara rutu kuveraverea vo oea rasitoa rutu-ia toupaveira voea-ia vakoravira pou virooro. <sup>36</sup> ✧ Vuutara rutu-ia vokiara rutu-ia uutupata toupao Pautoa iare variripaoro, ra visii vatepareve gorua. Oire ra va iava vara rutupa varao oara virivaripata oara visii-ia karekepaperea. Ora vo osa tapo vo utupavira uva ragai ruvara-ia toretaverea vo ragai osireiara-ia.”

<sup>37</sup> ✧ Vokiara rutu-ia Jisas oisoa oirara rutu siposipopareve voea tarai piepaoro vo Tempel-ia. Oire uva vokiara pukuia-ia oisoa toupasa vorevira kareparo vao oa vaisipaiveira oiso, Oliv Kovo Pukui. <sup>38</sup> Uva oirara rutu oisoa vokiapa rutu torepaooro rera iare uriopaave rera vo reoaro uvupasa Tugoropa Kepa-ia, vo osa voea siposipopareve.

## 22

*Judas Reo Ovoi Purareva Jisas Vatesa Reipa Irarapa*  
(*Matyu 26:1-5, 14-16; Mak 14:1-2, 10-11; Jon 11:45-53*)

<sup>1</sup> ✧ Oire uva vo voki-a vao tutuu pieva oa-ia Jiu-pa irara bret-ia aioive vao oa-ia viapau yisa vai. Vo vokiore oisoa rugorugopaave oa-ia Pauto Isip iava Isrel-pa irara ouveva voea oriruoro. Ovokia-a vao oa oiso vaisipaive oiso Tagausapa Pasova Ovapa Vurei. <sup>2</sup> ✧ Uva voea reipa irara voeao iava koruou purapa irara pris, ora voeao riro tarai irara Reo Taisi-ia oea rutu rirovira

✧ 21:27: Re 1:7, 14:14 ✧ 21:28: Lu 18:7 ✧ 21:31: Mt 3:2 ✧ 21:33: Lu 16:17 ✧ 21:34: Mk 4:19; Lu 12:45; 1 Te 5:6-7 ✧ 21:36: Lu 18:1 ✧ 21:37: Mk 11:19 ✧ 22:1: Jo 11:47-53  
✧ 22:2: Mt 12:14



uriripaaepa oirara asavira. Oa iava oiso puraaepa, “Apeisi vai ragavira rera upopai rara ro-ia Jisas?”

<sup>3</sup> ✧ Oire uva va-a vao oa iava Seten Judas sopaaro-ia ora kiuroepa. Ro ira oisoa vaisipaive oiso, Iskariot. Voea iava katai tau erao (12) disaipel rera. <sup>4</sup> Oire uva voea tapo reipa irara ora reoroepa pris ora reipa irara voeao oea Rovopa Kepa-ia Tempel oisoa uutupaave. Oea rutu ruvara-ia raiva taraaroepa Jisas kosi piesa voea vavaearo iare. <sup>5</sup> ✧ Osa iava rirovira rutu rorupaiva. Oire uva oavu reoa goruiva rerapa moni vatesa. <sup>6</sup> Osa iava Judas voea vo reoaro aatoreva oiso puraoro, “Vearopai.” Uva va-a vao oa iava ora rerapa raiva taraaroepa rera kosi piesa Jisas voea vavaearo iare. Oa iava oiso aueparoepa ra arakasi vuuta vai kekereve vao oa-ia viapau oirara vai Jisas tapo toupave.

*Disaipeltoarei Tagausapa Vurei Vatatoposiva*  
(Matyu 26:17-25; Mak 14:12-21; Jon 13:21-30)

<sup>7</sup> ✧ Vao Tugoropa Voki Yis Asa Bret vo vokiario oa karekeepa. Oire uva vo vokia-a vao oa-ia oisoa sipsip vai kopii pieive koruova vai aue iare Tagausapa Vurei Pasova. <sup>8</sup> ✧ Osa iava Jisas Pita vaio arureva ora Jon oiso puraoro, “*Trapasiei ragaipa Pasova Vurei vatatoposa ravaavira ra va aiope.*” <sup>9</sup> Oa iava oiso rera akesiva, “Ovu-ia vo aio ravaaveare?” <sup>10</sup> Uva oiso vaiiterei tavireva, “*Uvusi. Jerusalem-ia kare uviroisivere. Oire iravu veiva aivarovere raivaaro. Ira uuko ovi kaeparevere rirova-ia pitokava. Ra rera sirova utusi vo kepa-ia koatasa oa-ia koatasa kareparovere.*” <sup>11</sup> Oire uva rera-a ro ira vo kepaaro-a tavi rovosivere rerare oiso puraoro, Tisa oiso puraroi, Ovu-ia ragai vo tugiaro epao tavete tugi oa-ia ragai vooaaro tapo disaipel Pasova Vurei aiopaavere? <sup>12</sup> Oa iava vei tavirevere oiso, Otugiviu-a vao riroa oa epao oiso viara-ia. Oa-ia aue epao *tebolara ora paupara. Oire ra vo tugi-ia Pasova Vurei ravaasi.*” <sup>13</sup> Uva va-a vao oa iava avasiapa. Oire uva oisi va kekesiva oiso osa Jisas taviroepa. Osa iava Pasova Vurei ravaasiva voa.

*Jisas Komunion Aio Vatareva Voeapa Disaipel*  
(Matyu 26:26-30; Mak 14:22-26; 1 Korin 11:23-25)

<sup>14</sup> Oire uva vo vuuta-a vao oa pou piropa, oa iava Jisas tebol-ia pauroepa. Uva voea aposel irara rera tapo vao pau ovoiaepa. <sup>15</sup> Uva voa oiso voea tavireva, “*Oiso ruipa iraoparai ra visii tapo vao Pasova Vurei aio rovopaavo, uvare utupavira riroa siraoa oupaavo rara.*” <sup>16</sup> ✧ Uva visii tavipaavo oiso, Viapau vorerivira Pasova aioavere ita vo rutu rekasisa uva va vao oiraopere rutu Pauto vo Saraaro sovara-ia.”

<sup>17</sup> Oire uva kap oureva. Oa iava oira-ia okarovu puraoro va-ia vearo vaisi purareva Pautoa-ia. Oa iava oiso puraroepa, “*Vao outa, ra va roo pieta ora visiipa.*” <sup>18</sup> Uvare oiraopavira visii tavipaavo oiso, Vo vokie ora vo utupaua uva viapau wain kuearo-ia ukaioraverea vo rutu tugurasa uva Pauto vo Saraaro karekeperea.” <sup>19</sup> Oa iava bret oureva va-ia vearo vaisi purasa Pautoa-ia. Uva va puteputeoro voeapa va vatepaoro oiso puraroepa, “*Vao-ia ragai iava varaua. Oa vatepaavo visii tauvapasa. Oa iava ragaire rugoopataverea.*” <sup>20</sup> Oire uva va aioivoiva ita, oisi raga piereva aue-ia wain karo kap-ia ouoro. Oava oiso puraroepa, “*Eva airepa agiagi Pauto vaaro o-ia revasiva ragai iava. Iria petoavo visii tauvasa.*”

21 ✨ *“Ari! Rera kekepata ro-ia ira vavaearo ragai vate ruipaparoí voeao vavaearo iare ragaíva kerípa irara. Ro-ia ira ragai tapo touparevoí vo-ia tebol. 22 ✨ Iu. Ragai Oirato Oviitoaaro vo raívaio sírova uturavere Pauto oa reesireva ragaípa. Ari íta, uva síraovira rutu rerapa ro ira ragai kosi piepare rara voeao ragaíva ora kerípa irara.” 23 Osa-a eísi osa íava voea raga ora akeakepaaepa oíso puraoro, “Iroutoa rutu-a vígei íava íra vo pitupítu vao puraparevoí?”*

*Disaipel Irara Ora Kaureopaaepa Ora Voea Raga Oíso, Irouto Vígei Íava Reiparoí?*

24 Oíre uva voea disaipel ora kaureopaaepa ora reopaooro. Uva oíso purapaaepa, “Iroutoa vaí vígei íava reiparoí?” 25 Oa íava voeare oíso puraroepa Jísas, “*King írara osararovu voeaaro oíso toupaveíra reípa írara voea voeaaro. Oa íava voeao oea-ia gorua toupaveíra voea oírara oaíve voeao tokípaiveíra. Oea oíso ora vaísípaaveíra oíso, Vígei vearo pitupítu purapa írara oírarapa. 26 ✨ Ari víapau uvuípataí ra oísi piepata oíso. Víapau. Ari vosa ró íra vísíípa oíso reíparo, íra oíso víovoko vísíví vísíí reroaroví toupaveve. Ari ró íra vísíípa reíparo, íra oíso tou íraopaveve vísíí kovopatoaro vísíí taúvapaoro. 27 Irouto-a reíto? E pásí kovopato rerapa aío tovparoí sípooaro? Eera ró íra aíoa-ia pauparoí, eera raga íta. Ari íta, ragai vísíí vurúvuruaro-ia toupavaoví oíso, Kovopato vísíí taúvapaoro.*

28 ✨ *“Voari tuarírí uva orekerovu karekepaera ragai-ia varao tavaka vovouoro. Oara ragaípa ríroara vavatare vatepaívora, vo osa ragai tapo toupatavara. Uva víapau ragai kavupatavara. 29 ✨ Ari íta, Aíte ragai reesireva oíso ra oírara rutupa reípaoro voea tokípa. Eísi raga íta osa vísíípa vo reesí vateaverea. 30 ✨ Oíso ra tokía vao ragai vaaro oa-ia aítaverea ora ukáíotaverea vo ragai reraaro-ia tebol. Uva oíraopavira king varaaro-ia paupara paupataverea. Oa íava vao toupaooro oíso toupataverea, Reo rovíríeípa írara vísíí vígeípa Ísrel kataí tau erao (12) sararo Jíu-pa írara.*

*Jísas Píta-re Oíso Puraroepa, Ragaíre Ísívauvere*  
(*Matyu 26:31-35; Mak 14:27-31; Jon 13:36-38*)

31 ✨ *“Auoro Saimon, Saimon uvurí! Seten vísííre arereva oíso ra vísíí roporoporeve voeao raverave vovou írara veraveraoro. Oíso osa wít roge-taaro veraverapaveíra oíra aíoaro aríarava. 32 ✨ Ari íta, víí taúvapaoro varírírái, oíso ra víí vaaro oírao píe vovou víapau raveravepape. Ra va íava ora poreuvereá vorevíra voreoro ragaíre. Oa íava araoko írara oara goru píerívereá rutu.”*

33 Oa íava Píta rerare oíso puraroepa, “Turaro. Easí vatatoporái, oíso ra víí tapo tuukea íare avara. Ora oíso tapo ra víí tapo kopííra.” 34 Uva Jísas Píta-re oíso puraroepa, “*Vo rupao-ia vo osa kookaí gau asavira toupaveve, ovusa vo peva purarí oíso purapaooro, Víapau taraíparái eera-ia Jísas.*”

*Bokís Moní Íava Ora Ogataara Ora Toorío*

35 ✨ Oa íava Jísas voea rutu tavíreva oíso, “*Voari tuarírí uva vísíí sípooava. Uva víapau auero vaí kaeoro avataepa moní bokísro vaí, ora ogataara vaí, ora tasípara vaí, ora tooríoara vaí. Uva vo vuuta-a eva oa-ia oaravu avu vaípa apotataepa, eke víapau?”* Oa íava oíso puraapaaepa, “*Víapau.*” 36 Oíre

✨ 22:21: Jo 13:21-30 ✨ 22:22: Ap 2:23, 4:28 ✨ 22:26: Lu 9:48 ✨ 22:28: Hi 2:18, 4:15  
✨ 22:29: 2 Ti 2:12 ✨ 22:30: Lu 14:15; Re 19:9 ✨ 22:31: Jop 1:6-12; Amo 9:9 ✨ 22:32: Jo 17:9, 15, 21:15-17 ✨ 22:35: Mt 10:9; Lu 9:3, 10:4

Jisas oiso voeare puraroepa, “Ari ita, irouto vo vokio-ia moni bokis vaiva toupaveve, oire ra vava avaro aue tapo ogata. Ora aue tapo toorio vai. Ari vosa viapau iraipe ira ruvara-ia, oire ra kuvupatoa vai-ia monia vai ou rovoreve ora rerapa irai toorio vai vorisa oa-ia.” <sup>37</sup> ✧ Eake iava? Uvare Tugoropa Vuku oiso puraepa, ‘Rera tapo takuvuiverea vuri pitupituro purapa irara tapo.’ Oire uva oiso visii tavipaavo ra vo reo eva oiraope rutu vao oa karekeepa ragai iava. Ari ita, vo reoro rutu varao Tugoropa Vuku oara purava ragai iava, evara-a oara oiraosa auepai rutu.” <sup>38</sup> Uva disaipel irara rerare oiso puraepa, “Turaro. Kekepari? Easi igei ruvara-ia vaiterei-ia vaitere toorio vaio vo-ia.” Oa iava voeare oiso puraroepa, “Ovoiei.”

*Jisas Variria Purareva Getsemani-ia*  
(Matyu 26:36-46; Mak 14:32-42)

<sup>39</sup> ✧ Oire uva Jisas riro ruvi kavuoro avaroepa Oliv Kovo Pukui iare oiso osa raga oisoa piepareve vokiara rutu-ia. Oire uva disaipel irara rera sirova utuaeapa voare. <sup>40</sup> ✧ Oa iava vao pou viro ovoioro oiso voea tavireva, “Variripatai. Ra va iava varao kokarapara viapau visii-ia poupa piro visii kove piepaoro.” <sup>41</sup> Oa iava voea arova gare visivi avaroepa. Uva voavi kokoto rekuroepa varirisa oiso puraoro, <sup>42</sup> ✧ “Aite. Vosa ruipapau ra ragai iava o kap verari iria agasioi rutu aue iava siraoa vo vavataaro. Uva viapau uvuipau ra ragai vo ruipaaro sirova utuu. Viapau. Ari vii raga vo ruipaaro sirova utuu.”

<sup>43</sup> Uva va-a vao oa iava iravu ensel vuvuiua iava vararoepa rera goru piesa. <sup>44</sup> Oire uva riroa siraoa sovoreva Jisas ora rera-ia. Oa iava goruvira rutu variriroepa. Uva rirovira rutu pupuraki iraroepa oiso osa revasiva iria kosikosio viropa rera iava rasiua arore kovekovepaoro.

<sup>45</sup> Uva variri opesiroiva, rera voeaaro iare voreroepa disaipel. Oa iava voea kekereva, ovusa uusipaaepa. Uvare rirovira sirapaaepa, oa iava rurapaiva. <sup>46</sup> Osa iava voea erao piepaoro oiso puraroepa voeare, “Eakere uusipatai? Toreta ra varirita. Teapi kokarapa vovouro visii iare uriope visii kove piesa.”

*Judas Jisas Tovoreva Keripa Irara Vavaeoro-ia*  
(Matyu 26:47-56; Mak 14:43-50; Jon 18:3-12)

<sup>47</sup> Oire uva Jisas tovira raga reoreoparoepa, ovusa riro irara rutu urioaepa. Uva rera ro Judas voeao raga iava aposel irara ira voeapa iraroepa. Oa iava Jisas iare tutuu pierera rerava uugaasa. <sup>48</sup> Uva Jisas oiso puraroepa rerare, “Judas. E Oirato Oviitoarova uugaapauei, oiso ra keripa irarapa rera kosi pieri, eke?”

<sup>49</sup> Oire uva voeao disaipel irara oea Jisas tapo toupaiava, oea voea kekeoro voea-ia taraiapa oiso, Asi vo vuuta-a vao oa-ia karekepai vao vuria. Oa iava oiso puraepa, “Turaro, oiso ruipapaiei ra voeao upoio vara-ia toorioara, eke?” <sup>50</sup> Oire uva va-a vao oa iava iravu voea iava Rovopato Pisto kovopatoaro uvareoaro toereva rera pakooro oisova oirapapa varata-ia. Oa iava voava koveepa. <sup>51</sup> Uva Jisas rera kekeoro oiso puraroepa, “Ae! Vo pitupituo eakari!” Oa iava rera kokiario-ia vavaea tovoreva rera iava uvareoua vore pieoro. Osa iava rera iava vorevira veoroepa.

<sup>52</sup> ✧ Oire uva Jisas voea voeao reipa irara pris irarare vo reoro purapareva, ora voeao Tempel-ia uutupa irarapa reipa irara, ora voeao Jiu-pa irara oira vasi irara oea rutu urioaepa rera rausa. Uva voeare oiso puraroepa,

✧ 22:37: Ais 53:12; Mk 15:28 ✧ 22:39: Lu 21:37 ✧ 22:40: Mt 6:13 ✧ 22:42: Jo 5:30, 18:11

✧ 22:52: Lu 22:4, 37

*“E toorioarava uriotai ora kakuara, eke? Oire uva oiso pai rutu visiipa, Kavirupatoa vai ira tuukesa uriotai varava evara, raa?”* <sup>53</sup> ✱ Ari ita, vokiara rutu-ia oisoa visii tapo toupaa vo Tempel-ia. Uva eakepa oisoa voa ragai-ia pitu asapata? Eagara! Va purata. Uvare vo vuuta vao-ia visii vaaro oa-ia rupa vovou vo goruaro rirapai rutu.”

*Pita Oiso Puraroepa, Viapau Eera-ia Taraiparai Jisas*  
(Matyu 26:57-58, 69-75; Mak 14:53-54, 66-72; Jon 18:12-18, 25-27)

<sup>54</sup> ✱ Oire uva oisi-a oiso osa reoroiva, rera-ia pituiva. Oa iava rerava avaaepa. Uva rera koata pieiva Rovopato Pristo vo kepaaro-ia. Uva Pita rera sirova uturoepa. Oa iava voa rerapa tauaivi toureva. <sup>55</sup> Uva vo vo kepa kasuraaro sovara-ia tuitui kasi puraiva. Oa iava vo kasi-ia tuituipaaro paupaaepa. Oire uva voo-ia evoa uva Pita voea tapo pauparoepa. <sup>56</sup> Uva iriavu kovopava rera kekeeva, ovusa pauparoepa tuituipaaro. Oa iava tuupavira rerava vurapaaro oiso puraopa, “Easi ro tapo oisoa Jisas toupareve.” <sup>57</sup> Vo osa Pita oiso puraroepa ora taeao, “Auoo, viapau eera-ia taraiparai irare purauei.” <sup>58</sup> Oire uva va ita isivaaro iava iravu ita rera kekereva. Oa iava oiso puraroepa, “Auoro! Vii tapo iravu voea iava.” Oa iava Pita oiso puraroepa, “Easi ragai viapau.” <sup>59</sup> Oire uva katai vuuta putevoiva, va isivaaro iava iravu ita rirovira oiso puraroepa, “Oiraopavira. Ari rera tapo eera oisoa tapo toupareve. Rera ro-ia Galili iava.” <sup>60</sup> Vo osa Pita oiso puraroepa, “Auoro! Viapau evo reo-ia taraiparai oa purapari.” Oire uva oisi raga oiso puraparoepa Pita, osa ikauvira kookai gau ovoireva. <sup>61</sup> ✱ Uva Turaro Jisas ora poreroepa Pita-va tuupavira vurasa. Oa iava Pita vo reore rugooroepa oa purareva rerare Turaro oiso puraoro, “*Vo rupao-ia kookai gau asavira touparevere, ovusa vo peva purari oiso puraparo, Viapau taraiparai eera-ia Jisas.*” <sup>62</sup> Uva va-a vao oa iava Pita atoarova kosiro viropa rataure. Oa iava voa rirovira rutu gau iraoreva siraoparo.

*Jisas Agesipaaro Rera Upopaiva*  
(Matyu 26:67-68; Mak 14:65)

<sup>63</sup> ✱ Oire Jisas rauivoiva, rera tovipaiva rera upopaaro. <sup>64</sup> Uva rera iava osireito tavuruiva varoa-ia. Oa iava oiso puraaepa rerare, “Oire profet reo purari. Irouto vii taparevoi? Uvare ora vaisipaaveira, Profetato-a ragai.” <sup>65</sup> Oa iava rera-ia areorovu rutu takau reoro purapaiva rera-ia.

*Jisas Rovirieipaiva Kaunsel Irara Ruvara-ia*  
(Matyu 26:59-66; Mak 14:55-64; Jon 18:19-24)

<sup>66</sup> ✱ Ravireo kaero viropa ovusa reipa irara Irel iava ora guruaepa, ora voeao tapo riro tarai irara Reo Taisi-ia. Oa iava ora voea voeao iare Kaunsel irara rerava Jisas avaaepa. Uva oiso puraaepa, <sup>67</sup> “Igei taviri. Vii-a Kraisi viigoa roporeva Pauto, eke?” Oa iava oiso puraroepa, “*Vosa visii tavia, ra viapau va oirao pieta.*” <sup>68</sup> Ora vosa visii akepaa oarai iava reoara vai, ra viapau ita ragai vo rearo pukopata. <sup>69</sup> Ari vo vokie ora vo utupaua taru, uva Oirato Oviitoaaro oirapapa varata-ia pauparoverea vao Pauto vaaro vo uva riroa gorua toupaveira.”

<sup>70</sup> ✱ Oa iava voea rutu oiso puraaepa, “O! Ari vii raga-a vao Pauto Oviitoaaro, raa?” Uva oiso puraroepa, “*Ari ita, oiraopavira eisi osa ragai vaisipata oiso, Ragai raga ita vao-ia.*” <sup>71</sup> Oire uva oiso puraaepa, “Avoeao!

✱ 22:53: Jo 12:27 ✱ 22:54: Mt 26:58; Mk 14:54 ✱ 22:61: Lu 22:34 ✱ 22:63: Jo 18:22-23  
✱ 22:66: Mt 27:1; Mk 15:1 ✱ 22:70: Mt 27:11; Lu 23:3

Ra eake vaisi vai uvupe vuri vaisi vai rera ruvara-ia. Uvare ora rera gisipoaro-ia vo reo purarevoi oreoa uvuei ita.”

## 23

### *Jisas Rovirieiiva Pailat Ruvara-ia Kortua-ia (Matyu 27:1-2, 11-14; Mak 15:1-5; Jon 18:28-38)*

<sup>1</sup> Oire uva voea rutu rerava avaaepa Pailat iare. <sup>2</sup> ✧ Oa iava voa rovoaepa rera iava gasioro. Uva oiso puraaepa, “Rera-a ro-ia ira kekeiovora vo osa igei sara iraraoro piro pieparevora. Uva igeire tapo koruroera Sisa-pa takis vate arapa. Ari ita, ora vaisiparoveira oiso puroaro, Ragai raga-a Kraisi. Ragai king.” <sup>3</sup> ✧ Oire uva Pailat rera akereva oiso, “E vii-a Jiu reraoro king, raa?” Oa iava Pailat aatooro oiso puraroepa, “*Vii raga ita eisi purauei.*” <sup>4</sup> ✧ Uva va-a vao oa iava Pailat reipa irara pris irara ora Jiu-pa tuvetuvepa irara oeara rutu taviooro oiso puraroepa, “Viapau oiso oavu avu vai vuria vai kekeavoi ro-ia Jisas.” <sup>5</sup> Oa iava goruvira oiso puraaepa, “Ae! Ira-a eera vuvivira oirara rutu sita piepareveira voea siposipoaro vo Judia taere-ia. Uva Galili iava rovoroea evo pitupitu raga purapaoro. Oa iava vo rutu pouro virorao va raga purapaoro vo ruture.”

### *Jisas Rovirieiiva Herot Ruvara-ia*

<sup>6</sup> Oire uva Pailat va uru pieparevoiva, voea akereva oiso, “Esa rera ro-ia Galili taere iava, raa?” <sup>7</sup> ✧ Oa iava rera taviiva vo osa rera-ia Jisas taraiparoepa oiso, Vo rasio iava rera orasia oisoa tokipareve rera King Herot. Osa iava Pailat rera iare Herot Jisas siporeva, vo osa Jerusalem-ia toupavea.

<sup>8</sup> ✧ Oire uva Herot rera kekereva Jisas. Oa iava rirovira rorupavea. Uvare tuariri rutu oisoa rera iava uvupareve. Oa iava oisoa rera keke ruipaparo rutu. Oire uva oiso ruipaparoepa ra Jisas oai purareve ravotoa vai, ra oai kekereve. <sup>9</sup> Uva oisi-a oiso osa iava Herot rera akereva orekerovu ruture riroara. Vo osa Jisas viapau rerapa oreoi pukopavea vara iava. <sup>10</sup> Oa iava reipa irara pris ora voeao tarai irara Reo Taisi-ia oeara rutu vovio rera ruvara-ia toresa urioaepa uvavi-ia rera rovirieipaiva. Uva va iava goruvira rutu rera togapaoro rera iava gasipaiva. <sup>11</sup> ✧ Osa iava Herot ora rera voeaoro viurupa irara oea rutu Jisas akaipa piepaiva. Ora rera tovipaiva tapo. Osa iava iravu vearoto kuvuto ouiva rera-ia rera kuvusa. Oa iava rera vore pieiva aue iare Pailat. <sup>12</sup> ✧ Ari ita, voari tuariri uva oisoa Herot Pailat tapo ora keriparo. Uva vo vuutao raga-ia ora agiagisiepa.

### *Pailat Jisas Tapasa Evaio Parikou-ia Taviroepa (Matyu 27:15-26; Mak 15:6-15; Jon 18:39-19:16)*

<sup>13</sup> Oire uva Pailat reipa irarare pris kearoeapa, ora Jiu voeaoro tuvetu-vepa irara tapo, ora voeao rutu oirara. Uva ora gurusa urioaepa. <sup>14</sup> Oa iava voeare oiso puraroepa Pailat, “E rova uriotai ragai iare, oa iava oiso puratai, Ira-a ro oirara rutu vo pitupituroaro piro piereva? Uva rera akeavo vo visii osireiaro-ia torevokovira. Oire uvuta! Viapau oavu avu vai vuria vai kekea rera-ia ro-ia vao oa iava rera iava gasitavoi. <sup>15</sup> Oiso osa raga ita aue Herot ira rera vore pieravora vore vigei iare, uvare viapau vuria vai kekerevora rera-ia ro-ia. Oire uvuta! Ro viapau oiso oavu avu vai vuria vai purarevora, ra oai iava rera kopii piepe. <sup>16</sup> Uva voeaopa rera vate rovopaavoi, ra rera rahiive. Oa iava rera iava vaseavere rara. [ <sup>17</sup> Oire uva oiso toupaveira vo

✧ 23:2: Lu 20:22; Jo 19:12 ✧ 23:3: Lu 22:70; 1 Ti 6:13 ✧ 23:4: 1 Pi 2:22 ✧ 23:7: Lu 3:1

✧ 23:8: Lu 9:9; Mk 6:14 ✧ 23:11: Jo 19:2-3 ✧ 23:12: Ap 4:27

pitupituo Tagausapa Vurei Pasova vo pitupituario. Ra va-ia Pailat iravu kosi piereve tuukepa kepa iava voea iare.]

18 ✧ Oa-a vao oa vituaro iava voea rutu oirara rirovira kaku pieoro raga pieiva oiso purapaoro, “Rera kopii pieoro Barabas iava vaseri tuukepa kepa iava igei iare!” 19 Ari ita, Barabas iava oavu upoa kosi piereva gavmanva vo riro urui sovara-ia. Uva oirato tapo kopii piereva. Oa-a eva oa iava rera tovoiva tuukepa kepa-ia. 20 Oire uva Pailat voeare ita reoa purareva ita. Uvare Jisas iava vasesa aueparoepa. 21 Oa iava kaku pieoro ita oiso puraaepa, “Rera tapari evao parikou-ia!” 22 Oa iava ita vo peva pie vuutua-ia vorevira voea ita akereva oiso, “Eakepa? Ro oirato Jisas, aa vao vuri pitupituo purarevora? Viapau oiso rera-ia vuria vai kekeavoi, ra oai iava rera kopii piepe. Uva va-a vao oa iava oiso ruipaparai ra ragai voeaaropa rera vate rovoa, ra rera raga rovoive. Ra rera iava vasea.” 23 Vo ovusa rirovira rutu goru iraopaaepa. Oa iava goruvira rutu voea rutu raga piepaoro rerare oiso puraaepa, “Rera tapari evao parikou-ia!” Osa iava voea vo reoaro uvuparevoiva Pailat, goruvira vorevoreripavira rera iava vasereva. 24 Uva va-a eva oa iava Pailat reo goru purareva voea vo ruipaaro sirova utuoro. 25 Uva ro-ia riro kaureoto gavmanva ora upo purapato ira tovoiva tuukea-ia, ira arepaiva oirara, oiso ra rera vore piereve Pailat vorevira voeapa. Osa iava Pailat Barabas iava vasereva voeapa voea vo ruipaaro sirova utuoro. Ari rera Jisas tovoreva keripa irara vavaeoro-ia.

### *Jisas Tapaiva Evao Parikou-ia*

(*Maty 27:32-44; Mak 15:21-32; Jon 19:17-27*)

26 Oire uva rerava Jisas avaaepa. Uva iravu-ia oirato pituiva aue Saimon, aue iava rera Sairini urui. Uvare rerava aivaroiva ovusa riro urui-ia kare uvirosa aueparoepa. Oa iava rera vutuoro-ia evao parikou tovoiva vao Jisas oa kaepareva. Oa iava vava rera sirova uturoepa.

27 ✧ Ovusa riro irara rera sirova utupaaepa. Riro riako tapo airoa rerapa gau eraro-ia gaupaoro utupaaepa rerapa siraoparo. 28 Oa iava Jisas vairore oiso purasa ora poreroepa, “*Avairo Jerusalem iava. Opeita gaupata ragaipa. Easi vearopai ra ora visiipa gaupata ora voearopa visii ovii iraraaro tapo.*” 29 Uvuta! Vo utupavira uva ovuutavu urioperea uva oiso puraaverea, Vairo riako, ora vairo kavau asa riako, ora vairo airoa viapau kakae vure roro piepaiva, airoa rutu roruive, uvare viapau ovii irara vai epao siraoa vo vavataaro oupasa. 30 ✧ Vo vuutao-ia oa-ia oiso puraaverea pukuiarare, Igei rakuoro koveta. *Ora varaore garepa pukuirovi tapo oiso puraaverea, Igei tavuruoro koveta.* 31 Aue iava uvare vosa vo vokia-ia oiso ragai piepaivoi osa vo evao oa-ia uuko ovi toupavoi, oire ari eake vai puraive vao-ia erako ova?” [Ro Jisas ira oiso toupave osa eva ova vo eva-ia uuko ovi toupai vearoa. Uva erako ova oa oiso toupavoi vao erako ova osa voeao vuri irara vova Jerusalem-ia.]

32 ✧ Oire uva Jisas oiso puraroiva, rerava avaaepa ora aitereivu tapo vaitereo aiterea oisoa vuri pitupituro rutu purapasi. Uvare oiso vovoupaepa ra vaiterei tapo rera upoive Jisas. 33 Uva va-a vao oa iava uvavu poua viropa va vaisiario, Kukue Keru Pukui-ia opukuia-a vao oa-ia rera tapaiva evao parikou-ia. Oire uva evaiterei tapo tapaiva vao oiso-ia, Iravu oisova oirapapa varata vao Jisas, ari iravu oisova koike varata. 34 Oire uva Jisas oiso puraroepa, “*Aite! Voeao iava vuriara verari. Oea viapau va-ia taraipaai vao oa puravoi ragai-ia.*” Uva kuvupara-ia satu visiko purapaiva

vara roo piepaoro ora voeapa. <sup>35</sup> Vo ovusa oirara rutu voeava vurapaiva. Ari voeao tuvetuvepa irara Jiu iava oea oiso puraaepa, “Ari oearovu raga oisoa tauvapari. Oire vosa vii oiraopatoa rutu Ropotó Kraiss Pauto reraaro, oire uva va iava vii raga uvuipau ra ora tauvau.” <sup>36</sup> ✧ Uva voa voea tapo viurupa irara rera tovipaoro putepaiva. Oa iava rera vateiva aue viniga itakopa ovi <sup>37</sup> oiso purapaoro, “Vosa vii Juda kingaro rutu, oire ra ora vii raga ora tauvau.” <sup>38</sup> Oire uva oavu rigatoa rera kukuearovi-ia toupaiava. Oa oiso purapaepa, JISAS KING OAIIVE JIU.

<sup>39</sup> Uva vaitereo aiterea tapo rera kotoiva aiterea iava iravu rerare oiso puraroepa rera tovipaoro Jisas, “E vii-a Kraiss, raa? Oire vii raga ora tauvapaoro vigei rutu tapo tauvari.” <sup>40</sup> Ovusa iravu vaierei iava rera uvuoro kasipuoro oiso puraroepa, “Easi vii tapo evo siitoka ourivoi, oiso osa reraei. E viapau Pautoa-pa uriripauaei, raa? <sup>41</sup> Vegei tapo torevokovira vo siitoka ouvevoi oa torevokopai vegei vo pitupituroarova. Ari ro-ia ira viapau vuria vai purareva.” <sup>42</sup> Oa iava oiso puraroepa, “Jisas. Vosa turarouvere, uva evo vuuta-ia ragaivire rugoouvere.” <sup>43</sup> Uva Jisas oiso rerare puraroepa, “Oiraopavira rutu vii tavipaavoi oiso, Vo vokio-ia ragai tapo tourivoi vo Peradais-ia vo roru oupa tapi.”

### *Jisas Kopiiroepa*

*(Matyu 27:45-56; Mak 15:33-41; Jon 19:28-30)*

<sup>44</sup> Oire uva ravireo vuuta uvuiaro rutu-ia kopiiroepa. Oa iava ravireo utoroiva, rasitoo rutu-ia rupaepa vo rutu tugurasa vo peva vuuta-ia (3 klok) ovaiaro. <sup>45</sup> ✧ Vo osa va vao varoua oua oisoa Rovopa Kepa-ia Tempel kotovira toupaiave vo rataoa-ia touua Pauto vo topisiaro iava, oa ariarava oua vuritavira rutu kari piropa, oiso ra oirara rutu Pauto ruvara iare tutuu pieive.

<sup>46</sup> ✧ Uva Jisas rirovira rutu oiveoro keeraoro oiso puraroepa, “Aite! Ragai vii vavaearo-ia urauratoa oaa tovoavoi.” Uva oisi-a oiso osa pura ovoiroo vovouisi vikireva kopii ovoiroo.

<sup>47</sup> Oire uva va-a vao oa kekereva ro viurupa irara reitooaro. Oa iava Pauto vaisiario kae piereva rera-ia vuurapa vaisi puraoro. Oiso puraroepa, “Oiraopatoa rutu ro-ia, torevokoto Jisas.”

<sup>48</sup> Osa-a eisi osa voea rutu oirara voeao oea urioaepa siituesa oea vara rutu varao kekeiva oara karekeepa. Oa iava ora voea iava kopukopuara tapatapapaoro kareaepa sirao iraoapaoro.

<sup>49</sup> ✧ Vo osa rera Jisas vate iraraaro tauaivi toko pievira torepaaepa, voeao oea Galili rutu iava utuaepa rera sirova. Airorovu tapo riakora airoa vara rutu varao siitueiva.

### *Jisas Iava Varaua Tovoiva Aveke Rikui-ia*

*(Matyu 27:57-61; Mak 15:42-47; Jon 19:38-42)*

<sup>50-51</sup> ✧ Oire uva iravu oirato voo toreparoepa. Rera vaisiario, Josep eera Juda vo uruiaro iava vao oa oisoa vaisipaive oiso, Arimatia uvava rera-a vearoto torevoko vovouto eera. Reipa irara iava rera-a Kaunsel irara voea vo Jiu. Ari ita, ira ro viapau oiso voeao Kaunsel irara vo vovouaro sirova utuparo vao Jisas kopii piepa vovou. Ari oisoa Pauto vo Saraarore rugoopaoro vare tuepaoro. <sup>52</sup> Ira-a ro ira Pailat iare avaroepa Jisas kopii areisa rera ruvara-ia. <sup>53</sup> Oire uva va-a vao oa iava vo kopii rere piereva rera tavurusa popotepaua-ia varoua. Oa iava rera tovereva oavu-ia tova urui.

✧ 23:36: Sam 69:21 ✧ 23:45: Eks 26:31-35; Hi 9:8 ✧ 23:46: Sam 31:5 ✧ 23:49: Sam 38:11; Lu 8:2-3 ✧ 23:50-51: Lu 2:25

Uva voa-a vo uva rikui tekaiva ravaavira aveke-ia rirova voari tuariri uva oirara-ia viapau oisoa irai tovapaive. <sup>54</sup> Oire uva vo voki-a vao orekerovu ravaapa voki aue iare Sabat voki oa-ia Josep vao purareva. Oa iava Sabat vokiapa tutuu pieva oiso ra karekepe.

<sup>55</sup> Oa iava vairo riakora Jisas sirova utuaepa Galili rutu iava, airoa Josep sirova ita utuaepa voare vo tova siituesa oiso, Apeisi avu ragavira rera tovaparevoi? Oire uva va-a eva oa tapo kekeiva. <sup>56</sup> ✧ Uva rera siitueivoiva, vovevira kareaepa ora vairo vo uruiaro iare. Oa iava voa korovo oviro ravaasa kareaepa varao vearopa geesi oviro. Oire uva Sabat voki-ia reareaepa oiso osa oisoa purapape Reo Taisi.

## 24

### *Jisas Toreroepa Vovevira Tootoopaoro (Matyu 28:1-10; Mak 16:1-8; Jon 20:1-10)*

<sup>1</sup> ✧ Oire uva rovo voki rutu-a vao wik vituaro iava, ovokia-ia avaaepa tova iare vo ovirova varao riro geesi oviro aue korovo oara ravaa rovoiva. <sup>2</sup> Uva avekere vura ragaiva iria pekaiva vo tova riaaro iare. Oa iava viapau vo tova-ia toupaeava. <sup>3</sup> Uva va-a eva oa iava voa koataaepa. Oire uva voa viapau rera iava varaua kekeiva Turaro Jisas. <sup>4</sup> ✧ Oa iava rirovira rugorugoo iraopaoro vavagisipaaepa rutu. Uva voa aitereivu oiratoarei kekeiva, ovusa voavi ruvara-ia torepasiepa. Aiterea iava kuvupara rutu sisikorepaiva. <sup>5</sup> Oa iava rirovira rutu uririaepa vo riako vairo. Oire uva takua viropa rasiua arore. Vo ovusa vaiterei oiso vairore purasiepa, “Eake-a vao oare rora taraapatai ro tootooto vova kopii irara voaro? <sup>6</sup> Viapau oiso vo touparevoi. Ira vovevira toreroe. Ari ita, vo reore rugoo iraota oa vaterevora visiipa vo osa Galili-ia touparevora. <sup>7</sup> Vo uva oiso puraroepa, *Ragai vatepaivoi rara vuri irara keripa irara vavaeoro iare. Ra ragai tapaiave evao parikou-ia rara. Oire uva vo pevapa voki-ia toreravere vovevira.*”

<sup>8</sup> ✧ Oiso osa iava vo reore rugooaepa Jisas oa purarevora. <sup>9</sup> Oire uva tova tavukiaro kavuoro vovevira kareaepa katai tau katai (11) disaipel tavisa ora oearovu rutu. <sup>10</sup> ✧ Oiso Maria o Makedala iava, ari aue Joana, ari Maria Jems aakoaro airoa rutu toupaiava. Ora airorovu airoa tapo toupaiava, ovusa vo reo iava vao voea aposel irara tavipaiva. <sup>11</sup> Ari voeao aposel irara keapaaepa oiso, Kiuvu reo raga-a oa tavipaivoi. Oa iava viapau oiso vo riako vo reoaro oirao piepaiva. <sup>12</sup> Vo osa Pita ikauvira avaroepa vo tova iare. Oa iava takuro viropa uva voa kokepareva. Uva varoara raga kekereva osa voa toupaiava. Oa iava vovevira voreroepa kepa iare. Osa iava rirovira rutu rugorugoo iraoparoepa tavetavepaoro va-ia vao oa karekeepa.

### *Aitereivu Jisas Tapo Vokapasiva Vo Raivao-ia Vo Emeas (Mak 16:12-13)*

<sup>13</sup> Oire uva vo voki raga-a vao oa-ia aitereivu voea iava vokapasiva gare uruivi iare. Va vaisiara aue-ia, Emeas. Aue iava Jerusalem-ia oisoa vo raiva-ia avapaave voare Emeas. Uva aue-ia oisoa uvuipape voare katai tau katai vuuta rutu (11 kilomita). <sup>14</sup> Oa iava voa vokapaoro avapasiepa varao rutu-ia ora reopaoro oara karekeepa. <sup>15</sup> Oire uva voa ora reopaoro vokapasiva. Uva rera Jisas vaiterei ruvara-ia ora karekeroepa. Oa iava vaiterei tapo vokapaoro avaparoepa. <sup>16</sup> ✧ Ari vaiterei iava osireiara auuepa. Oa iava viapau oiso rera eveipasiva oiso, Jisas ro-ia.

✧ 23:56: Mk 16:1; Eks 12:16, 20:10 ✧ 24:1: Lu 23:56 ✧ 24:4: Ap 1:10 ✧ 24:8: Jo 2:22  
✧ 24:10: Lu 8:1-3 ✧ 24:16: Jo 21:4



17 Oire uva oiso waitereire puraroepa waiterei akeoro, “Eake-a vao oa-ia ora reopaoro avapasiei?” Uva oisi-a oiso osa puraroiva, ruusiva siraooro rutu. 18 Oa iava iravu rera vaisiario, Kliopas rera aatooro oiso puraroepa, “Riro irara rutu ouruirovu iava vo-ia Jerusalem-ia toupaivoi. Ari vii vai pasi kataito, viigoa viapau pasi taraipauei vao-ia oa karekeerao oiso Jerusalem-ia vo vuttao raga-ia, raa?” 19 ✧ Uva waiterei akereva Jisas oiso, “Eake-a?”

Oa iava oiso purasiepa, “Auoro! Vao-ia oa karekeei ro-ia Jisas vova Nasaret eera profetato. Ira oisoa riro gorupa kovoro purapareve, ora riro gorupa reoro tapo vo Pauto osireiario-ia ora vo tapo oirara rutu osireiario-ia. 20 Aue tapo uvare voeao reipa irara pris irara ora voeao tuvetuvepa irara vigei voeaaoro rera tovoivora voeao gavman irara vavaeoro-ia. Oa iava voea gavman irara reo goru puraivorao rera uposa. Uva rera tapaivorao evao parikou-ia. 21 Ari ita, voari tuariri uva oisoa igei rera oirao piepaio, Eera ira voea oirara karureverea Isrel-pa irara vova tuukea-ia. Iu. Ora oreovu tapo vao iava rera vo kopiiaro isivaoro iava vo vokia-ia vo pevapa voki vo vokia. 22 Ari ita, airovua vairo igei iava airoa igei sita pievoi rutu. Uvare vokipaua rutu vokiae voarire tova-ia. 23 Oa iava voa viapau rera iava Jisas varaua kekeivo. Osa iava vorevira voreae igei tavisa. Ari ita, uva voa oearovu enselpa irara tapo kekeivo oea oiso puraae, Ira tootoovira touparevoi. 24 Oa iava oearovu igei iava voare tova-ia tavariivo. Uva oisi raga ita va kekeivo oiso osa vo riako taviae. Vo uvare voa viapau rera kekeivo.”

25 Oire uva Jisas waitereire oiso puraroepa, “Ari ita, viapau oiso visii-a rugorugooa vaiiei. Uvare visii iava sopaura vavagisi iraopapeira. Oa iava viapau vo reoro oirao piepataveira profet irara oara iava oisoa tavipaave voari tuariri. 26 ✧ E apeisi-a? Esa pasi viapau taraipataveira oiso, Vo raga osa Kraisi siitoka ou rovo iraoreve, oire ra utupavira rera vaaro keraria ora gorua oureve?” 27 Uva vova varao rovoepa Moses vo reoro-ia vo pou virosa voea rutu profet irara. Oa iava waitereipa siposiporeva oiso vo reo rutu varao oara Tugoropa Vuku-ia oisoa tupaive, vo reoro iava rovopaoro oreoroa rigatoiva Moses ora profet irara. Oara rutu oisoa rera raga iava tavitavipape.

28 Oire uva vo urui iare tutuuiva vao oa iare avapasiepa. Oa iava Jisas oiso rovoroepea ra vo urui-ia waiterei veraoro putereve rera raga avaro. 29 Vo osa rera vovesivoiva, oiso purasiepa, “Vo tou rovori vegei tapo. Uvare ravireo rokorevoi. Uva rupasa auepai.” Oire uva waiterei tapo tousa koataroepea. 30 Oa isivaaro iava aiosa auepaaepa. Uva waiterei tapo puaoroepa rera Jisas. Uva Bret oureva va-ia veoro vaisi purasa Pautoa-ia. Oa iava waitereipa va puteputereva waiterei vatevatesa vara. 31 Uva oisi-a oiso osa va purarevoiva, waiterei iava osireiara karu piropa roroioro. Oa iava vearovira rutu rera-ia taraisiepa rera eveioro. Uva va isivaaro iava waiterei arova opesikoroepa avaro. 32 Oire uva ora reopasiepa waiterei raga oiso, “Ari ita, vo osa vopakavevo raivaaro, ovusa vegei tavitaviparevo aue iava Tugoropa Vuku vituaro iava. Uva oiraopavira ita, vegei iava vovouisirei roruro rirovira rutu kovatae rera vo reoro sovooro.”

33 Oire uva vo voki raga-ia Jerusalem iare vore karesiepa katai tau katai (11) disaipel iare pou virosa ora oearovu. Uva ora guruaepa voea rutu 34 ✧ oiso puraoro, “Oiraopavira rutu Turaro Jisas vorevira torerei Saimon iari kekerevo.” 35 Oa iava voeapa siposiposiva varao iava oara waiterei iare

karekeepa raivaaro. Uva oiso purasiepa voeare, “Easi eera vegeipa bret puteputerevo. Oa iava rera-ia taraiveie rera eveioro.”

*Jisas Ora Karekeroepa Rera Voeaaro Iare Disaipel  
(Matyu 28:16-20; Mak 16:14-18; Jon 20:19-23)*

<sup>36</sup> Oire uva oisi-a oiso osa ora reopaoro toupaiwa, ovusa Jisas voea vuutaaro-ia ora tore pieoro ora karekeroepa voea iare. <sup>37</sup> Uva rirovira rutu ora sitaaepa. Oa iava uriripaaepa rutu oiso keapaoro, Iravu uraurato tugarato ira voea iare pouro viroi. Oa iava rera kekeivoi. <sup>38</sup> Uva voeare oiso puraroepa, “*Eakepa vurivira rutu ora sitatai? Ari eakere visii iava sopaura ragai-ia vakuvaku asapai?*” <sup>39</sup> ✧ Ragai vavaeoro keketa ora ragai kokotoaro viupara kekesa. Easi ragai raga-a vao, ragoa toupaaivo. Oire ragai-ia pituta ora visii varaaro iava vavaeara, uvare tugaratoa-ia viapau keruara vai toupaveira oiso osa varao oara ragai-ia toupaiivo oara kekepatavo ragai-ia.” <sup>40</sup> Oire uva oisi-a oiso osa puraroepa ora rera iava vavaearei karekeoro ora kokotoarei voeapa. <sup>41</sup> Oa iava rirovira rutu roru iraopaiva. Ari touvira viapau rera oirao piepaiva rutu. Uva rirovira rutu rugorugoo iraopaaepa. Osa iava voea akereva oiso, “*Esa aioara vaiei voraro?*” <sup>42</sup> Oa iava rerapa ataria vateiva oa oriiva. <sup>43</sup> ✧ Uva va ouoro va aioreva ovusa rera siituepaiva rugorugoo iraopaoro.

<sup>44</sup> Oire uva voeare oiso puraroepa, “*Voari tuariri uva visii tapo toupaa- vora, uva visii taviavora vo reoro rutu iava varao ragai iava vo Reo Taisi-ia vao Moses vaoro, ora varao rutu oara rigatoiva profet irara vao-ia Vukua voea vaoro, ora vo Sam. Uva vo reoro rutu-a varao oara oiraoei.*” <sup>45</sup> Uva va-a vao oa-ia voea vovouaro roroio pierewa. Oa iava Pauto vo reoroaro-ia taraiaepa rutu. <sup>46</sup> ✧ Osa iava voeare oiso puraroepa, “*Tugoropa Vuku oiso purapapeira, Kraisi tavaka vo vavataaro kae rovo iraoreve. Oa iava vo pevapa voki-ia vorevira torerovere taru tova tapi iava.*” <sup>47</sup> Oa iava rera vo kovoaro iava siposipo iraopaivere vo oirara rutupa voraro rutu okovoa-ia raiva purareva Pautoa iare. Ra va iava voea iava sopaura oaive vorevira pore piro vova vuri vovouro oaive. Oire ra Pauto voea iava vuriara oaive verareve. Uva vova Jerusalem-ia vo siposipo vao rovo iraopataivo rara. <sup>48</sup> ✧ Uva uvui iraopatai ra vara iava varao siposipota oara keketavo rutu. <sup>49</sup> ✧ Oire uvuta! Va-a vao-ia oa iava Aite taviroepa voari tuariri, ira-a ro ira visiipa vatepaavo Tugoropato Uraurato. Uva rera sipaovere visiipa vo osa vo urui-ia Jerusalem urui-ia tou rovota. Oa-ia visii iare va vao rera vo goruaro vuvuiua iava varapere visii-ia okovorovu purapasa oearovupa oirara vao Pauto vo kovoaro.”

*Pauto Jisas Kae Pierewa Vuvuiua Iare  
(Matyu 16:19-20; Aposel 1:9-12)*

<sup>50</sup> ✧ Oire uva voava vo voea tuvetuvereva aue-ia ruture Betani-ia. Oa iava vavaea kae pierewa voea vateoro viraakrovopaivoivaova vao Pauto vo goruaro iava. <sup>51</sup> ✧ Oire uva voa-a vo uva voea viraakopareva touvira, ovusa Pauto rera kae pierewa vuvuiua iare. <sup>52</sup> Uva vao raga rera-ia Jisas vuurapa vaisi pura, Jerusalem iare voreaepa. Oa iava rirovira rutu rorupaiva rutu. <sup>53</sup> ✧ Oa iava vao oisoa vokiara rutu-ia Rovopa Kepa-ia Tempel toupave. Uva Pautoa-ia vuurapa vaisi purapaoro rorupaive rera-ia.

## JON

### Irapa Reoro Vo Vukuo Iava

Iravu-a ro Jon katai tau erao disaipel iava rera, ira oisoa kaviko irao-  
pareve rutu Jisas. Vaitereo ora Pita aiterea oearovupa disaipela irara  
oisoa irapasi. Uva Jisas vo araoreire keeraroepa ora Jems vo osa sara kovo  
purapasiva atari oupaoro ora aitetoa tapo Sebedi (Mk 1:19-20). Oa iava  
aiteto kavuoro utusiépa ora kovopa iraraoro Jisas sirova utuoro.

Oire uva vo rera vaoro-ia rigatóa Jisas iava poeravira rutu tavitaviroepa  
oiso, Rera raga Pauto ira oiravira karekeroepa vo rasio-ia toupasa oiso rutu  
osa vigei oirara. Uva viapau riroara vai siposipoara vai rigatoreva Jisas vo  
kovoaro iava, viapau. Ari Jisas vo siposiporoaro iava ora rera vo kovoaro  
vituario iava rigatoreva Jon, oiso ra oirara uvuipaai ra roroiovira taraiave  
oiso, Jisas-a ro Krais, Pauto Oviitoaoro rutu. Ira iavirava uvuipaviei ra  
Tootoo Ovoi oupe vo rera vaisiario-ia ora rera vo goruaro-ia.

Uva Pentikos Voki isivaoro-ia Jon toupaveva Pita tapo vo Jerusalem-ia (Ap  
3:1, 4:23). Oire vaitereo aiterea Kristen irara tauvasiva voeao oea oisoa  
Sameria-ia toupave (Ap 8:14-25).

1. Aviavi pie reoro aue iava Pauto vo Reoro rera raga ita Krais, 1:1-18.
2. Jon Baptais vo tavitaviaro iava, ora vo osa Jisas rera vo kovoaro  
rovopasa voeao disaipel ropo rovoreva, 1:19-51.
3. Voraro virireva Jisas rera vo kovoaro ravoto kovoro purapaoro,  
okovoroa iavirava lotupa irapa irara Jiu reoa puraiva Jisas kopii piesa,  
2:1-50.
4. Jerusalem-ia toupaooro disaipel irara siposiporeva ora rera iava. Oa  
iava oevu rera kotoiva evao parikou-ia, 13:1-19:42.
5. Jisas tova tapi iava vo pevapa voki-ia vorevira toreroepa. Oa iava  
disaipel irara iare ora karekeroepa, 20:1-29.
6. Vo toupai vao vituario iava oa iava Jon vo vukuo rigatoreva, 20:30-31.
7. Galili-ia Jisas disaipel tapo toureva, 21:1-25.

#### *Reo-a Vao Oa-ia Tootooa Toupaveira Oa Oiravira Karekeepa Ro Vaisiario Jisas Krais*

<sup>1</sup> Voari tuariri vo uva vo rasio pura asavira touva Reoa raga touva. Oa-a  
Reoa oa Pautoa tapo touva. Uva oisi-a eisi osa Pauto toureva, osa-a eisi osa  
Reoa raga touva. <sup>2</sup> Oa tuariri rutu Pautoa tapo touva. <sup>3</sup> Oreoa orekerovu  
rutu vituario. Oa iavirava Pauto orekerovu rutu purareva. Ari ita, viapau  
oiso oai oraivai raga iava karekeepa. Viapau. Ari Reoa raga-a orekerovu  
rutu vituario. <sup>4</sup> Oa-a Reoa Tootooa rutu vituario. Oa iava va Tootooa oirara  
rutupa Aviavia. <sup>5</sup> Uva va-a eva Aviavia oa rupapa aviavia vatepaiveira vare  
roropaoro. Osa iava eisi rupa viapau oiso vo Aviavi papupaiveira.

<sup>6</sup> Oire uva iravu oirato urioroepa rera vaisiario Jon, ro ira arureva Pauto.  
<sup>7</sup> Ira urioroepa oiraopa reo siposiposa. Va iava vao Aviavia tavitaviroepa  
voea rutupa, oiso ra va iava vao Aviavia uvuoro oirao pieive. <sup>8</sup> Uva rera-a  
viapau oiso va eva Aviavia. Viapau. Ari eera urio ragaroepa va iava vao  
Aviavia tavitavisa.

<sup>9</sup> Oaviavia rutu-a eva oiraopa. Oa oirara rutupa aviavia vatepaiveira.  
Rera-a eera Aviaviaro oirara rutupa ira urioroepa vo rasio iare. <sup>10</sup> Oa raga-  
a eva Reoa oa urioepa vo rasio-ia tousa. Uva rera-a ro ira iavirava Pauto

vo rasio rutu purareva. Uva oirara voea vo rasio-ia oisi iavirava viapau oisoa rera eveipaive. <sup>11</sup> Osa iava vararoepa vo tousa uva purareva rera voaaro. Ari ita, uva viapau oiso voeao rera voeaaro rutu rera ouiva. <sup>12</sup> Vo ovusa oearovu raga voea iava rera eveioro rera ouiva voeao oea oisoa rera-ia oirao piepaive. Oa iava voea vo vovouroaro-ia taraipaoro voea reesireva, ra oiso toupaiave rutu, voea-a Pauto ovii iraraaro rutu. <sup>13</sup> Ari voeao oea oiso toupaiaveira, Pauto ovii iraraaro viapau oiso eisire voea kavauivora aite irara ora aako riakoro oaive. Ora viapau oiso varaua raga vo ruipaaro-ia. Ora viapau oiso vo oirato raga vo ruipaaro-a. Viapau. Ari Pauto raga ora rera vo ruipaaro-ia voea kareke piepareveira oiso rutu, ra oiso toupaiave, Rera ovii iraraaro rutu.

<sup>14</sup> ✧ Oa raga-a vao-ia Reoa oa oiravira ora poreepa. Osa iava igei vuutaaro-ia toureva. Oa iava igei rera vaaro keraria kekeiova. Vao keraria-a rera vaaro ro-ia Kataitoa raga Oviito Aite ira arureva oa iava urioroepa. Ira-ia vereopa vovou toupaiaveira ora aue oiraopa pitupitu. Oara rutu iava agasiroepa. <sup>15</sup> Uva Jon Baptais rera iava taviro oiso puraroepa, “Era oirato tuariri rutu ira iava visii taviavora oiso-ia, Ro ira ragai sirova uturovere ira ragaipa reiparoveira. Eake iava? Uvare tuariri rutu toureva ovusa ragai kavau asavira touava.”

<sup>16</sup> Ari ita, vigei rutu ovatevatearovu rutu vorevoreripavira sirao vatero oisoa oupape rera ruvara-ia. Varao oara rutu iava agasiroepa. <sup>17</sup> ✧ Eake iava? Uvare Pauto vigeipa Reo Taisi vatereva Moses vavaearo-ia. Ari va vao rirao rutu vereopa vovou ora oiraopa pitupitu oara rutu Jisas Krai iavirava karekeepa. <sup>18</sup> Viapau oiso irai gare visivi Pauto kekereva. Viapau rutu. Ari rera raga ro-ia Pauto Oviitoaro ira Aiteto ruvara-ia oisoa toupave. Oire uva va-a eva oa iava Aiteto rutu iava oisoa vigei soporepave.

*Jon Baptais Tavitaviroepa*  
(Matyu 3:1-12; Mak 1:7-8; Luk 3:15-17)

<sup>19</sup> Oire uva Jiu iava voea reipa irara oearovu tauo purapa irara pris irara aruiva ora oearovu tapo Livai-pa irara voeao oea oisoa Tugoropa Kepa tokipaive. Oea Jerusalem iava urioaepa Jon akesa oiso, “Vii-a irouto?”

<sup>20</sup> Uva Jon roroio pievira rutu voeapa siposiporeva. Uva oisi siposipopaoro viapau oiso voeapa oreoi vairupaoro oai vataupareva. Ari oisi raga siposipopareva oiso purapaoro, “Viapau oiso Krai-a ragai ro ira roporeva Pauto, oiso ra Jiu-pa irara tuvetuvere.” <sup>21</sup> ✧ Oa iava rera akeiva “Ari apeisi-a. Vii-a profetato Ilaija, eke?” Oa iava oiso puraroepa, “Viapau.” Uva oiso ita puraapea, “Asi rera vai-a vii ro profetato viigoare tuepaioveira. Ro ira iava tuariri reo purareva Moses?” Uva voea vo rearo pukoooro oiso puraroepa, “Viapau.” <sup>22</sup> Osa iava rerare oiso puraapea, “Ari irouto-a vii? Igei oiso ruipapai ei ra voeao oreoiaro pukoooro oea igei aruivoiva, urioe. Apeisi-a oiso osa purapaei ora vii ragare?” <sup>23</sup> ✧ Oa iava Jon oiso puraroepa profetato Aisaia vo reoroaro sirova utuoro, “Ragai-iravu gisipoaro. Ragoa vo tupaoro raaka tapi oiso keeraparai, Turaro vo raivaaro torevokota.”

<sup>24</sup> Uva Farisi oearovu aruiva ora voea raga iava. Oa iava avaaepa rera iare. <sup>25</sup> Uva rerare oiso puraapea, “Ari viapau vii-a Krai, eke viapau vii-a Ilaija, ora viapau vii-a profetato. Vosa viapau Krai vii, uva apeisi ragavira vii reesirevora oa iava oirara rutu baptaisparivoi?” <sup>26</sup> ✧ Oa iava Jon voeare oiso puraroepa, “Ari ita, voea baptaispaaveira uukoa raga-ia. Vo ovusa visii vuutaaro-ia iravu toupaveira ira viapau eveipataveira. <sup>27</sup> Ro ira ragai

✧ 1:14: Jen 3:15; Re 19:13 ✧ 1:17: Ro 3:24 ✧ 1:21: Diu 18:15 ✧ 1:23: Ais 40:3 ✧ 1:26: Ap 1:5

sirova utuparoi. Uva viapau oiso vearoto-a ragai, ra rera vaaro iava tasipa tuukea karua.” <sup>28</sup> Vo reoro rutu purareva Betani urui-ia ovaratavu iava uuko ovi iviropavira vo ovio Jordan vo uva Jon oirara baptaispareva.

### *Jisas Ira-a Sipsip Kakae Pauto Vaaro*

<sup>29</sup> ✧ Uva vokipaua Jon Jisas tuereva osa vokapaoro urioparoepa rera iare. Oa iava Jon oiso puraroepa, “Va kekepata eva tauo puraso kakae Sipsip Kakae Pauto vaaro. Oa vuriara veravere oirara rutu iava vo rasio-ia. <sup>30</sup> Eera ira iava tuariri taviraepa oiso puraoro, Iravu oirato ragai sirova uturovere ira ragaipa reiparoi rutu. Eake iava? Uvare tuariri rutu toureva vo osa kavau asavira ragai touava. <sup>31</sup> Ari ita, viapau vearovira rera-ia tarai rovoraepa. Oa iava urioraepa oirara rutu baptaisisa uuko raga-ia ro oirato kareke peoro voeaopa Isrel-pa irara.”

<sup>32</sup> ✧ Oire Jon oiraopa reo vatepaoro oiso puraroepa, “Uraurato tueavora ovusa vuvuiua iava vararoera oiso rutu osa kurue rera kukuearo ariaraaro toupasa. <sup>33</sup> ✧ Ari ita, viapau rera-ia tarai rovoraepa vo ovusa ro ira ragai arureva oirara rutu baptaisisa uuko raga-ia. Ira ragai tavirevora oiso puraoro, Uraurato kekerivere. Ira varavovere iravu kukuearo ariaraaro iare oirato. Eera ira oirara baptaisparevorea rara aue-ia Tugoropato Uraurato. Oa iava aue-ia vukupaaverea Uraurato vo goruaro. <sup>34</sup> Uva ragai raga rera kekeava. Oa iava rera iava tavitaviparai oiso purapaoro, Oiraopavira rutu, uvare Pauto Oviitoaaro-a rera ro-ia.” Oiraopavira rutu Jon osa oiso puraroepa.

### *Jisas Disaipel Resura Oureva*

<sup>35</sup> Oire uva ovokivu vokikapouaro-ia Jon aitereivu tapo disaipeltoarei rera vaitereiaro toreroepa. <sup>36</sup> Uva voa-a vo uvava Jisas tuereva ovusa vokapaoro urioparoepa. Oa iava Jon oiso puraroepa, “Eva Sipsip Kakae Pauto Oviaro.” <sup>37</sup> Uva disaipeltoarei rera uvusiva ovusa oisi puraroepa oiso. Oa iava Jisas sirova utusa avasiepa. <sup>38</sup> Uva Jisas vaiterei akesa ora poreroepa ovusa rera sirova utupasiepa. Oa iava oiso puraroepa vaitereire, “*Eakere taraapasivoi?*” Oa iava rerare oiso purasiepa, “Rabai, ovu-ia touparivoi? Aa vo kepao-ia?” [Ovaisi-a vao, Rabai porearo oiso toupai, Tisato.] <sup>39</sup> Uva vaitereire oiso puraroepa, “*Uriosi kekesa.*” Oa iava avasiepa vo kepa kekesa voa oa-ia toupareva. Uva voa voeare vokiepa, vo uvare vo resura vuuta rutu-a vao oa-ia rera iare poui viropa voa.

<sup>40</sup> ✧ Andru, Saimon Pita araokotoaaro eera iravu vaiterei iava vaitereo aiteara Jon vo reoaro uvusivoiva, avaroepa Jisas sirova utusa. <sup>41</sup> ✧ Uva Andru araokotoare taraa rovosa avaroepa aue Saimon. Oa iava rera tavireva oiso, “Igei Mesaia kekeiovoi.” [Ovaisia porearo-a vao oiso, Krai.] <sup>42</sup> ✧ Oa iava Andru rera tapo avaroepa Jisas iare. Uva voa Jisas rera kekeoro oiso puraroepa, “*Vii-a vao Saimon Jon oviitoaaro. Viigoa vaisiera perea utupavira oiso, Sifas.*” [Ovaisia porearo-a vao oiso, Pita eera Aveke.]

### *Jisas Filip Vaio Roporeva Ora Nataniel*

<sup>43</sup> ✧ Oire uva Jisas Galili iare vokioro Filip kekeoro rera tavireva oiso, “*Ragai sirova utuu.*” <sup>44</sup> [Uva rera-a Filip aue iava Betsaida-ia, Andru vo uruiaro rutu vaiterei ora Pita.] <sup>45</sup> ✧ Uva Filip Nataniel kekesa avaroepa. Oa iava rera tavireva oiso “Ro ira iava tuariri Moses reoa rigatoreva Reo Taisi-ia. Ora aue tapo profet irara oea rera iava va rigatoiva, eera ira kekeiovorao

✧ **1:29:** Ais 53:7 ✧ **1:32:** Mt 3:16; Mk 1:10; Lu 3:22 ✧ **1:33:** Ap 1:5 ✧ **1:40:** Mt 4:18-22  
 ✧ **1:41:** Dan 9:25 ✧ **1:42:** Mt 16:18 ✧ **1:43:** Mt 10:1-6 ✧ **1:45:** Hi 11:1-6

ro Jisas Nasaret iava Josep oviitoaaro.”<sup>46</sup> Uva oisi-a eisi osa iava Nataniel rerare oiso puraroepa, “Esa pasi oavu avu vai vearoa vai uvuipai avu ra Nasaret-ia karekepe, raa?” Uva va-a vao oa iava Filip rerare oiso puraroepa. “Urio ragau kekesa.”

<sup>47</sup> ✧ Oire uva Jisas Nataniel siituepareva ovusa urioparoepa rera iare. Oa iava rerare oiso puraroepa, “*Keketa ro-ia Isrel-patoa rutu. Ira-ia viapau kuuvua vai toupavoi.*”<sup>48</sup> Oa iava Nataniel rera akeoro oiso puraroepa, “E apeisi iava ragai-ia maraiuera?” Uva Jisas oiso puraroepa, “*Ari ita, vo osa Filip viire keera asavira tourevora ovusa fik ova vituaro-ia toupavira, ovokia-a eva oa-ia vii keke rovoavora.*”<sup>49</sup> Oa iava Nataniel oiso puraroepa, “Tisato, vii-a Pauto Oviitoaaro. Vii Isrel-pa irara reraaro rufu Kingto.”<sup>50</sup> Uva Jisas rerare oiso puraroepa, “*Vii tavipaavoi vao iava osa vii keke rovoavora fik ova vituaro-ia. Uva va vai-ia pasi oiraopau vao, raa? Uva utupavira oaravu kekepariverea oara vao-ia putepaiverea rara.*”<sup>51</sup> Uva Jisas rera ita vorerivira tavireva oiso puraoro, “*Oiraopavira rutu eisi osa visii tavipaavoi oiso, Vo utupavira vuvuiua keketaverea ovusa karu piro, ra purapurapa irara ensel keketa voa Pauto voeaaro ovusa voare ipapaave ora voava varapaave Oirato Oviitoaaro iare ragai.*”

## 2

### *Iravu Oirato Ira Riako Ouroepa Kena-ia*

<sup>1</sup> ✧ Vo pevapa voki-ia iravu oirato riakova oureva Kena-ia oiso Galili taere sovara-ia. Uva Jisas aakoaro voa kavatao kepa-ia toupavea.<sup>2</sup> Uva Jisas-re tapo keeraaepa ora igei rera voeaaro disaipel va vao ora oupa pitupitu kekesa.<sup>3</sup> Uva wain ovi opesieiva, aakova Jisas tavieva oiso, “Voeao viapau wain ovi vaiei.”<sup>4</sup> Oa iava Jisas oiso oirare puraroepa, “*Riakova, ragai auearo. Viapau oiso vii auearo-a. Uvare ragai vo vuutaaro tugura asavira toupavoi [ovuuta-ia ragai vaisiara roroiovira kareke pieavere].*”<sup>5</sup> Oa iava aakova kovopa irara tavioro oiso puraopa, “Vosa eake reo purapareve visiire, uvuipatai ra oisi va sirova ututa.”

<sup>6</sup> Oire uva voa toupaiava aue katai vatara (6) pitokaara avekeara oara-ia Tugoropa Sisu oisooa purapaive vo vavaeara oaive-ia aue Jiu. Oara oisooa uvuipape vo osa vara uukopaoro vara agasi piepaive oiso uvuivira erao tau (20) galen ora vo peva tau (30) galen aue uuko vo kataiva-ia pitokava.<sup>7</sup> Oa iava varare Jisas voea tavireva oiso, “*Uukoara vai kuvuta vo pitokaara rutu-ia.*” Uva vara agasi pieiva rutu.<sup>8</sup> Jisas voea tavireva oiso, “*Oarai kokota. Ra ro vatesa avata ira aioa-ia tokipa.*” Oa iava varava avaaepa.<sup>9</sup> Oire uva rera ro ira vo aio-ia tokiparoepa vo ovi togovireva, ovusa wainvira ora poreepa. Uva viapau taraiparoepa oiso, Ovu-ia vo ovi ouivo. Vo osa voea raga kovopa irara taraipaaepa voea oea vara-ia uuko kuvupaaepa. Oa iava rera ro aioa-i tokipato rerare ro riako oupato keeraoepa<sup>10</sup> oiso puraoro, “Oirara rutu veaoro oviro wain oviro roo pie rovopaiveira. Oire ra rirovira ukaioave, ra va isivaoro iava taru wain turi-ia akukuara raga ukaio ragaave. Uva viapau oisi eisi pieri. Uvare vo vuuta-a vao oa-ia veaopara wain oviro roo pieparivoi oirara rutupa vo oviro oara rukurivo.”

<sup>11</sup> ✧ Oire uva vao rovopa rutu ravotoa Jisas oa purareva oiso Kena urui-ia Galili taere sovara-ia. Oa-ia rera vaaro keraria vo goruaro kareke piereva voeapa. Oa iava voea disaipelpa irara rera voeaaro rera oirao pieiva rutu.

<sup>12</sup> Uva va vao isivaaro iava Jisas Kapaneam iare tavetereva aakova tapo, ora araoko irara, ora igei disaipel irara. Uva vao ovokirovu-ia vo urui-ia touiova.

*Jisas Voripa Irara Sigureva Tugoropa Kepa Java Aue Tempel  
(Matyu 21:12-13; Mak 11:15-19; Luk 19:45-46)*

<sup>13</sup> ✧ Vo Tagausapa Vurei Pasova Vureipa Jiu vaaro tutuu pieepa oiso ra karekepe, ovusa Jisas Jerusalem iare iparoepa. <sup>14</sup> Uva vao Rovopa Kepa Tugoropa Kepa Tempel sovava-ia oirara rutu kekereva, ovusa orekerovu-ia voriana ora tuutuupaaepa aue-ia tapo sara kovoro purapaoro bulmakau kare, ora aue sipsip, ora kurue kare, vo kareo okarea-ia oisoa tauo purapaive. Uva vao voea kekereva ovusa paupaaepa oisi eisi vara-ia ora piepaoro. <sup>15</sup> Uva kopirovu kekereva Jisas. Oa iava rera-ia aue purareva raga vuruko. Osa iava va-ia voea oirara tarioreva voava vo Tempel-ia vo kareva aue sipsip ora bulmakau. Uva voea varaaro petopetoreva moniara voea oea moni tavariopaaepa varao tapo tebolara voea varaaro. <sup>16</sup> ✧ Uva va-a vao oa iava voeare oiso puraroepa voea oea sara kovoro purapaiva kurue kare-ia, “Vo kareva kosita viro. Opeita Aite oaa vo kepaoro oiso piepata, Vori oupa kepa.” <sup>17</sup> Uva igei disaipel oreovure rugooiepa oa epao Tugoropa Vuku-ia oa oiso purapapeira, ‘Kasivarivira rugorugoo iraoparaveira vii vo kepaore oiso vovoupaoro, ra vearovira touve.’

<sup>18</sup> Oire uva va vao kekeivoiva, reipa irara Jiu iava oiso puraaepa, “Eake ravoto rutu-a vao oa-ia igei kareke pierivoiva, uvuipaiei ra vii-ia taraiio oiso, Viigoa eva vo reesiva toupavoi oiso piepasa, raa?” <sup>19</sup> ✧ Uva Jisas voeare oiso puraroepa, “Tugoropa Kepa vao Tempel rigapata okepa rara tore pieavere ita vo pevapa voki-ia.” <sup>20</sup> Uva va-a vao oa iava voea Jiu oiso puraaepa, “Vo resura tau katai vatara (46) ivaro-ia vo kepao pauiva. Uva apeisi-a? Vo pevavi raga-ia voki uvuipaiei ra vo kepao vorevira tore pieri, raa?”

<sup>21</sup> ✧ Jisas vo kepaore Tugoropa Kepa Tempel oisi eisi puraroepa varaua vouao ora rera iava. <sup>22</sup> ✧ Oire vo tore vokiario vo osa Pauto vorevira tova tapi iava rera tore pierava ovokia-a eva oa-ia igei disaipel rera vo reoore rugooiepa vao oa purareva. Oa iava Pauto vo rigatoaro oirao pieiova ora vo reo vao oa purareva Jisas.

*Jisas Oirara Rutu-ia Tarairoepa*

<sup>23</sup> Oire uva Jisas Jerusalem-ia toureva va-ia vao Tugoropa Voki Pasova Vurei vaaro. Uva riro irara rutu oravotorovu rutu kekeiva varao oara purapareva vao. Uva vara-a evara oara iava rera oirao pieiva rutu. <sup>24</sup> Osa Jisas viapau oiso voea vo oirao piearo oirao piepareva. Viapau. Oa-a eva vituaro iava viapau oiso voea vavaeoro-ia ora tovoroepea. <sup>25</sup> ✧ Eake iava? Uvare taraiparoepa voea rutu-ia. Viapau oiso vavagisivira toureva ra irai rera tavireve vo oirara vo pitupituroaro iava. Viapau. Ari rera taraiparoepa voea vo sopaaro-ia.

### 3

*Jisas Nikodimas Tapo Ora Reoroepa*

<sup>1</sup> ✧ Iravu ro oirato toupaveva rera vaisiario, Nikodimas ratarataa vovoutoa rutu Farisi-pato. Uva iravu-a voea iava reipa irara Jiu voeaaro. <sup>2</sup> Ira urioroepea Jisas iare vokiario oiso rerare purasa, “Tisato. Igei taraipaiei

oiso, Pauto vii siporevora oiso rutu osa iravu tisato. Ari vosa viapau Pauto irai-ia toupaveira, ra viapau uvuipa ra vo ravotoro purapareve irai oara purapariveira.”

3 ✧ Oa iava Jisas rerare oiso puraroepa, “Oiraopavira rutu oiso osa vii tavipaavoi oiso, Vosa ro ira viapau airepavira kavauoro, ira viapau uvuiparoi ra Pauto vo Saraaro kekereve ora viapau Pauto vo goruaro sovopareve.”

4 Oa iava Nikodimas oiso puraroepa, “Apeisi ragavira irai avukaoro uvuiparoi ra vorevira ita kavauoro? E pasi uvuiparoi ra vorevira aakova kovuaro-ia koataroera vorevira rera kavaveve ita, raa?”

5 ✧ Oire uva Jisas rera vo reoaro pukooro oiso puraroepa, “Oiraopavira rutu osa vii tavipaavoi oiso, Vosa viapau uukoa-ia kavauo rovoro oirato, ora tapo vosa viapau Tugoropatoa-ia Uraurato ita kavauoro, ira viapau uvuipa ra Pauto vo Saraaro-ia koataro ora viapau Pauto vo goruaro sovopareve. 6 Ari ro oirato ira oiravira kavauoro eera oiratoa raga. Ari ro ira Tugoropatoa-ia Uraurato kavauoro, eera oirato ira sopaaro-ia Tugoropato Uraurato toupaveira. 7 Opeita rirovira rutu rugorugoo iraopau vo osa oiso vii tavipaavoi, Vorevira kavauo airepavira. 8 Kiuvu ora rera raga vo ruipaaro sirova utuparoveira uvarovu vuvurepaoro avapaoro. Uva rera vo gurukoaro uvupariveira, ra viapau taraipau oiso, Ovu iava urioiparoi, eke ovu-ia avaparoi. Ari ita, oirara rutu uvuipaai ra kiuvu vo goruaro kekepaive. Uva oisi-a eisi osa roroiavira rutu Pauto vo Urauraoro ora rera vo goruaro eveiparivere vo osa vorevira kavaupau, ra airepa rugooro purari.”

9 Oa iava Nikodimas rerare oiso puraroepa, “Uva apeisi ragavira va vao uvuipai ra karekepe?”

10 Osa iava eisi Jisas rerare oiso puraroepa, “Ari apeisi ragavira-a va-ia vao? Uvare vii-a Isrel-pa irara tuvetuvepato. Oa iava viapau va-ia vao roroipaveira, raa? 11 Oiraopavira rutu oiso osa vii tavi iraopaavoi oiso, Igei varao-ia reopaiei oara-ia taraipaiei. Ora varao iava siposipopaiovo oara kekeiovera. Osa visii vao vo reore isivapataveira oreoa vao oa iava oiraopavira rutu siposipopaiovo. 12 Visii tavipaaveira vara iava varao vo rasio iava. Uva viapau vara oirao piepataveira. Vosa visii tavia ita varao iava vuvuiua iava, ra apeisi ragavira vara oirao piepata ita rara, raa? 13 Viapau oiso irai vuvuiua iare iparoepa. Ari Oiratoa raga Oviitoaaro-a ragai ragoa vuvuiua kavuoro vararaepa. Ira raga-a ita ragai Kataito. 14 Tuariri Moses brasva rakoru toorotoa-ia kae piereva kuvauo tapi iria purareva. Eisi raga ita osa Oirato Oviitoaaro kae pievereira rara evao parikou iare. 15 Ra oisi iavirava oearovu oirara rutu iava ragai oirao pieve. Ra va iava Tootoo Ovoui oive.”

16 ✧ “Oreoa vituaro iava oiso toupai, Pauto ora rera vaaro sirao vovou rutu oirara rutupa vatepareveira voeao oea vo rasio-ia toupaveira. Eva-a oa vituaro iava ro kataitoa raga Oviito voeapa vatereva, oisore ra oirara rutu iava oearovu rera oirao pieve. Ra va iava viapau opesiave. Viapau. Uva uvuipaai ra Opeisi Asa Tootoo oive. 17 Pauto viapau oiso Oviito siporeva oirara rovirieipasa voeao vo rasio-ia oiso osa ro reo rovirieipato aue jas. Viapau. Ari eera siporeva vorevira voea kae piepaoro voea oupasa ora rera iare. 18 Ro ira Pauto Oviitoaaro oirao piepareve ira viapau rovirieia vai. Ari ro ira viapau rera oirao piepareve eera ira opesi ovoirovereira rovirieia-ia. Eake iava? Uvare viapau Kataitoa raga Oviito Pauto Oviitoaaro oirao piepareve. 19 Uva va-a vao rovirieia vituaro oa oiso toupai, Avaviaro



*oirarapa oa-a vao oa pou pirora vo tuaririvi vo rasio-ia, ovusa oirara rupapa ruipapaaveira. Eake iava? Uvare vuri pitupitu-a voea vaaro.* <sup>20</sup> ✧ Uva voea oea vuri pitupitupa ruipapaaveira oea aviaviava ora upopaaveira oiso reasipaoro, Teapi voea vo pitupituroaro vuriara poeravira karekepape. Eva-a oa iava viapau uriopaaveira aviavia iare. <sup>21</sup> ✧ Ari ro ira oirao pie vovou rutu purapareve ira aviavia iare urioparoveira. Oire ra va iava oirara vearovira rutu rera vurapaive. Ra oiso puraeva rerare, Eera ira ora rera vo kovoaro purapareveira Pauto vo rugoaro-ia.”

### *Jon Poeravira Rutu Siposiporeva Jisas Iava*

<sup>22</sup> Oire uva va vao opesieiva, Jisas rera voeaaro tapo disaipel avaroepa oisore Judia Distrik sovara-ia. Uva voa igei tapo toupaooro oearovu baptaispareva Jisas ora rera vaisiario-ia. <sup>23</sup> Uva aue tapo Jon Baptais voea rutu tapo baptaispareva vo aue-ia Inon-ia aue ruvara-ia Selim-ia uva oisora toupave riroara uuko oviro. Uva oirara rutu iava oearovu baptais ousa urioaepa voa. <sup>24</sup> Vo ovusa Herot Jon tovo asavira toupaveva tuukea-ia.

<sup>25</sup> Uva va-a vao oa iava oreorovu kosi pieiva Jon voeaaro disaipel ora iravu Jiupato. Oreoroa-ia ora reopaaepa baptaisa vo pitupituroaro iava. <sup>26</sup> Oa iava voea disaipel Jon voeaaro rerare avaaepa. Oa iava oiso Jon tavipaiva, “Tisato, ro-ia oirato ira vii tapo toupavevora oiso Jodan-ia iviropavira uva rera iava siposipoparivora, ira-a ro ira oirara rutu iava voea baptaisparevoi ora rera iava. Oa iava voea rutu rera iare avapaae. Ari apeisi viapau oea uriopaai vii iare?” <sup>27</sup> ✧ Uva Jon voea vo reoaro pukopaoro oiso puraroepa. “Vosa Pauto iraipa viapau kovoa vai vatereve, ra viapau oiratoa vai raga uvuiparo oavu avu vai purasa. <sup>28</sup> Ari ita, visii raga ita vao visiigoa vo reo uvutavora oa puraavora tuaririvi oiso, Viapau oiso Ropoto Kraisa ragai. Ari Pauto ragai ira pierevora. Oa iava iraraera rerapa ro Kraisa ira ragai sirova uturovere. <sup>29</sup> ✧ Oire vosa irai riakova vai oureve, ra rerapa oirape ro ira oira oureve. Ra sarato torepoaro rera gisipoaro uvupasa. Ra oisi iava rorupareve rutu rera uvupaoro rera ro ira riakova oureve. Uva ragai tapo oiso rutu rorupaavo, uvare sarato oaa ira iare oirara rutu ora gurupaaveira. <sup>30</sup> Ira vaisiario uvui iraopa ra reiparo, ovusa ragai vaisiario varapara.”

<sup>31</sup> ✧ Ro ira viara iava urioroera ira oirara rutupa reipa. Ari ro ira rasitoo iava karekero eera ita vo rasio iava rera-a. Ira varao rutu iava vo rasio-ia reoreoparoveira. Ari ro ira vuvuiua iava urioro ira oirara rutu-ia putepareveira eera. <sup>32</sup> Ira varao iava siposipopareveira oara rutu kekereva ora vara rutu iava uvureva. Ari viapau irai vara iava vo reoro oupaoro vara-ia goruvira rutu pitupareveira. <sup>33</sup> ✧ Vosa ro ira vo reo oureve, ra va iava goruvira vo reo-ia pitupareve. Ora tapo vosa ro ira iureve vo Pauto vo reoro-ia, eera-a ira oiraopa pitupitu kareke piepareveira Pauto vaaro.

<sup>34</sup> Uva Pauto Oviito arurevora, oa iava urioroera. Oa iava Pauto vo reoro iava siposipopareveira. Eake iava? Uvare Tugoropato Uraurato vatereva Pauto. Oa iava rera-ia vukuparoveira. <sup>35</sup> Ari ita, Pauto Oviito kaviko iraopareveira. Oa iava orekerovu rutu vateparevora rera vavaeoro iare.

<sup>36</sup> ✧ Ro ira Oviitoaaro oirao piepareve, ira-ia Tootoo Ovoi toupaveira. Ari vosa ro ira viapau Pauto Oviitoaaro vo reoroaro sirova utuparo, ira-a eera viapau uvuiparo ra Tootoo Ovoi oureve. Viapau. Ari Pauto vaaro kasipua ira-ia eera toupaverea opesi asavira rutu.

## 4

*Jisas Riakova Tapo Ora Reoparoepa Sameria Iava*

<sup>1</sup> Vo vuuta-a vao-ia oa-ia oeavu ratarataa vovou irara Farisi oea iava oreovu uvuiva vao oa oiso purapai, Jisas oearovu rutu oupaoro riro irara rutu disaipel baptaisparevoi. Oa-ia Jon-ia puterevoi rutu. <sup>2</sup> Uva viapau Jisas voea baptaispareva. Ari igei raga rera voeaaro disaipel igoa voea oirara baptaispaiova. <sup>3</sup> Uva Jisas oisi oiso-ia tarairoepa oiso, Farisi vo rearo-a vao oa uvuivoi oiso, Oirara baptaisparevoi Jisas aue-ia Jon putepaoro. Oa iava Judia-ia kavuoro vorevira kareroepa Galili iare. <sup>4</sup> Oa iava vo raivao gaereva oa Sameria-ia vuvuvuruiaaro-ia oisoa toupaiave.

<sup>5</sup> ✧ Oire uva riro urui-ia karero viropa vao Sameria taere-ia oa oisoa vaisipaiave oiso, Saika vo rasio ruvara-ia Jekop oa tuariri rutu vatereva oviiitoapa Josep. <sup>6</sup> Ouruia-a eva oa-ia vao uuko oupa riku oisoa toupaiave oa purareva Jekop. Uva Jisas vokapaoro avaroepa voare. Oa iava varaua rerare raveraveepa riro kaekae voka-ia. Osa iava vo riku vao uukopa ruvara-ia pauroepa Jisas aue rutu torevokoaro-ia ravireo vuuta 12 klok.

<sup>7</sup> Oire uva voava iriavu riakova Sameria-ia uriioopa uukosa. Uva Jisas oirare oiso puraroepa, *“Ragaipa uukoa vai. Ragoa rirovira rutu uuko regaparai.”* <sup>8</sup> Vo ovusa igei disaipel irara riro urui iare kareio viropa aio vorisa. <sup>9</sup> ✧ Uva va-a vao osa oira o Sameria iava rerare oiso puraopa, *“Easi vii-a Jiu-pato? Oea viapau oiso Sameria-pa irara tapo paupaaveira. Uva ragai-a vao Sameria iava. Uva apeisi-a oiso osa iava eisi purauei oiso, Ragaipa uukoa vai. Ragoa uuko rega iraparai?”* <sup>10</sup> Oa iava Jisas oirare oiso puraroepa, *“Vosa taraiapau Pauto vaaro-ia vatevatea, ra oisi iavirava va iava ro-ia taraiu ira vii areparevoi oiso purapaoro, Ragaipa uukoa vai. Ragoa uuko regaparai. Oire ra oisi iavirava rera vai areri pasi vaore uukoa oa-ia Tootoo Ovoi toupaiaveira. Ra oisi iava va iava vii vatereve.”* <sup>11</sup> Oa iava riakova rerare oiso puraopa, *“Turaro. Viapau baketa vai ei vii iriaiara, uvare vo riku uukopa rokovira rutu toupai. Uva oisi-a eisi osa iava vo uuko eva oa-ia Tootoo Ovoi toupai voi oa ovu ourivere, raa?”* <sup>12</sup> Oa-a vao uuko riku oa vatereva igeipa aaoto oaio Jekop. Aue iava uvare rera raga va-ia oisoa ukaioparo ora rera ovii iraraaro tapo, ora bulmakau raguiro, ora sipsip raguiro voea rera voeaaro. Uva vii vai pasi rera vai-ia puteparivoi, raa?” <sup>13</sup> Oa iava Jisas oirare oiso puraroepa, *“Ari ita, oiraopavira rutu oirara rutu-ia voea oea vo riku iava ukaiopaaveira. Oea ita vorerivira uuko regapaaveira.”* <sup>14</sup> Ari vosa irai vao-ia uukoa ukaioro oa vate ruipaparai, ra viapau vorerivira uuko regaparo. Viapau rutu. Oire uva vo uuko-a vao oa vate ruipaparai, oa oiso rutu toupai tuputupue riku. Oa rera iava sopau-ia toupaiaveira. Oire ra voava vusivusipaiave rerapa tootoo vatepaoro vao oa uvuipai toupaiave vo vokiara rutu-ia.” <sup>15</sup> Oa iava riakova rerare oiso puraopa, *“Turaro. Vo uuko vate iraori ragaipa. Oa iava viapau uvuiparai ra voreripavira uriopara uukopasa vo rara uuko regapara.”*

<sup>16</sup> Osa-a eisi osa iava Jisas oira tavireva oiso puraro, *“Avau vatuaoto oarare keerasa. Oa iava vorevira vore vorevere.”* <sup>17</sup> Oa iava Jisas aatoeva oiso puraro, *“Viapau ragai oiratoa vai oaa.”* Osa iava Jisas oirare oiso puraroepa, *“Vii-a ita vao viigoa oiso purauei, Ragai viapau oiratoa vai ei. Ari ita, uva oiraopavira oisi ita eisi purauei.”* <sup>18</sup> Eake iava? Uvare voari tuaririvi vo vavae rutuva oirara oisoa tou rovopari. Oire uva eera ita irava toupaiivoi, viapau oiso vii reraaro rutu-a. Ari ita, evo reo vii vaoro

oiraopai.” <sup>19</sup> Uva rerare oiso puraopa, “Turaro. Ragai vii-ia tarai iraorai oiso, Profetatoa rutu vii, viigoa ragai vo rugooaro sisiro iraopari. <sup>20</sup> ✧ Ari ita, voari tuariri rutu voeao Sameria-pa irara igei aao irara oai oisoa vo pukuio-ia ora gurupaave lotupasa. Ari visii Jiu oiso purapatai, Vo uva Jerusalem-ia toupaveira uva oirara uvui iraoapai ra vo Pautoa-pa lotupaave.”

<sup>21</sup> Oire uva Jisas oiso puraroepa, “*Riakova, ragai vo reoaro oirao pie iraori. Ovuutavu urioperea taru oa-ia viapau oiso lotutaverea Aitepa vo puki raga-ia eva. Ora viapau oiso rerapa lotupataverea tapo Jerusalem raga-ia.* <sup>22</sup> ✧ Visii ropa lotupaveira ira-ia viapau oiso taraipaveira. Ari igei Jiu igoa ropa lotupaiveira ira-ia taraipaveira. Eake iava? Uvare Pauto vo kovoaro-a vao vovevira oirara oupasa ora rera iare ro iavirava ira Jiu-pa irara iava karekeroepa. <sup>23</sup> Ari ita, tutuu pievoi vo vuutapa eva oiso ra karekepe uva karekei. Ra oirara rutu oiraopavira rutu lotupaave vuurapa vaisi purapaoro ora voea vo urauraro oaive iavirava Aitepa ora varao voea vo vovouroaro oiraopara. Oeare taraapaveira Aite vovea oea oisi eisi ragavira rera-ia vuurapa vaisi purapaive. <sup>24</sup> Pauto-a uraurato. Oa iava uvuipaa oirara rera-ia vuurapa vaisi pura iraoapaive. Vo osa ora voea vo urauraro iavirava vuurapa vaisi pura iraoapaive, ora voea vo vovouroaro oiraopar rutu.” <sup>25</sup> Uva riakova rera tavioaro oiso puraopa, “Taraiparai oiso, Mesaia uriorovere ro ira vaisipaiveira oiso, Kraís. Vosa uriorovere, ra vigei tavireve orekerovu rutu iava.” <sup>26</sup> Uva Jisas oira tavireva oiso, “*Easi ragai raga-a vao ragoa vii tapo ora reoparai.*”

<sup>27</sup> Uva oisi-a oiso osa puraroepa ovusa rera voveaaro disaipel igei igoa vovevira urioiepa. Oa iava rirovira rutu rera-ia rugorugoo iraoapaiepa, uvare oira tapo eira riakova ora reoparoepa. Uva viapau oiso irai oira akepareva oiso, “Eake vai ou ruipapauei?” Eke, “Eakere vii Jisas eira tapo ora reopaei?” <sup>28</sup> Oire uva oira o riakova ora oira oiraaro kavuoro uuko kaepava pitokava kareopa riro urui iare oirara rutupa tavitavisa. <sup>29</sup> Oiso puraopa, “Avoeao, uriota oirato kekesa ira ragai vo pitupituro sisiro iraorevo opitupitua oisoa purapaa voari tuariri. Oa iava ragai tavirevo. Esa pasi Kraís vai-a vigei muvetuvepatoaaro, eke?” <sup>30</sup> Uva va-a vao oa iava riro urui iava urioaepa rera kekesa Jisas.

<sup>31</sup> Ovuuta-a vao oa-ia urioapaera ovuuta-ia igei disaipel rerare oiso puraiepa, “Tisato. Tepa aio iraori taru.” <sup>32</sup> Oa iava igeire oiso puraroepa, “*Ragai oaravu aioara toupai. Oara-ia viapau taraipatai.*” <sup>33</sup> Uva igei raga disaipel oiso ora reopaeiepa, “Easi pasi irai vai rerapa oai aioa vai siporevo?”

<sup>34</sup> Oa iava Jisas igei tavioaro oiso puraroepa, “*Ragai vaaro-a vao-ia aioa oa oiso toupavoi, Ro vo ruipaaro strova utuparai ira ragai arureva. Eva oa oiso toupai osa vao aioa oa aiopaavoi. Uva uvui iraoaparai ra rera vo kovoaro opesi pie rova.*”

<sup>35</sup> “*Visii vao visiigoa oiso purapataveira, Vo resuraei tovira aue kekira, ra aio oupa vuuta karekepe. Ari oiso rutu visii tavipaavoi, Vuravurata ra riro irara keketa oea urioapaaveira ragai iare. Voeao oea sopaura oaive oiso toupai osa vo kuero okueroa vioro varavaravira toupai. Oea oiso rutu toupai, ragai oirao piesa auepaai.* <sup>36</sup> ✧ Voeao oea ragai vo reoroaro iava siposipopaiveira oea oiso toupaveira takuraara vikipaveira. Oea oiso toupai ragai vo reoroaro paupa irara vo oirara sopaaro-ia. Ovusa aia oearovu ita oea ragai vo reoroaro aviavi piepaiveira oea oiso toupai kuero rotupa irara. Oire vo reo uvupaoro oearovu ragai oirao piepaive. Ra va iava Tootoo Ovoi

ouive. Eva-a oa vituaro iava voeao takuraara paupa irara ora kue rotupa irara voea rutu rorupaive, uvare ragai-ia oirao piepai. Eva rorua voearei vo kovoreiara iava. <sup>37</sup> Oiraopavira rutu oirara oiso purapaaaveira, Iravu raga-a vo kovo paupato ari iravu-a vo kovo kuearo rotupato. <sup>38</sup> Oisi-a eisi osa iava visii aruavora vo kovoro kuoeroo rotupasaka okovoroa evara viapau oiso pau rovoavora. Ari oevu raga vo kovoro pau rovoivora. Va-a vao osa oirara siposipo rovoivora oevu Vearo Siposipo ragai iava. Vo osa oirarapa Vearo Siposipo aviavi piepatavora. Oa iava ragai-ia oirao pievora.”

<sup>39</sup> Oire uva va-a vao oa iava riro irara Sameria vo uruio iava voea oira reoroaro uvuoro Jisas oirao pieiva rutu. Eake iava? Uvare oira eira oiso puraopa, “Ira ragai tavitavirevoi varao iava muariri oisoa oara purapaa.”

<sup>40</sup> Oisi-a eisi osa iava voea Sameria-pa irara urioaepa rera iare. Oa iava rera pieoro oiso puraopa, “Igei tapo vo tou rovori.” Uva vo vokirei-ia tou rovoreva vo urui-ia voea tapo. <sup>41</sup> Osa iava riro irara rutu rera raga vo reoroaro uvuoro rera-ia oirao pie iraiova rutu. <sup>42</sup> ✧ Uva oirare oiso puraopa, “Viapau oiso vii raga vo taviaro uvuoro eera oirao pieiovoi oirato. Viapau. Ari igei rera vo reoroaro uvuiovoi. Oa iava taraitei oiso, O ari rera raga ro-ia ira oirara rutu vorevira ourevereia vo rasio iava ora rera iare.”

### *Jisas Reito Kovopatoaaro Oviitoaaro Ravotovira Tore Piereva*

<sup>43</sup> Uva vo vokirei vareo opesiepa oarea isivaaro iava Jisas vo uruio kavureva Galili iare avao. <sup>44</sup> ✧ Uva va-a vao osa Jisas siposipopaoro voeare oiso puraroepa, “*Profetato ro reo topa piepato ira viapau vaisia vaiiei rera oaiaro vo rera vo taerearo rutu-ia.*” <sup>45</sup> Osa iava Galili-ia kare uviroa avaroepa. Uva voa Galili-pa irara rera-ia roru iraopaiva, uvare voea iare avaroepa. Uva voea tapo varao kekeiva oara purareva voa evoa Jerusalemia vo vokie-ia Tugoropa Voki oa-ia Tugoropa Vurei pura piropa aue Pasova vao Tagausapa Vurei.

<sup>46</sup> ✧ Uva voava ita aue iare karero viropa Kena-ia vo Galili taere sovara-ia. Ouruia-a eva oa-ia uukoa wainvira porereva. Uva Kapaneam urui-ia iravu ofisato reito toureva. Ira oviitoaaro-ia upia toupai. <sup>47</sup> Uva Jisas iava uvureva ovusa Judia iava ora vaseroepa Galili iare uriooro. Oa iava rera iare avaroepa goruvira rutu rera tavisa, oiso ra vararo rera-ia oira oviitoaaro porete piesa irapa tutuu pieepa oiso ra kopiuro. <sup>48</sup> ✧ Uva Jisas oiso rera tavireva, “*Vosa visii vao ravoto kovoro viapau vai kekepata, ra viapau oirao pie vovouro vai purapata.*” <sup>49</sup> Oa iava rera ro ofisato rerare goruvira rutu oiso puraroepa, “Reito. Ikauvira varau. Teapi oviitoaaro oia kopiuro.” <sup>50</sup> Uva Jisas oiso puraroepa rera aruoro, “*Avau oviitoara tootoovira toupavevoi.*” Uva Jisas vo reoroaro oirao piepaoro vorevira voreroepa. <sup>51</sup> Oire uva vaova kareparoepa ovusa kovopa irara rera voeaaro raivaaro rerava aivaroiva. Oa iava voa oiso rera taviiva, “*Oviitoara vorevira tootooroi.*” <sup>52</sup> Uva oiso voea akereva, “*Aa vo vuutao-a vao oa-ia gare visivi tootooroi vorevira?*” Oa iava oiso puraopa, “*Ari aruvea aue-ia ravireo sipoko. Oa rutu-ia upia rera kavuvo.*” <sup>53</sup> Oa iava aiteo oiso tarairoepa, O ari vo vuuta raga ita-a vao oa-ia ragai tavirevo oiso puraoro, “*Oviitoara vorevira tootooroi.*” Oire uva oisi-a eisi osa iava Jisas oirao piereva ora voeao rera voeaaro, oea tapo Jisas oirao pieiva rutu. <sup>54</sup> ✧ Uva Jisas Judia iava urioroepa vore Galili taere-ia. Uva va vao erao pie ravoto oa purareva voa vo Galili taere-ia.

## 5

*Jisas Iravu Oirato Vorevira Porete Piereva Toko Rovua Vao Vo Betesda*

<sup>1</sup> Oire uva va-a vao opesieiva, oavu Tugoropa Voki Jiu vaaro pou piropa. Oa iava Jisas Jerusalem iare iparoepa.

<sup>2</sup> ✧ Uva voa-a vo Jerusalem-ia uva riro ratao toupai sipsip ragui vaaro. Uva oavu gareavi toko rovu toupaveira oa oiso vaisipaiveira, Betesda vo Hibru reo-ia. Uva voa vo rovu vatua-ro-ia ovavaiveira aue kiuvupa keparo toupaveira. <sup>3</sup> Uva vo keparo-a varao kiuvupa keparo oara-ia riro irara voosi irara, ora voearo vuri kokoto irara, ora voearo oearoa oisoa kerau upiario iava kopiipaave. [Uva auere voa oisoa tuepaoro toupaveira vo osa ora vurevurepe uuko rovu. <sup>4</sup> Aue iava uvare ovokirovu-ia Turaro Pauto reraoro purarupato ensel oisoa varaparo vo rovu sovara iare vao toko rovu voava va vurevurepasa. Oire ra vo rovu vao ora vurevurepe. Ra iravu ira rovororo vo rovu sovara iare, vosa apeisi rera vaaro upia, oa iava vorevira vearoro.]

<sup>5</sup> Uva va-a vao osa oisoa iravu voa toupaveira vo kiuvu oupa kepa-ia. Ira vo upiario aue rutu-ia uvuiepa vo peva tau vo peva vatara ivaro rutu (38 ivaro). <sup>6</sup> Uva voa Jisas vo gerepa kekereva. Osa iava rera-ia oiso tarairoepa, Riro kaekaevira rutu oisoa upiario. Oa iava Jisas oiso rera tavireva, “*E oiso ruipapau ra va iava eva vii vo upiario vorevira vearovira karekeu?*”

<sup>7</sup> Oire uva rera ro upiario rera vo reoaro pukooro oiso puraroepa, “Turaro. Viapau oiso irai ra ragaivi siporeve uuko rovu sovara-ia ragai tovosa vosa ora vurevurepe. Ari ragaivi raga ora akeake ragaparaveira oiso ra avara. Vo ovusa oearovu ragai-ia putepaoro voare ava rovopaave.”

<sup>8</sup> ✧ Uva oisi-a eisi osa iava Jisas rera tavireva oiso, “*Toreu. Ra urua ouoro vava vokari.*” <sup>9</sup> ✧ Oire uva ikauvira raga rera iava varaua vearo ovoiepa. Oa iava vokareva urua ouoro vao rera vaaro vava avasa.

Oire uva Sabat voki-a vao. <sup>10</sup> Oa iava Jiu rerare ro ira vorevira poreteroepa oiso puraaepa, “Auoro. Sabat voki-a vao. Oa-ia viapau rutu uvui iraopauei ra ora vii vo uruaro kaepari vo voki-ia vao Tugoropa.” <sup>11</sup> Oa iava voeare oiso puraroepa, “Easi ro-a ira ragai vorevira porete pierevoi ira oiso ragai tavirevoi, *Vii uruaro ouoro vava vokari.*” <sup>12</sup> Oa iava rera akeiva oiso, “Iroutoa rutu-a ira vii tavirevoi oisi osa iava vii vaarova urua ouoro vava vokari, raa?” <sup>13</sup> Oire uva rera ro ira vorevira poreteroepa ira viapau oiso tarairoepa. Uvare riro irara rutu oirara oea-ia ora riroirooro Jisas avaroepa.

<sup>14</sup> ✧ Uva utupa visivi Jisas rera tavireva Tugoropa Kepa-ia Tempel rera kekeoro oiso, “*Uvuri. Vorevira poreteue. Uva viapau rutu uvuipauei ra ita vorevira vuria vai purari ita. Viapau rutu. Teapi pute pie upia vai rutu ita vii-ia karekepe.*” <sup>15</sup> Osa iava avaroepa Jiu tavisia oiso, “Rera-a ro oirato ira ragai vorevira porete pierevorao aue Jisas.”

<sup>16</sup> Oire uva oisi-a eisi osa iava rovoaepa rera Jisas vuri piepaoro, uvare Sabat voki-a oa-ia va eva purareva. <sup>17</sup> Uva Jisas voeare oiso puraroepa, “*Aite oaa vokiaru rutu-ia kovopareveira. Osa raga ita ragai tapo kovopaavo ita.*” <sup>18</sup> ✧ Uva va-a vao oa iava voea Jiu oiso vovoupaepa rutu ra Jisas kopii pieve rera upooro. Eake iava? Uvare viapau oiso vao ragapa-a Sabat voki vo taisiario reo goru. Ari aue tapo uvare oiso puraroepa, Pauto-a rera rutu Aitetaaro. Uva vo reo-a eva oa-ia oiso rutu rera raga ora kareke pieparoepa Jisas, Oiso rutu toupaveira Pauto.

*Pauto Oviitoaaro-ia Reesia Toupai Kovo Purapasa*

19 Oire uva Jisas voeare oiso puraroepa ora rera iava, “Oiraopavira rutu oiso-ia osa visii tavipaavoi, Viapau uvuiparai ra ora ragai vo vovouaro iava oavu avu vai puraa. Viapau rutu. Ari vao raga-a oa purapaa oa kekeava ovusa Aitetoa oaa va purapareva. Oire ra ragai tapo ita rera Oviitoaaro ragoa uvuiparai oisi raga va purapaa. 20 Aite ruipa iraoroepa ragaipa, ra va iava ragai kareke piereva varao iava oara purareva. Uva ita, ragai tavirevere okovorovu iava ita riropara rutu oara varao-ia putepaivere rutu. Ra va iava rirovira rutu rugorugoo iraopata vara-ia tavetavepaoro. 21 \* Aite ro ira kopii irara vorevira tootoo piepaoro voea vatepareveira tootooa vorevira. Uva oisi raga ita-a eisi osa oearovu vatepaavoi tootooa vorevira voeaopa oea reesipaaveira ora ragaipa. 22 \* Aite viapau irai rovirieipareveira taavaa vai-ia kort. Oara rutu varao rovirieia purapa kovoro oara vaterera ragaipa. 23 \* Oa iava oirara rutu uvui iraopaai ra ragai vaisiario kae piepaive osa raga ita oiso uvuipaai osa Aiteto vaisiario kae piepaiveira. Ro ira viapau ragai vaisiario kae piepareve, eera ira viapau Aite vaisiario kae pieparevoui ro ira ragai arureva vore rasito puaro-ia.

24 “Oiraopavira rutu oiso osa visii tavipaavoi oiso, Ro ira ragai vo reoaro uvupareve, eera-a ira ro oirao piepareve ita ira ragai arureva oa iava urioraera, ira-ia Tootoo Ovoi toupaveira rutu. Ira ita viapau oiso kortua-ia karekeroverea. Viapau. Ari ira kopii-ia puterevora vore ivirooro Tootoo Ovoi vo raivaaro-ia.

25 “Oiraopavira rutu oiso osa visii tavipaavoi oiso, Vo vuuta-a vao oa karekesa auepapeira. Uva vo vuuta-a vao oa karekeiei vo vokia-ia oa-ia kopii roro tou irara Pauto Oviitoaaro gisipoaro uvuivere. Oire ra voea evoea ragai vo reoaro uvuoro tootooave rutu. 26 Ari Aite-a Tootooa rutu vituaro, uvare rera raga ita. Oa iavirava gorua vaterera ragaipa rera Oviitoaaro. Oire uva ragai tapo ita oisi raga ita toupavoi osa rera, Tootooa rutu vituaro. 27 Ragai-a vao Oirato Oviitoaaro ragoa roporeva Pauto. Oa vituaro iava Aite ragai vaterera reesia oirara rutu rovirieipasa taavaa-ia kort. 28 Visii vao opeita rugorugoo iraopata vaore oa oiso purapai, Tutuuvo vo vuutao oa-ia oirara rutu tova uruiro iava ragai gisipoaro uvuiverea. 29 Uva tova uruiro iava kosipaa piroverea voeao oea vearo pitupituro purapaiveira. Oea vorevira toreaverea taru Tootoo Ovoi rutu ousa. Ari voeao oea vuri pitupituro purapaiveira oea tapo ita vorevira toreaverea voea vo pitupituroaro vo voriaro ousa taavaa-ia kort.

*Oearovuei Oea Oisoa Jisas-re Rutu Vaaro Rutu Vituaro Iava Oiraopavira Siposipopaiva*

30 \* “Viapau rutu uvuiparai ra oavu avu vai puraa ora ragai vo vovouaro iava. Vo reo oa uvuava Aite ruvara-ia oreoa-a eva raga ita sirova utuparaverea oirara rovirieipaoro kortua-ia. Uvare ragai vo rovirieiaro-a torevokoa rutu. Uvare viapau oiso ora ragai raga vo ruipaaro sirova utuparaveira. Ari ro raga vo ruipaaro sirova utuparaveira ira ragai arurevora vore.

31 “Vosa ora ragai raga vo reoaro iava siposipopaa, ra va iava vo reo eva viapau oiso oiraopape. 32 Ari iravu toupere ro Aite ira uvuiparoi ra ragai vo reoaro iava oiraopavira rutu siposipopareve. Taraiparai oiso, Rera vo reoaro oiraopai ragai iava, eisi osa oiraopai rutu.

33 “Voari tuariri Jon iare oreovu sipotavora ragai iava akesa. Oa iava oiraopa reo rutu iava siposiporevora. 34 \* Ragai viapau oiso rerare

\* 5:21: Ro 4:17, 8:11    \* 5:22: Ap 17:31    \* 5:23: 1 Jo 2:23    \* 5:30: Jo 8:16, 4:34    \* 5:34: 1 Jo 5:9

rugorugoo iraoparai rutu, Irouto ro ira ragai iava siposiporevora. Viapau. Ari oiso ruipa iraoparai ra Pauto visii vorevira oureve. Eisi osa iava vo reo puraavo vo reo iava Jon vo rearo oisi osa ra rera vo rearore rugoopata. <sup>35</sup> Jon oiso tourevora osa vuravu aviavipava. Osa iava eisi oirarapa aviavia vaterevora. Oire uva oisi iava visii iava sopaura vearoepa. Oa iava poteku vuutavi-ia rorutavora rera vo aviaviario-ia.

<sup>36</sup> “Ari oaravu epao oara Jon-ia putevoi vo osa ragai iava oiraopavira siposiporevora. Oara oiso toupai, Varao kovoara oara vaterevora Aite ragaipa oisore ra vara purapaa. Oara iava evara oirara tavipaiveira ra oiso taraiapaave, Aite ragai arureva oa iava urioraepa. <sup>37</sup> ✧ Uva Aite tapo ira ragai rutu iava siposiporevora. Ari viapau oisoa rera gisipoaro uvupata gare visivi. Viapau rutu. Ora viapau oisoa rera puaroo kekepata. <sup>38</sup> Uvare tapo rera vo rearo viapau visii sopaaro-ia toupaveira. Eake iava? Uvare viapau eera vo rearo oirao piepataveira Aite ira ragai arureva. <sup>39</sup> Ari ita, riro goruvira rutu Pauto vo rigatoaro aue Tugoropa Vuku vieipaoro va-ia tarai iraopataveira oiso rugorugooaoro, ra oisi va iavirava Tootoo Ovoi oupata. Origatoa raga-a eva oa ragai rutu iava viaevira rutu siposipopaiveira, <sup>40</sup> vo osa ragai iare urio arapa reasipataveira vo Tootoo eva oupa arapa.

<sup>41</sup> “Viapau oiso ruipaparai ra irai ragai rei vaisi piepareve vova oirara. <sup>42</sup> Ari visii-ia taraiapaiveira visiigoa sopaaro-ia Pauto-pa siraopa vovou viapau toupave. <sup>43</sup> Aite oaa vaisiario-ia urioraera. Uva viapau ragai vo rearo uvupataveira. Vosa irai urioro vo ora irai raga vaisiario-ia, ra irai vo rearo uvuta. <sup>44</sup> Visii vao visiigoa oearovu raga ruvara-ia vuurapa vaisipa ruipapataveira. Vo osa viapau oiso rugoopata oiso, Vearopai vosa oai purape ra va iava Kataitoa raga Pauto ruvara-ia vuurapa vaisi oupe. Oire uva apeisi ragavira-a oiso osa iava uvuipatai ra ragai oirao pie iraopata, raa? <sup>45</sup> ✧ Viapau oiso ra ragai-ia rugorugoo ragapata oiso, Visii iava gasiaverea Aitepa. Viapau. Ari ro raga Moses ira oirao piepataveira oiso, Ira visii tauvarevera, ira-a eera ira visii iava gasirevera. <sup>46</sup> Vosa rera vo rearo oirao pietavori Moses, oire ra oisi ragavira ragai oirao piepatavori tapo. Eake iava? Uvare rera-a eera ira ragai iava vo reo rigatoreva. <sup>47</sup> Ari vosa viapau vo reo oirao piepata oa rigatoreva, ra apeisi ragavira ragai vo rearo oirao piepata, raa?”

## 6

### *Jisas Vo Vavae Tukupa (5,000) Aio Vateroepa (Matyu 14:13-21; Mak 6:30-44; Luk 9:10-17)*

<sup>1</sup> Uva vo reo opesieiva, Jisas toko rovu iava ovaratavu iare urioroepa. Vao toko rovu Gallili-ia oa vaisipaiveira ovaisivu iava vao oiso, Taibirias. <sup>2</sup> ✧ Uva riro irara rutu riro ravotoro kekeiva oara purareva upiapa irara-ia. Osa iava rera sirova utupaaepa. <sup>3</sup> Uva-a vo uva Jisas iparoepa pukuia iare. Oa iava voo pauroepa igei tapo ae disaipel. <sup>4</sup> Oire uva Tagausapa Vurei Pasova vo vuutaaropa tutuu pieepa oiso ra karekepe. Evo voki-a Tugoropa Voki Jiu vaaro. <sup>5</sup> Uva Jisas vuravurapareva. Oa iava riro irara rutu oirara kekereva ovusa utupaaepa rera iare. Osa iava Filip akereva oiso puraoro, “Ovu-ia breteara vai voripai voeaoa oirara, ra oarai aioive?” <sup>6</sup> ✧ Uva oisi-a eisi osa Filip akeakeparoepa vo osa rera raga taraiparoepa vao-ia oa purapare rara.

<sup>7</sup> Uva va-a vao oa iava Filip rerare oiso puraroepa, “Vosa aue-ia erao vovoto kina (K200) bret vorivio, ra pasi viapau vai voea-ia uvuipe vo osa garepa visivi ouave voea voeao-ia.” <sup>8</sup> Uva iravu disaipelto Andru aue araokotoaaro Saimon Pita, ira oiso puraroepa rerare, <sup>9</sup> ✱ “Iravu viovokoto ira vo toupaveovi ira varaaro vo vavae epao bret ora vaierei ataritoarei. Ari ita, uva viapau vai uvuipei pasi voea-ia voeao-ia riro irara rutu.” <sup>10</sup> Oa iava Jisas oiso puraroepa, “*Voea tavita, ra pauave evoa isiso kou ivara-ia.*” Uva voea rutu uvuiaro-a voeao-ia oiso-ia, vo vavae tuku rutu uvuiaro (5,000). Uva voa-a evoa uva pauaepa.

<sup>11</sup> Oa iava breteara ouoro Jisas vara-ia vearo vaisi purareva. Oa iava voeapa oirara vara roo piereva. Uva oisi raga ita ataritoarei piereva voea roo pieoro, voea vo ruiparoaro uvui pieoro. <sup>12</sup> Uva uvuivira aioivoiva, igei disaipel tavireva oiso, “*Aio ururukoro guruta evara oara touvira toupaivoi. Teapi oarai opesiko ragape.*” <sup>13</sup> Oa iava vara guruguruiova. Uva katai tau erao (12) pekuriara agasiepa vo vavae iava vao bret vo ururukoro-ia oara iava aiooro vukuaepa.

<sup>14</sup> ✱ Oire uva vo ravoto vao kekeivoiva, voea oiso puraaepa, “Oiraopavira rutu rera-ia ro-ia, Profetato ira vo rasio iare urioroera irare tuepavioveira.” <sup>15</sup> ✱ Uva Jisas voea-ia tarairoepa oiso, Rera ousa uriopaai ora voeapa, ra oiso toupaveve, Voea reraaro reito king. Uva va-a eva oa iava rera raga pukuia iare voreroepa.

### *Jisas Toko Rovu Ivava-ia Vokapareva (Matyu 14:22-23; Mak 6:45-52)*

<sup>16</sup> Oire uva vuri eveveia-ia Jisas voeaaro disaipel igei toko rovu iare varaiepa. <sup>17</sup> Uva uvuoa-ia kaeio viropa. Oa iava va-ia toko rovu ivava-ia avaipepa, uvare oiso vovoupaiepa ra Kapaneam iare avai. Uva rupaepa ovusa Jisas voa igei iare pou viro asavira toureva. <sup>18</sup> Uva voa riro gorutoa rutu kiuvu purepato igei vusireva. Ira uuko rovu sigasiga piereva. <sup>19</sup> Uva voa rera-ia tuepaoro avapaipepa aue uvuiaro-ia vo peva vuuta, eke vo resura vuuta rutu-ia (6 kilomita). Uva voava ora poreiepa Jisas aivaro rera kekesa, ovusa toko rovu ivava-ia vokapaoro utuparoepa. Uva voa-a vo uva uvuoa iare tutuu pierivoiva, uriripaiepa. <sup>20</sup> Oa iava voa igei oiso puraroepa, “*Asi ragai-a vao. Ragoa visii iare uturai. Opeita uriri ragapata.*” <sup>21</sup> Oire uva voare uvuoa-ia rera kae pieoro rera-ia rorupaiova ovusa ikauvira uvuoa vo pou piropa uvare avapaipepa.

### *Jisas-re Taraapaiva Oirara*

<sup>22</sup> Uva vokipavira voea oirara touvira tupaiva ivirova varata-ia vao toko rovu iava. Uva Jisas viapau vo uvuo-ia kaero viropa igei tapo disaipel. Viapau. Ari igei raga vo uvuo-ia ipaiepa avaro. Eisi osa iava oirara taraiepa, uvare katai uvuovi raga oa voa touva. Oa iava Jisas viapau voea tapo avaroepa va-ia. <sup>23</sup> Ari ita, vo osa oaravu uvuoaara Taibirias iava vara voavi ruvara iare vera piropa vovio uva Turaro breteara-ia vearo vaisi purareve, vao oa aioiva. <sup>24</sup> ✱ Oire uva voea oirara rutu roroaepa Jisas-re ora disaipel. Uva viapau oiso voea kekeiva osa voa tupaiva. Oa iava ipaaepa uvuoaara-ia Taibirias iava oara-ia urioaepa. Uva aue iare Kapaneam-ia avaaepa rerare Jisas voa taraasa.

### *Jisas-a Bret-ia Vuvuiua Iava Va-a*

✱ 6:9: 2 Kin 4:43 ✱ 6:14: Jen 49:10; Diu 18:15, 18 ✱ 6:15: Jo 18:36 ✱ 6:24: Mt 14:34; Mk 6:53



<sup>25</sup> Oire uva rera Jisas kekeiva iviropavira toko rovu-ia. Oa iava rerare oiso puraaepa, “Tisato. Aa vo vuutao iava vo vokio-ia vore uriovei?” <sup>26</sup> Oa iava Jisas oiso puraroepa, “*Ragai oiso oiraopavira visii tavipaavoí, Viapau oiso ra varare varao rugorugoopata ravotoara oara keketavo oa iava ragaire taraapatavoí. Viapau. Ari oa aiotavorao ita eva bret oa iava visii iava kovuara vukuerao. Eva-a oa vituaro iava ragaire taraapatavoí.*” <sup>27</sup> ✧ Viapau oiso ra kovopata vo aio eva oupasa oa vuripapeira. Viapau. Ari vo aio ou iraopata oa vokiara rutu-ia toupaveira. Eva-a tootooa vo aioaro, oa vokiara rutu-ia toupaveira vearovira. Vo aio Oirato Oviitoaaro ragai oa vateaverea visiipa. Aue iava uvare Pauto Aite ragaipa reesia vatevera.”

<sup>28</sup> Oa-a eva oa iava rerare oiso puraaepa, “Eake vai uvuipai ra oai puraio, ra Pauto vo kovoaro puraio?” <sup>29</sup> ✧ Oa iava Jisas voeare oiso puraroepa, “Pauto vo kovoaro oiso toupai, Visii ro oirao pie iraota Pauto ira ragai arurevora vore.”

<sup>30</sup> Oire uva rera akeiva oiso puraoro, “Eake-a reesia oa kekeiovere vii-ia, ra vii oirao pieio. Ora tapo eake kovo-a vao ravoto kovo oa purarivoi, ra va kekeiovora, vii vo rearo oirao pieio?” <sup>31</sup> ✧ Vigei aao iraraaro aue aioiva kuvau tapi mana voari tuariri rutu oiso osa Tugoropa Vuku purapai. Uvare vuvuiua iava vo bret vatevera voeapa oa iava va aioiva.” <sup>32</sup> Uva oisi-a oiso osa iava Jisas voea tavioro oiso puraroepa, “*Oiraopavira rutu oiso osa visii tavipaavoí, Viapau oiso Moses visii vatevera bret vao vova vuvuiua-ia. Viapau. Ari Aite rutu-a ira oiraopa bret vatepareveira vova vuvuiua-ia visiipa.*” <sup>33</sup> Vao bret Pauto oa vateparevora, Ro ira vuvuiua kavuoro vararoepa oirarpa tootooa vatesa voeao vo rasio-ia.” <sup>34</sup> Oa iava rerare oiso puraaepa, “Turaro. Igeipa va eva bret vateri vokiara rutu-ia.” <sup>35</sup> Oa iava Jisas oiso voea tavireva, “*Ragai raga-a ita bret vao Tootoo Vatepa. Ari ro ira ragai iare urioro ira viapau oiso uvuiparoi ra ogoero vorevira. Ora vosa ro ira ragai oirao piepareve ira ita viapau oiso uvuiparoi ra vorevira uuko regaro ita.*”

<sup>36</sup> “Ari ita, visii tavipaavoí, Ragai kekepatavoí ovusa viapau oiso ragai-ia oirao piepataveira.” <sup>37</sup> Oiraravi voeao Aite ragaipa oeavi-a vatevera, oisore ra voeavi rutu ragai iare uriopaave. Oire vosa ro ira ragai iare urioro, irare viapau uvuiparai ra rerare isivapara. Viapau rutu. <sup>38</sup> Aue iava uvare ragai-a vao ragoa vuvuiua iava vararaera vore. Uva viapau oiso ora ragai raga vo ruipaaro sirova utusa-a. Viapau. Ari ragai vararaera ro vo ruipaaro sirova utusa ira ragai arurevora vore oa iava *urioraera.* <sup>39</sup> Uvare ro vo ruipaaro-a ira ragai arurevora, vao oiso ragavira viapau uvuiparai ra oearoi kavua voeao rutu iava oea vatevera Pauto Aite ragaipa. Viapau. Ari oea rutu ita evoea vorevira tore pieaverea voea tootoo pieoro vo Ovoioa Voki-ia. <sup>40</sup> Aite oaa vo ruipaaro oiso toupaveira, Oirara rutu voeao oea Oviitoa oaa kekepaoro rera oirao piepaive oea uvuipaai ra Tootoo Ovoi oupaive vao oa viapau opesia vai. Evoea oea vorevira tore pieaverea voeapa tootooa vateoro Ovoioa Voki-ia.

<sup>41</sup> “*Ragai raga-a ita vao bret ragoa vuvuiua iava vararaera.*” Uva oisi-a oiso osa puraroiva, Jisas Jiu-pa irara kasipu iraopaaepa. Oa iava rirovira rutu reoreopaaepa. <sup>42</sup> Uva oiso purapaaepa, “Avoeao! Eaketoa vai irao-a rera ro-ia Jisas Josep oviitoaaro? Ari ita, vigei rutu tarai iraopavioveira aitetoarei-ia ora aakova. Uva eake vai iava oiso puraroi, *Ragai vuvuiua iava vararaera?*”

<sup>43</sup> Uva Jisas voeare oiso puraroepa, “*Teapi rirovira rutu ora reo ragapata ora visii raga vuutaaro-ia.*” <sup>44</sup> Viapau rutu irai uvuiparoi ra ragai iare urio ragaro. Viapau rutu. Easi Aite raga-a. Vosa irai ivureve vo ragai iare, oire ra rera-a eera urioora ragai iare. Uva rera ita-a eera ira vorevira tore pieaverea taru voari Ovoiopa Voki-ia. <sup>45</sup> ✧ Vo reo toupaivoi vo vukuo-ia profet irara vaaro oiso, ‘*Pauto oirara rutu tarai piereverea.*’

*Oire ra voea rutu rera uvuive vo rera ruvara-ia Aite taraia ouoro. Ra va iava ragai iare uriopaave.*

<sup>46</sup> “*Viapau oiso irai Aite kekereva. Ari ragai raga-a ragoa Pautoa tapo oisoa toupaa ragoa urioraera. Uva ragai raga ita-a ragoa Aite kekeava.*” <sup>47</sup> Oiraopavira rutu oiso osa visii tavi iraopaavo oiso, Vosa ro ira ragai oirao piepareve, eera-a ita ira-ia Tootoo Ovoi rutu toupaivoi. <sup>48</sup> Ragai raga-a ita bret Tootooa Vatepa. <sup>49</sup> Tuariri aao irara oavisii mana aioiva kuvau tapi uva raga-a vo uva kopiiiepa voari tuariri. <sup>50</sup> Ari bret oa vuvuiua iava varaepa. Vosa irouto ro ira va iava aio ruipaparo, ira viapau uvuiparoi ra kopiuro. <sup>51</sup> Ragai raga-a ita bret vao *Tootoo Vatepa ragoa vuvuiua iava vararaera. Vosa irai va vao bret iava aioro, ira uvuiparoi ra tootoovira toupaveve ovoievira rutu. Oa-a vao bret uvuiparai ra rera vatea vao-ia ragai iava varaua. Oua vatepaavo oirara rutupa voea vo rasio-ia ra tootoovira toupave.*”

<sup>52</sup> Oire uva va-a vao oa iava voeao Jiu ora voea raga ora kaureopaoro oiso purapaepa, “*Eaketoa vai-a ro ira uvuiparoi ra ora rera iava varaua vatereve vigeipa?*” E uvuiparoi ra ora rera iava voua vatereve, ra voua aiope rera iava, raa?”

<sup>53</sup> Oa iava Jisas oiso voeare puraroepa, “*Oiraopavira osa visii tavipaavo, Vosa viapau Oirato Oviitoaro iava varaua aiota, ora vosa viapau ragai revasiaro-ia ukaiota, ra viapau Tootoo Ovoi outa.*” <sup>54</sup> Ari ro ira ragai iava varaua aioreve ora ragai revasiaro-ia tapo ukaioro, ira tootooparoverea vokiara rutu-ia. Ora ira vorevira tore pieaverea Ovoiopa Voki-ia rera tootoo pieoro. <sup>55</sup> Eake iava? Uvare ragai iava varaua-a oiraopa rutu aioa. Ora revasiva oiraopava rutu ukaiopava. <sup>56</sup> Ro ira ragai iava varaua aioreve ora ragai iava revasiva-ia ukaioro, ira ita-a eera ragaiva ora tavosivira rutu toupave, ovusa ragai rerava ora tavosivira rutu tapo toupavo. <sup>57</sup> ✧ Aite ira tootoovira toupaveira ira ragai arurevora oa iava urioraera. Oa iava ragai Aite vo goruaro-ia tootoovira toupavo. Osa-a eisi osa uvuiparoi ro ira ragai iava varaua aioreve, oire ra va iava tootoovira toupaveve ragaiva ora tavosipaoro. <sup>58</sup> Vao bret oa vuvuiua iava varaepa oa viapau oiso vo bretova vaeavira toupaivoi oa aioiva vigei aao iraraoro tuariri. Oa iava kopii ovoiepa. Viapau. Ari vosa ro ira vo breto aioreve, ira-a eera uvuiparoi ra vokiara rutu-ia tootooparo.” <sup>59</sup> Vo Jisas voea siposipopareva Reo Taisi Uvupa Kepa Sinagog sovara-ia vo Kapaneam-ia uva reo eva vatereva voeapa.

### *Jisas-ia Tootoo Vatepa Reo Rutu Toupaveira*

<sup>60</sup> Oire uva riro irara disaipel vo reo vao uvuiva. Oa iava oiso puraaepa. “*Vo reo vavagisi iraopai. Irou vai uvuipai ra vo reo uvuve?*” <sup>61</sup> ✧ Vo osa ora rera iava sopaua-ia voea-ia tarairoepa Jisas oiso, Vo reo iava vao disaipel rirovira rutu oiso ora reopai. Uva va-a vao oa iava voeare oiso puraroepa.

“Evo reo ragai vo reoaro visii vo rugorugooroaro vuri piepaivoi, raa? <sup>62</sup> Ari vosa Oirato Oviitoaaro ragai tueta ovusa ipara vore uva oisoa toupaaue tuariri, ra apeisi? <sup>63</sup> ✧ Urauratoa raga tootoo vatepareveira oiratoapa. Varaua-a viapau oiso Tootoo Ovoui vituaro-a. Ari vo reo oa vateavoi visii vo urauraroaro aio piepasa. Oa iava uvuipai ra visiipa tootoo vatepaive vo reo. <sup>64</sup> Osa oearovu visii vuutaaro iava vo reo vao viapau oirao piepaivoi.” Ari ita, Jisas voea-ia tarai ovoiroepa oea viapau rera vo reoaro oirao piepaiva. Ora tapo osa ro-ia tarairoepa ira keripa irarapa rera kosi piereve. <sup>65</sup> Oa iava oiso puraroepa. “Ari ita, va raga vituaro-a vao oa iava visii taviavo oiso. Vosa Aite viapau oirato oisi piereve, ira viapau uvuipa ra ragai iare urioro.”

<sup>66</sup> Oreoa vao vituaro iava riro irara disaipel irara Jisas kavuoro sikaa viropa. Oa iava viapau oiso rera tapo vorerivira touiva. <sup>67</sup> ✧ Oire uva Jisas igei katai tau erao (12) akereva oiso, “E visii vai tapo ragai kavuoro avapatai?”

<sup>68</sup> ✧ Oa iava Saimon Pita oiso puraroepa, “Turaro. Ra irou iare avaiio? Uvare vii raga-a viigoa-ia Tootoo Vatepa Reo toupaiivoi. <sup>69</sup> Uvare igei vii raga-ia vovouisi oalo tovoiova vii raga oirao piepaoro. Uvare ita vii raga-ia taraiiepa oiso, Vii-a Tugoropato Pauto reraaro rutu.”

<sup>70</sup> Osa iava Jisas oiso igei akereva, “Apeisi ragavira iava visii katai tau erao (12) oiso ropooro visii reesiavora, ovusa iravu epao visii vuutaaro-ia vurito ira ragaiva keripa?” <sup>71</sup> ✧ Auere oiso puraroepa Judas Saimon oviitoaaro Iskariot. Eera-a iravu igei iava vao katai tau erao (12) disaipel. Aue iava uvare rera-a eera ira utupavira Jisas kosi piereve voeaopa oea rera upoive.

## 7

### *Araoko Iraraaro Rutu Viapau Jisas Oisoa Oirao Piepaive*

<sup>1</sup> Oire uva va vao opesieiva, Jisas oiso ragavira vokareva Galili taere-ia. Uva aue Jiu rera uposa auepaapea vo Judia-ia. Oa iava voare ava arapa reasiparoepa. <sup>2</sup> ✧ Uva va vao Tugoropa Voki Jiu vaaro oa oiso oisoa vaisipaive Oovapa Voki aue-ia Rovopa Kuero-ia. Ovoki-a vao oapa tutuu piepa. <sup>3</sup> Uva oisi-a eisi osa iava araoko irara rera arupaiva oiso, “Vo uruio iava avau Judia Distrik iare. Ra voa vii voeaaro disaipel vo kovoro kekeive oara puraparivoi. <sup>4</sup> Ari ita, vosa irai oavu avu vai purasa aueparo, ra riro vaisi oureve vo oirara osireiario-ia. Ra viapau oiso uvuiparoi ra vatau tapi vai oai purareve. Oire vosa oiso vao puraparivoi, uva uvuipauei ra viaevira rutu torepau oirara rutu osireiario-ia.” <sup>5</sup> Uva voea tapo-a araoko iraraaro oea oisoa viapau rera oirao piepaive. Oa iava oisi eisi puraapea. <sup>6</sup> Va-a vao oa vituaro iava Jisas oiso voeare puraroepa. “Ragai vo vuutaaro tugura asavira toupaiivoi oa-ia ragai vaisiario karekeavere. Ari visii raga vo vuutaroaro-a varao-ia. <sup>7</sup> ✧ Voeao oirara rutu vo rasio-ia viapau uvuipai ra visiiva ora keripaave. Ari ragai ragava ora keripaaveira. Eake iava? Uvare vo pitupiturore reoreoparaveira vuriara oara purapaiveira vurivira rutu. <sup>8</sup> Uva oiso visii tavipaavoi, Visii raga avata voare evoa Oovapa Voki-ia. Ari ragai viapau oiso va iare eva Oovapa Voki avaparai. Aue iava uvare ragai vo vuutaaro tugura asavira toupaiivoi.” <sup>9</sup> Osa oiso-ia voea tavireva. Oa iava vo raga Galili-ia toureva.

### *Jisas Rovopa Kuero Iava Oovapa Voki-ia Toureva*

<sup>10</sup> Uva voea Jisas araoko iraraaro avaaepa Oovapa Voki kekesa. Oa iava rera tapo voare uturoepa vatauvira. Viapau oiso viaevira voare iparoepa. <sup>11</sup> Uva va-a vao osa voea Jiu rerare taraa ragapaiva va-ia vao Oovapa Voki oiso puraoro, “Ovu irao ro epao?” <sup>12</sup> Voea rutu rirovira rutu rera-ia ora reopaaepa. Uva oearovu oiso purapaaepa, “Avoeao. Asi veroto-a eera.” Ovusa oearovu oiso purapaaepa, “Viapau. Ari oirara rutu keakea iraopareveira eera.” <sup>13</sup> ✧ Vo osa oearovu Jiu-pa irarapa uriripaoro vatau visivi raga rera-ia ora reopaaepa.

<sup>14</sup> Uva vo voki rutu-a vao Oovapa Voki oa vo vuutaaro-ia Jisas Tugoropa Kepa iare iparoepa oirara rutupa sipoisiposa voa. <sup>15</sup> Osa iava voea Jiu iava voea reipa irara rirovira rutu oiso rugorugoo iraopaoro oiso puraaepa, “Eake rutu-a vao oa iava rera vo vukuara vieiparevoi. Viapau oiso taraia vai oureva rera ro oiso osa voeao tarai irara rutu tisa irara.” <sup>16</sup> ✧ Oa iava Jisas voeare oiso puraroepa, “*Vo reo oa vatepaavoi visiipa viapau oiso ragai raga vo reoaro-a. Viapau. Ari Pauto vo reoaro-a ro ira ragai siporevora ragai aruoro.*” <sup>17</sup> Vosa irai Pauto gisipoaro sirova utu ruipa iraoparo, ra ragai vo reoaro iava vao tarairo oiso, Oiraopavira vo reo Pauto iava poupa piroi, eke ora ragai raga vo vovouaro iava oiso reoparai. <sup>18</sup> Ro ira ora rera raga vo vovouaro iava reoreoparo, ira-a eera oiso vovoupa ra ora rera raga ora vaisiario kae piepareve. Ari vosa ro ira roari vaisiario kae pie ruipaparo ira rera siporeve, ira-a eera torevokoto. Ira-ia viapau vuria vai toupai.

<sup>19</sup> ✧ “*Tuariri Moses visii vatereva Reo Taisi. Uva apeisi iava viapau irai visii iava viapau vo taisi sirova utuparoveira? Eake-a vao oapa ragai kopii piesa auepatai, raa?*” <sup>20</sup> Oa iava rerare oiso puraaepa, “Iravuei vurito uraurato vii-ia. Uva irou vii uposa auepai, raa?” <sup>21</sup> Ua Jisas voeare oiso puraroepa, “*Ari ita, vo kovo-ia tavetave iraopatavoi vao-ia, Oirato vorevira porete pieavo vo Sabat voki-ia. Oa iava rirovira rutu rugorugoo iraopatavoi eisi.*” <sup>22</sup> ✧ Easi Moses visiipa rakari verapa pitupitu vatereva. Opitupitua-a eva oa viapau Moses iava kosi piropa. Oa-a eva voeari iare vigei aao iraraaro karekeepa. Uva visii kakae vure rakariaro roorooparo voea rakariaro verapataveira vo voki-ia eva Sabat voki, vosa vo voki-a eva rakari verapa voki rera vo vokiario kakaeto. <sup>23</sup> Oiso rugorugooapataveira ra vearovira rutu Moses vaaro Reo Taisi sirova utu iraopata. Oa iava kakae vure rakariaro rooroopataveira va-ia Sabat. Oire uva voa-a vo Sabat uva ragai iravu oirato vorevira porete pieavorao. Uva eakepa ragaire kasipupatai, raa?” <sup>24</sup> ✧ Opeita orekerovu rovirieipata ora visii iava osireiara raga-ia oiso osa ragai piepatavoi. Ari uvui iraopatavoi ra oearovu sopaaro rutu-ia tarai rovpaparo voea vo rugooroaro kerikerisipata.”

### *Oeavu Oirara Oea Oiso Puraepa, Easi Kraisi Vai-a Ro-ia?*

<sup>25</sup> Oearovu Jerusalem iava oiso puraaepa, “E apeisi-a rera ro uposa auepaai, eke?” <sup>26</sup> Rera kekepata eera ira viaevira rutu reoreoparoi. Oa iava viapau oiso oreovu avu vai purapavoi rerare. Easi pasi oiraopai rutu, uvare vai reipa irara taraipaai rera-ia oiso, Kraisi vai pasi, raa?” <sup>27</sup> ✧ Ari ita, vigei taraipaviei rera vo uruiaro rutu-ia. Ari vosa Kraisi karekero, ra viapau irai taraiparo rera vo uruiaro rutu-ia.”

<sup>28</sup> ✧ Oire uva Jisas Tugoropa Kepa-ia Tempel toupaveva voepa sipoisipoparo. Uva rirovira rutu gisipo karureva voeare oiso puraoro, “*Ragai-ia taraipatai ita. Ora ragai vo uruiaro rutu-ia tapo taraipatai. Ari*

✧ 7:13: Jo 9:22 ✧ 7:16: Jo 3:11, 8:28, 12:49 ✧ 7:19: Eks 24:3 ✧ 7:22: Lev 12:3; Jen 17:10

✧ 7:24: Lev 19:15 ✧ 7:27: Mt 13:55 ✧ 7:28: Jo 8:14

ita, osa viapau oiso ora ragai raga vo vovouaro iava urioraera. Ari Aitetoa oaa raga ragai arurevora, oa iava urioraera. Ira vo vovouaro-a oiraopa. Uva viapau visii rera-ia taraipatai. <sup>29</sup> Ragai ira-ia taraiparai uvare rera tapo oisoa toupaa rera voaaro. Oa iava voava ragai arurevora vore.”

<sup>30</sup> Uva oisi-a eisi osa iava rera tuukesa auepaepa. Vo ovusa rera vo vuutaaro tigura asavira toupaiava. Oa iava viapau irai rera-ia vavaea vai tovoreva. Viapau. <sup>31</sup> ✧ Uva riro irara rutu oisi iava rera oirao pieiva. Oa iava oiso puraaepa, “Vosa Krai pouro virovere, ra pasi riroara ravotoara vai purareve. Oara vai-a uvuipai ra vo ravotoro-ia puteve oara purarevoi ro-ia, eke?”

### *Oeavu Polis Irara Aruiva Jisas Tuukesa*

<sup>32</sup> Oire uva Farisi ratarataa vovou irara voea oea uvuiva uvare oirara rutu oreorovu rutu purapaiava rerere Jisas. Osa iava reipa irara Pris ora aue Farisi oearovu polis irara aruiva. Oa iava urioaepa oiso ra rera tuukeive Jisas. <sup>33</sup> ✧ Uva va-a vao oa iava Jisas voeare oiso puraroepa, “Gare visivi visii tapo toupaaovi. Ra ro iare vorera ira ragai arurevora vore. <sup>34</sup> ✧ Uva ragaire taraa ragapatavere. Ra viapau oiso ragai keketa. Ora viapau tapo oiso ra vo urui-ia pouta viro vao oa iare avaravere. Vao iava uvare viapau oiso uvuipatai ra voare avata.” <sup>35</sup> ✧ Oire uva voea raga Jiu ora reopaaepa oiso purapaoro, “Ovu iare avarovere vo uva viapau rera kekeperea? Easi pasi vigei iavapa irara vai iare avarovere voeao oea vigei arova sikasikaaepa vorare avaoro vo voea vo uruiroaro iare Grik-pa irara? Uva voea tarai pieparevere vai Grik, raa? <sup>36</sup> Uvare oiso puraroi, Ragaire taraa ragapata. Ra viapau ragai keketa. Ora oiso tapo puraroi, Ra viapau voare avata vo uvare avaravere voa tousa. Uva aa vao-a vo reo vituaro, raa?”

### *Vo Toupai Uukoa Iava Vao Tootoo Vatepa*

<sup>37</sup> ✧ Ovoiopa voki vaopa Oovapa Vurei, reipa voki rutu oa-ia Jisas toreroepa rirovira rutu reoro oiso purasa, “Vosa irai uuko regapaoro urioro, ira-a eera uvuiparoi ra urioro vo ukaiosa ragai. <sup>38</sup> ✧ Oiso-ia osa Pauto vo rigatoaro oiso purapapeira, ‘Ro ira ragai oirao piepareve ira-a eera sopaaro-ia uuko ovi Tootoo Vatepa ovi karekepape rera iava vusivusipaoro.’ ”

<sup>39</sup> ✧ Oire Jisas vo ruu reo purareva ro iava Tugoropato Uraurato ira ouvireva vo rara rera oirao piepaive Jisas. Uvare vo vokia-a eva oa-ia Jisas tovira keraria ou asavira toureva. Aue iava uvare rera eera Tugoropato Uraurato urio asavira toureva irare eisi puraroepa.

### *Oirara Ora Roo Pieaepa*

<sup>40</sup> ✧ Oire uva oearovu oisi eisi vo reo uvuoro oiso puraaepa, “Oiraopavira rutu rera-ia ro-ia profetato irare tuepavioveira.” <sup>41</sup> Ovusa oearovu oiso puraaepa, “Eera Krai.” Ari oearovu oiso puraaepa, “Ra viapau oiso Galili iava uriorovere Krai. <sup>42</sup> ✧ Tugoropa Vuku taviepa Krai iava ro Devit voeaoro iava rera. Ira Betlehem-ia pouro virovere vo uruiro-ia oa-ia tuariri Devit tou rovoreva.” <sup>43</sup> ✧ Oisi-a eisi osa iavirava ora voearei-ia varei puraiva ora roo pieoro Jisas iavirava. <sup>44</sup> Uva oearovu oiso vovoupaaepa ra rera tuukeive. Uva viapau oiso irai rera-ia vavaea vai tovoreva.

✧ 7:31: Jo 8:30; Mt 12:23 ✧ 7:33: Jo 13:33 ✧ 7:34: Jo 8:21, 13:33 ✧ 7:35: Je 1:1; 1 Pi 1:1  
 ✧ 7:37: Ais 55:1; Re 22:17 ✧ 7:38: Ais 12:3 ✧ 7:39: Joe 2:28; Jo 20:22 ✧ 7:40: Mt 21:11  
 ✧ 7:42: Jer 23:5; Mai 5:2 ✧ 7:43: Jo 9:16, 10:19

### *Reipa Irara Jisas Viapau Oirao Piepaiva*

<sup>45</sup> Oire voea polis irara vovevira voreaeapa reipa irararei iare Pris ora Farisi. Oa iava voeare oiso puraaepa, “Eakepa viapau rerava voretai?” <sup>46</sup> ✧ Uva polis irara voeare oiso puraaepa, “Ari ita, voari tuariri uva viapau oisoa irai oiso reoparo osa ro reoparoi.” <sup>47</sup> Osa iava Farisi voeare oiso puraaepa, “Easi visii vai tapo pasi keakeaparevoi, raa?” <sup>48</sup> ✧ E pasi oearoi igei vai iava Farisi, o voeao iava reipa irara irai vai keketavo ovusa rera vo reoroaro oirao pieparevo, raa? Viapau. <sup>49</sup> Uvare akuku iraravi raga-a evoea oirara oea Jisas vo reoroaro uvupaoro viapau taraipaa Reo Taisi-ia vao oa-ia vuria puraivoi Pauto osireiario-ia, osa iava opesikoaverea rara.”

<sup>50</sup> Oire uva iravu-a ro-ia Nikodimas ira tuariri avaroepa Jisas iare. Voea iava rera, ira voeare oiso puraroepa, <sup>51</sup> ✧ “Esa vigei vaaro Reo Taisi oiso toupavo ra iravu iava akukuvira gasi ragape, eke? Uvui iraopaviei ra rera vo reoro uvupe. Oire ra va iava vearovira tarai rovvio vao-ia oa pura rovereve.”

<sup>52</sup> Oa iava rerare oiso puraaepa, “Easi vii tapo-a iravu Galili iava, raa? Vearovira rutu Pauto vo reoro viei rovori, ra tarai. Viapau irai profetatoa vai uvuiparoi ra Galili iava karekero.”

## 8

### *Riakova Ora Oua Vuri Pieva*

[<sup>1</sup> Oire uva voea rutu oirara sikasikaaepa vorarore ora voea vo keparoaro avaro, ovusa Jisas Oliv Kovo Pukui iare avaroepa. <sup>2</sup> Oa iava vokipakou rutu voava vokiroepa Tugoropa Kepa iare vao Tempel. Uva riro irara rutu voa rera iare urioaepa. Oire uva paupaoro voea tarai piepareva. <sup>3</sup> Uva voa vo uva riro tarai irara ora ratarataa vovou irara Farisi iriavuva riakova urioaepa rera iare. Aue iava uvare oira kekeiva iravu tapo. Oa iava ora voea vuruvuaro rutu-ia oira tore piesa urioaepa. <sup>4</sup> Uva oira iava Jisas tavipaoro oiso purapaaepa, “Tisato. O riakova iria ora oua vuri pieevo. Uva oevu oira-ia poua viro osa eisi pieevorao. <sup>5</sup> ✧ Vao-ia Reo Taisi Moses igei tavireva oiso puraoro, Vosa oiso iriavu riakova vuria puraave, oire ra oira vurokope aue-ia aveke. Ra oisi iava eisi apeisi purau?” <sup>6</sup> Oiso osa puraaepa rera-ia kokarapaoro. Uvare oiso vovupaepa ra oaire reoa vai taraaive rera-ia. Auere ra oreoi iava rera iava gasiive taru. Vo osa Jisas takuro viropa rasia-ia rigatopaoro ora rera iava sipareo-ia.

<sup>7</sup> ✧ Oire uva rera akepaiva voreripavira. Oa iava voava toreoro voeare oiso puraroepa, “Vosa irai visii vuruvuaro-ia toupaveve ro ira-ia viapau vuria vaipe, ira uvuiparoi ra rovova vai-ia aveke vai oira vuro rovereve o-ia riakova.” <sup>8</sup> Uva takuro viropa ita vo rasi rigatosa ita. <sup>9</sup> ✧ Oisi uvuiivoiva, voea rutu ora voea-ia vesipaoro kosikosa viropa oiso, reipa irara rovvira ira rovoaepa. Oa iava oearovu tupepaaepa utupaoro. Osa iava rera raga Jisas kavuiva. Uva rera raga oira tapo toupaveva, ovusa torepapa voari rera puaro-ia.

<sup>10</sup> Oire uva Jisas toreoro riakova akereva oiso, “Ovu-ia oirara epao? E viapau irai epao vii iava gasiparevoi, raa?” <sup>11</sup> ✧ Oa iava riakova oiso puraopa, “Reito. Easi viapau irai epao.” Oa iava Jisas oiso puraroepa, “Ari ita, ragai tapo viapau oiso vii iava gasipaavoi. Avau vova, ra viapau ita vorerivira oai vuria vai purari.”]

✧ 7:46: Mt 7:28-29 ✧ 7:48: Jo 12:42 ✧ 7:51: Diu 17:6, 19:15 ✧ 8:5: Lev 20:10; Diu 22:22

✧ 8:7: Diu 17:7 ✧ 8:9: Ro 2:22 ✧ 8:11: Jo 3:18, 5:14

### *Jisas Ira-a Rasitoapa Aviavia*

<sup>12</sup> Jisas voea tavioro oiso puraroepa, “*Ragai-a rasitoapa aviavia. Ro ira ragai sirova uturo ira viapau uvuipa ra rupa-ia vokareve. Viapau. Ari aviavia-ia touparevoi vao Tootoo Vatepa vituaro.*” <sup>13</sup> ✧ Oa iava Farisi rerare oiso puraaepa, “Easi vii ora vii raga vo reoaro-ia siposipopariveira. Eva-a oa iava vii vo reoaro iava viapau oarai oirao piepaioveira.” <sup>14</sup> ✧ Osa iava Jisas voeare oiso puraroepa, “*Oiraopavira rutu ita. Ora ragai raga vo reoroaro iava siposipopaaveira. Ari ita, vo osa oiraopa reo rutu-a ita vao ragai vo reoaro. Eake iava? Uvare vo urui-ia taraiparaveira vao oa iava urioraepa. Oa iava vo urui-ia taraipaoro voare avaravere. Vo osa visii viapau vao taraipatai vo uva vo urui iava urioraera. Ora vo uva ragavira avaravere uva tapo viapau taraipatai.*” <sup>15</sup> Visii vao visiiogo oearovivu oirara roviriei irapataveira vo vovouo-ia vo rasio-ia. Ari ragai viapau irai rovirieipaaveira. <sup>16</sup> Ari vosa ragai irai rovirieia, oire ra torevokovira rutu irai rovirieia. Eake iava? Uvare viapau oiso ragai raga kataito. Viapau. Ari iravuei Aite, ro ira ragai arurevora. Ira ragai tapo kovopareveira. <sup>17</sup> ✧ Vo visii vaaro-ia Reo Taisi oiso toupai, Vosa vaierei katai reo raga iava siposipopasi, oire ra vaierei vo reoaro torevokopape rutu. <sup>18</sup> Ari ita, ragai raga ora ragai iava siposipopaaveira ora vo osa Aite ragai arurevora. Ira tapo ragai iava oiraopavira tavitaviparoveira.”

<sup>19</sup> Oire uva voea rerare oiso puraaepa, “Ovu-ia vii Aitearo epao?” Oa iava Jisas voeare oiso puraroepa, “*Viapau oiso ragai-ia taraipatai. Eisi osa viapau Aite oaa-ia taraipata.*”

<sup>20</sup> ✧ Vo reo pukoreva Jisas monipa tugi-ia toupaooro. Vo osa oirara tarai piepareva voa evoa Tempel-ia. Uva oisi-a oiso osa iava viapau irai rera tuukepareva voa, uvare rera vo vuutaaro tugura asavira touva.

### *Vo Toupai Uvare Viapau Uvuipauei Ra Voare Avau Uvare Avaparai*

<sup>21</sup> ✧ Jisas vorerivira oiso voea tavireva, “*Avarai vore uva ragaire taraa ragapatavere. Ari ita, kopiipatavere visii varaarova vuriara oavisii, vo rara Aite viapau visii iava vara vera rovopareve. Oa iava viapau uvuipatai ra vo poupata viro uvare avaparai.*” <sup>22</sup> Uva va-a eva oa iava Jiu reipa iraraoro oiso puraaepa, “Apeisi ragavira eisi reoro oiso, *Viapau uvuipatai ra vo uruio iare avata oa iare avaparai?* Asi evo reo vai porearo oiso vaio toupai, Ra rera raga ora uporo, eke?” <sup>23</sup> Uva voeare oiso puraroepa, “*Visii reoroarova. Ari ragai viara iava. Uvare visii-a vao vo rasio iava. Ari ragai viapau vo rasi iava vao-ia.*” <sup>24</sup> ✧ Osa iava visii taviavo oiso, Kopiipatavere ovusa vuriara oavisii visii-ia touvira toupave. Ari ita, vosa viapau ragai vo reoroaro oirao piepata vo uvare ora ragai raga iava visiiipa siposipopaavo. Oire uva oisi-a eisi osa iava vuriara oavisiiipa kopiipatavere ovusa touvira visii-ia toupave.”

<sup>25</sup> Uva rera akeoro oiso puraaepa, “*Troutoa irao-a vii?*” Oa iava Jisas oiso puraroepa, “*Ragai raga ita vao-ia oiso osa ora ragai iava tuariri visii taviavora.*” <sup>26</sup> Riro reoro rutuva toupaaivo. Oara-ia uvuiparai ra visii vo pitupituroarore reoreora. Ora visii vo vovouaro tapo rovirieia oiso osa jas ro reo rovirieipato. Ari ro ira ragai arurevora ira vo vovouaro-a oiraopa rutu. Ora vo reoro rutu oara uvuava rera ruvara-ia, evara-a oara iava siposipopaaveira oirara rutupa voeao vo rasio-ia.”

<sup>27</sup> Oire uva viapau roroioaepa. Vo uvare voea tavipareva Aitetoa iava. <sup>28</sup> ✧ Uva osa-a eisi osa iava Jisas oiso voea tavireva, “Voari utupaua oiso Oirato Oviitoaaro kae pietavere rera kotosa. Uva vo vuuta-a eva oa-ia taraitaverea, Oiraopavira oisoa ora rera iava siposipopareve. Oire ra oisi iavirava taraita. Ari ragai viapau oiso oavu avu vai purapaavo ora ragai raga vo rugorugooaro iava. Viapau. Ari ragai vo reo iava siposipopaa vo oa iava ragai tavireva Aite. <sup>29</sup> ✧ Aite ragai siporeva ira ragai tapo toupareveira. Uva viapau oiso ragai kavurevora ra ragai raga toupaa. Viapau. Uvare vokiara rutu-ia varao purapaaveira oarapa ruipaparoveira.” <sup>30</sup> Oire uva oisi-a oiso osa puraroiva, oirara rutu iava oearovu rera oirao pie iraoiva.

*Oiraopa Reo Rutu Uvuipai Ra Visii Oiso Pieve, Viapau Oiso Ra Akukuvira Iraipa Kovo Ragapata Oiso Rutu Osa Voeao Oea Tuukepa Kepa-ia Toupaveira*

<sup>31</sup> ✧ Oire uva Jisas Jiu tavireve, voeao oea rera oirao pieiva oiso, “Vosa vokiara rutu-ia ragai vo reoaro vearovira uvupata, oire ra va iava visiipe oiso, Ragai rutu voeaaro disaipel. <sup>32</sup> ✧ Ra oisi iava oiraopa reo rutu-ia taraita. Oa iava oiraopa reo rutu uvuipai ra oiso visii pieve, Viapau uvuipatai ra akukuvira iraiipa kovo ragapata. Oiso osa ro ira tuukepa kepa-ia toupaveira.”

<sup>33</sup> Oa iava rera vo reoaro pukooro oiso puraaepa, “Igei-a Ebrahim iava vo sara. Viapau oiso irai igei iava akukuvira kovo ragapareveira iraiipa. Uva apeisi iava eisi purauei oiso, Viapau oiso akukuvira iraiipa kovo ragapatavere?”

<sup>34</sup> ✧ Uva Jisas oiso puraroepa, “Oiraopavira rutu oiso osa visii tavipaavo, Irou irara voeao oea vuri vovou purapaaveira. Uva varao vuri vovouro oaive oara voea tuukepaiveira. Oa iava akukuvira kovo ragapaiveira vaopa vearo rugoo viapavira. <sup>35</sup> Oviito ira vearovira kepaaro-ia aiteto toupareveira eva kepaaro rutu. Ari ro ira tuukepa kepa-ia toupareveira akukuvira kovo ragapaaro, uva viapau kepaaro rutu-a va vao. <sup>36</sup> Ragai-a vao Oviitoaaro ragoa uvuiparai ra tuukepa kepa iava visii kosi piea vao iava vuri vovou. Oa iava uvuipatai ra vearovira toupata vo Aite oaa vo kepaaro.

<sup>37</sup> “Taraiparai oiso, Ebrahim sara iraraaro visii. Uva apeisi viapau ragai vo reoaro visii sopaaro-ia toupavoi, raa? Eisi osa iava oiso ruipapatai ra ragai upooro ragai kopii pieta. <sup>38</sup> ✧ Ari ita, ragai siposipopaaaveira varao rutu iava oara kekepaaveira Aite oaa ruvara-ia, ovusa visii evo pitupituro purapataveira oara oupataveira ro ruvara-ia visii aitearo.”

### *Visii Aitearo-a Seten*

<sup>39</sup> ✧ Oire uva rerare oiso puraaepa, “Earu igei aitearo Ebrahim.” Oa iava Jisas oiso puraroepa, “Vosa oiraopavira visii Ebrahim ovii iraraaro, oire ra rera vo pitupituroaro rutu tapo purapata oiso osa rera Ebrahim oisoa piepareve. <sup>40</sup> Visiipa oiraopa reo rutu iava siposipo iraopaavo varao oara uvuavora Pauto ruvara-ia. Oara-a varao oarapa vo vokie-ia ragai uposa auapatatai. Ari ita, viapau oiso Ebrahim oisi oiso piereva. <sup>41</sup> ✧ Oiraopavira uvare ora visii aitearo vo pitupituro purapataveira.”

Uva va-a eva oa iava rerare oiso puraaepa, “Easi igei aako riakoaro viapau oiso otopa vovouro vai purapaaro igei kavaupaivora. Igoa-a kataitao raga Pauto ovii iraraaro.” <sup>42</sup> ✧ Oa iava Jisas oiso puraroepa, “Vosa oiraopavira rutu rera Pauto visii aitearo rutu, oire ragaipa siraopata. Eake iava? Uvare

✧ **8:28:** Jo 3:14, 12:32 ✧ **8:29:** Jo 4:34 ✧ **8:31:** 2 Jo 9 ✧ **8:32:** Ro 8:2; Je 2:12 ✧ **8:34:** Ro 6:16; 2 Pi 2:19 ✧ **8:38:** Jo 5:19, 30 ✧ **8:39:** Ro 9:7; Ga 3:7 ✧ **8:41:** Ais 63:16 ✧ **8:42:** 1 Jo 5:1



ragai oisoa Pauto ruvara-ia toupaa. Ora vo uvare tapo rera vo ruipaaro-ia urioraera. Viapau oiso ora ragai vo ruipaaro-ia vore urioraera. Viapau. Ari Pauto ragai arurevora oa iava vore urioraera. <sup>43</sup> Uva eakepa viapau ragai vo reoroaro-ia roroipatai? Oa vituaro vao-ia oiso toupaivoi, Viapau oiso uvuipatai ra ragai vo reoroaro uvupata riro vavagisiara.

<sup>44</sup> ✧ “Visii-a Seten ovii iraraaro. Uvare goruvira rutu rera vo vovouaro sirova utu iraopataveira eera visii aitearo. Ari ita, voari tuariri rera-a eera riro oira upoto, ora tapo viapau oisoa oiraopa vovou rutu sirova utuparo. Uvare oiraopa vovou rutu viapau oisoa rera-ia toupaiive. Uvare kuuvu reoro raga oisoa purapareve ora rera raga vo reoroaro torevokoaro. Eera-a riro kuuvuto, uvare rera raga-a kuuvu reoro rutu vo vovouaro vituaro. <sup>45</sup> Ari ragai oiraopa reoro rutu iava siposipopaaveira. Uva apeisi viapau vo reoro oirao piepataveira? Uva kuuvu reoro raga oirao piepataveira ro aite oavisii vo reoroaro Seten. <sup>46</sup> Iroutoa vai visii iava uvuiparoi ra ragai iava oai vuria vai kosi piereve vao oa toupaiive vo ragai-ia, raa? Ari ita, oiraopa reo rutu kosi piepaavoi. Uva apeisi iava oisi eisi viapau ragai vo reoro oirao piepatavoi, raa? <sup>47</sup> ✧ Ari Pauto ovii iraraaro rutu rera vo reoroaro rutu uvupaiveira. Ari viapau oiso rera ovii iraraaro-a visii. Oa iava viapau rera vo reoroaro uvupataveira.”

#### *Ebrahim Kareke Asavira Toureva Vo Vuutao-ia Oa-ia Touava*

<sup>48</sup> ✧ Oa iava voea Jiu rerare oiso puraaepa, “Eari, igei viire oiso pura-paioveira, Sameria iava vii. Viigoa-ia iravu vurito tugarato toupareveira. Uva oiraopavira vai oisi eisi purapaioveira viire, eke?” <sup>49</sup> Uva Jisas oiso puraroepa voeare, “Ragai viapau tugaratoa vaiva tupaaveira. Viapau. Ari Aite oaa raga vaisiara kae piepaaveira, ovusa visii ragai vaisiara akaipa piepata. <sup>50</sup> ✧ Ari ragai raga viapau oiso uvuiparai ra ora vaisi oaa kae piepaa, uvare iravu raga uvuiparoi ra ragai vaisiara kae piepareveira. Uvare rera-a eera oirara vo vovouaro rovirieipato. <sup>51</sup> ✧ Oiraopavira rutu oiso osa visii tavipaavoi, Vosa irai ragai vo reoro sirova uturo, ira-a eera viapau uvuiparoi ra kopii ovoiro.”

<sup>52</sup> Oire uva voea Jiu rerare oiso puraaepa, “Tarai iraoiei vii-ia. Viigoa-ia touparevoi vurito tugarato. Easi Ebrahim kopii ovoiroepa, ora voeao reo topa piepa irara profet irara oea tapo kopiiiepa. Uva apeisi-a oiso osa iava oiso puraei, Vosa irai vearovira rutu ragai vo reoro sirova uturo, eera-a ira viapau uvuiparoi ra kopii ovoiro? <sup>53</sup> E apeisi-a? Easi pasi vii vigei aautoaaro-ia puteparivoi Ebrahim, raa? Ira kopiioepa ora voeao profet irara oea tapo kopiiiepa. E vii raga apeisi ora kareke piesa auepaei?”

<sup>54</sup> ✧ Uva Jisas voea aatoreva oiso puraoro, “Vosa ora ragai raga vaisiara kae piepaa, ra oisi iavirava ragai iava vaisia akukupavira raga toupaiive. Ari Aite raga-a ira ragai kae piepareveira ro irare oiso purapataveira, Visii reraaro Pauto, <sup>55</sup> vo osa viapau rera-ia taraipataveira. Ari ragai rera-ia taraipareveira. Vosa oiso purapara, Viapau rera-ia taraiparai, oire ra oisi iava riro kuuvutoape ragai oiso osa visii. Ari rera-ia taraiparai. Osa iava vearovira rera vo reoroaro sirova rutu utuparaveira.

<sup>56</sup> ✧ “Aaoto oavisii Ebrahim rorureva vo vuutao-ia ragai vaaro-ia taraioro, oa iava urioraera vo rasio iare. Uva oisi-a eisi osa iava rera iava sopaua roruva rutu taraioro.” <sup>57</sup> Uva va-a vao oa iava Jiu rerare oiso puraaepa, “Easi vii viapau vo vavae tau (50) ivaro-ia tugarauera avukaoro. Uva

✧ 8:44: 1 Jo 3:8 ✧ 8:47: 1 Jo 4:6 ✧ 8:48: Jo 7:20, 10:20 ✧ 8:50: Jo 5:41 ✧ 8:51: Hi 11:5

✧ 8:54: Jo 16:14 ✧ 8:56: Mt 13:17; Hi 11:13

apeisi-a? Rera vai kekeriva Ebrahim, raa?" <sup>58</sup> ✱ Uva Jisas oiso puraroepa, "*Oiraopavira rutu oiso osa visii tavipaavoi, Vo osa Ebrahim kareke asavira toureva, ovusa vo vuuta-a eva oa-ia ragai voari tuariri touava.*"

<sup>59</sup> Oire uva oisi-a eisi osa iava rerare avekeara kae pie ragaiva, oiso ra vara-ia rera vurokoive. Vo osa Jisas voava Tugoropa Kepa-ia vatauvira kosiro viropa.

## 9

### *Vo Toupai Voosito Iava Vo Siposipo*

<sup>1</sup> Uva vokapaoro Jisas avaroepa. Oa iava iravu voosito oirato kekereva. Aakova oisi raga rera kavaveva voosivira. <sup>2</sup> ✱ Uva voa igei disaipel Jisas akeiova oiso, "Tisato. Irou vaoro-a vuria oa iava aakova oiso ro voosivira kavavevora? E rera raga vo vuriaro oa iava oisi karekeroepa? Eke aitetoarei vaoro vuria oa purasiva?"

<sup>3</sup> ✱ Uva Jisas igeire oiso puraroepa, "*Viapau ro oirato vuria vai purareva, ora aitetoarei ora aakova, ra oisi iava eisi voosivira karekero. Viapau. Ari vaore ro oiso toupaveira, ra rera-ia Pauto vo kovoaro viaevira rutu roroiovira karekepe.*" <sup>4</sup> Vosa ravireo tovura toupavevoi, uva uvui iraojaviei ra Pauto vo kovoaro-ia pitupe va puraoro. Uvare rupa urioei oa-ia viapau irai uvuipa ra kovoreve. <sup>5</sup> Vosa ragai vo rasio-ia tovura *toupaavoi, uva ragai-a aviavia voeaopa oea vo rasio-ia toupaveira.*"

<sup>6</sup> Uva oisi-a oiso osa iava vavaea-ia ruiroepa. Oire rasia uverereva va tovure pieoro. Oa iava rera osireiario vavoreva vo tovure-ia. <sup>7</sup> ✱ Uva Jisas rerare oiso puraroepa, "*Avau sisusa uuko rovu-ia va vao Siloam.*" [Oa porearo oiso toupai, Rera aruiva]. Oa iava avaroepa sisusa. Uva vorevira vorepaoro vuravurareva.

<sup>8</sup> Uva va-a vao oa iava voeao rera vo uruiaro iava ora oearovu tapo voeao oea oisoa rera kekepaive ovusa pavura raga tou rovopareve, oea rutu rerare oiso puraaepa, "E rera-a ro-ia ira oisoa rirovira moni areparo oirara rutu ruvara-ia, eke viapau?" <sup>9</sup> Uva osa iava rerare oiso puraaepa, "Iu. Rera raga-a ita ro-ia." Ovusa oearovu oiso purapaaepa. "Viapau. Easi oisi raga keketo-a ro-ia. Ari ita, uva iravu raga." Oa iava rera raga voeare oiso puraroepa, "Easi ragai raga-a ita vao-ia."

<sup>10</sup> Uva rera akeiva oiso, "Uva apeisi-a oiso osa iava vii iava osireitoarei vuravurasivo, raa?" <sup>11</sup> Uva voeare oiso puraroepa, "Ari ro oirato ira vaisipaiveira oiso, Jisas ira rasia uvererevo va tovure pieoro aue tapo uuko. Oa iava vo tovure-ia ragai osireiario vavooro oiso puraroe ragai aruro, *Avau sisusa vavo uuko rovu-ia Siloam.* Oire uva voa sisuoro vuravura ovoiaivo. Oa iava uvuirai orekerovu kekepasa." <sup>12</sup> Uva eisi osa iava oiso rera akeiva, "Ovu-ia rera epao?" Uva oiso voeapa taaroepa, "Viapau taraiparai."

### *Farisi-pa Irara Vo Ravoto Vituarore Taraapaiva*

<sup>13</sup> Oire uva rera tapo ro voosito tuariri ira voosivira oisoa toupaveve avaaepa Farisi iare voeao ratarataa vovou irara. <sup>14</sup> Uva Sabat voki-a vao oa-ia Jisas va vao rasia tovure pieoro va-ia rera iava osireito karureva. <sup>15</sup> Osa iava vorerivira ita rera akeiva oiso puraoro, "Apeisi ragavira rutu-a oiso osa iava vii iava osireitoarei vuravurasivo?" Oa iava oiso voea tavireva, "Ragai osireiario vavorevo tovurea-ia rasia. Oa iava sisusa avaraiva, ragai

iava osireitoarei vuravura ovoisivo roroio ovoioero.” <sup>16</sup> ✧ Osa iava oearovu Farisi oiso puraaepa, “Viapau oiso Pauto rera siporeva, uvare viapau oiso Sabat voki vo pitupituaoro sirova utuparoveira ora vao Reo Taisi.” Oa iava eva oearovu oiso puraaepa, “Uva apeisi ragavira-a ro ira-ia vuria toupave, ra oaiva varao purapareve ravotoara, raa?” Oire uva-a vao oa iava ora voearei-ia vo uvururei purapaiva.

<sup>17</sup> Uva rera akeoro ita oiso puraaepa, “Uva apeisi vai purapauvei rerare ro ira vii iava osireitoarei vura pierervo?” Oa iava oiso puraroepa, “Ari profetato eera.”

<sup>18</sup> Oiraopavira rutu ira-a ro oisoa voosivira toupaveve. Oa iava vo vokio vuravurarevoi. Uva voea Jiu vo reo vao viapau oirao piepaiva. Oa iava aitetoareire keeraaepa vaitereo uvava oviitoa rera ro ira iava osireitoarei karusi viropa. <sup>19</sup> Vaiterei akeoro oiso puraaepa, “E rera vai-a ro vei oviitoaaro, pasi? Ira iava oisoa oiso purapasi, Ira kavaveva aakova, ovusa voosivira raga toureva. Oire uva apeisi iava vuravurarevoi?”

<sup>20</sup> Osa iava aitetoarei voea tavisiva oiso, “Ari ira-ia taraipaveiei eera vegei oviitoaaro, osa raga voosivira aakova rera kavaveva. Oa iava oisi raga karekeroepa. <sup>21</sup> Uva vo vokio viapau taraipaveiei oiso osa ragavira iava rera iava osireitoarei aviavisivoi. Ora tapo viapau taraipaveiei oiso, Irouto rera osireiario karurevo. Rera ake iraota. Ira riroroera. Ira uvuipa ra ora rera raga tavitaviro.”

<sup>22</sup> ✧ Oire uva aitetoarei voea tavipasiva oisi eisi, uvare Jiu asavira uriripasiepa, voeao oea oiso purapaaepa reo goru puraoro, Vosa irai Jisas oiso vaisirevere, Ari Kraisa eera, oire ra oisi iavirava irai siguive vova Reo Taisi Uvupa Kepa Sinagog. <sup>23</sup> Oa-a vao oa vituaro iava aitetoarei voea taviooro oiso purasiepa, “Ora visii raga rera aketa. Ira riroroera. Osa iava uvuipa ra ora rera raga visii tavitavireve.” <sup>24</sup> ✧ Oire uva rerare vorerivira keeraaepa ro ira voosivira tou rovopareve. Oa iava rerare oiso puraaepa, “Pauto vaisipaoro oiraopavira rutu taviu. Uvare Jisas-ia taraipaiei oiso, Vurito.”

<sup>25</sup> Oa iava voeare oiso puraroepa, “E vurito-a eera, eke viapau? Uvare viapau taraiparai rera vo vovouaro-ia. Ari ita, oiso raga ora ragai-ia taraiparai osa oisoa tuariri voosivira raga toupaa. Uva vo vokio raga-ia ragai iava osireitoarei aviavisivoi karu uviro ovoioero.”

<sup>26</sup> Oa iava oiso rera akeiva, “Eake rutu purarevo viire? Apeisi ragavira rutu vii iava osireitoarei karurevo, raa?”

<sup>27</sup> Oire uva voeare oiso puraroepa, “Visii tavi ovoiavo ita. Uva apeisi ragavira uvusa auepatai ita? Easi visii vai tapo oiso ruipapatai ra oiso pieta, Rera voeaaro disaipel, raa?”

<sup>28</sup> Oa-a eva oa iava rera takaupaoro oiso puraaepa, “Vii raga ita rera disaipeltoaaro. Ari igei-a Moses voeaaro disaipel. <sup>29</sup> Uvare taraipaiei oiso, Pauto Moses vatereva reoa. Ari ovu irao rutu iava evo oira urioei? Ira-ia viapau taraipaiei.”

<sup>30</sup> Uva oiso puraroepa, “Avoeao. Avokoria vao-ia. Oa-ia viapau taraipatai oiso-ia. Uvare oiso purapatai, Ovu iava urioroe? Ira-ia viapau taraipaiei. Rera raga-a ita ro ira ragai iava osireitoarei aviavi pierervo. <sup>31</sup> ✧ Taraipaviei oiso, Pauto viapau oiso vuri irara vo reoroaro uvupareveira. Ari vosa ro ira rerapa lotuparo ora rera vo reoroaro rutu sirova utuparo eera Pauto, ra va iava rera Pauto vo reoroaro uvupareve vara purapasa. <sup>32</sup> Vokiara rutu-ia voari tuariri viapau oisi osiposipoi oisoa toupave irai iava ira voositoa vai

osireiario vura piereva ro ira voosivira raga kavaveve aakova vai. <sup>33</sup> Vosa Pauto viapau ro siporevori vo rasio iare, ra viapau oiso uvuiparoeri oaravu avu vai purapasa.”

<sup>34</sup> Oa iava rerare oiso puraaepa, “Auoro! Aakoara vii kavaveva vuri pitupitu raga-ia. Osa iava oisoa vurivira rutu toupari. Apeisire aupepauai, ra igei tarai pieri, raa?” Uva oiso pura ovoiro rera siguiva vova Sinagog.

### *Vovuisi Osireiario Aisia Voosivira Toupaveira*

<sup>35</sup> Uva Jisas rera iava uvureva uvare rera siguiva. Oa iava rerare taraapareva. Oa iava rera kekerevoiva, rera akereva oiso, “*E Oirato Oviitoaaro Ro Ropoto oirao pieparivoi, eke viapau?*” <sup>36</sup> Oa iava rerare oiso puraroepa, “Reito. Iroutoa rutu-a Oirato Oviitoaaro? Rera iava ragai taviri, ra rera oirao piea.” <sup>37</sup> ✧ Osa iava Jisas oiso puraroepa ora rera iava, “*Ira kekerivoi ro-ia ovusa vii tapo ora reoparoi.*” <sup>38</sup> Uva oisi-a eisi osa iavirava oiso puraroepa, “Turaro. Ragai vii oirao pieavo.” Oire eisi pura ovoiro takuro viropā Jisas-ia vuurapa vaisi pura ovoisa.

<sup>39</sup> ✧ Oire uva Jisas oiso puraroepa, “*Ragai urioraera vo rasio iare oirara roviriisa. Osa iava voearo vuravura asa irara vuravurapaiverea. Ovusa voeao oea vuravurapaivera oea iava osireiaria voosipapere rara.*” <sup>40</sup> ✧ Uva oearovu Farisi iava voa rera ruvara-ia toupaiava. Uva rera uvuoro rerare oiso puraaepa, “E apeisi-a? Igei tapo-a voosi osirei irara, raa?” <sup>41</sup> ✧ Uva Jisas voeare oiso puraroepa, “*Vosa vovouisiro oavisii osireiario visiire voosivira toupave, oire ra oisi iava viapau uvuipai ra oei visi togapaive aue-ia reo. Ari ita, oiso purapataveira, Igei iava vovouisiro osireiario aviavipaivera oiraopara rutu-ia taraipaoro. Oire uva oisi-a eisi osa iava uvuipai ra visi togapaive oevu aue-ia reo.*”

## 10

### *Reo Ruu Sipsip Kovokovo Iava*

<sup>1</sup> “*Oiraopavira rutu oiso visii tavipaavo, Ro ira viapau rataoa rutu-ia vao sipsip kovokovo vaoro koataro, ora vosa uvavu ragava putereve vo kovokovo kukuearo-ia voare koataro, ira-a eera oiso toupave, Kavirupato ira orkerovu rutu ou ragapaveira.*” <sup>2</sup> ✧ Ari vosa ro ira rataoa rutu-ia koataparō, ira-a eera sipsip ragui tokipatoaaro rutu. <sup>3</sup> Rataoa tokipato ira rataoa karupaveira ropa ira sipsip ragui tokipaveira. Oa iava sipsip ragui rera gisipoaro uvupaveira vo osa vo ragui vaivaisiarore keeraparo vo ragui rera voeare. Osa iava oisoa vo ragui kosi piepareve rataure vo ragui tuvetuvepaoro. <sup>4</sup> Uva oisoa vo ragui sipsip ragui ora rera voeare kosi piepareve rataure. Oire ra vo ragui iraro. Vo rara vo ragui sipsip ragui rera gisipoaro eveipaoro rera sirova utuave. <sup>5</sup> Viapau uvuipai ra iravu raga sirova utuave. Viapau. Ari eera asavira oisoa toripaive, uvare viapau rera gisipoaro eveipai eera iravu raga.” <sup>6</sup> ✧ Va-a vao reo ruu Jisas oa voeapa vatevera. Uva viapau roroiopaaepa vo reo vituaro-ia vao oa purareva voeare.

### *Vearoto Sipsip Ragui Tokipato*

<sup>7</sup> ✧ Uva va-a vao oa iava Jisas voeare ita oiso puraroepa, “*Oiraopavira oiso visii tavipaavo, Ragai-a vao rataoaro sipsip ragui vova kovokova.*” <sup>8</sup> Voeari oirara oea ragaipa iraaepa oea-a kavirupa irara oea oisoa urio ragapaave

✧ 9:37: Jo 4:26 ✧ 9:39: Jo 5:22, 27; Mt 13:13 ✧ 9:40: Ro 2:19 ✧ 9:41: Jo 15:22, 24 ✧ 10:2: Mk 6:34 ✧ 10:6: Jo 16:25 ✧ 10:7: Jer 23:1-2; Esi 34:2

sipsip kavirupasa, osa viapau sipsip kare voea gisipoaro uvupaoro voea iare utupaave. <sup>9</sup> Ragai raga ita ratao-a. Vosa irai ragai iare urioro koatasa vo kasura sovara-ia, ira-a eera orirurevere Pauto vo rara koataro. Ra voava ita kosiro viro aio oupasa. Ra oisi raga ora voreripaoro urioparo koatapasa ita.

<sup>10</sup> “Kavirupato viapau oiso orekerovu avu vaire urioparoveira. Ari sipsip ragui kavirupasa urioparoveira voea upopaoro vo kare vuri piepasa rutu. Ari ragai vaore urioraera, ra tootooa rutu oupaive. Oire ra oisi iava voea-ia agasipape rutu vo tootoo. <sup>11</sup> ✧ Ragai vearoto sipsip ragui-ia tokipato. Uvare rera raga vearoto sipsip ragui tokipato ira ora rera iava tootooaro viki ragarevereera rara vo ragui iavirava. <sup>12</sup> Ari ro kovopatoa raga ira voria ragare kovopareve, viapau oiso sipsip ragui tokipatoa rutu-a. Uvare viapau oiso rera vo raguiaro-a sipsip ragui. Eva-a oa vituaro oiso toupai, Ro ira aakau kare tueoro torirevere sipsip ragui kavuoro. Ra oisi iava aakau kare sipsip ragui aiopaooro vo ragui sikasikapaive. <sup>13</sup> Eake iava? Uvare eera voria ragare kovoparevoi. Viapau oiso sipsip raguire rugooparo.

<sup>14</sup> “Ari ita, ragai-a vearoto sipsip kare tokipato. Ragoa vo ragui-ia taraiparaveira, ovusa vo ragui tapo ita ragai-ia taraipaave. <sup>15</sup> Oiso-ia Aite ragai-ia taraiparoi, ovusa ita Aite-ia taraiparai. Oa iava ora ragai iava tootooa oaa vikiavere rara sipsip ragui tauvaoro. <sup>16</sup> Oire uva oraguirovu tapo tou ragapaiveira sipsip ragui. Uva viapau oiso vo kovokovo iava vo raguiro-a. Oraguiroare tapo oiso ruipaparai ra vo raguiro tuvetuvea. Ra va iava ragai raga gisipoaro uvuive. Ra oisi iava katai ragui rutu puraa viro ora takuvuoro. Osa iavirava kataitoa raga pere vo ragui rutu tokipato aue ragai. <sup>17</sup> ✧ Osa raga vituaro iava Aite ragaipa vo sirao vaterere vare, oiso ra ora ragai vaoro tootooa viki ragaa vo raguiapa ototooa vorevira ouavereera. <sup>18</sup> ✧ Viapau oiso irai ragai iava tootooa verarevere rara. Viapau. Ari ragai raga-a ragoa vare rugoopaooro va viki ragapaavo vo tootooa. Ari ita, gorua toupavo ragai vaoro tootooa viki ragasa. Ora oiso osa tapo toupavo vo goruo vo tootoo vorevira ita ousa. Oare oisi vo reo ouavora Aite ruvara-ia vare vao.”

<sup>19</sup> Oire uva voeao Jiu vo reo vao uvuoro ora voea-ia voearei ita puraiva ora roo pieoro oisi vo reo iavirava. <sup>20</sup> Uva oisi-a oiso osa iava riro irara rutu oiso purapaapea, “Vurito tugarato ira-ia toupare eera oa iava kokoroparoi. Uva eakere rera vo reoaro uvupatavo?” <sup>21</sup> ✧ Ovusa oearovu voe iava oiso purapaapea, “Viapau oiso vo reo-a vao ro vo reoaro ira-ia vurito tugarato toupareve. Eari apeisi ragavira vurito tugarato uvuiparoi ra voeao voosi irara osireiario vorevira vura piepareve, raa?”

### *Jiu Jisas-va Keriaepa*

<sup>22</sup> Uva Jerusalem-ia Tugoropa Voki karekeepa vao oa-ia oisoa Oovapa Vurei purapaive vo vokie reesipaoro oa-ia Tugoropa Kepa Tempel vorevira rataoro karuiva voari tuariri. Ovuaa-a eva riro uteo vuuta. <sup>23</sup> Uva voa Tempel sovara-ia Jisas vokareva rakorako uru ivara-ia vao oa paureva Solomon. <sup>24</sup> Oire uva voa-a vo uva Jiu rera kovokovosa urioapea ora guruoro rera iare. Oa iava voa rerare oiso puraapea, “Auoro. Aa vo vokie igepa aviavi pievira rutu ora vii iava sipsiporivere? Vosa vii rutu Krai, oire igepa roorio pievira rutu tavi iraou.”

25 ✧ Uva Jisas voeare oiso puraroepa, “*Visii tavipaavora vo vaisio iava. Uva viapau oiso oirao piepataveira. Uvare vo kovoro rutu varao oara purapaaveira Aite vaisiaro-ia oara iava ragai vaisiaro oiraopavira karekeparaveira.*” 26 Ari ita, oearovu raga-a visii. Viapau oiso ragai vo raguiaro iava sipsip ragui visii-a. Osa iava viapau oirao piepataveira. 27 Ari ragai vo raguiaro sipsip ragui ragai gisipoaro uvupaiveira. Oa iava ragai tapo vo ragui-ia taraiparaveira. Osa iava eisi ragai sirova *utupaaveira.* 28 ✧ Oa iava vo ragui vatepaaveira Tootoo Ovoi vao vokiara rutu iarepa. Ra oisi iava viapau oiso opesikopaave. Viapau rutu. Uva viapau irai uvuiparoi ra vo ragui verareve ragai vavaearo iava. 29 Aite oaa ragaipa oraguia vatereva, uvare rera gorutoa rutu ira orekerovu rutu-ia pute iraopareveira. Uva viapau oiso irai uvuiparoi ra vo ragui verareve vova Aite vavaearo iava. 30 Ragai ora Aite vegoa-a kataitoarei rutu.”

31 Osa-a oiso osa vituaro iava voea Jiu avekeara kae pie ragaiva, oiso ra rera vurukoive vara-ia. 32 Oa iava Jisas voeare oiso puraroepa, “*Visii tue pieavora riroara rutu-ia vearopa kovoro Aite varaaro. Ari aa vo kovo-a vao oa-ia rugorugooaoro ragai vurukosa auepatai evara-ia avekeara, raa?*”

33 Osa iava voea Jiu rerare oiso puraepa, “*Viapau oiso igei okovoi-ia vearoa vai rugorugooaoro vii vurukosa auepaiei. Viapau. Ari aue iava uvare Pauto toviparivoi vii vao oirato akuku raga. Ora tapo vaopa uvare ora vii ragare oiso purapauei, Vii-a Pauto.*”

34 ✧ Uva Jisas voeare oiso puraroepa, “*Apeisi ragavira? Uvare rigatoa oiso toupavoi vo visii vaaro-ia Reo Taisi oreoa-ia Pauto ora rerapa oeaavu reipa irara reesireva voari tuariri oiso puraoro, Visii-a pau irara.*” 35 Uva voea voeao tuariri oea iare Pauto vo rearo avaepa vao oa oiso puraepa, Voea-a pau irara. Ari ita, Tugoropa Vuku viapau uvuipai ra oku pieive. 36 Uva Aite ragai reesiro ragai arureva vo rasio iare. Uva oisi-a eisi osa iava oiso purarai, Ragai-a Pauto Oviitoaaro. Uva eakere oiso purapatai, Pauto toviparivoi, raa?

37 “*Vosa viapau Aite vo kovoaro purapaa, ra opeita ragai vo rearo oirao piepata.*” 38 ✧ Ari ita, ragai rera vo kovoaro purapaavoi. Vosa irai ragai vo reoroaro oirao pie arapa reasiparo, oa iava uvuiparoi ra vo kovoro raga oirao piepareve oara purapaavoi. Osa iava uvuipatai rutu ra taraita ora vearovira rugorugoota oiso-ia, Ragai-ia toupare Aite, ovusa ita ragai Aite-ia toupavoi.”

39 Uva rera tuuke rovosa auepaepa ita, ovusa voea vatavataoro avaroepa.

40 Uva Jisas vorevira voreoro uukova Jodan iviroreva. Oa iava vo pouro viropa uva tuariri Jon oirara baptaisreva. Uva voa toureva. 41 ✧ Oire uva voa riro irara rutu rera iare urioaepa. Oa iava oiso puraaepa, “*Oiraopavira rutu. Viapau oiso Jon oravotoi purareva. Ari vo osa Jon rera iava ro reora rutu purareva, oara-a oiraopara rutu.*” 42 Uva voa-a vo uva riro irara rutu rera oirao pieiva rutu.

## 11

### *Vo Lasaras Iava Toupai Uva Kopiioepa*

1 ✧ Uva iravu upiiparoepa eera Lasaras aue iava rera Betani urui-ia. Uva-a vo Betani-ia Maria vo voaorei vo uruiaro ora Mata. 2 Eira Maria iria

✧ 10:25: Jo 5:36 ✧ 10:28: Jo 17:2-3; 1 Jo 2:25 ✧ 10:34: Sam 82:6 ✧ 10:38: Jo 14:10-11

✧ 10:41: Jo 2:11 ✧ 11:1: Mk 11:1; Lu 10:38

oiso vo utupaua sanda kokoeva Turaro kokotoaro iare. Oa iava kokotoarei posiposi pieeva ora oira oruaro-ia. Uvava taataato-a eera Lasaras ira upiaparoepea. <sup>3</sup> Uva va-a vao oa-ia taataarirei keeraereiepa Jisas-re oiso puraoro, "Turaro. Ro ira kavikopariveira ira upiaparoi." <sup>4</sup> ✧ Oa iava Jisas vo reo uvuoro oiso puraroepa, "*Viapau ovoievira rutu kopiipasa eva upiapo. Ari auere-a keraria vo goruaro kareke piepasa vao Pauto vaoro. Ra oisi iavirava ragai vaisiario kae pieive rara.*"

<sup>5</sup> Uva Mata ora Maria ora Lasaras ovavuatapa oisoa rirovira siraoparo Jisas. <sup>6</sup> Uva Lasaras iava uvureva uvare upiaparoepea. Oa iava vo vokirei-ia toureva vo uruia eva oa-ia toureva. <sup>7</sup> Uva utupavira igei disaipel tavioro oiso puraroepa, "*Irata ra vorevio Judia Distrik iare.*"

<sup>8</sup> Oa iava igei disaipel rerere oiso puraiepa, "Tisato. Airevi raga ita voa vii vurukosa Jiu aue ragaae. Uva voare ita vorea auepauai, raa?"

<sup>9</sup> ✧ Jisas oiso puraroepa, "*Asi viapau pasi oiso katai tau erao (12) vaiei o ravireo-ia, eke? Vosa ro ira ravireo-ia vokapareve, ra viapau oiso koveparo. Eake iava? Uvare vo rasio aviaviaro kekeparevoi yokapaoro.* <sup>10</sup> Ari vosa vokiario vokapareve, ra koveparo, uvare viapau aviavia vai rerapa."

<sup>11</sup> Uva oisi-a eisi osa pura rovoroiava, oiso ita puraroepa, "*Vatetoa oavi Lasaras uusiroi. Ira tore piesa avaparai.*" <sup>12</sup> Oa iava igei rerere oiso puraiepa, "Turaro. Vosa uusiroe, uva uvuiparoi ra vorevira torero poreteoro, eke?" <sup>13</sup> Jisas Lasaras kopiiaro iava eisi puraroepa. Oa iava oiso kepaiepa, Ira uusi ragaparoi.

<sup>14</sup> Osa iava Jisas aviavi pievira oiso igei tavireva, "*Lasaras ira kopiioe rutu.* <sup>15</sup> Uva visiire rugorugooapaoro rorupaavo. Aue iava uvare viapau rera tapo touavo vo vokia eva. Osa iava rera iare avapavieii ra oiraota."

<sup>16</sup> Uva Tomas ro ira oisoa vaisipaive oiso, Didimas tavarato, igei disaipel arupareva oiso purapaoro, "Oire irata, ra Tisato tapo kopiisa avavio."

### *Jisas-a Oirato Vorevira Vo Torearo Vituaro Ora Tootooa*

<sup>17</sup> Oire uva Jisas avaroepa. Uva pouro viropa. Oa iava tarairoepa oiso, Lasaras vo resura rutu-ia voki toureva tova-ia. <sup>18</sup> Betani-ia uva Jerusalem-ia ruvara-ia toupaveira aue uvuiaro-ia vo peva vuutara (3 kilomita). <sup>19</sup> Uva-a vo uvare riro irara rutu Jiu iava urioaepa Mata voaorei ora Maria vo vovouaro varaata piepasa, uvare taataato vairei arova kopiioepa. <sup>20</sup> Uva Mata Jisas iava uvuoro avaopa raivaoro rerava aivarosa. Ovusa Maria kepa raga sovara-ia paupaoro toupavea.

<sup>21</sup> Oire uva Mata rerere oiso puraopa, "Turaro. Vosa vo tourivori, ra viapau taataatoa oaa kopiio. <sup>22</sup> ✧ Ari taraiparai oiso, Vosa Pautoa iare variriu, ra vii vatereve oavu avu vai vii vo ruipaoro sirova."

<sup>23</sup> Oa iava Jisas oiso oira tavireva, "*Taataatoara vorevira toreparoi, rara.*" <sup>24</sup> ✧ Uva Mata rerere oiso puraopa, "Ari ita, ragai oiso taraiparai, Ira Ovoioapa Voki-ia toreroverea vo rara tootooro rera raga vo vokiri-ia oa-ia oirara rutu vorevira torea veraea." <sup>25</sup> ✧ Uva Jisas oira tavireva, "*Ragai raga ita vorevira torea vituaro ora tootooa vituaro eva-a ita ragai raga. Ro ira ragai oirao piepareve eagara vosa kopiio, ira ita taru oiso tootoovira toupavearea.* <sup>26</sup> Ora voeao oea tootoovira toupai ragai oirao piepaoro oea viapau uvuipaai ra ovoievira kopii ovoipaave. Viapau. Ari evoea uvuipaai ra tootoovira raga toupave vokiara rutu-ia. Eva-a vai vao oirao pieparivoi, eke viapau?"

✧ 11:4: Jo 9:3 ✧ 11:9: Lu 13:33; Jo 9:4, 12:35 ✧ 11:22: Jo 9:31 ✧ 11:24: Dan 12:2; Jo 5:28-29

✧ 11:25: Jo 1:4, 5:26

27 ✧ Osa iava Mata rerare Jisas oiso puraopa, “Aure, Turaro. Vii oirao piepaa, uvare vii-a Krais Pauto Oviitoaaro. Vii vao viigoa iava Pauto taviroepa, oiso ra uriou vo rasio iare.”

### *Jisas Gaureva*

28 ✧ Mata oiso puraopa. Oa iava taevare keerasa avaopa Maria. Oire uva oira ou pieoro vatuarore oirava voreopa. Uva voa gare visivi oiso oira tavipaeva, “Tisato eera ira urioroi vo tousa. Ira viire keeraparo.” 29 Uva Maria vo reo uvuoro ikauvira avaopa Jisas iare. 30 Oire uva Jisas kare uviro asavira toureva. Uvare voari raga toupaveva uva Mata rerava aivaroeva. 31 Ari ita, vo osa Jiu-pa irara Maria tapo toupaiava kepa-ia oira vovouaro varaata piepaoro. Uva voa-a evoa uvava oira tueiva ovusa ikauvira kosio viropa. Oa iava oira sirova utuaepa uvare oiso keapaaepa, Tova-ia gaupasa avaoe.

32 Oire uva Maria vo pouo viropa uva toureva Jisas. Uva voa rera kekeoro rera kokotoaro ruvara-ia rekuoro takuo viropa rerare oiso puraoro, “Turaro. Vosa vo tourivori, ra viapau oiso taataatoa oaa kopiuro.”

33 ✧ Uva voa Jisas oira vurareva ovusa gaupaeva. Ora voea tapo kekereva Jiu-pa irara oea oira tapo urioaepa. Oea tapo gaupaiva. Osa iava vurivira rutu rera iava sopaua vavataepa kopiia vaarore kasipu iraopaoro aue siitoka. Oa iava siraoroepa rutu. 34 Osa iava oiso akereva, “*Ovu-ia rera tovatavo?*” Uva rerare oiso puraepa, “Turaro. Uriou vo tova kekesa.”

35 Osa iava Jisas gaureva ora rera sopaaro raga-ia. 36 Oa iava Jiu rerare oiso puraepa, “Rera kekepatavoi. Ro ira ro kaviko iraopareveira.”

37 ✧ Ovusa oearovu oiso purapaaepa, “Ira-a eera oearovu osireiario vura pieparevora voosi irara. Easi pasi, viapau vai uvuiroeri vai, ra ro tavarevora, viapau vai kopiuroeri?”

### *Jisas Lasaras Vorevira Tore Piereva*

38 ✧ Jisas rirovira siraoa vo vavataaro sovorevoiva ora rera sopaaro-ia, vo pouo viropa uva toupaiava vo tova aveke rikui-ia. Uvare iriavu-a rikui iria tekaiva rirova rutu-ia avekeva. Uva iriavu o rikui riaaro veropava aveke tupapaeva. 39 Uva Jisas voea tavirore oiso puraroepa, “*Aveke verata o-ia.*” Oa iava Mata o uvava taataato ira kopiuroepa iria oiso puraopa, “Turaro. Easi kopiuroerao. Vo resura voki putevoro rera isivaaro-ia. Uva eru geesi viapau kosi pirovere rara, eke?” 40 Oa iava Jisas oirare oiso puraroepa, “*Ari apeisi vii tavi rovoavo? Uva oiso purarae, Vosa oirao pieri, osa iava uvuipauei ra keraria vo goruaro kekeri Pauto vaaro.*” 41 ✧ Oire uva aveke veraiva.

Oa iava Jisas viara-ia vuraoro oiso puraroepa, “*Aite. Vii-ia vearo vaisi purapaavoi, uvare ragai vaaro variria uvurivoi.*” 42 ✧ Taraiapai oiso, Vii ragai vo variroaro uvupariveira varao oara purapaaveira. Ari voeare oirara rugoapai. Oa iava vo varirio puraavoi, oisore ra oisi vo reo uvuoro vao oirao pieve osa ragai arurivora vore.”

43 Eisi puraroiva, rirovira rutu rerare keeroepa oiso puraoro, “*Lasaras! Kosiu viro!*” 44 Oa iava rera kopiito kosiro viropa kokoto tuukerova ora vavaera varao oara tuukeiva aue-ia varo iroro. Ora rera puaro tapo tavuruiva oavu-ia varoa oa oisi raga toupaiava. Oa iava Jisas oiso voea tavireva, “*Varoara verata. Ra oisi iava vokareve.*” Uva oisi pieiva rera-ia.

### *Reipa Irara Reo Goru Puraiva Jisas Uposa* (Matyu 26:1-5; Mak 14:1-2; Luk 22:1-2)

✧ 11:27: Mt 16:16 ✧ 11:28: Mt 26:18; Lu 22:11 ✧ 11:33: Jo 12:27 ✧ 11:37: Jo 9:6-7

✧ 11:38: Mt 27:60 ✧ 11:41: Jo 17:1 ✧ 11:42: Jo 12:30



45 ✧ Riro irara Jiu iava urioaepa Maria tapo va kekesa vao oa purareva. Uva va-a eva oa iava rera Jisas oirao pieiva rutu. 46 Osa oearovu ratarataa vovou irara aue Farisi iare avaaepa voea tavisva va iava vao oa purareva Jisas.

47 Osa iava reipa irara pris voeao tauo purapa irara voearei ora Farisi Kaunsel irara guruiva. Oa iava voea oiso akeiva, “Apeisi rera piepai ro ira riroara rutu ravotoara pura vasiparevoi? 48 Vosa rera eaka ragapapere, oire ra oisi raga piepareve. Ra va iava oirara rutu rera raga oirao piepaive. Vosa oisi eisi ra Rom gavmanaro rera voeaaro arureve, ra urioave vigei vaaro Rovopa Kepa Tugoropa Kepa pakosa. Ora orekerovu rutu vuri pieive varao vigei varaaro ora voeao vigei voeaaro.”

49 ✧ Oire uva iravu oirato rera vaisiario, Kaiafas vo vuuta iava eva vo iva-ia pris kovo-ia reiparoepa. Ira voeare oiso puraroepa, “E viapau gare visivi taraipatai? 50 Opeita voeaore rugorugoopata. Vosa kataitoavi vai raga kopiuro oirara rutupa tootooaro vateoro, eva vearoa rutu visiipa. Teapi oirara rutu voeao vigei voeaaro opesi ragaave.”

51 Uva viapau oiso ora rera vovouaro iava oiso vo reo purareva. Ari eera pris kovo-ia reiparoepa vo iva sovara-ia voa-ia. Oa iava Pauto iava vo reo urioepa. Oa iava ravaavira oiso puraroepa, Jisas kopirove re Jiu irarapa tootooaro vateoro. 52 ✧ Uva viapau oiso Jiu ragapa tootooaro vatereve kopiuro. Viapau. Ari eera kopirove Pauto ovii iraraaro rutu gursa. Voeao oea vo rasio-ia sikasikavira toupaveira. Ra va iava katai irara raga puraive.

53 Uva vo voki-a eva Jiu reipa iraraaro rovoaepa reoa puraoro Jisas uposa. 54 ✧ Eva vituaro iava viapau oiso poeravira vokapareva Juda taere vuruvuru-ia. Uva vo taere kavureva eva. Osa iava uvavure avaroepa kuvau tapi ruvara-ia vo uruo iare riro urui oa voavi oisoa toupave oa oisoa vaisipaive, Efraim. Uva vo uruia eva toureva igei disaipel tapo.

55 ✧ Oire uva Tagausapa Vurei Pasova vo vuutaaropa tutuu pieepa Jiu vaaro. Uva Pasova vurei oa tovira toupaveiva ovusa oirara rutu ruuiara rutu iava Jerusalem iare ipaaepa, oisore ra ora voea raga ora sisigarue pie rovoave oavu-ia tugoropa pitupitu voea vaaro. 56 Uva osa iava Jisasre taraapaiva. Uva Tugoropa Kepa Tempel sovara-ia torepaaepa. Oa iava voea raga voa ora reopaaepa oiso purapaoro, “Apeisi vai rugoopatai visii vao? Easi viapau pasi eera Tugoropa Voki kekesa urioparoi vai?” 57 Uva voeao reipa irara pris irararei ora Farisi oiso reesia puraiva. Vosa irai Jisasi taraiparovere vo osa ovu-ia toupaveve, oire irai rera iava taviro. Oa iava uvuipaai ra uvai rera tuukeive.

## 12

### *Maria Sanda Petoeva Jisas Kokotoaro Iare (Matyu 26:6-13; Mak 14:3-9)*

1 ✧ Oire uva tovira katai vatara vokiro toupaveiva auepa Tagausapa Vurei Pasova oiso ra karekepe. Uva vo vuuta-ia Jisas Betani iare avaroepa Lasaras vo ruuiaro iare ro ira vorevira tore pierева tova iava. 2 Oa iava vo ruui-ia Jisas-pa aioa puraiva. Uva Mata urioopa aio tokesa. Oire voa Lasaras voea tapo oirara pauparoepa oea Jisas tapo paupaaepa. 3 ✧ Uva Maria aue uvuiaro katai vavata (paun) korovo ovi oueva. Oovia vaisipai oiso, Nad. Oovia puraiva aue iava airepa ruu piero. Ipa pie voriva rutu. Oa iava

✧ 11:45: Jo 2:23 ✧ 11:49: Mt 26:3 ✧ 11:52: Ais 49:6; Jo 10:16 ✧ 11:54: 2 Kro 13:19  
✧ 11:55: Mt 26:1-2 ✧ 12:1: Lu 7:37-39 ✧ 12:3: Jo 11:2; Mk 14:3

oira-ia Jisas kokotoaro kipueva. Uva ora oira iava orui-ia rera kokotoaro posiposi pieeva. Oira vearo geesi va vaaro vao sanda kepa sopaaro vogisi pieva. <sup>4</sup> Uva iravu disaipelto Judas Iskariot ro ira Jisas kosi pierevere keripa irarapa irara oiso puraroepa, <sup>5</sup> “Eakepa iraiapa vo ovio sanda ovi vate asapai, ra va vorireve irai? Oa iava uvuipaviei ra va-ia aue vo peva vovoto kina (K300) oupe vo ovi-ia. Ra oai apota irara vai vatepe rara.” <sup>6</sup> Uva viapau oiso apota irara-a oeware rugorugooapaoro oisi eisi puraroepa. Viapau. Ari ora rera ragare-a, uvare rera-a riro kaviruto. Ira oisoa moni bokis tokipaoro va kavirupareve.

<sup>7</sup> Uva oisi-a eisi osa iava Jisas voeare oiso puraroepa, “*Oira eakata eira. Iria eisi pieevoi ragai kipuoro vo vokia iare ravaavira ovokia-ia ragai tovoivere tova-ia. Uvare ragai vo vokiara tutuu pievoi.*” <sup>8</sup> ✧ Apota irara visii tapo vokiara rutu-ia toupaveira. Ari ragai viapau oiso visii tapo toupavere touvira.”

### *Reipa Irara Pris Reo Goru Puraiva Lasaras Uposa*

<sup>9</sup> ✧ Oire uva riro irara Jiu iava taraipaaepa oiso, Jisas vo uruio-ia toupaveoi. Oa iava rera iare urioaepa. Uva viapau oiso rera raga kekesa urioaepa. Viapau. Ari vao iava tapo-a, uvare Jisas Lasaras tuaririvi vorevira tore pieeva tova tapi iava. Oa iava rer tapo kekesa urioaepa. <sup>10</sup> Uva oisi-a oiso osa iava reipa irara reo goru puraiva, oiso ra Lasaras tapo upoive. <sup>11</sup> Eake iava? Uvare riro irara rutu Jiu iava Lasaras-re rugooapaoro voea kavuiva reipa irara pris Jisas raga oirao piesa.

### *Jisas Jerusalem-ia Karero Viropa Oiso Osa King (Matyu 21:1-11; Mak 11:1-11; Luk 19:28-40)*

<sup>12</sup> Oire uva vo vokia isivaaro riro irara Pasova vurei-ia tupaoro Jisas iava uvuiva oiso, Urioparoi vore Jerusalem-ia. <sup>13</sup> ✧ Osa iava sorapita raoro ouiva. Oa iava varava rerare korotosa avaaepa raivaaro. Oa iava raga piepaiva varava kaku piepaoro rerava oiso purapaoro, “Hosana! Ro vaisiara kae piepe ira urioroi Reito Turaro vaisiara-ia Isrel-pa irara reraaro King!”

<sup>14</sup> Uva Jisas iriavu donki kakae kekereva. Oa iava oira ivara-ia paupaoro urioroepa oiso osa Tugoropa Vuku purapapeira,

<sup>15</sup> ✧ ‘O Saion-pa irara. Opeita uriripata. Visii reraaro King keketa. Eera-a ira urioroi aue-ia paupaoro donki kakae.’

<sup>16</sup> ✧ Oire uva rovoa-ia igei disaipel viapau oiso va vituaro-ia taraiiepa. Ari rera vo torearo isivaaro iava Jisas keraria oueva. Ovuuta-a eva oa-ia vorevira ora rugorugoo pieiepa vaore osa Tugoropa Vuku purapapeira rera iava. Osa iava tapo oirara ruture rugooiepa voeao oea orekerovu purapaiva vo rerare.

<sup>17</sup> Tuariri Lasaras kopiioepa. Oa iava tova-ia toureva. Uva riro irara Jisas tapo toupaveiva ovusa Lasaras-re keeraroepa rera vorevira tore pieoro. Uva va-a vao oa iava riro irara tavitavi iraoapaepa va iava vao oa purareva Jisas. <sup>18</sup> Osa iava rera iava uvuiva oirara, uvare ravotoa purareva. Oa iava raivaaro rerava aivarosa avaaepa. <sup>19</sup> ✧ Uva oisi-a eisi osa iava voea raga Farisi ora reopaaepa oiso purapaoro, “Va eva keketavoi. Visiigoa voeare korukoru ragapataveira, osa viapau. Uva oirara rutu rera raga sirova avaa.”

### *Oearovu Grik Jisas Keke Ruipapaaepa*

✧ **12:8:** Diu 15:11; Mk 14:7    ✧ **12:9:** Mk 12:37    ✧ **12:13:** Sam 118:25-26; Jo 1:49    ✧ **12:15:** Sek 9:9    ✧ **12:16:** Mk 9:32    ✧ **12:19:** Jo 11:47-48

20 Oirara rutu Jerusalem iare ipaaepa Pautoa-pa lotusa vo vokia vao Tugoropa Voki Oovapa. Uva oearovu tapo Grik-pa irara voare ipapaepa. 21 Uva Grik-pa irara urioepa Filip iare aue iava rera Betsaida vo Galili taere sovara-ia. Uva oiso rerere puraaepa, “Auoro. Oiso ruipapaiei ra Jisas kekeio.” 22 Oa iava Filip avaroepa Andru tavisa. Uva vaierei rutu avasiepa Jisas tavisa. 23 Uva Jisas vaiereire oiso puraroepa, “*Easi Oirato Oviitoaaro ragai vo vuutaaro-a vao oa pou piroi. Oa-ia keraria oupaavo.*” 24 ✨ Oiraopavira rutu oiso osa vei tavipaavo ragai vo vuutaaro iava oiso, Vosa wit takura viapau rasiua arore kovepe kopiisa voa, ra va raga kataia toupave. Ari ita, vosa kopiuro, oire voava vorevira torero riro kouro aioara karekeoro. 25 ✨ Ari ro ira ora rera iava tootoa-ia virivirioparo ira iava opesi ovoipere eera. Ari ro ira tootoaro vatereve vo oearovupa ragai vo ruipaaro sirova utupaoro, eera-a ira ora rera vaaro tootoa ourevere vao Tootoo Ovoie rutu. Oa viapau opesia vai. 26 ✨ Vosa irai ragai vo kovoaro-ia pitureve, ira uvui iraopa ra ragai sirova uturo, oiso ra ragai tapo toupaveve, Kovopatoa oaa vo uva toupaveve. Vosa ro ira ragai vo kovoaro-ia pitupaveve, irapa rei vaisi vaterevere Aite oaa taru.

### *Uvuipaa Ra Oirato Oviitoaaro Vaisiaro Kae Pie Iraopave*

27 ✨ “Vo vokia ragai iava sopaua vavataei. Uva apeisi puraparai? E uvuiparai ra oiso vaio pasi purara, Aite vao verari oa ragai-ia karekesa auepai? Eke viapau uvuiparai ra eisi purara? Viapau. Uvare va raga-a eva oare poua virova vo vuutari-ia oa-ia siraoa vo tavakaaro ouavere.” 28 ✨ Aite. Uvuipauei ra ora vii vaisiaro rei pieri oisi iavirava oiso.” Eisi osa puraroepa Jisas. Oa iava Pauto vo reoaro vuvuiua iava varaepa. Oreoa-ia oiso puraroepa, “Tuariri ora ragai iava vaisia rei pieavora. Oire uva vorerivira ora ragai vaisiaro rei piepaavo rara.” 29 Oirara voeao oea rera ruvara-ia tutuu pievira torepaaepa oea vo guruko uvuiva. Oa iava oiso puraaepa, “Varakeoto ira pokoro viroi.” Ovusa oearovu oiso puraaepa, “Iravu purapurapato enselto ira rera tapo ora reoparoi.”

30 Oire uva Jisas voeare oiso puraroepa, “*Viapau oiso ragai tauvasa oiso vo reo karekeei. Viapau. Ari visii tauvasa-a.*” 31 ✨ Vo vokia Pauto oirara rutu voeao vo rasio-ia rovirieiparevo. Vo vuuta-a vao oa-ia vo rasio vo pitupituaro vo goruaro tokoparevo Seten vo goruaro-ia pute iraroero. 32 Vo vokia vo rasio-ia toupaa. Uva vovio utupauavi ragai kae pieivere ragai kotooro rara. Uva vo vuuta-a eva oa-ia oirara rutu vo rugooroaro ivuavere ora ragai iare. Ra oisi iavirava ragai oirao pieive.” 33 Uva oisi-a oiso osa puraroepa ora rera vo kopiiraro reesioro.

34 ✨ Oa iava oearovu rutu rera vo reoaro pukooro rerere oiso puraaepa, “Igei oiso vo reo uvuiova Reo Taisi-ia, Kraisi oiso touvira rutu toupaveve. Uva eake-a vao oa vituaro iava oiso puravei, Oirato Oviitoaaro kae pieivere rera kotooro? Uva aa ro rutu-a ro Oirato Oviitoaaro, raa?”

35 Oa iava Jisas oiso voea tavireva ora rerere, “*Gare vuutavi raga-ia aviavia visii tapo toupavoi. Uva uvui iraopatai ra vo aviavio-ia vokata. Teapi rupa visii tavuruve. Ro ira rupa-ia vokapareve oire ra viapau taraiparo oiso, Ovu avaparoi.*” 36 Vo osa aviavia vaviopavira visii tapo touvira toupai, oire uva uvui iraopatai ra vo aviavi oirao pie iraota. Oa iava uvuipatai ra oiso rutu kareketa, Visii-a aviavia-ia vokapa irara rutu.”

### *Riro Irara Rutu Jiu Viapau Oiso Jisas Oisoa Oirao Piepave*

Vo reo-a vao oa pureveoiva, Jisas voea kavuoro avaroepa voea osireiario iava vatausa. <sup>37</sup> Ari ita, rera oisoa siitue ragapaive Jiu, ovusa riro ravotoro rutu pura ragapareve. Ovusa viapau rera oirao piepaive oisi iavirava. <sup>38</sup> ✧ Uva oisi-a eisi osa iava profetato Aisaia vo rearo oiraoepa vao oa iava oiso puraroepa,

‘Turaro Pauto. Irouto igei vo rearo oirao piepare? Irouto-a ro ira Turaro Pauto vo goruaro eveiparevoi? Viapau rutu oiso iraiiei.’

<sup>39</sup> Uva viapau oiso uvuipaavere ra Jisas oirao piepaive. Oa vituaro iava Aisaia oiso oreovu rigatoreva. Oa-ia oiso puraroepa,

<sup>40</sup> ✧ ‘Pauto voea osireiario voosi ovoi piereva. Ora voea vo rugorugooroaro tapo tupareva. Osa iava viapau uvuipaai ra oaravu avu vai kekepaive ora voea osireiario iava. Ora vo vearo rugoo-ia voea iava sopaura-ia. Oire ra oisi iavirava viapau ora voea iava sopaura oaive porepaive. Osa iava viapau uvuiparai ra voea porete piepaa. Viapau rutu.’

<sup>41</sup> ✧ Ari ita, voari tuariri Aisaia ira Kraiss vaoro keraria kekereva. Oa iava vo reo pureveva rera ragare Kraiss.

<sup>42</sup> Riro irara reipa irara Jiu iava rera oirao pieiva. Osa Farisi ragapa uriripaaepa. Oa iava viapau ora voea vo oirao pieroaro iava tavitavipaaepa, uvare oiso rugooaaepa, Teapi vigei siguive Reo Taisi Uvupa Kepa iava Sinagog. <sup>43</sup> Aue iava uvare oiso raga oisoa ruipa iraoaave ra oirara voea vaisiario kae piepaive. Vo osa oisivi raga Pautoa-re oiso rugooaave. Ra voea vaisiario-ia vearo vaisi purapareve.

### *Jisas Vo Rearo-a Vao Oa-ia Oirara Rovirieiveveea*

<sup>44</sup> ✧ Oire uva Jisas rirovira rutu reoro oiso puraroepa, ‘Ro ira ragai oirao piepareve ira viapau oiso ragai raga oirao pieparevoi. Ari Aite tapo oirao pieparevoi ro ira ragai arureva vore. <sup>45</sup> Ora ro ira ragai kekereve eera ita-a ira Aite tapo kekepare ro ira ragai arureva. <sup>46</sup> Vo rasio iare oiso rutu urioraera osa aviavia vaore, oiso ra oirara rutu ragai oirao pieve. Ra oisi iava viapau oiso rupa-ia toupave. <sup>47</sup> ✧ Vosa irai ragai vo rearo uvupareve, ra viapau va oirao piepareve va sirova utupaoro, eera-a ira viapau rovirieivareea oiso osa ro reo rovirieipato. Viapau oiso ragai urioraera ra oiso toupaa, Oirara rovirieipato ragai. Viapau. Ari uriorae voea vorevira virivarisa rutu. <sup>48</sup> Ro ira ragaire isivaparo vo rara viapau ragai vo rearo oupareve, ira rovirieivareea ragai vo rearo raga vo Ovoioa Voki-ia. Uvare ragai vo rearo, Oiraopa Reo rutu oa toupai oiso rutu osa reo rovirieipato. <sup>49</sup> ✧ Viapau oiso ora ragai raga vo vovouaro iava oiso reoreoparai. Viapau. Ari Aite-a ira ragai siporeva. Eera ira ragai taviparevoi vo reoro ruture vara purapasa vara rutu tapo iava siposipoparo. <sup>50</sup> Taraiparai Aite vo rearo-ia. Oa tootooa kareke piepaiveira vao Tootoo Ovoioa vokiara rutu iarepa. Eisi osa iava vo reoro rutu varao purapaa oiso osa Aite varare puraroepa.’

## 13

### *Jisas Disaipel Irara Kokotoaro Sisureva*

<sup>1</sup> Tagausapa Vurei Pasova vo vuutaaro kareke asavira touva. Uva Jisas tarairoepa vo vuutao-ia oa karekee oia-ia vo rasio kavurevere Aitetoa iare avaro. Uva oisoa oirara kaviko iraoaave voea rera voeaaro oea vo

✧ 12:38: Ais 53:1; Ro 10:16 ✧ 12:40: Ais 6:9-10 ✧ 12:41: Ais 6:1-4 ✧ 12:44: Mt 10:40

✧ 12:47: Jo 3:17 ✧ 12:49: Jo 14:31

rasio-ia toupaveira. Okavikoa vao rera vaaro oa vo rutu tugurasa urioepa uva kopiioepa.

<sup>2</sup> ✧ Oire uva ovaiairovi aiopaoro toupai. Vo osa Seten ora rera vo rugurugooaro vuria ro rovoreva Judas Iskariot sopaaro-ia ro Saimon oviitoaro, oisore ra Jisas kosi pierere keripa irara vavaeoro iare. <sup>3</sup> ✧ Uva Jisas tarai rovroepa oiso, Aiteto orekerovu rutu vatereva rera vavaeoro iare. Uva vao-ia tapo oiso tarai rovroepa, Pauto Aite rera arureva oa iava urioepa vore. Ora uva vorevira voreroverea rara Pauto iare.

<sup>4</sup> Oire uva aiopa tapiva toreroepa varoa verasa ora rera iava vao oa-ia oisora ora rakurakuparo. Oa iava aue taul oueva rera-ia tuusa. <sup>5</sup> Osa-a eisi osa pierivoiva, uuko ovi petoreva aue iare dis. Uva rovroepa igei disaipel kokotoaro sisupaoro. Uvare oiso rutu ora pieroepa, Akukutoavi raga kovopato. Uva voava igei kokotoaro posiposi piepareva vorevira taul-ia.

<sup>6</sup> Uva Saimon Pita iare ora viruroepa. Oa iava Pita oiso rera akereva, “Turaro. E ragai kokotoaro tapo sisuparivoi?”

<sup>7</sup> Oa iava Jisas rerere oiso puraroepa, “*Vao oa purapaavoi oa-ia viapau taraipaei. Utupavira oa-ia taraiuvere rara.*”

<sup>8</sup> ✧ Uva Pita rerere oiso puraroepa, “Viapau oiso ra ragai kokotoaro sisuri. Viapau rutu.” Uva Jisas oiso puraroepa, “*Eakepa Pita? Vosa viapau vii sisua, ra viapau uvuipaei ra oiso toupai, Ragai reraoro disaipelto.*” <sup>9</sup> Oa iava Saimon Pita rerere oiso puraroepa, “Eagara. Ragai kokotoareiaro sisuri, ora vavaearei, ora kukue.”

<sup>10</sup> Uva Jisas oiso puraroepa, “*Ro ira ora rera iava varaua rutu sisu rovoreve ira sisigarue ovoiroi ita. Oa iava uvuiparoi ra kokotoaro raga ita sisureve. Ari ita, sisigaruevira toupatavoi. Uva viapau oiso visii rutu-a.*” <sup>11</sup> Aue iava uvare tarairoepa ro-ia ira rera kosi pieparevoi rara keripa irarapa. Uva va-a vao oa iava oiso puraroepa, “*Viapau oiso visii rutu sisigaruetai.*”

<sup>12</sup> Oire uva Jisas voea sisu rovorevoiva, vorevira varoa-ia ora raku-rakuroepa. Oa iava vorevira pauroepa. Uva voea akereva oiso, “*E vao-ia taraipatai oa puraavoi visii-ia?*” <sup>13</sup> ✧ Ari ita, ragai vaisipataveira oiso, Tisato, ora oiso, Turaro. Uva vearovira rutu-a, uvare oisi eisi purapataveira ragaire. Osa raga ita-a eisi osa toupavoi. <sup>14</sup> ✧ Oiraopavira rutu, uvare Turaro-a ragai, ora Tisato. Ragoa visii iava kokotoara sisuavoi. Oire uva visii tapo ita uvui iraopatai ra ora visii araoko iraraoro kokotoaro tapo oisi sisupata. Ra voeapa ora vaisiaro oavisii gare piepata. <sup>15</sup> ✧ Uva visii tapo uvui iraopatai ra oisi ragavira vioevira oisi piepata, oiso osa va vao ovoovovira puraavoi visii-ia. <sup>16</sup> Oiraopavira visii tavipaavoi oiso, Kovopato viapau putepare rera reraoro-ia reito. Ora ro ira okovovu iare avaro, ira viapau oiso uvuipa ra roari-ia putepareve ira rera arurevora, avaro. <sup>17</sup> Uva vo ovoovo-ia taraitai oa puraavo visii osireiaro-ia. Oa iava uvuipatai ra va sirova utupaoro oarai purapatavora, roru iraopata.

<sup>18</sup> “*Viapau oiso visii ruture oiso purarai. Ari ragai voeao-ia taraiparai oea ora ragaipa reereesiava ragai voeaaro. Ari ita, uvare va vao oare Tugoropa Vuku oiso puraepa oa oiraoperea rara. Oiso osa Tugoropa Vuku-ia oiso purapai,*

*‘Ro ira ragai tapo bret iava aioroera ira kokotoarei kae piereragai-ia tasisa.’*

<sup>19</sup> Uva va vao kareke asavira toupai osa rera iava visii tavipaavoi. Uvare oisi karekepere rara. Ra oisi iavirava ragai oirao pieta ragai raga ita vao-ia

**Krais.** <sup>20</sup> Oiraopavira visii tavipaavoi oiso, Vosa aa ro avuo ro ira kovopatoa oare vearo vovou rutu purapareve ro ira arua, ira ita vearo vovou rutu purapareveira ragai tapo-ia. Oa iava ita rera vegei-ia ora Aite tapo-ia vearo vovou rutu purapareveira.”

*Judas Jisas Vatesa Aueparoepa Keripa Irara Vavaearo Iare*  
(*Matyu 26:20-25; Mak 14:17-21; Luk 22:21-23*)

<sup>21</sup> ✧ Oire uva Jisas sopauaaro vavata iraoepa. Oa iava oiso voeare puraroepa, “*Iravu epao visii iava ira ragai kosi pieparevoi keripa irarapa rara.*”  
<sup>22</sup> Uva oisi-a eisi osa puraroiva, igei raga disaipel ora igeiva vurapaiova tuupavira oiso purapaoro, “*Viapau taraipaviei irouto-a.*”  
<sup>23</sup> Uva ragai Jon rera reraaro disaipelto Jisas kopukopuaro-ia otarapaoro pauparaepa. Ragoa oisoa kaviko iraoepareve rera Jisas. <sup>24</sup> Osa iava Saimon Pita kukue pikuoro ragaire oiso puraroepa, “*Rera akeri. Iroure eisi puraroei?*”  
<sup>25</sup> Oa iava rera kopukopuaro iare tutuu pieoro rutu ogaga visivi oiso rera akeava, “*Turaro. Iroure eisi purauei?*”  
<sup>26</sup> ✧ Uva Jisas oiso puraroepa, “*Aioa vai tovopaavoi tapi rovu-ia. Ra rera vatea ro raga ita-ia.*” Osa iava aioa tovoreva kap-ia. Oire va ouoro va vatereva Judas-pa Saimon Iskariot oviitoaaro.

<sup>27</sup> ✧ Oire uva Judas aioa ourevoiva, Seten rera sopauaaro-ia ora kiuroepa. Oa iava Jisas rerare oiso puraroepa, “*Vosa va pura ruipapau. Uva uvui iraoepauei ra ikauvira raga va purari.*”  
<sup>28</sup> Uva viapau oiso irai tebol ruvaravi paupaoro oisi iava vo reo vituaro-ia tarairoepa oreoa puraveva Judas-ri. <sup>29</sup> ✧ Uva oearovu igei iava disaipel oiso keapaaepa vao iava, uvare Judas moni bokis-ia pitupareveira. Oa iava oiso keapaaepa, Jisas rera taviparevoi orekerovu avu vai vorivorisa Tugoropa Vurei iare. Eke oarai vatevatesa apota irarapa. <sup>30</sup> Uva Judas aioa ourevoiva, ikauvira kosi ovoiro viropa ovusa rupa ovoiepa.

*Airepa Reo Taisi*

<sup>31</sup> ✧ Uva Judas kosiro viroiva, Jisas oiso puraroepa ora rera raga vaisipaoro, “*Vaviopavira Oirato Oviitoaaro Ro Ropoto keraria vo goruaro ourevoi, uvare Pauto vo kerariato rera-ia karekei.*”  
<sup>32</sup> Vosa ragai Oirato Oviitoaaro Pauto vaaro keraria vo goruaro kareke piea oirarapa, ra Pauto ita ragai vo kerariato vo goruaro tapo kareke piereve poeravira oirarapa. Ra torevokovira Pauto oisi piereve, uvare ragai vo kerariato vituaro rera-ia toupaveira. <sup>33</sup> ✧ Ovii irara oaa. Gare visivi raga visii tapo toupavoi. Uva ragaire taraa ragapatavere. Oiso osa Jiu taviava oiso-ia osa visii tavipaavoi tapo. Viapau rutu uvuipatai ra voare avata vo uvare avaparai. <sup>34</sup> ✧ Visii vateavoi airepa reo goru. Oa-ia oiso purarai, Ora visii iava sopaura rutu vatepata araoko irara oavisiiipa siraopaoro. Oiso osa ragai ita ora ragai iava sopaua rutu vate rovoavora visiiipa siraopaoro. Eisi raga ita osa uvui iraozatai ra ora visii araoko iraraaropa siraopata. <sup>35</sup> Vosa araoko irara oavisiiipa siraopata. Oa iava uvuipai ra oirara rutu oiso taraipaave, Visii-a ragai voeaaoro rutu disaipel irara.”

*Jisas Pita Tavipareva Oiso, Ragaire Isivavere Rara.*  
(*Matyu 26:31-35; Mak 14:27-31; Luk 22:31-34*)

<sup>36</sup> ✧ Oire uva Saimon Pita rerare oiso puraroepa, “*Turaro. Ovu-a vo uvare avavere?*” Uva Jisas oiso puraroepa rerare, “*Vo uvare avavere, uvare*

✧ **13:21:** Jo 12:27 ✧ **13:26:** Jo 6:71 ✧ **13:27:** Lu 22:3 ✧ **13:29:** Jo 12:5-6 ✧ **13:31:** Jo 7:39; 1 Pi 4:11 ✧ **13:33:** Jo 7:33-34 ✧ **13:34:** Lev 19:18; Jo 15:12; 1 Jo 2:7, 3:11, 4:10 ✧ **13:36:** Jo 21:18; 2 Pi 1:14

*viapau oiso uvuipauvei ra ragai sirova voare utuu. Ari ita, voari utupavira ragai sirova utuuvere.”*

<sup>37</sup> Oa iava Pita rerare oiso puraroepa, “Turaro. Eake iava viapau uvuiparai ra vii sirova utura? Uvare ora ragai iava tootooa oaa vikisa aueparai vii tauvaoro.”

<sup>38</sup> ✧ Uva Jisas rerare oiso puraroepa, “O ari ragai tauvaoro ora vii vaaro tootooa vikirivere, eke? Oiraopavira rutu oiso osa vii tavipaavoi, Vo osa kookai gau asavira toupavevere, ovusa ragai vaisiario vatauri vo peva piepa taea-ia.

## 14

### *Jisas-a Raiva Tootoo Vatepa Vore Aiteto*

<sup>1</sup> ✧ “Opeita visii iava sopaura oavisii siraopape. Ari Pauto oirao piepata ora ragai tapo ita. <sup>2</sup> Vo Aite oaa vo kepaaro-ia oa-ia riroara rutu toupaveira tugiugiara. Vosa viapau oisi eisi toupavori, ra viapau oiso visii tavi rovoavori. Ari oiraopavira avaparai visiipa uruia ravaasa. <sup>3</sup> Oire vo osa avaparai visiipa uruia ravaasa, uva voava vorevira voreraverea visii ou piesa. Ra ragai tapo touta voa. Osa-a eisi osa vo urui-ia eva touavere. Oa-ia ita visii tapo ragai tapo toupatavere. <sup>4</sup> Uva taraipatai raiva-ia vo urui iare vao oa iare avaparai.”

<sup>5</sup> Uva Tomas oiso rera akereva, “Turaro. Ovu-a vo uvare avapauvei? Viapau oiso igei taraipaiei. Apeisi ragavira iava uvuipaiei ra vo raiva-ia taraiio eva voare?”

<sup>6</sup> ✧ Oa iava Jisas oiso puraroepa, “Ragai raga ita-a vao-ia raiva, uvare ragai-a Oiraopa Rutu vituaro. Ora ragai-a Tootooa tapo vituaro rutu. Viapau irai uvuiparoi ra oraivai raga iava Aite-ia pouro viro. Viapau rutu. Ari vo raga ragai. <sup>7</sup> Vosa ragai-ia taraipataeri, ra oisi iavirava Aite oaa-ia tapo taraipata. Oire uva vaviopavira rovota rera-ia taraipaoro. Uvare ita rera kekepataveira.”

<sup>8</sup> Uva Filip oiso rerare puraroepa, “Turaro. Igei kareke pieri Aiteara iava. Ra oisi iavirava igei vo ruiparoaro uvui piereve.”

<sup>9</sup> Jisas rerare oiso puraroepa, “Filip. Riro kaekae vuutaro rutu-ia oisoa visii tapo toupaa, osa viapau ragai-ia taraipau, raa? Ro ira ragai kekepareve, eera ita-a ira Aite tapo kekepareveira. Uva apeisi iava oiso purauei, Igei kareke pieri Aiteara iava? <sup>10</sup> ✧ Easi viapau vai ragai oirao piepariveira vo osa Aite tapo toupaveira, ovusa ita Aite oaa ragai tapo toupaveira, raa? Vo reo oa vatepaaveira visiipa, uva viapau oiso va purapaaveira ora ragai raga vo rugorugooaro iava. Easi iava ragai tapo toupaveira ira ora rera vo kovoroaro purapaveira. <sup>11</sup> Ragai vo reoaro oirao pie iratoa aue-ia uvare Aite-ia toupaa, ovusa Aite ita ragai-ia toupave. Vosa vo reopa viapaeri, oire ra vo kovoro ruture rugoo iraopata oara purapaaveira. Osa iava uvuipatai ra vo kovoro iavirava ragai oirao piepata.

<sup>12</sup> “Oiraopavira rutu oiso visii tavipaavoi, Vosa irouto ragai oirao piepareve vo kovoro iava oara purapaaveira, ira-a tapo ita eera ira uvuiparoi ra oisi vara purapave. Ari ita, oa iava uvuiparoi ra pute pievira rutu okovorovu riroara purapave. Oire vo kovoro evara vo kovo-ia ragai vaaro puteve. Eake iava? Uvare avaparai Aite iare. Ra voa tupaoro Tugoropato Uraurato vara pieavere visii tavapasa. <sup>13</sup> ✧ Ra varao orekerovu rutu oarare

✧ 13:38: Jo 18:27 ✧ 14:1: Jo 16:23-24 ✧ 14:6: Jo 10:9 ✧ 14:10: Jo 10:38, 5:19, 12:49

✧ 14:13: Je 1:5; Jo 15:16

variripata ragai vaisiario-ia oara-ia uvuiparai ra vara purapaa. Osa iava uvuipai ra Aiteto vo kerariario goruaro karekepe ragai iavirava. <sup>14</sup> Vosa ragai vaisiario oirao piepaoro variripata orekevure, ra va puraa taru.

*Jisas Reo Ovoi Purareva Vorevira Tugoropato Uraurato Vara Piesa*

<sup>15</sup> ✨ “Vosa ragai kavikopaoro ragaipa ora visii iava sopaura oavisii rutu vatepata, eva-a oa iava ragai vaaro reo goru sirova vearovira rutu utu irapatavere. <sup>16</sup> Oa iava uvuiparai ra varirira Aite iare. Ra oisi iavirava visii vatereve iravu visii Tauvapato visii sopaura oavisii goru piepaoro vokiara rutu-ia. <sup>17</sup> ✨ Ro-ia Tugoropato Uraurato Oiraopara Rutu Kareke Piepato. Ira-ia viapau uvuipaai oirara rutu iava oearovu vo rasio-ia ra rera viapau oupaive, uvare viapau rera eveipaiveira, ora viapau rera-ia taraipaaveira. Ari ita, visii raga rera-ia taraipataveira. Eake iava? Uvare visii tapo toupaveira osa iava visii sopaoro-ia toupare.

<sup>18</sup> “Teapi keapata oiso, Visii kavupaavo, ra oiso rutu toupata osa virakoi kakaero. Viapau. Ari visii iare vorevira voreraverea rara. <sup>19</sup> Tutuu piepai ra oirara rutu voeao vo rasio-ia tou irara viapau ragai kekeive vorerivira. Ari visii raga taru ragai kekepatavere ragoa tootoovira toupaa. Eva-a oa vituaro iavirava visii tapo ita tootoovira toupataveira. <sup>20</sup> ✨ Ovokia-ia eva taraitavere oiso-ia, Ragai Aite tapo ora tavosiparai. Ra ita ragai tapo ora tavosipata, ovusa ragai ita visii tapo ora tavosipara. <sup>21</sup> Ro ira ragai vaaro reo goru oureva ra oisi iavirava vearovira rutu va sirova utuparo, ira-a eera ragaipa ora rera iava sopaua rutu vateparevo ragai kavikopaoro. Ora ro ira ragai kavikopareve, ira ita kavikopareverea Aite. Ora ragai tapo ira tapo kavikopaaveira rera iare roroiovira rutu ora karekepaoro.”

<sup>22</sup> Osa-a eisi osa puraroepa Jisas. Uva iravu raga Judas viapau oiso roa Iskariot, ira Jisas-re oiso puraroepa, “Turaro. Apeisi iavirava igei iare roroiovira ora karekevure, vo osa oisi eisi viapau roroiovira ora karekeu oirara rutu-ia voeao vo rasio-ia?” <sup>23</sup> ✨ Jisas rera vo reoaro pukooro oiso puraroepa, “Vosa ro ira ragai kavikopareve, ira-a eera vearovira rutu ragai vo reoaro sirova utuparo. Oa iava Aite rera kavikopareverea. Osa iava vegei aaorei rutu rera iare urioveare rera tapo toupasa vokiara rutu-ia. <sup>24</sup> Ari ro ira viapau ragai kavikopareve, ira-a eera viapau vearovira ragai vo reoaro sirova utupaveira. Oire uva vo reo-ia vao-ia oa uvutavo viapau oiso ragai vo reoaro-a. Ari Aite vo reoaro-a ro ira ragai arureva vore.

<sup>25</sup> “Tou visivi visii tapo tupaoro visii tavipaavo varao iava. <sup>26</sup> Ari ita, Tauvapatoa rutu ro Tugoropato Uraurato ira ragai vaisiario-ia arurevere Aite. Eera ira visii tarai pieparevere orekerovu rutu-ia. Ora visii vo rugorugooroaro toretore pieparevere. Oire ra oisi iavirava vo reoro ruture rugoopata oara vatepaaveira visiipa.

<sup>27</sup> ✨ “Visii kavusa aueparai. Ra oisi iava visii vatea gavaure vovou vaore, oiso ra visii-ia toupave. Eva gavaure vovou oa vatepaavo visiipa ragai vaaro. Viapau oiso visiipa vao oiso gavaure vovou vateavo osa voeao oirara vo rasio-ia visiipa gavaure vovou vate ragapaiveira. Opeita visii iava sopaura oavisii vavata ragapape. Ora opeita uriripata. <sup>28</sup> Vo reo uvutavo ita oa vateavo visiipa oiso, Visii kavuavo avao, oa iava vorevira voreraverea. Vosa ragaipa sirao rovotaeri, oa iava uvuipatai ra ragai-ia rorupata ovusa Aite oaa iare avara. Ra voa tupaoro visiipa Tugoropato Uraurato vara pieavere. Ari ita, Aite reiparoi rutu. Ira ragai-ia putepaveira. <sup>29</sup> Va-a vao oa pou viro asavira tupaivoi oa iava vo vokio visii taviavo. Oa-a eva

✨ 14:15: 1 Jo 5:3 ✨ 14:17: Jo 16:13; 1 Jo 4:6; 1 Ko 2:14 ✨ 14:20: Jo 10:38 ✨ 14:23: Re 3:20

✨ 14:27: Kl 3:15



vovio utupa visivi karekepere taru vo osa Aite iare avara. Ra oisi iavirava taru ragai vo reoroaro oirao pieta.

<sup>30</sup> “*Viapau oiso vorevoreripavira visiipa riro reoro vai rutu purapaa. Eake iava? Uvare vo rasio vo pitupituario goruaro, rera raga-a Seten ira urioroi. Ira viapau rutu uvuiparoi ra ragai vo goruaro-ia putepareve.* <sup>31</sup> Ari ita, uvare oiso ruipaparai ra oirara voeao vo rasio-ia taraiave, Ragai Aite oaa kaviko iraopaavo. Oa iava oisi piepaaveira oiso osa Aite ragai tavipareveira. Oire toreta ra vova avavio.

## 15

### *Jisas Ira-a Wain Ova Rutu*

<sup>1</sup> ✧ “*Ragai-a wain ova oiraopa ova. Ari Aite oaa-a vo kovo tokipatoa rutu.* <sup>2</sup> Oirara voeao oea ragai oirao piepaaveira oea oiso rutu toupai osa sipukau raoro ragai iava oraoroa kuepapeira. Ari ro ira viapau ragai oirao piepareve, ira tokorevere Aite oiso osa rurui raoro oara tokopareveira ro kovo tokipato. Oire uva ro ira oirao pie vovou purapareveira, ira sopaaro iava orugoorovu vuri rugooro oaive verapareveira Aite. Oiso ra rirovira rera vo kuearo kareke piereve aue oirao pie vovouaro-ia. Oiso rutu osa ruipapaoro ro kovo tokipato evao raoro tokopareve. <sup>3</sup> Uva visii sopaaro iava vuri rugooro oavisii vera pirora aue iavirava Tugoropa Reo, oreoa iava visiipa siposipopaavora. <sup>4</sup> ✧ *Ragai tapo ora tavosipaoro toupata. Ra ragai tapo ita visii tapo ora tavosipaoro toupaa. Uvare viapau raooa kue oupai vosa viapau evaova varaaro-ia toupave. Oiso rutu osa visii visiigoa viapau uvuipatai ra oirao pie vovouro purapata vosa viapau ragai tapo ora tavosipaoro toupata.*

<sup>5</sup> “*Ragai-a wain ova rutu. Ari visii-a raoara. Ro ira ragai tapo ora tavosipaoro toupave ovusa ragai tapo ita rera tapo ora tavosipaoro toupaa, ira-a eera ira rirovira rutu aio kue purapareveira. Ari vosa viapau ragai-toupata, oa iava viapau oiso uvuipatai ra oavu avu vai purapata.* <sup>6</sup> *Vosa viapau irai ragai tapo ora tavosiparo, ira taru eera verarevere Aite oaa oiso osa evao rao vao oa erakope. Ra va iava vo raoro guruguruive vara-ia vikisa tuitui kasi-ia vara kasioro.*

<sup>7</sup> ✧ “*Vosa ragai tapo ora tavosipaoro toupata. Ora vosa ragai vo reoro visii-ia toupave. Ra oisi iavirava uvuipai ra variripata visii vo ruipaaro arova katai vovou purapaoro ragai-ia. Ra va iava visii vo ruipaaro uvureve Aite oaa va purasa.* <sup>8</sup> *Vosa rirovira rutu aio kuero vai purapata, ovovoua iavirava eva eisi vuurapa vaisi oupareveira Aite. Osa iava uvuipatai ra oiso rutu toupata, Ragai voeaaro visii disaipel.* <sup>9</sup> *Aite ragai kavikopareveira. Eisi raga osa visii kavikopaaveira. Oa iava vokiara rutu-ia uvuipatai ra oiso toupata, Ragai voeaaro rutu oea kavikopaaveira.* <sup>10</sup> *Vosa vearovira rutu ragai vaoro reo goru sirova utupata, eva-a oa iava uvuipatai ra ragai vo siraoaro sovara-ia toupata. Oiso raga ita osa Aite vaoro sirova reo goru vearovira utupareveira. Oa iava rera vo siraoaro sovara-ia toupaveira.* <sup>11</sup> *Oiso ruipaparai ra ragai vo roruaro visii-ia toupave. Ra oisi iavirava vo roru eva visii sopaaro agasi piepaive rutu. Eva-a oa vituaro iava vo reo purapaavo visii-re.*

<sup>12</sup> “*Ragai vaoro-a vao reo goru oiso toupaveira, Ora visii araoko iraraviaro kaviko iraopata. Oiso osa ragai ita visii kaviko iraopaaveira.* <sup>13</sup> ✧ *Vosa irai ora irai iava tootoa vaiaro vikireve ora irai vate irara vaiaro tauvaoro,*

oire uva viapau oiso ovovouiei siraopa vovou vai oa vao-ia putepaiveira. <sup>14</sup> Vosa oiso rutu piepata osa visii tavipaavoi, oa iava uvuipatai ra oiso rutu toupata, Ragai vate iraraaro rutu visii. <sup>15</sup> Kovopa irara viapau uvuipai ra vao-ia taraipaave oa purapareve voea reitooaaro. Eisi osa iava oisi viapau visii vaisipaavoi vorerivira oiso, Kovopa irara. Aue iava uvare reoara rutu vateavorao visii siposipopaoro aue iava Aite. Oreoroa ouava rera ruvara-ia. Eva-a oa iava oiso visii vaisipaavoi, Vate irara oaa.

<sup>16</sup> ✧ “Viapau oiso ora visiipa ragai reesitava. Viapau. Ari visii ora ragaipa ropooro visii reesiava ragai raga. Oa iava visii tovoava kovoa-ia. Osa iava uvuipatai ra avataera, aio kuero purata. Osa iava visii vo aioroaro uvuipai ra toupate opesi asavira. Eisi piepaoro uvuipatai ra ragai vaisiara-ia variripata Aite iare. Ra visii vatereve oavu avu vai. <sup>17</sup> Visii vateavora reo goru vaore, oiso ra ora visii araoko iraraviaro kavikopata.

### Rasitoa-ia Tou Irara Disaipelva Keripaaverea

<sup>18</sup> ✧ “Vosa oirara voeao vo rasio-ia visiiva keripaave, osa iava uvuipatai ra taraita oiso, Oea-a evoea ragaiva keru rovoaera rovovira. <sup>19</sup> ✧ Vosa visii vao vo rasio rutu iava-a voea, ra oisi iavirava visii agiagipaive oearovu. Vo uvare visii-a voea iavapa irara. Ari ita, viapau oiso visii-a vo rasio iava. Viapau. Aue iava uvare visii reesiavora oiso ra vo rasio vo pitupituro kavuta. Eva-a oa iava oirara voeao vo rasio-ia visiiva ora keripaaverea. <sup>20</sup> Vearovira rutu vo reore rugoo iraopatavere oa puraavoi visiipa oiso, Viapau oiso kovopato rera reitooaaro-ia putepareveira. Osa-a eisi osa iava voea evoea oisoa ragai upopaive, eisi raga osa visii upopaivere. Ari ita, vosa ragai vo reoaro sirova utupaaeri, oire ra oisi raga ita visii vo reoroaro sirova utupaave. <sup>21</sup> Ari viapau taraipaaveira Aite-ia ro ira ragai arureva vore. Ra oisi iavirava keapaoro ragai vaisiara-ia visii-ia vuri vovouro purapaive.

<sup>22</sup> ✧ “Vosa viapau oiraopavira urioraeri voeapa siposiposa, eva-a oa iava viapau vuriara vaieri voea-ia. Ari ita, urioraera voea oiraopavira siposipopaoro ragai vo kovoaro vituaro iava. Osa viapau vo siposipo oirao pieive. Eva-a oa voea vo vuriaro vituaro. Oa roroiovira toupaveira. <sup>23</sup> Ro ira ragaiva keriparo, eera ita-a ira Aite tapova ora keriparoveira. <sup>24</sup> Ari ita, okovorovu rutu oara oisoa viapau oearoi tuariri purapaive okovorora puraavora voea rutu vuutaaro-ia. Oiraopavira rutu vosa viapau vo kovoro puraavori, ra oisi iavirava viapau vuriara vaipe voea-ia. Ari ita, vo osa vo vokio vara kekeivora uva ragaiva ora keripaai ora Aite oaa tapova. Eva-a ita voea vo vuriaro vituaro. <sup>25</sup> ✧ Uva voea vo pitupituroaro iavirava vo reo oiraopavira karekepa oa rigatoiva vo voea vaaro-ia Reo Taisi. Oreoa vao oa oiso toupai, Ragaiva keru ragapaai.

<sup>26</sup> ✧ “Ro visii Tavupato ira epao Aite tapo uvava rera aruavere, ra urioro visii iare. Eera Tugoropato Uraurato Oiraopa Rutu Kareke Piepato varao Pautoa iava. Ira Aite tapo toupaveira uvava uriorovere ragai iava oiraopavira siposiposa. <sup>27</sup> Visii tapo ragai iava oiraopavira siposipopatavere. Uvare tuariri visii ragai tapo oisoa toupata voari rovoa-ia ovusa kovoa rovoava. Oa iava vo voki-ia rekasisa voava uriotaerao oa-a vao-ia.

## 16

<sup>1</sup> ✧ “Visii taviavora ragai vo reoroaro iava, Teapi visii varaaro oirao pie vovouro oavisii kovepe opesioro. <sup>2</sup> ✧ Vo osa visii sigupaivere vova Reo

Taisi Uvupa Kepa Sinagog voea vaaro. Osa raga ita visii piepaiverea visii upopaoro vo vuutarori-ia oara uriopaperea. Ra oiso keapaave, Vearo kovo purapaivoi Pauto vaaro. <sup>3</sup> ✧ Viapau oiso Aite-ia taraipaaveira. Ora viapau oiso ragai-ia tapo taraipaave. Eisi osa iavirava vo vovouro purapaiverea visii-ia. <sup>4</sup> Ari ita, visii oisoa tavipaa vara iava oara utupaua karekepaperea. Oa iava varare vorevira rugurugopataverea, vo uvare vara iava visii tavipaaveira.

### *Tugoropato Uraurato Vo Kovoaro*

“*Tuariri oisoa visii tapo toupaa. Osa vituaro iava eisi viapau oisoa visii tavipaa va iava vao.* <sup>5</sup> Uva vaoviopavira avaparai ro iare ira ragai arurevoiva, vore urioraepa. Uva viapau oiso irai visii iava ragai akeparevoi oiso, Ovu iare avapavei? <sup>6</sup> Viapau. Ari ragai raga vo reo puraaivoiva, visiire sopaura oavisii vavatapai siraopaoro. <sup>7</sup> ✧ Oiraopavira rutu oiso visii tavi iraopaavo, Visii arova avaparai visii tauvasa. Oire vosa viapau avara, ra va iava viapau irai urioro visii tauvasa. Ari vosa avaparai, osa iava visii iare rera aruavere ra urioro eera visii Tauvapato visii soporepasa. <sup>8</sup> Uva uriorovere, ra oirara rutu voeao vo rasio iava tarai iraoaverea vuri vovouro rutu vituaro-ia voea varaaro, ora vao torevoko vovou rutu vituaro, ora kort vituaro-ia oira roviriei pitupitu Pauto vaaro, vo rara voea soporepareve. <sup>9</sup> Oire uva ora voea vo vuri vovouroaro vituaro-ia taraipaavere. Oa vituaro oiso toupai, Viapau ragai oirao piepaiveira. <sup>10</sup> Oirara rutu vo rasio-ia oea vearovira ragai-ia taraipaavere oiso, O ita, ari torevokotoa rutu-a ro Jisaa. Aue iava uvare avaparai vore Aite oaa ruvara-ia. Ra viapau vorerivira ragai kekepata. <sup>11</sup> ✧ Ari oira rovirieipa pitupitu iava voea soporepareverea ro Tugoropato Uraurato. Aue iava uvare Pauto Seten vo goruaro rovirieioro va putereva, uvare rera raga Seten vo rasio vo pitupituaro vituaro.

<sup>12</sup> “*Ari ita, riro reoro rutu epao oarava toupaa. Uva oiso ruipaparai ra visiipa tavitavira vara iava, osa viapau. Uvare viapau oiso vuupatai ra vaoviopavira vo reoro outa. Teapi visii iava sopaura oavisii vavatapape rutu.* <sup>13</sup> ✧ Ari vosa oiraopa reoa rutu vituaro urioro, rera ro Tugoropato Uraurato ira oiraopa reo rutu iava visii soporeparevere. Ra viapau oiso ora rera raga vo rugurugooroaro iava reoreoparo. Viapau. Ari vo reo-a oa uvureve Pauto ruvara iava oa siposipoparevere. Oire ra oisi visii tavitavipaoro varao iava oara karekepaperea utupaua visii soporepareve. <sup>14</sup> Ira ragai vo vovouaro-ia taraipaoro va iava visii soporeparevere. Osa-a eisi piepaoro ragai iava rei vaisi kareke pierereverea rara. <sup>15</sup> ✧ Orekerovu rutu Aite varaaro oara-a evara ragai raga ita varaaro. Eisi osa iava oiso purarai, Ira ragai vo vovouaro ouoro va iava visii siposipopaooro visii soporeparevere ragai iava.

### *Tavaka Vovou Ora Siraopa Vovou Roruvira Ora Poreperea*

<sup>16</sup> “*Gare vuutavi raga ra viapau ragai keketa vorerivira. Oire uva ita utupa visivi aia ragai keketavere ita rara.*” <sup>17</sup> Uva oearovu disaipep voea raga ora reopaoro oiso purapaepa, “*Aa vao rutu-a vo reo vao vituaro oa purarevoi vigeire? Oa-ia oiso puraroi, Gare vuutavi raga, ra viapau vorerivira ita ragai keketa. Uva ita gare vuutavi raga pere, ra utupauavi ita ragai keketa. Uva oiso tapo pura, Aite iare avaparai.*” <sup>18</sup> Oire uva oiso puraaepa, “*Gare vuutavi raga-a oa iava oisi taviroi. Oa apeisi ragavira toupai? Vigei viapau oiso taraipavie vo reo vituaro-ia eva oa purarevoi.*”

✧ 16:3: 1 Jo 3:1 ✧ 16:7: Jo 7:39, 14:16, 26, 15:26 ✧ 16:11: Jo 12:31 ✧ 16:13: Jo 14:17, 26

✧ 16:15: Jo 17:10

19 ✨ Oire uva Jisas voea vo rugooaro ou ovoireva vo osa rera akesa auepaaepa. Oa iava oiso puraroepa, “Asi visii vai pasi ora akeakepatai vo reo vituarore oa puraavoï. Oa-ia oiso purarai, Gare vuutavi raga toupai, ra viapau ita vorerivira ragai keketa. Uva ita, utupa visivi rara ragai ita keketavere. 20 ✨ Oiraopavira rutu visii tavipaavoï oiso, Utupaua gaupatavere sirao pievira rutu. Vo ovusa oirara rutu voeao vo rasio iava rorupaive. Ora tapo osa visii iava sopaura vavata iraope siraoa iava. Oire uva vo sirao-a eva oa roruvira rutu ora porepere taru. 21 ✨ Vosa riakova kakae kavausa auepao, oire ra ora oira vo vuutaaro-ia taraio oiso, Karekeei ragai vo vuutaaro. Oa iava rirovira rutu siraoapao. Oire ra va isivaaro iava kakaeto kavaveve. Ra viapau oiso evo upiare vorerivira rugoo oa puraave. Viapau. Ari roru iraoepave kakaeto raga-ia ro ira karekero. 22 ✨ Oiso ita osa vaoviopavira siraoapatai. Ari utupavira vorevira visii kekeaveve. Ra oisi iavirava sopaura oavisii visii iava roru iraoe. Osa iava eisi viapau oiso irai uvuirovereva ra visii iava vo roru eva verareve. 23 ✨ Oire uva vo voki-a eva oa-ia viapau oiso ragai akepatavere oavu avu vaire. Oiraopavira rutu visii tavipaavoï, Aite oaa iare variripata ragai vaisiario oirao piepaoro. Ra visiipa taru vara vaterevere. 24 ✨ Voari tuariri uva viapau oisoa variripata ragai vaisiario oirao piepaoro orekerovu avu vai oupasa. Oire vo vokiio uva variri iraoapatavere, oisore ra oisi iavirava oaravu avu vai oupata. Osa-a eisi osa vituaro iava visii iava sopaura roru iraoapaivere rutu.

### *Jisas Rasito Vo Vovouaro-ia Putereva*

25 ✨ “Ragai oiso vo reoro puraavoï visiire ruuvira. Uva utupaua viapau oiso vorerivira ita visiire oisi ruuvira reoravere. Viapau. Ari visiipa evoa aviavi pievira raga taviravere Aite iava. 26 ✨ Uva vo voki-a eva oa-ia ragai vaisiario oirao piepaoro variripatavere. Uva viapau oiso visii tavipaavoï, Ragai raga Aite iare variripavere, oisore ra visii tavvapareve. 27 ✨ Viapau. Ari Aite raga visii kavikopareveira. Uvare visii raga-a ita vao visiigoa ragaiipa ruipataera. Oa iava ragai oirao pietavora vao iava osa Aite tapo toupaaivoiva, urioraera vore. 28 ✨ Uvare tuariri rutu Aite tapo oisoa toupaa. Oa iava rera arova urioraera vore rasitoa-ia. Uva vo vokiio-ia vo rasio kavuoro Aite iare voreparai.”

29 ✨ Oire uva igei disaipel rerare oiso puraiepa, “Iu, vo vokiio-ia aviavi pievira tavitaviu. Viapau oiso ra ruuvira raga reopau. 30 ✨ Uvare oiso taraiiei, Viapau oiso voearore tue rovopau oearoa vii akesa auepaave. Viapau. Ari vii auero rutu-ia tarai iraoapauei. Eva-a oa vituaro iava vii oirao piepaioveira rutu oiso, Viigoa vao Pautoa tapo tourivoiva, urioeupa vore.”

31 ✨ Oa iava Jisas oiso igei akereva, “E vo vokiio-ia oiraotai rutu, raa? 32 ✨ Uvuta. Vuuta vao-ia tutuu pievoi vaore oiso ra karekepe. Iu. Kareke ovoiei vo vokiio oa-ia visii tariopaivoi rara vorarore visii vo uruiroaro-ia roopavira. Uva ragai kavupatavoï ovusa ragai raga toupaa. Ari ita, uva viapau oiso ragai raga toupaaevere. Viapau. Ari ragai tapo toupavevere Aite rera. 33 ✨ Uva oiso ruipaparai rutu ra ragai tapo ora tavosipata. Osa iava sopaura oavisii uvuipai ra gavaurevira toupave. Eisi osa iava vo reo visiire puraavoï. Oiraopavira uvare vo rasio-ia tou irara visiipa riroa rutu tavaka siraoa vatepaveve. Osa iava uvuipatai ra tuvuu vovouvira rutu goruvira toupata. Uvare ragai vo rasio vo vovouaro vo goruaro-ia pute iraoavoï.”

✨ 16:19: Mk 9:32 ✨ 16:20: Lu 23:27; Jo 20:20 ✨ 16:21: 1 Te 5:3 ✨ 16:24: Jo 15:11 ✨ 16:25: Jo 10:6; Mt 13:34 ✨ 16:27: Jo 14:21, 23 ✨ 16:28: Jo 13:3 ✨ 16:33: Kl 1:20; Ro 8:27; Re 3:21

## 17

*Jisas Ora Rerapa Varirioepa*

<sup>1</sup> Oisi-a oiso osa puraroepa Jisas. Oa iava vuvuiua taraaoro oiso puraroepa, "Aite. Ragai vo vuutaaro-a vao pura piroi. Osa iavirava uvuipau ra ragai vaisiaro kae pieri. Eisi osa iava ragai vii Oviitoaoro vii vaisiaro kae piepaaverea. <sup>2</sup> ✱ Uvare ragai vateriva reesia oiso ragai reesioro, Ragai-a oirara rutupa reipato. Osa iavirava uvuiparai ra oirarapa Opesi Asa Tootoo vatepaa voeao oea ragaipa vateriva. <sup>3</sup> Oa-a vao Tootoo Ovoi oa oupaivere vo rara vii-ia tarai rovopaave oiso, Vii-a Kataitoa raga Pauto, Oiraopatoa rutu. Ora vo osa ragai-ia tapo tarai rovopaave, Ragai Jisas Kraiss ragoa aruriva vore.

<sup>4</sup> "Vii vaaro keraria vo goruaro kareke pieavora vo rasio-ia. Okovo-a vao vateriva ragaipa va purasa oa opesi pieavoi. <sup>5</sup> ✱ Aite. Voari tuariri rutu uva rasito kareke asavira toureva, ovuuta-a eva oa-ia vii tapo toupaooro oisoa oisi rei vaisivira toupaa. Uva vo vokio-ia oiso ruipaparai ra vo vaisi raga ita eva reia vateri ragaipa vo vegei vo touaro-ia.

*Jisas Varirioepa Disaipel Tauvasa*

<sup>6</sup> "Voeapa vii vo ruipaaro kosi pieavora voeao oirara oea ragaipa vateriva vo rasio-ia vii voeaaro. Ari ita, uva ragaipa voea vate ovoiriva. Oa iava vii vo reoaro vearovira rutu sirova utupaaveira. <sup>7</sup> Osa-a eisi osa iavirava oiso taraiaerao, Orekerovu rutu varao oara vate ovoiriva ragaipa oara vii ruvara iava urioepa. <sup>8</sup> Ari ita, vo reoro rutu oara ragaipa vateriva oara rutu voeapa vateavora. Oa iava vara ou ovoivora. Osa iava tarai ovoiaera oiso, Oiraopavira, uvare tuariri rutu oisoa vii tapo toupaa. Oa iava voava urioraepa. Ora vao oirao pieivora rutu ita osa ragai arurivora vore.

<sup>9</sup> ✱ "Variriparai voea tauvasa. Ari ita, viapau oiso oirara rutupa voeao vo rasio-ia variriparai. Viapau. Ari voea raga tauvasa oea roporiva ragai iare, uvare vii voeaaro-a. <sup>10</sup> Uva voea rutu-a ragai voeaaro evoea vii voeaaro. Uva ita, voea rutu-a vii voeaaro evoea ita ragai voeaaro. Oea ragai vaisiaro kae piepaiveira.

<sup>11</sup> ✱ "Vo vokio viapau oiso tovira toupaaivoi vo rasio-ia. Ari voea vo rasio-ia toupavere ovusa vii iare uriora. Aite, Tugoropato. Voea kavikori voea tokipaoro ora vii vaisiaro vo goruaro iavirava, vo goru oa vateriva ragaipa. Osa iava uvuipaa ra katai vovou rutu-ia toupave. Oiso osa vegei katai vovou rutu-ia toupaveira. <sup>12</sup> Vo osa voea tapo toupaooro voea tokipaaveira vii vaisiaro vo goruaro iavirava. Vo vaisio oa goruaro vateriva ragaipa. Oa iava voea-ia vearovira rutu uutupaveira voea tokipaoro. Osa iavirava viapau irai opesikoparo. Eera ira iava vii vo rigatoaro oiraopere. <sup>13</sup> Uva vii iare uriorarai. Osa vituaro iava vo reo puraavoivoi vo rasio-ia. Oa iava ragai vaaro rorua uvuipai ra voea iava sopaura-ia agasipe rutu.

<sup>14</sup> "Ari ita, vii vo reoaro vateava voeapa. Osa iava oirara voeao vo rasio-ia voeava keripaaveira. Eake iava? Uvare ragai voeaaro vii vo reoaro-ia taraipaoro viapau vo pitupitu purapaaveira oara vo toupaveira vo rasio-ia. Oiso ita osa ragai ita viapau vara purapaaveira. <sup>15</sup> ✱ Viapau oiso viire variriparai oiso ra voea kae pieri vo rasi iava uvaire. Viapau. Ari oiso viire variriparai ra voeavi virivaripari. Ra oisi iava vurito Seten viapau voea piro pieparevere. <sup>16</sup> Viapau vo pitupituro purapaaveira oara vo toupaveira vo rasio-ia. Oiso ita osa ragai ita viapau vara purapaaveira. <sup>17</sup> Ora viipa

✱ 17:2: Dan 7:14; Hi 2:8 ✱ 17:5: Jo 1:1; Fl 2:6 ✱ 17:9: Lu 22:32; Jo 14:16 ✱ 17:11: Re 19:12; Jo 10:30 ✱ 17:15: Mt 6:13

voea roro pieoro voea reesiri, oisore ra vii vo vovouaro-ia Oiraopa Vovou goruvira pituive. Uvare vii vo reoaro-ia taraipaaro Oiraopa Vovou rutu-ia taraipaaverea. <sup>18</sup> Tuariri ragai aruriva oa iava urioraera oirara rutu vuruvuru-ia tousa voeao vo rasio-ia. Eisi raga osa voea voeao disaipel arusa aueparai, oiso ra oirara rutu vuruvuru-ia toupasa avaave. <sup>19</sup> \* Uva ora ragai iava tootooa oaa reesipaavo voeao tauvaoro. Oa iava vii vaaro-ia Oiraopa Vovou taraipaaro ora reesiavere oiso, Vii oiraraaro-a igei.

*Jisas Variriroepa Voeao Tauvasa Oirao Pie Vovou Irara*

<sup>20</sup> “Ari ita, viapau oiso voea raga tauvapasa variriparai. Viapau. Ari voeao tapopa variriparai oea voea vo siposipoaro uvupaive. Ra oisi iavirava ragai oirao piepaive rutu. <sup>21</sup> \* Uva oiso ruipaparai ra voea katai vovou raga-ia toupave. Oiso rutu osa vii Aite ragai-ia toupaveira, ovusa ita ragai vii-ia toupaa. Osa raga ita voeapa ruipaparai oiso ra vegei tapo tavosivira toupave. Osa iava uvuipai ra oirara rutu vo rasio iava vigei vo vovouaro katai vovou kekepaive, ra oisi oirao piepaive. Ragai arurivoiva, urioraera vore. <sup>22</sup> \* Uva vao keraria vo goruaro ragaipa oa vateriva eva ita oa voeapa vateavo, oiso ra va iavirava katai vovou rutu-ia toupave, oiso osa vegei toupaveira. <sup>23</sup> Ari ita, ragai voea-ia toupavo, ovusa vii ragai-ia touparivoi. Eisi osa raga ita voeapa oiso ruipaparai ra katai vovou raga-ia toupave. Ra oisi iavirava oirara voeao vo rasio-ia taraipaave oiso, Vii ragai arurivora vore. Ora tapo oiso osa voeapa siraopaveira oiso osa ragaipa siraopaveira.

<sup>24</sup> “Aite. Oiso ruipaparai ra oirara voeao oea ragaipa vateriva ragai tapo toupaverea vo uva toupaverea. Oa iava ragai vaaro keraria vo goruaro kekevera voa. Aue iava uvare tuariri vo uva rasito pura uviro asavira toureva ovuuta-a eva oa-ia oisoa ragaipa siraopau. Oa iava ragai vateriva va eva keraria vo goruaro. <sup>25</sup> \* Aite. Vii-a Torevokotoa Rutu. Uva oirara vo rasio iava viapau vii-ia taraipaaveira, vo ovusa ragai raga vii-ia taraiparai. Ora voeao disaipel oiso taraipaaveira, Ragai siporiva oa iava urioraepa vore. <sup>26</sup> \* Ari ita, vii vo ruipaaro iava siposipoavora voeapa. Uva topa pievira ita aia vii vo ruipaaro kosi piepaavo voeapa vaore, ra kaviko vovou rutu sovopaive ora voea sopaaro-ia. Oiso rutu osa vii vaaro kaviko vovou sovopaaveira ora ragai-ia. Ora oisore ra ragai tapo voea-ia toupaverea voeava ora tavosipaaro.”

## 18

*Judas Keripa Irara Vavaearo-ia Jisas Tovoreva  
(Matyu 26:47-56; Mak 14:43-50; Luk 22:47-53)*

<sup>1</sup> \* Vo variri purevoiva, Jisas ora igei disaipel tapo avaroepa uuko ovi ivirooro Kidron. Oa iviropavira okovovu Oliv kovo oisoa toupave. Oa iava vo kovo-ia ora kiusa avaroepa Jisas igei tapo. <sup>2</sup> \* Uva Judas tapo vo kovo-ia taraiparoepa ro Jisas kosi piepato. Uvare vokiara rutu-ia Jisas igei disaipel tapo vo kovo sovara-ia voa oisoa uvuruparo. <sup>3</sup> Uva voa-a vo uvare Judas viurupa irara tuvvetuvereva ora oearovu polis irara reipa irara pris voearo voearei ora voeao ratarataa vovou irara Farisi. Oa iava voare urioaepa aue-ia pitupaaro vuravuara, ora aoara, ora auero rutu varao upo purapara. <sup>4</sup> Oire uva Jisas tarai ovoiroepa vara rutu-ia varao oara rera-ia karekesa

\* 17:19: Jo 15:13    \* 17:21: Jo 10:38    \* 17:22: Jo 14:20    \* 17:25: Jo 15:21, 16:3    \* 17:26: Jo 15:9    \* 18:1: 2 Sml 15:23    \* 18:2: Lu 21:37

aeupaaepa. Oa iava Jisas voea iare tutuu piereva rutu voeare oiso purasa, “*Iroure taraapatavoi?*”

<sup>5</sup> Uva oiso puraaepa, “Ari Jisas, irare taraapaiovoi ro oisova Nasaret.”

Osa iava Jisas oiso puraroepa, “*Easi ragai raga ita vao-ia.*” Uva Judas toreparoepa voea ruvara-ia. <sup>6</sup> Uva Jisas voeare oiso puraroepa, “*Easi ragai raga ita vao-ia.*” Oa iava ora virupaoro vorepaaepa rasiuaaro kovopaoro.

<sup>7</sup> Uva vorerivira ita voea akereva oiso, “*Iroure taraapatavoi?*” Oa iava oiso puraaepa, “Ari Jisas ro oisova Nasaret-ia.”

<sup>8</sup> Uva Jisas voeare oiso puraroepa, “*Voari visii taviavoi ita oiso, Ragai raga ita vao-ia. Vosa ragaire taraapatavoi, oire voeao eakapatavoi ra avaaave.*” <sup>9</sup> Uva eisi puraroepa vo reo oirao pieoro tuaririvi oa puraveva. Oa-ia oiso puraroepa, “*Voea oirara ragaipa oea vaterivora oea iava viapau oiso irai opesikorovere.*”

<sup>10</sup> Oire uva va-a vao oa iava Saimon Pita toorio gororeva Rovopato Pristo kovopatoaaro iava uvareoua pakosa oisova oirapapa varata-ia uvava voua toereva. Ira vaisiaro-a ro-ia, Malkas. <sup>11</sup> Oa iava Jisas Pita oiso tavireva, “*Toorio toвори rera vaaro-ia pausa. E apeisi-a? O-ia kap viapau ukaioravere iria agasioi aue iava siraoa vo tavakaaro Aite iria vaterevora ragaipa?*”

### *Jisas Sipoiva Anas Iare*

<sup>12</sup> Oire uva va-a vao oa iava voea rutu viurupa irara, ora reito ofisato, ora polis irara rutu oea rutu Jisas rauiva rera tuukesa iroara-ia. <sup>13</sup> Uva rerava ava rovoaepa Anas iare Kaiafas avuetoaaro, ro ira pris kovoa reiparoepa vo iva-ia eva. <sup>14</sup> Ira-a ro Kaiafas voari Jiu-pa irara tavi rovoreva oiso, “*Vearopai vosa kataitoa vai raga kopiivoreve oirara rutupa toooaro vateoro.*”

### *Pita Ora Taaeroepa Oiso Puraoro, Ragai Eera-ia Jisas Viapau Taraiparai (Matyu 26:69-70; Mak 14:66-68; Luk 22:55-57)*

<sup>15</sup> Ragai ora Saimon Pita vegoa Jisas sirova utuveiepa. Uva pristo vo kepaaro kasuraaro iare koataraepa Jisas sirova. <sup>16</sup> Ovusa Pita ratau toreparoepa. Oa iava ragai vao ragoa-ia oisova reito pristo taraiparo, ragoa avaraepa riakova tavisva o iria oiso rataoa tokipaeve. Oa iava Pita koata pieava atoarore ragai arova. <sup>17</sup> Uva o tavauruva iria oisova ratao tokipaeve rerare Pita oiso puraopa, “*Easi vii-a iravu disaipelto rera reraaro, ra?*”

Oa iava Pita oiso puraroepa, “*Viapau oiso ragai-a.*” <sup>18</sup> Oire uva kovopa irara voearei ora polis irara oavu tuitui kasi kasiva, uvare rirovira rutu uteopaaepa. Uva voa toreparoero vo kasi-ia tuituipaaepa. Uva Pita voa voea tapo toreparoepa tuituipaoro.

### *Rovopato Pristo Jisas Akereva (Matyu 26:59-66; Mak 14:55-64; Luk 22:66-71)*

<sup>19</sup> Uva Rovopato Pristo Jisas akereva disaipelre voeao rera voeaaro ora vaore osa oisova oirara rutupa siposipopareve. <sup>20</sup> Oa iava Jisas rera vo reoaro pukooro oiso puraroepa, “*Ari ita, poeravira rutu oirarapa oisova siposipopaooro voea tarai piepaa vo Tugoropa Kepa-ia aue Tempel, ora vavao oara iare oisova ora gurupaave Reo Taisi uvupasa Jiu-pa irara. Uva viapau oiso vatauvira oreovu avu vai oisova purapaa.*” <sup>21</sup> Uva eakere ragai akepari? Ari voea akeri evoea oea vo reoro uvuivora. Oa iava vo reoro-ia taraiaera varao oara purapaaveira.”

✧ 18:9: Jo 17:12 ✧ 18:11: Mt 20:22 ✧ 18:13: Mt 26:57; Mk 14:53; Lu 22:54 ✧ 18:14: Jo 11:49-51 ✧ 18:18: Jo 21:9 ✧ 18:20: Mt 26:55; Jo 7:26

<sup>22</sup> Uva oisi-a eisi osa puraroiva, iravu polisto toreroepa Jisas tapaoro oiso puraoro, “Eakere Rovopatoare Pristo eisi reopaei, raa?”

<sup>23</sup> ✧ Uva Jisas rerare oiso puraroepa, “Vosa vuri reo vai puraa, oire uva uvuipau ra vo reo avu vuri reo kosi pieri. Ari vosa vearo reo raga puraa, uva eake-a vao oa rutupa ragai tapari?”

<sup>24</sup> Osa iava tuukea ragava toupareva Jisas, vo osa vava Anas rera siporeva Rovopatoa iare Pristo Kaiafas.

*Pita Vorerivira Ita Oiso Puraroepa, Viapau Oiso Ragai Eera-ia Jisas Taraiparai*

*(Matyu 26:71-75; Mak 14:69-72; Luk 22:58-62)*

<sup>25</sup> Uva Saimon Pita voari tuituipaoro torepoepa. Osa vao rerare oiso purapaaepa, “Asi vii-a iravu vai disaipelto rera reraaro, raa?” Uva ora taearoepa oiso puraoro, “Viapau oiso ragai-a.”

<sup>26</sup> Uva iravu kovopato Rovopatoapa Pristo roari saratoaaro Pita ira iava uvareoua toereva, ira oiso puraroepa rerare, “Oiraopavira rutu, uvare ragai tapo ita vii kekeavora ovusa rera tapo touparivora kovoa-ia.” <sup>27</sup> ✧ Uva Pita ora taearoepa ita oiso puraoro, “Viapau oiso ragai-a.” Vo osa kookai gau ovoireva.

*Jisas Sipoiva Pailat Iare*

*(Matyu 27:1-2, 11-14; Mak 15:1-5; Luk 23:1-5)*

<sup>28</sup> ✧ Oire uva Kaiafas ruvara iava rerava avaaepa ro reito Rom gavmanaro vo kepaaro iare vokipaua rutu. Uva viapau oiso voea rutu Jiu koataaepa vo kepa-ia vao reito gavman vo kepaaro. Uvare oiso rugoopaaepa, Teapi vuivui oupe Reo Taisi gasioro, ra viapau Pasova Vurei aiope. <sup>29</sup> Oa iava ratau toupai. Uva Pailat voea iare urioroepa oiso voea akesa, “Eakepa ro iava gasitavoi?” <sup>30</sup> Oire uva rera vo akearo pukooro oiso puraaepa, “Vosa rera ro viapau vuriara vai purapareve, oire ra viapau oiso rerava urioio vii iare.”

<sup>31</sup> Osa iava Pailat voeare oiso puraroepa, “Visii raga rera outa, ra rera rovirieita kortua-ia visii vaaro sirova Reo Taisi.” Oa iava Jiu rerare oiso puraaepa, “Asi igeipa tugoropai rutu vaopa vo osa iravu kopii pieio.”

<sup>32</sup> ✧ Ari ita, tuariri Jisas ora rera iava taviroepa ora rera vo kopiiaro reesioro. Uva oisi-a oiso osa iava rera vo rearo oiraosa auepai.

<sup>33</sup> Oire uva Pailat vorevira koataroepa voarire gavman kepa-ia. Oa iava Jisas-re keeraroepa. Uva rera akeoro oiso puraroepa, “E vii-a Jiu reraaro king, raa?”

<sup>34</sup> Uva Jisas rerare oiso puraroepa, “Easi vii vai raga oisi eisi rugoouei oa iava evo reo purarivoi, raa? O irai vai pasi vii tavirevo ragai iava oisi eisi, eke?”

<sup>35</sup> Uva Pailat rerare oiso puraroepa, “Easi pasi Jiu-patoa vai-a ragai, raa? Ari sara irara oara raga ora reipa irara pris irara viiva urioai ragai iare. E eake vai purarivora?”

<sup>36</sup> Jisas oiso puraroepa, “Ari ita, ragai vo Saraaro viapau oiso vo rasio iava. Vosa oisi eisi, oire ra kovopa irara oaa upoa vai puraive. Ra viapau oiso irai uvuiro ragai tovosa Jiu-pa irara vavaeoro-ia. Ari ita, uva vo vokio ragai vo Saraaro viapau oiso vo rasio iava.”

<sup>37</sup> ✧ Osa iava Pailat rerare oiso puraroepa, “O ari iravu-a vii king, raa?” Uva Jisas oiso puraroepa, “Vii raga ita-a viigoa ragaire oiso purauei oiso,

✧ **18:23:** Mt 5:39; Ap 23:2-5 ✧ **18:27:** Jo 13:38 ✧ **18:28:** Ap 11:3 ✧ **18:32:** Mt 20:19; Jo 12:32-33 ✧ **18:37:** Jo 8:47; 1 Jo 3:19, 4:6



king. Aako ragai kavaueva. Oa iava vo rasio iare urioraepa va ragare vao-ia. Uvare ragai vo kovoaro-a Oiraopa Reo rutu iava siposipopasa. Ari ita, oirara rutu voeao oea Oiraopa Reo rutu sirova utupaaveira oea-a evoea oea ragai gisipoaro uvupaiveira.” <sup>38</sup> Uva Pailat rera akereva oiso, “Eake rutu-a vao Oiraopa Reo, raa?”

*Pailat Jisas Tapasa Evao Parikou-ia Taviroepa*  
(Matyu 27:15-31; Mak 15:6-20; Luk 23:13-25)

Oire eva eisi osa akerevoiva, vorevira kosiro viropa voea iare Jiu. Oa iava oiso voea tavireva, “Viapau oiso oavu avu vai vuria vai kekeavoi rera-ia. <sup>39</sup> Ari visii vo pitupituario toupai, oiso ra visiipa iravu iava vasea tuukepa kepa iava vo Pasova Aio vo vuutaaro-ia. Uva ruipapatai pasi oiso ra visiipa king iava ro Jiu reraaro vasea, raa?”

<sup>40</sup> ✧ Uva voea rutu raga pieoro oiso puraaepa, “Viapau. Ari Barabas iava vase iraori.” Eera Barabas riro oirara upoto ora orekerovu tapo kavirupato.

## 19

<sup>1</sup> ✧ Oire uva Pailat Jisas vorevira koata piereva vore uva viurupa irara rera ragipaiva. <sup>2</sup> Oa iava rerapa kukuvaipa puraiva rokarokapa iro iava. Uva va tovoiva rera kukuearo-ia. Ora revasito kuvupato ira-ia rera kuvuiva rera reesioro oiso, Vii-a king. <sup>3</sup> Oire uva rera ruvara-ia pou viropaoro rerare oiso purapaaepa, “Vearo voki Jiu reraaro king.” Uva oisi purapaoro rera taparakopaiva.

<sup>4</sup> Oa isivaaro iava Pailat voea iare kosiro viropa vorerivira ita voeare oiso purasa, “Ragai kekepatavoi ragoa visiipa rera kosi pie ovoiaivoi. Ra oisi iavirava taraita oiso, Ragai viapau vuria vai kekeavoi rera-ia.” <sup>5</sup> Oire uva Jisas kosiro viropa. Uva va vao kukuvaipa oa puraiva iroiro iava rokarokapa iro oa rera kukuearo-ia toupaiva. Ro tapo revasito kuvupato ira rera-ia toupaveva. Uva Pailat voeare oiso puraroepa, “Rera kekepatavoi ro-ia.”

<sup>6</sup> ✧ Uva va-a vao oa iava voea reipa irara pris voearei ora polis irara rera kekeoro oiso puraaepa, “Rera tapa evao parikou-ia! Rera tapa evao parikou-ia!”

Oa iava Pailat voeare oiso puraroepa, “Ora visii raga rera outa rera tapasa evao parikou-ia. Ari ragai viapau oiso vuria vai kekeavoi rera-ia.”

<sup>7</sup> ✧ Oire uva voea Jiu rera vo rearo tuoro oiso puraaepa, “Ari ita, igei vaaro Reo Taisi toupavoi rerarepa, oiso ra kopiuro rera ro-ia. Uvare oiso puraparoveira, Ragai-a Pauto Oviitoaaro.”

<sup>8</sup> Uva Pailat vo reo uvuoro uriri iraoparoepa. <sup>9</sup> Oa iava vorevira koataroepa gavman kepa-ia voa Jisas akesa oiso, “Ovuva karekeuepa?” Uva Jisas viapau oiso rera vo rearo aatopareva. <sup>10</sup> Oire uva va-a vao oa iava Pailat rerare oiso puraroepa, “Eakepa viapau ragai aatopari, raa? Auoro. Uvuiparai ra vorevira vii iava vasea. Ora tapo uvuiparai ra vii tapaa evao parikou-ia. Easi pasi viapau va vai-ia taraipau, raa?”

<sup>11</sup> ✧ Uva Jisas rerare oiso puraroepa, “Vosa Pauto ro oisova viara-ia viapau viipa gorua vai vaterevori, oire ra viapau vii-ia gorua vaipe ragaipa reipasa. Osa-a eisi osa iava ro ira ragai tovorevorao vii vavaeoro-ia ira vo vuriaro eisi vii vo vuriaro-ia putepaivoi rutu.”

<sup>12</sup> Oire uva vo reo vao uvurevoiva, Pailat raiva taraaroepa, oiso ra oai iava Jisas iava vorevira vasereve. Ovusa aue Jiu-pa irara rirovira rerare oiso

puraaepa, “Vosa rera iava vorevira vaserivere, oire ra viapau oiso vii-a igei reitooaru rutu Sisa vatetooaru. Ro ira ora rera ragare oiso puraparoveira, Ragai-a king, eera Sisa vo tavukiario ousa auepa.”

13 ✨ Uva Pailat evo reo uvuoro Jisas kosi piereva. Oa iava oira rovirieipato vaaro-ia paupa pauroepa uvavu uva oisoo vaisipaive oiso, Aveke Uru. Ari aue-ia Hibru reo oiso oisoo va vaisipaive, Gabata. 14 Oire uva vo vokia-a vao orekerovu ravaapa voki aue iare Pasova Vurei. Uva ravireo vuuta rutu-a vao oa-ia tuguraaepa. Oa iava Pailat Jiu-re oiso puraroepa, “Rera kekepatavoi, eera Jiu reraaro king.”

15 Uva rirovira rutu raga pieoro oiso puraaepa, “Rera siguri! Rera siguri! Rera tapasa evao parikou-ia!” Uva Pailat voeare oiso puraroepa, “E oiso ruipapatai ra visii reraaro king tapaa evao parikou-ia, raa?”

Oa iava reipa irara pris irara oiso puraaepa, “Viapau oiso igei irai epao ita kingtoa vai. Ari kataitooa raga, Sisa.” 16 Uva va-a vao oa iava Pailat Jisas iava vasereva voea vavaeoro iare, oiso ra rera tapaiive evao parikou-ia voeao viurupa irara reipa irara pris irara vo ruipaaro sirova utuoro.

*Jisas Tapaiva Evao Parikou-ia*  
(Matyu 27:32-44; Mak 15:21-32; Luk 23:26-43)

17 Oire uva Jisas ouiva. Oa iava rera raga evao parikou kaepareva. Uva riro urui kavuoro rerava avaaepa uvavure uva oisoo vaisipaive oiso, Kukue Keru Pukui. Ari aue-ia Hibru reo oiso-ia, Golgota. 18 Uva-a evoo uva rera tapaiiva evao parikou-ia. Oire evoo aitereivu tapo voo tapaiiva aatokorovira oiso, iravu ovaratavu iava ari iravu ovaratavu iava. Uva vaierei vuruvuruoro-ia Jisas tovoiva.

19 Oire uva Pailat oreovu tapo rigatoreva. Oa iava va tovoreva evao parikou-ia vo rigato oa oiso purapai, JISAS KING OAIIVE JIU. 20 Uva Jisas kotoiva evao parikou-ia vo riro urui ruvara-ia, osa iava riro irara Jiu va vieipaiva voo. Uvare Pailat vo rigato purareva aue-ia Hibru reo, ora Rom reo, ora Grik reo. 21 Uva reipa irara pris Jiu voearo Pailat tavipaiva oiso purapaoro, “Viapau oiso ra oiso ragavira vo rigato purari, King Jiu reraaro. Viapau. Ari oiso ragavira uvuipauei ra vo rigato purari, Ro oiso puraroepa, Ragai-a king, Jiu reraaro.”

22 Oa iava Pailat voeare oiso puraroepa, “Vo reo oa rigatoa, eva-a oa rigato ovooi ita.”

23 Uva voea viurupa irara Jisas tapa ovoiiiva evao parikou-ia. Uva oisi rera pie ovoioro auero rutu varoara rera varaaro ou ovoiiiva. Oire ora voeapa vo resurapavira vara rutu rookaiva, osa voea viurupa irara katakataivira ora voeapa ouaepa. Uva kuvuto tapo rera reraaro ouiva ira-ia viapau oisoo turua vai toupaiive. 24 ✨ Osa-a eisi osa iava viurupa irara ora reopaaepa oiso purapaoro, “Viapau oiso uvuipaviei ra ro karikaripe. Ira-ia uvuipaviei ra rera-ia satupavio, oisore ra oiso piepaoro irai reesipe ro ira rera oureve.” Oire uva oisi-a eisi osa rera-ia piepaiva. Oa iava Tugoropa Vuku vo reoaro oisi iavirava oiraopea rutu. Vao oiso-ia, ‘Ragai varaaro-ia varoara rooai vara ouoro. Ora satupaaai ragai reraaro-ia kuvupato.’

Eisi osa pieiva viurupa irara vara-ia.

25 ✨ Uva evao parikou vao Jisas vaaro ruvara-ia Jisas aakoaro toupavea aue tapo taeva, ora Maria rera Klopas vatuavaaro, ora iriavu Maria Makdala iava. Vo resura evairo voavi toupaiiva evao parikou ruvara-ia. 26 Uva Jisas aakova kekereva vegei rutu ora ragai Jon ragoa oisoo

kavikopareve rutu, uvare voavi tutuu pie visivi torepaveiepa. Oa iava Jisas aakovare oiso puraroepa, “*Riakova. Eera vii oviitoaaro.*” <sup>27</sup> Uva ragai tavireva oiso puraoro, “*O-ia vii aakoaro.*” Oire vo vuuta raga-ia oira ouoro Maria oirava avaraepa ora ragai vo kepaaro iare voa oira tokipasa.

### *Jisas Kopii Ovoiroepa*

(*Matyu 27:45-56; Mak 15:33-41; Luk 23:44-49*)

<sup>28</sup> \* Uva vao isivaaro iava Jisas oiso tarairoepa, Orekerovu rutu opesi ovoiei vo vokio. Osa iava Pauto vo rigatoaro ora rera iava oirao pieoro oiso puraroepa Jisas, “*Uuko regarai.*” <sup>29</sup> Uva otouvu toupaiava botol tou oa agasiepa aue iava viniga ovi. Oa iava oavu pupupua ouiva va rupu piesa vo ovi-ia viniga ovi. Uva uuko piropa. Uva evao kairi-ia va tuukeiva. Oa iava rera gisipoaro-ia Jisas va tovoiva. <sup>30</sup> \* Uva Jisas va-ia viniga ukaio ovoiro oiso puraroepa, “*Opesiei rutu vaoviopavira ragai vo kovoaro.*” Eisi osa pura ovoiroiva, rera iava kukue goe ovoio viropa. Osa ora rera iava urauratoaro iava vasereva Pautoa iare vorevira.

### *Viurupa Irara Ora Rera Iava Ovaratavu Togaiva*

<sup>31</sup> \* Uva vo vokia vao orekerovu ravaapa voki aue iare Tagausapa Vurei Pasova ora vao tapo Sabat voki riroa rutu. Oa vituaro iava Jiu-pa irara reasipaaepa oiso, Teapi vo kopiuro evao parikouro raga-ia toupaiive vo voki-ia Sabat voki. Oa iava Pailat akeiva voea kokotoaro kepikepisa, oiso ra ikauvira kopiiave. Ra va iava vo kopiuro rere pieive. <sup>32</sup> Oire uva voea viurupa irara vaiterei kokotoaro kepikepisa avaaepa aiterea tapaiva Jisas tapo. <sup>33</sup> Uva Jisas-ia poua viropa rera kekesa ira kopii ovoiroepa. Oa iava viapau oiso rera kokotoaro kepikepiiva. <sup>34</sup> \* Ari iravu viurupato rera varataaro togareva aue-ia togava. Oa iava ikauvira revasiva paru ovoieva ora aue uuko ovi voava rera iava varaua-ia. <sup>35</sup> [Uva ragai Jon vao kekeava ragoa oisi va-ia tarairaiva, va iava oiso tavitaviparai oiraopavira rutu. Eisi osa iava uvuipatai ra va oirao pieta rutu.] <sup>36</sup> \* Ari ita, oa-a vao karekeiva oiso-ia Tugoropa Vuku vo rearo oiraoei vo reo oa oiso purapapeira, ‘Viapau oiso okerui kepiiiverea rera iava.’ <sup>37</sup> \* Ari oreovu-a vao oiso purapapeira voa Tugoropa Vuku-ia, ‘Irava vurapaiiverea ro ira togaivora.’

### *Jisas Iava Varaua Tovoiva Aveke Rikui-ia*

(*Matyu 27:57-61; Mak 15:42-47; Luk 23:50-56*)

<sup>38</sup> Oa-a vao isivaaro iava Josep Arimatia urui iava rera avaroepa Pailat areisa Jisas kopiire, uvare rera-a iravu disaipelto Jisas reraaro. Ari Jiu ragapa uriripaoro ora rera vo oirao piearo vataupareva. Oire uva Pailat rerapa vasereva. Oa iava Josep avaroepa Jisas iava varaua rere piesa. <sup>39</sup> \* Uva Nikodimas ro ira rovovira rutu Jisas iare urioroepa vokiaro, ira tapo urioroepa oavua mer vearo geesi ovi iisi ovi. Oa iava va vavataaro rutu aue-ia uvuiepa 34 kilo. <sup>40</sup> \* Uva vo kopii ousiva. Oa iava rera ruusiva varo-ia oaravu tapo vearo geesiara. Oiso osa vara oisoa purapaiive voea Jiu oirara tovapasa. <sup>41</sup> Oire uva voa-a vo uva Jisas tapaiva evao parikou-ia uva oisoa oavua kovoa toupaiive. Oa sovara-ia oavu oira tovaso riku toupaiiva. Ari ita, uva viapau oiso va-ia irai tova rovoiva. <sup>42</sup> Uva vo voki-a vao Jiu vaoro orekerovu ravaapa voki aue iare Pasova Vurei Oovapa. Uva vo rikui tutuu pie visivi raga toupaeva. Oa iava Jisas tovosiva rera tovaoro voa vo rikui-ia.

\* 19:28: Jo 13:1, 17:4; Sam 69:21    \* 19:30: Jo 17:4    \* 19:31: Diu 21:23    \* 19:34: 1 Jo 5:6, 8  
 \* 19:36: Eks 12:46; Nam 9:12; Sam 34:20    \* 19:37: Sek 12:10    \* 19:39: Jo 3:1, 7:50    \* 19:40:  
 Jo 11:44; Mt 26:12; Jo 20:5, 7; Lu 24:12

## 20

*Jisas Vorevira Toreroepa  
(Matyu 28:1-8; Mak 16:1-8; Luk 24:1-12)*

1 ✧ Oire uva rovo voki rutu-a vao wik iava uva Maria Makdala iava vokipaua rutu urioopa vo tova iare vo osa rupavira raga toupaiava. Iria aveke viapau kekeeva o iria-ia vo tova riaro-ia toupaeava iria peka pieiva.

2 Oa iava ikauvira raga vorevira voreopa ragai ora Saimon Pita tavisia, ragoa Jisas oisoa kavikopareve rutu. Uva Maria vegei tavipaeva oiso purapaoro, “Turaro vorevira tova iava voreivo. Uva viapau taraipaiei oiso, Ovu-ia rera tovoivo.”

3 Osa iava vegei ora Pita uruia iava ora vaseveiepa vo tova iare avaro.

4 Uva ikauvira raga avaveiepa. Ari ita, uva ragai Pita-ia puteava ikauoro. Oa iava voa pou rovora viropa vo tova-ia. 5 ✧ Uva voa kokeesa takura viropa osa iava varoara raga kekeava. Ari ita, uva viapau oiso koataraeapa rutu vo rikui-ia. 6 Uva Saimon Pita ragai sirova utuoro rikui rutu-ia koataroepa. Oa iava voa varoara kekereva. 7 Uva voa oavu kekereva varoa vao oa-ia rera kukuearo tavuruiva Jisas. Oire uva va eva varoa viapau oiso varari tapo toupaiava oara-ia rera rutu tavuruiva. Viapau. Ari evo viko uvavu raga toupaiava. 8 Uva ragai tapo ragoa ira rovoraepa voare rikui-ia ragoa tapo ita voare koataraeapa. Oa iava va eva kekeava. Uva oisi-a eisi osa iava oiraoraepa rutu. 9 ✧ Uva evo vuuta-ia viapau oisoa roroiovira rutu taraipaio Pauto vo rigatoaro-ia vao oa oisoa oiso purapape, Jisas vorevira toreroverea tova tapi iava. 10 Oire uva vegei disaipeltoarei vorevira kareveiepa atoiaie.

*Maria O Makdala Iava Iriava Aivaroreva Jisas  
(Mak 16:9-11)*

11 Maria rikui raga ruvara-ia torepaopa gaupaoro. Uva voa raga gaupaoro toupaeava rikui sovara-ia kokeepaoro. 12 ✧ Oa iava aitereivu enseltoarei kekeeva aiterea popotetoarei-ia kuvupasiepa kuvutoarei. Uva voa paupasiepa vo uva Jisas varaaro tovoiva, iravu oisoava uva kukueparoepa, ari iravu oisoava uva kokotoparoepa. 13 Aiterea oira Maria akeseva oiso puraoro, “Riakova. Eakepa gauparivoi?”

Uva oiso puraopa vaiereire, “Ari Turaro ragai reraaro ira voraro avu tovosa rera vorevira voreivo vova-ia. Uva viapau taraiparai ovu-ia reraei.”

14 Uva oisi-a eisi osa puraoviva, ora poreopa rera Jisas kekesa ovusa toreparoepa. Uva viapau oiso Maria Jisas eveipaeva.

15 Uva Jisas oira akereva oiso puraoro, “Riakova. Iroupa gauparivoi? Ora iroure taraaparivoi?”

Uva Maria oiso keapaopa, Kovoa tokipato ro-ia. Oa iava oiso puraopa rerare, “Auoro. Vosa vii rera ouri, uva uvuipauvei ra ragai taviri vore uva rera tovorivo. Ra voava rera kaeoro karera.”

16 Uva Jisas oiso puraroepa oirare, “Maria.”

Oa iava Maria ora poreopa rerare oiso purasa Hibru reo-ia, “Rabona.” Oa porearo oiso toupai, Tisato.

17 ✧ Uva oira tavioro oiso puraroepa, “Opeita ragai-ia pitupari. Ragoa ipa asavira toupavao Aite iare. Ari kare iraou, ra araoko irara oaa taviri oiso-ia, Iparai Aite iare ragai reraaro ora visii Aitearo. Ira iare avarai Pauto, ragai reraaro ora visii reraaro Pauto.”

18 ✨ Oire uva Maria vova Makdala vorevira kareopa disaipel tavisa oiso puraoro, “Turaro kekeavoí.” Uva voea tavieva vo reo iava vao osa oira tavireva Jisas.

*Disaipel Jisas Kekeiva  
(Mak 16:14-18; Luk 24:36-49)*

19 Igei disaipel Jiu asavira uriripaoro toupaiova. Oa iava kepa-ia ora igei ururao tuupaiova. Uva ravireo voa igeire rokoreva rovopa voki-ia wik iava vo voki. Uva voa Jisas igei rutu vuruvuruaro-ia toresa urioroepa oiso puraoro, “*Opeita uriripata. Visii iava sopaura oavisii kavepe.*” 20 Oire uva oisi eisi puraroiva, igeipa ora rera iava vavaearei karekepareva ora ovaratavu rera iava. Oa iava viupara kekepaoro igei iava sopaura oaio roru iraoiva rutu. 21 Uva Jisas igei ita tavireva oiso puraoro, “*Visii iava sopaura uvuipai ra kave iraope. Ari ita, Aite ragai arureva oa iava urioraepa vore. Osa ita visii arupaavoí ra avata.*” 22 Uva eisi puraroiva, igei iare vavauroepa oiso igei taviro, “*Tugoropato Uraurato outavoí.*” 23 ✨ Vosa oearovivu iava vuri vovouro vai oaive verapataverea, oire ra oisi iavirava vo vovouro vuriara voea iava opesi ovoipape. Ari vosa viapau oisi voea iava vuriara verapata, ra oisi iavirava voea-ia touvira toupaiave.”

*Tomas Jisas Kekerevoiva, Oirao Piereva*

24 Jisas ora karekeroepa disaipel irara iare vo vuutao iava vo vokia oa-ia iravu disaipelto igei iava katai tau erao (12) viapau oiso igei tapo toupaveva ro-ia Tomas. Ira iava ovaisivu-a, Didimas tavarato. 25 Uva oisi-a eisi osa iava oearovu disaipel rera taviiva oiso, “Igei Turaro kekeiovól.”

Uva Tomas oiso voeare puraroepa, “Vosa viapau nilpa vuurei kekea rera vavaearo-ia, ora vosa viapau sipareo roko piea voa vo nilpa vuu-ia. Ora aue tapo vosa viapau vavaea oaa tapo roko piea vo uva rera togaivorao, oire ra viapau oiso oirao piepaa rutu.”

26 Oire uva katai wik isivaoro iava igei disaipel kepa sovara-ia toupaiova. Uva Tomas igei tapo toureva. Uva ora igei ururao rataoara rutu tupaiova. Oa iava voa Jisas igei vuutaaro-ia ora karekeoro oiso puraroepa, “*Visii iava sopaura kavepe.*” 27 ✨ Oire uva Tomas tavireva oiso, “*Ora vii iava sipareo tovorí vo-ia. Ora ragai vavaearo kekeri, ra oisi iavirava viapau vakuvakuu. Ari ragai oirao pie iraoí.*”

28 Oa iava Tomas rerare oiso puraroepa, “Vii-a ragai reraaro Turaro. Ora vii-a ragai reraaro Pauto.”

29 ✨ Osa iava Jisas rerare oiso puraroepa, “*Ragai kekerivoiva, ragai oirao pierivoi, raa? Osa-a eisi osa voeao oea viapau oiso ragai kekepaoro ragai oirao piepaive, oea uvuipaaí ra vii vo roruaro-ia putepaoro roru iraoipaive rutu.*”

*Vo Toupai Vao Vituaro Iava Oa Iava Jon Vo Vukuo Rigatoreva*

30 ✨ Ari ita, Jisas ira oisoa oravotorovu purapareve igei disaipel osireiaro-ia. Uva viapau oiso vara rutu rigatoavoí vo vukuo-ia. 31 ✨ Ari vao oa rigatoavoí visiipa, oisore ra va oirao pieoro rutu Jisas oirao pie iraoita oiso, Ro-ia Kraís. Ora aue tapo oirao pie iraoita oiso, Jisas-a Pauto Oviitoaaro. Ora vo osa oirao piepata, osa iava uvuipataí ra Opesi Asa Tootoo rutu ou iraoita rera iavirava.

## 21

*Erao Vatara (7) Disaipel Jisas Kekeiva*

<sup>1-2</sup> Uva utupa visivi vorerivira ita Jisas ora karekeroepa igei iare disaipel vo toko rovu ruvara-ia, vao Taibirias. Uva karekeroepa oisi oiso-ia igei iare, Saimon Pita, ora Tomas ira iava ovaisivu-a vao Didimas tavarato. Ari Nataniel Kena iava oiso Galili taere. Ora vegei Sebedi oviitoareiaro, ora aitereivu disaipeltoarei igoa vao toupaiova. <sup>3</sup> Uva Saimon Pita igei tavipareva oiso, “Atarisa avaparai.” Oa iava oiso puraiepa, “Vigei rutu ita avapaviei,” Oa iava uvuoa-ia avaiiepa. Uva vo rupa-ia eva viapau oiso atari kare vai ouiova.

<sup>4</sup> ✧ Oire uva ravireo sikere asavira toureva ovusa Jisas rogaraua-ia torepapepa. Uva igei viapau oiso rera-ia taraipaiepa vao oiso, Jisas-a ro-ia. <sup>5</sup> ✧ Uva Jisas igei akeoro oiso puraroepa, “*Ovii irara oaa. E atari kare vai epao?*” Oa iava rerare oiso puraiepa, “Viapau rutu.” <sup>6</sup> ✧ Oa iava Jisas oiso igei tavireva, “*Ovaratavu iava oiso uvuoa-ia oirapapa kuverava vikita. Osa iava uvuipatai ra riro kare vai outa aue atari.*” Oire uva oisi-a eisi osa iava kuverava roko pieiova uvuoa iava oirapapa varata iava. Uva oira roko pieiovoiva, riro kare rutu kuveraiova. Oa iava viapau oiso uvuipaiepa oiso ra oira kae pieio oira ivuoro.

<sup>7</sup> Uva ragai Pita taviava oiso puraoro, “Eera Turaro!” Uva Saimon Pita ora rakurakupa varoa veraoro kovopareva. Eisi osa iava vo reo uvureva, Eera Turaro. Oa iava va-ia varoa vorevira ora rakurakuroepa. Uva vo rurakauva uuko rovu-ia rokoreva. <sup>8</sup> Ovusa oearovu disaipel uvuoa-ia uriopaaepa kuverava ivupaoro atari kareva. Uva viapau oiso tauaivira toupaiava rogarauapa. Ari oiso uvuivira vo resura vatara tau (90) mita raga-ia.

<sup>9</sup> Uva reresu urioiepa. Oa iava voava verau viroiepa oavu tuitui kasi kekesa, ovusa atarito vao vo kasi-ia toupareva. Ora bret tapo oa vao toupaiava. <sup>10</sup> Uva Jisas igeire oiso puraroepa, “*Evo kare iava atari kare oea outavoio okareiva.*” <sup>11</sup> Osa iava Saimon Pita uvuoa-ia kaero viropa kuverava ivusa. Uva oira ivupaoro urioroepa rogaraua iare. Uva riropa kare raga iava agasiopa kuverava. Okarea oiso uvuipaepa katai vovoto vo vavae tau vo peva (153). Ari ita, uva riro kare rutu-a. Uva viapau kuverava vo kareva tokopao viropa.

<sup>12</sup> Oire uva Jisas igeire keeraroepa oiso, “*Uriota aiosa.*” Osa iava viapau irai disaipeltoa vai uvuiparoepa ra rera akereve oiso puraoro, “*Irouto-a vii?*” Viapau. Ari taraipaiepa oiso, Turaro-a ro-ia. <sup>13</sup> Uva Jisas bret ourevoiva, igeipa va vatevatereva. Uva oisi raga ita igeipa atarito roo piereva ita.

<sup>14</sup> ✧ Vo uvare tova iava vorevira toreroepa rera Jisas. Oire uva va-a vao vo peva piepa vuuta oa-ia igei iare disaipel ora karekeroepa ita.

*Jisas Oiso Puraroepa, Ragai Vo Raguiaro Sipsip Ragui Aio Pieri.*

<sup>15</sup> ✧ Uva aio opesiiioiva, Jisas Saimon Pita-re oiso puraroepa, “*Saimon, Jon oviitoaaro. Easi vii vai voea rutu-ia voeao puteparivoi vai ragaipa ruipapaoro, eke?*” Oa iava Pita rerare oiso puraroepa, “*Iu Turaro. Vii kaviko iraopaavo.*” Oa iava Jisas rera tavireva oiso, “*O ita, uva vii-ia vovou iraoparai oiso ra ragai vo raguiaro aio pieri sipsip ragui.*”

✧ 21:4: Jo 20:14 ✧ 21:5: Lu 24:41 ✧ 21:6: Lu 5:4, 6, 7 ✧ 21:14: Jo 20:19, 26 ✧ 21:15: Jo 13:37

16 ✧ Uva vorerivira ita rerare oiso puraroepa, “*Saimon, Jon oviitoaaro. E ragaipa ruipa iraopauei?*” Oa iava Pita rerare oiso puraroepa, “*Iu Turaro. Ragai-ia ita taraipau ei ragoa vii kaviko iraopaavo.*” Oa iava Jisas oiso puraroepa, “*Oire ragai vo raguiaro sipsip ragui tokipari.*”

17 ✧ Uva vo peva piepa vuuta-ia rerare oiso puraroepa, “*Saimon, Jon oviitoaaro. Esa pasi ragai vai kaviko iraoparivoi?*” Uva va-a eva oa iava Pita iava sopaua vavataepa rutu. Uvare rerare oisi eisi puraroepa vo peva piepa vuuta-ia. Osa iava Jisas-re oiso puraroepa, “*Turaro. Orekerovu rutu-ia taraipau. Oiso osa taraipau ei ragai-ia, vo osa oisi vii kaviko iraopaavo.*” Oa iava Jisas rerare oiso puraroepa, “*Ragai vo raguiaro sipsip ragui tokipari.*”

18 “*Oiraopavira rutu oiso osa vii tavi iraopaavo oiso. Voari tuariri vii raga oisoa ora asikovira toupari ora vii vo iroaro-ia takipaoro tuu iro. Oire uva oisoa vokapari vii raga asikovira rutu uruiara iare voraro uvare ava vovoupau. Ari ita, uva utupaua avukauverea. Oire ovuuta-a eva oa-ia vii vavaearo kae pieverea, oisore ra iravu raga vii takireve tuu iro-ia. Oire oisi iava vii tuvetuvepaoro uvavure avaparo voraro uvaroare ava arapa reasipau.*” 19 ✧ Jisas vo oiso puraroepa, Pita utupavira kopiiovere. Uva vo kopii-ia Pauto vaisiaro kae pieverea. Osa puraroepa Jisas vo Pita-pa kopii reesioro. Oa iava oiso Pita-re puraroepa, “*Ragai sirova utuu.*”

### *Jisas Oreovu Purareva Ragai Iava Vao Jon*

20 Oire uva Pita ora poreoro ragai vurapareva ragoa oisoa kaviko iraopareve Jisas. Ragoa vaiterei sirova uturaepa avapaoro. Ragai raga ita ragoa voari pauparaepa ovokia-ia aiopaiova uva Jisas kopukopuaro rutu-ia toupaaava, uvava oiso puraraepa, “*Turaro. Irouto-a ro ira vii kosi pievere keripa irara vavaearo iare?*” 21 Uva Pita ragai kekeoro Jisas oiso akereva, “*Turaro. Ari apeisi ragavira ro vo kopiiaro?*” 22 Oa iava Jisas rerare oiso puraroepa, “*Vosa ragai raga rerapa ruipara, oiso ra toupareve vore toupaooro uva voreraverea, uva viapau oiso vii auearo-a. Ragai sirova utuu.*”

23 ✧ Osa iava vo reo vao uvarovu rutu arako irara iare disaipele viriva avaooro oiso, Ro disaipelto viapau oiso kopiiovere. Ari ita, osa Jisas viapau oiso oisi rera tavireva oiso, Ro viapau kopiiovere. Viapau. Ari eerare oiso puraroepa, “*Vosa oiso ruipapara ra toupareve vo vokiore tuepaoro oa-ia vorevira voreraverea, uva viapau oiso vii auearo-a.*”

24 ✧ Ira raga-a ita ragai Jon, ro-ia disaipelto. Ragoa orekerovu rutu iava oiraopavira siposipopaava. Oa iava vo reoro rutu rigato ovoiaava vaore, oiso ra vigei rutu vao-ia tarai iraopavio oiso, O ari va vao oiraopa siposipo rutu.

25 ✧ Ari ita, oaravu rutu oisoa purapareve Jisas. Vosa voeao oea vara rutu evara rigatooro varare katakataivira ora kasivariave rutu, oire ra vo vukuro evara rigatoive rirovira. Ra vo rasio iava viapau otavukipe oisi vara rutupa evara.

✧ 21:16: Mt 2:6; Ap 20:28; 1 Pi 5:2 ✧ 21:17: Jo 16:30 ✧ 21:19: 2 Pi 1:14 ✧ 21:23: Ap 1:15

✧ 21:24: Jo 15:27, 19:35 ✧ 21:25: Jo 20:30

## APOSEL IRARA VO KOVOARO Irapa Reoro Vo Vukuo Iava

Oeavu vo vuku vaiiiva oiso, *Aposel Irara Vo Kovoaro*. Ari ita, oiraopavira uvuipai ra va vaisipe oiso, *Tugoropato Uraurato Vo Kovoaro*. Aue iava uvare rirovira tavitavipai rera vo kovoaro iava vo osa oirarapa rugorugooara ora taraiara rera varaaro oisoa vatepareve. Ora vo osa aposel vo kovoaro oisoa oirao piepareve tapo.

Uva rera ro Luk ira varei rutu vukuarei rigatoreva. Ira Vearo Sipoipo Jisas iava rigato rovoreva (Ap 1:1). Oa iava aposel irara vo kovoaro iava rigatoreva vo vuku-ia vao. Ovukua rigatoreva 63 yia Jisas vo kavauaro isivaaro iava, vo osa Pol tapo toupaveva tuukepa kepa-ia Sisaria-ia.

Ari ita, Luk rirovira Tugoropato Uraurato iava tavitaviroepa. Ora aue iava tapo rigatoreva oaravu lotuara rovoaro varao oara-ia Pauto voearo oisoa toupave. Uva rovvira Pita vo kovoaro iava tavitaviroepa vo osa lotupa irara oisoa tauvapeve (Ap 1–12). Oire evo siposipo isivaaro iava Pol iava ita tavitaviroepa Luk (Ap 13–28).

1. Aposel irara vatatopopaaepa Jisas vo reoro vatesa oirara rutupa, 1:1–26.

a. Jisas ovoiojavira aposel irara tavireva Tugoropato Uraurato iava ira vara pierevere voea tauvapasa, 1:1–11.

b. Judas iava vao vo uvare iravu ira rera vo tavukiaro oureva, 1:12–26.

2. Turaro voea tavireva oiso, Vosa Uraurato outavere, ra Jerusalem iava rovota ragai vo reoro tavitavipaoro, 2:1–8:3.

3. Turaro voea tavireva oiso, Vore avata Judia taere iare ora Sameria-ia Vearo Sipoipo iava tavitavipasa, 8:4–12:25.

4. Pol vaaro iava kovoa vo osa Jisas vo kovoaro purapaoro avaroepea voraro rutu uruiara-ia, 13:1–28:31.

a. Rovopa voka Pol vaaro Jisas vo reoro kaepaoro, 13:1–14:28.

b. Riroa rutu paua puraiva vo Jerusalem-ia, 15:1–35.

c. Eraopa voka Pol vaaro Jisas vo reoro, 15:36–18:22.

d. Vo pevapa voka Pol vaaro Jisas vo reoro kaepaoro, 18:23–21:19.

e. Pol tuukepa keparo-ia toureva vo Jerusalem-ia, ora Sesaria-ia, ora Romia, 21:20–28:31.

### *Jisas Reo Ovoi Puraveva Auere Tugoropato Uraurato*

1 ☆ Vateto oaa, Tiofilas, viipa rigato rovoavora voviri vo siposiporo iava ora vo kovoro iava varao oara oisoa purapaveve Jisas. 2 Oara rovoreva osa vorevira iparoepea. Uva varao tapo reoreoara voeapa vatereva vo Tugoropato Uraurato vo goruaro iavirava, oiso ra vara purapaveve, voeao aposel irara oea reeresireva Pauto vo kovoaro purapasa. Oire va isivaaro iava iparoepea vuvuiua iare 3 ☆ aue-ia vo resura tau (40) voki ro rera kopiiaro isivaaro iava. Oa iava voea iare aposel irara ora karekeroepa vorevira. Ora rera raga ora tootooro karekereva voeapa oiso ra kekeive. Ora oiso tapo uvare vo kareke-ia eua voea tapo ora reoreoara aue iava Saraaro Pauto ipa asavira touoro. 4 Ovokivu-ia voea tapo goruvira tavireva oiso, “*Opeita vo Jerusalem-ia kavupata. Ari voa raga tuepatai auere ovoiei reoro Pauto oa varapere vao oa iava visii taviavora tuaririvi.*” 5 ☆ Oire Jon oearovu baptaisreva uukoa raga-ia. Ari tou visivi visii Tugoropato Uraurato vo baptaisaro-ia rera vaaro gorua outavere.”



6 Uva vo aivaro-a vao oa-ia oiso rera akeiva, “Turaro, apeisi-a? E vo vokio-ia Isrel sara tore piepari vorevira oiso osa voari tuariri?” 7 Uva voea tavireva oiso, “*Viapau oiso visii vaaro-a ra vo vuutaro-ia ora vo ivaro-ia taraita. Ari aue oaro-a Aite ira varao tovoreva vo ora rera raga vaaro-ia ruipa.*” 8 ✨ Ari vao raga vo osa Tugoropato Uraurato uriorovere visii iare osa rera-ia gorua outa. Oa iava ragai iava oearovu rutu tavitavitavere voraro oiso, Jerusalem-ia ora Judia ora Sameria, vo taerero rutu varao ora voraro rutu rasitua rutu ivara-ia.”

*Jisas Iparoepa Vuvuiua Iare  
(Mak 16:19-20; Luk 24:50-53)*

9 Uva vo reo-a vao oa isivaaro iava kaero viropa ipaoro vo osa rera siitueiva. Osa rukuta rera ruueva Jisas rera vatauro. 10 ✨ Uva vuvuiua-ia siituepaepa osa iparoepa, ovusa sita pievira voea vatuaru-ia karekesiepa aitereivu kaapopatoarei-ia kuvupaoro. 11 ✨ Oire voeare oiso purasiepa, “Ai. Visii vao Galili-pa irara. Eakere vuvuiua ragava siituepatai? Ro-ia oirato Jisas ira ipa pierevoi Pauto vuvuiua iare. Ira ita vararoverea vorevira oiso osa iparoi osa rera keketa.”

*Judas Vo Tavukiaro Oureva Iravu*

12 Uva eva isivaaro iava kareaepa Jerusalem iare vova vo pukuio-ia oa vaisipaiveira oiso, Oliv Kovo Puku, vo raivao-ia oa oisoa voare potekupape voava vo pukuia. 13 ✨ Uva kepa oaive-ia poua viropa. Oire voava vo kepa-ia ipaepa otugivu iare oa oisoa ipavirava toupaive, ivaraiapa tugi. Uva voea rutu vaisiaro-a voeao oea voa toupaiava oiso, Pita ora Jon, ora Jems, Andru, ora Filip vaio tapo ora Tomas, ora Batolomyu vaio tapo ora Matyu, ora Jems aue oviitoaaro Alfias, ora Saimon Selot, ora Judas aue oviitoaaro Jems. 14 ✨ Uva vaea vovou raga-ia voea rutu toupaiava variripaoro voeao oirara, ora riakora, ora Maria Jisas aakoaro, ora Jisas araoko irara oaro tapo.

15 ✨ Vo voki-ia vao Pita voea iava toreroepa reoreosa. Uva voea rutu vieiario uvuiaro-a voeao-ia oiso, Katai vovoto erao tau (120) oirao pie vovou irara. 16 ✨ Pita ira oiso puraroepa, “Visii araoko irara oaa, aue iava uvare vao Tugoropa Reo oiraoepa oreoa vaterava Tugoropato Uraurato aue-ia Devit gisipoaro. Uva vo vokia oirao piea rutu karekepa aue-ia Judas, eera ira voea tuvetuvereva voeao oea Jisas ouiva aue iare kort. 17 Eera iravu igei iava ira oisoa oiso kovopareve osa igei.

18 “Eera ira monia oureva aue-ia Jisas vuria puraoro. Oa iava oevu rera vaaro-ia monia vo rasio voriiiva oa-ia koveroepa takuvira. Oa iava ora kovuaro poko piereva. Uva sare rera iava vuseva. 19 Oire uva Jerusalem-ia tou irara va-ia taraipepa. Oa iava va vaisiiva voea vo rearo-ia oiso, Akeldama. Oa porearo oiso toupaiveira, Revasi Tova.

20 ✨ “Oara rutu varao toupaiveira aue-ia Sam Vuku oiso, ‘Kepa oaro viapavira toupaivereva. Viapau oiso ra oirara vai iava irai voa toureve. Iravu rera vo kovoaro ourevereva vao oa oisoa pitupareve.’

21 “Uva irai vo kovo ou iraovere, vo kovo aue iava tavitavisa torearo Turaro Jisas. Oa iava voeao sirova uturovere oea oisoa rera sirova utupaave Jisas ora igei tapo. 22 Vo voki-a vao-ia ovokia rutu-ia Jon voea baptaispareva, ovokiroa rutu-ia tapo vuuipe ra igei tapo toureve ora vo ovokia-ia Pauto Jisas ipa piereva vorevira.”

✨ 1:8: Ap 2:1-4; Jo 15:27 ✨ 1:10: Jo 20:12 ✨ 1:11: Mt 24:30; Mk 13:26; Jo 14:3 ✨ 1:13: Lu 6:14-16 ✨ 1:14: Ap 2:1, 46 ✨ 1:15: Ap 6:3 ✨ 1:16: Jo 13:18 ✨ 1:20: Sam 69:25, 109:8

<sup>23</sup> Oire uva voea vaiereore tore pieiva oiso aueroaro Josep ora ovaisireivu vareo-ia Basabas ora Jastas rera raga ita Mataias. <sup>24</sup> ✧ Uva oiso puraoro variriaepa, “Turaro. Vii oearovu rutu vovouaro-ia taraipau. Oa iava ro igei iare kareke pieri ira igeipa reesirivora. <sup>25</sup> Ira aposel kovoaro ouerevere Judas vaoro oa arova vuria purarevora vore avaooro opesi tapi oaro aue-ia vuria oaro.” <sup>26</sup> Uva va iava voea vao puraiva paupaua rerere Pauto vo ruipaaro sirova. Oa iava vaisiarei uveuveveiva. Oire iravu rera vaisiario kae piereva torevokovira. Oa iava rera tore pieiva ro-ia Mataias. Uva ora voea iare vaeavira raga rera tovoiva, oiso osa voea voeao aposel irara katai tau katai (11).

## 2

### *Tugoropato Uraurato Vararoepa*

<sup>1</sup> ✧ Uva vo osa Pentikos-pa Voki pou piropa. Uva oirao pie vovou irara ora guruaepa katai tapi raga-ia. <sup>2</sup> Uva urioepa gurukoa vuvuiua iava sita pievira. Oa oiso urioepa rutu osa riroto kiuvu. Uva vo kepao rutu agasi pieva okepa-ia ora voeava paupaaepa vo guruko vao oa varaepa vuvuiua iava. <sup>3</sup> Oire uva voea iare katakataivira karekeepa oiso osa arevuoara etovira voea kukuearo-ia pausa. <sup>4</sup> ✧ Oa iava rera iava vuku iraoaepa Tugoropato Uraurato ouoro. Uva rera iavirava oearovu rutu pisa reoro rutu puraiva, ovusa voeapa gorua vatereva vo reoro purasa Tugoropato Uraurato.

<sup>5</sup> Uva va iava oearovu rutu urioaepa Jiu-pa irara riro vuurapa vaisi pura irara voeao oea oisoa Jerusalem-ia toupaiave, voeao osararoa oisoa toupaiave vo uvarovu rutu vo rasitoa rutu-ia. <sup>6</sup> Oire uva gurukoa uvupaoro ora gurupaaepa voea rutu. Vo osa vavagisipaaepa uvare ora reo oaive raga uru piepaiva katakataivira, vo reoro pisipisa reoro oara purapaiva. <sup>7</sup> Oiraopavira. Uva voea rutu vavagisipaaepa. Oa iava oiso puraaepa rirovira rutu rugorugooro, “Uvuta. Easi voeao rutu Galili raga iava urioa. <sup>8</sup> Uva apeisi ragavira uvuipaviei ra ora vigei vo reoro raga uvupe vo reo oreoa-ia kakaevira touera. <sup>9</sup> Uva vigei rutu oiso toupai vo-ia, vigei Patia, ora voeao Midia, ora voeao Ilam, ora voeao Mesopotemia, ora voeao Judia, ora voeao Kapadosia, ora voeao Pontas, ora voeao Esia, <sup>10</sup> ora Frisia, ora Pamfilia, ora Isip, ora voeao otaererovu iava oiso osa Libia-ia sovara-ia oea Sairini-ia ruvara-ia toupaiaveira, ora oearovu voeao oea Jiu-pa irara vo pitupituroaro sirova utupaaveira. <sup>11</sup> Ora Krit-pa irara, ora Arebia-pa irara vigoa rutu oiso ragavira toupai. Vigoa rutu uvuipaviei ra evoea uvupe oea goru kovoaro iava Pauto vaoro tavitavipaai.” <sup>12</sup> Osa iava eisi vavagisivira rutu toupaiava oiso purapaoro, “Avoeao! Eake rutu-a vao?” <sup>13</sup> ✧ Oire uva oearovu oiso puraaepa vakuvakupaoro, “Easi evoea aue raga-ia airepa oviro wain ukaioaiva kokoropaai.”

### *Pita Vo Reoaro Aue-ia Pentikos Voki*

<sup>14</sup> Uva Pita aueva toreroepa katai tau katai (11) voeao rera iava oeava oiso puraroepa goruvira, “Visii rutu vao-ia Jerusalem-pa irara ora oearovu uvarovuva Jiu-pa irara visiigoa ragai uvuta. Uva ragai gisipoaro sirova utupatai rara.” <sup>15</sup> Uva oiso puraroepa oearovu vo reoro pukooro, “Viapau oiso evoea kokoropaai wain iava oiso osa purapatai voeare aue-ia tupaoro vo resura vatara vuuta (9 klok) vo vokipaua. Viapau igei vo pitupituroaro vao

vokipakou-ia ukaiopasa aue-ia wain. <sup>16</sup> Ari vao iava tuariri profetato Joel taviroepa oiso puraoro,

<sup>17</sup> ✧ Pauto oiso puraroepa auere ovoioipa vokiro, Ragai reraaro Uraurato irara oirara rutu vuku pieaverea voeao oea rasitao rutu-ia toupaveira oiso-ia, Voeao-ia ovii irara oavisii ora ovii riako oavisii oea taru ragai vo reoroaro siposipoiverea vo ragai vo goruaro sovara-ia. Oa-ia tapo orekerovu karekeaverea visii ovii iraraaro viovokoa osireiario-ia aue-ia areo uusi. Ari avuka irara oavisii urusiara oupaiverea.

<sup>18</sup> ✧ Ora voeao kovopa irara oaa ora kovopa riako oaa oea tapo vuku pieaverea aue-ia Urauratoa oaa. Oa iava ragai vo reoroaro kosi piepaiverea.

<sup>19</sup> Ragai osasararovu rutupa oaravu rutu ravotoara karekeaverea vova vuvuiua sovara-ia ora vo rasitao-ia tapo. Uva oaravu rutu tapo puraaverea oisi vo reesiro ravaavira oiso-ia, oaravua revasiara, ari oaravu tuituiara, ari oaravu kupareara.

<sup>20</sup> Ari ro-ia ravireo ira rupavira taru porero viroverea. Ari ro kekira ira revasivira ora porero. Oire vara rutu-a varao oara isivaaro iava taru Turaro vo vokiara oiraopavira pou piroverea. Vo voki-a eva oa-ia pisavira touperea oa-ia rera vaaro gorua karekerverea ora kortua.

<sup>21</sup> ✧ Vo oiso, irouto-a ro ira Turaro arereverea oiso puraoro, Turaro ragaivi tauvari vii goruaro sovara-ia, eera-a ira oiso kae piereve rera orirusa.'

Eisi osa ro profetato Joel puraroepa tuariri.

<sup>22</sup> "Isrel-pa irara visii-a vao visiigoa vo reoro uvu iraopata. Jisas ro vova Nasaret ira visiipa karekervera rutu Pauto aue-ia oiraopara. Oa iava pisaara oiraopara rutu purarevora Pauto goruaro-ia oiso-ia, varao oara purarevora oarovu porete piepaoro ora riro gorupa kovoro tapo puraparevora. Uva vara rutu-ia varao vearovira tarai iraopata. <sup>23</sup> Eera Jisas ira tapatavora aue-ia evao parikou rera kopii pieoro oevu raga vavaeoro iava oea-ia viapau lotua vai. Uva va puratavora. Ari ita, viapau oiso visii vaoro-a vao-ia, ari Pauto vaoro-a vao oa puratavora, uvare visiipa rera iava vasereva. Uvare rera raga vo ravaaro-a oa oisoa voari rutu toupave tuariri. Uva vo ravaa-a eva oa vo taraiaro sirova ututaera. <sup>24</sup> Oire uva viapau oiso kopiia rera tuukevora. Oa iava Pauto rera ro-ia kae pierevora. Osiitoka eva kavurevora, oa iava tootoovira toupere Jisas. <sup>25</sup> ✧ Oisi-a eisi osa iava Devit oiso puraroepa vo rera iava ro Jisas,

'Ro-ia Turaro Pauto ira kekepaaverea vo ora ragai puaro-ia vo irapaua. Uvare vo ragai oirapapa vavaeoro-ia toupavevora Turaro ragai virivaripaoro. Ra viapau vuria vai oua.

<sup>26</sup> Eva-a oa-ia sopaua oaa agasipapeira aue-ia rorua, ora uvare tapo ragai vuurapa vaisi purapaaveira rera-ia. Vosa kopiira, eagara. Tueparaverea vo ovoioipa voki vare tuepaoro.

<sup>27</sup> Eva oa iava viapau oiso varaua oaa urauraaro kavuriverea vore kopii irara voaoro voeao uraura irara. Ra viapau va iava vaseriverea, ora oiso tapo ra viapau oiso ra Tugoropato oara varaaro eruro.

<sup>28</sup> Vii ragaipa tootoopa raiva vaterivora ora ragai vuku piepariverea aue-ia rorua, uvare ragai tapo toupaviverea vo vokiara rutu-ia.'

Eisi osa puraroepa Devit.

<sup>29</sup> ✧ "Visii-a araoko irara oaa, uvuiparai ra visiipa aviavi pievira tavira aue iava aaotao oavi ro-ia Devit ira kopiioepa. Oa iava rera tovaiva aue-ia kakiua rera vouaoro. Uva va vao vigei ruvara-ia toupai vo voki. <sup>30</sup> Uva

rera profetato va iava tarairoepa vao oiso osa rera vatereva Pauto vao reo ovoï. Vo reo-a ovoïei reo oreoa-ia oiso puraroepa, Ragai vii aao irara iava irai ouaverea irai turaro piesa oiso osa vii vao Turaro. Uva va-a vao-ia oiso ragavira tarai rovoroea Devit oiso, Utupaua taru toupavevea ro-ia oirato Pauto reraaro Jisas Kraï ro Ropoto vo rasitoea-ia. Ora kopiïroverea, ora vorevira toreroverea tapo. <sup>31</sup> Oa-a vao oa-ia taraipaoro oiso puraroepa Devit auere Jisas Kraï vaore torea oaro vorevira, Viapau oiso Pauto rera ro-ia urauraaro iava vaserevea vore uva kopii irara urauraaro toupaveira. Ora oiso, Asi viapau varaua rerare eruperea.

<sup>32</sup> “Ro-ia oirato Jisas ira vorevira tore piereva Pauto, ira kekeiovora ora igei osireiario iava tuu pievira. <sup>33</sup> Uva toupaveira vo oirapapa varata-ia uva rera tovevea rera rei pieoro Pauto. Uva vao tapo-a uvare Tugoropato Uraurato oueva ro irare Reo Ovoï puraveva Pauto rerapa. Oisi-a oiso osa iava varaua rutu kareke pierevo oara rutu keketavo ora vara tapo uvutavo vo-ia. <sup>34</sup> ✧ Ira-a ro-ia Devit viapau oiso iparoepa vuvuiua iare. Ari ora rera raga oiso puraroepa, ‘Ro-ia Turaro Pauto ira oiso puraroepa rerare Turarotoa oaa, Vo pauu oirapapa vavae oaa-ia.

<sup>35</sup> Ovusa viïpa urua puraa tsipasa voeao-ia keripa irara oara, vo rara voea-ia puteri.’

<sup>36</sup> “Oiraopavira rutu varao Isrel sararo vao-ia tarai iraoapaavere Jisas iava ro ira rei piereva Pauto. Ro-ia ira evao parikou-ia tapatavora. Oa-a vao oa iava rera roporeva rera vaisiro oiso, Kraï, rera Turaro pieoro.”

### *Oirara Rutu Ora Voea Iava Sopaura Poreivoiva, Baptaisaepa*

<sup>37</sup> Uva vo reo isivaaro iava voea iava sopaura oaive vatavea rutu. Oa iava siraoaepa. Oire va iava oiso puraaepa auere Pita ora oearovu aposel irara, “Avoeao araoko irara oaïo. Eake vai-ia uvuipaiei ra oaï purao?”

<sup>38</sup> ✧ Oa iava Pita voeare oiso puraroepa, “Ora visii iava vovouisiro oavisii poretata katakataivira visii rutu. Ra baptaisa outa ora reesiro. Ra rera vaisiario-ia Jisas Kraï touta. Oiso ra visii iava vuriara oavisii verareve, oa iava vao Tugoropato Uraurato outavere rera vo goruarova tupaoro. <sup>39</sup> ✧ Vao-ia Reo Ovoï oa puraveva Pauto visiire, ora aao irara oavisii, ora voearore tapo oearoa tauairo rutu tapo toupaveira, ora oearovu rutu tapo oearoa roporoperevea Pauto ora rera iare.”

<sup>40</sup> Uva oreorovu rutu-ia voea goruvira tavireva Pita oiso, “Ora oriruta visii vao-ia ora voearo vo vokiã iavapa irara. Uva voearopa ora vatatopopatavere oearovu vuri vovou irara.” <sup>41</sup> Oire va iava voea voeao rera reoaro uvu iraoiva. Oa iava baptaisa ouiva. Voea rutu voeao-ia oea vieiario-a vao vo peva tuku (3,000). Uva voea evoea oïrao pie vovou irara tapo ora takutakuvuaepa. <sup>42</sup> Oa iava taraia ouiva aue sirova utupaoro aposel irara vo siposiporoaro. Osa iava voea rutu tupaiva oavu-ia ora goruaepa aue komunion aio purasa ora aue tapo variria.

### *Oïrao Pie Vovou Irara Vo Tootooaro Iava*

<sup>43</sup> ✧ Voea rutu voea-ia tavetavepaiva, uvare oaravu rutu ravoto kovoro puraiva aposel irara vo Tugoropato Uraurato goruaro-ia. <sup>44</sup> Oïrao rutu voeao oïrao pie vovou irara oea oïsoa vaea kaevira tupaive katai tapi, ora orekerovu rutu oaive oara-ia ora roorookaaepa ora voea raga. <sup>45</sup> Vara rutu varao oara oïsoa voea ruvara-ia tupaive oara-ia moni ouaepa oearovu ruvara-ia. Oa iava oïsoa voearopa vara varao moniario roo piepaive

✧ **2:34:** Sam 110:1 ✧ **2:38:** Lu 24:47; Ap 3:19, 5:31 ✧ **2:39:** Ais 57:19; Joe 2:32; Ap 10:45; Ef 2:13 ✧ **2:43:** Ap 5:12

voeaopa apota iraravi. <sup>46</sup> ✧ Uva oisoa vokiara rutu-ia aivaropaive Rovopa Kepa Tugoropa Kepa-ia Tempel vo katai vovou raga-ia, ora vo tapo kepara oaive-ia tapo. Uva tapo oisoa aue-ia aioara oisi raga vaeavira aiopaive voea rutu. Ora aue-ia roru vovou-ia oisoa oearovupa orekerovu vate ragapaive. <sup>47</sup> ✧ Oa-a eva oa-ia oisoa Pautoa-ia vuurapa vaisi purapaive. Uva va-ia oearovu voea-ia oisoa tavetavepaive. Oa iava oisoa vokiara rutu-ia Turaro Pauto oearovu gurupareve oirao pie vovou irara voea iare.

### 3

#### *Vuri Kokototo Vearoroepa Ira Oisoa Toupareve Tempel Iava Rataoa Riaaro-ia*

<sup>1</sup> ✧ Ovokivu-ia Pita vaio ora Jon ipasiepa Tugoropa Kepa Tempel iare aue-ia vo peva vuuta (3 klok) variripa vuuta ovaiarovi. <sup>2</sup> Oire iravu oirato ira kavaueva aakova vuri kokototo. Ira iava kopiepa kokotoarei. Oa iava oisoa rera kaepaive. Uva oisoa vokiara rutu-ia rera tovopaive vo Tempel rataoa riaaro-ia. Vo ratao oa oisoa vaisipaive oiso, Vearo Ratao Rutu. Uva oisoa voa toupaooro oearovu arepareve auere moni, ovusa koatapaave Tempel sovara iare. <sup>3</sup> Oire voava kaea-ia Pita vaio kekereva ora Jon ovusa koata rovopasiepa. Oa iava vaiterei arepareva auere oaravu avu vai rerapa, oiso ra oarai vatesi rerapa. <sup>4</sup> Uva tuupavira Pita rerava vurapareva. Uva Jon tapo toupaooro oiso puraroepa, “Vegei-ia vurari.” <sup>5</sup> Uva va iava vaitereiva vurapareva kepaoro oiso, Ragai vatepasivoi orekevu avu vai. <sup>6</sup> ✧ Oa iava Pita rerare oiso puraroepa, “Viapau oiso monia vaiei ra viipa oai vateve. Ari ita, oavu raga vao-ia oa iava vii vatepaave Jisas Krai vo goruaro raga iava ro vova Nasaret. Uva vii tavipaa ra toreu, ra vokari.” <sup>7</sup> Oire Pita rera oirapapa vavaeoro-ia pituoro rera tore pierewa. Uva vo vuuta raga-ia eva oa-ia rerare goruepa kokotoarei vova ario kerureiario iava. <sup>8</sup> Uva voava tokatokareva voaviva voka ovoisa. Oire vaiterei tapo koataroepa vore Tugoropa Kepa vao Tempel sovara-ia tokatokapaoro ora Pautoa-ia vuurapa vaisi puraoro. <sup>9</sup> Osa iava eisi oirara rutu rera kekeiva osa eisi vokareva Pautoa-ia vuurapa vaisi puraoro. <sup>10</sup> ✧ Oa iava voava rerare oiso puraroepa, “Akoea, ari ro oisoa Tempel vuura rataoaro-ia toupareve moni arepaoro.” Ari ita, rirovira rugorugoo iraopaapepa vao iava oa rera-ia karekeepa uva oisi vokareva.

#### *Pita Vo Reaoro Rakorako Uru Iava Vao Solomon Vaaro*

<sup>11</sup> ✧ Vo osa Pita vaio-ia pitupareva ora Jon, ovusa oearovu ikaupaoro uriopaapepa vore rakorako uru vao Rovopa Kepa Tugoropa Kepa. Oa oisoa vaisipaive oiso, Solomon Vo Uruaro Rakorako Uru. Osa iava oiso rirovira rutu rugorugooapepa voea rutu. <sup>12</sup> Oa iava Pita voeare oiso puraroepa, “Ai! Eake iava vegeiva tuupavira vurapata visii Isrel-pa irara. E oiso rugorugoopatai ora vegei raga vo goruaro iava vao puravevo? Ora vao tapo vao iava torevoko vovou oiso ro oirato pievevoi?” <sup>13</sup> ✧ Viapau rutu. Oiraopavira, ari Pauto raga ro Pauto oaive Ebrahim vase, ora Aisak, ora Jekop. Uva eera-a Pauto oaive vigei aite iraraoro. Ari ita, rera raga-a eera Oviito Kovopato Jisas ira rei pierevora Pauto. Ira vate ragatavora rera rovirieisa kortua-ia. Rera-ia kuuvu pitupituro rutu puraoro rerare isivataera vo Pailat osireiario-ia. Oire va iava Pailat Jisas kortuoro oiso puraroepa, Rerape. <sup>14</sup> Uva visii rutu vao-ia visiiigoa rerare isivaoro ora poretaera rera karusa ro oira upopato. Oire rera kopii pietavora

✧ 2:46: Ap 5:42; 1 Ko 10:16 ✧ 2:47: Ro 14:18 ✧ 3:1: Ap 2:46; Sam 55:17 ✧ 3:6: Ap 4:10  
 ✧ 3:10: Jo 9:8 ✧ 3:11: Lu 22:8 ✧ 3:13: Ais 52:13

Torevoko Vovouto ora Tugoropato. <sup>15</sup> ✧ Ira upotavora Turaro ira Tootooa vatepareveira. Ro ira vorevira tore pieredora Pauto voeao ruvara iava kopii irara. Uva rera-a eera ira kekevevora vegei. <sup>16</sup> Va-a vao oa iava Jisas oirao pievevoiva, vuri kokototo porete pievevora rera vaaro iavirava gorua, oporetea-a vao-ia oa keketavoi vo vokio vao oa karekei ro-ia ira-ia taraitai.

<sup>17</sup> “Araoko irara oaa, taraiparai vao-ia osa vao pura ragatavora vuria, uvare viapau taraipataera oiso rutu osa voeao reipa irara oavisii vo tuariri.

<sup>18</sup> Ari ita, vara rutu varao oara karekereva Pauto aue-ia profet irara gisipoaro tuariri. Oire vo tavakaro urioera Kraisi iare Pauto Ropotoaaro. Uva vo reoro varao oara oirao pieredora Pauto vo rera-ia.

<sup>19</sup> “Oire ora visii vo pitupituroaro tavariota, ra poreta viro. Oa iava vuriara oavisii uvuipai verareve. <sup>20</sup> Osa iava eisi uvuipa ra vorerivira airepa goru vateve, oiso osa ogoepato gorua oupareveira aioa-ia. Aue iava uvare vao raga-ia Turaro Pauto visii tapo toupate. Uva va iava Jisas visiiipa siporevere, ro Kraisi ira roporeva Pauto visiipa. <sup>21</sup> Ari ita, rera ro tou rovorevere va vo vuvuiua-ia vo vuutare tuepaoro, vo osa orekerovu rutu torevoko rovorevere vo rasitoo-ia. Oara iava rera voeaaaro profet irara tavireva tuariri voea vateoro. Osa iava profet irara vara iava tavitaviaepa.

<sup>22</sup> ✧ “Oire uva Moses tapo oiso puraroepa, ‘Pauto profetatoa vai roporevere va visii araoko iraraaro iava irai oiso osa ragai piereda. Ra irai reoro uvupata.

<sup>23</sup> ✧ Oire vosa irouto rera reoro viapau uvupareve, ira-a eera taru voea iava viro pieredere rera opesi piesa.’

<sup>24</sup> Oiraopavira ita, voeao-ia profet irara oiso osa ro-ia Samyuel rovopato, ora oearovu rutu voeoro oearoo oiso rera sirova utupave vo reoro varao vatepaoro oara rutu iava tavitaviaepa vo vokiro rutu iava varao-ia.

<sup>25</sup> ✧ “Oire uva evara-a oara iava oaravu outavere varao oara iava tavitaviaepa profet irara voari tuariri. Visiigoa Pauto vo Reo Ovoiario sovara-ia toupata oreoa iava vigei tuariripa iraraaro tavireva oiso, ‘Ebrahim, vova vii ovii iraraaro oea iava taru viraakoa karekeperea vore oearovu rutu-ia vo rasitoo-ia.’

<sup>26</sup> Pauto Oviitoaaro roporeva rera sipo rovosa visii iare, oiso ra visii rutu viraakoreve auere, ra vuriara oavisii iava poreta viro.”

## 4

### *Pita Vaio Ora Jon Tovoiva Tuukepa Kepa-ia*

<sup>1</sup> ✧ Oire vo osa voea tapo oirara ora reopasiepa, ovusa poua viropa oearovu oirara oiso osa pris irara, ora Sadyusi-pa irara, ora ro rovopatoa rutu vova voeao iava oea oisoa Tugoropa Kepa Tempel tokipaive. <sup>2</sup> Uva va iava rirovira kasipupaaepa vo siposiporo iava oara vatesiva oirarapa oiso osa vao-ia oa-ia oiso purasiepa, “Voea rutu taru oirara vorevira torevora Tootooa ouoro oiso osa pieredora ro-ia Jisas.” <sup>3</sup> Oa iava vaiterei iava gasiiva vaiterei tuukesa uva vaitereire vokiepa voa. <sup>4</sup> ✧ Ari ita, riro irara rutu Pauto vo reoroaro oirao pieva vo reo oa vatesiva. Eva-a oa iava voea rutu vieiario aue-ia uvuiaepa, vo vavae tuku (5,000) voea rutu uvuiaro voeao oirao pie vovou irara.

### *Kaunsel Irara Osireiario-ia Vaiterei Kortuiva*

<sup>5</sup> Uva katai voki putevoiva, voea rutu ora guruaepa Jerusalem-ia. <sup>6</sup> Oiso-ia tokipa irara, ora oavuu oira vasi irara, ora oavuu voeao Reo Taisi iava

✧ 3:15: Ap 5:31 ✧ 3:22: Diu 18:15 ✧ 3:23: Diu 18:19 ✧ 3:25: Jen 12:3, 28:14 ✧ 4:1: Lu 22:4; Mt 3:7 ✧ 4:4: Ap 2:41, 3:1

siposipopa irara, ora ro tapo Anas Rovopato Pristo, ora Kaiafas, ora Jon, ora Aleksanda, ora voea rutu voeao Rovopatoa rutu voeao. <sup>7</sup> Uva ora voea sovara-ia aposel irara tovoiva. Oa iava oiso voea akepaiva, “Aa vo goru-a, ora aa vo karopo-a oa iava varao purapatavo visii oira akukuro?”

<sup>8</sup> ✧ Oire Pita Tugoropato Uraurato vo goruaro iavirava oiso puraroepa voeare, “Visii vao oirarapa utupa irara reipa irara ora oira vasi irara oae Isrel-pa irara. <sup>9</sup> Vosa taraia oupata vegei-ia vava vegei rovirieipasa vao-ia vegei vaaro vearo kovo oa-ia ro porete pievevora vuri kokototo. Uva uvuipatai ra rera kekepaoro rugorugoo iraopata. <sup>10</sup> ✧ Ro Jisas ira vo goruaro-a vao oa aviavi pie iraopaavo visii vao-ia ora voeao Isrel-pa irara. Ari ita, rera raga ro-ia Jisas Krai ro vova Nasaret ira tapatavora aue-ia evao parikou, oa iava rera tore pievevora Pauto aue iava kopiario. Ira vo goruaro-a vao oa oiso ro porete pievora vuri kokototo ira tapo toupatavoi vo vokie. <sup>11</sup> ✧ Ro-ia Jisas irare isivataera oiso osa vao vo reo-ia rera iava Jisas aveke tuuta oreoa toupai Tugoropa Vuku sovara-ia oiso, ‘O-ia aveke iriare isivaaera kepa paupa irara. Uva utupauavi oiso karekeoi kukuuvu tuuta oira o aveke.’

<sup>12</sup> ✧ Uva viapau irai vova rasioa-ia uvuiparoi irai ita ousa vore Pauto ruvara-ia. Viapau rutu. Ari ro raga vaisiario-a, ira vigei kae pievevora utupaua ro raga, Jisas Krai.”

<sup>13</sup> Oa-a eva oa iava vaiterei-ia tarai iraopaaepa voeao Jiu iava voea reipa irara, uvare viapau uriripasi goruvira rutu reopaoro. Uva oiso tapo oisoa taraiapaave, Asi vaitereo viapau oiso skulsiapa, ora viapau vigei vo taraiaro ousivora. Oa iava rirovira rutu oiso rugorugooaaepa, uvare vaiterei eveipaiva oiso, Easi vaitereo Jisas tapo oisoa toupasi. <sup>14</sup> Ari ita, rera vurapaiva ita ro-ia oirato ira vorevira vearoroepa. Uva viapau oiso uvuipaepa oiso ra oreovu avu vai puraiva va iava eva rera-ia.

<sup>15</sup> Oire vaiterei kosi pieiva Kaunsel Kepa iava. Oa iava vaiterei-ia ora reopaaepa rirovira rutu rugorugooaoro vaore oa purasiva. <sup>16</sup> Uva oiso puraaepa vaitereire, “Avoeao, eake vai purapere vaitereire? Ari ita, oiraopa rutu ita vao oa purasivora ravoto kovo rutu puraoro oirara rutu osireiario-ia voeao Jerusalem-ia tou irara. Uva viapau uvuipavie ra oiso puravio, Easi viapau oavu avu vai ei vao-ia.” <sup>17</sup> Oire vaitereire oiso puraaepa voea raga ora reopaoro, “Vearopai ra oisivu avu rutu ora vaiterei raga-ia vape. Ra viapau rutu avape oearovu siposiposa ro iava Jisas. Teapi oearovu iare ita avape ra va-ia taraiave. <sup>18</sup> Uva va isivaoro iava vorevira ita vaitereire keeraaepa. Uva voava oiso vaiterei vearovira rutu vosipaiva oiso vaiterei tavipaoro, “Opeita vo vaisio iava ita Jisas-pa vaisi oearo ita siposiposivore.”

<sup>19</sup> ✧ Uva Pita vaio ora Jon oiso ragavira voea akepasiva voea vo reoroaro pukooro, “Eake vai vearopai vo Pauto osireiario-ia, visii vo reoroaro sirova utusa, eke Pauto vo reoro? Oire varei vearovira rookata, aa vao vearopai. <sup>20</sup> Viapau rutu uvuipaiei ra varao kavuio oara kekeiovora ora vara uvuiovora.” <sup>21</sup> Oire va iava vorerivira vaitereipa oreovu ita goru pie reo vateiva. Oa iava vaiterei iava vaseiva. Uvare viapau uvuipaepa oiso ra raiva vai kekeve ra oai-ia vaiterei vuri pieve. Aue iava uvare vao ragare vorevira rugorugooaepa oearovure voeoro oearo tapo vova ratau Pauto-ia vuurapa vaisi purapaiva va-ia vao vaiterei vo kovoaro-ia, oa-ia ro porete piesivora vuri kokototo. <sup>22</sup> Rera-a ro irare vo resura tau (40) ivaro puteva. Uva uvuiparoi ra vorevira vokareve vo vokie-ia.

### *Oirao Pie Vovou Irara Uriri Asavira Variripaaepa*

✧ 4:8: Ap 13:9 ✧ 4:10: Ap 3:6, 2:24 ✧ 4:11: Sam 118:22; Ais 28:16 ✧ 4:12: 1 Ti 2:5-6  
 ✧ 4:19: Ap 5:28-29

<sup>23</sup> Oire uva va iava ora vaiterei iavapa irara iare avasiepa voeapa siposiposa vo reoro rutu iava varao oara puraiva voeao rovopa irara rutu pris irara ora oira vasi irara. <sup>24</sup> ✧ Uva vo siposipo uvuoro katai guruko raga puraiva varirioro vaeavira rutu oiso, “Pauto riro gorutoa rutu-a vii Turaro. Vii raga varao purariva oiso-ia, vuvuiua, ora rasito, ora avakava, ora orekerovu rutu varao oara sovara-ia toupaveira. <sup>25</sup> ✧ Uva vii raga vo reoria Tugoropato Uraurato oara iava Devit gisipoaro-ia ro vii kovopatoaro oara-ia oiso purauepa, ‘Eakere osararovu kasipuvira toupaveira. Ora eakere oearovu vo kovoro-ia reesiara pura ragaiva akukuvira.

<sup>26</sup> ✧ Uva voeao-ia oira vasi irara oea oisoa rasitoa-ia toupaveira ora ravapaoro utuvivira. Ora oearovu tapo voeao tokipa irara oearoa rutu ora guruaepa uva voava rerere ro Turaro Pauto kasipuaepa ora auere tapo Kraisi rera reraro ro Ropoto.’

<sup>27</sup> “Oiraopavira osa toupai vo-ia. Uva voea voeao ora guruaera auere vii Oviitaaarore kasipusa ro Jisas ira roporiva rera siposa Airereito Kovopato. Uva voea-a voeao-ia oea ora guruaepa oiso-ia, Herot-a ro-ia, Pontias Pailata ro, ora Isrel-pa irara, ora oearovu ratau tou irara. <sup>28</sup> Oisi ragavira otakutakuvua vao puraiva oiso osa vii vo goruaro ora vii vo ruipaaoro reesireva, oisore ra oisi kareke iraope. <sup>29</sup> Turaro, igei tauvari voea vo reoaro uvuoro kasipu reo, oiso ra viapau uriripaio vo osa vii vo reoaro goruvira puraio. <sup>30</sup> Ora vo osa vavaea oara tovari vo oearovu porete piepaoro, auere ra ravaa reesiro ora karekepe ora ravoto kovoro tapo vao iavirava Jisas vaisiara vii reraro Airereito Kovopato.”

<sup>31</sup> ✧ Uva vo varirio isivaaro iava kepa vao rikerikeepa ravurikeoro. Uva voea rutu tapo agasiaepa Tugoropato Uraurato vo goruaro ouoro. Eva-a oara iava uriri asavira oisoa Pauto vo reoaro vatepaive.

### *Orekerovu Rutu Voea Varaaro-ia Oisoa Vaeavira Raga Pitupaive*

<sup>32</sup> ✧ Oire uva voeao oirao pie vovou irara oea aue raga-ia oisoa toupaveira katai vovou ora katai tootoo. Uva viapau oiso ra irai voea iava oiso puraro, “Eva-a ragai vaaro.” Oapa viapau oisi oa-ia touiva kataia raga-ia vaea rugorugoo. <sup>33</sup> Uva aueva gorua voeao aposel irara Turaro Jisas torearo iava siposipoiva. Osa iava riroa-ia touiva gavaurea ora tauva vereopa vovou-ia. <sup>34</sup> ✧ Uva viapau irai voea iava apotavira oisoa toupaveira, uvare kepaara ora rasiara oaive-ia oisoa voria oupaave varao oara oisoa voea ruvara-ia toupaveira. <sup>35</sup> Oire vo voriro evara oara oisoa oupaive oara oisoa tovopaive aposel irara ruvara-ia. Uva voava oisoa vara oupaoro voearovio roo piepaive apota irara.

<sup>36</sup> Ro Josep ira oisoa vaisipaive oiso, Banabas. Ovaisia porearo oiso ragavira oisoa toupaveira, Vearopa Reoro Vateto. Eera Livai-pato Saipras iava rera. <sup>37</sup> ✧ Uva oisoa rera vaaro rasia toupaveira, oa-ia voriroepa monia ousa aposel irarapa.

## 5

### *Vo Ananaias Vaio Iava Toupai Ora Sapaira*

<sup>1</sup> Uva ita, iravu-a ro-ia rera vaisiara, Ananaias ora vatuava o-ia, Sapaira aiteera tapo oavu oaesi-ia rasia voro ousiepa monia ouoro va-ia. <sup>2</sup> Ari ita, aiteera vaitereoro monia ouo ragasiva auero oaesi rutu voriaro-ia. Uva okarutuvu-ia pitureva ora rerapa. Uva vatuava tapo taraiopa va-ia, osa

✧ 4:24: 2 Kin 19:15 ✧ 4:25: Sam 2:1-2 ✧ 4:26: Hi 1:9 ✧ 4:31: Ap 2:2, 4 ✧ 4:32: Ap 5:12

✧ 4:34: Ap 2:45 ✧ 4:37: Ap 5:2



okarutuvu raga ouoro vava avaroepa aposel irara vatesa va. <sup>3</sup> ✧ Oa iava Pita oiso puraroepa rerare, “Ananaias. Apeisi ragavira iava ora vii iava sopaua iava vaserivo Seten-pa? Oa iava voua-ia piturevoi. Uva vo pitupitu-a vao kuuvua purarivo Tugoropato Uraurato keaoro ora viipa moni-ia karutuoro rasia variaro. <sup>4</sup> Vo osa vori asavira rasia oisoa toupai, uva voa-a eva uva oisoa vii raga vo rasia oisoa pitupari. Uva va isivaaro iava vo rasi voriiivo viipa. Oa iava va voriaro tokirivo. Oire uva apeisi ragavira vovouisi oara pierivo? Rera tapo Pauto kearivo. Viapau oiso oirara raga kearivo vao-ia. Viapau rutu.” <sup>5</sup> Uva va iava Ananaias vo reo uvuoro kove ovoiroepa kopii ovoiro. Oa iava voea rutu rera iava uvuiva va iava eva osa piereva kopiioro ora uririaepa rutu. <sup>6</sup> ✧ Uva oearovu rera ruuro rerava kosia viropa rera tovasa.

<sup>7</sup> Oire vo peva vuuta (3 aua) isivaaro iava urioopa vatuava oaro. Viapau oiso rera-ia taraipaoro oiso, Ro kopiiro, ra oa-ia koataopa. <sup>8</sup> Uva Pita oira akereva oiso, “E vo monia vao-ia rasia oaesi voriaro?” Oa iava oiso puraopa, “Aure. Eisi ita osa torevokopai.” <sup>9</sup> Osa iava Pita oirare oiso puraroepa, “Apeisi irao iava vei rutu vaea vovou purasivo Tugoropato Uraurato-ia kokaraoro Pauto reraaro? Uvuipau ra voea kukuukuaro uvuri oisova vii kaesa vorepaave vova uva vatuatoa oara tovapa tapi.” <sup>10</sup> Oa iava kove ovoioipa kopii ovoiro. Uva voava vokapaoro vo gerepa kekeiva. Oa iava oira kaeiva oira tovasa voari vatuato tova ruvara-ia. <sup>11</sup> ✧ Uva voea voea lotupa irara ora oearovu oea rutu vaitereo iava uvuoro rirovira rutu uririaepa.

### *Rioroa Puraiva Ravaa Reesiro Ora Ravoto Kovoro*

<sup>12</sup> ✧ Oire voea aposel irara osasarovu rutu ravoto kovoro puraiva oirara rutu vuutaoro-ia. Oa iava voea rutu vaea vovou puraiva. Uva ora guruaepa rakorako uru-ia Solomon vaoro. <sup>13</sup> Oearovu veaoro lotu asa irara oea viapau voea tapo ora guruaepa uvare uriripaaepa. Ovusa oearovu oisoa voea iava aposel irarapa avivikepaave. <sup>14</sup> Ari ita, oearovu oearoa Turaro-ia oirao pie vovou rutu purapaiva, oearoa voea tapo ora guruaepa ora takuvuoro. <sup>15</sup> ✧ Oa iava voraro rutuva oearovu uriopaaepa oearovu kaepaoro, upiapa irara vore raiva. Uva voeapa urupaiva vo raiva puaro aue-ia mat ora uru rakorako-ia tapo auere rugoopaoro, Vosa Pita voea-ia putepaoro vokaparevere, ra uveiotoa oaro kavupareve voea-ia rera verapaoro voea iare osa voea ruupareve uveiotoa oaro voea porete piepaoro. <sup>16</sup> Uva vo uruiro tapo uriopaaepa ouruioa oisoa Jerusalem-ia ruvara-ia toupai, ouruioa oearovu upiapa irara sipopaiva ora oearovu oearoa-ia oisoa tugara kopiiro toupai. Oa iava vorevira voea porete pieiva.

### *Vo Tavaka Iava Toupai Vao Oa Karekepa Aposel Irara-ia*

<sup>17</sup> ✧ Oara-a evara ravoto kovoro riiriireva kasipuoro Rovopato Pisto ora oearovu rera iava Sadyusi-pa irara. <sup>18</sup> Osa-a eisi osa iava aposel irara ouiva voea tovosa tuukepa kepa sovara-ia. <sup>19</sup> Uva vokiario urioroepa Turaro purapurapatoaoro ensel rataoa karusa. Oa iava voea kosi piereva rataure. Uva oiso puraroepa, <sup>20</sup> ✧ “Avata. Uva Rovopa Kepa-ia Tempel toutavere, ra voa toupao voea rutu oirara siposipota vao iava tootoa, Airepa Tootoo oa vo toupai voi Jisas vo raivaaro-ia.” <sup>21</sup> ✧ Eva-a oa uvuoro avaaepa Tempel iare vo reoro-ia rovosa vara vateoro.

✧ 5:3: Diu 23:21; Lu 22:3 ✧ 5:6: Jo 19:40 ✧ 5:11: Ap 19:17 ✧ 5:12: Ap 2:43, 3:11, 4:32  
✧ 5:15: Ap 19:12 ✧ 5:17: Ap 15:5 ✧ 5:20: Jo 6:63, 68 ✧ 5:21: Ap 4:5-6

Uva Rovopato Pristo urioroepa ora voeao rera iavapa irara tapo. Oa iava voeao Kaunsel irara guru pieiva voeare keeraoro voeao Isrel-pa irara oira vasi iraraaro. Uva va isivaaro iava oearovu aposel irara ousa avaaepa tuukepa kepa iava. <sup>22</sup> Oire uva polis irara avaaepa voare. Uva viapau voea kekeiva tuukepa kepa sovara-ia. Oa iava vura ragaoro voreaepa oiso purasa, <sup>23</sup> “Igei tuukepa kepa-ia vura ragaio. Viapau oiso irai ariarava karuiovo. Ari ita, tupavira raga toupai vo tupa. Ora aue tapo uvare vo kepa-ia uutupa irara tapo toupai vo.”

<sup>24</sup> Uva va iava vo reoro uvuoro Rovopato Pristo ora iravu reito aue iava Tempel aiterea rutu oiso rugorugoo iraopasiepa, Eake irao-a vao-ia oa pou piroi vo-ia? <sup>25</sup> Oa iava iravu urioroepa voea rutu tavisa oiso, “Avoeao uvuta. Easi voeao epao Tempel-ia oea oirara siposipopai vo.” <sup>26</sup> Oire reito avaroepa rera voeao tapo. Oa iava voea tapo aposel irara voreaepa voea rutu. Uva viapau oiso orekevu avu vai puraiva voea-ia, uvare oiso ragavira rugorugooapaepa, Teapi vigei iare avekeara vai vikiive.

### *Aposel Irara Viapau Oisoa Uripaave Kaunsel Irarare Reoreopaoro*

<sup>27</sup> Uva voava voeava karea viropa voea tovosa Kaunsel irara sovara-ia. Oa iava ro-ia Rovopato Pristo oiso puraroepa, <sup>28</sup> ✨ “Igei visiipa goru vosi rutu pura ragaiovorao oiso, Opeita vo vaisio iava oearovupa siposipopatavere Jisas-pa vaisi. Uva apeisi iava visii raga vo uruio agasi pieta Jerusalem urui vo ora visii gisipoaro raga iava igeipa vao vuria puraoro oiso, Igoa rera kopii pieiovara?”

<sup>29</sup> ✨ Uva Pita ora oevu aposel irara vo reo pukoiva oiso puraoro, “Igei Pauto vo reoaro sirova utu iraopaioveira. Ari oirara vo reoroaro oara tupepapeira. <sup>30</sup> Vigei aite iraraaro Pautoa-aro ira Jisas tore pieredora vorevira ro ira kopii pietavora evao parikou-ia. <sup>31</sup> Uva Pauto rera rei pieredora ora rera oirapapa varata oaro-ia oiso rera pieoro, Turaro Kae Piepato, oisore ra Isrel-pa irara sopaaro oaive poreive. Oire ra va iava voea iava vuriara oaive veraparevere. <sup>32</sup> ✨ Ora igei-ia vao iava tavitavipa irara ora ro tapo Tugoropato Uraurato ira voearopa vatepare Pauto oearoa rera vo reoaro sirova utupaaveira.”

### *Gameliel Oiso Puraroepa, Kaunsel Irara Gavaure Visivi Aposel Irarare Reopata*

<sup>33</sup> Oire uva vo reoro voea sopaaro togava rutu. Oa iava voeare vovouisiro tore iraoepa. Uva oiso vovoupaapea ra aposel irara upoive voea kopii pieoro. <sup>34</sup> Uva voava vo vokia vao-ia iravu toreroepa voea iava voeao Kaunsel irara ro-ia Farisi-pato rera vaisiario, Gameliel. Eera Gameliel riro taraito Reo Taisi-ia. Irare oisoa oearovu rutu oiso purapaave, “Eera-a vearo vovoutoa rutu,” uvare reo keketoa. Oire uva toreroepa oiso purasa, “Eisivi raga ratauvi voeao aposel irara kosi pieta.” <sup>35</sup> Oa iava oiso puraroepa Kaunsel irarare, “Visii vao Isrel-pa irara vatatopopata. Teapi voeao vuri pie ragata. <sup>36</sup> Teapi oiso pieta osa iravu ro-ia rera vaisiario, Tiudas ira oisoa ora rera vaisiario raga rei piepareve. Oire riro irara rutu rera sirova utuaepa. Voea uvuiaro voeao-ia vo resura vovoto (400). Uva va iava oevu rera upoiva. Osa-a eisi osa iava oisi raga ora rigaaepa voeao vo resura vovoto ora opesi pieoro. <sup>37</sup> Uva voea isivaaro iava iravu ro-ia rera vaisiario, Judas ira karekeroepa aue-ia vo vokie sensispa voki ro-ia Galili-pato. Uva voava riro irara ivureva ora rera iare rera sirova utusa. Ari ita, eisi ita osa ragavira iava ora opesi pieroepa. Uva oisi raga voeao utuaepa rera

voeaaro. <sup>38</sup> ✧ Ari ita, vo vokio-ia visii tavipaa oiso, Voeape, ora voea vo kovoaro tapo, ora raivara oaive. Oara tapo evara opesi ragapere, vosa voea raga varaaro oira turiro. <sup>39</sup> ✧ Ari vosa voea varaaro vova Pauto, ra viapau oiso uvuipatai ra voea-ia puteta. Uva oiraopavira pasi oiso, Easi visii vai raga Pauto upopatavere.”

### *Aposel Irara Roruiva Ariia Oupasa Jisas Vaisiaro-ia*

<sup>40</sup> ✧ Osa-a eisi osa iava Gameliel vo rearo sirova utuaepea. Oa iava voeare aposel irara keeraaepa. Uva voea ragaiva voeare goruvira oiso purapaaro, “Opeita Jisas vo kovoaro iava tavitavipatavere.” Uva va isivaaro iava voea eakaiva. <sup>41</sup> ✧ Oire Kaunsel-pa irara kavuiva roruuro, uvare Pauto voeapa reoa reesivira oiso puraoro, “Uvuutae ariia ouoro varao rutu-ia vo Rovopa kovoro kareketavoiva Jisas varaaro.” <sup>42</sup> ✧ Oa iava vokiara rutu-ia vo Rovopa Kepa-ia vao Tempel ora vo kepaara tapo vo siposipo oisoa vatepaive Jisas iava oiso, Pauto reraaro ro-ia Ropoto.

## 6

### *Erao Vatara (7) Oirara Reesiiva Aposel Irara Tauvapasa*

<sup>1</sup> Ovokivu-ia utupaua uva disaipel vieiario riroepa. Uva voea raga iava oearovu Jiu-pa irara Grik reo-ia oisoa reopaave voeare oea oisoa Hibru reo-ia reopaave oiso purapaaro, “Uva apeisi viapau vairopa raree riako igei iavapa riako uvuivira aioara vai vatepaiveira vokiara rutu-ia?” <sup>2</sup> Uva oiso puraapea voeao katai tau erao (12) aposel voeare keeraoro disaipel irara, “Viapau rutu uvuipaiei ra Pauto vo rearo vatepa kovo kavuio okovorovu raga tokioro. <sup>3</sup> ✧ Oire ora visii raga iava erao vatara vaire taraata torevoko sopa irara vai. Voeao oea vukupaveira aue-ia Tugoropato Uraurato rera vaaro tauva ouoro, ora aue tapo vosa riro tarai irara vai. Oa iava uvuipaiei ra voea reesiio vo kovo tokipasa aio vatepa kovo. <sup>4</sup> Uvare igei vaaro oiso toupai, Igoa variripaiovere, ora vo reo vatepaiovere siposipopaaro.”

<sup>5</sup> Uva va iava oiso puraapea, “O ita veaorapai.” Oa iava Stiven reesiiva ro ira aue-ia Tugoropato Uraurato vukuroepa ro riro oirao pie vovouto. Ora voeao tapo reesiiva oiso-ia, Filip, ora Prokoras, ora Naikena, ora Taimon, ora Pamenas, ora Nikolas Antiok iava rera ouruia oisoa ratau toupave tauai, ira Jiu vo pitupituaru sirova uturoepa. <sup>6</sup> ✧ Oire voea tovoiva aposel irara ruvara-ia. Uva variria isivaaro iava voea-ia vavaeara tovoiva voea-ia ovoiei reesi puraoro.

<sup>7</sup> ✧ Oire Pauto vo rearo ora sikataepa. Uva disaipel vieiario riroepa. Oa iava riro irara pris irara vo reo vao oirao pieiva.

### *Vo Stiven Iava Toupai Uvare Rera Tuukeiva*

<sup>8</sup> Oire uva Stiven vukuroepa gavaurea-ia ora gorua uvare Pauto vaaroa tauva. Ira varao ravaa reesiio purareva ora oira porete piepa kovo tapo. <sup>9</sup> Oire oevu okepavu iava Jiu vaaro Reo Taisi Uvupa Kepa oea oiso vaisipaiveira oiso, Friman oea urioapea ora oearovu vo taerero iava oiso-ia, Sairini, Aleksandria, ora Silisia, ora Esia Provins evoea oea rutu kaureoapea Stiven-va. <sup>10</sup> ✧ Uva viapau uvuipaapea oiso ra tarai oaro goruaro gasiive vao oa vatereva Tugoropato Uraurato rerapa vao oa iava oisoa reoreoparo. <sup>11</sup> ✧ Oire oearovu oirara vatauvira vori ragaiva, oiso ra oiso vo kuvuiva puraive, “Igei Stiven uvuiovora osa Pauto vaio toviparevora

✧ 5:38: Mt 15:13 ✧ 5:39: Ap 7:51, 9:5, 11:17 ✧ 5:40: Mt 10:17; Mk 13:9 ✧ 5:41: 1 Pi 4:13, 16; Jo 15:21 ✧ 5:42: Ga 1:16 ✧ 6:3: Jo 21:23; Ap 1:15 ✧ 6:6: 1 Ti 4:14, 5:22; 2 Ti 1:6 ✧ 6:7: Ap 12:24, 19:20 ✧ 6:10: Lu 21:15 ✧ 6:11: Mt 26:59-60

ora Moses tapo vaiterei vara piepaoro.”<sup>12</sup> Oa iava voea oira vasi irara aveave pieiva ora voeao riro tarai irara Jiu-pa irara oea rera vateiva Kaunsel irarapa.<sup>13</sup> Uva oearovu kareke pieiva kuuvuoro oiso purapaoro, “Ari ita, ro Tugoropa Tapi toviparevo ora vao Reo Taisi tapo.<sup>14</sup> ☆ Uva rera uvuiovora osa oiso puraroera, Ro-ia Jisas Nasaret iava ira vao Tugoropa Kepa Tempel verarevere, ora vo pitupituo tapo tavariorevere oa vatereva Moses vigeipa.”<sup>15</sup> Uva voea rutu Kaunsel Kepa-ia uvurupaoro rerava tuupavira vurapaiva. Uva oisi ragavira Stiven iava puaua vurapaiva sisikorevira oiso osa ensel puaro.

## 7

### *Stiven Voea Vo Reoroaro Pukooro Voeapa Siposiporeva*

<sup>1</sup> Uva ro Rovopato Pristo oiso rera akereva, “E auero rutu varao torevokopai?”

<sup>2</sup> ☆ Uva Stiven oiso puraroepa, “Araoko irara oaa, ora aite irara oaa. Ro reitoo rutu Pauto ira sisikorevira karekeroepa Ebrahim iare vigei aaotoaaro, vo osa Mesopotemia-ia toureva. Uva vo tou isivaaro iava aue iare avaroepa Haran-ia.<sup>3</sup> ☆ Uva oiso puraroepa Pauto, Rasiara oara kavuoro avau ora sara irara oara vo rasio iare oa-ia vii kareke pieavere.<sup>4</sup> Oire va iava Kaldia taere kavuoro avaroepa Haran-ia toupasa, vo uvare aitetoaaro kopiioepa. Oa iava visii iare urioepa vo taereo-ia oa-ia toupatavo, uvare Pauto rera urio piereva voare.<sup>5</sup> Viapau oiso rerapa rasia vai vatereva Pauto auere ra oavi-ia tasipareve. Viapau rutu. Ari ita, voari tuariri uva Reo Ovoi-ia rera tavireva Pauto oiso, Viipa taru vo rasio rutu vateaverea vii ora vii aao iraraa vaiaro. Eisi oiso puraroepa vo osa Ebrahim viapau oviitoo vaiaro toureva.<sup>6</sup> Uva Pauto oiso puraroepa, Ro-ia ira aao iraraaro aapaapavira toupave tauai rutu akukuvira kovopaoro. Ora aue tapo vuria ouiverea rara tauaipa irara aue-ia vo resura vovoto (400) ivaro.<sup>7</sup> Voeao oea oisoa kovopa irara oaive-ia pitupaive ragai voeoro, oea vo vuriaro voriaro vateaverea taru voeapa, ora voeao kovopa irara oea voava kosia viro ragaipa lotupasa vuurapa vaisi purapaoro vo-ia.<sup>8</sup> ☆ Oire uva va iava voeapa reo ovoi purareva Pauto. Oa iava vao puraiva rakari verapa pitupituo vo ora voea iava. Oire voava Ebrahim Aisak kavaureva. Oa iava vo peva vatara (8) vokiro putevoiva, rera kuroreva rera rakari veraoro. Oire va iava Aisak Jekop kavaureva. Uva rera ro Jekop katai tau erao (12) arao aitearo voeao vigei aite iraraaro.

<sup>9</sup> “Voeao katai tau katai (11) arao ora voea iava araokoto oaive-ia voriaepa Josep rera riiriipaoro voeapa oea avapaaepa Isip iare. Ari ita, Pauto oisoa rera tapo toupareve.<sup>10</sup> Rera vuria iava orirureva rera virivarioro. Ora aue tapo osa riroa tarai vatereva rerapa. Uva vearooa rutu-a ira oiso ragavira karekeroepa aue Pero osireiario-ia ro king oaive Isip-pa irara. Ira tore piereva Pero, oiso ra rerapa eraoparo Isip-pa irara tokipaoro ora orekerovu rutu Pero vo kepaoro sovara-ia touara tapo.

<sup>11</sup> “Oire uva ovokivu-ia ogoepa vuuta urioepa vore Isip taere-ia ora vo tapo Kenan taere-ia. Riroa rutua tavaka oa pou piropa vo voki-ia eva. Oa iava vigei aite iraraaro aio kasikasiepa rutu rera-ia eera ogoeto.<sup>12</sup> Oire Jekop aioara iava uvurevoiva Isip-ia, vigei aite irara oaro arureva voea ava pieoro voare Isip-ia.<sup>13</sup> ☆ Uva eraopa vore-ia ita Josep voeapa ora karekeroepa araoko irara oaro, ro ira oisoa Isip vata tokipareve.<sup>14</sup> Oa iava

☆ 6:14: Mt 26:61, 15:1 ☆ 7:2: Jen 11:31 ☆ 7:3: Jen 12:1 ☆ 7:8: Jen 17:9-11 ☆ 7:13: Jen 45:1-4

Josep aiteto oureva voare evoa Isip-ia. Uva voea rutu takuvuaro uvuiaro-a voeao-ia erao vatara tau vo vavae (75) rutu. <sup>15</sup> Oire voava vararoepa Isip iare Jekop voea tapo vigei aite iraraaro. Oa iava voa kopiiaepa. <sup>16</sup> Oire uva oisoa voa kopiipaave, oa iava vova oisoa voea kaepaive voea tovapasa Sekem-ia aveke rikui-ia oa vorireva Ebrahim Hemo ruvara-ia Sekem-pato.

<sup>17</sup> “Uva va iava Reo Ovoi vo vuutaaro tutuu pieva vao oare Ebrahim tavireva Pauto. Osa iava ora kavakavauaepa Isrel-pa irara Isip-ia. <sup>18</sup> Oire uva iravu Isip-pato king tore pieiva ira viapau oisoa Josep-ia taraiparo. <sup>19</sup> Vuri pitupitu-ia vigei aite iraraaro ratareva vatauvira oiso pieoro vo kakaero sikeo kakaero, oisore ra aite irara vo kakaero kavu ragapaive. Oa iava vo kakaero oisoa kopiipaave. <sup>20</sup> Uva vo vokia-a vao oa-ia Moses kavauroepa vearo keketo rutu oirato vo Pauto osireiario-ia. Uva voava vo peva putevoiva kekira, rera aio vatesiva aitetoarei, vo osa veguruvira toureva. <sup>21</sup> Oire uva oisi-a oiso osa Moses kavu ragaivoiva aakova, Pero oviivaaro rera oueva rera aio vatesa oiso rutu osa oira ovii kakaero, osa rera pieva. <sup>22</sup> Uva voava Moses riro tarai oureva Isip-pa irara vo sipoiporoaro-ia. Ora riroroepa tapo aue-ia reoara ora kovoara.

<sup>23</sup> “Oire voava vo resura tau (40) putevoiva ivara, oiso rugooroepa ra araoko irara oaro kekereve Isrel-pa irara. <sup>24</sup> Oire uva iravu-ia voea iava vuria karekepa. Oa iava Moses va kekereva rera-ia. Osa iava va tuureva Moses iravu-ia Isip-pato rera tapaoro. Oa iava kopiioepa. <sup>25</sup> Uva va iava oiso purarepa Moses ora rera ragare, Easi pasi ro araoko oiso purarovere ragaive vo osa riroa iava tavaka voea virivaria Pauto vo goruaro iavirava, Veairota rutu Moses. Riro virivari purato. Ira ragai tauvarevo.

<sup>26</sup> “Uva utupa visivi aitereivu-ia pouro viropa ovusa ora upopasiepa. Osa iava vaierei sikapaoro vaierei goruvira tavireva oiso, Ae ora eakasi. Eakere ora upopasiei? Vei araorei raga ita vao. Vorevira ora agiagisi. <sup>27</sup> Uva ro ira iravuva ora upoparoepa ira Moses peoro rerare oiso puraroepa, Auoro, irouto vii rei pierevora, oa iava vegei sikapari? <sup>28</sup> E ragai upopaari oiso osa Isip-pato pierivorao aruvea, raa? <sup>29</sup> Oire uva va iava torireva Midian-ia tousa Moses. Oa iava vo ovitooarei kavaureva.

<sup>30</sup> ✧ “Oa iava vo resura tau (40) ivaro puteva rerare. Uva purapurapato ensel rera iare pouro viropa raaka tapi vo Sinai Pukui-ia. Uva eto kasi-ia enselto karekeroepa rera iare Moses. <sup>31</sup> Uva rera-a ro kekerevoiva Moses, voavire tutuu pieveva rutu, oiso ra va eveireve. Uva Pauto vo reoro rera iare uroepa viaevira. <sup>32</sup> Oa rerare oiso puraepa, Ragai-a Pauto vii aitearo ora Turaroaro Ebrahim, ora Aisak, ora Jekop. Uva Moses uriroroepa. Uva viapau vorerivira voa vurareva. <sup>33</sup> Uva Turaro Pauto rerare oiso puraroepa, Tasitauo iava eva verari tasipa, uvare Tugoropa Tapi-a vo-ia uva toupavaovi uva tasipari va-ia. <sup>34</sup> Tavaka keke iraoavora oirara oaa-ia vo Isip. Oa iava voea gauaro uvuoro vararae voea orirusa voea virivarioro. Oire vatatopou ra vii sipo piea vorevira Isip iare.

<sup>35</sup> “Ro-ia Moses irava kaureosiepa oiso puraoro, Irouto vii rei pierevora oa iava vegei sikapari vegei taapaoro? Uva rera-a ro Moses sipo piereva Pauto turarosa, ora voea tapo voeao virivarisa vao-ia tauva enselto vaoro oava pouro viropa garepa vegovi-ia. <sup>36</sup> Uva varao tapo ravoto kovoro purareva Moses Isip-ia ora avakava-ia tapo aue Ret Si. Ira rera voeaaro oirara tuvetuveoro raaka tapi iare voeava kosiro viropa Isip iava. Oa iava vo resura tau ivaro voa voeare puteva, osa voa voea oisoa tokipareve. <sup>37</sup> Ira-a ro Moses ira Isrel-pa irara tavireva oiso, Rera ro Pauto oavisii ira visii

iava oirara profetatoa vai kareke piereverea oiso irai osa ragai. Ira taru visiipa Pauto vo reoroaro vatepareverea. <sup>38</sup> Ira raga-a ro Moses ira Isrel-pa irara gurureva raaka tapi voa voea tapo toupasa. Uva voa ro purapurapato ensel Moses gisipoaro iava reoroepa voeare. Oa iava voea vatereva Pauto vo reoro goru reo oa viapau opesia vai.

<sup>39</sup> “Ari ita, voea vigei aite iraraaro viapau oisoa Moses vo reoroaro sirova utupaave. Uvare oisoa oiso va purapaive, Rerape. Viapau uvuipavie ra rera uvupape, uvare orekerovu rutu vigei varaaro toupaveira Isip-ia. <sup>40</sup> Oa iava oiso puraaepa Eron-re, Tokarasiara vai purari ora vii vavaearo-ia. Ra oeai vigei tuvetupepaive, uvare viapau taraipaiei Moses-ia oiso, Apeisi pierevora ira vore vigei tuvetuverevora raaka tapi Isip iava. Ira va-ia piroeroa pasi, eke. Apeisia avu pierevora? <sup>41</sup> Uva vo voki-ro-ia oavu bulmakau kakae puraiva vapa tauopasa. Uva oisi-a oiso osa iava rorupaiva rutu vo kovo-ia vao oa puraiva ora voea vavaearo iava. <sup>42</sup> ✧ Uva va iava Pauto voea arova isivaroeapa voeapa vaseoro. Oa iava aaviikoarapa oisoa lotupaave varao oara vuvuiua-ia toupaveira. Oiso rutu osa vo rigato oisoa toupave profet irara vaaro vukua-ia vao oa-ia oiso puraroepa, ‘E ragai ragapa tauopataera vo-ia raaka tapi, ovusa vo resura tau (40) ivaro visiire putevora visii vao Isrel-pa irara?’

<sup>43</sup> Viapau rutu. Asi visii vo kepa Moloko vo kepaaro lotupa kepa varo kepa kaepatavora aue tapo aaviiko rera ro oiraaro Refan pauto. Ora varao tapo oisoa kaepata oara puratavora varapa lotupasa tokarasiara. Oire uva visii topa piepaavoi rara vova eisire Babilon tauai rutu.’

<sup>44</sup> “Uva vo-ia raaka tapi uva Lotupa Kepa varo kepa touva, okepa-ia Pauto oisoa ora rera vo reoroaro vatepareve. Vo kepa-ia vao oava oisoa toupave vigei aite iraraaro. Uva vo kepa-ia vao Pauto siposiporeva Moses taviro oiso, Vo kepa purari oiso osa okepavu kekeriva. <sup>45</sup> Voeao vigei aite iraraaro oea sirova oevu ita utuaepa vo kepa ragava vao-ia varo kepa toupasa. Uva osararovu rutu oisoa putepaive rara voea upopaive vo kepa ragava tupaoro vao-ia, vo vuutao-ia oa-ia oisoa Josua voeapa iraparo vo viurupasa. Oa iava voeao sara irara kosi piereva Pauto voea veraoro vigei aite iraraarova. Uva oisi-a eisi osa oisoa toupave vava vao varo kepa Lotupa Kepa vo osa Devit toupave. <sup>46</sup> Uva rera ro Devit ira vo tou-ia vao tupaoro vearo vovou oureva Pautoa-ia. Oa iava Pauto arereva oiso ra vigei reraaro Jekop reraaropa Pauto tavukia vai purareve. <sup>47</sup> Oire eva-a oa iava Solomon rerapa kepa paureva.

<sup>48</sup> “Ari ita, Pauto ro oiraopatoa rutu viapau oiso vo kepao raga-ia toupaveira oa purapaiveira vavaea-ia. Oa iava oiso puraaepa profet irara,

<sup>49</sup> ‘Ragai-a Pauto ragoa vo turaroparai vuvuiua-ia ora evoa rasitoa-ia. Ari evoa rasitoa-ia tasipaavoi voa paupaoro. Uva apeisi ragavira uvuipatai ra ragaipa kepa vai pautā? Uva aa vo tavukio-a vao oa uvuipai vao oa-ia toupaveira turaropaoro?’

<sup>50</sup> Varao-ia oiso-ia vuvuiua ora rasito oara rutu ragai raga puraava ora ragai vavaearo iava. Uva apeisi-a? Oiraopavira-a oiso osa purarai?’

<sup>51</sup> “Visii vao-ia visiigoa viapau oiso uvupataveira. Visiigoa oiso rutu toupataveira osa voeao ratau tou irara oea-ia viapau oiso oirao pie vovouro vai toupaveira vo sopaura oaive sovara-ia. Uva visii-a vao visiigoa Tugoropato Urauratoare korukorupataveira vo pitupituro purapaoro osa vara oisoa purapaive visii aite iraraaro tuariri.” <sup>52</sup> Uva va-a vao oa iava oiso voea akereva Stiven, “Irouto-a profet irara iava rera ira kavuiva visii aao

iraraaro? Viapau oiso irarai ira kavuro viropa vaopa vuri vovou oa puraiva rera-ia. Ora voea voeao upoiva oea Torevoko Vovouto vo raivaaro aviavi pieiva. Ro Tugoropato ira urioroepa, ira outavora kuuvu pitupitu-ia rera kopii piesa. <sup>53</sup> Visii vao visiigoa Pauto vo reoaro outavora pisavira enselpa irara ruvara-ia. Uva viapau oiso vo reo sirova utupataera.” Eisi osa rutu voeare puraroepa Stiven.

### *Stiven Vurokoiva Aue-ia Aveke*

<sup>54</sup> Vo reoro rutu voea vovouaro togava. Oa iava rirovira voea iava gisipoara keikei piropa rirovira kasipuoro rerare. <sup>55</sup> Ari ita, Stiven aue-ia Tugoropato Uraurato vukuroepa. Oa iava tuupavira vuvuiua taraareva. Uva voa Pauto vo sisikorearo kekereva ora Jisas tapo, ovusa Pauto oirapapa varataaro-ia torepapoepa. <sup>56</sup> ✧ Uva voava Stiven vao-ia oiso puraroepa, “Oiraopavira rutu vuvuiua kekeavoi oa karuvira toupavoi. Uva rera tapo kekea Ropotoaaro Oiraopato ira oirapapa varata-ia torepapoi Pauto varaaro-ia.”

<sup>57</sup> Oa iava kokiara tupaiva vo gaupaoro kasipupaoro rerare. Osa iava rerare vusi ovoiiiva. <sup>58</sup> ✧ Oa iava oearovu voea iava kuvupara oaive ririvuro vara guruiva ro ruvara-ia rera vaisiaro, Sol. Uva voea-a evoea oea rovovira rera reoroaro rovoiva aue-ia kort oea rera rovoiva rera vurukooro. <sup>59</sup> ✧ Oire vo osa rera vurokopaiva aue-ia aveke. Oa iava variriroepa oiso puraoro Jisas-re, “Turaro. Ragai urauraaro kae pieri.” <sup>60</sup> Uva voava takuro viropa oiso goruvira rutu keerasa, “Turaro. Opeita vao vuria voeapa reesiri, oiso ra utupaua va tuuri voeapa.” Oa-a vao oa isivaaro iava kopii ovoiroepa vovouisi vaseoro.

## 8

1 ✧ Uva Sol tapo gasirevoiva, Stiven upoiva.

### *Sol Oisoa Lotu Purapa Irara Vuri Piepareve*

Uva vo voki-a vao oa-ia vao riroa rutu tavaka karekepa vo lotua-ia Jerusalem-ia. Oa iava voea rutu voava sikaa viropa ora rigaoro vorarore oiso, oearovu Judia iare, ari oearovu Sameria iare avaeapa, ovusa voea raga aposel irara vao kavua viropa Jerusalem-ia. <sup>2</sup> Uva voa rera tovaiva Stiven voea voeao riro oirao pie vovou irara. Uva voa tovaoro gau eraro-ia gaupaiva rerapa. <sup>3</sup> ✧ Ari ro Sol ira oisoa lotupa irara rutu vuri piepareve, ira kepaara rutu-ia koatapaoro oisoa oirara ora riakora oupareve voea tovopasa tuukepa kepa-ia.

### *Vearo Siposipo Vao Oa Viriva Sameria-ia*

<sup>4</sup> Oire uva lotu purapa irara torioro avaaepa vorarore oiso-ia, Judia-ia ora Sameria-ia. Uva voa siposipooro oisoa vokapaive aue iava Vearo Siposipo voraro ruture. <sup>5</sup> Uva Filip vararoepa riro urui iare vao Sameria-ia voea tavitavisa Kraisi iava ro Ropoto. <sup>6</sup> Vo ovusa voea rutu vaea vovou raga-ia tupaoro rera siposipooro sirova utupaaepa. Vo osa voeapa siposipopareva vearo reo vatepaoro voeapa. Ora oaravu tapo oara kekeiva rera-ia oira porete piepa kovoro. <sup>7</sup> Riro irara tugura oea kosi pieriva ro-ia Filip, ovusa riro guruko purapaiva gaupaoro oirara iava kosi virooro. Oearovu rutu oearoa-ia oisoa rikerikepa kopiuro toupave, ora voeao oea iava kokotoara oisoa kopiipape oearoa rutu vearo pieriva. <sup>8</sup> Oa iava rirovira rutu roruiva vo uruia.

9 ✧ Ovusa iravu ro-ia rera vaisiaro, Saimon ira kekea kovoro oisoa

✧ 7:56: Mt 3:16; Dan 7:13 ✧ 7:58: Lu 4:29; Lev 24:16 ✧ 7:59: Sam 31:5 ✧ 8:1: Ap 7:58

✧ 8:3: 1 Ko 15:9; Ga 1:13; Fl 3:6; 1 Ti 1:13 ✧ 8:9: Ap 13:6, 5:36

purapareve pisavira rutu oirara keakeapaoro voeao Sameria-ia tou irara. Uva oisoa ora rera raga ora rei vaisi pieparo vo uruia. <sup>10</sup> Uva voea rutu oisoa oira vasi irara rera sirova utupaave ora voearo oiraravi raga. Oa iava voeao oiso puraaepa, “Avoeao ro-ia gorutoa rutu Pauto reraaro Saimon.” <sup>11</sup> Uva voea rutu oisoa rera sirova utupaave, rara rirovira rutu voea keakeapareve. <sup>12</sup> Ari ita, vo osa Filip vo siposipoaro oirao pieiva vao Vearo Siposipo aue iava Pauto vo Saraaro ora Jisas vo vaisiario goruaro, uva voea rutu oirara ora riakora baptaisa ouiva. <sup>13</sup> Uva va iava rera tapo Saimon oiraoroepa rarioro. Oa iava baptaisa oueva. Oire uva va isivaaro iava oisoa Filip tapo toupaveve vokiara rutu-ia Saimon. Oa iava vo tou-ia vara-ia tarairoepa ravoto kovoro ora varao tapo ravaa reesiro. Uva rirovira rutu rugorugoroepa varare varao-ia ravoto kovoro.

<sup>14</sup> Oire vo osa aposel irara vao iava uvuiva vo uvare Sameria-pa irara Pauto vo rearo ouiva. Oire va iava aitereivu sipoiva Pita vaio ora Jon Sameria iare. <sup>15</sup> Uva voa pousi viropa. Oa iava voeapa variri rovosiepa areoro Pauto ruvara-ia oiso, “Tugoropato Uraurato vara pierivere voeapa.” <sup>16</sup> ✨ Aue iava uvare viapau voea sopaaro-ia toupaveva Tugoropato Uraurato. Ari ita, Jisas vaisiario sovara-ia baptaisa ou ragaiva. <sup>17</sup> Oire uva va iava vavaeara oesi tovosiva voea-ia. Oa iava voea iare Tugoropato Uraurato vararoepa.

<sup>18</sup> Uva ro-ia Saimon ira vaiterei siituereva aposeltoarei osa vavaeara oesi-ia Tugoropato Uraurato vara piepasiva voea iare. Oa iava oiso puraroepa vaitereire, <sup>19</sup> “Ari oiso ruipaparai ra ragai tapo vo goru vao-ia voria vei ruvara-ia, oiso ra va-ia oearoi iare ragai tapo rera Tugoropato Uraurato vara piepa oearo-ia vavae oaa tovopaoro.”

<sup>20</sup> ✨ Oa iava Pita rerere oiso puraroepa, “Avoeao, apeisi ragavira rugorugoropau? E uvuipauei ra vatevatearo Pauto vorevira voriri? Vii ora monia oara oa tapo opesiuvare taru kopiioro. <sup>21</sup> Auoro. Viapau oiso uvuipauei, uvare sopaua oara tauaivira toupaveira Pautoa-pa. <sup>22</sup> Vii vao-ia ora poreu vuri vovou oara iava varirioro. Osa iava Pauto uvuipa ra vii vaaro vuri vovou verareve. <sup>23</sup> Oiraopavira rutu vii iava sopaua sisiropaa oua vukuepa aue iava riroara rutu vuri vovouro vii varaaro. Uva vii-ia ora goruepa vii varaaro vuri vovouro vii-ia pituoro.”

<sup>24</sup> Oa iava Saimon oiso puraroepa vaitereire Pita vaio ora Jon, “Turaro iare varirisi ragaipe tauva areoro. Ra oisi iava viapau vao karekepe ragai-ia oiso osa parasiei ragaire.”

<sup>25</sup> Oire vo kovoro opesiario isivaaro iava karesiepa Jerusalem iare, uvare voeapa aviavi pievira tavitavisiepa Pauto vo rearo iava. Uva vo osa karesiepa oa iava vo raivao-ia ouruiovu-ia pousi viropa voeapa ita siposiposa vo uruiro-ia va raga iava Pauto vaaro Vearo Siposipo voa raga Sameria taere sovara-ia.

### *Filip Vaio Iava Ora Ro Itiopia-pato*

<sup>26</sup> Oire uva Turaro reraaro ensel Filip-re oiso puraroepa, “Vatatopou, ra varau vo raivao-ia vova Jerusalem iava vore Gasa-ia vo raivao-ia oa raaka tapi-ia toupaveira.” <sup>27</sup> ✨ Uva va iava vatatoporoepa varasa, ovusa vo voki-a eva vao-ia iravu Itiopia iava, rera Kwin Kandesi reraaro reito ira oisoa oira vo monia tokipareve, ira urioroepa Jerusalem iare voa lotu purasa. <sup>28</sup> Uva vo voki raga-ia kareroepa voava aue-ia karis rakorako. Uva va-ia paupaoro profet Aisaia vo rigatoaro vieipareva. <sup>29</sup> Uva va iava Tugoropato



Uraurato oiso puraroepa Filip-re, “Tutuu pieri karis rakorako iare.” <sup>30</sup> Oire uva voa pouro viropa va iare ikauoro. Oa iava Filip rera uvureva vo osa profet Aisaia vo rigatoaro vieipareva. Osa iava oiso rera akereva, “E va-ia taraiapu eia oa iava va vieipaari?”

<sup>31</sup> Oa iava oiso puraroepa, “Viapau. Uvare irai ragaipa va aviavi piepareveira?” Oa iava Filip-re oiso puraroepa, “Vore kaeu viro ragai tapo pausa.”

<sup>32</sup> ✧ Oire vo vuutaro-a varao-ia oara oiso toupai vo vuku iava vao oa vieipareva,

‘Rera ava pieiva oiso osa sipsip kare oisoa kopii piepaive. Ra viapau vo kakae eva sipsip kakae oivepe vo osa oirato va oruaro siipareve. Eisi osa ro oirato ira viapau oreovu avu vai purareva osa rera-ia vuria puraiva vao.

<sup>33</sup> Uva vo osa rera arii pieiva rera-ia vakuvakupaoro, uva viapau oiso irai voea iava oiso puraroepa, Rerape, uvare torevokoto-a eera. Uva iroutoa vai uvuiparoi ra varao vuri vovouro oaive vieireve voea iava vo vokia iavapa irara. Evara vuri vovouro oara rera tootoaro ouiva rera kopii piesa vo rasio-ia.’

<sup>34</sup> Uva va iava ro-ia reito Itiopia-pato oiso puraroepa Filip-re, “Irouto-a ro ira iava siposipopare ro-ia profetato. Ora rera raga iava-a, eke iravu raga?”

<sup>35</sup> Oire uva Filip Vearo Siposipo rovoreva rera soporesa aue iava Jisas vo rigato raga iava Aisaia vo rigatoaro. <sup>36-37</sup> ✧ Uva vaierei avasiepa vo raivao-ia. Oa iava vo poui viropa vao-ia uuko rovu. Uva ro Itiopia-pato oiso akereva, “E oavu avu vai ei ragai-ia oa iava viapau uvuiparai ra baptaisua ova vao-ia uuko rovu?”

<sup>38</sup> Oire vo reo uvuoro karis rakorako ruu pieriva va goto pieoro. Uva va isivaaro iava varasiepa aue iare uuko rovu vaierei vaierei Filip vaio ora Itiopia-pato. Oa iava voa Filip rera baptaisreva Itiopia-pato. <sup>39</sup> ✧ Uva voava kaesi viropa vorevira. Oa iava sita pievira Turaro Pauto Urauratoaaro Filip kaereva vorarore. Osa Itiopia-pato viapau rera-ia tarairoepa vo osa voraro rerava avaroepa. Uva avaparoepa rera raga Itiopia-pato raivaaro rorupaoro rutu. <sup>40</sup> Uva Filip Asdot-ia pouro viropa. Uva voa vokapaoro vo uruio-ia siposipopareva. Ari va isivaaro iava eva avaroepa Sisaria iare.

## 9

### *Pol Porereva Vo Damaskas Raiva*

<sup>1</sup> Ro-ia Sol touvira rutu oisoa gasipareve Turaro voeaaro disaipel irara upopaaro. Uva oisi-a eisi osa iava avaroepa Rovopatoa iare Pristo <sup>2</sup> rera areva varaore rigatoara, oisore ra raiva oaro rerapa karu piro poure Jiu varaaro iare Reo Taisi Uvupa Keparo Sinagog, verapo oara oisoa toupaive Damaskas-ia. Oiso ra voa oearoi kekereve voearo oearoa Turaro vo raivaaro sirova utupaave Airepa Tootoo oupa raiva. Oire voea oureve voea tuukeoro tuukepa kepa iare Jerusalem-ia. <sup>3</sup> ✧ Uva vo osa avaparoepa Sol raiva-ia vao Damaskas, uva tutuu pieriva voa ovusa aviavia varaepa vuvuiua iava rera ruusa. <sup>4</sup> Oa iava koveroepa vo rasitoo-ia vo reo uvuoro oreoa oiso puraepa rerare, “Sol, Sol, apeisi iava ragai vuri piepariveira vokiara rutu-ia?” <sup>5</sup> Oa iava oiso akereva, “Turaro, irouto-a vii?” Uva Turaro oiso puraroepa, “Ragai-a Jisas ragoa upopariveira vokiara rutu-ia. <sup>6</sup> Uva vii tavipaa oiso, Toreu ra avau vo uruio iare oa-ia iravu vii tavirevere ragai iava vaore oa-ia uvui iraopauvere oiso ra va purari.”

<sup>7</sup> Vo osa voveao oea rera tapo avapaaepa oea ruruvutu ragaaepa voka tuuke pieoro, uvare oiso auepaaepa, Apeisi vai ragavira reoreopave. Uvare viapau rera kekepaiva ro ira reoreoparoepa auere Sol. <sup>8</sup> Oire uva voava Sol toreroepa rasiua arova. Oa iava aavira vurareva. Uva viapau oiso irai kekereva, uvare osireitoarei rerare aausiepa. Oa iava rera kapokaporopaoro rera tuvetuvepaoro poua viropa aue-ia Damaskas-ia. <sup>9</sup> Oa iava vo peva-ia aue voki peva voosivira raga toureva, ora aio asavira, ora ukaio asavira tapo.

<sup>10</sup> Oisi-a eisi osa iravu disaipelto toupaveva Damaskas-ia rera vaisiario Ananiais. Ira kuu piereva Turaro areo uusi-ia oiso puraoro, “Ananiais.” Oa iava Ananiais oiso puraroepa, “Ragai-a vao-ia.” <sup>11</sup> Uva Turaro rerare oiso puraroepa, “*Toreu ra avau vao-ia raiva va vaisiario, Torevoko Raiva. Uva evoa akerivere auere Sol ro vova Tasas, ira epao Judas vo kepaaro-ia uva variripa tauvare areparoi.*” <sup>12</sup> Ira areo uusi-ia vao kekeravorao, ovusa vii Ananiais rera osireiario-ia vavae tovoparivorao rera vura piesa vorevira.”

<sup>13</sup> Oa iava Ananiais rera vo reoro pukoooro oiso puraroepa, “Turaro, ro iava uvuavora riro irara rutu iava, vo osa oaravu kaureo vovouro puraparevora oearovu-ia vii voveaaro-ia oirao pie vovou irara vo Jerusalem-ia. <sup>14</sup> Ira uvuipa ra igei rutu tapo tuukereve, igoa vii vaisiario sovarama kovopaioveira. Uvare vo rigato kaepareveira raiva purapa rigato oa ourevora Rovopato Pristo ruvara-ia.”

<sup>15</sup> ✪ Uva va iava Turaro rerare oiso puraroepa, “*Avau, uvare ro reesiavora ora ragaipa ira ratau tou irara, ora oearovu Isrel-pa irara, ora king irara tapo, ora turaro irara oearoa rutu taru siposiporevere ragai iava.*” <sup>16</sup> Ira kareke pieavere siitoka-ia, uvare ragai iava siposiporevere.”

<sup>17</sup> Oire uva avaroepa Ananiais vo kepaio-ia koatasa oa-ia Pol toupaveva. Oa iava oiso puraroepa ora rera vavaeoro tovooro rera-ia, “Araokotoa oaa, Sol. Turaro Jisas ira vii iare karekeroeroa vo raivaaro Damaskas ruvara-ia vo osa uriopauerao. Ira ragai siporevoi vore vii vorevira vura piesa vii porete pieoro, ora auere tapo ra vukuuvare aue-ia Tugoropato Uraurato.”

<sup>18</sup> Uva vo voki raga-a vao oa-ia verutara rera osireiario iava kovekoveepa. Oa iava varare rorooro vearovira vurareva. Oa-a eva oa iava toreroepa. Osa iava rera baptaisiva. <sup>19</sup> Vo raverave eva isivaaro iava gorua oureva vorevira, uvare aloara aioreva.

### *Sol Siposiporeva Damaskas-ia*

Oire voava Sol touvira raga toupaveva Damaskas-ia disaipel irara ruvara-ia. <sup>20</sup> Uva vo vokia-a vao oa-ia siposipo rovroeroepa Jiu varaaro-ia Reo Taisi Uvupa Keparo Sinagog keparo oiso purapaoro, “Ro-ia Jisas Pauto Oviitoaaro.” <sup>21</sup> Uva oisi-a oiso osa iava rirovira rugorugooaepa, vo uvare va-ia eva rera uvuiva. Uva oiso puraepa, “Avoeao! E rera-a ro-ia ira Jisas kovopa iraraaro upopareveira Jerusalem-ia? Uva viapau oisi piesa urioroi ita vore osa oisoa vovea tuukepaoro vovea sipopareve aue iare Rovopato Pristo?”

<sup>22</sup> Vo osa rugorugooa oaro goruaro riroepa rerare Sol. Oa iava vovea Jiu-pa irara voveao Damaskas-ia tou irara oea vavagisi piereva, uvare Jisas oiraopavira poerareva vovepa oiso purapaoro, “Krais-a Ropoto ira reesireva Pauto oiso rutu, Rerapa Kovopato.”

### *Sol Jiu-pa Irara Asavira Torireva Vokiario*

✪ 9:15: Ap 13:2; Ef 3:7-8; Ga 2:7-8

<sup>23</sup> Ovokirovu isivaaro iava voea Jiu-pa irara ora guruaepa, oisore ra rerare raiva vaire taraaive rera kopii piesa Sol. <sup>24</sup> ✧ Vo ovusa voea vovouaro-ia tarai ovoiroepa rera Sol. Uva kasura rataoroaro-ia oisosa uutupaave vokiario rutu-ia avi vokiro-ia ora vokiario rera uposa. <sup>25</sup> Oa iava orupavu-ia vokiario aue disaipel irara rirova-ia pekuri rera vara pieiva rera pute pieoro kasura kukuearo iava. Oa iava voava torireva.

### *Sol Jerusalem-ia Toureva*

<sup>26</sup> ✧ Oire vo osa Jerusalem-ia pouro viropa uva oiso aueparoepa, ra oearovu tapo disaipel irara ora takuvuro. Oa iava evoea rera roruorupaiva oiso purapaoro, “Easi ro vigei keakeapare. Viapau oiso iravu-a vigei iava disaipelto.” <sup>27</sup> Oa iava aue Banabas rera oureva rerava avasa aposel irara iare. Oa iava oiso voea tavireva rera iava, “Ari ita, oiraopavira Turaro kekerevora. Uva Turaro rerava ora reoroera. Ora vo osa Damaskas-ia toupaooro voea goruvira siposiporevora vo Jisas vaisiario-ia.” <sup>28</sup> Oire va isivaaro iava aue Sol voea tapo ora takuvuroepa voea tapo toupasa vokiaria rutu-ia Jerusalem-ia. Uva voa uriri asavira siposipopareva aue iava Jisas Turaro vaisiario. <sup>29</sup> ✧ Uva va iava voa ora reoparoepa oearovu tapo Jiu-pa irara voeao oearoa oisosa Grik-pa reo-ia reopaave. Vo ovusa voea rirovira rutu ruipapaepa oiso ra raivaa vai rerare kekeive oa-ia rera kopii piesa. <sup>30</sup> Vo ovusa va-ia taraioro oearu oirao pie vovou irara rera vara pieiva vore Sisaria. Oa iava voava rera sipoiva aue iare Tadas-ia.

<sup>31</sup> Uva voeao lotupa irara oisosa vearovira rutu gavaurevira toupave vo Judia-ia, ora Galili-ia, ora Sameria-ia. Oire va iava Turaropa avivikepaoro lotupa kovo-ia goruaepa. Oa iava ora rigaaepa riropaoro aue-ia tauvaaro vao Tugoropato Uraurato vaoro.

### *Pita Inias Porete Piereva Vo Lida Urui-ia*

<sup>32</sup> Uva ovokivu-ia Pita vararoepa vokapaoro voeao kekesa oea oisosa Jisas oirao piepaive aue-ia Lida urui-ia. <sup>33</sup> Vo osa voa pouro viropa uva iravu kekereva rera vaisiario, Inias. Irare puteva vo peva vatara ivaro (8) rutu osa keravira raga toupave urua ivara-ia. <sup>34</sup> ✧ Oa iava Pita rerare oiso puraroepa, “Inias, Jisas Kraisi vii porete piepare vorevira, ra toreu. Ra urua oara torevokori.” Oa iava toreroepa Inias. <sup>35</sup> Vo osa vovearo rutu vo uruiro iava voa toupave oisosa, Lida vata ora Saron vata oearoa rutu-a voeao oea va rera-ia ro-ia kekeoro ora voea iava sopaura oaive rutu poreiva. Oa iava rera sirova oisosa utupaave Turaro.

### *Dokas Vorevira Tootoopa*

<sup>36</sup> Oire iriavu-a o riakova disaipelva Jopa vata iava oira. Iria vaisiario, Tabita. Uva Grik vo reoro-ia oiso, Dokas. Riro tauva purava rutu. Iria oisosa riropa kovoro veoroara purapaave orekerovu vate ragapaoro apota irarapa. <sup>37</sup> Uva ovokivu-ia upia oira ouva, oa iava kopiiopa. Oire va iava vo kopii sisuiva oira tovoisa ivaraiapa tugi-ia kepa-ia. <sup>38</sup> Uva Pita-re aruaepa, uvare oisosa Lida urui-ia tutuu pievira toupave Jopa-ia. Eva-a oa iava voare aitereivu aruiva Pita ou piesa. Oa iava oiso rera tavisiva, “Ikavira raga vegei sirova uriou, ra vorevio.” <sup>39</sup> Uva Pita tapo vovesiepa. Oa iava voa pouro viropa. Uva rera ipa pieiva vo tugi iare vao ivaraiapa tugi. Uva voa rera kareke piepaoro raroe riako gaupaiva varoara-ia oara oisosa purapaave Dokas, vo osa oisosa tootoovira toupave vairo tapo vo kovo purapaoro. <sup>40</sup> ✧ Oa iava Pita vairo rutu kosi piereva rataure. Uva

✧ 9:24: 2 Ko 11:32-33 ✧ 9:26: Ap 22:17; Ga 1:17-18 ✧ 9:29: Ap 6:1, 11:20; 2 Ko 11:26 ✧ 9:34: Ap 3:6, 16, 4:10 ✧ 9:40: Mt 9:25; Ap 7:60; Mk 5:41-42

kotupiuarei rekuoro variriroepa. Oire voava ora poreroepa vo kopiire oiso purasa, “Dokas, toreu!” Oire va isivaaro iava eva osirei kae pieoro porete ovoioipa tokoruosa Pita vurapaoro. <sup>41</sup> Uva oira vavaearo-ia pituoro oira tore piereva. Oa iava voea ruture lotupa irara keeraroepa ora vairo raroe riako. Oa iava oira kareke piereva veopa, uvare toopa vorevira. <sup>42</sup> Oire va-va vo oa-ia taraiaiva voeao Jopa-ia tou irara iava, oearovu rirovira rutu Turaro oirao pieiva. <sup>43</sup> ✧ Uva Pita voa toureva Jopa-ia riro vokiro rutu-ia iravu tapo ira oisoa bulmakau rakariro gagopareve vara purapasa. Rera vaisiario, Saimon.

## 10

### *Pita Vaio Iava Ora Konilias*

<sup>1</sup> Iravu rera vaisiario, Konilias ira oisoa toupaveve Sisaria-ia katai vovoto (100) tuvetuvepato viurupa irara. Uva voeao aue iava Itali ratau tou tapi. <sup>2</sup> Ira oisoa Pautoa-pa avivikeparo rutu vearotoa rutu lotupato ora ovii avao oaro. Riro vatevate vovouto oearovu rutupa apota irara. Ora oisoa tapo variriparo vokiara rutu-ia Pautoa-re. <sup>3</sup> ✧ Oire uva ovokivu-ia vo peva vuuta-ia (3 klok) ovaiarovi Pauto reraaro ensel kekereva, ovusa koataparoeпа rera iare oiso purapaoro areo uusi sovara-ia, “Konilias.”

<sup>4</sup> ✧ Oa iava tuupavira rerava vurapaveva uriripaoro rerapa. Uva oiso puraroepa, “Eake-a, Turaro?” Uva oiso puraroepa enselto rerare, “Vii varaaro variriara pou piropa Pautoa iare, ora vii vaaro tapo vatevatea vovou apota irarapa. Oarare rugorugoparoveira Pauto viire. <sup>5</sup> Uva oeai arupari Jopa iare eerare Saimon rera raga Pita, ra urioro vore. <sup>6</sup> ✧ Ira epao tavetevira iravu ruvara-ia Saimon, ira bulmakau kare rakariaro gagopareveira. Ira vo kepaoro avakava ruvara-ia toupaveira. Pita vii tavirevere rara oiso osa pierivere rara.” <sup>7</sup> Va isivaaro-ia purapurapato ensel rera arova voreroepa. Oa iava aitereivu oureva kovopatoarei ora iravu tapo upo purapato vearoto lotupato. Uva rera oisoa Konilias vearovira tauvapareve. <sup>8</sup> Oa iava enselto vo reoroaro iava voea tavitavireva voea aruoro Jopa iare.

### *Pita Orekerovu Kekereva Areo Uusi-ia*

<sup>9</sup> Utupa voki-ia vo urui iare tutuu pieiva evoea oira peva, ovusa Pita ivaraiapa tugi-ia varirisa kaero viropa rirotoa-ia ravireo. <sup>10</sup> ✧ Uva voa rirovira ogoeroepa aio ruipapaoro. Vo osa oeavu aioara rerapa ravaapaiva, ovusa rurapaveva. <sup>11</sup> ✧ Evo rura oa sovara-ia areo uusi oureva. Ovuiapa-ia aue vuvuiua kekereva ovusa karu piropa. Uva vo karupa-ia varapaepa aue varuere koko. Oiso osa oearovu varo kovero eoropaiveira. Eisi osa rutu vo koko kekereva osa varapaepa vore rasito. <sup>12</sup> Uva vo koko sovara-ia okarerovu sasararo touva oiso-ia, okarerovua vokapa karero, ari okarerovu riruvira ora voea raga-ia vokapaiveira rasittoa-ia, ovusa okarerovu oea papapaiveira. <sup>13</sup> Oa iava vo reo oiso rera iare urioepa, “Auoro Pita. Toreu ra vo kareo upori. Ra vo kare aiori.” <sup>14</sup> ✧ Ovusa Pita oiso puraroepa, “Viapau rutu Turaro, oiso ra vo kareo iava irai aioa. Uvare vuvuiui vo karea okareroapa tugoropapeira vo-ia Jiu-pa irara vaaro sovara-ia Reo Taisi vo karepa kavupasa.” <sup>15</sup> ✧ Oa iava vo reo oiso ragavira ita urioepa Pita iare, “Vosa vo karero-ia okarea purareva Pauto vearovira rutu, uva vii viapau uvuiapaei ra oiso purau vo karere, Vuri kare vao-ia

✧ 9:43: Ap 10:6 ✧ 10:3: Ap 9:10, 3:1, 5:19 ✧ 10:4: Ap 3:4; Re 8:4; Mt 26:13 ✧ 10:6: Ap 9:43 ✧ 10:10: Ap 22:17 ✧ 10:11: Ap 7:56; Re 19:11 ✧ 10:14: Lev 11:4, 20:25; Diu 14:3, 7 ✧ 10:15: Ro 14:14; 1 Ko 10:25

Jiu-pa irara vaaro Reo Taisi varuere karepa kavupa.”<sup>16</sup> Uva vo peva-ia aue areo uusi peva vara kekepareva. Oa iava vo peva isivaaro iava vo koko rutu vorevira kae piropa vuvuiua iare.

<sup>17</sup> Oire vosa evara vorearo isivaaro iava Pita rirovira rutu oiso rugorugooparoepa, Apeisi rutu vao porearo toupaivoi? Vo ovusa evoa oira peva Saimon vo kepaarore akepaiva vo kepao-ia toupaveva Pita. Oa iava poua viropa opevaa arureva Konilias rerare Pita vo kepa rataoaro riaaro-ia.<sup>18</sup> Oa iava vo peva eva oiso puraaepa, “E Saimon-ei vo ira vaisiario ro-ia, Pita?”

<sup>19</sup> Oire va iava Tugoropato Uraurato oiso puraroepa rerare vo osa tovira rugorugooparoepa areo uusire, “Evo peva oea viire akepaivoi.<sup>20</sup> Toreu, ra voea iare varau. Opeita vao-ia roruorupari. Viapau oiso ra vii tuukepaive, ra voea tapo avau. Ari ita, ragai raga viire vo peva aruavo.”

<sup>21</sup> Vao isivaaro iava Pita voea iare vararoepa oiso purasa, “Ragai-a vao ragoare taraapata. Eakere uriotai?”<sup>22</sup> Oa iava oiso puraaepa rera iava tavioro Konilias, “Ro-ia irapato ira katai vovotopa (100) viurupa irarapa iraparoveira. Vearo vovoutoa rutu-a, uvare Pautoa-pa avivikiparoveira Oa iava Jiu-pa irara rera vaisipaiveira oiso, Vearo vovoutoa rutu. Uva Pauto reraaro ensel ira rera tavireva oiso, “Pita-re aruu, ra urioro. Ra rera uvuri.<sup>23</sup> Uva va isivaaro iava Pita voea koata piereva kepa-ia. Oa iava rera tapo touiva voa tavetevira vokiario. Uva utupa voki-ia voea tapo avaroepa ora oevu oirao pie vovou irara Jisas-ia voava vo Jopa-ia.

### *Pita Konilias Vo Kepaaro Iare Avaroepa*

<sup>24</sup> Ovokivu-ia poua viropa vo Sisaria-ia, vo ovusa Konilias voa voeare tueparo ora rera voavaoaro, ora vate irara oaro tapo.<sup>25</sup> Oire vosa Pita Konilias vo kepaaro-ia koataroepa. Uva Konilias rerapa avivikepaoro rerare takuro viropa kotupiuare i rekuoro.<sup>26</sup> ✧ Oa iava Pita rera tore piereva oiso puraro, “Ae! Eaketo-a ragai? Easi ragai-a oiratoa raga. Viapau oiso pautoa-a ragai.”<sup>27</sup> Oisi-a eisi osa ora reopaoro koatasiepa atoaro ruture oearov oirara riro irara kekepaoro, ovusa ora gurupaepa voa.

<sup>28</sup> Oa iava oiso puraroepa voeare, “Visii rutu vao-ia taraiptai Jiu vo pitupituaroo oa oiso toupaiveira, Viapau irai uvuiparoi Jiu-pautoa vai ra osararovu raga iava iraiva uvururo tavetetoa vai, uvare viapau oiso Jiu vaaro eva. Ari ita, Pauto ragai tavirevora areo uusi-ia, oiso ra viapau uvuiparai ra vo pitupituo oirao piepaa igei vaaro Jiu, oa oisoa purapaive voeapa Reo Taisipa sopaipa irara, Visii-a vuri irara.<sup>29</sup> Oire vao oa sirova uriorai visii iare ikauvira, uvare ragaire arutaerao. Viapau oiso oavu avu vai-ia rugorugooparo uriorai visii iare. Oire uva eake vaipa ruipaoro ragaire arutaerao?”

<sup>30</sup> ✧ Oire va iava Konilias oiso puraroepa, “Ari ita, vo resura aue voki putevoiva vo vuutaore vo peva vuuta (3 klok) ovaiarovi oa-ia variriparaera, osa sita pievira urioroera oirato ragai iare. Ira varaaro sisikorevira tourevora.<sup>31</sup> Uva ragaire oiso puraroera, “Konilias, variria oara uvu-paraiveira vii varaaro Pauto. Ora vao tapo vatevatea vovou apota irarapa vii vaaro oare tapo rugoaparoi.<sup>32</sup> Uva oiso vovouparai ra Saimon Pita-re aruu Jopa-ia. Ira Saimon vo kepaaro-ia toupave tavetevira vo kepao oa avakava sirova toupaiveira, bulmakau rakariro gagopato vo kepaaro. Uva vosa rera Pita uriorovere, ra vii tavireve.<sup>33</sup> Uva vo voki raga-a eva oa-ia viire aruraerao. Ari ita, uva vearo vovoutoa rutu-a vii, osa iava ikauvira uriou ragai iare. Oire ra vigei rutu vo toupe Pauto osireiario-ia. Ra igei

taviri rara vo reoro iava oara igeipa vaterevora Turaro Pauto viipa.” Eisi osa puraroepa Konilias.

*Pita Konilias Vo Kepaaro Sovara-ia Reoreoroepa*

<sup>34</sup> ✧ Oa iava Pita siposipo rovoroepea voeapa oiso puraoro, “Oiraopavira rutu oiso ragavira taraiparaí vokio-ia, Viapau oiso rovirieivira Pauto vo vovouaro toupaveira vo osararovu rutupa. <sup>35</sup> Vosa eake sara iava irouto Pautoa-pa avivikeparo ora torevoko vovou purapareve, ira-a eera oiratoaaro Pauto. <sup>36</sup> ✧ Visii rutu vao-ia taraipatai vo reo-ia oa vatereva Pauto Isrel-pa irarapa. Oa-ia Jisas Kraís iava gavaurea taviroepa vao sovara-ia Vearo Siposipo [oirara rutu reraaro Turaro]. <sup>37</sup> Vo reoro-ia oreoroa kosi piepaiveira Judia iava oara rovoepa vova Galili taere-ia aue isivaaro iava oiso oia siposiporeva Jon vo ora rera vaaro-ia baptaisa. <sup>38</sup> Ora oiso tapo osa vo siposipo aue iava Jisas ro vova Nasaret, uvare rera iare Tugoropato Uraurato vara piereva Pauto ora riroa gorua, vo osa Jon rera baptaisreva. Jisas ira virireva vokaoro vearopara rutu purapaoro ora oirara rutu porete piepaoro voearo oearoa-ia pituva Seten vo goruaro. Oara purareva Jisas, uvare oisoa Pauto rera tapo toupaveve. <sup>39</sup> Vara rutu varao kekeiovora oara puraparevora vo Judia taere-ia ora Jerusalem-ia. Uva rera kopii pieoro rera tapaivora evao parikou-ia Jisas. <sup>40</sup> Rera raga ita ira tore pierevora Pauto aue-ia vo pevapa voki. Oa iava rera karekerevora oirarapa. <sup>41</sup> ✧ Ari ita, viapau oiso oirara rutupa. Ari igei raga igoa reeresireva Pauto tuariri igoa rera iava tavitavipaioveira. Igoa rera tapo aiopaiovora ora ukaiopaiera rera torearo isivaaro-ia, vo osa kopii tapiva voreroera. <sup>42</sup> ✧ Ira oiso igei tavirevora goruvira rutu, *Ava iraopatai oirara rutupa siposiposa oiso, Ro-ia kataitoa raga ira reesireva Pauto oirara rutupa. Ira voea rovirieiparevora voeao oea tootoovira toupai, ora voeao oea kopiiáepa tapo.* <sup>43</sup> Oire voeao-ia profet irara oea rera iava tavitaviaepa tuariri oiso, Vosa iroutoa vai Jisas oira piererve rera-ia rarioro, oa iava rera iava vuri vovouaro verareve Jisas ora rera vo goruaro-ia.”

*Ratau Tou Irara Tugoropato Uraurato Ouiva*

<sup>44</sup> ✧ Oire touvira evo reoro vatepareva Pita voeapa, osa Tugoropato Uraurato vararoepa voea iare oea rera vo siposipoaro uru piepaiva voa. <sup>45</sup> Uva voeao Jiu-pa irara oirao pie vovou irara oea tapo Pita urioroepea voare, oea rirovira rutu vao-ia tavetave iraopaiva, uvare ratau tou irarapa Tugoropato Uraurato vara piereva Pauto rera vatepaoro voeapa. <sup>46</sup> Ari ita, ro-ia Tugoropato Uraurato ira eveiiva voeao Jiu-pa irara, uvare pisa reo-ia Pautoa-ia vuurapa vaisi puraiva. Oire vao isivaaro iava Pita oiso puraroepa, <sup>47</sup> ✧ “Iroutoa vai uvuiparoi ra oiso puraro, Viapau uvuipauei ra uukoa vai-ia baptaisa vateri voeapoa oea Tugoropato Uraurato ouívooi oiso-ia osa igei igoa rera ouiovora?” <sup>48</sup> ✧ Osa iava Pita voea goruvira tavireva oiso, “Visii vao-ia baptaisa ou iraota ora reesioro, ra rera vaisiario sovara-ia touta Jisas Kraís.” Uva vo reo isivaaro iava rera akeiva oiso, “E uvuipau ra igei tapo tou rovoroi ovokiro-ia ita?”

## 11

*Pita Ora Rera Vo Kovoaro Iava Siposiporeva Vo Jerusalem Vao Oa Oisoa Purapareve*

✧ 10:34: Diu 10:17; Ro 2:11; Ef 6:9 ✧ 10:36: Ais 57:19; Ro 10:12 ✧ 10:41: Jo 14:17, 22  
 ✧ 10:42: Ro 14:9; 2 Ko 5:10 ✧ 10:44: Ap 4:31, 8:15-16, 11:15, 15:8 ✧ 10:47: Ap 8:36 ✧ 10:48: 1 Ko 1:17

<sup>1</sup> Oire uva aposel irara ora oearovu oirao pie vovou irara oea rutu vao iava uvuiva, Ratau tou irara Vearo Siposipo oaro Pauto ouivora va sirova uturo. <sup>2</sup> Uva vo osa Pita kareroepa Jerusalem iare vovevira, uva oearovu Jiu iava voeao oea oisoa rakari verapa pitupitu iava siposipopaive oea Pita roearopaoro rerava ora kaurepaaepa <sup>3</sup> ✨ oiso purapaoro, “Auoro, vii koatauerao osaravu raga-ia voeao ratau tou irara. Uva voea tapo toupapaoro aioparivora voeao oea viapau ora kuropaaveira ora rakari verapaoro.”

<sup>4</sup> Ari varao aviavi pie rovoreva Pita oiso osa vo siposipoa oiraopavira karekepa. Oare oiso puraroepa, <sup>5</sup> ✨ “Ari ita, Jopa-ia toupavora variripaoro, ovusa ragai iare urioera areo uusi-ia aio koko eorovira vuvuiua iava varaoro. Oa iava ragai iare pou pirora. <sup>6</sup> Uva tuupavira vava vuraapaoro okarerovu rutu sasaaro kekepaavora oiso-ia okarerovua vavarai kare, ari okarerovua oea riruvira ora voea-ia vokapaiveira rasitoo-ia, ari okarerovua kokio kare. <sup>7</sup> Oa iava vo reo uvuavora oa ragaire oiso puraera, Auoro, Pita. Toreu ra vo kareo upori. Ra vo kare aiori.” <sup>8</sup> Uva oiso puraraera, “Viapau rutu Turaro, oiso ra vo kareo iava irai aioa, uvare vuvuieie vo kareo-ia okareapa tugoropapeira vo-ia Jiu-pa irara vaaro sovara-ia Reo Taisi vo karepa kavupa.” <sup>9</sup> Oa iava oreovu vovevira vuvuiua iava varaera ragai iare oiso puraoro, “Vosa vo karea purareva Pauto vearovira rutu, uva viapau uvuipaei ra oiso purau vo karere, Vuri kare vao-ia Jiu-pa irara vaaro Reo Taisi sirova varuere karepa kavupa.” <sup>10</sup> Uva vo peva-ia aue areo uusi peva vara kekepaavora. Oa iava vo peva isivaaro iava vo koko rutu vovevira kae pirora vuvuiua iare. <sup>11</sup> Vo voki raga-a vao oa-ia vo pevao oira peva poua viropa kepa iare vao oa-ia toupavora. Oea urioera Sisaria iava ragai ou piesa. <sup>12</sup> Oa iava Tugoropato Uraurato ragaire oiso puraroepa, Avau voea tapo. Viapau oiso ra rugorugoopau rutu vaore. Ari ita, viapau oiso vii tuukepai va vao-ia. Uva voeao-ia katai vatara ora vo peva vao oea ragai sirova utuaera. Oa iava igei rutu avaiera Konilias vo kepaoro-ia koatasa. <sup>13</sup> Oire uva ro-ia oirato igei tavirevira vo iava osa enselto kekerevora ora rera vo kepaoro-ia. Uvare vovevira toupapaoro rera taviparevora oiso, Oeai aruri Jopa iare Saimon ou piesa rera raga Pita. <sup>14</sup> Ira visii aao rutu tavirevere Turaro iava visii siposipooro, ra vuri vovouro oavisii kavuta. Osa iava eisi visii virivarirevere visii oriruoro Pauto. <sup>15</sup> Oire vo osa ragai voeapa siposipo rovoraera, ovusa Tugoropato Uraurato vararoera voea iare, oiso-ia osa va purareva vigei-ia voari rovoa-ia. <sup>16</sup> ✨ Uva vaore rugooraera oiso osa puraroepa Turaro oiso, *Jon baptaisa vaterevora aue-ia uukoa raga. Ari tou visivi visii Tugoropato Uraurato vo goruaro-ia baptaisa outavere.* <sup>17</sup> Vo osa Pauto Tugoropato Uraurato vaterevora voeapa, eisi ita osa vigei vate rovorevora voari tuariri, vigei vao vigoa Turaro Jisas Krai oirao piepapeira. Oire vosa Pauto oisi va purareve, uva irouto-a ragai ragoa uvuiparai ra Pautoa-re korura?”

<sup>18</sup> ✨ Uva vo reoro-a varao uvuoro viapau oiso oavu avu vai puraiva. Ari Pautoa-ia vuurapa vaisi raga puraiva oiso puraoro, “Oiraopavira rutu ita Pauto vigei vatereva vo raivao ora osararovu rutu tapo. Oa iava vigei rutu uvuipavieie ra Airepa Tootoo oupe, vo rara ora vigei iava sopaura oavi rutu porepe.”

### *Vo Toupai Voeao Iava Lotupa Irara Vo Antiok-ia*

<sup>19</sup> ✨ Oire voeao-ia oea Jerusalem iava sikaa viropa Stiven upoaro iava tauairo ruture avaaepa oiso aue-ia vo Finisia-ia, ari Saipras-ia, ari Antiok-ia

✨ **11:3:** Ap 10:28; Ga 2:12 ✨ **11:5:** Ap 10:9-32 ✨ **11:16:** Mt 3:11; Jo 1:26, 33; Joe 2:28, 3:18

✨ **11:18:** Ro 10:12-13 ✨ **11:19:** Ap 8:1, 4

vo taerero-a evara oara-ia toupaooro oisoa Jiu-pa irara raga siposipopaoro toupai. <sup>20</sup> Ari oearovu oiso Saipras iava ari Sairini iava evoea disaipel irara iava, oea poua viropa aue-ia Antiok. Uva evoea-a oea Gri-pa irara tapo siposipoiva Vearo Sipoipo iava Jisas Krai vaaro. <sup>21</sup> Oire uva Turaro voea tauvareva gorua vateoro voeapa. Oa iava riro irara rutu sopaura oaive poreiva Jisas Krai oirao pieoro.

<sup>22</sup> Vo siposipoa pou piropa voea iare lotupa aivaro-ia, ovusa toupai Jerusalem-ia. Oa iava aue Banabas sipoiva Antiok iare. <sup>23</sup> ✧ Oire uva voa pouro viropa, oa iava Pauto vo kovoaro kekereva voa, ovusa Pauto voea viraakopareva. Oa iava rirovira rutu rorupareva. Uva voeare oise puraroepa, “Oirao pieara oavisii tovota Turaro-ia. Oa iava viapau oiso oavu avu vai visii vaaro sikavere oirao piea, rara goruvira raga oiso Turaro sirova utupata.” <sup>24</sup> Eisi osa voeare puraroepa Banabas, ovare vearo vovouto rutu-a. Ira ita vukuroepa aue Tugoropato Uraurato ora oirao pie vovou. Oa iava eva riro irara rutu Turaro-ia oirao pie vaisi puraiva.

<sup>25</sup> Oire Banabas avaroepa Tasas iare Sol-re taraasa. <sup>26</sup> ✧ Uva voa rera kekerevoiva, rera tapo vorevira kareroepa Antiok iare. Oa iava voa tousiva katai iva sovara-ia. Oire uva vo tou-a vao oa-ia toupaooro riro irara rutu siposiposiva lotupa irara. Uva voeao oea oisoa oise disaipel irara vaisipaive, Kristen irara, uvare oisoa Jisas Krai oirao piepaive.

<sup>27</sup> Uva ovokirovu-ia urioaepa oearovu profet irara Jerusalem iava aue iare Antiok. <sup>28</sup> Oa iava iravu voea iava toreroepa rera vaisiario, Agabas. Uva Tugoropato Uraurato vo goruaro iavirava reoreoroepa voeare oise purapaooro, “Rirotoai ogoeto ovuuta uriopere vorarore rasitoo rutu-ia.” [Ari ita, oiraopavira rutu ro ogoeto ira urioroepa, vo ovusa ro reito Klodias vo tokiaro-ia touiva.] <sup>29</sup> ✧ Osa iava voea rutu disaipel oiso puraaepa, “Vearopai vosa vigei voeao oirao pie vovou irara tauvaa vai vatepe Judia Distrik-ia oiso osa uvuipaviei katakataivira. <sup>30</sup> Oa iava va puraiva moniara vateoro voare vaitere voaisiario-ia Banabas vaio ora Sol. Oire evaiterei varava avasiepa oira vasi irarapa vara vatesa.

## 12

### *Oeavu Jems Kopii Pieiva Ora Pita Tapo Tuukeiva*

<sup>1</sup> Oire ro-ia ira vo vokiario-ia oearovu lotupa irara iava oea vuri pie rovereva rera vaisiario, King Herot. <sup>2</sup> ✧ Oiso osa vao oa purareva ro-ia Jems kopii pieoro aue-ia baint toorio, ro-ia Jon araokotoaaro. <sup>3</sup> ✧ Uva Jiu-pa irara roruiva rera-ia. Ororu-a vao kekerevoiva, Pita ita oureva rera tovosa kortua-ia. Uva vao oa purareva Jiu-pa irara vo vokiarioo sopaaro vuutario-ia Tugoropa Vokiro. Ovokiroa vaisiario-a varao oara oisoa vaisipaive, Yis Asa Bret Vo Vokiro. <sup>4</sup> Uva rera-ia pituoro rera koata piereva tuukepa kepa sovara-ia. Oa iava rera tokipasa uutupa irara resiresuravira tovoreva. Oiso ragavira rugorugoparoepa, Vearopai ira karekeavere vo Tagausapa Vurei Pasova isivaaro-ia oirara rutu osireiario-ia rera rovirieisa. <sup>5</sup> ✧ Oire vo osa oisoa Pita tokipaive tuukepa kepa-ia, ovusa voeao lotupa irara rerapa Pauto oisoa arepaive aue-ia variriara oaive vokiara rutu-ia.

### *Pita Kosi Piereva Tuukepa Kepa Iava Enselto*

<sup>6</sup> Oa iava tutuu pieepa, oire va iava King Herot oiso vovouparoepra ra rera oureve vorevira. Uva vo rupa-a vao oa-ia voeao uutupa irara rera tapo toupai oiso-ia, Aitereivu rera tapo ora aue-ia tuuke iro ora

✧ 11:23: Ap 13:43 ✧ 11:26: Ap 26:28 ✧ 11:29: Ro 15:26; 1 Ko 16:1 ✧ 12:2: Mt 4:21, 20:23

✧ 12:3: Eks 12:15, 23:15 ✧ 12:5: Ef 6:18



tuukesiepa. Vo ovusa oevu rataoa-ia uutupaaepa. <sup>7</sup> ✧ Osa iava Turaro reraaro enselto sita pievira pouro viropa rera ruvara-ia Pita, ovusa aviavia varaepa voa raga ora kiusa tuukepa tugi-ia. Oire voaviva rera eraopareva rera vurevupaoro. Uva oiso puraroepa rerere Pita, “Toreu ikauvira.” Oa iava tuuke iro kove ovoiepa rera iava. <sup>8</sup> Uva purapurapato ensel rerere oiso puraroepa, “Kuvupatoa-ia ora kuvuu. Ora tasiparei tapo goruri.” Oa iava vara tovtovoreva ora rera-ia. Uva vorerivira enselto rera ita tavireva oiso, “Ora rakurakupato oara-ia ora rakurakuu. Ra ragai sirova utuu.” <sup>9</sup> Oa iava iraroepa enselto. Uva Pita rera sirova uturoepa. Uusivira raga Pita toupareva, vo osa rera eraopareva enselto. Osa iava oiso keaparoepa Pita, Urusiparai. Viapau oiso oiraopa vao-ia oiso-ia osa ragai piepare ro-ia enselto. <sup>10</sup> Oire vo osa rovpato uutupato ira-ia putesiva, oire va iava vokasiva ita iravu-ia putesa eraopato. Oa iava tutuu piesiva riro ratao iare vao urui iarepa ratao. Ovusa karu piropa akukuvira raga vaiiterepa. Oa iava kosi virosiepa raiva iare. Uva vao isivaaro iava enselto Pita arova roroverikovira ava ovoiroepa.

<sup>11</sup> ✧ Uva Pita torevokovira rutu roroiövira rugorugooepa oiso purasa, “Oiraopavira rutu oiso osa tarai irarai vao-ia oa purarevo enselto ragai-ia. Ira arurevo Turaro ragaire ragai kosi piesa Herot vavaearo iava, ora vavao tapo Jiu-pa irara oara purapasa aue ragapaaveira ragaire Herot tapo.”

<sup>12</sup> Oire va-a vao oa ragare rugorugooepa Maria vo kepaaro-ia pouro viropa, Jon aakooro rera raga Mak. Vo ovusa vao vo kepa-ia riro irara ora gurupaaepa variripaoro. <sup>13</sup> Uva voea iare pouro viropa rataoa iava tofosa. Oire va uvuoro iriavu kosi uviropa va iava vurasä. Oira vaisiäro, Roda. <sup>14</sup> ✧ Oa iava eva tofoa rera reoaro eveieva. Vo osa viapau oiso karueva. Ari tupa raga-a tupaiva ratao-ia, ovusa rirovira rorupaoro va kavu ragaeva voea tavisa ikauro vorevira oiso puraoro, “Avoeao, Pita eera evoa ratao riaaro-ia.” <sup>15</sup> Uva viapau oiso oira vo taviaro oiraö piepaiva. Oiso raga purapaaepa oirare, “O ita, easi kokoropava o iria vigei keakeapaveoi.” Oa iava vorerivira ita aia oiso voea tavieva, “Viapau rutu. Ari oiraopavira eera-a Pita.” Oa iava oiso puraäepa, “Viapau, easi rera urauraaro eera.”

<sup>16</sup> Osa Pita touvira totopareva rataoa-ia voa raga toupäoro ratau. Oa iava rataoa iava tupaaro karuoro rera kekeiva. Uva rera-ia tavetave iraopaiva rutu rorupaoro. <sup>17</sup> Osa iava voea tapetapereva Pita aue-ia vavaearei oiso voea tavisa, “Turaro ragai kosi pierervo tuukepa kepa iava. Uva visii tavipaa ra avata Jems tavisa ora araoko irara oaro tapo va iava vao oa purerevo ragai-ia Turaro.” Uva vao isivaaro iava voea kavureva vorarore aväoro.

<sup>18</sup> Oire uva evo kepa-ia tuukepa kepa voeäo uutupa irara oiso aue iräoäepa tavetavepaoro, Ae! Apeisi pierervo Pita vova? <sup>19</sup> Oa iava oearovu arureva Herot rerere taraasa. Uva viapau rutu oiso uvuipaaepa ra rera kekeive. Osa iava voeäore keeräroepa uutupa irara oea oisoä tuukepa kepa tokipaive voea akesa va iava. Uva va-a vao oa iava oearovu arureva oiso ra uutupa irara upoive, uvare voea ruvara iava kosiro viro Pita.

Vao isivaaro iava Herot ovokirovu-ia Judia Distrik-ia kavuoro varäroepa Sisaria iare.

### *King Herot Vaaro Iava Kopiiä*

<sup>20</sup> ✧ Oire uva King Herot rirovira kasipuroepa äuere Taia vatärei ora Saidon vata. Oa iava ora guruäepa rera iare uriosa. Oire va iava Blastas ou rovoiva rera-ia veäro rugoo ou rovoisa ora voeäpa. Uva ro ira ou rovoiva ira oisoä King Herot vo kepaaro tokipareve. Oire vao vuavua vovou oare

✧ 12:7: Ap 5:19, 16:26 ✧ 12:11: Lu 15:17; Dan 3:28, 6:22 ✧ 12:14: Lu 24:41 ✧ 12:20: Mt 11:21; 1 Kin 5:9, 11

taraapaiva rera-ia Herot, uvare oiso ragavira taraipaaepa, Easi ro ruvara-ia aio voripavioveira.

<sup>21</sup> Uva vo vokia-a vao oa reesireva oa-ia varoa-ia ora rakurakuroepa vao turaro irara vo varoaro. Uva voa paupa-ia tapo pauroepa turaró irara vaaro voeapa riro kaekaevira siposiposa. <sup>22</sup> Uva voeao oirara rera uvuoro oiso purapaaepa rirovira keerapaoro, “Ro-ia pauto ira vigei vateparevoi vo siposiporo. Viapau oiso oiratoa raga-a ro-ia Herot, ari pautoa-a.” <sup>23</sup> ✧ Uva vo voki raga-a vao-ia oa-ia Turaro reraaro enselto rera upia piereva, uvare viapau vao pautoapa vaisi torevokoreva voeapa vovevira, oiso osa rera vaisiiva. Uva vo upia vao oa-ia aviko kare rera sarearo aioiva, vo ovusa urauratoaaro varaua arova rera kavureva. Oa iava kopiropoepa Herot.

<sup>24</sup> Vo osa Pauto vo reoaro kovaepa ora rigapaoro rirovira rutu.

<sup>25</sup> Uva Banabas vaio ora Sol Jerusalem iava karesiepa auero tapo Jon rera raga Mak. Uva voea vo kovoroaro ovoiro kareaepa vo peva rutu.

## 13

### *Banabas Vaio Ora Sol Reesiiva Vaiterei Aruoro Kovosa*

<sup>1</sup> ✧ Olotuvu vao-ia Antiok-ia oa sovara-ia oisoa voeao profet irara ora tisa irara toupaive oiso voea Banabas, ari Simion ira oiso vaisipaive Naisa, ora auero Lusas aue iava rera Sairini, ora Maneyen ira oisoa iravu raga Herot Tetrak ruvara-ia toupaveve tuariri, ora ro-ia Sol. <sup>2</sup> Oea-a Pautoa-ia vuurapa vaisi purapaiva ovokivu-ia aio asavira toupaoro auere lotu purapasa vearovira rutu. Oa iava Tugoropato Uraurato voeare oiso puraroepa, “Banabas vaio rovirieita ora Sol vaiterei roro pieoro. Aiterea vo kovo purapasivere oa reesiavora vaitereipa, oiso ra va purasi.” <sup>3</sup> ✧ Oa iava aio asavira raga toupaoro variripaaepa vaitereipa. Oire va iava voea vaiterei kukuearo-ia vavaeara oaive tovoiva vo vaiterei reesioro Pauto vo kovoaro purasa tauai. Oa iava eva isivaaro iava vaiterei sipoiva vaiterei ava pieoro voava vo.

### *Aposel Siposipoiva Saipras-ia*

<sup>4</sup> Oire voava Tugoropato Uraurato vaiterei siporeva, oa iava varasiepa Selusia iare. Uva voava aue iare Saipras-ia avasiepa selpa uvuo-ia. <sup>5</sup> Uva voa pou virosieiva, voeao siposiposiva Salamis-pa irara vo Jiu-pa irara vo keparoaro-ia Reo Taisi Uvupa Keparo Pauto vo reoaro iava. Uva oisoa Jon vaiterei tapo toupaveve vaiterei tauvapaoro.

<sup>6</sup> Oire voeao oea voraro vo toko-ia vokaiva. Oa iava vo voka iava Pefosia poua viropa. Uva voa iravu-ia poua viropa Jiu-pato ira oisoa kuuvu kovoro purapareve pisavira rutu. Riro keakea purato profetato ira vaisiaro-a, Ba-Jisas. <sup>7</sup> Ro-ia rovopato gavman ro kuuvu kovoro purapato vatetoaaro. Uva ro-ia rovopato gavman ira-ia oisoa vearo rugorugoo toupaive. Rera vaisiario, Sesias Polas. Ira vaitereore Banabas vaio ora Sol keeraroepa, oisore ra Pauto vo siposipoaro uvureve vaiterei ruvara-ia. <sup>8</sup> Ro-ia ira oisoa kuuvu kovoro purapareve, rera vaisiario Elimas rera raga vaisiario Ba-Jisas ira rore rovopato gavman korukururoepa, vo osa vaitereipa ruiparoepa. Uva rera ro reasiparoepa oiso, teapi Pauto vo reoaro vatesivere ra va uvureve. <sup>9</sup> Ari ita, ro-ia Sol rera raga vaisiario, Pol ira vukuroepa rera-ia Tugoropato Uraurato ira rerava tuupavira vurapaoro oiso puraroepa rerare, <sup>10</sup> ✧ “Auoro, vii-a vao Seten reraaro rutu viigoa vukupaveira tugara kare raga-ia, ora vii varaaro tapo vuri pitupituro. Vii vo pitupituroaro

✧ **12:23:** 1 Sml 25:38; 2 Sml 24:17 ✧ **13:1:** Ap 11:22-26 ✧ **13:3:** Ap 6:6, 14:26 ✧ **13:10:** Mt 13:38; Jo 8:44; Hos 14:9

purapariveira. Viigoa torevoko pitupitupa keru iraopauveira. Vokiara rutuia vo vovouo purapariveira oirara rutu piro piepaoro vova Pauto vaaro-ia torevoko raiva. <sup>11</sup> ✧ Vaoviopavira raga Turaro vavaeoro vii-ia toupai. Oa iava vavoriipauei, ra viapau ravireo kekepari vo vokiro-ia varao.” Oire vao isivaoro iava apapa koarapavira vurareva. Oa iava oira taraaparoea oiso ra irai rera sikuropaoro vokapareve, uvare rupavira rutu vurareva. <sup>12</sup> Oa kekereva ro gayman rovopato, oa iava rera iava sopaua rutu oiraoepa rutu, vo osa varao-ia Turaro varaaro rutu tavetavereva.

*Pol Ora Banabas Aiterea Antiok-ia Vo Pisidia Taere Sovara-ia Toupasiva*

<sup>13</sup> Oire uva Pefos-ia kavuoro aue-ia selpa uvuoa topaa viropa Pega urui iare ouruia oisoa toupave Pamfilia taere sovara-ia. Uva evoa vaiiterei arova kareroepa rera raga Jon Mak Jerusalem iare. <sup>14</sup> Oa iava Pega urui iava vokasiva aue-ia pou virosa Antiok vo uruio oa oisoa Pisidia taere sovara-ia toupave. Uva okepavu-ia koatasiepa Sinagog Jiu vaaro voo pausa. <sup>15</sup> Oire oearovu Pauto vaaro Reo Taisi viei rovoiva, ora vo reoro tapo profet irara vo rigatoroaro. Uva varao isivaoro iava voeao rovopa irara vova Sinagog vo rigato vateiva vaiiterepa origatoa oiso puraepa, “Araokotoarei oaiso, vosa roea vai vei-ia toupave voeao oirara ora riakora sopaaro soporesa, oire oai kosi piesi vo uvuruo-ia.” <sup>16</sup> Oire uva Pol toreoro voea tapetapereva vavaearei-ia oiso puraoro voeare,

“Visii Isrel-pa irara ora visii oearovu visiiigoa Pautoa-pa avivikepataveira. Visiiigoa rutu vao uvuta. <sup>17</sup> ✧ Ro Pauto oaive Isrel-pa irara ira oearovu voeao iava vigei aao iraraaro viro piereva voea reesioro auere voea riro piesa vo ovusa tavetevira voo toupave. Oa iava voea iare goruaro karekereva voea kosi pieoro voava Isip-ia. <sup>18</sup> Oa iava aue sovara-ia vo resura tau ivaro (40) voea oisoa tauvapeve vo osa raaka tapi-ia toupave. Oiso osa voeoro oearoa veguru kakaero oaive tokipaveira. <sup>19</sup> Oire vosa erao vatara (7) sararo opesi pie rovorevoiva aue iava Kenan-ia, voea vatereva vo rasi Jiu-pa irara. Oa iava oiso pura piropa, Voea raga vo rasiaro. Uvare voeapa vo rasi roorookareva. Uva voo touiva aue-ia vo resura vovoto vo vavae irara ivaro (450). <sup>20</sup> Uva vao isivaoro iava Pauto voea vatereva reo roviriepa iava aue jas voea tokipasa. Oa iava ro-ia Samyuel profetato voeapa vatereva Pauto.

<sup>21</sup> “Uva Samyuel isivaoro iava auere ita Pauto areiva king. Oire Sol vatereva Kis oviitoaro vo sarao iava rera Bensamin vase vo saraaro. Uva oisoa va-ia toupave vo ivaro sovara-ia vo resura tau iva (40). <sup>22</sup> Vao isivaoro iava Sol verareva vorevira ita Pauto aue tavari piesa Devit, oisore ra voeapa turaroparo. Oa iava vo reoro vatereva voeapa aue iava Devit oiso puraoro, Ro-ia Jesi oviitoaro, ira ragai vo ruipaaro rutu-ia toupave. Ira taru oiso vara puraparevere osa rera tavipaavo. <sup>23</sup> ✧ Uva Devit aao iraraaro-ia Pauto ro Jisas karekereva Isrel-pa irara kae piesa voea oriruoro. Oa purareva vao ora rera vaaro reo ravaa oirao pieoro.

<sup>24</sup> “Oire uva Jon ira piereva Jisas-pa. Oa iava oiso siposiporeva oirarapa, Visii poret viro, ra vuri vovouro oavisii kavuta. Oa iava baptaisa outavere. <sup>25</sup> Uva Jon vo kovoro opesi pieoro oiso puraroepa, Apeisi rugorugooptai ragai-ia? Irouto-a ragai? Viapau oiso ragai-a ro ira iare tuepataveira. Oire uvuta oiso-ia iravu ira uriorovere irapa ariparai. Uva viapau uvuiparai ra rerapa akaipa kovo vai pura ragaa. Oiso osa vao tasipaaro oa-ia viapau uvuiparai ra va akaipavira vera ragaa vo rera iava.

<sup>26</sup> “Araoko irara oaa. Visii vao Ebrahim aao iraraaro, ora visii vao ratau tou irara visiiigoa rutu Pautoa-pa avivikepataveira, vigei rutupa Pauto vo

reo vatereva virivari pie reo aue iava Jisas KraiS vigei Kae Piepatoaaro. <sup>27</sup> Voeao-ia Jerusalem-ia tou irara ora voeao reipa irara oaive oea rutu vo reo oirao pieivora profet irara vo reoaro vo Jisas kopii pieoro, uvare viapau oiso rera eveivora oiso, Kae Pieto oaive. Ira iava profet irara vo reo rigatoiva oa oisoa vieipaive Sabat voki-ro rutu-ia. <sup>28</sup> Uva viapau oiso uvuaiera ra rera kortuive vuriara vai sirova, uvare oiso ragavira taraiiera rera-ia, Easi torevokotoa-a ro-ia. Ari ita, Pailat taviiva oiso ragavira, Egara ita, ruipapaiei oiso ra rera kopii pieri igeipa. <sup>29</sup> Uva vo reoro rutu evara oirao pieoro oara rera iava rigatoiva rera rere pieivora vova evao parikou-ia rera tovasa aveke rikui-ia. <sup>30</sup> Ari ita, vo osa Pauto vorevira rera tore pieivora vova kopii. <sup>31</sup> Oa iava oearovu ovokirovu-ia rera kekeivora voeoro oearoa tapo avaroepa Galili iava aue iare Jerusalem-ia. Voeoro oearoa vo voki-ia tavitavipaai rera iava.

<sup>32</sup> “Ora vegei tapo vara iava tavitavipaveiei veoro siposiporo oiso-ia, vara iava ovoiei reoro oara oirao pieivora Pauto vigeipa rera-ia. Varao oara vatereva tuariri vo voeaoa vigei aite iraraaro. <sup>33</sup> ✱ Oiso osa vao-ia oa-ia Jisas tore pieivora vorevira kopii iava. Osiposipoa vao aue-ia Sam Vuku papara erao oiso oa-ia puraroepa Pauto, ‘Vii-a oviitoa oaa. Ragai vo voki vii aitea.’

<sup>34</sup> ✱ Oa iava Pauto reo ovoi puraoro oiso va purareva, ira toreroverea Jisas kopii iava vorevira, ra viapau eruro. Eisi osa pura piropa vo rigato oiso osa vao-ia, ‘Ragai-a vao ragoa visii rutu oiraopavira vateaverea oiraopara ora tugoropara, varao oara iava reo ovoi puraava auepa Devit.’

<sup>35</sup> ✱ Ora vao tapo oa-ia oiso puraroepa Devit vo aue-ia opaparavu vo Sam Vuku sovara-ia. ‘Ro-ia Tugoropatoa oara ira iava varaua iava viapau uvuipau ra vaseri, oiso ra erupe.’

<sup>36</sup> Uva vo reoa vao-ia aue iava Jisas oa purareva, viapau oiso ora rera raga-ia vo reo-a. Aue iava uvare rera vo touaro-ia Devit Pauto vo vovouaro purareva rera voeao-ia oirara, oa iava kopiioepa. Uva rera tovaiva vo rera aite iraraaro tovaaro ruvara-ia. Oa iava rera iava varaua erupea vao.

<sup>37</sup> Ari ita, ro ira tore pieivora Pauto kopiiaro iava rera Jisas, ira iava viapau oiso varaua oaro eruera. <sup>38</sup> Araoko irara oaa, vao uvuta oa iava visiipa siposipopaavo vuri verapa siposipo. Oa visiipa ora vatepere rera raga-ia ro-ia Jisas, <sup>39</sup> vo rera rera oirao pieta. Oa iava visii iava vuriara oavisii verarevere oara viapau uvuipai ra Moses vaaro Reo Taisi vara verapaive. <sup>40</sup> Vatato-popata, teapi vao visii-ia karekepe oiso osa profet irara vo reoaro-ia puraapea voari oiso, Vao karekeperea vo oearovu-ia. Oiso osa vao-ia,

<sup>41</sup> ✱ ‘Visii riro vakuvaku irara vao keketa, ra vare rugorugoota visiigoa taru kopiitavere, uvare vo kovo purapaavo. Uva viapau oiso va oirao piepata. Ari ita, vosa irai visiipa evo kovo aviavi piepareve, ra viapau oiso irai vo reoro oirao piepata va iava eva.’”

<sup>42</sup> Oa iava kosi virosiepa Pol vaio ora Banabas voava vo Sinagog. Uva voea rutu oiso puraapea vaiiterei, “Uriosivere aia vo toupao-ia utupa igeipa siposipo vo reoro iava.” <sup>43</sup> Oire uva voeao-ia Jiu-pa irara ora oearovu ratau tou irara oearoa oisoa Jiu-pa irara vo pitupituaro sirova utupaave, oea rutu vaiiterei sirova utuaepa raivaaro. Oa iava vao vaiiteo aposeltoarei voea taporo ora reopasiepa oiso voea tavipaoro, “Avoeao. Pauto vo Saraoria sopaura oavisii tovopatavoi. Ra vao toupaooro goruvira rera sirova ututa.”

44 Va-ia vao utupa Sabat voki vorevira voeao vo urui iava ora guruaepa Pauto vo rearo uvusa. 45 Vo osa voeapa siposipopareva Pol, ovusa Jiu-pa irara urioaepa vo uvuru kekesa. Oa iava rirovira rutu vara riiriiva. Osa iava vara iava rerava rirovira ora kaureopaaepa rera reoropaoro. 46 Uva goruvira rutu reopaoro voeare Pol vaio ora Banabas oiso purasiepa, “Ari ita, rovovira rutu visii vate irao rovovevora vo reoro Pauto vo reoroaro. Uva visii-ia tarai iraopaveiei visii kekepaoro, ovusa vo reoropa reasipaoro vara peopata ora visii iava. Uva oisi-a oiso osa ora kosi piepatai, oa iava viapau oiso uvuipatai ra vao Tootoo Ovoi outa. Eva-a oa vituaro iava avapaveare ratau tou irarapa vo reo vatepasa. 47 Aue vituaro iava uvare ro Turaro vegei tavirevora oiso,

‘Ragai visii sipopaa osararovu ratau tou irara aviavi piesa voeapa vao iava siposipooro. Oa iava uvuipaa ra ora voea varaaro iava vuri vovouro ora poreave, vo rara vo reoro varao oirao piepaive voea rutu vo rasitoo rutu-ia.’”

48 Uva vao uvupaoro oearovu ratau tou irara iava rirovira rorupaiva. Oa iava Pauto vo rearo rei pieva oiso puraoro, “Vearovira rutu vatevatearoi-ia Pauto.” Uva riro irara vo reo oirao pieva voeao oea ropo rovoveva Pauto ora rerapa voari rovoa rutu-ia.

49 Oa iava Pauto vo rearo ora sikataepa voraro ruture vo taerero-ia varao. 50 Uva voeao Jiu-pa irara oira vasi irara kasipu pieva ora riakora tapo vairo airoa oisoa goruvira rutu lotu purapaave vokiara rutu-ia. Oa-a vao oa puraiva Pol vaio ora Banabas kosi piesa vo taere iava. 51 Uva kokotoara oaesii iava vereo tovetovesiepa voare vo urui reesioro vao-ia, Reo uvu asa urui. Oa iava voea kavuoro ava ovoisiepa vore Aikoniam-ia. 52 Uva voeao disaipel irara vukuapea rutu aue-ia Tugoropato Uraurato ora aue-ia tapo rorua.

## 14

### *Vo Toupasiva Aikoniam-ia Kovopaoro*

1 Oire uva ovokivu-ia ita vao vo Aikoniam-ia oavu-ia ita Sinagog pausa koatasiepa. Voa ita goruvira rutu voeapa siposiposiva. Uva riro irara rutu vaierei vo siposiporoaro oirao pieva voea rutu oiso, Jiu-pa irara ari Grik-pa irara tapo. 2 Ari ita, oearovu voea iava Jiu-pa irara oirao pie asa irara oea oearovu kasipu pieva osararovu iava, oisore ra vurivira rugurugooave vaiereire Pol vaio ora Banabas oearovure tapo oirao pie vovou irara. 3 ✧ Oire vao vo riro kaekaevira tousiva siposipopaoro uriri asavira Turaro iava, ro irara vaierei vo reoroaro aue iava Pauto vo tauvaaro oirao piepareva gorua vatepaoro. Osa iava ravaa reesiro ora ravoto kovoro purasiva ora vavaea oaesii iava voea rutu osireiario-ia. 4 ✧ Oa iava voeao vo urui-ia tou irara oea viapau oiso vaeavira vovoupaapea, uvare oearovu oiso vovoupaapea osa Jiu-pa irara vo vovouaro. Ari oearovu oiso vovoupaapea osa aposel irara vo vovouaro.

5 Oire Jiu-pa irara ora rearovu ratau tou irara ora voea iavapa irara reipa irara oiso vovoupaapea ra aposeltoarei vurokoive aue-ia aveke. 6 ✧ Ari ita, vo osa va-ia tarai rovosiepa. Oa iava ouruireivu iare torisiva vo uruireo Listra-ia ora Debi-ia. Ouruirea oisoa Likionia taere sovara-ia toupave, ora vo tapo otaererovu oara oisoa voavi ruvara-ia toupave. 7 Uva vao Vearo Siposipoaro Jisas vatepasiva voeapa.

### *Vaiterei Vo Kovoaro Iava Oa Purasiva Listra-ia*

✧ 14:3: Hi 2:4; Jo 4:48 ✧ 14:4: Ap 17:4-5 ✧ 14:6: Mt 10:23

8 ☆ Oire uva iravu ira oisoa vo urui-ia vao Listra urui tokoruovira raga toupaveve, uvare rera iava kokotoa vuriepa osa raga rera kavaueva aakova. Oa iava oisoa viapau uvuiparo oiso ra vokapareve. 9 Uva Pol vo rearo uvureva, oa iava Pol rera eveireva. Osa iava ora rerere oiso puraroepa, “Akoa, ro-ia oirato ira ragai vo rearo oirao piepare aue iava Jisas. Ira poreterovere rara.” Uva Pol rerava tuupavira vurareva oiso rutu puraoro akareva, 10 “Toreu torevokovira. Vii oiraaro-ia kokotuo.” Oa iava tokaoro toreroepa voka ovoisa.

11 ☆ Oire riro irara va eua kekeiva oa purareva rera-ia Pol. Rera kekeoro voea rutu rirovira oiveaepa oiso puraoro, “Ae, oiraopavira rutu vaitereo-ia pautoarei, aiterea oira varavira raga varasiei vore vigei iare.” 12 Banabas vaisiiva oiso, Sus pautoa oaive, ora aue tapo Pol ira-ia vo vaisio tapo tovoiva, Hemis iravu ita pautoa oaive. Uva vao iava vo vaisio Pol-ia tovoiva Hemis-pa vaisi, rara voeapa reo vateparo. 13 Ro-ia pristo Sus reraaro ira vo kepaaro lotupa kepa oisoa uruia vatuaro-ia toupave, ira urioroepa bulmakau kare tapo ora kokookoara voea rutu iare, oiso ra vara-ia koruoua purareve voea tapo Pol vaiopa ora Banabas. Uvare vaitereipa oiso keapaaepa, pautoarei.

14 Uva Pol vaio ora Banabas eisi va iava uvuoro ikauvira uriosiepa voea iare kuvupara karikaripaoro ora vaiterei iava. [Uvare rirovira rutu ariipasiepa vao-ia oa purapaiva vaitereipa.] Oa iava oiso purasiepa, 15 ☆ “Ae! Eake-a vao purapatavoi? Viapau oiso vegei-a pautoarei. Vegei oiratoarei oiso osa visii vao-ia. Vegoa urioveiera visii rutu vao tavisa Vearo Siposipo iava, oisore ra vo pitupituro iava kuuvu pitupituro poretta viro Tootopato sirova utuoro Pauto. Ro ira vuvuiua purareva, ora rasito, ora avakava, ora auero rutu varao oara vara sovara-ia toupaveira. 16 Ro-ia Pauto ira oisoa osararovu rutupa vasepareve voari tuariri. Oa iava ora voea raga vo pitupituroaro sirova oisoa utu ragapaave. 17 ☆ Ari ita, vo tuariri rutu rovoa-ia uva Pauto auero rutu purareva, oiso ra oirara rutu vara kekepaoro vara iava rera eveipaive. Oiso veaopara rutu varao purareva oiso-ia, kokeva o auere kovepasa, ari kovoara varao auere kovapasa, ari evaouara rutu varao auere kuepasa, ari oaravua varao auere ope purapasa, ora varao tapo auere vara aiopasa. Oire ra vara iava vukupaae ora aue-ia rorua ora gorua. Varao oara rutu viraakoreva Pauto vara ovoiro.”

18 Uva vo reoro-a varao oara-ia voea kasikasi pievira akeakesiva, oisore ra va eakaive vao uvare koruoua purapaiva vaitereipa.

### *Pol Vurokoiva Avekeara-ia*

19 ☆ Uva vo vokia-a vao oa raga-ia oearovu Jiu-pa irara Antiok iava ora Aikoniam-ia urioaepa oearovu ivu ragapaoro. Oa iava voea sirova utupaepa. Uva Pol vurokoiva avekeara-ia. Oa iava rera ivuoro rera kosi pieiva vo urui sovara iava oiso keaoro, Ira kopiiori. 20 Oa isivaaro iava vao voeao oirao pie vovou irara ora guraaepa rera kovokovooro. Oa iava poreteoro ora pueroepa vorevira vo urui iare vovesa. Ovokivu-ia utupa voki vo urui kavuoro avasiepa vaiterei rutu Pol vaio ora Banabas aue iare Debi-ia.

### *Pol Vorevira Kareroepa Vova Antiok-ia Vo Siria Taere-ia*

21 Uva vao vo Debi-ia tupaoro voeapa Vearo Siposipo iava siposipapa-siva. Oire riro irara rutu vaiterei vo siposiporoaro oirao pieiva rutu. Uva vara opesi piesivoiva, vorevira karesiepa Listra iare. Oa iava voava ita Aikoniam iare vovesiepa. Oa iava voava ita Antiok-ia. 22 ☆ Uva voava

☆ 14:8: Ap 3:2 ☆ 14:11: Ap 8:10, 28:6 ☆ 14:15: Jen 1:1; Sam 146:6 ☆ 14:17: Ro 1:20; Sam 65:10 ☆ 14:19: 2 Ko 11:25; 2 Ti 3:11 ☆ 14:22: Ap 11:23, 13:43; Jo 16:33

vorevira karepaoro voeao oirao pie vovou irara sopaaro goru piepaoro karesiepa riro goruvira oiso puraoro, “Uvuiatai ra goruvira touta oirao piepaoro. Uvare tutuu piepai ra koatavio Pauto vo Saraaro-ia. Ari ita, vo osa voka rovope vo raivao-ia oa-ia riroara vavatare toupai.” <sup>23</sup> ✧ Oire uva oearovu lotupa irara iava reereesisiva, oiso ra lotupa irarapa irapaoro vearovira voea tokipaive. Uva aio kavuvira raga toupaooro Pautoa iare varirisiepa voeapa Turaro vo tokiaro sovara-ia voea tovooro, ro ira-ia raripaaveira. Uva oisi-a eisi osa piepasiva voraro rutu vo uva lotu gururo rutu oisoa toupave.

### *Vo Vorevira Karesiepa Antiok Iare Vo Siria Taere*

<sup>24</sup> Oire uva Pisidia sovara-ia vokapaoro aue-ia Pamfilia-ia poui viropa. <sup>25</sup> Oa iava voa vo Pega vearo reo iava tavitavisiepa voeapa siposipooro oirara. Uva va isivaaro iava varasiepa aue iare Atelia. <sup>26</sup> ✧ Uva voava kare ovoisiepa selpa uvuo-ia Antiok iare, vo uruio-ia oa-ia oearvu aposel irara rorovira vaierei tovo pie rovoiva Pauto vavaeoro-ia kovosa. Oa iava opesioro voare karesiepa.

<sup>27</sup> ✧ Oire vo osa voa pou virosiepa, oa iava lotupa irara rutu gurusiva voeapa varao iava tavitavisa oara oisoa purapareve Pauto vaierei tapo. Vao iava tapo uvare vo raivao karureva ratau tou irarapa, oisore ra taraiave Jisas vaisiario-ia. Ra va iava rera oirao pieve rera-ia rarioro. <sup>28</sup> Oire uva voa vo Antiok-ia riro kaekaevira tousiva vo voea tapo voeao oirao pie vovou irara.

## 15

### *Lotuara Kaunsel Irara Ora Guruaepa Jerusalem-ia*

<sup>1</sup> ✧ Uva oearvu varaaepa Judia iava vore Antiok-ia voeao oea oiso voeapa siposipopaiva oirao pie vovou irara oiso purapaoro, “Vosa visii viapau vo pitupitu sirova ututa Moses vaoro rakari verapa pitupitu, oa iava viapau uvuiatai ra vuriara oavisii iava virivarita utupaua.” <sup>2</sup> Oa iava Pol vaio ora Banabas voeare goruvira rutu oiso purasiepa, “Easi viapau oiso vao torevokopai.” Oa iava rirovira rutu ora takatoeapa kasipuvira ora reoro. Uva vao iava Pol vaio reesiiva ora oearovu vaierei iare Jerusalem iare avasa vo reova vao-ia oa-ia ora reoaepa. Uva voare oearovu iare reipa irara ora aposel irara vava avaaepa, oiso ra va-ia ora reoave voea rutu.

<sup>3</sup> Oire uva va iava voea rutu voeao-ia lotupa irara vaierei sipoiva Jerusalem iare. Vo uruireo Finisia ora Sameria vuutaaro-ia pute rovooro voeao tavisiva oirao pie vovou irara oiso puraoro, “Vo raiva-ia Pauto ratau tou irara sopaaro porereva oiso-ia.” Oa iava rirovira rutu roruiva vo siposipo uvuoro oirao pie vovou irara. <sup>4</sup> Vo osa voa poui viropa Jerusalem-ia, oa iava vaiereiva sekansa avaaepa reipa irara, ora aposel irara, ora voeao rutu lotupa irara. Oa iava voeapa siposiposiva varao iava oara oisoa purapareve Pauto vaierei-ia. <sup>5</sup> Uva oearovu voeoro oearoa oisoa Farisi vo siposiporoaro sirova oisoa utupaave, oea toreaepa riro oirao pie vovou irarare oiso purasa, “Avoeao, tepa ora rakari verapaavere Moses vo taisiario sirova utupaoro Reo Taisi.”

<sup>6</sup> Uva va-a vao oa iava voeao reipa irara ora voeao aposel irara rutu ora guruaepa va-ia ora reosa. <sup>7</sup> Uva riro kaekaepa reoro rutu-a oara-ia ora reopaaepa vo aivaro-ia vao-ia oa puraiva. Oa iava Pita toreroepa oiso purasa, “Araoko irara oaa, tuariri Pauto ragai reesireva ratau tou

✧ 14:23: Ta 1:5 ✧ 14:26: Ap 11:19, 13:1, 3 ✧ 14:27: Ap 15:4, 12; 1 Ko 16:9; 2 Ko 2:12; Kl 4:3

✧ 15:1: Ga 2:12, 5:2

irarapa Vearo Siposipo vatepasa, oisore ra oearovu rutu vo reo oirao piepaive. <sup>8</sup> Pauto raga oirara rutu iava sopaura-ia taraiparoveira. Oa iava ora rera voeaaro vo rugorugooroaro oirao piepasa Tugoropato Uraurato rere pieredora voeaopa ratau tou irara, oiso osa piereva vigeipa voari. <sup>9</sup> ✧ Oiraopavira rutu. Viapau oiso Pauto vo vovouaro vigei iava oearoi veriverisipaiveira. Viapau. Uvare vigei rutu areiivira rutu toupaveira. Osa iava oearovu uvuipaai rera oirao piepaive. Oa iava Pauto uvuiparoi ra voea iava vuriara verapareve. <sup>10</sup> Uva apeisi vovoupatai, ra Pauto akeaketa va-ia vao, oisore ra va-ia rera torevokota, ra va sirova utuave? Opitupitua vao rakari verapa oiso rutu toupaveira osa aveke. Ari ita, vosa oirato oira-ia kae vovouaro, ra viapau uvuiro oira kaesa vo rara vavatapao. Eisi osa oisoa toupave voari igei aao iraraaropa tuariri, ora vigeipa vao-ia vo vokie. Eisi osa iava viapau uvuipavioveira ra oisi va sirova utupavio. <sup>11</sup> ✧ Ari ita, vao vigei vaaro oirao pie vovou oa oiso ragavira toupai, Akuku raga vatevatea oa vate ragareva Pauto. Ovatevatea raga iavirava Jisas Krai uvuiparoveira ra vuriara oavi verapareve vigei iava. Osa-a oiso osa pierevere rara voeaopa ratau tou irara.”

<sup>12</sup> Vao isivaaro iava voea rutu voeao vo uvuru-ia vao ora reopaaepa. Oea rutu ora tape pieaepa Pol vaio ora Banabas raga reoaro uru piepaoro, vosa voeapa siposipopasiva varao iava ravaa reesiro ora ravoto kovoro tapo. Varao oara oisoa purapareve Pauto vaiterei-ia voeapa voeao sopaipa irara ratau tou irara.

<sup>13</sup> Oire uva siposipoa oaesi opesi piesiva, oa iava Jems toreroepa oiso purasa, “Araoko irara oaa, ragai uvuta. <sup>14</sup> Ari ita, Pita visiipa siposiporevoi roroiovira oiso osa iraroepa Pauto oearovu tauvapaoro voea ou rovosa voeao iava ratau tou irara, oisore ra vearovira rera sirova utupaave oiso rutu osa rera voeaaro. <sup>15</sup> Ari ita, vao rigatoa oaive voea profet irara oa oisi toupai osa Pita puraparoi vao-ia. <sup>16</sup> ✧ Vo uvare profet irara oiso va rigatoiva, “Turaro oiso puraroepa, Vao isivaaro iava kareraverea, ra Devit vo kepaoro tore piea vorevira vao oa vurioro koveepa tuariri. Vo kepa vorevira vearo pieoro vo kepa tore pieaverea.

<sup>17</sup> Auere ra voea rutu voeao ragaire taraiive ragai sirova utusa, voarei rutu voeareo ora oearovu rutu ratau tou irara, evoearei oearea reesiava oiso, Ragai voareiaro oirara.

<sup>18</sup> Eisi osa puraroepa Turaro ro ira vo taraio kareke piereva voari tuariri rutu.”

<sup>19</sup> “Oire vao-ia ragai iava rugorugooa oiso toupai, Viapau uvuipaviei oiso ra voeao ratau tou irara vavagisi piepe vao-ia vigei Jiu-pa irara vaaro riro vavata reo goru. Uvare evoea iava sopaura oaive porepa virora Pautoa iare rera sirova utupasa. <sup>20</sup> Ari varao raga oara iava voea vatepere aue vai pasia vai oiso, Opeita varao koruou aioro aiopata, oara vatepaiveira oearovu tokarasi irarapa vara-ia vuivui purapaoro. Opeita ora visiiva otopata, oara kavu iraota. Opeita vo karero varuere kare aiopata okarea kopii piepataveira voea kaapaoro, vo rara viapau oiso revasiva puteive vo kare iava. Opeita revasiara aiopata. <sup>21</sup> ✧ Uva varao raga iava voea vatepai rara, uvare varao Tugoropa Reoro toupaveira vao-ia Jiu vaaro-ia Reo Taisi. Oara vatepaiveira vieiara sovara-ia Sabat vokiro rutu-ia vo Jiu Reo Taisi Uvupa Keparo rutu-ia vova tuariri rutu.”

### *Pasia Sipoiva Voeaopa Oirao Pie Vovou Irara Voeao Ratau Tou Irara*



<sup>22</sup> Oire va iava voea aposel irara, ora reipa irara, ora voearo rutu tapo lotupa irara, oea vaea vovou kataia raga puraiva ora guruoro aitereivu reesioro ora voea iava aue iare Pol vaio ora Banabas, oiso ra voea rutu avaaave Antiok iare. Uva vaiterei vaisiaro-a vaitereo Judas Basabas ora Sailas, aiterea-ia oisoa vearo vaisi purapaive oirao pie vovou irara. <sup>23</sup> Uva vaiterei tapo vo pasio sipoiva oa-ia oiso purapaoro,

“Igei aposel irara ora riro irara tapo igoa visiiva oiso puraiei, Vearo voki rutu araoko irara oaio, visiigoa evoa toupataveira Antiok-ia, ora Siria-ia, ora Silisia-ia. <sup>24</sup> Ari ita, visii iava uvuiovora vo uvare oearovu voearo igei iava avaaera oiso visii tavitavisa. Uva visii vavagisi piepaivora oiso purapaoro, Uvuiatai ra Jiu vaaro sirova ututa Reo Taisi vo pitupitua-ia rakari verapa pitupitu. Ari ita, taraipatai oiso, Viapau rutu igei voea sipoiovora visii iare. <sup>25</sup> Oa iava ora guruerao evaiterei reesisa aue-ia katai vovou. Uva turaro irara iava vaiterei uriosiei visii iare aue sirova igei vatetoareiaro Banabas vaio ora Pol. <sup>26</sup> \* Vaitereo-ia Pol vaio ora Banabas aiterea ora tootoarei oaesii piresivora vosa Turaro oaiopa kovopasivora ro Jisas Krai. <sup>27</sup> Uva vaitereo sipoiovoi visiipa Judas vaio ora Sailas, oiso ra ora vaiterei gisipoaro iava visii tavitavisi vearovira oiso osa evo rigato oa puraiovoi visiipa. <sup>28</sup> Uvare igei ora Tugoropato Uraurato oiso auepaiei, Viapau oiso vearopai ra vao riro vavata reo goru tovo ragapaio vo visii-ia. <sup>29</sup> Ari ita, varao raga oara sirova utu iraota oiso-ia, Opeita varao koruoupa aioro aiopata oara vatepaiveira oearovu tokarasi irarapa vara-ia vuuvui purapaoro. Opeita ora visiiva otopata, oara kavu iraota. Opeita vo karero varuere kare aiopata okarea kopii piepataveira voea kaapaoro, vo rara viapau oiso revasiva puteive vo kare iava. Opeita revasiara aiopata. Oire uva oiso-ia ra visii rutu vearovira ora visiiva tou iraopatavere, vorara varao sirova ututa. Oire evavi raga ra opesipe. Vearo voki rutu.”

<sup>30</sup> Uva tavitavipa resura oea sipoiva, oa iava voare avaaepa evoa Antiok-ia. Oire va iava voa vo resura voea voeao oirao pie vovou irara guruiva voa vo rigato vatesa voeapa. <sup>31</sup> Oa iava voea rutu vo rigato vieipaoro rirovira rutu rorupaiva, uvare voea iava sopaura oaive goru pieiva va-ia. <sup>32</sup> Uva Judas vaio ora Sailas profetatoarei aiterea riro kaekaevira voeapa siposiposiva voeao oirao pie vovou irara voea vo rugoaro goru pieoro. <sup>33-34</sup> \* Ovokirovu isivaoro iava ojavu vaiterei sipo pieiva oiso puraoro, “Avasi gavaurea sovara-ia toupasa.” Uva vorevira voreaepa aposel irara iare. <sup>35</sup> Oa iava Pol vaio ora Banabas tou rovosiva voa Antiok-ia vo voeapa siposipopaoro aue iava Turaro vo reoroaro ora oearovu tapo riro irara.

### *Pol Vaio Ora Banabas Ora Sikasiepa*

<sup>36</sup> Oire uva ovokirovu isivaoro iava Pol oiso puraroepa Banabas-re, “Vearopai vosa kareve ora vegei araoko irara oaro kekesa, voeao oea oiso toupaveira voraro uruiara-ia vo uvaroa voea siposipo rovoveva aue iava Turaro vo reoroaro. Oa iava uvuiaveiei ra taraive voeao-ia oiso, Apesi ragavira toupai. Ra voea ita tauvave.” <sup>37</sup> \* Vo osa Banabas Jon-pa ruipaparoepa, rera raga Mak, oiso ra rera tapo avasi voare. <sup>38</sup> \* Oire va iava Pol rerare oiso rugorugooepa, Easi viapau uvuiaveiei ra rera tapo avave. Uvare ita vegei kavureva aue-ia Pamfilia-ia vo kovopa reasipaoro. <sup>39</sup> Oa iava ora aveavesiepa. Uva viapau oiso katai vovou vai-ia toupasiva. Oa iava ora tavarisiepa oiso, Banabas avaroepa Saipras iare vaiterei ora Jon Mak selpa uvuo-ia. <sup>40</sup> Ovusa Pol Sailas tapo avaroepa. Vo ovusa voeao

oirao pie vovou irara Pauto vo tokiaro sovara-ia vaiterei tovoiva. <sup>41</sup> ✧ Uva avasiepa vo Siria taererei ora Silisia-ia vuutaaro-ia lotupa kovo voraro goru piepaoro.

## 16

### *Timoti Pol Vaio Tapo Avaroepa Ora Sailas*

<sup>1</sup> ✧ Oire voa pousi viropa vo Debi-ia ora vo Listra-ia. Uva voa iravu oisoa toupaveve oirao pie vovouto rera vaisiario, Timoti. Uva aakova Jiu-pava ora oirao pie vovouva tapo, vo ovusa aitetto-a Grik-pato. <sup>2</sup> Uva voeao oirao pie vovou irara oea oisoa Listra-ia toupaveve ora Aikoniam-ia oea oisoa oiso purapaave rerare Timoti, “Vearotoa rutu ro-ia.” <sup>3</sup> ✧ Oire va iava Pol rera akereva oiso ra rera tapo kovopaveve vo voka-ia vao. Ari ita, vo osa rovovira rera rakari vera rovoveva, uvare riro irara Jiu-pa irara oisoa voa toupaveve. Uva oiso tapo taraia ouiva uvare aitetto-a Grik-pato ira oisoa rera-ia koruparo vapa eva rakari vera. <sup>4</sup> Oa iava avaaepa voea uruiara ruturoaro iare vao reo goru vatepaoro voeapa voeao oirao pie vovou irara. Vo reoria varao iava aue koruoupa aioropa, ora otopa pitupituropa, ora varao tapo revasipara aio arapa evo reo oa puraiva aposel irara Jerusalem-ia. <sup>5</sup> ✧ Oire vokiara rutu-ia lotupa kovo goru pieiva, vo osa voea rutu voeao vieiario riroepa.

### *Vo Pol Masedonia-pato Kekereva Areo Uusi-ia*

<sup>6</sup> Uva vorarore vokaiva Frisia-ia ora Galesia-ia, vo osa Tugoropato Uraurato voeare korukuroepa Esia Provins-ia siposipo arapa Turaro vo reoro iava. <sup>7</sup> ✧ Uva va iava poua viropa vo Misia-ia uvuiario rekasiario-ia akeakevira avapaoro, oiso ra poua viro Bitinia-ia. Vo ovusa Tugoropato Uraurato goruvira rutu voeare oiso puraroepa, “Avoeao, opeita voare puteta Bitinia-ia koatasa.” <sup>8</sup> Oa iava voka ragapaoro aue Misia-ia vuutaaro iava varaaepa Troas iare. <sup>9</sup> ✧ Oire evoa-a uva areo uusi oueva Pol vokiario oa-ia iravu oirato kekereva Masedonia-pato, ovusa variripaoro torepaooro keeraparoepa oiso purapaoro, “Vore uriou Masedonia-ia igei tauvasa.” <sup>10</sup> Vo areo uusi isivaaro iava vatatopopaaepa Masedonia iare avasa. Uva ragai Luk voea tapo avaraepa. Uva voavi raga oiso taraiiepa, Pauto igei sipopare rera vaaro vatesa Vearo Siposipo.

### *Lidia Sopaua Poreeva*

<sup>11</sup> Oa iava Troas iava avaaiepa selpa uvuo-ia torevokovira Samotres iare avaro. Oire voava ita utupa voki-ia aue iare avaaiepa Niapolis. <sup>12</sup> ✧ Uva voava Filipai iare vao rovopa urui vovio Masedonia-ia sovara-ia. Vo uruiio oa oisoa tokipareve gavman ro vova Rom-ia. Oa iava voa ovokirovu-ia toupaiova. <sup>13</sup> Uva Sabat voki-ia kosi viroiiepa vore uuko ovi sirova oiso ragavira rugooro, Ari voa-a vo uva Jiu-pa irara variripa tapiaro toupaveveira. Uva voa uvuruoro airorovu riakora siposipoiova. <sup>14</sup> Oire uva iriavu riakova oira vaisiario, Lidia vova Taiataira. Iria oisoa raove varoro raga sipopaveve vara-ia moni oupaoro, eira iria oisoa lotu purapao Pautoa iare. Oire Pol vo siposiporoaro uvueva. Uva Turaro oira sopaoro karureva. Oa iava rera vo reorooro sirova utuopa. <sup>15</sup> ✧ Oire uva va iava baptaisa oueva ora voeao tapo oea oisoa oira vo kepaoro-ia toupaveve. Oa iava igeire oiso puraopa igei akeoro, “E uvuipatai ra ragai tapo uvurusa uriota vo kepa oaa-ia, vo rara

✧ 15:41: Ap 16:5 ✧ 16:1: Ap 14:6; Ro 16:21; 2 Ti 1:2 ✧ 16:3: Ga 2:3 ✧ 16:5: Ap 15:41  
 ✧ 16:7: Ro 8:9; Ga 4:6 ✧ 16:9: Ap 9:10, 18:5, 20:1, 3, 27:2 ✧ 16:12: Fl 1:1 ✧ 16:15: Ap 11:14; Lu 24:29

oiso ragai taraipata, Oirao pie vovouva o-ia.” Uva oisi raga oiso voreripavira igeire keerapaoro oiso purapaopa. Oa iava oira tapo avaiepa.

*Pol Vaio Ora Sailas Tuukeiva Vo Filipai-ia*

16 ✱ Uva ovokivu-ia avaiepa varirisa. Uva voa iriavu igei tapo uvurusa urioopa kovopava. O-ia riakova riro reova varao-ia oara utupaua karekepape. Uva vo reoroa oisoa purapaeve aue vo goruaro-ia tugara, oia oiso riroa monia oupaeve. Va oupaoro voeopa vara vatepaeve oea oisoa oira tokipaive. 17 Uva oira igeire ora Pol oiso keerapaoro utupaopa, “Voeao Reitoa rutu Pauto kovopa iraraaro, oea oiso vigei tavipaiveira vao iava Pauto vaaro raiva oa-ia uvuiparoi ra vigei vovevira oupareve ora rera iare.”

18 Uva oisoa vokiara rutu-ia oisi raga piepaeve. Oire va iava Pol reasioro oirare ora poreroepa oiso purasa auere tugarato ro oira reraaro, “Jisas Kraiss vo goruaro iavirava vii tavipaa, ra oira arova kosiu viro.” Uva va iava kosi ovoiro viropa oira iava vo voki raga-ia.

19 Oa iava voeao oea oisoa oira tokipaive taraiepa oiso, Easi kovoa oavi opesiei. Viapau oiso moni oupaviovere oira ruvara-ia ita. Oire uva voava kasipuoro vaiterei sitaiva Pol vaio ora Banabas vaiterei ivuoro. Uva voava vo urui sovara-ia vuruvuru-ia vaitereiva avaaepa oira vasi irara iare voea tapo ora gurusa. 20 Uva oa-ia oiso puraaepa, “Voeao Jiu-pa irara oea vigei vo ruviaro vuri piepaiveira. 21 Voea vo pitupituroaro-ia siposipopasi pisavira rutu. Uva vigei vao-ia Rom-pa irara viapau uvuipaviei ra va-ia vearo vaisi purape.” 22 ✱ Uva va iava riro irara rutu ora uvuruaepa vaitereo Pol vaio ora Sailas uposa. Uva vo uvurua-ia ora voea iava voeao turaro irara kuvupara oaive karikaripaiva rirovira rutu kasipupaoro vaitereire. Oa iava oiso puraaepa, “Vaiterei ragita.” 23 Oa iava vaiterei ragipaiva rirovira rutu. Uva vao isivaaro iava tuukepa kepa tokipato vateiva vaiterei oiso puraoro, “Vearovira rutu vaiterei tokiparivere.” 24 Oire va uvuoro vaiterei peoreva oisirire tuukepa kepa rutu sovara-ia. Uva evoa-a uva vaiterei iava tasiara kaporeva evao peroro-ia vaiterei tuukeoro.

25 ✱ Uva voki vuuta-ia Pol vaio ora Sailas Pautoa-pa variripasiepa erapaoro rera-ia vuurapa vaisi purapaoro. Vo osa oearovu tuukepa irara vaiterei uru piepaiva. 26 Va purasivoiva, riroto ravurike karekeroepa. Uva tuukepa kepa vituaro rikerikeepa. Oa iava riro tuparo karu piropa akukuvira. Ora kapo tuukero tapo varao vova voea rutu tuukepa irara kokotoaro iava rutu kovekoveepa oisi raga akukuvira. 27 Oire oa iava ro ira oisoa tuukepa kepa tokipareve eraoroepa riropa tuparo vo karuparoaro kekesa. Va iava ora rerare sigoa goro ragareva oiso ra ora uporo, uvare oiso keaparoepe, Voea vai rutu tuukepa irara toriivo. 28 Vo osa Pol rerare koruroepa oiso puraoro, “Ae, opeita eva purapari ora vii-ia. Easi igei rutu-a vao vo-ia.” 29 Va iava vuravu arereva, oa iava oira-ia avapaoro ikauvira koataroepe. Oire uva rirovira rikerikepaoro kovorepa vaiterei kokotoaro-ia Pol vaio ora Sailas. 30 Voava vaiterei tapo kosiro viropa oiso purapaoro, “Avoeao apeisi vai ragavira uvuiparai ra vuriara oaa iava ora porera?”

31 ✱ Uva rerare oiso purasiepa, “Ro Turaro Jisas Kraiss oirao pieri. Oa iava vuriara oara iava uvuipau ra poreu viro, visii rutu vao-ia ora voeao vii vo kepaoro-ia tapo toupaveira.” 32 Oire vao isivaaro iava voea rutupa siposiposiva ora voeao oea oisoa rera vo kepaoro-ia toupave va iava vao Turaro vo reoro. 33 Vo vuuta raga-ia eva vo vokiario ro ira oisoa tuukepa kepa tokipareve vaitereipa iava kapuara sisureva. Vao isivaaro

iava baptaisa oureva ora voea tapo oea tapo oiso toupareve. <sup>34</sup> Oire uva vaierei koata piereva rera vo kepaaro-ia vaierei aio vatesa voa. Uva voa rirovira rutu rorupareva ora voeao oea tapo oisoa toupareve, uvare oirao piea ouiva.

<sup>35</sup> Oire vokipaua voeao reipa irara oea polis irara aruiva auere tuukepa kepa tokipato tavisa, oiso ra vaierei kosi piereve. <sup>36</sup> Oa iava ro tuukepa kepa tokipato vaiereire oiso puraroepa, “Avasi gavaurea sovara-ia toupasa.”

<sup>37</sup> ✧ Ari oiso puraroepa Pol, “Akoea, viapau oiso torevokovira vegei kort rovoivora. Oa iava vegei raga ragaivora oearovu rutu osireiario-ia. Vegei toupaveaira vo Rom gavman sovara-ia. Uva apeisi-a? Evoea uvuipaa ra oisi raga ita vegei kosi pie ragaive ita vatauvira voava vo tuukepa kepa-ia, eke? Uva voea tavi iraopari, ra voea raga urioave vegei kosi piesa voava vo-ia.”

<sup>38</sup> Oire uva va iava voeao polis irara reipa irara tavisa voreaepa. Uva voea-a voeao oea rirovira rutu uririaepa, uvare oiso ragavira taraiapapa Pol vaio-ia ora Sailas, Eari Rom gavman vaiereiaro vaiereo. <sup>39</sup> Uva evoea urioaepa vaierei kosi piesa. Oa iava vaiereire oiso puraaepa, “Vei-ia vuria pura ragaio. Uva oiso vovoupaiei ra vo kavuoro ava iraoi uvai ragare.”

<sup>40</sup> Va isivaaro iava tuukepa kepa iava avasiepa Lidia vo kepaaro iare. Uva voa-a evoa uva oearovu riro oirao pie vovou irara kekesiva. Oa iava voea vovouaro goru piesiva voa. Vao isivaaro rutu iava voa rutu vo kavuoro avasiepa.

## 17

### *Tesalonaika Vata Pol Vaiore Ora Sailas Rirovira Kasipuaepa*

<sup>1</sup> ✧ Uva Pol vaio ora Sailas vo urireo-ia vokapaoro avasiepa Amfipolis uruia ora Apolonia. Uva voava aue-ia pousi viropa Tesalonaika urui uva oisoa Jiu vo kepaaro Reo Taisi Uvupa Kepa Sinagog toupave. <sup>2</sup> Uva ora rera vo pitupituaro raga sirova utuoro vo kepa-ia koataroepa. Uva voa vo peva-ia Sabat vokiropo Rigato voeapa karukarureva Pol <sup>3</sup> ✧ vo reo aviavi piesa Jisas vo siitokaaro iava, ora vao iava tapo osa vorevira toreroepa kopii tapi iava. Oa iava Jisas oirao piereva voeapa oiso puraoro, “Ari ita, Pauto reraaro Ropoto rutu Jisas.” <sup>4</sup> Uva oearovu rera vo reoaro oirao pieiva va uvuoro. Oa iava oiso vovouaepa ra vaierei tapo ora takuvuave. Ora oearovu Grik iava riro irara oea oisoa Pautoa-pa lotu purapai, ora airorovu oira vasi riako.

<sup>5</sup> Ari ita, oearovu voea raga iava Jiu-pa irara oea viapau oiso vaierei vo reoaro uvuiva va oirao piesa. Evoea-a oea oisoa vaierei vo kovoaro riiriipaive. Uva voea riro pokapoka irara oea ouiva oearovu tapo ora takuvusa aue Jiu, oiso ra voea rutu Pol vaio tapo ora upoave. Oa iava voea rutu avaaepa Jeson vo kepaaro-ia Pol vaiore taraasa voa. Uvare oiso ruipapaaepa ra oirara rutu osireiario-ia vaierei karekeive. <sup>6</sup> Oire uva vaiereire vura ragaoro Jeson ouiva ora oearovu tapo voeoro oirao pie vovou irara. Uva voea rutuva avaaepa voea ivuoro voeoro iare oea oisoa vo urui-ia turaropaave. Oa iava voeare oiso puraaepa, “Avoeao vaiereo Pol vaio ora Sailas aiterea oirara rutu vavagisi piepasiveira uvarovu rutu. Uva oisi-a oiso osa piesa vore ita uriosiei <sup>7</sup> ✧ aue iare Jeson taveteoro. Aiterea-a vaiereo Sisa vaoro reo goru pute irapasiveira oiso purapaoro, Iravu epao king. Rera vaisiario, Jisas.” <sup>8</sup> Oa iava oirara rutu ora turaro irara oea

oisoa vo uruio-ia toupaiue oea vo reo vao uvuoro ora sitaaepa rirovira rutu rugorugooro. <sup>9</sup> Oa iava Jeson ruvara-ia moni ouaepa ora oearovu voeao riro oirao pie vovou irara oiso-ia, Vosa viapau vuria vai purasivori, oire vo vori vao voeapa Jeson vase vore pieive. Oisi-a eisi osa vaierei pieivoiva, vaierei iava vaseiva. Oa iava avasiepa.

*Pol Vaio Ora Sailas Kovosiva Beria-ia*

<sup>10</sup> Uva vo rupa raga-ia Pol vaio ora Sailas sipo pieiva voeao oirao pie vovou irara aue iare Beria. Uva voare avasiepa. Oa iava Jiu vo kepaaro-ia Sinagog koatasiepa voeapa siposipo rovosa voa. <sup>11</sup> \* Voeao oea oisoa vo Beria-ia toupaiue oea viapau oiso oisoa toupaiue osa voeao Tesalonaika-pa irara, oea vaaru vovouvira rutu oisoa toupaiue auepa vo siposipo uvu arapa. Ari voeao Beria vata vo rugorugooroaro karu viropa, ovosura voeapa siposipopasiva. Uva va-a vao oa vituaro-ia oisoa vearovira Tugoropa Rigato taraapaiue voea voeao Beria vo osa Pol voeapa siposipopareve vaore, oiso ra rera vo siposiporoaro uvupaoro vearovira vara uvuipaiue, vosa va rutu sirova torevokopape Pol vo siposiporoaro. <sup>12</sup> Oa iava riro irara rutu Jisas oirao pieiva oiso-ia, airorovu-a oira vasi riakoro Grik iava, ora oearovu rutu oirara. <sup>13</sup> Vo ovusa oearovu Jiu-pa irara voeao oisoa vo toupaiue Tesalonaika-ia oea va iava uvuiva vao oa purapasiva Pol vaio oirara-ia vaeo Beria-ia Pauto vo reoro vatepaoro. Oa iava voare avaaepa voea piururuosa voea kasipu pieoro. <sup>14-15</sup> \* Oa iava oearovu oirao pie vovou irara Pol sipo pieiva uvavu avakava-ia. Uva voava Beria-ia Pol tapo avaaepa oearovu aue arova Timoti vaio ora Sailas Atens iare. Oire uva vao touoro vaiereire vorevira voea kokareva oiso, “Ragai iare ikauvira Timoti vaio ora Sailas arusa karepatai. Ra ragai tapo tousa utusi vo-ia.”

*Vo Toupai Pol Iava Vo Osa Atens-ia Toureva*

<sup>16</sup> \* Vosa vaierei ateate piepaoro Atens-ia Pol rirovira rutu rugorugoo iraoparoepa voeaore oea oisoa sopaura oaive tovopaiue aue-ia tokarasiara oaive, voea rutu voeao vo urui rutu sovara-ia tou irara. <sup>17</sup> Oa iava avaroepa oavu iare Sinagog Jiu vaaro vao oearovu tapo Jiu-pa irara ora reoreosa ora oearovu oearoa oisoa Pautoa-pa lotupaave. Uva vokiara rutu-ia tapo aivaropa tapi oisoa voea tapo ora reopasa avaparo. <sup>18</sup> \* Ari ita, oearovu voearo riro tarai irara oea tapo oisoa Pol tapo uvurupaave oiso-ia, Epikurian-pa irara voeao, ora Stoik-pa irara. Uva oisi voearei rutupa siposiporeva Jisas iava ora rera vo torearo iava tapo. Vo osa rera vo reoroaro pukopaooro oiso puraaepa rerare, “O ita. Koovoto eera ira riroara rutu reora purapare.” Vo ovusa oearovu oiso puraaepa, “Eera vigei siposipopare oearovu raga iava pisa irara pau irara.” <sup>19</sup> Oa isivaoro iava vao rerava Pol avaaepa aivaroa iare aue kukuearo-ia Ariopagas Pukui. Voa uva oisoa oaravu rutu lotuara rovririepasa ora gurupaave. Oa iava vao rerare oiso puraaepa, “Vearopai vosa igei taviri oraivai raga iava vao-ia osa ragavira vii vo reoroaro toupaiueira. <sup>20</sup> Uvare pisa reoro rutu purapariveira. Eva-a oa iava oiso ruipapaiel ra vara porearo iava vearovira rutu taraiio.” <sup>21</sup> Uva voearo Atens iava ora oearovu tapo aapaapau irara oea rutu oisoa reo uvu ruipapaave orekerovu iava varao airepara, oara iava tavitavipaave oearovu.

<sup>22</sup> Uva va iava Pol toreroepa voea rutu osireiario-ia vao vo Ariopagas Pukui-ia oiso purasa voeare, “Visii vao-ia Atens-pa irara. Uvuiparai visii kekea vo ovusa avivikepata rirovira rutu oearovupa pau irara. <sup>23</sup> Ari ita,

\* 17:11: Ais 34:16; Lu 16:29; Jo 5:39 \* 17:14-15: Ap 15:3 \* 17:16: 2 Pi 2:8 \* 17:18: 1 Ko 4:10; Ap 4:2

vo osa oisoa vokapaa, uva riroara rutu eravaoara oisoa kekepaoro viripaa voraro rutu visii vo uruiaro sovara-ia. Uva oavu-ia vo rigato epao oa oiso oisoa toupaiue oiso-ia, Vao-a vao eravaoa ropo pauto ira-ia viapau taraiapaviei. Uva rera-a ro pauto irapa oisoa loupata vo rera-ia tarai asavira, ira iava oiso ruipaparai ra visii tavitavia.

24 ✧ Ro-ia Pauto ira vo rasio rutu purareva ora orekerovu rutu varao oara rera sirova toupaiueira. Aue iava uvare rera reitoo rutu ora rovopatoa rutu vo vuvuiua-ia ora vo rasitoo-ia. Ari ita, viapau oiso vo toupaveira lutupa keparo-ia oara purapapeira vo ora vigei vavaeoro-ia. 25 ✧ Ora oiso tapo vo osa oearovu viapau uvuipaa ra oaravu avu vai rerapa vatepaiue vo osa rerapa kovopaiue. Eake iava? Uvare vara rutu-a vatepareveira oiso-ia, tootooa vao, ora vovoua, ora orekerovu rutu varao oara-ia vatevatea purapaveira oirara rutupa vo rasio rutu-ia. Uvare vaea kaevira raga toupapeira. 26 ✧ Ari ita, oirara rutu purareva kataito raga iava ro-ia rovopato. Ira raga iava voea rutu rigareva voraro ruture vo rasio rutu-ia. Uva rera raga Pauto vo vokie reesireva oa-ia karekeaverea, ora vo vokie oa-ia voea rutu opesiaverea, ora vo tapo uva toupaveira taru. 27 Uva vara rutu-a varao ora rera ragare taraapasa oara purareva. Uva vai pasi uvuipaa ra rera vai kekepaiue Pauto vo ora vara raga iava. Ari ita, oiraopavira rutu viapau oiso tauavira vigeipa toupaveira Pauto. 28 Uvare Pauto raga iavirava tootoopaviei, ora rera raga iavirava vokapai, ora auero rutu purapai rera raga iavirava. Oiso osa iravu visii iava riro taraito rigatoo purareva oiso, Vigei rutu-a Pauto ovii iraraaro. 29 O ita, oiraopavira vigei-a Pauto ovii iraraaro. Uva viapau rutu uvuipaviei ra oiso rugorugoopavio oiso puraoro, Easi oirara raga Pauto puraiva oiso osa tokarasi aue-ia gol ora silva ora avekea vo oirara raga vo rugorugooaro sirova utupaoro. 30 Ari ita, Pauto ira oisoa oirara rutu vura ragapareve voari tuariri rutu vo ovusa vaaru vovouvira toupaiue voea vo pitupituroaropa voea roviriei arapa. Uva vo vokie goruvira rutu oirara ruture oiso puraparoi, Visii rutu vuriara oavisii iava poreta viro. 31 Eake iava? Uvare ovokivu reesireva vao oa-ia oirara rutu taru rovirieireverea vo rasio rutu-ia kataitoo raga uvuiarova Jisas. Eera ira-ia vo reesi oiraopavira purareva rera vorevira kopii iava tore pieoro,” eisi osa puraroepa Pol.

32 Ari ita, vo osa vo reo uvuoro rera toearo iava Jisas rirovira ora agesi pieaepa vo va-ia vakuvakupaoro. Ovusa oearovu voea raga iava oiso purapaaepa, “O ita, igei oiso ruipapaiei ra vii vo siposipoaro uvuio ita va iava eva.” 33 Oa iava voea arova ora vaseroepa Pol vorepaoro. 34 Vo osa oearovivu rera sirova ora tavosiaepa oiso-ia, Daionisas ro Kaunselto vova Ariopagas Kort, ora o-ia riakova Damaris, ora oearovu tapo.

## 18

### *Pol Vo Kovoaro Iava Korin-ia*

1 Va isivaaro iava Pol avaroepe Korin iare vova Atens-ia. 2 Uva voa aivaroreva iravu tapo rera vaisiario, Akwila ira kavauroepa Pontas urui-ia. Ira airevi raga urioroepe vatuava oaro tapo aue iava Itali-ia. Aue vituaro iava uvare iravu king ira reo goru-ia oiso puraroepa, Vloea rutu Jiu-pa irara vo kavu iraoivere Rom-ia. Uva rera vaisiario ro-ia, Klodias Sisa. 3 ✧ Oire uva Pol vaiiterei tapo tupaoro kovoreva, uvare vaiiterei vo kovoaro oiso rutu oisoa toupaiue osa Pol vo kovoaro aue purapaoro varo keparo. 4 Uva oisoa vokiara rutu-ia vo Sabat vokiario-ia vo Jiu vaaro-ia Reo Taisi Uvupa

✧ 17:24: Ais 42:5 ✧ 17:25: Sam 50:10-12 ✧ 17:26: Mal 2:10; Diu 32:8 ✧ 18:3: Ap 20:34; 1 Ko 4:12

Kepa Sinagog toupaveve Pol vo voea varaaro rugorugooara akeakepaoro, oiso ra poreo viro Jiu-pa irara ora oearovu voea raga iava Grik-pa irara.

<sup>5</sup> Oire vo osa Sailas vaio ora Timoti kare ovoisiepa aue iava Masedonia-ia, ovusa vaiterei isivaaro iava oisoa Pol voea siposipopaveve vokiara rutu-ia rera iava Ropoto Jisas Pauto reraoro rera oirao piepaoro voeapa. <sup>6</sup> ✧ Vo ovusa aue Jiu-pa irara rirovira rutu kaureopaave rerava rera roeroapaoro. Uva vo kaureo uvuoro Pol voea ruvara-ia kuvupatoaaro iava poupou tovetoveroepa oiso puraoro voeare, “Eagara, visii vaaro eva vuri reo kaureoa. Ari ita, vosa visii vao-ia riroirovira raga toupata vapa vao, uva viapau ragai vo vuriaro-a. Visii raga vaaro. Ari ragai evapa viapau. Ragoa kosiparavi ratau tou irara iare.” <sup>7</sup> Uva Sinagog iava kosiro viropa Pol avasa iravu vo kepaoro iare. Rera vaisiario ro-ia, Tisias Jastas ira ro Pautoa-pa oisoa lotuparo. Uva rera vo kepaoro aue vatuario-ia oisoa toupaveve Sinagog Jiu vaaro. <sup>8</sup> Uva iravu Krispas ira oisoa Sinagog-ia reiparo, ira oisoa Turaro Jisas oirao piepareve ora voeao oea tapo oisoa toupaveve rera vo kepaoro-ia. Ora oearovu rutu tapo Korin iava oearoa rutu oirao pie vovou rutu ouiva Pol vo reoaro uvuoro. Oa iava voea rutu baptaisaepa.

<sup>9</sup> Uva orupavu-ia vokiario aue Turaro areo uusi-ia oiso puraroepa Pol-re, “*Opeita uriripaoro ora vii iava gisipo kapu piepari. Ari reo oara kosi piepari.*” <sup>10</sup> Uvare vii tapo toupaveveira. Uva viapau irai uvuiparoi ra vuria vai puraveve vii-ia. Ari ita, riro irara rutu oirara oaa vo uruio sovara-ia karekeavere, Ragai voearo rutu.” <sup>11</sup> Oire uva voa Pol katai iva-ia toureva ora kuro iva tapo, vo osa Pauto vo reoaro iava voea siposipopaveve.

<sup>12</sup> Oire vo osã voa iravu ro-ia Galio ira airepavira rovoparoepa gavmanpaoro voa Grik-ia. Vo ovusa voea rutu Jiu oiso ruipapaepa ra upoa purai aue-ia Pol. Oa iava rerava avaaepa aue iare kort oiso rera iava tavisã, <sup>13</sup> “Ro-ia ira vigei vaaro Reo Taisi putepaveveira oraivarovu purapaoro Pautoa-pa lotupasa.” <sup>14</sup> ✧ Oire vo osa Pol voea vo reoroaro puko rovopaveve, ovusa Galio ora poreroepa Jiu-pa irarare oiso purasa, “Vosa rera-ia taraipata oiso, Oearovu uvureva oirara, ora riro kaviruto, ora oaravu rutu tapo vuriaro oisoa purapaveve, eva-a oa iava uvuiparai ra visii Jiu uvua va-ia. <sup>15</sup> Ari vosa visii raga vaaro Reo Taisi, ora varao vaisiara, ora oreorovu rutu, uva visii raga uvuipatai ra vora torevoko ragata rera tapo. Oa iava viapau uvuiparai ra vara puraa.” <sup>16</sup> Osa iava voea kosi piereva voava vo kortupa tapi. <sup>17</sup> Uva vao oa isivaaro iava voeao Grik-pa irara aue Sostenis ouiva, ro ira oisoa Jiu vo kepaoro-ia Sinagog reiparo. Oa iava rera rãgiiva vo kortupa kepa rataoaro riaaro-ia. Uva viapau va-ia eva oa puraiva rera-ia, Galio oavu avu vai puraveve voea-ia.

### *Pol Antiok Iare Voreroepa Vo Siria Taere-ia*

<sup>18</sup> ✧ Uva-a voa vo Pol riro kaekae visivi toutou piereva. Oa iava voava ora vaseroepa voeao ruvara iava oirao pie vovou irara. Oa iava avaroepa selpa uvuo-ia aue iare Siria. Uva vaitereo-ia Akwila avukarei ora Prisila aiterea rera tapo avasiepa. Oire uva-a voa vo uvare avaroepa uva rera iava orui siiva rera vaaro reo ovoi reesioro, vao oa puraveve voa Jiu-pa irara vo pitupituaa. <sup>19</sup> Oire uva voava pouro viropa Efesas-ia. Uva voa vaitereo arova avaroepa Akwila avukarei ora Prisila rera raga Jiu vo kepaoro iare Sinagog voea rutupa voa siposiposa voea vo rugorugooaro tavariosa. <sup>20</sup> Uva rera ake ragapaiva oiso ra voea ruvara-ia tou rovoveve, ovusa voeare oiso puraroepa, “Easi viapau uvuiparai ra vo toua. <sup>21</sup> ✧ Uvare oiso vovouparai

✧ **18:6:** Ap 13:45, 51; 2 Sml 1:16; Esi 18:13 ✧ **18:14:** Ap 23:29 ✧ **18:18:** Nam 6:18; Ap 21:24; Ro 16:1 ✧ **18:21:** 1 Ko 4:19

ra ikauvira raga avara Jerusalem iare.” Oire uva oiso voea tavireva, “Ari ita, vosa Pautoa raga uvuipa ragai vorevira kare pierève visii iare pasi.” Oa iava voava Efesas-ia ora vaseroepa va-ia selpa uvuoa.

<sup>22</sup> Uva voava avakava sirova o-ia pouro viropa vo Sisaria-ia. Oire voava taru avaroepa Jerusalem iare lotuara rutuva vearo vaisi purasa. Uva oisi-a eisi osa piervevoiva, Antiok iare vararoepa.

### *Apolos Siposipopareva Vo Efesas-ia*

<sup>23</sup> Pol riro kaekae visivi toureva vo Antiok-ia. Uva va isivaaro iava avaroepa vokapaoro ouruivovu iare vo rasio-ia vo Galesia ora Frisia-ia. Uva oirao pie vovou irara sopaaro goru piepaoro vokapareva.

<sup>24</sup> ✧ Uva iravu Jiu-pato aue iava Aleksandria rera vaisiario, Apolos. Riro vearo reo puratoa rutu, ora vao-ia tapo oisoa vearovira rutu rirovira taraiparo aue Tugoropa Vuku. Ira urioroepa Efesas iare. <sup>25</sup> ✧ Uva rera-a ro-ia ira oisoa taraiparo vo Turaro vaaro-ia raiva. Oa iava oisoa kasivarivira rutu torevokovira siposipopareve aue iava ro Turaro Jisas. Uva Jon vo baptaisaro raga-a oa-ia oisoa taraiparo. <sup>26</sup> Oa iava Jiu vo kepaoro-ia Sinagog siposipo rovroepa goruvira. Uva Prisila vaio ora Akwila rera uvusivoiva, rera ousiva rera vearovira siposiposa rera tarai pieoro aue-ia Pauto vo raivaaro, uvare oaravivu vuri visivi rera vaaro-ia uvusiva. <sup>27</sup> Oire uva ro-ia Apolos ira oiso ruipaparoepa ra avaro Grik iare. Oa iava oearovu oirao pie vovou irara rera tauvaiva oavu-ia rigatoa rerapa raiva karusa va-ia. Oire vosa pouro viropa voa Grik-ia, oa iava voa toupaooro voeao oearovu oirao pie vovou irara rutu rirovira tauvapaoro toupareva voa. Voeao oea Pauto vo kavikoaro sovara-ia Jisas oirao pieiva rutu. <sup>28</sup> Oa iava rera vaaro-ia goru reo rutu Jiu vo reoroaro putepareva vo oavu-ia ora reoa. Uva Pauto reraaro ro Ropoto oirao pierveva rutu aue-ia Tugoropa Vuku.

## 19

### *Pol Efesas-ia Toupareva*

<sup>1</sup> Uva vo osa Apolos Korin-ia toupareva, ovusa Pol oiso ragavira vokaoro vo pukuiro-ia urioroepa aue-ia pou virosa Efesas. Uva voa oearovu kekereva disaipel irara. <sup>2</sup> Uva voea akereva oiso, “E Tugoropato Uraurato outavorao vo oirao piea rovoaro isivaaro-ia?” Uva va iava oiso rerapa taeaaepa, “E uvare igei taraipaiei rera-ia ro Tugoropato Uraurato?” <sup>3</sup> Oire va iava voeare oiso puraroepa, “Ari eakere vao baptaisa-a oa outavorao?” Oa iava oiso puraapea, “E aa vao-a? Ari vo baptaiso iava Jon oiso siposiporeva.”

<sup>4</sup> ✧ Uva Pol oiso puraroepa voeare, “O ita, Jon ita obaptaisa vaterevora visii reesioro visiigoa poreta virora vuriara oavisii iava Pautoa iare. Oire ita, tepa Jisas tapo oirao pieta ro ira iava oiso puraroera Jon, Ro ira ragai sirova uturovere utupaua. <sup>5</sup> Oa uvuoro baptaisaepa ora reesioro, ra rera vaisiario-ia Jisas Kraisi toupaiava. <sup>6</sup> ✧ Osa iava Pol ora rera vavaeoro tovoreva voea-ia. Oa iava voea iare Tugoropato Uraurato rerereva. Oa-a eva oa iava osarovu rutu aue reoara puraiva Tugoropato Uraurato goruaro-ia, ora varao tapo reo ravaaro. <sup>7</sup> Uva voea uvuiaro rutu-a voeao katai tau erao (12).

<sup>8</sup> Oire uva oisoa Pol avaparo Jiu vaaro iare Reo Taisi Uvupa Kepa Sinagog voea siposipopasa uriri asavira rutu vo peva sovara-ia kekira. Uva oisoa voea rugoaro akeakepareve, oisore ra oiso pieve osa rera vo

✧ **18:24:** Ap 19:1; 1 Ko 1:12, 3:5-6, 4:6; Ta 3:13  
Ap 13:24-25 ✧ **19:6:** Ap 6:6, 8:17, 2:4, 10:46

✧ **18:25:** Ro 12:11; Ap 19:3-4 ✧ **19:4:** Mt 3:11;



rugorugooaro Pauto vaaro iare Sara. <sup>9</sup> ✧ Ari vo osa oearovu viapau oisoa rera reoaro uvupaive. Uva vao vituaro iava Turaro Kraiss vo raivaarova oisoa kaureopaave oira uvururo osireiario-ia, uvare viapau oirao pie vovou vai oaive. Va iava voea tapo disaipel avaroepa oavu iare skulpa kepa aue vaaro Tiranass. Uva vao vokiaro rutu-ia voea oisoa siposipopareve. <sup>10</sup> Uva vo pitupitu-a vao oa purareva erao ivarei sovara-ia. Oa iava oirara rutu vo Esia Provins sovara-ia tou irara Turaro vo reoaro uvuiva, voea rutu voeao Jiu-pa irara ora Grik-pa irara.

### *Siva Ovii Iraraaro Iava*

<sup>11</sup> Uva vao vo tou-ia Pauto Pol-pa gorua vatereva. Oa iava vao pisipisa kovoro ravoto kovoro rutu purareva. <sup>12</sup> Oire vao varao purareva osasararovu rutu iava varo tokotokoro voea vararo vara-ia gavipasa. Uva vara-a evara oara oisoa oupaaro avapaave vo voeoro-ia upiapa irara vara tovopasa. Ra vara raga iava porete ovoipaave. Ora aue tapo tugara karero kosi piepaive vo vara raga-ia varao varo tokotokoro.

<sup>13</sup> ✧ Oire oearovu tariri irara Jiu oea vo kovoaro-a vao-ia pisa kovo tugara kosi piepa kovo oirara iava. Uva urioaepa vo kovo purasa akeakevira Jiss vaisiario sovara-ia oiso puraoro, “Visii vao-ia tugara kosi viro iraota, uvare vao-a oa puraio Jiss vaisiario sovara-ia, ro ira iava Pol siposipopareveira.”

<sup>14</sup> Uva voea voeao-ia erao vatara aue Siva ro Rovopato Pristo Jiu reraaro. Ira ovii iraraaro oea vo kovo puraiva. <sup>15</sup> Oire uva ro oirato rera iava tugarato oiso voea tavireva, “O ita, ira eveipaa eera Jiss vaiterei ora Pol. Ari iroo irara visii?” <sup>16</sup> Vao isivaaro iava voea rutu-ia ora vikiroepa rera ro ira-ia oisoa tugara toupave. Oa iava voea upopaoro virireva. Uva va iava kasikasioro toriiva gapuvira raga rirovira rutu ora voea iava varaura oaive kapua pieoro. <sup>17</sup> ✧ Uva vo siposipo rera iava ikauvira rutu voraro rutu avaepa Efesas sovara-ia aue iare Jiu-pa irararei ora Grik. Uva riroa rutu uriria ouiva. Oa iava Turaro Jiss vaisiario riro pieiva. <sup>18</sup> Oire uva oearovu voeoro oirao pie vovou irara oea urioaepa voea iare voeapa kosi pievira tavitavisa, oisore ra vuriana oaive kauuive varao oara oisoa purapaive voviri tuariri. <sup>19</sup> Uva oearovu voea iava oearoa oisoa kuuvu kovoro purapaive, ora voea varaaro kuuvu kovoro purapa vukuro ouiva vara kasisa voea rutu osireiario-ia. Uva vara rutu voriaro uvuiaro-a oiso toupai, Riroara rutu silva moniro (K50,000).

<sup>20</sup> Uva oiso rutu goruvira Pauto vo reoaro touva vao. Uva viapau oavu avu vai uvuipaepa oiso ra va puteve vo osa goruvira rutu kovaepa.

### *Vo Efesas Vata Kasipuaepa Pol-re*

<sup>21</sup> Uva varao isivaaro iava Pol goru rugorugoo oureva, oiso ra vorarore avaro Masedonia-ia ora Grik-ia. Oire vo osa vorarore avaro uvaroava, uvuiparoi ra Jerusalem-ia pouro viro. Va iava oiso puraroepa, “O ita. Tapa ra Rom-ia kekeavere.” <sup>22</sup> Vaitereo aiterea oisoa rera tauvapasi ira pierava Timoti vaio ora Irastass Masedonia iare. Vo osa oiso aueparoeapa ra tou pie rovoreve vao vo-ia Esia Provins-ia.

<sup>23</sup> Oire uva vo vokia-a vao oa-ia riroa upoa karekeepa vao-ia Turaro Kraiss vaoro raiva vo-ia Efesas-ia. <sup>24</sup> ✧ Iravu rera vaisiario, Demitriass ira oisoa kovopa irara oaro tapo oaravu garepa keparovi lotupa keparo purapareve aue-ia silva. O vo keparoro riakova pauva iria vaisiario, Atemis. Ora oearovu tapo tokarasi irara oea tapo oisoa purapareve vara raga-ia silva. Oara rutu-ia oisoa riroa rutu voria oupareve ora oirara oaro tapo. <sup>25</sup> Oire

✧ 19:9: 2 Ti 1:15; Ap 9:2 ✧ 19:13: Mt 12:27; Mk 9:38; Lu 9:49 ✧ 19:17: Ap 2:43, 5:5, 11

✧ 19:24: Ap 16:16, 19

uva ovokivu-ia ora rera voeaauro gurureva kovopa irara, ora oearovu tapo voeaauro areiivira raga oisoa oisi kovopaive tokarasi purapaaro. Oa iava voea ruture oiso puraroepa, “Avoeao, taraipatai vao-ia kovoa oa raga-ia monia oupapeira. <sup>26</sup> ✧ Visii vuupatai ra vurata ora uvuta vao-ia oara purapare Pol oiso purapaaro, Voeao-ia pau irara tokarasi irara oea purapai ora voea vavaeaauro iava, viapau oiso oiraopa irara. Ira-a ro-ia Pol ira voeao rutu vovouaro soporerevora Efesas ora uvarovu rutu voraro Esia Provins-ia. <sup>27</sup> Uva vao-ia oa iava pasi vao vigei vaaro kovoa oavi opesipere, ora varao tapo voriaara oavi. Ari ita, uva viapau oiso vava raga varao-ia, ari pasi vao tapo-a osa vai pasi viapau oiso oearoi varaopa lotupa keparo Atemis varaaro avivikepaavere. Oa vai iava vo keparō varao tou ragapaivere pasi. Ora oira tapo o-ia Atemis vaisiara rerevere iriapa oirara rutu lotu purapaaveira vo-ia Esia-ia ora voraro rutu vo rasio-ia.”

<sup>28</sup> Uva vo reoro uvuoro rirovira rutu raga pieiva kasipuoro. Oa iava voea rutu oiso puraaepa, “O-ia rirova rutu Atemis, vigei oiraaro vo-ia Efesas-ia.”

<sup>29</sup> Oire va iava oearovu tapo rovoaepa vo ora guruoro. Uva ora voea-ia vavagisiaepa. Viapau oiso ragavira taraipaaepa, Eake gurukoa vao, ora oiso apeisi ragavira piepaio. Osa iava voea rutu ikauvira urioaepa ora kiusa vo ora reopa uvuru sovara-ia, vo ovusa vaitereo ivupaiva Gaias vaio ora Aristakas vaitereo Masedonia Provins iava, aiterea tapo oisoa vokapareve Pol. <sup>30</sup> Oire Pol oiso ruipaparoepa ra rera tapo koataro vo uvuru-ia, ovusa disaipel irara rerare koruaepa. <sup>31</sup> Uva oearovu tapo gavmanpa irara vova Esia-ia oea rerare Pol korukoruoro rerapa rigatoaepa rera vate iraraaro oiso, “Opeita koatapaavere voea sovara-ia.”

<sup>32</sup> Orekerovu rutu voeare vo uvuru-ia vavagisiepa. Oa iava oiso vaivaisipaiva oearovu osivu ragavira reoreopaave, osa oearovu osivu ragavira purapaave ita. Uva viapau oiso ora voea-ia taraipaaepa oiso, Apeisi ragavira oiso osa piepai. <sup>33</sup> Uva oearovu Jiu-pa irara voea iava oea ro Aleksanda kekeiva. Oa iava rera peopeopaiva ira pievira ora voeapa. Vo ovusa oiso vovou ragaroepa ra voea tapetapereve ora rera vavaeaauro-ia, oiso ra ora reoreoave. Ra voea eakaive Jiu-pa irara. <sup>34</sup> Vo osa vo uvuru rutu vao-ia rera veipaoro oiso purapaepa, “Akoea. Rera ita eera Jiu-pato.” Oire va iava voea rutu rerava rirovira raga pieiva aue-ia erao vuuta oiso puraoro, “O-ia rirova oavi rutu Atemis vo Efesas-ia. O-ia rirova oavi rutu Atemis vo Efesas-ia.”

<sup>35</sup> Oa iava iravu kuskus voea tapetape ovoireva oiso puraoro, “Visii rutu vao-ia Efesas-pa irara. Iroutoa vai viapau visii iava taraiparoaveira vao-ia osa vigei rutu lotupa kepa tokipapeira Atemis vaaro, ora aue tapo aveke o tugoropava iria koveopa vuvuiua iava? <sup>36</sup> Vosa va-ia vao taraipata, oire ora tape pieta. Opeita oavu avu vai purapata. Eake iava? Uvare viapau oavu avu vai rutu vuupai vao putesa. <sup>37</sup> ✧ Easi visii voeao ou pietavoi vore. Uva viapau oiso oaravu avu vai kaviruivoi vo o vo kepaaro-ia lotupa kepa. Ora viapau oiso oira vaisiara vara pieivo. <sup>38</sup> Vosa Demitrias ora voeao tokarasi purapa irara oiso ruipaparo ra voeao oirara kortuive, oire uva torevoko raiva toupaivoi va purasa, vo osa reo rovirieipa irara va puraive, aue iava vo osa gavman vaaro reo goru sirova utuave. <sup>39</sup> Vosa oreoro va sovara-ia touve, oire uva vearopai ra va torevokota Kaunselpa aivaro sovara-ia. <sup>40</sup> Ari ita, vuupaviei pasi ra va-ia vao vuria vai oupe vo Rom gavmanaro-ia, uvare vigei rutu tokipareveira. Eake iava? Uvare viapau oiso vuupaviei ra va vao vuria aviavi piepe voeapa.” <sup>41</sup> Ore-a vao oa isivaaro iava voea rutu kosi piereva kuskus.

## 20

*Pol Masedonia Provins Iare avaroepa Ora Grik-ia*

<sup>1</sup> ✱ Oire uva va vao isivaaro iava Pol keeraroepa voea ruture disaipel auere voea tapo sekansa. Oa iava voea vovouaro goru piereva vo voeapa vearo reoro vateoro. Uva vao iava avaroepa Pol Masedonia iare. <sup>2</sup> Oa iava voraro rutu vokareva vo taerero rutu-ia voeoro oirao pie vovou irara vovouaro goru piepaoro. Uva vo voka-a eva oa-ia pouro viropa Grik-ia. <sup>3</sup> Oa iava vao tou rovoveva vo peva kekira sovara-ia. Uva vo tou-ia eva Siria iare avasa vatatopoparoepa aue-ia avasa selpa uvuo. Uva voare avasa auepaoro oiso uvureva, uvare rera uposa raiva purapaaepa Jiu. Oa iava viapau Siria iare avaroepa, ari vorevira voreroepa Masedonia iare. <sup>4</sup> Uva voeao-ia oirara oea rera tapo avaaepa vova Esia voea oiso, Sopata ro vova Beria ro-ia Piras oviitoaaro, ari Aristaka ora Sekandas aue iava vaierei Tesalonaika, ari Gaias vova Debi, ora ro-ia Timoti, ora aitereivu vaitereo vova Esia Provins, Tikikas ora Trofimas. <sup>5</sup> Voea rutu iraaepa tues aue-ia Troas igeire. Vo ovusa ragai Luk vorevira Pol tapo touava. <sup>6</sup> ✱ Vo vokiro vao Tugoropa vokiro isivaaro iava Yis Asa Bret Vokiro Filipai iava ora vaseiepa uvuoa-ia. Vosa vo vavae aue voki igeire puteva voa oa-ia aue-ia pou viroiepa Troas urui. Uva voa touiova katai wiki-ia.

*Pol Ovoiojavira Rutu Avaroepa Troas Iare*

<sup>7</sup> ✱ Oire uva vao rovopa vokia vo wik iava ovokia-ia igei rutu ora guruiepa kovukovu aio ora komunion aio purasa. Ari ita, riro kaekaevira rutu siposiporeva aue Pol katai tau erao (12) vuuta-ia putesa voa vo vokiario. Uvare oiso vovouparoepra ra voa ragava va iava vao voki ovoiro uvavure ita. <sup>8</sup> Uva vo kepa-ia otugivu oisoa toupave ivaraiapa tugi, oa sovara-ia vuravura toupai va vo uva ora guruiepa Pol vo siposiporo uru piesa. <sup>9</sup> Oire vo osa Pol voeapa riro kaekaevira rutu siposipopareva, ovusa iravu viovokoto, Yutikas kiuvupa ratao-ia pauparoepa rera uru piepaoro. Uva voa ruapareva. Osa iava koveroepra kukau viorooro riro kaekaevira kovesa vo rasiuaaro vo tugi iava vao vo pevapa tugi ivaraiapa rutu. Oire voava rera kae pieiva vo kopii raga, uvare ora kopii pie ovoiroepa. <sup>10</sup> ✱ Uva Pol vararoepa rera-ia pituoro taku virosa. Oa iava voeare oiso puraroepa, “Teapi kepaoro uriri ragapata. Viapau oiso oavu avu vai ei rera-ia. Ira ro tootoovira toupae.” <sup>11</sup> Uva vao isivaaro iava vorevira iparoepa vore ivaraiapa tugi va vao kovukovu aio ravaasa. Oa iava voea rutu va aioiva. Oire uva voa riro kaekaevira rutu siposipopareva voeapa, ovusa rerare aviepa. Oa iava voea arova voki ovoiroepa ora vaseoro voea arova. <sup>12</sup> Uva kareaepa voava vorevira rera tapo ro-ia viovokoto, uvare vorevira tootooroepa. Oa iava rera-ia roru iraoai va.

*Pol Uvuoa-ia Avaroepa Vova Troas Eisire Mailitas*

<sup>13</sup> Uva igei iraiapa selpa uvuoa-ia Asos iare, vo osa Pol raivaaro vokavira uturoepa igei iare. <sup>14</sup> Oire voava igei iare karero viropa. Uva voava igei rutu taru uvuoa-ia avaiapa ita aue iare Mitalini. <sup>15</sup> Voava ita topa uviroiepa va-ia selpa uvuo aue iare Kaios ruvara-ia. Uva voava taru pou viroiepa utupa voki-ia Semos-ia. Oire voava ita ora vaseoro topa uviroiepa Mailitas iare. <sup>16</sup> ✱ Oire voa Pol oiso ruipaparoepa ra Efesas-ia pute ragaive, uvare reasiparoepa oiso ra voeare pute ragave ovokirovu Esia-ia. Aue iava uvare

✱ 20:1: Ap 11:26; 1 Ko 16:5; 1 Ti 1:3 ✱ 20:6: Ap 16:8 ✱ 20:7: 1 Ko 16:2; Re 1:10 ✱ 20:10: 1 Kin 17:21; Mt 9:23-24 ✱ 20:16: Ap 18:19; 2 Ti 1:15

Pentikos Vureipa Voki Jiu vaaro iare ora ikau pieparoepa Jerusalem-ia, oiso ra ikavira voa poua viro.

*Pol Oira Vasi Irarare Avauereva Efesas-ia*

<sup>17</sup> Uva Mailitas-ia toupaooro Pol reoa siporeva Efesas iare voeaoe oea oisoa lotu kovo-ia irapaave, oiso ra rera iare urioave vo-ia selpa uvuoa-ia. Uva Efesas-iapa tauai visivi toupaveira. <sup>18</sup> Oire vo osa poua viropa rera iare, oa iava voeare oiso puraroepa,

“Visii rutu vearovira vao-ia taraipatai, oiso osa vova rovo voki rutu-ia Esia Provins-ia vovouisi oaa rutu tovo rovoavora vo kovo sovara-ia. <sup>19</sup> Uva viapau oiso ora vaisi oaa rei pieavora. Ari oisoa gau ragapaa vo pitupituro-ia voea varaaro vuri pitupituro, rara vara-ia ragai sirao piepaive. Ari ita, taraipatai va-ia vaø ragai vaaro tavaka vao-ia oiso osa oisoa ragavira keripaave voeao Jiu, oiso ra ragai upoive. <sup>20</sup> Uva vao-ia taraipatai oiso, Easi viapau oiso oreoroø karutuoro oarai vateavora voviri visiipa vo reo iava tauva reo. Ari ita, oiso-ia visiipa oiraopavira siposipopaavora vo aivaroaria-ia ora vo kepaara oavisii-ia. <sup>21</sup> Vo reo raga vao-ia oa vateavora voeareopa Jiu ora Gri, oeaerea voeareo vosiavora oiso voearei tavoro, Vuriara oavisii iava poreta viro aue iare Pauto, ra Jisas Kraiss oirao pieta ro Turaro oavi. <sup>22</sup> Uva vo vokio-ia avaparai Jerusalem iare, uvare ro Tugoropato Uraurato ragai ivupare goruvira. Uva va iava oiso rugooperai, Eake vai ragai-ia karekepere voa evoa Jerusalem-ia? <sup>23</sup> Ari ita, vao raga-ia taraiparai vo osa virivira vokapaaveira voraro uruiara rutu-ia, uva Tugoropato Uraurato ragai tavipareveira varao raga iava tavakaara, ora vo osa ragai tuukepaive tuukepa keparo-ia oara kekeavere vovio utupauavi.

<sup>24</sup> ✧ “Ari ita, vao ragai vo tootooro oa-ia viapau oiso rugooperaveira vo osa kovopaaveira. Ari ita, vava toupaa auere oiso ra va iava ragai vo kovoaro ora ragai vo raiavaoro opesi piea vareo oarea ragaipa vatereva Jisas Kraiss oirara rutupa siposipopasa Pauto vo tokiaro iava vearoa.

<sup>25</sup> “Ari ita, visii rutu tapo tupaavora vo Sara iava siposipopaoro Pauto vaoro. Uva vaviopavira raga vara rutu varao opesi ovoiei. Uva taraiparai oiso, Easi viapau oiso ragai puaro keketavere rara vorerivira. <sup>26</sup> Oa iava visii rutu tavitavi iraopaa vo vokio-ia oiso-ia, Vosa ro ira visii iava oiso opesiro oirao pie asavira raga, uva viapau rutu oiso ragai vaoro-a. <sup>27</sup> Uvare viapau oiso visiipa oavu avu vai karutupaavora vo osa visiipa Pauto vo reoro iava siposipopaavora. <sup>28</sup> ✧ Oire uva vatatopopatai. Ra vearovira ora tokita, ora voeao tapo Pauto voearo oea visii vo tokiaro sovara-ia Tugoropato Uraurato oea tovorevora. Ra oiso ora tokita osa oearovu sipsip karero tokipaiveira. Visii tavipaa ra voeao aio pie iraota vao-ia Pauto vo reoro, voeao oea roporoporevoiva Pauto, voea vorireva Jisas revasiaro-ia vo evao parikou-ia. <sup>29</sup> Ari ita, uvare oiso ragavira taraiparai osa oearovu osararovu iava ora kiavere visii sovara-ia voeao visii iava oearovu riro oirao pie vovou irara kavirusa. Oiso osa aakau kare uriopaaveira sipsip ragui aiopasa voea kavirupaoro. <sup>30</sup> Ora oiso tapo auepa ora visii raga iava oearovu oearoa rirovira kuuvuavere. Ra visii iava oearovu keave, Voearo oirao pie vovou irara ora voea sirova utupasa. <sup>31</sup> Oire oiso-ia, ra uutupaoro ora vatatopopata. Ra vaore rugoopata oa iava visiipa oisoa siposipopaa vokiara rutu-ia aue sovara-ia vo peva ivaro (3 yia). Oiso tapo osa rirovira oisoa gaupaoro visiipa siraopara.

<sup>32</sup> “Vo vokio-ia visii tovopaa Pauto vo tokiaro sovara-ia. Ra Pauto vo reoro-ia sopaura oavisii aio pieta. Oreoa-a vao-ia goru reo rutu oreoa

uvuipai visii sopaaro goru piepasa. Oa iava utupaua oiso visii viraakorevere, uvare visii rutu-a rera voeaaro oea roporoporeva ora rerapa. <sup>33</sup> Visii tavipaa oiso, Viapau oiso oearoi visii iava orekeroiaro riiriipaavora moniara vai, ora kotokotoara vai, ora veaopara vai kuvupara vai. <sup>34</sup> Uva visii raga vearovira rutu taraipatai ragai-ia, ragoa ora ragai vavaeoro-ia orekerovu oisoo purapaa moni oupasa aio voripasa ora ragaipa, ora voeao tapo ragai iavapa irara. <sup>35</sup> ✧ Ragai-a ovoovoa visiipa ragoa visii kareke pieavora vao-ia oiso, Apeisi ragavira uvuipatai ra voearovio apota irara tauva ragapata vaore rugoopaoro Jisas vo rearo o-ia oiso puraroepa, “*Roru-a vao oa oupari oearovu vate ragapaoro, oa-ia putepaiveira vo roru oa karekepapeira varao-ia oara ou ragapari.*”

<sup>36</sup> Uva vo reoa-a vao oa opesi pierevoiva, Pol takuro viropa voea tapo varirisa. <sup>37</sup> Oa iava voea rutu rirovira gauiva rera raupaoro ora rerava uugaapaoro. [Evarei voea vo sekanaro.] <sup>38</sup> Uvare vaore rirovira rugorugooaepa oreoa-ia oiso puraroepa voeare, “Viapau oiso visii kekeavere vorevira.” Eva-a oa iava voea vovouisiro oaive vavataepa siraooro. Uva va vao isivaaro iava rera tapo avaaepa selpa uvuo iare.

## 21

### *Jerusalem Iare Avaroepa Pol*

<sup>1</sup> Vo osa voea arova lotu tokipa irara ora vaseiepa vo-ia Efesas avaro uvuoa-ia, aue iare torevokovira pou virosa Kos-ia. Uva utupa voki-ia avaipea Ros iare. Oire uva voava avaipea Patara iare. <sup>2</sup> ✧ Uva evoa oavu kekeiovora selpa uvuo oa aue iare Finisia avasa auepaaepa. Uva va iare ora vaseiepa vo uvuo arova oa-ia urioiepa vore. <sup>3</sup> Oire voa urioapaoro koike varata iava Saipras toko vurapaoro puteiova torevokovira avaro Taia iare vao oa Siria taere sovara-ia toupaveira. Uva voa-a vo uva selpa uvuo arova ora vaseiepa vo osa va iava kovopa irara kotokotoara rere piepaiva rogara arore. <sup>4</sup> ✧ Uva voa toupapaoro oevuva aivaroiava disaipel. Oa iava voa touiova katai wik rutu sovara-ia. Uva Tugoropato Uraurato vo goruaro iavirava Pol taviiva oiso, “Viapau uvuipau ra Jerusalem iare avau.” <sup>5</sup> ✧ Oire uva vo vokiro isivaaro iava ora topaiepa ita uvavure ita avaro. Oire vo osa voava igei rutu ora disaipel irara ovii avaroaro igoa rutu ora vaseiepa vo urui iava avaro. Uva voava avapaoro rogaraua-ia taku viroiepa varirisa. <sup>6</sup> Oa iava igei rutu ora igeiva sekaniepa ora tavarisa voava, vo ovusa voreaepa atoiare ovusa uvuoa-ia avaipea.

### *Sisaria-ia Profetato Agabas Pol Vatareva Reoa*

<sup>7</sup> Vo osa aue iava ita Taia-ia avaipea vore Tolemes. Uva evoa oearovuva oirao pie vovou irara sekaniepa voa touoro katai voki-ia. <sup>8</sup> ✧ Oa iava utupa voki-ia avaipea ita Sisaria iare. Uva voa iravu vo kepaoro iare avaipea rera vaisiario ro-ia, Filip ro evanselista. Voeao iava rera oea roporopo rovoiva tuariri Jerusalem-ia erao vatara oira vasi irara. <sup>9</sup> Uva rera ovii riakoaro tavauru riako vo resura airoa vairo oisoo oiso rutu reopaave osa profet irara, varao reesipaoro ravotovira oara uvuipai ra karekepape vo utupaua.

<sup>10</sup> ✧ Oire uva ovokirovu-ia voa toupaiava ovusa iravu ro-ia vararoepa igei iare Judia Distrik iava rera vaisiario, Agabas ro profetato. <sup>11</sup> Oire vosa igei iare karero viropa, oa iava Pol vo iroaro takipa iro oureva ora rera iava vavaeara ora kokotoarei tuukesa oiso puraoro, “Vo irore Tugoropato

Uraurato oiso taviroi, Ro vo iro-ia takiparoveira, ira tuukeivere Jiu vo-ia Jerusalem-ia. Osa iava osararovupa rera vateivora, rera vuri pieivere.”

<sup>12</sup> Uva vo reoro uvuiovoiva, igei rutu ora voeao oea vo kepa-ia oisoa toupaipe oiso Pol rirovira rutu vosi ragapaiova, “Viapau rutu uvuipauei ra Jerusalem iare avau.” <sup>13</sup> Vo osa oiso puraroepa, “Eake-a va oapa gaupata ragai vovouaro vavata pie ragapaoro? Ari ita, voare vatatopoparai Jerusalem-ia. Eagara vosa ragai tuukeive voa. Ora vao tapo oare vatatopovira toupaa, Eagara vosa kopiira auropa Turaro Jisas voa vo Jerusalem-ia.” <sup>14</sup> ✱ Oire uva va iava oiso aueiepa, Easi viapau rutu uvuipaviei oiso ra rera vovouaro vorepe. Oa iava rera eakaiova oiso raga rerare purapaoro, “Ari ita, vao ragapa ruipapaiei vo osa Turaro raga-a rera vo ruipaaoro purareve vii-ia.”

### *Jerusalem-ia Pol Ora Rera Vo Kovoaro Iava Siposiporeva Reipa Irarapa*

<sup>15</sup> Vao isivaaro iava auero oaio vatatopoiova ipa ovoisa voare Jerusalem-ia. <sup>16</sup> Oire uva oevu disaipel irara Sisaria iava igei tapo avaaepa Neson vo kepaoro iare okepa-ia toupaiovere. Ro-ia Neson ira Saipras iava urioroepa, ira oisoa rovovira rutu Pauto oirao piepareve. <sup>17</sup> ✱ Oire vo osa pou viroiepa Jerusalem-ia, ovusa oearovu oirao pie vovou irara igei-ia rirovira rorupaiva.

<sup>18</sup> Oa iava utupa voki-ia Pol igei tapo avaroepa Jems iare ora oearovu lotua-ia reipa irara. <sup>19</sup> ✱ Uva pou virooro Pol voeava sekanroepa. Va isivaaro iava voeapa siposiporeva katakataivira varao iava oara purapareva Pauto voeaoapa ratau tou irara vo rera vo kovoaro-ia Pol.

### *Pol Reo Uvuroepa Reipa Irara Ruvara-ia Oa Iava Tempel Iare Avaroepa*

<sup>20</sup> ✱ Vo osa vo siposipo vao uvuiva, oa iava Pautoa-ia vuurapa vaisi puraiva. Uva va iava oiso Pol-re puraiepa, “Ari ita, vo-ia Jiu-ia taraiapauei, uva riro irara rutu oirao pie vovou irara toupai riro tukuro rutu (tausen). Vo osa tapo goruvira rutu vao raga sirova Moses vaaro Reo Taisi utupaaveira. <sup>21</sup> Ari ita, oearovu voea iava Jiu-pa irara vii iava tauai rutu oisoa tavitavipaave voeao oirao pie vovou irara oiso, Ro Pol voeao Jiu siposipopareveira oearoa ratau tou irara vo taereroaro sovararia toupaiaveira, oiso ra Moses vaaro Reo Taisi eakaive. Ora vao tapo oare koruparoveira oiso, Opeita ora visii voeaooro kakae vure rakari verapata. Ora opeita vao tapo sirova utupata Jiu vo pitupituaru. <sup>22</sup> Oire uva apeisi ragavira, vo osa vii vo touaro iava uvuivere vo-ia voeao Jiu iava voea oirao pie vovou irara? <sup>23</sup> Uva oiso veoropai rutu vosa oisi pieri oiso osare vii tavipaiovoi oiso, Vo resura epao oira vo-ia oea oavu reo ovoi puraivora oavu avu purasa Pautoa-pa. Uva va puraoro ora voea-ia reesia puraivere ora gagavurioro. <sup>24</sup> Oresuai tapo avauvere rara Jiu-pa irara vaaro tugoropa sisu purasa. Oire uva vo pitupituo vigei vaaro voririvere tugoropa sisu ora vao koruoupara tapo, vo osa ora vii iava orui gagavurisa auropau. Oa iava oearovu uvuipaai ra vii-ia taraiave oiso, Akoea, ari vara rutu-a varao oara iava kuuvupaaveira. Ari ita, oiraopavira rutu Pol Moses vaaro sirova Reo Taisi utuparoveira. <sup>25</sup> ✱ Uva igei vo rigato sipoioyora voeapa oearovu oirao pie vovou irara ratau tou irara voea origatoa tavipapeira Moses vaaro iava Reo Taisi. Oa oiso purapapeira, Veoropai ra varao raga sirova utupata oiso-ia, Opeita varao koruoupara aioro aiopata oara vatepaiveira oearovu tokarasi irarapa vara-ia vuvui purapaoro. Opeita ora visiiva otopata oara kavu iraota. Opeita vo karero varuere kare aiopata okarea kopii piepataveira

✱ **21:14:** Mt 26:42; Lu 22:42 ✱ **21:17:** Ap 15:4 ✱ **21:19:** Ap 14:27, 1:17, 20:24 ✱ **21:20:** Ap 22:3; Ro 10:2; Ga 1:14 ✱ **21:25:** Ap 15:20, 29

voea kaapaoro. Oa iava revasiva viapau puteiveira vo kare iava. Opeita revasiara aiopata.” <sup>26</sup> ✨ Oire uva utupa voki-ia vo resura tapo avaroepa Pol voeapa va vorisa tugoropa sisu. Oa iava voea rutu va puraiva ora rera. Eisi osa iava Jiu vo kepaaro-ia Rovopa Kepa Tempel koataroepa va iava vao reo ovoi reesiaro vearovira voea tavitavisa. Oire uva ora rera-ia tapo oavu purareva tugoropa sisu, oisore ra sisigaruevira rutu toupaveve. Osa iava voea tavireva oiso, “Va vao tugoropa sisu oa opesipere vosā koruoua puraio, vo rara erao vatarapa voki putevė.”

### *Pol Rauiva Vo Tempel Sovara-ia Rera Iava Gasisa*

<sup>27</sup> ✨ Vo osa erao vatarapa voki tutuu pieva osa oavuu Esia Provins iava voea Jiu-pa irara Pol kekeiva Tugoropa Kepa Tempel sovara-ia. Oa iava voea oearovu rutu kasipu pieva voea vavagisi piepaoro. Oa iava Pol sitaoro rera ivuiva <sup>28</sup> oiso keerapaoro, “Avoeao uriota! Uriota! Ro kekesa oirato ira uvarovu rutu avaparoveira oirara rutu vovouaro poreporepasa, oisore ra varao eakaive Jiu vo pitupituroaro. Ora varao rutu oara toupaveira Moses vaaro-ia Reo Taisi, oisore ra vara tapo kavuive, ora vao tapo Tugoropa Kepa. Oire uva vo vokio ita koataparoi aue-ia Tempel voea tapo voeao ratau tou irara vo kepa-ia vuivupasa, osapa oiso tugoro iraopapeira.” <sup>29</sup> ✨ Oa iava oiso puraaepa, uvare vokipaua Pol kekeiva ovusa uruia sovara-ia toupaveva iravu tapo ratau tou irara iava rera. Ira vaisiara-a ro, Trofimas, Efesas iava rera. Ari ita, uva viapau oiso Tempel sovara-ia koatasiepa, ari rera roruoru ragapaiva.

<sup>30</sup> Oire uva vo urui rutu ora sitaoro vusiiva Pol rausa Tugoropa Kepa sovara-ia. Uva voava rera ivupaoro kosia viropa. Uva va isivaaro iava riro ratau tupaoro va goruiva rera asavira.

### *Rovopato Viurupato Rom Gavman Tokipato Pol Oureva*

<sup>31</sup> Uva voea-a voeao kasipu irara oea oisore auepaaepa ra Pol kopii pieve rera upooro. Osa-a oiso osā iava oavu rigatoa ava pieiva iravu iare rovopato voeao iava viurupa irara rera. Origatoa-ia oiso puraaepa, Voea rutu vo Jerusalem-ia oiso ruipapaai ra Pol upoive, uvare kasipuvira rutu toupai rerare. <sup>32</sup> ✨ Oire iravu ro-ia ofisato ikaureva oearovu tapo reipa irara ora viurupa irara voare vo kasipu uvuru uva touva. Uva rera kekeoro ora oearovu viurupa irara Pol eakaiva rera kopii pie arapa. <sup>33</sup> Oa iava ro-ia ofisato Pol ruvara iare tutuureva rera-ia pitusa auere rera kort piesa. Uva oiso voeao viurupa irara tavireva ofisato, “Vearovira rutu rera Pol tuuketavere goruvira oirorei-ia sen irorei vai.” Vo uvuru voeao akereva oiso, “E irouto-a rera? Ira eake purapare?” <sup>34</sup> ✨ Oa iava oavuu oiso puraaepa, ovusa oavuu osirovu ragavira ita aia reopaaepa. Uva viapau oisi vituaro iava oiso reoa vai oupareva, uvare riroirovira raga ora reopaaepa. Uva ofisato viurupa irara tavireva oiso, “Avata rerava Pol vore visiū vo kepaaro-ia.” <sup>35</sup> Oire vo osa kepa oaive-ia voea viurupa irara rerava karea viropa. Oa iava vo kepa taapaoro vituaro iava ipapaoro ora voea raga vituaro-ia rera ipa pieva, uvare oearovu rirovira rutu kasipupaaepa rerare Pol. <sup>36</sup> ✨ Uva voea rutu rerare raga piepaoro urioaepa oiso purapaoro, “Rera upota! Rera upota!”

### *Pol Jiu Tavireva Rera Vo Oirao Piearo Vituaro Iava*

<sup>37</sup> Oire tutuu pieva ora voea vo kepaaro-ia viurupa irara rerava koatasa. Uva voava ofisatoare oiso puraroepa Pol, “E vuuparai ra vii tapo ora reo

✨ **21:26:** Nam 6:13; Ap 24:18 ✨ **21:27:** Ap 24:18, 26:21 ✨ **21:29:** Ap 20:4, 18:19 ✨ **21:32:** Ap 23:27 ✨ **21:34:** Ap 19:32 ✨ **21:36:** Lu 23:18; Jo 19:15; Ap 22:22

rovora?” Oa iava vo reo uvuoro vao Grik reo ro ofisato oiso puraroepa rerare, “O ari Grik reo-ia taraipauai? <sup>38</sup> \* Uva vii vo reoaro-ia taraira, viigoa viapau oiso gavman tapo ora upouepa voviri tuariri oearovu vo rugorugooaro vavagisi pieoro. Vo ovokia-ia vo resura tukuro (4,000) tuvetupeaivora raaka tapire.” <sup>39</sup> Oa iava Pol rera vo reoaro pukooro oiso puraroepa, “Iu ita, ragai-a Jiu-pato vova Tasas-ia vo Silisia taere. Vo uruio oa-ia rei vaisi toupaveira. Uva oiso ruipaparai ra voeao tapo oirara ora reora.” <sup>40</sup> \* Oire va iava ro ofisa oiso rerare puraroepa, “Oire ita, oisi pieri voea tapo.” Oire voava Pol taapa kukuearo-ia torepaooro voea rutu tapetapereva aue-ia vavaearei. Uva ora siroi pieaepa. Oa iava voeava ora reoroepa Hibru-pa reo-ia rera Pol.

## 22

<sup>1</sup> Uva voeare oiso puraroepa, “Aite irara oaa ora araoko irara oaa. Ragai uvu iraota vao-ia osa visii tavitavipaa ora ragai iava.” <sup>2</sup> Oire vo osa Hibru-pa reo-ia reoreoroepa voeare, osa va-ia rera uvuoro rirovira rutu riteiva reo tokooro. <sup>3</sup> Uva oiso puraroepa voeare,

“Ragai-a Jiu-pato ragoa vo kavauraera Tasas-ia Silisia taere sovara-ia. Oa iava Jerusalem-ia voava skulsa avaraera. Oire uva voa toupaveira iravu Gameliel ragai reraaro tisato, ira ragai vearovira rutu siposiporevora Reo Taisi vao vigei aao iraraaro vaaro. Oa iava vearovira rutu Pauto sirova utupaveira. Uva viapau oiso iraiiei visii-ia ira uvuipa ra oiso piereve osa toupaa. <sup>4</sup> \* Ari ita, riroa rutu tavaka oisoa kareke piepaa voeao oirao pie vovou irara Kraiss vo raivaaro-ia, vo osa voeare taraapaavora voea upopasa. Voea rutu oirara tapo ora riakora oearoa rutu oisoa oupaa tuukepa kepa iare. <sup>5</sup> Uva voea rutu-a voeao-ia reipa irara pris irara ora voea Kaunsel irara oea rutu uvuipaa vo reo oirao pieive visipi ragai vaaro, uvare voea ruvara-ia pasiara ouavora vo Damaskas iarepa raiva karusa voeare voa tou irara oirao pie vovou irara. Oa iava vo raivaao-ia avaraera oearovu vovesa oirao pie vovou irara vore Jerusalem-ia, oisore ra voa voea upoio.

### *Pol Voea Tavireva Ora Rera Vo Pore Uviroaro Iava*

<sup>6</sup> \* “Ari ita, vo osa avaparaera vore Damaskas-ia ruvara-ia ravireopa vuutavi-ia, ovusa voa ragai iare varaera sisikore aviavi vuvuiua iava ragai aau piesa. <sup>7</sup> Oa iava rasiua are kove ovoiraera. Uva voava vo reo uvuavora oa oiso puraera ragaire, *Sol, Sol. Apeisi iava ragai vuri piepariveira vokiara rutu-ia?* <sup>8</sup> Uva oiso akeavora, Turaro, irouto-a vii? Oa iava Turaro oiso puraroepa, *Ragai-a Jisas ragoa upopariveira vokiara rutu-ia.* <sup>9</sup> \* Ari ita, voeao oea tapo vokapaavora oea vo aviavi kekeivora, osa viapau vo reo uvuivora. Oa uvuavora, ragai raga.

<sup>10</sup> “Oa iava oiso puraera rerare Turaro, Uva eake vai purapaa? Oa iava oiso ragai tavirevora rera Turaro, *Toreu vova ra avau Damaskas iare. Uva evoa iravu vii tavirevere rara varao rutu iava oara vii iare uriopere utupaua.* <sup>11</sup> Ari ita, ragai aau pievora vo aviavi, oa iava ragai sikuropaivora Damaskas iare avapaoro.

<sup>12</sup> \* “Uva voa iravu oisoa toupaveire rera vaisiara, Ananias vearoto lotu purapato, Uva oisoa Moses vaaro sirova Reo Taisi vearovira utuparo. Ro irapa oisoa Jiu-pa irara rutu avivikepaave voa Damaskas-ia. <sup>13</sup> Ira ragai iare urioroepa. Uva ragai ruvara-ia tutuu pieoro oiso puraroepa, Araokotoa oaa, Sol. Vorevira vurari. Oa iava vorevira vuraavora vo rera keke ovoisa.

\* 21:38: Ap 5:36; Mt 24:26    \* 21:40: Ap 12:17, 22:2, 26:14    \* 22:4: Ap 8:3, 26:9-11; Fl 3:6

\* 22:6: Ap 9:3    \* 22:9: Ap 9:7, 26:13    \* 22:12: Ap 9:17, 10:22



<sup>14</sup> Oire va iava Ananaias ragaire oiso puraroera, Vegei aao iraraaro reraaro Pauto vii reesirevo, oisore ra rera vo vovouaro-ia taraiu. Ora vo rara Torevokoto kekeri rera reraaro Kovopato, ora vo osa rera vo reoaro uvuri vo reo oa kosi piro rera gaisipoaro iava. <sup>15</sup> Vaore oiso ra vara rutu iava tavitaviu varao oara kekerivoroaro ora varao oara uvurivoroaro voea rutupa oirara. Ra vara iava rera oirao pieri voea rutupa. <sup>16</sup> ✧ Oire uva eakere tuepau. Avau bapataisa ousa, ora rara tapo Jisas Kraisa areri ra vii vaaro vuri vovu verareve. Eisi osa puraroepa Ananaias ragaire.

### *Pauto Pol Siporeva Ratau Tou Sararore*

<sup>17</sup> ✧ “Oire uva Jerusalem iare voreraera. Uva voa-a vo Jerusalem-ia uva variriparaera, ovusa areo uusi sovara-ia ragai iare urioroera Turaro, vo ovusa Tempel sovara-ia toupavora. <sup>18</sup> Uva Turaro ragai tavirevora aue-ia areo uusi oiso, *Jerusalem iava avau ikauvira, uvare vo tou irara viapau oiso vii reoroaro uvupaivere varao ragai iava.* <sup>19</sup> Oa iava oiso puraraera rerare, Turaro oearovu ragai-ia taraipaa vo osa avaparaera vorarore aivaropa tapiro voeare taraapasa oirao pie vovu irara, auere voea ragipasa ora voea tovopasa vo tuukepa kepa sovara-ia. <sup>20</sup> ✧ Ora vao-ia tapo taraipaa ragai-ia vo osa vo tou-ia toupavora, ovusa Stiven vurokooro rera kopii pieivora aue-ia aveke ro vii kovopatoaro. Oire uva vo vokia-a eva oa-ia ragai toupavora. Oa iava voeare oiso puraraera, lu vearopai, rera kopii pieta, vo osa voea vo ogooroaro tokipavora aue kuvupa ogooro oara veraivora ora voea iava rera uposa. <sup>21</sup> ✧ Ari ita, Turaro ragaire oiso puraroera, *Jerusalem iava ora vaseu, uvare voava vii arupaa. Ra avau osararovu rutu voeao ratau tou irara tavitavisa tauai.*”

### *Pol Utupato Ruvara-ia Toureva*

<sup>22</sup> Ovoiei, voava voea rutu ora siroi pieaepa Pol vo reoaro uru piepaoro. Ari vosa ratau tou irara iava voea tavireva, oa iava rerare rirovira rutu kasipuaepa. Oire va iava voea rutu raga pieoro oiso puraepa, “Rera kopii pieta. Teapi vo raga tootooparo.” <sup>23</sup> ✧ Uva rerava oivepaoro rasiara kakavupaoro va-ia vikipaaepa viara-ia. Eva-a oa-ia kuvupara oaive tapo sitapaoro ora voea iava vara vikipaiva. Oara rutu-ia rerare kasipua kosi pieiva vao voea vo pitupituaro. <sup>24</sup> Oa iava ro ofisato rera koata pieveva. Uva rera vateoro voeapa oiso voea tavireva, “Rera ragipata, ra oiraopa vai iava taviro vao oapa kasipupaai rerare Jiu.” <sup>25</sup> ✧ Uva vo osa rera ragisa rera tuuke rovoiva, ovusa iravu ofisato ira rera ruvara-ia toreparoepa irare oiso puraroepa Pol, “E torevokopai, vosa vii vao Rom gavmanaro iava oiratoa vai ragiri, ro ira viapau rera reoaro kosi pierive rovoivora aue iare taava kort?” <sup>26</sup> Oire uva vo ake uvuoro ro ofisato roari rovopatoa ruture avaroepa oiso purasa, “Apeisi vai ro piepari oirato. Uvare Rom gavmanaro iava rera.” <sup>27</sup> Uva va iava urioroepa Pol akesa oiso, “E vii-a vao Rom gavman iava? Ragai taviri.” Uva Pol rerare oiso puraroepa, “Aure.” <sup>28</sup> Oa iava ofisato rerare oiso puraroepa, “Ari ita, ragai tapo-a vao-ia voava Rom-ia, ragoa riroa rutu moni vikiavora auere voa koatas vo gavman sovara-ia.” Oire va iava Pol oiso rera tavireva, “O ita, ari ragai vo gavman sovara-ia kavauraepa.” <sup>29</sup> ✧ Oire ikauvira voeao oea rera ragisa auepaepa rera kavu ovoioro avaaepa. Uva rera tapo ofisato rirovira rutu uririroepa, uvare oiso ragavira tarairoepa, Akoea, ari Rom gavman iava rera. Uvare rerare voea tavi ragareva oiso, Rera ragipata, ora rera tuukepata.

✧ 22:16: Ap 2:38; Hi 10:22; Ro 10:13 ✧ 22:17: Ap 9:26, 10:10 ✧ 22:20: Lu 11:48; Ap 8:1; Ro 1:32 ✧ 22:21: Ap 9:15 ✧ 22:23: Ap 7:58; 2 Sml 16:13 ✧ 22:25: Ap 16:37 ✧ 22:29: Ap 22:24-25

<sup>30</sup> Uva voava utupa voki-ia Pol tuuke iro vagoreva va karuoro. Oa iava voea pris irara gurureva ora Jiu iava voea lotupa irara Kaunsel irara. Oire uva va-a vao ovuurua-ia ora voea sovara-ia rera tovoreva auere rera-ia oiraopa reo rutu ousa, vao oa iava rerare kasipuaepa rera togapaoro aue-ia reo.

## 23

### *Pol Vo Tavitaviroepa Kaunsel Irara Voead Jiu*

<sup>1</sup> Uva tuupavira Kaunsel irarava vurapaoro voeare oiso puraroepa Pol, “Araoko irara oaa, ragai torevokovira rutu oisoa toupaa voari rutu vo vokio iare rekasisa. Uva viapau oiso uririparai Pautoa-pa. Ari ita, vo vokio viaevira rutu toupai ragai vo vovouaro ora ragai vo rugorugooaro.” <sup>2</sup> ✧ Eisi osa iava Ananias ro Rovopato Pristo voeare oiso puraroepa oea Pol ruvara-ia toupai, “Avoeao, rera gisipoaro tapatapata.” <sup>3</sup> ✧ Uva va iava Pol rerare oiso puraroepa, “O ita, Pauto viigoa tapatapareverea. Vii vao viigoa iava kepa kaapovira kovovoaro toupaveira vova ratau, osa atoarova rupapavira toupai. Viigoa-a vao viigoa paupauei ragai kortusa aue-ia Reo Taisi-ia. Uva viigoa raga vao tokopari Reo Taisi, uvare voeao aruparivoi ragai tapatapasa.”

<sup>4</sup> Oire va iava voeao oea Pol ruvara-ia toupai oea oiso purapaaepa rerare, “Auoro. Uva apeisi kaureopauei rova Rovopato Pristo Pauto reraaro?”

<sup>5</sup> ✧ Oa iava oiso voeare puraroepa, “Avoeao, easi viapau oiso taraiparai rera-ia eera Rovopato Pristo. Ari ita, vuria puraavoi rerava kaureooro, uvare Moses vaaro-ia Reo Taisi oiso purapapeira, Opeita rova ora kaureopau reito ira visii rutu tokipareveira.”

<sup>6</sup> Oire uva Pol voea vo vovouaro kekereva. Oa iava oiso aueroepa, Viapau oiso katai vovou vai-ia toupai. Aue iava uvare oearovu-a Sadyusi ari oearovu Farisi iava. Oire eva-a oa iava voeare Kaunsel irara oiso puraroepa, “Araoko irara oaa, ragai-ia ravu Farisi iava, ora vao osa ragai-a Farisi-pato oviitoaaro. Uva visii rutu-a vao ragai roviriepatavoi kortua-ia, uvare oiso oirao piepaaveira, Kopii irara vorevira torevare tootooro. Eva-a oa vituaro iava oirara siposipopaaveira. Oa iava vava ragai kortupatavoi.”

<sup>7</sup> Uva vao isivaaro iava voearei voeareo Farisi ora Sadyusi oearoa ora kaureopaaepa kasipuvira, uvare voearei vo rugorugooaro ora sikaepa. <sup>8</sup> ✧ Oa vituaro iava ora reopaaepa kasipuvira, uvare Sadyusi irara oiso oisoa purapaave, “Viapau oiso vorevira torea vai peira ora ensel irara vai peira, ora viapau oiso oirato urauratoa vaiaro peira. Vo ovusa voeao Farisi-pa irara vo pevao rutu oirao pieva oiso-ia, torea, ora enselto, ora uraurato.

<sup>9</sup> Oire vo osa va iava rirovira ora kaureopaaepa. Uva voava voeao Reo Taisi iava tisa irara oea oisoa Farisi vo pitupituaro sirova utupaave, oea oiso purasa toreaepa, “Viapau rutu oiso vuria vai ei oa kekeiovoi ro-ia Pol. Easi pasi, oiraopavira vai-a oiso osa rera tavirevora uraurato vo raivaoro ora vo Jerusalem-ia.”

<sup>10</sup> Oa iava voearei kekeoro rirovira rutu Pol-pa siraoroepa ofisato. Uva oiso vovouroepa, Ora voeareire piopaoro rera opesi ovoi piepai. Oa iava rerare rera voearo viurupa irara arureva rera ousa vo uvure vuutaaro-ia. Uva oiso voea tavireva, “Rerava voretavere vore visii vo kepaaro.”

✧ 23:2: Jo 18:22 ✧ 23:3: Mt 23:27; Lev 19:35 ✧ 23:5: Eks 22:28 ✧ 23:8: Mt 22:23; Mk 12:18

11 ✨ Oire uva vo rupa-a vao oa ro Turaro Pol sirova touoro oiso puraroepa, “Opeita uriripau. Ari Jerusalem-pa irara ragai iava siposiporivora. Uva eisi raga ita oiso taru voeao Rom-ia tou irara siposiporivere ragai iava.”

### *Reo Ovoi Puraiva Pol-re Oiso Ra Rera Upoive*

12 Uva utupa voki vokipakouaro-ia Jiu-pa irara ora guruaepa, oiso ra rerare raiva puraive rera kopii piesa. Oire vo vokia-a vao oa-ia ora voeapa reo ovoi puraiva oiso, Easi viapau uvuipaviei ra tootoovira toupaveve, ovusa aioara vai aiopape ora ukaiopavio. Ari vo raga vearopai vosa rera kopii pie rovopere. 13 Voea rutu uvuiaro-a voeao oea vo resura tau (40) uvuiaro-ia puteva rutu, vo uvuru rutu vieiara oea vo raiva vao purapaiva.

14 Oire uva voea voeao vo reo ovoivoiva, urioaepa rovopa irara pris irara ora oira vasi irara tavisia oiso, “Igei vao igoa ora igeipa reo goru puraio oiso, Easi viapau oiso uvuipaviei ra aioara vai aiopape ora ukaiopavio vosa Pol viapau kopii pie rovopape. 15 ✨ Uva visii rutu-a vao ora oearovu Kaunsel irara visiigoa tavipaiovoi, auere ra rovopatoapa ofisato vo reo ava pieta, oa iava uvuipa ra visii-pa Pol siporeve. Uva oiso ruipapaiei ra oiso rera keatavere, Igei vateri Pol, ra igeipa torevoko reo vai vatereve. Uva va-a vao oa-ia rerare utupaiovere ovusa urioro. Ra va iava rera upoio.”

16 ✨ Uva Pol paparitoaaro vo reo uvureva. Oa iava urioroepa viurupa irara vo kepaaro-ia Pol tavisia. 17 Oire uva va iava Pol iravu kepten arureva oiso puraoro, “Vearopai ra ro tapo paparitoa oaa avau vore rovopatoa iare ofisato. Ra vasivasivira rutu rovopato ofisato tavireve.” 18 ✨ Vao isivaaro iava avasiepa rera iare rovopato ofisato. Oa iava vao rera ruvara-ia pou vioro oiso puraroepa rerare, “Ro tuukepato Pol ira ragai arure vii iare ro tapo viovokoto ira ruvara-ia reoa tupaivoi. Uva oiso ruipapaa ra vii tavireve va iava.”

19 Oire uva Pol paparitoaaro ivuoro vavaea iava rerava avaroepa uvavivire toko pievira, oiso ra vao roroiovira rera tavireve. Osa iava oiso vao rera akereva, “Apeisi vai ragai tavisia uriouei?” 20 Uva ro viovokoto oiso puraroepa, “Auoro oiso-ia uvare voeao Jiu-pa irara ora reoae. Uva vii-ia va tovoivo oiso, Urioavere vii aresa auere Pol oiso ra rerava uriou rera siposa Kaunsel irara ruvara-ia vokipavira. Uva oiso vii keavere, Rerapa ruipapaiei ra rera ruvara-ia torevoko reo vai ouio. 21 Uva viapau oiso ra voea uvuri, uvare vo resura tau-ia putevo voea rutu vieiara voeao oea utuavere rerare rera uposa. Uva rera-ia ora reoro ora voeapa reo ovoi puraivorao oiso, Viapau oiso ra aiopape ora ukaiovio vosa Pol upo avasira toupaveve. Ari vo raga osa rera upo rovepe rera kopii pieoro. Uva vao raga-ia vii vo reoro pukoarore tuepaai.” 22 Oire uva va iava ro rovopato ofisato oiso rera goruvira tavireva oiso, “Viapau oiso ra irai ita taviri va iava vao oa iava ragai tavirivoi.” Oa iava rerare ro viovokoto koruroepa vorevira.

### *Pol Sipoiva Reitoa Iare Gavman Filiks*

23 Uva vao isivaaro iava ro rovopato ofisato vaitereiarore keeroepa vaiterei tavisia oiso, “Erao novoto vai (200) vatatopopasi viurupa irara vai, ora erao vatara tau vai (70) voeao oea aue-ia hos kare avavere, ora erao novoto vai (200) voeao oea kaatutaru kaeivere avao Sisaria iare aue-ia vo resura vatara vuuta-ia (9 klok) vo kavuoro vokiara. 24 Uva okarei tapo ousivere auropa Pol vo kareo okarea-ia avavere. Oire uva virivarivira rutu rera tapo vatatopovira rutu avatavere aue iare Filiks roari reitoa rutu gavman.” 25 Oa iava ro rovopato ofisato rerapa rigatoroepa aue Filiks oiso,

26 ✨ Ragai-a Klodias Lisias ragoa vo pasio rigatua viipa reitua rutu gavman Filiks. Vearo voki rutu. 27 Voeao-ia Jiu oea ro-ia pituivora oirato oiso ra rera kopii pieive. Ari ita, vo osa rera-ia taraiia ou rovoavora oiso ragavira, uvare rera-a Rom gavman iava. Oa iava rerare viurupa irara oaa aruavora rera ousa. Oire voava rera oriruavora voea sovara-ia. 28 Oa iava rera tapo avaraera Kaunsel irara iare, oiso ra rera-ia vuria vai kekea. 29 ✨ Uva rera-ia oiso tarairaera, Akoea ari Moses vaaro raga Reo Taisi oapa oisi rera piesa aupepai. Oire uva viapau oiso va iava uvuiraera rera tovosa tuukepa kepa-ia, ora oiso ra rera kopii piea. 30 Ari ita, vo osa iravu ragai tavirevorao rera iava. Uvare rerare raiva goruivora ora voea-ia, oiso ra rera uposa utuave raivaaro. Eva-a oa iava vii iare rera sipoavoi. Oire uva voea-a voeao oea taviavorao, ra ora voea vo rearova urioave rara, vao oa puraivora oiso ra rera upoive va-ia.”

31 Oire uva vo rupa raga-a vao oa-ia viurupa irara Pol tapo rovpato ofisato vo rearo sirova utu ovoiaepa avaro Antipatris iare. Oa iava vo rupa raga-ia voa pou viro ovoiaepa. 32 Uva voeao oea oisoa hos kare-ia vokapaive oea Pol tapo topa viropa, osa voeao viurupa irara voeava tavariooro vorevira kareaepa vore ora voea vo kepaaro iare. 33 Oa iava voa Sisaria-ia poua viropa. Oire voava va vao pasia vateiva rera tapo Pol rerapa ro reitua rutu gavman. 34 Oire vo osa vo pasi vao vieireva, oa iava Pol akereva oiso, “Aa vo distrik iava uriouei?” Uva Pol oiso puraroepa, “Ari Silisia-ia.” 35 ✨ Oa iava rera uvuoro oiso puraroepa, “Akoea! Uva vii uvuavere rara voeao poua viro, oea viire vo reo puraivora.” Uva ora rera voeaaro tavireva oiso, “Pol ururaa tupata vo Herot gavman vo kepaaro-ia.”

## 24

### *Pol Togapaiva Reoara Rutu-ia Aue Jiu-pa Irara*

1 Oire uva ro-ia Ananias ira vo vavae voki ro isivaaro iava urioroepa Sisaria iare oevu tapo oira vasi irara, ora iravu tapo voeapa reo kaepato voeao oea oisoa Pol-re aupepaave. Uva rera ro reo kaepato, Tetalas ira oiso urioroepa voea tapo, ra Pol iava vo reo kosi pieive rovpatoapa reitua rutu gavman. 2 Oire uva Tetalas-re keararoepa oiso ra Pol iava reoa kosi pierave rera togaoro va-ia. Oa iava oiso puraroepa,

“Ari ita, vii-a reitua Filiks viigoa vo tokiaro-ia vearoa varao kosi piropa oiso-ia, gavaurea vao ora gavaure tou igeipa vao Jiu-pa irara. Ari ita, riroara reo goruro vearopara oara igeipa purarivora, oisore ra igei vo uruioaro-ia orekerovu rutu torevokope. 3 Oa iava igei rutu vii-ia rorupaioveira varao-ia oara rutu purapariveira igeipa vii Filiks.

4 “Uva reasiparai vii pugu piearapa. Oa iava oiso vii arepaavoi, E uvuipauei ra ragai vo reoviaro uvuri, ovusa vii tavia va iava poteku visivi vao iava oa puraparevora rera ro Pol? 5 ✨ Ari ita, igei rerava siituepaioveira ovusa varao vuriara purapareveira. Ira varao rovporeveira oara-ia Jiu-pa irara reraarova gavman ora upopareveira vo rasitua rutu-ia. Ro ira oisoa voeapa reiparo oea oisoa Nasaret pitupitu purapaive. 6 ✨ Ora vao tapo osa igei vaaro Rovopa Lotupa Kepa Tempel vuivuirevora igei vaaro puteoro Reo Taisi tugoropa. Eva-a oapa rera ouivora. [Uva va-ia oiso ruipapaiera rera kortuoro rera rovirieio Reo Taisi-ia vao igei. 7 Osa rovpato ofisato Lisas igeiva paupaupaoro urioroera rera Pol ivu ovoisa igei ruvara-ia 8 oiso puraoro, Avoeao, rerava avata Filiks iare, ra rera rovirieireve vao-ia Rom

✨ 23:26: Ap 24:3, 15:23 ✨ 23:29: Ap 18:15, 25:19, 26:31 ✨ 23:35: Ap 24:19, 25:16, 24:27

✨ 24:5: Ap 16:20, 17:6, 21:28 ✨ 24:6: Ap 21:28

vaaro raga reo goru.] Oire uva uvuipauei ra rera akeri varaore oara-ia ora reopaveiei oiraopara. Ra vii tavireve oisi raga oiso-ia osa vii tavipaa.”

<sup>9</sup> ✧ Oire uva voea rutu Jiu oiso puraepa ora voeapa kae pieoro kataivira, “Oiraopavira rutu eisi osa puraparoi Tetalas.”

### *Pol Filiks-pa Reora Kosi Piereva*

<sup>10</sup> Vao isivaaro iava ro reito gavman Pol piiroo-ia tavireva. Uva va-ia oiso puraroepa Pol,

“Ari ita, vii-ia taraiparai Filiks viigoa oisoa Jiu rovirieiparive riro ivaro rutu sovara-ia, varao oara-ia rorupaoro vo reo vatepaavoi viipa ora ragai iava vo reo. <sup>11</sup> Uva uvuipau ra vaore voea akeri oiso osa katai tau erao (12) vokiroputevora varao oara-ia lotu puraparaiva, Jerusalem iare avaraera.

<sup>12</sup> Uva viapau oiso Jiu ragai vurapaivora osa iraiva ora variri posiparaera ora reopaoro Jiu vaoro Rovopa Kepa Tempel sovara-ia. Ari ita, viapau oiso voeao iava oeai ragai kekeivora osa oeai kasipu pieavora uvai Reo Taisi Uvupa Kepaa vai sovara-ia, ora uvai vo urui sovara-ia. Viapau rutu. <sup>13</sup> Uva vo reoa vao-ia oa purapaivoi, viapau oiso ra va oirao pieive.

<sup>14</sup> ✧ “Ari ita, varao raga iava vii tavipaa ro iava Pauto ira ragapa lotu puraparaveira, ro igei aite iraraoro reraoro ro Pauto. Vo raivao raga sirova utupaoro rera vo raivaaro, vao-ia oa-ia vakuvakupaiveira Jiu oiso purapaoro, Kuuvu raiva. Ari ita, vao-ia Moses vaoro Reo Taisi ora varao profet irara vo rigatoroaro oara rutu oirao piepaaveira. <sup>15</sup> ✧ Ari ita, vao raga-ia rugooparaveira oiso osa oirara rutu kopiia iava vorevira toreaverea voeao-ia torevoko vovou irara ora voeao vuri vovouro pura irara. Uva va raga-a vao oa raga-ia rugooparai vao-ia voeao oiso-ia osa voeao-ia Jiu. <sup>16</sup> Ari ita, uva va-a vao oare akeakepaaveira rutu vo ora ragai vo goruaro rutu-ia, oiso ra roroi vovou rutu-ia toupaae Pautoa-pa ora voea rutu oirara. Uvare viapau vuriana vai purapaaveira voe-ia ora rera-ia Pauto.

<sup>17</sup> “Uva riroara ivara isivaaro iava vorevira kareraera Jerusalem iare Jiu-pa irarapa vatevateavira moniara vatesa, ora koruouara tapo purasa Pautoa-pa. <sup>18</sup> Uva vo osa varao purapaavora, osa ragai iare urioaera. Uva voa tugoropa sisu puraavora. Oire va raga-a eva oa-ia ragai kekeivora. Ari ita, viapau riro iraraa vai ragai tapo toupavira, oa-ia viapau oiso upoa vai. <sup>19</sup> Ari ita, oeavu Esia Provins iava Jiu-pa irara oea tapo voa toupavira. Uva vosa evoea vo toupave, oire uvuipaai ra voea tapo viipa oirao pievira taviave vo osa ragaire kasipupaave. <sup>20</sup> Ari ita, vo osa voea akeri oaire vuria vai oiso oai kekeivora ragai-ia vo Kaunsel uvuru sovara-ia. <sup>21</sup> ✧ Ari ita, vao raga osa purasa toreraera voeare oiso, Oiraopavira oiso osa visii vavaeoro-ia toupaa kort purapa irara. Uvare ragai vao ragare rugooparai oiso osa oirara rutu taru vorevira toreaverea kopiia oaive kavuoro.” Eisi osa puraroepa Pol rera tavioro.

<sup>22</sup> Oire va-a vao oa iava Filiks ro riro taraito aue-ia oirao piea vo pitupituaro-ia, ira vo kort vao opesi piereva oiso voea tavioro, “Vosa rovpato ofisa Lisas vo pouro virovere, oire visii rutu vo reoroaro rovirieia.” <sup>23</sup> Oire va iava tuukepa kepa-ia uutupato tavireva oiso, “Pol tapo avau rera koata piesa tuukepa kepa-ia rerare tore pie ragasa. Ari vosa sara irara rera iare uriopaave, ra opeita voeare korupauvere, vo osa orekerovu avu vaiva urioapaave rera vatepasa.”

### *Filiks Pol Tuukereva Vo Ivarei Uvuiaro-ia Tuukepa Kepa-ia*

<sup>24</sup> Oire uva ovokirovu isivaaro iava Filiks urioroepa vatuava tapo Drusila Jiu-pava Pol-re arusa, oiso ra rera kosi piereve uutupato tuukepa kepa iava. Ra vaiterei tavireve vo raivao iava Jisas Kraiss oirao piepa raiva. <sup>25</sup> ✧ Oire va iava Pol vo avukarei tavitavireva aue iava torevoko vovou vo pitupituario, auere ra torevokovira raga ora tokipaave vaopa, teapi vuriara vai purapaive. Uvare oirara rutu vo vokiario pou piroverea vao oa-ia taru oirara rutu rovirieireverea Pauto. Oara-a varao oara rutu uvuoro rirovira uririroepa Filiks, uvare ora rera sopaaro-ia vo reoro uvuipareva. Oa iava Pol arureva oiso, “Ovoiei. Avau. Uva ovokia ita oiso viire keeraravere, rara avu viipa ruipara ita.” <sup>26</sup> Ari oiso vovouparoepea, Easi pasi Pol vai ragaipa monia vai vaterevere va iava rerare karua tuukepa kepa iava. Oire oa iava rerare voreripavira keeraroepea vo rera tapo ora reoreopasa.

<sup>27</sup> ✧ Oire uva erao ivarei puteva, oa iava iravu raga tavaireva Filiks vo tavukiario iare. Rera vaisiario ro-ia, Posas Festas. Uva Filiks avaro Pol kavureva tuukepa kepa-ia vaore, oiso ra Jiu rera-ia rorupaive rutu.

## 25

### *Pol Sisa-pa Ruiparoepa Vaore Oiso Ra Rera Vo Kortuaro Uvureve*

<sup>1</sup> Oire uva Festas urioroepa Sisaria-ia touse. Voava vo peva isivaaro iava aue voki peva Jerusalem iare avaroepa. <sup>2</sup> Uva voa Jerusalem-ia pouro viropa Festas. Oa iava voa voeao rovopa irara pris irara ora oearovu oira vasi irara voea iava Jiu, oea rutu oreorovu-ia ita rera iava Pol gasiiva rerapa ro-ia Festas. <sup>3</sup> Uva vorevoreripavira rera arepaiva rerare Pol, oiso ra Jerusalem iare rera siporeve. Uvare oavu raiva rerare ravaa rovoiva, oiso ra rera upoive vo osa urioparo raivaaro. <sup>4</sup> Uva voea vo reoro pukoreva Festas oiso voea tavioro, “Avoeao, ira tuukepa kepa-ia toupere Sisaria-ia. Uva tutuu piepai ra rera iare vorera vao. <sup>5</sup> Uva oiso vearopai vosa oearoi visii iava riro iraraa vai ragai sirova utupaai, ra oeari tapo karera. Oa iava vigei rutu uvuipavie ra rera-ia vuriara vai kekepe pasi.”

<sup>6</sup> Oire uva vo peva vatara voki o katai tau voki isivaaro iava Festas voreroepa Sisaria iare. Oa iava utupa voki-ia vo kort vao purareva. Uva va iava Pol-re aruroepa. Oa iava oavu rera iare rera sipoiva. <sup>7</sup> Uva voa pouro viropa kortupa kepa sovora-ia rera Pol. Oa iava oavu Jiu-pa irara Jerusalem iava oea Pol ruvara-ia tupaiva, oea rera iava Pol oreorovu rovoiva. Osa iava vo reoro iava vuriara oara-ia Pol togapaiva, oara-ia viapau oiso ra irai vara oirao piepareve. <sup>8</sup> ✧ Oire oa iava vearovira rutu Pol voea vo reoroaro pukoreva oiso puraoro, “Viapau rutu oiso vuria vai puraavora oiso osa purapaai voeao. Viapau oiso oavu avu vai gasiavora Jiu vaaro iava Reo Taisi. Ora viapau tapo oiso Jiu vaaro-ia Rovopa Kepa Tempel. Ora Rom reraaro tapo King Sisa ira-ia tapo viapau oiso oai vuria vai puraavora.”

<sup>9</sup> Ari ita, Festas oiso ruiparoepa ra Jiu agoagotoreve rovirie-ia kortua-ia. Oa iava Pol akereva oiso, “E avapau Jerusalem iare ra vao vii rovirieia?”

<sup>10</sup> Oa iava Pol rerare oiso puraroepa, “Vo kepa-ia oa-ia torepaoaro toupaa eva kortupa kepa Sisa vaaro. Uvare vo kepa raga vao-ia oa raga ragai vo kortuaro uvuipaivoi. Ragai-ia taraipau ei ragoa viapau oiso vuria vai puraavora Jiu-pa irara-ia. <sup>11</sup> ✧ O ita, vosa Reo Taisi tokoa, o vosa oarai puraava vuriara vai, oa-ia taru uvuipaai ra ragai kopii pieve. Osa iava viapau uvuiparai ra voea asavira toria. Ari vosa voea vaaro vao kuuvua, oa-ia viapau rutu irai uvuiparoi ra ragai vatereve voeapa voeao Jiu. Vii tavipaa

✧ 24:25: Ga 5:23; Ap 10:42 ✧ 24:27: Ap 25:1, 4, 9, 14 ✧ 25:8: Ap 6:13, 24:12, 28:17 ✧ 25:11: Ap 26:32, 28:19

oiso, Avaravere Rom reraaro iare King Sisa ira raga uvuiparoi ra ragai rovirieireve.”<sup>12</sup> Oa iava Festas ora reoroepa voeaova riro tarai irara. Uva va iava oiso puraroepa Pol-re, “O ita, ragai tavipari oiso ra avau Sisa iare. Uva vii tavipaavoio oiso, Vearopai ita, ra rera iare avau Sisa.”

### *Festas Agripa Akereva Pol-re*

<sup>13</sup> Uva ovokirovu isivaaro iava aue King Agripa avukarei tavetesiva ora o-ia vatuvava Benaisi aue iare Festas. Oa iava rerava vearo vokisiva. <sup>14</sup> ✧ Oire uva riro vokiyo rutu-ia voa toupaooro aue Festas King tapo ora reoroepa Pol iava vo reoro iava rera tavitavipaoro. Uva oiso puraroepa, “Ro-ia oirato ira vo tourevora ovusa Filiks avaroera rera arova. <sup>15</sup> Ro-ia ira iava ragai tavivora rovopa irara pris irara ora voea tapo oira vasi irara eisi Jerusalem-ia vo osa voa tupaavora. Uva oiso ruipapaaera ra ragai rera rovirieia. <sup>16</sup> Uva oiso voeare puraraera voea taviooro, Viapau oiso Rom opitupituiaro oiso toupai, ra oiratoa vai vate ragaive irai kopii piesa vo rara viapau rera roviriei rovoive, ora vo osa viapau kortua-ia voea vo reoro pukopareve.

<sup>17</sup> “Uva va-a vao oa iava urioaiva vore ovokivu-ia utupavira kort uvupa kepa sovava-ia paupaoro, voea uutupa irarare aruraera oiso ra rera sipoive. <sup>18</sup> Uva voa-a vo uva Jiu toreaera. Uva ragai oiso keaparaera, Riroa vai rutu vuria vai oa iava rera iava tavipaai. Osa viapau oisi oai iava oisi vo reo puraivora. <sup>19</sup> ✧ Vo osa vao raga lotua oa vo pitupituro-a, oa iava ragai tavitaviivora ora Jisas iava tapo ro ira kopiiroepa. Uvare Pol rera iava oiso siposipopareveira, Ira tootoovira toupave. <sup>20</sup> Uva va-a vao oa rutu-ia vavagisiparaera oiso, Uva apeisi ragavira va vituarore taraavere. Oa iava Pol akeavora oiso, E avapau ei sire Jerusalem-ia, ra voa vii kortua vo reo-ia vao-ia? <sup>21</sup> Vo osa Pol oiso puraroera, Viapau. Ari King iare avaparai ro Rom-ia, oisore ra rera raga ragai vo reoro rovirieireve. Oa iava uutupa irara rerare taviavora oiso, Vearovira rera tokipata vaore tueoro osa rera sipoavere rara utupa visivi aue iare Sisa.” <sup>22</sup> Oa iava Agripa oiso puraroepa Festas-re, “Oiso ruipaparai ra Pol uvua.” Osa iava Festas oiso King Agripa tavireva, “Vearopai. Ira uvurivere vokiavira.”

<sup>23</sup> Oisi-a eisi osa iava utupa voki-ia Agripa vaio ora Benaisi oritoareiva uriosiepa ora gurua kepa-ia koatasa. Uva oevu tapo reipa irara viurupa irara iava voea oea tapo uriosiepa voare ora oira vasi irara. Oa iava Festas Pol-re aruroepa oiso ra uriooro. <sup>24</sup> Uva Festas voea ruture oiso puraroepa, “Vii King Agripa ora visii rutu vao-ia ro oirato kekepata ira arepaiveira voea Jiu oea vo tupaiveira Jerusalem-ia vorevoreripavira rera uposa. <sup>25</sup> ✧ Vo osa ragai raga oiso rugooparaveira, Viapau oiso vuria vai purareva, ra oai iava rera upope. Uva rera sipopaa auepa Sisa, uvare Pol rera iare ragai arerevora. <sup>26</sup> Ari ita, oiso ragavira va-ia vavagisiparai oiso auepaoro, Aa vao-a vuria oa iava Sisa-pa rigatoravere oa iava Pol siposa rera iare? Oa-a vao oa iava rera ou pieavoio vore visii rutu osireiaro iare. Oire uva oiso ruipaparai ra vii King Agripa rera ita taraari vao avuore oa iava rigatoavere Sisa iare. <sup>27</sup> Uvare viapau oiso torevokopai ra tuukepato sipo raga Sisa iare, vosa viapau siposipoa vai ou rovoa rerapa rera vo vuriaro iava.”

## 26

### *Pol Agripa-pa Reoara Kosi Piereva*

1 Oire King Agripa oiso puraroepa Pol-re, “Vearopai ra ora vii iava tavitaviu.” Oa iava Pol ora vavaearo iraoro oiso puraroepa voeao Jiu vo reoro pukooro, vao oa-ia rera iava gasiiva.

2 “Vearovira rutu King Agripa vao-ia oiso osa uvuiparai ra ragai vo reoro vatea vo reoro pukooro viipa. 3 Oiraopavira rutu oiso osa taraipaei rutu Reo Taisi-ia vao Jiu vaoro ora igei vo pitupituroaro. Oa iava oiso vii akepaavoi, ra ragai uvuoro ragai vo reoro aroviri.

4 \* “Ari ita, vara rutu-ia taraipaai Jiu ragai vo touaro-ia vo osa viovokovira oisoa toupaa vo ragai voeao ruvara-ia oirara Tasas-ia. Uva voava avaraepa Jerusalem-ia tousa. 5 Ari ita, tuariri voa ragai-ia taraiaepa. Vosa oisi ruipapaaeri, ra voa vo reo kosi pieive. Uvare voa ragai-ia taraiaepa osa Farisi vo vovouroaro sirova utupara, varao riro vavagisiara rutu oara opitupiturovu rutu-ia varao lotupara putepaiveira rutu igei varaaro. 6 \* Oire uva ragai-a vao ragoa roviriipata vo vokie aue vituaro iava uvare vo reo raga-ia oirao piepaaveira vao Reo Ovoi oa vatereva Pauto voeaoa vigei aao iraraaro. 7 \* Oa raga-a vao Reo Ovoi oa oisoa oirao piepaive opesi asavira katai tau erao (12) sararo vigei aao iraraaro, vo osa Pautoa-pa lotupaave vo vokiara ora vo ravireo-ia. Ari ita, uva vo oirao piea vao-ia ragai vaoro oa-ia ragai roviriipai voeao Jiu osa vii tavipaa King oaa. 8 Apeisi vaoro-ia vavagisipatai oiso rugoopaoro, Viapau Pauto uvuiparoi ra oirato tore piereve vorevira kopiia iava?

9 “Ari ita, iravu-a ragai ragoa oisoa vurivira rugoopara, oa iava oisoa vuria purapaa Jisas vo siposipoaro-ia ro vova Nasaret. 10 \* Oa iava oisoa varao purapaa Jerusalem-ia riro irara rutu Pauto kovopa iraraaro tovopaooro tuukepa kepa sovara-ia. Uvare oisi vo goruva ragai tovoiva rovopa irara pris irara. Ari ita, vao tapo osa oisoa oearovu voea upopaive. Uvare ragai tapo oisoa voeare arupara oiso, Iu vearopai. Voea upota. 11 Uva ita, vokiara rutu-ia oisoa vuriara purapaa voea-ia voraro Jiu varaaro-ia Reo Taisi Uvupa Keparo Sinagog. Ari ita, oiso rutu oisoa rugoopara ra voea varaaro oirao pie vovouro tokopaa. Vao-ia osa rirovira rutu voeare oisoa kasipupara. Oa-ia tauairo rutu oisoa voeare taraapaoro avapara.

### *Pol Voea Tavireva Ora Rera Vaoro Iava Oiso Osa Porero Viropa*

12 \* “Ari ita, va vao vuri vovou purapasa avaparaepa vo raivao-ia vo Damaskas, uvare oavuva vasirako reesi oisoa vokapaa reo goro sirova, oarei ragai vateiva rovopa irara pris irara. 13 Uva uvupari King oiso-ia, Ovokivu-ia ravireo vuuta-ia oavu aviavia varaepa vuvuiua iava oaviavia ravireo vo aviaviaro-ia puteoro rutu varaepa ragai aau piesa voeao tapo oea tapo vokapaava. 14 Uva igei rutu kovekoveiepa. Oire voa Hibru-pa reo uvua oa-ia oiso puraepa ragaire, *Sol, Sol. Apeisi iava ragai vuri piepariveira vokiara rutu-ia? Ragai vo ruipaoro tapo upopariveira. Oiso rutu piepariveira osa bulmakau orekerovu otuotupara totopaaveira ora oira kokotoaro-ia. Eisi osa rutu ragai toopariveira ora vii raga ora vuri piepaoro.* 15 Oire uva va iava oiso akeava, Turaro, irouto-a vii? Oa iava oiso puraroepa, *Ragai-a Jisas ragoa upopariveira vokiara rutu-ia.* 16 \* Toreu. Uvare viire ora perarai vii reesoru viigoa ragaipa kovoparivere. Uva vii tavipaa oiso, Oearovu rutu tavitavirivere varao iava oara kekerivoi ragai ruvara-ia vo vokie, ora varao iava tapo oara vii iare karekepapere utupaa. 17 \* Ari ita, vii virivaripaavere voeao asavira Jiu ora oearovu asavira osararovu iava ratau

\* 26:4: Ga 1:13-14 \* 26:6: Ro 15:8; Ta 2:13 \* 26:7: Je 1:1; 1 Te 3:10 \* 26:10: Ap 8:3; Ga 1:13; Ap 9:14, 21 \* 26:12: Ap 9:3, 22:6 \* 26:16: Esi 2:1; Dan 10:11; Ap 22:14-15 \* 26:17: Jer 1:8, 19



tou irara voearo oearoa iare vii sipopaavere. <sup>18</sup> ✧ Voearo oea vo rugooroaro karurivere voeapa vara aviavi pieorō. Eva oa iava rupa vovouro oaive iava poreva virovere aviavia iare. Ora Seten vo goruaro iava Pautoa iare porepaa virovere. Eisi osa ragavira ragai oirao piepaivora, uvuipai ra voea iava vuri vovou verapa piro. Oa iava uvuiparai ra voea rutu takuvua ora voearo oea roporeva Pauto ora rerapa.”

*Pol Ora Rera Vo Kovoaro Iava Lotu Kovo King Agripa Tavireva Vao Oa Purareva*

<sup>19</sup> “Ari ita, King Agripa, viapau oiso ragai vo reova kaureoraepa oreoa ragai iare varaepa vova vuvuiua iava areo uusi sovara-ia. <sup>20</sup> Ari rovovira Damaskas-ia voea siposipoavora. Oire uva voava Jerusalem-ia ita. Uva aia voava ita voraro rutu vō taerero-ia vo Judia Distrik sovara-ia ora voraro tapo osararovu-ia, oearoa rutu oisoa tavitavipaave oiso, Tepa vuriara oavisii iava poreta viro vore Pauto. Ora vosa porepata viro, ra uvuipatai ra oisi iavirava veorapa kovoro vai purapata visii vo oirao pieroaro kareke piepaoro. <sup>21</sup> ✧ Uva ragai ouivora voearo Jiu vo Rovopa Kepa Tempel sovara-ia ragai tovosa kortua-ia vo reoropa oara iava voeapa siposipopaavora. Uva vara-a varao oara iava oiso aue ragaaera ra ragai kopii pieive. <sup>22</sup> Ari ita, oisoa Pauto ragai taupapareve vokiara rutu-ia, oiso ra vō voki-ia toupaa rera vo reoroaro vatepaoro oirara rutupa voearo oiso-ia, oira vasi irara ari oearovua apota irara. O ita, oiso puraparai vao-ia oiso osa puraaepa profet irara ora aue tapo Moses varaore oara uriopaperea voari rutu utupaua. <sup>23</sup> ✧ Oiso-ia, Jisas ro Ropoto Pauto reraaro ira riroa ourevere siitoka. Eera irapatoa rutu ira taru kopii iava toreroverea voeapa raiva puraoro voearo-ia Jiu ora ratau tou irara. Vo osa va-ia vao voearoipa varei rutu aviavi pie rovoreverea, oire va iava rera oirao pie iraoive rutu vo torea taraio. Osa iava voea orirureverea.”

*Pol Agripa Tavireva Oiso Ra Oirao Piereve Rutu*

<sup>24</sup> Oire vo osa Pol voea vo reoroaro pukoreva varao oara-ia rera toga ragapaiva, oa iava aue Festas rerare rirovira oiso puraroepa, “Auoro Pol. E kokoropau? Ari ita, riroa taraia oa ouriva. Oa raga-a eva vii kokoro piepaivoi.” <sup>25</sup> Uva Pol rerare oiso puraroepa, “Viapau rutu Festas. Viapau oiso vii keakeapaavo. Oiraopavira rutu oiso osa vii tavitavipaa torevokovira. <sup>26</sup> Ari ita, rera ro King Agripa ira vara rutu-ia varao taraiparoi. Rera tapo vara-ia roroiivira ora reoparai, uvare viapau oiso vara iava oai vatauvira puraavora. <sup>27</sup> Auoro King Agripa. E profet irara vo rigatoro oirao piepariveira? Ari ita, vii-ia taraiparai viigoa vo rigatoro oirao piepariveira.”

<sup>28</sup> Uva King Agripa oiso puraroepa Pol-re, “E uva apeisi-a oiso rugoopaei, ra evo reovi-ia ragai iava sopaua poreri? Ra va uvuoro Kristen tou pura?”

<sup>29</sup> Uva Pol oiso puraroepa, “Ari ita, Pauto areavoi visii rutupa vo reovi-ia ora riro reo tapo, osa iava uvuipatai visii rutu kristenta oiso osa ragai-a vao vo vokio. Ari vao ragapa reasiparai oiso, Teapi visii tuukepaive oiso osa ragai piepaiveira.”

<sup>30</sup> Oire uva vo reo isivaoro iava King, ora reito gavman, ora Benaisi, ora oearovu oea vo peva tapo toupaiava oea rutu toreaepa ora vasesa avaro.

<sup>31</sup> ✧ Uva vo osa kosia viropa, oa iava vao ora reopaaepa oiso puraoro vo ora voea ragare, “Avoearo, viapau oiso oavu avu vai vuria vai purarevora ro-ia oirato irare oiso auepavieraoro ra rera upope ora rera koata piepape

tuukepa kepa-ia.” <sup>32</sup> ✧ Oire va iava Agripa Festas-re oiso puraroepa, “Ari ita, uvuipauēi oiso ra rera karuri vo vokiō raga-ia. Ari aue raga ita uvare oiso puraroerao ra Sisa iare avaro. Ira rera rovirieirevere rara.”

## 27

### *Pol Tovoiva Selpa Uvuoa-ia Rom Iare Avasa*

<sup>1</sup> Oire uva varao isivaaro iava oavu reo goru puraiva, oiso ra Itali iare avaiō aue-ia uvuoa. Vo osa Pol tovo rovoiva vo Sisa reraaro vo tokiaro-ia ofisato. Ro-ia rera vaišiaro, Julias ro Rom gavmanpa uutupato ira oisoa katai vovotova (100) toupaveve viurupa irara. Uva voa toupaveve oearovu tapo tuukepa irara. <sup>2</sup> Oire oavu-ia vao selpa uvuo vova Adramitiam oa-ia kae uviroiepa. Uva vo uvuo-ia avaiēpa Esia-ia vatuaro. Uva igei rutu vao igoa avaiēpa ora ragai Luk ora iravu ro-ia Aristakas Tesalonaika-pato vova Masedonia Provins. <sup>3</sup> ✧ Oa iava utupa voki-ia Saidon-ia pou viroiepa. Oire uva voa-a evoa uva pou viroieiva, aue Julias vearo vovou purareva. Oa iava Pol iava vasereva, oiso ra avaro vate irara iare voea ruvara-ia oaravu avu vai ousa, oisore ra vara iava vearovira toupaveve. <sup>4</sup> Oa iava voava ita ora vaseiepa Saipras toko isivaaro-ia avasa, uvare kiuvuva aivaropaiva uvuoa. Oa iava vovevira vo toko ravisioro avaiēpa. <sup>5</sup> ✧ Uva vo voka-a vao oa-ia Silisiarei vatuaro vi puteiova ora Pamfilia-ia. Va iava Maira-ia pou viroiepa vao oa Lisia Distrik sovara-ia toupavevira.

<sup>6</sup> Uva voa-a evoa uva tupaaro ro igei reraaro ofisato oavu tuereva uvuoa, ovusa Aleksandria iava uriopaepa vo aue-ia Isip. Oire voava uriopaepa Itali iare avasa. Uva va-ia igei rutu tovoreva. Oa iava igeiva avaeapa.

<sup>7</sup> Uva garutu visivi vasi pievira avapaiēpa vokapaaro, uvare kasikasi pie visivi rutu kovopaaro vokapaiova voare avapaaro Naidas-ia. Uva viapau uvuiēpa oiso ra voava topa viroio, uvare riroto kiuvu igei takireva. Oa iava vovevira varaiepa oiso Krit toko rorovira Salmoni kipekipe vatuaro-ia varasa. Oire eva-a oa iava vo toko reoroaro avaiēpa taru, uvare kasikasi pievira rutu vokaoro urioiepa. <sup>8</sup> Uva vo-ia kasikasi visivi rutu avapaiēpa vore avapaaro Vearo Paitu vao oa toupavevira Lasia urui ruvara-ia.

<sup>9</sup> Oire uva voa-a evoa igeire riroara vokiara puteva osa vokapaiova vo vuuta vao oa-ia avakava vuriopa rutu rirovira. Uva va-a vao oa iava Pol voea goruvira tavireva ravaavira, uvare vo vuutao-ia taraiparoepa oa oisoa karekepape ivara rutu-ia katakataivira. <sup>10</sup> ✧ Uva voea tavireva oiso, “O ita, oiraopavira vao-ia oa kekepaa oa ouvere rara, vo osa vova topa uvirovio. Ra riroa tavaka oupe oa vatevere rara vo vuutao vigeipa. Uva selpa uvuo rokovere ora kotokotoara rutu tapo ora vigei vai pasi.” <sup>11</sup> Uva Pol vo tavitaviaro uvu rapapaaro ofisato uvuoa voka piepato vo reoroaro raga oirao piepareva vaierei rutu ora ro oira-ia reipato kepten. <sup>12</sup> Uva vovevio kovopa irara va-ia vao uvuoa oea oiso vovou ragapaaepa ra Finiks iare topaa viro. Uvare vao oa-ia tupaiva oare rugoopaaro oiso purapaaepa, “Avoeao viapau rutu uvuipaviei ra vo toupape, uvare vagoa vao-ia oa-ia uvuipaviei kiuvu vaiō ora kokeva ra vigeiva uvuoa vuri piesi. Ari vosa aue iare ipavio Krit-ia vo uva Finiks pasis toupavevira uva kavovovira toupavevira paitua utopavira, oa-ia uvuipaviei ra virivarivio.”

### *Riroto Kiuvu Vuri Toru Kareke Piereva Avakava-ia*

<sup>13</sup> Uva voava rovovira gare visivi rovoroeapa vusipaaro kiuvu. Uva va iava oiso raga rugoo oulva vo rera iava oa iava oiso puraaepa, “O ita,

✧ 26:32: Ap 28:18, 25:11 ✧ 27:3: Ap 24:23, 28:16 ✧ 27:5: Ap 6:9, 13:13 ✧ 27:10: Ap 27:21-22

vearopai ra voa raga virare raiva purape, ra voare avavio eisi Finiks-ia.” Oa iava anka kae pieiva avasa uvuoa-ia vo Krit rogara vatuaro-ia. <sup>14</sup> ✧ Oire uva ikauvira purepavira vo toko iava vararoepa vo voa igeire riro varivarivira rutu. <sup>15</sup> Uva voava igeiva vo uvuo peoreva riro goruvira rutu, ovusa osa auepaiepa ra rera sirova oira tovoio, ovusa viapau oiso uvuipaiepa ra rera gaieve. Oapa voea peo ragapaoro igeiva va topapareva va pupipaoro. <sup>16</sup> Oire vosa voava gaegaerepaoro otokovu reoaro igeiva puteva virivari visivi va-ia ururaopaoro. Oa iava igeiva gaegaerepaoro avapaepa. Uva vo toko vaisiario-a vao-ia oa-ia igeiva va-ia putereva, Koda Toko. Uva vo toko-ia vao putepaoro dingiva takauiepa rutu oira kae pieoro, o iria ivupaoro vokapaeva selpa uvuo. <sup>17</sup> Uva vo osa pege roruorupaoro va rutu tuukeiva uvuoa kovuaro oirovu-ia riro goru iro oiso, teapi kiuvu oira kaekae pieparevora, pegeo viro igeiva. Osa-a oiso osa iava uriripaaepa oiso, teapi vigeiva uvuoa vera piereve raaka-ia vao Arika-ia ruvara-ia tou raaka. Oa iava va iava selara sigiiova oiso va puraoro ra igeiva gaegaerevira raga avape. <sup>18</sup> Uva va vao isivaaro iava rirovira rutu torueva avakava. Oa iava voeao kovopa irara voava auero-ia kotokotoara rovoaepa vara-ia vikipaoro. <sup>19</sup> Uva ovokivu-ia vo pevapa voki igei rutu kopirovu vikiiepa. <sup>20</sup> Uva riro voki rutu-a pupuru voki rutu ovokiroa-ia viapau rutu oiso ravireo kekepaio ora visurikoara, oara iava riroiroreva. Oa iava igei rutu oiso vovoupaiepa, Oiraopavira rutu igei rutu vao opesipaiei, uvare igeivi riroiro pierere purepato kiuvu.

<sup>21</sup> Uva riroara rutu vokiara igeire oisoa pute ragapaive aio asavira. Ovokiro-a evara isivaaro iava Pol toreroepa oiso purasa, “Ari ita, vosa ragai vo reoroarore uru piepasa ora tape piepataeri voviri vo osa Krit toko pute asavira toupaoerao, oa iava viapau oiso vo tavakao vigei ouvori. Oa iava tapo varao kotokotoara viapau oiso riroirovira touvori vigei varaaro. <sup>22</sup> Uva visii tavipaa ra uririara eakata, uvare viapau oiso irai vigei iava kopiiovere. Ari vao raga uvuoa rokovere vigei arova. <sup>23</sup> ✧ Ari ita, vo vokiaro uva purapurapato ensel urioroerao ro reraaro Pauto ira ragai-ia pitupareveira, ora oiso tapo irapa kovopaaveira. <sup>24</sup> Uva ragai sirova tupaoro oiso puraroerao, Auoro Pol, teapi uriripau. Ari King Sisa osireiario-ia tourivere rara. Uva visii rutu-a vao ora voeao oearovu uvuoa-ia tou irara visigora rutu virivariavere. <sup>25</sup> Oire uva ora tape pieta. Teapi uriripata. Oa purarevere rara vigeipa oiso osa rera vo reoaro tupaiveira. Ari ita, oara rutu oirao piepaaveira ragai vao-ia. <sup>26</sup> Ari ita, vao uvuoa oa vigeiva vera pirovere oavu-ia raaka vo oavu-ia tokoa.”

<sup>27</sup> Uva vao iava katai tau vo resurapa (14) rupa vao oa-ia igeiva uvuoa peopareva kiuvu vo avakao-ia vao oa vaisiario, Edria Si. Uva voa avapaoro vo uvuoa-ia aue sovopaiva oa iava oiso puraaepa, Easi tutuu piei rasia vai iare, voeao oea oisoa vo uvuo-ia kovopaive. <sup>28</sup> Oa iava voeao vo rovu avaka rovu rokoaro uvuiva oavu-ia iroiro. Oire uva aue-ia erao tau vuta (20 param) vo rovu rokoaro uvuiepa, uvare va uvuiva vo iro-ia. Oa iava aue-ia ita uvuiepa katai tau vo vavae vuta (15 param). <sup>29</sup> Uva voava oavu-ia uvuiva kekeiva vo avapaoro raaka-ia osa tutuiva uvuoa. Oa iava uririoro oiso puraaepa, “Vigei upopai raaka-ia”. Uva vo resura vikiiva anka vo uvuo taki rovusa varirisa, oiso ra avi rovepe tapo uvare rupavira vokapaiva. <sup>30</sup> Uva voa-a vo uva kovopa irara rirovira uriripaaepa. Oa iava oiso vovouaepa ra toriive vo uvuo arova. Uva iriavu dingi vo uvuo iava rere pieiva oiso ra torioro avave. Uva oiso voea kea ragapaiva, “Oaravu ankara tovoio oisova irapaua va vao uvuoa takioro rutu.” <sup>31</sup> Vo osa Pol oiso puraroepa auere

ofisato ora voeao viurupa irara, “Vosa kovopa irara viapau vo toupave uvuoa-ia, ra viapau oiso virivarita.” <sup>32</sup> Oa iava iroi-ro tokoiva aue iava dingi, ra koveo avaka rovu iare.

<sup>33</sup> Vo osa avia sikerepaiva osa Pol oiso riro goruvira rutu voea tavipareva, “Vearovira rutu aiopatavoi, uvare viapau oiso vo wikireo sovara-ia aiopata-vorao oarea putevo. <sup>34</sup> Uva eisi osa visii tavipaavoio oiso ra aioara vai aiota, ra vorevira gorua outa rara. Ari ita, viapau rutu oiso irai visii iava vuria vai ourevere.” <sup>35</sup> Uva vo reo isivaaro iava Pol bret ouoro oiso puraroepa, “Vearovira rutu Pauto vao-ia.” Uva va puteoro voea rutu osireiario-ia va aioareva. <sup>36</sup> Uva va-a vao oa kekeoro rera-ia vorevira vovouisiro voea iava kavevira toupave oiso vovouoro, O asi vearovira toupai. Oa iava voea rutu aioara aioiva. <sup>37</sup> Uva voea rutu uvuiaro-a voeao oea oisoa vo uvuo sovara-ia toupave, erao vovoto erao vatara tau katai vatara rutu (276). <sup>38</sup> Uva aio opesiava, oaravu aioara witara vikiiva avakava iare, auere oiso ra selpa uvuo varaatape.

### *Selpa Uvuo Oa Taki Piropa Raaka-ia*

<sup>39</sup> ✧ Oire uva avieiva. Osa iava viapau oiso vao tokoa vatuaroo eveipaiva. Oa iava oavu kekeiva paitua. Uva oiso puraaepa, “Easi uvuipai vai ra vao iare uvuoa viru piepe rogararore tutuu pieoro.” <sup>40</sup> Oire uva va iava voare va viru piesa auero rutu vatatopopaooro ankava iroi-ro tokoiva. Oa iava avaka rovu iare koveroepa. Ora vo uvuo torevokopa perova tapo iroi-ro iava vagoiva, ora sel tapo iria ipa pieiva. Oa iava vo uvuo topapaiva, oisore ra rogaraua iare viruve. <sup>41</sup> ✧ Oire uva ora vaseiepa oiso ra rogaraua iare viruve. Osa raaka-ia irapauava paiva, ovusa rirova toruva vo uvuo vituaroo pegeeva. <sup>42</sup> ✧ Oa iava ofisato arepaiva viurupa irara voeare tuukepa irara, oiso ra voea kopii pieive vo raga auempa, teapi aataoro toriive vorarore vegoaro. <sup>43</sup> Uva oiso vovouparoepa ro-ia ofisato ra Pol raga virivarireve voea arova. Oa iava voea rutupa vaseoro oiso puraroepa, “Vosa uvuipata aatasa, oire vearopai avakava-ia ora vikioro vao aatapaoro verata viro rogara arore. Ari ita, vosa viapau uvuipata aatasa, oire vo peroro-ia pitupaoro verata viro.” <sup>44</sup> Uva vao oearovu voea iava aatapaoro verapaa viropa, ovusa oearovu oaravu-ia plank peroro ora operorovivu-ia vo uvuo iava oara-ia verapaa viropa. Uva oisi raga-a eisi osa verau viroiepa igei rutu rogara arore virivarioro.

## 28

### *Pol Toureva Molta Toko-ia*

<sup>1</sup> Oire vo osa igei rutu vo toko-ia vao tupaoro vo toko vaisiario-ia taraiiepa vao-ia, Molta Toko. <sup>2</sup> Uva voeao oea oisoa vo toko-ia toupave oea igei-ia vearo vovou rutu puraiva igei-ia eto kasiro. Uvare rirova-ia uteova uteoiepa, oa iava kasiraoiepa. <sup>3</sup> Uva vao-a vo uva Pol erako kouara kakavupareva va tovosa eto kasi-ia, osa oira kopii piepava rakoru rera vavaeoro avusa vusieva. <sup>4</sup> ✧ Oa iava voeao vo toko-ia oea oisoa toupave oira kekeoro oiso puraaepa ora voeare osa rera vavaeoro avupaoro kotovira toupavea, “Akoea oira opopatoa vai-a ro ira vo toko iare virivarivira uriroi. Uva vo vuria vao oa-ia torevokovira ora rera-ia viroi. Uva kopiipa o iava rakoru iria rera avuevoi.” <sup>5</sup> Ari ita, vo osa Pol oira sisiputareva tuitui kasi iare. Oire uva viapau oiso upiaroepa vova uvava rera avueva. <sup>6</sup> Osa iava voea rutu rerava tuepaoro oiso vovoupaepa, Easi tuvuparoi

ra kopiuro va iava ikauvira. Uva oisa-a eisi osa rugorugooapaoro rerava riro kaekaevira tue ragapaaepa oiso ra va iava kopiuro. Vo osa viapau vuria vai oureva vo va-ia va oavua puraeva rera-ia. Uva va-a vao oa-ia soporeaepa. Oa iava oiso puraepa, “Avoeao, easi pauto-a ro.”

<sup>7</sup> Uva reitao ro-ia vo toko iava, Pablias ira vo rasiaro ruvara-ia verau viroiepa, ira vearo vovoutoa rutu. Ira vo peva-ia voki igei oisoa aio vatepareve osa voa toupaiava. <sup>8</sup> ✧ Uva vo vokiuro-a varao oara-ia oisoa Pablias aitearo upiaparo urua raga ivara-ia. Oire uva oisoa rera iava kukue tapo upiapao kasiraovira, ora kovuto ira tapo oisoa rera upopareve. Oa iava Pol rera iare koataroepa rerapa varirisa. Uva rera varaaro-ia vavaea oaro tovooro, rera vorevira porete piereva. <sup>9</sup> Uva va isivaaro iava oearovu rutu upiapa irara urioaepa rera iare. Oa iava voea rutu vorevira porete piereva. <sup>10</sup> Osa iava igeipa riroara vatevateara vateiva. Ora vo tapo osa voava topa uviroa auepaaepa, osa igeipa oaravu ita vate ragaiva vatevateara auere raiva vearosa igeipa.

### *Pol Rom-ia Pouro Viroepa Molta Iava Uriooro*

<sup>11</sup> ✧ Uva-a vo uva vo uvuoa vuriaro isivaaro iava igeire vo peva kekira voa raga vo puteva. Oa iava oavu raga-ia Aleksandria iava vo uvuo selpa avaiapa. Vo uvuo vaisiario-a vao-ia oiso-ia, Tavaratoarei Pauto Araorei. Uva vo uvuoa voa tupaoro koke taki ateate piepaeva, oa iava voava avaiapa.

<sup>12</sup> Oire uva aue-ia pou viroiepa Sairakyus vo peva-ia voki voa tousa. <sup>13</sup> Oa iava voava avaiapa aue iare ita Risiam. Uva ovokivu-ia vearoto kiuvu urioroepa. Oa iava rera-ia avaiapa aue iare Pyutiolai-ia. <sup>14</sup> Uva voa-a eva uva touoro oearovu kekeiova oirao pie vovou irara oea oiso igeire puraepa, “E uvuipatai ra igei tapo tou rovota katai wik sovara-ia?” Osa iava vo wik eva putevoiva, Rom iare topa viroiepa. <sup>15</sup> Uva voeao Rom-ia tou irara oirao pie vovou irara igei iava uvuoro varaepa Aivaropa Tapire Apias voaaro. Uva ouruivu-ia va vaisiario, Vo Peva Stua kovuaro oearovu veraoro puteiva ora voea iava vo ruture puteoro. Oa iava Pautoa-ia Pol vuurapa vaisi puraoro oiso puraroepa, “Vearovira rutu Pauto aue-ia voka.”

<sup>16</sup> ✧ Vo osa voa pou viroiepa Rom-ia, oa iava ro ofisato Pol-re oiso puraroepa, “Vearopai ra kepa oara-ia torevokovira touri, vo osa irai uutupatoa vai vii tokipareve voa.”

### *Pol Vearo Sipoipo Kosi Piereva Rom-ia Tupaoro*

<sup>17</sup> Oire uva voki peva isivaaro iava oira vasi irara Jiu iava gurureva Pol. Oa iava voeare oiso puraroepa, “Araoko irara oaa, evoea evoa Jerusalem-ia Jiu-pa irara oea ragai ouivora kortua iare, oiso ra Rom reraaropa gavman ragai vateive. Ari ita, viapau oiso vuria vai puraava voeao-ia vigei voeaaro oirara, ora varao-ia aao irara oavi vo pitupituroaro. <sup>18</sup> ✧ Uva Rom reraaro gavman ragai rovirieirevora vo va-ia. Uva viapau oiso vuria vai kekerevora ragai-ia. Oa iava oiso vovou ragaoroera ra ragai karureve vorevira, uvare viapau oiso ragai-ia oavu avu vai touvora, oiso ra oai sirova ragai uporeve eisi osa rutu oisoa ruipapaave Jiu ragaire. <sup>19</sup> Uva oiso puraera Jiu, Viapau oiso ro vo rearo gavman torevokopai. Eva-a oa iava oiso puraraera, Vearopai ra Sisa iare avara, ra ragai vo rearo rovirieireve. Ari ita, uva ragai viapau oiso voeao oirara oaa Jiu kortupaa. <sup>20</sup> ✧ Oa-a vao oa iava visii guruavo oiso ra va-ia ora reovio. Ari ita, oiraopavira vo iro-ia ragai tuukepa iro oa vituaro tupaivoi vao-ia, Kataia-a raga oare rugooapaoro

✧ 28:8: Je 5:14-15; Mk 5:23 ✧ 28:11: Ap 27:6 ✧ 28:16: Ap 24:23, 27:3 ✧ 28:18: Ap 26:31-32

✧ 28:20: Ap 26:6-7, 29; Ef 3:1; 2 Ti 1:16

rariiparai oiso osa voea ita voeao Jiu rariipaaveira rera-ia ro-ia Ropoto Pauto reraaro Kae Pieto ira taru urioroverea.”

<sup>21</sup> Uva va-a vao oa iava rera vo rearo pukooro oiso puraaepa, “Ari ita, viapau oiso reoa vai vuria vai vii oiario uvuiovora. Ora aue rigatoa vai tapo vo vii iava vo voea iava voeao oea oisoa uriopaave Judia Distrik iava. <sup>22</sup> Ari ita, oiso ruipapaiei rutu ra vo reo uvuio oreoa oirao piepariveira, uvare voraro rutuva voearo iava uvupaioveira vii voeaaro oirao pie vovou irara oea-ia vuri reoro purapaiveira oearovu.”

<sup>23</sup> Oa iava ovokivu reesiiva oiso, “Vo vokia-ia ora guruviovere vorevira ita.” Uva vo voki-a vao oa-ia riro irara rutu Pol vo kepaaro iare urioaepa, ovokia vokiapakouaro rutu-ia voeapa siposipopaoro rovoroeapa vo putesa vokiariovi vo turguras vokiario Pauto vo Saraaro iava siposipopaoro. Ari ita, vao-ia Moses vaaro Reo Taisi ora profet irara vo rigatoroaro origatoroaro rutu iava voea tavitavipaoro voeapa vara aviavi piepareva aue iava Jisas.

<sup>24</sup> Oa-a vao oa iava oearovu rera vo rearo oirao pieiva, ovusa oearovu vo reo uvu ragaiva. <sup>25</sup> Uva oisi-a eisi osa iava viapau oiso katai vovou vai-ia ora reopaaepa. Vo osa Pol arova ora vaseaepa osa oavu goruvira reo vatereva voeapa oiso puraoro voeare, “Ari ita, ro-ia Tugoropato Uraurato ira oiraopavira rutu profet Aisaia gisipaoro iava oisoa reoreoparo visii aao iraraarore ora visii vao oiso purapaoro,

<sup>26</sup> \* ‘Avau ra voeao oirara taviri oiso, Visii vao-ia uvu ragatavere. Ari ita, oiraopavira vo reo gurukoaro uvupatavere, osa viapau oiso taraipatavere. Ora oiso tapo vare keke ragapatavere, ra ita viapau oiso vara-ia taraipata oiso osa toupai.

<sup>27</sup> Aue iava uvare tarai asavira toupata. Kokiara oavisii tupapata ora visii iava, ora osireiara oavisii tapo ururupa piepata. Uvare reasipatai oaravu keke arapa, ora oiso tapo uvare reasipatai oaravu uvu arapa. Oa-ia vao ragai arova porepata viroveira, aue iava uvare oisi ragavira rutu visii iava sopaura oavisii ragaipa reasipapeira oiso, teapi visii virivaria.’

Eisi osa puraroepa Pauto.”

<sup>28</sup> \* Uva Pol oiso puraroepa voeare ita, uvare tarairoepa voea vo vovouroaro-ia tarai asa vovouro, “Uvuta! Pauto vo raivaaro iava vao virivaripa ora poretepa raiva. Osa-a eisi osa iava vo reo vao avapaperea voeaopa ratau tou irara. Oa iava vo reo uvu iraoivere rara voea voeao sopaipa irara.” <sup>29</sup> [Uva vo reo isivaaro iava ora vase oviaeapa ora reopaoro voea raga. Uva vo reo-ia ora voeava kaureopaoro avapaaepa.]

<sup>30</sup> Pol vo ivarei sovara-ia toureva Rom-ia. Oa iava vao ora rerapa kepa vorireva. Uva vo kepa rataoaro oisoa karupareve oearovu rutupa voearo oearoa oisoa rera rugoopaoro rera iare uriopaave. <sup>31</sup> Uva oisoa vokiara rutu-ia voa toupao Pauto vo Saraaro iava siposipopareve ora Turaro iava ro-ia Jisas Kraiss. Eera ira iavirava oisoa uriri asavira rutu siposipopareve, osa viapau oiso irai uvuiparo rerare korusa.

## ROM Irapa Reoro Vo Vukuo Iava

Pol vo pasio rigatoreva 57 o 58 yia Jisas vo kavauaro isivaaro iava, vo ovusa Korin urui-ia toupaooro oisoo lotupa irara tauvapareve. Riroara pasiaara rigatoreva Pol oara toupaveira Nupela Testamen sopaaro-ia. Ari vao-ia oa purareva voeaopa Rom vata oa oaravu rutu-ia putepai vao reia pasia.

Uva vo pasio sovara-ia ira voearei rutupa reora purareva. Voeao Jiu-pa irara (Ro 2:17–4:25), ora voeao tapo Jentael-pa irara (Ro 1:13-15, 11:13) oearea takuvuvira oisoo lotupaave vo Rom urui-ia toupaooro. Uva voearei rutu tavireva oiso rigatooro, Kataitoo raga-a ro Kraisi ira uvuipa ra oirara karureve vuri vovou vo goruaro iava. Ra va iava uvuipaai Airepa Tootoo oupasa rera oirao piepaoro. Ari ita, Moses vaaro tapo vao Reo Taisi oa viapau uvuipai, ora orekerovu rutu oara viapau uvuipai tootooa vatepasa. Ari kataitoo raga Kraisi vo osa rera oirao piepaive oirara rutu.

Oearovu Papara 8 oiso vaisipaiveira, Vearo Sipoipo Rera Iava Tugoropato Uraurato.

1. Kovoa vituaro vao aposelto oa purareva aue Pol, 1:1-17.
2. Oirara rutu uvuipaai ra vao kaviko vovouaro oupaive vao Pauto. Auepa, teapi eto kasi-ia avaaverea vao vuri tapi, 1:18–3:20.
3. Pauto Oviitoo-ia Airepa Raiva purarevora vao oa-ia uvuipa vigei oriru iraopasa, 3:21–4:25.
4. Jisas raga-ia uvuipaviei ra Airepa Tootoo oupape, 5:1–8:39.
5. Pol siraoarpa Jiu-pa irarapa voeao oea reesireva Pauto ora rerapa, 9:1–11:36.
6. Vo toupai oiso osa ragavira uvuipa Kristento ra toupaveve Pauto vo ruipaaro sirova utupaoro, 12:1–15:13.
7. Vo Pol ovoioapa reoro purareva ora tapo vearo vokireva, 15:14–16:27.

### *Kovoa Vituaro Vao Aposelto Oa Purareva Aue Pol*

<sup>1</sup> ✧ Ragai raga-a, vao Pol Jisas Kraisi reraaro kovopato, ro ira ragai arurevora rera vo reoro kaesa. Eera ira ragai roporeva rera vaaro kaepasa va iava oearovupa siposipopasa Vearo Sipoipo.

<sup>2</sup> Vo siposipo-ia oa iava Pauto tuariri rutu reo goru purareva. Vao oa iava profet irara va vao reo goru rigatoiva Tugoropa Vuku sovara-ia voari tuariri rutu. <sup>3</sup> ✧ Vo siposipo-ia Vearo Sipoipo oa rera iava ro-ia Jisas Kraisi toupai, vigei reraaro Turaro, Pauto Oviitooaro. Ro ira oiravira rutu kavauroepa vo rasio-ia vo Devit vo saraaro sovara-ia. <sup>4</sup> Uva oiraopavira rutu-a, uvare tugoropa vaisitoo rutu-a ro-ia Pauto Oviitooaro. Ira-ia toupaveira riroa gorua. Aue vituaro iava uvare rera vo kopiiaro iava ravotovira vorevira toreroepa. Oire uva va-a eva oa iava vigei rutu taraipavio oiso, Rera eera Pauto Oviitooaro rutu. <sup>5</sup> ✧ Rera Jisas ira iava Pauto vigei-ia vearo vovou purapareveira. Osa iava Pauto ragaipa ruipapaoro rutu ragai-ia vo kovo tovoreva oiso ra rerapa kovopaa rutu oiso, aposel. Ra va iava oearovu rutupa tavitavipara osararovu rutu iava. Ra va uvupaoro ora voea iava sopaura oaive vorevira porepaive rera iare, ro Pauto rera vaisiaro kae piepaoro. <sup>6</sup> Oire uva visii-a eva visiiigoa evoa toupataveira Rom urui-ia osararovu rutu iava visii. Pauto visiiigoare tapo keeroepa oiso ra kareketa voeao tapo Jisas voeaoro.

7 ✧ Uva oisi-a eisi osa iava vo rigato purapaavoi visiipa vao Rom-ia tou irara. Visiigoapa siraopaoro Pauto visiire keeraroepe, oiso ra oiso touta rera voeaaro. Uva uvuipasi Pauto Aite oavi ora Turaro Jisas Kraiss ra visiipa tauva vatesi ora gavaure vovou tapo.

### *Pol Vearo Vaisi Puraveva Rera Vaaro Sovara-ia Variria Pautoa Iare*

8 Rovopavira rutu visii tavipaavoi vao iava osa oirara rutu voraro rutu tupoaro visii iava uvupaiveira oiso, Riro rari irara visii Jisas-ia. Oa vituaro iava oiso purapai, Vearovira rutu Pauto. Aue iavirava uvare Jisas rutu vo kovoaro-a vao-ia. 9 ✧ Oire uva vokiara rutu-ia kasivarivira rutu kovopaaveira ora ragai iava vovouisi rutu tovopaoro, oiso ra va iava Pauto vo kovoaro vearovira rutu puraa oearovu rutupa siposipoaoro rera Oviitoaaro iava. Ro-ia Pauto ira vearovira rutu ragai-ia taraiparaveira vosa oiso oiraopavira purapara, Visiipa siraopaoro vokiara rutu-ia visiire variriparai Pautoa iare. 10 Ari ita, voviri tuaririvi uva oiso ruipa ragapara oiso ra visii kekea. Oa iava Pauto iare variriparai oiso ra visii kekea. Uva Pauto vo vovouaro raga sirova va vao variria purapaavoi vo voki-ia, oiso ra visii kekea rara. 11 ✧ Uva oiso ruipa iraparai ra visii kekesa uriora rara. Oiso ra visii siposipoa varao iava oara iava Tugoropato Uraurato ragai siposiporevora. Oire ra vara iava uvuoro visii varaaro oirao pie vovouro oavisii goru pieta rutu. 12 Uva ora tautauvavio ora vigeipa tavitaviooro varao iava vigei rutu varaaro oirao pie vovouro. Oire ra va iava vigei rutu iava vaeavira goruvira rutu torepe oirao pie vovouro oavi.

13 Araoko irara oaa, vearovira rutu vare vao rugorugoo iraopatai, uvare vokiara rutu-ia oiso ruipa ragaparaveira ra visii kekea, vo osa orekerovu rutu ragai vo ruipaarore korupape. Ari ita, visii tapo tou ruipa ragaparaveira, oiso ra visii siposipoa visii tarai pieoro vo siposipo iava vao-ia. Oire va iava visii iava oearovu iava sopaura oaive pore piro, oiso osa oearovupa siposipopaavora rera iava Jisas voeaaropa ratau tou sararo. 14 ✧ Ari ita, Pauto ragai reesirevora rutu. Uva vo reesire rugoopaoro rutu rera vo kovoaro purapaaveira oearovivu rutu oirara tauvapaoro. Viapau oiso voeao raga tauvapasa reipa uruiro-ia. Viapau. Ari oearovu rutupa voeoro oearoa vegoara sopaoro-ia toupaveira. Ari ita, viapau oiso voeoro ragapa riro tarai irara. Viapau. Ari voeaviopa tapo ruruvutu irara. 15 ✧ Va vao vituaro iava visii keke ruipa iraparai visiigoa evoa Rom-ia toupaveira. Oiso ra vao visii siposipoa visii tarai pieoro va iava vao Vearo Siposipo.

### *Vearo Siposipo Vo Goruaro-a Vao*

16 ✧ Vao Jisas vo rearo viapau oiso raveravea-a ra vava ariipara. Viapau. Ari ita, uvare Pauto vo goruaro rutu va-ia toupavoi vao-ia Vearo Siposipo. Uva va-a eva oa iava oiso taraiparai vo osa oearovu vo reo iava uvuoro ora virivaripaaverea rutu voeao oea Jisas oirao piepaiveira rutu voeao iava Jiu-pa irara voari rovvira, uva voea isivaoro iava oearovu rutu voeao ratau tou irara. 17 ✧ Vao Pauto vo rearo oa roroiovira rutu vo raivao kareke piepaiveira Jisas vo raivaaro, oa-ia oearovu rutu uvuipaai ra va-ia ora agiagipaave Pautoa-va. Uvare vo raiva vituaro-a eva oirao piea, ora vo raiva ovoiaro-a vo raga oirao piea, va vao oa iava Pauto voea oirara oiso reesiparevora oiso, Voea voeao torevoko vovou irara. Ari ita, Tugoropa Vuku oiso purapapeira, 'Ro torevoko rugooto ira uvuiparoi ra Pautoa-ia rugorugooaoro rera-ia rariiparo orekerovu rutu oupaoro varao vearopara Pauto varaaro.'

✧ 1:7: 1 Ko 1:2-3 ✧ 1:9: Fl 1:8; Ap 24:14 ✧ 1:11: Ro 15:23 ✧ 1:14: 1 Ko 9:16; Ap 28:2  
✧ 1:15: Ro 12:18 ✧ 1:16: 2 Ti 1:8; 1 Ko 1:18 ✧ 1:17: Ro 3:21; Ga 3:11; Hl 10:38



### *Oirara Rutu Isivaaepa Pauto Vo Ruipaaro Sirova Utu Arapa*

18 ✱ Pauto toupave vo vuvuia-ia. Uva voava roroiovira rutu kasipua karekpareveira voeao vuri vovou irara ora voeao oea rerare isiva-paaveira. Voeao oea oiraopa sipoisopore korukorupaaveira oearovu asavira oiso, teapi va-ia taraipaave. Uva voea-a evoea oea vuri pitupitu purapaiveira vare korukorupaoro. 19 Ari ita, viapau oiso rera vo vovouara vataureva Pauto. Uva voea tapo va-ia taraipaaveira oiso osa vigei, uvare oearovu rutupa va karekereva. 20 ✱ Iu, Pauto tuariri rutu orekerovu rutu purareva vo vuuta-ia eva, oa iava vo voki-ia rekasisa urioerao ovokia vao-ia. Uva oirara vara varao akukepaiveira varao oara purareva ora rera vo goruaro-ia vao oa viapau opesia vai. Oire uva vara iavirava uvuipaai ra rera vo goruaro eveipaive ora rera vo vovouaro. Eva oa vituaro iava viapau raiva vai epao voeapa oiso ra vuri pitupituro oaive vataupaoro vara taepaive.

21 Ari ita, Pautoa-ia oisoo taraipaave. Uva viapau oisoo rerapa avivikepaave rera vaisiara kae piepaoro. Ora viapau oiso oisoo purapaave rerare, “Vearovira rutu Pauto” vo rera-ia vearo vaisi purapaoro. Oisi-a eisi osa raga purapaoro oisoo akukupapa rugorugooora raga oupaive. Uva vara- a evara oara-ia ora voea vo rugorugoooroora ruupa pieiva vara vavagisi pieoro rutu. 22 ✱ Oa iava oisoo oiso purapaave, “Igei-a riro tarai irara rutu.” Vo osa voeare rugorugooara vavagisivira rutu toupave. 23 ✱ Ari ita, vo pitupituo kavuiva oa-ia oisoo Pautoa-ia vuurapa vaisi purapaive, ro ira viapau opesia vaiaro. Oa iava opitupiturovu oaive raga puraiva varaopa ora avivikepasa vara-ia vuurapa vaisi purapaoro tokarasiara. Oara oisoo purapaive ora voea vavaeoro raga iava, oiso ra oiravira kekepa viro ora kokiovira, ora rakoruvira, ora vo karero okareroa vo rasio-ia vokapaiveira.

### *Vo Toupai Ovurovu Rutu Iava*

24 ✱ Uva oisi-a eisi osa ragavira vo pitupitu eva puraiva, oa iava Pauto voea iava vasereva oiso ra ora voea vo pitupituro purapaive evara kokoropara. Oa iava ora voea vo rugorugoooroora raga sirova utuoro opitupiturovu rutu vuriara karekareke piepaiva. Uva ora voea-ia opitupiturovu rutu purapaiva oiso osa okarerovu kaakau karero, voeao okarea viapau oiso ora vo karepa ariipaave. 25 ✱ Ari ita, Pauto vaoro oiraopa reo ovauoro oreorovu raga kuvuara sirova utupaaepa ora voea raga varaaro. Oa iava oisoo varaore variripaave oara purareva Pauto voari tuariri. Oire uva varapa evara variripaoro rerare Pauto isivaaepa rutu, ro ira vara rutu evara purareva. Ro-ia Pauto ira-ia vuurapa vaisi purapai vigei vao vo vokie ora vo utupaua rutu.

26 Uva vara-a varao vuri pitupituro oara iava Pauto voea iava vasereva, oiso ra ora voea raga ora voea vovouoroora sirova utuave. Ra vara-ia ora arii pieave ora voea raga. Vao kavuoro vearoa ora oua, ora vairoro ragava otopaave riakora. 27 Vo ovusa oirara tapo oisi raga piepaoro ora voeava otopaave. Oire uva oisi-a eisi osa iava riroa vuria vavataaro oisoo kaepaive ora voea raga. Uva va eva vuri pitupitu vo voriaro oa voeapa torevokopapeira oa oupaiveira.

28 ✱ Uva oisoo Pautoa-re isivapaoro rera vo tavitaviarova kaureopaave. Uva va-a vao oa iava voea iava vaserevoiva Pauto, voea iava sopaura oaive agasiepa rutu vuriara oaive iava vo pitupituro-ia oara oisoo purapaive vo vokiara rutu-ia. 29 Oiso vo vovouoro varao vuri vovouoro rutu oiso-ia, iiruko vovoua vao, ari otopa pitupitua vao, ari riiriipa vovoua vao,

✱ 1:18: Ef 5:6; Kl 3:6 ✱ 1:20: Sam 19:1-6 ✱ 1:22: Jer 10:14 ✱ 1:23: Sam 106:20; Ap 17:29

✱ 1:24: Ef 4:18-19; 1 Pi 4:3 ✱ 1:25: Ais 44:20 ✱ 1:28: Ef 4:19

ari oira kopii pie ovoipa pitupitua vao, ari ora upopa pitupitua vao, ari kuuvu reoroa varao oara oisoa purapaoro oearovivu akaipa piepaive, ari reo topatopa piepa vovoua vao. <sup>30</sup> Ari oearovu togapa vovoua vao kuuvu reoro-ia, ari Pautoa-pa reasipaoro oisoa ora voea vaiiario raga iava vagupaave, ari raiva taraapa vovoua vao oisore ra oraivai iava vuriara purapaive, ari aite irarava ora kaureopa vovoua vao. <sup>31</sup> Ora vuri pitupituro oaive purapaoro oisoa voea varaarore ovaupaave reo ovoiro oaive. Ora viapau oiso oaravivu-ia roroioapaave. Uva oearovupa siraopa pitupitu viapau sovopaive vo ora voea sopaaro-ia. Ari, vosa oisi ora sovoooro voearovi tauvapaive osa viapau. Aue iava uvare viapau sirao vovourovi vai voea sopaaro-ia. <sup>32</sup> ✧ Pauto vo reoro-a vao oa oiso purapapeira, Oiso torevokopai vosa iravu vuri vovou purapareve vokiara rutu-ia, oire ra rera kopii pieta rera upooro. Uva va-a eva rera vaoro voria. Oire uva vo reoa vao-ia oa-ia oisoa taraipaave rutu. Uva oiso purapaave vare, “Eagara, vo reope eva. Vao purape vuria.” Oire uva vao-ia tapo vuria purapaive oearovu siposipopaoro oiso, “Eagara, vuri vovou purapata. Viapau oiso oavu avu vaiei va-ia.”

## 2

### *Pauto Vo Rovirieiario Torevokoa Rutu*

<sup>1</sup> ✧ Voeao-ia vuri irara oea iava tavitaviparai oiso, E voea rovirieipataveira oiso voeare purapaoro, “Vuri irara evoea”? Oire opeita ora visii raga ora keakeapata oisi eisi purapaoro. Vosa oearovu togapata, oire uva visii raga ita oisi vara vuriara purapataveira. Uva oisi-a eisi osa purapaoro uvuipatai ra ora visii raga ora togapata ita. <sup>2</sup> Oa-ia vao-ia taraipaviei oiso, Pautoa raga oa-ia vao voeapa siraoa vavataaro vatepareveira voea vo vovouaro vuriara rovirieipaoro. Uva va-a eva rera vo pitupituro oa oisi eisi torevokopapeira rutu. <sup>3</sup> Uva visii-a vao-ia visiigoa oirara toga iraopataveira varao-ia voea vo vovouaro vuriara. Ari ita, uva visii raga ita visiigoa oisi vara vuriara purapataveira. Oire uva apeisi-a? Pauto vaoro-ia voria putetaverea va vatavataoro? <sup>4</sup> Ari ita, taraipatai Pautoa-ia vearo vovouto, uvare viapau oiso vagevagepavira visiire kasipuparaveira oiso ra visii opesi pie ovoireve. Oire uva apeisi-a? Va-a eva vituaro iava rerapa reasipataveira, eke? E viapau taraipataveira rera-ia Pauto ira visiipa kave vovou rera vaoro vatepareveira visiipa siraoapaoro, oisore ra vorevira rera iare sopaura oavisii porepata? <sup>5</sup> ✧ Oire uva vo voki-a vao oa-ia Pauto rera vaoro kasipua karekereveira voea vaaro vuriara rovirieipaoro torevokovira, uva evo voki-ia visii vaoro voria outaverea rera ruvara-ia pute pievira rutu. Eake iava? Uvare riitako vovou irara visii rera vo reoro uvu arapa.

<sup>6</sup> Aue iava uvare uvuivira rutu Pauto voea vorireverea vuriara oaiveva uvuiooro, oiso osa voea varaaro vuriara uvuipapeira. <sup>7</sup> Uva oisi-a eisi osa ragavira Pauto voea vatevareira Tootoo Ovoi voeao oea vo tootoore taraapaiveira, ora voeao oea rerare veoro vovou rutu purapaive kasivarivira rutu oiso ruiapaoro ra Pauto voea-ia rorupareve, voea vaiiario kae piepaoro. <sup>8</sup> ✧ Osa voeao oea ora voea ragare rugurugooapaoro veoro vovou kavupaiveira, voea vo pitupituroaro raga sirova utupaoro vuriara, uva voea-a evoea oea-ia Pauto rera vaoro riroa kasipua tovoreverea voeare aveaveoro rutu. <sup>9</sup> Oire uva riroa tavaka ouiverea voea vo vurioaro voriaro iava, ora riroa tapo vavata siraoa-ia oa ouiverea. Ovori epao toupai oa ou rovoiverea irapavira voeao Jiu. Ra voea isivaaro iava oearovu voeao

✧ **1:32:** Ro 6:21; Ap 8:1   ✧ **2:1:** Ro 1:20; 2 Sml 12:5-7   ✧ **2:5:** Diu 32:34   ✧ **2:8:** Ga 5:20; 2 Te 2:12

iava ratau tou irara vo vori raga ouive ita. <sup>10</sup> Ari ita, uva oiraopavira uvare voriana epao, oara toupai vearo vovouro rutu vo voriroaro. Oara vatereverea Pauto voeaopa oea vearo pitupitu purapaive. Oiso osa vo voriro-ia, vigei-ia rorureverea vigei vaisiaro kae pieoro, ora gavaurea tapo vatereverea vigeipa. Oa-a vao oa ou rovoiverea irapavira voeao Jiu. Ra voea isivaaro iava oearovu voeao iava ratau tou irara vo voriro raga ouive ita. <sup>11</sup> Aue iava uvare torevokovira raga Pauto vaeavira rutu oearovu rutu rovirieiverea vo utupaua.

<sup>12</sup> Uva voea voeao-ia ratau tou irara oea-ia viapau oiso Moses vaaro Reo Taisi toupaveira. Oire vosa vuri vovou puraive, ra va-ia kopii ovoiaive opesi ovoioro. Uva viapau oiso Pauto oisi voea pierereverea vo uvare Moses vaaro sirova Reo Taisi utuoro voea rovirieiverea. Viapau. Ari, eva peira Reo Taisi Jiu-pa irara raga ruvara-ia. Ari vosa voea evoea vuriara purapaive, oa sirova voea rovirieiverea eva Reo Taisi. <sup>13</sup> ✧ Vosa voeao oirara oea Reo Taisi uvupaiveira, ra viapau va sirova utupaave vo Pauto osireiario-ia, uva viapau oiso vearo irara voea evoea. Ari voea oea vearovira vaisipareveira Pauto, oea vearovira Reo Taisi uvupaoro va sirova utupaaveira. <sup>14</sup> Uva va vao-ia Reo Taisi oa viapau oiso voeao-ia ratau tou irara toupaveira. Ari vosa irai voea iava ora rera vo ruipaaro raga iava vearo vovouro purapareve varao oara iava tavipapeira Reo Taisi, oire uva vo vovouro-a varao oara oiso karekepere rera-ia, oara evara rera vaaro reo goru va sirova utupasa. <sup>15</sup> Uva voea raga ita oea vearo pitupitu purapaiveira, oa-a eva oa-ia vao kareke piepaiveira oiso rutu Reo Taisi vo reesireiario, oa toupaveira voea sopaaro-ia oisi. Ora oiso ragavira tapo osa va vao kareke piepaiveira, uvare ora eveipaaveira voea varaaro iava vuriara. Ra va iava ora togapaave oiso puraoro, “Vuria puraavoi.” Oire vosa ovokivu-ia ora eveiave ora voea raga oiso puraoro, “Vearoa puraavoi,” ra oisi ragavira eisi voea vaaro reo goru ora voea-ia karekeive. <sup>16</sup> Uva oisi-a eisi osa iava vo vokia eva oa-ia Pauto Jisas tavireverea oiso puraoro, “Oirara rovirieiparivoi,” ovoki-a eva oa-ia varao vatau rugorugooro oara vigei sopaaro-ia vatauvira toupaveira roroiovira ora karekeperea rutu viaevira. Uva vara-a evara oara rovirieiverea rara Jisas. Oiso osa oearovu taviavora vao iava Vearo Sipoipo Jisas vaaro.

### *Voeao Iava Jiu Ora Voea Vaaro Reo Taisi*

<sup>17</sup> Visii vao-ia apeisi ragavira toupataveira? Oa iava visii raga ora vaisipataveira oiso, “Igei raga Jiu, riro tarai irara Reo Taisi-ia.” Oa-a eva oa-ia ora visii raga ora vaisiaro kae piepataveira oiso purapaoro, “Pauto ira igei raga roporeva. Ira igei raga-ia toupaveira.” <sup>18</sup> Uva visii rutu rera vaaro Reo Taisi vieipataveira. Osa iava vearovira taraipataveira vo, oiso ra rera vo ruipaaro sirova utupata. Oa iava uvuipatai ra oaravu rutu oisi iava vearovira rovirieipata oaravu reeresipaoro oiso, “Torevokoara varao-ia.” <sup>19</sup> Oire ora visii raga iava oiso purapataveira, “Uvuipaiei ra ro vaaru vovouto vovouaro karuio, ora uvuipaiei ita tapo ra aviavia vateio voeaopa oea rupavira toupaveira. <sup>20</sup> Ora uvuipaiei tapo ra voeao auu reo pura irara torevokoio tapo. Ora tapo uvuipaiei voeao roroio pievira siposipopasa oea airepavira Pautoa-ia taraiave.” Ora oiso purapataveira, “Taraipaveira vearovira rutu Reo Taisi-ia, oa iavirava varao-ia oiraopa reoro rutu vituaroa iava taraipaveira rutu ora orekerovu rutu-ia taraipaei.” <sup>21</sup> Avoeao! Visii vao-ia visiigoa oearovu rutu siposipopataveira. Uva apeisi-a? Ari akepa visii raga ora siposipo asapataveira? Oearovu vosipataveira oiso purapaoro, “Opeita kavirupata.” Uva apeisi-a? E kavirupa irara

visii? Iu. Oa purapataveira. <sup>22</sup> ✧ Oearovu vosipataveira oiso purapaoro, “Opeita otopata.” Ari eakepa visii raga oisi ora pie asapataveira. Visii riro kasipu irara voeaore oea varaore variripaaveira oara purapaiveira ora oea vavaeoro iava. Vo osa visii raga orekerovu kavirupata vo keparo-ia oara-ia varao toupaveira tokarasiara. <sup>23</sup> Uva ora visii raga tapo ora vaisi oavisii kae piepataveira oiso purapaoro, “Pauto vaaro Reo Taisi igei raga-ia toupaveira.” Uva va vao-ia Reo Taisi oa vatavatapaoro Pauto vaisiara akaipa piepataveira rutu. <sup>24</sup> ✧ Vao-ia Tugoropa Vuku oiso purapapeira, ‘Voeao-ia ratau tou irara oea visii varaaro vuri pitupituro kekepaoro Pauto vaisiara tovipaiveira.’

### *Rakari Verapa Pitupitu Oa Viapau Uvuipai Oirara Orirupasa*

<sup>25</sup> ✧ Vosa Reo Taisi rutu sirova utu ruipapata, ra ora visii iava rakari verapata ora reesipaoro oiso, Visii Pauto voeaoro rutu. Eisi osa vearopai. Ari vosa oisi va purapaoro eisi Reo Taisi vatavatapata, ra vo reesi eva oiso rutu toupave Kuvuvua rutu. Oa akaipavira rutu toupai. <sup>26</sup> Oire uva apeisi ragavira toupai vo Pauto osireiara-ia? Aue iava vosa iravu voea iava ratau tou irara rakari vera asato vearovira Pauto vaaro sirova Reo Taisi utuparo. Oiraopavira ita, oiso Pauto ira eveiparevere oiso rutu osa iravu ro visii iava, visiigoa ora visii iava rakari verapataveira. <sup>27</sup> Oire uva voea voea-ia ratau tou irara ora voea iava rakari vera asa irara, oea vearovira rutu Pauto vaaro Reo Taisi sirova utu irapaaveira. Uva voea-evoea oea vorevira visii togaiverea, uvare visii-a vao Jiu rakari verapa irara, visiigoa akukupavira Reo Taisi-ia tarai ragapataveira, osa viapau oiso va sirova utupata. <sup>28</sup> ✧ Aue iava uvare iroutoa rutu-a Jiu-pato? Easi ro-ia ira-ia rakari vera reesi toupai, raa? Viapau. Asi ro-ia ira-ia oiraopa reesi rutu toupave. Vo reesio-ia oiso-ia vosa Pauto vaaro Reo Taisi rera sopaoro rutu-ia oiraopavira rutu toupave. <sup>29</sup> ✧ Oiraopavira rutu ro-ia oiraopato Jiu-pato ira-ia oiraopa reesi rutu toupave rera sopaoro-ia. Vo reesio oia viapau oiso sigoa-ia oa purapaiveira vao Reo Taisi sirova utupaoro. Asi vao-a oa purapaveira Pauto reraoro Tugoropato Uraurato. Oa-a eva oa vituaro rutu iava ruipapaaveira rutu, oiso ra voea-ia rurupareve rutu Pauto, uvare viapau oiso rugorugopaaveira ra ora voea raga vaisiara-ia vuurapa vaisi purapave oirara.

## 3

### *Pauto Rovovira Reoa Vate Rovoreva Voeapa Jiu Uva Voava Rerare Isivaapea Ita*

<sup>1</sup> Oire uva apeisi ragavira oiso osa toupavei vao-ia? Vosa Jiu-pato vii, oire ra va iava iravira irapau oearovu rutupa oirara vo Pauto osirearo-ia, eke? E apeisi-a? Akukuvira raga ora voea iava voea Jiu rakari vera ragapaaveira, eke oai toupaveira va-ia vao? <sup>2</sup> ✧ Avoea, oiraopavira rutu oa-ia vao toupavei vao-ia. Oa vituaro uvare va-ia vao oearovu rutu putepaveira. Rovopa rutu veaoro oiso rutu toupaveira, uvare Pauto ora rera vo rearo vatereva voea Jiu. Oa iava uvuipai ra va iava vearovira rutu taraipeave va-ia vao oa purave voea. <sup>3</sup> Oire uva apeisi-a? Oearovu Jiu-pa irara vo reore vao-ia isivaapea, uva apeisi-a? E Pauto vare vao rera vo rearo ovaoreva? <sup>4</sup> ✧ Viapau rutu. Oreoa vao rera vaaro oirao pierevera ra oiraopavira karekeperea rutu. Vosa oirara rutu oiso toupave osa riro

✧ 2:22: Ap 19:37 ✧ 2:24: Ais 52:5 ✧ 2:25: Ga 5:3 ✧ 2:28: Mt 3:9; Jo 8:39 ✧ 2:29: Kl 2:11; 2 Ko 10:18; 1 Pi 3:4 ✧ 3:2: Diu 4:8; Sam 147:19 ✧ 3:4: Jo 3:33; Sam 116:11, 51:4

kuuvu irara, uva rera raga ira pauakavira rutu toupaveira Oiraopatoa Rutu Pauto. Oiso osa vao-ia purapaveira Tugoropa Vuku, 'Vosa reoreopau, ra vii vo rearo oiraopape rutu, oire ra va iava taru oirara rutu vo reo uvupaive. Vosa oearovu vii keakeapaoro vii togapaive oaravu-ia kuuvuara oiso purapaoro, Vuritoa rutu vii, oire ra voea-ia puteri voea varaaro viaevira kuuvu reoro karekeoro.'

5 Ari ita, oearovu vo rasio iava oiso purapaaveira, "Vosa vigei vo pitupituroaro varao vuriara oara-ia Pauto vaoro torevoko pitupitu viaevira rutu karekerea, oire uva apeisi-a?" Vosa Pauto vara-ia vigei varaaro vuriara vigei vorirevera, uva apeisi-a? Ra rera Pauto vuria purareve va-ia oisi? 6 Viapau rutu! Viapau oiso vurito-a Pauto. Vosa oisi ragavira toupaveiri, ra apeisi ragavira oearovu varaaro vuri vovouro torevokovira roviriepareve voea oea vo rasio-ia toupaveira? 7 Oire oearoi pasi ragaire oiso puraavere, "Viapau oiso torevokopai ra Pauto igei varaaro iava kuuvuara igei rovirieireve. Aue vituaro iava uvare vara iava evara Pauto-ia taraipaaveira oearovu vearovira oiso, Oiraopatoa Rutu Pauto. Ira ora rera vo rearo oirao piepareveira vara rovirieipaoro. 8 ✧ Oire vosa oiraopa reo vao-ia, ra va iava oearovu vai pasi oiso puraave, "Oire ra vuriara vai purape, ra va iava vearoa vai karekepe." Ari ita, oearovu oiso ragai tovipaiveira oiso purapaoro, "Vii Pol viigoa oisi oiso oearovu siposipopariveira." Oiraopavira rutu oa-a vao oa-ia voea evoea riroa tavaka oiviera rara vo Pauto ruvara-ia voea vo toviouro voriaro sirova vuriara.

### *Viapau Rutu Irai Vo Rasio-ia Torevokotoa Vai Toupaveira*

9 ✧ Oire uva apeisi-a? Voeao Jiu-pa irara ratau tou irara-ia putepaveira, uvare voea-a vearo irara, eke? Viapau rutu. Vo reo-ia oa aviavi pievira rutu pura rovoavo oiso-ia, Voea rutu voea Jiu ora voea tapo ratau tou irara oea rutu takuvuaro-ia goruvira rutu toupaveira vuria vo varivariaro. 10 ✧ Oisi-a oiso osa rutu toupaveira Tugoropa Vuku-ia vo reo-ia, 'Viapau rutu iraiet torevokotoa vai, uvare oirara rutu-a vuri irara.

11 Ari ita, viapau oiso iraiet ira roroiovira rutu Pauto-ia taraiparoveira. Ora tapo viapau oiso irai epao ira Pauto-re taraipareveira rerare rugurugopaoro.

12 Uvare oirara rutu-a oea Pauto-re isivaapea vuriara-ia pirooro. Viapau oiso vearoa vai purapaveira. Oa iava viapau oiso irai epao voea iava ira vearoa vai purapaveira.

13 ✧ Ari ita, voea vo reoroaro vuriara rutu eru geesi reoro, oiso rutu osa vao eruara vo geesipaveira tova urui-ia. Ari ita, voea gisipoaro iava kuuvu reoro kosipa piroveira vo oearovu keakeapasa. Oa iava voea vo reoroaro oearovu avupaiveira, oiso rutu osa tavuako.

14 ✧ Oearovu tovipaiveira vurivira rutu vaavaavuvira. Oa iava ikavira rutu voea iava kasipua kosipa piroveira.

15 ✧ Oire ra oearovu upopaive.

16 Ora uvarovu rutu vokapaoro oearovu rutu varaaro tekipaiveira. Oire ra varapa rirovira siraopaave voea oea varaaro-a.

17 Viapau rutu oiso vao-ia taraipaaveira kave vovou vo pitupituroaro.

18 ✧ Ari ita, oiraopavira, viapau oiso Pauto-re rugopaoro rerapa ora avivikepaaveira.'

19 Oire uva vigei oiso taraipavioveira Pauto voeaopa Jiu-pa irara Reo Taisi vatereva, oiso ra tupaive va sirova utupaoro. Oa iava viapau oiso irai voea iava uvuiparoi ra oiso puraparo, "Ragai-a torevokotoa rutu." Viapau

rutu. Ari ita, oiraopavira voea rutu voeao uvarovu rutu tou irara oea va-ia vao Reo Taisi taraipaaro ora voea-ia taraipaaveira oiso, “Vigei rutu vao-ia vuri irara. Vigoa taru voria ouperea vo Pauto ruvara-ia, varao voriaro vigei varaaro vuri vovouro oavi.” <sup>20</sup> Eake iava? Uvare viapau oiso iraiiei ira torevokovira karekeroverea Reo Taisi sirova utuoro vo Pauto osireiaro-ia. Viapau. Ari vosa oisi ragavira oiso oaravu-ia taraipavio va iava vao Reo Taisi, oire ra oisi ita ora vigei raga-ia taraipavio, ra oiso purapavio, “Oiraopavira rutu ita, vigei rutu vuri irara.”

*Ro Ira Krai Oirao Piepareve Eera Ira Torevokovira Karekeroverea Pauto Osireiaro-ia.*

<sup>21</sup> Vosa eisi ragavira toupave Reo Taisi, oire ra viapau oiso oisi ragavira va iava torevokovira karekepavio. Viapau rutu. Ari ita, uva oraivavuei vao oa roroiovira karekervora Pauto oirara rutupa. Vao oa iava vo rigato epao vo Moses vo taisiaro Reo Taisi sovara-ia. Ora vo oearovu rutu profet irara vo rigatoroaro tapo sovara-ia, varao oara puraiva voari rutu tuariri.

<sup>22</sup> Oiso osa vao-ia oa-ia vigei reesipareveira oiso purapaaro, “Torevoko irara voeao-ia” aue iava rara Jisas Krai oirao piepape. Oraiva eva oa oirara rutupa toupai. Oa-ia oisi eisi voea taru oiso pierereveira voeao oea Krai oirao piepaiveira rutu. Oa-a eva oa vituaro iava oirara rutu areiivira raga toupaveira Pauto osireiaro-ia. <sup>23</sup> ✧ Oiraopavira rutu, oiso osa oirara rutu vuri vovou purapaiveira. <sup>24</sup> Oa iava oirara rutu tauaipaaveira Pauto vo Saraaro-ia koata arapa vore rera ruvara-ia. Ari Pauto vo siraoaro riroa rutu akukuvira oa vate ragapareveira vigeipa vo Jisas Krai vo kovoro iavirava. Oire uva vo vafevatea vao-ia oa-ia vigei reesipareveira oiso, Torevoko irara voeao-ia, vorara va-ia vigei iava vuriara vera rovopareve.

<sup>25</sup> ✧ Aue iava uvare Pauto Jisas vara piereva rera siporo vigeipa kopiiro koruoua tavoriosa. Oire uva va vituaro-a vao-ia vosa va oupasa Jisas oirao pie rovopape rutu, ra va iava Pauto tapo ora agiagipavio. Uvare Pauto oirara rutu varaaro oisoa keke ragapareve vuri vovouro. Oa iava vooapa oisoa siraoparo rutu. Oire uva oisi-a oiso osa iava Pauto vo vovouaro torevokoa rutu viaevira karekeerao vo vokio. <sup>26</sup> Uva vo vokio viapau oiso oirara vo vovouoro keke ragapareveira. Uva va-a eva oa vituaro iava oirara rutu oiso taraipaaveira, Ro-ia Pauto torevokotoa rutu. Ira voearore oiso puraparoveira, “Torevoko vovou irara voeao,” vo rara Jisas oirao pie rovopave rutu.

<sup>27</sup> ✧ Oire uva eake vai rutu uvuipai ra oai purape, ra oai iava vo vaisi eva oupe oiso, Vii-a torevoko vovouto? Ra va iava vaguvira tavitavivio? Viapau rutu oiso oai epao. Uvare Reo Taisi rutu sirova utupavioveira, eke? Viapau rutu. Ari aue raga-ia oirao piea vao vigei vaaro. Oa raga-ia uvuipaviei ra vo vaisi eva oupe. <sup>28</sup> Oire uva oisi-a oiso osa iava uvuipaviei ra Pauto tapo ora agiagipavio vearo vaisi ou rovoro, vo rara Jisas oirao pie rovopape rutu. Ari ita, viapau oiso uvuipaveira vosa Reo Taisi raga vo pitupituroaro sirova utupavio.

<sup>29</sup> Uva apeisi-a? E Pauto-a Jiu raga reraaro? E viapau oearovu rutu reraaro-a voeao ratau tou irara, raa? Ari oiraopavira rutu, ro-ia Pauto oirara rutu reraaro. <sup>30</sup> ✧ Pauto-a kataitoa raga rutu. Ira voarei rutu iava oearovu rutu reeresipareveira torevoko vovou irara ora rerapa vao raga iava oirao piea. Voarei rutu iava oiso, voeao iava Jiu-pa irara ora voeao ratau tou irara. <sup>31</sup> Oire uva apeisi ragavira? Reo Taisi veripape uvare vigei varaaro oirao pie vovouro va-ia Reo Taisi putepavio rutu? Viapau rutu.

✧ 3:23: Ga 3:22 ✧ 3:25: 1 Jo 2:2; Hi 9:14, 28; 1 Pi 1:19 ✧ 3:27: Ro 2:17, 23; 1 Ko 1:29-30

✧ 3:30: Ga 3:8

Ari ita, vo osa vao airepa raiva sirova utupaoro vao tapo Reo Taisi oirao piepape.

## 4

### *Pauto Ebrahim Vaisireva Oiso, Torevokoto*

<sup>1</sup> Ro-ia Ebrahim Jiu-pa irara aautoaaro, uvare rera-a voea vituaro rutu Jiu. Oire uva apeisi ragavira purapaviei rerare, uvare apeisi ragavira torevokovira karekero viropa? <sup>2</sup> Uva apeisi-a? Torevokotoa rutu-a rera varao iava okovoroa rutu purareva, eke? Viapau. Vosa eisi vo kovoro purarevori, uvuipa ra ora vaisiario rei piero. Oire ra va iava ora rera iava vara-ia evara ora rera iava riataroeri. Ari ita, uva viapau oiso uvuiparoepa ra oisi eisi piereve vo Pauto osireiario-ia. <sup>3</sup> \* Uva Tugoropa Vuku oiso purapapeira, 'Ebrahim Pauto oisoa oirao piepareve. Va-a vao oa iava Pauto rera vaisireva oiso, "Torevokoto."'

<sup>4</sup> Ari ita, oiso-ia vosa iravu iravupa oirato kovopareve, oire ra vo kovoa-ia eva rera vaaro vori ouparo. Vo vorio-ia rera vaaro viapau oiso sirao voria vova rera reitooaro rerapa. Viapau. Ari evo vori oisoa oupareve vao raga-ia rera vo kovooaro. <sup>5</sup> Oire uva rera-a eera ira oisoa vaisipareve Pauto oiso, Torevokoto, vo rara ora rera vo kovooarore ovaupaoro Pautoa raga oirao piepareve. Ari ita, Pautoa raga oiso vigei vaisipareveira, Torevoko vovou irara, vigei vao vigoa vuriara purapapeira. <sup>6</sup> Ro-ia Devit ira tapo oiso reoreoroepa va iava vao oiso-ia, Vosa voeao oirara oea Pauto oirao piepaive, oire ra voea varaaro oirao pie vovouo kekepaoro oiso voea vaisipareve, Torevoko vovou irara. Oa iava oisoa rorupaive rutu. Uva viapau oiso voea vo kovooaro kekepaoro-a. Viapau. Ari, aue raga oirao piea vao voea vaaro. <sup>7</sup> \* Oiso vo rigato purareva Devit,

'Voeao oirara oea rorupaive rutu, uvare voea iava vuriara rutu vera ovoireva vara ovau ovoiro rutu Pauto.

<sup>8</sup> \* Ora tapo rorupareve, ro ira varaaro vuriara kekepaoro Pauto viapau oiso vara vieipareveira vore tuepaoro utupa voki-ia.'

<sup>9</sup> Oire uva apeisi-a oiso osa puraroepa Devit? E voeao raga rorupaive oea ora voea iava oisoa rakari verapaave? Viapau. Eake iava? Uvare Ebrahim voari tuariri rutu Pauto oirao piereva rutu. Oire uva Pauto rera vaaro iava oirao piea eveioro oiso rera vaisireva Ebrahim, Torevokoto. Eisi osa visii tavitavipaavo vo reo iava vo Tugoropa Vuku-ia. <sup>10</sup> Oire uva apeisi-a? Aa vo vuutao rutu iava vo voki-a vao oa-ia oisi Ebrahim vaisireva Pauto? Uva oisi rera vaisi rovorevoiva, ora rera iava utupavira rakari torevoko vovouepa, eke? Ari! Osa-a eisi. <sup>11</sup> \* Iu ita, oa-a eva isivaaro rutu iava rera iava rakari veraeapa reesia puraoro. Oiso ra va iava oiraopavira karekepe vo vaisio oa-ia Pauto rovovira oiso rera vaisireva Ebrahim, Torevokoto, vo osa ora rera iava rakari vera asavira toureva. Oire uva eisi osa ragavira pierava Ebrahim, Voeao ratau tou irara aitooaaro. Voeao oea ora voea iava viapau rakari verapaaveira. Uva oisi-a oiso osa iava voea varaaro raga iava oirao pie vovouo voea vaisipareveira Pauto oiso, Torevoko vovou irara. <sup>12</sup> Oiso-ia tapo rera ro Ebrahim Jiu-pa irara aitooaaro toupaveira, voeao oea oisoa rakari verapaave. Ora voeao tapo Jiu oea Pauto oirao piepaiveira. Uva oisi-a eisi osa pie rovoreva Ebrahim Pauto oirao pie rovooro, oa iava ora rera iava rakari veraroepa utupavira.

### *Reo Ovoi Vatevea Voeao Oirao Pie Vovou Irara*

13 ✧ Pauto Reo Ovoi purareva Ebrahim-pa ora voeao rera aao iraraaro utupa irara. Vao oa-ia oiso puraroepa, “Ragai visiipa vo rasio rutu vateavere rara, ora voeao vii aao iraraaro utupa irara.” Ro Ebrahim ira oisoa Reo Taisi rutu sirova utupao. Oire uva viapau oiso va vituaro-a vao-ia oa iava Pauto rerapa Reo Ovoi purareva. Viapau. Ari oirao piea raga-a rera vaaro oa vituaro iava va vao vearo vaisi rutu oureva Pauto ruvara iava Ebrahim. 14 Oire uva apeisi-a voea iava voeao oea reo ovoi ouiverea? E voea raga va sirova utupaaveira va vao Reo Taisi, eke? Oire vosa oisi oiso toupaive, ra akukuvira raga oea Pautoa-ia oiraopa vaisi purapaive. Ra va iava viapau Pauto vaaro Reo Ovoi viapau akaipavira rutu toupaive, raa? Ari! 15 ✧ Uva viapau oisi eisi toupaiveira. Eake iava? Uvare va-ia va taraipavioveira Reo Taisi oa oiso purapapeira, “Voeao oea vuriara purapaive oarava uvuivira ita vara voriaro ouiverea.” Ari vosa viapau oisi eisi Reo Taisi vaieri, oire va iava viapau oiso ra irai ragaire oiso puraparo, “Vuriara puraparivoi. Oa iava vii vaaro voria ouriverea rara.”

16 Oire uva va raga vao Reo Ovoi vituaro oirao piea. Oiraopavira rutu, uva viapau oiso va vituaro-a vao varao-ia vigei vo kovoroaro. Vosa va vituaro oisi oiso toupaive, uva viapau oiso akukua vatevatea vao-ia Reo Ovoi Pauto vaaro. Ari ita, oiraopavira oiso osa varao uvuipaviei ou rovopape vo Reo Ovoi iava vao Pauto vaaro rara Pauto oirao pie rovopape, oiso osa Ebrahim oisoa pie rovopareve voari tuariri, uvare Ebrahim-a vigei rutu aitearo. Vigea Reo Taisi sirova utupavioveira, ora voeao oea Pauto oirao piepaiveira oiso rutu osa oisoa piepareve Ebrahim. 17 ✧ Aue iava uvare oiso purapapeira Tugoropa Vuku, ‘Ragai vii oiso pieava osararovu rutu aitearo vii.’ Oiraopavira rutu vigei vao-ia Ebrahim ovii iraraaro vo Pauto osireiaro-ia, ro Pauto ira oisoa oirao piepareve Ebrahim. Oa vao Reo Ovoi oirao pierereva vo utupaua Pauto. Aue vituaro iava uvare rera raga uvuiparoveira rutu voeao kopii irara vorevira tore piepasa vova tova uruiro-ia. Ora varao tapo oara-ia viapau uvuipaii oearovu oiso ra vara kekepaive, rera raga uvuipa oara karekepa roroiivira. Rera ro vigei rerao Pauto ira oisi oiso toupareveira.

18 ✧ Rera ro Ebrahim ira avuka ragaroea kakae kavau asavira raga. Uva oisoa tovira rutu tueparo Pautoa raga oirao piepaoro oiso purapaoro, “Rera raga ragai vaterevere rara kakaetoa vai.” Uva va-a vao vituaro iava oisoa vao Reo Ovoi oirao piepareve rutu oa vatereva Pauto rerapa. Vao oa-ia oiso puraroepa, “Vii-a Ebrahim, osararovu rutu aitearo.” 19 ✧ Oire uva vo vuuta-a vao oa-ia Ebrahim katai vovoto ivaro (100) iare uvuiva tutuureva. Oa iava oiso puraroepa ora rerare, “Avoeao, avuka ragarai ragaivi. Uva kopiisa tutuuvai. Vegei avukarei rutu ora vatuuva oaa o-ia Sara. Iria viapau uvuipaii oiso ra kakaetoa vai kavaveve.” Uva oisi ragavira toupao goruvira oisoa va raga vao Reo Ovoi oirao piepareve, oiso ra va iava kakaetoa vai kavaveve. 20 Oire uva va raga-ia vovoupaoro vao Reo Ovoi viapau oiso rera vaarore oirao piea oisoa ovauparo. Uvare va-a vao oirao piea oa rera vo rugurugooaro goru pieva rutu. Oa iava Pautoa-ia vuurapa vaisi purareva rutu. 21 Ari ita, goruvira rutu va vao Reo Ovoi oirao pierereva rutu. Oiso ra Pauto rera vaaro rerapa va oiraopavira kareke pierere rutu, uvare viapau oisoa vakuvakuparo rera-ia Pauto rera Ebrahim. 22 Oire uva va-a eva oa vituaro iava Pauto rerare oiso puraroepa, “Torevoko vovoutoa rutu vii Ebrahim.” Uvare oisoa rera vaaro kekepareve riro gorua oirao piea rera vaaro.

✧ 4:13: Jen 17:4-6 ✧ 4:15: Ro 3:20, 7:8, 10, 11 ✧ 4:17: Jen 17:5; 1 Ko 1:28 ✧ 4:18: Jen 15:5

✧ 4:19: Jen 17:17; Hi 11:11



<sup>23</sup> Oire uva vo reo-a vao oa rigatoiva rera iava Ebrahim oiso, ‘Pauto rera vaisireva oiso, Torevokoto vearoto.’ Uva va vao oiso puraoro viapau oiso rera raga iava oiso vo rigato puraiva. <sup>24</sup> Ari ita, vo reo toupaveira vigei rutu iava, vigoa vaisirevea Pauto oiso, Torevoko vovou irara. Aue raga iava vo rara rera oirao pie rovopape rutu, ro-ia Pauto ira Jisas kopiia iava vorevira tore piereva. <sup>25</sup> Pauto rera eakareva viurupa irara vavaearo-ia, oiso ra kopiio vigei varaaro vuriara voriaro ouoro. Uva va-a vao oa iava vorevira toreroepa, oiso ra va iava eva Pautoa tapo ora agiagipavio oiso rutu toupaooro, Torevoko vovou irara rutu.

## 5

### *Pautoa Tapo Ora Agiagipavio Vo Rara Jisas Oirao Pie Rovopape*

<sup>1</sup> Oire vo osa Pautoa tapo ora agiagi rovopavio rera vaaro Reo Ovoi oirao pie rovopaooro, oa iava gavaurea-ia rera tapo toupapeira. Vo uvare Jisas Kraiss vigei Turaroaro va eva kasipua opesi pierevora. <sup>2</sup> \* Oa vao purarevorao Jisas vigeipa. Ari ita, uvui irao paviei ra Jisas oirao piepaoro vereopa vovou oupape vo Pauto ruvara-ia. Uva evo vovou oupaoro tootopavioveira vokiara rutu-ia. Oa-a vao oa iava roru irao papeira vo vuutaore tuepaoro, oa-ia Pauto tapo toupaperea rera vo vovouaro rutu sirova utupaoro oiso rutu osa rera. <sup>3</sup> Ora varao tapo sirao vovouro vo tavakaroaro oara-ia tapo roru irao pape. Uvare vara-ia tarai irao pavioveira oiso, Oara vea ropapeira vigeipa. Eake iava? Uvare vara varao vo siraoaro kaepaoro uvuipaviei ra raverave asavira goru visivi rutu vokapape. <sup>4</sup> Oire vosa oisi eisi toupaperea osa Pauto vigeire vo reo purarevea oiso puraoro, “Vearopai rutu uvare oisi eisi piepatavoi.” Oire vo osa vo reo-ia taraipaoro rutu, oa vigei varaaro oirao pie vovouro goru piepaivea rutu rerare tuepaoro. <sup>5</sup> \* Oiraopavira rutu, uvare viapau oiso akukuvira oirao piepapeira rerare tuepaoro. Viapau. Uvare Pauto riroa siraoa vate ragarevora vigeipa ro-ia Tugoropato Uraurato ira-ia vigei iava sopaura agasi pierevora rutu. Ro-ia Tugoropato ira-ia Pauto vigeipa sirao vate purarevora.

<sup>6</sup> \* Vo vuuta-a eva oa-ia viapau oisoa vigei raga uvuipavio ora tauvapasa, vao oa-ia Pauto vo vokie reesireva oa-ia Kraiss arureva vigeipa kopiisa vigei vao vuri irara. <sup>7</sup> Oire vo osa irai oiso puraro, “Vosa oesai ragai roro pieve ragai reesiro oiso ra iravu vearoto vo tavukiaro ouoro rerapa kopiira. Avoeao, uva sirao vira rutu-a. Uvare reasiparai oisi pie arapa. Eari vai pasi, irai vai uvuiparoi ra oisi piereve. Irou vai ira-ia tarapai?” <sup>8</sup> Ari ita, Pauto riroa rutu siraoa purareva vigeipa ro-ia Kraiss, ira vigei vo tavukiaro rutu oureva kopiio vigeipa vao-ia riro vuri vovouro pura irara. <sup>9</sup> Uva vigei-a vao vigoapa kopiioepa rera Kraiss. Osa iava uvuipaviei ra Pautoa tapo ora agiagipavio. Ora rera ro Kraiss ira vigei virivariparevea Pauto vo kasipuaropa. Ra va iava utupaua viapau oiso vigei ouve ita va. <sup>10</sup> \* Voari tuariri rutu uva oisoa rera tapo ora keripavio. Oa isivaoro iava rera tapo ora agiagivierao uvare Oviito Jisas vigeipa kopiioera. Uva oisi-a oiso osa toupaooro oiso rutu toupapeira, Pauto vate iraraoro vigei. Ra vao-ia tapo veaovira tarai irao pavio rutu oiso, Jisas vigei oriruparevea vigei tootoo piepaoro aue iavirava rera vaaro tootoo. <sup>11</sup> Iu ita, uva viapau oiso orirua raga-a oa-ia rugorugopavioveira. Ari vao tapo-a riroa rutu rorua

\* 5:2: Ef 2:18; 1 Ko 15:1; Hi 3:6    \* 5:5: Fl 1:20; Ef 1:13    \* 5:6: Ga 4:4; Ro 4:25    \* 5:10: Kl 1:21-22; 2 Ko 5:18

oa oupapeira. Vo roruo oa sovopapeira ora vigei-ia, vo rara vokiara rutu-ia Pautoa tapo ora agiagipavio. Ro Jisas Kraís vigei Turaroaro ira vearo vovou-ia vituparoveira rutu.

*Adam Ira Kopii Rovoreva, Ari Kraís Ira Oiraopa Tootoo Rovoreva Vigeipa*

<sup>12</sup> ✧ Oire uva vo rovoa-ia iravu oisoa toupaveira ira kopii rovoreva Adam. Oa-a vao vituaro vuri vovou vo voriaro karekepa vao-ia kopii. Uva oisi ragavira oirara rutu-ia poupa piroveira kopii, uvare oirara rutu vuri vovou purapaiveira. <sup>13</sup> Uva vuri vovou purapaaro oisoa toupaveira oirara rutu. Oire uva Moses vo vuuta-ia voeare kavaroepa. Oa iava riroroiva, vao Reo Taisi purareva voeapa. Ari ita, voari tuariri uva oisoa va-ia vao vuri vovou toupaveira vo osa viapau Reo Taisi vaiva toupaveira. Uva viapau oiso Pauto voea varaaro vuri vovouro oisoa vieipaveira. <sup>14</sup> ✧ Oire uva vo vuuta vao Adam vaaro oa iava vo tuguraepa Moses vo vuutaaro-ia, oa-ia oirara oisoa kopii ragapaave. Uva viapau oiso oisoa piepaveira oiso osa ro-ia Adam, ira Pautoa-va kaureoroepa rutu vuri vovou rovooro rutu. Va vao purareva rera Adam ovoovovira. Oa iava Jisas rera isivaaro-ia karekeroepa kavauoro oavu ita ovoovoa vituaro rovooro.

<sup>15</sup> Oire uva vaiteira-va vaiteira tasitoarei. Uva viapau oiso vaeavira rutu vaiteira-ia toupaveira. Aue iava uvare Adam vaaro vuria viapau rutu oiso Pauto vo vatearo-a. Eake iava? Uvare riro irara rutu oisoa va-ia kopii ragapaave rutu. Ari ita, Pauto vaaro-a sirao vate, uvare riro irara rutu oirara vo sirao vao ou ragapaiveira rutu. Ari ro raga-ia Jisas ira vigeipa siraparoveira. Ira vituparoi vao-ia oa iava Pauto vo sirao vate kareke pieravorao vigei-ia vo vokie. <sup>16</sup> Oire uva rera vo voriaro Adam oa ouveira rera vaaro-ia vuria vo voriaro, pisa vorivi rutu vaopa Pauto vaaro riroa siraoa. Aue vituaro uvare kataia rutu vuria riroa rera vaaro kekeoro rera rovirieira. Oa iava rerare oiso puraroepa Pauto, “Vuritoa rutu vii Adam.” Ari ita, vigei rutu varaaro riroara vuriara. Ovusa vigeipa riroa rutu vate rovoaveira siraoa. Oire va isivaaro iava oiso vigei vaisipaveira, Vearo irara rutu. <sup>17</sup> ✧ Oiraopavira rutu Adam vaaro vuria oa iavirava kopii vo goruaro varivariaro karekepapeira vo oirara rutu-ia. Rera raga iava ro-ia Adam. Ari ro-ia Jisas Kraís ira vaaro pute pievira rutu toupaveira. Uvare va purareva vigeipa oa-ia riroa rutu vatevateira siraoa oupapeira. Oa iava oiso vigei vaisipaveira, Torevoko vovou irara. Ra va iava vo toupapeira tootoo vo goruaro-ia, uvare rera raga Kraís ira Oiraopa Tootoo rutu vatepaveira.

<sup>18</sup> Kataitoa raga vaaro iava vuria vo tavakaaro kosi piropa oirara rutu iare. Uva ita, kataitoa raga Jisas ira vuriara vo tavakaaro opesi pieoro tootoo vatevora oirara rutupa. <sup>19</sup> Uva oisi-a oiso osa iava riro irara rutu vuri irara oisoa toupaveira, uvare kataitoa raga Pautoa-va kaureoroepa Adam voari rovoa-ia vuria rovooro. Uva oisi ragavira ita vigei rutu riro irara vuipaviei ra vearo vaisi oupaveira, uvare kataitoa raga ita Jisas Pauto vo ruipaaro sirova uturoepa.

<sup>20</sup> \* Va-a vao-ia Reo Taisi oa ora kareke rovoepa rutu voari tuariri, oiso ra va iava oirara rutu ora vaeaveira ora voea raga. Ra va iava oiso purapaave ora voeare “Oiraopavira vuri irara rutu vigei.” Uva va-a vao oa vituaro iava vuri vovou ora rigaaveira oirara rutu iare. Oire uva oisi raga ita Pauto

✧ 5:12: Jen 2:17, 3:6, 19 ✧ 5:14: 1 Ko 15:22, 45 ✧ 5:17: 2 Ti 2:12; Re 22:5 \* 5:20: Ga 3:19; 1 Ti 1:14 uvare rerare tuepaoro raripavioveira rera oirao piepaoro rutu. Oire uva eake-a vo reo vao porearo, raria? Oreoa porearo-a vao-ia oiso toupaveira, Tuepata vaoro oara visipi touvira karekeperea. Ari ita, vo osa ro ira iare oisi orekeve karekepe, oire ra viapau oiso vovuparo raripaoro ita, “Oa ouavere tou visivi.” Viapau, eva ita oa rerapa kareke ovoierao.

vaaro vereopa vovou oa pute pievira rutu ora rigaerao rutu. <sup>21</sup> Uva vuria vo goruaro oisoa oirara tokipaive voeapa reipaoro. Vao oa vituaro iava oisoa kopiipaave. Ari vao Pauto vaaro vereopa vovou oa-ia uvuipaai ra vearo tauva rutu oupaive torevoko vovou purapasa. Aue iava uvare Jisas Kraiis toupere vo vokie, ira Pauto vaaro vereopa vovouro roroioreva rutu. Vao vereopa vovou oa iava vigeipa siraoparoveira rutu vigeipa Tootoo Ovoi vatepaoro. Vao oa-ia vituparoveira rera Jisas Kraiis vigei Turaroaro.

## 6

### *Vigei Rutu Kopiiviera Kraiis Tapo*

<sup>1</sup> Apeisi puravio vao iava? E uvuipaviei ra oaravu ita vuriara purape, ra va iava vorerivira Pauto vara ita verareve ora rera vo siraoaro riro pieoro? <sup>2</sup> Viapau rutu. Uvare oiso rutu toupapeira osa voeao kopii irara, oea viapau uvuipaaveira oiso ra vuriara vai purapaive. Uva apeisi-a? E uvuipaviei ra oisi eisi tupaoro vuri vovouro vai purape vokiara rutu-ia, eke viapau? <sup>3</sup> Uva va-ia tarai irapata oa-a vao-ia bapataisa vituaro rutu oiso, vo osa bapataisa oupa va-ia ora reesioro oiso, kataivira rutu toupai vigei rutu Kraiis tapo ora tavosipaoro. Oire uva oisi raga ita-a eisi osa ora reesiviepa ita oiso, oisi raga kataivira rutu rera tapo kopiioro. <sup>4</sup> ✧ Oire uva va-a vao-ia bapataisa vituaro porearo oiso-ia, Vo osa Kraiis kopiioera, oire uva vigei tapo rera tapo kopiiviera. Oa iava vigei tapo ita tovaiورا rera tapo. Oa iava vorevira rera tootoo pieoro rera tore pieredora Pauto riroa iava gorua vao rera vaaro. Uva oisi ragavira-a eisi osa iava uvuipaviei ra airepa tootoo-ia vokapape.

<sup>5</sup> Oire uva va-a vao osa rera tapo kopiiviera, uva vorevira toreroera. Oa iava vigei tapo ita ovoovovira toreviera rera tapo. Oa-a eva oa iava airepa tootoo oupapeira. <sup>6</sup> Oiso va-ia taraipavio osa rera evao parikou-ia tapaiva vigei varaaro tapo vuri vovouro. Uva va vao vuria vo varivariaro oa vigei oisoa tuukepaive, osa iava vigei iava toko ovoi piropa. <sup>7</sup> Vosa irai oiratoa vai kopiio, ra viapau oiso tovira vuria vo goruaro sovava-ia toupaveve. Viapau. Ra aa vao iava? Ovarivaria eva toko ovoi piropa rera iava, ro ira kopiio.

<sup>8</sup> Uva oisi ragavira vigei varaaro tapo vuri vovouro rera tapo Kraiis touepa kopiiooro evao parikou-ia. Eisi osa iava uvuipaviei ra oiraopavira rutu rera-ia raripavio, oiso ra rera tapo tupaoro tootoopavioveira vo vokie ora vo utupaua. <sup>9</sup> ✧ Taraipavio oiso-ia, Kraiis vorevira kopii iava toreroepa. Uva viapau uvuiparo ita ra vorevira kopiio ita. Aue vituaro uvare viapau oiso kopii va varivariaro sovava-ia toupavevoi. <sup>10</sup> Oire vo osa Kraiis kopiioepa, uva va-a eva oa-ia kopii va varivariaro toko ovoireva va opesi pie ovoiooro. Oa iava viapau uvuiparo ra ita vorevira kopiio. Uva vo tootoo-a eva oava toupavevoi Pauto roru piepasa ora rera-ia. <sup>11</sup> ✧ Oisi-a eisi osa iava vearovira rutu ora visiire rugorugoopata oiso-ia, vigei kopii irara. Viapau oiso vuria vo varivariaro-ia toupapeira. Ari ita, oiraopavira oiso toupapeira tootoo irara vigei, vo rara Kraiis Jisas tapo ora tavospavio Pautoa-pa rorua kareke piepaoro ora vigei-ia.

<sup>12</sup> Oire vosa vuri vovou ita visii-ia rovosa ita auepape, oire ra vare koru ovoita. Ra oisi iava viapau oiso vo vovou sirova ututa. <sup>13</sup> ✧ Ora viapau rutu uvuipatai tapo ra ora visii varauraaro iava orekerovu avu vai iava vaseta, oiso ra vuri vovou eva sirova utupe. Ari uvuipatai ra ora visii iava varaura rutu vate ovoita Pautoa-pa ora visii iava sopaura rutu tapo. Oiso

rutu ovoovooro oisi va purata osa ragavira kopiia iava vovevira toretaera. Osa iava Pauto vo vovouaro sirova utupaoro vearoa purapataveira. <sup>14</sup> ✧ Oiraopavira rutu-a oiso osa vuri vovou vo varivariaro toko piropa. Uva viapau oiso uvuipai ra visiipa riropape. Eake iava? Uvare vao-ia Moses vo taisiario Reo Taisi viapau visiipa reipapeira. Ari vao raga Pauto vaaro sirao vate, vao oa-ia tauvaa oupataveira.

### *Vigei Oiso Toupapeira, Torevoko Vovoupa Kovopa Irara*

<sup>15</sup> Oire uva apeisi-a? E uvuipaviei ra vuri vovou purapape uvare vao Reo Taisi viapau vigeipa reipape, eke? Apeisi-a? Uvuipaviei ra vuria purape, uvare sirao vatei vigei-ia vao Pauto vaaro? Asi viapau rutu oiso uvuipaviei. <sup>16</sup> ✧ Visii taraipataveira vao-ia oiso-ia, Vosa kovopato vii, oire va iava vii reraoro vo reoroaro uvu iraopariveira, ro reito. Vosa oiso-ia rera-ia toupave vuri vovou, oire vii tavireve oiso osa va puraparivoi. Ra rera vaaro sirova utuoro oiso vo pitupitu purari vuria. Eisi osa iava va voriaro ouriverea ita vovevira vao-ia kopiia. Ari vosa ro-ia Pauto vii reitoaro oisi vare oiso vii tavireve, “Vao purari,” oire uva va-a eva oa-ia vearoa ourivere va voriaro, rara va iava oiso vii vaisireve, Vearoto vii. <sup>17</sup> Uva uvuipaviei ra Pauto-ia vuurapa vaisi purape, uvare voviri vuri vovouro sirova utupataera. Oa iava vo vokie ora tavarioei. Uvare visii iava rugorugooara agasierao rutu varao iava oiraopa siposiporo osiposiporoa outavora. <sup>18</sup> ✧ Ari ita, Pautoa raga ira visii iava vo tuuke karurevora vuri vovouro vo tuukearo. Uva vo vokie-ia rera raga toupape Pauto visii reraaro reito. Osa iava uvuipatai ra rera ragapa kovopata torevoko vovouro purapaoro. <sup>19</sup> Uva oisi ragavira reorai voeao-ia kovopa irara aue uvuioro. Auepa teapi oiso raga visiipa siposipopaoro visii vavagisi piepaa. Ari ita, voviri tuariri ora visii iava vasetava. Oa iava vuriara rutu ora visii-ia purapatavora vearo pitupitu pura arapa reasipaoro. Uva vo vokie-ia uvui iraopatai ra rugorugooara oavisii tavario iraota. Oa iava ora visii iava ita vasepatavere oiso ra vearo pitupitu sirova utupata Pauto vo ruipaaro rutu purapaoro.

<sup>20</sup> Vo osa rovovira voari toupataavora, uva oiso rutu toupataavora, Vuri pitupitupa kovopa irara visii. Uva oisi tupaoro viapau oiso uvuipataera ra vaore vearo raiva rugoopata. <sup>21</sup> Ari ita, osararovu rutu vuriara pura rovatavora. Oire uva vara-a evara oara iava ariitai ita. Uva eake rutu-a vao oa outavora vara iava evara? Viapau rutu oiso oavu avu vaiei vara iavirava evara, uvare vuriara vo voriaro-a aue kopii raga. <sup>22</sup> ✧ Oa iava vuria vo varivariaro karu pirorao rutu. Oa iava vuria kavuoro oiso toupatavoiro rutu, Visii Pautoa-pa kovopa irara. Uva ora visii iava vovouisiro oavisii rutu iava vearoa purapatavere, uvare Tootoo Ovoi rutu vituaro-a va vao-ia. <sup>23</sup> ✧ Oiraopavira rutu, oa-a vao rera vo voriaro ro oirato oa ourevere rera vaaro vuria vo voriaro vao-ia kopii ovoi. Ari Pauto vao riroa rutu sirao vate Tootoo Ovoi akukuvira vate ragapareveira. Oa vitupai ro vigei reraaro Turaro Jisas Kraiss.

## 7

### *Ovoovo Reoa Vao Reo Taisi Aviavi Piepa Reo*

<sup>1</sup> Araoko irara oaa, vo reo-ia oa purapaavoio visiire oiso-ia, vao-ia Reo Taisi vearovira taraipataveira Moses oa purareva. Oreoa-ia oiso ragavira taraipataveira voeao vo reoro oea epao oea tootoovira toupai. <sup>2</sup> ✧ Oiso

✧ **6:14:** Ro 8:2; Ga 5:18 ✧ **6:16:** Ro 11:2; Mt 6:24; Jo 8:34 ✧ **6:18:** Jo 8:32; Ro 8:2 ✧ **6:22:** 1 Ko 7:22 ✧ **6:23:** Ro 5:12; Ga 6:7-8 ✧ **7:2:** 1 Ko 7:39

ragavira oa-a vao goruvira toupaveira reo goru o-ia riakova iria vatuatedo tapo toupave, vo osa tootoovira toupasi vo avukarei rutu. Ari ita, vosa oira arova kopiuro, oire ra viapau oiso reo goru sirova utuo ita. <sup>3</sup> ✧ Uva vosa rerava vatuatedo toupaooro iravu ragava toupave, oire ra va iava oira-ia ora reopaoro oearovu oirare oiso purapaave, “Avoeao, otopava-a o-ia.” Ari vosa vatuatedo oira raroero kopiuro, ra va iava viapau oiso va eva reo goru gasieve vo osa iravu raga oueve.

<sup>4</sup> Oa-a vao oa oisi oiso toupaveira visiipa vao-ia, araoko irara oaa. Aue iava uvare visiia-a vao visiigoa kopiutaera Kraiis tapo ovoovovira oiso osa Kraiis vo evao parikou-ia kopiuroepa. Oa vituaro iava viapau oiso visiipa Reo Taisi reipapeira Moses vaaro. Visiigoa oiso rutu toupataveira osa voeao kopii irara, oea viapau Reo Taisi uvupaive. Uva vo vokie-ia oiso rutu toupatavoi, rera voeaooro ro-ia Kraiis airepato visi vatuatoaoro. Ro Kraiis ira kopii rovoroiava, vorevira toreroepa. Uva rera tapo torepaoro vorevira kopii iava vuupaviei ra veoro vovouro purapape vo rasio-ia vao sirova Pauto vo ruipaoro utupaoro. <sup>5</sup> ✧ Vo osa voviri tou rovopaera ora vigei vo ruipaoro raga-ia vuriara purapaoro, oa iava vao Moses vaoro Reo Taisi vara vuriara roroiovira kareke piipaivora. Osa viapau vao Reo Taisi vigeire oisoa korupape vuri pitupituro purapa arapa. Oa iava oisoa vo pitupitu vuriara purapape vo rasio-ia vao sirova vuri vovou vo goruaro utupaoro vore kopii ovoipasa. <sup>6</sup> ✧ Oire uva vo vokie-ia viapau oiso Reo Taisi vigeipa reipaerao. Oa iava tuukea karu piraooro, vo uvare va arova kopiiviera. Uva vo vokie-ia kovopae viapau oiso vao-ia tuariripa Reo Taisi. Viapau. Ari vao-ia airepa raiva vao oa karekerevoroa Tugoropato Uraurato vigeipa.

### *Vuria Vo Pitupituario Oa Vigei Vuri Pieva*

<sup>7</sup> ✧ Oire apeisi vovoupaviera vare vao Reo Taisi? E vuria-a? Viapau. Asi veaoro. Ari ita, oa-a eva Reo Taisi oa raga ragai tarairova vaopa vuria vo pitupituario. Vao-ia osa oiso purapapeira Reo Taisi, “Opeita iravu varaaro riiriipari.” Oire vosa viapau oiso purapaeri, oa iava viapau ragaire vo ruipa eva karekeeri iravu raga varaaro riiriisa. <sup>8</sup> Uva va vao vuria orekerovu riiriipasa oa raga ragai soporeva rutu. Oa iava oiso rugorugooaraepa, ra opitupiturovu rutu puraa orekerovu riiriipasa oa iava tavitavipai Reo Taisi. Oa iava Reo Taisi raga oiso ragai pieva ra vuria puraa. Iu, vosa viapau Reo Taisi vaieri, oire ra viapau oiso vuria oisi opitupitui purapaavori. <sup>9</sup> Ari ita, voari rutu tuariri uva oisoa toupaa Reo Taisipa sopaipavira rutu. Oa-a eva oa iava oisoa tootoovira rutu toupaa. Uva Reo Taisi-a vao oa-ia tarairaiva, ora ragai varaoro-ia vuriara ateraero vo uvare riroerao rutu oa vituaro-ia oiso rutu touavora, Kopiito ragai. <sup>10</sup> ✧ Ari ita, Pautoa raga ira Moses-pa Reo Taisi vate rovoreva. Oiso ra va iava oirara rutu tootoovira touive Reo Taisi sirova utupaoro. Uva va iava vao Reo Taisi taraia ouava. Uva va-a raga eva oa ragaipa kopii vateva. <sup>11</sup> Oa vaoro-a vao vuria-a oa ragai keakeava vavo reoro iava vao Reo Taisi. Oa vituaro iava tuukera viropa rutu. Oire uva vuria vo voriaro ouavorao vao-ia kopii. <sup>12</sup> ✧ Oiraopavira rutu, eva Reo Taisi Pauto vaoro rutu. Torevokoa rutu veaoro oa rigatoveva Moses.

<sup>13</sup> Oire uva apeisi-a? Veoro reoa va vao-ia oa ragaipa kopii sipova, eke? Viapau rutu! Asi vao raga vuria vo pitupituario oa sipova. Va raga iava vao veoro reo oa vao vuria vateva kopii ragaipa. Auere oiso ra viaevira rutu vuria vo pitupituario karekepe. Oire ra va-ia taraipaoro vao Reo Taisi vuri vovou vo pitupituario eveipape oiso purapaoro, Vuri-a vao-ia vuri vovou vo pitupituario.

✧ 7:3: Mt 5:32 ✧ 7:5: Ro 6:13, 21; Ga 5:19; Je 1:15 ✧ 7:6: Ro 2:29; 2 Ko 3:6 ✧ 7:7: Eks 20:17; Diu 5:21; Ro 3:20 ✧ 7:10: Lev 18:5; Ro 10:5; Ga 3:12 ✧ 7:12: 1 Ti 1:8

### *Vo Ruiparei Iava Vareo Oarea Oiratoa-ia Ora Itopapeira*

<sup>14</sup> Taraipavioveira vao-ia Reo Taisi urauraropa oa vatereva Tugoropato Uraurato vigei iava urauraropa vearoo rugooa vatepasa. <sup>15</sup> ✧ Uva va-eva vituaro iava vavagisi iraoparaeroa oiso auepaoro, Eakere oisoa oiso vo pitupituro ragai vararoo? Oisopa osa varao oara pura ruipa ragaparaveira, osa viapau oisi vara purapaa. Vo osa varao raga purapaa oara pura arapa reasipara, uva vara raga purapaa evara vo vokiara rutu-ia. <sup>16</sup> Oire vosa oisi ragavira oiso va puraa oiso osa va pura arapa reasipara, oire ra va iava vao Reo Taisi eveia, ra va iava oiso auera, Vearoa vao-ia torevoko reo oa oiso purapai “Opeita varao purapai.” <sup>17</sup> Oire uva viapau oiso ragai raga-a vao ragoa varao purapaaveira oara pura arapa reasiparaveira. Viapau. Vao raga vuri vovou vo pitupituro raga oa oisi oiso ragai piepaiveira, oa vo toupaveira ragai sopaaro-ia. <sup>18</sup> Uva oiso ragavira rutu ora ragai-ia taraiparaveira, Viapau oiso ragai-ia vearoo vai epao, uvare rasito raga iava ragai. Oa iava raverave iraoparaveira. Ra viapau uvuiparai varao sirova utupasa torevoko vovouro, oara vo toupaveira ragai sopaaro-ia. <sup>19</sup> Oiraopavira rutu viapau oiso varao purapaaveira vearopara oara pura ruipa ragaparaveira. Ari varao raga purapaa vuriara oara pura arapa reasipara. <sup>20</sup> Oire vosa varao raga purapaaveira evara vuriara varao oara pura arapa oiso reasipara, opitupitua vituaro rutu-a vao-ia vuria, oa vo ragai sopaaro-ia toupaveira.

<sup>21</sup> Oire uva oiso ragavira rutu toupaveira, vo osa vearoo purapasa auepara, ovusa vuria tutuu pieve ita ragai iare ragai vo ruipaoro piro piepaoro. <sup>22</sup> ✧ Ari ita, ragai vo ruipaoro vaopa ruipa iraopapeira Pauto vaaro Reo Taisi. Oiso ra ragai vaaro-ia rugooa tou iraopaive. <sup>23</sup> Vosa vouao varaua ora ragai iava eveipaa oiso vouao-ia oavuei reo goru oa vo rugooa ora upopapeira, oa sirova ruipa ragaparaveira. Oa-eva vao-ia reo goru oa ragai iava varaua-ia toupaveira, oa eva vuria vo vovouro goru piepaoro rutu ragai tuukepaiveira. Oa iava oiso rutu vapa toupaveira ragai, Vapa kovopato vuri vovou, vo rara va sirova utupara. <sup>24</sup> ✧ Avoeao, siraovira rutu uvare vuritoavi rutu-a ragai. Vouao-ia varaua ragai iava oua-ia iroutoa vai uvuiparoi ra voua tuuke pierve. Ra oisi iava viapau oiso ra ovoiei kopii iare ragai topaive varaua. <sup>25</sup> ✧ Uva ro raga ita Jisas Kraisi vigei reraaro Turaro, ira raga-ira uvuiparoveira ragai tauvapasa. Oa iava rera iava Jisas Pautoa-ia vearo vaisi purapaaveira. Uva oisi-a oiso ragavira toupaveira oiso, Vova ora ragai iava sopaua-ia uvava Reo Taisipa ruipapaoro va sirova utuparaveira Pautoa-re rugurugoo iraopaoro. Vo osa varaua vouao ragai iava oiso tupaive, Kovopato vuri vovou vo pitupituro.

## 8

### *Pauto Reraaro Tugoropato Uraurato Ira Vigeipa Tootooa Vatepareveira*

<sup>1</sup> ✧ Vosa kataivira rutu rera tapo Jisas Kraisi toupape, oire ra va iava viapau Pauto vigei togapaveve reoara vai-ia. <sup>2</sup> Vo rara Oiraopa Tootoo rutu ouapeve rera tapo Jisas Kraisi, uvare Pauto reraaro-a Uraurato vo reo vao-ia puraveve oiso puraoro, “Visii karukaruavo vuriara arova varao oara visii tuukeva kopii-ia. Oiso ra oiso rutu toupata, Ragai vo reoaro tapo reipai visiipa.” <sup>3</sup> ✧ Vigei vao-ia oirara viapau oiso uvuipavioveira ra Moses vaaro Reo Taisi sirova vearovira utupavio. Oa vituaro iava viapau oiso uvuipapeira va vao Reo Taisi vigei torevokopasa vigei virivaripaoro. Uvare Pautoa raga-ira uvuiparoveira vigei rutu virivaripasa. Pauto ora rera Oviitoaaro kataitoo

rutu siporeva vo rasio iare, oa iava oiravira kavauroepa. Uva kopiiproepa vigei vaaro vuria vo voriaro ouoro. Uva va-a eva vuria oa vo pitupituroaria puteoro rutu vigei karukarureva vova vuria-ia. Osa iava viapau oiso vigeipa reipapeira. <sup>4</sup> Vao-ia Moses vo rearo oa eva torevokopai. Uva uvuipavieie oiso ra varao purapape oarare tavitavipapeira vo reoa vao-ia Reo Taisi, vo rara Tugoropato Uraurato vo tavitaviaro sirova utupaoro vo rugorugooroarpa reaspavio ora vigei varaaro ragapa.

<sup>5</sup> Aue vituaro uvare voeao oearoa varao raga purapaiveira oara ragapa ruipapaave rutu, evoea-a oea varao ragare rugorugooapaaveira rutu oara voea ragapa karekepape. Vo osa voeao oea Tugoropato Uraurato vo tavitaviaro sirova utupaave, oea-a evoea varao ragare rugorugooapaaveira vara purapasa oara-ia rorupareveira Pauto. <sup>6</sup> Vosa varao raga-ia rugorugooapavio oara vigei ragapa karekepapeira vo rasio-ia, oire uva vara voriaroeie ita vao-ia kopii ovo. Ari vosa vaore rugorugooapavio Tugoropato Uraurato vo ruipaaoro sirova utupasa, oa-a eva ovoiaroeie vao-ia oiso-ia, Tootoo Ovoi ora gavaurea. <sup>7</sup> Vosa ro ira oiso vara purapareve ora rera raga varaarore rugooapaoro, uva rera-a eera ira oiso toupape, Pautoa-va keripato. Aue vituaro uvare viapau oiso Pauto vaaro Reo Taisi sirova utupaveira. Oiraopavira rutu, uvare viapau oiso uvuiparoveira, oiso ra va vao Pauto vaaro Reo Taisi sirova vearovira utuparo <sup>8</sup> Iu ita, uvare voea-a evoea oea ora voea raga vo ruipaaoro sirova utupaaveira vo rasio-ia, evoea oea viapau oiso uvuipaaveira ra Pauto roru piepaive ora voea-ia.

<sup>9</sup> ✧ Vo osa visii viapau oiso purapataveira ora visii raga vo ruipaaoro sirova utupaoro. Ari visii Tugoropato Uraurato vo ruipaaoro sirova utupataveira, vo osa oisi oiraopape rutu oiso, Tugoropato Uraurato visii sopaaro-ia toupaveira. Oiraopavira rutu ro iava oirato ira-ia viapau oiso toupaveie Tugoropato Uraurato ro Jisas reraaro, uva rera-a eera oirato viapau oiso Kraiis reraaro-a. <sup>10</sup> ✧ Visii iava varaura taru kopiipere, uvare vuria vo pitupituroa va eva. Ari ita, visiire oiso puraroverea Pauto, “Torevoko vovou irara visii.” Eisi osa iava visiipa Oiraopa Tootoo vatereveia Tugoropato Uraurato, vo rara Kraiis visii sopaaro-ia toupaveie. <sup>11</sup> Oire vosa rera iava Urauratoaaro pe visii sopaura-ia, uva va iava Pauto visii tapo vorevira tootoo pieverea kopii iava vo Tugoropato Uraurato iavirava, oiso rutu osa Jisas tootoo pievera.

### *Uvui Iraopavieie Ra Airerei Vovouvira Toupape*

<sup>12</sup> Araoko irara oaa. Opeita Pauto vo ruipaaoro vatavata iraopata ora visii vo ruipaaoro raga sirova utupaoro. <sup>13</sup> ✧ Vosa oisi oiso piepaoro ora visii vo ruipaaoro raga sirova utupata, ra kopii ovoitaverea taru. Ari vosa Tugoropato Uraurato vo goruaro-ia visii vo ruipaaoro kopii pieta, oire uva uvuipatai ra Tootoo Ovoi rutu oupataverea. <sup>14</sup> Ari voeao oea Tugoropato Uraurato vo tavitaviaro sirova vearovira utupaave, oea-a evoea Pauto ovii iraraaro. <sup>15</sup> ✧ Pauto visiipa Tugoropato vaterevora. Uva viapau oiso visii pievera ra akukuvira rerapa kovopata rerapa uriri ragapaoro. Viapau. Uvare Tugoropato Uraurato vigei sopaura-ia toupaveira. Oa vituaro iava oiso toupapeira, Vigei-a Pauto ovii iraraaro. Ora vao vo osa tapo rera vo goruaro-ia oiso rerare purapavioveira, “Aite, aite.” <sup>16</sup> Uva ro-ia Tugoropato Uraurato ira vigei reraaro tapo uraurato ora takuvuparoveira. Ra va iava kataivira raga rera tapo oiso purapavioveira, “Vigei-a vao-ia Pauto ovii iraraaro.” <sup>17</sup> ✧ Oire uva oisi-a eisi osa toupapeira oiso, Vigei-a rera ovii iraraaro. Oa iava varao vearopara vatevateara ouperea, oara

✧ **8:9:** 1 Ko 3:16; Ga 4:6 ✧ **8:10:** Ga 2:20; Ef 3:17 ✧ **8:13:** Ga 6:8; Kl 3:5 ✧ **8:15:** 2 Ti 1:7; Hi 2:15 ✧ **8:17:** Ga 4:7; 2 Ti 2:12; 1 Pi 4:13

orirupareveira voeaopa rera voeaaro. Oiraopavira rutu viapau oiso varao raga-a vearopara, ari oaravu rutu tapo-a varao oara orirupareveira Kraispá. Aue iava uvare varao tavakaara vo siraoaro kaepapeira oiso osa Kraispá vo siraoaro rutu kaereva. Eisi osa iava uvuipaviei ra varao tapo oupape oara peira vo Pauto ruvara-ia Kraispá varaaro.

### *Vigeipa Vearoa Toupaveira Keraria Vore Utupaua*

18 ✨ Vo siitokaro oara kaepapeira vo rasio-ia akukuara raga. Ari ita, vosa varei uvui ragapaoro vareí akeake ragapapeira vao tapo rorua oa peira vore utupaua, oíre uva viapau oiso uvuipavioveira osa ra oisi vareí piepape. Eake iava? Uvare vigei roru piepareverea rera vaaro-ia vaea vovou rutu oa peira rera ruvara-ia Pauto. Ororua eva riroa rutu, oa vo siitokaro vaaro-ia putepaveira rutu. 19 Aue vituaro iava uvare vara rutu varao oara purareva Pauto voraro rutu, oara vo vokiore vagevagepaoro rutu toupaveira oiso ra pou piro vo vokio, ovokia-ia Pauto rera ovii iraraaro kareke pieverea orekerovu rutu osireiario-ia. 20-21 ✨ Oíre uva vara rutu-a varao oara purareva oara rutu erupapeira. Ari viapau oiso vara vaaro-a. Viapau. Uvare vo rovoa-ia vuria vo pitupituaro rovoira rutu kareke rovoepa. Oa-a vao oa vituaro iava vara rutu iava vasereva Pauto, oiso ra oisi ragavira piepaive opesi ovoipaoro. Uva touvira vara rutu evara toupaveira vo vokiore tuepaoro oa-ia vara rutu eruara vo pitupituroaro opesi ovoiperea. Ovokia-ia vigei kareke pieverea Pauto. Évo voki raga ita oa-ia vara rutu ora tavarioperea airepara karekeoro ita. Ari ita, vigei rutu tapo ita osa raga ita eisi pieperea, oa iava varao oara purareva Pauto oara vigei tapo roruverea.

22 Vara rutu varao oara-ia taraipavioveira oara purapaoro rovoroepe voari tuariri. Oa iava vo vokio rekasierao vara, oara riroa tavaka vo siraoaro kaepaveira, oiso rorovira osa riakova o iria kakaetoava upiapaoro rera kavausa auepaoro gaupaeve. 23 Uva viapau varao raga oara purareva, oara oisi eisi piepaiveira. Viapau. Easi vigei tapo oirara. Vigeo vovouisiro iava koikoipapeira giigiiraupaoro. Vigeo-ia toupaveira ro Tugoropato Uraurato, ro-ia rovopatoa rutu vatevatea vovouto Pauto, ira vatereva vigeipa. Oiraopavira rutu, uvare gaupaoro tuepavioveira vo vokiore oa-ia vigeire oiso puraroverea Pauto, “Ragai ovii iraraaro visii.” Oa eva vituaro iava airepavira ora tavariovioverea. 24 Pauto vigei ora rerapa vorevira vorereverea, uvare rerare tuepaoro raripavioveira rera oirao piepaoro rutu. Oíre uva eake-a vo reo vao porearo, raria? Oreoa porearo-a vao-ia oiso toupaveira, Tuepata varaore oara visiipa touvira karekeperea. Ari ita, vo osa ro ira iare oisi orekevu karekepe, oíre ra viapau oiso vovouparorarpaoro ita, “Oa ouavere tou visivi.” Viapau, eva ita oa rerapa kareke ovoierao. 25 Ari vosa viapau va keke ovoireve, oíre ra va iava toko asavira rutu tueparo.

26 ✨ Oíre uva oisi-a eisi osa vituaro iava Tugoropato Uraurato uriopaveira vigei tauvapasa vao raverave vovou irara. Ira vigei tauvapaooro Pautoa-re variripaveira vigeipa, vo rara viapau taraipavio oiso, Apeisi ragavira uvuipaviei ra oiraopa variri purapape. Vo varirio oa purapaveira Pautoa iare oa-ia koikoipaoro, viapau oiso irai oiratoa vai taraipaveira va-ia aviavipasa. Oiso osa piepareveira Tugoropato Uraurato. 27 Oiraopavira rutu Pautoa raga taraiparoi vigei iava sopaura-ia, ora vao-ia tapo taraipaveira Tugoropato Uraurato vo koikoiaro vova vigei sopaoro-ia. Uvare Pauto vo ruipaoro sirova utupaveira rera ro Tugoropato Uraurato vigeipa variripaoro.

✨ 8:18: 2 Ko 4:17; Kl 3:4; 1 Pi 5:1 ✨ 8:20-21: Ap 3:21; Ro 6:21 ✨ 8:26: Mt 20:22; Ef 6:18



28 Uva vara rutu-ia varao vearovira taraipavioveira oara vigei-ia karekepapeira, oara rutu ovoiaro-a vao-ia vearoa. Oa vituaro oiso toupaveira, vosa Pautoa-pa siraojavio vigei vao vigoa reesireva ora rera vo ruipaaro-ia. Oire uva eagara, oara-a evara oara rutu porerevereia Pauto vigeipa vearoa puraro. 29 Vigei rutu ropo rovorevoiva, vigei reesireva ora rerapa oiso ra oiso rutu toupape osa rera Oviitoaaro Jisas Krai. Oire ra Jisas oiso toupave vigei avaiotoaaro, vigei vao rera araoko iraraaro rutu. 30 ✧ Uva Pauto vigei reeresireva katakataivira vigoa roporopo rovopaaro. Uva vigeire keera rovorova, oiso puraroepa vigeire, “Torevoko rovou irara visii.” Oa iava vearopara vatevatereva rera vaaro iava keraria.

### *Pauto Vaaro Siraoa Oa Viapau Uvuipai Ra Opesipe Vigei Iava*

31 Vara rutu-ia tarai ovoiviepa evara. Uva aa vo reo rutu-a vao oa epao touvira oa purapere rara? Vosa Pauto vigei tapo ora takuvuro vigei virivarioro, uva uvuipaviei ra voeaore oea vigeiva ora keripaaveira oiso puravio, “Eagara, visiipe.” 32 ✧ Viapau oiso iirukoto-a Pauto ora rera Oviitoaaro raga-ia kavikovira vovoupaaro. Viapau. Ira akukuvira rutu vovou eakavira paaroreva ro-ia Jisas vigeipa. Oire uva oisi-a eisi osa ragavira rera piereva osa tapo orekerovu rutu iava paarorovere akukuvira vigeipa. 33 Iroutoa vai rutu-a ro ira uvuiparoi ra vigeire vao Pauto ovii iraraaro oiso puraro. “Vuri irara-a visii”? Oire viapau oiso irai epao. Eake iava? Uvare rera raga Pauto ira vigeire oiso puraroepa, “Vearo irara-a visii torevoko irara.” 34 ✧ Ari ita, viapau rutu uvuipai oea oiso ra oisi vigeire purapaave oiso-ia. Aue vituaro iava oiso-ia uvare Krai Jisas kopii rovorova, vorevira rera ita tore piereva. Oa iava oirapapa varataaro-ia vao Pauto torepaveira. Uva vao tupaaro Pauto arepareveira vo vigei tauvapasa.

35 Oiraopavira rutu. Viapau oiso irai epao ira uvuiparoi ra vigei iava Krai vo siraoaro tokoreve. Ari ita, otavakarovu rutu karekepapeira vigei-ia oiso-ia, tavaka vovou-a vao, ari tou taraapa vovou-a vao, ari kasipupa vovou-a vao-ia vigeire uvare vigei-a Krai voeaaro, ari ogoe vuuta vao, ora apotapa vuuta vao, ari ora upopa vo vuutaaro-a vao, ora vao-ia kopii. Oire uva aa vao-a vao vara iava evara oa uvuipai ra Krai vo siraoaro tokove vigei iava? Viapau rutu oiso oaiei. 36 ✧ Oara iava oiso purapaveira Tugoropa Vuku, ‘Vokiara rutu-ia igeipa tutuu piepaveira kopii, uvare vii voeaaro-a igei. Igoa oiso rutu piepaveira osa sipsip kare, okarea upopasa aupeaaveira.’

37 Oiraopavira uvare siraoa vo vavataaro kaepaveira. Uva viapau oiso oaiei ra vigei-ia putepaive. Oa iava uvuipaviei ra va-ia roru iraopape va kaepaaro, uvare vo roru vituaro-a vao-ia, Jisas vo siraoaro vigeipa. 38 ✧ Oiraopavira rutu va-ia tarai iraoparai oiso-ia, Easi viapau oiso oaiei oa uvuipai ra vao Jisas vo siraoaro tokove vova vigei-ia oiso-ia, kopiiarei ora tootoa oarea tapo viapau oiso uvuipai, ora purapurapa irara ensel, ora voea oea orekerovu rutupa reipaaveira oea rutu vuvuuia-ia tupaaveira, ora varao oarai vo voki-ia ora varao oara epao vore utupaua, 39 ora varao rutu orekerovu oara peira vuvuuia-ia, ora varao rutu orekerovu oara vo rasiroa-ia tupaaveira. Oara rutu evara viapau rutu oiso uvuipai. Viapau oiso oarai epao varao rutu iava evara oara puraveira Pauto oara iava oarai uvuipai oiso ra vigei tokove vova Pauto vo siraoaro-ia, vo sirao-ia vigeipa oa-ia vitupaveira Krai Jisas vigeipa ro vigei Turaroaro.

✧ 8:30: Ef 1:5, 11; Ro 9:24 ✧ 8:32: Jo 3:16; Ro 5:8 ✧ 8:34: Kl 3:1; Hi 1:3, 7:25, 9:24 ✧ 8:36: Sam 44:22; 2 Ko 4:11 ✧ 8:38: Ef 1:21; 1 Pi 3:22

## 9

*Pol Siraoroepa Jiu-pa Irarapa Voeao Oea Reesireva Pauto Ora Rerapa*

1 ✧ Ragai-a Kraís reraaro uva viapau oiso kuuvuparai. Ro Tugoropato Uraurato ira ragai sopaaro tokipareveira. Uva voa toupaooro ragai tapo katai reo rutu puraparevoi. Oa iava oiso puraparaí, Viapau oiso kuuvuparai oiso purapaoro. 2 Riroa rutu siraoa oa ragai-ia toupaveira ragai iava vovouisi vavata pie irapaoro vokiara rutu-ia. 3 Uvare voeviore sara irara oaa rugorugoo irapaoveira Jiu. Voeao katai revasi rutu ragai tapo, oevia isivaaepa Jisas-re. Uva va voriaro ouiverea ora voeapa rara. Oa iava oiso vovou irapaaraí ra voea vo voriaro vao vuri vorí oua voea vo tavukiara ouoro. Eagara, vosa ragaire Kraís oiso puravoreea, “Vurito vii,” voea arova oisi ragai vaisioro. Uvare rirovira rutu voeapa sirao irapaaraí. 4 Aue iava uvare Pauto voeao raga Jiu-pa irara roro piereva ora rerapa voea oiso vaisioro, Ragai ovii iraraaro. Oa iava voea iava oearovupa kerariaro iava paaroroepa. Oa iava Pauto voea tapo reo ovoiro purareva vao tapo Reo Taisi oa rigatoreva Moses. Ora tapo vaore oiso ra oiraopavira Pautoa-ia vuurapa vaisi purapaive. Uva va isivaaro iava Pauto voeapa reo ravaa purareva oiso, “Utupavira taru visii oriruaverea rutu ora ragai ruvara-ia.” 5 ✧ Voeari turaro irara reipa irara Pauto voeaaro, voeao aao iraraaro oea-a voeao Jiu-pa irara vo vokiá-ia. Oire uva Kraís-a voea saratoaaro vo osa oisoa tootoovira toupaveve vo rasio-ia. Uva Pauto ira turaropaveira orekerovu rutupa. Ira-ia uvuipaviei ra vuurapa vaisi purapape opesi asavira rutu. Eva ovoiei oiraopa.

*Pauto Oirara Rutu Reesireva Ora Rerapa*

6 ✧ Iu ita, reo ovoí purareva Pauto voeapa Jiu-pa irara. Uva viapau va sirova vara rutu oivua oara-ia voeapa reo ovoí purareva. Uva apeisi-a? Oisi eisi vuripai? Viapau. Uvare oearovuei voea iava Jiu voeao oea viapau roporeva Pauto voea iava. 7 Oisi ragavira eisi oea voeaore Ebrahim ovii iraraaro, viapau oiso voea ruture oiso puraroepa Pauto, “Visii rutu-a vao-ia ragai voeaaro.” Viapau. Easi eera oiso puraroepa Ebrahim ragare “Ro Aisak vii oviiitoaaro kikooto, ira ovii iraraaro raga oiso karekeave vii iavapa irara. Vo osa voeao viapau, avaioto ovii iraraaro.” 8 Oreoa porearo vituaro oiso toupavei, Viapau oiso Ebrahim ovii iraraaro rutu oiso toupaveira, Pauto voeaaro. Voeao oea varaua vo ruipaaro-ia puraa viropa. Ari voeao raga oea Ebrahim-re aiteaepa vo osa voea-ia Pauto vo reoaro vao reo ovoí oirao piereva. 9 ✧ Uva oiso Reo Ovoí-ia Ebrahim tavireva Pauto, vao oa-ia oiso puraroepa, ‘Vo osa vuuta-a vao torevokovira pou piro, oire ra vorevira vorera. Oa iava vii vatuavaaro Sera kakaeto kavavevere.’

10 ✧ Uva tovira reoreoparaí va iava vao oiso osa Aisak riroroiva, vatuava oureva Rebeka. Oa iava tavara kakaerei kavaveva. 11-12 ✧ Oire vosa kovua raga-ia kavau asavira tousiva vo vuria pura asavira ora vearoo, uva Pauto Rebeka tavireva vaiterei iava oiso, “Kikooto ro avaiotoapa reiparovere.” Uva oisi ragavira piereva Pauto vo rera vo vovouaro oirao piesa oiso. Oire uva vaiterei-ia touva vo reesirei vo rovoa-ia. Uvare viapau oiso vaiterei vo pitupituroaro-a, oara sirova oisi vaiterei reesireva. Ari rera raga Pauto vo ruipaaro-a, oa-ia oisi vaiterei piereva. 13 Iu, osa Tugoropa Vuku purapaveira oiso, ‘Pauto oiso puraroepa, Jekop-a ro, irapa ruipaparaveira ropa Iso reasipaoro rutu.’

✧ 9:1: 2 Ko 1:23, 11:10 ✧ 9:5: Kl 1:16-19; Jo 1:1 ✧ 9:6: Nam 23:19 ✧ 9:9: Jen 18:10

✧ 9:10: Jen 25:21 ✧ 9:11-12: Jen 25:23

14 Oire uva apeisi ragavira? Pauto akerukavira oiso vo reo purareva, eke? E apeisi-a? Viapau torevokotoa rera Pauto, eke? 15 ✧ Ari ita, Pauto oiso puraroepa Moses-re, 'Ragai oiso oirara piepaaveira ragai vo vovouaro sirova utupaoro. Oearovupa voea iava siraoparaveira.'

16 Oire uva oisi-a eisi osa ragavira Pauto vo siraoaro oupapeira. Vao osiraoa vituaro oiso toupaveira, Viapau oiso vigei vo kovoaro-a ora viapau oiso vigei vo ruipaaoro-a oisi piepasa, ari rera raga vo vovouaro-a. Oa sirova oisi piepapeira. 17 ✧ Oire uva Fero-a ro-ia ira-ia ovoovoa toupaveira vao oa-ia Pauto rerare oiso puraroepa, 'Ragai vii turaro piepaavoi. Oa iava orekerovu kareke pieavere vii-ia. Oire ra vara kekepaoro ragai vo goruaro taraipaave. Ora aue tapo ragai vaisiario viripaivere vo rasitoa rutu-ia.' 18 Uva vo ovoovoa-ia uvuipavei ra vearovira taraipavio oiso, Ora rera vo ruipaaoro sirova utupaoro oearovu ragapa siraoparaveira oearovu riro kaureo piepaoro ritakovira rutu.

### *Pauto Vaaro Iava Siraoa Ora Rera Vaaro Kasipua*

19 ✧ Oire uva Pauto oirara rutu oiso piepareveira ora rera vo vovouaro raga sirova utupaoro. Uva va-a vao oa iava irai vai pasi visii iava ragaire oiso purarovere, "Vosa eisi piepareve Pauto, oire uva iroutoa vai uvuiparoi ra Pauto vo vovouaro gasireve? Uva apeisi ragavira iava Pauto uvuipa ra iraire oiso puraro, Vurito-a vii?" 20 ✧ Ari iroutoa vai-a vii vova rasito, viigoa uvuipau ra eisi purau Pauto tovipaoro? Uva o-ia pitokava viapau oiso uvuipaoi ra toreoro oiso purao rore ira oira purareve, "Eakere oiso ragai pieparivoi?" 21 Oiraopavira rutu, ro-ia ira pitokarirei purasa aueparo oiso iriavu oira-ia veaopara gurupareve, ari iriavu o iria-ia vuriara rogaraara vikipareve. Uva eisi piepaoro oisoa rera raga vo ruipaaoro sirova utuparo.

22 Oire uva apeisi ragavira Pauto toupareveira? Ira voeaore kasipu iraoparaveira oearoa vuri pitupituro purapaiveira. Ra oiso vovouparo ra voea opesi pierave ora rera vo goruaro rutu karekeoro voea-ia. Osa viapau oisi voea piepareve vagevagevira. 23 Iu ita, oiso piepareveira voeaore oepa siraoparaveira. Oiso ra voea-ia keraria vituaro rera vaaro karekereve. Uva voea-a vigei raga ita. Vigoa vatatopo piepareveira rera varaaro veaopara oupasa vo rera vaaro-ia keraria. 24 Uvare vigei ruture keeraroepa ora rera iare. Iu, uvare oevu-a vigei iava Jiu, ovusa oevivu-a voea voea raga iava ratau tou irara. 25 ✧ Oiso osa purararoepa vo Pauto rigato oa purareva Hosea vo Tugoropa Vuku voea iava ratau tou irara, 'Voeao oea oiso viapau toupaveira ragai voeaaro, oea vaisiaverea oiso, Evoea ragai voeaaro rutu. Ora voea oea vo sara sovora-ia toupaveira oepa viapau siraopara, evoea-a oearo oiso puraraverea, Visiipa tapo sirao iraoparaveira. 26 ✧ Uva vo uva vo tavitavio uvuiva oiso, Viapau oiso ragai voeaoro-a visii, uva evoa raga ita oiso vo vaisio uvuiverea, Ragai ovii iraraoro visii, ragai Pauto Tootoo Ovoi.'

27 ✧ Ora vo reo tapo oa vo Vuku-ia Tugoropa toupaveira origatoa purareva Aisaia Jiu-pa irara iava. Oa-ia oiso puraroepa, 'Vosa voea Jiu-pa irara rutu vieiario takuvuaro rutu oiso toupaveira osa rogaraara riroara rutu, oire uva voea iava kataipa irara raga roporoporevere ora rera iare. 28 Vao vituaro iava uvare ikavira ora goruvira rera ro Turaro Pauto voea varaaro vuriara voriaro vatereverea voeapa.'

29 ✨ Aue iava uvare oiso ragavira Pauto va purareverea osa Aisaia rovvira voari rutu va rigato rovoreva,  
 ‘Ro reitao rutu Turaro Pauto. Oire vosa viapau oiso Jiu-pa irara vigeipa siraoreri ora voeao vigei ovii iraraaro, uva vigei rutu vigoa opesi pie ovoirevori, oiso osa voeao oea Sodom uruirei-ia oisoa toupave ora Gomora urui.’

### *Voeao Isrel-pa Irara Jisas Vo Tavitaviaro Viapau Oirao Pieiva*

30 ✨ Uva apeisi puravio va iava eva? Oiso-ia, voeao-ia ratau tou irara oea viapau oiso kasivarivira rutu oisoa kovopaive, oire ra va iava oiso toupave, Torevoko vovou irara rutu vo Pauto osireiaro-ia. Ari ita, vo osa Pauto oisoa oirao pie iraopaive, eva-a oa raga iava Pauto voeare oiso puraroepa, “Torevoko vovou irara rutu visii.” 31 Vo osa voeao Jiu-pa irara Pauto oea rovvira ropo rovoreva ora rera iare, oea-a evoea oisoa taraa ragapaive rutu oaravure aue iava Reo Taisi. Oiso ra oisi oai iava oiso karekeave, Torevoko irara rutu vo Pauto osireiaro-ia. Vo osa viapau oisi voeapa uvuipape rutu. 32 ✨ E apeisi-a oiso osa vaaro-ia viapau oisoa uvuipape voeapa Jiu? Aue iava uvare ora voea raga ora virivaripasa ora voea ragapa oiso vo kovo pura ragaiva. Osa viapau oiso oirao pie vovou vai puraiva rera-ia Pauto. Oire uva avekei iria toupaveira o iria-ia koveaepa. Oa iava viapau oiso uvuaiepa oiso ra vo raivao sirova utuave virivaria oupa raiva. 33 ✨ Uva Tugoropa Vuku oiso tavipapeira o iava aveke ro Jisas, ‘Keketa, o-ia aveke iria tovoavo vo-ia Saion taere sovara-ia ravaavira. Iria-ia koveavere ora opesi pie ovoiro. Ari vosa ro ira rera-ia raripaoro rera oirao piepareve rutu, eera-a ira-ia viapau uvuiparoi oiso ra rera iava vasereve.’ Mt 21:42; Ro 10:11

## 10

### *Voeao Isrel Vata Viapau Oiso Torevoko Pitupitu Sirova Utuaepa Vao Pauto Vaaro*

1 Araoko irara oaa, rirovira rutu rugorugoo iraoparaveira voeao Jiu-pa irara ragai iavapa irara. Uvare rirovira rutu oiso ruipa iraoparaveira ra Pauto voea oureve ora rera iare. Oa-a eva oa iava rirovira rutu Pautoa iare variriparaveira voeapa. 2 ✨ Uva vearo reo rutu purapaavo voea iavirava, uvare kasivarivira rutu kovo iraopaiveira, oiso ra voea-ia Pauto rorureve. Ari ita, akukupavira rutu kovo ragapaiveira, uvare viapau oiso soporepaa viroveira ora voea vo kovoroaro vituaro iava. 3 ✨ Viapau rutu oiso taraipaaveira vao iava vo osa Pauto oirara oiso vaisipareveira, Torevoko vovou irara. Ora aue tapo vo osa kovo ragapaiveira oisore ra vo vaisio ouive, Igei-a vao torevoko irara. Oa-a eva oa vituaro iava viapau oiso ora voea iava vasepaiveira oiso ra Pauto voea torevokoreve. 4 ✨ Uva tarapavio rutu oiso Jisas urioroera. Oa iava Reo Taisi vo goruaro opesiera. Oire uva vo vokia-ia oiso toupai, Vosa ro ira rera oirao piepareve rutu, eera-a torevoko vovoutoa rutu vo Pauto osireiaro-ia.

### *Pauto Oiso Ruiparaveira Ra Ora Rera Iare Oirara Rutu Vorereve Voeao Ouoro*

5 ✨ Moses vo reo rigatoreva Reo Taisi iava oiso-ia,  
 ‘Itrouto-a ro ira tore ruipaparo vo Pauto osireiaro-ia oiso rutu osa torevokoto, ira uvui iraopa oiso ra varao rutu sirova uturo oara epao Reo Taisi sovara-ia. Uva oisi eisi piepaoro Tootoo Ovoi oureve.’

✨ 9:29: Ais 1:4, 13:19 ✨ 9:30: Ro 10:6; Ga 2:16 ✨ 9:32: 1 Pi 2:6, 8 ✨ 9:33: Ais 28:16  
 ✨ 10:2: Ap 21:20 ✨ 10:3: Ro 1:17; Fl 3:9 ✨ 10:4: Ga 3:24; Ro 7:1-4 ✨ 10:5: Nie 9:29; Esi 20:11, 13, 21

<sup>6</sup> Ari oreovu raga vao oa toupaveira va iava vao oirao piea Pautoa-ia oiso, ‘Opeita ora viire oiso purau, Irouto ro ira vuvuiua iare iparoverea?’

[oiso ra voava Krai vara pierve]. <sup>7</sup> ✧ Ora ‘Opeita oiso tapo ora viire purau, Irouto-a ro ira rasito sovava-ia roko-reverea?’

[oire ra voava Krai ipa pierve vovira kopiia iava]. <sup>8</sup> ✧ Uva eake rutu-a oare purapaveira Pauto vo rearo vaore torevoko vovou? Oreoa vao oiso purapaveira,

‘Vo reo-ia vao iava torevoko vovou viapau oiso tarataraapaa vare taraapasa. Oreoa-ia reoreopaveira ora vii gisipoaro iava. Ora vo reo oirao piepaveira vo ora vii vovouaro-ia.’

Oreoa vao oa iava voviri visii tavitavi rovoava oiso puraoro, ‘Oiso toupavere Krai oirao piepaveira.’ <sup>9</sup> Vo rara oiso purapata ora visii gisipoaro iava, ‘Jisai ragai Turaroaro.’ Vo rara tapo ora visii vovouaro-ia vao oirao piepata rutu oiso osa Pauto Jisai vovira torevoka pierve kopiia iava. Oire eva-a oa iava vuvuiparoi ra visii vorereve vovira ora rerapa visii virivarioro. <sup>10</sup> Oa vituaro-a vao-ia oiso-ia, Vosa Pauto oirao piepaveira vo ora vigei vovouaro-ia, oire ra va iava vigei vovira oiso puraoro, Tovevoko vovou irara visii. Ora vo rara oiso purapaveira, ‘Jisai vigei Turaroaro.’ Oire ra va iava ora rerapa vigei vovira vorereve ita.

<sup>11</sup> ✧ Vo Tugoropa Vuku-ia oiso purapaveira, ‘Ro ira rera oirao piepaveira, oire uva rera-a eera ira iava viapau vuvuiparoi ra rera iava vasereve.’

<sup>12</sup> ✧ Uva vo reo-a vao-ia oa oiraopaveira rutu vove rutupa oirara, voveo Jiu-pa irara, ora voveo ratau tou irara, uvare katai irara rutu-a vo Pauto osireiara-ia. Ro Pauto vigei rutu reraoro Turaro. Oire vosa irouto-a ro ira Pautoa iare variriparoi, eera-a irapa vuvuiparoi ra veoropara paaropaveira Pauto rera tavapasa vara-ia. <sup>13</sup> ✧ Uva oiso purapaveira Tugoropa Vuku, ‘Ro ira variriparoi vove Turaro akepaoro auere tauva, eera-a ira vorereve ora rerapa rera virivarioro.’

<sup>14</sup> Vosa viapau Pauto oirao pie rovopaveira, oire ra apeisi ragavira rera Pauto akeve tauvaare? Ora vosa rera iava vo siposipo viapau uvu rovopaveira, oire ra apeisi ragavira ita rera oirao pieve? Ora vosa viapau siposipopa irara vai toupaveira vove siposipopasa rera iava, oire ra apeisi ragavira vuvuipaave ra rera iava vo siposipo uvupaave? <sup>15</sup> Ora vosa viapau irai toupaveira siposipopa irara vai arupasa, oire ra apeisi ragavira vo siposipo vao kosipa piro voraro rutu viripasa? Ari ita, Tugoropa Vuku oiso purapaveira, ‘Vosa oevu vigei iare poua viro Vearo Siposipo iava vigeipa siposiposa, osa oiso osa veoropaveira rutu.’

### *Isrel-pa Irara Isivapaaveira Va Vao Vearo Siposipo Uvu Arapa*

<sup>16</sup> ✧ Uva oearovu isivapaaveira rutu va vao Vearo Siposipo uvu arapa. Oa iava vao-ia Aisaia oiso vo reo rigatoreva, ‘Turaro, kataipa iraravi raga ragai vo rearo uvupaaveira vo reo oirao piepaveira. Vo osa oearovu reasipaave.’

<sup>17</sup> Oire tarapaveira vao-ia Krai iava vo tavitavi oiso osa oearovu voari tuariri vigei tavi rovoiva. Oire uva vo tavitavi eva oa vituaro-a vao-ia, oa iava Pauto oirao piepaveira.

<sup>18</sup> ✧ Uva visii akepaavo oiso, E Jiu viapau vo tavitavi iava vao uvuiva? Ari oiraopaveira oa iava vao-ia uvuiva, uvare Pauto vo rearo oiso purapaveira,

'Ari ita, siposipopa irara vo siposipoaro gurukoaro voraro rutu rasitoo-ia viriva. Oreoa vao-ia voraro rutu avaepa rasito rutu rekasiaro-ia.'

19 ✧ Uva oiso tapo vorevira ita visii akepaavoi oiso, E apeisi-a? Aviavipai vo reo voeaopa Jiu, eke? Ari! Uvare Moses oiso vo rigato purareva va iava vao,

'Viapau oiso ragai vo reoaro outava, eva oa iava voeaopa ratau tou irara tavitaviravere. Eva-a oa vituaro iava oiso ragavira aveavepatavere. Uva voea voeao-ia ratau tou irara sopaipa irara voeare kasipu iraopata, vo osa Vearo Sipoipo uvu rovopaive.'

20 ✧ Ora Aisaia tapo ira goruvira rutu uriri asavira vo reo vao rigatoreva va iava vao-ia,

'Oirara ragai kekeiva voeao oea viapau ragaire oisoa taraapaive. Ora ragai voea-ia poua viropa voeao oea viapau oisoa oearoi akepaive ragaire.'

21 ✧ Ari ita, Pauto oiso puraroepa voeare Isrel-pa irara, 'Vokiara rutu-ia voeao ouou ragapaaveira ora ragai iare, ovusa ragaire isivapaave kaureopaoro.'

## 11

### *Pauto Siraoparoepa Oearovivupa Isrel-pa Irara*

1 Ragai vo akearo-a vao-ia oa oiso purapai, E Pauto voeaore isivaroepa rera voeaaro Jiu? Viapau rutu. Ragai-a vao Pol voea iava rera, uvare ragai aaotoaaro-a Ebrahim voea iava rera. Ora vao tapo ragai vo saraaro oa oiso vaisipaiveira, Bensamin. 2 ✧ Oea roporeva voari rovoa rutu-ia Pauto ora rerapa, voeao Jiu-pa irara. Oire uva vo vokie viapai oiso voeare ovauparoi. Oreoa vao oa-ia taraipataveira Tugoropa Vuku-ia toupaveira vao iava osa Ilaia Pauto tavitavipaoro Isrel-pa irara togareva oiso puraoro,

3 'Turaro, vii voeaaro siposipopa irara upoiva voea kopii pieoro. Ora vii varaaro tapo eravaoara rigaiva. Uva ragai raga vao-ia ragoa touvira tupaavoi. Uva ragai tapo uposa ita auepaai.'

4 ✧ Uva apeisi ragavira Pauto rera vo reoaro aatoreva? Oiso-ia, 'Viapau oiso vii raga-a. Ari oevu rutu tapo-a erao vatara tuku (7,000) evoea oea viapau ro-ia kuuvuto pauto vuurapa vaisi purapaiveira Bal. Oea-a evoea oea touvira tupaivoi ragai voeaaro.'

5 Oire uva oisi ragavira-a eisi osa tupaivoi katakataipa irara vo vokie-ia voeao rera voeaaro. Voeao oearoa roporoporeva ora rerapa, uvare oisoa voeapa vereopa vovou vatepareve. 6 ✧ Oiraopavira rutu oiso osa vao oira roporopopa pitupitu vituaro tupaiveira vereopa vovou raga-ia vao rera vaaro. Oa vituaro-a vao-ia oira roporopopa pitupitu viapai oiso tupaiveira varao iava vearopa kovoro oara purapaive. Vosa oisi eisi tupaivori, ra viapai oiso Pauto vaaro vereopa vovou oiraopape rutu.

7 Oire uva oisi raga tupaiveira osa viapai vao kekeiva Jiu oare oisoa taraa ragapaive vereopa vovou Pauto vaaro, ovusa voeao raga katakataipa irara, voea iava oea roporeva Pauto, oea va keke ovooiiva. Ovusa oevu voea iava Jiu oea iava oisoa rugorugoara tuukevira rutu vavagisivira tupaive. Oa iava rerare Pauto isivaaepa. 8 ✧ Oa-a vao oa iava oiso purapapeira Tugoropa Vuku,

'Pauto voea vo vovouroaro vavagisi piepaoro rovrorepa voari tuariri rovoa-ia. Oa iava vo rutu rekasiaerao vo vokie-ia oisi raga piepaoro. Uva va-a eva oa iava viapai oiso vuupaai ra oiraopara kekepaoro

✧ 10:19: Diu 32:21 ✧ 10:20: Ais 65:1; Ro 9:30 ✧ 10:21: Ais 65:2 ✧ 11:2: Sam 94:19; 1 Kin 19:10 ✧ 11:4: 1 Kin 19:18 ✧ 11:6: Ro 4:4 ✧ 11:8: Ais 29:10; Diu 29:4

vara eveipaive, ora varao tapo oiraopa reoro oisi raga ita viapau eveipaoro vara uvupaive.’

9 ✧ Devit tapo oiso puraroepa vo rigato-ia oa purareva, ‘Ari ita, oisoa aioara tapo vearopara purapaive oiso keapaoro, Varao iava igei-ia roruparevira Pauto. Vo osa vara rutu-a evara akukuara raga. Oara-ia ora voea vo vovouroaro raga-ia oisoa viripato purapaive rera-ia ora voeare kuverava purapasa. Oire uva oisi-a oiso osa vara purapaoro ora voea-ia rikui-ia koveaepa voa ora kopii pie ovoioro. 10 Vearopai vosa voea iava osireiara voririkepa, oa iava viapau uvuipaaepa ra oaravu eveiive. Ora vearopai tapo vo uvare vosa pukoa viropa riro vavatapara kaepaoro tavaka vovouro.’

### *Oearovu Oirara Oureva Ora Rerare Vorevira Pauto*

11 ✧ Oire visii akepaavo oiso-ia, E Jiu kove ovoiaepa koveoro, eke? Viapau rutu. Easi eveoa vorevira torevarea. Ari ita, uvare koveaepa voea vo pitupituroaro-ia varao vuriara, evara oara kekeoro Pauto voea arova voeao Jiu ora poreroepa voeao iare ratau tou irara, ora rera iare voeao ousa. Oire uva rera vo siraoaro voeaopa ratau tou irara, oa kekeoro voeao Jiu rerapa vorevira ruipapaaverea, oiso ra voeapa ita vorevira siraooro ita utupavira. 12 ✧ Uva oisi ragavira oiso pieivoiva Jiu, Pauto oearovu rutu vaterava rera vo reoro voraro rutu vo rasio-ia. Ari ita, uvare voea vaoro Jiu oirao piea rera-ia oisoa potepaive, oa-ia oearovu rutu vo rasio iava uvuipai ra rera goruvira rutu oirao piepaive. Uva oisi-a eisi osa iava oearovu vearoara ouiva, vo osa Jiu vuriara puraiva. Uva vara-a evara oara-ia pute pieara vearopara rutu ouiverea voearei rutu takuvuaro, vo rara Jiu vorevira ora poreave rera iare Pauto.

### *Voeao Ratau Tou Irara Oea Jiu Vo Tavukiaro Ouiverea Rara*

13 Visiire ratau tou irara reoreoparai, uvare ragai-a Krai-pa kovopato visiipa. Oire uva viapau oiso ariiparai vo kovova vao-ia reia rutu oa purapaavo visiipa. 14 Oiraopavira rutu, reia rutu vao-ia kovoa. Vosa oisi ragavira rugorugoopaeri voeao Jiu, ra vaopa Pauto vo kovoaro ruipapaave vai pasi. Oa iava vorevira poreva virori rera iare Pauto vo utupavira. 15 Vo osa Jiu-pa irara arova ora poreroepa voeao tapo ratau tou irara ora agiagisa. Ora vo osa voeao tapo Jiu-pa irara oisi raga ita vorevira ora poreave rera tapo vorevira ora agiagisa ita. Vosa oisi ragavira oiso pieve, oire ra oiso rutu roropape voeapa kopiiia iava vorevira torei rera iare Pauto. 16 ✧ Oire vosa tuariri voeari Ebrahim vase oisoa toupave Pauto voeaoro, oea iava voeao-ia vo vokio-ia, oea tapo ita oisi ragavira eisi tupaivoi. Uvare oiso-ia vosa vo eva vavurupaoro vearovira toupave, oire ra va iava vo eva raoro tapo oisi raga ita vearovira toupave.

17 ✧ Oire oevavu oliv ova oa varuparo uvavu toupaveira. Oa iava oraorovu piaiva. Uva vo tokoruro iare oraorovu ouiva vo evao iava vegovego ova oavu oliv ova. Oiso ra vo raoro siguave vo tokoruro-ia. Ra voa poretepe. Oire uva visii-a vao-ia ratau tou irara visiigoa oiso toupata osa vo evao vegovego ova oliv ova. Visiigoa oiso rutu oureva Pauto osa vo evao vegovego ova vo evao iare, oa vo oisoa toupave varuparo paupa ova. Oiso ra voa vorevira poreteta gorua ouoro tootoosa. Vo goru oa peira Jiu-pa irara taupapasa. 18 Oire ra viapau oiso rutu rugorugoopata, Vearo irara rutu-a visii voea-ia putepaoro Jiu, oea oiso tokoa viropa osa vo evao. Viapau. Uvare visii oiso rutu toupatavo, Raoara visii. Iu ita, viapau oiso raoro vavuruparapa tootoa vatepaiveira. Viapau. Asi vavurupara-a oara

✧ 11:9: Sam 69:22-23 ✧ 11:11: Ap 13:46; Ro 10:19 ✧ 11:12: Ro 11:25 ✧ 11:16: Lev 23:10

✧ 11:17: Jer 11:17; Ap 2:39

raoara vatepaiveira tootooa. Eva oa vituaro iava viapau uvuipatai ra ora rei vaisi pieta.

<sup>19</sup> Oire uva pasi oiso vaio purapatai, “Ari ita, Pauto oea piareva. Oa iava voea vo tavukiaro ouiovorao.” <sup>20</sup> ✧ Iu, oiraopa reo vao-ia. Uvare Pauto voea piareva, vo rara reasipaave Pauto oirao pie arapa. Oire vo osa vo tavuki-ia eva toupata, uvare rera oirao piepataveira, ra opeita vagupaoro ora visii iava riatapata. Viapau. Ari vo ovoovore rugoo iraopaoro uriri iraopatavere. <sup>21</sup> Aue vituaro uvare evoea Jiu oiso toupai osa vo evao sipusipuaro, oa varuparo toupaveira. Oeva iava Pauto voea piareva voea tokooro. Uva apeisi-a vosa visii tapo vao-ia vo evao iava vegovego ova oisi eisi oai vuria vai purata osa evoea Jiu? Oire ra viapau oisi oai iava Pauto visii tapo tokoreve visii piaoro, eke?

<sup>22</sup> Keketa! Oiso osa ragavira Pauto vo pitupitureo purapareveira oiso, oearovupa siraoparoveira oearovupa kasipupaoro. Oire ra ora voea vo vovouroaro-ia vuri vovouro vorevira voea viro piepareve. Uva oisi ragavira-a eisi osa voeao Jiu ora voea-ia viroaera uvare voea tokorevora. Vo osa visii ragapa riroa rutu siraoa rera vaoro karekereva, vo uvare tovaira rutu Kraisi oirao piepataveira. Ari vosa visii tapo viapau oisi piepata, oire ra oisi ita visii tapo tokoreve ora rera iava. <sup>23</sup> ✧ Voeao Jiu oea Pautoa-ia oirao piea kavu rovoiva. Osa iava voea tovorevorea Pauto vo ora voea vo tavukiaro-ia, vo rara rera vorevira oirao pieve ita. Uva Pauto uvuiparoveira rutu oisi piepasa eisi. <sup>24</sup> Visii ratau tou irara visiigoa oiso rutu toupaveira osa vo raoro vo evao iava, vegovego ova. Oire vosa visii oureva Pauto vova vegovego ova vo evao iare oa eva varuparo toupaveira paupa ova, oire uva oisi-a eisi osa ragavira apopoipapeira rutu. Eake iava? Uvare viapau oisi eisi oearoi piepaiveira. Ari ita, vosa Pauto voeao raga vorevira Jiu siguvareve vo eva-ia, oire ra voeapa avekatape rutu oisi oiso.

### *Pauto Vo Siraoaro Oirao Rutupa*

<sup>25</sup> ✧ Araoko irara oaa, oiso ruipaparai ra vao-ia taraita vatau reo. Ra va-ia taraio ru viapau oiso ra ora visii vaisiari rei piepata oiso purapaoro, Igei-a vao riro tarai irara. Oreoa vao-ia oiso toupai, Oearovu voea iava voeao-ia Jiu viapau oiso vokiara vai rutu-ia kaureopaaveira Pauto vo vovouarova. Osa piepaoro vo rutu rekasisa poua viroveira, uva uvuiperea ratau tou irara vo vieiario, voea raga oea Pauto oirao piepaiveira rutu. <sup>26</sup> ✧ Uva vo vuuta-a eva oa isivaaro iava Pauto voea rutu ourevereira Jiu-pa irara ora rerapa. Oa iava oiso purapapeira Tugoropa Vuku, ‘Iravu vova Saion uruia ira uriorovereira visii kae piepasa, vo rara voea iava oirara vuri vovouro vera ovoipareve voeao Jekop vo saraoro iava voea. <sup>27</sup> ✧ Osa va-a vao oa puraoro vao Reo Ovoi oiraopavira rutu kareke pieavereira. Vao oa puraava tuariri rutu voea tapo Jiu-pa irara aao iraraaro.’

<sup>28</sup> Oire vo osa Jiu-pa irara Vearo Sipoisipore isivaapea, oa iava oiso rutu karekeapea, Pautoa-va ora keripa irara. Uva va vituaro-a eva oa iava uvuipatai visii vao-ia ratau tou irara ra va iava Kraisi oirao piepata. Ari ita, vo osa voari rutu Jiu-pa irara ropo rovorevoiva ora rerapa, voea tapo reo ovoi purareva voeari tuariripa irara. Uva oearo rugorugooapaoro voeaoa siraoparoveira vo vokio iavapa irara Jiu. <sup>29</sup> ✧ Uvare viapau rutu rera vo rugorugooaro tavariopaiveira. Ari ita, vosa katai vovou raga purareve, oire ra oearovu roporoporeve voea iava voea viraakosa. Uva oisi-a eisi taru osa vo vovou purarevereira rara.

✧ **11:20:** Ro 12:16; 2 Ko 1:24 ✧ **11:23:** 2 Ko 3:16 ✧ **11:25:** 1 Ko 2:7-10; Ef 3:3-5 ✧ **11:26:** Ais 59:20-21 ✧ **11:27:** Ais 27:9 ✧ **11:29:** Nam 23:19



30-31 Ari ita, visii vao-ia ratau tou irara oisoa reasipata Pauto vo rearo uvu arapa. Uva vo vokio Pauto visiipa siraoroerao, uvare vo tavukio-ia Jiu-pa irara vaaro toupatavoi, voea oea isivaaepa rerare. Oiraopavira vo vokio-ia viapau oiso riro irara vai Jiu-pa irara vai Pauto-ia oirao piepaivoi rutu. Ari voea rutupa siraoroverea vo utupaua. Visiipa sirao iraoopaveira Pauto, eisi osa ragavira ita voeapa siraoroverea Jiu. 32 ✧ Oa vituaro vao-ia osa Pauto oirara rutu iava vasereva, oiso ra ora voea vo ruipaaro raga-ia vuri pitupituro purapaive. Ra va iava voea rutupa siraoro akukuvira rutu vo utupaua.

### *Uvuipaviei Pautoa-ia Vuurapa Vaisi Purapasa*

33 ✧ Oiraopavira Pauto orekerovu rutu paaropaveira vigeipa varao iava rera varaaro. Ora rera vaaro rugorugooa riropapeira rutu, uvare orekerovu rutu-ia tarai iraoopaveira. Iroutoa vai rutu-a ro ira uvuipaveira oiso ra roroiovira rutu Pauto vo ruipaaro-ia taraiparo? Ora iroutoa vai rutu-a ro ira roroioverea rutu ora rera vo pitupituro-ia taraipaveira? 34 ✧ Vo Tugoropa Vuku oiso purapapeira, 'Irouto-a ro ira Pauto vo rugorugooaro-ia taraipaveira? Irouto-a ro ira Pautoa-pa rugoo vateparaveira rera vo taraiaro topa piepaoro rutu? 35 Irouto-a ro ira uvuipa ra oarai vateoro Pautoa-pa oiso puraro, Varao tuoro ragaipa oarai vateri rara?

36 ✧ Vao vituaro iava uvare Pautoa raga ro ira reoreoroiva, orekerovu rutu karekarekeepa. Varao rutu oara vo toupaveira oara purareva rera raga. Oiso ra vara-ia rera iava vaisia kae piepape. Ra Pautoa-ia vuurapa vaisi purapape vokiara rutu-ia. Ovoiei.

## 12

### *Vo Toupai Vao Iava Vosa Ora Vigei Iava Varaura-ia Tauopavio Krais-pa Voura Vatepaoro Oiso Osa Tauoa*

1 ✧ Araoko irara oaa, vao-ia taraipataveira riroa siraoa Pauto vaaro vigeipa. Oa-a vao oa iava goruvira rutu visii akepaavoi oiso ra ora visii iava varauro oavisii rutu vateta, ora sopaura oavisii rutu Pautoa-pa. Kasivarivira rutu rerapa kovopata vearo pitupituro purapaoro rera vo vovouaro raga sirova utupaoro. Ra va iava visii-ia rorupareve. Vo osa oisi eisi piepaoro rera-ia vuurapa vaisi purapata rutu oiraopavira. 2 ✧ Opeita varao raga-ia rugorugoopata vo rasio-ia touara oearovu vo pitupituroaro sirova utupaoro. Viapau. Ari Pautoa-re rugoopata, eera ira uvuiparoi ra visii vo rugooroaro tavariopareve. Ra va iava airepa rugooro oupata ita, oisore ra vara-ia taraipata oarapa ruipaparo Pauto. Oiso ra vara purapata. Vosa rera vo rugooaro veoroa sirova utupata ora vao tapo vearo pitupitu, oire ra va iava visii-ia rorupareve rutu.

### *Vo Pitupitu Oa Pura Iraopape Pauto Voeaaro Osireiario-ia*

3 Akukuvira rutu Pauto ragai vate ragarevora vao rera vaaro tauvaa, uvare ragai-a rerapa kovopato. Osa iava oiso visii tavipaavoi, Opeita oiso ora visiire rugorugooapoaro oiso purapata, "Igei-a vao reipa irara rutu." Viapau rutu. Ari uvuipatai ra avivikevira rutu ora visiire rugorugooa irapata, rara vao eveipata ora visii-ia oirao pie vovou oa vaterevora Pauto visiipa. Vo osa visii vo vovouroaro-ia tarai rovoroiva rutu, uvuvira rutu visii vaterevora totoevira oirao pie vovouro. 4 ✧ Ari ita, kataiua varaua

✧ 11:32: Ro 3:9; Ga 3:22-23 ✧ 11:33: Ef 3:8; Sam 9:25 ✧ 11:34: Ais 40:13-14; Jop 36:22  
 ✧ 11:36: 1 Ko 8:6; Hi 2:10; Ro 16:27; Hi 13:21 ✧ 12:1: 2 Ko 10:1-2; Ro 6:13, 16, 19 ✧ 12:2: 1 Pi 1:14; 1 Jo 2:15; Ef 4:23 ✧ 12:4: 1 Ko 12:12-14; Ef 4:4, 16

vigei-ia, osa vara rutu varao toupaveira vigei varaaro-ia oara varaaro kovoara roorookavira toupaveira. <sup>5</sup> Eisi osa rutu toupapeira vigei vao-ia oirara vigoa oisi roorookavira rutu toupapeira, vo osa Krai tapo kataivira rutu takuvuvira toupape. Oiso osa kataiua varaua vo roorookarova varao toupaveira.

<sup>6</sup> ✧ Vo osa oisi eisi toupapeira roorookavira, oa iava viapau vaeavira oaravu vigeipa vatepareveira varao vatevateara vigei tauvapasa. Viapau. Ari katakataivira vigei vatepare. Oire ra vearovira kovopape vara iavirava rera-ia raripaoro. Oiso-ia osa ragavirare vigei reesireva vaore rera vo siposipoaro purapasa oearovupa. Oire vosa oisi vao purapaoro uvui iraopaviei ra rera-ia raripavio vearo kovo purapaoro vigei varaaro oirao pie vovouro sirova uvuvira. <sup>7</sup> Ora oiso tapo osa iava vigei reesireva oearovu tauvapasa, osa iava eisi uvui iraopaviei ra oisi vara purapape voeapa. Ari ita, vosa oisi vigei reesireva oiso ra oearovu tarai piepape tapo, uva uvui iraopaviei ra oisi piepape. <sup>8</sup> ✧ Ora oisore tapo ra oearovu vovouaro varaata piepape, oire uva uvui iraopaviei ra oearovu vovouaro varaata piepape rutu. Vosa oiso vigei tavireve, ra oearovupa vatepavio varao iava vigei varaaro moniara, uva oisi-a eisi osa ragavira uvui iraopaviei ra voearopa vara-ia paaropavio. Ora vao tapo osa vigei reesireva vaore, oiso ra oearovu tokipape, oire ra oisi kasivarivira rutu vo kovo oisi purapape. Ora ro tapo ira kasivarivira rutu apota irararovi tauvapareve, ira-a eera uvui iraoparo ra oisi piepaoro rorupareve rutu.

### *Oiraopa Pitupitu Purapape Oearovupa Siraopaoro*

<sup>9</sup> Opeita kuuvuvira oearovupa sirao ragapata. Ari uvui iraopatai ra ora visii iava vovouisiro rutu iava oearovivupa sirapata rutu. Ora vao-ia oiso-ia vuri pitupituro veri iraopaoro vearoa-ia pitu iraopata goruvira rutu. <sup>10</sup> Vigei rutu kataivira rutu tou iraopapeira Krai tapo, eisi osa vituaro iava uvuipaviei ra ora vigeipa sirapavio rutu, oiso rutu osa vigei vavuata. Oire vosa iravu visii iava rera vearoa vai purapareve, uva uvuipatai ra rera-ia egapata rorupaoro.

<sup>11</sup> Kasivarivira rutu kovo iraopata. Oisi piepaoro eisi opeita pokapoka ragapata. Vosa kovoa purapata Turaropa, ra oisi va purapaoro goruvira rutu ora visii iava vovouisiro rutu tovo iraopata va-ia.

<sup>12</sup> ✧ Visii vao-ia visiiigoa Krai-ia rari iraopaoro toupata, osa iava eisi uvui iraopatai ra roruvira rutu toupata. Ora goruvira rutu varao tapo-ia tavakaara toupata. Ra variripata vokiara rutu-ia Pautoa-pa.

<sup>13</sup> ✧ Vosa araoko irara oavisii orekerovupa potepave, oa iava uvuipatai ra ora visii varaaro iava paaropata voeapa toupapeoro. Ora oiso tapo ra voearopa tavetepa irara ora visii vo kepaoro karupata, ra voa voea tou piepata vearovira.

<sup>14</sup> ✧ Ari ita, uvui iraopatai oiso ra Pauto arepata, ra va iava voeao viraakopareve oea visii togapeave oreorovu-ia. Oiraopavira rutu oiso uvuipatai ra voeapa vearovira arepata. Viapau oisore-a ra voea vuri piepareve Pauto.

<sup>15</sup> Voea tapo roru iraopata oea roruvira toupave. Ora voeao tapo gaupata oea gauvira toupave. <sup>16</sup> Ra vaeavira rutu kovopata, Ora visii-ia rorupaoro. Opeita oiso ragavira ora visiiire rugorugopata, Oearovu visii iava vara pievira toupaveira. Viapau. Avivikevira rutu ora visiiipa toupapeoro kataivira rutu kovopata voearovio tapo akaipa keke irara. Opeita oiso ora visiiire purapata, "Igei-a riro tarai irara rutu."

✧ **12:6:** 1 Ko 7:7, 12:4, 10 ✧ **12:8:** Mt 6:1-3; 1 Ti 5:17 ✧ **12:12:** Hi 10:32, 36 ✧ **12:13:** Ro 15:25; Hi 13:2 ✧ **12:14:** Mt 5:44; Lu 6:28

17 ✧ Oire vosa iravu visii iava vuria vai purareve visii-ia, ra viapau oiso rerava ora tuutuukopata. Ora oiso tapo-ia, vosa vearo rugorugooro raga purapata, oa iava viapau uvuiparo irai ra visii vo rugorugooroaro vaisireve oiso, Vuriara evara. 18 Opeita potepata vearo rugorugoo purapa arapa. Ari gavaure vovou purapata oearovu tapo toupao. 19 ✧ Araoko irara oaa, opeita oevu vuriara purapaive osa vara aatopasa oiso auepata rugoopao, Ragai auearo va aatosa. Viapau. Oape Pauto vaaro oa taru aatorevere. Oa-a vao-ia vituaro iava oiso purapapeira Tugoropa Vuku, 'Ragai raga auearo oara vuriara voriaro vateaverea oirara rutupa. Ragai raga Turaro oara tuaverea taru.'

20 Oiraopavira rutu, oiso osa purapapeira Tugoropa Vuku vigeire oiso, 'Vosa irouto oirato ogoeparo viiva ora keripato, oire ra rerapa aioa vateri. Ora vosa uuko regapaparo, ra rera vateri uukoa. Ari ita, vosa oisi pierivora rerapa, ora sovero rara rerare kasiraope rugooa oiso osa tuituia ariioro rera varaarore vuria rugooro.'

21 Ora opeita vuri vovou vo pitupituaropa vasepata, oiso ra visii-ia puteve rutu ora rigaoro. Viapau rutu. Oa-ia vao vuri vovou uvui iraopatai ra va-ia pute iraopata rutu vao vearo vovou raga purapao.

## 13

### *Uvui Iraopaviei Ra Gavman Reroaro Toupape*

1 ✧ Vigei rutu vao-ia uvuipaviei ra gavman varaaro reo goruro sirova vearovira utu iraopavio. Vosa viapau Pauto gavman vai tovorevori vo-ia, oire ra viapau oiso toupaveve irai. Ari ita, Pauto voeaopa gorua vatepareveira, oiso ra gavman vo kovoaro purapaive vigeipa. 2 Vosa iroutoa vai ora kaureoparo gavman tapo, ira vaova tapo ora kaureoparovere oa tovoreva Pauto. Oa-a eva vituaro rera raga ora rerare tavaerovere vo tovoriepa voki-ia. 3 Uvare oirara vearopara purapaiveira, uva viapau oiso uriripaaveira gavmanpa. Oea raga ita-a evoa oia vuria purapaiveira. Oire vosa ruipapata oiso ra gavman tapo toupata rutu uriri asavira, uva uvuipatai ra vearo pitupituro rutu purapata. Opitupituro-a evara oara-ia uvuiparoi ra vara iava visii vaisiaraaro kae piepareve. 4 Voeao oea gavmanpa kovopaive oea oiso rutu tupaiveira, Pauto kovopa iraraaro. Oa iava vearopara karekepapeira rutu visii rutupa. Ari vosa vuriara purapata, oire ra vara iava rera asavira uriri iraopata. Aue iava uvare torevokovira rutu visii vorirevere varao-ia visii varaaro vuriara. Uva oisi eisi pieoro Pauto vo kasipuaru oirao pierevere, voeao-ia oea vuriara purapaiveira. 5 ✧ Osa iava uvui iraopatai ra gavman vo reoroaro sirova vearovira rutu utu iraopata. Ari ita, viapau oiso vao raga-ia, vo osa Pauto vo kasipuarore rugoopao vearovira gavman varaaro sirova utupata. Easi vao rutu tapoa, vo osa ora visii vo rugooroaro eveipaoro vara-ia taraipata oiso, Vearo vovou-a vao-ia.

6 Oiso osa vao tapo vearopai osa takis vatepataveira gavmanpa. Eake iava? Uvare gavmanpa kovopao Pauto vo kovoaro purapaiveira voeao oea goruvira gavman vo kovoaro purapai. 7 ✧ Oire ra takis vate iraopata voearopa oearoa visii arepaive oiso, oai gavmanpa, ari oai kaunselpa. Osa ragavira eisi oiso opeita iravu ragapa vateoro iravu vo arearo uvu ragata. Viapau rutu. Asi uvuipatai ra vaea rutupa ora avivike iraopata vaea vo areoroaro uvupaoro.

✧ 12:17: Pro 20:22; 2 Ko 8:21 ✧ 12:19: Lev 19:18 ✧ 13:1: Ta 3:1; 1 Pi 2:13; Jo 19:11; Dan 2:21

✧ 13:5: Ekl 8:2; 1 Pi 2:19 ✧ 13:7: Mt 22:21; Mk 12:17

*Apeisi Ragavira Uvuipaviei Ra Reo Goru Sirova Utuvio*

8 ✧ Vosa irou irara vigeipa eake kovo vateive, oire ra ikavira vo kovo opesi piepe va puraoro. Ari Pauto okovovu raga rutu vaterevora vigeipa vao oearovupa siraopasa. Okovoa-a vao viapau rutu uvuipai oiso ra va opesi piepe. Ari ita, uvare oiso toupai vo osa irouro ro ira oisi vo kovo purapareve vearovira rutu, eera-a ira Moses vaaro Reo Taisi sirova vearovira utuparoveira. 9 ✧ Uvare Moses vo rigato purareva oiso-ia, ‘Opeita ora visiiva otopata, ora opeita oira upopata, ora opeita kavirupata, ora opeita riiriipata,’ ora varao tapo oara katakataivira toupave. Oreoroa rutu varao takuvuaro oiso purapapeira, “Iravivupa siraopau oiso rutu osa ora viipa siraopauveira.” 10 ✧ Vosa iravivupa siraopata, oire ra viapau oiso vuria vai purata rera-ia. Vo osa oisi eisi piepaoro Reo Taisiro rutu roorookaro-ia sirova vearovira utupata. Aue iava rara vo reoro rutu varao takuvuaro-ia vearovira rutu utupata oearovupa siraopao.

*Uvui Iraopaviei Ra Torevokovira Vokape*

11 ✧ Osa vearpapeira vosa oisi va purapape vao-ia. Uvare taraipavioveira oiso Ovoioapa Voki-a vao oa tutuu piepaivoi. Oire ra opeita tapurisivira toupata uusi rorovira. Viapau. Ari kaiporivira rutu toupata, vo rara rera oirao pie rovoera oiso rugorugooivo, Utupavira rutu voreroverea igei ousa. Osa oiraopavira rutu-a vo vokio-ia vorepa voki rera vaaro oa-ia kareroverea, oea tutuu pievoi rutu. 12 ✧ Rupapa tutuu piei, oa iava aviua sikereresata tutuuvo. Osa iava uvui iraopaviei ra varao kavupe oara purapapeira vo rupa-ia. Vo osa oisi oarai purapape, oire ra va iava oirao pie vovou-ia pitupaoro ora vigei raga ora virivaripavio Pautoa raga-ia raripaoro vo osa aviavia-ia vokapape. 13 ✧ Vigei vao-ia vigoa aviavia-ia toupapeira. Osa iava uvui iraopaviei ra torevoko vovouro purapape oiso purapaoro, Opeita vureipata spakpaoro, ora opeita riako vuravurapata, ora oira otopa pitupitu purapasa. Opeita arii asavira vuri pitupituro purapata. Opeita raivaro taraapata oearovure oisore ra voea upopata voraro voea riiriipaoro. 14 ✧ Ari ita, Turaro raga Jisas Kraisi ira-ia uvuipatai ra rera arepata rera vo goruarore va-ia ora virivaripasa vuri vovouro asavira. Oire uva vo goru-a eva oa raga-ia uvuipatai ra kokarapa vovou putepata ora visii iava vo osa visii ou ragapave vo vovou.

## 14

*Opeita Araoko Irara Oavisii Vo Pitupituro Roviriepata*

1 ✧ Iravu oirato ira airevi raga Kraisi oirao pieparevora, ira oisoa viapau taraiparo aue-ia oirao piea. Vosa ruipaparo visii tapo tousa, ra vearovira rera pau pieta. Ra opeita rera taraiaro-ia vakuvakupata ora piopioapaoro vo tarairo rera vaaro aue-ia oirao piea. 2 ✧ Oeavu oirara oea goruvira rutu oirao piepaiveira vore Pauto, oa iava oaravu rutu aiopaiveira oiavoru rutu. Ari oeavu oea varu arapa kavupaiveira aue raga aioparo osasararovu rutu aioara voeao oea viapau goruvira Pauto oirao piepaiveira. 3 ✧ Ro ira orekerovu aiopareve, ira viapau uvuiparoi oiso ra eera akaipa piepareve ira viapau oiso evo pitupitu sirova utuparoveira vara aiopaooro evara. Oire uva rera ro ira varu arapa kavupaiveira, ira viapau uvuiparoi ita ra eera akaipa piepareve, ira osasararovu rutu aioara aiopareve. Eake iava? Uvare Pauto vaiterei rutu-ia vaeavira vearo vaisi rutu purare. 4 ✧ E rovirieci

✧ 13:8: Ga 5:14; Kl 3:14 ✧ 13:9: Eks 20:13-14 ✧ 13:10: Mt 22:39-40 ✧ 13:11: 1 Ko 7:29  
 ✧ 13:12: 1 Jo 2:8; 1 Te 5:8 ✧ 13:14: Ga 3:27; Ef 4:24 ✧ 14:1: 1 Ko 8:9, 9:22 ✧ 14:2: 1 Ti 4:4; Ta 1:15 ✧ 14:4: Je 4:12

vovou irara rutu-a visii? Oa iava uvuipatai ra iravu voeaaro kovopa irara rovirieipata? Viapau. Ari, voea raga reraaro turaro voea vo pitupituroaro rovirieirevere voeare oiso puraoro, “Vao veaopai,” ari “Vao vuripai.” Uva oiraopavira rutu-a va-ia vao oa veaopape voeapa oa rutu reiperé voeapa, uvare voea tauvapareverea Turaro va-ia.

<sup>5</sup> Oavu-a vao-ia ovoovoa iravu iava oirato, ira ovokivu reesipareveira oiso purapaoro, “Rei voki rutu-a vao-ia, ovokiapa viapau oiso ovokirovu reipapeira.” Vo osa iravu oiso rugorugooapaoro oiso puraparo, “Viapau oiso ovoki reipai. Ari vo vokiro rutu varao kataivira raga toupai.” Oire ra oisi raga roopavira rugorugooapaoro ora vaierei vovouaro-ia oiso puraparo, “Tepa vo reoro goru piepasi. Auepa teapi vaierei iava vo rugooro tariri ragapape.” <sup>6</sup> Oearovu ovokirovu rei piepaiveira, oiso ra va iava Pauto vaisiario kae piepaive vo vokiro-ia rerapa avivikepaoro. Vo osa oearovu osasarorovu rutu aiopaiveira aioara, varao oara vaterava Pauto voeapa. Evara-a oara-ia rera-ia vuurapa vaisi purapaiveira rera vaisiario kae piepaoro. Vo ovusa oearovu voeao oea aioara rutu iava oaravupa kavupaiveira, uvare oiso rugooapaiveira, Pauto vo vovouaro sirova utupaiei. Ari ita, uva voea tapoa oea Pauto vaisiario-ia vuurapa vaisi purapaiveira vara-ia aioara rerapa avivikepaoro ita.

<sup>7</sup> Viapau oiso irai vigei iava ira epao ro ira tootoopaoro ora rera raga-ia rugorugooaparoveira. Ora vosa irai vigei iava kopiio, ra viapau uvuiparoi ra Pauto vo Saraaro iava kosiro viro. <sup>8</sup> Ari ita, vao vituaro-ia osa tootoopaoro toupapeira rera ragapa ro vigei reraaro Turaro. Ora oiso tapo osa kopiipaoro rera raga sirova utupavioveira. Uvare vosa tootoopavio Turaro ragapa, ora kopiipavio rera sirova utupaoro, uva oiso toupapeira, Vigei vao rera voeaaro Turaro. <sup>9</sup> Oiraopavira rutu oiso osa Krai kopiioropa, ora vorevira toreroepa tootooro. Oiso ra voearei rutupa turaroro oiso, Voeao oea tootoovira toupave, ari voeao oea kopiave.

<sup>10</sup> ✧ Visii vao-ia eake-a vao oapa araoko irara oavisii toga ragapataveira oaravu-ia reoara? Ora eakere voeapa voeao araoko irara oavisii reasipataveira voea akaipa piepaoro? Uvare vigei rutu Pauto ruvara-ia torevioverea. Ra voa rera raga vigei rovirieireve varao iava vigei vo vovouaro. <sup>11</sup> ✧ Uva va-a eva oa-ia taraipavio oiso, Oiraopa rutu, uvare vao Tugoropa Vuku oa-ia oiso puraroepa Turaro, ‘Ragai-a tootoopato. Oa iava uvuiparai rutu oiraopavira visii tavipasa oiso, Oirara rutu vo rasio-ia ragaipa avivikepaaverea rekupaoro ragai iare. Ora oiso tapo osa voea rutu ragaire oiso puraaverea, Oiraopatoa rutu Pauto.’

<sup>12</sup> ✧ Oa vituaro-a vao-ia vo pitupituro-ia vigei varaaro oara kosi piepere ora vigei iava Pauto tavitavipaoro.

### *Opeita Araoko Irara Oavisii Orekerovu Purapata Ra Vara-ia Voea Kove Piepata*

<sup>13</sup> ✧ Opeita oreorovu purapata tovira oearovu visii iava togapaoro. Ari visii vo pitupituroaro tavariopaoro vatatopo iraopata oiso, teapi orekerovu purapata vuri vovouro sirova araoko irara oavisii piro piepaoro. <sup>14</sup> Ro Turaro ira ragai vo rugorugooaro goru pieredora oiraopavira rutu, oiso ra veavovira rutu tarai iraopara oiso, Viapau oiso oiaioiei vurua vai. Viapau rutu. Ari vosa irouto ro-ia ira oiso puraro, “Oa eva vuripai rutu,” osa oisi rerapa vuripape rutu. Rera-a eera oiso rutu toupape osa voeao oearoa oaravupa aioara kavupaiveira. <sup>15</sup> ✧ Ari ita, vosa vo aioro aiopata oarare

oisoa oiso purapaave, “Vuriara,” oire ra vo vukuro kekepaoro araokoto oavisii riroa vavata oupare visii vo pitupituaro-ia. Vo osa oisi piepata, ra viapau oiso rerare rugorugooapaoro siraopata ro araokoto oavisii. Opeita iravu piro pieta oisi vara aiopaoro vo ora visii vo ruipaoro raga siraova utuoro. Uvare Krai kopiroepa rera tapopa eera. <sup>16</sup> Vosa oiso taraipata vao-ia, Vearo pitupitu purapeira. Oire vatatopopata, teapi oeai visii vo pitupituaro kekepaoro oiso va vaisiive “Vuri pitupitu vao-ia.” <sup>17</sup> Vao iava Pauto vo Saraaro vituaro. Viapau oiso varao iava-a oara aiopapeira ora varao oara-ia ukaiopavioveira. Viapau. Asi akukuara raga evara. Ari varao-ia reipara rutu oiso-ia, torevoko pitupitu-a vao-ia, ora vao gavaure tou oearovu tapo, ora oiso-ia ra rorupata vao iava osa Tugoropato Uraurato vigei tauvapareveira. <sup>18</sup> Oire uva irouto ira vara evara purapareveira oiso-ia rerare ro Krai rugorugooapaoro, ira-ia eera rorupareveira Pauto, ora oiso tapo vo osa oearovu rera-ia vearo vaisi purapaive va raga iava rera vaaro vearo pitupitu.

<sup>19</sup> ✧ Oire uva oisi-a eisi osa ragavira uvui iraopaviei ra vearo vovou purapaoro akeakepape oearovuva gavaure vovou purapaoro. Oa-ia uvuipaviei oearovu varaaro oirao pie vovou goru piepape rutu. <sup>20</sup> Pauto ruipaparoveira rutu vigeipa oiso ra ora rera vo kovoaro purapareve vo vigei sopaoro-ia. Uva viapau uvuipaviei oiso ra rera vo kovoaro tekipepe varao ragare rugorugooapaoro akukupapa aioro. Iu, osa eisi vearopai oiso ra osasararovu rutu aiopape aiora, uva vuripai vosa oisi piepaoro oearovu vovouaro piro piepape voea kasipu piepaoro vara-ia varao aiora. <sup>21</sup> Vosa oisi toupaviri, ra vearopape rara viapau oiso varuara vai aiopata, ora aue wainara vai-ia ukaiopata, ora orekerovu vai rutu purapata, varao oara-ia araoko irara oavisii vai kove piepata. <sup>22</sup> ✧ Ora varao rugorugooara ora visii varaaro, oara-ia uvuipatai ra ora visiipa vara roroio piepata rutu vo rara Pautoa raga tapo ora reopata varare varao aiora rugooapaoro ora orekerovu rutu. Auere ra rorupareve, ro ira ora rera raga viapau ora togapaoro ora rera ragare rugooapaoro varao-ia, oara-ia taraiparo oiso, Vao torevokopai vo Pauto osireiario-ia. <sup>23</sup> Ari vosa ora rera raga vo vovouaro-ia viapau vearovira tarai rovoru, ra oiso rugooapaoro “Torevokopai eke viapau,” oiso ra vara aiopareve. Oire vosa vara sirova utuparo, oire ra rerare vuripape, vo rara viapau oiso va oirao piepareve oiso purapaoro, “Torevokopai rutu vo aio.” Oiraopavira rutu oisi eisi oiso-ia vosa visii vao orekerovu purapata, ra vara iava viapau Pauto oirao piepata, oire eva-a oa vituaro iava visiire vuripai rutu.

## 15

### *Uvui Iraopaviei ra Krai Vo Pitupituarore Rugorugooapaoro Oearovu Ruture Rugooapaoro*

<sup>1</sup> ✧ Vigei vao vigoa goruvira rutu Krai oirao piepapeira, vigoa uvui iraopavioveira oearovivu tauvapasa, oea varaaro oirao pie vovouaro rav-eravepapeira. Ora vigei raga-ia vovoupa pitupituro tapo kavu rovopape ra oearovivu kapokaporopape voea tauva rovopao aue-ia siraoa vo vavataaro. <sup>2</sup> Ari ita, vigei rutu uvuipaviei ra katakataivira araoko irara oavi tauvapape voea vo vovouaro varaata piepaoro. Auere ra voea varaaro oirao pie vovouaro goruvira rutu torepape. <sup>3</sup> ✧ Uvare viapau oiso Krai ora rera raga-ia rugorugooapaoro. Oa-a vao oa iava oiso purapapeira Tugoropa Vuku,

✧ **14:19:** Sam 34:14 ✧ **14:22:** 1 Jo 3:21 ✧ **15:1:** Ro 14:1; Ga 6:1-2 ✧ **15:3:** Sam 69:9; 2 Ko 8:9

‘Vosa oearovu visii tovipaive visiipa riroa sirao vavata vatepaoro, ragai tapo ita ovavata eva kaeavora visii vaoro.’

4 Vo reoro rutu-a varao oara Tugoropa Vuku-ia toupaveira, oara vigei ruture tapo reoreopapeira, oiso ra vearovira rutu vo reo iava taraiia oupape. Oa iava uvuipai vigei vo vovouroaro varaata piepasa. Ra va iava goruvira rera-ia pitupape raripaoro. 5 ✧ Oiso-ia Pauto-a raga ira uvui iraoparoveira vigei vo vovouroaro varaata piepasa ora vigei varaaro rari vovouro goru piepasa. Eera-a ira raga vo goruo vatepareveira vigeipa oiso ra Krai vaoro ovoovoa eveipaoro rera vo vovouro purapape. Uva eisi osa piepaoro uvuipaviei ra gavaurevira rutu toupape oearovivu tapo katai rugoo raga-ia. 6 Uva uvuipaviei ra oisi ragavira eisi tupaoro katai vaisi purapape oearovivu tapo Pautoa-ia vuurapa vaisi purapaoro, ro Pauto, Jisas Krai ro vigei Turaroaro Aitearo.

### *Veoro Sipoipo Vao Voeaopa Ratau Tou Irara*

7 Katai vovou rutu purapata oearovu tapo voeoro oearoa visii tapo paupasa urioapaaveira. Oiso osa Krai visii piereva ora rera-ia visii tovooro. Oire ra va iava oearovu visii vo pitupituroaro kekepaoro Pautoa-ia vuurapa vaisi purapaive. 8 ✧ Uva visii tavipaavo oiso, Krai vararoepa vo rasio iare, oisore ra Jiu-pa irara tauvapareve. Vo osa oisi piepaoro vao Reo Ovoui Pauto vaoro oirao piepape. Vo reo-ia oa purareva voearipa vigei aao iraraaro voari rutu tuariri oiso ra voea tauvareve. 9 ✧ Oisore tapo ra ratau tou irara vuurapa vaisi purapaive Pautoa-ia ora rera vaoro riroa siraoa voeapa. Oa iava oiso purapapeira Tugoropa Vuku, ‘Ragai-a vao ragoa ratau tou irara tapo torepaoro vuurapa vaisi purapaaverea vii-ia Pauto. Uva igei rutu eraioverea vii vaisiaro kae piepaoro.’

10 ✧ Oire uva oreovu tapo va iava vao Tugoropa Vuku oiso purapapeira, ‘Visii ratau tou irara rorupata evoea tapo Jiu, oea roporeva Pauto ora rerapa.’

11 ✧ Ora vo reo tapo oa rigatoiva vo vuku sovora-ia vao-ia oa oiso purapapeira, ‘Ratau tou irara vuurapa vaisi purapata Turaro-ia. Iu, rirovira rutu vuurapa vaisi purapata Turaro-ia, visii vao-ia osararovu rutu iava.’

12 ✧ Ora vao-ia Aisaia oreoa rigatoreva, oa oiso purapapeira, ‘Ro aoto Jesi ira oiso toupape osa ikopi, ira iava iravu oiso kovaroverea oiso osa airepa sipukao. Ra vao tupaoro ratau tou irarapa turaroparo. Uva rera raga-ia raripaaverea vokiara rutu-ia.’

13 ✧ Oire uva variripaveira Pautoa iare visiipa, ro ira oiso toupaveira, Visii varaaro oirao pie vovouro vituaro. Ira uvuiparoveira visii vatepasa gavaure vovou ora rorua. Oiso ra vara iava visii vaoro rirope rutu vao oirao piea, vo osa Tugoropato Uraurato vo goruaro visii sopoaro-ia kovopaive.

### *Pol Arii Asavira Vo Rigato Purareva*

14 Araoko irara oaa, oiso rugorugooapai visiire, Visii vo pitupituroaro-a veoroara rutu, ora visii vo rugorugooaro roroioara. Oara-ia uvuipatai ra oearovu vearovira tarai piepata ora visii iavapa irara. 15 Ari ragai vo rigato vao-ia oa puraavo visiipa arii asavira, uvare oiso ruipapapai ra visii rugoo piea visii pore pieoro. Oa vituaro-a vao-ia oa iava Pauto ragai reesirevora vo kovo vao purapasa. 16 ✧ Oiraopavira Pauto ira ragai oiso pierevora oiso-ia, Krai Jisas-pa kovopato ragai voeaopa ratau tou

✧ 15:5: Ro 12:16; 1 Ko 1:10 ✧ 15:8: Mt 15:24; Ap 3:25-26 ✧ 15:9: Sam 18:49 ✧ 15:10: Diu 32:43 ✧ 15:11: Sam 117:1 ✧ 15:12: Ais 11:10 ✧ 15:13: Ro 14:17 ✧ 15:16: Ap 9:15

irara. Uvare ragai vo kovoaro oiso rutu toupai, Voeapa siposipopasa vao iava Vearo Siposipo Pauto vaaro. Auere ra va uvuivora, uvuiave ra Pauto ora rerapa voea vovevira ouevre voea-ia roruoro, voeao oea pasiko piepareveira Tugoropato Uraurato ora rerapa Pauto.

17 ✧ Vo osa Krai tapo ora tavosipaoro oiso purara vare vao ragai vo kovoaro, “Vearopai rutu” vo kovo oa purapaaveira Pautoa-pa. 18 Oiraopavira viapau oiso ragai raga vo kovoaro-a. Ari vo kovo purarevora Krai vao-ia ragai-ia, oiso ra va kekepaoro, ora va uvupaoro ragai vo reoaro ora voea iava sopaura oaive porepaive Pautoa iare voeao ratau tou irara. 19 ✧ Iu ita, osa oiso ragai pierevora, oiso ra ravaa reesiara vai purapaa, ora ovoovoara vai. Ora oiso tapo osa ragavira Tugoropato Uraurato ragaipa gorua vatevora. Uva oiso ragavira piepaoro viripaavora voraro rutu Vearo Siposipo oiraopavira rutu kosi piepaoro Krai iava. Uva Jerusalem iava rovoraepa oiso rutu rekasisa Ilirikam oisi vo kovo purapaoro. 20 ✧ Aue iava uvare oiso ruipaparaveira ra uvaroi ouruiroi-ia oearoi tarai piepaa va iava vao Vearo Siposipo Krai iava, voraro uvaroa viapau irai voea tarai pie rovoive rera iava ro Krai. Uva oiso reasiparai ra oeari okovoiaro topa piea. 21 ✧ Vao-ia oa iava oiso purapapeira Tugoropa Vuku, ‘Vo uva viapau Jisas Krai vo siposipoaro viapau uvupaive, uva-a evoa va uvuiverea taru. Vo uva viapau va ou rovoive, uva-a evoa uva voea iava rugorugooara taru roroiopea.’

### *Rom Iare Tavetesa Ruiapa Ragaparoepa Pol*

22 Eisi osa ragavira ragai vo ruipaaro toupaveira. Oa iava voraro rutu viripaaveira. Uva vara-a varao oara-ia ora pugu pieparaveira. Oa iava viapau uvuiparai oiso ra visii iare tavetea evoa. 23-24 Uva vo vokia ragai vo kovoaro opiesiaro voraro uvarovu. Uva ragai vo ruipaaro-a vao oa ouavora voari tuariri oa sirova utusa vatatopoparai, oiso ra evoare tavetea visii iare. Ari ita, Spen-ia ruture avaravere, vo rara visii tapo tou rovoa evoa Rom-ia. Oire uva visii rutu iare taveteavora, vigei rutu rorupere. Ra va isivaaro iava ragai tauvaoro pasi ragai vai topa pieta vosa avara.

25 ✧ Vaviopavira ava rovoparai rara Jerusalem iare voeaopa vatevateara vate rovosa oirao pie vovou irara. Varao oara guruiva vatevateavira oearovu voeapa. 26 ✧ Uvare lotupa irara oea ratauvira toupaveira Masedonia Provins ora Grik taere, oea ora voea vo ruipaaro raga sirova utuoro monia guruiva voeaopa apota irara Pauto vooaoro iava, oea Jerusalem-ia toupaveira. 27 Uva roruiva, vo uvare voeapa oisi pieiva eisi. Ari viapau uvuipaai ra apota iraravire ovaupaave, uvare voeao ratau tou irara Vearo Siposipo ou rovoiva Jiu ruvara-ia. Oire uva oisi ragavira ora tuutuupaoro uvuipaai ra veoropara vatepaive vorerivira voeaopa Jiu.

28 Uva va guruivoroa oa iava va topa piepaavoi voeapa rara voeao oea Jerusalem-ia toupaveira. Uva va isivaaro iava voa kavuoro Spen iare avaravere visii iare tavete rovopasa tou visivi. 29 Taraiparai oiso osa urioparai visii iare vara rutuva veoropara, oara toupaveira vo Krai vo viraakoaro sovara-ia. Oara visiipa vatesa urioparai.

30 ✧ Araoko irara oaa, katai vovou raga-ia toupataveira Turaro Jisas Krai tapo, ora tapo vo uvare Tugoropato Uraurato vigei tauvapareveira vo oearovupa siraopasa. Oa vituaro-a vao-ia oa iava visii are iraoapaavoi oiso ra vigei rutu goruvira variripavio Pautoa iare. Ra va iava ragai tauvapareve. 31 Variripata oiso ra viapau ragai vuri pieive voeao Judia-ia tou

✧ 15:17: Fl 3:3; Hi 2:17 ✧ 15:19: Ap 19:11 ✧ 15:20: 2 Ko 10:15-16 ✧ 15:21: Ais 52:15  
✧ 15:25: Ap 19:21 ✧ 15:26: 2 Ko 8:1, 9:2 ✧ 15:30: Ga 5:22



irara oirao pie vovou asa irara. Oa iava voea asavira ragai virivarirevere rara Pauto. Ora vaore tapo variripata voeaopa oea Jerusalem-ia toupaiaveira oirao pie vovou irara. Oiso ra va iava vearovira rutu vao tauvaa ragai vaoro ouive. <sup>32</sup> Oire uva va vao isivaaro iava Pauto vo ruipaaro sirova utuoro urioravere visii iare rorupaoro rara. Uva visii tapo touoro reareaa oua vearovira rutu.

<sup>33</sup> ✧ Pauto vigei rutupa gavaure vovou vatereve. Uva variriparai auere ra visii tapo toupareve. Ovoiei.

## 16

### *Pol Vearo Voki Purareva Ora Rera Vate Iraraaropa*

<sup>1-2</sup> ✧ Iriavuei oira vaisiara, Fibi oirao pie vovouva. Iria vo uruio-ia toupaeveira Senkria urui lotupa kovo-ia pitupaoro. Iria oisoa riro irara rutu tauvapaeve ora ragai tapo. Vearo vovouva rutu. Uva va-a eva oa-ia oirapa vearo vovou purata ita visii vao Pauto voeaaro rutu, vo rara urioo visii kekesa ita, uvare Turaro oiraaro-a oira eira.

<sup>3</sup> ✧ Ragai-a vearo voki purata vaiereopa Akwila avukarei ora Prisila. Aiterea ragai tapo tavosivira kovopasiveira Krais Jisas vo kovoaro puraoro. <sup>4</sup> Aiterea ora vaiereve iava tootooa oaesi piresivora ragai tauvaoro. Osa iava vearo vaisi purapaavoi vaiereve-ia. Ari viapau oiso ragai raga-a, ari voeao rutu tapo ratau tou irara oea lotu purapaiaveira. <sup>5</sup> Ragai-ia vearo voki purata voeao rutu iare oea lotupaaveira vo avukarei evaiterei vo kepaaro-ia.

Ora oiso purata vearo voki ro iare Epinitas ragai vatetoaaro rutu. Eera rovopato-a rutu voeao iava vo-ia Esia Provins. Ira Krais oirao pie rovoreva rutu.

<sup>6</sup> Ora ragai-ia vearo voki purata o iare Maria. Iria vearo kovo rutu purapaaveira kasivarivira visii rutupa.

<sup>7</sup> Ora vearo voki purata vaiereve iare Andronikas vaio ora Junias. Uvare igei peva-a vao Jiu iava igoa vase tuukepa kepa-ia touiova. Aiterea-ia vaiereve taraipaaveira aposel irara, uvare rovovira rutu Krais oirao pie rovovira. Oire uva vaiereve isivaaro iava ragai ita.

<sup>8</sup> Ragai vo reoaro topa pieta vearo voki ro iare Amplietas. Irapa siraoparaveira rutu, uvare Turaro reraaro-a rera.

<sup>9</sup> Ora vaiereve iare tapo vearo voki purata aiterea iava ro-ia Eban ira Krais-pa kovopareveira oiso osa vigei. Ora ro Stekis ragai vatetoaaro rutu.

<sup>10</sup> Ora ragai vo reoaro topa pieta vearo voki ro iare Apelis, uvare rera-ia oearovu taraipaaveira, vo uvare rera vaoro oirao pie vovo oa goruvira rutu Krais-ia toupaiaveira.

Ora vearo voki purata vo aao iare, Aristobyulas aao.

<sup>11</sup> ✧ Ora ragai vo reoaro topa pieta vearo voki ro iare Herodion, uvare saratoaaro-a Jiu iava rera. Ora voeao tapo iare oirao pie vovou irara vova Nasisas aao voea.

<sup>12</sup> Ora vearo voki purata vaireve iare Traifina vaio ora Traifosa, airea Turaro vo kovoaro purapaereveira.

Ora o tapo iare Pesis iria riro kovo rutu puraeva Turaropa, ragai vatevaoro.

<sup>13</sup> Ora vearo voki purata ro iare Rufas. Uvare vearo vovoutoa rutu-a ro ira roporeva Jisas ora rera iare. Ora o tapo iare aakova iria oiso rutu oisoa toupaeve ragai aakoaro.

14 Ora ragai vo reoaro topa pieta vearo voki voeao iare Asinkritas vase ora Fligon, Hemis, Patrobas, Hemas, ora oearovu oirao pie vovou irara, oea voea tapo toupaveira.

15 Ora vearo voki purata vaitereo iare Filologas vaio ora Julia. Ora vo vauatareo iare tapo Nerias vauatarei. Ora voeao iare tapo Olimpás vase, ora voeao tapo Pauto voeaaro oea tapo toupaveira.

16 ✨ Ora visiiva sekanta visii varaaro sirao vovouro karekeero. Ora voeao rutu lotupa irara Kraís voeaaro oea oiso purapaai visii ruture, “Vearo voki rutu.”

### *Pol Ovoioapa Reoro Vatareva Voeapa Voea Goru Piesa*

17 ✨ Araoko irara oaa, visii vosi iraopaavoi voeao asavira. Oiso ra voeapa ora vatatopo pie iraopata, teapi visii sikasikapaivere. Ra va iava oearovu visii iava oirao pie vovouroaro piro piepaive. Uva oiso visii tavipaavoi ra tauaivi rutu voeapa toupata, oea Vearo Sipsisore kaureopaaveira va-ia oa ou rovoavora. 18 ✨ Voeao raga ita oea oearovu vo vovouroaro piro piepaiveira, oea viapau oiso Kraís vo kovoaro purapaiveira ro vigei reraaro Turaro. Oire uva va purapaoro ora voea raga vo ruiparoaro sirova utupaaveira. Ra vo reo purapaive oa vearovira rutu gurukopaive, vo osa viapau oiraopa reo-a va eva. Oire uva oisi-a eisi osa purapaoro voeao keakeapaiveira oea viapau oiso oiraopa reoro-ia taraipaave rutu. 19 ✨ Oearovu rutu visii-ia taraipaaveira visiigoa Kraís vo siposipoaro ou ovoitava. Oa iava roru iraopaavoi rutu. Uva oiso ruipa iraoparai ra vearovira rutu roroio iraopata varao-ia vearopa pitupituro taraipaoro. Oire ra vuri pitupituro vatavata iraopata varapa reasipaoro. 20 ✨ Pauto-a raga vigei vaaro gavaure tou vituaro. Ira raga Seten-ia putesa aueparoveira, oiso ra rera tovopareve vo visii kokotoaro reroaro. Ovoiei.

Jisas Kraís raga visii vatareva rirovira rutu vova rera vaaro-ia tauva, vo osa visii varaaro-ia ruroguoara toupareve.

### *Oearovu Vearo Voki Puraaepa Voeaore Rom-ia Tou Irara*

21 ✨ Timoti ira visiire vearo voki puraparevoi. Ira ragai tapo vokapaoro kovopareveira. Ora voeao tapo Lusias vase, ora Jeson, ora Sosipata Jiu iava vova vo uvava raga.

22 Oire ora ragai-a vao Tetias ragoa tapo visii iare vearo voki purapaavoi, uvare kataitoo raga Turaro oavi vigei reraaro. Ragoa Pol vo reoreoaro rigatoavoi visiipa vo pasio sovara-ia.

23 Oire uva ragai-a vao-ia Pol ragoa vo tupaavoi Gaias vo kepaaro-ia. Uva rera tapo visii iare vearo voki puraparevoi. Ira vo kepaaro-ia ora gurupaaveira lotupa irara voo lotupasa. Ora vaitereo Erastas vaio ro ira gavman vo moniario tokipareveira vo uruio-ia, ora ro Kwotas vigei araokotoaaro. Aiterea rutu tapo visii iare vearo voki purapasivoi.

24 [Pautoa iare variriparai visiipa, oiso ra rirovira visii tauvareve Turaro Jisas Kraís aue-ia vereopa vovou. Ovoiei.]

### *Pol Vuurapa Vaisi Purareva Pautoa-ia*

25-26 Vigei rutu vuurapa vaisi purape vo Pauto vaisiario kae piepaoro. Ro ira uvui iraoparoveira visii goru pie iraosa, oiso ra Kraís-ia raripata. Oiso osa purapapeira vo Vearo Sipsisipo-ia ora vo ragai vo reoaro-ia tapo vao oa vateavora visiipa. Vao Vearo Sipsisipo oa vao iava tavitavipapeira oa rovoa rutu-ia vatauepa. Oire uva vo vokio-ia Pauto va roroiovira

✨ **16:16:** 1 Ko 16:20; 1 Te 5:26 ✨ **16:17:** 1 Ti 1:3, 6:3; 2 Jo 10 ✨ **16:18:** Fl 3:19; Kl 2:4 ✨ **16:19:** Ro 1:8; Mt 10:16 ✨ **16:20:** Jen 3:15 ✨ **16:21:** Ap 16:1, 13:1, 17:5, 20:4

karekeparevorao. Vo uvare va iava profet irara rigatoara pura rovoiva voari tuariri, ora vo uvare tapo Pauto voeao siposipopa irara rutu arureva vorarore osararovu rutu iare va iava vao-ia siposiposa. Oa-a vao-ia oa vituaro iava uvuipaviei ra goruvira rutu Krai oirao pie iraopape. Ora va tapo vosa Pauto vo vovouroaro rutu-ia vearovira utupaoro. <sup>27</sup> Vigei reraaro Pauto kataitoa raga. Ari viapau oiso irai epao, ira rera vo taraiaro-ia putepareveira vao-ia reia rutu. Ari ita, uvare Jisas Krai raga va-a vao vituaro oa iava Pautoa-ia vuurapa vaisi pura iraopapeira, vo rara rera vaisiaro kae piepape opesi asavira rutu. Ovoiei.

Eisivi raga, ra opesipe ragai vo reoaro.

Ragai-a vao, Pol.

## 1 KORIN

### Irapa Reoro Vo Vukuo Iava

Pol vo pasio rigatoreva 56 o 57 yia Jisas vo kavauaro isivaaro iava. Ira va siporeva voeaopa lotupa irara oea Korin urui-ia oisoa toupave. Uva vo urui Korin urui rifo urui rutu, ouruia-ia osasararovu rutu vuri pitupituro oisoa toupave. Oa iava vo pitupituro iava vuriara oisoa Pol akepaive. Eisi osa iava vara iava aviavi pievira rigatoreva voeao oirao pie vovou irara tauvapa, oiso ra viapau vuria purapaive evo urui-ia tupaoro.

Oiré uva goruvira Pol voea tavitavireva varao iava tokarasiara, ora kuuvu irara tisa irara, ora otopa pitupituro iava, ora aioara varao oara tugoropai aio arapa, oiso ra viapau vuriara vai purapaive vara-ia evara. Uva varao tapo torevoko pitupituro oara iava rigatoreva oiso-ia, ora oupa pitupitu (1 Ko 7:1-40), ora komunion (1 Ko 11:20-34), oearovivupa siraoapa vovou (1 Ko 13), ora lotu purapasa Tugoropato Uraurato varaaro vatevateara kovo piepaoro torevokovira (1 Ko 12:1-14:40).

Evo reo isivaaro iava oreorovu purareva vao iava osa oirara vorevira toreaverea kopii tapi iava vo utupaua (1 Ko 15:1-58).

1. Vo pasio iava aviavi pie reoro, ora vearo vaisi purareva Pol, 1:1-19.
2. Lotupa irara ora roopa pieaepa oevu irapa irara vaisioro oiso-ia, Pol, ora Apolos, ora Pita, 1:10-4:21.
3. Otopa pitupitu oiso vaisireva Pol, Vuri pitupitu rutu. Ora oiso, teapi araokotoara iava gasiri kortua-ia vao oa purapaiveira voeao oirao pie asa irara, 5:1-7:40.
4. Kristen irara vo pitupituroaro iava vo osa oearovu tapo toupaveira voeao oirao pie asa irara, 8:1-11:1.
5. Lotupa pitupitu iava oa-ia uvuipaai oirara ra Pauto roru piepaive, 11:2-14:40.
6. Torearo iava Jisas eisi raga osa toreaverea oirao pie vovou irara vo Jisas, 15:1-58.
7. Sirao vate puraiva voeaopa Kristen irara vo Judia Distrik-ia, 16:1-4.
8. Pol vo ovoioapa reoro purareva ora tapo vearo vokireva, 16:5-24.

1 ✧ Ragai-a vao Pol Jisas Kraiis reraaro aposelto. Ragoa roporeva rera vo kovoaro kaesa Pauto ora rera raga vo ruipaaro sirova utuoro. Oa iava vegei vao vo pasio rigatopavevoi ora ro-ia Sostenis vigei araokotoaaro. 2 ✧ Uva vo pasio vao-ia visiipa lotupa irara visiigoa Korin urui-ia toupaveira. Visii vao visiigoa roporeva Pauto ora rera iare, oiso ra oiso rutu toupata, Rera voeaoro rutu torevoko vovou irara. Visiigoa Kraiis Jisas tapo ora tavositaepa ora voearo rutu tapo uvarovuva, oearoa ro Turaro vigei rutu Turaroaro Jisas Kraiis vaisipaiveira variriara purapaoro. 3 Uva Pauto Aite arepaavoi vaiterei ora Turaro Jisas Kraiis, oisore ra visii vatesi tauva ora gavaure vovou.

#### *Pol Vearo Vaisi Purareva Pautoa-ia*

4 Vokiara rutu-ia vearo vaisi purapaaveira Pautoa-ia visii-ia rugorugoopaoro, uvare vereopa vovou rutu purapaveira visii tauvapaoro Kraiis Jisas vo goruaro iavirava. 5 ✧ Ari ita, vo osa Kraiis tapo ora tavosivira toupatavoiva, visii-ia vearopara rutu karekeepa oiso osa varao, vearopa rugorugooro ora varao tapo oiraopa reoro rutu kareke piepasa. 6 Uva oisi-a eisi osa iava visii vo touaro oisi eisi oirao piepaiveira rutu vo reo vao-ia

Krais iava oa vateavora visiipa. <sup>7</sup> ✧ Oa iava viapau oiso oaravu avu vaipa viraakoara vai apotavira toupataveira, vo osa tuevira toupata rore vigei reraaro Turaro Jisas Krais, vao iava osa vorevira voreroverea vo rasio iare. <sup>8</sup> Oiraopavira rutu ira visii vo vovouroaro goru pieparevere taru vo ruture rekasisa Ovoioipa Voki-ia vaore, vo osa vo voki-ia eva Jisas Krais vo vokiaro Pauto visii kekeoro visiire oiso puraroverea, “Roroio vovou irara raga visii. Visiigoa-ia viapau vuriara vai.” <sup>9</sup> ✧ Ari ita, viapau oiso Pauto tavariora vai epao Oa iava uvuipaviei rutu ra Pautoa-ia rari iraopavio rera oirao piepaoro. Ro ira visiire keeraroea, oisore ra ora tavosifa rutu Oviitoava Jisas Krais vigei reraaro Turaro.

### *Lotupa Irara Ora Roopa Pieaepa*

<sup>10</sup> ✧ Goruvira rutu oiso visii tavipaavo Jisas Krais vaisiario goruaro-ia ro vigei reraaro Turaro oiso, Araoko irara oaa, katai vovou rutu purata vo osa ora reoreopata. Oa iava viapau uvuipatai ra ora roopa piepata. Eisi osa va iava vao visii tavipaavo oisore ra tavosi visivi rutu toupata katai rugorugoo raga purapaoro, ora katai kovo raga purapaoro. <sup>11</sup> Aue iava uvare oreorovu uvuavora voea ruvara iava Klowi voeaaro. Oea oiso aviavi pievira ragai taviivora, uvare rirovira rutu kaureo irapaotaveira visii vao araoko irara oaa. <sup>12</sup> Uva vo reo eva topa piepaavo oiso reopaoro visii vaoro vuria. Vao iava osa totoevira roopavira oiso purapataveira, “Ragai Pol vo siposipoaro sirova utuparai.” Ovusa oearovu visii iava oiso purapaave, “Uva eakepa? Ari ragai Apolos vo siposipoaro sirova utuparai.” Ovusa oearovu oiso purapaave visii raga iava, “Ari ragai Pita vo siposipoaro sirova utuparai.” Vo osa oearovu goruvira oiso purapaave, “Ari ragai Krais vo siposipoaro sirova utuparai.” <sup>13</sup> Oire uva oisi-a eisi osa piepaoro visii raga Krais roopa piepataveira, oisore ra oearovu rutu roopavira rera-ia pitupaive. Uva visii akepaavo oiso, E apeisi-a? Pol kotoiva evao parikou-ia oiso ra visiipa kopiiro? Uva apeisi-a? Baptaisa outavora rera vaisiario-ia Pol, eke? <sup>14</sup> Oire uva Pautoa-ia vearo vaisi purapaavo vao iava, uvare viapau oiso visii iava iraiapa baptaisa vai vateavora. Ari vaitereo ragapaa Krispas vaio ara Gaias. <sup>15</sup> Eva-a oa vituaro iava viapau irai uvuiparoi ra oiso puraparo ragaire, “Pol igeipa baptaisa vatereva, oisore ra rera vo siposipoaro raga sirova utupaio.” <sup>16</sup> Aika! Ora rugoo pierai iravure oirato Stefanos ora rera voeaaro. Ari ita, osa vai-a ovauparai vai pasi vo oearoi vai tapore voearo oearoa vaipa baptaisa vateava, eke viapau pasi. <sup>17</sup> ✧ Viapau oiso Krais ragai arureva baptaisa vatesa. Viapau. Easi eera ragai arureva Vearo Siposipo iava siposiposa. Oa-a vao oa iava viapau vo taraio iava vo rasio-ia oisoa siposipopaa. Viapau. Vaopa teapi Krais vo kopiario vo evao parikou-ia akukuvira raga tou ragapaive.

### *Krais-a Pauto Vaaro Gorua Ora Taraia*

<sup>18</sup> ✧ Ari ita, vo siposipo Krais vaaro iava kopiia vo evao parikou-ia, oa voeao-ia oiso rutu toupaveira keevaita reo raga, oea oiso vore avapaave Opsi Ovoipa Urui iare. Vo osa vo siposipo-a eva, Pauto vo goruaro iava vigeipa vao vigoa oriruvira rutu toupapeira vo rera vaaro sovara-ia gorua. <sup>19</sup> Vo Tugoropa Vuku-ia oa oiso purapapeira, ‘Ragai vao taraia opesi pieaverea voeao iava riro tarai irara. Ora voea iava oiso roroio rugooro vavagisi pieaverea taru voeao oea orugooru-oorovu rutu oupaiveira vo rasio raga iava.’

20 ✧ Oire apeisi ragavira voea-ia evoea riro tarai irara eisi toupai? Ari apeisi voeaopa oea taraiare taraapaiveira? Ora voeao oea oearovu rutu-ia putepaive oreorovu-ia reoreopaoro? Oiraopavira rutu uvare Pauto vo taraiaro-a gorua rutu oa karekereva Oa iava vo tarai vo rasio iava akukupapaepa. 21 Uva oisi-a eisi osa ragavira iava viapau uvuipaviei ra Pautoa-ia roroi ovira taraipavio ora vigei vo rugooaro raga iava. Eake iava? Uvare oisire vigei oisi pierewa ora rera vo rugooaro sirova. Ari ita, Pauto voeao oupareveira ora rera iare oea rera oiraou piepaive igei vo siposiporoaro uvupaoro. Vo siposiporo oarare oiso purapaaveira oearovu, “Keevaita reoro raga.” 22 Voeao Jiu oea oiso ruipapaaveira ra ravotoara kekepaivora, oiraou piepaive. Ora oearovu voeao iava Grik oea tapo oiso ruipapaaveira ra riro tarairo vai rutu ou rovopaivora, oiraou piepaive rutu. 23 ✧ Vo osa vigei-a vao vigoa vo siposipo raga iava ora tavitavipavioveira Krai vaoro iava kopiia vo evao parikou-ia. Osiposipoa vao Jiu vo vovouaro vuri pie iraopaiveira, oa iava vo siposipopa reasipaiveira. Ora voeao Grik oea vare oiso purapaaveira, “Keevaita reo raga.” 24 Ari ita, oiraopavira rutu vo siposipo vituaro-a rera ro Krai. Ira Pauto vo goruaro rutu karekeraiveira. Ora oiso tapo vo uvare oiso toupaveira, Eva riroo rutu taraiara Pauto vaoro. Oiraopavira rutu uvare vo reo-a eva oa rutu vituaro-a rera ro-ia Krai voeapa voeao oearo Pauto oiso puraroepa, “Ragai voeao,” voea ousa vovevira ora rera iare, voeao raga iava ita voea Jiu ora oearu Grik ratau tou irara. 25 Ari ita, Pauto vo siposipoaro oare oearovu oiso purapaaveira, “Keevaita reo raga.” Uva va-a vao oa oearovu rutu oirara vo tarairoaro-ia putepaiveira vo rasio iava voea. Ora oiso osa oiso purapaaveira, “Raverave reo Pauto vo reoaro.” Uva va-a eva goru reo Pauto vo reoaro oa oirara vo reoroaro-ia uvuipapeira ra vara-ia putepaive vo reoro vo rasio iava.

26 Araoko irara oaa, visii vo touroarore ora rugorugoo pie iraopata, vo osa Pauto oisoa vo keeraaro uvu asavira toupata. Eake iava? Uvare viapau riro tarai irara-a visii voari tuariri. Ora viapau oiso gorupa reoro pura irara visii. Ora viapau oiso turarovira oisoa toupata oirara osireiario-ia. 27 ✧ Ari Pauto visii ora rerapa roporeva visii ouoro rera vo ruipaaro sirova utuoro vaore, oiso ra riro tarai irara-ia pute iraota. Ora oiso ra voeao-ia tapo pute iraota riro gorupa irara, oea visii raga ita vaisipaiveira, “Akukupapa irara.” Eake iava? Ari vaore oiso ra ora voea raga ora arii piepaave. 28 Ari ita, vara-a evara oara oiso vaisipaiveira akukupapara, Pauto oara roporeva vaore, oiso ra vara iavirava oaravu opesi pie ovoireve varao oara rei piepaiveira ora voea vo rugorugooaro raga iava varao vo rasio iava. 29 Eva-a oa vituaro oiso toupai, Viapau irai uvuiparoi ra irai raga vo Pauto osireiario-ia ora vaisiario rei piepareve oiso purapaoro, “Ragai vo taraiaro raga vao oa uvuipai.” 30 Viapau oiso uvuiparoi. Uvare Pautoa raga-a kataito ira visii rutu Krai Jisap tapo tavosireva. Ora vo uvare rera raga-a Pauto irai Krai oiso pierewa ra rera iavirava vigei vo tarairoaro uvuipae rutu. Osa iava eisi uvuiparoi ra vigeire oiso puraparo, “Visii torevoko vovou irara.” Oa iava uvuipaviei ra oiso rutu toupape, Vigei-a Pauto voeao rutu. Oa iava ora rera iare vigei ourevere rare. 31 ✧ Oire uva oisi-a eisi osa toupaveira oiraopavira rutu oa iava Tugoropa Vuku oiso purapapeira,

‘Vosa irai oiso ruipaparo ra ora irai raga ora vaisiario rei piepareve, ra viapau oisi uvuipape Ari vosa Turaro Krai raga vaisiario rei piepareve, oa raga-a eva oapa oisi torevokopai rutu eisi.’

## 2

*Pol Evao Parikou Iava Siposiporeva*

<sup>1</sup> Araoko irara oaa, vo osa rovoaira rutu visii tarai pie rovoava Pauto vo rearo-ia, uva viapau oiso voa vavagisi reoro vai-ia taraivira rutu visii tarai pieava. <sup>2</sup> ✧ Viapau. Ari ragai vo vovouaro raga iava-a vao oiso ra ovovoueru rutu veepea. Oisore ra Jisas Kraiss iava poeravira tavitavira, ourou ro vo kopiáaro vituaro iava tapo vo evao parikou-ia. <sup>3</sup> Vo osa raveraveraepa visii tapo toupaooro uriripaoro, <sup>4</sup> oa iava viapau oiso vearovira rutu visii siposipoava tarai pievira rutu. Viapau. Ari Pauto reraaro raga Tugoropato Uraurato ira goruvira ragai vo rearo goru piereva rutu va oirao pievira rutu karekeoro vao iavirava rera vo varivariaro. <sup>5</sup> ✧ Uva va-a eva visii vo vovouaro oiraopa vovou rutu vituaro, uvare viapau oiso oirara ruvara iava vo tarai iava-a voeao vo rasio iava. Viapau. Ari Pauto ruvara iava vo varivari iava-a vao.

*Tugoropato Uraurato Pauto Reraaro Vigei Vatepareveira Taraia*

<sup>6</sup> Oiraopavira rutu oiso osa oisoa riroa vatepaa taraia voeao oirao pie vovou irara, oea oisoa uvuipaave ra riroa rutu oupaive taraia. Uva viapau oiso vo rasio iava vo taraia. Ora tapo viapau oiso voeao ruvara iava turaro irara oea reipaaveira vo rasio-ia. Otaraia va opesiaveira ora gorua. <sup>7</sup> Viapau Easi Pauto vo taraiaro-a vao oa oisoa kosi piepaa. Vo taraio oa oisoa vatauvira toupave oirara vo rugoaro asavira. Vo taraio oa reesireva Pauto voari tuariri rovoa-ia, vo osa viapau orekerovu avu vai touva vaore oiso ra va iavirava rorupape rera tapo toupaooro vorerivira. <sup>8</sup> Ari ita, viapau rutu oiso irai ei turarotoa vai ira vo tarai-ia eva tarai rovoroepea. Vosa oisi va-ia taraiaeri, oire ra va iava viapau oiso Turaro tapaive vo evao parikou-ia, ro ira-a keraria vituaro. <sup>9</sup> ✧ Ari ita, Tugoropa Vuku oiso purapapeira, 'Vao oa viapau irai kekepareve, ora vao oa viapau irai uvupave, ora vao oare viapau irai rugorugoooro, uva va-a eva oa oiraopavira rutu karekepeera. Pauto oa ravaaveira voeao oea rerapa siraopaave.'

<sup>10</sup> ✧ Oiraopavira rutu va iava vao oa oisoa vatauvira rutu toupave Pauto oa poeravira karekereva rera reraaro iavirava Tugoropato Uraurato. Uvare Tugoropato Uraurato ira Pauto vo taraiaro-ia taraipaveira, vao oa kae pievira rutu toupaveira ora roko pievira rutu toupaveira. Oa-a eva oa iava rera raga uvuiparoi ra vigeipa vo tarai topa piepareve. Vo taraia oa sirova utuoro ora rera iare raiva puraveira vigeipa.

<sup>11</sup> ✧ Ari ita, oirato reraaro uraurato ira orekerovu rutu-ia taraipaveira varao oara oirato sapaoro-ia toupaveira. Oiso osa Pauto reraaro Tugoropato Uraurato ira orekerovu rutu-ia taraipaveira varao Pauto vo taraiaro iava vara. <sup>12</sup> Vo vovouo vo rasio iava oa-ia viapau uvuipaviei ra va-ia pitupape taraia oupasa. Viapau. Ari Tugoropato raga Uraurato ro Pauto ruvara iava ira ouepa. Eake iava? Uvare Pautoa raga rera arureva vigeipa varao iava vigei aviavi piepasa Pauto vo tauvaroaro vigeipa, vigeo Pautoa-pa siraopavioveira. <sup>13</sup> Uva oisi-a eisi osa ragavira iava igei viapau oarovupa siposipovioveira vo reoro iava oara oupavioveira voeao ruvara iava riro tarai irara vo rasio iava. Viapau. Ari oiso ragavira iava-a, uvare Tugoropato Uraurato igeipa reoreora vatepareveira varao oara iava uvuipaviei ra aviavi pievira oiraopara rutu iava siposipovioveira, varao Pauto varao voeao oea uvuipaai ra vara oupaive, vo osa Tugoropato Uraurato voea sopaura-ia toupave voa voea tauvapaoro.

✧ 2:2: Ga 6:14; 1 Ko 1:23 ✧ 2:5: 2 Ko 4:7, 6:7 ✧ 2:9: Ais 64:4, 65:17 ✧ 2:10: Mt 16:17; Ef 3:3, 5 ✧ 2:11: Pro 20:27; Jer 17:9

14 ✨ Ari ro ira viapau sopaaro-ia Tugoropato Uraurato toupaveve, ira-a eera viapau oiso uvuiparoi ra vo tauva oureve vao Tugoropato Uraurato vaaro. Vao iava rara viapau rera iava rugorugooara viapau aviavipape va iavirava. Oa vituaro iava oiso piepaiveira voeao-ia akukupapa irara. Eake iava? Uvare viapau oiso va kerisipaiveira vao Tugoropato Uraurato vo kovoaro. 15 Ari ita, vo osa ro ira iava sopaua-ia toupaveve Tugoropato Uraurato, ira uvuiparoi ra vearovira rutu orekerovu-ia taraipaoro vara kerikerisipareve oiso, “Vearo-a vao-ia, ari vuri-a vao-ia.” Ari rera-a eera ira-ia viapau irai uvuiparoi rera vo vovouaro rovirieireve. Eake iava? Vo rara eera ira-ia viapau Pauto vovouaro toupaveve, viapau uvuipa ra rera rovirieipareve ro ira-ia Tugoropato Uraurato toupaveveira. 16 Eva-a oa vituaro iava Tugoropa Vuku oiso purapapeira, ‘Irutoua vaiiei ira aviavipa vao-ia Turaro vo taraiaro? Ora oiso iroutoa vaiiei ro ira uvuiparoi ra Turaro tarai piereve?’ Vigei raga ita vao-ia vigoa vo rugorugooaro-ia Kraiso vo rugooaro toupaveveira. Evo rugoo iavirava uvuipavei ra orekerovu rutu kerikerisipape vara vearovira rovirieipaoro.

### 3

#### *Lotupa Irara-a Pautoa-pa Kovopa Irara*

1 ✨ Oiraopavira rutu araoko irara oaa. Vo osa voari tuariri visii tapo oisoa toupaa, uva oisoa viapau visii tapo ora reopara oiso osa oearovu tapo ora reopaveveira voeao oea-ia Tugoropato Uraurato toupaveveira. Ari ita, oisoa visii tapo ora reopara veu visivi raga oiso rutu osa vo kakaero veu kakaero. Uvare eisi toupaooro Kraiso sirova utupaoro viapau rutu oisoa uvuipata vearovira roroio pievira taraipasa vo ro-ia vao Pautoa iava. 2 ✨ Uva oisoa visii vatepaa gorotua aioa, vao oa-ia viapau sopea vai, uvare viapau oiso rirovira rirotaepa, oiso ra va iava varao goru aiaro aiopata. Uva oiraopavira rutu-a uvare touvira rutu visii epao veu visivi raga. Oa iava viapau uvuipatai ra goru aio vai aiota. 3 Eake iava? Uvare oisoa touvira rutu vo vovouro purapata vo rasio iava vara. Vao-ia osa oearovu varaaro orekerovu riiriipataveira. Ora vo vovouro purapataveira kaureo vovouro. Oara-a evara oara-ia vo vovouro varao kareke piepataveira vo rasio iava. Oiraopavira rutu uvare oira turiro raga vo vovouoro-a varao oara pura vasipataveira. 4 Vosa irai visii iava oiso puraparo, “Pol sirova utuparai.” Osa irai oiso puraro, “Ari Apolos sirova utuparai.” Oire uva apeisi-a? E vo rasio iava viapau vo pitupitu-a eva, eke? Iu.

5 Aue iava uvare irouto-a rera ro-ia Apolos? Ora irouto-a ro Pol? E apeisi-a? Turarotoarei-a vegei? Viapau. Easi kovopatoarei raga vegei Pautoa-pa, vegoa rutu oisoa tauvaa vatepave visii vo vovouaro oirao piea tore piepaoro. Ari ita, vigei rutu katakataivira vo kovo purapai oa vatepareveira vigeipa Turaro oisore ra va purape. 6 Oiso-ia, takura pauraepa rasia-ia, vo osa Apolos oisoa vo kovo aruopaveve vo kovo viuopaooro. Ovusa Pautoa raga-a ira vara evara kovaa kae piereva rutu. 7 Ari ro ira takura pauraepa, ora ro ira oisoa vo kovo aruopaveve, uva evaiterei rutu akukuvira kovo ragasiva, vo osa Pautoa raga kataito ira vara riro pieoro rutu vo kovo aruopaveve, oa iava vearovira kovapea. 8 ✨ Uva iroutoa vaiiei ora vaiterei raga iava irai ro ira oisoa ora vaiterei raga iava irai-ia putepareve. Viapau. Asi vaeavira rutu Pauto vaiterei vorireverea oiso, Ro ira oisoa takura pauparo, ari ro ira oisoa vo kovo viuopaveve. 9 Eake iava? Uvare igei oisoa tavosi visivi rutu kovopai Pautoa-pa. Uva eake-a vao oa vituaro iava igei



roo piesa auepatai? Ari ita, visii-a vao visiigoa oiso toupata osa rasia vao oa-ia aio kovo purapa piroveira vao Pauto vo rasiaro.

*Ro Kovopato Lotupa Irara Tokipareveira Kasivarivira Oiso Osa Kepa Paupato Kovopareve*

Uva oavu-a vao-ia ovoovoa uvare visii oiso toupataveira, visii-a Pauto vo kepaaro. <sup>10</sup> Pauto oisoa ragai tauvapareve vo osa kovopaa kasivarivira rutu, oiso osa ro kepa paupato ira kasivarivira kovopareve kepa paupaoro. Oire uva torevokovira rutu tuutara tovo rovoava. Oa iava ro kepa paupato vara ivara-ia vo kepao purareva. Uva visii tapo ita oisi otuutarovu ivara-ia kepa paupataveira. Osa iava eisi uvuipatai ra ora vatatopopata vaopa, teapi vurivira vo kepa pauta. <sup>11</sup> ✧ Oa-a vao vituaro oiso toupaveira uvare Pauto-a ro ira Jisas Kraiss reesireva oiso, Eera ira kukuuvu tuuta. Otuita vo rikuaro iare viapau uvuipai otuutavu raga ra tavarive. <sup>12</sup> Uva oisi-a oiso osa iava oearovu goru tuutaro-ia kepa paupaaveira oiso-ia, sikoi tuuta-a vao-ia, ari atogo tuuta-a vao-ia, ari torea tuuta-a vao-ia. Vo osa oevu rivutepa tuutaro-ia kepa paupaaveira oiso osa varao-ia, kusiivio-a vao, ari revasioki tuuta-a vao-ia, ari kovuruko tuuta-a vao-ia. <sup>13</sup> ✧ Oiraopavira rutu voea rutu vo kovoroaro taru viaevira karekeperea vo vokio-ia ovokia iava vo vuuta-ia vovevira karekeroverea Kraiss. Uvare vo vokia-a eva oa-ia eto kasiva pouro viroverea. Vo kasio eto kasi oa vo kepao vo goruaro oiraopavira rutu viaevira karekeverea. <sup>14</sup> ✧ Vosa ro ira oisi oiso vo kepa paureve vo tuutaro-ia varao goru tuutaro, oire uva vo kepa-a eva oa viapau oiso rovaperea. Oire ra va-ia riroa rutu voria oureve rera ro ira vo kepaaro-a. <sup>15</sup> ✧ Ari vosa vo kepao oa rutu rovaperea opesi ovoiooro, oire ra rera ro ira vo kepa paureve, ira iava vara rutu tapo kovoara opesi ovoiperea. Vo osa rera oiso toupaveira vo ro ira vovevira kae pieiva rera sitaoro tuitui kasi iava, vo osa rova rovoaroepa. Eva-a oa vituaro iava uvui iraopatai ra vearo kovo rutu purapata vo Pauto vo ruipaaro-ia vearo kovo purapasa.

*Visii Rutu Vao Oirara Visiigoa Oiso Toupataveira Osa Tugoropa Kepaaro Pauto*

<sup>16</sup> ✧ E viapau vai pasi taraipataveira ora visii-ia vearovira, uvare oiso toupata, Tugoropa Kepa Tempel Pauto vaoro? Vao oa-ia vokiara rutu-ia Tugoropato Uraurato toupaveira? <sup>17</sup> Uva oisi-a oiso osa ragavira ro oirato ira Pauto vo kepaaro Tugoropa Kepa vuri piepareve, ira raga ita opesi pie ovoireverea Pauto. Eake iava? Uvare Pauto vo kepaaro rutu-a Tugoropa Kepa. Uva visii raga ita eva oiso toupata osa kepa.

*Viapau Rutu Uvuipaviei Ra Oiratoa Vai Vaisiario Kae Piepape*

<sup>18</sup> ✧ Opeita ora visii raga ora keakea ragapata oiso-ia, vosa irai visii iavapatoa vai ora iraire oiso rugorugoparo oesai siituepaoro, Akoea, riro taraito-a ragai. Oire uva uvui iraoparoi ra rorukovira toupaveve vo oirara rutu osireiario-ia. Osa-a eisi osa iava uvuiparoi ra oiraopavira rutu oiso toupaveve, Taraitoa rutu vo Pauto-ia. <sup>19</sup> ✧ Vao vituaro iava oiso-ia vo osa ro ira reesipaive oirara oiso, Riro taraitoa rutu ro-ia, uva rera raga ita vaaruu vovouto vo Pauto vo reesiaro-ia. Ari ita, Tugoropa Vuku oiso purapapeira oisi voea iava eisi, 'Voeao riro tarai irara Pauto oea eisi piepareveira oiso ra ora voea vo taraiaro raga-ia utupaoro vo taraiio vo rasio iava oa-ia ora piro piepaaveira.'

✧ **3:11:** Ais 28:6; Ef 2:20 ✧ **3:13:** 1 Ko 4:5; 2 Te 1:7-10 ✧ **3:14:** 1 Ko 4:5; 9:17 ✧ **3:15:** Jop 23:10 ✧ **3:16:** 1 Ko 6:19; 2 Ko 6:16 ✧ **3:18:** Ais 5:21; 1 Ko 8:2 ✧ **3:19:** Jop 5:13; 1 Ko 1:20

20 ✨ Ari oreovu tapo-a vao vao vo Tugoropa Vuku-ia oa oiso purapapeira, 'Ro Turaro ira riro taraito vo rugooaro-ia taraiparoveira rutu, vo tarai rera-ia eveipaoro rutu. Oa iava oiso puraparoveira, Akukua raga viapa.'

21 Osa iava viapau irai visii iava uvuiparoveira oiso ra oiratoa vai raga vaisiario kae piepareve oiso purapaoro, "Ira-a ro-ia vearo tarai toupaveira." Vao iava uvare orekerovu rutu oara oisi toupaveira visii varaaro 22 oiso-ia, Pol-a ro-ia, ari Apolos-a ro, ari Pita ro-ia, uva igei rutu-a vao visii voeaaro. Igoa oiso toupaveira, Visii tauvapa irara. Ora orekerovu rutu varao vo rasio iava, ora aue tootoa, ora kopiia, ora vo vuutaro oara varao vo vokia-ia, ora vo vuutarori rutu voari utupaua. Oara rutu evara visii tauvapara. 23 ✨ Ari ita, oara rutu toupai, Visii tauvapara. Osa ragavira ita visii toupatavoi oiso, Kraiss voeaaro visii. Ovusa Kraiss oiso toupae, Pauto Oviitoaaro.

## 4

### *Turaro Raga Taraiparoveira Rera Voeaaro Kovopa Irara Rovirieipaoro*

1 ✨ Uva visii vao uvui irapatai ra igeire oiso rugoo irapata, Igei-a Kraiss kovopa iraraaro. Uvare igei vo kovoaro-a vao oa oiso toupavoi, Pauto vo rearo tokipa irara va kosi piepaoro vao vataua. 2 Ari ita, oiso ragavira tarapatai tapo, ro ira reesireve rera reraaro turaroto vaore, oiso ra rera varaaro orekerovu tokipareve. Ra va iava goruvira rutu orekerovu rutu vearovira toki irapareve varao rera reraaro turaroto varaaro. 3-4 ✨ Uva oisi-a eisi osa ragavira vigei Turaroaro ragai vo kovoaro rovirieireverea taru. Viapau oiso visii-ia rugorugoparai rutu oiso osa ragai vo kovoaro rovirieipataveira. Uvare oiso taraparai visii-ia, Viapau uvuipatai ra oisi orovirieii purata visii vao ora irai. Ora ragai ita ragoa viapau uvuiparai ra ora ragai ragare oiso purapara, "Viapau vuria vai ei vo ragai-ia." Vao vituaro iava uvare Turaro vo rovirieiaro-a oa purareverea. 5 ✨ Uva oisi ragavira ita viapau uvuipatai ra oearovu kovopa irara vo kovoroaro vagevagepavira rovirieipata. Uvare oiraopa rovirieii rutu epao tovira, oa karekeperea vo osa Turaro vorevira voreroverea. Oire uva vo vuuta-a eva oa-ia vo vovouro rutu vatauara poeravira karekereverea, oara oearovupa vataupaveira sopaura oaive sovara-ia. Oa iava vara iavirava voea vo voriaro vatereverea Pauto, vo rara vearo kovo purapave. Oa iava voea vaisiario rei pierereverea. Ari vosa akaipa kovo, oire ra viapau oiso voea rei vaisi pierereve.

### *Voeao Korin Vata Oea Ora Vaisiario Kae Pie Iraopaiva*

6 Araoko irara oaa, vo reo purapaa ora vegei iava ora Apolos visii vo rugorugooaro aviavi pieoro. Uva vo ovoovoro-a varao-ia oara puraavoi vaore, oiso ra vara iava vo reo rutu vituaro-ia taraita oa oiso purapai, "Visii uvui irapatai ra vearo reo rutu sirova utupata." Ari ita, uva viapau irai visii iava uvuiparoi ra iravu vaisiario rei piepaoro iravu vaisiario akaipa piepareve. 7 Uva iroutoa vai rutu-a ro ira eisi visii piereva, oiso ra oearovu rutu vo tarairoaro-ia pute irapata? E ora visii raga, eke? Viapau. Asi Pautoa raga ira visiipa orekerovu rutu vatereva. Uva apeisi-a? E uvuipatai ra visii raga vaisiario oavisii rei piepata varao-ia vatevateara? Viapau rutu.

8 ✨ Oiraopavira rutu vo vokia-ia orekerovu rutu toupavoi visii vo ruiparoaro uvui pievira rutu uvui piepaoro, uvare riroara rutu orekerovu rutu toupataveira. Vo osa igei, viapau oisi. Uva oiso vovouparai ra oiraopavira rutu oisi turarovira toupata, ra ragai tapo oisi visii tapo toupaa turarovira. 9 Oa iava oiso rugooperai, Pauto osa oiso igei aposel irara

✨ 3:20: Sam 94:11 ✨ 3:23: 1 Ko 15:23; 2 Ko 10:7 ✨ 4:1: 2 Ko 6:4; 1 Ko 9:17 ✨ 4:3-4: Ro 2:13 ✨ 4:5: Ro 2:1, 29 ✨ 4:8: Re 3:17-18

piereva oiso ra oearovu sirova utupaio igei vao-ia akukupapa irara. Oiso rutu osa voearo oearovu oirara oearoa-ia upo reesiro toupaveira, oisore ra va-ia ora voea-ia ariia ouive oirara rutu osireiaro-ia ora purapurapa irara ensel. <sup>10</sup> ✧ Oiraopavira rutu uvare oiso rutu toupaveira, Kokoropa irara vo Krais vo kovoaro purapaoro, vo osa visii vai-a riro tarai irara rutu, eke? Ari igeivi-a raverave vovou irara rutu, ari visii-a riro goru irara rutu, raa? Vo uvare oearovu igei oiso vaisipaoro igei tovipaveira, Akukupapa irara visii raga vaisiario kae piepaoro. <sup>11</sup> Uva vaviopavira raga ogoepaiei, ora viapau uukoa vaiei igeipa ukaiosa. Ora varao tapo varoara igei varaaro karikaripara, ovusa oearovu igei ragipaveira. Virivira raga uvarovu rutu vokapaveira. <sup>12</sup> ✧ Ari ita, igeivi kasivarivira rutu kovopaveira ora igei vo vavaeroaro iava orekerovu voripasa ora igeipa. Vo ovusa oearovu igeivi takaupave, ovusa voeare vearo vovoupaiveira. Ari ita, vosa oea igei vuri pie ruipaave ra viapau oiso ra igei vo kovoaro kavuoro va arova raveraveio. <sup>13</sup> Igei tovipaveira ovusa voea vo reoroaro pukopaio voeava kave visivi raga reoreopaoro. Oiraopavira rutu uvare igeivi oiso rutu toupaveira osa kaie kouro, oiso rutu osa kaie tagatagaaro, varao oara viki ragapaveira akukupapa.

### *Voeao Korin-pa Irara Uvu Iraopaai Ra Pol Vo Pitupituario Vioe Iraopave*

<sup>14</sup> Oire uva vo reo-a vao-ia oa rigatoavoi visii pa uva viapau oiso visii arii piesa-a. Viapau. Ari visii taraisa-a, uvare oiso toupatavoi, Visii-a ita ragai voeaaro kakae vure. <sup>15</sup> ✧ Riro irara rutu epao oea visii tarai pieive Krais vo taraiaro iava. Ari viapau oiso riro irara vai rutu epao visii aite irara vaiaro. Viapau. Ari ragai raga kataito. Vao iava uvare oisora visii siposipopaa Vearo Siposipo iava vaore, oiso ra va iava Krais oirao piepata rutu. <sup>16</sup> ✧ Uva goruvira rutu visii tavi iraopaavoi, oiso ra ragai vo pitupituario vioe iraopata. <sup>17</sup> Oa vituario iava Timoti arupaavoi rara visii iare. Eera ita iravu ragai oviitoaaro Krais vo kovoaro-ia. Ira viapau oiso raveraveparoveira ragai tauvapaoro. Ira visii tauvaparevere rara. Ra va iava ragai vo pitupituroarore rugoopata, opitupituroa purapaaveira Airepa Tootoo-ia tupaoro vao oa ragaipa vatepareveira Krais. Vo pitupituro rutu oara iava lotupa irara rutu siposipopaoro vokapaaveira voraro rutu.

<sup>18</sup> Ari ita, oearovu ora visii raga iava voea vaisiario rei piepaveira keapaoro oiso, Viapau vorevira Pol igei iare uriorovere. <sup>19</sup> Ari vosa Turaro oiso puraro, “Vearopai,” oa iava uvuiparai ra rera vo ruipaoro sirova uriora visii iare tou visivi rara. Ra voa visii tapo tupaoro voea siituepa oea vaisiario rei piepaveira. Ra va iava ora ragaipa oiraopavira rutu taraira vo kovo-ia eva oisi oiso, E vearoa-a, eke kiuvua raga vao voea vo kovoaro iava. <sup>20</sup> ✧ Aue iava uvare Pauto vo Saraaro viapau oiso reo turi vai raga karekepaveira. Viapau. Ari rera vo Saraaro riroa rutu gorua kareke piepaveira. <sup>21</sup> Oire uva aa vao vaio-a oapa ruipapatai, raga rao vaiva pasi urioravere visii torevokosa? Eke vereopa vovouva urioravere visii siraooro? Oire ora torevokota. Osa iava vearo vovou ragava urioravere visii iare.

## 5

### *Vao Iava Ora Oupa Vo Pitupituario Vuri Piepave Vo Korin-ia*

<sup>1</sup> ✧ Tavitaviara visii iava ragai iare kare pirora. Vao iava osa oearovu visii iava otopa pitupitu purapaveira. Uva vara-a evara vuri pitupituro

rutu oara opitupiturovu rutu-ia putepaiveira vo vuriro oara purapaiveira voeao oirao pie vovou asa irara. Oiraopavira rutu uvare va-a eva vuri pitupitu rutu, osa ro iravu oirato visii iava ira aiteto vatuavaaro oureva. 2 ✧ Oire vosa rera vaaro-ia vuri vovou taraipata, ra apeisi ragavira iava ora visii raga ora vaisiario kae piepata, raa? Vearopai vosa vuria vo tavakaarova toupaooro rera verata ora visii iava rera eera kooupato. 3 Uva ragai vo rugorugoaro raga-ia rera rovirieia vora eera oirato ira vuri vovouro rutu purapaveira vo rovirieio-ia vigei reraaro Turaro vaisiario sovara-ia Jisas Kraiis. Ari ita, visiipa tauaivira rutu toupavoi vo osa ragai iava sopaua visii-ia toupavoi. 4 Osa-a eisi osa ragavira iava vigei rutu uvuipaviei ra katai vovou rutu sirova ora takuvupavio. Oa iava uvuipaviei ra rera ro ira-ia vuri vovou toupave ra ro verape vo goruo iavirava vigei reraaro Turaro Jisas Kraiis vaaro. 5 ✧ Ra oisi pieoro rera tovepe Seten vavaeoro-ia. Oire voa rera iava varaua vo ruipaoro opesipe. Oiso ra va iava ora rera vaaro vuria eveireve soporeoro. Osa iava pasi uvuiparoi Turaro ra rera iava uraurato oureve rera orirusa vo vuuta vo vokiario-ia Turaro vaaro.

### *Korin Lotu Uvuipaa Ra Iravu Veraive Vurito*

6 ✧ Viapau oiso torevokopai, ra ora visii raga vaisiario kae piepaoro vagupata. Vao ovoovo reo oiso purapai, “Gareavi raga yis uvuipai ra plaua rutu kae pieve va rutu.” 7 ✧ Oire uva va-a eva vagu vovou oa oisi eisi toupai oiso osa yis. Oa-ia eva yis uvui iraopatai ra va verata. Ra va iava oiso rutu touta osa airepa plaua vearoa vao oa-ia viapau yisa vai toupai. Ari visii-ia taraiparai oiso-ia, Vearo vovou irara-a visii. Oire uva vo ovoovo vao-ia purapaavoi va iava vao yis, uvare Tagausapa Vurei Pasovaei oa vatatopoei. Uvare Kraiis-a ro ira oiso tourevoi osa oavu sipsip kakae ro ira-ia koruoua pura piropa, oiso ra Kraiis iavirava uvuipaviei ra oiso toupape, Roroio vovou irara vigei. 8 Osa iava uvuipaviei ra Pasova purape rorupaoro rutu. Ari viapau oiso vao-ia bret vo vurei purape oa-ia tuariripava toupave yis o iria vao reesipaevoi kaureo vovou ora vao vagu vovou. Viapau. Uva vao-ia uvuipaviei ra va purape bretea oa-ia viapau yisa vai toupave. Obrete-a eva oa oiso toupai, Sisigarueua rutu sopaua ora oiraopa.

9 Voari tuaririvi uva visiipa oavu pasia rigatoava vao oa-ia oiso ragai visii taviava, “Opeita voeoro tapo ora takuvupata oearoa vuri vovouro purapaiveira varao otopa pitupituro.” 10 Uva vo rigatoa-a eva ragai vaaro viapau oiso evoea otopa irara vaisiava va-ia voeao oea viapau oirao piepaive. Uvare voea raga ita opitupiturovu rutu vuricara purapaiveira oiso vara, otopa-a vao-ia, ari iiruko vovou-a vao-ia, ora kavirupa vovou, ora vuurapa vovou-a vao-ia kuuvu irarapa pau irara oa purapaiveira. Vosa voeare visii taviavori oiso, “Voea vatavatapata,” ra ovure oisi avapata voea vatavatapaoro? Uvai ragare vo rasio iava? 11 ✧ Viapau. Ari ragai vo pasia vituaro rutu oiso toupavoi, Opeita ro tapo ora takuvupata ira visii tavipareve ora rera iava oiso, “Ragai-a visii araokotoaro vo Jisas vaisiario sovara-ia.” Vo osa tovira otopa pitupitu purapaveira ora vao iirukopa. Ora vao osa kuuvuvira vuurapa vaisi purapaveira kuuvu irarapa pau irara. Ora oiso tapo osa oearovu tovipaveira. Ora spakparoveira kokoropaoro. Ora orekerovu ratarataapa vovouro purapaveira. Uva ita, opeita rera tapo paupaoro aiopata. 12-13 ✧ Oiraopavira viapau oiso ragai vaaro-a vo voeao rovirieipasa oea lotupa irarapa ratauvira toupave oirao pie asa irara. Viapau. Ari auearo-a raga Pauto ira voea rovirieireveera. Uva visii oiso akepaavoi, “E visii auearo-a lotupa irara vo pitupituroaro

✧ 5:2: 1 Ko 4:18; 2 Ko 7:7 ✧ 5:5: 1 Ti 1:20 ✧ 5:6: Je 4:16; Ga 5:9 ✧ 5:7: 1 Pi 1:19 ✧ 5:11: 2 Te 3:6 ✧ 5:12-13: Diu 13:5, 21:21

rovirieipasa? Iu. Uvare Tugoropa Vuku-ia oiso purapai, ‘Ro ira-ia vuri vovou toupave, uva uvui irapatai ra rera verata ora visii iava.’

## 6

### *Lotupatoa Rutu Ira Viapau Uvuiparoi Ra Rera Araokotoaaro Iava Gasireve*

1 ✧ Ari ovurivu-a vao-ia oa visii-ia toupaveira, uvare ora visii iava oearovivu iava gasipataveira vore gavman. Oa iava voeao ruvara-ia voea tovopataveira oea viapau Jisas oirao piepaiveira. Uva viapau oiso torevokopai eisi. Uvare eakere vo vuriro voea varaaro viapau opesi piepataveira vara-ia ora reopaoro, uvare visii raga ita Pauto voeaaro. 2 ✧ E viapau taraipataveira uvare voeao Pauto voeaaro oea vo rasio rutupa reipaaverea rutu vo orekerovu rutu rovirieipaoro? Uva visii raga ita Pauto voeaaro visiigoa eisi pietaverea vo rasio-ia voari utupaua. Oire uva apeisia? E viapau uvuipatai vo vokio-ia ra gareparavi rovirieipata vo ora visii vo taereroaro raga-ia, raa? 3 Tarai irapataveira vao iava osa enselpa irara vo vovouaro rovirieipaperea rara vo voeapa reipaoro? Oire uva uvuipaviei ra oisi oiraopavira rutu vuri vovouro rovirieipape varaaro voeaaro vo rasio-ia vo vokio. 4 Vosa oavu vuria visii-ia pou piro, uva apeisia? E uvuipatai ra voeao oirao pie vovou asa irara tavita, ra visii tauvaive opitupiturovu rovirieipasa, raa? 5 Ae, viapau! Easi eisi vuripai. Uvui irapatai iravure taraata ora visii raga iava riro taraito eera, ira uvuiparoi ra visii varaaro rovirieireve vuri vovouro, oiso osa vao oa katai araorei rutu tokove vaitereo oirao pie vovoutoari. 6 ✧ Oiraopavira rutu vao-ia vuria oiso-ia, vo osa iravu riro oirao pie vovouto iravu iava gasireve oirao pie vovouto, ra va iava ro vaiterei vo vuriaro rovirieireve oirao pie asa vovouto.

7 Ari ita, visii-a eva visiigoa eisi piepataveira ora visii iava oearovivu iava gasipaoro. Uva oisi-a eisi osa piepaoro visii raga ora kove piepataveira. Eake iava? Vosa ro iravu oirao pie vovouto ira ora rera vaaro vuria rovoreve visii vuri pieoro, oa-a eva oa-ia uvuipatai ra rera eakata rerare oiso puraoro, “Oire rerape.” Osa eisi torevokopai. 8 Uvare visii raga ita visiigoa oearovivu sirao pie ragapataveira voea varaaro ou ragapaoro. Iu, uvare ora visii voeaaro-a araoko irara oavisii oea eisi piepataveira.

9 ✧ Oiraopavira vao-ia oiso taraipataveira, Voeao oea vuri vovouro purapaiveira oea viapau oiso koataverea Pauto vo Saraaro iare. Ra viapau oiso ora keakeapata uvare taraipatai oiso, Viapau oiso voeao koataaverea oea otopa vovouro purapaiveira, ora voeao oea tauopaaveira voeopa kuvu irara pau irara, ora voeao oearo oearovuva oirara otopaave ora riakora airoroa oriakorovuva otopaave, 10 ora voeao kavirupa irara, ora voeao iiruko vovou irara, ora voeao vokiara rutu-ia spakpaaveira kokoropaoro, ora voeao oea oearovivu tovipaiveira. Oiraopavira rutu viapau irai voea iava koataroverea Pauto vo Saraaro iare. 11 Uva oearovu epao oea visii iava oisi vo pitupituro purapaivora voari rovvira. Vara-a evara isivaaro iava visii rutu iava sopaura oavisii sisigarueera rutu. Oa-a vao oa iava visii reesireva oiso, Visii ita Pauto voeaaro. Oa iava torevoko vovouvira rutu toupatavoi vo Pauto osireiario-ia ro raga vaisiario iavirava Turaro Jisas Krai, ora tapo vo kovo iavirava Tugoropato Uraurato vo kovoaro Pauto reraaro.

### *Uvuipaviei Ra Pauto Vaisiario Kae Piepape Vova Varaua Oavi-ia*

12 ✨ Oearovu visii iava oirao pie vovou irara oiso purapaaveira, “Uvuiparai ra opitupiturovu rutu purapaa.” O ita osa eisi oiraopai. Uva viapau oiso opitupiturovu rutu visii tauvapaaveira. Ari ita, ragai tapo uvuiparai ra oiso purapara, “Uvuiparai ra opitupiturovu purapaa.” Ari viapau uvuiparai ra ora ragai iava vasea. Uvare apeisi ragavira uvuiparai vovio utupaua ra oiso vo pitupituro eakasa? 13 ✨ Oearovu epao visii iava oea oiso puraaveira, “Aioa toupavoi vaore kovuto vuku piesa. Ora kovuto toupaveira aio oupasa.” Oiraopavira rutu. Ari ita, Pauto evara rutu aioara ora kovuara opesi piererevea. Vao ovoovo reo vearovira vigei soporepaivoi oiso purapaoro, Oiratoa iava varaua vaore viapau oiso toupai, ra varaua vo ruiparoo-ia vao-ia otopa pitupitu vukupape. Opitupitu vaoro viapau oiso ra akukuvira opesipe oiso osa aioa. Viapau. Ari varaua-a Turaro vo kovooaro purapaua. Vo osa rera-a Turaro ira vigei iava tootoora oavi vuku piepareveira vigei tauvapaoro. 14 ✨ Pauto ira Turaro iava varaua kopii tapi iava vorevira tore piereva. Oiso osa ragavira vigei tore piererevea voari utupaua vo goru raga iavirava eva rera vaoro.

15 Ora visii iava varaura-ia taraipatai ourarora oiso rutu toupaveira, Jisava iava vavaeara, ora kokotoara, ora orekerovu rutu. Oire uva oisi-a eisi osa taraipaoro, E ragai uvuiparai ra Kraisa varauaaro iava ovarui oua pasi, ra va oiso piea ovaru vao otopa? Easi viapau rutu eisi torevokopai. 16 ✨ Esa pasi viapau taraipataveira oiso, Vosa iravu oirato iriavuva otopava ora tavosiuro o-ia iria vuri pitupitu purapaaveira, ra oisi iava kataiua varaua purasi ora vaiterei-ia? Ari ita, Tugoropa Vuku oiso purapai roroiiovira rutu, ‘Oirato ora riakova aiterea uvuipasi ra kataiua varaua purasi ora vaiterei-ia.’ 17 Ari ro ira Turaro-ia ora tavosiuro rutu ro Turaro ira roroiiovira toupaveira. Oire ra katai vovou purareve rera tapo oisi eisi toupaooro.

18 Vao otopa pitupitu veripata vaopa, vosa irai oai vuri pitupitu vai purareve oearoi-ia, oa-ia eva viapau ora rera iava varaua vuri piereve. Ari vosa ro ira otopa pitupitu purareve, ira-a eera ira ora rera iava varauaaro vuri pierivoi rutu. 19 ✨ E viapau vao-ia taraipataveira pasi oiso-ia, Visii iava varaura-a Tugoropa Kepa Tempel, Pauto vo kepaaro, vo uva toupaveira Tugoropato Uraurato ro ira vatereva Pauto visiipa. Oa-a eva vituaro iava visii-a Pauto voeaaro. Viapau oiso irai voeaaro-a visii. Ari ita, viapau oiso visii voeaaro-a visii, ra akukupavira ora visii vo ruiparoooro sirova utu ragapata. 20 Uvare Pautoa raga ira visii vorireva ora rera iare vo Oviito Kraisa revasiaro iavirava. Oa iava uvui iraoptai ra ora visii iava vearovira rutu varauraro oavisii rutu tokipata torevoko vovou raga purapaoro. Osa iava uvuipaai ra oearovu Pauto vaisiara kae piepaive rara visii vo pitupituroaro siituepaoro.

## 7

### *Ora Oupa Pitupitu Iava*

1 Vaviopavira visii vo akeroaro pukopaa varao oara sipotavora ragaipa pasia-ia. Oiso-ia rovopa vao-ia. Viapau oiso oavu avu vai vo osa viapau oirato riakova oureve. 2 Ari vao raga uvare rirovira rutu otopa pitupitu toupaveira visii vo uruiaro-ia. Eva-a oa vituaro uvuipa ra oirato ora rerapa torevokovira riakovaaro oureve. Ora riakova tapo uvuipaai ra ora oirapa torevokovira oiratoaaro rutu oueve reo goru sirova utupaoro. 3 ✨ Oire vii vatuaato viapau uvuipauei ra ora vii iava varaua oara vairupari vo vatuaava oarapa. Ora vii riakova viapau oiso uvuipauei ra ora vii iava

✨ 6:12: 1 Ko 10:23 ✨ 6:13: Mt 15:17; Ef 5:23 ✨ 6:14: Ro 6:5, 8, 8:11 ✨ 6:16: Jen 2:4; Mt 19:5 ✨ 6:19: Jo 2:21; Ro 14:7-8 ✨ 7:3: 1 Pi 3:7

varaua oara vairupari rerapa, vo osa vatuato oara vii iava vouava uusi ruipaparo. <sup>4</sup> Viapau oiso ra vatuava reipao ora oira iava varaua tokipaoro. Viapau. Ari uvui iraopaori ra vatuatoaaro vo ruipaaro sirova utupao. Osa raga ita toupai, viapau oiso ra uvuiparoi vatuato ra ora rei pieparo. Viapau. Ari rera ita uvui iraoparoi ra vatuavaaro vo ruipaaro sirova utuparo. <sup>5</sup> ✧ Opeita ora vairupasi ora veipa. Ari ita, vearopai vo osa gare vuutavi ou rovopasi variripasa katai rugoo raga-ia. Uva vo vuuta-a eva oa isivaaro iava uvuipasiei ra ora veiva uusisi. Teapi Seten kokarapato vei-ia kokararo vuri pitupitu purasa, ra va-ia kovesi, uvare viapau uvuipatai ra goruvira va-ia vao otopa vovou ora airerei iraopata, pasi. <sup>6</sup> Vo reo-a eva ragai vaoro oa-ia visiire airereivira reoparai. Viapau oiso reo goru vai purapaavoivi visiire. <sup>7</sup> Uvare ragai vo vovouaro oiso toupaiivoi, vo osa oirara rutu oisi raga oiso toupavevise raga. Ari ita, oiso taraiparai, Pauto katakataivira oirara rutu vatevava vatevateara vaore, oiso ra oiso piepaive iravu ora rera vo pitupituaro purapareve, ovusa iravu osivu raga ora rera vo pitupituaro purapareve rera raga vo vatevatearo iava.

<sup>8</sup> Oire oreovu-a vao-ia visiipa voveao oirara, ora voveao raree irara ora vaioro raree riako, visiigoa viapau vatua irara vai ora viapau vatua riakoro vai oavisii. Vearo iraopai vosa oisi raga toupata osa ragai riako oa asavira. <sup>9</sup> ✧ Ari vosa viapau uvuipata oiso ra visii vo ruiparoaro rukupata, oa-a eva vituaro iava uvuipatai ra ora oupata. Oire vo osa ora oupavira tupaoro viapau oiso visii vuri piepaive orugoorovu avu vai vara varaura oaraiaoro.

<sup>10</sup> ✧ Uva vaviopavira voveao ora oupa irara taraipaavoivi. Oa iava goruvira rutu oiso purapari. Ari viapau oiso ragai vaoro-a reo goru. Ari Turaro raga oa-ia oiso purapari, “O riakova viapau uvuiparoi ra oira vatuatoaaro kavueve. <sup>11</sup> Ari vosa rera kavu ragaevise vatuato, ra va iava vorevira ita uvui iraopaori ra rera agiagieve, eke apeisi touveve, oira raga tou ragapaveve. Uvare viapau uvuiparoi ita ra vorevira irai oueve. Osa tapo ita oiratoapa toupai. Ira tapo ita viapau uvuiparoi ra ora oupa pitupitu putereve vatuava vaiaro kavuoro.

<sup>12</sup> Oire oreovu-a vao-ia oearovupa visii iava. Viapau oiso Turaro vo reoro-a. Ari ragai raga vo reoro-a oa oiso purapai, Vosa irai oiratoa vai riro oirao pie vovouo riakova vai oureve, o iria viapau Jisas oirao piepaveve, oire uva oisi eisi viapau oirao piepaoro uvuiparoi ra touvira toupaveve ruvara-ia oira vo ruipaaro sirova utupaoro. Oa-a eva vituaro iava viapau rutu uvuiparoi vatuato oiso ra oira kavureve. <sup>13</sup> Osa o riakova riro oirao pie vovoua irai oirato oueve, ro ira viapau Jisas oirao piepareve. Ra oiso puraro, “Vearopai osa raga toupavevare.” Osa iava viapau rutu uvuiparoi oiso ra rera kavueve. <sup>14</sup> Eake iava? Uvare vatuato viapau oirao piea vai. Oire ra Pauto riakova raga vo vovouaro oirao piea sisiropaoro vaiereve vaoro ora oua reesipareve oiso, Vearoa torevokoa. Ari vosa riakova ita oisi oira oirao pie vovou asava, oire ra Pautoa raga ita oirato vo vovouaro oirao piea sisiropaoro vaiereve vaoro ora oua reesipareve oiso purapaoro, “Vearoa torevokoa.” Vosa viapau Pauto oisi eisi puraroeri, oire ra va iava viapau oiso vearovira torevokovira ovii kakaero vai purapasi. Ari vo osa oisi raga eisi, vaiereve iava torevokovira ovii irara karekapaave vo Pauto osirearo-ia. <sup>15</sup> Ari vosa rera ro ira viapau Jisas oirao piepareve ora rera vatuavaaro kavu ruipaparo o ira Jisas oirao piepaveve, uva oisi vearopai, ra oisi rerape. Oire uva oisi-a eisi osa sirovava viapau reo goru vaierei vao oa iava viapau uvuiparoi ra vatuato vo vovouaro sirova utupao. Vao vituaro iava uvare Pauto ora rera vovearo tavireva oiso, “Kave vovou raga

purapata orekerovu rutu-ia.” <sup>16</sup> ✧ Aue iava uvare vosa kave vovou raga purapari vii riakova riro oirao pieva, oa iava pasi uvuipauēi ra vii reraaro vatuaato tauvari. Oire eva-a vai oa iava uvuiparoi ra ora rera iava sopauaaro porereve Jisas oirao piesa. Ora vii tapo oirato oirao rei vovouto viigoa tapo uvuipauēi ra oisi raga ita kave vovou purapari vatuaava oara tauvapaoro. Oa iava uvuipaoi ra oira iava sopauaaro pore piro, ra Jisas oirao pievee.

*Uvui Iraopaviei Ra Vo Vovou-ia Toupape Pauto Oa Rovu Piereva Vigeipa*

<sup>17</sup> ✧ Oire uva oavu-a vao oa-ia uvui iraopatai visii rutu ra oiso rutu toupata vo vuutao-ia osa vo vuutari oa-ia oisoa toupata oa-ia Pauto visii reesireva rera vo kovoaro purapasa. Ari ita, Turaro ira visiipa vatevateara vatereva, oisore ra vara kovo piepata. Uva va-a vao osa toupatavoi vo kovo eva purapaoro. Vo reo-a eva oa vatepaaveira voraro rutu lotupa irara voea sipoisopapaoro. <sup>18</sup> Vosa irouto-a ro ira ora rera iava rakari vera rovoru Jiu vo pitupituaoro sirova utuoro, ira-a eera porero viroi Pauto vo ruipaaro purasa. Oire ra teapi oiso vovoupara vo reesi tavarioreve. Ora vo osa irouto-a ro ira viapau vo reesiva toupaaoro porero viro Pauto vo ruipaaro sirova utusa. Oa-a eva isivaaro iava viapau uvuiparoi ra ora rera-ia oreesii purareve lotupa irara roru pie ragapasa. <sup>19</sup> Eake iava? Uvare va eva rakari verapa pitupitu viapau oiso reipapeira. Viapau. Ari vao raga oa rei iraopai, Pauto vo ruipaaro sirova utupa. <sup>20</sup> Visii rutu uvui iraopatai ra oiso rutu toupata osa oisoa toupata vo uva ora visii iava sopaura oavisii poreoro Pauto vo ruipaaro sirova ututaera. <sup>21</sup> Oiso-ia, E reitoa vaipa oisoa kovopata akukuvira vori ou asavira vo vokio-ia oa ora visii iava sopaura oavisii poretava Pautoa iare? Oire uva vearopai oiso ra oisi raga eisi toupata. Ari ita, vosa oraivavu avu vai toupave, ra oai iava uvuipatai ra torevokovira reito oavisii arova monipa kovo vai outa. Oire ra oai purata. <sup>22</sup> ✧ Vosa eera ruvara-ia visii reraaro reito kovo ragapata moni ou asavira, uva uvuipatai ra iravu ruvara-ia Turaro Jisas Kraiis vori outa, vo rara ora visii iava sopaura oavisii pore rovota. Ari ro ira ora rerapa kovopareve moni oupaoro, oire ra Kraiis-re oiso puraro, “Ragai reraaro-a Turaro.” <sup>23</sup> ✧ Oiraopavira rutu vo uvare Pauto vigei vorireva rera Oviitoaaro-ia ora rera iare vigei ouoro. Osa iava viapau uvuipatai ra ora visii iava ora vasepata oearovupa oirara, oiso ra visii vo vovouarore ora rei piepaave. Viapau. Uvare Kraiis raga ira vigeipa reiparoveira. <sup>24</sup> Araako irara oaa, visii rutu uvui iraopatai ra katakataivira Pautoa tapo ora tavosipaoro oiso rutu toupata osa oisoa toupata vo uva ora visii iava sopaura oavisii poreoro Pauto vo ruipaaro sirova ututaera.

*Voeho Iava Oirara Ora Raroe Riako Oea Viapau Ora Oupaave*

<sup>25</sup> Oire vo reo-a vao-ia visii vo akeroaro pukopasa voeoro iava oearoa viapau riako oupaave. Viapau oiso oreoi iava ragai vo reo purapaavoio vo Turaro oreoiaro. Ari ora ragai raga vo rugooaro iava vo osa Turaro ragai soporepare ragai tauvapaoro. Osa-a eisi osa iava uvuipatai ra ragai vo reoro sirova utupata.

<sup>26</sup> Taraiparai vao-ia riroa tavaka vigei rutupa oirao pie vovou irara oa rovoi. Uva vo tavakaireo rugooapaoro oiso puraparai, Vearopai vosa irouto oirato oisi raga toupaveve, ra oisi raga vearopape rerapa. <sup>27</sup> Ari ro ira riakova oureve, ira viapau uvuiparoi ra oiso rugooaro ra oira kavureve. Ora vosa ro viovokoto, ira viapau uvuiparoi ra riakova vaire taraapareve vaore, oiso ra iriai oureve. <sup>28</sup> Ari ita, vosa rera ro viovokoto riako ouro, oire ra viapau oiso vuria vai purapareve. Viapau. Ari ita, ora o tavauruva

✧ 7:16: 1 Pi 3:1 ✧ 7:17: Ro 12:3; 1 Ko 4:17 ✧ 7:22: Jo 8:32, 36; Fm 16; Ef 6:6 ✧ 7:23: 1 Ko 6:20



iria iravu oirato oueve, oa iava viapau oiso vuria vai purapaeve. Uva ragai vo rugooaro-a vao-ia oa-ia oiso puraparai, Vearopai rutu voeapa vosa viapau ora oupaave. Eake iava? Uvare oiso rugoopaari, Vosa oisi raga eisi toupavira, uvuipaari ra otavakarovivu vatavatapaive varapa ora airereipaoro. Vaopa teapi vo tavakarovi evara takutakuvupaive vao iare roo tavaka oa epao vo vokio-ia vigei rutu vaaro.

29 ✧ Ragai vo reoaro vituaro-a vao-ia oiso-ia. Araoko irara oaa, vuuta vao potekupai vigeipa vo rasio-ia. Eva-a oa sirova voeao oea ora oupaaveira uvui iraopaari ra oiso rutu toupave osa riako ou asa irara Pautoa-pa kovopaoro. 30 Ora voeao oea gaupaiveira, oea vo vokio oiso rutu tou iraopaivere osa voeao oea viapau tavaka vovouro vai oupaive ora siraoara vai Pautoa-pa kovopaoro. Ora voeao tapo oea agesipaaveira, oea uvui iraopaari ra oiso toupave vo vokio-ia osa voeao oea viapau rorupaive Pautoa-pa kovopaoro. Ora voeao oea sara kovoro purapaaveira, oea uvui iraopaari ra oiso rugoopaave Pautoa-pa kovopaoro, Viapau oiso ora vigei ragapa moni oupavioveira. 31 ✧ Ora voeao oea varao-ia kovopaiveira vo rasio iava vara oea uvui iraopaari ra oiso rutu toupave, Evoea oea viapau oiso goruvira rutu varao-ia pitupaiveira vo rasio iava vara. Vao vituaro iava uvare tutuu piepai vo rasiopa oiso ra ora tavariooro pisavira rutu ora karekepe.

32 ✧ Vaopa reasiparai oiso, Teapi rugooroi visii pugu piepaive. Uvare oiso ruipaparai ra oiso rutu toupata osa ro ira viapau riakova vai ouveve. Ira katai rugoo raga sirova utuparoi. Oire rera-a eera ira uvuiparoi ra Turaro vo kovoaro purapareve. Eake iava? Uvare rirovira rutu oiso ruipaparoi ra Turaro roru piepareve rutu ora rera-ia. 33 Ari ro ira riako ouro, ira kovoparevere moni oupaoro vatuava roru piepasa. Oire uva vo kovoro-a evara oara-ia ora pugu pieparoi. 34 ✧ Uva oisi-a eisi osa piepaoro vo rugooeiva touparevere oiso, Turaro-ia orugoovu, ari vatuava-ia orugoovu. Ari vosa tavauruva raga, oire ra rera raga Turaro vo kovoaro purapaeve. Eake iava? Uvare oira-a eira iria Turaro vo reesiaropa ruipapaari vao oa oiso toupai, Rera oiraoro rutu. Ari o oira oupava iria kepa tokirore rugorugooapaoveira ora ovii vure tapo ora orekerovu. Uvare oiso ruipapaoveira ra vatuato roru piepaive.

35 Oreoa vao-ia oa purapaavoi visii varaaro oirao pie vovouro tauva-paoro. Viapau oiso visiire korukoruparai vearo pitupituro-ia. Viapau. Ari ragai vaopa ruipaparai torevoko pitupitu rutu, oiso ra va purapata ora tovopaoro vo Turaropa kovopasa. Oa-ia viapau oiso oavu avu vai uvuipai ra visiire korupape rera vo kovoaro purapa arapa.

36 Oire vaviopavira vo reo vatepaavoi voeao oea ora ousapa reesirova toupavoi vore utupaua. Oire vosa vaiterei evaiterei oiso vo reesiva ora ousapa toupaooro oiso vovousi katai vovou raga sirova utuoro, Vearopai ra viapau ora ouve. Oire ra va iava oirato oiso ora rugoo piero, Ae asi viapau oiso vearo vovou-a vao-ia oa purapaavoi ragai raga oira vo ruipaarore korupaoro. Oire vosa evo rugoo sirova uturoera vorevira, viapau oiso vuria vaipe vaiterei-ia vo rara ora ousi. 37 Ari vosa irai ora irai raga oruipaiaro sirova utuoro oiso puraro, "Viapau uvuiparai ra riakoa vai oua." Oire vosa uvuiparo rutu oiso ra ora rera iava varaua vo ruipaooro rutu-ia putereve vo ruipao oa riako ou ruipapape, oire eva-a oa iava viapau uvuiparoi ra iriai tavauruva vai ouveve. Uva oisi-a eisi osa ragavira vearopai rerapa. 38 Vo reoro rutu isivaaro iava oiso puraparai, Vosa ro oirato ira o tavauruva ouveve iria-ia rera vaarova ora ousapa reesi toupaeve, oire ra va-ia viapau

vuria vaipe vaiterei-ia. Ari ro ira viapau oiso riako vaiaro oupareve, ira oiraopavira rutu vearo vovou purapareveira.

<sup>39</sup> ✧ Ari vosa o riakova iria ora oira reraaro oueve, oire ra rera tapo toupaveve vokiara rutu-ia. Viapau uvuipaori ra rera kavueve vo osa tootoovira raga toupaveve. Ari vosa kopii rovoru, uva-a eva uva uvuipaori ra ora oira vo ruipaaro sirova utuoro iravu raga oueve ita. Ari vao raga oiso-ia osa iava viapau uvuipaori ra iravu oueve ro ira viapau Jisas oirao piepareveira. <sup>40</sup> Ari vosa oira ou asavira toupaveve, oa iava uvuipaori ra oiraopavira rutu roruvira raga toupaveve. Eisi osa ora ragai ragá vo rugooaro toupai. Uvare oiso taraiparai, Pauto reraaro Tugoropato Uraurato osa tapo vo vovouaro toupaveira.

## 8

### *Varuere Kare Oisoa Tauopaive Tokarasi Irarapa*

<sup>1</sup> Visii vo akearo pukopaavoi varao iava aioara oara-ia koruoupaaveira tokarasi irarapa voea-ia vuurapa vaisi purapaoro. Vao iava uvare oiso purapataveira, “Igei orekerovu rutu-ia taraipaiei.” Ari ita, visii vo reoroaro oiraopai. Ari vao raga vo osa ro ira ora rera-ia rugoopoaro oiso, Riro taraito-a ragai. Eera-a ira ora vaisiario rei pie ragapareveira. Ari vosa vereopa vovou rutu purapareve, oire ra ora rera vaaro vearo pitupitu goru piepareveira rutu. <sup>2</sup> ✧ Ari ro oirato ira oiso puraparo, “Iu osa taraiparai oiso, Ragai-ia taraia toupavoi.” Ira raga ita-a eera apotapa taraia pa. <sup>3</sup> ✧ Vo osa ro ira Pautoa-pa sirao iraoparo, ira raga ita-a eera ira-ia taraiparaveira Pauto. Oa iava rerare oiso puraparoveira, “Ragai reraaro-a ro-ia oirato.”

<sup>4</sup> Oire vigei vao-ia taraipavioveira rutu ro iava tokarasi, Ira ovoovovira vaopa oiso toupaveira, oa viapau toupaveve rera iavirava. Ora tapo vo osa oiso taraipavioveira, Kataitao raga toupaveira Pauto. Viapau irai ei ita. Oire uva apeisi-a? Uvuipaviei ra voeapa koruoupa varuro aiopape, eke? Uva viapau. <sup>5</sup> Ari ita, riro irara toupavoi voeao oea vaisipaiveira oiso, Pau irara ora turaro irara voeao vova vo rasio-ia ora oiso vuvuiua-ia. <sup>6</sup> ✧ Uva oiso vearopai, Viapau uvuipaviei ra voea-ia rugorugoaro oavi tovopape, uvare vigei reraaro-a ro Oiraopatoa rutu Pauto Aite kataitao raga. Ira orekerovu rutu purareva. Ora vigei tapo purareva ora rerapa, oisore ra rera vaisiario rei piepape tootoovira tupaoro. Ora tapo ro kataitao raga Turaro vigei reraaro Jisas Krai. Ro ira iavirava Pauto orekerovu rutu purareva. Ora vo osa rera vo goruaro iavirava tootoopavioveira. Ira vigei rutu oiso pierava ra oiso toupape, Vigei-a rera voeaaro rutu.

<sup>7</sup> Oire uva apeisi-a vo aiuro-ia varao oara vatepaiveira voeapa evoea tokarasi irara? Ari ita, voari rovvovira rutu uva oearovu visii iava oisoa aio vatepaave voeapa tokarasi irara. Uva voea vo rugorugoaroarou touvira karu uviro asavira toupaveira. Oa iava touvira viapau roroioapaaveira Pautoa-ia taraipaoro vo vokie. Vao vituaro iava vosa koruoupa aio vorevira aioive, uva va-a eva oa-ia oiso rugoopaaveira, Ora voea iava sopaura vuivui piepaiveira. Eake iava? Uvare viapau oiso goruvira rutu ora voea vo rugooaro goru pie rovopaiveira. <sup>8</sup> ✧ Oiraopavira rutu viapau oiso uvuipaviei ra aio kavupavira rutu, torevokovira oiso toupape vo Pauto osireiario-ia. Uva viapau oiso oavu avu vai ei vosa viapau vo aiuro evara aiopape. Ora viapau oavu avu vai vo rara vara aiopape. <sup>9</sup> Ari ora airerei iraopata vaopa, vosa eisi rugoopaoro ora visii vo ruiparoaro raga sirova

✧ 7:39: Ro 7:2; 2 Ko 6:14 ✧ 8:2: 1 Ko 3:18, 13:8-9, 12 ✧ 8:3: Ga 4:9; Ro 8:29 ✧ 8:6: Mal 2:10; Ro 11:36 ✧ 8:8: Ro 14:17

utupata. Teapi visii vo vovouaro sirova utuoro oearoi koveave vuria-ia, voeao oea-ia raverave vovou oirao piea toupaivoi.

<sup>10</sup> Vosa visii tapo irai toupave ro ira viapau vearovira ora rera vo rugoaro rovirieipareve, oire ra visii uvupa osa oiso purapata, “Vigei rutua toupaivoi taraia.” Oire va-a eva oa sirovava visii siituepareve ovusa aiopaoro paupata tokarasipa kepa-ia. Oire uva apeisi-a va-ia vao? Vosa rera tapo oisi aiota, ra va isivaaro iava oiso rugooro vai pasi, Easi vuria vai-a vao oa puraavoi. <sup>11</sup> Uva oisi-a eisi osa piepaoro visii raga ita uvuipatai ra iravivu araokoto oavisii kove pieta ro irapa Krai kopiroepa. Uvare visii vo taraiaro-a oa-ia rera vavagisi pietavoi. <sup>12</sup> Visii raga ita vuri vovou purapataveira Krai-ia, vo osa ora visii araoko iraraaro kove pieta voeao oea viapau vearovira taraiapaave vao purapaoro torevoko vovou rutu. <sup>13</sup> ✧ Uva ragai raga vo rugoaro-a vao-ia, Vosa tokarasi vaoro aioa varua aiopaoro ora ragai araokotoaro kove piea vuria iare. Uva oisi-a eisi osa iava uvui iraparai ra varuarapa kavu ovoia vaopa oiso, teapi araokotoa oaa vuria vai purareve.

## 9

### *Pol Oisoa Rorupareve Vo Rara Viapau Moni Ouparo Vao-ia Rera Vaoro Aposel Kovo*

<sup>1</sup> Viapau oiso irai ei iravivuiparoi ra ragaiapa reiro, uvare ragai-a aposelto Pautoa ragapa kovopato. Vo osa Jisas vo reoaro vigei reraoro Turaro kaepaveira, ro ira kekeavora ora ragai vaitereiaro iava osireitoarei. Uva apeisi-a? E viapau visii-a ragai vo kovoaro vo kuearo vao aposel kovo? <sup>2</sup> Ari ita, vosa oearoi viapau ragai eveipaive oiso purapaoro, “Easi viapau aposelto rera ro.” Uva apeisi-a visii? Iu, uvui irapatai ra ragai-ia taraiapa, Aposelto ragai. Eake iava? Uvare visii vaoro-ia oirao piea Turaro tapo ora tavosipatai. Okuea-a eva ragai vo kovoaro iava vao aposel kovo.

<sup>3</sup> Vosa oearovu ragai reoropaveira ragai togapaoro oreorovu-ia, uva voeao vo reoroaro pukopaveira oiso purapaoro, <sup>4</sup> ✧ E viapau ragaiapa oiso torevokopai ra aioara vai oupa, ora uukoara vai vo oirao pie vovou irara ruvara-ia, uvare ragai vo kovoaro-a vao lotua-ia? <sup>5</sup> E viapau ragaiapa oiso torevokopai ra oiso piea osa oearovu aposel irara, ora voeoro Turaro araoko iraraoro, ora ro Pita oea vatua riako tapo vokapaoro avaeapa vairo oirao pie vovou riako? Uva apeisi-a? E viapau uvuiparai ra oisi piea vao-ia ragai vo vokaoro? <sup>6</sup> Uva apeisi-a? E vegei raga ora Banabas uvui irapaveiei ra kovopave aio voripasa varao vegeipa ora orekerovu, vo osa viapau oearovu oisi oisoa piepaive? <sup>7</sup> E upo purapato aio voripasa kovopaveira ora orekerovu vo osa viuru kovo-ia toupaveve? E irai ei iravivuiparoi, ra viapau oai iava opoa vai aioreve? Uva apeisi-a? Iravivuiparoi oai iravivuiparoi kare vai tokipaoro oea iava roro pigiparoveira, ra viapau oviroi-ia ukaloro vo vo kare iava, raa? Iu. Vara rutu varao ovoovo reoro oara oirapai. Ari ipei tapo uvuipaiei ra tauva oupaio vo lotupa irara ruvara-ia Pauto vo kovoaro purapaoro.

<sup>8</sup> Ovoovo reo-a eva oa puraavoi varaore rugoopaoro vo rasio iava. Ari vosa Reo Taisire ora rugoo piera, oire ra vava vaeavira rutu vo reo vao puraa vao iava aposel kovo-ia vori oupa. <sup>9</sup> ✧ Uva vigei uvuipaviei ra Moses vaoro Reo Taisi vieipe oa oiso purapaveira, ‘Vo kareo bulmakau kare oea wit-ia tasiapaoro uvuipaai ra veoro takuraro kareke piepaive. Okarea tapo ita uvuipaai ra vo takuraro aiopaoro vokapaive kovopapaoro.’ Uva

apeisi-a? E Reo Taisi vai ei va iava eva vo uvare Pauto vearo vovouparoveira vo karere, vo rara vara aiopaive, eke? <sup>10</sup> Viapau. Ari vigeire va-a eva Reo Taisi oa oiso purapapeira. Oiraopavira rutu ro oirato ira aio kovo aruo rovoreve, oire ra iravu ro oirato vo kovo opoaro taterere, aiterea rutu uvuipasei ra vaeavira kovopasi oiso rugoopaoro, Oiraopavira rutu uvare aiopaveare rara vovio utupauavi vegei vo kovaaro iava. <sup>11</sup> Ari ita, takuraara vikiavora rasitua-ia ro visii iava sopaura. Otarai va takuraara oa vova Tugoropato Uraurato uriopapeira. Uva apeisi-a? E viapau uvuiparai ra ora ragai vo kovoaro iava kueara vai oua vo kuo iava oa visii-ia toupaveira, raa? <sup>12</sup> E torevokopapeira vearopa oearovu oearoa visii ruvara-ia orekerovu oupaiveira ora voea vo pauroaro vearopasa? Uva apeisi ragai? Ragoa uvuiparai ra pute pievira rutu oisi piea eisi.

Ari ita, viapau oiso ora ragaire rugorugooaparaveira ragoa oiso toupaveira. Eagara vosa riroa tavaka oupa, ra viapau oiso visii ruvara-ia oiso arepara oiso, Ragai tauvapata. Uvare oiso rugoopaori, Teapi oisi oai iava oearovivure korukorupara vao uvupa arapa Vearo Siposipo Kraisi iava va. <sup>13</sup> ✱ Visii voveao-ia vearovira rutu taraipataveira oea Tugoropa Kepa-ia ae Tempel kovopaveira. Uva voa raga aio oupaaveira ora voeapa. Ora voveao tapo oea koruoupa aioro purapaveira vo Tempel-ia. Oire ra voava okurorovu aiopaive ora voea raga ita varao oara kavupa piroveira. <sup>14</sup> Uva oisi ragavira Turaro vo reoaro tapo riro goru reo rutu oiso purapapeira, 'Voveao oea lotupa irarapa siposipopaveira vao iava Vearo Siposipo, uva voea raga ita lotupa irara ruvara-ia orekerovu rutu oupaiveira ora voea vo pauroaro rekopasa.'

<sup>15</sup> Uva viapau oiso oisi voveao lotupa irara oisoa piepa vo reo sirova utupasa eva riro goru reo rutu, oisore ra oisi ragai tauvapaive. Uva viapau oiso oisore visii va vo pasio rigatopaavo ra oisi ragai tauvata. Viapau. Eagara. Vosa kopiiravere oisi oreoi pura arapa vaore rugoopaoro oiso puraparai, Teapi irai ita oiso ragai vo tavitaviroaro vo ora ragai iava akukupapa piepareve. <sup>16</sup> Ari ita, viapau oiso ora rei vaisi pieparai oiso reoapaoro va iava vao ragai vo vovouaro oa purapaaveira Vearo Siposipo iava siposipopaoro. Viapau rutu. Eake iava? Uvare Turaro ragai arureva vo vovou purasa vao-ia. Oiraopavira rutu. Siraovira rutu vosa viapau rera vo reoaro sirova uturaeri Vearo Siposipo iava siposipopaoro. <sup>17</sup> Vosa ora ragai raga vo ruipaoro sirova uturaeri vo kovo purasa, osa-a eisi osa iava visii arepaavori oiso ra ragaipa voriara vai vatepata. Osa viapau oisi eisi. Viapau rutu. Ari ragai vo kovo purapaaveira uvare Pauto ragaire oiso puraroepa, "Uvuipavei rutu. Oa iava viipa vo kovo vatepaavo, oisore ra Vearo Siposipo iava siposipopari." <sup>18</sup> ✱ Oire uva akuku visivi raga toupaveira vo ora ragai raga vo touaro-ia. Uva aa vo voria rutu-a vao oa uvuipapeira ragaipa? Vao raga vo osa rorupaaveira rutu Vearo Siposipo iava siposipopaoro. Vao oia-ia viapau voria vai ei. Uvare viapau visii arepaavo oisore ra ragai vateta voria vai va-ia vao ragai vo kovoaro.

### *Pol Oisoa Oiso Toupave, Kovopato Oirara Rutupa*

<sup>19</sup> ✱ Viapau oiso reitua vai ei ro irapa kovopaaveira. Viapau. Ari ora ragai vo vovouaro raga sirova utupaveira vaore, ra oiso toupaa, Ragai oirara rutupa kovopato. Vaore oiso ra ragai vo kovoaro iavirava riro irara vai iava sopaura vai pore pirovorea Jisas oirao piesa. <sup>20</sup> Vosa oisoa reo vatevatepara vo Jiu-pa, uva voea tapo tupaoro oisoa voea vo pitupituroaro sirova utupara vaore, oiso ra ora voea iava sopaura oave porepaive. Ari ita, oiraopavira eisi osa iava viapau oiso Moses vaaro Reo Taisi ragaipa

reipape. Ari voea raga vo rearo sirova oisoa utupaoro va sirova utupara vare vao rugoopaoro, oiso ra voea iava sopaura oaive porepa piro Jisas oirao piepasa. <sup>21</sup> ✧ Oire uva oisi-a ita eisi osa ragavira voeao tapo ratau tou irara oisoa toupaa uva tapo ita oisoa oisi voea vo pitupituroaro sirova utupara, oea oisoa viapau Moses vaoro-ia taraipaave Reo Taisi. Vaore rugoopaoro oiso ra ora ragai raga vo pitupituroaro iavirava ora voea iava sopaura oaive porepaive. Ari oisi eisi piepaoro viapau oisoa Pauto vaarore Reo Taisi viapau oisoa ovaupara, vo osa touvira Kraís raga vo rearo sirova oisoa utupara. <sup>22</sup> Vosa voea tapo raverave rari irara toupaveira, uva ora ragai vo vovouaro oisivio rutu piepaaveira osa voea vo vovouaro. Eake iava? Uvare oiso rugoopaaveira, Oearovi vai voea iava uvuipaaí ra Jisas vo rearo uvuive va-ia gorua ouoro. Oire uva irou irara irao-a oea tapo uvuiparai touoro ora ragai vo vovouaro oiso piea osa voea. Ra va iava ragai vo pitupituroaro kekepaoro ragai vo rearo uvupaive oiraopavira rutu ora voea iava sopaura-ia Jisas oirao piepasa.

<sup>23</sup> Eisi osa iava ragai vo pitupituroaro evara purapaaveira, uvare ragai vo ruipaoro-a oiso ra Vearo Siposipo kosi piepaa. Ra va iava rorupaa oirara kekepaoro voeao oea ora voea iava sopaura oaive vorevira porepaive va uvupaoro.

### *Uvui Iraopaviei Ra Goruvira Ikaupaoro Vo Poupavio Uva Ovoioipa Reesi Toupaveira*

<sup>24</sup> ✧ Voeao-ia tarai iraopata oea ora paupaupaoro ikaupaaveira. Oire uva riro irara rutu-a oea ikaupaaveira, ra kataitoavi raga voea rutu-ia putereve, eera-a ira oisoa voria oureve. Uva visii tapo ita oisi uvuipatai ra oisi ora varovaropata ikaupaoro vo Kraís vo raivaoro-ia. Ra opeita raveravepata ikaupaoro vo voriro oavisii ou arapa Pauto ruvara-ia. <sup>25</sup> Uva oisi-a eisi osa ro ira paupau ikauro purapareve íra uvuipa ra rearea asavira ikaupareve varaua oara tarai piepaoro oiso rugoopaoro, Rorupaavere rara oearovu rutu-ia putea. Ororua-a eva rera arova opesipere. Ari vosa vigei oisi piepape, oire ra va iava vigei vaoro rorua ororua vatepareira vigeipa Pauto oa viapau oiso opesipe rutu. <sup>26</sup> Uva oisi-a eisi osa vituaro iava torevokovira rutu ikaupaaveira reesia-ia tukurapasa. Iu, uvare oiso rutu toupaa osa ro íra vavaearei vuvukopareveira íravu tosa. Oa-ia viapau oiso riroirovira vavaearei vikivikipaaveira. <sup>27</sup> ✧ Viapau. Ari ora ragai iava varaua goru piepaaveira voua tarai piepaoro. Osa iava uvuiparai ra ora ragai iava varaua vo ruipaoro vara piepaa vaopa oiso, teapi oearovu ragaire oiso purapaave, “Rerape. Ira viapau uvuiparoi.” Vo osa oisi eisi puraave ragaire, uvare raveravevira opesi ragarai.

## 10

### *Vo Toupai Kokarapa Iava, Teapi Va-ia Kovevii*

<sup>1</sup> ✧ Oavu-a vao-ia oa toupai vo vigei soporepasa voeao iava oea viapau voria oaive ouiva vo Pauto ruvara-ia. Araoko irara oaa, visii rugoo piepaavoí voearie Jiu aao iraraoro oea Moses sirova utuaeva kuvau tapi, vo uva viapau aue uukoara vai ora aue aioara vai. Uva voa-a vo uva oisoa Pauto voea virivarivira rutu voea tuvetuvepareve rukuta-ia. Oa iava Ret Si iviroiva uvare raakaopa. <sup>2</sup> Uva oisi-a eisi osa pieoro ovoovovira Tugoropa Sisu Baptais ouiva Moses ruvara-ia vo avakava-ia Ret Si ora rukuta. Oa-ia oiso ora reesiaepa, Voea evoea raga tapo ora tavosiaepa. <sup>3</sup> Uva voa-a vo uva vaeavira voea rutu katai aio rutu oisoa aiopaive, vao oa voeapa oisoa

karekepape vo Kraís vo goruaro raga-ia. <sup>4</sup> ✧ Ora voea rutu oísoa kataia rutu-ia uukoa ukaiopaave vaeavira, vao oa voeapa oísoa karekepape vo Kraís vo goruaro raga-ia. Ari ita, vo ovi-a eva uuko ovi oa aveveia íava kosi píropa oa-ia oísoa ukaiopaave. Uva ragai ovoovovira aveke vaisipaavoi, uvare rera raga-a eera Kraís ira oísi toupaveira oíso osa aveke. Rera raga-a ira oísoa voea taupareve, ovusa viapau oíso rera vo tauvaaro oísoa eveipaive. <sup>5</sup> Ari Pauto viapau oísoa rorupareve rutu voea íava oearovu-ia riro írara rutu. Oa-a eva vituaro íava oísoa voea raga kopiipaave uvarovu voraro kuvau tapiro vo voea vovouaro ouaive ou arapa vo Pauto ruvara-ia.

<sup>6</sup> Osíposípoa vao oíso ovoovovira vígeipa toupaveira vaopa, teapi vígei tapo oísi orekerovu vuriara sírova avapavio. <sup>7</sup> ✧ Ora oíso tapo, teapi vígei vao tokarasi írara-ia vuurapa vaisi purapape oíso osa oearovu voea íava oísoa píepaive. Oa íava Tugoropa Vuku voea íava oíso purapapeira, ‘Pauaepa aíosa ora ukaiopasa. Oíre uva va ísivaaro íava toreaepa pípipasa.’ Vo aio-ia oa puraíva tokarasi írara-ia vuurapa vaisi purapaaro. <sup>8</sup> ✧ Ora vaopa tapo oíso, teapi otopa pítipitu purapape oíso osa oearovu voea íava evoea. Evo vuríro voea varaaro oara vituaro íava riro tukuro rutu kopíiepa katai voki raga-ia oíso osa vo tukuo-ia 23,000 aue oira. <sup>9</sup> Vígei vao viapau rutu uvuípaviei ra Turarore aveave reoro vai purapape oíso purapaaro, ‘Ae apeísi viapau vearovira vígei tokípareveira Pauto,’ oíso osa oearovu voea íava oea oísoa oíso purapaave. Uva oísi-a eísi osa píeívoiva, rakoru kare voea upoíva, uvare vo kare síporeva Pauto. <sup>10</sup> Ora viapau rutu uvuípaviei ra rera-ia Turaro vakuvakupavio oreorovu purapaaro vuríara rera-ia, oíso osa oearovu voea íava oea oísoa rera-ia vakuvakupaave. Ari ita, eísi osa píepaívoiva, opesiaepa, uvare Oira Upopato Enseldo voea rutu uporeva.

<sup>11</sup> Ovoovoroa rutu-a evara oara toupaveira vígeipa, uvare oearovu vara rígoíva, oíso ra voa toupave vígei vosípasá rutu varapa. Vaopa teapi vuríara purapape vara-ia oíso osa voea voari. Uvare vígei-a vao toupai vo vuutao íava vo voki-ia oare tutuu píepai Ovoíopa Voki. <sup>12</sup> Oíso ragavira íava, teapi oíso keapaaro oíso rugoopata, Goruvira torepatai. Teapi oísi íava koveta. <sup>13</sup> ✧ Evo pítipíturo oara karekepapeira vígei-ia kokarapasa. Uva viapau oíso vígei raga-ia, ari oearovu tapo-ia voea voraro rutu. Oa íava Pauto vísiire viapau ísivaparovere. Osa íava kokarapa vovou viapau uvuípai ra vísií-ia putepaive. Viapau. Ari vísií tauparevere vokiara rutu-ia. Uvare rera raga íra reo ovoi rera vaaro oírao píepareveira. Oa íavírava vísiípa gorua vatepareveira uvuívira rutu vísií taupapaaro vaopa oíso, teapi raveravepata. Ora oíso osa uvuípaoí ra oraívai purareve vísií vírívarisa vao oa íava uvuípatai ra kokara-ia vatavatapata.

### *Viapau Rutu Uvuípaviei Ra Pauto Oírao Píepaaro Vuríto Uraurato Tapo-ia Rarípavio*

<sup>14</sup> Oísi-a eísi osa íava vate írara oaa, vísií vatatopo píepaavoi oíso ra tauai vísií rutu toupata vo pítipíturo asavira tokarasiara-ia vuurapa vaisi purapa. <sup>15</sup> Vearovira rutu rugoo íraopata. Osa íava uvuípai ra vísií-ia tarápaaro vísiire oíso purara, Ragai vo reoroaro rovíríeípaata oíso, E vearovira avu rutu vísií tavípaavoi oíso? <sup>16</sup> ✧ Vo osa kovukovu aio purapapeira vao komunion, uva kap-ia pítipapeira. Oa íava oírava Turaro arepape, oísoare ra oírava Pauto vígei rutu víraakoreve. Oa íava uvuípaviei ra rera-ia Pauto vearo vaisi purapape. Uva apeísi-a? E oíraopavira eísi píepaaro Kraís tapo ora tavosípavíoveira, rara vare ovoovovira Kraís revasiaro-ia ukaiopavio, o revasíva íria parueva vo vígeipa. Iu. Ora

✧ **10:4:** Eks 17:6; Nam 20:11 ✧ **10:7:** Eks 32:4, 6 ✧ **10:8:** Nam 25:1-9 ✧ **10:13:** 2 Pi 2:9

✧ **10:16:** Mt 26:26; Ap 2:42

vao bret-ia oa kakuakupapeira va aiopasa. Uva apeisi-a? E Kraís tapo ora tavosipavioveira ovoovovira Kraís iava varaua aiopaoro eisi? Iu! <sup>17</sup> Oiraopavira rutu vigei-a riro irara rutu oirara, ari kataiua-ia varaua karekepavioveira vao-ia lotua, vo rara kataia raga aiopape bret-ia. Eake iava? Uvare ora tavosipavioveira kataivira rutu kataia bret-ia aiopaoro eera raga ita Kraís.

<sup>18</sup> ✧ Voearire rugoopata voeao Jiu oea oisoa korusupa aioro iava aiopaive. Vo aioro oara oisoa vatepaive Pautoa-pa. Osa eisi pieiva oa-ia vigei soporeiva. Oa iava uvuipaviei ra oiso rugoopavio, Akoea ora tavosiaepa rutu Pautoa tapo. <sup>19</sup> Oire uva apeisi-a oiso osa puraparai voeare ratau tou irara oea tokarasi irara vo pitupituro sirova utupaaveira? E akukuvira raga toupaveira tokarasi irara, ora varao aioara oara-ia oisoa voeapa korusupaave, eke? <sup>20</sup> ✧ Iu. Akukupapara raga-a evara oara-ia viapau gorua vai. Ragai vo reoaro vituaro-a vao-ia oiso-ia, Evo aioro oara oisoa tovopaive eravaoara-ia tokarasi irarapa vara-ia korusupaoro, viapau oiso Pautoa-paa. Osa-a eisi osa iava oiso ruipaparai ra viapau oiso voare avapata vo uva tokarasi irarapa korusupa purapaveira. <sup>21</sup> Viapau rutu uvuipatai katai vovou purapaoro ra vairei-ia ukaiopata kaprirei oiso, O iria vatepapeira Turaro vaaro-ia komunion, ari o iria vatepaveira tugara kare-ia vuurapa vaisi purapaoro. Uva viapau oiso uvuipatai vo aiorei iava aiopata oiso, vo aio Turaro vaaro komunion, ari vo aio tugara kare-ia vuurapa vaisi purapaoro. Oaiorea-a evarei ora vareipa pisavira rutu toupaveira. <sup>22</sup> ✧ Easi pasi visii vai oiso vovupataveira ra Turarore vuri vovou piepata tokarasi irara-ia visii vo rugorugooaro tovopaoro, ra va iava visiire kasipuparo, eke? E vigei vo goruaro Turaro vo goruaro-ia putepaveira, raa? Asi viapau rutu.

### *Vokiara Rutu-ia Uvuí Iraopaviei Pautoa-ia Vuurapa Vaisi Purapasa*

<sup>23</sup> ✧ Ari ita, oearovu vigei iava oiso purapaveira, “Uvuipaviei ra opitupiturovu purapape, ora vigei vo ruiparoaro sirova utupaoro.” Oiraopai eisi. Ari viapau oiso opitupiturovu rutu vearopapeira. Uvuipaviei ra opitupiturovu purapape. Uva vao raga uvare viapau oiso opitupiturovu vo vovouaro vigei taupaveira. <sup>24</sup> ✧ Opeita iravu vigei iava tapo ora rera raga ora tokiparo oearovivure rugoo asavira. Viapau. Ari eera uvui iraparoi rutu ra oearovure rugooapaoro voea taupavareve tapo vearo pitupituro raga purapaoro.

<sup>25</sup> Viapau oiso oavu avu vaiei vo oaravu rutu-ia varuara, varao oara voripataveira uua-ia vara aiopasa. Ari vao raga vo uvare viapau korusupa pitupiture rugooapaoro vara viapau ake rovopataveira oiso, “Ovu iava vao-ia?” <sup>26</sup> Vao iava uvare Tugoropa Vuku oiso purapapeira, ‘Rasito ora oearovivu rutu varao rera-ia toupaveira Turaro varaaro.’ Oa vituaro iava uvuipaviei ra oaravu rutu varuara aiopape.

<sup>27</sup> Vosa ro ira-ia viapau oirao pie vovou vai toupave viire kaokaoro aiosa rera tapo, ra va iava ora vii vo rugooaro sirova utuoro avau. Oire vosa viipa aio koko purareve. Veարopai va aio ragari. Opeita rera akepari oaravu-ia akeara rirovira oisi varare rugorugooapaoro. <sup>28</sup> Ari vao raga vosa irai vii tavi rovoreve oiso, “Korusupa aioa vao-ia auepa tokarasi.” Oire ra va iava viapau oiso aiori vaopa oiso, teapi rera vo rugooaro piro pieri varao iava oirao pie vovou vo pitupituroaro. Ora vao tapo vosa oiso ora sovota, Vuria-a vao, ra opeita va aiopata. <sup>29</sup> Oire uva viapau oiso visii vo rugorugooarore oiso purarai, ari oearovua vo rugooarora-a.

Vo osa oisi vo reo iava oearovu oiso vaio puraave, “Eakere ora ragai vo rugoore korurai vao oa-ia oearovu vuri pieavoi pasi vo aio-ia ora orekerovu avu vai rutu? <sup>30</sup> Vosa Pautoa-ia vearo vaisi puraa vo aio iavirava, uva apeisi irai uvuiparoi ra vo aio iavirava ragai togareve?”

<sup>31</sup> ✨ Eisi osa iava oiso visii tavipaavoi, Vo osa eake aio aiopata, ora eake uuko-ia ukaiopata oara rutu-ia uvui iraopatai ra vara rutu aiopata ora vara rutu-ia ukaiopata, oisore ra visii siituepaoro oearovu visii-ia uvuipaai ra Pauto vaisiara kae pieve. <sup>32</sup> Torevokovira rutu tootoopatai. Oa iava viapau uvuipai ra vuria vai karekepe voeao-ia Jiu, ora voeao tapo ratau totu irara, ora oirao pie vovou irara voeao Pauto voeao. <sup>33</sup> ✨ Oiso vearopai rutu vosa ragai vo pitupituario vioepata. Oiso osa akekevira raga ragai vo touaro purapaaveira oearovu roru piepaoro. Ari ita, viapau oiso ora ragai ragare rugoore vaore, oiso ra vearoa vai oua. Viapau. Ari vaore oiso ra oearovu rutu vearoa ouve. Oa-a evo vituario iava oearovu uvuipaai ra ora voea iava sopaura oaive poreive Jisas oirao pieoro.

## 11

<sup>1</sup> ✨ Osa vituario iava eisi visii tavipaavoi, oisore ragai vo pitupituario vioeta, oiso rutu osa Krai vo pitupituario vioepaveira.

### *Kukue Tavurupa Pitupitu Vao Lotua-ia*

<sup>2</sup> ✨ Visii-ia vearo vaisi puraavoi, uvare ragai roru piepataveira ragaire rugoore ragai vo siposipoaro sirova utupaoro vao oa vateavora visiipa. <sup>3</sup> Uva ragai vo ruipaoro oiso toupai, ra roroiovira rutu vo reore rugoore oreoa oiso purapai, Krai-a toki ruvarautoa rutu ira oearovu rutu-ia oirara putepaveira. Oiso rutu osa vatuato vatuava-ia putepaveira oirapa reipaoro. Oiso osa raga ita Pauto Krai-pa reipaveira. <sup>4</sup> Osa iava ro ira variriparo, eke Pauto vo rearo iava siposipave kosi pievira oirara rutu osireiara-ia, vosa ora rera iava kukue ruupave, oa-a eva oa-ia rera raga uvuiparoi ra ora akukupapa pieparo. <sup>5</sup> Osa raga ita o riakova iria oisi variripao, ora Pauto vo rearo iava siposipave tapo kosi pievira vo oirara rutu osireiara-ia. Oire vosa viapau ora oira iava kukueva ruupave, oa-a eva oa-ia ora oira vatuatoaro vaisiara akaipa piepaveoi. Oire vosa viapau kukuvaipa toveve tavuruvira, ra oiso rutu toupave osa o iria ora oira iava orui gagavurive riroa arii ouoro. <sup>6</sup> Ari ita, vosa viapau ora oira iava kukueva tavurupave vo varoa-ia, oire uva vearopai pasi vosa ora oira iava orui gagavuri roveve. Uvare taraiptai oiso, Vosa riakova ora oira iava orui gagavurive, ra va-ia ora arii pieo oira raga. Uva oisi-a eisi osa iava oiso vearopai rutu oirapa vosa ora oira iava kukue tavurupave vo lotupa kepa-ia. <sup>7</sup> ✨ Oire uva viapau oiratopa torevokopai oisi oiso vosa ora rera-ia kukuvaipa toveve Pautoa iare lotupaoro. Eake iava? Uvare rera vaoro vura oiso rutu toupai osa Pauto vo vuraoro. Osa eisi osa iava uvuipaai oearovu Pauto vaisiara-ia vuurapa vaisi purapaive. Ari riakova vo vuraoro-a vao, oa iava oearovu oirara oearovu-ia oirara raga uvuipaai ra rei vaisi purapaive.

<sup>8</sup> Vao vituario iava uvare viapau oiso oirato purareva riakova iava. Viapau. Ari oirato pura roveve rovvira rutu. Oa iava utupavira riakova ita purareva. <sup>9</sup> ✨ Uvare viapau oiso oirato purareva riakova iare, ari riakova purareva oiratoa iare. <sup>10</sup> Eva-a oa vituario iava uvui irapaai ra riakova ora oira iava orui tavurupave kukue-ia Pautoa iare lotupaoro. Oa iava

✨ **10:31:** Kl 3:17; 1 Pi 4:11 ✨ **10:33:** 1 Ko 9:22, 13:5 ✨ **11:1:** 1 Ko 4:16 ✨ **11:2:** 1 Ko 4:17; 2 Te 2:15 ✨ **11:7:** Jen 1:26 ✨ **11:9:** Jen 2:18



uvuipaa oearovu oiso taraipaave oira-ia, Vatuato oirapa reiparoi. Ora ra va iava enselpa irara oiso puraave oira kekepaoro, “Vearopai rutu.” <sup>11</sup> Ari oiraopavira rutu vo Turaro vaisiario sovara-ia toupaooro vigei raga oirara viapau uvuipaviei ra riako asavira toupape. Oisi raga ita riakora viapau oiso uvuipaa ra oira asavira toupave ita. <sup>12</sup> Oa-a vituaro-a vao-ia vo uvare Pauto riakova purareva oiratoa iava voari rovoa-ia. Osa raga ita oirara kavaupaveira riakora, oea rutu-a voeao oea purareva Pauto ro ira-a orekerovu rutu vituaro.

<sup>13</sup> Ora visii vo rugorugooraro roviriei iraopata oiso-ia, E torevokopai riakovapa o iria variripao oirara rutu osireiario-ia Pautoa-pa ora oruaro tavuru asavira eke? <sup>14</sup> Vaore rugoopata vo voki iavapa pitupitu oa vigei soporepaveira o iava geegeeru orui riro kaekaeva. Vo rara oirato oirava geegeeru ariiparo. <sup>15</sup> Ari vosa riakova oirava orui geegeeru toupave, oa iava oisoa oearovu oirara oira kekeoro oira-ia veoro vaisi purapave rorupaoro. Uvare iriapa Pauto vo oru vao geegeerua vatereva vaore, oiso ra vo oru-ia kukue tavurupave. <sup>16</sup> ✧ Ari vosa irai ragaiva kaureo ruipaparo va-ia eva, uva uvuiparai ra rera tavia oiso, Viapau oiso igei aposel irara igoa oiso oai-ia taraipaei vo rasio iava oa oiso torevokopai vigei rutupa, ora oearoipa Pauto oirara vaiaro lotupa irara vai voearo uvarovu rutu toupavoi.

### *Turaro Vo Aioaro Iava Vao Oa Oisoa Vuri Piepave Korin-pa Irara*

<sup>17</sup> Visii vatepaavo oreorovu va-ia vao iava oia viapau oiso visii-ia rorupaa oisi iava eisi. Eake iava? Uvare lotua-ia visii rutu ora gurupataveira. Oire voa vo pitupituro purapataveira oara viapau oiso torevokopaveira evara. <sup>18</sup> Uva rovo reo rutu-a vao-ia. Oa iava oearovu ragai taviivora, uvare roopavira toupaooro ora kaureopataveira vo ora visii vo pauroaro-ia. Oa iava oiso rugoopaari, O asi oiraopavira vai-a pasi. <sup>19</sup> ✧ Ari ita, vearepapai vosa osivi ragavira rugorugoopata, uvare oiso osa ragavira iava uvuipatai ra oearovu ora visiipa eveita voeao oea-ia veoro rugoo ora oiraopa vovou toupaveira. <sup>20</sup> Oire vo osa ora gurupata Turaro vo aioaro purapasa vao ovapa aio, oaioa eva akaipa piepataveira. <sup>21</sup> Uvare vagevagepavira katakataivira aio rovpapataveira oearovivure tue asavira. Osa iava eisi oearovivu ogoevira raga touvira toupave, vo osa oevu raga vuku rovoave kokoropaoro spakpaoro. <sup>22</sup> ✧ E viapau kepaara vai ei visii okeparoiaro, oara-ia uvuipatai ra rovvira aio rovpata ora ukaio rovpata, raa? E visii vo vovouaro-a eva eisi, oa iava Pauto voeao reroaropaoro voeava kaureopataveira voeao lotupa irara? Oire oisi-a eisi osa iava oearovivu voea iava arii piepataveira voeao oea aio arapa ogoevira toupave. Uva apeisi puraparai? Ragai roru piepataveira va-ia oisi eisi eke? Viapau rutu!

### *Turaro Jisas Ira Komunion Vatereva Voeaopa Disaipel Rera Voeaaro*

<sup>23</sup> ✧ Uvare Turaro vo taraiaro-a vao oa rovvira rutu visii vateavora vao oa ouava rera raga ruvara-ia Turaro. Otarai oiso purapaveira, Vo vokiario Judas vigei reraaro Turaro Jisas kosi pierava vore viurupa irara vavaeoro, vo rupao-ia oa-ia Jisas bret-ia pitureva. <sup>24</sup> Oa iava va kakuakureva va-ia veoro vaisi puraoro Pautoa-ia. Uva oiso puraroepa, “*Va vao-ia bret ragai iava varaua, oa-a vouao visii rutupa, oisore ra va aiota ragaire rugoopasa.*” <sup>25</sup> Oire uva oisi raga ita evo aio isivaaro iava kap-ia pitureva oiso purapaooro, “*O-ia kap iria agasivira toupave aue-ia wain ovi. Iria oiso toupai ovoovova*

vaopa Airepa Reo Ovoi Pauto vaaro, oreoa oirao piepaeverea ragai iava o-ia revasiva. Vosa aa vo vokio-ia oira-ia ukaiota, ra oisi va puraoro ragaire rugoopata.” <sup>26</sup> ✱ Osa iava uvuipatai ra Turaro vo kopiario vigeipa oirao piepata rutu vo vokiro rutu-ia, varao oara-ia va vao bret-ia aiopata, ora oira-ia o kap ukaiopata vo rutu tugurasa vo vuutao-ia oa iava vo voki-ia vorevira voreroverea Turaro.

### *Ro Ira Komunjon Vuri Piereva, Ira Vo Vuriaro Voriaro Toupai Rera Ragapa*

<sup>27</sup> Eisi osa iava vosa ro ira vurivira vao aioreve Turaro vaaro bret ora ukaioro o iava kap, ira raga ita-a ira vuria purarevoi vareo rutu-ia oiso, Turaro iava varaua ora revasiva. <sup>28</sup> Visii rutu katakataivira ora visii iava sopaura oavisii-ia uvui iraupatai ra voura sisiro rovota. Oa iava uvuipatai ra ora visii varaaro-ia rugoara oavisii torevokovira Pautoa iare rugorugoopata. Ra va iava taru va aiota bret ora ukaiota kap-ia. <sup>29</sup> Uvare vosa akukuvira raga va vao bret aioreve ora oira-ia o kap ukaioro vo rara viapau oiso vearovira ora rera sopaaro-ia tarai rovoro oiso rugoopaoro, Apeisi ragavira rutu vao vituaro porearo toupai oiso, Vao-ia Turaro iava varaua oiraopaua rutu. Oire uva va-a eva oa iava voua aiorevoi ora ukaioro oira-ia o kap, oarea-ia ora rera raga-ia vuria purarevoi vo Pauto osireiario-ia. Ra va-ia ora rerapa voria oureve siraoa-ia tavaka. <sup>30</sup> Eva raga ita-a oa vituaro iava oearovu riro irara visii iava upiapaaveira ora raveravepaaveira. Ora oearovu visii iava oisoa kopiipaave. <sup>31</sup> Vosa visii rutu ora visii iava sopaura oavisii sisiro rovopata rutu, oa iava Pauto viapau oisi visii piepareve eisi. <sup>32</sup> ✱ Ari ita, Turaro vigei varaaro vuri vovouro rovirieipareveira, oa iava vigeipa tavaka vateparevoi vigei torevokopaoro vo vokio-ia, vaopa oiso, teapi opesi ovoivioverea voeao tapo oea viapau oirao pie vovou vaiva toupai voi.

<sup>33</sup> Araoko irara oaa, vosa Turaro vo aioaro aiosa ora gurupata, ra opeita vagevagepavira va aiopata. Ari oearovivure tue rovota voeao oea tapo koatapaai va aiosa. <sup>34</sup> Ora vosa irai visii iava ogoero, uva oiso vearpai ra rovovira ora rera vo kepaaro-ia aio rovoreve. Oa iava Pauto viapau uvuipa ra visii ruture oiso puraro, “Vurivira eisi piepatavoi visii,” vo rara oisi eisi ora gurupata vare vao Turaro vo aioaro.

Oaravuei touvira varao oarapa ruipaparai oiso ra visiipa vara torevokoa. Osa pieavere rara vo osa visii tapo tousa urioravere rara.

## 12

### *Vo Toupai Ovatevatearovu Rutu Iava Tugoropato Uraurato Varaaro*

<sup>1</sup> Araoko irara oaa, visii vo akeroaro pukopaavoi varao iava vatevateara Tugoropato Uraurato varaaro. Uvare oiso ruipaparai ra vearovira rutu roroi ovira vara-ia taraipata. <sup>2</sup> Uva taraipatai oiso ragavira osa toutava voari tuariri, vo uva viapau oisoa oirao pie vovou vaiva toupata, vo vuutao-ia oa-ia oisoa tokarasi irara raga rei piepata, voeao oea vo vovouroaro sirova utupaoro visii raga ora piro pietaepa. <sup>3</sup> ✱ Oiraopavira rutu vara-ia varao vearovira taraipata oiso-ia, Ro ira tuvetuvepareve Pauto reraaro Uraurato, ira viapau uvuiparoi rutu ra tovi reoro vai purareve oiso puraoro, “Rerape eera Jisas, ira-ia vuria toupai voi.” Ora oiso tapo osa iava viapau irai uvuiparoi ra oiso puraparo, “Rera-a ro-ia Jisas ragai reraaro Turaro,” vo ovusa viapau rera vo ruiparo Tugoropato Uraurato sirova utuparo.

<sup>4</sup> ✱ Ovatevatearovu rutu toupai voi oara vatepareveira kataitoo raga

Tugoropato Uraurato. <sup>5</sup> Ora oaravu rutu tapo kovoara toupaivoi vara purapasa. Oara-ia uvuipaviei ra vara purapape kataitao ragapa Turaro. <sup>6</sup> Ari ita, oirara rutu viapau oiso uvuipaai ra vaeavira okovorovu rutu pura-paive Pautoa-pa. Ari kataitao raga Pauto ira oirara rutu oiso piepareveira ra rera ragapa kovopaive voea vo rugoaro-oia uvuivira. <sup>7</sup> ✧ Oiso osa katakataivira Tugoropato Uraurato vo kovoaro eveipaiveira ora voea iava sopaura-ia oaravu-ia vatevateara varao oearovu rutu oirara tauvapasa <sup>8</sup> oiso-ia, ro Tugoropato Uraurato ira iravupa reoa vaterere, oisore ra va iava oirara vo rugoaroaro soporepareve. Vo osa rera raga ita Tugoropato Uraurato iravupa rugoa vaterere vaore, ra oearovu oirara tarai pierere vao iava oa vatauvira toupaveira. <sup>9</sup> ✧ Uva rera raga ro Tugoropato Uraurato ira riro gorua oirao piea iravupa oirato vaterere, oiso ra va iava oearovivu vearovira tauvapareve. Ora iravupa aia ita gorua vaterere oisore ra va iavirava oearovu oirara ruvarupareve voea porete piepaoro. <sup>10</sup> ✧ Ari iravupa gorua vaterere ravoto kovoro purapasa. Ari iravu oiso pierere, ra Pauto vo taraiaro oiraopavira rutu kosi piepareve goruvira. Ari iravu oiso pierere ra oearovu rutu oirara vo tarairoaro rovirieipareve oiso purapaoro, “Vova vo kovo-ia Tugoropato Uraurato, ari ourauravu raga iava kuuvua vao-ia.” Ari ita, ovusa iravupa pisa visivi rutu reoa vaterere, ra va iavirava reoreoparo. Ari iravupa tarai vaterere, ra vo tarai iava eva pisa reo rutu porereve. Oa iava uvuipaai oearovu vo reo porearo rutu-ia tarai-paave. <sup>11</sup> ✧ Ari ita, evara rutu orekerovu rutu oara toupaivoi vatevateara, vo osa kataitao ragaei Tugoropato Uraurato ira oirara rutupa katakataivira oisi vara piepareveira ora rera raga vo ruipaaro sirova utupaoro.

### *Vigei-a Ovarurovu Vova Krai Iava Kataiua Varaua*

<sup>12</sup> Oire Krai-a ro ira oiso toupere, Kataiua varaua oua-ia ovarurovu epao. Ari ita, uva osarovu rutu-a vo ovusa kataiua raga iava varaua vara-a. <sup>13</sup> ✧ Oiso ragavira Jiu-a voeao-ia, ari ratau tou irara-a voeao-ia, ora voeao oea kovo ragapaiveira akukuvira vori ou asavira. Ari voeao oea monipa kovoro purapaiveira ora voeapa, vigei rutu-a vao vigoa ora reesiviepa oiso, Vigei-a kataiua iava varaua. Oa-a vao oa iava Tugoropa Reesi ouepa vigei rutu vo Krai-va ora tavosioro vao iavirava Tugoropato Uraurato goruaro. Iu, Pauto vigei vaeavira rutu oiso piereva, oiso ra vigei rutu ukaopavio ovoovovira rera iava Tugoropato Uraurato, ra rera tovopape vo vigei varaaro-ia tootooara oavi.

<sup>14</sup> Vouao varaua viapau oiso kataiua rutu-a. Viapau. Ari ovarurovu rutu voua iava toupai. Osa rutu toupaveira Krai ira varaaro iava ovarurovu rutu toupaveira. <sup>15</sup> Vosa tasi tauo oiso purape, “Viapau oiso vavaea-a ragai. Oa iava viapau oiso toupavoi, Ragai-a ovaruvu voava.” Uva oisi-a eisi osa viapau torevokopai, uvare tasi tauo-a oa oiso toupai, Oavu voua iava varaua. <sup>16</sup> Ora vosa kokito oiso puraro, “Viapau oiso ragai-a osireito. Eisi osa iava viapau oiso ragai-a varaua iava.” Eva oa viapau torevokopai, uvare rera-a kokito voua iava varaua. <sup>17</sup> Vosa voua rutu varaua oiso raga toupave osireitoa raga, oire uva apeisi-a, uvuiparoi osireito ra uvureve? Ora vosa voua rutu varaua oiso raga toupave, Voua kokitoa raga, uva apeisi-a? E uvuiparoi ra geesipareve, raa? <sup>18</sup> Viapau. Uvare Pautoa raga ora rera vo vovovuro sirova utuoro ovarurovu rutu tovoreva varaua-ia. <sup>19</sup> Vosa katai varuvi raga toupave, uva apeisi-a? Oiraopavira rutu uvare viapau oiso uvuipai oisi eisi toupave varaua. <sup>20</sup> Oiraopavira rutu viapau oiso oisi-a eisi, uvare ovarurovu rutu iava voua-a kataiua raga varaua.

✧ 12:7: Ef 4:7 ✧ 12:9: Mt 17:19-20 ✧ 12:10: Ga 3:5; 1 Jo 4:1 ✧ 12:11: 2 Ko 10:13 ✧ 12:13: Ef 2:18; Ga 3:28; Kl 3:11; Jo 7:37-39

<sup>21</sup> Uva viapau osireito uvuiparoi ra oiso puraro vavaeare, “Viipe. Ra ragai ragape. Uvare ragai raga uvuiparai.” Ora kukueva viapau oiso uvuiparoi ra tasi taure oiso purao, “Viipe. Ragai uvuiparai. Uvare viapau uvuiparoi ra ragai tauvari.” <sup>22</sup> Ari ita, oisi eisi viapau torevokopai. Oa-ia eua viapau uvuiparoi ra vearovira toupape, vo rara viapau ovarurovu viapau toupape vigei-ia, vo varuro oara raveravevira vai toupaveira. <sup>23</sup> Ora vo varuro oarare oiso rugorugooaaveira, Akukuara raga evara, ovarurovi-a evara oara-ia uvui iraopaviei ra kasivarivira rutu varavi tokipape. Ora vo varuro oarare oiso rugoopavioveira, Viapau oiso vearovira kekepa piroi, ovarurovi-a evara oara-ia vearovira rutu vara ruupape varoara-ia. <sup>24</sup> Vo varo oa-ia viapau uvuiparoi ra vara ruupape ovaruroa vearovira rutu kekepa piro. Uva vo varuro rutu takuvureva Pauto kataiua rutu varaua puraoro, oiso ra oirara vo varuroviore vearovira rutu rugooaave oara akaipa visivi toupape. <sup>25</sup> Oire uva oisi-a eisi osa vituaro iava ovarurovu viapau oiso roopavira toupaveira. Viapau. Ari evo varuro rutu vaeavira rutu ora tauvapeira ora vo varuro raga ora tokipaoro. <sup>26</sup> Vosa ovaruvu vuria tavaka ouve, ra ovarurovu vo tavaka sovove ora vara-ia. Oa iava vara rutu vo sirao kaeve. Ari vosa ovaruvu vaisiaro kae pieve, oa iava ovarurovu roruve va tapo.

<sup>27</sup> ✧ Oire visii rutu ora takuvutaepa rutu. Oa iava oiso toupata visii-a kataiua rutu oiso osa Krai. Ari ita, visii rutu katakataipavira toupaveira oiso osa ovarurovu voua raga iava varaua rera vouaoro. <sup>28</sup> Osa iava Pauto ovarurovu rutu tovtovoreva torevokovira ora vara vo tavukiroaro-ia oiso ragavira, Rovopa irara-a voeao aposel irara. Uva eraopaai voeao-ia profet irara. Uva vo pevapaai voeao-ia tarai vatepa irara. Uva voea isivaaro iava voeao-ia oea ravoto kovoro purapaveira. Uva evoea isivaaro-ia voeao tapopa vo goru vatereva oirara ruvarupa irara ora voeao oearovu tauvapa irara, ora voeao oearovu rutupa irapa irara, ora voeao oea pisa reoro rutu-ia reoreopaaveira. <sup>29</sup> Oire uva viapau oiso voea rutu areiivira rutu toupaveira oiso, Voea rutu-a profet irara, ari voea rutu-a tarai vatepa irara. Viapau. Viapau oiso voea rutu gorua oupaveira Tugoropato ruvara-ia Uraurato vao ravoto kovoro purapa, ora <sup>30</sup> oirara ruvarupa, ora vao pisa reoreoro-ia reoreopa, ora vao pisa reoro aviavi piepa. <sup>31</sup> ✧ Osa iava eisi uvui iraopatai ra ora visii iava sopaura rutu tovtova varao-ia vatevateara oara evara-ia uvuiparoi ra putepave rutu.

Ari ita, oavuei aia oa epao tovira aue riroa rutu sirao vovou. Vosa viapau vava toupata, ra viapau uvuipatai ra evo vatevatero kovo piepata vo oearovivu tauvapas.

## 13

### *Vo Toupai Oearovivupa Siraopa Vovou*

<sup>1</sup> Uva va vao-ia rovoa rutu aue siraopa vovou oa oiso toupai, Uvuiparoi ra oearovu rutu vo reoroaro-ia reoreopara, ora vo reo enselpa irara vaoro pisa reo rutu. Ari vosa viapau siraopa vovou purapaa oisi eisi reopao, ra ragai vo reoro oiso raga guruko ragapave osa toiva o iria akukuvira guruko ragapaveoi, uvare oira toga ragapai. <sup>2</sup> ✧ Ora vosa goruvira rutu Pauto vo rugooaro kosi piea va iava siposipopao. Ora vosa orekerovu rutu-ia tarai para varao oara viaevira toupape ora varao oara vatauvira toupaveira. Ora vosa riroa rutupe oirao pie vovou ragai-ia oa iavirava uvuiparoi ra pukuia virua uvavure. Ari vosa viapau siraopa vovou purapaa

eisi evara purapaoro, oire ra oiso raga toupaa, Akukupapatoa raga ragai. <sup>3</sup> ✧ Ari ita, vosa ora ragai varaaro rutu orekerovu vatepaa oearovivupa apota irara. Ora vosa ora ragai raga iava varaua iava vasea oearovupa, oire ra ragaire kasipupaoro ragai iava voua kasiive vaopa, uvare Pauto vo kovoaro-a oa purapaaveira. Oara rutu-a evara oara-ia viapau vitua vai toupai, vo rara viapau siraopa vovou vai pura rovopaa.

<sup>4</sup> ✧ Oire uva va-a vao-ia siraopa vovou oa oiso rutu toupai osa kave vovou ora vereopa vovou. Uva ro ira siraopa vovou purapareve, ira viapau uvuiparoi ra orekerovu riiriipaoro iravure vuri rugorugoo purapareve, oiso ra rera varaaro rutu ou ragareve. Ora vo osa viapau ora rera raga-ia vovouparo. Ora viapau oiso ra ora rera raga vaisiaro rei piepareve.

<sup>5</sup> ✧ Ora vo osa ro ira-ia siraopa vovou toupaveira, ira viapau uvuiparoi ra oearovivu arii piepareve. Ora ira viapau uvuiparoi ra iiruko vovou purapareve. Ora viapau uvuipa ra vagevagepavira kasipuparo. Ora vo osa viapau oiso ra varaore vuiriara rugorugoo para oara purapave oearovu rera-ia.

<sup>6</sup> Oire uva rera ro ira-ia siraopa vovou toupaveira ira viapau uvuiparoi ra rorupareve vuri rugorugoo-ia. Ari uvuiparoi ra varao-ia vearopa rugoo rutu orekerovu varaaro rorupareve, varao oiraopa rutu varaaro ora vearopara rutu. <sup>7</sup> ✧ Ari ro ira siraopa vovou-ia toupaveira, ira viapau uvuipa ra va eakareve vo osa riroa tavaka pou piro rera-ia. Ora vao tapo vosa oavu-ia oirao piepareve, ra viapau uvuipa ra va iava ora rera vo rugooaro tavarioreve ita aia. Ora vao tapo vo osa rorupaoro toupaveira varaore tuepaoro, vo osa Pauto vo utupavira rera vatereverea, ra viapau uvuipa ra vo roru eaka pierve. Ora uvuipa ra kave vovou purapareve voeaore oea viapau rera vo rugooaro sirova utupave.

<sup>8</sup> Va-a vao siraopa vovou oa pauakavira rutu toupaveira. Oirara uvuipaaveira vearovira Pauto vo reoaro kosi piepasa. Ari ita, uva katai voki raga iare va-a. Ora vao osa oirara vatevateara oupaveira, oire ra vara iava reoreopaave pisavira reopaoro, oreoroa rutu-a evara oara opesi ovoipapeira. Oiraopavira rutu uvare riroa rutuei taraia vo Pauto vo ruipaaro iava. Uva ita, osa vo tarai tapo opesiperea. <sup>9</sup> Oara rutu vituaro-a vao-ia, uvare vigei varaaro-a vatevateara oara viapau rutupavira toupaveira varao oara-ia taraia oupapeira, ora oara iava Pauto vo reoaro kosi piepapeira. <sup>10</sup> Viapau. Ari oavu epao rutupa rutu. Vosa va eva rutupa pou piro, ra va iava orekerovu rutu evara kurokuroara opesi ovoipe.

<sup>11</sup> Oire vo osa kakae visivi oisoa toupaa, uva voa-a evoa uva oisoa veu visivi rutu reopara. Ora tapo oiso rutu voa oisoa rugorugoo para osa oavu kakae vure rugorugoo paaveira. Oire uva vo vokio-ia ragaiei oira vasito. Eisi osa vituaro iava kakae vure vo vovouroaro kavuava. <sup>12</sup> Varao oara kekepai vigei vo vokio. Uva viapau oiso roroiovira vara kekepai, uvare turopavira oiso vara vurapai osa sisiroara-ia orekerovu turopavira kekepapeira aauvira. Ari vovio utupaua vara evara viaeperea vigeipa, ra va iava roroiovira vara kekepe. Vo vokio-ia Pauto varaaro-ia taraiparai, vo osa ragaipa vavagisipai. Ari evara rutu taru eveiaverea vovio utupaua vara-ia roroiovira tarai ovoiooro, oiso rutu osa Pauto ragai-ia tarai ovoiparoveira.

<sup>13</sup> ✧ Iu, osa ragavira-a eisi osa touperea voari utupaua. Ari vo vokio-ia oiso rutu toupai vo peva vao oa reipai rutu oiso-ia, oirao pie vovou-a vao-ia, ari rari vovou-a vao-ia, ari siraopa vovou-a vao-ia. Oa-a vao-ia siraopa vovou rovopa rutu vo vo peva iava.

## 14

*Vo Toupai Rovopa Iava Vatevatea Tugoropato Uraurato Vaaro*

<sup>1</sup> Ora visii iava sopaura rutu tovota siraopa vovou rutu purapasa. Uva viapau uvuipatai ra oiso ovatevatearovre ovaupata. Uvare vo vatevatea vao-ia Pauto vo reoaro kosi piepa, oa-a eva tapo visiipa reipapeira. <sup>2</sup> ✱ Aue vituaro iava uvare ro oirato ira pisa vaivaisi-ia reoreoparo, ira viapau oiso oirarapa reoreoparoi. Viapau. Ari eera Pautoa ragapa reoreoparoi. Eake iava? Uvare oirara vo rugorugooroaro vavagisipai rera vo reoaro uvupaoro, vo osa vatauvira rutu oiraopa rugoo kosi pieparevoi Tugoropato Uraurato vo goruaro iavirava. <sup>3</sup> Ari ro ira roroiiovira rutu Pauto vo reoaro kosi piepareve, ira raga ita oirara taupaparevoi voea vovouroaro tapo goru piepaoro. Ora voea vateparevoi kave vovou. <sup>4</sup> Ari ro ira pisa vaivaisi-ia reoparo, ira raga ita ora rera raga ora taupaparoi. Ari ro ira Pauto vo reoaro vearovira rutu kosi piepareve, ira-a ita eera ira lotupa irara rutu taupaparevoi taraia vatepaoro Pautoa iava. <sup>5</sup> ✱ Uva ragai vo ruipaoro-a vao-ia, oiso ra visii rutu pisavira rutu reopata. Ari rirovira rutu oiso ruipa iraparai ra vo vatevateaova toupata, oa iava vava uvuipatai ra vearovira Pauto vo reoaro kosi piepata. Oa-a vao oa iava ro ira roroiiovira rutu Pauto vo reoaro vatepareve, ira-a eera ira oiraopavira oirara rutu taupapareveira. Ari ro ira oreovu raga-ia pisa vaivaisiro-ia reoreoparo, ira viapau oiso piepareveira osa eera. Ari vao raga oiso-ia, vosa iravu rera vo reoaro porepareve, oa iava lotupa irara rutu uvuipaai ra taava rutu oupaive.

<sup>6</sup> ✱ Oire araoko irara oaa, e uvuiparai ra visii iare taveteoro visii tauvaa vo rara pisa visivi reoreora? Viapau. Ari vao raga vosa uriora ra roroiiovira Pauto vo reoaro vatea vao oa vatereva ragaipa, ora tarai reo vao rera ruvara iava va-a, ora siposipoara varao oara-ia visii tarai piesa urioravere.

*Visii Uvui Iraopatai Ra Pauto Vo Reoaro Kosi Piepata Vo Oirara Vo Reoaro-ia*

<sup>7</sup> Oiraopavira rutu vosa viapau vearovira pureo tavara vuvurepata ora aue gitaara tatupata, ra va iava ogurukorovu rutu puraave. Ra apeisi ragavira roroiiovira vara gurukoaro gauaro eveipata, raa? <sup>8</sup> Ora vosa ro ira utave vuvurepareve, oire ra vosa viapau roroiiovira gurukopave, ra apeisi ragavira oira gurukoaro eveioro oearovu oiso puraave, “Upoa purasa vatatopopaviei”? <sup>9</sup> ✱ Uva oisi ragavira vosa oisi eisi pisavira visii vo reoroaro vatepata, ra apeisi ragavira oearovu visii vo reoroaro uvupaoro vara vituaro-ia roroiiovira tarapaave? Ari ita, visii vo reoroaro oara ora ropi ragapapeira, oiso rutu osa kiuvu gurukoara kaepaoro avaparoveira. <sup>10</sup> Riroara rutu reo kakuro oara vo rasio-ia toupaveira. Oara rutu vituaro poreporearo toupaveira. <sup>11</sup> Ari vosa viapau eveivira irai oreoiaro uvua vao oreovu raga, oire uva eera-a ira ragaipa aapaapavira toupaveira, vo osa ragai ita oisi raga rerapa aapaapavira ita oisi toua. Ra ita viapau uvuipaveiei ora vegei-ia taraipasa. <sup>12</sup> Taraiparai oiso, Visii-a vao visiigoa ruipa irapataveira oiso ra vara rutuva varao vatevateara toupata, varao Tugoropato Uraurato oara vatepareveira visiipa. Uva osa iava eisi uvui iraopatai ra visii ita pute pie visivi rutu vatevateara kovo piepata, varao oara lotupa irara taupapaveira rutu voea vo vovouroaro oirao pie vovouro goru piepaoro rutu.

<sup>13</sup> Oiso osa ro oirato ira pisa vaivaisi-ia reopaoro uvui iraparoi ra Pauto arepareve variripaoro, ira raga ita uvuiparoi ra rera vo vaivaisiaro

roroiovira rutu porepareve oearovupa. <sup>14</sup> Oiso osa ora ragai-ia taraiparaveira, uvare ovokirovu-ia pisavira rutu vaivaisipaoro variriparaveira, vo rara Tugoropato Uraurato vo vaivaisiro tovopareve vo ragai sopaoro-ia. Uva ora ragai reraaro raga iava uraurato oisi oiraopavira rutu vaivaisipaoro variriparaveira. Ovusa viapau vo vaivaisiro-ia taraiparaveira. <sup>15</sup> ✧ Ra va iava eva eake vai pura iraoa? Ari vao oiso osa vearopai vo osa ora ragai iava urauratoa oaa rutu iava variripara, osa vearopai tapo vo osa ora ragai vo rugorugooaro rutu iava aviavi pievira variripara. Oiso osa tapo ragai vo vearopai vo osa erapara ora ragai reraaro rutu iava uraurato, ra ita oisi raga aviavi pievira rutu erapara vova ragai vo rugorugooaro-ia. <sup>16</sup> Uvare vosa irai visii iava vearo vaisi purareve Pautoa-ia vo ora irai iava uraurato vaiaro rutu-ia oisi eisi pisavira vaivaisipaoro. Ra apeisi ragavira iravu rera vo rearo sirova utuoro oiso puraro, “Vearovira rutu Pauto”? Osa eisi viapau uvuiparoi. Eake iava? Uvare viapau oiso rera vo rearo vearovira aviavi pievira uvurevo. <sup>17</sup> Ari ita, vosa visii tapo ita pisavira rutu vaivaisipaoro oisi vearovira rutu variriara purapata Pautoa-ia vuurapa vaisi purapaoro, osa eisi vearopai ita. Uva aue raga, apeisi ragavira uvuiparoi irai ra visii ruvara-ia tauva oureve vo osa visii vo variroaro uvupareve eera sopaipato. <sup>18</sup> Vearo vaisi purapaaveira Pautoa-ia vo vaivaisi iavirava vao-ia pisa. Uvare rirovira rutu va-ia reoreopaoro variriparaveira oearovo vo vaisiroaro-ia pute pievira pisaara. <sup>19</sup> Ari vo uva lotu puraparaveira oearo rutupa, uva vo raivarei toupaivoi, oiso-ia osa vao-ia, rovopa reoreo vatepa, oiso osa ragavira uvuiparaveira garepa reoro-ia aviavi pievira reoreopaoro. Uva eraopa vao-ia, oa-ia oisi raga ita reoreoa vatepa vaopa, vo osa riro vavagisi reo rutu-ia riropara vaivaisipaoro reoreo vatepara. Ra viapau oiso irai uvuiparo aviavi pievira vara uvupaoro vara oupareve. Uva apeisi-a? Ari oiso-ia osa vao vearopai rovoa, osa ragavira ragai vo vovouroaro-ia uvuiparai ra aviavi pievira oearovivu tarai piepaa.

<sup>20</sup> ✧ Araoko irara oaa, opeita oiso ragavira varaore pisa vaivaisiro veuvira rugorugoopata. Ari ita, oiraopavira rutu uvare veu kakae viapau vurua vai. Ra visii tapo ita uvuipatai ra oisi eisi piepata. Ari uvui iraozatai ra oiso vearovira rugoopata osa oira vasi irara vo rugooraro toupaveira vo vaivaisiro iava. <sup>21</sup> ✧ Vo Tugoropa Vuku-ia oiso purapai, ‘Vo oearovu-ia voeoro oreorovu raga iava voea, ora vo oearovu gisipoaro-ia voeao osararovu iava ragai vo rearo vateavere voeaopa ragai voeaoro. Ari eagara vosa viapau ragai gisipoaro sirova utupaave vo voea-ia va uvupaoro.’

Eisi osa puraroepa Turaro vo osa Jiu vo kaureo vovouroaro kareke piereva. <sup>22</sup> Oire uva vo vatevatea-a vao-ia pisa vaivaisi oa iava uvuipaai oirao pie asa irara ra Pauto vo goruaro eveipaive vao oa kaureo vovou kareke piepaiveira. Ari va vao-ia vatevatea oearovupa oisore ra va iava goruvira rutu Pauto vo rearo kosi piepaive, oa toupaveira vaopa oiso ra va iava voeao riro oirao pie vovou irara Pauto vo goruaro eveipaive vao oa Pauto vo tauvaaro kareke piepaiveira.

<sup>23</sup> Oire vosa oirao pie vovou irara ora guruave lotusa, ra va isivaarua rovoave pisipisavira vaivaisiro. Uva apeisi vosa oearu voea iare koataave voeoro iava oirao pie vovou asa irara, voeao oea vo vaivaisiropara ruruvutuvira toupave. Uvare oiso puraave vai pasi, “Easi voeao kokoropaoro oiso reoreopaai.” <sup>24</sup> Ari vosa voea voeao lotupa irara ora guruave Pauto vo rearo iava siposiposa, oa-a eva oa iava voeao oirao pie vovou asa irara uvuipaai ra ora voea iava sopaura oaive sovooro oiso puraave,

“Oiraopavira rutu uvare vuritoavi-a ragai.” Aue iava uvare vo reo eva uvuivoi vo voea iava sopaura togavoi voea vo vovouroaro vuriara kareke pieoro. <sup>25</sup> ✧ Ora vo osa vo reo eva voea vo rugorugooroaro roroiove varao oara vatauvira toupaveira. Oa vituaro iava uvuipaai ra voea rutu ora takuvave Pautoa-ia vuurapa vaisi purasa oiso purapaoro, “Oiraopavira rutu, uvare Pautoa epao visii-ia.”

*Okovorovu Rutu Varao Lotua Varaaro Uvui Iraopai Ra Torevokovira Rutu Karekepape*

<sup>26</sup> ✧ Oire uva apeisi-a oiso osa ragai vo reoaro opesiaroei? Ari oiso, vo osa visii rutu ora gurupata vuurapa vaisi purapasa, uva oiso vearopai vosa iravu erava kae pie rovoreve. Ari iravu tarai reo iava siposiporeve. Ari iravu vo reo kosi piereve oreoa vatereva Pauto rera ragapa. Ari iravu siposiporeve pisa reo vo vaivaisiaro iava, vo ovusa iravu vo reo porepareve. Ari ita, viapau rutu uvuipatai oavu avu vai purasa, vo rara viapau visii rutu lotupa irara tauvapaive va eva. <sup>27</sup> Vosa oearoi visii iava oiso vovoupaave ra va-ia vao pisa reo vo vaivaisiaro reoreoave, uva uvuipaai ra oiso reoreoave vaiterei raga, eke vo peva tupetupereovira, vo osa oavu katakataivira voea vo reoreoroaro porepasa. <sup>28</sup> Ari vosa viapau irai toupaveve voea vo reoreoroaro porepasa, osa iava uvui iraoparoi ro ira pisavira vaivaisipaoro siposipopareve ora tape piero vaopa, vosa eisi reoreopaoro ora rera raga vo reo uvupareve ora Pautoa tapo. <sup>29</sup> Ari ita, oiso vearopai vosa aiterei o vo peva oiso vovouave ra Pauto vo reoaro kosi pieve vao oreoa voea ragapa oisoa vatepareve. Uva oisi-a eisi osa iava oearovu uvuipaai ra vo peva eva vo reoreoroaro rovirieive, oiso ra vo reo vituaro-ia taraiave. <sup>30</sup> Ari vosa irai oavu tapo pauparo, ra Pauto rerapa oreovu vatereve, oire ra va iava uvuipaai oearovu ra iravu siposipopato tapetapeive oiso puraoro, “Ora tape pieu.” Ra va iava rera eera eraopato Pauto vo reoaro iava kosi piereve voeapa. <sup>31</sup> Visii rutu uvuipatai ra Pauto vo reoroaro kosi piepata oearovupa rera vaaro iavirava vatevatea. Uva aue raga vosa tupetupereovira oisi siposipopata, osa ragavira iava visii rutu uvuipatai ra ora visii vo reoroaro iavirava taraiia oupata. Ra vara iava visii iava sopaura goru piepata tapo. <sup>32</sup> ✧ Ari ro oirato ira vatereve Pauto ora rera vo tavitaviaro, ira uvui iraoparoi ra ora rera iava uraurato rei piepareve rutu vo osa evo reo kosi piepareve. Teapi reoreo ragaparo akukuvira. <sup>33</sup> Eake iava? Uvare Pauto viapau oiso vo vatevatearo vigeipa oiso vatepareveira, ra vara-ia ora vavagisi piepavio lotu purapaoro. Viapau. Ari oiso ruipaparoveira ra torevokovira kave vovouvira rera vo ruipaaro sirova.

Vo osa vo uvaroa ora gurupata visii oirao pie vovou irara lotupasa, <sup>34</sup> ✧ uva voa-a evoa uva riakora raga rutu uvuipaai ra ora tape piepaave vo oiso rutu osa rutu airovu lotupa riako ora tape piepaaveira vo uvarovu rutu. Vaopa uvare viapau oiso vairopa torevokopai, oiso ra akukuvira reoreo ragapaave, uvare Jiu vaaro Reo Taisi oiso purapapeira, ‘Riakora uvuipaai ra ora vairo raga vo tavukiroaro-ia toupave. Uvare viapau uvuipaai ra oirara vo tavukiroaro iare putepave.’ <sup>35</sup> Vosa oiso ruipapaave ra vara-ia taraiapaave varao oara karekepe vo visii vo uvuruaro-ia, oarare uvuipaai ra vatua irara oaive akepaive vo ora vo vureru vo keparoaro-ia. Vaopa vosa iriai riakova vai lotua-ia reoreopao ora oira vo ruipaaro ragai-ia, ra oisi iava vigei rutu ariia oupape. <sup>36</sup> Uva apeisi-a? Ragaiva ora kaureopatai? Oire ragai tavita oiso, apeisi-a? E visii raga-a visiihoa iare pou piropa Pauto vo reoaro? E rera vo reoaro visii vo lotuaro sovara iava rovoepa?



<sup>37</sup> Ari vosa irai visii iava oiso ora irai-ia rugooparo, Ragai-a vao Pautoa reraaro kovopato, ora ragoapa Tugoropato Uraurato vatevatea vatero-  
rao, uva uvuiparoi ra irai ragai vo rigatoaro eveireve oiso purasa, “Pol vo  
rigato purarevora vao iava uvare Turaro goruvira rutu rera arureva oisi  
va purasa.” <sup>38</sup> Uva ro irouto oirato ira viapau ragai vo rearo eveireve  
oiso, Turaro rutu iava vo reo-a vao, uva va iava ira viapau torevokovira  
ora vaisipa oiso puraoro, “Ragai-a vao Pauto reraaro kovopato.”

<sup>39</sup> Oire araoko irara oaa, oiso ora visii vo vovouroaro piepata. Oa iava  
uvui iraopatai ra Pauto vo reoroaro kosi piepata vara iava siposipopaoro.  
Ari vao raga oapa vuripai oiso, Opeita oearovivure korukorupata voeao  
oea pisa reoro-ia vaivaisipaive, uvare Tugoropato Uraurato vo goruaro-a va  
eva. <sup>40</sup> ✧ Uvui iraopatai ra vara rutu orekerovu torevokovira rutu purapata.  
Opeita visii raga ora vavagisi piepata vara-ia varao vo lotua sovara-ia.

## 15

### *Krais Kopiroepa Oa Iava Vorevira Toreroepa*

<sup>1</sup> Araoko irara oaa, oiso vovouparai ra visii rugoo piea vaore Vearo  
Siposipo oa iava vokiara rutu-ia visiipa oisoa siposipopaa. Vao oa out-  
avoiva, goruvira rutu torepataera oirao pie vovouro oavisii-ia. <sup>2</sup> Vo  
siposipo-ia oa iava ragai oisoa visii siposipopaa, oiso ra va-ia goruvira rutu  
pituta. Oa iava Pauto uvuiparoi ra visii vorevira oureve ora rera iare. Uvare  
va-a vao-ia vo osa oeai rovvovira rutu va oirao pie ragapaivora, vorevira va  
ita eakaive. Osa-a eisi osa iava Pauto viapau uvuiparoi ra oisi ora rera iare  
vorevira oeai visii iava oureve.

<sup>3</sup> ✧ Vo reo-a vao rovoa rutu oa ou rovoava, oa iava visiipa vo reo ita  
aia topa pieavora. Vo reo oa oiso purapapeira, Krais kopiiroepa vigei vo  
vovouroaro vuriara voriaro ouoro. Oiso rutu osa Tugoropa Vuku rera  
iava tavitavi rovoepa vigeipa. <sup>4</sup> ✧ Vao oa isivaaro iava rera tovaiva. Oa  
iava vorevira Pauto rera tore pierava vo pevapa voki-ia. Oiso rutu ita osa  
Tugoropa Vuku vo siposipoaro oisoa tavitavipape. <sup>5</sup> Uva vorevira rovvovira  
rutu Pifa iare ora karekeroepa. Oa isivaaro iava voea rutu iare aposel irara  
urioroepa. <sup>6</sup> Oa iava ita vo vavae vovoto rutu iare (500) oirara vo vutavi  
raga-ia eva ora karekeroepa, voeao oea oisoa rera sirova utupaave. Oea  
iava oearovuei riro irara totooivira toupavoi, vo ovusa ita oeavu epao  
voea iava oea kopiiiaepa. <sup>7</sup> Oa-a eva isivaaro iava Jems ita rera kekereva  
ro ira lotupa irarapa reiparoveira. Oire voava voea rutu ita aposel irara  
rera kekeiva.

<sup>8-9</sup> ✧ Uva ragai tapo iare ora karekeroepa ragai vao ovoiopatoa rutu.  
Ari ita, ovoovovira ragai ovoiovira rutu kavauraepa. Uva voo-a evoa  
uva oisoa pisavira rutu rerapa toupaa, vao-ia osa Pauto voeaaro oirara  
oisoa vuri piepaa voviri rovopa visivi. Osa iava viapau oiso uvuiparai ra  
torevokovira ora ragaire oiso purara, “Vearoto-a ragai aposelto.” <sup>10</sup> ✧ Uvare  
Pautoa raga vo siraoaro-a vao oa iavirava oiso toupavoi vo voki-ia. Vao-  
ia siraopa vovou oa ragaipa vaterava. Oa vaaro-a vao siraopa vovou oa  
viapau oiso ora ropivira oiso ragai pie ragava. Viapau. Ari eva ouoro va  
iava kasivarivira oisoa kovopaa Pautoa-pa oearovu rutu aposel irara vo  
kovoroaro-ia putepaoro. Oiraopavira rutu uvare viapau oiso ragai vaaro-a  
va vao-ia. Ari Pautoa raga vo tauvaaro-a oa eisi ragai pieva. <sup>11</sup> Uva oisi-a  
eisi osa ragavira, eagara va iava oearovu-ia aposel irara oisoa va uvupata,  
eke ragai vai ruvara-ia pasi va uvutava. Uvare oiraopavira rutu-a, uvare

igei rutu Vearo Siposipo iava vaeavira siposipopaioveira vao kataia Jisas iava va-a. Oa iava va oirao pietava.

### *Vigei Vaaro Iava Torea Vorevira*

<sup>12</sup> ✱ Ari ita, igei vo siposipoaro-a vao-ia oa oiso purapapeira, Pauto Krais vorevira tore piereva kopiia iava. Uva apeisi-a, oiso osa iava oearovu visii iava oiso purapaaveira, “Voeao oea kopiipaaveira, oea viapau uvuipaa iava vorevira kopii tapirova torepave?” <sup>13</sup> Viapau vearovira reoreopaai oisi puraoro, uvare vosa vo reo eva oiraopape, ra vo reo kuuvupape Krais iava oiso, Vorevira toreroepa. <sup>14</sup> ✱ Ari ita, vosa Krais viapau vorevira toreroeri kopiia iava, ra viapau oisi oai iava osiposipoi igei-ia toupave. Oa iava viapau uvuipai oai oisi toupavora, igei-ia viapau oai oirao piepata. <sup>15</sup> Ora tapo vosa oisi eisi oai toupavori, ra oai iava oearovu visii iava oiso purapaave, “Kuuvu reoro rutu purapaaveira Pautoa iava.” Eake iava? Uvare oiso siposipopaioveira, Rera raga ita ira Krais vorevira tore piereva kopii tapi iava. Ari vosa visii vo reoroaro oiraopape oisi eisi oiso, viapau oiso kopii irara vorevira viapau torevarea. Vo osa ita oisi ragavira ita Pauto viapau Krais tore pieravori. <sup>16</sup> Vosa viapau vorevira kopii irara torevarea, ra osa oisi viapau Krais vorevira toreroeri. <sup>17</sup> ✱ Ora vosa Krais viapau toreroeri vorevira, ra akukuvira rutu oisi iava ora keakea ragapata visii raga rera oirao pie ragapaoro. Oire uva va-a eva oa iava visii raga ora opesi pie ragapataeri, uvare visii vo vovouroaro-a vuriara. <sup>18</sup> Vosa oiraopavira rutu oisi eisi reopata, osa iava voeri oearovu voeao oea oisoa Jisas oirao piepave oearoa oisoa kopiipaave, oea tapo ita uvuipaa iava oisi ragavira iava opesi ragaave vuria oupaoro. <sup>19</sup> Vosa vigei vao Kraisia raripavieri varao ragare vearopara rugoopaoro oara-ia uvuipavioveira ra vara oupape vo rasio-ia tootoovira toupao. Oa isivaoro iava viapau uvuipavieri ra oarai oupasa kopiipavio. Viapau, ari opesi ovoipavieri. Vosa oisi eisi oiraopaeri vigeipa, ra siraovira rutu oisi iava vigeivipa. Vo osa vo sirao eva vigei vaaro oearovu vo siraoroaro-ia uvuipaeri putepave rutu.

<sup>20</sup> Ari ita, oiraopavira rutu Krais vorevira tore piereva Pauto kopii tapi iava. Uva oisi-a eisi osa vo ovoovo puraoro iraroepa ipaoro voeao oea oea vorevira torevarea kopii tapiva. <sup>21</sup> Osa ragavira kopiia vo pitupituarovoepa kataitoa raga iava, ro ira vuria purareva rovovira rutu Adam. Osa kopiia iava torepave pitupitu-a vao oa rovoreva kataitoa raga ro ira vearo purareva Krais. <sup>22</sup> Uva oirara rutu kopiipaaveira, uvare rera sirovava voea rera aao iraraoro ro ira vuria pura rovoreva Adam. Eisi osa ita katai raiva raga sirova oirara rutu torevarea rara tootooro voeao oea Krais-va ora tavosi rovopaaveira. <sup>23</sup> Vigei rutu katakataivira torevioveira vorevira tootooro vo vigei vo vuutaaro-ia. Uva vigei reraoro ro-ia Krais ira vigeipa ira rovorovera, ra rera sirova utuvioveira, vo rara vorevira vorerovera vigei oupasa.

<sup>24</sup> Oire uva evo vuuta isivaoro iava vo vuutao pou pirovarea oa-ia rasito opesirovarea taru. Vo uva Krais gavman irara rutu opesi piereverea, ora reipa irara, ora turaro irara, voeao oea vo rasitoo-ia toupaveira ora voeao oea uvarovu rutu toupaveira. Oa-a eva isivaoro iava taru orekerovu rutu-ia puterevarea rara varao oara reipapeira vigeipa. Oire uva oisi eisi va puraoro rera vaaro Turaro gorua vaterevarea ropa reitoo rutu Pauto Aite. <sup>25</sup> ✱ Eva ita oa vituaro iava vo goruei vao-ia Kraisia, oava vo tuguraroverea uva Pauto ora rerava keripa irara opesi piereverea voea tovooro vo Krais kokotoaro rooro. <sup>26</sup> Uva ovoia rutu-a vao kopiia vo pitupituarovo Pauto

oa tapo opesi pie ovoireverea. <sup>27</sup> ✧ Aue iava uvare Tugoropa Vuku oiso purapapeira, 'Pauto orekerovu rutu tovoreva Krai kokotoaro reroaro, rera raga toki ruvarautoa rutu.' Uva taraipaviei vo reo eva poptaro-ia oa viapau oiso oiso purapapeira, "Pauto ora rera raga ora tovoroepta Krai kokotoaro reroaro." <sup>28</sup> Viapau. Uvare Krai raga ira orekerovu rutupa reiparoverea. Oire vo vuuta-a eva oa-ia rera raga ora tovoroverea Pauto vo Saraaro-ia. Osa iava Pautoa raga rei iraoparoverea rutu orekerovu rutupa ora rera tapopa Oviito.

<sup>29</sup> Ari oavu-a vao-ia osa oearovu baptaisa oupaiveira voeare rugoopaoro voeao rovo kopii irara, oire ra oisi iava Tugoropa Reesi oupaive. Oire uva apeisi-a? Vosa viapau vorevira tootoave, uva eake-a vao oare voeao rovo kopii irara rugoopaoro baptaisa purapaiveira? <sup>30</sup> Ora apeisi-a tapo igei-ia, vo osa vokiara rutu-ia ora igei iava vasepaioveira, oiso ra oearovu vai igei vuri piepaive pasi, vo osa vo kovo purapaio vao-ia. <sup>31</sup> ✧ Araoko irara oaa, oiraopavira rutu uvare vokiara rutu-ia kopii ragai iare tutuu piepaiveira rutu, vo osa Pauto vo kovoaro purapaa. Oreoa eva oirao piepaavo rutu, uvare roru iraopaaveira visii-ia. Vao iava osa Krai Jisas tapo ora tavosipataveira. <sup>32</sup> Ari vosa riro avuavu kare tapo oiso ora upopara vuria ouoro vo uruiio-ia Efesas-ia. [Oa-a vao iava ovoovovira oiso reoreoparai riro kasipu vovou irara reesipaoro.] Uva aa vao-a vao veoro-a ragai vaoro oa ouaverea vo upo iavirava eva ragai vaoro? Asi viapau oaiei. Ari ita, vosa kopii irara viapau oiso vorevira toreverea, oire ra oisi iava eagara, "Uvuipaviei ra aio ragapape ora ukaio ragapavio, vao iava osa vokipavira kopii ragaviovere." Oreoa vao oearovu purapaiveira.

<sup>33</sup> Opeita visii ragai ora keakea ragapata vao iava, osa oearovu visii tapo toupaooro ovovourovu vuriara purapaiveira. Uvare uvuipaai ra visii tapo vuri piepaive. <sup>34</sup> Poreta viro veoro rugoo puraoro vorevira. Vuri vovouro oavisii pura arapa eakata. Oa-a vao oa iava oiso visiere purarai visii arii pieoro. Uvare oevaeui visii iava voeao oea touvira Pautoa-ia tarai asavira toupavo.

### *Varaura Vorevira Toreperea Osivu Ragavira Karekepaoro*

<sup>35</sup> Iravu oirato oiso vaio akerevere, "Apeisi ragavira oirara vorevira kopiiara iava tootoopaoro torepaveira? Ora apeisi ragavira varaura kekepa pirovorea rara?" <sup>36</sup> Ari ita, ro vaaruvo vovouto ira oiso evo ake purarevere. Uvare viapau taraipatai vaisio-ia takura isi, eke? Vosa vaisi pauta, uva va-a eva oa iava vao uvuipai ra vaisi iava varaua eru rovope, va isivaoro iava kovape. <sup>37</sup> Oiraopavira rutu vaisi-a vaisio aisia pauta takura isi raga-a oiso osa aue kukara takura, ora oaravu rutu takuraroro. Uva viapau oiso vara iava takeruara oisoa pau rovopata. <sup>38</sup> Ari Pautoa raga-a ira vara govukoaropa varaura vatepareveira, vo rara rera raga oisi rugoo rovoro. Ora vo vara rutu takuraara katakatairo tapopa varaura vatepareveira oiso, oavu raga ita vao, ari oavu raga ita vao.

<sup>39</sup> Oire ovararovu rutu viapau oiso vaea kaevira toupaveira. Viapau. Ari ovaravu raga-a vao oirato, ari varuere kare ovaravu raga, ovusa kokio kare ovaravu raga, ari atari kare ovaravu raga. <sup>40</sup> Oiso osa varao oara kekepapeira vuvuiua-ia, ora varao rasitoa-ia oara kekepapeira. Uva veoro kekeara rutu-a varao oara vuvuiua-ia toupaveira, ora varao tapo ita rasitoa-ia oara toupaveira oisi, veoro keke. Uva vao raga ita uvare osivu raga visivi kekepa piroveira. <sup>41</sup> Ari ita, ravireo vo kekearo veoparoveira ora kekira tapo ita. Ira tapo veoro visivi kekeparo viroveira, vo osa eera

vo kekearo pisa visivi ita kekepa piro. Ora aaviikoara rutu vo kekearo katakataivira kekepa piroveira pisa visivi vearovira ita.

<sup>42</sup> ✧ Oire uva oisi ragavira eisi osa kopii irara piesa vorevira toreaverea tootoosa. Vosa varaura tovapapeira, oire voa erupapeira. Uva evoa-a uva ita vorevira torepere, ra va iava viapau opesia vai voua varaua oaiaro.

<sup>43</sup> Vosa varaura tovapapeira, uva raveravevira toupave vuvivira keke vuviroparo. Ari vosa vorevira torepere, ra evoa kaitufuvira rutu goruvira kekepa piro vearovira rutu.

<sup>44</sup> Vosa varaura tovapapeira, uva oira vara-ia toupave. Ari vosa vorevira torepere, ra uraura vara purave. Oiraopavira rutu ita, uvare vo vokio-ia oira vara-a vao oa-ia toupapeira.

Oa iava uvuipaviei ra oiso ragavira ora vigei-ia taraipavio, Utupaua uraura vara-ia taru toupaperea.

<sup>45</sup> ✧ Vao iava uvare Tugoropa Vuku-ia oiso purapapeira, 'Rovopatoa rutu Adam pura rovoreva Pauto oiso ra oiravira toupaveve.'

Uva oiraopavira rutu-a uvare iravu-a ro Adam ovoiooto ira-a ita ro raga Krai reraaro Uraurato ira tootooa vatepaveira.

<sup>46</sup> Uraurato vo tootoaro viapau oiso irapapeira. Viapau. Ari vo rasio vo tootoaro irapapeira. Oa iava uraurato vo tootoaro utupapeira.

<sup>47</sup> Pauto rovopatoa rutu Adam rasito poupouaro iava pura rovoreva. Ari ro ovoiopato Adam vuvuiua iava vararoepa.

<sup>48</sup> Ari ita, oirara voeao vo rasio iava oea oiso rutu toupaveira osa ro ira rasito poupouaro iava pura rovoreva Pauto. Ari voeao oea vo uruiaroiei vuvuiua-ia, oea oiso toupaveira osa ro ira vuvuiua iava vararoepa.

<sup>49</sup> Uva vigei vo kekearo oiso roropaveira osa rovopato vo kekearo, ro ira vo rasio poupouaro-ia pura rovoreva Pauto. Osa-a eisi osa ragavira vo utupaua vigei vo kekearo oiso roroverea osa ro Krai vo kekearo, ira vuvuiua iava vararoepa.

<sup>50</sup> ✧ Araoko irara oaa, ragai vo reoaro vituaro-a vao-ia oiso, Vouao varaua oua-ia sopeara toupaveira ora aue revasiva. Ovava-a eva viapau uvuipai ra Pauto vo Saraaro iare koatape. Eake iava? Uvare voua varaua uvuipai erupape. Oa vituaro viapau uvuipapeira oiso ra vao tapo ora tavosipape oa viapau uvuipai ra opesipape.

<sup>51-52</sup> ✧ Ragai vo reoaro uvuta. Uvare vatau reo-a vao visiipa oa kosi piepaavo. Viapau vigei rutu kopiivoverea. Ari ora tavario ragavioverea vagevage visivi raga, oiso osa kataivira ripopaveira osireito. Vo vuuta-ia oa-ia gurukoverea ovoiova utave, vo osa Jisas vo vuutaaro reesioro vo vuuta-ia oa-ia voroverea. Ogurukoa eva isivaaro iava kopii irara vorevira toreaverea vo vararova oara viapau uvuipai ra opesipe. Vo ovusa vigei ora tavario ragavio kopii asa irara.

<sup>53</sup> Uvare vo varao oa erupapeira oa uvui iraopai ra ora tavariope vo varao iare oa viapau uvuipai ra opesipe. Uva oisi-a oiso osa vo varao oa kopiipapeira, oa uvui iraopai ra ora tavariope vo varao iare oa viapau opesia vai.

<sup>54</sup> Oire uva va-a eva vituaro iava uvuipaviei ra Tugoropa Vuku vo reoaro eveipape. Ra oiso purapavio, Ari oiraopa reo rutu, vao oa oiso purapapeira Jisas iava,

'Kopii vo goruaro oa opesi ovoiepa rutu. Vo osa orekerovu rutu-ia putereva.'

<sup>55</sup> 'Ovu vii vo goruaroiei kopii, vao oa iavirava uvuipavei igei vuri piepari? Ora ovu-ia kopii vii vo goruaroiei, vao oa iavirava uvuipavei ra orekerovu rutu-ia putepari?'

<sup>56</sup> Oiraopavira rutu uvare kopii vo goruaro vituaro-a vao-ia vuri vovou. Oa vituaro iava uvuipai ra vigei vuri piepave. Uva uvuipaviei ra vuri vovou eveipape rutu, vo rara Moses vaaro-ia Reo Taisi taraipavio. Uva

✧ 15:42: Dan 12:3; Mt 13:43 ✧ 15:45: Jen 2:7; Ro 5:14, 8:2 ✧ 15:50: Mt 16:17 ✧ 15:51-52:

1 Te 4:15-17

vuri vovou-ia taraipaoro va voriaro oupapeira vao-ia kopiia. <sup>57</sup> Ari roru iraopaavo Pautoa-ia vuurapa vaisi purapaoro. Eake iava? Uvare rera raga vigei vatepareveira tauva ro vigei reraaro Turaro Jisas Kraiss vo goruaro iavirava. Eva-a oa iava uvuipaviei ra vuri vovou vo pitupituaro-ia putepape ora kopiia.

<sup>58</sup> ✧ Oisi-a eisi osa iavirava visii araoko irara oaa, goruvira rutu toupata raripaoro. Opeita raveravevira vovoupata. Ari goruvira rutu kovo iraopata Turaropa. Uvare Jisas vo torearo-ia rugoopaoro taraipatai oiso, Viapau oiso akukuvira kovo ragapatavoi rerapa Turaro. Viapau. Ari visii vo voriaro epao vearoo voria oa outaverea rara.

## 16

### *Sirao Vate Oirara Rutu Tauvapa Pauto Voeaaro*

<sup>1</sup> ✧ Oire oreovu vao-ia oa visii vatepaavo vao iava moni vate. Uvare oiso ruipaparai ra oiso piepata osa Galesia-pa irara taviava. Oa iava oisoa moni oupaave Pauto voeaaro tauvapasa. <sup>2</sup> ✧ Oiso voea taviava, Toupa voki ro rutu-ia visii rutu moniara oavisii orirupata ora visii vo kovoroaro uvuipaoro. Oire vosa oisi eisi piepata, oa iava viapau oavu avu vai vo ovusa visii ruvara-ia moni oupasa uripara visii iare tavetepaoro. <sup>3</sup> ✧ Vo osa poua viro ra voeao arua oea reesitava moni kaepasa. Oire uva voea riaro iare oaravu pasiara rigatoavere rara voea iava varao oara kaeivere vaore, oiso ra voeao Jerusalem urui sovara-ia tou irara taraiave voea-ia oiso puraoro, “Oiraopavira rutu voea Korin iava urioai vigeipa sirao vate moniro vatesa.” <sup>4</sup> Ari vosa oiso rugoopata, Asi rera raga Pol uvuiparoi ra avaparo, uva evoea uvuipaa ra ragai taveoive.

### *Oiso Ruipaparoepe Pol Ra Vokareve Korin-pa Irara Kekesa*

<sup>5</sup> ✧ Visii iare karera virovere vo rara Masedonia Provins-ia pute rovoa, uvare voa Masedonia Provins-ia pou viro ruipa rovoparai. <sup>6</sup> Uva viapau taraiparai oiso visii tapo touavere, eke viapau. Oiso rugoo ragaparai, Iu vai pasi vo vaio tugurasa uva kokepa vuuta opesipere. Oire vo vuuta vai isivaaro iava uvuipatai vai ra ragai tauvata ragai sipo pieoro ouruiovu iare voraro uvaroare avapara. <sup>7</sup> Uva reasiparai poteku visivi visii tapo tou arapa. Uvare ragai vo ruipaaroo-a vao oa-ia oiso ruipaparai ra riro kaekae visivi visii tapo toua, vo rara Turaro oiso puraro, “Vearopai eisi viipa.” <sup>8</sup> Ari ita, tou rovoavere rara Efesas urui-ia vo voki-ia rekasio ro ovokia vaisipaiveira oiso, Pentikos-pa voki. <sup>9</sup> Uvare riro kovo rutuei ragai vaoro vo urui-ia vao-ia. Uvare rataoa karu pirorao ragaipa, oiso ra Turaro vo kovoroa puraa. Ari visii tavipaavo oiso, Riro irara rutu epao vo kovore korokorupa irara.

<sup>10</sup> ✧ Oire vosa Timoti visii tapo tousa urioro, oa iava uvuipatai ra rera vearovira pau pieta. Oa iava viapau rera-ia uvuipaa orugorugoovu avu vai toupave visii. Eake iava? Uvare rera-a Turaropa kovopato ira oiso toupave osa ragai. <sup>11</sup> ✧ Viapau rutu oiso vearopai vosa irai visii iava rerare oiso puraro, “Akaipatoa raga ro-ia akukuto.” Viapau. Ari visii rutu uvuipatai ra rera tauvapata rera sipo piepaoro. Oa iava uvuiparoi ra vearo voka rutu purapareve rorupaoro. Uvare ragai rerare tueparavere ora oearovu tapo araoko irara oavi oea rera tapo urioavere.

12 ✧ Oire ra ro iava Apolos vigei araokotoaaro visii tavipaavoi. Uvare vorevoreripavira rera tavitavi ragapaavora, oiso ra visii iare tavetereve oearovu tapo araoko irara, ovusa touvira orugoovoru rera-ia toupavoi. Oa iava viapau oiso ikavira avapasa rugoovaru. Ari vovio vaio-a pasi utupaua, vo rara rerapa raiva karu piro.

*Ovoioa Reoro Vateveva Pol*

13 Visii vearovira rutu ora airerei iraopata. Goruvira rutu toupata visii varaaro-ia oirao pie vovouro. Opeita uriripata. Ari tuvuu vovouvira rutu toupata. 14 Vo osa varao okovoroa rutu purapata, oara-ia uvuipatai ra sirao vovou rutu sirovava vara purapata.

15 Taraipataveira vo aao-ia Stefanas aao. Oaaoa rovvira rutu ora vo aao iava sopaura oaive pore rovoiva, voeao iava vo aao oea Grik taere-ia oisoa toupave. Uva va-a vao oa iava ora vo aao iava sopaura oaive rutu tovoiva vo kovo puraoro Pauto oiraraaro tokipa kovo. Araoko irara oaa, oiso visii tavipaavoi, 16 Voeao vo vovouroaro sirova ututa oea eisi piepaiveira osa evo aao vovouaro. Ari vosa oearovu voea sirovavi toupave voea tapo kovopaoro, oa iava uvuipatai ra oiso voea rutu vo vovouroaro sirova ututa.

17 Roru iraopaavoi vao iava uvare Stefanas vase voeao oea ragai iare urioaerao voeao ora Fotyunetas ora Akaikas, oea ragai rugoo piepaiveira visiire, uvare tauai rutu ragaipa toupataveira. 18 Otoua-a vao oa-ia ragai tapo tupaoro ragai roru pievoroa, oiso rutu osa oisoa visii tapo tupaoro visii roru piepaive. Ari ita, uvuipatai ra oirara-ia veoro vaisi rutu purapata evoea oea oiso rutu toupaveira osa voeari Stefanas vase.

19 Voea rutu voeao lotupa irara oea Esia Provins-ia toupaveira oea rutu visii iare veoro voki puravoi. Ora vaiterei tapo Akwila avukarei ora Prisila aiteara veoro voki visii iare puravoi. Ora voeao oea vaiterei vo kepaoro-ia ora gurupaaveira lotu purapasa. Uva veoro voki vaisipaoro visiipa, oiso purapaai vo Turaro vaisiara sovava-ia. 20 Vigei rutu araoko iraraaro voea vo uruio-ia oea veoro voki puravoi visiipa.

Oire uva va-a vao oa iava visii tavipaavoi ra ora visiipa siraopaoro sekanta.

21 Va vao-ia ragai vo reoviaro oa rigatoavoi ora ragai raga vavaeoro-ia oiso-ia, "Veoro voki ragaiva Pol."

22 Oire vosa irouto visii iava viapau Turaropa siraoparo, irape. Ira voari utupaua taru opesi ovoirovorea. Turaro Jisas uriou igei iare ikavira rutu.

23 Oire uva oiso ruipa iraparai ra visii tauvaa outa vigei reraaro Turaro Jisas ruvara-ia vo ovusa visiipa siraoparo. 24 Ragai-a vao sirao vovou rutu puraavoi visii tapo ora tavosioro Krai Jisas vaisiara-ia.

Eisi osa vo pasio opesi piepaa.

Ragai-a vao, Pol.

## 2 KORIN

### Irapa Reoro Vo Vukuo Iava

Pol vao eraopa pasi rigatoreva vo ivao isivaaro iava oa-ia rovopa pasi rigatoreva Masedonia Provins-ia toupao. Uva voea Korin urui-ia tou irara rovopa pasi vieiivoiva, vuri pitupituro kavuiva. Oa iava Taitas vo reo kaereva Pol iare rera tavisava voea vo pitupituroaro iava varao veaopara. Eva-a oa iava vao-ia eraopa pasi rera vaaro rorua karekereva voeapa.

Ari viapau voea rutu lotupa irara rera Pol vo reoro sirova utuaepa. Viapau. Aue iava uvare tovira vuri pitupituro purapaiva. Uvare Pol vo vaisiario aposel vaisi akaipa piepaiva oiso purapaivo, Viapau oiraopato-a ro Pol, oa iava viapau uvuipaiei rera vo reoro uvupasa. Oire uva va-a eva oa iava ora rera iava goruvira voea tavitavireva, uvare Pauto rera reesireva oisore ra aposel kovo purapaveva (2 Ko 10:1–13:10).

1. Ora rera iava aviavi pie reoro, ora vearo vaisi purareva Pol, 1:1-11.
2. Pol ora rera vaisiario aposel vaisi oirao piereva voeaopa vakuvaku vovou irara, 1:12–7:16.
3. Oirao pie vovou irara uvuipaai araoko irara oaive taupaveiva vo Jisas vaisiario-ia, 8:1–9:15.
4. Goruvira Pol ora rera vaaro iava aposel kovo taviroepa. Teapi kuuvu irara vo siposiporoaro sirova utupaave Korin vata, 10:1–13:10.
5. Ovoioapa reoroaro varao Pol varaaro ora oreorovu varao goru reoro rutu, 13:11-14.

1 ✧ Pauto ragai Pol roporeva oiso ra oiso toupaa, Krai Jisas reraaro ragai aposelto. Oa iava vegei-a vao ora ro-ia vigei araokotoaaro, Timoti vegoa vo rigato puravevoi visiipa Pauto voeaaro rutu visiigoa evoa Korin urui-ia lotu purapataveira. Ora voeaopara tapo oearovu oearoa evo taere iava vo uruiro-ia toupaveira Grik taere Pauto voeaaro.

2 Uva ragai vo ruipaaro-a vao-ia oa-ia oiso vovouparai ra Pauto vigei Aitearo ora ro vigei reraaro Turaro Jisas Krai visiipa vereopa vovou rutu purasi visii taupapaoro ora gavaure vovou.

#### *Pol Pautoa-ia Vearo Vaisi Purareva Vao-ia Osa Oisoo Rera Taupapaveiva*

3 Uvuipaviei ra Pautoa-ia vearo vaisi rutu purapape rera-ia rorupaoro vigei reraaro Turaro Jisas Krai Aitearo. Ro Aite ira riroa rutu kaviko vovou purapaveira. Ro-ia Pauto ira ruvara iava otaubarovu rutu oupaveira.

4 ✧ Vosa tavakaa vai vegei-ia pou piro, ra oai-ia oisoo vegei taupapaveiva. Osa iava uvuipaveiei ita ra oisi oearovu taupapaveiva, vo osa voeaoro-ia ita vo tavaka poupa piro. Eake iava? Uvare vegei ita uvuipaveiei ra vo tauvaa ita topa piepave oearovupa, oiso osa vegei pie rovopaveira Pauto.

5 Oiraopavira oiso rutu ita osa Krai-pa vo siitoka eva siraoa oisoo vatepaive oearovu. Uva vo raiva raga ita eva kataia oa sirova ita uvuipaveiei ra riroa siitoka vo siraoaro oupave. Oire uva oisi-a eisi osa iava uvuipaveiei ra riroa rutu tauva oupave Pauto ruvara iava, vo rara Krai tapo ora tavosipave rutu.

6 ✧ Ari ita, oearovu vegei vuri piepaiveira. Uva va-a eva oa iava Pauto vegei taupapaveiva. Uva veapapai oisi ita. Uvare vosa vegei oisi piepaive eisi, oa iava uvuipaveiei ra oisi iava goruvira toupave visii vo vovouroaro varaata piepasa. Ra va iava oisi vegei vo vovouroaro siituepaoro va sirova ora visii iava oirao pie vovouro oavisii rutu goru piepata. Ra va iava oiso purapata “Vigei ita uvuipaviei ra oiso rutu goruvira torepavio osa

vaitereo Pol vaio,” vo rara vo siitoka vo siraoaro visii-ia poupa piro. <sup>7</sup> Eva-  
oa vituaro iava uvuipaveiei ra oiso taraipave visii-ia, Oiraopavira goruvira  
rutu torepapai, uvare tavaka vo vavataaro sovopaiveira oiso osa vegei. Oa  
iava va vao riroa tauva oupaivoi, oiso osa vegei ita vo tauva oupaveira  
vokiara rutu-ia.

<sup>8</sup> ✧ Araoko irara oave, oiso ruipapaveiei ra otavakarovu iava taraipata  
varao oara vegei-ia poupa pirorao vo Esia Provins-ia. Ari ita, riroa  
rutu vavata vegei-ia pou pirorao va vao tavaka vo vavataaro. Oa iava  
raveraveira oisoa toupave voa oiso rugoopaoro, Vegeivi kopiipaveiei. <sup>9</sup> ✧  
Oiraopavira rutu, uvare oiso rutu rugoopaveiera, Vegoa ita reesiivora,  
oisire ra vegei upoive. Uva vo rugoo-a eva vegei-ia pou ovoi pirora, oa  
iava viapau oiso rugoopaveiera ra ora vegei ovovouiaro sirova goruvira  
tovere. Viapau. Ari kataitoo raga Pauto vegei Virivaripato, ira raga ita  
uvuiparoi ra vegei virivaripareve. Ro ira oirara tore piepareveira vorevira  
kopii tapirova. <sup>10</sup> Ari ita, oisi ragavira oisoa vegei virivari piepareve voeao  
asavira oea oisoa vegei-ia upo ruipa ragapaave. Uva vo vokiio ita oisi raga  
vegei virivaripaveira. Oire uva oisi-a eisi osa uvuipaveiei ita rera-ia  
raripave vovio utupaua, vo rara ita vegei iare tutuu piepaive ita va kopiia  
vorerivira. <sup>11</sup> ✧ Uva uvuiparoi ra vegei ita tauvapareve, vo rara visii vegeipa  
variripata vegei tauvapaoro. Ra va iava Pauto visii vo variriroaro riroara  
uvupaoro vegei-ia vearoo purapareve. Eisi osa ragavira iava riro irara  
uvuipapai ra vo tauva eveipaoro rera vaisiario kae piepaive va iava vearo  
vaisi purapaoro.

### *Pol Viapau Oiso Korin-pa Irara Keareva*

<sup>12</sup> ✧ Oire uva vegei vaaro-a vao-ia riroa rutu rorua, ororua rutu vituaro-  
a vao sovopaavoi vo ora ragai iava sopaua-ia. Eake iava? Uvare  
oiso taraiparai Pauto vegei-ia vearoo rutu purapareveira vo vegei iava  
sopauarei goru piepaoro. Oa iava vegei visii tapo toupaooro ora oearovo  
tapo voraro oisi va torevoko rugorugoo rutu Pauto vo rugorugoooro  
ora katai vovou oisoa purapave ita. Oiraopavira viapau oiso vo rasio vo  
taraiaoro sirova utupaoro-a, ari Pauto vo tauvaaro iavirava raga vegei oisoa  
vereopa vovouro purapave evara. <sup>13</sup> Vosa opasirovu rigatopaavora visiipa,  
oara-ia evara roorio reoro raga rigatoavora visiipa. <sup>14</sup> Uva oiso vovouparai  
rutu ra utupauavi vo reo-ia vao ora vegei iava vearovira taraitavere rutu,  
oreoa-ia vo vokiio gare visivi vavagisipatai. Vaore vosa vo utupaua ovokia-  
ia Turaro vorevira voreroverea, uva vegei vaisiario-ia vearoo purataverea.  
Ovusa ita vegei oisi raga vo vokia ita visii vaisiario-ia vearoo purave  
rorupaoro.

<sup>15</sup> Ari ita, visii oirao piepaavora oiso, Vegei vai egaegapata. Oa-a vao oa  
iava oiso vovou ragaraepa ra visii iare tavetea vo vuutarei-ia, oiso ra oisi  
pieoro voreripavira visii tauvaa. <sup>16</sup> Eva vituaro iava oiso vovou ragaraepa  
ra visii iare tavetea evoa. Ra evoava Masedonia Provins iare ava rovora.  
Oire ra voava ita vorevira vorera visii iare. Ra va isivaoro iava taru evoava  
ragai tauvata ragai sipo pieoro Judia Distrik iare. <sup>17</sup> Uva oisi-a eisi osa visii  
tavi rovoava osa eisi ragai vovouaro oiraopavira rutu toupava. Viapau  
oiso visii keava oiso osa iravu vo rasio raga iava rera. Viapau. Uvare  
viapau uvuiparai oiso ra oeai tavi ragaa oiso, “Urioparai visii iare,” vo  
ovusa ragai oruipaiaro viapau oisi eisi toupave. <sup>18</sup> Pauto oiraopavira rutu  
reoparaveira. Oa iava rera vo pitupituaro sirova oisi oiraopavira rutu  
reoparaveira oiso-ia, Ragai viapau uvuiparai ra oiso rugoopara, Viapau  
avaparai, vo ovusa ragai iava gisipo oiso purapao, “Oiraopavira urioparai.”

✧ 1:8: Ap 19:23 ✧ 1:9: Jer 17:5, 7 ✧ 1:11: Ro 15:30; Fl 1:19 ✧ 1:12: 2 Ko 2:17; 1 Ko 2:4, 13



19 ✧ Oiraopavira rutu igei vase vao-ia Sailas ora Timoti visii tarai pieiova Jisas iava, vo siposipo-ia oa oiso purapai, Jisas Krai Pauto Ovitooaaro ira viapau oiso rugooparo, Ragai viapau vao purapaavoi, vo ovusa rera gisipouro iava oiso purapape, “Oa purapaavoi vao-ia.” Viapau. Ari oiso va pura ovoipareve vao oare oisoa taviparo va purapasa. 20 ✧ Oa vituaro-a vao-ia oiso-ia uvare Pauto ovoi reoro purapaoro oiso puraparoveira “Ragai oa purapaa.” Oa iava Krai Pauto vo reoro sirova utupaoro oisi va purapareveira vo reo oirao piepaoro rutu. Eisi osa ragavira Pauto oiraopavira rutu taviparoveira. Uva va sirova utupaoro Krai tapo ora tavosipavio oiso purapaoro, “Oiraopavira rutu,” vo Pauto vaisiario kae piepaoro. 21 Vo uvare Pautoa raga-a ira vigei rutu ora vegei Krai-va tavosireva vigei vo vovouroaro oirao pieara goru pieoro rutu. Uvare Pautoa raga-a ira vegei roporeva vo kovoa vao purapasa. 22 ✧ Ari ita, vigei rutu-ia vo reesio tovoreva oa oiso purapaveira, “Vigei-a Pauto vooaaro.” Uva vara rutu oirao piesa Tugoropato Uraurato tovoreva vo vigei sopaaro-ia. Ra va iava rera iavirava oiso taraipavio, Oiraopavira rutu osa eisi oaravuei oara epao tuevira vigeipa varao iava rera varaaro.

### *Viapau Pol Ikauvira Voea Iare Avaroepa*

23 ✧ Oire vo osa oiso rugoo ragaparaepa oiso ra uriora evoare Korinia, osa viapau ita urioraepa. Vo uvare oiso rugooaraepa, Teapi visii iava sopaura vavata piea. Pauto ragai iava sopaua-ia taraiparoi, vo ovusa oiso oiraopavira visii tavipaavoi. 24 ✧ Viapau oiso riro goru reo vai rutu vatepavevoi visiipa, oisore ra oai raga sirova utupata, vo osa ora visii varaaro-ia oirao pie vovouro rugoopata. Viapau. Ari visii vo vovouroaro uvuvira rutu toupaveira varao oirao pie vovouro. Uva visii-ia kovopavevoi visii vatepaoro tauvaa. Oa iava uvuipatai ra roruvira rutu vearovira toupata.

## 2

1 Uva ora ragai raga vo rugorugooaro-a vao oa-ia oiso rugooaraepa, Viapau uvuiparai ra vorevira visii iare avara. Teapi visii vatea vavata vovou. 2 Vaopa vosa oisi eisi visii piea, uva irou vai-a vao uvuipai ra ragai roru pieve? Ari visii ita viapau uvuipatai ra ragai roru piepata, vo osa visiipa vavata vovou vate rova. 3 ✧ Eisi osa vituaro iava-a vari rovopa pasia oa rigato rovoavora visiipa oisi raga ita eisi. Uvare reasiparaera oiso, Teapi visii ruvara iava riro vavata oua, vo osa visii-ia poua viro. Eake iava? Uvare visii raga ita visiigoa vokiara rutu-ia uvuipatai ra ragai roru piepata ragai vo reoroaro sirova utuoro. Va-ia oisi eisi taraiparai, Vosa ragai rorupaa, oire visii tapo ita rorupata. 4 ✧ Uva rirovira rutu gaupaoro siraopaoro va eva rovopa pasi rigatoavora visiipa. Viapau oiso visiipa vavata vovou vatepasa vo rigato puraavora. Ari ragai vaaro riroa rutu siraopa vovou kareke pieoro-a visiipa.

### *Uvuipaa Ra Iravu Iava Vuria Veraive Ro Ira Vuria Puraveva*

5 Oire uva vuria purapaoro eera oirato ira visii tapo toupaveira. Ira ragaipa vavata vatepavevoi ovusa oearovupa visii iava vavata rutu vatepavevoi. Uva oisi eisi purarai oiso, “Visii iava oearovupa” vaopa oiso, teapi torevokovira rutu riro goruvira oisi ragavira rera togapaa va-ia. 6 Ari ita, visiipa vo reo rigatoavora ro iava ira vuri vovou rovoreva riro vavata vateoro. Oa iava ragai vo reoro sirova utupaoro rerare oiso purataera,

✧ 1:19: Mt 16:16; 1 Te 1:1; Hi 13:8 ✧ 1:20: Ro 15:8-9 ✧ 1:22: Ef 1:13-14 ✧ 1:23: Ga 1:20; 1 Ko 4:21 ✧ 1:24: 1 Pi 5:3; Ro 11:20 ✧ 2:3: 2 Ko 12:21, 7:16, 8:22 ✧ 2:4: 2 Ko 7:8-9, 12

“Vuria purarivoi,” rera vo vuriaro vo voriaro vateoro rerapa. Uva oisi-a eisi osa uvuipai rutu rerapa. <sup>7</sup> ✧ Oire visii taviavoi oiso, ra viapau ita vorerivira rera vo vuriaro rugoopata. Viapau. Ari uvuipatai ra rera vaaro oirao pie vovou vorevira goru pieta vaore rugoopaoro, Teapi oisi va iava rera iava sopaua-ia riro vavata vovou sovooro ora piro pieparo. <sup>8</sup> Uva oiso goruvira rutu visii tavipaavoi, Rerapa visii vo vovouroaro siraopa vovouro rirovira rutu kareketa. Ra va iava oiso tarairo, O ari oiraopavira rutu ragaipa siraoai. <sup>9</sup> Uva vari rovo rigato pura rovoavora vare rugoopaoro oiso, E pasi ragai vo reoroaro rutu sirova utupaavere, eke viapau? <sup>10</sup> Uva oisi-a eisi osa ragai vo reoro sirova utupaoro rera eera vo vovouro vuria veratavoi, vo osa oisi eisi piepatavora. Ra ragai tapo ita rera vaaro vuria veraa vo Krai vaiiario sovara-ia. Ari vosa iravu iava oavu vuria veraa, ra viapau ita vorevira vare rugoora. Osa-a eisi osa piepaaveira vo Krai vaiiario sovara-ia visii iava sopaua rutu goru pieparo. <sup>11</sup> ✧ Vaopa, teapi Seten vigei-ia putepareve rutu. Uvare taraipaviei rera-ia ira vigei ateate piepaoro toupaveira vaore, oiso ra ovokirovu-ia vigei kove piepareve rera vo reoroaro-ia kuvuara.

### *Pol Riro Tavaka Rutu Kekereva Troas Urui-ia*

<sup>12</sup> ✧ Vosa Troas urui-ia poua viropa Vearo Siposipo iava Krai vaaro siposiposa, Uva evoa touoro oiso tarairaepa, Akoea, Turaro ragai vo kovoaropa rataoa karurevoi vao-ia. <sup>13</sup> ✧ Uva evoa touoro taraa ragaava rore vigei araokotoaaro Taitas. Oa-a eva vituaro iava rirovira rutu rugorugoo iraoparaepa rerare oiso purapaoro, “Apeisi pierevo?” Uva va-a eva vituaro iava voea evoea avaueava. Oa iava voava topara viropa Masedonia Provins iare.

### *Aposel Irara Pauto Vo Goruaro Iavirava Oisoa Upoa-ia Putepaive Rutu*

<sup>14</sup> ✧ Ragai roru iraopaoro Turaro-ia toupaaavoi. Uvare Krai tapo ora tavosipaveiei, ra vegei tapo vokapaveira Pauto uvarovu rutu Seten-ia putepaoro. Ari ita, voraro rutu viripareveira Pauto vegei iava sopauarei tauvapaoro, vo ovusa vegei vo taraiaro vao Krai iava kosi piepave uvarovu rutu. Ra va iava vo reo vao rera iava oa uvupaoro va sovopaive gavaurevira ora voea-ia, oiso rutu osa vearo geesiva o korovo (wel). <sup>15</sup> ✧ Aue iava uvare vegei oiso rutu toupaveira osa o vearo geesiva korovo, vao oa-ia korouua tauoa purapareveira Krai Pautoa-pa. Uva vo geesi-a eva oa gaegaerepaoro uvarovu rutu avapapeira voeaore oea oupareveira Pauto ora rera iare vorevira, ora vearo oearoa opesi ovoipaaveira. <sup>16</sup> Ari ita, vosa va vao vearo geesi voea ruvara-ia pou piro, oire ra va iava vo geesi eveiive, ra oiso puraave, “Asi Pautoa iava vo geesio-ia. Oa iava taru opesi ovoiiioverea.” Osa voeao oea Pauto ora rera iare vorevira ouparevere vo geesi eveiiora va geesiive. Ra va iava oiso puraave, “Pauto vo geesiaro vao-ia tauvapa. Oa iava taru Tootoo Ovoi oupe.” Oiraopavira rutu vo osa vegei raga-a viapau oiso uvuipaveiei ra oisi voea tauvapave. Viapau. Ari Pauto vo goruaro raga-a oa iavirava voea tauvapaveira. <sup>17</sup> ✧ Riro irara rutu oirara Pauto vo rearo vatepaiveira oiso rutu osa akukupara raga tokokotoara. Oire ra vara-ia moni oupaave vara voripaoro. Ari vegei viapau oiso osa voea. Eake iava? Uvare Pauto vegei vao arureva. Eva-a oa vituaro iava oiraopa reo rutu iava siposipopave, vo rara Krai tapo ora tavosipave. Uva Pauto vegeiva vurapaveira, vo ovusa oiraopavira rutu vo reo kosi piepave oa oupave rera ruvara-ia.

✧ 2:7: Ga 6:1; Ef 4:32 ✧ 2:11: Mt 4:10; Lu 22:31; 2 Ko 4:4; 1 Pi 5:8 ✧ 2:12: Ap 16:8; 1 Ko 16:9  
 ✧ 2:13: 2 Ko 7:5-6 ✧ 2:14: Ro 6:17; Ef 5:2; Fl 4:18 ✧ 2:15: Ef 5:2; 2 Ko 4:3 ✧ 2:17: 2 Ko 4:2, 1:12, 12:19

## 3

*Kovopa Irara Vaaro Airepa Reo Ovoi*

<sup>1</sup> Vosa oisi eisi purapave, uva viapau oiso ora vegei vaisiaro raga kae piepaoro-a. Viapau oiso aapaapautoarei-a vegei visiipa, oa iava uvuipaveiei ra visiipa oaravu pasiaro kaepave, vo pasiro oara-ia rigatopaive oearovu oiso puraoro, “Vearotoarei-a vaitereo aiterea vo rearo uvuta vearovira. Ra aiterei vearovira pau pieta.” Viapau oiso oisi eisi opasiei. Ari vegei-ia taraiataveira. Ari ita, uvarovu rutu vokapaveaira. Uva voraro viapau oiso ora vegei iava opasiiva vokapaveaira vo pasio oa rigatotavora. Ari ita, uva vegei vearovira oisi raga pau piepaiveira. <sup>2</sup> Eake iava? Uvare visii raga ita vegei vaoro pasia eva vegei vo kovoaro oirao piepaoro. Vo uvare visii vo touaro-a vearoa, otoua vegei vo kovoaro oiso karekepaiveira pasia. Oa-ia uvuipaai oearovu rutu ra va vieiro taraiave. <sup>3</sup> Oirara rutu visii eveipaiveira oiso, Visii vao pasia vao vova Kraiis oa viapau oiso ing vai-ia rigatoreva aveke pero vai-ia. Viapau. Ari visii sopaoro-ia vo pasio rigatoreva ro iavirava Tugoropato Uraurato Pauto reraoro ira vigei iava sopaura-ia toupaveira. Oire vo pasi-a vao oa rigatorevoiva, va siporeva oearovu iare Pauto vo kovoaro iavirava oa purapavevora visii tapo tupaoro.

<sup>4</sup> Osa eisi purapaveiei uvare va-ia vao taraiaveiei oiso osa Pauto vegei tavapaveira vokiara rutu-ia vo vegei vo kovoaro-ia, vo ovusa Kraiis tapo ora tavosipave. <sup>5</sup> ✧ Viapau oiso oavu avu vai epao vegei-ia, oiso ra oai iava oiso purave, “Iu. Uvuipaveiei rutu vo kovo purapave.” Viapau rutu. Ari Pautoa raga-a ira oiso vegei piepareveira vo kovo purapasa. <sup>6</sup> ✧ Uva Pautoa raga-a ira vegei goru piepareveira vegei sipopasa rera vaoro iava Airepa vao Reo Ovoi tavitavipasa. Vo uvare rera-a Pauto ira reoreopaoro Tuariripa vao Reo Ovoi-ia va rigatoreva aveke pero-ia. Oa iava oearovu oirara vo reo sirova utu ragaepa. Osa iava vo reo-ia voea raga ora piro pieaepa uva oisosa kopii ovoipaave evo reo sirova. Ari vao-ia Airepa Reo Ovoi oa viapau oiso toupavoi oisa eva Tuariripa. Eake iava? Uvare Airepa Reo Ovoi-a vao oiso purapaveira, “Ro Pauto reraoro Tugoropato Uraurato ira Tootoo Ovoi vatepareveira.”

<sup>7</sup> ✧ Ari ita, Pauto tuariri rutu Reo Taisi aveke pero-ia rigatoreva. Vao oa iava Moses vo pero kareke piereva voeaopa oirara, vo ovusa Pauto vaoro keraria aviaviaro goruvira rera-ia roropaiva. Uva voavi ragava va eva keraria vo aviaviaro opesipaoro varapaepa oisivi. Ari ita, tou visivi roropaiva goruvira. Ra va iava vao Jiu-pa irara osireiaro aau piepaiva, oa-ia viapau vearovira Moses puaro kekeiva. Oire va vao isivaoro iava va eva Reo Taisi sirova akukuvira utu ragaoro kopii ouiva. Ari oiraopavira rutu oiso osa va vao-ia Reo Taisi rovoepa, vo ovusa Pauto vaoro riroa keraria va-ia rorova ora Moses-ia tapo. <sup>8</sup> Oire uva apeisi-a va-ia vao Airepa Reo Ovoi oa Tootoo Ovoi vatepaiveira? Oiraopavira rutu uvare va vao Airepa Reo Ovoi vaoro keraria pute pievira rutu roropaivere vo osa vo Reo iava tavitavipave rera iava ro Tugoropato Uraurato ira Tootoo Ovoi vatepareveira. <sup>9</sup> Uva voea rutu va-ia vao Reo Taisi taraiaveira oiso, Vearoa vao-ia reoa. Oa-a vao oa iava oearovu voea iava kopiaepa. Uva oisi raga ita oiso osa oearovu vao-ia Airepa Reo Ovoi vao Kraiis vaoro taraiapaoro oiso purapaai, “Vearo reo rutu vao-ia. Oreoa-ia aviavia toupaveira oirara iava sopaura aviavi piepasa, oisore ra Pauto uvuiparoveira ra oiso puraparo, Visii-a torevoko vovou irara. Osa iava taru Tootoo Ovoi outaverea.” <sup>10</sup> Uva voea voeari tuariripa irara oea vao-ia Reo Taisi taraiaro oiso puraepa, “Vearo rutu-a vao-ia oa

reipai rutu vigeipa.” Ari vo vokio vigei taraipaviei, uvare viapau oisi eisi vo vokio-ia toupai. Eake iava? Uvare Airepa vao Reo Ovoi-a oa Tuariripa Reo-ia pute iraopavoi rutu pauakavira toupao, vo osa orekerovu rutu kareke piepaiveira vearopara. <sup>11</sup> Ari ita, Tuariripa Reo oa oisoa aviavia vatepaive opesipaoro. Ari vao-ia Airepa Reo Ovoi vo aviaviaro oa viapau rutu opesia vai epao. Evo reo oa vearo iraopai tuariripa-ia Reo Taisi putepaoro rutu vearoa sisikore aviavi vatepaoro.

<sup>12</sup> ✧ Oa-ia oisi taraipaoro vegei tuuvu vovou rutu purapaveaira. <sup>13</sup> Uvare vegei viapau oiso toupavevoi osa roari Moses ira ora rera iava puaua tavurureva vaopa oiso, teapi Jiu-pa irara keraria aviaviaro kekeive, vo osa rera puaro iava opesipaoro varape. <sup>14</sup> Ari ita, voea iava rugorugooara oisoa vavagisipape. Uva vo vokio-ia oisi raga touvira vo tavururova toupavoi voea vo rugooaro ruupaoro vaore, oiso ra tuariripa Reo Taisi vieipaive, ra va iava viapau voeapa aviavipape. Ari vosa iroutoa vai ro ira Krai tapo ora tavosiro, eva-a oa iava uvuiparoi ra ora rera iava ruupa varoa verareve ora rera vo rugooaro ariarava, oisore ra roroiovira taraiparo. <sup>15</sup> Ovokirovu-ia vo vuutao-ia Jiu-pa irara va vao Reo Taisi vieipaive Moses vaoro, vo ovusa viapau oiso aviavivira rugooapaive. Uvare ruupa varoa oa-ia ora voea vo rugorugooaro tavurupaiveira. <sup>16</sup> ✧ Ari uvuipai vera uvirova va eva varoa vo osa voea iava iravu oirato rera iava sopaua porereve Turaro oirao piepasa. <sup>17</sup> Oire uva irouto-a Turaro ira vaisipai evo reo? Ro raga ita Tugoropato Uraurato. Oire taraipaviei vao-ia vosa Tugoropato Uraurato oirato iava sopaua-ia toupaveira, ra viapau oiso touvira rera iava rugorugooara vavagisipape. <sup>18</sup> ✧ Uva vigei tapo viapau oiso touvira ora vigei iava puara ruupai oiso osa piereva Moses. Viapau. Ari oirara uvuipaai ra vigei-ia vurapaoro Turaro vo vovouroaro eveipaive. Vao-ia rera raga-ia ro Turaro reraaro Tugoropato Uraurato, ira vokiara rutu-ia vigei tavariopaoro kovopaveira, oiso ra vigei vo vovouroaro riropape avapaoro oiso rutu toupasa osa Krai vo touaro.

## 4

### *Aposel Irara Oiso Toupaveira Osa Pitokava O Verakova*

<sup>1</sup> Pauto vereopa vovou rutu puraoro vegeipa vo kovo vatereva. Eisi osa vituaro iava vegei iava viapau sopauarei raveravepaiveira. <sup>2</sup> Uva oisi eisi pievevoiva, vo vovouro eakaveva oara oisoa purapave rupa vovou-ia varao oara-ia oisoa ariia oupave. Uva eisi osa pievevoiva, viapau oiso kuuvupaveaira. Ora vosa vo reo-ia vao Pauto vo rearo siposipopaveaira, uva viapau oiso va tavariopaveaira. Ari aviavi pievira rutu va iava siposipopaveaira vaore, oiso ra uvui iraopata va-ia taraipasa oiso, Oiraopa-ia rutu. Ari ita, Pauto vegei-ia taraiparoveira oiso, Vegei oiraopa reo rutu kosi piepave. Oiso rutu ita osa oearovu oirara ita vegei-ia taraipaaveira oisi, <sup>3</sup> ✧ vo osa aviavi pievira Pauto vo rearo kosi piepaveaira voeapa. Ari oearovu viapau roroiovira va ouiva. Uva aue oaive-ia vosa voea raga ora opesi pie ovoiaive eisi va iava. <sup>4</sup> Uva eisi osa piepaiveira vo rara Seten voeao oirao pie vovou asa irara vo rugooaro ruupareve vara rupa piepaoro, ro raga ita Rovopatao Rutu Tugarato vo rasio iava. Oire ra oisi iava viapau aviavia vai kekeipaive, vo aviavio oa Vearo Siposipo iava rugorugooarare roropaiveira vara aviavi piepasa. Vo siposipo-a vao oa rera iava Krai toupaveira. Ro ira kerariava toupaveira oiso rutu osa Pauto. <sup>5</sup> ✧ Uva viapau oiso ora vegei raga iava siposipopaveaira. Viapau. Ari vegei Krai

✧ 3:12: Ef 6:19 ✧ 3:16: Ro 11:23 ✧ 3:18: 1 Ko 13:12; 2 Ko 4:4, 6 ✧ 4:3: 2 Ko 2:12, 3:14; 1 Ko 1:18 ✧ 4:5: 1 Ko 1:13, 23

Jisas iava siposipopaveaira oiso, Rera-a Turaro. Ari vegei-a kovopatoarei visiipa vo Krai vaiiario-ia. Eisi osa vo reo iava tavipaveaira. <sup>6</sup> ✧ Aue iava uvare Pauto oiso puraroepa, “Aviavia rorori vova rupa tapi.” Ira raga ita Pauto ira aviavia roro piepareveira vigei iava sopaura-ia vigei iava rupa vovouro verapaoro. Oisore ra vo aviavi iavirava varao-ia roroiovira taraipavio Pauto vo vovouroaro, oarare oisi eisi roropaiveira Jisas Krai vo vovouro iavirava.

<sup>7</sup> Pautoa raga-a ira vegei iava sopauarei oisi piereva, oiso ra oisi aviavivira toupave. Ari ita, oiso vegei piepareveira osa pitokava o iria uvuipaori ra pegepege ovoio viro opesi ovoiooro. Uva va-a eva oa uvuipai Pauto vo goruaro kareke piepasa, uvare rera vaaro raga-a gorua oava toupavevoi.

<sup>8</sup> ✧ Oiraopavira rutu tavakaara vegei-ia pou ragapa piroveira vaore, osa ra vegei tupapaive, vo osa viapau. Ari ita, ovokirovu-ia vegei vo rugooroaro vagagisi ragapapeira, ovusa viapau uvuipai ra vo kovo kavuve. <sup>9</sup> Riro irara rutu vegeiva ora keripa irara toupai, ovusa vate irara oave viapau vegei eakapai. Ovokirovu-ia vegei iava varauarei upia piepaiveira, uva viapau oiso vegei opesi pie ovoipaiveira vegei upopaoro. <sup>10</sup> Vokiara rutu-ia vegei oiso piepaiveira osa Jisas pieiva rera-ia vuria puraoro. Uva oisi-a eisi osa va vuria oupaveaira vao oa-ia goruvira rutu torepaveaira. Oisore ra Jisas vo tootooro vo goruaro roroiovira karekepape vo varaura oave-ia ouareia raveravevira toupaveira. <sup>11</sup> Vokiara rutu-ia vegei iare kopiia tutuu piepaiveira, uvare Jisas-pa kovopaveaira, oiso ra oearovu rera vo goruaro eveipaive vao oa purapaveira vegei iava varaura oave-ia, vo ovusa kopiisa tutuupaive. <sup>12</sup> Uva oisi-a eisi osa vituaro iava visii tapo uvuipatai ra Tootooa oupata. Vo uvare kopii-a vao vegei iare tutuu piepaiveira, vo ovusa Pauto vo rearo kosi piepave visii tauvapasa.

<sup>13</sup> ✧ Ari ita, vegei oiso rutu toupavevoi osa ro iravu ira rigatoa purareva Tugoropa Vuku-ia oiso-ia, ‘Ragai oirao pie vovou rutu pura rovoava. Uva va-a eva sirovava oiso reoreoparai kosi pievira.’ Oiraopavira rutu oiso osa vegei Pauto vo rearo iava siposipopaveaira, vo rara rera oirao piepave. <sup>14</sup> Uvare taraipaveiei oiso, Eera Pauto Turaro Jisas vorevira tore piereva rera tootoo pieoro. Oa-ia oisi taraipaveiei, Osa ita vegei vorevira tore pierevarea vegei vore piesa visii tapo ora rera iare, vo rara vigei rutu Krai Jisas tapo ora tavosipavio. <sup>15</sup> Vo tavakaro rutu varao oara oupaveaira vao iava Vearo Sipoipo siposipopaoro visiipa. Oa iava varare oiso puraparaveira, “Vearopai.” Eake iava? Uvare vegei-ia vurapaoro tauvaa oupataveira, vo rara goruvira torepave. Ora oearovu tapo riro irara vo tauva ouive, vo rara Pauto vaaro siraoa voea-ia karekepe. Oire ra va iava riro irara rutu oiraopavira Pauto vaiiario kae piepaive rera-ia vuurapa vaii purapaoro.

### *Vao Iava Tavaka Oa Riroa Keraria Kareke Pievarea*

<sup>16</sup> Eisi osa vituaro iava vegei iava sopauarei viapau oiso raveravepapeira rera oirao piepaoro. Vo ovusa vegei iava varauarei opesipaoro avapai oisivi raga. Vo osa vokiara rutu-ia vegei iava sopauarei gorua oupaiveira.

<sup>17</sup> ✧ Evara-a vuriana oara vegei-ia purapaiveira gareparavi raga. Uva opesi ovoipaiveira, vo ovusa goruvira rutu tore iraopave. Uva oisi-a eisi osa vituaro iava riroa rutu voria oupavearea voari utupaua varao iava vearopara oaraei vuvuiua-ia vegeipa opesi asavira. <sup>18</sup> ✧ ✧ Eake iava? Uvare ora vegei iava sopauarei rutu tovo iraopaveaira varao-ia Pauto varaaro, oara-ia oirara viapau uvuipaaveira oiso ra vara kekepaive. Viapau

varao-a oirara oara kekepaiveira vo rasio-ia. Uvare varao raga oara-ia oirara uvuipaai vara kekepasa, oara evara rutu opesi ovoiperea. Vo ovusa varao oara-ia viapau uvuipaaveira oirara oiso ra vara kekepaive, oara touvira rutu toupaveira opesi asavira. Oara rutu-a evara oarare rugorugopaveira.

## 5

### *Aposel Irara Vo Oirao Pieroaro Voea Iava Sopaura Oaive Oisoa Goru Piepaive*

<sup>1</sup> ✧ Vo osa vo rasio-ia toupaveira, uva vegei iava varaura oiso rutu toupaveira, kepa. Uva oiso taraipave, Okepa-a vao opesi ovoipapeira eru-paoro. Oa isivaaro iava okepavu epao vegeipa, vo kepao oa purareva Pauto vo vuvuiua-ia vegeipa. Okepa-a viapau irai oiratoa vai oa paureva. Okepa viapau opesia vai ei vegei arova. <sup>2</sup> Uva oiso purapaveiei, “Ae, siraovira.” Ari ita, ruipa iraopaveiei oiso ra airepauarei vai-ia varauarei vai touve vo kepa-ia vao oa epao vuvuiua sovara-ia vegeipa. <sup>3</sup> Ari ita, airepauarei vaipa varauarei ruipa iraopaveiei vaopa, teapi kopiiveira, viapau varauarei vai pere vegeipa vo utupa tootoo-ia. <sup>4</sup> ✧ Vo osa touvira vo varaareo-ia toupaveira vo rasio-ia, uva upiara sovopaoro koikoipapeira ora siitokaara. Uva viapau oiso purapaveiei, Viapau ruipapaveiei vegei vouareiaropa varauarei. Viapau. Ari vegei oiso pura iraopaveiei, Ruipapaveiei rutu ra vegei vouareiaro varauarei kavuve, vouareo ouarea-ia kopiiveare. Ra va iava tuariripauarei tavariove airepauarei-ia toupasa, vouarei ouarea viapau opesia vai ei. <sup>5</sup> Pauto rera raga vegeipa raiva purareva vaore, oiso ra ora vegei iava varauarei oave tavariope airepa vararei ousa. Uva vegei vatereva Tugoropato Uraurato vore sopauarei oave iare varao rutu oirao piepasa rera iavirava oara rutu purareva Pauto vegeipa.

<sup>6</sup> Eva-a oa vituaro iava vegei goruvira rutu toupaveira tuuvu vovou rutu-ia. Vo uvare taraipaveira oiso osa tootoopaveira vova ora vegei iava varauarei-ia vo osa tauavira toupaveira Turaro vo uruiaropa. <sup>7</sup> ✧ Vo osa touvira viapau Turaro kekepave, uva rera vo touaro oirao piepaoro toupaveira, vao oa sirova ora vegei vo touaro purapaveira. Uva varao oara kekepaveira, viapau vara kekepaoro raripaveira vegei vo oirao pie vovouaro purapaoro. <sup>8</sup> Oire uva tuuvu vovouira rutu toupaveira. Oa-a vao oa iava vegei vo ruipaoro oiso toupaveira, ra ora vegei iava varauarei kavuve rera tapo Turaro toupasa vo rera vo uruiaro-ia. <sup>9</sup> Ari rovopa rutu-a vao-ia ruipa vegei vaaro Pauto roru piepasa vo rasio-ia toupaooro vo ora vegei iava varauarei-ia ora vo vuvuiua-ia. <sup>10</sup> ✧ Oiraopavira vigei rutu vovio utupaua rera ruvara-ia toreviovereia Krais, vo ovusa vigei vo vovouaro rovirieipave. Uva evoa vigei rutu totevira voria oavi ouperea rera ruvara-ia, ora vigei vo kovoroaro voriaro vo kovoro oara purapapeira vo rasio-ia toupaooro. Ari ita, oearovu rorua oupaiveira veoro kovoro oaive voriaro-ia, osa voeao vuri kovo purapa irara, viapau.

### *Vao Iava Voeao Tauvapasa Oea Katai Vovou Rutu Purapave Pautoa Tapo*

<sup>11</sup> ✧ Oire va-a eva vuri kovo voriaro oa-ia taraipaoro uriri iraopaveira. Ouriria vao vituaro iava vegei goruvira oirara rutu tavitavi iraopaveir, oisore ra ora porepaave Turaro iare. Uva oisi-a eisi osa iava Pauto vegei vo vovoureiaro-ia taraipaveira rutu. Uva visii tapo ita tavipavei, oisore ra visii tapo vegei vo vovoureiaro-ia taraipata vo kovo iava vao oa

✧ 5:1: 2 Pi 1:13-14 ✧ 5:4: 1 Ko 15:53-54 ✧ 5:7: 1 Ko 13:12 ✧ 5:10: Ro 14:10; Ef 6:8

✧ 5:11: Hi 10:31; Ju 23

purapaveaira. <sup>12</sup> Viapau oiso voreri tavi vaiei oa-ia uvuipaveiei ra visii ita tavive oisi oiso-ia, “Vegei oiso piepavevoi vearovira, eke eisi osa piepavevoi vearovira.” Viapau. Ari visii tavitavipavevori ora vegei vo vovoureiaro iava. Oa iava uvuipatai ra voeai vo reoroaro pukopaoro voea tavipata vegei iava, vo osa rorupata vegei-ia. <sup>13</sup> Vosa kokoropa rugoorei vai-ia kovopave, uvuipavei vo kovo purapave Pauto vaisiaro kae piepasa. Ari vosa torevokovira kovopave, oa-ia uvuipaveiei visii tauvapasa. <sup>14</sup> ✧ Ari Krai raga vaaro riroa siraoa oa vegei oiso piepaveira, oa iava viapau uvuipaveiei ora vegei vo ruipaaro raga sirova utupasa. Viapau. Ari rera raga vo rugoaro-a oa sirova utupaveaira. Uvare vegei ita oisi rera-ia oiso taraipaveaira, uvare rera raga-a kataito, ira kopiioepa oirara rutu vo vovouroaro voriaro ouoro. Ari ita, rera raga iavirava oirara rutu toupaveira vo Pauto osireiaro-ia oiso rutu osa kopii irara. <sup>15</sup> Uva kopiioepa oirara rutupa, oisore ra viapau uvuipavei ra ora vegei raga vo ruiparoaro sirova utupavio vigoa Tootoo Ovoi ouera. Viapau. Ari rera raga vo ruipaaro-a, ro ira kopiia iava vorevira toreroepa vigei rutupa Airepa Tootoo vateoro.

<sup>16</sup> Osa-a eisi osa vituaro iava vegei viapau uvuipaveiei ra vo rasio vo pitupituroaro sirovava touvira rutu oirara vo vovouroaro rovirieipave. Viapau. Ari oiraopavira rutu-a vosa Krai keke rovovevori voviri rovovira, oire uva voa-a evoa uva vo rugoo sirovava eva vo rasio iava va rera vo kovoro rovirieivevori. Uva viapau uvuipaveiei ra oisi eisi pieve vo vokio. <sup>17</sup> ✧ Oa vituaro iava vosa ro oirato ira Krai tapo ora tavosiparo, oire ra va iava oiso karekero, Airepatoa rutu. Vo uvare rera vo vovouroaro tuariripa vovouro kavu ovoirevo vao-ia tousa airepa vovou.

<sup>18</sup> Pautoa raga ira oisi vigei airepavira kareke piepareveira vigei vo vovouroaro tavariopaoro. Ari ita, vigei-a vao vigoa rovovira rerava oisoo ora keru rovopavio. Oa iava Oviito Krai siporeva. Ira iavirava Pauto vigei oisi piereva, Ora rera raga vate iraraaro vigei. Oa isivaaro iava vegei vateveva vo kovo, oisore ra oearovivu agiagipave rera iare. <sup>19</sup> Ari ita, vegei vo siposipoaro-a vao-ia oiso toupai, Pauto oirara oisoo agiagipareve ora rera iare. Vao iava uvare Krai vo kovoaro-a, ira kopiioepa oirara rutupa. Uva Pauto viapau oiso vuri vovouro rigatoreva oirara varaaro vara vievieipasa, oiso ra voa varare rugoopaoro oirara togapareve vara-ia. Viapau. Ari vo siposipo-a oa vegeipa vateveva, oisore ra oirara rutu tavitavipave rera iava oiso, Ro oirara rutu agiagipareveira voea kavikopaoro ora rera iare vorevira.

<sup>20</sup> ✧ Uva oisi-a eisi osa toupaveaira Krai vo reoro kaepaoro vaore, oiso ra vegei gisipoaro-ia Pauto visii tavitavipareve. Uva va-a vao oa iava Krai vo vovouro kareke piepavevoi goruvira rutu visii tavipaoro oiso, “Ora visii iava vaseta Pautoa-pa. Oa iava uvuiparoi ora rera iare visii agiagipareve visii kavikopaoro. Oa iava uvuipatai ra oiso rutu toupata, Oiraopa irara rutu rera voeaaro. <sup>21</sup> ✧ Ari ita, Krai ira-ia oisoo viapau vuri vovouro vai toupave. Uva Pauto oisi rera piereva, oiso ra vigei varaaro vuri vovouro kaereve varao vova vigei iava ora rera iare. Oa iava uvuipavei ra Krai tapo tavosivira rutu toupape. Ra va iava Pauto vigei kekepareve oiso, Sisigarue vovou irara rutu. Oiso rutu osa rera Pauto vo vovouro sisigarue-a rutu.

## 6

### *Pol Riroa Rutu Tavaka Kaereva Vo Kovo-ia*

1 Vo osa Pautoa tapo kovopaoro visii goruvira rutu oiso tavipavevoi, Opeita Pauto vaaro tauvaa vò vereopa vovou-ia va ou ragapaoro oa ropi ragapata vava tou ragapaoro. 2 ✧ Aue iava uvare Pauto oiso puraroepa vo Tugoropa Vuku-ia,

‘Vosa torevokovira rutu karekeepa evo vuuta, oisore ra va-ia visii uvua, oire uva va-ia visii uvuava. Uva vo vuuta eva torevokovira rutu karekeepa, oisore ra va-ia visii kae piea. Oire uva va-a eva oa-ia visii kae pieava.’

Oire uvuta! Evo vuuta-ia visii uvurevere. Uva vo vuuta-a vao-ia vo vokio-ia, oa-ia oiso vovoupa ra visii kae piereve ora rera iare.

3 Oire uva vegei viapau oiso oavu avu vai purapavevoi oirara kove piepasa. Vao oa iava oearovu uvuipaai ra oiso purapaave vegeire, “Vuri kovo eva oa purapasivoi.” 4 Viapau. Ari vegei orekerovu rutu oiso purapavevoi vegei vo kovoaro vearovira kareke piepasa vo kovo-ia oa purapavevoi Pautoa-pa. Vosa tuuvu vovou rutu purapave vuriara oupaoro oearovu ruvara-ia ora osiitokarovu rutu oara rutu vegei goru piepai, oisore ra goruvira rutu torepave oisi iavirava. 5 Iu. Oearovu vegei oisoa ragipaive. Ora oisoa vegei tovo ragapaive tuukepa kepa-ia akukuvira raga. Ovusa oearovu vegei kovokovopaive vegeiva kuarapaoro. Vo ovusa kasivarivira rutu kovopave uusi asavira ora ogoevira vo ovokirovu-ia. 6 Vosa vara evara vegei iare oisoa poupa piro, uva ora goru piepave rutu. Viapau vuria vai puravevora. Ari oisoa roroio rugorugoo raga rutu purapave. Ora oisoa kave vovou purapave ora vereopa vovou vaore, oiso ra oearovu va iava taraipaave oiso, Akoea, vearotoarei-a Pauto kovopatoareiara. Ari ita, vegei oisoa oiso ragavira piepave rera vo goruaro iavirava Tugoropato Uraurato kaviko vovou rutu purapaoro. 7 Oiraopa reo raga oisoa vatepave, ora vearo pitupituro purapave vo rera vo goruaro raga-ia. Ra oiso ragavira va-ia vao torevoko vovou pitupave osa ro ira kakutoa raga-ia ora virivaripaoro upoa purapareve rera-ia. 8 Uva oearovu oisoa vegeire oiso rugoopaave, Vearo kovo purapasivoi, vo osa oearovu, viapau. Ari oearovu oisoa vegei takaupaive, vo ovusa oearovu vegei vaisiara kae piepaive. Vo ovusa oearovu vegei vaisipaoro oiso purapaave, “Riro kuuvufoarei.” Vo ovusa oiraopa reo rutu iava tavitavipave. 9 Ari oearovu vegeire oisoa oiso purapaave, “Aapaapautoarei ratau toutoarei.” Vo ovusa oearovu rutu vegei vo kovoaro-ia vearovira taraipaoro vegei eveipaive. Uva vegeipa tutuu piepai oiso ra kopiive. Vo ovusa vegei-a vao tovira rutu totoovira toupavevoi. Ari ita, oirara vegei ragipaiveira vurukoara-ia. Oa-a vao oa-ia viapau vegei upo ovoipaiveira ra kopiipave. 10 ✧ Ari ita, oearovu vegei iava sopauarei vavata piepaiveira, vo ovusa tovira rutu rorupave. Ora oiso toupaveaira, Vegei-a apototoarei. Ari oiso tupaoro oearovu riro irara oiso purapaveaira ra orekerovu rutu-ia pitupaive vearopara Pauto varaaro, vo rara Pauto vo reoaro vatepave voeapa. Ari oavu-a vao-ia vao iava osa oearovu vegeire oiso rugoopaaveira, Viapau oiso oaravu avu vai peira vaitereipa. Vo ovusa orekerovu rutu vegei varaaro tupaive.

11 ✧ Vate irara oaa visii, visiigoa Korin-ia toupataveira. Visiigoapa sirao iraopaveiei oa-ia viapau oiso oreovu avu vai vataupavevoi visiipa. 12 Uva-a evoa uva viapau ora vegei iava sopaura oave vairupaveaira visiipa. Viapau. Ari visii raga-a taru, visiigoa ora visii iava sopaura vairupataveira vegeipa. Oa iava vigei rutu viapau katai vovou-ia toupapeira. 13 ✧ Oire uva va-a vao oa iava ragai vo reo vatepaavo oiso rutu osa aiteto ovii iraraoro tapo ora



reoreoparoveira. Ora visii iava sopaura oavisii karuta vegeipa siraosa, oiso osa vegei ita oisoa vokiara rutu-ia visiipa siraopave visii kavikopaoro rutu.

### *Vigei Raga-a Pauto Vo Kepaaro*

14 ✨ Oire vosa visii Kraisi voeaoro visiigoa orekerovu vearoara pura ruipapata, ra viapau oiso ra voeoro tapo ora tавosipaoro oirao pie vovou asa irara oisi vara purapata. Uvare apeisi ragavira uvuipatai ra vuria tapo tавosipaoro veoro vovou raga purapata? Ora apeisi ragavira uvuipatai ra voeoro tapo ora tавosipata oea rupa vovouva toupaveira, visii vao visiigoa aviavi vovouva toupaveira? Vosa eisi ragavira piepata, ra viapau oiso vearovira kovopata voea tapo ora tавosipaoro rutu. 15 E Kraisi vaio ora Seten uvuipasi ra katai vovou purasi? Asi viapau rutu. E ro oirao pie vovouto oirao pie asato vo vovouarova tapo vaeavira toupaveira? Easi eisi viapau rutu. 16 ✨ Vigei-a Pauto vo kepaoro Tugoropa Kepa, ro Pauto Tootoo Ovoi. Uva apeisi-a? Uvuipatai ra orekerovu avu vai upata vo tugara kare vo kepaoro vo orekeroi tovopasa Pauto vo kepaoro-ia Tugoropa? Viapau. Aue iava uvare Pauto oiso puraroepa vigeire, 'Ragai pauparaveira vo uva toupaveira ragai voeaoro oirara. Uva-a voa uva voea vuutaoro-ia toupaveira. Ra voa oiso toupaa, Ragai-a voea reraoro Pauto. Vo osa voea oiso toupave, Ragai voeaoro oirara.'

17-18 ✨ ✨ Ora oiso tapo osa puraroepa Turaro, 'Uvuipatai ra voea ruvara iava ora goropaoro avapata. Opeita varao-ia pitupata oara vuivuvipavira toupaveira. Vosa eisi pieta, oa iava uvuiparai ra visii ora ragai iare oua. Ra va iava oiso toupaa, Ragai-a visii aitearo. Ovusa visii ita oiso toupata, Ragai ovii iraraoro visii, ora ragai ovii riakoaro visii. Eisi osa purarai, ragai vao-ia Gorutoa rutu Turaro.'

## 7

1 ✨ Vate irara oaa. Reo ovoiro evara toupavoi vigeipa. Osa ragavira-a eisi osa uvui iraopaviei ra orekerovu rutu vara kavupape oara-ia ora vigei iava varaura ora sopaura vuivui piepapeira. Oa iava uvui iraopaviei ra ora airerei piepavio rutu Pautoa-pa avivikepaoro.

### *Korin-pa Irara Ora Voea Iava Sopaura Oaive Poreivoiva, Pol Rorureva Rutu*

2 ✨ Ari ita, vegei viapau oiso vuria vai puraveva visii iava irai-ia. Viapau oiso irai keaveva visii iava irai piro pieoro. Viapau oiso irai keaoro orekerovu avu vai oisoa ou ragapave irai ruvara-ia. Osa vituaro eisi uvuipatai ra vegeipa siraopa vovou rutu vatepata. 3 Uva viapau oiso eisi purarapai visii togapaoro. Viapau. Uvare oiso purarapai vorevoreripavira visii tavipaoro, Rirovira rutu ora vegei iava sopauarei rutu-ia visii kaviko iraopaveira visiipa siraopaoro. Oa vituaro-a vao oa iava vegei iava sopauarei visii tapo ora tавosipapeira, vo ovusa tootoovira toupave, eke vo osa tapo kopiive. 4 Viapau oiso orugorugooi epao ita oa purapaavoi oiso reopaoro visiire. Uvare visii vo vovouoro-ia roru iraopaoro taraiparai oiso, Torevoko vovou rutu purapatavere. Ari ita, otavakarovu rutu oisoa vegei-ia poupa piro. Uva-a evoa uva oiso visii iava uvuvevora, Veoro pitupitu purapatavoi. Eva-a oa vituaro rutu iava varaata vovouvira toupaveira visii-ia roru iraopaoro.

✨ 6:14: Diu 7:2-3; 1 Ko 5:9-10 ✨ 6:16: 1 Ko 3:16; Jer 31:1; Esi 37:27 ✨ 6:17-18: Ais 52:11

✨ 6:17-18: Hos 1:10; Ais 43:6 ✨ 7:1: 2 Ko 6:17-18 ✨ 7:2: 2 Ko 6:12-13

5 ✨ Ari ita, oiso ragavira-ia Masedonia Provins-ia pou viroveiepa. Uva viapau oiso voa reareaveiepa, uvare otavakarovu rutu vegei iare voa pou piropa, vo osa oearovu vegeiva ora kaureopaaepa. Oa-a vao oa iava vegei iava sopauarei rirovira vavataepa rugorugoo irapoaooro. 6 Uva rera-a Pauto ira uvuiparoi vo vavataro verapareve oirara sopaooro iava. Osa-a oiso osa vegei-ia piereva vo osa Taitas siporeva vegei iare. 7 Uva viapau oiso rera keke ragapave. Viapau. Ira-ia rorupavevoi rutu, uvare rera vo siposipoaro uvuvevo vao visii iava, vo uvare vearovira rutu rera tauvatavora rera iava sopaua rutu goru piepaoro. Oiraopavira rutu ragai tavirevorao visii iava, vo uvare ragaipa oisoa ruipapata oiso ra ragai keketa. Ora vo osa oisoa ragaipa rirovira siraopata. Ora vao iava tapo osa ragai vo reoroaro sirova oisoa goruvira rutu utupata. Oire uva va-a eva tapo-ia rirovira rutu roru irapoaavo.

8 Ari ita, ragai vaoro-ia rovoa pasia taraiparai oiso, Voea vaipa pasi riro vavataa vai vateavora vao sipooro. Ari viapau oiso siraoparai vo vokio-ia vo pasi iava eva. Uva taraiparai oiso osa visii sirao pieavora gare visivi raga. Ari viapau oiso ragai iava sopaua oaa vavatapai visiire rugoopaoro. 9 Viapau. Ari ragai roru irapoaavo. Uva viapau oiso vo sirao vavataro iava-a eva visii vaoro. Viapau. Ari vao iava uvare visii vo vavataroaro-a evara oara vituaro iava ora visii vo pitupituroaro tavariotavora ragai vo reoroar uvuoro. Uvare Pauto kasikasi pievira vo vavataro kovo pierevora visii iava sopaura-ia. Uva oisi-a eisi osa vituaro-ia ragai viapau oiso visii vuri pieavora. 10 ✨ Eake iava? Uvare vo vavataro evara oara iava uvuipa Pauto oirara vorevira sopaooro porepareve. Ra va iava Pauto voea orirureve. Osa iava eisi vigei rutu uvuipaviei rutu ra rorupe. Ari vosa vo tavakaro vo rasio iava oupaive oirao pie asa irara, oa iava uvuipapai ra kopii ovoipaave rara, vo rara viapau oiso ora oearo iava sopaura vai oave vorevira poreive va iavirava. 11 ✨ Vearovira rugorugoo irapoata vo tavakare vao-ia, uvare Pauto oisi va-ia vo kovo purareva visii-ia. Uvare va iavirava oisoa oisi rutu goruvira rugorugoo irapoata. Ora oiso tapo osa va iavirava ikauvira rutu vo reo pukotava, oa-ia visii vo vovouroaro torevoko vovouro karekeepa vaore, oiso ra viapau oisi orugorugooroi purapaive oearoi visii iava. Ari ita, uvare oisi-a eisi osa iavirava vuri vovou veritavora vapa uriripoaro vapa pura arapa ita. Iu, uvare ragaipa siraopaooro goruvira rutu ragai vo reoroar sirova torevokovira rutu utu iraoataepa rera eera torevokooro ira vuri pitupitu purareva. Oa iava va eakareva. Oire uva oisi-a eisi osa iava ragai vorerivira keke ruipapatai vaore, ra visii vovouaro kekeoro va-ia oisi taraira eisi oiso, Oiraopavira rutu viapau oiso vuria vaiei visii-ia, vo uvare oisi eisi rera pietava eera.

12 Oire vo rigato eva oa puraavora uva viapau oiso rugorugooaraera, Uvare vuri pitupitu purareva, ora o tapo iria rera vovouaro-ia vuria oueva. Viapau. Ari visiire rugorugooapaoro evo pasi rigatoavora visiipa. Oisore ra va kekeoro vo reo sirova utuoro ora visii-ia va iava taraita vo Pauto osireitoaaro-ia. Ra oiso purata, “Oiraopavira rutu oiso osa Pol-pa siraopavioveira ora voeao oea rera tauvapaiveira.” 13 Oa-a eva vituaro iava vegei iava sopauarei varaata piepataveira.

Iu. Roru irapoavevoi visii vovouroaro-ia ora ro-ia tapo Taitas. Uvare vegei roru pieavora rutu va-ia, osa visii iava vegei tavitavirevora, vo osa visii rutu rera vo vovouroaro goru piepatava rera vo tavakaroaro verapaoro. 14 Ari ita, voviri tuariri Taitas tavi rovoava oiso, “Evoea Korin-pa irara oea ragai vo reoroaro uvuivere rara.” Oire uva va-a eva osa ragai vo reoroar eva oirao pietavora rerapa visii vo vovouroaro iava. Uvare vokiara

rutu-ia vegei visiire oiraopavira reopaveaira. Oiso osa vo reo oa vateava Taitas-pa visii iava, uva oisi oiraopavira rutu karekeera. <sup>15</sup> Oire uva visiire rugorugoopaoro rera vaaro siraopa vovou kavikoa rirapai. Eake iava? Uvare ikauvira rutu ora visiipa rera rei vaisi pietava, vo uvare rera vo rearo uvutava. Ora vao-ia tapo osa ora visii raga oisoa ora uriri piepata oiso rugoopaoro, E vearovira avu rera vo vovouaro sirova utuviovere? <sup>16</sup> ✱ Uva roru iraopaavo, uvare vao-ia tarai ovoirai oiso, Goruvira rutu eisi vo vovou purapataveira eva vearoa.

## 8

### *Oirao Pie Vovou Irara Uvuipaaí Araoko Irara Oaive Tauvapaive*

<sup>1</sup> Araoko irara oaa, oiso ruipa iraoparai visiipa ra oiso ragavira taraipata voeao-ia lotupa gururo oea voraro toupaveira Masedonia Provins sovararia. Vao iava osa Pauto oisoa rirovira rutu voeapa vereopa vovou rutu purapaveve. <sup>2</sup> ✱ Vosa riro tavakaro rutu voea-ia pou piro, uva evara-a oara-ia tupaoro uvuipaaí touvira ra roruvira rutu toupave. Uva vo rorua eva vituaro-a vao-ia, orekerovivu-ia voea varaaro oara-ia oisoa sirao vate purapaive. Oiraopavira uvare apota iraravi rutu-a. Ari oisi tupaoro apotavira riroa rutu sirao vate puraivora. <sup>3</sup> Uva oiraopavira visii tavipaavo oiso, Voea varaviaro rutu orekerovu vateivora Kraís voeaaro apota irara tauvapasa. Ari ita, pute pievira oaravu ita voea varaaro vateivora. Osa piepaivora eisi ora voea vo ruipaaro raga sirova. <sup>4</sup> Uva goruvira ragai tavipaivora, “Igei ruipa irapaiei rutu oiso ra sirao vate purapaio va takuvupaoro oearovu vo vateroaro tapo. Oa iava uvuipaiei ra va-ia Pauto voeaaro tauvapaio.” <sup>5</sup> Uva oisoa oiso keapaave, Gareavi raga monia sirao vate oa vatei, osa viapau. Riroa rutu oa vatepaivora. Ari ita, oisi-a eisi osa ragavira ora voea rutu iava sopaura rutu oisoa Turaropa vatepaive. Eisi osa ragavira Pauto vo vovouaro sirova utuoro ora voea rutu iava ita sopaura vateiva vegei tauvapaoro.

<sup>6</sup> Oa-a eva oa iava oiso Taitas-re puraveira, “Ari ita, voviri tuaririvi Korin-pa irara tavirivora, oiso ra sirao vate purapaive. Ari vosa viapau ikaupavira va guruguruive, uva eva raga-ia uvuipaiei ra voea tauvarivora, va ikauvira opesi pieive va guruoro.” Eisi osa rera tavivevora. <sup>7</sup> ✱ Oiraopavira rutu ita oiso osa ovokirovu-ia okovorovu purapata, ra vearovira rutu vara purapata riro goruvira. Uva oisi-a eisi osa ragavira visii-ia taraiparai oiso, Osa ita goruvira rutu Jisas vo rearo-ia pitupataveira. Ora va kosi piepataveira vearovira rutu. Ora vearovira rutu vearo tarai-ia taraipataveira. Ora vegeipa sirao irapataveira. Ari ita, ikauvira rutu ragai vo rearo uvu ovoitava ragai tauvasa. Oire uva vearovira rutu pute pievira vara evara purapataveira. Uva visii arepaavo ra vao tapo sirao vate vearovira rutu ita purapata.

<sup>8</sup> Ari ita, ragai viapau oiso reo goru vai purapaavo vaore, oiso ra va sirova utupata. Viapau. Ari visii tavipaavo voeao iava oea oiso ruipapaai ra oearovivu tauvapaive. Uva visii akepaavo oiso, “E uvuipatai ra oisi pieta eisi?” Ra va iava visii vaaro siraopa vovou kareke pieta viaevira rutu. <sup>9</sup> ✱ Uvare taraipatai vigei reraaro Turaro Jisas Kraís vo vovouaro-ia vao vereopa vovou. Ira oisoa riroara rutu-ia orekerovu pitupareve ora rera varaaro. Ari ita, oa iava vara-ia ora apota pieroepa rera raga visii rutu tauvaoro. Uva oisi ora apota pieroiva, eisi visii piereva, oiso ra riroara rutu-ia orekerovu pitupata rera varaaro vearovira.

<sup>10</sup> Oire uva oiso rugorugoo-parai vao iava, Vearopai vosa vo kovo opesi pieta ora visii varaaro moniara guruoro sirao vate puraoro, vo kovoa rovotavora vo ivari-ia oa putevora. Ari ita, uva voari oearovivu tauvasa vovou rovotaera. <sup>11</sup> Uva oisi-a eisi osa iava uvuipatai ra ikauvira ora visii vo kovoaoro opesi pie ovoita visii vo rui-paaro oirao piepaoro. Ra oisi vo moniro guru ovoipaoro voeavio apota irara tauvapata voea vatepaoro vara. Vosa riroara moniara sirao vatero touve, oara-ia ita uvuipatai ra vara vateta. Ari vosa garearavi, oire oisi raga ita vara vateta ita voeapa. <sup>12</sup> Vosa vearo vovou rutu purata vo vate purasa eva siraoa, oire ra va-ia Pauto roru pieta. Vosa riropara rutu, ora garepara visii varaaro oara pitupata, uva viapau oiso Pauto vara vieipare. Uvare va-a eva visii raga vo vovouaro vituaro oa-ia oisi rera eisi roru piepataveira.

<sup>13-14</sup> Viapau oiso visii tavipaavoi ra visii raga kasivarivira kovopata, ovusa oearovu tou ragapaive pokapokapaoro. Viapau. Ari vo vuutao-ia riroara rutu orekerovu toupai-voi visii ruvara-ia. Evara-a oara iava uvuipatai ra voeaviopa apota irara vatepaoro voea tauvapata. Oisore ita ra vo utupaua riroara vai-ia ita pituivere. Oire ra visii tauvaive ita oarai vatepaoro vo osa ita apotavira toupata. Osa iava uvuipatai ra vaeavira rutu ora tuutuukopata ita. <sup>15</sup> \* Tugoropa Vuku oiso purapapeira, 'Ro ira riroara rutu ora rera varaaro gurupareve, oara-a evara viapau oiso varao-ia putepaiveira oarapa rui-paparoveira. Ora oiso osa ro ira garearavi ora rerapa gurupareve, oara-a evara viapau oiso potepaiveira varao-ia oarapa rui-paparoveira. Oara rutu evara rerapa uvuipai ro ira ora rera iare riroara rutu gurupareve, ora ro ira ora rerapa gareparavi gurupareve.'

Uva oisi rutu toupai-voi vo visiipa vo osa orekerovu gurupata sirao vate purapasa oearovivupa.

### *Oearovu Kovopa Irara Poua Virovere Korin-ia*

<sup>16</sup> Vegei Pautoa-ia vearo vaisi purapavevoi rorupaoro rutu, uvare Taitas eisi piereva oiso ra visiipa siraoparo, oiso osa vegei oisoa visiipa siraopave. Oa iava rirovira rutu oisi vovou iraoparoi oiso ra visii tauvapareve. <sup>17</sup> Ari ita, ora rera vo vovouaro rutu sirova utuoro uriorovere rara visii tauvapasa. Vosa oisi eisi piereve, oire ra oisi iavirava vegei vo rearo sirova uturo vao oa-ia rera sipopavevoi visii iare. <sup>18</sup> Uva vaiterei rutu sipopavevoi visii iare ora ro iravu araokoto oavi. Ro ira-ia vearo vaisi rutu purapaiveira lotupa gururo vo uruiara rutu-ia. Eake iava? Uvare vearo kovo rutu purapareveira Vearo Siposipo kosi piepaoro. <sup>19</sup> Ora vao tapo-ia oiso-ia uvare voea raga lotupa irara rera reesioro rera ropoiva vaore, oiso ra vegei taveopareve. Ra igei rutu vo kovo purapaio Turaro vaisiaro rei piepaoro, vo osa sirao vatero kaepaoro avapaio voearopa apota irara. Oire va iava oisi ora igei iava voea tauvapa vovouro kareke piepaio voeapa.

<sup>20</sup> Oire uva oisi-a eisi osa piepaoro ora vatatopopai rutu vaopa, teapi oearoi igeire vuri rugorugoo vai kosi pieive va iava vao vo osa va vao sirao vate riroa vatepaio oearoipa. <sup>21</sup> \* Igei katai vovou ragava toupai-oveira, oiso ra va iava torevoko vovou raga purapaio Turaro osireiaro-ia ora vo oirara rutu osireiaro-ia.

<sup>22</sup> Oire uva iravu raga ro vigei araokotoaaro ira voea tapo arupavevoi visii iare. Ari ita, ovokirovu rutu-ia rera vo kovoaro sisiropaveaira. Oa-a vao oa iava oiso taraipaveaira rera-ia, uvare rirovira rutu oiso rui-paparoveira ra visii tauvareve. Uva visii-ia vearovira raripaoro oiso vovouparoveira rutu ra visii tauvapareve. <sup>23</sup> \* Ora ro Taitas ira ragai tapo kovopareveira

visii tauvapaoro. Ora oearovu araoko irara oavi, voeao oea roporopoiva lotupa irara vo reo eva voea vaaro kaesa visii iare. Ra voea iavirava Kraís vaisiáro kae pieta. <sup>24</sup> ✧ Uva oiso visii tavipaavoi, ra voeavipa vereopa vovou rutu purapata vosa tauvapaoro. Ra oisi iavirava lotupa gururo rutu va-ia taraipaave vao oiso oea oiraopavira rutu visii vaaro iava vearo pitupitu rutu siposipopaveaira visii-ia vearo vaisi purapaoro.

## 9

### *Vateatea Iava Vao Pauto Vaaro Oirara Tauvapasa*

<sup>1</sup> Va iava vao visii tavitavi ragapaavoi vo pasio rigatooro, uvare visii-ia taraiparaveira oiso osa apota irara tauva ruiapa iraopataveira Pauto voeaaro evoea oea Judia Distrik sovara-ia toupaveira. Ari ita, osa eisi piepataveira ora visii raga vo ruiapaoro sirova utupaoro. <sup>2</sup> Uva visii vo vovouroa-ia tarai rovoaiva, eisi voeaopa oisoa vearovira siposipopaa oea Masedonia Provins-ia toupaveira. Uva oiso puraparaera, “Voeao vigei araoko iraraaro oea Grik-ia tupaoro, ora voea vo vovouaro puraivorao vao sirao vate vatepa vo ivari-ia oa putevorao. Oire uva visii iava uvuoro voeao Grik-ia tou irara voea vo vovouaro puraivora voeao apotapa irara tauvasa.” <sup>3</sup> Oa vituaro-a eva oa iava voeao araoko irara oavi visii iare sipopaavoi. Oire ra oisi iava vo reo eva visii iava oiraopavira rutu karekepe, vo osa visii ruvara iava oarai sirao vatero vai oupaive. Vosa viapau oisi ovatevatearoi ravaata, ra oisi iava viapau ragai vo rearo oiraopavira karekepe. <sup>4</sup> Oire vosa oearoi Masedonia iava ragai tapo urioavere, vo osa viapau moni vatatoporo vaiva toupata vare eva sirao vate, uva oisi-a eisi osa iava uvuiparai ra riroa rutu ariia oua visii iava. Oiraopavira oiso osa visii tapo uvuipatai ra vo arii outa, vo rara rirovira rutu vo vatevatearo egaega ragapaoro reoreopata, vo osa viapau vara vatepata. <sup>5</sup> Oire uva va-a eva vituaro iava vigei araoko iraraaro ira pie rovoavoi visii iare sirao vate ravaasa vo vateo oa iava ragai tavi rovtavora. Uva oisi-a eisi osa iava vo vatevateo rutu eva ravaavira visii ruvara-ia toupavere, vo ovusa visii ruvara-ia pou virosa uriora. Ra va iava oiso taraira, Ora visii raga vo vovouaro sirova ututai vo vatevateo vateoro, vo osa viapau ragai vo rearo iava.

<sup>6</sup> ✧ Vaore ovoovoa rugoo iraopata ro iava oirato ira gareara takuraara paureva. Oa iava vara kuearo gare visivi ourevere. Ari ita, ro ira riroo takuraro paureva, oa iava vara kuearo ita rirovira ourevere ora rerapa. <sup>7</sup> Oire visii rutu katakataivira ora visii vo vovouaro sirova sirao vatero vate iraota. Ra opeita reo goru ragare rugorugoo iraopata rutu, ra va-ia sirao vate vatepata. Ora vosa oisi vara purapata, ra opeita ora visii ragare siraopaoro rugorugoopata oiso-ia, Ora ragai varaviaro opesi pieavoi. Viapau. Eake iava? Uvare Pauto taru rerapa vereopa vovou rutu puraparevere, ro ira sirao vate purapareve rorupaoro rutu oearovupa. <sup>8</sup> ✧ Oiraopavira rutu oiso osa Pauto uvuiparoi visiipa orekerovu vatepasa visii vo vovouroaro-ia pute pievira rutu. Eisi osa iava rirovira rutu orekerovu touvere visiipa ora oearovivu tauvapasa tapo. Oa iava viapau uvuipatai ra orekerovu avu vaipa apotapata varao oarapa ruiapapata. <sup>9</sup> ✧ Tugoropa Vuku-ia oiso purapapeira, ‘Ro ira rirovira rutu apota irara vatevatepareve, ira-a eera ira-ia vereopa vovou opesi asavira rutu toupavere.’

<sup>10</sup> Ari ita, vo ovoovo-ia tapo oiso oiraopavira purapai, Vosa oirato takuraara paupareveira, Pautoa raga ita-a ira vo takuraro purareva. Oire vosa

ro ira otakurarovu ita paureve, uva rera raga ita Pauto ira vo takuraro kova piepareveira. Oire ra va iava oirato vara aiopareve. Osa ragavira Pauto uvuiparoi ra oisi eisi visii pierevora, oisi vo vatero varao vatepata. Osa iava uvuipatai ra vo vatero tuaro pute pievira rutu oupata rera ruvarua. <sup>11</sup> Oire vosa Pauto visiipa rirovira rutu orekerovu vate rovporeve, uva visii ita uvuipatai ra vara iava rirovira oaravu vatepata. Osa-a eisi osa iava riro irara rutu oirara uvuipaai ra Pauto vaisiara kae piepaive, vo rara visii vo vatevateroaro ou rovpapeira ora voeapa varao oara kaero uvuipaiei avao voeapa. <sup>12</sup> Uvare vo vatevatea eva oa puratavoi oa-ia varei kovoarei toupavoi oiso, Oavu-a vao apota irara tauvapa voeao oea orekerovupa apotavira toupavoi. Ari oavu-a vao-ia oiso ragavira uvare vo vatevatea-a eva oa iavirava riro irara uvuipaai ra Pautoa-ia vuurapa vaisi purapaive rera-ia rorupaoro. <sup>13</sup> Vosa igei vo moniro evara ouoro avaiovere rara voea vatesa, oire ra vara kekeoro varao visii vo vateroaro siraoara taraiave visii-ia oiso puraoro, “Oiraopavira rutu uvare voeao Korin-pa irara goruvira rutu Krai vo reoro-ia pitupaiveira vao Vearo Siposipo. Oa iava oearovupa siposipapaiveira va iava favitavipaoro.” Oire ra va iava Pautoa-ia vuurapa vaisi puraive visii iavirava. Ora visii vaoro-ia vereopa vovou vearo vaisi puraive vao oa purapata voea tauvapaoro ora oearovu. <sup>14</sup> Osa iava uvuipaai ra visiipa rirovira variripaave visii kaviko iraopaoro. Eake iava? Uvare uvuipaai ra taraiave oiso, Pauto oiraopavira rutu visii tauvapaoro vearopara rutu kareke piepareveira visii-ia. <sup>15</sup> \* Ari ita, vigei rutu uvuipaviei ra vearo vaisi purapape rera-ia va iavirava vao riro rutu tauva sirao vate rovpapa rutu. Vo vateo-ia rera raga-ia ro-ia Krai, ira siporeva Pauto vigei virivarioro vigei kae piesa.

## 10

### *Pol Takau Reoro Pukoreva Varao Oara Oisoa Purapaive Aposel Irara Takaupaoro*

<sup>1</sup> Ragai-a vao-ia Pol ragoa oiso visii tavipaavoi ra goruvira rutu vo reore rugoo iraopata. Uvare oiso purapataveira, “Pol igeipa tauavira tupaoro igeipa uriri asavira riro gorupa reoro vatepareveira. Ari vosa igei tapo toupavevori, ra va iava kave visivi reoreoparo igeire.” <sup>2</sup> Oire uva oiso ragavira visii tavipaavoi vo vovou sirova Krai oa oisoa purapareve kave vovou. E ragaiapa ruipapatai ra visii iare uriora uriri asavira visii tapo tupaoro reoreosa evoa visii rutu puaro-ia, eke? Opeita eisi ragai piepata, oiso ra oisi piea visii-ia. Uvare oiraopavira rutu taraiapai oiso osa uvuiparai ra uriri asavira rutu oisi eisi piea voeao iare oea vegeire oiso purapaaveira, “E vaiterei rasitoa raga vo rugorugoooroaro sirova utupaveira.” <sup>3</sup> Ari ita, vegei rasitoa-ia toupaveira. Uva viapau oiso rasito vo pitupituarore rugorugooopaveira oiso ra va-ia gorua oupave Seten-va ora upopasa. <sup>4</sup> \* Varao upo purapara oara-ia upo purapaveira, uva viapau oiso vova rasitoa-ia vara-a. Viapau. Ari evara vova Pauto ruvara-ia uriopapeira riro goruara rutu. Oara uvuipapeira rutu vao riro gorua vuria opesi pie ovoipasa, ora va rera vaoro riro goru kovo. Osa ita eisi osa vegei varao opesi piepaveira, oara purapaiveira oirara varao kuvvu reoro Pautoa tapo kaureopaoro. <sup>5</sup> \* Varao oiso vosa oearovu Pauto toga ragapaive oreorovia rera takaupaoro, vo rara oisi vo reo iava viapau oearovu rera oirao piepaive. Oire uva vo reoro verapaveira varao oara iavirava oearovu ora vaisi oave raga kae piepaiveira, oiso ra oirara vo rugorugoooroaro tavariopavevora, oirara uvuipaai ra Krai ragare rugooapaave rera raga

\* 9:15: 2 Ko 2:14; Ro 5:15-16 \* 10:4: 1 Ti 1:18; 2 Ti 2:3; Ap 7:22 \* 10:5: 1 Ko 1:19; Ais 2:11-12

sirova utupaoro. <sup>6</sup> Osa pieveare eisi ra va iava oisi eisi toupata Krai ragare rugoopaoro. Osa iava uvuipaveiei ra uriri asa vovou rutu iava oearovu visii iava vo rugooraoro torevokove, voearo oearoa rutu ora voea ragare rugorugoo iraopaaveira Pauto vo reoroaro uvupa arapa.

<sup>7</sup> Osireiara oavisii vura pieta. E Apeisi-a? Viapau vegei sopaaro eveipata, eke? Uvare vegei tapo ita sopaura oave porevevora Krai iare oiso rutu osa visii. Oire vosa irai oiso ora iraire puraparo, “Ragai-a Krai reraaro,” uva uvui iraoparoi ra vovevira rera raga ita ora sapaarore rugorugooapaoro ora rugorugoo piero. Oisi iava oiso tarairo, Ragai ita Krai reraaro. Eisi raga ita osa vegei tapo ita toupave, Krai vaitereiaro. <sup>8</sup> Eagara vosa ragai raga rirovira rutu reora puraavora ora ragai iava oiso, Ragai reiparai visiipa. Uva viapau oiso vo reo-ia vao ariia vai ouavoi. Vo uvare Turaro raga irai oisi ragai pierevora visii varaaro oirao pie vovouro tore piesa. Viapau oiso ragai vo kovoaro-a visii vo vovouroaro oirao pie vovouro tekipasa. <sup>9</sup> Ra opeita oiso rugoopata, Ragai vo pasiro rigatoavoi visii uriri piesa. Viapau oiso ragai eisi visii pieavoi. <sup>10</sup> Oearovu vai pasi visii iava oiso purapaai, “Pol riro goru reoro purarevoi igei torevokosa vo pasiro-ia. Ari vosa igei tapo toupaveviri vo-ia, ra raveravevira raga reoreo ragaparo akukuvira.” <sup>11</sup> Ragai eveoapa oiso ruipa iraoparai, ra vao-ia oiso taraiave rutu osa ragavira visiipa tauavira rutu tupaoro vo reo rigatoavoi vo pasiro-ia. Uva vo reorei vaeavira rutu tupaivoi ora vo reo oa taru puraavere vo osa visii iare poua viro evoa.

<sup>12</sup> Viapau oiso reoreopaveiei osa voeao oea ora voea vo kovoroaro raga rovirieipaoro oiso purapaai, “Oearovu vuri kovoro purapaiveira, ovusa igei vearo kovo ita purapaio.” Vo ovusa voea raga ita oiso purapaaveira, “Viapau oearoi uvuipaai ra oiso vearopa kovoro vai purapaive osa igei.” Uva vegei viapau oisi uvuipaveiei ra eisi purapave. Uvare kokoropa reoro raga vao oara-ia eisi purapaaveira. <sup>13</sup> Ari Pautoa raga-a ira vegei oisi tavireva vo kovo vao-ia purasa. Oa vituaro iava rera vo reoro raga sirova utupaveaira vo osa visiipa kovopaveaira. Uva viapau uvuipaveiei ra oiso purave ora vegei ragare, “Okovovu raga-a vao-ia oa purapavevoi vearovira.” Viapau. Ari vo kovo raga vao-ia oa iava tavitavaveaira, Pautoa raga oa vegeipa vatereva va purapasa vo visii tavitavapaoro oearovu. <sup>14</sup> Vosa oisoa toupata voari tuariri Vearo Siposipo uvu asavira, uva visii iare urioveiepa va iava tavitavisa vao Vearo Siposipo. Oa iava uvuipaveiei ra ora vegei vo kovoroaro iava torevokovira tavitavipaoro rorupave rutu, uvare vo kovo-a eva Pauto oa vatereva vegeipa, oisore ra va purave visiipa. <sup>15</sup> Uva viapau oiso oearovu vo kovoroaro egaegapaoro oiso purapave, “Vegei vo kovoaro raga vao-ia osa va purapaveaira.” Viapau. Ari vao raga iava tavitavipaveaira oiraopavira okovoa purapaveaira. Ari ita, vegei oiso ruipaveiei ra visii vo vovouroaro oirao pie vovouro kovapape rutu. Oisore ra visii tavitavapaoro vegei vo kovoroaro riorapape rutu vao oirara tavapasa. <sup>16</sup> Uva ita, uvuipaveiei ra otaererovu iare ita avave Vearo Siposipo iava tavitavisa visii vo taerearo-ia puteoro. Uva uvuipaveiei voeoapa siposipove oea viapau Vearo Siposipo iava uvupaiveira. Osa iava viapau uvuipaveiei ra oearovu raga vo kovoroaro egaegapaoro rorupave. Viapau. Ari vo kovo raga vegei. Eake iava? Uvare vegei raga-a vegoa Krai iava rovpavira rutu voea vovea tavitaviveare rara.

<sup>17</sup> ✧ Uva oiraopavira rutu-a, uvare Tugoropa Vuku oiso purapaveira, ‘Ro ira oiso vovouparo ra iravu raga vaisiario kae piepareve, ira-a eera uvuiparoi ra Turaro raga kataito vaisiario kae piepareve.’

18 ✨ Eake iava? Vosa ro oirato ira ora rera raga iava vaisia kae piepareve oiso purapaoro, “Ragai vearo kovo rutu-a vao purapaaveira,” oreoa eva akuku reo raga. Ari vosa Turaro Pauto rerare oiso puraro, “Eera vearo kovo rutu purapaveira,” oire ra va iava vo reo eva oisi oiraopavira rutu toupave.

## 11

### *Pol Poeravira Rutu Kuuvu Irara Iava Aposel Irara Tavitaviroepa*

1 Oiso ruipaparai ra ragai vo reoaro uvuta, uvare oearovu ragaire oiso purapaaveira, “Rerape eera. Ira ora rera vaisiario raga kae piepareveira ora rera vo kovoaro iava eera Pol,” osa viapau ragai oisi eisi. Uva ita, uvuipatai ra ragai vo reoaro uvu irapata. 2 ✨ Eake iava? Uvare ragai visiire rirovira rutu rugorugoo irapaveira, oiso raga ita osa Pauto visiire rirovira rutu rugorugoparaveira oiso, Teapi oeai visii ivuive rera arova. Oa-a vao oa iava oiso rugoaparai visii-ia, uvare oiso rutu toupatavoi ovoovoa, oiso osa o iriavu tavauruva iria reesireva aiteto iravpu viovokoto, oiso ra oira oureve. Uva oisoa vaiterei vo vokiare ora ousapa voki tuepaoro aiteto vearovira rutu oisoa oira tokipareve vaopa oiso, teapi irai raga oira-ia vuria vai pura rovoreve. Oire uva oisi-a eisi osa ragai-a ita visii rutu aitearo ragoa visii reesipaaveira, oiso ra Kraís tapo kataivira rutu ora tavospata. Oa vituaro iava eisi vokiara rutu-ia kasivarivira visii tokipaaveira. 3 ✨ Eake iava? Uvare vapa vao uriri irapaveira oiso, teapi oearoi raga visii vo rugorugooro tekipeave vara vuri piepaoro. Ra oisi iava vo vovov kavuta vare ovauoro oa purapaveira Kraís tapo ora tavospaoro. Teapi oiso pieta osa o-ia Iv iria piro piereva ro rakoruto Seten vara raga-ia evara kuuvu reoro. 4 Ari ita, rorupaveira oearovu vo siposiporoaro uvupaoro, oara osivu ragavira purapaveira. Uvare iravu vai raga iava Kraís vo siposipo eva. Viapau oiso rera raga ro Kraís ira iava visii siposipopaveira. Uva oisi ragavira-a eisi osa iava vo reoro evara oaravu raga tovopaveira ora visii iava sopaura-ia. Oa iava ora visii sopaaro iare iravu raga uraurato oupaveira. Oiraopavira rutu uvare voea evoea vo siposipoaro viapau oiso toupaveira osa vo siposipo vegei vaoro. Ora eera uraurato iravu raga. Viapau oiso ro-a Tugoropatoa rutu Uraurato ro ira-ia tarapaveira.

5 Uva oearo evoea oiso purapaveira, “Vearo irara rutu voeao-ia aposel irara.” Ari ita, ora ragai vo kovoaro-ia tarapaveira oiso, Viapau oiso evoea vo kovoaro ragai vo kovoaro-ia putepaveira. Viapau. 6 Uva ita, viapau oiso uvuiparai ra vearo reo vai puraa, oiso osa vo reoro oara purapaveira. Ari ragai vao raga-ia oiraopa reo rutu-ia vearovira rutu taraparai, oiso osa va iava oisoa siposipopaa visiipa roroiovira rutu va kosi piepaoro. Ora oiso tapo osa oisoa torevokovira rutu ragai vo pitupituaro viveira rutu visii osireiario-ia purapaa, oiso ra vara-ia tarapata oiso, Vo reoro-a eva Pauto vo reoaro rutu oiraopara.

7 Oiraopavira rutu va iava osa oisoa Vearo Siposipo iava visiipa siposipopaa. Uva vo kovo eva oa-ia viapau oisoa moniara vai oupaa visii ruvara iava. Viapau. Ari ragai akukuvira rutu eisi oisoa piepaa ora ragai vaisiario raga vara piepaoro, oisore ra visii vaisiario kae piea. Uva apeisi-a? Vuria vai oa oisoa purapaa eisi piepaoro, raa? 8 Ari ita, vosa oisoa visii tapo toupaa, uva oearovu lotupa irara uvarovuva ragai oisoa tavapave moniara vatapaoro varao oara-ia oisoa visiipa kovopaa. Uva eisi osa piepaoro oisoa moni oupaa oearovu raga ruvara-ia vo visii tavapasa vara-ia. Uva apeisi-a? Oisi eisi vuripai, raa? 9 Oire vo osa visii tapo



toupaoro moni apotaparaera auere ora ragaipa oaravu avu vai voripasa. Uva viapau visii areavora moniara voire. Viapau. Ari voeao raga araoko irara oavi oea oisoa Masedonia Provins iava uriopaave ragai tauvapaas. Irapau visii ruvara-ia moni areparaera. Uva viapau oiso ra visii arepaa oairaire ita moniara vai vo utupavira. <sup>10</sup> Taraipatai oiso osa oiraopavira rutu oiso puraparai, Kraiss tapo ora tavosiparaveira. Uva oisi ragavira ita oiso osa oiraopavira rutu oiso puraparai, Viapau rutu irai uvuiparoi ra ragai vo siposipoarore korukoruro, osiposipoa purapaavo vao iava osa visiipa akukuvira rutu oisoa kovo ragapaa moni ou asavira. Viapau. Ari ragai vo reoaro voraro rutu avaperea Grik-ia. <sup>11</sup> Eake iava oiso puraparai visiire? E viapau pasi visii vaipa siraoparaveira, raa? Ari ita, Pautoa raga taraiparoveira ragai vaaro-ia riroa rutu siraoa visiipa oiraopavira rutu oa ragai-ia toupaiveira.

<sup>12</sup> ✧ Oire uva akukuvira raga touvira moni ou asavira visiipa kovopaavere. Uvare evoea oearovu oea vaisipataveira oiso, Aposel irara oea moni oupaoro kovopaiveira. Uva oisi-a eisi osa iava viapau uvuipaai ra ora voea vo kovoaro-ia rorupaoro vovio utupauavi va iava tavitavipaave, oiso osa ragai ora ragai vo kovoaro-ia rorupaoro uvuiparai ra tavitavipara. <sup>13</sup> ✧ Oearoa viapau oiso aposel irara-a. Viapau rutu. Ari kuuvu irara raga evoea. Oea ora voea vo kovoaro keakeavira raga purapaiveira va tavariopaoro vaore, oiso ra utupauavi oiraopavira rutu voea vo kovoaro oiso karekepe Kraiss voeaa ro kovoaro aposel kovo. Vo osa viapau rutu. <sup>14</sup> Ari ita, viapau oiso va kekepaoro ora sitaraerao. Uvare Seten tapo ira uvuiparoi ora rera raga ora tavarioparo. Ra va iava eisi karekeparo oiso, Purapurapato enselto ro ira oiraopa reo rutu iava tavitaviparoi. Vo osa viapau rutu. <sup>15</sup> ✧ Oire oisi-a oiso osa vo ovoovo sirova utupaoro ora rera Seten voeaaro kovopa irara vo vovouaro tapo tavariopaiveira, uvare ora voeare eisi rugopaaveira, oiso ra oearovu visii iava voea vaisipaive oiso, Vearo irara rutu aposel irara. Vo ovusa Pauto vearovira rutu voea-ia vurapareveira vore tuepaoro utupaua, uva voea vo voriaro vaterevere evara kuuvu kovoro voeapa vorioro.

### *Pol Riroara Rutu Tavakaara Oisoa Oupareve Aposel Kovo-ia*

<sup>16</sup> Oire ragai ita oiso vorerivira visii tavipaavo voeao iava oea ragaire oiso purapaaveira, “Rerape eera. Ira ora rera raga ora rera iava vaisia kae piepareveira.” Opeita visii tapo ita ragaire oisi purapatai eisi. Ari vosa oisi eisi purapata, oire eagara, uvuipatai ra touvira ragai vo reoaro uvuta <sup>17</sup> vo osa oiso puraparai, “Vearovira vao purapaa,” ora “Ragai oa puraavere vearovira rutu.” Uva Turaro viapau vo reo eva ragaipa vaterevoi. Ari ragai raga vo rugorugooaro iava oiso vo reo purapaavo akukuvira raga. <sup>18</sup> Ari ita, riro irara ora voea raga ora vaisiaro kae piepaaveira, uvare vo rasio vo rugooaro sirova utupaaveira oisi eisi piepaoro. Oire uva eagara ita. Ragai tapo ita oisi piepaavo. <sup>19</sup> Visii raga ita ora vaisipatai oisio, Igei-a riro tarai irara rutu. Osa iava roruvira rutu vo reo uvupataveira oa-ia oearovu oiso purapaaveira, “Igei uvuipaiei ra oiso vearovira vara puraio, eke eisi ragavira.” <sup>20</sup> Oiraopavira rutu visii roruvira rutu evo reoro uvupata varao oara-ia oisi eisi oiso visii tavipaive, “Oire oisi eisi piepata ikavira!” Ora tapo oiso osa rorupata voea vo rugooaro raga sirova utupaoro, vo rara visii vo rugorugooaro paipai piepaive visii varaaro ou ragapaoro vatauvira raga. Ora vosa visii oiso piepaive akaipa irara raga. Ora vosa visii puaro taparakopaive. <sup>21</sup> E vuria vai pasi puraavora, uvare viapau oiso eisi visiipa oai puraavora tapo, raa?

Oire vo osa oisi eisi purapaave oiso, “Igei veaoro vao-ia purapaiovoi,” osa raga ita ragai tapo uvuiapai ra oisi reora visiire eisi. Ari ita, uvuiapai ra eisi kokoropavira reora visiire osa voeao oea vuriara purapaiveira oisi eisi reoreopaoro. <sup>22</sup> ✧ Ora apeisi-a? Ora voeare oiso purapaaveira, Igei-a Hibru-pa irara? Osa raga ita ragai tapo uvuiapai ra oiso purara, Ragai-a iravu Hibru-pato. Ora apeisi-a? Jiu-a voea evoea? Iu ita, uva ragai tapo ita iravu Jiu-pato. Ora apeisi-a? Ebrahim aao iraraaro-a, osatoa tapo ita ragai, ragoa oisi toupaa. <sup>23</sup> ✧ Vosa oiso purapaave, “Igei-a Krai kovopa iraraaro.” Uva ita, ragai tapo vearovira Krai vo kovoaro goruvira rutu purapaaveira voea vo kovoroaro-ia putepaoro rutu. Uva ora ragai-ia taraiparai uvare oisi rutu eisi ora ragai raga ora vaisiara kae piepaavoi oiso rorovira rutu osa kokoropato. Oire uva va-a vo osa oisoa kasivarivira Krai-pa kovopaa, oa iava oisoa vo ovuutarovu-ia ragai tovopaive tuukepa kepa-ia. Ora rirovira rutu oisoa ragai ragipaive. Ora vo osa oisoa ovokirovu-ia ragaipa oisoa tutuu pie ragapape oiso ra kopiira. Oire uva oisi-a eisi osa oisoa piepaavora, ragai vo siitokaroaro voea vo siitokaroaro-ia pute iraoapaive rutu evoea aposel irara riro kuvu irara. <sup>24</sup> Oire vo vavae voki-ro-ia oara sovara-ia oisoa ragai ragipaive aue-ia kopirovu iro voea vo pitupituroaro sirova utupaoro Jiu. Osa oisoa piepaive oearovu oirara ragipaoro vo peva tau vo resura vatara vuutaro rutu-ia (39) ragipaoro. <sup>25</sup> ✧ Ora voea tapo Rom vata oea ita ragai ragaiva opevavu-ia ita voki. Uva ovokivu-ia ragai vurokoiva aue-ia aveke. Ora vo peva selpa uvuo peva oara ragaiva vuriepa vo peva vuuta rutu-ia vo rirova-ia purepava. Oa iava voa avakava igei oisoa vuri piepaave. Vo uva katai voki rutu-ia ravireopa voki gaegaerevira touava ora oavu-ia rupa voki voa raga avakava ivara-ia gaegaerepaoro. <sup>26</sup> Oire vo osa oisoa voraro rutu vokapaoro viripaa, uva vo tavakaro ragai iare oisoa karekepape oiso rutu osa varao pirutuara, ora voeao kavirupa irara. Ora vosa voeareo Jiu-pa irara ora voeao ratau tou irara oiso ruipa ragapaave ra ragai vuri pieive rutu. Ari ita, vosa reipa uruiro tapo-ia toupaooro oisoa vo tavakaro oupaa ora voraro tapo vegoaro. Ora voraro avakava selpa uvuoara-ia vokapaoro. Ora vao-ia tapo oisoa tavakara oupaa rara ragai keakeapaive oiso purapaoro, “Igei-a vii vate iraraaro.” Vo osa viapau. <sup>27</sup> ✧ Uva voa-a vo uva oisoa kasiraovira rutu kovopaa. Vao-ia osa riro ruparo rutu-ia viapau oisoa uusipara, ora viapau aiopaa, ora viapau ukaiopara. Ari ita, riro voki rutu-ia oisoa aio apotapara rutu, ora aue varo, ora aue kepa vaore uusipasa.

<sup>28</sup> Ora oiso osa oavu-a vao-ia, uvare vokiara rutu-ia oisoa riro vavata rutu siraoa oisoa kaepaa lotupa gururo ruture voeapa siraoapaoro rutu <sup>29</sup> oiso-ia, Vosa oearovu oisoa raveravepaave, vo oa iava oisoa ragai tapo ita oisi ora ragai-ia oraverave sovopaa. Ora vosa oearovu oirara oearovu vuri vovouro-ia kove piepaive, oire ragai tapo ita otavakarora evara vo siraoaro oisoa sovopaa vo ora ragai-ia oiso rutu osa eto kasi.

<sup>30</sup> ✧ Vosa ora egaepaoro vo reoro puraa ora ragai iava, oa iava uvuiapai ra varao raga iava visii tavitavipaa, oara iava ragaire oiso puratavere vai pasi, “Viapau oiso riro gorutoa vii Pol.” <sup>31</sup> Uva Pautoa raga Turaro Jisas reraaro Aite ira vo vaisiara kae piepaiveira rutu oirara, ira taraiparoveira vo osa ragai viapau oiso visii keakeapaa. <sup>32</sup> ✧ Ari ita, vo osa Damaskas urui-ia touava, ovusa ro Reito Aretas reraaro kovopato oisoa voa turaroparo, ira ora rera voearo uutupa irara arureva, oisore ra ragai ouive vo rei urui rataoaro riaaro-ia, oiso ra ragai tovoive tuukepa kepa-ia. <sup>33</sup> Ovusa voava voea asavira toriava, uvare oearovu ragai vara pieiva rirova-ia kuverava

✧ 11:22: Ap 6:1 ✧ 11:23: 2 Ko 6:5 ✧ 11:25: Ap 16:22, 14:19 ✧ 11:27: 1 Te 2:9 ✧ 11:30: 1 Ko 2:3 ✧ 11:32: Ap 9:24-25

kiuvupa ratao-ia ragai pute pieoro vo kasura iava. Oa iava viapau uvuiaepa oiso ra ragai ouive voea uutupa irara.

## 12

### *Urusiara-ia Riro Reoro Rutu Iava Pol Kareke Piepareva Pauto*

<sup>1</sup> Vo reo iava ragai oiso ragavira reoreoparai osa oearovu piepaiveira ora voea iava vaisiara oaive raga kae piepaoro. Ari eagara osa piepaa ita. Vo uvare ragai oiso ruipaparai ra visii tavia varao iava areo urusiro oara-ia vo reoro vatepareveira Pauto ragaipa ravotovira <sup>2</sup> ✧ oiso-ia, Ourusivu-a vao-ia oa puraavoiva, katai tau vo resura ivaro va isivaaro iava putevorao vo touoia oa-ia oiso toupavora, Ragai vao Kraiis reraaro. Va-a eva oa iavirava ragai kae piereva oiso ruture vuvuiua ivara-ia rutu. Ari ita, varauava touava vo urusi-ia eva. Uva viapau taraiparai rutu oiso, Apeisi ragavira-a oiso osa kaera viropa varaua rutuva, eke uraura vai raga. Uvare viapau taraiparai. Uva Pautoa raga ira taraiparoi.

<sup>3</sup> Oire vorerivira ita oiso puraparai, Taraiparai oiso osa oiraopavira rutu iparaepa vuvuiua iare. Uva viapau oiso aviaviparai rutu oiso osa ragavira avu iparaepa. Uva Pautoa raga ira taraiparoi. <sup>4</sup> Uvare rera raga-a ira ragai kae piereva vuvuiua iare, vo uva rera vo reoro riro gorua rutu uvuava. Uva ragai-a vao oiso puraparai, “Riro goru reo rutu-a oa iava viapau uvuipaai oirara ra va iava tavitavia.” <sup>5</sup> Uva roru iraopaavoiva vara-ia varao oara kekeava vo tou-ia eva. Oa iava visii tavitavipaavoiva vara iava. Oire uva viapau oiso ragai vo kovoaro iava vao veoro kovo visii tavitavipaavoiva. Viapau. Ari varao raga-a oara-ia uvuipatai ra taraita, Ragai-a Pol raverave vovouto.

<sup>6</sup> ✧ Vosa ragai raga ora vaisiara kae pie ruipapara, oa iava viapau kokoropavira reoreoparavere. Eake iava? Uvare oiraopa reo rutu-a vao-ia oa kosi pie iraopaavoiva ora ragai iava. Uva viapau ita oisi piepaa ora ragai iava vaisia ita kae piepaoro vaopa, teapi oearoi ragai vaisiara raga kae piepaoro vo reoro ragare ragai varaaro rugorugooapaave. Ari ita, uvuipatai ra ragai vo kovoaro kekepata ora ragai vo reoro uvupata. Ra va iava torevokovira rutu ragaire rugorugoopata ragai vaisiara oisi piepasa.

### *Pauto Oavu Upia Rerapa Pol Vateveva*

<sup>7</sup> Oiraopavira rutu oiso osa riroara rutu pisara veoropara kekeava, vo osa vuvuiua iare taveteava. Uva oisi vai iava pasi uvuiparai ra ragai vaisiara rei piea evara rutu iava tavitavipaoro. Vo osa viapau oisiei. Uvare Pauto ragaipa oavu upia vateveva vaopa, teapi ora ragai raga vaisiara kae piepaa vagupaoro, ra oisi va-ia vuria vai puraa. Vo upiao-ia oa oiso toupai, Seten-pa kovopato ro ira ragai iava varaua upia piepareveira vapa oiso, teapi oisi iava vagupara. <sup>8</sup> Uva vo peva rutu-ia aue vuuta variriparaepa Turaro akepaoro vare vao. Oiso puraraepa, “Turaro, vo upiao verari ragai iava.” <sup>9</sup> ✧ Oa iava ragai vo variriara pukoreva vao-ia oiso puraoro, “Viapau. Ari uvuipauei ra upiavira raga toupai, uvare virivarivira toupai ragai vavaeoro-ia. Ari ita, ragai vo goruaro kareke piepariveira rutu, uvare goruvira rutu kovopariveira raveravevira raga toupaooro.” Osa-a eisi osa ragai tavireva Turaro. Oa iavirava rorupaa tavitavipaoro ora ragai vo raveraveroro iava. Eake iava? Uvare vara-a evara ragai rugoo piepaiveira rutu. Ra vara iava Kraiis vo goruarore rugoopara ora ragaipa vaore, ra kasivarivira ragai tokipareve vereopa vovou purapaoro ragaipa. <sup>10</sup> ✧ Oire

✧ 12:2: Ro 16:7; Ef 4:10; 2 Ko 11:11 ✧ 12:6: 2 Ko 10:8, 11:16 ✧ 12:9: Fl 4:13; 2 Ko 11:30

✧ 12:10: Ro 5:3; 2 Ko 6:4

ra va iava kave vovouvira rutu toupaa. Eagara ita vosa riroara tavakaara iava vuriara ragai-ia karekepape oiso osa varao, vo osa ragai iava varaua raveravepape, ora vo osa ragai-ia takau vaisiro purapaive, ora vo osa apotapara, ora vo osa ragai uposa auepaave, ora vo osa orekerovu vuriara karekepe ragai-ia. Oara rutu iava uvuiparai ita ra rorua oupaa vara-ia, vo osa Krai-pa kovopaoro toupaa. Ororua vao vituaro oiso toupai, vo uvare raveravevira toupaooro vao-ia taraiparaveira Krai vo goruaro, uvare ragai goru piepaiveira rutu.

*Pol Oiso Ruipaparoepa Ra Korin-pa Irara Varaaro Oirao Pie Vovouro Goru Piereve Rutu*

<sup>11</sup> Oire uva oisi-a eisi osa purapaoro ragai oiso reoreoparai osa voeao oea ora voea iava vaisiara oaive kae piepaiveira. Uva viapau oisi eisi piepaavo ora ragai vo ruipapara raga sirova utupaoro. Ari visii raga-a visiigoa ragai oisi piepatavo, oa iava oiso eisi puraparai. Eake iava? Uvare visii raga ita visiigoapa torevokopai, Visiigoa uvuipatai ra ragai vaisiara kae piepata. Ari ita, akaipatoa raga-a ragai, ovusa ita oiso tupaoro oearovu vo kovoroaro viapau ragai vo kovoaro-ia putepaivoi, voeao oearoa vaisipataveira oiso, “Vearo irara rutu voeao aposel irara.” <sup>12</sup> ✧ Vo osa ragai visii tapo oisoa toupaa, uva oisoa ragai vo kovoaro kekepata, ovusa riro goruvira rutu kovopaa raverave asavira. Ora oaravu rutu ravoto kovoro purapaa visiipa, ora okovorovu pisa kovoro. Oara rutu iava taraia outava ragai iava oiso osa vao-ia oa iava oiso taraitaepa, O ari oiraopatoa rutu-a aposelto Pauto reraaro rutu. <sup>13</sup> Uva eakere ragaire oiso purapataveira, “Viapau oiso vearo vovou vai igei-ia purariva oiso osa vara purariva oloturovupa uvarovu?” Uva visii vo reoaro oiso vai toupavo vao iava, osa ragai viapau pasi visii ruvara-ia viapau oisoa moniara vai oupaa vaore orekerovu avu vai voripasa ora ragaipa, raa? Uva apeisi-a? Vuripai oisi eisi, raa?

<sup>14</sup> Oire uva vatatoparai oisore ra visii iare ita vorerivira uriora. Uvare oiso ruipaparai ra visii iare vo pevapa voka puraa ita visii kekesa. Uvare ragai vo vovouaro visii-ia toupaveira, oiso ra visii tapo tupaoro visii varaaro oirao pie vovouro goru piea. Viapau oiso visii ruvara-ia moni ousa-a ora ragaipa. Viapau eisi ragavira vovoupaoro oiso moni areparave visii ruvara-ia. Ari ita, aite irara moniara oaive orirupaiveira ovii irara oaive taupapasa. Vo ovusa ovii irara kakae vure viapau voea aite irara oaive taupapaive oara-ia moniara vai. <sup>15</sup> Uva oisi-a eisi osa iava uvuiparai ra visii taupaparo rorupaa rutu orekerovu rutu ragai varaaro ora sopau oaa rutu tapo visiipa vatapaoro. Vosa eisi piepaa, ra ragai vaoro-ia siraopa vovou oisi iava eisi taraipata rutu. Uva apeisi-a? Eakere ragaivipa tapo gare visivi raga siraopataveira, raa?

<sup>16</sup> Taraipatai vo osa viapau oiso ragai visii ruvara-ia moni ousa uriora. Ari oearovu raga visii iava eisi ragaire purapaaveira oiso, “Pol igei keakeapasa urioparoera, vo osa orekerovi vatauvira puraparevora.” <sup>17</sup> Oire uva apeisi-a? Ragai tavita! Aa vao-a oa puraavora, raa? E ragai iraiaro kovopatoa vai aruavora visii vuri piesa, oa iava eisi purapataveira ragaire, raa? <sup>18</sup> Uva goruvira rutu Taitas taviava voari tuariri. Oa iava rera sipoava visii iare. Ora iravu araokoto oavi tapo aruava rera taveosa. Oire uva apeisi-a? Ragai tavita! E Taitas vai visii keakeareva visii vuri pieoro, raa? E viapau vegei rutu ora Taitas katai vovou raga purapaoro visii-ia oisoa kovopave, ora vo pitupituo oa iavirava visii oisoa taupapave, raa?

<sup>19</sup> Vosa vo pasio viepatavo oi puraavo, ra viapau oiso vare vo rugoota oiso, Vo pasio rigatovevora oiso ra vearo rugoo rutu purape rerare. Ari vegei evo reo puravevoi Krai vo vovouaro raga sirova utuoro. Vate

✧ 12:12: Ro 15:18-19

irara oave, visii tauvapasa orekerovu rutu purapaveaira. Pauto ragai-ia taraiparoveira, ovusa oiraopa reoro rutu iava tavipara. <sup>20</sup> ✧ Visii tavipaavoivi vao iava uvare visiire rirovira rugorugoo iraparai oiso, Teapi visii iare urioraera, touvira rutu vuri vovouro purapata. Uvare pasi tou visivi vai ora visiire kaureopataveira, ora tapo ora visii kasipu vovouro rutu purapataveira, ora vara riirii vovou. Ora kuuvu reo raga purapata oearovivu iava. Ora oiso osa vai tapo tou visivi oearovivu takaupataveira. Ora vo osa orugoorovu raga vatepata lotupa irara roo piesa. Ora vo osa visii raga vo vovouaro iava vagupata, ora vo osa ora iiruko vovou purapataveira. Teapi vorerivira oisi raga ita eisi visii kekea. Oire ra va iava visiire ita kasipura vorerivira. Oapa reasipataveira ragaipa oiso, Teapi visiire vorerivira eisi piea. <sup>21</sup> ✧ Ora oiso tapo osa rugorugopara vaopa, Teapi vorerivira visii kekea vo osa touvira vuri pitupitu purapata, ra Pauto ragai arii piererve vao iava, uvare visii varaaro-a vuriara oavisii. Vosa oisi eisi piepata, ra uvui iraparai ra visiipa siraopaoro gaua. Uvare voeao oea tuariri rutu vuri vovouro puraiva, uva viapau oisoa vara iava ora voea iava vo vovouisiro oave porepaive vara veripaoro vara vuri pitupituro rutu otopa pitupituro.

## 13

### *Korin-pa Irara Uvuipaai Ra Vearovira Rutu Ora Voea Vo Oirao Pieroaro-ia Uutu Iraopaave*

<sup>1</sup> ✧ Ragai visii iare vo vokarei puraava. Uva vo vokarei isivaoro iava vo pevapa voka puraavere rara. Tugoropa Vuku-ia vo reo oiso purapai, <sup>2</sup> Vosa vaiterei eke vo peva oirara iravu kekeive ro ira vuria purareve, oa iava uvuipaai ra torevokovira rutu rera togapaive va-ia rera vaaro vuria viaevira rutu kareke piepaoro.<sup>7</sup>

<sup>2</sup> Oire uva oisi-a oiso osa vo reo purapaavoivi visiire visiigoa vuriara rutu oisoa purapata tuariri ora oearovu tapo. Uvare va-a vao osa visii tapo touava eraopa voka-ia, uva evoa oiso visii taviava oiso. Oire va vorerivira ita visii tavipaavoivi oiso visiipa tauavira rutu toupaooro, “Oiraopavira rutu vo vokari-ia utupa voka visii tapo toupaavere.” Uva voa-a evoa uva viapau oiso irai visii iava kavuavere, vo osa visii rutu torevokopaoro visiire kasipura, visii vao visiigoa touvira rutu vuri pitupituro pura irapataveira.

<sup>3</sup> Uva oiso purapataveira ragaire, “E Krai vo reo vatereva oa vatepareveira igeipa Pol? Eke ora rera vai raga vo rugooaro iava vo reo vai?” Oire vosa visii iare urioravere rara, uva uriri asavira rutu reoreoravere visiire. Ra va iava ragai-ia oisi taraita oiso-ia, Akoea, Krai vo reoar kosi piepato-a rera ro-ia. Aue iava uvare Krai visii iava sopaura-ia kovopareveira raverave asavira, vo osa rera vo goruaro kareke piepareveira eisi piepaoro.

<sup>4</sup> ✧ Oiraopavira rutu uvare oearovu Krai upoiva vo evao parikou-ia vo uva raverave ovoiroo kopii ovoiroepa. Uva varaua oaa raveravepapeira oiso osa Jisas varaaro piereva vo evao parikou-ia. Oa iava rera tapo ora tavosipaoro Pauto vo goruaro oupaaveira. Ari Pauto riroa rutu gorua kareke piereva. Oa iava va-ia Krai vorevira tore piereva kopiia iava. Oa-a vao oa iava oisi ragai Krai tapo ora tavosipaoro kave vovou rutu purapaaveira. Oisore ra vo osa visii iare urioveare rara visii torevokosa, uva rera tapo torepaoro Pauto vo goruaro kareke pieveare rutu visii-ia.

<sup>5</sup> ✧ Ora visii vo vovouaro rutu sisiro iraota vara rovirieipaoro, ra oiso ora akepata, “E torevoko vovouvira rutu toupai oirao piepa pitupitu sirova

rutu utupaoro? Eke viapau?" E viapau oiso taraipatai, Jisas Krai visii iava sopaura-ia toupaveira? Uva oisi-a eisi osa oiraopai. Ari vosa oearovu visii iava viapau Krai-va tavosivira toupave, ra opesi ovoiaive. <sup>6</sup> Ora vosa vegei iava sopauarei sisiro rovopata, ra va iava taraita oiso, Oiraopavira rutu Krai tapo tavosivira toupaveira Pol vaio. <sup>7</sup> Vegei variripaveiei Pauto arepaoro visii tauvapasa, ra viapau vuri vovouro vai purapata. Eake iava? E vao iava osa ora vegei raga ora vaisiaro kae piepave visiire? Viapau. Ari vaore vegei visiipa oiso ruipapaveiei, ra vao purapata oa oiso torevokopai. Vosa oearovu vegeire oiso rugoopaave, Vaiterei vo kovoaro vuria, oire uvuipai voeape. Uvare vegei visii ragare rugorugoo iraopaveira. <sup>8</sup> Vo uvare vegei viapau uvuipaveiei ra vao Oiraopa Reo tavariove. Viapau rutu. Ari vegei vo kovo purapaveira vao Oiraopa Reo vearovira rutu voa kareke piepasa. <sup>9</sup> Ari ita, uvuipaveiei ra rorupave vo osa viapau ora vegei vo kovoaro iava vao aposel kovo goruvira tavitavipave. Vorara visii-ia taraipave oiso, Goruvira rutu Jisas raga-ia oirao piepataveira. Osa iava eisi Pauto arepaveira visii varaaro oirao pie vovouro uvuivira rutu kareke piepasa, vo rara torevoko vovou raga purapata. <sup>10</sup> ✧ Vo osa tauai tupaoro visiipa vao rigatoavoi, oisore ra vosa aa vo reo avuo vao ragai vaoro sirova utupata ora visii raga ora torevokopaoro, oa iava viapau oiso uvuiparai ra uriora visii torevokosa Turaro vo goruaro iavirava. Uvare rera vo goruaro toupaveira oirara varaaro oirao pie vovouro goru piepasa. Viapau oisore ra oirara varaaro oirao pie vovouro vuri piesa.

### *Ovoioipa Reo Vatareva Pol*

<sup>11</sup> ✧ Araoko irara oaa, va vao-ia ovoioipa reo ragai vaoro. Vearovira rutu toupata. Ora visii rutu iava sopaura oavisii rutu tovopaoro torevoko pitupituro raga purapata ragai vo reoaro sirova. Opeita ora kaureopata ora upopasa. Ari uvuipatai ra kave vovou raga purapata oearovivu tapo ora visii iava voea. Uva uvuiparoi Pauto ra visii tapo toupave ro ira visii vatepareveira siraopa vovou rutu ora gavaure vovou.

<sup>12</sup> Ora visii iava vavaeara oavisii vatepata sekanpaoro araoko irara oavisii tapo voeao Krai voeaaro. <sup>13</sup> Voea rutu voeao Pauto voeaaro vo tupaoro oiso purapaai visiire, "Vearo voki rutu visii-ia."

<sup>14</sup> Oire uva ragai-a vao variriparai Turaro iare Jisas Krai, oisore ra visii tauvapave, vo osa Pauto visiipa siraopa vovou rutu tapo vatepareve. Ora vaore tapo ra taraipata oiso osa Tugoropato Uraurato toupaveira visii iava sopaura sovara-ia, vo osa katai vovou raga-ia toupata rera-ia tapo.

Eisivi raga osa vo pasio purapaavoi, ra opesipe.  
Ragai-a vao, Pol.

## GALESIA

### Irapa Reoro Vo Vukuo Iava

Pol vo pasio rigatoreva Antiok urui-ia toupaooro aue-ia 49 yia Jisas vaoro isivaoro iava kavaua. Vo pasio rigatoreva voeao iare Kristen irara vo Galesia Provsins-ia voea tavioro oiso, Viapau uvuipatai ra rugorugoo ragapata vao-ia Jiu vaoro Reo Taisi rakari verapasa. Uva oiso puraroepa eisi uvare oevu Jiu iava oea urioaepa Galesia-pa irara siposipopasa ora voea vaoro iava Reo Taisi. Ari goruvira voeao oirao pie vovou irara tavireva Pol, vaare Kraiss voea karureva Reo Taisi vo goruoro ariarava (Ga 2:15, 16, 21). Uva viapau uvuipaai oirara ra Reo Taisi raga sirova utupaoro torevoko vaisi ouive Pauto ruvara-ia.

1. Ora rera iava aviavi pie reoro Pol varaaro ora oreorovu vo pasio vituaro iava, 1:1-10.
2. Pol Pauto ruvara-ia gorua ou iraoreva aposel kovo purapasa, 1:11-2:21.
3. Vearo Siposipoaro-ia Pauto vereopa vovou toupai oirara rutu tauvapasa, vo osa viapau tauvaa vai oupaive Jiu vaoro Reo Taisi sirova utupaoro, 3:1-4:31.
4. Kristen irara airerei vovouvira toupaooro viapau uvuipaai ra ora voea raga vo ruipaaro sirova utupaave, 5:1-6:10.
5. Ovoioapa reoreoro-ia Pol reoroepa, 6:11-18.

1-2 ✧ Vo rigatoa vao-ia oa purapaavoi voeao rutupa riro oirao pie vovou irara lotuara rutu sovara-ia oea toupaveira Galesia taere sovara-ia. Uva ragai-a Pol ragoa vo rigato puraavoi voea tapo oea ragai tapo toupavoi oearovu oirao pie vovou irara. Ari ita, iravu ragai roporeva, oiso ra oiso toupaa, Ragai-a aposelto oirara siposipopato. Ari viapau vova vo rasio iava ira ragai roporeva. Ora aue tapo viapau Pauto irai oiratoa vai tavireva ragai roposa. Viapau. Ari rera raga-a Jisas Kraiss ora rera aitetoaoro Pauto, ro ira Jisas vorevira porete piereva kopii tapiva.

3 Oire uva oiso visiipa ruipaparai ra Pauto vigei rutu Aitearo ora Jisas Kraiss vigei reraaro Turaro, vaifereo aiterea visii tauvapasiveira gavaurea vatepaoro. 4 ✧ Ari ita, Jisas vigei reraaro Pauto Aite vo ruipaaro sirova utuoro ora rera iava vasereva ora rera-ia tauoro vuriara oavi-ia. Oa iava kopiioepa vuriara rutu vo goruoro-ia tasioro. Eisi osa pierivoiva, uvuipaviei vo raivao-ia oa purareva Jisas vuriara vatavatapape vo rasio-ia toupaooro. 5 Eva oa iava uvuipaviei ra Pautoa-ia vuurapa vaisi purapape vo vokio ora vo vokiara rutu-ia. Ovoiei.

#### *Kataia Raga Vearo Siposipo Toupai*

6 Visii tavitavipaavoi oiso, uvare rirovira rutu tavetave iraoapaavoi vao iava osa ikauvira Pauto kavupatavoi ro ira-ia vearovira rutu tarai rovopataveira. Ari ita, Kraiss visiipa siraoparoveira. Osiraaoa iavirava Pauto visii ourevora. Osa iava Tootoo Ovoi vaterava visiipa. Ari visii vo siposipo Vearo Siposipo kavupatavoi vo siposipo vao kuuvu siposipo oirao pieoro oiso keapaoro, Vearo Siposipo-a vao. 7 Oiraopavira rutu uvare katai siposipo raga vao oiraopa siposipo, osiposipo tavariopaoro oearovu raga visii keakea ragapaiveira visiipa tavaka vate ragapaoro. 8 ✧ Uva va vao-ia Vearo Siposipo voviri tuariri oa vate rovoavora visiipa eva oiraopa siposipo rutu. Oire vosa irouto vova vo rasio iava, ora vosa irai vova vuvuiua iava enseltoa vai, ora vosa ragai raga oisi va Vearo Siposipo tavarioreve

osiposipovu raga vateoro, uva eera-a ira vai-a tovoreverea Pauto vo vuri tapi uva opesi ovoiroverea. <sup>9</sup> ✧ Oisi raga ita oiso-ia osa vorerivira visii tavipaavoi oiso, Vosa oisi irouto va vao Vearo Siposipo tavariorëve vao oa-ia rovovira tarai rovota, ira-a eera irapa Pauto riroa tavaka vatepareverea oa viapau opesia vaiaro.

<sup>10</sup> ✧ Apeisi-a? Eakere oiso visiire puraparai? E visii vai agoagoto ragapaavoi visii roru pie ragapaoro? Viapau. Easi ragai vo reo oiso purapaavoi, auere ra Pauto ragai-ia rorupareve. Ari ita, vosa oirara raga roru piepasa vo rugorugoova toupaa, ra viapau oiso uvuiparai oiso toupasa, Ragai-a Kraisi-pa kovopato.

### *Pol Iava Vo Siposipo Ro Ira Vavaearo Oiso Karekeroepa, Pautoa-pa Kovopato*

<sup>11</sup> ✧ Araoko irara oaa, oiso visii tavipaavoi, Viapau rutu oiso oirara iava vo siposipo oiraopa oa vate rovoavora visiipa. <sup>12</sup> Oiraopavira rutu. Viapau oiso irai oiratoa vai ragaipa oiso vo tavitavio purarevora ragai siposipooro. Viapau. Ari rera raga ro-ia Jisas Kraisi ira ragaipa oiraopa siposipo rutu karekereva poeravira rutu.

<sup>13</sup> ✧ Ari ita, ragai-ia oisoo taraiata vo osa Jiu-pa irara vo pitupituroaro sirova oisoo utu rovopara voviri tuariri. Ovuuta-ia eva voraro rutu oisoo voearore taraapaa lotupa irara Pauto voeaaro, oiso ra voeapa vuri vovou vatepaa. Oa iava oisoo akeakepaa vo lotupa kovo opesi piesa. Uva taraiatai oiso, Viapau Vearo Siposipo ouava voeao ruvara-ia oea uposa oisoo rugorugoo ragapara. <sup>14</sup> Aue iava uvare oisoo kasivarivira rutu Reo Taisi sirova utupara, vao oa oisoo Jiu-pa irara vo pitupituroaro sovara-ia toupave. Oiraopavira rutu oiso osa oearovu rutu-ia puteava aue-ia ragai vo vovouaro, voeao oea karekeapea vo vuutao-ia oa-ia ragai karekeraepa.

<sup>15</sup> ✧ Ari Pauto vo rera vaaro-ia vereopa vovou ragaire keeroepa ragai tauvaoro, oiso ra rerapa kovopaa. Vao vituaro iava osa ragai reesireva ora rerapa vo osa tovira aako raga kovuaro-ia toupava. <sup>16</sup> ✧ Uva Pauto ora rera vo ruiparo sirova utuoro Oviito oaro kareke piereva ragaire, oisore ra va iava avara visiipa ratau tou irara siposiposa rera iava Jisas. Uva vo vuuta-a eva oa-ia viapau oiso oearoi ruvara-ia vo taraiou oavora vo oearoi tapo ora reoreopaoro. <sup>17</sup> Viapau oiso Jerusalem iare ava rovoraepa aposel irara ruvara-ia orugorugooi ou rovosa voeao oea reesi rovoreva Pauto. Viapau. Ari raaka tapia-ia vo uvare ava rovoraepa Arebia. Evoava uvava karera viropa vorerivira taru riro urui iare vao vo Damaskas.

<sup>18</sup> Oire uva utupavira rutu vo peva ivaro isivaaro iava Jerusalem iare Pita kekesa avaraepa. Uva katai tau vo vavae (15) vokiro-ia voa touava rera ruvara-ia oaravu tarai reoro oupaoro. <sup>19</sup> Uva vo vuuta-a eva oa-ia viapau oiso irai aposelto kekeava. Ari ro raga-ia Jems vigei Turarotoaoro araokotoaoro. <sup>20</sup> Uva vo rigato-a vao-ia oa purapaavoi oiraopa vovou rutuva vo Pauto osireiario-ia. Viapau oiso kuvvu reo-a vao-ia.

<sup>21</sup> Oire uva Jerusalem iava Siria taere iare avaraepa ora vo tapo Silisia-ia. <sup>22</sup> Uva vo vuuta-a eva oa-ia ragai kekeivori, voeao lotupa irara oea evoa toupaveira Judia-ia. <sup>23</sup> Ari reoara raga iava oisoo ragai-ia taraiapaave varao oara iava oisoo oearovu voea tavitavipaive oiso, "Easi eera igeiva ora keriparoera voviri tuariri. Uva vo vokio-ia igeipa siposipoparevoi, oiso ra Kraisi oirao piepaio. Ro Pol ira tuariri oisoo Kraisi vo siposiporoaro

✧ **1:9:** Ro 1:15-17; 1 Ko 16:22 ✧ **1:10:** 1 Te 2:4-6 ✧ **1:11:** 2 Ti 3:16-17 ✧ **1:13:** Mt 16:17-19  
✧ **1:15:** Ais 49:1-6; Jer 1:4-6 ✧ **1:16:** 1 Ti 1:12-16



tekipareve rutu.” <sup>24</sup> ✧ Oa iava ragai vaaro airepa vovou kekepaoro vuurapa vaisi purapaivora Pautoa-ia.

## 2

### *Pol Jerusalem Urui Iare Avaroepa Aposel Irara Kekesa*

<sup>1</sup> ✧ Oire uva va vao osa katai tau vo resura (14) ivaro putevoiva, vara isivaaro iava avaraepa Banabas tapo. Oire Taitas ou pieava oiso ra vegei tapo avaro Jerusalem iare. <sup>2</sup> Evoa uvare avaraepa, Pauto ragai tavirevoiva voare. Oire uva va vao osa lotuapa irapa irara tapo ora reoreo rovoraepa voa vo igei raga. Uva evoea isivaaro iava oearovu tapo aia oirao pie vovou irara touava voea tapo ora reopaoro. Uva irapa irara tavitaviava vao iava Vearo Sipsisipo osiposipoa puraava voeapa ratau tou irara. Auepa teapi oiso keapaave irapa irara, Osiposipovu raga iava voeapa siposipoparevo Pol voeaopa ratau tou irara. Ra va iava viapau oiso ragai tapo katai vovou purapaive voeao irapa irara. Ora teapi vo kovo okovoa purapaa vo vuutao-ia ora vo kovo oa pura rovoavora irapavira akukuvira rutu ava ragape. <sup>3</sup> ✧ Oire uva va vao osa vo tavitavi vao ragai vaaro uvuoro oiso puraatera, “O ita, osa vearopai eisi.” Uva oisi-a eisi osa purapaoro viapau oiso goruvira ragai tavipaivora, oiso ra ragai vatetoaaro iava Taitas rakari verara, voeao iava ratau tou irara rera, ra oisi rera pieoro rera reesia. <sup>4</sup> Oiraopavira eisi vo osa oearovu riro kuuvu irara vo vuuta-ia eva oearovu urioaepa igei sovara-ia pausa, oiso ra igei vo pitupituroaro-ia taraiave vara rovirieipaoro. Uvare Krai Jisas vo siposipoaro iavirava viaevira rutu toupau vaopa Reo Taisi. Oire uva oiso purapaepa, “Oiraopavira, igei tapo ita vao-ia riro oirao pie vovou irara.” Uva voea raga vo ruipaaro-a, oa-ia oiso vovoupaepa ra vigei-ia voea vaaro riro vavata reo goru tovo ragapaive vao Jiu vaaro iava Reo Taisi. <sup>5</sup> Ari viapau voea vo ruipaaro sirova uturaepa oisi Taitas pieoro oiso-ia. Vosa oisi va puraavori, ra kerukavira poupa piro visii-ia vo siposipo vao Vearo Sipsisipo oa uvutavora ragai ruvara-ia.

<sup>6</sup> Ari ita, evoea reipa irara oea viapau oiso ragaipa orugorugooi airepa vai vateivora. Iu, oearovu evoea vaisipaiveira oiso, Reipa irara, vo osa vigei rutu areivira rutu toupapeira vo Pauto osireiario-ia. <sup>7</sup> Uva viapau oiso orugorugooroi rutu vateiva ragaipa, uvare taraiapa rutu ragai-ia vo osa Pauto ragaipa vo kovo vatereva, oiso ra oirara rutupa voeao ratau tou irara vai iava Vearo Sipsisipo siposipoa. Oiso rutu osa aue ita Pita irapa Pauto oisi vo kovo ita vatereva, oiso ra voeapa voeao Jiu-pa irara siposipopareve va iava vao Vearo Sipsisipo. <sup>8</sup> Aue vituaro iava uvare Pita roporevoiva Pauto, ora rera vo goruaro karoporeva rerapa, oiso ra va iava vearo kovo rutu purareve voeapa Jiu-pa irara. Ari ita, uva oisi-a oiso-ia osa ragai tapo ita roporeva. Oa iava oisi raga ita ragaipa ora rera vo goruaro karoporeva, oiso ra vo goru iava riro goru kovo rutu puraa voea-ia ratau tou irara. <sup>9</sup> ✧ Oire uva va vao osa Pauto vo goruaro eveipaoro ragai-ia oiso purapaepa “O vearopai ita.” Oa iava vegeiva ora Banabas sekanaepa irapa irara Jems vase ora Pita ora Jon. Uva katai rugoo rutu sirova utuiepa igei rutu oiso ora reoro, Jems peva Jiu-pa irarapa Jisas vo reoro iava siposipoivere, vo osa vegei voeapa ratau tou irara siposipove. <sup>10</sup> ✧ Ora vao tapore oiso ra moniara vai oupaave vatevateara vai voeao tauvapasa oarai-ia apota irara. Oa iava voea taviavora oiso, Kasivirivira rutu oa purapaaveira vao oiso.

### *Pol Ira Pita Torevokoreva Vo Antiok-ia*

11 ✨ Oire vo osa Pita Antiok urui iare urioroepa vo uva toupavora. Oa iava rera taviavora oiso, Vuria purarivoi. 12 Ovuria-a vao oa oiso ragavira toupavoi, Vo osa voari rovovira rutu oisoa Pita koataparvo voea tapo ratau tou irara aiopasa. Oa iava Jems oeavu oirao pie vovou irara arureva voare vo-ia Antiok-ia. Uva voea evoea kekerevoiva Pita, viapau oiso vorerivira ita ratau tou irara tapo aioreva. Auepa uvare oiso ragavira uririparoepa, Teapi rerare oiso puraave, “Jiu vaaro Reo Taisi gasipareveira Pita oiso piepaoro.” 13 Eisi ita osa oeavu tapo Jiu-pa irara oisoa piepaive, voeao oea oisoa Jisas oirao piepaive rutu vo rera raga Pita vo vovouaro sirova utupaoro vo vovourei rutu vatakoiva. Uva va vao osa piepaoro Banabas tapo ora piro pieroepa. 14 Opitupitua-a eva oa kekeavorao. Oa iava oiso rugoorerao, Viapau oiso katai vovou vai puravoi Vearo Siposipo sirova utusa. Oire uva va-a vao oa vituaro iava Pita taviavora voea vuutaro-ia oiso, Pita vii-a Jiu-pato. Viigoa Jiu vaaro Reo Taisire ovauuepa tuariri rutu. Oire uva apeisi-a? Uvare vo vuutao-ia voea ratau tou irara taviparivoi, oiso ra eva Jiu vo pitupituroaro sirova utupaoro oisi piepaive.

### *Ro Ira Jisas Oirao Piepareve Ira Uvuipa Ra Torevokovira Karekero*

15 Ari ita, vegei-a vao vegoa voa kavauveiepa vegei Jiu-patoarei. Viapau oiso vegei-a voeao iava ratau tou irara oea vuri pitupituro sirova utupaaveira vuriara purapaoro. 16 ✨ Vearovira rutu oiso taraipaveiei, Vosa Jiu raga vaaro Reo Taisi sirova utupave, ra viapau oiso va iava vegei vaisireve Pauto oiso, “Torevoko vovoutoarei-a vei.” Viapau. Ari vao raga iava vo osa Jisas Kraisi-ia rari iraoape. Eva-a oa iava uvuiparoi ra vegei vaisireve oisi eisi. Ari ita, vegei-a ita vao-ia vegoa eisi piepaveira vo Kraisi Jisas-ia raripaoro, oisore ra vegei-ia va kekepaoro oirao pie vovou Pauto vegei vaisireve, “Torevokotoarei.” Viapau oiso Reo Taisi oirao piepaveira rutu. Eake iava? Uvare oiso ragavira taraipaveira, Viapau oiso irai vaisirevera Pauto oiso, “Torevokoto-a vii,” vo osa evo taisi raga vo rearo sirova utuparo. 17 ✨ Oire uva apeisi-a? Vosa vegei ora vii Kraisi oirao piepaoro oiso rugoopave Pauto vegei vaisirevere oiso, “Torevokotoarei-a vei.” Osa iava utupavira rara oisi ora eveiveare oiso, Akoea, ratau tautoarei-a vegei vuriatoarei. Oire uva apeisi-a? E ora vegei iava oiso tavipaveiei, Kraisi oirao piepaoro ora piro pieveira? Asi viapau rutu. Siraovira rutu vosa irai oisi oiso-ia puraro rera iavirava ro-ia Kraisi. 18 Ari ita, uvare oiso toupavoi, Vosa irai eru kepa vai rigareve, ra vo kepa iava tuutara-ia airepa kepa paureve. Oire ra viapau oiso oisi veoropape. Ari ita, uva oiso ragavira-a, vosa rovovira rutu Jiu-pa irara vaarore Reo Taisi ovau rovora, oire ra vorevira ita va sirova utupaoro oiso purapara ragai raga ora keakeapaoro, Pauto ragai ourevera ora rera iare. Osa viapau rutu. 19 Vosa eva Reo Taisi kavu ovoiva vare ovauoro vao oa viapau uvuipape ragaipa tootoo vatepasa. Oire uva oisi-a eisi osa ragavira iava kopiiraepa Reo Taisi arava. Oa vituaro iava uvuiparai ra vorevira tootoovira tupaoro Pautoa ragare rugorugooapaoro toupaa. 20 Iu. Eake iava? Uvare Kraisi evao parikou-ia kotooro viropa. Uva rera tapo kopiiraepa. Oire uva vao-a evoa vo rugorugoooro rutu kopiiepa oara iava oisoa ora ragai ragare rugorugooapa. Uva vo voko Kraisi vo rugorugoooro tupaiveira ragai-ia. Oa ragai tootoo piepai ragaipa vearopa rugorugoooro vatepaoro. Osa iava tootoo iraoaparaveira rutu. Evo tootoo oa vituaro oiso toupai, Pauto Oviitoaaro rutu-ia rari iraoaparaveira. Ro ira iava vasereva ragaipa ragai kavikooro, oiso ra rera kopii pieve. Eva-a oa iava Oiraopa Tootoo oupaaveira rutu. 21 ✨ Viapau oiso Pauto vaaro veripaaveira

vatevatea vovou Reo Taisi raga-ia raripaoro, oiso ra Tootoo Ovoi oua vo va-ia. Viapau. Eake iava? Vosa irai Reo Taisi raga vo reoaro sirova utuparo, ra va iava Pauto rerare oiso puraro, “Torevokoto-a vii.” Vosa oisi oiraopape vo reo eva, oire ra oiso taraipavio, O ari akukuvira rutu kopii ragaroeпа Kraiѕ. Ari ita, oѕa viapau rutu oiso eisi torevokopapeira.

### 3

#### *Reo Taisi Vo Pitupituario Sirova Utupa Vovou Ora Oirao Piea Sirova Utupa Vovou*

<sup>1</sup> Visii vao-ia vaaruu vovou irara vova Galesia! E viapau ora eveipataveira, uvare visii piro pierevorao iravu? Visii roroio pievira taviava ro iava Jisas Kraiѕ ira evao parikou-ia kopiiroepa. Uva vo vokio-ia oearovu raga vo reoaro sirova utu ragapataveira oiraopa reo rutu kavupaoro. Irouto-a ro ira oisi eisi visii pierevorao? <sup>2</sup> Oire uva katai ake raga vao-ia oa-ia oiso visii akepaavoi. E Pauto visii vaterevora Tugoropato Uraurato vo oѕa Reo Taisi sirova vao Jiu vaaro utupataera? Asi viapau rutu. Oire ra oiso ragavira ita visii akea. E Pauto visii vaterevora Tugoropato Uraurato vo oѕa Jisas Kraiѕ oirao piepatavora vo rera raga-ia raripaoro? Iu, eisi. <sup>3</sup> \* Oire uva eake-a vao oare visii vao-ia eisi rutu piepataveira oiso oѕa voeao kokoropa irara? Ari ita, rovovira rutu voari Pauto reraaro Tugoropato Uraurato sirova utu rovotaepa. Oa iava rera ita kavutavora ora visii raga vo goruaro-ia raripaoro. Oire uva apeisi-a? Eisi vai piepaoro ora keakea ragapataveira oiso rugooapaoro, Uvuipatai vai pasi ra torevokovira kareketa oisi iava eisi? <sup>4</sup> E vara ruture varao ovautaera oara rutu visiipa vatepareva Tugoropato Uraurato vo oѕa oisoa Pautoa-pa kovopata? Uva apeisi-a? Oiraopavira rutu-a oisi eisi pasi? <sup>5</sup> Uva oiso visii akepaavoi, E apeisi-a Pauto visiipa Tugoropato Uraurato vatepareveira, ora varao tapo oira porete piepa goruro, ora varao tapo ravoto pitupituro purapa goruro, vo rara Reo Taisi raga vo vovouaro sirova utupata? Easi viapau rutu! Teapi ora piro piepata Reo Taisi raga-ia rugooapaoro. Eake iava? Uvare evara vituaro oiso foupai, Vo oѕa Jisas Kraiѕ oirao piepata rutu rera vo siposipoaro sirova utupaoro vao oa iava uvutavora.

<sup>6</sup> \* Ari ita, oiso purapapeira ro iava Ebrahim vao-ia Tugoropa Vuku, ‘Pauto vaaro Reo Ovoi oirao piereve rutu. Eva oa iava oiso Ebrahim vaisireva Pauto, Torevoko vovoutoa rutu.’ <sup>7</sup> Oire uva oiso ragavira va-ia tarai iraopata, Vosa irouto ro ira Pauto oirao pie iraopareve vo ora rera vaaro-ia raria, ira-a eera Ebrahim saratoaaro. <sup>8</sup> Oire vo tuariri rutu rovoa-ia Pauto voeao-ia ratau tou irara tarairoepa oiso, Akoea, voeao Vearo Siposipo oirao piepaiverea, ra va iava ora ragaipa voea oua vorevira. Uva oisi-a eisi oѕa tarairoiva, Ebrahim tavireva Pauto aue iava Tugoropa Reo oiso puraoro, ‘Vii-a vao rutu vituaro, oa iava oirara rutu taru viraaokaverea.’ <sup>9</sup> \* Uva Ebrahim vo reo eva Reo Ovoi oirao piereva rutu. Oa iava Pauto oiso rera vaisireva Ebrahim, Torevokotoa rutu. Oire vosa eisi oearoi tapo rera Pauto vaaro Reo Ovoi oirao piepaive, ra va iava voea ita oisi vaisireve oiso, Torevoko vovou irara rutu.

<sup>10</sup> \* Ari oearovu Reo Taisi raga oirao piepaiveira oiso purapaoro, ‘Vao raga uvuipai ra vigeipa vearoara karekeve.’ Uva voea-a evoea oea vuria vo voriaro rutu ouive vo Pauto ruvara-ia, uvare Tugoropa Vuku-ia oiso purapapeira,

‘Vosa irouto ro ira Reo Taisi-ia taraiparo, oire ra va-ia

taraipaoro viapau oreorovu rutu sirova utuparo varao oara va sovara-ia toupaveira, ira-a eera taru vuria vo voriaro rutu oureve Pauto ruvara-ia.’

11 Oiraopavira rutu, oiso osa viapau oiso iraei ro ira uvuiparoi ra Reo Taisi sirova utupaoro torevokovira rutu karekeroverea vo Pauto osireiaro-ia. Viapau rutu. Eva oa iava oiso purapapeira vo Tugoropa Vuku-ia, ‘Ro ira Pauto oirao piepareve rutu oire ra va iava Pauto rera vaisireve oiso, Vii-a torevokoto, ira-a eera irapa taru Tootoo Ovoi vatepareverea Pauto.’

12 Eake iava? Uvare Reo Taisi-a oavu raga rutu pisa. Uvare oirao pie asavira rutu orekerovu rutu purapaveira oearovu oirara vo Reo Taisi sirova utu ragapaoro. Uva Tugoropa Vuku-ia oiso purapapeira, ‘Vosa irouto Reo Taisi rutu sirova utupaoro varao purapareve oara Reo Taisi sovara-ia toupaveira, eera-a ira uvuiparoi ra Tootoo Ovoi rutu oureve.’

13 ✧ Ari vigei rutu-a vao-ia vigoa oisoa potepape rutu vo Reo Taisi sirova utupaoro. Eva-a oa vituaro iava vigeipa vuria vo voriaro rutu vatevori Pauto. Oire uva eakere? Uvare Krai urioroepa vigei varaaro rutu ouoro vuriara. Uva varava koto ruviro evao parikou-ia, uvare vo Tugoropa Vuku-ia oiraopavira oiso purapapeira, ‘Ro oirato ira kotoive evaova-ia, oiso ra vao rera vo voriaro vuri vori oureve vo Pauto ruvara-ia, vo osa Pauto rera vaisireve oiso, Vurito-a vii.’

14 Oire vo Pauto Ebrahim-pa Reo Ovoi purareva vao oa-ia rerare oiso puraroepa, “Ragai veoropara vateaverea rara voeao rutupa ratau tou irara.” Uva vigei vaaro vuri vori ou ovoioro Krai Jis va eva Reo Ovoi oirao piereva vigeipa. Eva-a oa vituaro iava uvuipavie ra oisi iava ratau tou irara tapo vigei rutu Tugoropato Uraurato oupape, vo rara goruvira rutu oirao pie rovopape rutu vo Pautoa-ia raripaoro.

### *Vo Toupai Reo Taisi Iava Ora Reo Ovoi*

15 Araoko irara oaa, visiipa ovoovo reo vatepaavoi. Vosa aiterei reo ovoi vai purasi vo reoara vai rutu opesi pieoro, ra viapau oiso iravu uvuiro aue aveke tauvu verasa vao oa-ia oisoa ovoiei vaisi purapasi. Oiso tapo osa viapau irai uvuparoi ra airepa reo vai takuvuoro tuariripa reo vai verareve vao iava reo ovoi. 16 ✧ Oire Pauto Ebrahim vaiopa ora rera aaotoaaro Reo Ovoi vaterava vo reo-ia oa viapau oiso vaterava oiso puraoro, “Vo reo vatepaavoi visii aao rutupa,” Viapau. Ari ro ragare Krai oiso puraroepa, “Vao oa purapaavoi vei aoparei ragapa.” 17 ✧ Uva oiso puraparai, Viapau oiso oai ei oai uvuipai ra vo reo tavariove oa purareva Pauto ovoievira. Oire uva va-a vao Reo Ovoi isivaaro iava varao vo resura novoto vo peva tau (430) ivaro puteva. Oa iava Reo Taisi vaterava Pauto. Uva viapau oiso vao-ia Reo Ovoi putepaveira Reo Taisi. Viapau. Ari tovira rutu Reo Ovoi toupaveira vao Pauto vaoro. 18 Ari ita, vosa irai eisi Reo Taisi sirova utuparo, ra va iava vearoa oureve, oire uva va-a eva oa iava Reo Ovoi akukuvira rutu tou ragapaveira. Ro-ia Ebrahim ira Reo Ovoi oirao piereva rutu. Oa vituaro iava Pauto rerare oiso puraroepa, “Ebrahim-a torevoko vovoutoa rutu.” Oa iava vearovira rutu oiso taraipavio, Viapau oiso Pauto vaoro-ia Reo Ovoi putepaveira rutu eva Reo Taisi.

19 ✧ Oire uva aa vao rutu-a va vao Reo Taisi vo kovoaro? Vao-ia oa vo kovoaro vao Reo Taisi oiso toupaveira. Uvare voeao tuariripa irara viapau oiso ora voea-ia va eveiva oiso puraoro, “Akoea, vuri pitupituro rutu-a varao oara purapapeira.” Ari vo osa va-ia Reo Taisi taraiava, oiso

✧ 3:13: Diu 21:23 ✧ 3:16: Jen 13:14-18 ✧ 3:17: Eks 12:40; Ro 4:13-14 ✧ 3:19: Diu 5:5; Ro 4:13-15

puraaepa, “O, ari vuriara rutu-a varao oara purapapeira Pauto osireiario-ia.” Uva oisi raga-a eisi osa oisoa toupave Reo Taisi vore tuepaoro uva Pauto Oviitoaaro pouro virovere rera raga ita Ebrahim aaotoaaro. Oire uva vo vuuta-a eva oa-ia opesi ovoiepa Reo Taisi. Uva va-a vao Reo Taisi oa iava Pauto enselpa irara tavireva. Oa iava evoea ita topa pievira aue Moses taviiva ita. Uva eera ita topa pievira oirara ita tavitavireva. <sup>20</sup> Ari torevokovira rutu Pauto Reo Ovoi vatereva. Eva-a oa vituaro iava vao-ia Reo Taisi putepaveira rutu, uvare Reo Taisi riroara rutu iava pura piropa gisipoara.

### *Reo Taisi Vo Kovoaro Iava*

<sup>21</sup> Oire uva apeisi-a? Ora upopapeira varei vareo Reo Taisi ora Reo Ovoi? Asi viapau rutu. Ari ita, vosa irai va sirova Reo Taisi utupaoro va iava tootooa oupareve, uva va-a eva oa iava uvuiparoi vai ra torevoko vaisi oupareve vo Pauto ruvara-ia. Asi viapau oiso uvuipai ra torevoko vaisi vai oureve Reo Taisi iavirava, <sup>22</sup> \* uvare Tugoropa Vuku oiso purapapeira, ‘Oirara rutu vuri rugorugooro oaive sirova utupaaveira. Osa iava vuria oirara rutu tuukepaveira vo rasio-ia.’ Oa-a eva oa iava oirara rutu uvuipai ra oiso taraipaave, Voeao oea Jisas Kraiis oirao piepave ora voeao vo vovouroaro iava oirao pie vovouro raga, oeapa Oiraopa Tootoo rutu vaterevera Pauto vo Reo Ovoiara sirova utuoro vao oa vatereva Ebrahim-pa.

<sup>23</sup> Voari tuariri rutu vo osa Kraiis-ia oirao pie vovou vo pitupituaro pou viro asavira oisoa toupave, ovuuta-a eva oa-ia Reo Taisi oisoa vigeire riro vavata iraoape. Uva oisoa vigei tuukepave rutu. Oa iava oirao pie vovou vo pitupituaro karekeera. Uva va-a eva vituaro iava Jisas ora karekeroera vo rasio iare. <sup>24</sup> \* Oire uva Reo Taisi vo kovoaro-a vao, oirara tokipasa voea torevokopaoro. Oa iava vo rekasiera vo vuutao-ia oa-ia Kraiis pouro virora. Uva vo vuutao-ia Kraiis vigeipa tasi puraparevoivi vitupaoro. Oa iava uvuipaviei ra oirao pie vovou rutu purapape torevokovira rutu toupaooro vo Pauto osireiario-ia. <sup>25</sup> Ari ita, ovuuta-a eva oa vo vokio-ia toupavoi eva oa-ia Kraiis-ia raripaviei. Uva va-a eva vituaro iava viapau oiso Reo Taisi vigeipa reipapeira.

<sup>26</sup> Oire uva vo vokio-ia visii varaaro oirao pie vovouro visii oiso rutu piepavoi, Visii-a Pauto ovii iraraaro vo rara Kraiis Jisas-ia raripata rutu. <sup>27</sup> \* Uvare baptais outavora, oiso ra kataivira rutu toupata Kraiis tapo oiso, Visii-a Pauto ovii iraraaro rutu oiso rutu osa ro-ia Kraiis eera Pauto Oviitoaaro. <sup>28</sup> Ari ita, oiraopavira uvare visii rutu areiivira rutu toupataveira. Viapau oiso roopavira toupata oiso, Jiu-pato-a vii, ari ratau tou irara iava vii, ari kovopato-a vii moni oupato, ari vii-a akuku kovotoa raga. Ora oiso riakova viapau oiso oiratoa-ia putepaveoi, ora viapau oirato riakova-ia putepaveoi. Viapau rutu. Ari kataivira rutu toupataveira vo Kraiis Jisas-ia. <sup>29</sup> \* Iu, vo osa visiipe rutu Kraiis voeaaoro, ra oiso rutu touta, Visii-a Ebrahim aao iraraaro visiigoa rera sirova utupataveira. Ra va iava vao outa veaoro Pauto ruvara-ia oa iava voari tuariri Reo Ovoi purareva Ebrahim tavioro.

## 4

<sup>1</sup> Oire uva topa pievira vo reo vatepaavoi ita oiso-ia, vosa iravu oirato kopiuro auero rutu arova varao rera varaaro, ra oviito vara-ia ita pitureve vo rara riroparo. Oire ra viapau oiso ikauvira vara oisoa oupareve vo rara kakaevira toupaveve. Viapau. Ari oisoa kovopavira tou rovopaveve oiso osa kovopato vo vuutaore tuepaoro oa-ia oisoa vara rutu oupareve varao

aiteto varaaro. <sup>2</sup> Oire vo osa kakaevira toupaveve, uva oisoa oearovu sirova utuparo voeao oearoa oisoa rera tokipaive ora rera varaaro vo vuutaore tuepaoro oa reesireva aiteto. <sup>3</sup> Oire uva vigei ita oisoa toupape oiso osa evoea kakae vure, uvare tuariripa pitupituro oisoa vigeire reipape rutu varao oara-ia oisoa avatapa irara toupave uraura irara. <sup>4</sup> ✧ Uva va-a eva isivaaro iava vo vokiõ pou pirorao vigeipa ovokia reesireva Pauto, oiso ra vo vokia rera Oviitoaaro kataitoa rutu siporeve. Oa iava vo vokia rera siporevora. Uva tavauruva rera kavavevora. Oa iava riropaoro toupavevora Jiu vaaro Reo Taisi sirova utupaoro. <sup>5</sup> ✧ Ari ita, oirara oisoa Reo Taisi reroarovi tou rovopaive. Oa iava Jisas urioroera vo taisi vavataaro verasa vuri voriro oavi opesi pieoro, oisore ra vigei rutu oiso toupape, Pauto ovii iraraoro rutu.

<sup>6</sup> ✧ Oiraopavira rutu uvare visii rutu-a Pauto ovii iraraoro. Eake iava? Uvare eva oirao piesa Pauto rera Oviitoaaro Urauraoro siporevora vigei sopaoro iare, oisore ra voa tupaoro oiso puraparo vigei iavirava, “Aite. Igei rutu Aitearo.” <sup>7</sup> Oire uva va-a eva oa vituaro iava viapau oiso akukuvira kovo ragapaoro toupavevira oiso osa voeao oea akukuvira raga kovopaiveira aite irara varaore tuepaoro. Viapau. Ari visii-a Pautoa rutu ovii iraraoro. Eva-a oa iava varao rutu vateparevere visiipa oara tuevira toupavevira visii rutupa vao-ia ovii irara.

### *Pol Rirovira Rutu Galesia Vatare Rugorugoopepa*

<sup>8</sup> Voari rovovira rutu uva Pautoa-ia tarai asavira rutu oisoa tou rovopata. Evo vuuta-ia oiso rutu toupata, Kovopa irara voeaoa vuri tugararu oea visii oisoa tuukepaive, voeao oea viapau oiso oiraopavira rutu toupavevira oiso osa Pauto. <sup>9</sup> Oire ra vo vokiõ-ia Pautoa-ia taraipata, vo rara rera-ia oirao pie vovou purapata. Ari ita, oiraopavira uvare Pautoa ita visii-ia tarai iraparo rovopavira. Oire uva apeisi-a? Rerare ovaupaoro vorepatai varao iare tuariripa pitupituro varao oara viapau uvuipai oirara tauvapa, eke? E ruipapatai ita ra tuariripa pitupituro kovo ragapata ita vori ou asavira, raa? <sup>10</sup> ✧ Uva vo pitupituro purapaoro ovokirovu oovapa vokiro reesipavevira ora visiipa, ora oaravu kekiraara, ora oivarovu tapo, oisore ra vo vuutaro-ia aioara vureiara purapata. Oire ra voa vara-ia variripata oiso keapaoro, Oara-ia Pauto roru piepaiveira. <sup>11</sup> Ari ita, visiire rugorugoo irapavevira, uvare riro kovo rutu puraava visii siposipopaoro. Uva apeisi-a? Akuku kovo raga-a oa puraava visii-ia, eke?

<sup>12</sup> Araoko irara oaa, goruvira rutu visiire oiso purapara, Ragai tapo katai vovou rutu purapata vao iavirava Reo Taisi vare rugorugooapaoro, uvare ragai tapo va kavuava, ra visii tapo va kavu irapata. Ari ita, viapau oai vuria vai puratavora ragai-ia. <sup>13</sup> ✧ Ari tuariri oisoa ragai tauvapata vo osa upiapaera. Oupia-a eva oa-ia tupaoro riro kaekavira tupaavora visii ruvara-ia. Ovuuta-a vao oa-ia visiipa Vearo Siposipo vatepaavora. E vare rugorugooatai? <sup>14</sup> ✧ Vo osa oisoa upiapaoro visii pugu piepaa, uva viapau oiso ragai oisoa kavupata ragai tovipaoro. Viapau. Oiraopavira rutu, eisi osa voeao enselpa irara vai pasi oisi piepatavori, oiso osa ragai oisoa tokipata. Ora ro tapo Jisas Krai ira vai-a tapo uvuipatai ra rera oiso tokipata osa ragai oisoa tokipata. <sup>15</sup> Oire uva oisi-a eisi osa ragavira oisoa ragai tauvapata voari tuariri. Oire uva apeisi-a? Visii vavara ragai-ia roru vovou touvira toupavevira visii-ia oiso osa voari tuariri, eke? Ari ita, taraipara, Vosa eisi purataeri voari tuariri, “Ora vigei varaaro gorogorope osireiara.” Oa iava purata, “Ie, Pol, osireiara varao oara tateiovoi ora igei

✧ 4:4: Jen 3:15; Ais 7:14 ✧ 4:5: Ef 1:7; Jo 1:12; Ef 1:5 ✧ 4:6: Ro 8:14-17 ✧ 4:10: Kl 2:14-17

✧ 4:13: 1 Ko 2:3 ✧ 4:14: Mt 10:40; Lu 10:16

iava viipa tauva vatepaoro pute pievira rutu.” Oire uva oisi-a eisi osa purataeri, vo uvare ragaipa oisoa sirao iraopata rutu rirovira. <sup>16</sup> Ra apeisi vo vokio-ia? Vo uvare visiipa oiraopa reo rutu vate rovoavora. Uva apeisi-a? Vo vokio-ia ragai-a visiiva keripato, eke?

<sup>17</sup> Oire oiso-ia vo osa visiipa kuuvu reoro raga vatepaiveira rakari verapa pitupitu iava vo visii aroviaku ragapaoro, uva riroa rutu rugorugooa purapaiveira visii-ia. Eake iava? Uvare oiso rutu vovoupaaveira ra visii ivupaive igei arova, oiso ra kasivarivira rutu voea sirova utupata. <sup>18</sup> Oire vearopai vo osa oearovu kasivarivira avu rugorugooapaavere visiire visii tauvapasa oiso osa ragai visii tauvapaavora visii tapo toupaooro. Ari vao raga oiso vo osa torevokoa vai karekepere vo tauva iava eva. Ari ita, viapau oiso torevoko rugoo vai-ia visii tauvapaivere voea evoea. Aue iava uvare ora voea vo pitupituroo raga sirova utupasa visii tavitavipaiveira vao rakari verapa pitupitu. <sup>19</sup> \* Ari ita, oiso rutu toupaveira, Ragai ovii iraraoro rutu. Oire vosa riakova kakaeto kavausa auepao, ra riroa rutu upia oueve. Uva vo upia eva oira iava oisoa opesipape vo osa kakaeto karekero. Uva oisi-a eisi osa ragavira visiiva riroa upia oupaaveira vo osa rirokata. Ari ita, vosa ovoievira rutu visii varaaro oiraopie vovouro toupaveira vo osa vara iava Jisas-ia raripata, eva-a oa iava uvuiparai ra ragai iava opesipe evara upiara. <sup>20</sup> Ragai rirovira rutu oiso ruipa irao ragaparai ra visii tapo toupaa vo vuuta-ia vao-ia. Uvare oiso rutu ruipa iraparai ra ragai vo rugorugoooro visii varaaro rugorugooara keke irao. Oa iava ragai vaoro riro vavata reoreo uvuipai ra tavariope. Ra va iava kavevira reoreora visii tapo. Uvare vo toupaooro ragai vo rugorugoooro paipai irapaivoi. Eva-a oa iava viapau uvuiparai oiso ra visii tauvaa.

### *Reo Ruu Vaireo Iava Hega Vaio Ora Sera*

<sup>21</sup> \* Oire ragai tavita vearovira rutu ora visii iava visiigoa oiso ruipataveira ra Reo Taisi reorooro toupata. Uva eake-a vao oa rutupa viapau vearovira Reo Taisi vo reoro uvupataveira? <sup>22</sup> Oire vo taisi oiso tavipapeira, Ebrahim vaierei oviiitoarei kavaveira. Uva oiso-ia iriavu-a kovopava iria oviiitoaro-a iravu. Ari iriavu-a vatuava oaro rutu iria oviiitoaro-a iravu. <sup>23</sup> Oire uva avaioto kavaveira o kovopava oiso osa airorovu rutu okakaerovu kavaveira. Ovusa ro-ia kikooto ira pisa visivi rutu karekeroepa. Eake iava? Uvare rera-a eera ira iava Pauto Reo Ovo puraveira Ebrahim-pa. <sup>24-25</sup> \* Oire vo siposipo ovoovovira rutu toupaveira vaiere iava oviiitoarei, uvare vaireo riakorirei airea oiso rutu toupaveira vaiere Reo Ovoirei. Ari ita, o-ia kovopava Hega iria ovii iraraoro oiso karekeapea, Evoea kovopa irara. Uva oiso rutu toupaveira osa vao Reo Taisi oa Moses-pa vateraveira Pauto vo Sinai Pukui-ia. Ari ita, voea oea oisoa Arabia-ia toupaveira oea vo pukui oisoa vaisipaive, Hega Pukui. Uva eira Hega iria ovoovovira oiso rutu toupaveira osa vao Jerusalem urui. Eake iava? Uvare oira-a kovopava oiso osa voea Jerusalem urui-ia tou irara oea oisoa Reo Taisi reoroovi kovopaveira. <sup>26</sup> Oire uva oira-a o-ia vigei aakoaro rutu Ebrahim vatuavaoro rutu eira iria oiso toupaveira, Oruivu airepa rutu vao Jerusalem oa vo vuvuu-ia toupaveira, eira-a Sera iria ovii iraraoro viapau oiso Reo Taisi reoroovi kovopaveira. <sup>27</sup> \* Iria iava Tugoropa Vuku oiso purapapeira, 'Rorupari vii vao riakova viigoa kakae kavau asavira toupai upia ou asavira. Utupavira riro kakaero rutu taru kavaurivere o-ia puteoro kovopava o-ia iriapa kakae puraro vatuato.'

28 ✧ Oire uva visii rutu-a vao ragai araoko iraraaro Pauto ovii iraraaro, visiigoa rera oirao piepaoro rutu oiso rutu toupataveira osa vaiereo Ebrahim avukarei, aiterea Pauto vo rearo oirao piesiva rutu. Oa iava Aisak kavausiva. 29 Ari ita, o-ia Hega iria ro kavauvea iravu kakaeto oiso raga ita osa airorovu rutu riakora kakae vure kavaupeveira. Uva eera-a ira ropa tavaka vatereva ira Pauto reraaro Uraurato vo goruaro-ia kavauroepa. Uva oisi rutu-a oiso-ia osa piepaiveira vo vokio-ia Reo Taisi roaroovi kovopaoro voeavao tavaka vatepaoro oepa Pauto Tugoropato Uraurato vatereveira. 30 ✧ Ari ita, ro-ia Ebrahim ira iava oiso tavipapeira vo Tugoropa Vuku sovara iava, uvare Pauto oiso rera tavireva ra kovopava ora rera iava verareve voavaorei rutu ora oviito. Eake iava? Uvare ro kovopava oviitoaaro viapau oiso uvuiparoi ra orekerovu rutu varao Ebrahim vararo oureve vo rara Ebrahim kopiuro. Uvare ro ragapa rutu oisoa uvuipape rera vatuavaaro rutu oviitoaaro. Vosa kopiuro aiteti, ra orekerovu rutu oureve taru rera raga. 31 Araoko irara oaa, viapau oiso toupape osa voeao okakaeroa kavauvea o-ia kovopava. Viapau rutu. Ari vigei-a vao oiso rutu toupape, Vigei-a Ebrahim vatuavaaro rutu ovii iraraaro. Oire uva evo reo oa oiso ovoovovira rutu toupaveira vigeipa.

## 5

### *Vii Viigoa Karurevora Tuukea Iava Viigoa Uvuipaei Ra Eakavira Rutu Toupai*

1 ✧ Viapau rutu oiso kovopavira toupataveira oiso osa voeao oea Reo Taisi roaroovi kovopaveira, uvare visii karurevora Krai Reo Taisi vo tuukearo iava. Uva visii tavipaavo oiso, ra oiso ragavira rutu toupata. Ra oisi tupaoro viapau oiso ra ora visii vo pitupituroaro iare vorevira porepata oiso osa evoea kovopa irara.

2 Oire uva ragai-a Pol ragoa vo rearo vao-ia uvu iraota! Vosa vao Reo Taisi sirova utupaoro ora visii iava rakari verapata oiso rugoopaoro, Vao raga rutu iava Pauto uvuiparoi ra igei ora rera iare vorevira oupareve. Uva oisi-a eisi osa iava Krai viapau uvuiparoi ra visii orirupareve vo ora rera iare visii virivaripaoro. 3 ✧ Oiso vorerivira ita visii tavipaavo, Vosa irai visii iava oiso rugoopaoro, Vosa ora ragai iava rakari verara, ra va iava Pauto ragai-ia vearo vovou purareve. Oire vosa oisi oiso-ia rugoopaoro, ra viapau rutu uvuiparoi ra oreorovivu ruture ovauparo vao Reo Taisi rutu sovara-ia. 4 Uva visii oiso purapataveira, “Reo Taisi sirova utupaoro Oiraopa Tootoo rutu oupaiveira.” Ari oisi-a eisi osa purapataveira, uva viapau rutu oiso uvuipatai ra Oiraopa Tootoo oupata vo Krai ruvara-ia. Uvare eisi purapaoro Pauto vo siraoaro kavupataveira. 5 ✧ Ari igei tavupareveira Tugoropato Uraurato igoa Krai-ia raripaoro Pauto vo rearore tuepaiveira, vo osa rera raga igeire oiso puraro, “Vearo irara rutu visii.” 6 Ari ita, oiso-ia vosa ro ira Krai Jisas-va tavosivira toupaveira, ra viapau oiso rerapa rakari verapa pitupitu reipape rutu. Ora vao vosa vo pitupitu kavureve, ra viapau oiso eva tapo rerapa reipape. Viapau. Ari vao raga rutu-ia oirao pie vovou. Eva-a oa vituaro rutu iava oirato vo vovouaro tore piepaiveira, ra sirao vovou rutu purapareve vo vokiara rutu-ia.

7 Voari tuariri uva vearovira rutu Krai vo rearo uvu rovatovora, oa iava oisoa va sirova utupata. Oire uva iroutoa rutu-a ro ira visii piro pierevora oiraopa reo sirova utu arapa? Uva apeisi rutu-a oiso osa visii re puraroera, oa iava oisi rera uvuoro eisi pietavora? 8 Ari ita, viapau rutu oiso Pauto visii



piro pierevora. Viapau. Uvare rera-a eera ira keeraparoveira varao arova tuariripa vo vovouro visii varaaro oara oisoa visii tuukepaive rutu. <sup>9</sup> ✧ Uva oearovu oiso ovoovovira purapaaveira, “Gareavi yis uvuipai ra riroa rutu plaua kae pieve rutu va riro pieoro.” <sup>10</sup> Oire uva oisi-a eisi osa voearo vo reoaro visii piro piepaiveira. Ari Pauto ovovouroa-ia evara voea varaaro vurapareveira oara voriaro voeapa vatereveera. Uva oiso ragavira tarai iraoparai ro iava Turaro Krai ira raga uvuiparoi visii tauvapasa rutu. Oa iava uvuipatai ra evara piro pie reoro eakapata. Eisi osa iava uvuipatai ra ragai vo reoaro sirova utupata ita.

<sup>11</sup> Uva oearovu oiso purapaaveira, “Rera Pol oiso voea siposipopareveira, oisore ra ora voea iava rakari verapaave. Ra va iava oiso karekepaave, Jiu rutu.” Uva vosa oisi eisi visii siposipopaavori, ra eakepa Jiu-pa irara ragaire kasipupai? Ari vao raga Jisas iava vo reo ro ira evao parikou-ia kopiioepa, oreoa vatepaaveira. Oa vituaro iava oisi eisi kasipupaai ragai vuri piepasa. <sup>12</sup> Uva oiso ruipa iraoparai evoea iava oea visii piro piepaiveira oiso purapaoro, ra ora visii iava rakari verapata. Uva oiso voeapa vearopapeira vosa visii arova uvuipaai ra ora verapaave uvaroi ragare.

<sup>13</sup> Araoko irara oaa, oiso visii tavipaavoi, Pauto visiire keeroepa, oiso ra tuariripa pitupituro rutu kavuta varao vavagisiara rutu. Ra avekatavira toupaooro opeita ora visiire oiso purapata, “Uvuipaviei ra varaua vo ruipaoro sirova toupape.” Viapau. Ari eisi toupaooro uvuipatai ra oearovupa siraopaooro voea tauvapata. <sup>14</sup> ✧ Aue iava uvare vara rutu evara oara Reo Taisi sovora-ia toupaveira oara rutu takuvuaro iava oiso purapapeira, “Oearovivupa siraopata oiso osa ora visii ragapa siraopataveira.” <sup>15</sup> ✧ Ari ita, vosa eisi piepata oiso osa kaakau kare vo kareo oea ora upopaaveira, ra eake vai va sirovava karekepe? Ora vatatopo iraopata. Uvare eisi piepaoro uvuipatai ra ora opesi pieta.

### *Tugoropato Uraurato Vo Pitupituro Iava Ora Oirara Vo Pitupituro Vo Toupaooro Rasitoo-ia*

<sup>16</sup> Ragai vo reoaro-a vao-ia oiso. Vo osa Tugoropato Uraurato ora rera vo reoaro vatereve visiipa, oire eva-a oa-ia uvuipatai ra va sirova utu iraopata. Ari ita, vosa visii raga vo ruiparoaro oiso purapapeira, Eagara vuria purari, uva vo ruiparo-a evara oara iava uvuipatai ra pore iraota viro Tugoropato Uraurato vo reoaro raga sirova utupasa. <sup>17</sup> ✧ Uvare Tugoropato Uraurato vo rugorugoooro osivu ragavira rutu toupaveira, vo rara vigei vo rugorugoooro pisavira toupave. Oire vo rugorugooorei eisi ragavira toupaooro upopapeira. Ora tapo vo rugorugooorei oiso vigei piepaiveira, ra oavu kavuoro oavu raga sirova utupavio vao oa pura arapa reasipavio. <sup>18</sup> Ari ita, vosa Tugoropato Uraurato vo reoaro rutu sirova utu iraopata, ra va iava viapau oiso Reo Taisi visii tuukepaive.

<sup>19</sup> ✧ Vosa ora vigei raga vo rugorugoooro raga sirova utupavio, ra va iava vo vovouro rutu viaevira karekepape varao oiso-ia, otopa pitupitu, ora vuri rugorugoooro topo varao oara purapaaveira, ora opitupiturovo purapaaveira arii asavira. <sup>20</sup> ✧ Vo osa oearovu tokarasiara vaisiara kae pie ragapaive va iare tugara vo goruroaro ou ragapaoro. Ari oearovu kavokavo kovoro raga purapaaveira. Ari oearovu viurupa vovouro purapaaveira. Vo osa oearovu ora upopaveira. Ari oearovu riirii vovouro purapaaveira, osa oearovu kasipu vovourova toupaveira, ora oearovu tapo ora voea raga-ia vovoupaaveira ora vaisi oaive kae piepaoro. Vo osa oearovu oiso

✧ 5:9: Mt 13:33-35; 1 Ko 5:1-8 ✧ 5:14: Ro 13:8-10 ✧ 5:15: Je 3:13-18 ✧ 5:17: Ro 7:15-25

✧ 5:19: Ef 5:3; Kl 3:5 ✧ 5:20: Re 21:8

purapaave, “Igei vovouaro torevokopai. Ari visii vaaro koikepavira toupai.”  
 21 Vo osa oearovu varaaro aupariara riiriipaiveira. Ari oearovu riro gorupara-ia ukaiopaaave kokoropaaro. Osa oearovu vurei aioro purapaive. Oire ra vo aioro-ia ora voeava vuri vovouro purapaive. Oire uva oiso ita vorerivira visii tavipaavoii osa rorovira visii tavi rovoavora oiso, Vosa ro ira vuri vovouro rutu purapareve oiso osa vara evara, ira-a eera viapau rutu oiso uvuiparoi ra koataro Pauto vo Saraaro iare. Ra va iava viapau oiso toupave, Rera-a Pauto oiratoaaro.

22 ✧ Ari vosa Tugoropato Uraurato vo rugorugoaro sirova utupavio vara oara kareke piepareve vigei sopaaro-ia. Uva evara oara iava uvuipai ra oiso karekepape, sirao vovou-a vao-ia, ari rorupa vovou-a vao-ia, ari kave vovou-a vao-ia. Oire ra eisi sirova viapau oiso vagevagepavira kasipupavio, vo osa oearovu tauvapasa auepavio, ora varaaro vearo rugorugoaro, ora vao tuuvu vovou rutu oa purapape. 23 Ora vao tapo veripape oiso-ia, opeita oearovivu-ia putepape, ora opeita ora vigei iava vasepape vuri vovouro purapasa. Oire vosa oisi eisi piepari, viapau oiso irai uvuiparoi ra vii togareve reoa vai-ia, vii vao viigoa Tugoropato Uraurato vo vovouaro sirova utupau. Viapau. Aue iava uvare viapau oiso Reo Taisi vo pitupituaroo puteparivoi eisi vara sirova utupaaro. 24 ✧ Oire opitupituroa rutu vara eakaiva voeao Krai voeaaaro varaaro vuri rugorugoaro.

25 ✧ Ari ita, vosa tootopavioveira vo Tugoropato Uraurato vo goruaro sovara-ia, eva-a oa iava uvuipaviei ra ora vigei iava vase irapape rera iare. Oa iava uvuiparoi ra vigeipa vasepareve ora rera vo rugorugoaro iare. 26 Ra vara evara sirova utupaaro viapau oiso vagu vovoua vai purapape, ora viapau oiso oearovure kasipu rugoaro torevokopai, ora viapau oiso ra oearovu varaaro riiriipape.

## 6

### *Vigei Uvuipaviei Ra Araoko Irara Oavi Tauvapape Voea Vo Siraaro Kaepaaro*

1 ✧ Araoko irara oaa, vosa irouto visii iava oirao pie vovouto vuri vovou-ia kovero, oire ra irai visii iava ro ira goruvira rutu Tugoropato Uraurato vo vovouaro sirova rutu utuparo, eera-a ira uvuiparoi ra reravi vorevira torevokopai rera tauvaaro kave vovou raga-ia. Oire ra vearovira ita vorevira vokareve. Uva vo osa rera tauva rorevora, vearovira rutu ita rera ora vatatorovero vaopa, teapi rera ita va vao vuria raga-ia kovero ita. 2 Visii rutu oearovivu rutu visii iavapa irara tauvapaaro toupata voeavi kapokoroporoaro vuri vovou vo vavataarova. Oire vosa oisi eisi piepata, ra va iava Krai vo reoaro sirova oisi rutu eisi utupata vao rera vaaro reo goru. 3 Ari vosa irai visii iava oiso puraparo, “Viapau rutu uvuiparai ra eisi ovoovo sirova utura. Uvare riro vaisitoo rutu-a ragai.” Oire uva rera-a eera ira eisi purapaaro ora keakea ragaparo. 4 Vosa iravu siituepaaro oiso purapau, “Viigoa-ia putepaavo uvare vuria repararivoi,” oire uva viapau oiso torevokovira eisi reopave. Viapau. Ari vearovira rutu ora vii raga ora viiva siituepau ora vii vo vovouaro roviriei rovopaaro rutu. Oire vosa vii iava sopau oiso purape, “Vearopai,” ra va iava oiso ragavira taraiu, O, ari torevoko vovou-a vao-ia oa purapaavo, 5 uvare oirara rutu uvui irapapai ra katakataivira kovoara oave vavataaro kae piepaive.

6 ✧ Oire vosa irai Jisas vo reoaro iava visiipa siposiporeve, oa iava visii ita uvuipatai ra orekerovu-ia vearopara rera tauva ragapata rera vatepaaro.

7 ✧ Opeita ora visii raga ora keakea ragapata oiso keapaoro, Uvuipaviei ra Pauto keapasa vatauvira orekerovu pura ragapape. Oa vituaro vao-ia oiso toupaveira, Vosa eake vao pauri vo kovoa-ia vii vaaro, ra oisi raga kuepe. 8 Oire vo osa irai orekeroi vuriara vai paupareve, ra vara iava oupaoro rera vo vovouroaro vuri vovouro aio piepareve. Eva-a osa raga piepaoro ora opesi pie ovoiroverea. Ari vo osa ro ira vearopara paupareve Tugoropato Uraurato vo rearo sirova utupaoro, uva rera-a eera ira vearoa oureverea. Aue iava vo rara Tugoropato Uraurato ruvara-ia Tootoo Ovoio rutu oureve. 9 ✧ Vo rara reasi asavira varao vearopara purapape. Ari vosa keruiriavira rutu topa pievira orekerovu rutu vearopara purapata, oire eva-a oa iava taru vearopa kuero oupatavere vova Pauto ruvara-ia. 10 ✧ Va-a eva vituaro rutu iava uvuipaviei ra oearovivu rutuva vearopa vovouro purapape vo osa vuutaa vaipe oisi eisi piepasa. Oiso osa voeao oeavia Kraiis oirao piepaveira vigei araoko iraraaro, oeapa ita uvuipaviei ra oisi vearopara rutu purapape pute pievira rutu.

*Pol Kristen Irara-ia Rorureva Voea Goru Pieoro*

11 Oire ragai-a vao ragoa raga visiipa vo rigato puraavo. Uva vo kirokiroro kekepatavoi riropara ragai varaaro. 12 Uva voeao oea oisi visii sipoipopaiveira goruvira rutu visiire oiso purapaoro, “Uvui irapatari ra ora visii iava rakari verapata.” Uva eisi ragavira piepaveira vuri vovou vo vavataaro asavira oiso, teapi voea oupaive. Aue iava uvare oiso taraipaaveira oraivavu epao vao-ia osa Jisas kopiiopea evao parikou-ia vigei vovevira ouoro. Uva vo raiva eva oa iava sipoipopaoro pasi vuri vovou vai oupaive Jiu ruvara-ia pasi. 13 Ari ita, osa voeao-ia oea oisoa ora voea iava rakari verapaave, viapau oiso Reo Taisi rutu rutuaro sirova utupaoro-a. Viapau. Uva oiso ruipapaaveira rutu ra voea vo rearo sirova utupaoro ora visii iava rakari verapata. Ra va iava oiso purapaave ora voea iava, “Easi evoea vigei vo pitupituaro raga sirova utupaaveira.” Oa iava oearovu voea vo pitupituaro raga rei piepaive rutu. 14 ✧ Ari ragai viapau oiso oisi ragavira eisi oearoipa sipoipopaa. Viapau. Ari evao parikou raga rei piepaaveira rutu vao oa-ia kopiiopea vigei reraaro Turaro Jisas Kraiis ragai ouoro. Uva oisi-a eisi osa vituaro iava viapau oiso orekevu avu vai ragai vo vovouaro uvai ragare ivupaiveira varao vo rasio iava akukupapara raga. Evara rutu kopiiepa ragai iava evao parikou-ia. 15 ✧ Ari ita, vo osa ora visii iava rakari verapataveira oa-a viapau eva uvuipai ra visii virivarive. O vosa vo pitupitu eva kavuta, oa tapo ita viapau uvuipai oiso ra visii virivarive. Ari vao raga-ia vo rara Tugoropato Uraurato vigeipa airepa rugorugooro vaterave. 16 Vosa oisi raga eisi vo reo sirova utupaave oearoi, oire ra va iava voeare oiso purara, Osa vearopai eisi. Eake iava? Uvare ruipaparaveira rutu voea rutupa oiso ra vearo tou puraive, ora aue tapo ra sirao vovou purareve Pauto voea-ia ora oearovu tapo Pauto voeaaro.

17 ✧ Oire ovoioipa reo-a vao-ia ragai vaaro oiso oa visiipa vateavo vo vokie-ia. Ovokia vao isivaaro iava viapau rutu oiso irai uvui iraparoi ra utupaua ragai vo rearova ora kaureoro. Uvare ragai-a Jisas-pa kovopato. Ari ita, viupara varao oara ragai varaaro-ia toupaveira ragai vo rearo oirao piepasa.

18 Araoko irara oaa, oiso rutu ruipa iraparai ra vigei reraaro Turaro Jisas Kraiis visii rutu viraako iraoreve visii taupapaoro.

Evavi raga, ra opesipe.

Ragai-a vao, Pol.

## EFESAS

### Irapa Reoro Vo Vukuo Iava

Vo pasio rigatoreva Pol tuukepa kepa-ia toupaooro eisi Rom aue-ia 61-63 yia Jisas vaaro isivaaro iava kavaua. Pol aue iava rigatoreva ra katai vovouvira rutu toupave Jisas vaisiario-ia voeao lotupa irara. Ari ita, oirao pie vovou irara oiso rutu toupaveira, Jisas iava varaua (Ef 1:23, 4:25, 5:23, 30), ro ira oiso toupave osa kukue (Ef 4:15-16). Ora vao sios voea ita lotupa irara oea oiso rutu toupaveira Kraiis oiraaro vatuava (Ef 5:22-32) vo osa rera-a vatuato. Evo reoro rutu rigatoreva Pol lotupa irara goru piesa, voeao oea oisoa Efesas urui-ia toupave.

1. Ira pievira aviavi pie reoro rigatoreva Pol, 1:1-2.
2. Kraiis-a ro ira vo raiva vituaro rutu oa-ia uvuipaa oirara ra vorevira voreave Pautoa iare rera tapo ora agiagipaoro ita, 1:3-3:21.
3. Opitupiturovu iava torevoko pitupituro oara purapaveira voeao oea aviavia-ia toupaveira Pauto vaaro, 4:1-6:20.
4. Pol veoro voki purareva oearovuva oirara, 6:21-24.

<sup>1</sup> Ragai-a Pol ragoa vo pasio rigatoavoi visii rutupa Pauto voeaoro visiigoa evoa Efesas-ia toupataveira. Visiigoa Kraiis Jisas vo reoro uvu rovtava. Uva vo vokie-ia tovira rutu toupatavovi Kraiis Jisas-va ora tavosipaoro oisi raga vo reo sirova utupaoro. Ari ita, Pauto ragai roporeva ora rera vo ruipaoro-ia, oisore ra aposel kovo-ia pitupaoro Jisas Kraiis kareke piepaa. <sup>2</sup> Oire uva ragai vo ruipaoro oiso rutu toupavei visii, Pauto ro vigei Aitearo ora ro vigei reraaro Turaro Jisas Kraiis evaiterei aiterea vokiara rutu-ia tauvaa ora gavaurea vatepasiveira visii.

#### *Pauto Vigei Vatepareveira Viraakoa Vao-ia Ro-ia Jisas Kraiis*

<sup>3</sup> Uva vearopai ra rera-ia Pauto vuurapa vaisi purapape ro Aitetoaro Jisas Kraiis vigei Turaroaro. Uvare vigei rutu viraakorevora orekerovu rutu vearopara vateoro varao rera vo Saraaro iava, auere oiso ra uraura tootooro oavi tauvapareve, uvare kataivira rutu vigei Jisas Kraiis tapo toupapeira. <sup>4</sup> Voari rutu tuariri vo osa Pauto rasito pura asavira toureva, uva vo vuuta-a eva oa rutu-ia Pauto vigei ropo rovoreva rutu, oisore ra oiso toupave, Vigei rera voeaoro rutu. Oa-a vao vituaro rutu riaro iava, rera ro-ia Kraiis. Uva oisi-a eisi osa iava uvuipaviei ra torevoko vovou rutu purapape vao oa-ia viapau vuria vai vo rera osireiario-ia Pauto. <sup>5</sup> \* Ari ita, Pauto vigei kavikoreva rutu, uvare vigeire rugorugoopepa rutu voari rova-ia ro iava Jisas Kraiis, ira iavirava vigei ourevere taru vorevira ora rera iare oiso vigei vaisiario, Ragai ovii iraraoro. Eisi osa pierereve, uvare rera rutu vo ruipaoro-a Pauto. <sup>6</sup> Rera-ia vuurapa vaisi pura irapata ro-ia Pauto vaore rugorugoopepa rutu, akukua vatevatea vovou ora vao rera vo tauvaoro vereopa vovou-ia vigei-ia. Eake iava? Uvare rera Oviitoaoro-a ira oisoa kavikopareve rutu. Ira iavirava akukuvira rutu evara oupapeira.

<sup>7</sup> Ro-ia Jisas ira evao parikuo-ia kopiiopepa. Oa iava vao rera iava revasiva parueva vigei iava vuri vovouro veraoro rutu. Oiraopavira rutu Pauto vo siraooro riroa rutu vao oa iavirava vigei karurevora vuria vo tuukearo iava.

<sup>8</sup> Vo sirao-ia oa pute pievira rutu vigeipa vaterevora. Eake iava? Uvare orekerovu rutu-ia tarai rovoropepa rutu. <sup>9</sup> \* Iu. Uvare Pauto ora rera raga vo ruipaoro sirova utuoro vao vatau reo poeravira karekereva. Vo reo

oa voari rutu tou rovova ro iava Krai Pauto vo rugooaro iava. <sup>10</sup> Oreoa-ia Pauto ovokivu reesireva vao oa-ia Krai iava orekerovu rutupa kukue purareverea varao oara rutu gurureverea vo vuvuiua-ia ora vo rasitoo-ia ora rera iare. Uva eisi osa pieoro oiso ora rera vo ruipaaro sirova uturo.

<sup>11</sup> Pauto ora rera vo ruipaaro-ia vigei roporeva vo Krai vaisiario sovara-ia, oiso ra oiso toupape, Rera voeaaro vigei. Uvare ora rera vo ruipaaro raga-ia oaravu rutu purapareveira. <sup>12</sup> Oiraopavira rutu, vigei vao-ia vigoa Krai-ia oisoa rari rovopavio. Ra oearovu vigei varaaro oirao pie vovouro kekepaoro uvuipaai ra vuurapa vaisi purapaive Pautoa-ia.

<sup>13</sup> ✧ Oire uva oisi ragavira eisi osa toupavoi visii rutu-ia. Eake iava? Uvare voari rovoa-ia oiraopa reo uvu rovatavora vao Vearo Siposipo osiposipoa iava uvuiparoi Pauto ra vigei oureve vorevira ora rera iare. Oa iava Krai-ia raritaera. Uva Pauto ora rerapa visii reesirevora visii vateoro Tugoropato Uraurato ro ira iava rovoa-ia Reo Ovoi purareva. <sup>14</sup> ✧ Ro-ia Tugoropato Uraurato rovopatoa rutu varaopa oara oupaperea vo utupaua. Oiraopavira rutu rera-a eera ira iava uvuipaviei ra ora vigei-ia rera sovopaoro va iava oiso purapavio, O, oiraopa reo rutu vao Pauto vaaro oa tavitavipapeira varao rutu iava oara vatereverea Pauto vigei ouoro ora rera iare. Uva vearovira rutu Pauto, uvare rei vaisitoo rutu-a vii.

### *Pol Varirioepa Pautoa Iare Oiso Ra Efesas-pa Irarapa Taraia Vateve*

<sup>15-16</sup> Vo voki-a vao oa-ia visii iava uvu rovooro variripaoro rovoraera Pautoa iare visii iavirava rera-ia vearo vaisi puraoro. Ari ita, evo voki-ia visii-ia tarai rovoraepa rovovira rutu, vo osa Jisas Krai oirao piepatavora ro vigei Turaroaro. Oa iava eva oisoa oearovupa siraopata vearo Pauto vaeaoro. <sup>17</sup> Oisi-a eisi osa rugooapaoro Pauto akepaaveira ro Jisas Krai Turaro Aitearo ro ira kerariava toupareveira, ira arepaaveira visiipa, oiso ra visiipa Tugoropato Uraurato vatereve. Auere ra va iava vearovira rutu Pautoa-ia taraiapata. <sup>18</sup> ✧ Ira arepaaveira oiso ra visii varaaro rugooora karureve aviavia ariarava rera vaaro. Eva-a oa iava uvuipatai ra vovio utupaua roroiovira rutu varao keketa oara karekereverea varao oarare tuepataveira. Aue vituaro iava uvare visii ourevora ora rera iare. Oiraopavira rutu oiso osa va vao Reo Ovoi oa purareva Pauto, oiso ra rera vaeaoro rutu viraako iraoreve rutu vo utupa voki-ia. Uva va-a eva riroa rutu viraakoo oa eveitavere rara. <sup>19</sup> Ari ita, vo vokio tapo rera vo goruaro riro varivarivira rutu kovopaiveira vigei tavapaoro vao vigoa rera oirao piepapeira. Eisi osa iava uvuipatai ra varao-ia riropara rera varaaro taraiapata aviavi pievira rutu. <sup>20</sup> Uva vo gorua-a eva oa vaova areiipaiveira ogorua iava Krai vorevira tore pierava kopiia iava rera pau piesa vo ora rera vaaro-ia oirapapa varata vo Pauto vo ruuiaro-ia vo vuvuiua-ia. <sup>21</sup> ✧ Oa iava vao tupaoro oearovu rutu-ia reipa irara putepareveira oiso-ia, gavmanpa reipa irara-a vaeao, ari turaro irara-a vaeao, ora vaeao tapo pau tugara irara ora enselpa irara oea reipaai vo vokio ora vo utupaua. Ari ita, oea rutu-ia evoea pute iraopareveira rera raga ro-ia Krai. <sup>22</sup> ✧ Oiraopavira rutu Pauto orekerovu rutu tovoreva vo Krai tasiaro reroaro, oiso ra varapa kukue purapareve vigeipa lotupa irara vigoa rera iava varauava ovoovovira toupapeira. <sup>23</sup> Uva voua-a varaua lotuua oua-ia ovoivira rutu toupareveira. Ira voraro rutu orekerovu rutu ovoi pie iraopareveira.

✧ **1:13:** Jo 16:7-11; Kl 1:5; Ef 4:30 ✧ **1:14:** 2 Ko 1:22 ✧ **1:18:** Ap 26:18; Ef 6:10 ✧ **1:21:** Fl 2:9-10 ✧ **1:22:** Ef 4:15

## 2

*Pauto Vigei Oiso Rutu Piereva, Kopii Irara Vigei, Oisore Ra Avaavaovira Krai Tapo Tootoopavio*

<sup>1</sup> Ari ita, voari tuariri rutu uva oisoa oiso rutu toupata osa kopii irara. Eake iava? Uvare oisoa kaureopaoro rirovira rutu vuri vovouro purapata. <sup>2</sup> Uva vo vuuta-a eva oa-ia toupaooro oisoa vo rasio vo pitupituroaro ragapa ruipapata. Oa iava Seten vo pitupituroaro raga oisoa purapata, ro ira tugara kare rutupa turaroparoveira. Ira kovopareveira vo voeao sopaoro-ia oea Pautoa-va ora kaureopaaveira. <sup>3</sup> ✧ Oiraopavira rutu ita oiso osa vigei tapo piepapeira vo ora vigei raga vo ruiparoaro sirova utupaoro. Ari ita, varao-ia vuri vovouro oara puraepa voari tuariri oara varaura vo ruiparoaro-ia karekepa ora vo tapo vigei vo rugorugooroaro-ia. Uva oisi-a eisi osa pieepa, oa iava tutuu pie ragava Pautoa-pa, oiso ra vigei varaaro vuriara vuriaro vatereve vigeipa oiso osa oearovu oirara oisoa piepareve.

<sup>4</sup> ✧ Vo osa rirovira rutu siraopaoro vigeipa rera vaoro riroa sirao rutu vatereva vigeipa. <sup>5</sup> Oire uva-a va eva oa vituaro iava avaavaovira vigei rutu tootoo piereva Krai tapo, vigoa oisoa oiso rutu toupape, Kopii irara aue-ia vuri vovou. Oiraopavira rutu uvare Pautoa-re riroepa rutu vao vereopa vovou. Oa iava vorevira ora rera iare vigei oureva vigeipa siraooro. <sup>6</sup> ✧ Uva vigei vorevira tore pieparevora, uvare vigei tavosireva Krai tapo. Uva oisi-a eisi osa ragavira ovoovovira toupaooro Krai Jisas tapo vuviuia-ia turarovira toupapeira. <sup>7</sup> Oire vigei oiso piereva. Oa vituaro iava oearovu vo utupa vuutaro-ia uvuipaai ra vigeiva vurapaoro Pauto vo vatearo vao sirao vate eveipaive vo vigei-ia vo osa Krai Jisas-va ora tavosipavio. Vo sirao-ia oa oaravu rutu-ia pute iraopaiveira. <sup>8</sup> Oa-ia Pauto akukuvira rutu vigei vorevira ourevora ora rera iare vo vigei varaaro sirova oirao pie vovouro. Oire uva apeisi-a? E vigei raga vo kovoaro riaaro iava oiso toupapeira? Viapau rutu. Ari vao raga-a akuku vate Pauto vaoro. <sup>9</sup> ✧ Uva viapau rutu uvuipavioveira ora vigei raga-ia vuurapa vaisi purapape. Eake iava? Uvare viapau oiso vigei vo kovoaro-a. <sup>10</sup> Iu, uvare Pautoa raga kataito vigei pura rovorevoiva, vigeipa Airepa Tootoo vatereva ro-ia Jisas Krai. Oiraopavira rutu uvare vao rutupa oisoa ruipaparo, vo osa vearovira rutu toupape oearovivu tauvapaoro, uvare tuariri vo vovou reesi rovoreva vigeipa oearovivupa siraopasa.

*Krais Vo Sararei Takuvureva Oa Iava Kataia Purava*

<sup>11</sup> Oire ra opeita vaore ovaupata osa Jiu-pa irara voeao rakari verapa irara oisoa visii vaisipaive oiso, Vuviuipa irara visii oea-ia viapau reesia vai toupaveira. Iu. Uva ora visiire rugoopata, Vigei-a Jentael-pa irara vigoa ratau kavaipepa. <sup>12</sup> Ora oiso tapo rugoopata, Vo vuuta-a eva oa-ia Krai-pa oisoa toko pievira toupai, uvare igei rutu-a vao-ia tauaipa irara raga aapaapau irara voeaopa Pauto voeaoro Jiu. Ari ita, voeapa evoea Jiu Reo Ovoi purareva osa sopaipavira oisoa toupata vaopa Reo Ovoi. Oa iava viapau uvuipataera ra oaravu avu vai oupata Pauto ruvara-ia. Otoua-a eva visii vaoro oa-ia oisoa Pautoa-pa rorukovira rutu oisoa toupata. Eva-a oa iava oisoa viapau oaravu avu vaire tuepata vaooro vova Pauto. <sup>13</sup> ✧ Ari ita, voari tuariri tauaivira rutu oisoa toupata, ovusa vo vokie-ia Krai Jisas-va ora tavosipaoro uvui iraopatai ra Pautoa iare tutuu piepata. Oa vituaro iava uvuipatai ra oiso pieta, uvare vigeipa kopiiroepa Krai ora rera iava revasiva petooro. <sup>14</sup> ✧ Rera raga-a ira Jiu-pa irararei ora ratau

✧ 2:3: Ga 5:16-17; Ro 2:14 ✧ 2:4: Ro 10:12; Sam 103:1-14 ✧ 2:6: Ef 1:20 ✧ 2:9: Ro 3:20, 28; 2 Ti 1:9 ✧ 2:13: Hi 10:19-25 ✧ 2:14: Kl 3:15; 1 Ko 12:13

tou irara takuvureva. Oa iava ora agiagiaepa, uvare rera vo kopiiario-ia vigei ariarava kovokovoa tokoreva. Oa-a vao oa-ia ora vigeiva keripa pitupitu opesi pie ovoireva. <sup>15-16</sup> Uva evao parikou-ia kopiioro Jiu varaaro reo gorou opesi piereva varao oara-ia oisoa oiso visii vaisipaive, Aapaapau irara. Uva oiso osa pieoro voearei iava airepa sara roro piereva ora rera-ia voea tavosioro. Eisi osa iava gavaure vovou-ia kataivira toupapeira, uvare Pautoa tapo ora agiagipavioveira. Iu, uva oiso osa kataivira toueiva, vigei vaoro keripa vovou opesiapa vao-ia evao parikou. <sup>17</sup> Oiraopavira Krai pouro viropa Vearo Siposipo iava siposipopaoro aue iava gavaure aviavi pievira. Uva va-a vao osa va purareva visiiapa ratau tou irara visiiogo oisoa Pautoa-pa tauavira rutu toupata. Ora igei tapopa vao-ia Jiu-pa irara goa oisoa rera-ia taraipaoro rera ruvara-ia toupai. <sup>18</sup> \* Iu, Jisas Krai vo kovoaro-a vao vituaro rutu oiso-ia, oa-ia uvuipaviei vigei Jiu-pa irara ora visii ratau tou irara ra aite Pauto osireiara iare koatavio, vo ovusa Tugoropato Uraurato vigei rutu taupaveve.

<sup>19</sup> Visii vao-ia ratau tou irara, viapau oiso vorerivira ratau tou irara-a visii. Ora viapau oiso aapaapau irara-a visii. Viapau rutu. Eake iava? Uvare visii-a ora igei Pauto voearo katai irara rutu. Aue iava uvare vigei rutu-a Pauto ovii iraraaro. <sup>20</sup> \* Oire voeao-ia profet irara ora voeao aposel irara oearea rutu-a tuutara. Oa iava voea rira-ia torepaveira oiso tupaoro. Ari ita, Krai Jisas-a eera rovopatoa rutu Tuutato. Oiso osa vo tuutao oa tovo rovopaiveira aveke tuuta vo osa kepa-ia pau vovouave. <sup>21</sup> Oire eera kukuuvu tuuta Jisas ira-ia vigei rutu uvuipavioveira ra rera raga-ia ora takuvupavio, ra riropape kovapaoro vo osa vearo pitupituro purapape. Oa iava uvuipaviei ra oiso rutu toupape osa rera vo kepaoro Tugoropa Kepa vao oa-ia viapau vurira vai. <sup>22</sup> Uva visii tapo visiiogo uvuipatai ra rera raga-ia tavosivira toupata oearovivu tapo voeoro oirao pie vovou irara. Eva-a oa vituaro rutu iava Pauto vo kepa paureve rera vo kepaoro. Visii rutu-ia vo kepaoro sovara-ia toupaveira urauravira Tugoropato.

### 3

#### *Pol Vo Kovoaro Voeapa Siposipopasa Ratau Tou Irara*

<sup>1</sup> \* Ragai-a Pol Jisas Krai kovopatoaaro ragoa vo tupaavoi tuukepa kepa-ia, uvare visii iava tapo siposipopaiveira oiso, Vigei rutu-a katai irara rutu. <sup>2</sup> Vao vai-ia pasi taraipataiveira oiso osa Pauto ragai tauvaoro ragai vatereva vo kovo-ia, oisore ra visii tauvaa. Iu, vao-ia taraipatai ora oavu-ia tapo vao. <sup>3</sup> Vo osa Pauto ora rera vo vovouaro karekereva ragaipa, oiso ra va-ia taraira. [Ari ita, gare visivi va iava siposipoavora visiiapa oavu-ia rigatoa ragai vaoro]. <sup>4</sup> Evo rigato oa viepaoro uvuipatai ra va iava ragai-ia taraipaoro oiso purapata, “Akoea, Pol roroiovira rutu taraiparoveira vao-ia oara Krai iava vatauvira tupaiveira.” <sup>5</sup> Ari ita, voari tuariri uva oisoa Pauto vo vovouaro vatauvira rutu tou rovopaive. Oa iava rera voeoro viapau oisoa va-ia taraipaave. Uva vo vokie Pauto ora rera vo reoreoro aue-ia Tugoropato Uraurato karekerevoroa ora rera voeareiaropa voeao aposel irara ora voeao profet irara, oearea roroio sopavira rutu oisoa tupaive. <sup>6</sup> \* Vo reo-a oreoa oisoa vataupape oa oiso oisoa purapape, “Voeao ratau tou irara oea orekerovu rutu ouivera Pauto ruvara-ia oiso osa voeao Jiu-pa irara. Vao oa vituaro-a vao-ia Vearo Siposipo, oa iava vigei rutu oiso tupaia, Katai irara. Uvare oiraopa rutu-a vao Reo Ovoi oa purareva Pauto Krai Jisas iava vigei rutupa.

<sup>7</sup> Ari ita, Pauto vo kovo vatereva ragaipa, oiso ra oearovu rutupa siposipopaa Vearo Siposipo iava. Oa iava ragai tauvapareveira rera raga vo goruaro-ia, oisore ra torevokovira rutu rera vo kovoaro purapaa. <sup>8</sup> ✧ Oiraopavira rutu uvare oirara rutu voeao Pauto voeao oea ragai-ia putepaveira. Eake iava? Uvare akaipatoavi rutu-a ragai. Ari ragai raga roporevorao Pauto, oiso ra Vearo Siposipo kaea voeopa ratau tou irara. Osiposipoa varao iava Krai varaaroo veaopara oara viapau uvuipatai oiso ra vara vieipata, uvare viapau oiso vara iava rekasia vaiiei. <sup>9</sup> Ora vao tapo osa oisore ragai reesireva, ra voeapa Pauto vo vovouaro aviavi piepaa va kosi piepaoro roroiovira rutu. Auere ra va iava oirara rutu vearovira taraipaave oisi vo vovou kovoaro iava, ora rera-ia tapo Pauto. Vao iava osa orekerovu rutu pura rovoreva voari rovoa-ia, uva vao tapo vatau vovou pura rovoreva. <sup>10</sup> ✧ Uva oisi-a eisi osa pie rovoreva voari tuariri. Oa iava voeao reipa irara ensel ora oearovu oea vuvuiua-ia toupaveira tokipaoro rera vo taraiaro eveipaiveira, vo osa rera varaaroo otarairovu rutu kareke piepaiveira voeao lotupa irara ora takuvupaoro kataivira. <sup>11</sup> Oa-a vao-ia oa purareva ro-ia Jisas Krai vigei reraaro Turaro vo rasio iare rera sipooro. Uva va purareva Pauto ora rera raga vo vovouaro sirova utuoro, ovovouva oisoo toupaveve vo osa vo rasio pura asavira touva. <sup>12</sup> ✧ Ari ita, uva uvuipaviei ra ora vigei-ia Jisas tavosipaoro rera oirao piepape. Eva-a oa iava uvuipaviei rutu ra tuuvu vovouvira rutu Pauto iare tutuu piepape rera osireiario iare. <sup>13</sup> Va-a eva vituaro iava ragai oiso visii tavipaavo, Viapau uvuipatai ra ragai vaoro tavaka kekepaoro visii varaaroo visii vovouaro raverave piepata. Ari ita, vuria oupaavo visii tauvapaoro. Eva-a oa vituaro iava uvuipatai ra varaata vovouvira rutu toupata.

### *Vo Toupai Krai Vo Siraoaro Iava*

<sup>14</sup> Oire uva Pauto vo ruipaoro taraipaoro variria purapaavo taku viropaoro Aite oaa iare. <sup>15</sup> Ira ruvara-ia oiraopa vaisi rutu oupapeira vigei ora voeao oea vuvuiua-ia toupaveira. <sup>16</sup> ✧ Ira-a ro-ia Pauto ira arepaavo, oisore ra visiipta tupetupereovira rutu Tugoropato Uraurato vatereve vao iava keraria oa viapau opesia vai, oisore ra rera iavirava visii varaaroo oirao pie vovouaro goru pie iraoreve. <sup>17</sup> Ora vaore tapo variriparai oiso ra Krai visii sopaaro-ia tootooparo, vo rara rera oirao piepata rutu. Uva tupaoro evoa rera vo siraoaro uvuipai ra karekepe. Oa vituaro iava eva uvuipatai ra goruvira toreta oiso osa evaora, oara rasitoo-ia ikoara roko piepaoro goruvira rutu riropavira torepapeira. <sup>18</sup> ✧ Ora oiso variripara ra visii rutu-a vao ora voeao Pauto voeao visiiigoa rutu uvuipatai ra Krai vo vovouaro sirao vovou roroiovira eveipata rutu. Ovovouva oiso rutu toupaveira oiso, vo parakaaro-a vao, ari va kaekaearo-a vao, ari va torearoo-a vao, ora va rokoaro-a vao. <sup>19</sup> ✧ Uva eisi osa ragavira uvuipaoro uvuipatai ra vo sirao uvuaro-ia taraita. Ari oiraopavira rutu uvare viapau oiso irai uvuiparoi ra rera vo siraoaro rekasiaro rutu-ia taraiparo. Uva eisi tupaoro Pauto visii sopaaro-ia uvuipa ra visii vuku piepareve rutu ora rera raga-ia.

<sup>20</sup> Oire uva Pauto ora rera vo goruaro vituaro karekepareveira vigei sopaaro-ia. Eva oa vigei vo areroaro-ia ora vigei vo rugorogooaro-ia pute pievira okovorovu rutu purapaiveira. <sup>21</sup> Uva va-a vao oa iava vuurapa vaisi purapapeira Pautoa-pa. Uvare evara oirao piepareveira rera vo goruroaro ora rera vo siraoaro vo lotua sovara-ia ora vo Krai Jisas tapo-ia. Ari ita, vokiara rutu-ia rera vaisiario kae piepapeira rutu opesi asavira. Eisi ovoiei.

✧ **3:8:** 1 Ti 1:12-15 ✧ **3:10:** 1 Pi 1:12; 1 Ko 2:7 ✧ **3:12:** Hi 4:16 ✧ **3:16:** Fl 4:19 ✧ **3:18:** Ef 1:18; Jop 11:8-9 ✧ **3:19:** Kl 2:10; Ef 1:23



## 4

*Vigei-a Vao Kristen Irara Krai Iava Varaua*

<sup>1</sup> ✧ Ragai vo-ia tuukepa kepa-ia toupaaovi, uvare Turaro kovopatoaaro-a ragai. Ragoa oiso goruvira visii tavipaavoi, Pauto visii keerarevoiva, visii-ia uvuia purarevorao, oisore ra vearovira tootoopaoro vo uvui-ia rekasipata. <sup>2</sup> Uva oisi-a eisi osa tupaoro uvuipatai ra gavaurevira rutu toupata vo ora visii raga iava vaisiara vara piepaoro. Ra opeita kasipu vovouro purapata. Ari uvui iraopatai ra visii iava sirao vovou rutu kosi piepata oearovivu tauvapaoro. <sup>3</sup> Vo vovouo rutu pura iraopata oa purapareveira Tugoropato Uraurato visii-ia, oiso ra kataivira rutu tou iraopata. Oire ra oisi vo vovou sovopaoro ora visii-ia gavaurevira rutu tou iraopata. <sup>4</sup> Kataivira rutu tou iraopata oiso osa kataiua varaua. Ora vao tapo uvare kataito-a Uraurato vigei reraoro. Ora oiso osa vaeavira rutu visii ruture keeraroepa Pauto, oisore ra oisi raga ita vaeavira raga orekerovu ruture tuepata varao oupasa rera vaoro iava keraria. <sup>5</sup> ✧ Uvare kataitoa raga vigei reraoro Turaro. Ra rera-ia kataia raga oirao pie vovou purapape. Ora vao tapo kataia rutu baptaisa oa-ia uvuipaviei ra ora reesipavio va oupaoro. <sup>6</sup> Ari ita, uvare kataitoa rutu-a Pauto ira oiso toupareveira, Oirara rutu Aitearo. Rera raga reipareveira vigei rutupa. Ira rera vo goruaro vigeipa katakataivira vatepareveira, oisore ra rera vo kovoaro purapape. Ora oiso tapo osa katakataivira vigei iava sopaura-ia toupareveira.

<sup>7</sup> Vigei rutu vao-ia vigoa voari tuariri pisavira rutu vatevatea ouepa Krai ruvara-ia, vo osa vigei rutupa katakataivira vara vatereva ora rera vo ruipaoro sirova. <sup>8</sup> ✧ Vo Tugoropa Vuku-ia oiso purapapeira, 'Vo osa tuukepa irara tapo iparoepa viara-ia ruture, oa iava vatevateara voeapa vatereva oirara.'

<sup>9</sup> Oire uva aa vao-a vao vo reo vituaro vao-ia vo osa iparoepa voea tapo? Vao-ia oa vituaro vo osa rasito sovara-ia roko rovoreva. <sup>10</sup> Uva voava toreoro vuvuiua-ia puteoro iparoepa rutu. Oire uva vo rekasio ora rera vo tavukiroaro rutu uvui piereva vara agasi pieoro rutu ora rera-ia. <sup>11</sup> ✧ Ari ita, uvare rera raga ira vara rutu vatevateara vatereva oirara rutupa oiso-ia, oearovu-a voeao oea roporeva aposel kovo purapasa. Ari voeao profet irara oea roporeva, oisore ra rera vo reoaro vatevateiva oirara rutupa. Ari voeao oea roporeva Vearo Siposipo iava siposiposa va uvarovu ruture sikasikaoro, oea vaisipaiveira oiso, evanselis. Ari voea oea roporeva, oisore ra rera vo reoaro iava oirara rutu tarai piepaive voea tauvapaoro, oea vaisipaiveira oiso, pasta irara voea raga ita tisa irara. <sup>12</sup> Oire uva eakere vo vatevatearo vatepareveira voeapa oirara? Oa vituaro-a vao-ia oiso tupaiveira, ra va iava oisi rutu uvuipaoro goruvira rera vo kovoaro purapaive lotupa irara. Ra va iava vigei goruvira rutu torepe, uvare vigei-a vao Krai iava varaua lotuua. <sup>13</sup> Eisi osa iava uvuipaviei vigei rutu, ra katai rugoo raga-ia vao oirao piepa pitupitu ora takuvupavio Pauto Oviitoarore rugooapaoro Krai. Eisi osa iava uvuipaviei ra oiso rutu pura uvirovio kakae vure rirooro vo rekasisa Krai vo uvuiaro-ia. Ra va iava rera iavirava uvuivira rutu toupape Krai. <sup>14</sup> Oire ra voava veu kakaero vo rugooaro kavupe rirooro. Eake iava? Uvare vo kakaero evara vo rugooaro viripaiveira ora tavariopaooro oiso rutu osa kiuvu ira voraro rutu avaparoveira, ora oiso osa toru kouro. Ari ita, uvare vuri irara voeao piro piepaiveira kuuvu reoro vatepaoro voeapa oea veuvira rugorugooapaiveira, oisore ra voea vo vovouroaro

sirova utupaave. <sup>15-16</sup> Ari vigei oearovupa siraopaoro oiraopa reoro rutu-ia uvui iraopaviei ra voea vatepape. Eisi osa iava uvuipaviei ra rirovio vo rekasisa Kraiis vo uvuiaro rutu-ia okovorovu rutu purapaoro. Uva vigei-a Kraiis iava varaua. Oa iava rera-a vigei kukuearo. Ra va iava vigei vao pisa irara ora takuvupavio rutu. Ra va iava rera vo goruaro oupape vao vova Kraiis vo tootoaro goruaro-ia. Oire ra va oupaoro rera tapo favosivira rutu riropavio, vo rara torevokovira rutu rera vaaro purapape. Uva oisi-a eisi osa iava vova varaua uvuipai ra riropape vao-ia lotuuu. Eake iava? Uvare lotuua varaua vituaro rutu vao-ia siraopa vovou.

### *Airepa Tootoo Toupaveira Kraiis Raga-ia*

<sup>17</sup> Oire uva Turaro Kraiis vaisiario-ia goruvira rutu oiso visii tavipaavoii, Opeita ora tou pie ragapata oiso rutu rorovira osa voeao ratau tou irara oea-ia viapau rari vovoua vai toupave. Uva voea vo rugorugoooroaro agasipa-peira rutu aue-ia kokoropa vovouro raga. <sup>18</sup> Uvare voea vo rugorugoooroaro a oara rupavira rutu toupaveira. Viapau oiso voea iava rugorugooara karupa piroveira, oisore ra Pauto vo tootoaro oupave. Uvare oiraopavira rutu riitako vovou irara rutu-a voea voeao-ia vaaru vovou irara. <sup>19</sup> ✨ Ari ita, viapau rutu oiso ora voea vaaro ariia sovopaiveira, vo osa ora voea vo vovouroaro vuriara purapave. Aue iava uvare ora voea iava vaseiva, oiso ra ora voea vo pitupituro raga sirova utupaave orekerovu rutu vuriara purapaoro arii asavira, varao oara-ia ora voea iava varaura agasi piepaiveira touvira rutu.

<sup>20</sup> Opeita evo pitupituro vuriara purapata, uvare viapau oiso vo tarai-a eva oa outavora vo Kraiis ruvara-ia oiso ra vara purapata. <sup>21</sup> Uvare vo osa Kraiis-ia taraiia ou rovatavora, uva viapau oiso vuri pitupituro purapasa vo tarai eva outavora. <sup>22</sup> Oire tuariripa vovouro kavu iraota, rara varao vuri vovouro ora visii iava verata oara iava visii iava varaura oavisii agasipapeira. Varao oara visii keakeapaiveira, oisore ra vuri pitupituro purapata ora visii vo vovouroaro raga sirova utupaoro. <sup>23</sup> Vosa eisi pieoro visii vo rugorugoooroaro tavariota, ra va iava visii iava sopaura airepavira rutu karekepe ora tavariooro. <sup>24</sup> ✨ Vao-ia Airepa Tootoo sisigaruea rutu, oa-ia viapau vuria vaieli. Oa ora visii-ia tovo iraota oiso rutu osa airepa varoa sisigaruea. Pauto ootootoa purareva oiso osa rera vo tootoaro.

<sup>25</sup> ✨ Opeita touvira raga kuuvu reoro purapata. Ari oiraopavira rutu araoko irara oavisiiiva ora reoreopata. Uvare vigei rutu takuvivira toupapeira oiso rutu, Vigei-a kataiua varaua Kraiis iava. <sup>26</sup> Oire vosa kasipupata, ra viapau vava vuria purapata. Ikauvira raga oiso vo vovou opesi pie ovoita. Teapi vo kasipure vokipe, vo osa touvira kasipupata. <sup>27</sup> ✨ Oa vituaro oiso toupai vao-ia, Vosa oisi touvira kasipupata, ra va-ia ora visii iava sopaura iava vasespata, ra Seten visii sopaaro-ia koataparou vuri pitupituro karekepasa. <sup>28</sup> Oire vosa irai oiratoa vai orekerovu avu vai kavirupareve, ira-a eera uvui iraoparoi ra vo pitupitu eva kavu iraoreve. Oa iava uvuiparoi ra rera vaaro voria oureve. Ra va iava oearovivu tauvapareve voeoro apota irararovi. <sup>29</sup> ✨ Opeita vuri reoro kosi piepata ora visii gisipoaro iava. Ari uvuipatai ra vo reoro raga veoro reoro purapata. Ora iava oearovivu uvuipaai ra tauva oupave visii ruvara-ia voeao raverave vovou irara. <sup>30</sup> Ora opeita Pauto reraaro Tugoropato Uraurato vavata piepata orekerovu-ia vuriara oavisii. Eake iava? Uvare vo reesia-a eva oa oirao

piepareveira, oa iava Pauto visii eveireverea voari Ovoioapa Voki rutuia. Vo vokio oa-ia ora rera iare Pauto visii oureverea. <sup>31</sup> Evara rutu vuriara oara ora visii iava vera iraota oiso-ia, kasipua vao-ia, ari apeavea vao-ia, ari oearovu togapa vao-ia kasipu reoro-ia. Ora aue tapo ora vovouaro raga iare kasipupaoro, ari ikaupa vavae viki. <sup>32</sup> Evara ovovouroa tavariopaoro veaopara rutu pura iraopata oiso-ia, oearovivu tauvapata voeaopara siraopaoro, ora voeoro iava vuriara verapata oiso osa Pauto visii iava vuriara oavisii verarevora Kraisi-ia, uvare Kraisi voeaoro-a visii oirara.

## 5

### *Vigei Uvui Iraopavie Ra Voka Iraopape Aviavia-ia*

<sup>1</sup> ✧ Visii rutu-a Pauto ovii iraraviaro. Eva-a oa iava uvuipatai ra rera vo pitupituro vioepaoro oisi pieta, oiso rutu osa ovii kakaero aite irara vo pitupituroaro vioepaoro vara sirova utupaaveira. <sup>2</sup> Ovoivira rutu sirao vukurova toupata vo oearovivupa siraopaoro. Vo osa oisi eisi piepaoro Kraisi vaoro sirova ovoovovira oiso utupata. Uvare vigeipa siraoro ora rera iava vasereva. Oa-ia ora rera-ia tauoa purareva. Oa iava Pauto vo tauo vearovira utuuvaaro geesireva va-ia rorupaoro rutu.

<sup>3</sup> Ra opeita ora visiiva otopa pitupituro purapata, ora varao vuri rugooro, ora opeita oearovu varaaro riiripata vara oupasa ora visiipa. Viapau rutu uvuipatai ra oisi eisi piepata. Ora aue tapo opeita oaravu-ia vuri reoro ora reopata vara purapasa. <sup>4</sup> Ora tapo oiso-ia, opeita ora visiire vuri reoro purapata varao vuivui pa reoro, oreoroa-ia oearovu kovata piepataveira. Viapau. Ari uvuipatai ra Pauto vaarore rugoopaoro rutu rera-ia vuurapa vaisi pura iraopata. <sup>5</sup> Oire vearovira varao-ia tarai iraopata oiso-ia, Ro ira otaporo, ora ro ira vuri rugooro purapave, ora ro ira oearovu varaaro riiripareve, eera-a ira viapau uvuiparoi ra Kraisi vaio ora Pauto vo Saraaro iare koataro rera vo voriaro ousa. [Oa vao riiripa pitupitu porearo oa-ia Pauto tovoparevira utupaua, rara varao raga vo touara vo rasio-ia ira piepareve. Oiso rutu osa ro ira tokarasiara raga oirao piepareveira Pauto tovopaoro rutu utupaua.]

<sup>6</sup> ✧ Ora opeita iravupa ora visii iava vasepata, oiso ra visii keareve visii tavipaoro, “Viapau oavu avu vai. Ari uvuipatai vo pitupituro purapasa.” Oire teapi rera vo reoaro uvuta, uvare oiraopavira rutu evo pitupituro sirova Pauto vo kasipuaoro karekeperea voeaore oea rerava ora kaureopaaveira rutu. <sup>7</sup> ✧ Eva oa vituaro iava visii tavipaa, Opeita voea tapo voea ora tavosipata. <sup>8</sup> Eake iava? Uvare tuaririvi rupa vovou-ia toupatavora. Uva vo vokio-ia visii rutu-a vao Turaro vaoro-ia aviavia toupatavovi. Eva-a oa vituaro iava uvui iraopatai ra oiso rutu tou iraopata osa voeao oirara oea aviavia sovara-ia toupaveira. <sup>9</sup> Vo aviavia oa veoro vovou ora torevoko vovouro rutu kareke piepaiveira. Uva vo vovouro-a evara oara-ia uvuipatai ra vara pura iraota. <sup>10</sup> Vo rara orekerovu rutu akeake iraopaoro vara purapata, ra va iava oaravu ora visii-ia sovopata vara eveipaoro oiso, O, ari Turaro roruparevovi rutu va-ia oa puraiei. <sup>11</sup> Opeita varao orekerovu purapata oara purapaiveira oearovu oara kuearo vurivira karekepapeira. Evara-a oara purapaiveira vo rupa vovou-ia. Ari visii uvuipatai ra evara vuriara oaive viaevira kareke pie iraopata vore aviavia-ia. <sup>12</sup> Vo vovouro vuriara oara ariia kareke piepaiveira, vo rara vara-ia ora reopata varao oara vatauvira purapaiveira. <sup>13</sup> Vosa vara evara vatauv vovouro kosi pie rovopape vore aviavia-ia, ra va iava utupavira oiraopavira rutu vara

vituario karekepape. Aue iava uvare varao oara vatauvira toupaveira oara viaevira karekepere vo osa aviavia vara-ia rorove. <sup>14</sup> ✧ Eva-a oa vituario iava oiso purapai, 'Eraou vii viigoa uusipau. Ora vorevira toreu vii kopiito. Osa iava Kraís vo aviaviaro uvuipai ra vii-ia rorove.'

<sup>15</sup> Ora vatatopo iraopata. Goruvira rutu voka iraota. Teapi koveta. Ra visii vo vokaroaro oiso rutu pie iraota osa voeao varaaro riro tarai irara. Ra opeita oiso piepata osa voeao vaaruu vovou irara. <sup>16</sup> ✧ Teapi visii vo vuutararo ropi ragapata. Ari vokiara rutu-ia vearo kovoro raga purapata, uvare vuriara toupai vo voki-ro-ia. <sup>17</sup> Ra opeita oiso raga toupata osa voeao vaaruu vovou irara. Viapau. Ari vo osa Pauto vo vovouaropa ruipapaoro oisi vo vovou sirova ututa.

<sup>18</sup> ✧ Ora opeita goruara-ia uukoara ukaiopata ora kokoro piepaoro. Viapau. Vosa eisi raga piepaoro uvuipatai ra visii raga ora opesi pieta vai pasi. Ari uvuipatai ra Tugoropato Uraurato iare ora visii iava vaseta. Ra va iava rera iava ovoivira rutu touta. <sup>19</sup> Vo rara ro iavirava Turaro ora visii raga ora reoreopata, vo ora visii raga ora varaata piepaoro vo reo sirovava oa toupai vo Sam ora vo erava-ia uva toupai Tugoropa reoro. Oire vo osa oiso eisi piepaoro ora visii sopaaro-ia Turaro vaisiara kae pie iraopata. <sup>20</sup> Ra vokiara rutu-ia vearo vaisi pura iraopata orekerovu rutu iavirava rera-ia ro Pauto vigei Aitearo, ro vaisiara-ia Turaro vigei reraaro Jisas Kraís.

### *Ora Oupa Pitupitu Iava Vao Oirara Ora Riakora*

<sup>21</sup> Oire visii vao oiso ora piepata, ra oearovivu roaro toupata. Oisi-ia iava eisi uvuipatai ra Kraís vaisiara avivikevira toupata.

<sup>22</sup> Riakora visiigoa vatua irara oavisii roaro toupata voea vo reoroaro uvupaoro. Osa ragavira eisi piepaoro uvuipatai ra Turaro Jisas roaro ora tovopata. <sup>23</sup> ✧ Oiso ragavira osa ro ira vatuaaro tokipareve, eisi osa ragavira Kraís oirara rutu tokipareveira, voeao lotupa irara oea oiso toupaveira, Rera iava vavaeara, ora rera iava kokotoara, ora varaua, uvare voea rutupa oiso toupaveira, Voea Kae Piepatoaro. <sup>24</sup> ✧ Eva vituario iava va vao lotua Kraís vo reoro sirova utupapeira. Oire uva visii riakora uvuipatai ra vatua irara oavisii vo reoroaro sirova vearovira rutu utupata ita.

<sup>25</sup> ✧ Ra visii vatua irara riakora oavisii vearovira rutu sirao iraopata oiso osa Kraís lotupa irarapa sirao iraopaveira. Uvare voeapa siraooro ora rera iava vasereva, oisore ra kopi-ro voeapa. <sup>26</sup> Osa eisi piveira Kraís Pauto iare oirara rokaoro. Uva oisi rutu-a oiso-ia osa ovoovo purareva lotupa irara sisoro aue-ia baptais ora vao Pauto vo reoro Tugoropa Reo.

<sup>27</sup> Uva va vituario-a vao oiso osa uvuiparoi Jisas ra ora rerapa lotupa irara vatepareve, vo rara vuurapavira rutu toupave. Viapau vuuvuara vai voea-ia, ora viapau regorea vai voea-ia. Ari uvuipaai ra rorovira raga toupave, uvare vara asavira oiso voea sisigarue piepareve voea sisupaoro.

<sup>28</sup> Eisi osa ragavira visii vatua irara riakora oavisii sirao vearovira rutu vairovo tokipata. Oisi rutu osa ora visii iava varaurapa siraooro voura vearovira tokipateveira. Uvare oiso toupai, Ro ira vatuaaropa siraooro vearovira, ira ita-a eera ora rera varaaropa siraooro vearovira. <sup>29</sup> Viapau oiso irai ei ira ora irai iava varaua vaire kasipupaveira. Viapau. Ari voua aio piepareveira vearovira voua tokipaoro. Eisi rutu osa Kraís ora rera iava varaua tokipareveira vouao-ia vao-ia lotua. <sup>30</sup> Ari ita, vigei-a vao lotupa

✧ 5:14: Ais 60:1; Jo 5:25 ✧ 5:16: Kl 4:2-6 ✧ 5:18: Pro 23:29-35 ✧ 5:23: 1 Ko 11:3; Kl 1:18

✧ 5:24: Kl 3:18 ✧ 5:25: Kl 3:19

irara vigoa oiso rutu toupapeira, Rera iava vavaeara, ora kokotoara, ora orekerovu rutu varao voua-ia vouao varaua rera vouaaro. <sup>31</sup> ✧ Uva oiso purapapeira Tugoropa Vuku,

‘Ro oirato ira aitetoarei kavuoro avaro, ra voava iriavu riakova oureve, oire ra oisi iava eisi vo rara ora ousi oiso rutu karekesi, Kataiua varaua.’

<sup>32</sup> Uva vo reoa-a vao-ia reia rutu, oa vituaro viaevira kareke piereva Krais. Uva ragaipa oiso va porearo vituaro toupai, Lotupa irara rutu toupai Krais-ia kataiua raga purapaoro varaua rera-ia. <sup>33</sup> Ari vao porearo vituaro visii rutupa oiso toupai-ia, ra ora visii vo riakoroaropa siraopata, oiso rutu osa visii vatua irara ora visiipa siraopataveira. Eva-a oa iava vairo vatua riakoro oavisii uvuipai ra visiipa avivikevira toupave.

## 6

### *Vo Reo Aite Irara Vo Reoro Ora Ovii Irara*

p <sup>1</sup> ✧ Oire kakae vure visii vao uvui iraopatai ra aite irara oavisii vo reoroaro uvupata, uvare Turaro visii tovoreva voea reoroarovi. Osa eisi vearoapeira. <sup>2</sup> Oire avivike iraopata aitearapa ora aakoara. Eva-a rovopa rutu Reo Taisi iava, oa toupaveira aue tapo Reo Ovo. <sup>3</sup> Vao Reo Ovo oa oiso purapapeira, “Vosa eisi ragavira piepata ora visii aite iraraaropa, oire ra va iava vearovira rutu visii iava tootooara riro kaekavira toupave vo rasio-ia.” <sup>4</sup> ✧ Oire vei aitetoarei ora aakova viapau uvuipasiei ra ovii irara oaesi kasipu piepasi, ra va iava oisi piepave. Viapau. Ari oiso-a vo osa voea tokipaoro voeapa vearo raiva purapasi va-ia vearovira rutu voea siposipoaro Turaro vo siposipoaro sirova utupaoro.

### *Kovopa Irara Iava Vo Reo Ora Voea Tokipa Irara*

p <sup>5</sup> ✧ Visii vao-ia akuku kovo irara visiigoa vori asavira kovo ragapataveira, visiigoa ora visii vo kovoaro purapata voeapa avivikepaoro oea visii tokipaveira. Oire vosa oisi eisi kovopata, ra viapau oiso orugoarova purapata voeare. Ari uvuipatai ra voeapa kovo ragapata oiso rutu osa Krais-pa kovo ragapataveira. <sup>6</sup> Oire ra opeita kasiraovira rutu kovopata vo vuutao raga-ia oa-ia visiiva vurapaive voeao oea visii tokipaveira vaore rugoopaoro, ra visiire oiso purapaave, “Akoea, vearo kovoto ro-ia.” Viapau. Ari visii uvuipatai ra vuutara rutu iava vo vokiro-ia visii vo varivariroaro tovopata vo vara-ia kovopaoro Pauto vo ruipaoro sirova. Uva eisi osa ragavira uvuipatai ra eisi varivaripata vo Krais-pa kovopaoro. <sup>7</sup> ✧ Oire ra oisi ora visii vo kovoaro purapata rerare rugorugoopaoro Turaro Krais. Oa iava uvuipatai ra rorupata. Eisi osa viapau uvuipatai oiso ra oirara ragare rugorugoopata voeao oea visii tokipaveira. <sup>8</sup> Eva-a oa vituaro porearo rutu oiso toupai, Vo osa evara uvuiaro voriaro rutu vearopara vaterereva visiipa Turaro Krais varao oara purapata. Eagara, vosa aa ro avuo ro ira akukuvira kovopareve, ira-ia viapau vaisia vai toupave, ora ro ira-ia vaisia toupave tapo, oea rutu vaeavira uvuiaro oisi pierereva.

p <sup>9</sup> ✧ Ora visii vao-ia tokipa irara visiigoa vearo vovou iraopata voeare visii voearo kovopa irara. Opeita voeare reoreopaoro voea uriri piepata. Ari vaore rugoo iraopata, uvare visii tokipato toupaveira vo vuvuiua, ira reoroaro toupaveira visii rutu tokipa irara ora voeao kovopa irara areiivira raga.

### *Oirao Pie Vovou Irara Vaaro Uutupa*

✧ 5:31: Jen 2:23-24; Mt 19:5; 1 Ko 6:16 ✧ 6:1: Eks 20:12 ✧ 6:4: Pro 22:6; Jen 18:19 ✧ 6:5: Kl 3:22; Fl 2:12 ✧ 6:7: Kl 3:23 ✧ 6:9: Ap 10:34-35; Jo 13:13; Kl 3:25

p<sup>10</sup> Oire ovoioipa reo-a vao-ia oa oiso visiipa vatepaavoi, oiso ra goruvira rutu torepata Turaro Kraís vo goruaro-ia. Uva oiso ruipaparai ra rera ruvara-ia vo goru outa rera tapo ora tavosioro rutu. <sup>11</sup> Ra varao-ia ora kuvupata oara visiipa vatepareveira Pauto, oiso ra vara-ia Seten asavira vara-ia ora utopata vao asavira kuvvupa pitupituro rera varaaro. <sup>12</sup> ✱ Uvare viapau oiso oirara raga tapo ora upopavioveira voeao oea-ia varaua toupaveira. Viapau. Ari voeao tapo-a uraura irara tugara oea tapo ora upopavioveira, voeao reipa irara ora turaro irara oea urauravira toupaveira. Voeao oea vuri vovouro purapaiveira rupa vovou-ia tupaaro. Voeao oea vo viara-ia ora vo rasitua-ia tokipaaveira. <sup>13</sup> Uva oisi-a eisi osa toupaveira, uva uvuipatai ra Pauto varaaro ora utopara outa vara-ia ora utosa. Oire vosa vo vokio oa-ia vo vuri eva karekepere, oa vokia-ia goruvira rutu virivaripaoro torepatavere. Viapau oiso ra ora visii iava sopaura iava vasepata. Uva oisi-a raga eisi osa piepaoro uvuipatai ra goruvira torepata vo tugurasa uva taru vo tatu eva opesipe.

p<sup>14</sup> ✱ Oire toreta ora virivaripaoro oiso-ia, Tuu iroro-ia takita vo ora visii kovuaro-ia, eva-a oiraopa reo rutu oa oiso rutu toupai, takipa iro. Ora vo pekerio oa-ia pitupata ora visii iava varataara oavisii utopasa. Opekeria oa oiso toupavoi osa vao torevoko vovou oa-ia viapau vuria vaiiei. <sup>15</sup> Oire ra ora visii-ia tasipara oavisii tapo tovota varao oara oiso toupai, eva-a ikaupa voka oa-ia vokapaoro uvuipatai ra Vearo Sipoipo kosi piepata uvarovu rutu, vao oa gavaure vovou iava tavipai. <sup>16</sup> Vokiara rutu-ia vo pekerio kaepata viurua iare oa oiso toupai, oirao piepa vovou rutu. Oa-ia uvuipatai ra o asavira rauruva iria viriario-ia tuituia toupaveira ora utopata, vo kaeo oa-ia ritaparoveira Seten. <sup>17</sup> ✱ Ora vao tapo kukuvaipa oa ora visii kukuvaro-ia tovota va-ia kukuvaio, oa oiso toupavoi osa Pauto vigei oureva ora rera iare vigei orirusa rutu. Ora vao-ia Pauto vo rearo oriruvira pitupata, vo reo oa vatepareveira visiipa Tugoropato Uraurato. Oreoa oiso toupai osa toorio. <sup>18</sup> ✱ Oire uva oisi rutu piepaoro uvui irapatai ra variripata vo vokiara rutu-ia, ovusa Tugoropato Uraurato vo tauvaario-ia variriara purapata. Eva-a oa vituaro iava tuevira toupata variripasa. Ora vao tapo oiso osa Pauto voeaa raga variripata voea tauvapaoro vo vokiara rutu-ia. <sup>19</sup> Ora ragaipa tapo variripatavere ra va iava Pauto ragaipa oreorovu vatepareve vo osa oirarapa siposipopasa vatatopopaa. Ora vaore tapo ragai goru piepasa variripatavere ra uriri asavira Vearo Sipoipo kosi piepa vo reo poerapaoro voeara oearovu ratau tou irara. <sup>20</sup> Ari ita, oiraopavira uvare reo kaepato-a ragai vao-ia Vearo Sipoipo kosi piepaoro. Ari vo vokio-ia ragai epao vo-ia tuukepa kepa-ia. Ragaipa variripata Pautoa iare ra uriri asavira rutu Vearo Sipoipo kosi piepa, uvare ragai vo kovoaro rutu-a.

### *Pol Vearo Voki Puraveva Oearovuva Oirara*

p<sup>21</sup> ✱ Eera Tikikas vigei araokotoaaro, irapa kavikopavioveira. Vokiara rutu-ia ipei tauvapareveira Turaro vo kovoaro purapaoro. Ira visii siposipoparevere ragai iava, auere ra vearovira taraipata ragai vo touaro iava ora varao iava oara purapaaveira vo tupaoro. <sup>22</sup> Ira-a ro-ia ira visiipa sipopaavoi, oiso ra visiipa siposipapaoro visii vo vovouroaro varaata piepareve ipei iava siposipapaoro.

p<sup>23</sup> ✱ Oire ragai vo ruipaoro-a vao-ia oa-ia oiso ruipaparai ra Pauto ro vigei Aitearo ora Jisas Kraís ro vigei Turaroaro, aiterea evaiterei gavaure vovou vatepasivoi, ora vao sirao vovou, ora vao oirao pie vovou rutu voeao

✱ 6:12: 1 Ko 9:25; Ro 8:38 ✱ 6:14: Ais 11:5, 59:17 ✱ 6:17: Ro 1:15-17 ✱ 6:18: 1 Te 5:17

✱ 6:21: Ap 20:4 ✱ 6:23: 1 Pi 5:14

rutupa igei araoko iraraaro oearoa Jisas-ia raripaaveira. <sup>24</sup> Oire Pauto visii rutu viraakoparevoi, visiigoa ropa Turaro oavi Jisas Krai sirao iraopaoro rerapa ruipa iraopataveira. Vo ruipao iava oa-ia viapau opesia vaiei.  
p Eivivi raga ra opesipe.  
p Ragai-a vao, Pol.

## FILIPAI

### Irapa Reoro Vo Vukuo Iava

Pol vo pasio rigatoreva tuukepa kepa-ia toupaooro eisi Rom aue-ia 61-63 yia Jisas vo kavauaro isivaaro iava. Pol vo vearo vaisi vore pierева vao-ia vatea oa sipoiva Filipai vata, osa vo toupaveva tuukepa kepa-ia. Ora aue iava tapo voea tavireva oiso osa toupaveva vo tuukepa kepa-ia. Ora aue iava tapo goruvira voea tavireva voea vovouaro goru pieoro, ra viapau uvuipaai ra voea gisipoaro uvupaive kuuvu irara tisa irara voeao oea aue iava siposipoaveira rakari verapa pitupitu (Fl 3:2-3, 18-19).

1. Vearo vaisi purareva Pol Pautoa-ia voea-ia rugoopaoro Filipai vata, 1:1-11.
2. Pol ora rera varaaro iava taviroepa tavakara, varao oara iavirava vo raiva karu piropa oa-ia Vearo Siposipo avaepa voraro rutu, 1:12-26.
3. Reesiara iava varao oara iava uvuipaai oearovu ra Kristento eveiive, 1:27-2:18.
4. Timoti vaio ora Epafrodaitas arusa aueroepa Pol lotupa irara vo vovouaro varaata piesa, 2:19-30.
5. Vatatopo pie reoro voeao iava keripa irara Jiu, ora aue iava variri purapa pitupitu, 3:1-4:9.
6. Pol vearo vaisi purareva Filipai vatava aueva vatevatea, 4:10-20.
7. Ovoipa reoro vatereva Pol, 4:21-23.

<sup>1</sup> ✧ Ragai-a vao Pol ora ro Timoti vegoa vo rigato puravevoi visiipa, vegoi-a vao Krai kovopatoareiro. Oa iava visii rutu vo rigato vieipatavere, visii eva lotua-ia irapa irara, ora visii rutu vao visii goa lotua-ia ora tauvapataveira, ora visii oirao pie vovou irara evoa Filipai urui-ia. <sup>2</sup> Oire Pauto visii rutu viraakoreve vereopa vovou-ia. Ari ita, ragai visiipa Pauto arepaavo ro vigei Aitearo, vaiterei ora Turaro Jisas Krai, oisore ra visiipa gavaure vovou vatesi.

#### *Pol Vo Variri Voeare Oea Rera Vo Reoro Vieipaive*

<sup>3</sup> Oire vosa visii ruture rugoopaari, oa iava vearo vaisi purapaavo Pautoa-ia visii iavirava. <sup>4</sup> Ora vo vuutaro-ia tapo oara-ia variripaveira rorupaoro visii-ia. <sup>5</sup> ✧ Aue iava uvare vo vuutarore rugoopaaveira oara-ia ragai tauvapatavora Pauto vo kovoaro purapaoro, vo osa visii ruvara-ia toupaavora Vearo Siposipo iava visiipa siposipoaoro. Oiraopavira uvare voari rutuva rovoa-ia ragai tauvapaoro rovotaepa. Oa iava vo vokie-ia tukurataerao oisi raga ragai tauvapaoro. <sup>6</sup> Pautoa raga-a ira oisi visii pierava, oa iava oisi ragai tauvapataveira. Oiso osa raga ita Pauto vo kovo rovoreva visii-ia vo rutu tukurasa uva Krai Jisas vorevira vorerovere vo rasio iare. Eisi osa ragavira va-ia vearovira taraiparai ragai. <sup>7</sup> Rirovira rutu oisoa ragai tauvapatava, oa iava oisoa ragai vo kovoaro purapaa. Vo kovo oa vatereva Pauto ragaipa vo tuukepa kepa-ia, oiso ra voa va puraa ora vo ratau vo oearovu tavitavipaoro Krai iava, vo osa voa Vearo Siposipo vituaro rutu oisoa kosi piepaa vo voeao vo reoroaro veripaoro asapapa reo pura irara, voeao riro kuuvu reoro raga pura irara. Uva va eva visii vaoro tauvaa oare rugoopaoro vearovira rutu visiire rugorugoo iraopaveira. Eisi osa torevokopai. <sup>8</sup> Ari ita, Pauto ragai vo reoro-ia oiraopavira rutu taraiparo vo osa oiso purapara, Visiipa rirovira rutu sirao iraopaveira Krai Jisas vo siraoaro sirava.

✧ 1:1: Ap 16:11-35    ✧ 1:5: Ap 2:42, 16:12-40



<sup>9</sup> Uva ragai vaaro variria oa purapaavoi visiipa, oiso ra visii vo vovouroaro sirao vovouro rirope rutu, ora visii vo tarairoaro tapo, ora varao torevoko rugorugoooro rutu. <sup>10</sup> ✧ Eisi osa iava uvuipatai ra vearovira rutu rugorugoo rovpata. Ra va iava rugorugooara rutu roviriei rovpaaoro urugoorovu vearovira purapata vara-ia kovopaaoro. Eva-a oa iava viapau oiso irai uvuiparoi ra oreovu avu vai-ia visii togareve. Eisi osa iava uvuipatai ra vearovira raga touta vo vokio-ia tugurasa oa-ia Kraiis vorevira voreroverea. <sup>11</sup> Uva oisi-a eisi osa piepaoro uvuipatai ra torevoko vovouro raga purapaoro oisi raga kareketa, vo vovouro oara visii iava vearovira riro pievererea Jisas Kraiis. Ovovouroa-a evara oara kekepaoro oearovu uvuipaai ra Pautoa-ia vuurapa vaisi purapaive rera vaisiaro kae piepaoro.

### *Ragai-a Vao Ragoa Kraiis Sirova Toupaa*

<sup>12</sup> Uva visii tavipaavoi araoko irara oaa, Varao rutu orekerovu oara oisoa purapaive oearovu vo ragaire, uva evara oara-ia raiva puraiva, oiso ra va iava Vearo Siposipo avape uvarovu ruture. <sup>13</sup> ✧ Oisi-a oiso-ia osa tuukepa kepa-ia ragai tovoiva, oa iava voa tuukepa irara tokipa irara polis irara oisoa voa ragai-ia taraipaave oiso, Kraiis kovopatoaaro-a ro-ia, oa vituaro iava tuukepa kepa-ia toupaveira. <sup>14</sup> Ari oavu-a vao-ia vo osa oisi tuukepavira tupaavora. Uva voa oearovu voeao oirao pie vovou irara oisoa ragai-ia taraipaoro voea vo vovouroaro oirao pie vovouro oisoa goru piepaive rutu Jisas-re rugopaaoro. Eisi osa iava uvuipaai ra oisi uriri asavira rutu Pauto vo rearo kosi piepaive.

<sup>15</sup> Ari ita, oearovu rera iava Kraiis oisoa siposipoive, vo osa rirovira ragaiva ora kaureopaave ragai riiriipaoro. Vo osa oearovu rera iava Kraiis siposipopaive vearo vovou rutu purapaoro. <sup>16</sup> Oire uva voea-a evoea oea oisoa eisi piepaive ragaipa siraopaoro, uvare oiso ragavira oisoa taraipaave, Pauto vo kovo vatereva ragaipa, oiso ra rera vaaro Vearo Siposipo goruvira tore piea, ovusa ojavu va reroaro ragapaive, <sup>17</sup> voeao oea viapau oiso katai vovou-ia Kraiis vaisiaro iava oisoa siposipopaive. Viapau. Ari oiso-a ra ora voea raga vaisiaro kae piepaive, uvare oiso tapo oisoa rugorugooapaave, Vosa Vearo Siposipo iava siposipopape, ra va iava Pol vurira rutu oupareve vo tuukepa kepa-ia. Eisi osa vearovai. <sup>18</sup> Uva voeare oiso puraparai, Eagara. Voeape. Eake iava? Uvare rorupaavoi. Uvare oisi voearei iava Kraiis vaisiaro kosi viropa voeareo oearoa vo rugorei purapaiveira oiso, Voeao oea vuri rugooro purapaiveira, ari voeao oea oiraopa rugoo sirova utupaaveira.

<sup>19</sup> Iu, eisi osa vare-ia vareo taraiparai oiso, Visii varaaro variriara oara purapataveira ragaipa. Ora ro tapo Jisas Kraiis Urauratoaaro vo tauvaaro ragai-ia, oarea vo tauvaaro iava vorevira vearovira tupaavere rara ita. <sup>20</sup> ✧ Ragai vo ruipaoro rutu oiso rutu toupai osa va vao oa oirao piepaavoi rutu. Osa iava eisi viapau uvuiparai ra raveravepaoro vao kavua ragai vo kovoaro. Vo uvare oiso ruipaparai ra vokiara rutu-ia oisi raga oiso touvira rutu toupaa va-ia vao goru vovou. Oa iava uvuiparai ra ora ragai rutu iava Kraiis vaisiaro kae piepaa. Ari ita, osa-a eisi oiso vosa apeisi avu, vosa kopiira, eke apeisi-a vosa tootoora. <sup>21</sup> ✧ Uvare eake rutu-a va vao-ia tootooa? Oa vituaro iava ora ragai ragare oiso puraparai, Ro-ia Kraiis, ragai vaaro rutu tootooa vituaro, vo rara rerapa kovopaa. Ora vosa kopiira, ra va iava vearo tou rutu ouavere. <sup>22</sup> Vosa touvira tupaaverea, oa iava uvuiparai ra rerapa kovopaa tou visivi rutu vo rasio-ia. Oire uva apeisi-a, aa vao-a vao oa ragaipa vearovai, tootooa eke kopiia? Uva oisi-a eisi

osa iava varei-ia avavaiaapaoro rirovira vavagisiparai ora ragai raga. <sup>23</sup> ✧ Uvare oiso ruipaparai rutu ra vo rasio kavura Krai tapo tousa tootooro oiso osa rera. Uvare va-a eva oa oaravu rutu-ia putepaiveira. <sup>24</sup> Ari ragai vo kovoaro reipai rutu visiipa. Oa iava uvuiparai ra touvira tootoopara vo rasio-ia. <sup>25</sup> Eva-a oare rirovira rutu rugorugoo irapaoveira. Uva va-ia taraiparai oiso, O, ari oiso iava uvuiparai ra goruvira rutu toupaa vo rasio-ia visii tauvapaoro, auere ra visii varaaro oirao pie vovouro rirope. Ora oiso ra rorupata Jisas raga oirao piepaoro. <sup>26</sup> Va-a eva vituaro iava ragai tapo rorupatavere utupaua, uvare ragai utorevoiva, visiivire vorevira voreraera. Osa iava vigei rutu Krai Jisas vaisiario kae piepapere.

*Pol Filipai Vata Tavireva Oiso Ra Rera Tapo Tavosivira Toupave Vo Upoa-ia*

<sup>27</sup> Oire uva va-a vao-ia oa visiipa reipai rutu, oiso-ia ra ro oirato vo vovouaro sirova ututa ira goruvira rutu Krai vaisiario oirao piepareveira. Eisi osa iava uvui iraopatai ra apeisi avu pieta, vosa visii tapo toupaa. Eke apeisi avu-a, vosa viapau eisi. Eagara vosa apeisi avu toupatavora visii iava ragaipa taviave oearoi, oiso oisi raga goruvira rutu toupaveira touvira katai vovou raga purapaoro. Uva eisi osa ragavira piepaoro vuri pitupituro upopatavere katai vovou raga sirova utupaoro vao Vearo Siposipo goruvira rutu tore piepaoro. <sup>28</sup> ✧ Opeita voearo asavira uriripata oea visiiva ora keripaaveira. Viapau. Ari goruvira rutu torepatavere. Oa iava visii eveipaive, ra visiire oiso purapaave, “O oiraopavira rutu, uvare uvuipai ra vigei-ia putepaive.” Aue vituaro iava uvare Pauto visii kavikopaoro visii virivirirevere, osa voea-a evoea oea opesi ovoivaveira. <sup>29</sup> ✧ Ari ita, Pauto visii ropaveira, oiso ra Krai-pa kovopata vo raivare-ia oiso-ia, Oraivavu vao-ia rera oirao piepaoro. Ari oraivavu-a vao-ia siraoa riroa tavaka oupaoro vo oearovu-ia, vo rara rera sirova goruvira rutu utupata. <sup>30</sup> Oire uva vigei rutu-a vao ora ragai vigoa rutu va eva vuri pitupitu-ia uvuipavie ra va upopape tavaka kaepaoro. Eisi osa vava oisoa ora upopara voviri tuariri, oiso osa ragaiva oisoa vurapata. Uva vo upo raga-a vao oa touvira purapaavo vo vokiro-ia vao oa iava uvupatavoi.

## 2

*Ora Vigei Iava Sopaura Oavi Gare Piepaoro Uvuipavie Ra Ora Vigei Iava Sopaura Vatepape Oearovivupa Araoko Irara Oavi*

<sup>1</sup> ✧ Oire uva oiso puraparai, E visii iava sopaura uvuipai ra gorua ouve vo Krai-ia? Uva apeisi-a? E rera vo siraoaro sovopataveira oa visii iava sopaura varaata piepaiveira? Ora apeisi-a? E katai rugoo rutu purapataveira Tugoropato tapo Uraurato? Ora apeisi-a? E oearovivupa sirapataveira voearo tokipaoro? <sup>2</sup> Oire uva visii vo rearopa ruipaparai ra oiso purape, Iu. Oara rutu-a evara oara-ia uvuipatai rutu ra ragai roru pie iraopata rutu oiso katai rugoo raga purapaoro vo oearovivu rutupa sirapaoro vao katai vovou raga purapaoro. <sup>3</sup> ✧ Opeita orekerovu ora visii raga-pa purapata, ra vara-ia rei vaisi piepata. Ora opeita vara iava vaguvira reopata ora visii iava. Viapau. Ari visii uvui iraopatai ra ora gare piepata oisivi vo rara oiso rugoopata, Viapau oiso vigei oearoi-ia putepapeira vo orekerovi purapaoro. <sup>4</sup> Ora ra opeita ora visii raga-ia rugorugoopata rutu varao-ia visii varaaro. Viapau. Ari oearovivure rugorugoo iraopata voea tauvapasa.

✧ 1:23: 2 Ko 5:1-10 ✧ 1:28: 2 Te 1:3-12; Ro 8:17 ✧ 1:29: Mt 5:12; Ap 14:22 ✧ 2:1: Ju 20-23  
✧ 2:3: Je 3:14

5 ✨ Oire uva vo rugooro visii vo rugooro ora visii iava ora varao vo oearovure vo rugooro oara rutu uvuipai ra oiso toupai vea oisa Krai vo rugooro vo ora rerere ora oearovure tapo. 6 ✨ Uvare Krai ira oiso rutu toupaveira oisa Pauto. Ari viapau oiso ora rera raga-ia rugooro oiso puraoro, “Ragai rirovira rutu oiso pieavere oisa Aite vo uva toupaveira.” Viapau. 7 ✨ Ari rera raga vo ruipaaro-a oa-ia gorua sovara iava ora keraria ora rera iava vasereva oiso rutu ora pieoro, Kovopatoa raga oearovupa. Ari ita, oiso rutu karekeroepa oirato vo rasio iava rera. 8 Uva rera raga oiso ora gare pieparo. Oa iava oisi raga pieparo vo raivao gaepaoro vokareva uvava vo tuguroepa evao parikou-ia uva rera kopii pieva. 9 Oa iava Pauto vorevira rera tore pieveva rera kae pievira tovosa uvarovu rutu ariaraoro. Oa iava oisi pieparo vao rei vaisi tovoveva rera-ia Krai oearovu rutu vaisiara-ia puteoro. 10-11 ✨ Uva vo vaisi eva rei vaisi ovaisiapa avivikeparo va kae piepaiveva va-ia vuurapa vaisi purapao oearovu rutu voeoro vo viara-ia, ora voeoro rutu vo rasito ivara-ia, ora voeoro rutu vo rasito rooro tou irara. Oeoro rutu-a oea taru vuurapa vaisi purapaveira Pauto-ia Aiteto oiso puraoro, “Oiraopavira rutu uvare rera ro Jisas Krai vigei reraoro rutu Turaro.”

### *Uvuipatai Ra Oiso Rutu Toupata, Visii Aviavia Rasitoa Rutupa*

12 Araoko irara oaa, visii tavipaavo oiso, Vo oisa tuariri visii ruvara-ia tou rovopaavora, uva oisoa veorovira rutu ragai vo reorooro sirova utupata. Uva oisi raga uvuipatai ra ragai vo reoro uvupata vo oisa visii tauavira tupaavo. Oa iava uvuipatai ra ora visii raga kasivarivira rutu kovo iraopata siituevira ropeparo. Ra va-ia vo kovo opesi pie ovoita rara okovoa iava Pauto visii-ia rorurevira rutu. 13 Uvare Pauto visii tauvaveira, oisore ra rera vo ruipaoro sirova utu ruipata. Osa iava uvuipatai ra rera vo ruipaoro sirova utupaoro rera rora piepata.

14 ✨ Oire ra oaravu rutu kovoara purapata kaureo asavira. Ora opeita tapo oearovu tapo kasipu reoro purapata. 15 ✨ Vosa eisi rutu piepata, ra sisigaruevira rutu toupata. Oa iava oisi rutu karekepata, Visii rutu vao-ia Pauto ovii iraraoro rutu oea torevoko vovou rutuva toupaveira. Iu, oisa eisi oisa toupao uvuipatai ra roroiovira rutu tupaoro voeoro tapo vuri irara toupata oea eisi ora piro piepaaveira voea raga. Ra voeapa Veoro Sipoipo iava sipoipata, oiso rutu tupaoro oisa avii koara roropaveira aviavipaoro. 16 ✨ Oire vosa tootopa reo vatepata voeapa, oa iava uvuiparai ra visii-ia rorurevira vo vokio-ia oa-ia vorovere Krai. Eake iava? Uvare oiso vovouraveira, Viapau oiso akukuvira kovo ragaavora visii tauvapaoro.

17 ✨ Uva oiso vovuparai, Oeoro vai ragai upoive ragai revasi pieoro, uvare visii tauvapaaveira. Uva viapau oiso taraiparai vao-ia oa ragai-ia karekeperea. Eagara, uvuiparai ra visii tapo toupaveira rorupaa. 18 Oire uva oisi-ia eisi oisa raga toupata roruvira ragai rora pieparo vo vovou raga-ia vao-ia varaata vovou.

### *Vo Toupai Timoti Vo Reoro*

19 Vosa Turaro Jisas vo ruipaaro-a, oa iava oiso vovuparai ra visii iare Timoti arua. Ra va iava vorevira visii iava ragaipa tavitavisa vorero rara. Ra oisi iava visii-ia rora iraopaa. 20 Ro raga ira katai rugoo rutu purapaveira igei tapo tupaoro vo visii-ia rugorugopaoro rutu. 21 Vo oisa oearovu ora voea raga varaoro rugorugopaave vare vao Jisas Krai

✨ 2:5: Ro 15:1-3 ✨ 2:6: Jo 1:1 ✨ 2:7: Sam 8:1-9 ✨ 2:10-11: Ais 45:22-23 ✨ 2:14: 1 Ko 10:10; Mt 5:15-16 ✨ 2:15: Ef 5:1 ✨ 2:16: 2 Ko 1:14; 1 Te 2:19 ✨ 2:17: 2 Ti 4:6-8

vo kovoaro ovaupaoro. <sup>22</sup> ✧ Ari ita, taraipataveira rera-ia ro Timoti, oiso ragavira osa rera vo kovoaro kekepatavorao vo osa kovoparevora. Oiraopavira uvare oiso rutu toupaveira, Rera ro-ia Timoti ragai ovitoaro rutu, uvare tavosivira rutu kovopaveira Kraiss vo kovoaro iava siposipopaoro. <sup>23</sup> Uva visii iare rera aruavere rara tou visivi, vo rara varao iava taraia ou rovoa oara puraivere ragai-ia, vo osa vo toupaa tuukepa kepa-ia. <sup>24</sup> ✧ Turaro raga-ia rariparai, oa iava uvuiaparai ra urioravere tou visivi visii tauvasa.

### *Epafrodaitas Iava Vo Reo*

<sup>25</sup> Oire va-a vao osa rirovira rutu ora rugorugoo pieraera. Oa iava ro vigei araokotoaaro Epafrodaitas arupaavoii visii iare, ira arutava ragai iare. Oa iava ragai tauvpasa urioroepa. Uva rera iava oiso visii tavipaavoii, Ira vearovira rutu kovorevora vuri pitupiturova ora upopaoro rutu. <sup>26</sup> Uva ruipa iraoparoi oiso ra vorevira visii kekesa vorero. Ari ita, viapau oiso vearovira toupaveoi, uvare visii ruvara iava oreorovu uvurevora ora rera iava oreoa oiso purapaera, “Vurivira rutu upiaparoi.” Osa viapau oiso upia vai epao rera-ia. <sup>27</sup> Ari oiraopavira, rirovira rutu upiaparoeira, oa iava kopii ragaroera. Uva Pautoa raga rerapa siraoro rutu rera vearovira tokirevora. Oa iava ita ragai tapopa siraoroera Pauto oiso auepaoro, Teapi rerapa Epafrodaitas siraopaoro ragai iava sopaua vavatape rutu. Oire uva varaatavira raga oisoa toupaa. <sup>28</sup> Iu. Osa oiso ruipa iraoparai rutu oiso ra visii iare rera arua. Ra va iava rera kekeoro rera-ia rirovira rutu roruta. Eisi osa iava uvuiapai ra ragai vo vavataaro opesipe. <sup>29</sup> ✧ Ra va iava rera tapo sekanta vo rera-ia rorupaoro, vo rara pouro viro visii iare rera ro-ia visii araokotoaaro Kraiss vaiisaro sovara-ia. Uva uvui iraopatai ra oearovu tapo avivikepata voeao oea oiso rutu toupaveira osa rera ro-ia Epafrodaitas. <sup>30</sup> Uvare ora piroroepa rutu topogovira, oiso ra Kraiss vo kovoaro purareve. Oa iava vo kovo purapaoro tutuu pie ragaepa oiso ra kopiuro. Oire uva oisi-a eisi osa piepaoro oisoa ragai tauvareve vo visii iavirava kovopaoro, uvare ragaipa tauavira rutu toupaveira.

## 3

### *Ro Iava Oirato Ira Kraiss Oirao Piepareve Rutu, Eera Torevokoto*

<sup>1</sup> Oire oiso vo rigato opesi piepaoro oiso visii tavipaavoii, Rorupata rutu aue-ia Turaro, vo rera rerere rugoopata rutu rera vaiisaro raga-ia toupaaoro. Uva aia ita oiso vorerivira visii tavipaavoii oiso osa voari tuariri visii taviava vara iava varao oara reipapeira rutu visiipa.

<sup>2</sup> ✧ Vearovira rutu ora vatatopo iraopata voeaoa oirara oea oiso toupaveira, Kaakau kare oea vuriara purapaveira. Uvare oiso purapaaveira, “Ora rooropata ora visii iava rakari verapaoro ora reesipaoro.”

<sup>3</sup> Ari ita, vo reesieii vo vigei-ia oiraopa. Oa vituaro rutu porearo oiso toupaveira, Vo uvare Tugoropato Uraurato Pauto reraaro vigei tauvareveira orugoorovu vatepaoro auere lotu purapasa. Ora vo osa Jisas Kraiss vaiisaro kae piepapeira vo rara rera-ia toupape. Ora oiso tapo uvare viapau oiso ora vigei raga-ia rugoopaviovera varao raga-ia raripaoro oara purapapeira vigei raga vo ruiparoaro sirova utupaoro. <sup>4</sup> ✧ Oire uva irai vaiei pasi ira vai-a uvuiaparoi ra oisi oiso-ia puraro, “Ragai kovoara rutu gogotoavora vara rutu opesi pieoro. Oa iava uvuiaparai ra Pauto vo Saraaro iare koatara.” Oire vosa iraiieri ra eisi puraro osa eera, oire uva ragai

✧ 2:22: 1 Ko 4:17; 1 Ti 1:2 ✧ 2:24: Fl 1:25 ✧ 2:29: 1 Ko 16:18; 1 Ti 5:17 ✧ 3:2: Ais 56:9-12

✧ 3:4: 2 Ko 11:16-33

raga-a vao-ia ragoa-a eera oearovu rutu-ia putepaa. <sup>5</sup> Vao vituaro uvare Jiu-ia kavauraepa, oa iava ragai-a Bensamin vo saraaro iava. Uva kataiva rutuva revasiva toupaaivoi voeao tapo oiraopa Hibru vova Jiu. Uva vo uva kavauraiava, erao vatara (7) voki ro isivaaro iava ragai iava rakari veraepa. Oire uva voava riro raiva, Farisi vaisi-ia toupaaiva vao Jiu vaaro Reo Taisi sirova utupaoro goruvira rutu. <sup>6</sup> ✧ Oa iava oisoa tupaoro Jiu-pa irara vo pitupituroaropa ruipa iraopara, oiso ra va iava voeoro vuri piepaa oea oisoa Jisas vo kovoaro purapaive. Oiraopavira rutu uvare reo uvutoa rutu-a ragai torevokovira. Oa-ia oisoa Reo Taisi-ia kasivarivira rutu utupara. Uva viapau oiso oavi va iava vao Reo Taisi oisoa kavupaa oaire ovaupaoro. <sup>7</sup> Oire evara rutu vieiavo oara iava uvuiparai ra ora ragai raga vaisiara kae piepaa vara iava. Uva varare vovou eakavira oiso puraparai, Varape evara akukuara raga. Aue vituaro iava uvare vo voki Jisas Krai raga oira piepaavo rutu. <sup>8</sup> Ari ita, oara rutu-a evara oarare oiso puraparai vovou eakavira, Oara rutupe evara akukupapara raga. Uvare kataia raga-a vao oa raga-ia taraiparai oa orekerovu rutu-ia vara evara putepaiveira, vao-ia ro-ia Jisas Krai ragai reraaro Turaro. Eake iava? Uvare orekerovu rutu oiso tupaivoi osa kaieara. Oara rutu viki ovoipaavo rera raga-ia Krai goruvira rutu pituoro. <sup>9</sup> Uva varao torevoko vovouro sirova utuparaera vo Reo Taisi rutu purapaoro oiraopavira. Uva vara rutu evara akukupapara raga oara-ia viapau oiso oavu avu vaii. Uva vo voki-ia rera vaisiara-ia tupaoro uvuiparai ra torevoko vovou rutu pura iraopaa vo Krai vo goruaro raga-ia, vao oa vituaro oiso tupaivoi, ra Krai oira pie iraopaa. Uvare Pautoa raga torevoko vovouro rutu karekereva. Oa iava oiso vara eveipareveira ragai vaaro oira piea kekepaoro. <sup>10</sup> ✧ Uva orekerovu rutu kavuoro katai vovou raga rutu sirova utuparai ro-ia Krai taraipasa. Ora vao goruvira rutu tupaiva vo rera vo goruaro-ia, ogorua iava vovovira toreroepa rera vaaro iava kopii. Ora tapo ra rera vo sitokaaro kaea vao oa vateiva rerapa oearovu. Ora tapo osa oiso ruipaparai ra oiso piepaa osa Krai osa varaua vo ruipaa oisoa kopii piepareve. <sup>11</sup> ✧ Oire uva va-a eva osa iava Pautoa-ia rariparai oiso, Ragai tapo vovovira torevovira Airepa Tootoo ousa.

### *Pol Ikaureva Vo Rekasisa Ovoipa-ia Reesia*

<sup>12</sup> ✧ Viapau oiso oearoi tavitavipaaveira vao iava oiso, Ragaie vo-ia ovoipa-ia reesia vo uva viapau vuria vai tupaiveira, uvare vearo vovou raga purapaaveira. Asi viapau. Eake iava? Uvare tovira rutu akeake rovopaaveira rutu oisi rutu eisi tousa. Eisi osa iava oiso rutu uvuiparai ra oiso toua osa Krai vo ruipaa tupaiveira ragaipa. Uvare Krai Jisas raiva purareva oraiva iava uvuiparai ra vao vo poua viro ovoipa-ia reesia. <sup>13</sup> ✧ Oiraopavira rutu araoko irara oaa, viapau oiso rugoaparai, Ragaie evoa karera viropa. Viapau. Ari goruvira rutu oiso vovouparai ra orekerovu rutu kavuoro evoare topara viro. <sup>14</sup> Uva oisi-a eisi osa ikaupaavo torevokovira oiso vovoupaoro ra vao poua viro vo ovoipa reesi-ia. Oa iava uvuiparai ra vao toua oiso rutu osa Krai vo ruipaa tupaiva ragaipa, oiso ra vao Airepa Tootoo oua. Ari ita, vo toua oa iare Pautoa keeraoepa va vao Krai Jisas vo kovoaro iavirava.

<sup>15</sup> Oire uva uvuipatai ra torevokovira rutu rugoo irapata oiso rutu osa riropa irara. Oa iava uvuipatai ra oiso rutu rugoopaava vare vao osa ragai. Ari vosa oearovu visii iava osivu raga rugoopaava, uva vo rugoo eva oa oisi visiipa kareke pieve Pauto. <sup>16</sup> Ari vao raga-ia oiraopa tarai pie reo rutu goruvira tupaiva oa visii iare pou piropa voari tuariri.

✧ 3:6: Ap 8:1-4 ✧ 3:10: Ef 1:9-23 ✧ 3:11: 1 Ko 15:51-57 ✧ 3:12: 1 Ti 6:12; 1 Ko 13:10

✧ 3:13: Lu 9:62

17 Araoko irara oaa, oiso ruipa iraoparai visiipa ra oiso rutu pie iraopata osa ragai. Uvare va-a eva ovoovoa oa puraiovora visii tapo toupaooro, oisore ra oisi va sirova utupata. Oa iava uvuipatai ra voeao reesipata oea va sirova oiso utupaave. Oa iava visii uvuipatai ita ra oisi vioevira utupata. 18 Ari ita, viapau oiso katai reo vai va iava vao visiipa vateava voari tuariri. Easi riro reoro rutu-a. Uva vorerivira oiso osa ita visiipa vo reo vao vatepaavoi gaupaoro. Uvare riro irara rutu oiso vovoupaai rutu ra oiso toupave osa voeao keripa irara, oearoa Kraiis vo reoarova ora upopaaveira rutu. Vo reo oa evao parikou iava tavitavipapeira. 19 ✧ Oiraopavira uvare voea-a evoea oea opesiaverea vo eto kasi-ia, uvare oiso piepaiveira ora voea vo rugorugoooro raga sirova utupaoro. Uvare ora voea vo ruiparooro raga-a oara rei piepaiveira rutu oiso rutu osa varao tokarasiara voea varaaro, oara vaisiario rei piepaoro vara sirova utupaaveira. Uva vara rutu-a evara vuriara oara-ia uvuipai ra ariia vai ouive ora voea raga-ia, uvare viapau arii vovouro vai voea-ia. Aue iava uvare vara raga purapaoro vagupaaveira varao raga-ia rugorugoooro oara vo rasio-ia toupaveira. 20 Oire uva vigei-a vao Pauto voeao rutu oirara vigoa vo uruiaro rutu vuvuiua-ia toupaveira. Uva tuepavioveira touvira rutu oiso rugorugoooro, Esa pasi touvira vai uriorovere Kae Piepato vigei reraaro vova vuvuiua-ia ro-ia Turaro Jisas Kraiis. 21 ✧ Ari ita, vigei iava varauraro oavi raveravepapeira ovararoa tavarioverea rara Kraiis. Ra va iava oiso raga karekepe osa rera iava varaua oua vo toupaveira sisikorepaoro. Eisi osa pierereva vo rera vo goruaro-ia, vao oa-ia uvuiparoi ra ora rera reoro orekerovu rutu tovoreve varapa reipaoro.

## 4

### *Uva Uvuipai Ra Katai Vovou Purapai, Ra Va Iava Vereo Vovou Rutu Oupaive Voeao Rutu*

1 ✧ Oire uva araoko irara oaa, ragai visii-ia roru iraopaaveira vo osa visiire rugoopa, uvare kasivarivira rutu Kraiis vo pitupituro rutu sirova utupataveira. Oa-a eva oa-ia ragai iava sopau varaata iraopaaveira. Ari ita, uvare oiso ruipa iraoparai ra oisi raga eisi piepata Kraiis sirova goruvira rutu torepaoro.

2 Oire vei-a vao-ia riakorirei Yuodia vaio ora Sintiki veigoa ragai vo reoro vao-ia uvu iraoere oa veipa vatepaavoi, oiso ra ora vei vo vovourooro varao kaureo vovouro eaka iraoere. Uvare Turaro-a ita vei tauvarevere vo osa oisi pieere. 3 Oire uva vii tapo ragai vatetoaaro rutu uvuipaei ra evairei tauvari. Uvare oisoa ragai tauvapai vea rutu ora Klemen vase vo Vearo Sipoipo kosi piepaoro. Oea vaivaisiario vo toupai Pauto vo vukuaro-ia vao Tootoopa oa toupaveira.

4 Oire ra rorupata Turaro vo vovouro rutu sirova utupaoro. Uva vorerivira ita visii tavipaavoi oiso, Roru iraopata!

5 Opeita gete rugorugoooro purapata oearovivure. Ari uvuipatai ra voeavi tauvapata, uvare Turaro vo vokiropa tutuu piepai vao oa-ia taru vorevira vorerovere. 6 ✧ Opeita rirovira rugorugooopata varaore oara-ia uvuiparoi Pauto visii tauvareve, vo rara rerare goruvira rutu variri rovopata. Vosa oisi eisi piepaoro rerare, uvuipatai ra vearo vaisi rutu pura rovopata rera-ia vao iavirava tauvaa rera varaaro visii-ia. 7 Oire vosa oisi-a eisi piepata, oa iava uvuipatai ra gavaure vovou rutu outa vao oa visiipa vatereve

✧ 3:19: 2 Ko 11:15; Ro 16:18 ✧ 3:21: 1 Ko 15:43-53 ✧ 4:1: Dan 12:3; 2 Ti 4:6-8 ✧ 4:6: 1 Te 5:17-18

Pauto. Vao oa viapau uvuipaai kareke piepaive oirara ora voea vo taraiaro-ia. Viapau. Ari Pautoa raga ira uvuiparoveira ra visii soparoaro vuavua piepareve. Ora varao visii vo rugorugooaro tapo, vo rara Kraiis raga-ia rari iraopata.

8 ✨ Oire oiso vo reo opesi pieoro visii tavipaavoi araoko irara oaa. Visii vo rugorugooaro agasi pieta rutu varao raga-ia oiso-ia, oara vearopara kareke piepaiveira ora aue sisigarueara, ora varao oiso oara avivike vovou kareke piepaiveira, ora varao torevokoara. Oara rutu-a oara iava uvuipatai ra Pautoa-ia vuurapa vaisi purapata. 9 Ari ita, visii tapo oisoa ora reopara eva oa-ia visiipa ovoovoa puraava. Ovoovoa sirova utuoro uvuipatai ra vara evara sirova utupata. Osa iava uvuipa Pauto ra visii tapo toupaveve visiipa gavaure vovou rutu vatepaoro.

### *Pol Vearo Vaisi Purareva Filipai Vatava Aueva Vatevatea*

10 Oire uva rorupaavoi rutu Turaro vo pitupituro iavirava, uvare voari tuariri viapau oisoa uvuipata ra visii varaaro kaviko vovouro kareke pieta ragaipa. Ari vo vokio-ia oisi uvuipatai rutu. Uva va-a eva oa-ia rirovira rutu visii-ia roru iraopaavoi, uvare vorerivira aia ragai tauva iraopatavo. 11-12 ✨ ✨ Viapau oiso puraparai ora ragaire, Oaravu avu vaipa apotaparai. Viapau. Ragai taraia ouavora oiso, Vosa orekerovu rutu ragai-ia karekepape, eagara, ragai iava sopaua vearopapeira evapa. Evara rutupa ragoa uvuiparai ra oiso toupaa osa ro oirato apotato. Ora uvuiparai ra riroara rutu-ia pitua. Ragai taraiparai vo pitupituo-ia riropa aio pitupitu ora vao ogoepa pitupitu. Ora vo pitupituo-ia taraiparai riro orekerovu rutu-ia pitupasa, ora vao orekerovu rutupa apotapasa. Ora vo vuutara rutu-ia ora vo uvarovu rutu. Oire uva vara rutu-a varao oara-ia vearo tarai ouavora oara rutu ragaipa vearopai. 13 ✨ Ari ita, uvuiparai ra eisi ragavira toua. Eake iava? Uvare vare oiso torepasa Kraiis rera vo goruaro vatepareveira ragaipa ora vigei rutupa.

14 Uva vearopai rutu vo uvare oisoa vearovira ragai tauvapata vo osa vuria oupaa. 15 Oire visii Filipai-pa irara vao-ia taraipataveira osa Vearo Sipoipo iava siposipo rovoraepa vo Masedonia Provins-ia pute rovopaoro, vo uva visii raga vaoro katai lotu toupaveira vao oa iava oisoa visii rutu ragai tauvapata ragaipa moni vatepaoro, ora vigei rutu oisoa ora tutukopavio oaravu-ia ora vatepaoro. 16 Ora vo osa Tesalonaika-ia oisoa toupaa uva viapau oiso katai vuuta raga-a vao oa-ia ragaipa tauvaa oisoa sipopata. Ari vorevoreripavira-a. 17 Uva oiso visii tavipaavoi, Viapau oiso orekevu avu vai rutu ou ruipaparai visii ruvara-ia. Viapau. Ari vao keke ruipaparai voari utupauavi vo uva visii vo tauvaroaro evara voriaro taru outaverea veoropara. 18 Ari ita, uvuivira rutu oisoa ragaipa orekerovu rutu vatepata. Ovuuta vao-ia oa-ia uvuivira orekerovuva toupavoi vova visii ruvara-ia varao oara sipotavora ragaipa, oarava urioroepa Epafrodaitas. Evara-a oara oiso rutu toupaveira, Vearo riipua tauoa oa riipuaru vupapaoro Pauto rorupareveira rutu visii-ia. 19 ✨ Ari ita, uva rera raga-a Pauto ira visiipa oisi uvuivira oaravu vatevere vara iava rera varaoro oara vo toupaveira rera voaro. Oara-a evara vituaro purareva vao-ia Kraiis vo kovoaro vigeipa. 20 Uva eisi osa iava vokiara rutu-ia vuurapa vaisi purapapeira rera-ia eera Pauto vigei Aitearo opesi asavira. Ovoiei.

### *Ovoioa Reoro Vateveva Pol*

21 Vearo voki rutu vaisipaavoi oirara rutuva voeao oea Kraiis Jisas vaisiario sovara-ia toupaveira. Voeao-ia vigei rutu araoko iraraoro oea ragai tapo

✨ 4:8: 1 Ko 13:4-8; 1 Pi 2:12; 1 Te 5:22 ✨ 4:11-12: 1 Ti 6:6 ✨ 4:11-12: 1 Ko 4:11; 2 Ko 11:9

✨ 4:13: Jo 15:5; 2 Ko 12:9 ✨ 4:19: Sam 23:1

toupaoro visiipa vo reo sipopaivoi oisi raga ita eisi oiso purapaoro, “Vearo voki rutu visii-ia.” <sup>22</sup> Ari ita, voea rutu voeao-ia Pauto voeaaro oea vo toupaveira oea rutu eisi purapaai oiso, “Vearo voki.” Ora voeao tapo oirao pie vovou irara oea reito Sisa vo kepaaro-ia kovopaiveira oea tapo oisi raga ita eisi visiire purapaai oiso, “Vearo voki visii-ia.”

<sup>23</sup> Ro vigei reraaro Turaro Jisas Krai ira uvuipa ra visii rutu viraakoro visiipa vereopa vovou vatereve visii tauvapaoro. Eva-a oare oiso visiipa variriparai rerare.

Eisivi raga, ra opesipe.

Ragai-a vao, Pol.



## KOLOSI

### Irapa Reoro Vo Vukuo Iava

Pol vo pasio rigatoreva eisi toupaooro tuukepa kepa-ia Rom aue-ia 61-63 yia Jisas vo kavauaro isivaaro iava. Uva vo Pol Kolosi vatapa rigatoreva voea tavioro, uvare Vearo Sipoipo vatakoiva varao tapo Jiu vo pitupituroaro, ora varao oirao pie asa vovou irara vo pitupituroaro. Oiso voea tavireva uvare oearovu raga lotupa irara oisoa vuurapa vaisi purapaive enselpa irarapa. Ora oiso oisoa siposipopaive, Krais-a oiratoa raga, uvare viapau Pautoa iava rera. Oa iava Pol goruvira voea tavireva Krais iava oiso, Pauto ruvara iava ira ro urioroepa oiravira toupasa vo rasio-ia (Kl 2:9-10).

1. Aviavi pie reoro Pol varaaro, ora vearo vaisi Pautoa-ia, 1:1-14.
2. Krais iava ora rera vo kovoaro, ro ira uvuiparoi rutu oirara oisi piesa ra torevoko vaisi ouive vo Pauto ruvara-ia, 1:15-3:4.
3. Oirara uvuipaai ra Tootoo Ovoi ouive Krais-ia vo rara rasito vo pitupituroaro kopii pie rovoive vara kavu ovoioro, 3:5-4:6.
4. Pol vearo voki rutu purareva voea rutuva Kolosi vata, 4:7-18.

<sup>1-2</sup> Vo pasio rigatoavoi ragai Pol visiipa araoko irara oave, visiigoa Kolosi urui-ia toupataveira Pauto voeaaro. Visiigoa goruvira rutu toupataveira Krais-ia raripaoro rutu. Ragoa roporeva Pauto, oisore ra oiso toupaa, Ragai-a Krais Jisas reraaro aposelto. Uva vegei rutu-a vao-ia vo rigato puraveivoi ora Timoti vigei araokotoaaro visiipa. Uva variriparai Pautoa iare vigei Aitearo, oisore ra visii vatereve tauvaa ora gavaure vovou.

#### *Pol Vearo Vaisi Purareva Pautoa-ia Rera Vaaro-ia Variria*

<sup>3</sup> Vo osa variripaveiei visiipa tauvare akepaoro uva vokiara rutu-ia vearo vaisi purapaveira Pautoa-ia ro Turaro Jisas Krais Aitearo. <sup>4</sup> Uvare visii iava uvupaveira visiigoa Krais Jisas oirao piepataveira rutu. Ora vao tapo iava osa Pauto voeaaropa siraopataveira rutu. <sup>5</sup> Ari ita, oisi-a eisi osa piepataveira uvare vaore oiraopa Vearo Sipoipo rugoopataveira oa iava voari tuariri visii taviiova oiso, Pauto orekerovu rutu vearopara tovoreva vuvuiua-ia visiipa oara taru oupataverea utupaua. <sup>6</sup> ✧ Va vao Vearo Sipoipo oa ripoaoro uvarovu ruture va kuearova ora sikasikapaveira voraro ruture vo rasio-ia, oiso rutu osa voari rovoa-ia ita visii vuruvuruaro-ia ora sikasikaepa, vo vokio rutu isivaaro iava oa-ia Pauto vo siraoaro-ia roroiovira taraia ou rovtava. Vo sirao akuku vatevatea rera vaaro oa vate ragapareveira Pauto. <sup>7</sup> ✧ Uva vo taraia-a vao oa vatereva visiipa ro-ia Epafas, ro ira oisoa vegei tapo kovopareve goruvira rutu, uvare iravua-ia rera Krais reraaro. Ira oisoa kaviko iraopave. <sup>8</sup> ✧ Ira vegei tavireva visii iava oiso, Pauto reraaro Tugoropato Uraurato visiipa oearovupa siraopa vovou vatereva.

#### *Pol Variriroepa Pautoa Iare, Oiso Ra Kolosi Vata Goru Piereve*

<sup>9</sup> Uva eisi osa iava visii iava uvuoro vo vokia eva variria rovoveva visiipa. Oa iava oisi raga piepaoro vo vokio tuguraveiei. Ari ita, variripaveira Pautoa iare oiso ra rera vo vovouaro viaevira rutu karekepe visii-ia. Ra va iava vearovira taraipata vo osa Tugoropato Uraurato visiipa vara aviavi piepareve. <sup>10</sup> ✧ Ra oisi va-ia roroiovira taraipaoro vearovira Turaro vo pitupituroaro ora rera vo vovouaro sirova utupata. Ra va-ia rera roru piepata rutu ora visii-ia. Ora vosa oearovu-ia vearo kovo purapata. Uva va-a

eva oa-ia kuea kareke piepata, ra oiso pieve, Visii-ia Pautoa iava vo tarai oa kovapai. <sup>11</sup> ✧ Uva variripaoro Pauto arepaveaira oiso ra visii goru piepareve. Ra va iava Pauto vo kerariaro vo goruaro oupata vo goruo oa toupaveira visii goru piepasa. Oa iava viapau uvuipatai ra Pautoa-pa tauaita, vo rara otavakavu visii-ia pou piro. <sup>12</sup> Viapau. Ari touvira rutu vigei Aitearo-ia Pauto vuurapa vaisi pura iraopata rorupaoro rutu, uvare Pauto oisire visii oisi uvuireva rutu, oiso ra vara outa oara Pauto ruvaria-ia toupaveira vore utupa vokia tuepaoro, oara ravaavira toupaveira voeaopa oea aviavi vovou rutu-ia vao rera vaoro vokapaveira. <sup>13</sup> Ari ita, rupa iava Pauto vigei vovevira oureva vigei orirusa rera vo Saraaro sovararia ro Oviito ira kaviko iraopareveira. <sup>14</sup> ✧ Ro Jisas ira vigei karureva vovevira vova vuri pitupitu vo tuukearo vigei iava vuri vovouro verapaoro.

*Vo Toupai Krai Vo Pitupituaru Iava Ora Rera Vaoro Kovoa*

<sup>15</sup> ✧ Viapau oiso irai Pauto kekepareveira. Ari ro raga Krai, ira raga oisi rutu oiso toupaveira osa Pauto. Oa iava rera vuurapaoro uvuipaviei ra va iava Pauto kekepape rera-ia. Ari ita, Pauto orekerovu rutu pura rovoreva. Uva Krai raga orekerovu rutupa rovopatoa rutu, uvare vara rutu-ia putepareveira rera ro avaioto Pauto Oviitoaro. <sup>16</sup> Uvare rera iavirava Pauto pute pievira orekerovu rutu purareva oiso-ia, oaravu-a varao oara vuvuiua-ia toupaveira, ari varao oara vo rasioa-ia toupaveira, ora evara oara iava oaravu kekepapeira, ovusa vara iava oaravu viapau kekepape, varao oara vatauvira toupaveira. Oire uva va vao osa oevu tapo pura rovoreva reipa irara voeao uraura irara enselpa irara oea reipaaveira voeaopa oea vuvuiua-ia toupaveira. Vara rutu evara purapaveira Pauto Oviitoaro iavirava, oiso ra rerapa varape Oviito. <sup>17</sup> ✧ Ari ita, voari rovia-ia viapau orekerovu avu vai touva ovuuta-a eva oa-ia Krai raga kataito toureva. Uva rera raga iare orekerovu rutu ora vara vo tavukiroaro iare purareva voraro. Uva touvira vara evara toupaveira rera vo goruaro-ia. <sup>18</sup> Oire uva Krai-a lotua iava kukue, ovusa lotu-a varaua. Uvare vigei raga vigoa tokipareveira vigeipa oiraopa rutu Tootoo Ovoi vatepaoro. Rera-a Krai avaiotoa rutu ira kopiia iava vovevira tore pierava Aiteto. Eva-a oa vituaru iava rera-a rovopatoa rutu ira orekerovu rutu-ia putepareveira, uvare vigeipa iraoro toreroepa vovevira. <sup>19</sup> ✧ Ari ita, Pauto vo ruipaoro-a oa-ia oisi pierava rera Oviito Krai oiso rutu osa Pauto. <sup>20</sup> ✧ Uva rera raga vo ruipaoro-a vao sirova utuoro rera Oviito roporeva, oisore uva rera iavirava orekerovu rutu varao pauaka touara vovevira ourevere ora rera iare. Oa iava Pauto ora agiagipa pitupitu purareva, vo osa kopiiopepa Oviito evao parikou-ia ora rera iava revasiva petooro vigeipa. Va-a vao oa vituaru iava orekerovu rutu taru ourevere ora rera iare varao oara vuvuiua-ia toupaveira ora vo rasioa-ia.

<sup>21</sup> Ari ita, voari tuariri uva oisoa vuriarare rugoopata, oa iava varao vuri vovouro oisoa purapata. Oara-ia Pautoa-pa oisoa tauaivira toupata rerava keripaoro. <sup>22</sup> Uva vo vokio-ia oiso toupatavoi, Rera vate iraraoro visii. Uvare oisi-a eisi osa visii pierava, vo osa Oviito siporeva oiso ra kopiio oiso rutu osa oirato akukutoavi. Oire uva va-a vao oa purareva, oiso ra rera vo vuraaro iare koatataverea roroiovira raga torevoko vovouvira rutu toupasa rera ruvara-ia, vo osa viapau vuriara vai visii-ia. <sup>23</sup> Oiraopavira rutu osa eisi ragavira va purarevere, vo rara Vearo Sipiipo oirao piepaoro rutu va vituaru-ia goruvira rutu pitupata. Teapi oearovu gisipoaro uvupaoro oirao pie vovouro oavisii iava vasepata. Vo vovouro oara ou rovatava rutu voari

✧ 1:11: Ef 3:16, 4:2 ✧ 1:14: Hi 9:16-28 ✧ 1:15: 2 Ko 4:4; Re 3:14 ✧ 1:17: Hi 2:9-10 ✧ 1:19: Jo 1:16 ✧ 1:20: 2 Ko 5:18-21

vo uva Vearo Siposipo oirao pie rovota va uvupaoro. Ari ita, eva raga ita Vearo Siposipo oa iava ragai raga ita vao-ia Pol oiso siposipopaaveira, uvare oiso rutu toupaveira, Ragai-a kovopato vo reo vao sikasikapaoro uvarovu ruture vo rasio-ia.

### *Pol Ira Kolosi-pa Irara Tauvareva*

<sup>24</sup> Roru iraopaavo i uvare visii tauvapaoro riroa siitoka oupaaveira. Osiitoka vao oa-ia Krai vo siitokaoro uvui piepaavo oiso osa piereva lotupa irara rutu tauvaoro. Uvare vigei raga ita-a vao-ia lotua iava varaura. Oa iava uvuipai ra vo siitokarei rutu ora tavosioro lotua tauvave rutu ora Krai. <sup>25</sup> Uvare ragai tovoreva Pauto visii tauvasa. Oa iava ragai vatereva vo kovo-ia, oiso ra va iava visii tavitavipaa vo reoro rutu iava varao rera vo reoroaro. Oa iava uvuipai ra vearoa rutu karekeperea visii-ia lotupa irara rera voeaaro. <sup>26</sup> \* Ari ita, voari tuariri uva Pauto vo reoaro Krai vo kovoaro iava oreoa oisoa vatauvira rutu toupave. Viapau oisoa irai voa vo reo-ia roroiparo. Uva vo vokie-ia rera vaoro Vearo Siposipo kosi pierevoro, oisore ra va-ia taraiave voeaoro rera voeaaro. <sup>27</sup> Eake iava? Uvare Pauto oiso ruiparoepa ra rera vo reoaro vatau reo voeaoro iare rera voeaoro karekepe ora poeraoro vao riroo goro rutu. Oa peira oirara rutu vaaro. Oa vao porearo oiso toupaveira, Krai-a eera ira tootoovira rutu toupavei visii iava sopaura-ia. Ira-a vao vituaro, oa iava rera vo kerariaro iava vearopara outaverea rara, evara oarare tuepavioveira raripaoro. <sup>28</sup> \* Uva eisi osa iava vegei oearovu rutu oirara tavitavipaveira Krai vaisiario iava. Oa iava oirara rutu vatatogo piepaveira voea siposipopaoro riroa-ia taraiavaore, ra viapau vavagisipaave. Ra va iava rera-ia taraiapaave, oa iava rera vo vuraoro iare koataaverea. Viapau oiso ragavira taraiapaoro-a osa voeaoro veu kakaero. Ari oiso rutu-a osa voeaoro riroa irara vo Krai tapo kataivira toupasa. <sup>29</sup> \* Uva va purapasa riroa rutu kasivaria kovoa purapaaveira. Oa iava Krai vaoro riroa gorua vatepareveira va purapasa, vo goruo oa-ia ragai iava sopaua goro piepareveira rutu.

## 2

### *Oirara Rutu Uvuipai Ra Goruvira Rutu Oirao Piepaive Kuuvu Reorore Isivapaoro*

<sup>1</sup> Oire uva oiso ruipaparai ra vao-ia vearovira rutu tarai iraopata, osa ragavira kovoava visiipa kasivarivira rutu, ora voeaopa tapo Leodisia tou irara, ora oavupa tapo voeaoro oea viapau oiso ragai iava oisoa puava kekepaive. <sup>2</sup> \* Uva oiso osa ragavira kovopaoro rirovira rutu voeare rugorugoo iraoparai, auere ra voea iava sopaura oaive goruvira rutu torepe. Ra va iava ora voea iava voeapora siraopa vovou tapo purapaive katai vovou raga-ia, vo rera vearovira rutu roroiovira Pautoa-ia taraiapaave. Oa iava uvuipai ra vakuvaku rugoorore isivapaave. Osa iava uvuipai ra Pauto vo reoaro-ia vatau reo taraiapaave vo reo oa Krai raga iava toupaveira. <sup>3</sup> \* Va vituaro iava uvare rera raga Krai ira ruvara-ia taraiara rutu toupaveira. Ira raga uvuiparoi ra oiraopa rugooro rutu kosi piepareve vara vatepaoro.

<sup>4</sup> Eisi osa iava oiso visii tavipaavo, Opeita iravupa ora visii iava vasepata ro ira uvuiparoi ra kuuvu rugooro iare visii piro piereve. Viapau rutu oiso ra rera vo reoaro uvupata. <sup>5</sup> \* Ari ita, ragai visiipa tauavira toupavo. Uva oisi-a oiso osa toupaooro visiire touvira rugooparai. Vo uvare torevokovira

\* 1:26: Ef 3:3-4 \* 1:28: Kl 3:16; 1 Ko 2:6-7 \* 1:29: 1 Ko 15:10; Ef 1:19 \* 2:2: Fl 3:8  
\* 2:3: Ais 45:3; Ro 11:33 \* 2:5: 1 Te 2:17; 1 Pi 5:7-9

rutu visii vo touaro-ia toupaooro, oisi torevokovira Kraís oirao piepataveira goruvira rutu. O pitupitu-a eva visii vaaro oa-ia rirovira rutu visii-ia rorupaaveira vokiara rutu-ia.

*Vigei Rutu Uvuipaviei Ra Kraís Tapo Ora Tavosipavio, Oa Iava Uvuipaviei Ra Oiraopa Tootoo Oupe*

6 ✨ Ari ita, visii rutu oiso purataepa, “Kraís-a vigei rutu Turaroaro.” Uva va-a eva osa rerava oisi pietavoiva, uvui iraopatai ra ora tavosivira rutu rera tapo toupata. 7 Eisi rutu toupaooro uvuipatai ra oiso toupata ikoto. Ro ikoto ira oisiri rutu rokopaveira rasitoo-ia avekeara-ia pitupasa. Oire uva oisi-a eisi osa eera ikoto osa ragavira ita visii Kraís-ia pitupataveira, eera ira oiso toupaveira osa rasitoo ora aveke. Osa iava uvuipatai ra kovapata riropaoro rera-ia gorua oupaoro. Oa iava uvuipatai ra igei vo siposiporoaro sirova utupaoro visii vo vovouaro oirao pie vovouoro goruvira rutu karekepe. Osa iava uvuipatai ra oisi toupaooro vuurapa vaisi purapata Pautoa-ia vo vokiara rutu-ia.

8 ✨ Oire ora vatatopo iraopata vaopa, teapi irai visii-ia kokararo visii ivuoro kuvu reo vai uvusa vuria vai. Vo reoro oara ora voea raga vo rugorugoroaro iava karekepaiveira, oara ouiva vova avu iraraoro voeao vo rasio-ia. Viapau oiso vo vara ouiva Kraís ruvara-ia.

9 Oa-a vao porearo oiso toupai, uvare Kraís iavirava Pauto vo vovouaro vituaro karekepareveira viaevira rutu oiravira toupaooro. 10 Ra va iava rerava ora tavosipaoro Kraís ovoievira rutu Oiraopa Tootoo rutu oupata. Rera rera raga-a ira reipa irara rutupa reiparoveira. Rera raga-a ira turaro irara rutupa turaroparoveira. 11 Uva va-a vao osa rera tapo ora tavositaiva, ora visii iava rakari verataepa. Ari ita, viapau oiso rera vo reesiara rakariua-ia toupaveira oa verapaiveira oirara. Viapau. Asi voo sopiaura oavisii rutu sovara-ia. Uvare rera raga Kraís ira vuri vovou vo goruaro tokoreva vao oa oisoa sovara-ia toupata. Oa iava viaevira rutu toupataavorao varaua raga vaaro vuria kavuoro. 12 Ari ita, oirara visii-ia baptaisa puraiva vao oa iava oiso rutu toupatavoivi visii ita, Kraís tapo kopiitaepa. Oa iava rera tapo tova-ia rokotava. Oa iava vorevira rera tapo ita toretaepa. Vao iava osa Pauto vo goruaro rutu oisoa oirao pie iraopata, vo goruo oa iava Kraís vorevira torevira rikui iava. 13 Ari ita, kopiivira rutu oisoa toupata voari tuariri, uvare vuri vovou oisoa purapata. Uvare ratau tou irara visii, vo rara viapau Reo Taisi-ia taraipata vao Pauto vaoro. Uva vo voki-ia Kraís raga-ia visii torevira. Oa-a eva vituaro iava Airepa Tootoo rutu vaterevira Pauto vigeipa vuriara veraoro vigei sopiaoro iava. 14 ✨ Ora vao tapo osa rera raga Pauto varaaro reo goruro oara oisoa gasipata, varao-ia oara oisoa oiso purapape, “Opeita vao purapata.” Eva-a oa vituaro iava oreorovu toupai Reo Taisi-ia oa oiso purapai, “Vuri pitupituro rutu purapataveira visii.” Uva Pauto evo reoro rutu veraveira vo osa Kraís kopiiopea evao parikou-ia. Uvare Kraís-a ro ira vigei vaaro oureva varao vuriara oavi vo voriaro ouoro. 15 Uva va-a vao osa Kraís evao parikou-ia kopiiooro Seten vo goruaro-ia putereva ora voeao pau tugara irara. Osa iava viapau oiso oai rera-ia putepaveira. Viapau. Ari evoea rutu tovoreva ora rera kokotoaro reoro. Oa-ia voeao vituaro vase arii pieraveira rutu vo oirara rutu osireiara-ia.

16 ✨ Uva oisi-a eisi osa iava viapau uvuipatai ra ro reoaro uvupata ira visii togapareve varao iava visii varaaro aioara, ora uukoara, ora vo voki-ia ovokiroa reesipataveira ora visii-ia oiso, tugoropa voki-a vao, ora

vo aio airepatoa iava kekira, ora vao Sabat voki. <sup>17</sup> Evara reo goruro oara vurapaoro Pauto vo kovoaro oisoa kekepaive urauravira okovoa touvira purapareve. Oire eva isivaaro iava Kraiis urioroepa ro Oiraopatoa rutu, ro ira-ia Pauto vo kovoaro oiraopavira rutu roorio pierevora. <sup>18</sup> Oire opeita oearovu vo reoroaro uru piepata, vo osa visiire oiso purapaave, “Vuri irara-a visii, uvare viapau oiso enselpa irara-ia vuurapa vaisi purapataveira osa ora visii iava varauraaro tekkipata.” Uvare visii keaoro oiso puraaverea, “Igei-a vao igoa riro tarai rutu ouiova urusiara-ia. Uva eakepa visii tapo viapau oiso pie asapataveira?” Uva oisi-a eisi osa piepaoro ora voea raga ora riro piepaaveira vo oirara raga vo rugorugooroaro-ia. <sup>19</sup> ✨ Ari ita, oa-a eva oa vituaro iava Kraiis-ia pitu arapa ora voea iava vasepaiveira. Rera raga ita-a ira orekerovu rutu kukuearo. Osa toupaooro vigei-ia orekerovu rutu aioara vatepareveira varuapa vouao lotuua. Ira raga-a ira vigei rutu takutakuvupareveira, oisore ra kataiua raga-ia varaua toupape vigei rutu vao-ia lotuua. Oa iava uvuipaviei ra riropavio, vo rara vigeipa Pauto gorua vatepareve.

### *Krais Tapo Kopii Ovoitaepa*

<sup>20</sup> ✨ Ari ita, kopiitaepa Kraiis tapo. Oa iava varao kavutava oara-ia visiire oiso oisoa purapaave, “Varao sirova utupata, ra vara iava oriruvira rutu toupata.” Uva eake rutu-a vao vo rasio iava oare uvuipatai ra touvira rutu vara sirova utupata varao oiso-ia, <sup>21</sup> Opeita vara-ia pitupata, ora opeita vara-ia togovipata, ora opeita vara ravapata vara sovopaoro. <sup>22</sup> Oara-a evara vo ragava rasitoa-ia. Va vituaro iava vosa aioara togovipata, oire ra voava vara opesi pie ovoipata vara aiopaoro, uvare akukupapara raga evara vo rasio iava. <sup>23</sup> ✨ Uva voeao oea oisoa evo pitupitu purapaive oea oiso rutu kekepaa viroveira, riro tarai irara ora oea lotu purapaaveira tapo. Uva oiso purapaaveira, “Enselpa irarapa taku viropata voea vaisiario kae piepaoro. Ora uvui iraopatai ra ora vaisiario gare piepata. Ora varaura vo ruipaaro pa reipata vo osa visii iava varaura oavisii upopata.” Ari ita, akukupapara raga evara reo goruro. Oara viapau uvuipai ra voea iava varaura tokipaive. Eake iava? Uvare touvira varaura vo ruiparoaro reipapeira rutu voea vo rugorugooroaro piro piepaoro.

## 3

### *Pauto Ovoieivira Kraiis Tapo Vigei Tore Pie Ovoireva*

<sup>1</sup> ✨ Oire vo osa Pauto visii tore pie ovoireva Kraiis tapo, oa iava visii rutupa Airepa Tootoo rutu vate ovoireva. Uva oisi-a eisi osa iavirava uvuipatai varaore vearovira rutu rugoopata oara peira vuvuiua-ia tuevira. Vovio uva toupareveira Kraiis reia-ia paupa vao Pauto voaviaro oirapapa varata iava. <sup>2</sup> ✨ Oa iava viapau rutu uvuipatai ra varaore vo rasitoa-ia rugoopata. Viapau. Ari varao ragare rugoo iraopata oara epao vuvuiua-ia. <sup>3</sup> Aue iava rara oiso rutu toupata osa voeao kopii irara oea rasito vo touaro kavupaiveira Airepa Tootoo rutu oupasa Kraiis tapo ora tavosipaoro. Osa eisi uvuipatai toupata vora, Pauto visii orirupareve vokiara rutu-ia. <sup>4</sup> ✨ Oiraopavira rutu uvare visii vaaro-a Oiraopa Tootoo rutu vituaro rera ro-ia Kraiis. Uvare vorevira vorerovere, ra oisi vo tootoo outa aue tapo rera vo kerariaro vo aviaviaro.

### *Vao Iava Airepa Tootoo Ora Tuariri Tootoo*

<sup>5</sup> ✨ Varao-ia vo rasio iava oara kopii piepata oara-a varao-ia oiso-ia,

✨ **2:19:** Ef 1:22, 4:16 ✨ **2:20:** Ro 6:3, 5; Ga 4:3, 9 ✨ **2:23:** Ro 13:14 ✨ **3:1:** Ro 6:1-10; Sam 110:1 ✨ **3:2:** 1 Jo 2:15-17 ✨ **3:4:** 1 Te 4:13-18; Jo 14:6 ✨ **3:5:** Ro 6:13; Ef 5:3, 5

kaakau kare vo pitupituario-a vao oa uvuipatai kavu iraopata, ora otopa rugooro, ora opeita iravure riiriipare oirato vatauvira rera oupasa ora riakova oira oupasa, ora vao tapo opeita iiruko vovou purapata, ora opeita oearovu varaaro riiriipata, ora oiso tapo ra viapau oaravu vuri pitupituro purapata ora visii raga-ia vovoupaoro orekerovu-ia vearopara varao vo rasio-ia touara. Opitupituroa-a evara porearo oara-ia Pauto tovopataveira utupaua rara varao raga vo touara vo rasio-ia ira piepataveira, oiso rutu osa ro ira tokarasiara raga oirao piepareveira Pauto tovopaoro rutu utupaua. <sup>6</sup> Vosa vo pitupituro evara purapaive oirara oara voriaro voeapa tuuvira vatereverea Pauto voeare kasipuoro. <sup>7</sup> Ari ita, tuariri rutu opitupituroa evara oisoa purapata, vo osa vo vuuta-ia eva vara visiipa riropape vo rasio-ia.

<sup>8</sup> Ari vo vokio uvuipatai ra vara ruture isivapata oiso, kasipu vovoua vao-ia, ora aveave vovoua vao-ia, ora vuri rugorugoo, ora fakau reoa vao-ia oearovu togapaoro reoara-ia, ora tapo ora asapapa reoro eakapata, ora arii asa reo puraro eakapata tapo. <sup>9</sup> Ora opeita oearovu keakeapata, uvare tuariri evo pitupituro sirova oisoa utupata oa isivaoro iava varare isivataepa vara kavuoro. <sup>10</sup> \* Uva vara iava ora tavariooro airepa vovouro sirova utupataveira ro airepatato varaaro ira airepavira ita purareva Pauto. Eisi ita osa ragavira visii tauvapareveira Pauto oiso ruipapaoro ra topatopa pievira torevoko vovou rutu purapata. Oa vituaro iava uvuipatai ra torevoko vovou sirova rutu utupaoro va iare tutuu piepata vao Pauto vo vovouaro vioepaoro. <sup>11</sup> \* Ari ita, uvare vigei rutu-a vao-ia vigoa airepa pierevora Pauto. Oa vituaro iava viapau oiso pisipisavira toupai. Viapau. Vigei-a katai irara raga Krai vaiisaro sovara-ia oiso-ia, ratau tou irara voeao, ora Jiu-a voeao, ora voeao oea oisoa ora voea iava rakari verapaave ora reesipaoro, ora voeao oea vo pitupitu eva kavuiva, ora voeao tauai rutu oea toupaveira, ora voeao oea vegoaroro toupaveira, ora voeao oea riro vaisivira toupaveira, ora voeao akaipa keke irara. Eake iava? Uvare Krai-a kataitao raga vigei rutu vituaro. Oa iava vigei rutu vaeavira roosikevira rutu toupai.

### *Vigei Uvui Iraopaviei Ra Oearovupa Siraopa Pitupitu Pura Iraopape*

<sup>12</sup> \* Pauto visii kaviko iraopareveira oare visii roporeva oiso ra oiso rutu toupata, Rera voeaoro. Oa-a eva iava uvui iraopatai ra oearovivupa siraopata. Ra oearovure ita rugorugooapaoro voea tauvapata. Ra oisi voea piepaoro ora visii iava vaisiara oavisii vara piepata voea roerarovire. Opeita vagevagepavira kasipupata, ari uvuipatai ra voea ateate pie rovopata. Oa iava uvuipaai ra visiire vorevira ita kave vovou puraive. <sup>13</sup> Ari ita, vosa iravu-ia siraoa vo vavataaro touve, oa iava visii rutu uvuipatai ra reravi vo vavataaro kapokaporota rera tauvaoro. Ora vosa iroufo ro-ia visii-ia vuria vai pura rovoreva, ira iava uvuipatai ra rerapa siraota va veraoro rera iava. Oiraopavira rutu vosa iravu iava oisi vuria verata, oiso rutu ita-a osa visii iava Krai vuriara vera rovoreva visii rutu kavikooro. <sup>14</sup> Ari ita, uvare riroa rutu-a va vao-ia kaviko vovou. Ovovou-a vao-ia kaviko vovou orekerovu rutu vearopa pitupituro vituaro rutu, oara uvuipai ra vaeavira rutu ovoieivira toupave. <sup>15</sup> \* Vosa eake avu visii-ia karekepe, oa sirova Krai uvuiparoi ra visiipa vare kave vovou vatereve, vo rara goruvira torevoko vovou-ia vare keris iraopata. Uva Pauto visii oureva vaore oiso ra kave vovou purapata. Ovovoua-a eva oa-ia uvuipatai ra kataiua rutu-ia varaua toupata vao-ia lotuua veoro vaisi purapaoro Pautoa-ia vokiara rutu-ia. <sup>16</sup> Vo reore rugorugoo iraopata oa

\* **3:10:** Ro 12:2; Ef 4:23    \* **3:11:** Ga 3:26-29    \* **3:12:** Ga 5:22-23; Fl 2:3; 2 Ko 6:6    \* **3:15:** Fl 4:7

toupai ro iava Krai, oisore ra vo reo rutu sovopaoro utu iraopata. Oa iava uvuipatai ra vearo rugoo raga-ia oearovu tarai piepaoro voearopa oisi vara kareke piepata varao torevoko vovouoro. Oire vo osa oisi piepaoro uvuipatai ra vearo vaisi purapata Pautoa-ia Tugoropava-ia erapaoro, ora o erava iria-ia vuurapa purata rera-ia. Ora o iria-ia Pauto vo rearo veita. <sup>17</sup> ✧ Ari vosa eakero avu purapata ora vo osa eake reoro avu tapo purapata, oara rutu-ia uvuipatai ra vo raga vara purapata Turaro Jisas vaisiario sovara-ia. Oa iava rera tapo ora tavosipata visii rutu, vo osa Pautoa-ia vigei Aitearo vuurapa vaisi purapata.

### *Oirato Vo Vovouaro Iava Vo Osa Oearovu Tapo Vearovira Toupave*

<sup>18</sup> ✧ Visii riakora uvuipatai ra vatua irara oavisii vo reoroaro uvu iraopata rutu. Vosa oisi eisi piepata, oa iava uvuipatai ra Turaro vo vovouaro rutu sirova utupata. <sup>19</sup> Ra visii tapo oirara uvuipatai ra riakora oavisii kaviko iraopata rutu vairoropa siraopaoro. Opeita vo riako torevokopata kasipu reoro-ia.

<sup>20</sup> ✧ Ora visii kakae vure visiigoa aite irara oavisii vo reoroaro uvu iraopata, vo osa vara sirova utupata. Vosa oisi piepata, oa iava uvuiparoi Pauto ra visii-ia rorupareve rutu. <sup>21</sup> Ora visii aite irara opeita kasipu reoro rutu-ia ovii irara oavisii torevokopata. Teapi riro vavatapara vatepata voeapa kakae vure oara-ia pasi viapau uvuipai oiso ra vara kaepaive.

### *Pol Vo Reoreo Purareva Voeaopa Kovopa Irara Ora Tokipa Irara*

<sup>22</sup> ✧ Ora visii kovopa irara visiigoa uvuipatai ra voearo vo reoroaro uvu iraopata oearoa visiipa reipaaveira. Ra opeita kasivarivira rutu kovopata vo vuutao raga-ia oa-ia visiiva vurapaive voeao oea visii tokipaiveira, vaore rugooapaoro ra visiire oiso purapaave, “Akoea, ari vearo kovoto ro-ia.” Ari ro raga-a ira-ia rugooapaoro uvuipatai ra oearovupa vearo kovo rutu purapata Turaro Krai. <sup>23</sup> Iu, vosa aa vo kovo avuo vao oa kasivarivira purapaoro rera ragare rugoopata Jisas, ra oiso purapata, “Oiraopavira rutu, ira-a ro ragaipa reiparoi ira ragaipa vo kovo vaterereve.” Uva osa eisi vovouapaoro uvuipatai ra oearovupa kovopata voearo oearoa visiipa reipaaveira. <sup>24</sup> ✧ Oa vituaro oiso toupaivoi, Visii-a Krai-pa kovopa irara. Ari ita, uvare taraiatai visii vaoro voria toupaivoi tuevira oa vatererevea rara visiipa. <sup>25</sup> ✧ Pauto oearovu rutuva vurapaaveira roosikevira rutu voea rovirieipaoro. Oa tapo eva vituaro iava oiso toupaveira, Vosa irai visii iava vuria vai purareve, ira tapo ita ora rera vo voriaro ouerevea va sirova eva.

## 4

<sup>1</sup> ✧ Visii tapo reipa irara visiigoa ora visii voearopa kovopa irara torevoko pitupitu vearoa purapata vaeavira rutu. Eake iava? Uvare oiso taraiatai, Visii reraaro epao reito ira vuvuiua-ia toupaveira.

### *Goruvira Variripa Pitupitu Ora Torevokovira Vokapasa Tapo*

<sup>2</sup> ✧ Uva visii uvui iraopatai ra goruvira variripa vo pitupituaro rutu-ia pitu iraopata. Teapi rurapaoro variripata. Ari uvuipatai ra roroiovira rutu rugooapaoro Pautoa-ia vearo vaisi purapata vokiara rutu-ia. <sup>3</sup> Uva oisi-a eisi osa piepaoro igei tapopa variripata vaore, ra igeipa raiva karupareve oa-ia uvuipaiei ra siposipapaoro Vearo Siposipo iava vokaio. Ari ita, voari tuariri viapau oiso vo siposipo-ia vao taraiapa oirara. Uva vo vokio karu

✧ **3:17:** 1 Ko 10:31-33; Ef 5:20 ✧ **3:18:** Ef 5:22-23 ✧ **3:20:** Ef 6:1-4 ✧ **3:22:** 1 Te 5:18; Ef 6:5-8 ✧ **3:24:** Ef 6:2-8; 1 Ko 7:22 ✧ **3:25:** Ef 6:8-9; Ap 10:34 ✧ **4:1:** Lev 25:43, 53; Ef 6:9 ✧ **4:2:** Ro 12:12; Fl 2:7

piroi rutu va vao Vearo Sipoſipo Jisas Kraiſ iava, uvare va karuavoi. Oa a vao vituaro iava ragaiei vo-ia tuukepa kepa-ia. <sup>4</sup> Oire variria Pauto vo tauvaarore purapata, oa iava uvuiparai ra roroiovira rutu ragai vo ſipoſipoaro vatepaa oirarapa. Aue iava uvare Pauto ragai roporeva oisi eisi va purapasa.

<sup>5</sup> ✧ Oire voſa oearovu tapo toupata voeao oirao pie vovou aſa irara, uva uvuipatai ra voeapa ora vatatopo piepaoro rutu oaravu vearopa pitupituro purapata voeapa. Opeita viſii vo vuutaroaroro ropi ragapata vo oſa viapau voea tauvapata. <sup>6</sup> ✧ Oire voſa oearovupa reo vatevate vovoupata, ra vearo rugoo rutu iava voeapa reoreota. Ra tapo vearovira rutu taraipaoro voea vo akeroaro aatopata torevoko reo-ia.

### *Pol Tikikas Vaio Ora Onisimas Arureva*

<sup>7</sup> ✧ Oire uva oavu-a vao-ia oa iava viſii tavipaavoi ro iava vigei araoko-toviaro Tikikas. Ira oiſoa kaſivarivira rutu ragai tauvapaoro kovopareve Turaro vo kovoaro purapaoro. Ira viſii ſipoſiporevere rara ragai iava. <sup>8</sup> Oa iava viſii iare rera arupaavoi vaore, ra igei vo touaro iava uvuoro viſii iava vovouſiſiro varaatape. <sup>9</sup> ✧ Uva vaiſerei rutu-a vaiſereo viſii iare uriopasiei rara ora ro Onisimas iravu ita vigei araokotoaviaro. Ira tapo ita oisi kaſivarivira rutu oiſoa kovopareve reasi aſavira. Eera-a viſii raga iava rera ira tapo oisi raga ita igei vo touaro iava viſii tavitaviparevere rara.

### *Pol Vearo Voki Rutu Purareva Voea Rutuva Voeao Kolosi Vata*

<sup>10</sup> ✧ Ariſtakas ira ragai tapo toupate vo-ia tuukepa kepa-ia vaiſerei ora Mak, Banabas raovutoaoro, aiterea tapo viſii-ia vearo voki purapasivoi. Ro Mak ira iava voari tuaririvi viſii taviava, oiſo ra rerava ſekantpata rera vearovira rutu tokipaoro. <sup>11</sup> Uva iravu ro Jisas ira raga vaiſiario-a ro Jastas ira tapo viſii-ia vearo voki puraparevoi. Uva vo peva raga-a vao-ia Jiu iava voea oea ragai tapo oiſoa kovopaive Pauto vo Saraaro kova piepaoro. Oearoa oiſoa rirovira rutu ragai tauvapave riroa tavata kaepaoro.

<sup>12</sup> ✧ Ari iravu-a ro viſii iava rera Epafraſ ira tapo viſiiva vearo voki puraparevoi. Ira tapo oiſoa Kraiſ Jisas vo kovoaro purapaoro oiſoa vokiara rutu-ia variriara purapareve viſiipa kaſivarivira rutu, auere ra vearovira katai vovou rutu-ia torepata goruvira oira vaſivira. Ra oisi vo vovou iava katai rugoo raga-ia Pauto vo ruipaoro rutu ſirova utu ruipasa auepata. <sup>13</sup> Ari ita, ragai oiſoa rera teeriopaa rutu vo oſa oisi kovopareve. Oa iava ragai rera iava viſii tavipaavoi oiraopavira rutu vao iava oſa viſiipa kovoreva voari tuariri, ovusa rera teeriopaavora rutu. Uva viapau oiſo viſii ragapa kovoreva. Ari voeareo tapopa kovoreva Leodisia-rei ora Hirapolis vata. <sup>14</sup> ✧ Ora ro Luk ira oiſoa igei ruvarupareve ira oiſoa kavikopao rutu, vaiſerei ora Dimas aiterea tapo viſiiva vearo voki purapasivoi.

<sup>15</sup> ✧ Ragai vaaro vearo reo topa piepata voeapa araoko irara oavi oea Leodisia-ia toupaveira, ora o Nimpa, ora voeao oea oira vo kepaoro-ia lotu purapasa uriopaaveira. <sup>16</sup> Oire vo paſia vao-ia oa vieri vovopatavoi, ra va iava va topa pievira vateta ita voeapa oirara lotupa irara oea Leodisia-ia toupaveira. Oa iava voea tapo ita uvuipaai ra va vieiive. Oa iava uvuipatai ra tuuvira aia ita viſii voea vo paſiario vieita rara ita. <sup>17</sup> Oire Akipas tavipatavoi oiſo, “Vo kovo opesi pieri oa vatereva vigei reraaro Turaro viipa.”

✧ 4:5: Ef 5:15-16 ✧ 4:6: Ef 4:29; Mk 9:50; 1 Pi 3:15 ✧ 4:7: Ef 6:21-22 ✧ 4:9: Fm 10-18  
✧ 4:10: Ap 19:29 ✧ 4:12: Kl 1:7 ✧ 4:14: 2 Ti 4:10-11 ✧ 4:15: Ro 16:5



<sup>18</sup> Ari ita, ora ragai raga vavaearo iava vo rigato puraavoi oiso-ia, Vearo Voki ragaiva Pol. Ragaire rugoopata ragoa vo toupaavoi tuukepa kepa-ia touvira. Pauto visii viraakoreve ora ragai.

Eisivi raga osa ragai vo rearo opesi piepaavoi.

Ragai-a vao, Pol.

## 1 TESALONAIIKA

### Irapa Reoro Vo Vukuo Iava

Pol vo pasio rigatoreva tavete tapi touoro vo Korin urui-ia 50 yia Jisas vo kavauaro isivaaro iava. Taraiparoepa voeao-ia Jiu-pa irara oea vuria rutu oisoa purapaive lotupa irara-ia oirao pie vovou irara. Eva-a oa iava vo rigato purapareva voea varaaro oirao pie vovouro goru piepasa. Uva aue iava tapo rigatoreva Kraiss vo vorearo iava vore vo rasio oirao pie vovou irara ou piesa vuvuiua iare (1 Te 4:13–5:11).

1. Pol vearo vaisi purareva Pautoa-ia voeapa Tesalonaika vata, 1:1-10.
2. Pol vo kovoaro iava vao oa purareva Tesalonaika-ia, 2:1–3:13.
3. Oirao pie vovou irara uvui iraopaai ra airerei vovouvira toupave, 4:1-12.
4. Turaro oirao pie vovou irara rutu ousa vorevira voreroverea, 4:13–5:11.
5. Ovoioapa reoro Pol varaaro, 5:12-28.

<sup>1</sup> Ragai-a vao-ia Pol ragoa vo pasio rigatoavoi vaitereo tapo tupaoro Sailas vaio ora Timoti. Origatoa oa puraavoi visii rutupa lotupa irara visii goa evoa Tesalonaika-ia toupataveira, visii eva Pauto Aite voeaaoro ora Turaro Jisas Kraiss. Uva variripaiei visii pa oisore ra visii pa tauva vatesi ora gavaurea.

*Voeao Tesalonaika-pa Irara Oisoa Oirao Piepaive Rutu Torevokovira Rutu Tupaoro*

<sup>2-3</sup> Igoa peva vao igoa vokiara rutu-ia Pautoa-ia vearo vaisi purapaveira visii iavirava. Uva visii vaisipaveira variriara-ia, vo rara visii vo pitupiturore rugoopaio, vo osa visii varaaro-ia oirao pie vovouro oavisii goruvira kovopataveira, ora vo osa oearovupa siraopaoro voea taupataveira. Ora vao-ia tapo visii vaaro rari vovou rutu, vo osa vigei reraarore Turaro Jisas Kraiss tuepaoro eisi goruvira raripataveira vo Pauto Aite oavi osireiario-ia. <sup>4</sup> Oirao pavira rutu araoko irara oaiio visii kavikopareveira rutu Pauto. Uva visii-ia oisi taraipaiei oiso, Visii eva visii goa roporeva Pauto ora rerapa, oisore ra oiso rutu toupata rera voeaaoro.

<sup>5</sup> ✧ Vao iava uvare Vearo Siposipo iava siposipoava visii pa. Ari ita, viapau oiso reo turituri raga oa siposipoavora visii pa. Viapau. Ari gorua rutu tapo-a Tugoropato Uraurato iavirava. Uvare ragai vo reoro-a vao oa oirao piereva rutu vigei rutupa ora visii. Iu, uvare igei vo pitupituroaro-ia oisoa taraipata vo osa tupaiovera evoa visii taupapaoro.

<sup>6</sup> Uva igei vo rugorugooroaro sirova utuoro orekerovu oisoa purapata Turaro vo rugorugooroaroa torevokovira. Uva Pauto vo reoro-ia pitu-tavoiva, oearovu visii vuri piepaiovera. Ari ita, oisoa rorupata rutu vo reoro-ia varao oara vira piereva Tugoropato Uraurato visii pa rorua tapo.

<sup>7</sup> Uva oisi-a eisi osa ragavira va-ia ora visii-ia ovoovoa puratava voeapa oirao pie vovou irara, oisore ra oisi va kekepaoro goruvira oirao pie vovou purapave va sirova utupaoro, voeareo oearea Masedonia Provinsarei-ia tupaiveira ora Grik. <sup>8</sup> Aue vituaro iava uvare Turaro vo siposipoaro-a oa oiso rutu ora sikataepa osa toiva gurukoaro oa ora sikataepa voraro ruture. Ari ita, avaepa voare vo Masedonia-ia ora evoa Grik-ia. Oa iava voava uvarovu ruture puteva, oiso ra oearovu voraro va iava uvuoro visii varaaro oirao pie vovouro-ia taraipaave rutu. Oa vituaro iava viapau oiso

✧ 1:5; 2 Te 2:14; Kl 2:2

uvuipaiei ra oearoipa ita siposipoio. <sup>9</sup> ✱ Evoea oea oisoa visii iava igei siposipopaive, vo osa visii tapo oisoa toupauo. Aue iava uvare vearovira rutu oisoa igei tokipata. Ora varao iava tapo osa ora visii vo kovoroaro varao tokarasipa kovoro tavariotava oiraoptaoa rutu iare Pauto ro irapa kovopataveira. <sup>10</sup> ✱ Ora aue tapo osa rera oviitoaarore tuepataveira ro ira vuvuuua iava vararoverea. Eera ro Oviito Jisas ira vorevira tore piereva kopii tapi iava. Ro raga ita ira vigei virivaripareveira osa iava viapau Pauto vo kasipuaro vigei-ia pou piroverea. Oa-a eva voeao vuri vovou irara-ia pou piroverea.

## 2

### *Pol Vo Kovoaro Iava Vao Oa Purareva Tesalonaika-ia*

<sup>1</sup> Oire va vao-ia araoko irara oaio, oa-ia tarai iraopata oiso-ia, Viapau oiso akukuvira raga visii iare tavete ragaiova. Viapau. Uvare igei vo kovoaro kueera visii-ia. <sup>2</sup> ✱ Uva vao-ia tapo oiso ragavira taraipata rutu osa Filipai-ia oisoa toupauo, uva oisoa oearovu igei vuri piepaive rutu igei tovipaoro. Uva va-a eva oa iava Tesalonaika iare topa uviroiepa. Uva eva ita oearovu oisoa igeire ita kaureopaave. Ari ita, Pauto raga ira oisoa igei vo vovouroaro goru piepareve rutu, oiso ra visiipa Vearo Siposipo iava tavitavipaio. <sup>3</sup> Uva torevokovira rutu va iava visiipa siposipoiova, ra va-ia viapau visii iava irai piro pieio. Viapau rutu. Ora aue tapo viapau ora igei raga-ia rugoopaoro vo siposipo puraiova. <sup>4</sup> Ari reoreopaioveira vao sirova utupaoro Pauto vo ruipaoro, uvare oisire igei oisi uvuireva. Oa iava oiso puraroepa igeire, “Uvuipatai ra Vearo Siposipo kaeta va iava siposiposa.” Uva viapau oiso vaore oisoa Vearo Siposipo kosi piepaio, oiso ra oirara igei-ia rorupaive. Viapau. Vaore-a oiso ra Pauto igeire oiso puraroverea, “Vearovira rutu,” vo rara oisi igei vo vovouroaro eveireve. <sup>5</sup> ✱ Oire uva oisi ragavira taraipataveira osa oisoa visii tapo toupauo. Uva vo tou-ia viapau oisoa visii agoagoto ragapaoro toupauo. Ora oiso tapo igei-ia taraipata, Viapau oiso orekerovu riiriipa vovou vai oisoa vataupaio. Viapau rutu. Pauto vearovira rutu ragai vo rearo-ia taraiparoi osa oiso puraparai oiraopavira. <sup>6</sup> Ari ita, viapau oisore vo kovo puraiova ra igei vaisiaro raga rei piepata visii ora oearovu. Viapau rutu. Oiraopavira, uvare igei-a Kraispapa kovopa iraraaro voeao igoa arureva igei sipooro. Eisi osa iava uvuipaiei ra oiso visii tavipaio, Igei vaisiaro rei piepata. Ari ita, osa viapau oisiei eisi. <sup>7</sup> Ari vao raga kave vovou rutu oa raga oisoa purapaio visii tapo toupauo. Oiso rutu osa aakova oisoa kakaeto piepaeve vo osa vo kakae tokipaeve. <sup>8</sup> Oa iava visii kavikopaoro oisoa rorupaio Pauto vo rearo iava visiipa siposipopaoro. Ora vao tapo osa oisoa oiso rutu vovoupaio ra ora igei iava sopaura oaio rutu vatepaio visiipa, uvare oisoa visii kaviko irapaio rutu. <sup>9</sup> ✱ Oire uva apeisi-a araoko irara oaio? E igei vo kovoarore ru-goopataveira vao-ia osa kovoiova visii-ia? Ari ita, uva goruvira rutu oisoa moni oupasa kovopaio vo ravireoura-ia ora vokiaroro tapo. Osa iava viapau oisoa igeipa orekerovu avu vai voripata, vo osa visii tapo oisoa tupaoro visiipa siposipopaio va iava vao Vearo Siposipo Pauto vaaro. <sup>10</sup> Ari ita, igei vo pitupituroaro oisoa eveipata visii rutu ora Pauto vo osa oisoa rerapa goruvira kovopaio, ora vuri rugorugooro pura asavira. Osa iava viapau irai uvuiparoi ra oreoi purapareve igei vaisipaoro vo osa visii tapo toupauo visii vao visiigoa Kraispapa oirao piepataveira. <sup>11</sup> Oire oisi-a eisi osa ragavira va-ia tarai iraopata oiso-ia osa katakataivira rutu

oisoa visii kavikopaio oiso rutu osa aite irara roopavira kakae vurero oaive kavikopaiveira. <sup>12</sup> ✧ Uva oisoa visii iava sopaura goru piepaio. Ora tapo visii sopaura oisoa varaata piepaio. Ora oisoa topatopa piepavira visii tavitavipaio, oisore ra vo touo purapata oa-ia uvuiparoi Pauto visii-ia rorupareve. Vao vituaro iava uvare visii roporeva oiso, Visiigoa koatataverea vore rera vo Saraaro-ia vao oa-ia rera vo kerariaro-ia rera tapo toupataverea.

*Voea Rutu Goruvira Oirao Pie Vovou Purapaoro Sirao Vo Vavataaro Oisoa Kaepaive*

<sup>13</sup> Oire uva oavu tapo-a vao-ia oiso osa visii iavirava Pautoa-ia vuurapa vaisi purapaioveira vo vokiara rutu-ia. Aue iava uvare visiipa Pauto vo rearo kaeiova. Oa iava va uvuoro ora visii sopaura oavisii-ia vo reo oriru ovoitava rutu. Uva oisoa viapau oiso rugorugoopata, Oiratoa raga vo rearo vao-ia. Osa viapau. Ari oiso rugoo ovoitaepa, Pautoa rutu vo rearo vao-ia, oreoa visii sopaaro-ia kovopaiveira visii eva oirao pie vovou irara. <sup>14</sup> ✧ Araoko irara oaio, uva visii vuria outavora oearovu-ia ora visii raga iava voeoro vova ora visii raga vo taereroaro-ia. Uva visii lotupa irara oiso rutu toupatavoi osa voeao oea Judia Distrik-ia oisoa toupave Jisas vaisiarova. Uva va-a eva oa-ia vuria ouiva rera vaisiario iavirava voeao-ia Jiu. <sup>15</sup> ✧ Uvare voea ita evoea Jiu oea Jisas upoiva rera kopii pieoro ora oavu profet irara. Ari ita, igei tapo oisoa vuri piepaive rutu vo osa oisoa igei sigupaive. Oiraopavira rutu, uvare ora voeare Pauto kasipu piepaiveira rutu. Ora aue tapo osa oearovure oisi eisi oisoa kasipupaave. <sup>16</sup> ✧ Igeire oisoa korukoru ragapaave oiso, Teapi ratau tou irarapa sipoisipopaio vo reo iava vao Pauto vo rearo. Oiso rugooparo, Teapi vo reo sirova utupaaera, oiso rutu pieive Pauto voearo. Oa vao vituaro iava kap agasiopa rutu varao iava vuri vovouro voea varaaro. Uva va vao osa agasioiva, oira vurapaoro rirovira rutu kasipu iraoaparoveira Pauto, oisore ra oirapa voea opesi pie ovoivereva.

*Pol Oiso Ruipaparoepa Rutu Ra Vorerivira Ita Voea Kekereve*

<sup>17</sup> ✧ Araoko irara oaio, voviri visii arova avaipea. Uva varaura raga ita, ovusa rugorugooara touvira rutu igei iava visiire rugoopaveira. Uva va vao osa visiire rugooparo raiva taraa ragaparaveira oiso ruipaparo ra vorevira visii puaro ita kekea. <sup>18</sup> Rirovira rutu ruipa irao ragapaioveira oiso ra vorevira visii iare kareio visii kekesa. Vo osa viapau. Uva ragai vorevira karesa akeake raga iraoapaaveira, vo ovusa Seten raga vorevira ragaire korukoruparo. <sup>19</sup> ✧ Ari ita, utupaua vigei reraaro Turaro Jisas vorevira vorerovere. Ra va iava rera puaro-ia vigei rutu torevio vo vuuta-ia eva. Ra eake vai ouio igei? Ora eake vai iava vearo vovouio? Ora eake vai-ia rorua vai ouio? Ora aa vao oa-ia ora igei iava vaisiara rei pieovere? Ari visii iavirava raga. <sup>20</sup> ✧ Uvare oiso rutu toupataverea, Igei vaoro keraria ora igei vaoro rorua.

### 3

*Pol Timoti Arureva Voea Iava Sopaura Goru Piesa*

<sup>1-3</sup> ✧ Viapau rutu uvuipaiei oiso ra visii iare urioio evoa, uvare viapau raivaa vai igeipa. Uva va-a vao oa iava rirovira rutu rugorugooparaero vo toupaparo Atens urui-ia, oiso ra visii iare Timoti arua, ra visii iare urioio

✧ **2:12:** Ef 4:1; 1 Pi 5:10 ✧ **2:14:** Ap 17:5; 2 Te 1:4 ✧ **2:15:** Mt 23:34-36 ✧ **2:16:** Mt 23:32-33  
 ✧ **2:17:** 1 Ko 5:3; 1 Te 3:10 ✧ **2:19:** 2 Ti 4:6-8; 1 Te 3:13 ✧ **2:20:** 2 Ko 1:14 ✧ **3:1-3:** Ap 17:15

vo osa ragaïpe vo raga. Ro Timoti vigei araokotoaaro ira Pauto vo kovoaro purapareveira vegei tapo Vearo Sïposipo siposipopaaro oearovupa Kraïs vaaro iava. Uva visii iare rera sipaovoi visii vo vovouaro oïrao pie vovouro goru piepasa rutu. Teapi oearovu visii varaaro oïrao pie vovouro iava visii kosi piepaive visiire kasipupaaro, ra va iava vo vovouro oavisii kavupata. Uva taraipatai va-ia vao osa Pauto voeapa vasepareveira, auere ra vigei-ia vuriara purapaive voeao vuri irara. <sup>4</sup> Ari ita, vo osa oïsoa visii tapo tou rovopaïo uva voa visii taviiova oïso, Utupa visivi vuria oupere rara voeao ruvara-ia vuri irara. Oïre uva taraipatai uvare oïsi rutu eisi karekeepa. <sup>5</sup> Uva visii-ia rirovira rugorugooapaaro Timoti aruava visii iare, uvare viapau rutu uvuipaiei ra visii varaaro-ia taraipaïo oïrao pie vovouro oavisii vo raga tapoaro. Uva rirovira rutu oïso rugorugooapaaraveira, Seten vai pasi visii-ia kokaaparaveira, oïso ra oïrao pie vovouro oavisii kavupata. Oïre ra oïsi iava igei vo kovoaro akukupapira rutu visii-ia tou ragapaive.

### *Pol Rorupareva Timoti Vo siposipoaaro-ia*

<sup>6</sup> Oïre uva va vao osa Timoti visii ruvara iava vorevira kareroerao visii iava ragai tavitavisa. Uva vearo reo visii iava kaeoro kareroerao goru oïrao pie rutu iava visii vaaro vo Kraïs vaisiara sovara-ia. Ora vao tapo iava osa oearovupa siraopataveira. Ora vao tapo iava osa visii iava ragaïpa tavitavisa kareroerao, uvare vearo vovou rutu purapataveira igei-ia. Eva oa vituaro iava igeipa oïso ruipapataveira rutu ra igei keketa. Osa igei tapo ita oïsi ruipaïo oïso ra visii kekeïo. <sup>7-8</sup> Uva oïsi-a eisi osa iava igei iava vovouïsiro varaatavira toupaveira, vo osa vuri vovou vo siraoaro sovara-ia tupaïo oearovu vovouaro. Iu araoko irara oaïo, visii varaaro iava oïrao pie vovouro uvupaaro tootopaïei rutu, vo osa tavosivira rutu Turaro tapo toupaveira. <sup>9</sup> Eva-a oa iava uvuipaiei ra vearo vaisi Pautoa-ia purapaïo visii iavirava. Ari ita, rorupaïovoi rutu vo Pauto osireiario-ia, uvare visii vaaro-ia taraipaïei vearoa rutu toua. Oa iava Pautoa-ia vuurava vaisi purapaïovoi rutu visii iavirava. <sup>10</sup> Vo ravireopa vokiro-ia ora vo vokiaraoro uvaroa Pauto arepaïoveira rutu oïso ruipaaro ra visii iava puaraa kekepaïo. Ari ita, vosa visii varaaro oïrao pie vovouro potepaive, oa iava uvuipaiei igei visiïpa vara riro piepaïo ita.

### *Pol Varirioepa Pauto Iare*

<sup>11</sup> Igei-a vao oïso ruipapaïei ra vigei Aitearo Pauto vaiterei ora vigei reraaro Turaro Jïsas igeipa raiva vai purasi. Ra oaï iava evoare torevokovira urioïo visii iare. <sup>12</sup> Ora oïso tapo osa rirovira rutu oïso ruipapaïei ra visii varaaro siraopa vovouro riro piepareve rutu Turaro oavi. Oïre ra vo vovouro iava oearovivupa siraopata ora visii iava voeoro ora oearovu rutu. Eisi osa iava uvuipai ra vaeavira rutu touve igei vo vovouarova siraopa vovou. <sup>13</sup> Uva oïsi-a eisi osa uvuipai ra tupaïovora, sopaura oavisii uvuipa ra va iava visii iava vo vovouro goru piepareve rutu Turaro. Oa iava uvuipatai ra torevokovira raga rera osireiario-ia kareketaverea Pauto Aite vo vokiïo-ia oa-ia vorevira kareroverea oïrara rutu tapo rera voearo vigei reraaro Turaro Jïsas.

## 4

### *Vo Tupaï Toua Iava Vao Oa Iava Uvuipa Pauto Vigei-ia Rorupareve*

✧ 3:5: 1 Ko 10:12-13 ✧ 3:7-8: Ef 6:11-17 ✧ 3:9: 1 Te 1:2 ✧ 3:12: 1 Te 4:1, 10 ✧ 3:13: 1 Ko 1:8; 1 Te 2:19, 4:17

<sup>1</sup> Oire oavu-a vao araoko irara oaiio taviapaiiovoi. Igei ruvara-ia vo taraio outavora vao iava vearo tou oa-ia Pauto roru pietavora. Uva va-a vao oa iava goru pievira ita Turaro Jisas vaisiaro-ia visii oiso taviapaiiovoi, Uvuipatai ra eva-ia pute pievira oaravu rutu ita purapata vearopa pitupituro.

<sup>2</sup> Ari ita, oreoa-ia vao tarai reo taraipatai oa visiipa vateiovora ro vaisiaro-ia vigei reraaro Turaro Jisas. <sup>3</sup> ✧ Uvare Pauto oisi eisi ruipaparoveira oiso ra oisi vara purapata oiso-ia, vo osa sopaura oavisii visii iava torevokovira raga toupave, vo rara viapau otopa pitupiturore rugoopata vara purapasa. <sup>4</sup> ✧ Ari visii uvuipatai ra katakataipavira ora oupa pitupitu raga purapata. Oa iava uvuipatai torevokovira raga riakora oavisii oupata, oa-ia viapau vuria vai. <sup>5</sup> ✧ Vosa oisi piepaoro eisi, viapau oiso vo vovouo otopa purapata. Oa oiso toupaveira voeao vaaro oea viapau Pautoa-ia taraipaave. <sup>6</sup> Ora viapau oiso irai uvuiparoi ra vuria vai purareve ora irai araokotoa vaiario-ia irai keakeapaoro, oiso ra rera putereve rera-ia. Oa-a vao oa iava voari tuariri visii taviiova. Vo uva varare evara ravaavira visii vosiiova oiso visii taviro, Turaro voeao vorireverea oea oiso vara vuriara purapaveira. <sup>7</sup> ✧ Uvare viapau oiso Pauto vare eva otopa pitupitu vigei roporeva. Viapau. Ari vaore-a oiso ra vearovira rutu roroiovira toupape. <sup>8</sup> Uva oiso toupai vo osa ro ira vo reore vao-ia isivaparo. Uvare eake-a? Viapau oiso oirara ragare oisi isivaparoveira eisi. Ari Pautoa-re ro ira visiipa Tugoropato Uraurato vatepareveira.

<sup>9</sup> Ari ita, oiso taraipatai viapau oiso uvuiparai ra vorerivira visii ita roroio piea vaore, ra ora visii araoko iraraaropa siraopata. Uva rera visii tarai pie ragaparevora Pauto, oiso ra oearovivupa ora visii iava voea kavikopata. <sup>10</sup> Ari ita, oiso osa oearovivupa piepataveira ita vigei araoko iraraaro voearo riro oirao pie vovou irara, oearoa voraro toupaveira Masedonia Provinsia. Uva oiso goruvira rutu visii taviapaiiovoi, Uvuipatai ra evo vovou-ia pute pievira rutu oisi piepata eisi. <sup>11</sup> Oire uva ora eaka pie irapata. Opeita voraro vokapata oearovu vo rugorugooroaro torevoko ragapasa ora visii vo ruiparoaro raga-ia. Ari uvuipatai ra moni oupata ora visii vo kovoroaro-ia varao oara purapataveira ora visii vavaeoro iava. Oiso osa voari rovoa-ia tuaririri visii tavi rovoiovora. <sup>12</sup> Oa iava uvuipaai oearovu oirao pie vovou asa irara oisi iavirava visii kekepaoro visiipa avivikepaave. Ora aue tapo ra viapau potepata auepa vearopara varao oara arepataveira oearovu ruvara-ia.

### *Turaro Vigei Rutu Ousa Vorevira Voreroverea*

<sup>13</sup> ✧ Araoko irara oaiio, igei oiso ruipapaiei ra voeao-ia tarai irapata rutu kopii irara vaopa, teapi rirovira rutu visii iava sopaura siraopape rutu voeapa oiso rutu osa voearo oearoa viapau Pauto oirao piepaoro gaupaveira. <sup>14</sup> ✧ Oiraopavira rutu oiso osa vigei va vao oirao piepaveira oiso-ia, Jisas kopiiopea, oa iava vorevira va iava ora poreteroepa toreo. Oa-a eva vituaro iava oiso ragavira rera oirao piepaioveira. Osa ragavira iava Pauto voea rutu voeao kare piereverea oea kopiipaaveira Jisas oirao piepaoro. Oea rera tapo kareaverea Jisas.

<sup>15</sup> ✧ Oire uva oiso ruipapaiei ra visiipa vao iava taviio oa iava Jisas taviroepa rera vo siposipoaro-ia vo vokiio iava oa-ia vorevira voreroverea vigei rutu ousa. Uva vigei vao vigoa tootopaviei viapau oiso voeapa iravioverea oea kopiipaaveira. <sup>16</sup> ✧ Viapau. Asi Turaro raga-a ira vuvuiua

✧ **4:3:** 1 Ko 6:18; Kl 3:5 ✧ **4:4:** 1 Ko 7:2; 1 Pi 3:7 ✧ **4:5:** 1 Ko 6:14-20 ✧ **4:7:** Hi 12:14; Lev 11:44 ✧ **4:13:** Jo 11:11-27 ✧ **4:14:** 1 Ko 15:13, 23 ✧ **4:15:** Ap 1:10-11 ✧ **4:16:** Mt 24:31

iava oiso keerapaoro vararo. Ora rovopatoa rutu reito enselto ira kaku pie rovoreverea vò osa Turaro vaaro utave guruko pura piro. Ogurukoa isi-vaaro iava voeao oea Kraiis oirao piepaoro kopiipaaveira tore rovoaverea. <sup>17</sup> ✧ Uva evoea isivaaro iava vigei rutu vao vigoa tootoovira toupai vo voki-ia voeava aivaroperea rukuta sovara-ia. Ra va iava vigei rutu Turaro iare pou virovio vo vuvuiua rutu ivara-ia. Uva voa-a evoa Turaro tapo toupaperea vokiara rutu-ia. <sup>18</sup> Oreoa vao-ia oa iava uvuipatai ra oearovivu tavitavipata. Ra va uvupaoro ora voea iava vovouisiro oaive varaata piepaive.

## 5

### *Ora Vatatope Iraopata Vo Vuutaopa Oa-ia Turaro Vorevira Voreroverea*

<sup>1</sup> Araoko irara oaa, viapau oavu reoa rigatopaavoi visiipa, oiso ra va-ia visii siposipopaa evo vuutaro iava oara-ia orekerovu karekeperea vo utupaua rutu. Ari ita, viapau ruruvutu rugorugoo irara-a visii. <sup>2</sup> ✧ Viapau. Ari taraipataveira oiso, Vo voki-a vao oa vatauvira pou piroverea oiso rutu osa kavirupato vo pitupituaro. Uva viapau irai evo vokia-ia taraiparo ovokia-ia voreroverea Turaro. <sup>3</sup> ✧ Ovuuta-a eva oa-ia oearovu oiso purapaaverea, “Viapau oiso oavu avu vaiei. Ari orekerovu rutu torevokovira raga toupaivoi.” Vo osa vo vuuta-a eva oa-ia riroa rutu siraoa vo tavakaaro karekeperea voea rutu-ia. Oiso rutu osa riakova oisoa upia oupaeve vo osa kakaeto kavausa auepao. Viapau rutu oiso uvuiaverea vo tavaka eva vatavata, uvare Pauto vo Saraaro iava opesi ovoiai. <sup>4</sup> ✧ Ari ita, araoko irara oaa, viapau oiso visii vo rugorugooroaro visii iava rupavira toupaiaveira, ra oisi iava visii sita pieoro vo voki eva pou piro oiso rutu osa kavirupato. <sup>5</sup> Ari visii rutu aviavi rugoovira toupatavoi. Uva vigei rutu-a vao oirara vo voki iava ravireopa voki. Viapau oiso rupa voki iava vigei-a. <sup>6</sup> Teapi uusipata oiso osa oearovu. Viapau. Ari vigei uvuipaviei ra ora airereipavio varao tokipaoro rutu ora vigei iava varauaro oavi vo ruiparoaro. <sup>7</sup> Oiraopavira rutu, uvare rupa vokia oa-ia uusipaaveira oirara osa oearovu vo rupa-ia spakpaaveira kokoropaoro. <sup>8</sup> ✧ Ari vigei-a aviavi voki iava voea oirara. Oa vituaro iava uvuipaviei ra roroio rugorugoo rutu-ia toupape vao oearovupa siraopa rugoo ora oirao piepa rugoo. Oa iava uvuipaviei ra ora utopatoa-ia oirao piepato kuvuvio kuvupato vuriara asavira. Ora oa iava uvuipaviei ra ora vigei iava kukueara kukuvaive vo pitupituo-ia oa-ia Pauto-re tuepavioveira vo vokiore, oa-ia vigei rutu ouverea vorevira ora rerapa. <sup>9</sup> Viapau oiso Pauto vaore oiso vigei roporeva, ra vigeire kasipuro vigeipa upia vateoro. Viapau. Asi vigei reraaro Turaro Jisas Kraiis kopiireopa. Oa iava vigei varaaro vuri vovouoro voriaro ouveva rera raga. <sup>10</sup> ✧ Eva-a oa vituaro iava uvuipaviei ra rera tapo tootoovio vo utupaua. Egara vosa apeisi tootoovira toupape, eke kopiivira toupape ovusa urioro vorevira vigeire. <sup>11</sup> Uva oisi-a eisi osa ragavira uvuipatai ra oearovivu ora visii iava sopaaro varaata piepata voea tauvapaoro oiso osa ora visii raga ora piepataveira.

### *Vo Reoreo Iava Oa-ia Vo Pasio Opesi Piereva*

<sup>12</sup> ✧ Oire uva visii goruvira akepaavoi, oisore ra voeao-ia rei vaisi purapata oea visiipa reipaaveira. Uvare Turaro voea roporevora, auere ra visii tauvapaive visiipa tarai reoro vatepaoro. <sup>13</sup> Uva uvuipatai ra voeavipa

✧ **4:17:** 1 Ko 15:52 ✧ **5:2:** 1 Ko 1:8; 2 Pi 3:10 ✧ **5:3:** Hos 13:13 ✧ **5:4:** Ro 11:14; 1 Jo 2:8  
✧ **5:8:** Ais 59:16-21 ✧ **5:10:** 2 Ko 5:15 ✧ **5:12:** 1 Ti 5:17; Hi 13:17

reipa irara avivikevira rutu toupata voeapa siraopaoro. Aue iava uvare voea-a evoea oea Turaro vaisiario sovara-ia kovopaoro toupaivoi. Oire ra ora visii ragava tapo gavaure vovou rutu purapata.

14 ✧ Araoko irara oaio, goruvira rutu visii tavipaiovoi, oiso ra voearovio pokapoka vovou irara vosipata rutu. Ora voeao tapo vovouaro goru piepata oea uririavi purapaiaveira. Ora oiso ra voearovio tapo tauvapata oearoa viapau oiso goruvira torepaveira. Ra oisi eisi piepaoro kave vovou rutu purapata vo oearovu rutuva.

15 ✧ Vosa irai visii iava irai vuri piereve, viapau oiso uvuipatai ra rera varirivira ita vuri pieta. Viapau rutu. Ari goruvira rutu vaore rugoo iraopata, ra ora visiiva vearo vovou raga purapata oearovu rutu tapo oirara.

16 Vokiara rutu-ia roruvira raga toupata. 17 Vokiara rutu variripata reasi asavira. 18 Vosa eake karekepe visii-ia, uva uvuipatai ra va-ia vearo vaisi purapata Pautoa-ia. Vao vituaro iava osa Pauto oisi ruipaparoveira eisi vo osa Krai Jisas vaisiario-ia oisi piepata.

19 Ra opeita Tugoropato Uraurato vo goruaro sisipata oiso osa eto kasiro sisipataveira vo kasiro roko piepaoro. 20 Ra opeita voea vo reoroaro uvu arapa reasipata oea oiso toupaveira, Pauto gisipoaro. 21 Orekerovu rutu vearovira rovirieipata vara iava vearopara raga roporopopaoro vara-ia pitupasa. 22 Ra oisi piepaoro eisi vearovira varao rutupa vatavata iraopata vuri pitupituro.

23 Oiraopavira ita, uvare Pauto-a ro-ia gavaure vovou vituaro rutu. Ira uvuipa ra visii airereipareve, oiso ra roroio vovouro raga-ia toupatavere. Oa iava urauraara oavisii ora vovouisiro oavisii ora varauraro oavisii oara rutu uvuipai ra vuri asavira rutu toupave vo vokiore tuepaoro oa-ia vigei Turaroaro Jisas Krai vovevira voreroverea. 24 ✧ Uva Pauto visiire keeroepa, ra oisi piereve visii-ia eisi osa iava uvuipa, ra viapau visii kavureve.

25 Araoko irara oaa, variri iraopata igeivipa.

26 Ora sekanpata oearovivu tapo vo Jisas vaisiario sovara-ia evoea vigei arako iraraaro.

27 Oire uva ragai-a vao goruvira rutu oiso visii tavipaavoi Turaro Jisas vaisiario sovara-ia, oa iava uvui iraopatai ra vo pasio vieita voea rutupa oirao pie vovou irara evoea arako irara oavi.

28 Igei variripaiei, oiso ra Turaro Jisas Krai visiipa vereopa vovou vateve.

Eisivi raga osa vo rigato purapaavoi visiipa.

Ragai-a vao, Pol.



## 2 TESALONAIKA

### Irapa Reoro Vo Vukuo Iava

Gare vuutavi raga puteva vo osa Pol rovopa pasi purareva voeaopa Tesalonaika vata. Uva evo vuuta isivaaro iava oavu eraopa pasi rigatoreva voea ragapa. Aue iava uvare vavagisipaaepa Jisas vo vorearo iava vao oa iava rigatoreva rovovira. Uva viapau rera vo reoroaro uvuiva vo osa voea tapo toupavea. Ora viapau rera vo reoroaro oirao pieiva varao iava oara iava rigato rovoreva rovopa pasi-ia oara toupaiava. Eva-a oa vituaro iava eraopa pasi rigatoreva vorerivira voea soporepasa aviavi pievira Kraiss vo vorearo iava. Uvare oearovu voea iava lotupa irara oiso purapaaepa, Ari Kraiss vorevira vore ovoiroera tuaririvi. Osa viapau oiraopaepa eisi.

1. Aviavi pie reoro Pol varaaro, 1:1-2.
2. Pol rera vaaro rorua kareke piereva Pautoa-ia voea iavirava Tesalonaika vata, 1:3-12.
3. Aviavi pie reoro vao iava Turaro vo vokiario oa-ia voreroverea oirao pie vovou irara ou piesa, 2:1-17.
4. Goruvira voea tavireva Pol oisore ra variriara puraive, ora ra raverave asavira kovoa puraive Pauto vaaro, 3:1-15.
5. Ovoioapa reoro Pol varaaro, 3:16-18.

<sup>1</sup> Igei-a vao-ia oiso-ia ragai Pol ora Silas ora Timoti igoa vo rigato puraiovoi visiipa lotupa irara evoa Tesalonaika urui-ia. Visiigoa oiso toupata, Pauto vigei Aitearo voeaaro visii ora Jisas Kraiss vigei reraaro Turaro.

<sup>2</sup> Uva oiso ruipapaiei ra Pauto Aite vaio ora Jisas Kraiss Turaro vareo vatesi visiipa oiso-ia, tauvaa vao-ia ora gavaure vovou.

#### *Pol Veoro Vaisi Rutu Purareva Pautoa-ia*

<sup>3</sup> Igei uvuipaiei ra Pautoa-ia veoro vaisi rutu puraio visiire rugoopaoro arako irara oiao. Osa-a eisi osa purapaoro torevokopai. Vao vituaro iava uvare visii varaaro oirao pie vovouro riro varivarivira rutu torepai. Ora varao iavirava sirao vovouro oara visii iava riro varivaripai oearovupa siraopaoro ora visii iava voeoro. <sup>4</sup> Oa-a vao vituaro iava igei vo reoroaro-ia oearovivu oloturovu iava voea tauvapaivoi voeoro-ia tavitavipaoro visii iava visii vaisiario rei piepaoro. Ora vao iava tapo vo osa oearovu visii vuri piepaiveira, vo osa fouvira goruvira rutu toupata oirao pie vovou purapaoro raverave asavira rutu.

#### *Pauto Vigei Roviriepareveira Torevoko Pitupitu Sirova*

<sup>5</sup> Oire uva oisi-a eisi osa toupai visii vo pitupituaro vituaro vao oa iava vo reo Pauto vo reoro oirao piepaiveira vao oa-ia oirara torevokovira rutu roviriepareveira. Eake iava? Uvare goruvira rutu oirao pie vovou rutu purapataveira oearovu-ia ora visii-ia vuria oupaoro. Ovovoua-a eva oa kekereverea Pauto visii-ia. Oa iava uvuivira oiso kareketaverea visiigoa vao visiigoa rera vo Saraaro-ia koatataverea. <sup>6</sup> Iu, uvare torevoko vovou raga Pauto oa purapareveira voearopa siraoa vavataaro vatepaoro oearoa visii vuri piepaiveira. <sup>7</sup> Uva vo vavata vao oa tuuke piereverea visii iava ora igei. Ari ita, oisi-a oiso osa va purareverea vo osa Turaro Jisas vuvuiua iava vorevira vararo voeao tapo reipa irara purapurapa irara voeao ensel. <sup>8</sup> Eisi raga ita osa urioroverea voea vo voriaro vuri vori vatesa voeaopa oea viapau oiso Pautoa-ia taraipaaveira. Ora voeaopa

oea viapau vearovira rera vo siposipoaro sirova utupaaveira vao Vearo Siposipo rera iava Turaro Jisas. <sup>9</sup> Oiraopavira rutu, osa ragavira-a oiso osa voea vo voriroaro varao oupaoro vo toupavereia kuvau tapi rutu vuri tapi. Uva-a vo uva viapau voea ruvara-ia toupavereia Turaro. Viapau rutu. Uva viapau oiso oavi gareia vai vearoa vai rera vo kovoaro iava, o rera vo goruaro iava toupavereia oiso ra oai kekepaive voa. Uva-a evoa vuri tapi uva tovira rutu toupavereia ora voeapa siraopaoro opesi asavira rutu. <sup>10</sup> Oire uva oisi-a eisi osa voea pierereia vo voki-ia vao oa-ia urioroverea rara vovira. Ovokia-a vao oa-ia voeao oirao pie vovou irara rutu rera-ia vuurapa vaisi puraivereia rera-ia egapaoro rutu. Uva-a vo uva visii tapo voea tapo toutavereia, uvare vo Siposipo Vearoa oirao pietavora oa visiipa vateiovora.

### *Variria Purareva Pol*

<sup>11</sup> ✨ Oa vituaro iava visiipa goruvira rutu variripaioveira vo vokiara rutu-ia Pauto akepaoro, oisore ra visii taupavareve auere ra vo touo vearovira rutu purata otoua iare visii reesireva. Uva oiso ruipapaiei ra rera vo goruaro-ia visii vo ruipaaro uvui pierere visiipa visiigoa vearo vovou purapasa ruipa irapataveira. Ora aue tapopa variripaioveira, oiso ra visii vo kovoroaro ovoi pierere, vo kovoro oara purapataveira vao vituaro iavirava oirao pie vovou oavisii. <sup>12</sup> ✨ Oisi-a oiso osa uvuipatai oisi piepaoro rera vaisiara kae pieta rutu Turaro Jisas. Ra aia ita tuuvira ita visii vaisiara varirivira kae pierere ita rera. Oa rutu vituaro-a vao-ia akuku raga vatevatea vereopa vovou vaiterei vaaro Pauto vaio ora Turaro Jisas Krai.

## 2

### *Ro Iava Ira Pautoa-va Ora Kaureoparoveira*

<sup>1-2</sup> Oire uva visii tavitavipaavo rera iava ro-ia Turaro Jisas Krai, ira vovira voroverea taru vo rasio iare vo vokie-ia oa-ia vigei rutu ora guruvioverea rera tapo tousa. Uva ragai oiso goruvira rutu visii tavipaavo, ra viapau oiso vo vokia eva oearovu vo reoroaro uvuta, voeao oea oiso purapaaveira, “Turaro vo vokiara-a vao-ia oa pou piroi.” Teapi oisi vo favi uvoro visii raga ora visii iava rugugooara vavagisi pieta. Vo uvare oeai vai oirara vai pasi urusia vai-ia eisi evo reo ouiva, eke oeai vai Pauto vo reoro iava siposipopa irara vai vo reo eva kosi pieiva, eke oearoi vai pasi igei iava oisi puraepa oiso, “Pol vai pasi va iava taviroepa rera vo rigatoaro-ia.” <sup>3</sup> ✨ Oire ra viapau oiso voea vo reoroaro evara kuuvuara oirao piepata. Vao vituaro iava uvare viapau vo voki-ia vao Turaro ovokia-ia voroverea vo rara viapau vo vokireo kareke rovope oiso-ia, vo vokie voeao vaaro oea Pautoa-va ora kaureopasa ora guruavereia. Ari vo vokie oa-ia ro Vuritoa Rutu viaevira ora karekeroverea, ira vuri pitupituro rutu vituaro karekepareveira. Era raga ita Vurito, ira eto kasi iare avaroverea. <sup>4</sup> ✨ Rera raga ita ro Vuritoa Rutu ira orekerovu rutuva ora upo rovoparoverea varao oara rutu-ia oirara rutu vuurapa vaisiro purapaiveira. Ora varao oara reesipaiveira oirare oiso purapaoro, “Vova vao-ia Pauto.” Oire uva rera-a eera ira ora rera raga ora rei pieroverea rutu varao rutu-ia puteoro. Ora oiso tapo osa Pauto vo kepaoro-ia Tugoropa Kepa Tempel koataroverea tapo. Uva vao pauoro oiso puraroverea ora rerare, “Ragai-a oiraopatoa rutu pauto.”

<sup>5</sup> E ragai vo reoroaro rugoopatai vao iava oiso, eke? Vo reoro oara oisoa vatepaa visiipa vo osa visii tapo oisoa toupaa. <sup>6</sup> Ari ita, ro Vurito

ira viapau oisi oai purapareveira. Eake iava? Uvare oavuei touvira oa rerare korupapeira. Uva va vai-ia taraipataveira ita pasi. Oiso-ia vosa vo koru eva opesi rovope, oire ra utupavira va isivaaro iava taru pouro virovera. <sup>7</sup> Oiraopavira rutu, uvare vo gorua vao-ia vuri vovou vo goruaro vituaro oa oirara oiso piepaiveira oa iava reo goruro gasipaiveira. Uvare vatauvira rutu sopaura sovara-ia kovopaiveira vo goru vao-ia. Ari ita, uva utupavira rutu ora poera iraooperea riro varivarivira rutu kovooro, vo rara evo koru vera rovorevera iravu raga ita oa vare korukorupapeira. <sup>8</sup> ✨ Oire uva va-a eva oa isivaaro iava rara rera ro ira vuri vovouro rutu-ia vituparoveira ira karekeroverea rara. Oa-a vao taru oa iava Turaro Jisas sisikorepaoro urioroverea. Uva vo sisikorea eva ora vo vuvuroa evara oara raga Turaro varaaro rera Vuritoa Rutu Oirato taru kopii pie ovoive rera opesi pieoro. <sup>9</sup> Rera raga ita ro-ia Vurito ira taru urioroverea vo Seten vo goruaro-ia orekerovu rutu purasa ravotovira. Uva vara rutu-a varao oara keakeavira raga toupaveira rera vo reesiroaro ora rera vo kovoroaro, vo osa viapau oiraoa vai vara-ia. <sup>10</sup> Oire uva vara-a varao riroara rutu kuuvu kovoro rera varaaro oara-ia oirara piro pie ovoirevera. Ra va iava opesi ovoiaev. Eake iava? Uvare oiraopa ruture isivapaaveira vao oa iava viapau oiso Pauto voea ourevera ora rera iare. <sup>11</sup> Uva va vituaro iava Pauto voea vavagisi pieerevera rutu. Ra va iava kuuvu kovoro oirao piepaive rutu. <sup>12</sup> Oire uva oiraopa kovore isivapaoro rorupaiveira varao raga vuri vovouro purapaoro. Oa-a vao oa vituaro iava Pauto voea roviriepaoro voeare oiso puraroverea, “Visii vao-ia vuri irara rutu.”

### *Pauto Visii Reesireva Ora Rera Iare Visii Ousa*

<sup>13</sup> ✨ Vokiara rutu-ia uvui iraoapaiveira ra vearo vaisi purapaio Pautoa-ia visiire rugorugooaoro. Araoko irara oaio, visii kavikopareveira Turaro, uvare rovoa rutu-ia visii reesi rovoreva vaore ora rera iare vovevira visii ousa. Oa iava Tugoropato Urauratoa-ia oiso visii pievera ra ora airereipaoro oiso rutu toupata, Pauto voeaoro rutu. Ora oisore tapo ra goruvira rutu rera vaaro oiraopa kovo rutu oirao piepata. <sup>14</sup> ✨ Uva va sovara-ia Pauto visiire keeroera Vearo Sipoipo vao oa iava visiipa siposipoiovora. Iu. Uvare Pauto visiire keeroera, oiso ra rera tapo ora tavosi ovoipaoro rera tapo ita keraria oupataveira rera vaaro ro Turaro Jisas Krai vigei reraoro. <sup>15</sup> ✨ Araoko irara oaa, goruvira rutu torepata varao-ia pitupaoro oiraopara rutu. Oara-ia visii tarai pieiovora vo osa vara iava visii siposipoiovora, ora vo osa vara iava visiipa rigatoara sipopaavora.

<sup>16-17</sup> ✨ Uva eisi osa iava oiso ruipaparai ra vigei reraoro Turaro Jisas Krai ora ro vigei Aitearo Pauto visii vakuvakuvira rutu tore piepasi, auere ra vearopa vovouro goruara rutu purapata ora vearopa reoro. Oiraopavira uvare Pauto vigei vo vovouroaro varaata piepareveira ora rera vaaro iavirava vereopa vovouaro. Ora vigeipa siraoaroveira vokiara rutu-ia vigei varaaro rari vukuro vituaro purapaoro.

## 3

### *Visii Rutu Variripata Ra Pauto Igei Tavvapareve*

<sup>1</sup> Araoko irara oaio, visii akepaavoi oiso ra variripata igeipa. Ra va iava ikaupavira rutu Turaro vo rearo uvarovu ruture sikasikapaio. Osa iava vo reo-ia oearovu uvuipai ra Pautoa-ia vuurapa vaisi puraive oiso osa visii

pie rovtava voari rovtovira. <sup>2</sup> Ora vaore tapo variripata Pautoa-re ra igei utopareve voeao asavira vuri irara. Teapi igei vuri piepaive. Oiraopavira oearovu epao oea viapau oiso igei vo siposiporoaro oirao piepaiveira.

<sup>3</sup> ✧ Ari ita, viapau tavarioa vai peira rera-ia ro Turaro. Ira touvira visii varaaro oirao pie vovouro goru piepareveira visii virivaripaoro ro asavira Vuritoa Rutu. <sup>4</sup> Uva ro-ia Turaro ira igei vo rugorugooroaro tore piepareveira visii iava tavipaoro, uvare vearovira rutu igei vo siposiporoaro sirova utupataveira. Ora tapo osa evo vovou isivaaro iava topa pievira ita utupauavi oisi piepataverea.

<sup>5</sup> ✧ Ari ita, Turaro raga uvuiparoi ra visii sopaaro ivupareve vore Pauto vo siraoaro. Ra voa toupaooro goruvira rutu toupata oiso osa Kraiss.

### *Oirara Rutu Uvuipaai Ra Kovo Iraopaive*

<sup>6</sup> ✧ Araoko irara oaoi, goruvira rutu oiso visii tavi iraopaavoivo vo vaisio sovara-ia ro-ia Turaro Jisas Kraiss voeao vatavatapasa, oea pokapoka pitupituro purapaiveira igei vo reoroaro sirova utupa arapa. <sup>7</sup> Oire vara-ia varao vearo pitupituro tarai iraopata, ra vara sirova goruvira utu iraopata pokapoka asavira oara oisoa purapaio. Uvare viapau oisoa pokapoka vovouro vai oisoa purapaio vo visii tapo toupaooro. <sup>8</sup> Igei viapau oiso akuku tauva vai ou ragalova visii ruvara iava. Viapau. Ari evara aioara oara oisoa voripaio visii ruvara-ia. Ari ita, kasivarivira rutu oisoa kovopaio vo aviaviaro ora vo vokiario moni oupaoro auepa oiso, teapi visii vo moniario aio ragapaio. <sup>9</sup> Uva eisi osa oisoa piepaio visiipa ovoovoara purapaoro visii osireiario-ia. Ari oiraopavira oiso uvui irao ragapaioveira oiso ra oisi visii tavipaio, ra igeivi akukuvira tauva ragapata, uvare Pauto kovopa iraraaro-a igei. Vo osa viapau uvuipaiei ra eisi oisi visii tavipaio. <sup>10</sup> Vo osa visii tapo oisoa toupaoio uva oiso oisoa visii tavipaio, “Vosa irai viapau moni kovo vai purapareve, ra va iava viapau oiso aiopareve.”

<sup>11</sup> Uva oiso purapaiei visiire uvare vo reo uvuiovaro oiso-ia, “Oearovu visii iava pokapokapaaveira voraro vokapaoro oearovu vo rugorugooroaro torevoko ragapasa ora voea vo ruiparoaro raga-ia.” <sup>12</sup> ✧ Uva voeare ravaavira goruvira rutu oiso purapaiei vo vaisio sovara-ia Turaro Jisas Kraiss, auere ra ora voea vo kovoaro vearovira rutu purapaive ora tape pie ragapaoro. Osa piepaoro uvuipaai ra moni oupaave ora voea vo pauaro voripasa.

<sup>13</sup> Oire visii-a vao opeita reasi iraopata varao veaopara purapa arapa. <sup>14</sup> Vosa irouto visii iava viapau igei vo reoroaro sirova utuparo vo pasio-ia, ira-ia uvuipatai ra rera reesita. Ira uvuipatai vatavatata, ra va-ia ora rera-ia ariia oureve. <sup>15</sup> Uva opeita oiso rera piepata, Visiiva keripato. Viapau. Ari vorevira uvuipatai ra rera vosita. Aue iava uvare rera-a eera visii araokotoaaro.

### *Ovoioapa Reo Vao-ia*

<sup>16</sup> ✧ Ro vigei reraaro Turaro ira raga-a gavaure vovou rutu vituaro. Uva oiso ruipaparai rutu ra gavaure vovou rutu vituaro iava visii vatepareve vo vokiara rutu-ia oraivarovu rutu-ia. Osa iava uvuiparoi Turaro ra visii tapo toupareve.

<sup>17</sup> Ari ita, ora ragai raga vavaeoro iava vo rigato puraavoivo oiso-ia, Vearo Voki ragaiva Pol. Vo pitupitua vao oa sirova uturai vao opesi pieoro osa pasiara rutu opesi pieavoivo. Eisi ragavira ragai vo kiroaro keketa.

✧ **3:3:** 1 Ko 1:9; 1 Te 5:24; 2 Pi 2:9 ✧ **3:5:** 1 Kro 29:18 ✧ **3:6:** 1 Ko 15:1-13 ✧ **3:12:** 1 Te 4:1, 11; Ef 4:28 ✧ **3:16:** Ro 15:33; Rut 2:4

<sup>18</sup> Ra visiipa Turaro Jisas Krais eua vereopa vovou vatereve visii tauva-  
paoro, ra visii tapo touve.  
Evavi raga osa vo pasio purapaavoi.  
Ragai-a vao, Pol.

## 1 TIMOTI

### Irapa Reoro Vo Vukuo Iava

Ovokirovu-ia Pol vaio ora Timoti oisoa kovopasi, oa iava Pol Timoti arureva Efesas urui iare, oiso ra voa toupaooro lotupa irara tauvapareve irapaoro voeapa (1 Ti 1:3).

Goruvira Timoti tavireva rera vosipaoro voeao asavira kuuvu irara tisa irara. Teapi oirao pie vovou irara vavagisi piepaive ora voea varaaro-ia kuuvu reoro. Ora auere tapo Timoti tavireva oiso ra riro oirao pie vovou irara vai reesireve lotupa kovo-ia pitupasa. Rirovira tavitavipai vo pasio aue iava lotupa kovo, ora aue iava voeao lotupa kovo-ia irapa irara.

1. Aviavi pie reoro-ia Pol reoroepa, 1:1-2.
2. Lotupa kovo iava rigatoroepa Pol oiso-ia, variri purapa pitupitu, ora irapa irara reesisa, ora kuuvu irara vo siposiporoaro vatavatapasa vara uvu arapa, lotupa riako vo pitupituroaro, ora lotu purapa pitupituro iava vara, 1:3–3:16.
3. Oreorovu vatereva Pol Timoti-pa rera vo vovouaro goru piepasa vo osa lotupa kovo-ia iraparo, 4:1–6:21.

1-2 ✧ Ragai-a Pol ragoa vo pasio rigatoavoi viipa Timoti viigoa goruvira rutu Krai oirao piepariveira. Oa iava oiso toupaveira, Ragai oviitoaoro rutu. Ragoa roporeva Pauto Krai Jisas-pa kovopasa. Rera raga Pauto ro ira vigei vovevira oureva vigei virivariooro ora rera iare, oiso ra Krai-re Jisas tuevira toupape. Uva variriparai Pautoa iare Aite ora Krai Jisas vigei reraaro Turaro, oiso ra viipa tauvaa ora siraopa vovou vatesi ora gavaure vovou.

#### *Uvui Iraopaviei Ra Oreorovu Rutu Kuuvu Reoro Veripape*

<sup>3</sup> Vo osa ragai Masedonia Provins iare avaparaera, uva evoa oiso goruvira rutu vii taviava, ra evoa raga toupari Efesas-ia. Uva vorerivira ita oisi vii tavipaavoi, oiso ra voa raga evoa toupari. Eake iava? Uvare oearovu oearovu iava kuuvuara siposipavoi. Osa eisi vituaro iava uvuipauei rutu ra voeare korupau vo reoropa evara. <sup>4</sup> ✧ Oiso voea evoea riro kuuvu irara tavipari, “Opeita vo siposiporo purapata vo rasio raga iava vara. Ora opeita aao irara oavisii vaivaisiario vievieipata. Uvare vo reoro evara oara vituaro iava kaureo vovou karekepapeira lotupa irara iava. Viapau oiso ra vo siposiporo purapata vo rasio raga iava. Viapau. Uva vo reoro evara viapau oiso uvupai visii vo rugooroaro-ia kovopasa Pauto vo taraiaro soporepaoro visiipa. Viapau.” <sup>5</sup> ✧ Ari ita, vao goru reo rutu voeapa vatepari, ra voea iava vovouisiro oaive torepe ora voeapa sirao vovou rutu puraoro. Uvare va vao-ia sirao vovou oa voeao-ia toupaveira oea torevoko vovouo rutu purapaiveira, ora oa voeao-ia tapo toupaveira oea viapau oiso ora voea iava sopaura oaive sovopaoro oiso purapaaveira, “O ari touvira rutu vuri vovouoro-a varao oara purapapeira.” Ora oa-a vao oa voeao-ia tapo toupaveira oea oiraopavira rutu oirao pie vovouo purapaveira.

<sup>6</sup> Oearovu ora voea vo vovouoro iava ora piro piepaaveira varao oirao pie vovouo kavupaoro. Osa iava voea iava rugorugooara riroirovira raga avapapeira akukupapa reoro raga-ia ora reopaoro. <sup>7</sup> ✧ Uva oiso ruipa ragapaaveira ra oiso rutu toupaveira oea voeao oea Pauto vaoro iava reo goru siposipaveira. Oa-a eva oa iava voea vo rugooroaro paipai ragapaaveira

vo reoro-ia roroiovira taraipa arapa, oara iava siposipopaiveira osa viapau oiso vara-ia taraipaave.

<sup>8</sup> Vigei taraipavioveira vao-ia, Reo goru vearo-a, vo osa torevokovira rutu vo taisi iava siposipopaive. <sup>9</sup> Uva eisi osa iava uvui iraopaviei ra vearovira rutu taraipavio oaravua-ia reo goruro. Uvare viapau oiso voeaopa vao reo goruro, oearoa torevoko vovouro purapaiveira. Viapau. Ari voeaopa oea vara gasipaiveira, ora voeao oea vuri pitupituro rutu purapaiveira, ora voeao oea viapau Pauto oirao piepaiveira, ora voeao oea viapau oiso lotuapa ruipapaave, ora voeao oea viapau Tugoropato Uraurato vo vovouaropa ruipapaaveira, ora voeao oea aite irara oaive ora aako riako upopaiveira ora oearovu rutu oirara upopaiveira. <sup>10</sup> ✧ Ora voeao tapo otopa irara, ora voeao oea ora oupa pitupituro vuri piepaiveira, ora voeao oea oearovu oirara kavirupaiveira voea-ia monia oupasa, ora voeao oea kuuvu reoro raga purapaiveira vo rara viapau vearopa reoro rutu purapaive orekerovu oirao piepasa rutu. Ora voeao tapopa reo goruro toupaveira oea vuri pitupituro sirova utupaaveira, vo rara reasipaave oiraopa siposiporo rutu sirova utupa arapa, <sup>11</sup> varao oara Vearo Siposipo rutu-ia toupaveira, vo siposipo oa Pauto ragaipa vateveva oisore ra va kosi piepaa. Ari ita, rera raga vo siposipo eva kosi piereva Pauto ro ira vaaro-a keraria oa aviaviava toupaveira. Ira raga-ia oiraopa roru rutu toupaveira.

### *Pol Ira Pautoa-ia Vearo Vaisi Purareva Uvare Rerapa Siraoparoepa*

<sup>12</sup> ✧ Vearo vaisi purapaavoi Krai Jisas-ia vigei reraaro Turaro. Ira ragai vatepareveira vo goruo vo kovo purapasa. Uva va-a vao oa iava vearo vaisi purapaavoi rera-ia, uvare ragai-ia raripaoro Krai vo kovo toveveva ragai-ia oiso ra rerapa kovopaa. <sup>13</sup> ✧ Ari ita, oiraopavira rutu voari tuariri vuri reoro rutu oisoa purapaa rera-ia Krai. Oa iava oisoa keripa vovouro rutu purapaa oirao pie vovou irara rutuva rera voeaoro. Ora oiso osa tapo oisoa rera vaisiaro tovipaa. Uva Pauto ragaipa siraoroepa vo rara viapau rera oirao piepaa vaaru vovouvira rutu tupaoro vuri vovouro rutu purapaoro rera-ia. <sup>14</sup> Uva oisi-a eisi osa iavirava ragai-ia kaviko vovou rutu purareva. Uva va iavirava ragai vo vovouaro tore piereva rutu oirao pie vovou ora vao siraopa vovou vateoro. Ovovourea vigei-ia toupaveira vo rara Krai Jisas tapo ora tavosipavio rutu.

<sup>15</sup> ✧ Uvare vo reo-a vao-ia oiraopa reo rutu oreoa-ia uvuipaa pitupaoro va oirao piepaive. Oreoa vao-ia oa oiso purapai, "Krai Jisas vararoepa vo rasio iare, oiso ra raiva purareve voeaopa vuri irara. Ra va iava vovovira voea kae piereve." Ari ita, ragai-a vuritoavi rutu. Oiraopavira ragoa oearovu rutu-ia vuri irara oisoa putepaa vuriara rutu purapaoro. <sup>16</sup> ✧ Uva va-a eva oa iava oisi eisi Pauto ragai-ia vo sirao oiso karekereva. Osirao-a vao oa iavirava oisoa Krai Jisas ragai ate piepareva vaore tuepaoro ra ora ragai iava sopau oaa vovovira pore rera iare. Uvare oiso rutu oisoa toupaa, Rovopatoa rutu ragai vurito. Ra oearovupa voeao utupa irara oiso rutu ovovovira tupaaveira. Uvare ragai porereva ora rerapa ragaipa sirao iraopao rutu. <sup>17</sup> ✧ Ro Pauto Kataitoo raga ira viapau opesia vaiei, ira viapau uvuipaa ra rera kekepe ro ira orekerovu rutupa veiparoveira. Oa iava uvuipaviei ra rera vaisiaro kae piepaoro rera-ia vuvurapa vaisi purapape vokiara rutu-ia. Ovoiei.

### *Uvui Iraoparoepa Timoti Ra Kuuvu Siposiporo Pura Irara Torevokoreve*

18 ✨ Timoti oviitoa oaa, vii vatepaavoi vo reo-ia riro goru reo rutu, oiso ra evoea riro kuuvu siposiporo pura irara torevokopari. Osa-a eisi osa purapaoro vo reo sirova utuparai profetato oa purarevorao vii iava voviri tuaririvi. Evo reoro-ia goruara rutu pitu iraopari oara oiso rutu toupaveira osa upo purapara. Oara-ia uvuipauei ra vearovira rutu upoa purapari vuria vo goruaro tokooro. 19 ✨ Osa iava eisi uvuipauei ra goruvira rutu oirao pie vovou rutu purapari sisigarue vovou rutu iava. Ari ita, oearovu viapau oisoa oisi eisi piepaive, vo rara va eva sisigarue vovou rutu veripaive. Osa iava eisi oisoa ora voea vo vovouaro oirao piewa vuri pie ovoipaive. 20 ✨ Oiso osa aitereivu-a vaiereo evoea iava Haimenias ora Aleksanda. Aiterea tovoava Seten vavaearo iare, oisore ra voa taraia oui siraoa vo tavakaaro-ia. Ra oisi iavirava Jisas vaisiario takau arapa eakasi.

## 2

### *Oiso Osa Ragavira Uvuipaviei Ra Variripavio*

1 Oire uva vao-ia rovopa reo rutu vii tavi rovopaavoi ragai vaaro viipa vao variria vo pitupituaro iava oiso-ia, ra vokiara rutu-ia variripau voeaopa oea voraro rutu toupaveira ora vigei tapopa. Uvuipauei ra Pauto akepari vaore, oiso ra voeaou tavapareve, vo osa vearo vaisi purapari Pautoa-ia vo tauva-ia vao oare variripau. 2 ✨ Uvuipaviei ra reipa irarapa variripavio ora voeaou turaro irara oea vigeipa reipaaveira. Oa iava uvuipaai ra va-ia tauvaa oupaoro vearovira rutu vigei tokipaive. Osa iava uvuipaviei ra gavaurea-ia toupape ora vao kave vovou-ia, vo rara eisi vearo vovou rutu purapape Pautoa-pa avivikepaoro rutu, uvare vigeipa reiparaveira. 3 ✨ Osa piepaoro eisi uvuipaviei ra Pauto roru piepape ro vigei Kae Piepatoaaro. 4 Ari ita, ira ora rera vo ruipaoro sirova vao-ia oiso oirara vorevira ora rera iare oupareveira. Ora oiso ra oisi iavirava rera-ia taraipaave vao iava rera vo reoro oiraopa rutu. 5-6 Uvare oiso rutu-a rera raga ro-ia Kataito Pauto, ora ro-ia Kataito Kraiss Jisas Vuruvuru-iapato. Ro ira Pautoa-va vorevira oirara rutu agiagi piewa va iavirava rera vo vovouaro. Vao-ia osa ora rera iava vasereva, oisore ra rera upoivora, vigei varaaro vuriara voriaro oureve evao parikou-ia. Ovuuta-a eva oa purareva oa torevokopai. Pauto oa purareva oisore ra va iava rera vo vovouaro oirao piewe oirara rutu vorevira virivariaro. 7 Oa-a eva vituaro iava Pauto ragai siporeva oisore ra aposel kovo puraa, ora vo osa ratau tou irara tarai piea. Vo rara oisi eisi piepaoro vo siposipo kosi piepaa oirao pie vovou iava. Viapau oiso kuuvuparai. Viapau. Ari oiraopa rutu-a vao-ia ragai vo kovoaro iava.

8 ✨ Uva oiso ruipaparai ra oirara rutu voeaou voraro rutu variripaave, voeaou oea Pauto vaaro oiraopa vovou sirova utupaaveira va purapaoro. Oea uvuipaai ra ora voea iava vavaeara oaive kae piepaoro variripaave, vo rara viapau kaureo vovouro vaiva toupaveira ora kasipu vovouro vai.

### *Reoara Vairopa Riakora*

9 ✨ Oiso ruipaparai tapo vao iava oiso-ia ra evairo ora vairo-ia vearo visivi kuvuara tovopaive vaopa, teapi ooritorovu rutu ora vairo-ia oruaro-ia tovopaive. Ora tapo vaopa, teapi rirovira rutu varao-ia aasipaave bisiaara oara-ia riropa moniro rutu vikipaveira vara-ia ora orito ragapasa. Ora teapi orito ragapasa riropa moniro viki ragapaveira vara-ia varao varoara. 10 Viapau. Ari vao-a oiso-ia vosa vearo vovouro rutu purapaive vairo evairo, ra oisi iavirava oearovu vairo kekepaoro oiso purapaave, "Oiraopavira rutu

✨ 1:18: 1 Ti 4:14; 2 Ti 2:2-3 ✨ 1:19: 1 Ti 6:12 ✨ 1:20: 2 Ti 2:17, 4:14 ✨ 2:2: Esr 6:10; Ro 13:1 ✨ 2:3: Ro 12:2; 1 Ti 4:10; Ap 16:31 ✨ 2:8: Sam 134:2 ✨ 2:9: 1 Pi 3:3



lotupa riako taru vo riako.” <sup>11</sup> ✧ Vosa lotupa riako vuurapa vaisi purapaive vo lotua-ia, ra uvui iraoapai kuuvaki visivi rutu toupave oearovivupa avivikepaoro. <sup>12</sup> Ragai vo rugorugooaro oiso toupavei, Riakora viapau uvuipaa ra oirara taraipaive voeapa reipaoro. Viapau. Ari evairo uvuipaa ra kuuvaki visivi toupave avivikepaoro. <sup>13</sup> ✧ Eake iava? Uvare Pauto Adam pura rovoveva. Uva va isivaoro iava utupavira Iv purareva. <sup>14</sup> ✧ Oisi-a oiso osa ragavira rakoru viapau oiso Adam keakeaveva rera kove pieoro. Viapau. Ari riakova-a iria vo reo eva sirova utuopa koveoro, vo uvare oira-a riakova iria Pauto vaoro reo goru gasieva vao oa vatereva Pauto vaitereipa tapo. <sup>15</sup> Uva Pauto vorevira iriai kae piereverea vo osa oiraopa vovou rutu pura roveve rera-ia. Vo rara torevokovira rutu kakae kavaupao, ora vo rara oearovu tauvapaive voearopa siraopa vovou purapaoro. Ora aue tapo vo osa ora airereipao vuri rugooaro asavira, ra veoro rugoo raga-ia toupave. Osa iava eisi oiraopavira rutu Pauto oira vorevira ourevereera rara ora rera iare.

### 3

#### *Voead Vo Reoaro Lotupa Uvurupa Tokipa Irara*

<sup>1</sup> ✧ Vo reo-a vao oreoa-ia oiraopavira rutu oiso reopara. Vosa irouto oiso vovouparo ra lotupa irara tuvetupepareve, osa ita eisi veuropai. Uvare oisi eisi oiraopai veoro kovo. <sup>2</sup> Ari ro ira lotupa irara sovora-ia reiparo, ira uvuiparoi vosa viapau rera-ia vuri vovou vai toupave. Ora vosa kataiva ragava vatuava toupaveve. Ira uvuiparoi ra ora airereiparo vavao tokipaoro rutu ora rera iava varau vo ruiparoaro. Vo rara vereepa vovou rutu torevoko purapaveve oearovupa ora rera vo kepaoro-ia voeoro koata piepaoro. Osa ita veuropai vo osa uvuiparoi ra vearovira rutu oearovivu tarai piepareve. <sup>3</sup> Vo rara viapau spakparo, ora kasipu vovouro purapaveve oearovivu upopasa. Ira uvui iraoaparoi ra kave vovou rutu purapaveve ora kuuvaki tou. Vo rara viapau oiso riro rugorugooaro vai rutu oupareve, oiso ra oisi iava rirovira rutu moni ouparo. <sup>4</sup> ✧ Oa iava uvui iraoaparoi ra vearovira rutu ovii irara oaro toki iraoapaveve voea torevokopaoro. Ra va iava rera vo reoroaro uvupaivora, oisi raga piepaive osa rera. <sup>5</sup> Vaopa vosa viapau oiso ovii irara piepareve oiso ra rerapa avivikepaave, uva apeisi ragavira-a oiso osa uvuiparoi ra vearovira rutu lotupa irara tokipaveve, raa? Uvare voea tapo ita-a evoea Pauto ovii iraraoro. <sup>6</sup> Ro ira airevi raga ora rera iava sopaua oaro porereve Turaro iare, ira viapau uvuiparoi ra oirarapa reiparo. Eake iava? Auepa teapi ikavira rutu ora rera vaisiario rei pierave ora rera vo kovoaro rugooaro. Ira-a eera-ia Pauto uvuiparoi ra rera verareve rera vo vovouro sirovava eva tavoko vovou oiso osa Seten pierave. <sup>7</sup> ✧ Oire uva viapau uvuiparoi ra lotupa kovo-ia pitupaveve vo rara voea tapo lotu asa irara rera vaisiario-ia viapau veoro vaisi purapaive. Ra oisi iava viapau oiso rera avivikepaave. Osa iava eisi uvuiparoi ra kovero vo rara oisi iavirava Seten vo kokaraoro rera iare kare piro.

#### *Vo Toupai Vo Reo Voeaore Oea Lotupa Irarapa Irapaaveira*

<sup>8</sup> ✧ Voea oea tauvapaaveira lotua vo kovoaro-ia oirarapa irapaoro, vo osa veoro vaisivira tupaoro evo kovo purapaive. Vo rara viapau rutu oiso uvuipaa ra voea keakea ragapaive voeapa reo vatepaoro vo rugorugoor-eiva. Ora vo rara viapau spakpaave, ora iirukopaave, ora voea raga-ia rugorugooaro. <sup>9</sup> ✧ Vo osa goruvira rutu oiraopa reo rutu-ia pitupaveve

✧ 2:11: Jen 3:16 ✧ 2:13: Jen 1:27; 1 Ko 11:8 ✧ 2:14: Jen 3:6; 2 Ko 11:3 ✧ 3:1: Ap 11:30, 20:28-30 ✧ 3:4: Ta 1:6 ✧ 3:7: 1 Te 4:9-12; 1 Ko 5:12; 2 Ti 2:26 ✧ 3:8: Ap 6:1-8 ✧ 3:9: 1 Ti 1:19

vao oa-a oirao piea vo vovouaro rutu vituaro. Uvare viapau uvuipaai ra vuri rugorugoova toupave. Ari vao ragava roroio vovou. <sup>10</sup> Uvuipau ra voea evoea kovopa irara vo pitupituroaro siitue rovopari rutu. Oire vosa vearovira rutu kovopaive, oa iava uvuipaai ra oisi kovopaive vearovira. Ra voea reesipari oiso, Tauvapa irara-a voeao-ia. <sup>11</sup> ✧ Ora evairo tauvapa riako airoa tapo uvui iraoapai ra oisi vearo vovouro rutu purapaive. Aue iava rara viapau rirovira reo rovopaave oearovivu toga ragapaoro oreorovu-ia kuuvuara. Ora vo rara viapau rirovira rutu ukaiopaave goruara-ia. Ora uvui iraoapai ra goruvira rutu kovopaive. <sup>12</sup> Vosa irouto ro ira tauvaparotua-ia, ira uvui iraoapai ra kataiva rutuva vatuaava toupaveve. Ora ovii irara oaro tapo ora aao irara vearovira rutu tokipareve tapo. <sup>13</sup> Voeao tauvapa irara oea vearo kovo purapaive vo lotua, oea vearo vaisi ouiverea taru oearovu ruvara iava vovio utupaua. Osa vituaro iava tuuvu vovouvira rutu oearovu vearovira rutu tavitaviiverea va iava vao Krai Jisas-ia raripa vovou.

### *Pauto Vo Rearo Rutu Vituaro Iava*

<sup>14</sup> Oiraopavira rutu uvare ragai oiso ruipaparai ra vii kekea rara. Va vao oare rugoopaoro vo rigato puraavo viipa. <sup>15</sup> Ari vosa oavu avu vai ragaire korupere, ra oisi iava viapau ikauvira vii iare uriora, uva uvuipauei ra ragai vo rugoaro ouoro vearovira vo pasio vieiri. Uvare oiso ruipaparai rutu ra taraiu vo pitupitu-ia vao-ia oa purapapeira lotua-ia, vao lotua Pauto vaaro ro Pauaka Tootooto rutu. Ro Pauto kukuuvu tuuta rutu ora vitui rutu vaopa oiraopa reo rutu vituaro. <sup>16</sup> ✧ Iu, uvare apopoivira rutu toupai Pauto vo vovouaro, vo osa va-ia taraisa ruipapavio. Ari oiraopavira va kareke piesa oiravira karekeroepa. Oa iava Tugoropato Uraurato rera vo vovouaro torevokoa rutu oirao pievira karekereva. Ora vo osa purapurapa irara voeao ensel rera kekeiva. Ora vo osa oearovu rera iava siposipoiva voraro rutu vo rasio-ia. Oa vituaro iava riro irara rera oirao pieiva. Oa iava Pauto vorevira rera ipa piereva vuvuiua iare.

## 4

### *Riro Kuuvu Irara Iava Vo Reo*

<sup>1</sup> ✧ Ari ita, roroiovira rutu Tugoropato Uraurato oiso taviparoveira, Utupaua oearovu oirao pie vovouro oaive kavupaiverea. Vo osa ora voea iava sopaura oaive porepaive kuuvu urauraro sirova utupasa voeao Seten vovearo. Vo osa tugara vo siposiporoaro uvupaive vara purapasa voeapa kovopaoro. <sup>2</sup> Voeao iava riro kuuvu irara osiposiporoa kosipa piroveira voea oea viapau vuri vovouro sovopaiveira ora voea iava sopaura-ia. Vao iava uvare voea iava sopaura rutu tupapa piroveira. <sup>3</sup> ✧ Oea oiso voea tarai piepaiveira oiso purapaoro, “Viapau oiso vearovai ora oia. Ora oaravu tapopa aioara oara voeapa tugoropapeira. Oa iava viapau uvuipaai oearovu vara aiopasa.” Ari ita, oiraopavira rutu varao-ia aioara rutu Pauto oara rutu pura rovoreva vaore, oiso ra oirara vara oupaive aiopasa rera-ia vuurapa vaisi pura rovopaoro. Oire va iava vara taru aiopaive voeao oea Pauto oirao piepaive oiraopavira rutu rera vo vovouaro-ia tarai rovopaoro. <sup>4</sup> ✧ Orekerovu rutu Pauto vearovira rutu karekereva. Oa iava viapau irai uvuiparoi ra vara iava oaioi veripareve varao. Viapau. Ari uvuiparoi ra vara rutu oupaoro Pautoa-ia vuurapa vaisi purapareve vara iavirava.

✧ **3:11:** 2 Ti 3:3; Ta 2:3 ✧ **3:16:** Ais 7:14, 9:6-7; Jo 1:1-14; Ap 1:10-11 ✧ **4:1:** Mt 24:4-8; 1 Jo 2:18-29 ✧ **4:3:** 1 Ko 7:28; Hi 13:4; Jen 1:29 ✧ **4:4:** Ro 14:14

<sup>5</sup> Eake iava? Uvare Pauto vara rutu karureva, oisore ra vigei vara rutu oupape. Ra va iava rerare variripavio rera vo reoaro-ia vaivaisipaoro variria-ia.

*Vo Timoti Iava Toupai Uva Uvui Iraoparoi Ra Vearovira Rutu Oiso Toupaveve, Vearoto Krais-pa Kovopato*

<sup>6</sup> Ari ita, vosa eisi lotupa irara tarai piepari evo reoreo-ia rugorugopaoro, oa iava uvuipau ei ra oiso rutu toupai, Vearotoa rutu vii Krais Jisas-pa kovopato. Uvare oirao piea rutu iava vo reo-ia ora torevoko vovou rutu purapa, oarea rutu uvuipai ra vii-ia torevoko vovou riro piepaive va kova piepaoro. <sup>7</sup> ✧ Uva viapau oiso uvuipau ei ra evo reoro uvupari kuuvuara, oara viapau oiso Pautoa iava siposipopaiveira. Viapau rutu. Ari uvuipau ei ra varapa ora airerei iraopau. Oa iava vii iava sopaua uvuipai ra gorupape rutu Pautoa raga vo pitupituaru iavirava. <sup>8</sup> Ari ita, vigei ora vigei iava varaura tokipaoro rorupapeira oisi eisi piepaoro. Uva va-a eva oa-ia riroa rutu rorua oupapeira, vo rara vearovira rutu ora vigei iava sopaura airereipape. Eake iava? Uvare eisi iava Oiraopa Tootoo rutu oupere rara vo vokio ora voari utupaua. <sup>9</sup> Oreoa-a eva oa oiraopa reo rutu. Oa-ia uvuipai oirara rutu goruvira rutu pitupaoro va oirao piepaive. <sup>10</sup> ✧ Oa-a eva vituaro iava kasivirivira rutu kovopapeira. Uvare Pautoa-ia raripapeira ro ira pauakavira rutu tootooparoveira. Ira raga ita ro kataito ira taru oirara kae pierevrea. Oiraopavira rutu ita, uvare rera raga ira vigei virivaripaveira vigoa rera oirao piepapeira.

<sup>11</sup> Goruvira rutu tarai piea purapari varao-ia. <sup>12</sup> Opeita ariipau ora vii raga vo rara oearovu oiso purapaave viire, “Easi viovokotoa raga eera.” Viapau rutu. Uvare vii raga uvuipau ei ra voeopa riro oirao pie vovou irara ovoovoa purapari vearopa reoro rutu purapaoro, ora vearopa vovouro, ora vereopa vovou. Ora vo osa tapo riro goruvira rutu rari vovou rutu purapari ora sisigarue rugorugooro rutu roroioara. <sup>13</sup> Ragaire tupepaoro rirovira rutu siposipoara Tugoropa Vuku iava vieipari lotupa irarapa siposipopaoro, ora voea tarai piepari. <sup>14</sup> ✧ Ora oiso ra opeita vo vatevatea eva ropi ragapari Tugoropato Uraurato oa viipa vatereva. Oa-a eva oa-ia vii iava ravaa reo puraiva. Oa iava reipa irara rutu vii ariaraoro ora voea iava vavaeara tovoiva vii viraakooro. <sup>15</sup> Uva vatatopovira rutu vo pitupituro evara puraparivere vaore, osa oearovu vii siituepaoro oiso purapaavere, “O ita, vearovira. Uvare rera vaoro oirao pie vovou kovapai.” <sup>16</sup> ✧ Ra airereivira rutu ora tokipauvere vearovira rutu oearovu tarai piepaoro. Ra opeita raveravepauvere vearopa kovoro purapaoro, uvare vara-a evara oara iavirava uvuipau ra virivaripau, ora voeao oea vii vo reoaro uvupaiveira.

## 5

*Vearo Vovou Vao Oirara Rutu Torevokopa*

<sup>1</sup> ✧ Opeita kasipuvira iravivu avukato vo vovouaro torevokori. Viapau. Ari uvuipau ra vearovira rugopaoro oiso-ia rera kave visivi torevokori oiso osa aiteara rutu piepariveira. Ora viovoko irara tapo oisi eisi piepari oiso osa arako irara oara rutu piepariveira. <sup>2</sup> Ora avuka riakovi tapo oisi eisi piepari vairo torevokopaoro airoa ita oiso toupai, Vii aako riakoaro. Ora favauru riako tapo oisi eisi torevokopari airoa ita oiso toupai, Vii taataa riakoaro evairo, vo rara vearo rugorugooro raga purapari vairo-ia.

*Raroe Riako Iava Vo Reo Vairo Airoa Arova Vatua Irara Kopiipaaveira*

✧ 4:7: 2 Ti 2:16; Hi 5:14 ✧ 4:10: 1 Ko 4:11; 1 Ti 2:4; Ap 16:31 ✧ 4:14: 2 Ti 1:6; 1 Ti 1:18

✧ 4:16: Ap 20:18; Jos 1:1-9 ✧ 5:1: Lev 19:32

<sup>3</sup> Vearo vovou rutu purapari vairovipa vairo airoa oiraopavira rutu raroevira raga toupaveira. Vao iava rara viapau rutu oearoi vairo tokipaive. <sup>4</sup> Ari ita, vosa ovii kakaero vai toupave ora avu kakaero vai, okakaeroa ita evoea uvuipaai ra vearovira rutu vereopa vovoua oira tokipaive. Oa-ia uvuipaai ra vo tokiro tuuive otokiroa oisoa pura rovopaive vairo evairo voea-ia. Eake iava? Uvare vo pitupitu-a eva oa-ia uvuipaai ra Pauto roru piepaive. <sup>5</sup> ✧ O raroeva riakova iria viapau tauvapareve irai, iria-a eira kataivira raga tupaoro Pauto oirao piepaveira rutu, vo rara vokiara rutu-ia Pauto akepaeve variripaoro, oiso ra oira tauvapareve. <sup>6</sup> ✧ Ari ita, vosa iriai raroeva vai ora iriai raga vo ruipaoro sirova utuo vuria vai puraoro, ra va iava oiso rutu tupaave, Kopiiva rutu oira eira va iava eva oira vaaro vuria. <sup>7</sup> Voea rutupa uvui iraopauei ra goru reo rutu vatepari. Osa iava uvuipaai vuriara oaive eakapaive. Oa iava oearovu viapau uvuipaai ra reora vai-ia voea togapaive. <sup>8</sup> ✧ Oire vosa irai viapau oiso vearovira rutu ora irai sara irara vaiaro tokipareve ora aao irara vaiaro, ira ita-a eera ira oirao piepa pitupiture isivaparoveira. Vao oa iava rera vaaro vuria voeao vo vuriroaro-ia putepaveira rutu oirao pie vovou asa irara.

### *Vo Toupai Raroe Riako Iava Airoa Lotupa Kovo Purapaive*

<sup>9-10</sup> ✧ Vosa oisi raga raroevira tupaave vo rara kataitoa raga vatuaoto oira reraoro, oire oisi touevora, oearovu oiso oirare purapaave, “Iria o vereopa vovouo rutu vearopara purapaaveira.” Ora vosa vearovira rutu kakae vure airereivira riro piepaevora, ora oearovivu aapaapaupa iraravi rutu koata pie ragapaaveira ora oira vo kepaoro iare. Ora vosa oearovu Pauto voeaoro kokotoaro sisupaive. Ora vosa vearovio tauvapave oearoa tavaka vo siraooro vavataoro kaepaveira, ora okovorovu rutu vearopara purapaave. Vosa oirare katai vatara tau (60) ivaro rutu puteve, osa iava uvuipauei ra oira vaiiario rigatori airorovu vaiiario iare raroe riakoro. Osa iava lotupa irara uvuipaai ra vairo rutu tokipaive.

<sup>11</sup> Ari ita, viapau oiso ra vairo vaiiario tapo rigatopari airoroa viapau oiso avukapaave. Uvare evairo uvuipaai ra ora vairo vo ruiparooro sirova utupaave vorevira oira oupaoro. Osa iava pasi uvuipaai vai ra vorevira Krai-re isivapaave. <sup>12</sup> Osa eisi piepaoro vao reo goru gasipaaveira oa oisoa pura rovopaive oiso purapaoro, “Krais vairoaro vigei.” <sup>13</sup> ✧ Vairo raroe riako airoa viapau avukapaave, airoa uvuipaai vai pasi ra opitupiturovu oaive purapaive vo vuatarovio pute pie ragapaoro viripaive okeparovu iare. Ora opitupiturovu vai tapo oara vai-ia uvuipaai ra vara purapaive, vo osa vo vovouo sirova utu ragapaave siposipoara purapaoro kiuvu reoro raga iava. Varao iava vara oupaoro oara viapau torevokopapeira oiso ra vara iava reoreopaave. <sup>14</sup> ✧ Osa-a eisi osa ragavira ragai vairore raroe riako rugoaparai airoa viapau avukapaaveira. Airoapa vearopai vosa vorevira oira oupaave. Ra va iava kakae kavaupaoro vo kakaero vearovira tokipaive ora vairo sara irara tapo. Vosa oisi eisi piepaive, ra oisi iava vigeiva keripa irara viapau oiso vigei-ia vao oirao pie vovou irara ora reopaave vuri reoro vai-ia. <sup>15</sup> Oiraopavira rutu, uvare airovu evairo iava raroe riakoro Krai-re isivapaoro Seten sirova utupaaveira. <sup>16</sup> Oire vosa irouva o riro oirao pieva rutu iria uvuipaai ra vairo oira sara riakoaro raroe riako tokipaive. Osa iava viapau uvuipaai ra lotupa irara arepaave oisore ra vairo tokipaive. Viapau. Eake iava? Uvare lotupa irara vaioro tokipaaveira raroe riakoro airoroa viapau oearoi vairo tokipasa.

✧ 5:5: 1 Ko 7:32; Lu 2:37 ✧ 5:6: Je 5:5 ✧ 5:8: Mt 15:1-9; Ga 6:10; Ta 1:16 ✧ 5:9-10: Ap 9:36-43, 16:15 ✧ 5:13: 2 Te 3:11; Ta 1:11 ✧ 5:14: 1 Ko 7:9; Ta 2:5

### *Vo Reoreo Lotuapa Reipa Irarare*

17 ✧ Voeao oea lotua-ia reipaaveira oevi-ia uvui iraopatai ra vearovira voeapa tauvaa vateta. Ari ita, evoea oea siposipopaveira visiipa ora visii tarai piepaiveira, osa iava uvuipatai ra voeavipa vearo vovou rutu purapata pute pievira rutu. 18 ✧ Eake iava? Uvare Tugoropa Vuku-ia oiso purapaveira,

‘Vo kareo bulmakau kare oea wit-ia taciasipaoro uvuipaai ra vearo takuraro aiopaoro vokapaive kovopaoro. Uvare voriavi ovoiaro-a vo karepa.’

Ora vo reo tapo oa-ia oiso purapai,

‘Torevokopai kovopatoapa vori ousa evo kovo-ia rera vaaro.’

19 ✧ Ari ita, vosa irai kataitoavi vai oreoi-ia lotua-ia reipato toga raga- pareve, ra opeita rera vo reoaro uvupari, vaopa vo osa viapau aiterei opevai rera sirova toupave rera vo reoaro oirao piepaoro va vavata piepaive.

20 ✧ Voearo oearoa lotua-ia reipaoro vuria puraive, oa iava uvuipauei ra voea torevokori oirara rutu osireiario-ia. Osa iava uvuipaai ra voea kekeoro uririave. Ra viapau irai voea iava lotupa irara vuria vai purapareve.

21 Ragai-a vao oiso vo reo-ia vii tavipaavoi Pauto osireiario-ia ora voeao rera voeaoro oiso-ia, Krais Jisas-a ro ora purapurapa irara ensel. Uva oiso goruvira rutu vii tavipaavoi ra vo reo sirova utuu rutu ragai vaoro oa purapaavoi, oiso ra voea rutu areivira rutu torevokori vearovira. 22 ✧ Ra opeita vagevagevira ora vii iava vavaea tovopari oearovu-ia voearo reesipaoro, oearoa oiso vovoupaave ra Turaro vo kovoaro purapaive. Ora opeita voearo tapo ora tavosipau oearoa vuri vovouro purapaiveira. Viapau. Ari uvui iraopauei ra ora vii iava sopaua airereipari rutu vapa vao oiso, teapi vuria vai purari.

23 Opeita uuokoara raga-ia ukaiopau upiapaoro. Ari uvuipauei ra gare visivi raga wain ovi iava ukaiou ora vii iava kovuto ruvarupaoro. Aue iava uvare kovuto viire upiaparoveira.

24 Taraipauei oearovu poeravira rutu vuriara purapaiveira, ovovouroa-ia evara viapau uvuipai ra vataupape. Osa raga piepaoro vo rutu rekasiperea Ovoiopa Voki-ia uva taru ora voea varaaro voriaro ouiverea vuriara. Vo osa voearo oearovu vatauvira oaravu vuriara purapaiveira. Osa iava viapau ikaupavira voea varaaro-ia vuriara taraipavioveira. 25 Uva oisi raga ita oiso osa veapora kovoro viaevira karekepaveira. Ora vo kovoro garepa kovorovi oisivi vearo pieara ita oara tapo viapau oiso uvuipai ra vataupape.

## 6

### *Akuku Kovo Irara Iava Vo Reo*

1 ✧ Voeao oirao pie vovou irara oea vori ou asavira kovo ragapaiveira oea uvuipaai ra vearo vovou rutu pura iraopaive voearo-ia oearoa voeapa reipaaveira oisopa, teapi oearoi vuri reoro vai purapaive Pauto vaisiario-ia ora vigei vo taraiaro.

2 ✧ Oearovu voeao oirao pie vovou irara oearoa akukuvira kovo raga- paiveira voearopa oearovu riro oirao pie vovou irara rutu, uva voea evoea viapau uvuipaai ra oiso rugoopaave, Rera ro araokotoa oaa raga ita. Uva viapau uvuipari ra rera uvupaa. Ari ita, viapau rutu torevokopai oisi eisi rugoopaoro. Ari eisi ragavira uvuipaai ra kovo iraopaive pute pievira voeapa araoko irara oaive. Uvare voea ita oea oirao pie vovou irara tauvapaiveira.

### *Riroara Rutu Orekerovu Oupa Pitupitu Iava*

Oire vii Timoti, vo reoro iava siposipo iraopari oearovu tarai pieoro varia-ia. <sup>3</sup> \* Ari vosa irai osivu ragavira siposipoveve voea tarai pieoro, ro ira viapau vo reo vigei reraaro Turaro Jisas Kraiss vaaro viapau oirao piepareve rutu. Ro ira orugoovu raga oureve vao oa-ia uvuipaviei ra Pauto roru piepape, osa viapau oiraopa rugooa, <sup>4</sup> ira-a eera ira ora rera raga vaisiario kae piepareveira oiso purapaoro, “Riro taraito-a rutu ragai.” Ira-ia viapau taraia vai ei eera. Ira oiso ruipa ragaparoveira ra oearovuva kaureoparo vo reoro rutu vituarore taraa ragapaoro. Opitupitua-a eva vuria oa-ia riiriipa vovou ora upo purapa vovou oarea karekepapeira. Oupoa-ia oearovu ora tovipaaveira ora vaisi ragapaoro oiso, “Visii vao vuriara purapa irara.” <sup>5</sup> Uva oisi-a eisi osa iava ora kaureopaoro ora kasipupaaveira voea raga voeao oea vo rugorugooaro avagisivira toupaveira, uvare oiraopa reo ruture oisoa isivapaave. Oa iava oiso rugooapaaveira, Easi uvuipaviei ra lotupa vovou purapape. Oa iava uvuipaviei ra riroara vai rutu orekerovi veoropara vai oupape ora vigeipa.

<sup>6</sup> \* Oiraopavira rutu, vosa iroto ro ira Pauto vo reoro rutu sirova utuparo, ira uvuiparoi ra rorupareve rutu varao-ia oara oupare Pauto ruvara-ia. Vo rara ora rera iava sopaua-ia tarai rovoroo oiso, Oaravia ita varao uvuipai Pauto oara ragaipa vatepareveira. <sup>7</sup> \* Vosa kavaupavioveira, uva orekerovu avu vaiva-a, raa? Viapau. Vosa ita kopiipavioveira, uva orekerovu avu vai kaepaoro avapavioveira, raa? Viapau. <sup>8</sup> Ari ita, vosa vo rasio-ia toupapeira, uva varavio raga vigeiva uvuipapeira aioara ora varoara. <sup>9</sup> Ari voeao oea rirovira rutu orekerovu guru ruipapaaveira ora voeapa, oea-a evoea ikavira rutu kovapeveira kokarapa vovou. Oeare oisoa Seten kuverava tovopareve voea kuverapasa. Ra va iava rera vo vovouara raga sirova utupaave vao vuria. Uva va-a eva oa oirara iava sopaura vuri piepaiveira. Ra va iava kove ovoipaave opesipasa. <sup>10</sup> \* Aa vo vovouo-a va eva vuri vovou vituaro? Vao raga ita aia oa oirara vuri piepaiveira, moni ou ruipa. Ari ita, oearovu vorevira oirao pie vovou iava porepaa viroveira moni oupa pitupitu raga sirova utupaoro. Uva va-a eva oa-ia uvuipaai ra otavakarovu rutu oupaive ora voea iava sopaura-ia.

### *Uvui Iraopauei Ra Goruvira Rutu Tootoo Ovoi Rutu-ia Pitu Iraopari*

<sup>11</sup> Uva vii-a Pauto reraaro. Oa iava uvuipauei ra evo pitupituro vatavata iraopari vara pura arapa. Uva uvuipauei ra Pauto vo rugooaro-ia pitupaoro kasivarivira rutu varao pura iraopari torevoko rugoo rutu iava, ora oirao pie vovou, ora siraopa vovou, ora kave vovou, ora tapo vo osa goruvira rutu torepau Pauto vo vovouaro sirova utupaoro. <sup>12</sup> \* Goruvira rutu paupaua purari, ra orekerovu-ia vuriara pute iraori. Uvare va-a eva vii vo oirao pieoro oa iavirava uvuipauei ra ora vii vo voriaro ouri vao pute pie moni oa oiso rutu toupai, Tootoo Ovoi. Eake iava? Uvare Pauto vii roporevora, oisore ra va vao Tootoo Ovoi ouri. Vao oa iava oiraopavira rutu tavitavieupa va iava eva vii vaaro raria. Oa-ia oearovu riro irara va-ia taraipaaepa. <sup>13</sup> \* Oire uva oiso riro goruvira rutu viire puraparai vaitereo Pauto vaio osireiario-ia ora ro Jisas Kraiss, uvare rera raga Pauto orekerovu rutu totooara vituaro. Ora Jisas uvare Pontias Pailat osireiario-ia aviavi pievira Pautoa iava tavitaviroepa. <sup>14</sup> Uva oiso va iava vao vii tavitavipaavo vaiterei osireoaro-ia oiso, Goruvira rutu Pauto vo vovouaro sirova utupau ora airereipaoro. Teapi vuri vaisi puraive oearovu vii-ia. Ra oisi raga toupai vo vokia-ia rekaspasa ovokia-ia vigei reraaro Turaro

\* 6:3: 1 Ko 8:1-3    \* 6:6: Fl 4:10-19    \* 6:7: Jop 1:21; Sam 49:16-20    \* 6:10: 1 Ti 3:3; Je 5:19

\* 6:12: 1 Ko 9:25-26    \* 6:13: Jo 18:37

Jisas Krai voreroverea. <sup>15</sup> ✧ Pautoa raga-a ira torevokovira ora rera vo vovouaro sirova vo voki eva karekereverea. Uvare Kataitoa raga Reitoa rutu ira oearovu rutupa reiparoi king irara voeao voraro rutu. Ora oearovu rutupa turaro irara reiparoi voearo voraro rutu. <sup>16</sup> ✧ Ira viapau opesia vai, uvare tootoovira toupaveira rera vaaro-ia keraria ovusa roropaive. Oa aviaviaro eva uvuipai ra ro aau pieve ira voavire tutuu piereve. Ari ita, viapau oiso irai rera kekereva. Osa raga ita viapau irai rera kekerevere. Rei vaisitoa rutu. Ira vo goruaro-ia viapau uvuipai oavu avu vai puteve. Osa raga toupaveira. Ovoiei.

*Vo Reoa Vao Voeaore Oea Riroara Rutu Orekerovuva Toupaveira*

<sup>17</sup> ✧ Uvuipauei rutu ra voearo oearoa riroaro rutuva orekerovu toupaveira tavitaviri vaopa, teapi ora voea vaisiara raga rei piepaive vara iavirava evara vova rasi-toa-ia. Osa iava viapau uvuipaai ra vara raga-ia raripaave oara opesiperea. Ari uvui iraopaai ra Pautoa-ia rari iraopaoro rera oirao piepaive rutu, ro ira vigeipa riroara rutu vatepareveira. Osa iava uvuipaviei ra vara-ia rorupape. <sup>18</sup> ✧ Oiso voea taviri, “Vearo kovo purapata. Opeita iirukopata. Ari uvuipatai ra paaropa vovou rutu vatevatea vereopa vovou purapata.” <sup>19</sup> Osa piepaoro eisi uvuipaai ra vearoa voria gurupaive vao ovoria ouivera rara voviri utupaua. Vo uva oiso Tootoo Ovoi ouive vao Oiraopa Tootoo rutu.

*Uvuipauei Ra Ora Vii Vo Kovoaro-ia Siitue Pievira Rutu Utupau*

<sup>20</sup> ✧ Timoti, vearovira rutu vo kovoro oriru iraopari Pauto viipa oara vatereva. Vaopa uvare oearovu rirovira rutu reoreo ragapaaveira orekerovu iava, ovusa viapau rugorugooaave Pautoa-re. Ari oearovu oreorovu rutu riroara pura ragapaaveira akukuvira raga varao raga iava vo rasio-ia. Oa iava oisi vo reoreo oiso purapaaveira, “Riroa taraia toupavoi oreoa-ia vao-ia.” Vo osa viapau. Uva oisi-a eisi osa iava viapau oiso uvuipauei ra voea tapo ora tavosipau evoea oea eisi piepaiveira. <sup>21</sup> Eake iava? Uvare oearovu ora vaisi oai ve raga oisoa rei piepaive oiso purapaoro, “Riro tarai irara igei.” Oa-a eva oa-ia oisoa Pauto oirao piepa vovoure ovaupaave.

Ragai-a vao visii rutupa variriparai Pautoa iare ra visii-ia vereopa vovou rutu purareve visii tavupaoro.

Eisivi raga osa vo pasio puraavo viipa.

Ragai-a vao, Pol.

## 2 TIMOTI

### Irapa Reoro Vo Vukuo Iava

Vorerivira Pol toupaveva tuukepa kepa-ia eisi Rom 66 o 67 yia Kraiis vo kavauaro isivaaro iava. Uva voa toupaooro vo pasio eraopa pasi rigatoreva taraipaoro oiso, Tutuu pievoi vo vuutao ra kopiira (2 Ti 4:6). Uva Timoti vovouaro goru piesa vo pasio rigatoreva Pol. Rera tavireva oiso ra viapau uririparo vo tavakapa vuutaaro-ia, vosa vuri vovou purapaive oearovu rerare (2 Ti 1:8, 2:3-7). Uva oiso puraroepa Timoti-re, Goruvira Vearo Sipoipo kosi pieri oirara siposipoaoro tuuvu vovouvira rutu toupaooro (2 Ti 4:1-5).

1. Irapa reoro aviavi pie reoroaro Pol varaaro, 1:1-2.
2. Timoti vovouaro tore piesa goru reo vatereva Pol, oiso ra tovira rutu tuuvu vovouvira toupaveve Timoti kovopaoro lotua-ia, 1:3-2:13.
3. Pol rera tavireva oiso ra aireivira toupaveve, ora vatatopoparo voeaopa kuuvu siposiporo purapa irara oea poua viroverea ovoioipa vokiro-ia, 2:14-4:8.
4. Ovoioipa reoro varaoro, ora vearo voki pureva Pol oearovuva, 4:9-22.

<sup>1-2</sup> ✧ Ragai-a vao Pol ragoa vo rigato puraavoi viipa Timoti. Uva vii oiso toupari, Vii-a ragai oviitoaro. Ragoa roporeva Pauto ora rera raga vo ruipaoro sirova utupaoro, oa iava oiso toupaveira, Ragai-a Kraiis Jisas reraaro aposelto. Oa iava vo kovo eva purapaaveira va iava vao Tootoo Ovoi tavitavipaoro. Uva va-a eva oa iava Pauto reo ovoi pureva vare vao tootoo, oiso ra va oupape vo rara Kraiis-va ora tavospavio rutu. Uva ragai-a vao Pauto-pa Aite variripari ora Kraiis Jisas vigei reraaro Turaro, ra visii vatesi tauvaa, ora sirao vovou rutu, ora gavaure vovou.

#### *Viapau Uvuipaviei Ra Ariipavio Vearo Sipoipo*

<sup>3</sup> ✧ Aao irara oaa oisoa Pauto vo rugorugoooroaro sirova rutu utupaave. Osa raga ita oiso osa ragai katai raga roroio rugoo sirova utupaveira Pautoa-pa kovopaoro. Oa-a eva oa-ia vearo vaisi rutu purapaaveira rerapa. Ora tapo osa viipa Pautoa-ia vearo vaisi purapaaveira vo osa viipa variripara vo vokiara ora vo avi vokiro-ia. <sup>4</sup> Uva gau ovire rugoopaaveira vao oa purariva ragaire rugoooro. Osa iava oiso ruipaparai rutu ra vii kekea ita. Oa iava uvuiparai ra rorua rutu vii tapo toupaooro. <sup>5</sup> Ari ita, ragai rugoopaaveira vii vaarore oirao pie vovou rutu oa oisoa purapari kasivarivira rutu. Uvare oisi raga ita-a eisi oisoa pie rovopaere taataiara avaorei aue Lois ora aue aakoara Yunis, airea oisoa rovopa visivi Pautoa-ia oirao piepaere rutu. Uva taraiparai osa vii tapo ita oisi rera oirao piepariveira. <sup>6</sup> Eva oa iava vii rugoo piepaavoi vo kovo iavirava oa vaterevora Pauto viipa, vo osa vii reesiavora vii-ia vavae tovooro. Ra oiso rutu vo kovo riro pieri osa ro oirato ira eto kasi vuvurepare vao oa rokosa auepai. Ra vorevira vuvuve. <sup>7</sup> ✧ Ari ita, Pauto viapau oiso vigei piepareveira ra orekerovupa uriripavio. Viapau. Ari eera vigei vatepareveira Tugoropato Uraurato vigei iava sopaura goru piepasa, ora sirao vovou kareke piepasa, ora vigei tauvapasa, oisore ra aireivira rutu toupape varaura vo ruiparoaropa reipaoro rutu.

<sup>8</sup> Oire uva opeita ariipau oearovu tavitavipaoro Turaro iava. Ora ragai tapopa oisi viapau uvuipavei ra ariipau osa tuukepa kepa sovara-ia toupavoi rera vo kovoaro iavirava. Uva uvuipavei ra goruvira rutu



tore iraopau vo osa vii-ia poupa piro otavakarovu va iavirava vao Vearo Siposipo. Ari ita, Pautoa raga vii tauvaparevere, ra goruvira rutu torepau evo tavakarova. <sup>9</sup> Rera raga oisoa vegei orirupareve. Oa iava vegei roporeva ora rerapa kovopasa. Uva uvuipaveiei ra ora airereipave rutu vuri rugoo asavira, ra vao raga vearo kovo purapave. Vegei vao rera vaitereiaro. Uva apeisi-a? E vearo pitupitu vai pura rovovevoiva? Viapau. Ari vao raga iava-a, Rera vo vovouaro raga, ora rera vaaro vereopa vovou rutu vegei-ia. Vao oa oisoa purapareve vegei sopaaro-ia Krai Jisas iavirava voari tuariri rutu, vo osa vo rasio pura uviro asavira touva. <sup>10</sup> Ari vo vokie rera vo vovouaro-ia taraipaveiei vao vereopa vovou oa purapareveira vegei-ia. Eake iava? Uvare viaevira rutu va karekereva vo osa Krai Jisas siporeva, oisore ra oiso toureve, Eera vegei Kae Pietoaaaro. Ira oiraopavira kopiiia vo varivariaro tokoreva Tootoo Ovoi kareke pieoro. Ootooa eva vituaro oiso toupaivoi vao-ia Vearo Siposipo Krai iavirava va-a.

<sup>11</sup> Oa-a vao oare Pauto ragai roporeva oearovupa va iava eva Vearo Siposipo tavitavi rovopasa. Oare ragai reesireva oiso, Aposelto ora tarai vatepato. <sup>12</sup> ✧ Eisi osa iava vo tavakao oupaaveira. Uva viapau oiso ariiparaveira vo osa oisi toupaa eisi. Eake iava? Uvare tarai ovoiraera ro-ia ira oirao piepaaveira oiso, Oiraopavira rutu ira uvuiparoi ra ragai virivaripareve vao-ia ragai vo kovoaro. Oa vatereva ragaipa vaore, oiso ra va purapaa rerapa voari rera vo Vokiario-ia rekasisa utupaua.

<sup>13</sup> Oreoa vao tarai reo uvuriva ragai gisipoaro-ia. Oreoa-ia eisi ovoovovira vii taviava, oiso ra oisi va sirova utupau goruvira rutu vo reoro-ia pitupaoro vara purapari. Ra viapau evo oirao pie vovou kavupari, ora eva siraopa vovou oa oiso toupaveira vegei-ia osa Krai-va tavosivira toupaveira. <sup>14</sup> ✧ Vearovira vo kovo tokipari vao oa vatereva viipa Pauto. Oa iava uvuipau ra oiraopavira Vearo Siposipo iava tavitavipau ro vo goruaro iavirava Tugoropato Uraurato, ira vegei sopaaro tootoo piepaoro vegei-ia toupaveira.

<sup>15</sup> Voeao-ia taraipaveira oea Esia Provins-ia toupaveira oea rutu ra-gaire isivaoro porea virova vaitereo tapo Fiselas ora Hemosenis. <sup>16</sup> Uva Turaro arepaavoi oiso ra vereopa vovou purareve Onesiforas aaopa, uvare ovokirovu rutu-ia ragai iava sopaua oisoa varaata piepareve ragai roru piepaoro. Vo uvare viapau oisoa ragaipa ariiparo vo osa oisoa tuukepa kepa-ia toupaa. <sup>17</sup> Viapau. Ari vosa Rom urui-ia pouro viroiva, rovoroepea voava ra-gaire taraapaoro. Oa iava ragai ruvara-ia pouro virova. <sup>18</sup> Ira ita taraipaveira eera Onesiforas, ira ragai oisoa tauvapareve vearovira rutu Efesas-ia ragai tapo toupao. Oa-a eva oa iava Turaro arepaavoi ra oisi iava rerapa sirao vovou rutu purarevere vo vokiri-ia utupaua Turaro vo vokiario.

## 2

### *Uvuipauiei Oiso Toupari, Vearoto Viurupato Krai Jisas Reraaro*

<sup>1</sup> Timoti, ragai oviitoaaro rutu-a vii. Vigoa goru vovou rutu pura iraori rara vereopa vovou ouri Krai Jisas ruvara iava. Ovovoa eva oa-ia tauvaa oupaveira vo rara rerava ora tavosipave rutu. <sup>2</sup> Vo reo oa uvuriva ragai ruvara-ia vo osa va iava riro irara rutu oisoa siposipopaa, uva vii ita uvuipauiei ra oearovupa ita topa pievira vo reo vateri voearopa oearoa vo kovoroaro-ia vearovira taraipaveira. Oa iava voea ita uvuipai ra oisi raga ita vearovira oearov ita siposipave vo reoro-ia.

<sup>3</sup> Ora vatatopo iraopau, uvare oearovu tapo otavakarovu ouparivere, uvare oisi eisi toupári oiso, Kraís Jisas reraaro viurupato ro ira goruvira rutu toreparoveira. <sup>4</sup> ✧ Uvare viurupato oiso vovouparoveira ra rera reraaro reito roru piepareve ora rera-ia. Osa ragavira iava eisi viapau oiso voearova ora tavosiparovere oearoa ora voea ragapa moni oupa kovoro purapaiveira. Viapau. Uvare rera-a ira viuru kovo raga purapareveira. <sup>5</sup> ✧ Oiso osa ro ira ikaupareve paupaua purapaoro. Ira viapau uvuiparoi ra oearovu-ia putepareve rutu, vo rara viapau torevokovira reoreoa sirova uturo vao paupaua vaaro. Oa iava oiso oisóa rera piepaive, Ovoiokuto. <sup>6</sup> Ora ro ira kasivarivira rutu aio kovo tokipareve, uva uvuiparoi ra vo kovo iava avaio kuero ou rovoreve ora rerapa torevokovira. <sup>7</sup> ✧ Vo ovoovorore rugoopauiei oara purapaavoí viipa, oiso ra katai rugoo raga rutu sirova utupau. Oara viipa Turaro roroio pieparevere vo rugoororoire vii soporepaoro, ra oisi iava vara vituaro-ia vearovira rutu taraipau.

<sup>8</sup> Rugoou Jisas Kraís-re Devit aaotoaaro, ro ira Pauto vorevira tore piereva kopii tapi iava. Ira iava oisóa siposipopaa Vearo Siposipo rutu purapaoro eisi. <sup>9</sup> Vo osa oisóa Vearo Siposipo iava siposipopaa, uva va-a eva oapa oearovu oisóa ragai tuukepaive sen iroro-ia, oiso rorovira rutu osa voearo vuri irara oearoa reo goruro gasipaiveira. Uva viapau rutu oisóa uvuipaave oiso ra Pauto vo rearore korupaave va tuukepaoro sen iroro-ia. <sup>10</sup> Eva vituaro iava viapau raveraveparaveira vo osa otavakarovu rutu ragai-ia poupa piroveira. Ari oisi eisi piepaoro voeare rugooperaveira Pauto oea ropopareveira ora rerapa. Uvare oiso ruipaparaveira ra voea taupapaa. Oa iava Pauto voea virivaripareve, vo rara Jisas Kraís oirao piepaive. Ra va iava vao rera vaaro keraria tapo oupaive oa viapau opesia vai.

<sup>11</sup> Vo reo-a voa-ia oiraopa rutu,  
 “Vosa oiraopavira rutu kopiiviepa rera tapo, oa iava rera tapo toupapeira tootoapaoro.

<sup>12</sup> ✧ Vosa goru vovu rutu-ia siraoa vo tavakaaro kaepape, oa iava uvuipaviei ra rera tapo reipavio.

Vosa rerare isivavio, osa ita uvuioverea rera vigeire isivaoro.

<sup>13</sup> ✧ Vosa viapau oiraopavira rutu rera vo vovouaro purapape, uva rera raga ora rera vo vovouaro purareve. Eake iava? Uvare viapau oiso uvuiparoi ra ora rera vo vovouaro tavarioveve vao vokiara rutu-ia ovovoua oirao piepareveira vigeipa.”

### *Oiraopatoa Rutu Iava Kovopato Ro Ira-ia Pauto Vo Reesiaro Toupaveira*

<sup>14</sup> ✧ Voea rugoo pieri voea vatatopo pieoro evoea oea tokipariveira Pauto osireiario-ia. Ra oiso purau voeare, Opeita ora kaureo ragapata oreorovu roviriepaoro vara-ia ora reo ragapaoro. Viapau rutu vearoa vai uvuipai ra eisi oreoi iava karekepape. Viapau. Ari vao raga-ia uvare voearo vo rugorugooraro vuri piepaiveira oearoa voea vo reoroaro uru piepaiveira.

<sup>15</sup> ✧ Ora vii iava vovouisi rutu tovorí ora vii vo kovoaro-ia. Oa-ia uvuipauiei ra Pauto roru piepari va-ia. Osa iava viapau uvuipauiei ra ariia vai oupari vii vo kovoaro-ia, vo rara torevokovira rutu Pauto vaaro-ia oiraopa reo oearovu tarai piepari. <sup>16</sup> Viapau rutu uvuipaavei ra voearo tapo ora tavosipau oearoa riroara rutu akuku reoro raga pura ragapaiveira, vo osa viapau Pautoa-re rugoopaave. Vo reoro oreoroa-ia oirara rutu kove piepaiveira, oa iava Pauto vo rearore isivapaaveira vare ovaupaoro. <sup>17</sup> Oreoroa varao akuku reoro oara iava siposipopaveira oara oiso rutu

✧ 2:4: 2 Pi 2:20 ✧ 2:5: 1 Ko 9:25 ✧ 2:7: Pro 3:5-10 ✧ 2:12: 1 Pi 4:13; Mt 10:33 ✧ 2:13: Ro 3:3; Nam 23:19 ✧ 2:14: 1 Ti 5:21, 6:4 ✧ 2:15: Je 1:12

toupaiveira, Riroa kapua oa sopeara aiopaiveira. Oea iava vaitereo-ia tisoareie aiterea oiso vaisipaiveira, Haimenias vaio ora Failitas. <sup>18</sup> ✧ Aiterea evaiterei oiraopa reo rutu arova pirociera. Uva va-a vao oa-ia oearovu vo vovouaro piro piepasiveira oisi siposipopaoro oiso, Vigei tore ovoiviepa kopii tapi iava.

<sup>19</sup> ✧ Vo osa vo reoa vao oiraopa reo rutu Pauto oa purareva oa oiso rutu toupaiveira kukuuvu tuuta. Oa viapau uvuipai ra irai va gugugireve va verapasa, vao oa iava evo reo oiso purapapeira, “Oea-ia Turaro taraiparoveira voeao rera voeao.” Ora oreovu vao oa oiso purapapeira, “Ro ira oiso puraparo, Turaro-a ragai rerao, ira uvui iraoparoi ra ora rera iava vovouisiaro porereve vuri vovou rera vaoro kavuoro.”

<sup>20</sup> Okepavu-ia riroa oisoa osasararovu rutu dis toupaive oiso-ia, oaravu aue iava gol, ari oaravu aue iava silva, ari oaravu aue iava evaoara, ari oaravu aue iava verako rasi. Evara rutu oara iava oaravu rutu pisa visivi toupaiveira oara-ia ovureirovu aiopaiveira. Ovusa oaravu raga toupaive varao akukupapara oara-ia vokiara rutu-ia aio ragapaiveira.

<sup>21</sup> Osa ragavira ita oirato tapo uvuipa ra pisa visivi tourevo oiso osa kovopa Pauto vaoro, vo rara vuri pitupitu rera vaoro kavu rovereve, vo pitupituo oa oiso rutu toupaiveira osa akukupapava raga. Oa iava uvuiparoi ra Pauto rera roporeve rera reesiro oiso rutu, Rerapa kovopato. Osa iava Pauto uvuiparoi ra veoro kovo rutu purareve rera iavirava vo osa oiso toupareve, Ira-a eera vo kovo purasa vatatopovira touparevo.

<sup>22</sup> Vii vovouaro airereiro rutu va tokipari vaopa, teapi va vao vuri vovou purari vo vovouoapa ruipapaaveira voeao viovoko irara. Ovovouoara asavira uvuipau ei ra vatavatapau. Goruvira rutu kovopari torevoko vovou rutu puraparo oirao pie vovou tapo, ora siraoa, ora gavaure vovou. Vo osa oisi eisi piepaoro uvuipau ei ra veoro tapo ora tavosipau oea sisigarue sopavira rutu toupaiveira. Oire ra oisi va iava Turaro arepaive voea tavapasa. <sup>23</sup> Uva viapau oiso uvuipau ei ra voea tapo ora tavosipau oea akuku reoro raga purapaveira ora kaureo ragapao, vo osa viapau taraipaave rutu. Oea-ia taraipaaveira evoea oea oisi eisi piepaoro ora kaureoara kareke piepaiveira vokiara rutu-ia. <sup>24</sup> ✧ Ari ita, Turaropa kovopato viapau uvui iraoparoi ra kaureoparo. Ira uvuiparoi ra vearopa rugooro rutu purapareve oirara rutupa. Vosa vearovira rutu voea tarai piepareve, ra viapau voeao vagevagepavira aveaveparo oea viapau vagevagepavira rera vo reoro oupaoro va-ia viapau roroioapaave. <sup>25</sup> Ira uvuiparoi rutu ra kave vovou rutuva voea torevokopareve voeao oea rera vo gisipoarova kaureopaave. Oa vai iava uvuipaai ra ora voea iava sopaura oaive porepaive, vo osa Pauto voea tavapareve vo osa oisi vai eisi piepaive. Osa iava voea evoea uvuipaai ra oiraopa reo rutu oirao pieve. <sup>26</sup> Eisi osa uvuipaai ra voveira veoro rugorugoo ouve o iava kuverava torioro Seten iria tovopareveira voea oupasa. Ro vurito ira rovvira voea ou rovopareveira, oisore ra rera vo vovouaro sirava utupaave.

### 3

#### *Ovoioapa Vuuta Iava Oa-ia Taru Ovovourovu Rutu Vuriara Karekeperea*

<sup>1</sup> ✧ Vearovira rutu vao-ia tarai vo osa ovoioapa vuutaro iava vo voki-ro-ia karekeperea tavaka vo siraoaro. <sup>2</sup> ✧ Oirara riroara rutu vuri pitupituro purapaiveira oiso vara, iirukopa vovou-a vao-ia, ari orekerovu rutu gurupa vovou-a vao-ia, ari vagu vovou-a vao-ia, ari ora vaisi oaive raga kae piepa

vovou-a vao-ia, ari oearovivu tovipaiverea. Ora vo osa aite irara oaiveva kaureopaave, vo osa viapau voea vo vovouaro sirova utupaave. Vo rara viapau oiso rugoopave ra vearo vaisi purapaive voea-ia orekerovu oupaoro voea ruvara-ia. Vo osa Pauto vo vovouaroore isivapaave. <sup>3</sup> Vo osa viapau vereopa vovou purapaive. Oa-a eva oa iava viapau oiso oearovivupa siraoa vovouro viapau purapaiverea. Osa-a eisi osa iava vuri takauro rutu purapaiverea oearovu reopaoro. Ora rirovira rutu ora upo ruipa iraopaave kasipu iraopaoro reasi iraopaoro vereopa vovou vo pitupituario purapa arapa. <sup>4</sup> Ora oiso osa ora voea vate iraraaro taeapaiverea voeare isivapaoro vorevira, vo rara vagevagepavira vuri rugorugooro raga sirova utupaave. Ora oiso osa ora voea raga vaisiario kae piepaiverea oearovivu vaisiario akaipa piepaoro. Ora oiso osa ora voea raga vo vovouaro sirova utupaaverea Pautoa-re isivapaoro. <sup>5</sup> Ora oiso osa lotu purapaaverea varaatavira raga oiso osa orekerovu rogetara gaegaerepapeira uuko rovuro ivara-ia. Vo rara vao oiraopa goru rutu taeapaive oa oiraopavira rutu vavatapaoro rokopaiveira sovara-ia ruture. Uva viapau uvuipauvei oiso ra voea iare tutuu piepari.

<sup>6</sup> Ari oearovu voea iava vatauvira okeparovu-ia koatapaaveira airorovu oupasa riakora, oiso ra vairoro vo rugorugooroaro piro piepaive vairoro airoa viapau goruvira rutu rugorugoopave. Airoa riro vavata rutu kaepaiveira vairo varaaro vo vavataaro vuriara. Uvare vairo vo rugorugooroaro viripaiveira orekerovure vuriara rugoopao, oiso ra vara purapaive. <sup>7</sup> Evairo riakora airoa taraa ragapaiveira vaore, oiso ra oiraopa vovou rutu vo pitupituroaro-ia taraiave, osa viapau. <sup>8</sup> ✧ Ari voeao-ia oirara oea vuri rugooro purapaiveira oiraopa pitupitu ruture isivapaoro. Oea ita evoa oea kove ovoiaepa lotupa pitupituario pura arapa. Oiso rutu osa vaitereo-ia Janis vaio ora Jambris aiterea vaitereo-ia oisi Moses-re isivasepa rera vo rearo sirova utu arapa. <sup>9</sup> Osa iava viapau uvuipaa ra riro kovo vai puraive. Eake iava? Uvare oearovu oirara voea vo vovouaro kekepaoro oiso purapaaveira, “O ari keakea kovoro varao voea varaaro oara purapaiveira kokoropavira raga.” Oiso rutu osa vaitereo voari tuariri Janis vaio ora Jambris oisoa eveipaive.

### *Uvui Iraopauvei Rutu Ra Pauto Vo Rearo-ia Goruvira Rutu Pitupari*

<sup>10</sup> Ari ita, oisoa ragai vo vovouaro sirova vearovira rutu utupau varao iava oara oisoa purapaa tarai reoro vatepaoro, ora vo pitupituro oara oisoa purapaa, ora ragai vo touaro vituaro iava tapo. Oara rutu-ia oisoa evara vearovira rutu ragai siituepari, vo osa vara purapaa oirao pie vovou rutuva. Ora vo osa oisoa orekerovu ruture ora fuvuu piepara siraoa vo vavataaro kaepaoro. Ari ita, ragai vo siraoaro-ia oisoa taraipau vao oa oisoa purapaa oearovupa. Ora oiso osa viapau oisoa raveravevira kovopaa. <sup>11</sup> ✧ Ari ita, ragai vo tavakaroaro-ia oisoa taraipau varao oara oisoa ragai-ia poupa piro. Oara oisoa ragaipa vokiara rutu-ia upiara vatepaive. Ora varao rutu-ia taraipauveira oara oisoa ragai-ia karekepape vo osa Antiokia toupaa, ora Aikoniam-ia, ora Listra-ia. Oara rutu evara oisoa ragaipa rirovira rutu tavaka vovou vatepaive. Ari ita, uva Turaro raga oisoa ragai virivaripareve vara rutupa evara. <sup>12</sup> ✧ Oiraopavira rutu oiso osa irou irara avu voeao oea Pauto vo vovouaro sirova utu ruipapaave Krai Jisas tapo ora tavosipaoro rutu, oea ita-a oea oisi vo tavakaro vo siraoaro oupaivere taru. <sup>13</sup> Ari vuri irara voeao riro kuvu irara oea oirara vo rugorugooroaro piro piepaiveira vuri vovou vo pitupituario voeapa topatopa piepaoro rutu.

Osa iava vorevoreripavira oearovu keakeapaveira. Osa piepaoro eisi ora voea raga ora piro piepaaveira rutu.

<sup>14</sup> Ari ita, uva vii Timoti uvui iraopauei ra goruvira rutu torepaooro oiraopa reo rutu sirova utupau. Vao oa-ia oearovu vii tarai pievoiva, va oirao piepariveira goruvira rutu. Uva voea-ia taraipaveira voveao oea oisoa vii tarai piepaive. <sup>15</sup> ✧ Vo osa kakae visivi touriva uva oisoa evoa vii tarai piepaive. Ovuuta-a eva oa-ia taraiuepa Tugoropa Vuku iava vo siposipo-ia vao oreoa vaoro iava taraia ouriva. Vo taraio oa vituaro-a vao-ia vo raivao oraiva-ia Pauto uvuiparoi ra oirara rutu vovevira oupareve ora rera iare, vo rara Krai Jisas oirao piepaive rutu. <sup>16</sup> ✧ Oiraopavira Pauto reraaro-a Tugoropato Uraurato ira réoara kareke rovoreva varao oara Tugoropa Vuku-ia toupaveira. Vo reo oa-ia uvuipaviei ra oiraopa vovou rutu iava siposipopape. Ora oiso osa vo reo iavirava uvuipaviei ra ora vigei iava sopaura-ia vuri vovouro eveipape. Ora oiso osa vo reo iavirava uvuipaviei ra torevoko pitupituro-ia taraipavio ora vigei raga oiso rutu osa vigei tavipaiveira. <sup>17</sup> Eisi osa vo reo vao Tugoropa toupaveira oiso osa kovo purapa, ro vaoro ira Pautoa-pa kovopareve. Osa iava uvuiparoi ra uvuivira rutu okovorovu rutu purapareve varao vearopa kovoro rutu.

## 4

### *Uvui Iraopau Ra Oiraopavira Rutu Pauto Vo Reoaro Kosi Piepari*

<sup>1</sup> ✧ Krai Jisas oirara vo vovouroaro rovirieireverea rara, voveao oea oiso tootoovira toupaveira ora voveao oea kopiipaaveira. Oire uva vii tavipaavoi Pauto osireiario-ia vaiterei ora Krai Jisas oiso, Krai taru oirara rutu osireiario-ia ora karekoverea turarovira oirara rutupa reipaoro.

<sup>2</sup> Uva oisi-a oiso osa goruvira rutu vii tavipaavoi oiso ra goruvira rutu evo reoro iava tavitaviu, vo osa oearoi vii uvu ruipapaave va-ia. Oire vosa vapa reasipaave, oire eagara. Oisi raga uvuipauei ra va iava voea tavitavi ragari. Osa iava uvuipauei ra va-ia voea vo vovouroaro vuriara poeravira karekeri, vo osa oearovu voea iava torevokori, ora vo osa oearovu varaoro oirao pie vovouro voea iava goru pieri voea rutupa siposipooro kave vovou rutuva. <sup>3</sup> ✧ Vo vuutari utupa oa pou piroverea ovuuta-a eva oa-ia viapau oiraopa reo rutu uvuiverea oirara, uvare ora voea raga vo vovouroaro sirova utupaaverea. Vo uvare riro irara rutu voea tuvetuvepa irara guruguruiverea voea aivaro pieoro ora voea iare oea kokiario kokosipaveira rutu vo reoro uvu iraopasa oreoropa ruipapaaveira.

<sup>4</sup> Osa eisi piepaoro oiraopa reo ruture isivapaaveira, oiso vovoupaoro ra vao raga tuariripa reo vo siposipoaro sirova utupaave rasito vaoro. <sup>5</sup> ✧ Uva uvuipauei ra roroiovira rutu rugorugoopaoro ora airerei-pau rutu. Teapi raveravepauera, tavaka vovou vo siraoaro kaeri. Uva vo kovo-ia uvuipauei ra va purapari oearovivu siposipopaoro Vearo Siposipo iava. Osa tapo uvuipauei ra okovorovu rutu tapo purapari varao oara vaterevora viipa Pauto. Oa iava uvuipauei ra oiso toupari, Rera kovopatoaaro vii.

### *Ragai Vo Kovoaro Opevisa Tutuuvo*

<sup>6</sup> ✧ Ari ita, taraipaveira voeari-ia rovopa irara oea oisoa tauopaave Pautoa-pa. Osa ita eisi ragai-a vao oisi tauovira tupaavoi. Aue iava uvare ragai vo vuutaaro tutuu pievoi oiso ra vo rasio kavua Pautoa iare avaooro, oiso rutu vo tuukeo karuoro vo rasio-ia osa pisikui o iria vagoovi. <sup>7</sup> ✧ Ragai vao-ia paupaua ikauava, oa iava reesia-ia pouara virorao. Uvare ragai vo

kovoaro viapau oisoa oavu avu vaipa apotapape vao iava rara oiraopa vovou rutu purapaa. <sup>8</sup> ✧ Osa pieava eisi oa iava ragai vaaro peira pute piea voria. Ovoría eva ouaverea vo rara oiso ragai vaisireve, Torevokotoa rutu vii, voari Ovoioipa Voki-ia. Uva Turaro vo reesiaro-a ro ira ora rera raga torevokovira oirara vo vovouroaro rovirieipareverea. Uva viapau oiso ragai raga vo reesiaro-a. Ari oearovu rutu tapo vaaro-a voeao oea rerare tuevira toupaveira rerapa kaviko vovou rutu purapaoro.

### *Ovoioipa Reoro Vatevewa Pol*

<sup>9</sup> Akeake iraopari ragai iare ikavira uriosa. <sup>10</sup> Ari ita, Dimas ragai kavureva vo rasio raga vo pitupituario sirova utupasa. Oa vituaro-a vao oa iava Tesalonaika iare avaroera, vo osa Kresens Galesia iare avaroera. Ari Taitas Dalmesia iare avaroera. <sup>11</sup> Uva Luk raga-a ro ira touvira ragai tapo toupaveoi. Uva Mak tapo uriopavei, ra vei rutu ragai iare uriosi. Eake iava? Uvare uvuiparoi ra ragai tauvareve vo kovo puraoro. <sup>12</sup> Ari aue Tikikas aruavora Efesas iare.

<sup>13</sup> Vosa uriopavere, ra ragai reraarova kuvupato uriou ira kavuava Traos-ia aue ruvara-ia Kapas, ora vukuara tapo. Viapau oiso uvuipavei ra vo vukuro evara kavuri oara oisoa purapaive aue iava bulmakau rakariro.

<sup>14</sup> ✧ Ari ropa ora vatatopopavere Aleksanda ira orekroovu rutu purapaveira aue-ia bras. Ira oisoa ragai vuri piepareve rutu. Ovuria eva voriaro Turaro rerapa vatevewerea voari utupaua. <sup>15</sup> Irapa ora vatatopo iraopavei. Eake iava? Uvare rirovira rutu kasipupaoro oiso ruipaparoveira ra vigei vo siposiporo tekipeve va opesi ovoipasa.

<sup>16</sup> ✧ Ari ita, rovo vuuta rutu-a vao-ia oa-ia rovoa rutu-ia kortua-ia toreraepa. Uva viapau oiso irai voa ragai tapo toureve voea vo reoroaro reo rovirieipa irara pukopasa ragai tauvapaoro. Uva Pautoa iare variriparai ra viapau oiso voeare kasipupaoro voeapa reesia vai purareve, vao-ia vuría oa puraiva ragai eakaoro. <sup>17</sup> Ari ita, Turaro viapau oisoa ragai eakapareve. Viapau. Uvare rera raga ira oisoa ragaipa gorua vatepareve. Oa iava oisoa vo reoro rutu iava siposipopaa Pautoa iava. Eisi osa iava voea rutu voeoro ratau tou irara oisoa ragai vo reoroaro uvupaive. Uva oisi-a eisi osa piepaavoiva, Turaro oisoa ragai virivaripareve voea asavira keripa irara, oea oisoa oiso vovou ragapaave ra ragai opesi pieive. Evoea oea oiso rutu toupaveira osa aakau kare voeao riro kasipu vovou irara. <sup>18</sup> ✧ Ari ita, Turaro utupaua ragai virivariparevere evoea ruvara iava oearoa oisoa oiso vovou ragapaave ra ragai vuri pieive. Oa vituaro iava ragai orirurevewerea ora rera vo Saraaro-ia eisi vuvuiua-ia. Oa-a eva oa iava vokiara rutu-ia rera vaisiaro kae piepaaveira rera vaaro keraria eveipaoro oa-ia viapau opesia vai. Ovoiei.

<sup>19</sup> Uva ragai-a vao veoro voki rutu purapaavoí Prísila vaiopa, ora Akwila, ora Onesiforas aao rutu. <sup>20</sup> Oire uva Erastas ira epao touvira Korin-ia. Ora Trofímas ira kavuava Mailitas-ia, uvare upiaparoea vao. <sup>21</sup> Akeakeri rutu ra ikavira uriou. Teapi kokepa vuuta vao vuría pou piro. Yubyulas vase veoro voki purapaivoi ora ro Pyudens, ora ro Lainas, ora ro Klodía ora voea rutu araoko irara oaive voeao vo.

<sup>22</sup> Turaro iare variripaveira oiso ra rera tapo vii reraaro tapo uraurato tavosivira toureve. Ra oisi iava Pauto tauva visii rutupa vateveve evoa.

Evavi raga osa viipa vo pasio purapaavoí.

Ragai-a vao, Pol.

## TAITAS

### Irapa Reoro Vo Vukuo Iava

Pol toupaveva Masedonia Provins-ia uva voa toupaooro vo pasio rigatoreva Taitas-pa. Oiso ra Krit Toko iare Taitas arureve Pol oiso ra voeao lotupa irara tokipasa avaro. Vo pasio oa oiso toupaveira osa vao rovopa pasi oa rigatoreva Pol rera vatetoaoro iare Timoti. Aue iava uvare Taitas tavireva oisore ra lotupa irarapa iraparo (Ta 1:5), torevokovira siposipopaoro vao iava Vearo Siposipo (Ta 2:1), ora voea vo rugorugoooro soporepasa voeao oea viapau vearovira Pauto vo rearo sirova utupaave (Ta 2:15, 3:8).

1. Aviavi pie reoro Pol varaaro, 1:1-4.
2. Voeao iava lotupa kovo-ia irapa irara, 1:5-16.
3. Lotupa irara tavireva Pol varao iava oara-ia uvuipaa ra Pauto roru piepaive rera vo ruipaaoro sirova utupaoro, 2:1-3:11.
4. Ovoioira reoro Pol vo reoroaro, 3:12-15.

1-4 ✧ Ragai-a vao Pol ragoa vo rigato puraavo viipa Taitas, uvare oiso rutu toupaveira, Ragai oviitoaoro rutu vii, vo rara vegei rutu Turaro oirao piepave rutu. Ari ita, variripaveira Pautoa iare Aite ora Jisas Krai vegei Kae Piepatoaoro, auere ra vii tauvapasi aue-ia gavaure vovou ora vereopa vovou rutu. Ragai-a vao-ia Pautoa-pa kovopato, uvare Jisas Krai oiso puraroepa ragai aruoro, “Avau oearovu rutupa siposiposa.” Iu, uvare Pauto ragai roporeva, oiso ra voeao tauvaa oea roporeva Pauto vaore, oiso ra voea vo vovouroaro oirao pie vovouro goruvira rutu voea iava torepe. Oa iava uvuipaa ra vao-ia Pauto vo pitupituaoro oiraopa rutu taraiave, vo rara va iava voea siposipoa. Oire ra oisi iava va-ia taraiooro vearovira rutu tuevira raga toupave auere Tootoo Ovoi, uvare voeapa vo tootoo vatereveira Pauto voeao rera voeaoro. Tuariri rutu vo uva vo rasio pura viro asavira touva uva Reo Ovoi purareva va iavirava, oiso ra vo tootoo vatereve. Oiraopavira, uvare viapau oiso kuuvupato-a Pauto. Ira vo vuutao-ia oearovu arurevera va iava vao Vearo Siposipo kosi pievira siposipopasa. Eera Pauto vegei Kae Pietoaoro ira ragai tapo ita roporeva oisi ita osiposipo iava siposipopasa.

#### *Taitas Vo Kovoaro Iava Vo Osa Krit Toko-ia Toureva*

5 ✧ Vii Taitas tavipaavo oiso-ia, Vii kavavora evoa Krit Toko-ia, oiso ra voo vo kovoro torevokori okovoroa pura uviro asavira toupavira evoa Krit-pa irara sovara-ia. Oire ra voo oearoi tapo reeresiri voeao oearoa uvuipaa ra lotupa irara tokipave voraro uruiara-ia voeapa irapaoro. 6 Eisi osa iava uvuipaei ra vaore rugooou osa vii tavi rovoavo rorovira oiso, Voeao lotupa irarapa oea irapaaveira viapau oiso uvuipaa ra vuriara vai purapaive. Ora oiso-ia viapau irai uvuiparo ra aireiva vatuarirei vai toupaveve. Viapau. Ari kataiva raga. Ora vo osa rera ovii iraraoro, oire ra oirao piepa vovouvira rutu torevokovira toupave. Viapau rutu oiso uvuipaa ra ora voea vo ruiparoaro sirova utupaoro vuri vovouro purapaive. Ra oisi iava voea iava siposipoara varovu rutu vuriara avapape. 7 Aue vituaoro iava uvare rera-a eera oirarapa irapato ira Pauto vo kovoa tokipaveira. Eisi osa iava uvuiparo ra torevokovira raga toupaveve. Opeita ro ropori ira oearovu tapo rirovira ora kaureoparo. Ora opeita ro tapo ropori ikaupa kasiputo, ora ro ira spakpaoro kokoroparo, ora ro ira oearovu upopaoro voea upia piepareve, ora ro ira rera

raga-ia vovouparou vo orekerovu rutu ou ragapaoro. <sup>8</sup> Ari uvuipauei ra rera ropori ira oearovure sopaipa irara oiso puraro, “Uriota vore ragai vo kepaoro-ia vearovira pausa touoro.” Ora ro tapo ira vearo rugooro raga sirova rutu toupave. Eera ira uvuiparoi ra ora rera vo vovouaro raga rovirieipareve, ra va iava torevoko vovouoro raga purapareve ora airereipaoro rutu. Iu, eera torevoko vovoutoa rutu. <sup>9</sup> Ari ita, vosa oiraopa reoro rutu-ia pitupareve varao oara oupareveira vo Vearo Siposipo iava, uva va-a eva oa iava ita rera uvuiparoi ra oearovivupa topa pievira siposipopareve kosi pievira va iava vao oiraopa reo rutu. Ora ira uvuiparoi ra viaevira vo reoro karekereve vuriara oreoroa vatepaiveira oearovu oirara piro piepasa.

<sup>10</sup> ✧ Aue iava uvare riro irara rutu epao oea ora upopaaveira vaova Vearo Siposipo, vo osa oearovu keakea ragapaive kokoropa reoro raga-ia. Ari ita, voea tapo Jiu oea vao iava ora voea iava rakari verapa pitupitu siposipopaiveira. <sup>11</sup> Uva voea tavi iraori ra ora eakaave uvupavira, uvare oira aaro rutu piro piepaiveira rutu vuri reoreoro raga-ia. Uvare oiso piepaiveira ra vo aaro ruvara-ia moni oupaave vo aaro siposipopaoro. <sup>12</sup> Oiraopavira rutu osa vii tavipaavoi iravu iava Krit-pa irara iava rera. Ira oiso puraroepa voeaore oea oisoa vo Toko-ia vao Krit toupave, “Voea-o-ia Krit-pa irara oea kuuvu reoro raga purapaaveira. Oea oiso rutu toupaveira osa kaakau kare. Oea kovo arapa reasipaoro ora voea raga-ia rugoopaaveira riroara rutu aio ragapaoro.” <sup>13</sup> Ari ita, uva oiraopa reo rutu-a vao-ia. Eisi osa vituaro iava uvuipauei ra goruvira rutu voeare korupau vo voea torevoko piepaoro. Oa iava voea vo vovouoro oirao pie vovouro uvuipai ra goruvira voea iava torepape. <sup>14</sup> Uva oisi-a eisi osa toupao uvuipai ra vo reorapa reasipaave tuariripa siposiporo iava varao akukuara, oara vo ragava uriopapeira Jiu, ora voeao oearoa reo goruro pura ragapaiveira oara-ia oiraopa reore isiva ragapaaveira.

<sup>15</sup> ✧ Oire vosa viapau irai vo rugorugoooro-ia vuria vai toupave, uva va eva vituaro iava oiso toupai, Vosa apeisi eake uvureve, ora apeisi eake kekereve oara-a evara oara-ia viapau oiso vuria vai toupavoi. Ari ita, vosa vuria vai toupave vo rera varaaro-ia rugorugooara, oire uva vara-a evara oara vituaro-ia oaravu rutu vuriara toupaveira varao oara uvupareve ora vara kekepareve. Aue iava uvare rera vo rugorugoooro piroepa rutu. Oa iava oisi iava orekerovu rutu rera iava vuivuepa ro ira Jisas Krai viapau oirao piepareve. <sup>16</sup> Ari ita, oiso purapaaveira, “Igei Pautoa-ia taraiopaveira.” Uva vigei uvuipavie oiso ra voea vo pitupituroaro eveipaoro vearovira rutu voea-ia taraiopavio oiso, Asi vuri rugorugoo irara rutu-a voeao oea kuuvu reoro raga rutu purapaiveira. Eake iava? Uvare kasipu vovouro raga-a oara purapaiveira vo oearovuva ora aveavepaoro. Oa-ia Pauto vo reoro gasipaiveira. Oa iava viapau oiso uvuipai ra veoropara vai purapaive.

## 2

### *Vo Toupai Avuka Irara Iava Vo Reo*

<sup>1</sup> ✧ Oire uva uvuipauei ra torevokovira rutu voea tarai piepari aue-ia oiraopa reo rutu vao oa-a vigei vaaro oirao piea rutu vituaro. <sup>2</sup> ✧ Avuka irara tavipari oiso, Opeita spakpata ukaioapaoro, ora opeita varao purapata osa kokoropa irara vara purapaiveira. Viapau. Ari uvuipai ra vearovira rutu taraiapaoro ora voea vo pitupituroaro sirova utupaave vara purapaoro. Oa



iava viapau uvuipaa ra raveravevira Krais oirao piepaive ora oearovupa siraopaave vo vokiara rutu-ia.

<sup>3</sup> Oisi raga ita eisi osa uvuipaei ra vairoro avuka riako tavipari, ra oisi raga vo vovouro purapaive evara. Auepa teapi kiuvu reoro raga pura ragapaive oearovivu toga ragapaoro vo reo-ia. Ra opeita tapo goru oviro vai-ia ukaiopaave spakpaoro. Uva evairo airoa uvuipaa ra vatuapa riako vearovira rutu tarai piepaive vearo pitupituro-ia. <sup>4-5</sup> ✧ Ra va iava vo aaoro vearovira ora tokipaave ora vo aaoropa siraopaoro. Ra viapau vuri rugorugooro karekepape vo riako-ia. Uva uvuipaa vatuapa riako ra vearovira rutu vatua irara oaive vo reoroaro uvupaive reasi asavira. Evairo airoa uvuipaa ra ora vairo vo vovouroaro raga rovirieipaive, ra va iava torevoko vovouro raga purapaive ora airereipaoro rutu. Uva oisi-a eisi osa vearopai vo osa eisi ragavira vo pitupituro evara purapaive. Oa iava viapau oiso irai uvuiparoi ra vuri reo vai purapareve vao-ia Pauto vaaro tarai reo.

### *Vo Toupai Viovoko Irara Iava Vo Reo*

<sup>6</sup> Oire uva oisi ragavira ita uvuipaei ra voeao viovokoa tarai piepari. Ra va iava ora voea vo rugooraro rife pie rovpaiave auepa, teapi evo rugooro raga voea vovouaro piropiro piepaive rutu vo rara voea-ia putepaive. <sup>7</sup> ✧ Oire uva vii tapo Taitas oiso toupai, Viigoa uvuipaei ra voeapa ovoovoa rutu purapari vo osa vearovira raga kovoa purapari. Opeita voeare keevaita reoro raga purapari. Viapau. Ari uvuipau ra voeapa vavata pievira reopau vo osa voea siposipopari. <sup>8</sup> ✧ Iu, uvuipau ra vo reo rutu vateri oa vituaro-ia riroa gorua rutu toupai. Oa iava viiva keripa irara viapau uvuipaa ra oiso puraave, “Kevaita reo raga-a eva akukupapa reo vuria.” Oa iava uvuipaa ra ariiave.

### *Vo Toupai Kovopa Irara Iava Vo reo*

<sup>9</sup> ✧ Oire uva kovopa irara uvuipaa ra voeao vo reoroaro tapo uvupaive oea voea tokipaiveira. Ra va iava vearovira rutu voea-ia rorupaive voea tokipaoro. Ora ra opeita kaureopaave voeare. <sup>10</sup> ✧ Uva viapau uvuipaa ra reipa irara oaive varaaro orekerovu kavirupaive. Ra va iava oearovu voea-ia va kekepaoro oiso purapaave, “O oiraopavira rutu, uvare Pauto ro Kae Pieto vaaro tarai reo kasiraovira rutu torepai.”

### *Uvui Iraopaviei Ra Sisigarue Vovouvira Toupape*

<sup>11</sup> ✧ Ari ita, Pauto rera vo vovouaro vao vereopa vovou viaevira rutu karekere piepareveira vo oearovu rutu kae piepaoro. Oa iava vorevira ora rera iare voea oupareveira. <sup>12</sup> Eva vereopa vovouaro oa vigei tarai piepai, ra va iava rera vo ruipaaro purapape vo rasio-ia. Eisi osa vituaro iava uvuipaviei ra vuri vovouro oavi kavupape ora vigei iava, oiso ra vearovira rutu ora airereipavio vuri pitupituropa vo rasio iava. <sup>13</sup> ✧ Uva oiso ragavira touoro vo vokiore tuepavio pisa voki rutu. Ovokia-ia va Pauto vaaro kerari aviavi oa karekepere rara, vo osa va-ia aue Jisas Krais vigei Kae Pietoaro vorevira vorero. Oa-a eva oare rugopaoro goruvira raripavioveira. <sup>14</sup> Uvare ora rera iava vasereva oiso ra kopiuro. Eisi osa iava uvuiparoi ra vigei kae piepareve vorevira varao iava vigei vo vovouroaro vuriara. Ora vao tapo oiso ra torevoko vovou raga-ia toupape, uvare ora rera iare vigei vaisireva. Oire uva va-a eva oa iava uvuipaviei ra ruipapavio vearo vovouro purapasa vo rera vaisiario-ia.

✧ 2:4-5: 1 Ko 14:34; Ef 5:22; 1 Ti 6:1 ✧ 2:7: 1 Ti 4:12 ✧ 2:8: Fl 4:8-9; 1 Ti 6:3 ✧ 2:9: Ef 6:5  
✧ 2:10: Mt 5:16 ✧ 2:11: Ef 2:8-10 ✧ 2:13: 1 Te 4:13-18; 2 Pi 1:1

15 ✨ Oire uva vo reo-a vao oa iava uvuipauei ra oearovu vo vovouroaro varaata piepari voea goru piepaoro. Asi vii-a reito vaisito viigoa uvuipauei oiso ra oearovivu vo vovouroaro vuriara poerapari voea vorevira torevokopaoro. Teapi viipa keapaave oiso, Vii-a oira akuku raga-a.

### 3

#### *Uvuipau Ra Goruvira Toupári Torevoko Pitupitu Raga Purapaoro*

1 ✨ Oire voeao oirara oea tokipariveira oea-ia uvuipauei ra voea soporeri. Auepa teapi gavman-va ora kaureopaave ora voeao oirara oea reipaaveira visii rutupa. Oa iava uvuipaai ra vearovira rutu voea vo reoroaro uvupaive, ra vearo kovo rutu purapaive. 2 Voea taviri oiso, Opeita oearovu togapata vuri reo-ia. Viapau. Ari visii uvui iraopatai ra kave vovou rutu rupapata oearovu rutupa. Ora vao tapo osa ravaavira raga toupata oearovivu tauvapasa gavaure vovou raga-ia.

3 Vao vituaro iava uvare voari tuariri oisoa toupape vuriara raga purapaoro rupasopavira raga toupaooro. Ora varao osa oisoa ora vigeiva kaureopavio. Ora oiso osa tapo viapau vearo vovou sirova oisoa utupavio vo osa reo goru gasipape. Oa iava vuri pitupitu vigei tuukeva, oiso ra ora vigei raga vo rugooroaro-ia vuriara sirova utupavio. Eva-a oa iava oisoa oearovu varaaro riiripape. Uva oisoa oearovure rirovira kasipupavio, osa vorevira igeire ita rirovira rutu kasipupaave.

4 Ari ita, vo osa Pauto vo vuutaaro karekeerao oa-a eva oa-ia ora rera vareiaro sirao vovourei karekerevorao ora tauvaa vigeipa. 5 ✨ Ora iava vorevira vigei ora rera iare ourevorao ro-ia Pauto vigei Kae Pietoaro. Oiraopavira, viapau oiso vearo kovo vai purapape, ra oai iava Pauto vigei-ia vearo vovou vai purapareve. Viapau rutu. Ari ita, vao raga-a kaviko vovou riroa rutu rera vaaro vigei-ia. Oa-a eva oa iava Airepa Tootoo rutu ouerao, uvare vigei sisigarue pierevorao. Osa vigei pieoro ro Tugoropato Uraurato oisi vigei pierevorao, Airepa irara vigei. 6-7 Iu, Pauto vigeipa rirovira rutu Tugoropato Uraurato vaterevorao, vo uvare Jisas Krai vigei Kae Piepatoaaro vigeipa raiva purarevora vao vorevira ora porete piepa raiva. Uva Pauto vigei vaisipare oiso rutu, Torevoko irara. Eva-a oa vituaro iava uvuipaviei ra oisi iava ora agiagipavio rutu Pautoa tapo. Oire uva oisi-a eisi osa iava uvuipaviei ra Tootoo Ovoi ouperea vao oare tuevira toupaooro goruvira rutu raripavioveira.

8 ✨ Uva vo reo-a vao-ia oa puraavoi oa-ia oiraopavira rutu vii tavipaavoi, oisora ra voeapa vo reo vasirakovira rutu topa piepari rutu, ra va iava pisa visivi rutu toupave voeapa voeao oea Pauto oirao piepaive rutu. Ra va iava vearo kovoro purapaive evara oara vearopai. Oara iavirava uvuipaai ra vearo tou rutu ouive.

9 Uva visii rutu viapau uvuipatai ra akukupapa reo raga-ia ora upopata. Ora opeita aao irara oavisii raga-ia vuurapa vaisi purapata vo voea vaivaisipaoro. Ora opeita ora visii ragava kaureopata. Ora opeita oearovu kasipu piepata Moses vaaro-ia Reo Taisi voeare reoreopaoro. Uva vo reoro-a evara kiuvu reoro raga, oreoroa rutu iava viapau uvuipai vearoa vai karekepe.

10 ✨ Oire vosa irai orugoorei iava pisavira siposiporeve vo lotupa uvuru sovara-ia, ra vo rugoorei sirova roopavira avaave, ra vii goruvira rera taviri oiso, Viapau uvuipauei ra vorevira oisi osiposiporoi purapari ita! Oire vosa viapau vii vo reoro uvureve, ra viapau oiso vorerivira ita rera tapo touri. 11 Vo uvare rera-ia taraipauei oiso, Vuri vovou rutu rera-ia toupavoi.

✨ 2:15: 1 Ti 4:12-16 ✨ 3:1: Ro 13:1-7 ✨ 3:5: Ef 2:4-9; Ro 3:20 ✨ 3:8: Je 2:14-20; 1 Ti 1:15

✨ 3:10: Ro 16:17

Ovovouroa ora rera-ia eveipaoro oiso puraparoveira, “Eagara, ragoa oisivio toupaveire.”

*Ovoioa Reoro Vateveva Pol*

<sup>12</sup> Ari ita, ragaipa tutuu piepai ra vii iare Atemas sipoa eke aue Tikikas. Oire vosa irai vaiterei iava vii iare pouro virovere, ra va iava ikauvira ragai iare uriou vo-ia Nikopolis-ia. Úvare oiso ruipaparai ra evoa touve vo uteopa vuuta-ia. <sup>13</sup> ✧ Viigoa uvuipauei ra Sinas tauvari riro taraito reo goruro-ia, aiteara vatatopopasiei ora Apolos vokasa. Uva vii tavipaavoi oiso ra oearovu taviri, ra orekerovu avu vai vaitereipa vatevateive oarava uvuipasiei avasa.

<sup>14</sup> Voeao oirao pie vovou irara oea tokipaveaira, oearo oiso vii tavipaavoi ra voea vearovira rutu tarai pieri. Ra va iava vearo pitupitu rutu purapaive. Oa iava uvuipaai ra tauva vovou rutu purapaive voeaopa oea Jisas vo kovoaro purapaiveira. Ra vearo tou rutu purapaive ora voea vo rugooroaro kavuoro oara-ia ora voea raga-ia vovoupaaveira.

<sup>15</sup> ✧ Ari ita, voeao rutu oea oisoa ragai tapo toupaveira oea voeao viiva vearo voki rutu purapaivoi. Oa iava uvuipauei ra vo vaisio topa pieri, vearo voki voeaopa oea Jisas oirao piepaiveira.

Pauto visiigoa rutupa rirovira vereopa vovou vateveve ora igei tapo. Ragai-a vao, Pol.

## FAILIMON

### Irapa Reoro Vo Vukuo Iava

Pol vo pasio rigatoreva tuukepa kepa-ia toupaooro eisi Rom urui-ia 61 o 63 yia Kraiis vo kavauaro isivaaro iava. Vo rigato purareva rera iare rera vatetoaoro ro Failimon ira Pol vo reoaro uvuoro proro viropa oa iava va sirova uturoepa Kraiis oirao piepaoro. Uva iravu kovopato Onisimas Failimon reraoro, ira torireva Failimon arova vore Rom uva voa oisoa Pol tapo toupaveve, oa iava oisoa Kraiis oirao piepareve, uvare rera vovouaro proroaveva. Oisi-a eisi osa iava Failimon akereva Pol oiso, E uvuipauei ra rera Onisimas vorevira ou pieri, uvare vii araokotoaoro rera-a ro vo Kraiis vaisiario-ia. Ra rera ou pieoro rerapa siraou vao-ia rera vo vuriaro vao oa purareva.

1. Aviavi pie reoro rigatoreva Pol, 1-3.
2. Ora rera vaaro sirao vovou Failimon-pa, 4-7.
3. Failimon arereva Pol oiso ra vorevira Onisimas ou pierive, 8-22.
4. Ovoioapa reoro-ia veoro vokireva Pol, 23-25.

1-2 ✧ Ragai-a vao Pol ragoa tuukepa kepa-ia toupaaivoi, uvare Kraiis-pa kovopato-a ragai. Uva vegei-a vao ora ro Timoti vii araokotoareiaro ora ragai, vegoa vo rigato puravevo viipa Failimon. Uvare viipa siraopaveira vo osa Kraiis-pa kovopariveira. Oire uva voeoro rutu tapopa vo rigato-a vao-ia, oearoa vii vo kepaoro-ia ora gurupaaveira lotu purapasa. Ora o tapo vigei taataavaaro Apia iriapa tapo vo rigato puravevo, ora ro tapopa Akipas ira vegei tapo vuri vovouora ora upoparoveira. <sup>3</sup> Uva variriparai Pautoa iare vigei aitearo ora Jisas Kraiis vigei Turarooro oiso ra gavaure vovou purasi visii-ia tauvaa vateoro visiipa.

#### *Oirao Pie Vovouaro Failimon Ora Siraopa Vovou Aue-ia Turaro*

4 ✧ Ari ita, vosa variria purapaoro vii vaisipaavoivo Failimon. Ora vosa viire rugoopaoro veoro vaisi vuurapa vaisi purapaavoivo ragai reraoro-ia Pauto. <sup>5</sup> Vo uvare vii iava uvupaaveira vo oearovu ruvara-ia. Uvare vii-a eva viigoa oearovu rutupa siraopaveira voeao vii voeao, vo rara goruvira rutu oirao pie vovou purapari Turaro-ia Jisas. <sup>6</sup> ✧ Uva oiso variripaoro viire rugooparai oiso, Vearopai rutu vo osa ora vii vaoro oirao pie vovou kareke pieri oearovu rutupa oirara. Oire ra va iava vii-ia vo vovou eveoro oiraopavira rutu varao oirao pieve vara-ia taraoro veoropara, oara vigeipa Kraiis Jisas-ia toupaveira, vo osa rera tapo ora tavosipavio. <sup>7</sup> ✧ Oiso osa va eva, araoko, vii vaoro sirao vovou voearoapa Pauto voeoro. Oa iava rorupaavoivo rutu, uvare va-a eva oa ragai vovouaro varaata pievoivo rutu. Ari ita, igei rutu varaata pierivora igei vao Pauto voeao.

#### *Pol Failimon Tavireva, Viipa Ruipaparai Rutu Ra Onisimas Ou Pieri Ora Vii Iare Oiso Rutu Osa Araokoto Oara*

<sup>8</sup> Oire uva veoro vovou-a vii vaoro oa-ia taraipaoro uvuiparai ra oiso vii tavia goruvira, Ragai vo reoaro uvu iraori, uvare vegei araorei-a vo Kraiis vaisiario-ia. <sup>9</sup> Ari ita, viipa siraoparaveira rutu. Eva-a oa vituaro iava gavaure visivi vii arepaavoivo. Ragai-a vao avukatoavi Pol, ragoa tuukepa kepa-ia toupaaivoivo Kraiis-pa kovopato. <sup>10</sup> Oire uva oisi-a oiso osa ragavira rerapa ro-ia Onisimas vii arepaavoivo, oiso ra rera tauvari ira viipa

✧ **1:1-2:** Ef 3:1; Fl 2:25; Kl 4:17    ✧ **1:4:** Kl 1:3-7; Ro 1:8-9    ✧ **1:6:** Je 2:14-20; Fl 1:9    ✧ **1:7:** 2 Ko 7:13

kovo rovoreva. Oa iava torireva vii arova. Uvare rera-a ira oiso rutu toupaveira, ragai oviitoaaro. Vao vituaro iava uvare tuukepa kepa-ia toupaooro Krai iava rera taviava. Oa iava ragai vo rearo uvuoro Krai oirao piereva. Osa iava Airepa Tootoo rutu oureva. <sup>11</sup> Ari ita, voari tuariri viapau vearo kovo vai purapaveira viipa. Ari vo vokio-ia uvuiparoi rutu ra vearo kovo rutu purapaveve vegei rutupa ora vii.

<sup>12</sup> Oire uva rera arupaavoivo vorevira vii iare. Uva rera-ia ora ragai iava vovouisi rutu tapo sipopaavoivo vii iare siravira. <sup>13</sup> Ari ita, rerapa ruipa ragaparai rutu oiso ra vovio raga ragai ruvara-ia toupaveve, vo uva tuukepa kepa-ia toupaveve. Aue iava uvare oearovupa siposipopaaveira Vearo Siposipo iava. Oire ra oisi ragai ruvara-ia touoro ragai tauvareve vii vo tavukiario ouoro. <sup>14</sup> Ari viapau uvuiparai ra goruvira rera-ia pitupaa vo raga ragai ruvara-ia, vosa viapau vearo vaisi pura rovori rera-ia. Ari ita, reasiparai oiso ra vii tavia oiso, "Ragai tauvari." Viapau. Ari vii raga vo rugoaro vegei-ia. Oa-ia uvuipauei ra vegei tauvari vii vo ruipaaro sirova.

<sup>15</sup> Ari ita, ragai oiso rugorugooparai, Pautoa vai vo ruipaaro sirova torireva vii arova. Oire uva vooa-ia vooa uvava voreoro taru vii ruvara-ia riro kaekaevira rutu toupaveve. Iu, uva oiraopavira rutu-a eisi. <sup>16</sup> ✧ Vo vokio vao oa-ia viapau oiso Onisimas toupavevoisa vooa voari tuariri akukuvira oisoa kovo ragapaveve. Viapau. Uvare vo vokio-ia oiso rutu toupavevo, Rera-a ro-ia vegei araokotoaaro vo Krai vaisiario-ia. Eva-a oa-ia kovopa irarapa pute pievira toupavevo. Eisi osa iava uvuipavevei ra rirovira rutu rerapa siravira. Oire vosa oiso rugorugoopau rore Onisimas, Ragaipa kovopato ro-ia ora ragai araokotoaaro vo Turaro vaisiario-ia, uva eisi osa rugoopaaro uvuipauei ra rirovira rutu rerapa siravira vo sirao-ia pute pievira osa rerapa siravira.

<sup>17</sup> Ari ita, vosa oiso ragaire rugoopau, Vatetoa oaa rutu-a ro-ia Pol, uva uvuipauei ra rerere tapo oisi rugoovo, vorevira ora vii iare rera voreoro ro-ia Onisimas. <sup>18</sup> ✧ E vuria vai peira rera-ia vii-ia ora vo vii orekerovu avu vaiario-ia? Vosa oisi oarai pape, oire uva uvuiparai ra viipa oarai kare piea. <sup>19</sup> Oire uva va vao oa kekepari oreoa rigatopaavoivo ora ragai Pol vavaeoro raga iava. Oa-ia oiso puraparai, Iu, oiraopavira rutu viipa oara kare pieaveve. Uva uvuiparai ra oiso vii tavia, Easi riroa rutu epao oa ou ragariva ragai ruvara-ia, uvare vii siposipo ragapaavora Vearo Siposipo iava. Oa iava Jisas oirao pieoro Airepa Tootoo ourivora. <sup>20</sup> Oire araokotoa oaa, vii Failimon arepaavoivo oiso ra oisi eisi va purari. Uvare tavosivira rutu toupavevoivo Krai vaisiario-ia. Uva va-a vao oa-ia uvuipauei ra oisi iava ragai vovouaro varaata pieri rutu, vo osa vii tauvareve Turaro oisi eisi piepasa.

<sup>21</sup> Ari ita, vii-ia taraiapaoro oiso viipa vo pasio rigatoavoivo. Oiso osa ragavira uvuipauei ra oisi va purari. Uvare oiso ragavira vii-ia taraiaparai, evara-ia pute pievira rutu taru orekerovu rutu oisi purarivere rara ragaipa. <sup>22</sup> Oire uva oisi-a eisi osa ragaipa oai tugia vai ravaavira vatatopori. Ari ita, Pauto oirao piepaavoivo rutu, oiso ra visii rutu varaaro variriara vearovira rutu uvupaveve. Oa iava ragaipa raiva purareveve vao oa-ia vorevira voreravere visii tapo toupasa.

### *Ovoipa Reoro Vatereva Pol*

<sup>23</sup> Oire uva oreovu-a vao-ia vo osa Epafra vearo voki purarevoivo viiva. Ira oisoa ragai tapo toupaveve vo tuukepa kepa-ia, uvare rera tapo Kraipa kovopato. <sup>24</sup> ✧ Ora vooa tapo Mak vase, ora Aristakas, ora Dimas, ora

Luk oea rutu tapo viiva vearo voki purapaivoi, voeao oea oisoa ragai tapo kovopaive.

<sup>25</sup>Oire uva ragai-a vao variriparai Turaro iare Jisas Krais, oisore ra visiipa tauva vatereve visii viraakooro rutu. Ovoiei.

Ragai-a vao, Pol.

## HIBRU

### Irapa Reoro Vo Vukuo Iava

Vo pasio rigatoreva iravu voeaopa oirao pie vovou irara Jiu-pa irara iava voea. Ari viapau taraipaviei oiso, Iroutoa rutu vo rigato purareva.

Uva Kraís iava Kristenpa irara tavitavireva oiso purapaoro, Ro Kraís ira oearovu rutu-ia pute iraopareveira reipaoro voeao iava, oiso osa voeao profet irara, ora voeao enselpa irara, ora ro Moses, ora Josua, ora pris irara Eron vo saraaro iava voea. Ora oiso tapo puraroepa vo pasio-ia, Vao Airepa Reo Ovoi oa tuariripa-ia pute iraopaiveira tauva vatepaoro oirarapa. Ora vao koruoua oa purareva ora rera-ia Kraís ora aue tapo varao oirao pie reoro oara rutu Jiu varaaro-ia putepaiveira varao oara oisoa purapaive vo tuariri rutu.

Oire uva Papara 11 sovara-ia goru reoro rutu toupaveira oreoroa epao voeao iava tuariripa irara oea varaaro oirao pie vovouro oisoa kareke piepaive Pautoa raga-ia rari iraopaoro vo osa oisoa oaravu kovoara purapaive.

1. Jisas iava vao aviavi pie reo, ira-a orekerovu rutu vituaro-a rera, 1:1-3.
2. Kraís voea-ia enselpa irara puteparevoi rutu, 1:4–2:18.
3. Kraís vaiterei-ia Mòses vaio ora Josua puteparevoi rutu, 3:1–4:13.
4. Kraís voea-ia pris irara Eron vo saraaro iava pute iraoparevoi rutu, 4:14–7:28.
5. Tuariripa koruouaroa-ia puteparevoi Kraís, uvare ora rera iava revasiva-ia ovoioapa koruoua purareva Airepa Reo Ovoi oirao piepaoro, 8:1–10:18.
6. Oirao pie vovou-a vao oa-ia uvui iraopaviei ra Pauto roru piepape oiso oia tuariripa irara oisoa rera roru piepaive, 10:19–12:29.
7. Goru reo vatereva Kristen irara vo vovouroaro tore piepasa, oiso ra tuuvu vovouvira toupave, 13:1-25.

#### *Pauto Oviitoaaro Vigeipa Reo Vatepare*

<sup>1</sup> Pauto tuariri rutu ora rera vo reoaro oisoa vatevatepareve voeaopa vigei aao iraraoro. Ora vo osa tapo vo oraivarovu rutu-ia oisoa profet irara-ia piepareve ra rera vo reoaro kareke pieve va kosi pieoro. <sup>2</sup> ✧ Ari vo vokiroa varao-ia ovoioapa vokiro oara-ia Pauto ora rera vo reoaro kosi pierevora rera Oviitoaaro-ia. Ro-ia ira iavirava Pauto orekerovu rutu pura rovoreva voari rovoa rutu-ia. Ora oiso tapore eera ira-ia orekerovu rutu touvora vo ovoioapa voki-ia, ra oiso rutu pieve evara, Rera raga varaaro. <sup>3</sup> ✧ Eera Jisas ira iava roropaiveira aviavia vova Pauto vo kerariaro-ia. Ro ira kekepaoro oiso taraipaaepa, O ari Pauto oiso toupaveira osa ro, uvare Pautoa-va areiipareveira rutu Jisas. Rera vo reoaro vo goruaro oa-ia orekerovu rutu voka piepareveira oiso vuvuiua-ia ora vo rasitua-ia, oisore ra orekerovu rutu oisi raga toupave vo vokiara rutu-ia. Oire uva raiva pura rovoreva oirara rutupa vo vuriara rutu verapasa vo ora rera revasiario-ia. Oa iava vo vokie oirapapa varata-ia pauparoí vuvuiua-ia Pauto ruvara-ia, ro-ia Reitoa rutu ira oearovu rutu-ia King irara putepareveira.

#### *Pauto Oviitoaaro Ira Enselpa Irara Rutu-ia Putepare*

<sup>4</sup> Eva-a oa iava rera raga enselpa irara-ia putepareveira rutu. Oiso osa raga ita rera vaisiario voea vaisiario-ia putepareveira vo vaisio-ia oa

vatereva Aiteto Pauto rerapa. <sup>5</sup> ✧ Uva va vituaro iava oiso toupai, uvare viapau oiso irai voea iava enselpa irara oisi tavireva oiso, 'Vii-a ragai Oviitoaaro. Vo vokio-ia ragai-a vii aitetoaaro.'

Ora oiso tapo osa viapau oiso irai voea iava enselpa irara tavireva oiso, 'Ragai-a rera aitearo. Ira taru toupavevea ragai Oviitoaaro.'

<sup>6</sup> ✧ Oire vosa Pauto ora rera Oviitoaaro rutu Avaioto vara piesa aueparoepa, uva oiso puraroepa, 'Voea rutu Pauto voeaaro purapurapa irara ensel irara taku viro iraoave rera Oviitoaaro-ia vuurapa vaisi puraoro.'

<sup>7</sup> ✧ Oire uva voeao enselpa irara oea iava Pauto oiso puraroepa, 'Purapurapa irara ensel irara puraava, oiso ra oiso toupave osa kiuvu. Ora tapo ragai voeaaro kovopa irara oiso puraava, ra oiso toupave osa vuvua.'

<sup>8</sup> ✧ Oire uva vo reo raga purareva rera Oviitoaaro iava oiso, 'Turaro. Vii vaaro paupa viapau oiso opesiperea. Oa touvira rutu toupavevea ovusa va-ia paupau oearovu rutu tokipaoro. Voeao rutupa reipauvevea, oea torevokovira rovirieiparivevea.

<sup>9</sup> ✧ Viigoa vovou iraoapu torevokoa purapasa vao vuria verapaoro. Eva-a oa vituaro iava Pauto, vii reraaro Pauto vii roporevora. Oa iava oearovu rutu-ia putepari, vo osa viipa avivikepaaveira vii-ia vuurapa vaisi purapaoro. Va-a vao oa vituaro iava roru vovou rutu vaterevora viipa.'

<sup>10</sup> ✧ Oire uva oiso tapo puraroepa Pauto, 'Vii-a Turaro viigoa vo rasio karekeriva va purapaoro rovoa-ia. Oa iava ora vii iava vavaea raga-ia vuvuiua ita aia purariva.

<sup>11</sup> Ari ita, oiraopavira rutu. Vara rutu opesiperea, vo osa vii raga touvira rutu toupari. Oara rutu evara rutapaperea avukapaoro. Oiso rutu osa varoara varao oarapa tutuu piepapeira oiso ra karikari piro.

<sup>12</sup> Oisi-a eisi osa piepavira uvuipau ra vara vikopari vara vikipasa. Uva vara rutu oisi purariva oara ora tavariopapeira oiso osa varoara ora tavariopapeira, vo osa vii viapau oisi otavarioiei. Ora viapau rutu oiso avukapauvevea.'

<sup>13</sup> ✧ Ari ita, Pauto viapau irai enseltoa vai tavireva oiso purapaoro, 'Vo pauu ragai vaaro iava oirapapa varata. Uva tuepauvevea vo vokio-ia oia-ia voeao viiva keripa irara tovoavevea vo vii roeroaro, oiso rutu osa orekerovu varao oara ivara-ia tasipaiveira kokotoara.'

<sup>14</sup> Oire uva eake rutu-a voeao enselpa irara? Uvare voea rutu kovopaiveira urauravira Pautoa-pa. Oa iava Pauto voea sipopaveveira voeoro tauvapasa oearoa ora vatatopopaaveira rerare tuevira. Vo osa voeapa ruipaparo, oiso ra ora rera iare voea oupareve.

## 2

### *Pauto Vo Ruipaaro Oisi Toupaveira Ra Vorevira Ora Rerapa Vigei Oupareve*

<sup>1</sup> Oire uva vo reo-a vao oreoa vate rovoivora vigeipa oiraopa reo rutu, oa iava vo reo uvu iraoapeira. Vo reo-ia pitupapeira goruvira rutu. Teapi vo reo arova ora aapaapau pie oiso osa opitaisi vo avaka rovu ivara-ia gaegaerepai. <sup>2</sup> ✧ Uva vo siposipoa-a vao oa purapaiveira enselpa irara oa eveipaiveira oirara rutu oiso, Va-a vao-ia oiraopa siposipo rutu aue Reo Taisi Jiu vaaro. Uva viapau oiso vearovira vo reo sirova utu rovopaaepa.

✧ 1:5: Sam 2:7 ✧ 1:6: Diu 32:43 ✧ 1:7: Sam 104:4 ✧ 1:8: Sam 45:6-7 ✧ 1:9: Ais 61:1-3  
✧ 1:10: Sam 102:25 ✧ 1:13: Sam 110:1 ✧ 2:2: Hi 1:1



Oa iava vuria vo voriaro uvuivira ouivora. <sup>3</sup> ✱ Oire uva apeisi-a? Vosa vo siposipo eva uvu ragapape vo pitupitu iava Pauto vaaro oearovu oupa vore ora rera iare, uva apeisi ragavira oiso osa iava uvuipaviei ra vuri vovou vo voriaro vatavatape? Viapau rutu uvuipaviei ra vuria vo voriaro vatavatape, uvare Turaro Vearo Siposipo kosi pie rovoreva. Oa iava oearovu va uvuivoiva, Pauto voea oureva ora rera iare. Va-a eva oa rutu vituaro iava vo siposipo oiraopavira rutu oiso karekeerao vigeipa. <sup>4</sup> ✱ Uva Pauto vigei rutupa evo reo oirao piereva oaravu rutu ravotoara puraoro vigeipa ora rera vo goruaro riro goru rutu kareke pieoro. Oa iava oaravu tapo vatereva voeaopa oirao pie vovou irara, varao vatevateara Tugoropato Uraurato varaaro. Uva vara-a evara oara vatereva voeapa ora rera vo ruipaaro raga-ia, Pauto.

### *Jisas Raga Uvuiparoi Rutu Vorevira Vigei Oupasa*

<sup>5</sup> Oire uva airepa vovouva urioroepa Krais. Oa iava viapau oiso Pauto enselpa irara reesireva oisore ra varao-ia airepa rugooro tokipaave, varao oara iava tavitaviparai. <sup>6</sup> ✱ Viapau. Ari, iravu oirato oiso puraroepa Tugoropa Vuku sovara-ia oiso,

‘Pauto. Eake irara vai-a oirara ra voeare rugorugoo rovou? Iu. Eake rutu-a oirara ra voeapa siraopau rutu?’

<sup>7</sup> Ari ita, poteku vuutavi raga oa-ia voeapa oisi pierivora, oiso ra enselpa irara roeroovi toupave. Uva evoea oirara oea-ia keraria tovorivora, oiso ra vara rutu voea vaisiaro kae piepaive. Uvare orekerovu rutu voea roeroo toupaveira varao oara rutu tokipaaveira.’

<sup>8</sup> Oiraopavira rutu oiso osa evo reo purapai oiso, Orekerovu rutu oirara roeroovi toupavoi varao oarapa reipaaveira. Ari touvira rutu oirara siitueperea vo rara oisi pieive orekerovupa reioro. <sup>9</sup> ✱ Ari ita, viapau oirara oisi kekepapeira, ari Jisas raga. Poteku vuutavi raga oa-ia tourevora vo enselpa irara roeroovi oiravira. Oa iava Pauto oirara rutupa siraoro Jisas siporevora, oiso ra voea rutupa kopiuro. Okopiia isivaaro iava rera kae pierivora ora rera iare. Uva rerapa rei vaisi rutu vaterevora rera tovooro rera vo keriaro sovara-ia.

<sup>10</sup> Uvare Pauto-a ira orekerovu rutu karekereva ora rerapa. Ora orekerovu rutu rovo rovoreva. Eva-a oa vituaro iava oisi torevokovira rutu Jisas oisi piereva. Ari ita, Jisas eera ira iava oirara rutu uvuipaai ra oisi toupave, ra va iava Pauto ora rera iare vorevira voea oupareve. Uva va-a vao oa vituaro purareva Jisas siitoka ouoro. Uvare rera raga kataitao rutu ira uvuivira rutu karekeroeapa oirara rutu tuvetuavepa vaore, oiso ra Pauto voaaro koatapaave. <sup>11</sup> ✱ Uva Jisas vuriara rutu vera iraopareveira oirara iava. Oa iava voea rutu Jisas vase areiivira rutu toupaveira, uvare torevoko irara-a vigei. Oa iava kataitao rutu-a Aiteto Pauto vigei rutu Aitearo. Oa-a eva oa sirova viapau oiso Jisas ariia vai oupareveira, vo rara oirao pie vovou irara rutu vaisipareve oiso, “*Ragai araoko iraraaro.*” <sup>12</sup> ✱ Ira vo reoaro oiso puraepa,

‘Pauto. *Ragai vii iava araoko irara oaa tavipaoro vii vaisaro-ia vuurapa vaisi purapaaverea vo oirara rutu osireiaro-ia voea oea ora gurupaave.*’

<sup>13</sup> ✱ Ora vo reo-ia tapo rera vo reoaro oa-ia oiso puraroepa,

‘*Ragai vii-ia Pauto rari vovou purapaaveira.*’

Ora vo reo tapo oa oiso purapai,

✱ 2:3: Hi 10:29, 1:1; Lu 1:2 ✱ 2:4: Jo 4:48; 1 Ko 12:4; Ef 1:5 ✱ 2:6: Sam 8:4-6 ✱ 2:9: Fl 2:7-9; Ap 2:33; Jo 3:16 ✱ 2:11: Hi 10:10 ✱ 2:12: Sam 22:22 ✱ 2:13: Ais 8:17-18; Jo 10:29

*'Ragai-a vao ragoa voeavio tapo kakae vure toupaaivoi, oea vaterevora Pauto ragaipa.'*

*Jisas Ira Oiravira Karekeroepa Vigei Tauvasa*

<sup>14</sup> ✧ Oire uva voeao oea oiso vaisireva kakae vure evoea-a oirara rutu. Uvare Jisas oisi rutu kavauroepa oiso osa voeao oirara oeava areiipare. Ira eisi ragavira pierewa aue-ia evao parikou-ia kopiiro, oiso ra Seten vo goruaro-ia tasireve vao oirara kopii piepa goru. <sup>15</sup> ✧ Uva Jisas Seten-ia pute ovoireva rera vo goruaro tokooro. Oa iava voea vo rugorugooaro karukarureva voeao oea vokiara rutu-ia oisoa kopiiapa uriripaave. Uva vo uriri tapo eva opesi pie ovoireva. <sup>16</sup> Oiraopavira rutu vao-ia taraipavio oiso, Viapau oiso enselpa irara tauvaporeveira. Viapau. Aue iava uvare voea-a voeao oea tauvaporeveira oea toupai Ebrahim aao iraraaro. <sup>17</sup> ✧ Oa vituaro iava oiso rutu karekeroepa osa oirara rutu araokotoaaro, oisore ra oiravira rutu touoro goruvira rutu Pauto vo kovoaro purapareve. Vo kovo-ia okovoa oisoa purapareve Rovopato Pristo, oiraopa kovotoa rutu Pautoa-pa tauoara purapaoro vigei iavivira siravira. Oa iava Pauto oirara iava vuri vovou rutu verareva. <sup>18</sup> ✧ Oire uva oisi ragavira eisi osa tupaoro uvuipareveira rutu voeao tauvapaoro oea-ia kokarapareveira Seten. Eake iava? Uvare Jisas tapo-ia kokara ragaroepa rera Seten. Oa iava va-ia vo sirao oureva eera, vo osa vao Jisas rera-ia Seten vorevira putereva rutu.

### 3

*Vao Turaro Vaisi Jisas Vaaro Oa Vao-ia Turaro Vaisi Moses Vaaro Puteva*

<sup>1</sup> Araoko irara oaa, visii vaisireva Pauto, "Ragaipa." Uvare viapau vuri vovou vaiei visii-ia. Oire rugoo iraopata rore Jisas. Eera ira siporevora Pauto vo rasio iare rera vo rearo kaepasa. Oa iava oiso rera karekerevora rera Rovopatoa rutu Pristo. Uva rera-a eera ira vaisipai oiso, "Vigei reraaro." <sup>2</sup> Uva viapau oiso Pautoa-va kaureoroepa ro ira roporeva rutu vo kovo purapasa. Oiso osa pierewa aue Moses ira viapau oiso potereva vo oirara rutupa kovopaoro Pauto voeaaro ora Pautoa tapopa. <sup>3</sup> ✧ Oire auea vao-ia ovoovoa ro iava oirato ira kepa paureve rei vaisi kepa. Ra rera vaisiario reiparo vo kepa-ia. Oiso osa aue Jisas ira vaisiario Moses vaisiario-ia puteva vo Pauto rugorugooaro-ia. <sup>4</sup> Ari ita, viapau oiso okepai akukuvira kareke ragapapeira. Viapau. Ari oirara raga oea vo keparo rutu evara paupaveira. Oiso osa Pauto ro ira orekerovu rutu purareva. <sup>5</sup> ✧ Oire uva Moses-a eera Pauto kovopatoaaro. Uva viapau oisoa potepareve voeaopa kovopaoro oea Pauto vo keparo-ia tupaiveira. Viapau. Asi eva-ia rera vo kovoaro ovoovoa purareva vao oa iava ora tavitaviave vo utupau. <sup>6</sup> ✧ Ari ita, uva Kraisa Pauto Oviitoaaro rutu ira tapo viapau oiso potepareveira vigei tokipaoro vigoa oiso tupaiveira, Pauto vo kepaoro. Uva vigei vao vigoa oiso rutu tupaiveira, Pauto vo kepaoro, vo rara Kraisa-ia oirao piepaoro goruvira pitupape vo Pauto vo Saraarore tuepaoro.

*Voeao Oea Pauto Gisipoarova Kaureopaai Oea Viapau Uvuipaai Ra Reareaa Vai Ouive*

<sup>7</sup> ✧ Oire uva eisi tupaoro Tugoropato Uraurato ravaavira vigei vatatopo piepareveira oiso purapaoro, 'Vo osa vo vokiio reara uvu iraopata varao vova Pauto gisipoaro-ia,

✧ 2:14: Mt 16:17; Jo 1:14 ✧ 2:15: Ro 8:15; 2 Ti 1:7 ✧ 2:17: Fl 2:7; 1 Jo 2:2, 4:10 ✧ 2:18: Hi 4:15 ✧ 3:3: 2 Ko 3:7-11 ✧ 3:5: Nam 12:7; Eks 14:31; Diu 18:18-19 ✧ 3:6: 1 Ko 3:16; Ro 5:2 ✧ 3:7: Hi 9:8; Sam 95:7

- <sup>8</sup> ra opeita oiso vo vovouro purapata osa voviri tuariri kaureopataepa rutu Pautoa-va. Vo osa voraro toutava raaka tapiro evoava oisoa Moses vo reoroaro akeakepata varo reroaropaoro.
- <sup>9</sup> ✧ Ari ita, uvaroa evoraro uva touiva voeari visii aao iraraaro. Uva oisoa voraro toupaooro oaravu rutu vuriara purapaive. Oa iava tutuu pie ragaepa ragaipa oiso ra voea opesi piea. Osa viapau. Ari vo resura tau ivaro-ia (40) touiva osa voea oisoa tokipaa touvira. Iu ita. Evoa oisoa ragai vo tokiaro evei ragapaoro vuri vovouro rutu pura ragapaive.
- <sup>10</sup> Oa vituaro iava voeare kasipuraepa oiso puraoro, Voea rutu voeao-ia riro kaureo irara. Uvare viapau oiso ragai vo reoro sirova utupaaveira oisi vara purapasa.
- <sup>11</sup> ✧ Uva voeare kasipuraepa. Oa iava reo ovoi puraava oiso puraoro, Viapau rutu oiso oea koataavere ragai tapo touoro reareasa!

*Viapau Rutu Uvuipavio Ra Kaureopavio Pautoa-re Oiso Osa Voeao Isrel*

<sup>12</sup> ✧ Araoko irara oaa, ora vatatopo irapata. Teapi irai visii iava oiso okaureoi purapareve evo vovouro rutu purapaoro vuriara. Ra vara-ia ora piro piero Pauto arova. Ro Pauto ira touvira visii tokipareveira. <sup>13</sup> ✧ Ari oearovivu taupapata ora visii iava vokiara rutu-ia, vo osa touvira evo vokiore toupave vore utupau. Teapi irai visii iava ora keakea ragaparo oiso purapaoro, “Viapau oiso vuri vovou uvuipai ra ragai vuri pieve.” Oire uva va-a eva oa viapau oiso uvuipai ra vii arovi pieve Pauto vo pitupituaro sirova utusa. <sup>14</sup> Eake iava? Uvare vigei rutu Krai tapo takuvuvira rutu toupai rera vaoro oupaoro tauvaa, vo rara vao-ia rari vuku goruvira rutu pitupape vao oa-ia rovovio rovovira rutu. Teapi vaore ovaupavio Ovoioipa Vokire tuea.

<sup>15</sup> Iravu vo rigato purareva oa oiso purapapeira, “Vosa vo vokiore reoara uvupata varao vova Pauto gisipoaro iava, ra opeita vo vovouro purapata osa voviri tuariri kaureopataepa rutu Pautoa-va.”

<sup>16</sup> Uva irou irara rutu-a voeao oea Pauto gisipoaro oisoa uvu ragapaoro rerava kaureopaave? Evoea raga ita oea tuvvetuvereva Moses vo vokiore oa-ia Isp-ia kavuoro avaaepa. <sup>17</sup> Ora irou irara rutu-a voeao oearo kasipuroepa Pauto aue-ia vo resura tau (40) ivaro? Ari voea raga ita evoea oea vuri vovouro purapaiva. Oa iava kopiiiepa evoraro raaka tapiro. <sup>18</sup> ✧ Uva irou irara-a voeao oeara vao ovoioipa reo purareva Pauto oiso voea vosiore ravaavira, “Viapau rutu oiso oea koataaverea ragai tapo touoro reareasa!” Oreoa vao-ia oa purareva voeare voeao oea oisoa rerava ora kaureopaave rutu. <sup>19</sup> ✧ Oire uva va-a eva oa-ia taraipavio rutu, uvare va iavirava viapau oiso uvuiaepa rera voarore reareapa tapi koataave, uvare viapau rera-ia raripaoro oisoa toupave.

## 4

*Rearea Toupai Pauto Voeaaroa Oirara*

<sup>1</sup> Touvira Pauto vo reoro vigeipa toupavoi vore koatapasa reareapa tapi. Ra ora vatatopo irapata vaopa uriripaoro, teapi irai vigei iava potereve vo Pauto osirearo-ia, ra viapau uvuiro voare koataa vo reareapa tapi. <sup>2</sup> Iu, oa iava vo siposipo uvuerao oiso ra Pautoa tapo toupape oiso osa voeari tuariripa irara. Ari ita, oea vo siposipo oisoa uvu ragapaive. Osa iava vo reo oupaoro viapau oisoa vo reo oiraõ piepaive.

3 ✨ Ari vigei vo reo vao-ia oirao piepaera. Eva-a oa vituaro iava koata ovoiviera voare vo Pauto voaaro reareapa tapi toupasa. Oa iava ita oiso puraroepa,  
 'Uva voeare kasipuraepa. Oa iava ovoioipa reo puraava oiso puraoro, Viapau rutu oiso uvuipai ra oeai koataaverea ragai tapo touoro reareasa!'

Uva oisi-a eisi osa puraroepa. Ari oiraopavira rera vo kovoaro opesi piereva rutu voari rovoa-ia. Oa iava voeare oisoa tueparo. 4 ✨ Oa vituaro oiso toupaveira vo-ia Tugoropa Vuku-ia, uvare oiso puraroepa aue iava vao-ia erao vatarapa (7) voki,  
 'Vao-ia erao vatarapa voki rearearoepa Pauto orekerovu rutu isivaaro iava vara purarevoiva.'

5 ✨ Oire uva vo reoa raga-a vao oa ita toupai voi vo Tugoropa Vuku sovara-ia,  
 'Viapau rutu oiso koataaverea vo ragai iare reareasa.'

6 ✨ Ari ita, voeao oea vearo siposipo uvu rovoiva oea viapau oiso koataaepa Pautoa iare vo reareapa tapi reareasa. Uvare viapau oiso oirao pie vovou vai oisoa purapaive. Ari oearovu epao touvira, oea uvuipai koatasa rera iare Pauto vo reareapa tapi. 7 ✨ Eake iava? Uvare Pauto ovokivu reesireva oiso vaisioro, Vo vokio. Oreoa vao isivaaro iava Devit vo reo rigatorevora vao-ia Pauto vo reoaro vo vokio iavapa reo oiso,  
 'Vosa vo vokio reoara uvu iraopata varao vova Pauto gisipoaro-ia, ra opeita vo vovouro purapata osa tuariri kaureopataepa rutu Pautoa-va.'

8 ✨ Uva oirara vo vuutao-ia touiva oa-ia Josua voea tokireva. Oire vosa vo vuuta-ia eva koataaeri vore Pauto voaro reareapa tapi, ra viapau oiso Devit oisi oa-ia taraioro oiso vo rigato purareve, 'Ovokivu toupai touvira oearovupa.' 9 ✨ Ari ita, oiraopavira rutu, uvare touvira vuuta epao vao oa-ia koataaverea vo Pauto ruvara iare reareasa. Oa oiso toupai osa vo vokio erao vatarapa voki oa-ia rearearoepa orekerovu rutu puraoro. 10 ✨ Aue iava uvare ro ira koataro voare vo Pauto voaaro reareapa tapi, uva oiso rutu toupave, Ira ita eera oisi orekerovu rutu opesi pierevora, oa iava rearearoi oiso osa Pauto rearearoepa. 11 ✨ Oisi-a eisi osa visii tavipaavoi oiso, Orekerovu vearovira rutu purapape, ra va iava koatavioverea vore Pauto rera tapo reareapasa voa. Auepa teapi irai vigei iava oiso piereve osa voeao tuariripa irara oea oisoa kaureopaave. Ra va iava viapau oiso uvuipa ra Pauto tapo toupasa koataro.

12 ✨ Oiraopavira rutu oiso osa Pauto vo reoaro tootopai ora kovopai voi. Riro avuavua oa oaravu rutu sigoara avuavuario-ia putepaveira rutu. Uva eisi osa uvuipai oirara ra va avuavuario sovopaive vo ora voea sopoaro-ia, ora vo tapo ora voea varaaro-ia rugorugooara. Oa rokopaiveira vo keruara rutu sovara-ia. Oire voava vearopa vovouro rovirieipaive varao arova vuri vovouro, ora varao vearopa rugorugooro varao arova vuri rugorugooro. 13 ✨ Uva oisi-a eisi osa iava viapau rutu oiso uvuipai ra kataiavi vai gareavi vai vataupape. Viapau. Ari orekerovu rutu-ia taraiaroveira Pauto vara kekepaoro. Ari ita, orekerovu rutu viaevira toupaveira. Ra va iava vara-ia taraiparo Pauto. Va-a eva oa iava uvui iraopaviei ra ora vigei vo vovouroaro karekepape. Ra va iava vara-ia taraiparo Pauto vara rovirieipaive.

### *Jisas-a Rovopato Pristo Vigeipa*

14 ✨ Eva-a oa iava goruvira rutu toupata Jisas raga-ia raripaoro. Ira raga uvuiparoi vigei taupapaveve, uvare rera raga-a Pauto Oviitoaaro.

✨ 4:3: Sam 95:11 ✨ 4:4: Jen 2:2; Eks 20:11 ✨ 4:7: Sam 95:7-8 ✨ 4:8: Jos 22:4 ✨ 4:12: Jer 23:29; Ef 6:17 ✨ 4:13: Sam 33:13-15 ✨ 4:14: Hi 13:1, 7:26, 10:23

Eera ira koata rovoroeпа Pautoa tapo tousa, uva voa toupaooro Rovopato Pristo vo kovoaro purapareveira vigei tauvapaoro. <sup>15</sup> ✧ Uva Jisas viapau oiso toupareveira osa irai pristoа vai, ro ira viapau vigei varaaro vuriara vavataaro sovopareve. Ari ita, vigei reraaro-a Rovopatoа rutu Pristo Jisas ira tou rovoreva vo rasitoo-ia oiso osa vigei vao-ia. Oa iava oaravu rutu vuri pitupituro rera-ia kokara ragapaepa, oiso ra vuria vai purareve. Osa viapau oiso oai purareva vuria vai. <sup>16</sup> ✧ Oisi-a eisi osa vituaro iava uvuipaviei ra koatavio Pauto voaoro iare reia paupa tutuu pieoro uriri asavira rutu. Ra voa vigei kekeoro vigeipa vereopa vovou vaterere, vigeipa siraoro vo vuutao-ia, oa-ia riroa rutu tavaka karekeperea.

## 5

### *Ro-ia Jisas Rovopatoа Rutu Pristo Vigei Orirupato*

<sup>1</sup> Oire ro oirato ira rovoпа pris irara vo kovoaro-ia pitupareveira, oirara raga iava rera-a. Uva rera vo kovoaro rutu-a vao-ia Pautoa-pa kovopaoro oirara rutu tauvapasa oiso-ia, tauoara purapareveira auere ra Pauto oirara iava vuriara verapareve, ora Pautoa-pa vatevateara vate ragapareve voea iavirava. <sup>2</sup> Uva uvuiparoveira rutu voeapa siraopaoro voea tauvapasa oea ruruvutu rugoo-ia ora piro piepaaveira, uvare viapau goru vovouro vai voea-ia toupaveira. Uva oisi raga pristo vo vovouroaro toupaveira osa sovopaoro ora rera-ia voea tauvapareveira. <sup>3</sup> Uva oiso toupaooro uvui iraparoі tauoara purapareve oirara tauvapaoro, oiso ra Pauto voea iava vuriara oaive verapareve ora rera iava tapo pris.

<sup>4</sup> ✧ Viapau rutu irai uvuiparoі ra ora iraiпа avivikevira toupasa ora ropoparo oiso purapaoro, “Ragai-a Rovopato Pris.” Viapau. Ari Pautoa raga ira rera vaisipareveira oisi. Eva-a oa iava Rovopatoа rutu vo kovoaro purapareveira Pristo. Oa-a eva oa vituaro iava Eron Rovopato vo kovoaro Pris kovo oureva voari tuariri.

<sup>5</sup> ✧ Oire uva eisi osa ita toupaooro Krai viapau ora roporoepa rera raga. Viapau. Ari Pautoa raga ira rera roporeva rerapa avivikea vateoro. Oa iava Pauto oiso puraroepa, “Vii-a ragai Oviitoaaro. Oa iava vo vokio-ia ragai viipa oiso toupaa, Ragai vii Aitearo.”

<sup>6</sup> ✧ Uva oreovu toupai vo Tugoropa Vuku sovara-ia oa oiso purapai, “Vii pris vo kovoaro purapariverea vokiara rutu-ia vao oa viapau opesipape rova Melkisedek areiipaoro rutu.”

<sup>7</sup> Uva vo osa Jisas oisoа toupareve vo rasio-ia uva voava oisoа variriparo Pautoa iare. Uva oisoа gaupaoro areparo rera vo vavataaro sovopaoro. Uvare oisoа oiso taraiparo Jisas, Pauto uvuiparoі ra ragai utoreve, ra va iava viapau kopiira rutu. Uva va-a eva oa iava Pauto rera uvureva. Eake iava? Uvare taraipavira rutu Pautoa-pa avivikepaoro oisi vo variri oisoа purapareve Jisas. <sup>8</sup> ✧ Oire Jisas-a Pauto Oviitoaaro rutu. Ari tavaka vovou vo vavataaro kaereva. Oa rera tarai pieva rutu, oiso ra va iava Pauto gisipoaro sirova rutu uturo. <sup>9</sup> Uva eisi osa piepaoro Jisas vo rekasio-ia rutu rekasiroepa oa purareva Pauto rerapa. Eva-a oa vituaro purareva toupaooro, oiso ra va iava Pauto vigei oupareve vorevira ora rera iare, vo rara goruvira rutu Jisas gisipoaro sirova utupavio. <sup>10</sup> Uva rerare ro Jisas oiso puraroepa Pauto, “Rovopatoа rutu vii Pristo vo Melkisedek vo saraaro sovara iava.”

✧ 4:15: Hi 2:18; 2 Ko 5:21; 1 Pi 2:22 ✧ 4:16: Ef 2:18 ✧ 5:4: 2 Kro 26:18; Eks 28:1 ✧ 5:5: Jo 8:54; Sam 2:7; Hi 1:1, 5 ✧ 5:6: Sam 110:4; Hi 7:17 ✧ 5:8: Hi 3:6; Fl 2:8

### *Opeita Kovepata Oirao Pie Vovou Arova*

<sup>11</sup> Visiipa riro gorupa reoro oara vatesa aue ragaparai osa vavagisipatai. Uva viapau vearovira rutu vara uvupataveira, ra vara sirova utupata. <sup>12</sup> ✧ Riro kaekaevira toupatavora visii vao oirao pie vovou irara. Osa iava uvuipataeri oiso ra oearovu siposipopata va iava, osa viapau oiso uvuipataveira. Ari oearovu raga rivasara-ia vo tarai ou iraopataveira vo siposipo iava vao oa ou rovtava voari tuariri. Oiraopavira rutu, uvare vorevira oiso rutu toupataveira osa voeao veu kakaero oea viapau uvuipai ra sopearo vai aiopaive. Viapau. Ari aue raga tapi rovuro. <sup>13</sup> ✧ Oire vosa iravu kakaeto tapi rovu raga tapipareve, ra va iava oearovu rera siituepaoro oiso purapaave, “Okakaeto-a ro-ia ira-ia viapau vearo rugoo vai toupai. Ira viapau taraiparo torevoko vovou vai-ia.” <sup>14</sup> ✧ Ari ita, riropa irara raga sope varuro aiopaiveira. Uvare voea varaaro rugorugooara oaive roroiovira toupaveira. Oa iava taraivira orekerovu rutu rovirieipaiveira. Uva vo vokio-ia uvuipai ra vearopara orekerovu rovirieipaive oiso, Veoro-a vao-ia, ari vuri-a vao-ia.

## 6

### *Goruvira Rutu Kovopape Oirao Piea-ia Pitupaoro*

<sup>1-2</sup> ✧ Oisi-a eisi osa iava uvui iraopaviei ra topa pievira otarairovu ita oupape. Oiraopavira ita. Eake iava? Uvare rovvovira Krai vo taraiaro ou rovoepa. Oa iava uvuipaviei ra otarairovu ita topa pievira oupape. Uvare rovvopa rutu-a vao-ia ro-ia Krai ira-a vigei vaoro vituaro rutu oirao pie vovou. Uva apeisi-a? E vorerivira ita visii taviavere va vituaro puraoro ita? Viapau. Teapi visii tavi ragaa ita akukuvira oiso puraoro, “Opeita ora vatatopo pie ragapata akukupa kovoro raga pura ragapaoro.” Viapau. Ora teapi visii siposipo ragaa baptaisa vituaro iava ita, ora vao vavae tovo vo viraakoa purapaoro. Ora voeoro iava oearoa kopii rovvopaaveira ra voava vorevira voea ita tore piepape. Ora vo vuutao iava oa-ia Pauto oirara rutu rovirieirevere voeapa vuri vovou vo voriaro vateoro. <sup>3</sup> Vo siposiporo-a evara oara iava uvuipaviei ra topa pievira ita avavio otarairovu iare ita, vo rara Pauto oiso puraparo, “Osa veorapai eisi osa piepata.”

<sup>4</sup> ✧ Oearovu epao oea Pautoa-ia taraipaaveira aviavi pievira rutu. Ari vosa koveave oisi rera-ia taraipaoro ra vo tarai kavuoro kove ovoivave. Ra apeisi ragavira vorevira ita voreave oiso vo tarai iare rera iava vao-ia torevoko vovou toupasa? Oiraopavira rutu, uvare Tugoropatoa-ia Uraurato tarai rovoeapa rutu ro vova vuvuiua-ia rera sovopaoro ora voea sopaoro-ia. <sup>5</sup> Uva oiso tapo taraipaara, Pauto vo reoro-a vao oa tapo-a veorapai rutu. Ora vao riroa rutu gorua oa eveivora va sovopaoro ora voea sopaoro-ia vao oa kovovere rara vo vuutao-ia Pauto vaoro. <sup>6</sup> Uva evara rutu arova koveaepa. Ari ita, oiraopavira rutu viapau oiso uvuipai ra vorerivira ora voeare oiso puraave, Ragai iava vuria oaa verari Pauto. Eake iava? Uvare vara ruture ovauoro evara oiso piepaiveira oiso osa ro Pauto Oviitoaaro tapaivora evao parikou-ia. Oa iava riroa ariia oureva oearovu rutu osireiaro-ia.

<sup>7</sup> ✧ Ari ita, vosa rasia vearovira toupave, oisi toupaooro oaravu rutu aioara kova piepaive vara-ia oirara rutu aio piepasa. Ra ovokirovu-ia Pauto vo rasiapa veoroa purapareve kokeva kove piepaoro vo rasi veoro piepasa. <sup>8</sup> Ari vosa vuri kou rokarokapa kou voa kovape, ra va-a eva oa iava vuri rasia. Oa iava Pauto uvuiparoi ra vo rasi opesi pie ovoireve vai pasi va kasioro.

✧ **5:12:** Ap 7:38; 1 Ko 3:2 ✧ **5:13:** 1 Ko 3:1 ✧ **5:14:** Ais 7:15 ✧ **6:1-2:** Fl 3:12-14 ✧ **6:4:** Hi 10:26, 32; Ef 2:8; Ga 3:2, 5 ✧ **6:7:** Sam 65:10

<sup>9</sup> Visii-a ragai vate iraraaro, visii tavipaavo riro vavatavira rutu eisi. Ari visii-ia vearovira rutu taraipaioveira visiigoa vao oiso toupataveira goruvira rutu oirao pie vovou purapaoro oa-ia igei vo rearo uvupataveira. Oa vituaro iava eva veaoro rutu kuea oa kareke piepataveira. <sup>10</sup> ✧ Uva oiso taraipavioveira, Pauto orekerovu rutu torevokovira rovirieipareveira. Teapi keapata oiso, Visii vo kovoroarore ovauroverea ora visii vo siraoroaro varao rerapa. Uvare rerare rugoopaoro rera voeaaro oisoa tauvapata. Ari ita, eisi osa tovira voea tauvapataveira. <sup>11</sup> Oire uva rirovira rutu vaopa oiso ruipapaiei rutu oiso ra visii rutu katakataivira oearovivu rutu kavikopata voeapa siraopaoro. Eva oa iava taru vearopara outaverea varao oarare visii rutu rugoopaoro oisi piepataveira eisi ragavira raripaoro. <sup>12</sup> Opeita pokapokapata. Uvare igei oiso ruipapaiei rutu visiipa ra oiso rutu toupata osa voeao riro oirao pie vovou irara aate vovou irara rutu. Auere ra oisi eisi tupaoro vearopara oupaive varao oarare ovoioapa reo purareva Pauto.

### *Uvuipaviei Vo Pauto Vaaro Ovoioapa Reo Oirao Piepasa*

<sup>13</sup> ✧ Pauto Reo Ovoi rutu purareva ropa Ebrahim. Oa iava va-ia reo goru purareva, oiso ra va iava Reo Ovoi rera vaaro oirao piepape. Osa viapau oiso iraiiei ira toureva vo vuuta-ia oiso ra irai vaisiario Pauto vaisiario-ia putereve. Oisore ra ira vaisiario Reo Ovoi rera vaaro oirao piepareve Pauto. Eva-a oa vituaro iava rera raga Pauto ora vaisiroepa ora rera vaaro Reo Ovoi pura ovoioro. <sup>14</sup> Oire Pauto oiso puraroepa rore Ebrahim, 'Ragai-a vao ragoa vii tapo Ebrahim vao Reo Ovoi purapaavo, oiso ra riro irara rutu oirara taru viire aiteave voeao ovii iraraaro vii aao iraraaro.'

<sup>15</sup> Oa isivaaro iava oisoa Ebrahim toupaveve reo ravaa ateate piepaoro vao oa oirao piereva Aisak kavauoro.

<sup>16</sup> ✧ Oire vosa irai oiratoa vai reo ovoi vai purareve, eera-a ira oisoa ro vaisipareve ira rera vaisiario-ia oisoa putepareve rera vo rearo oirao piepaoro. Osa iava oreorovu rutu ora eaka piepapeira. <sup>17</sup> ✧ Oire uva Pauto oiso ruipaparoepa rutu, ra voea iava vakuvaku rugooro verareve. Ra va iava goruvira rutu rera-ia raripaave varaore rugorugoopaoro oara ouivereva rara rera ruvara-ia vearopara. Uva va-a vao-ia oa vituaro iava ora rera raga ora vaisiroepa rera vaaro Reo Ovoi oirao pieoro rutu. <sup>18</sup> Uva vo reerei-a vareo-ia oiso-ia, Reo Ovoi-a vao-ia, ari oirao piepa reo-a vao-ia. Uva viapau rutu oiso uvuipai ra keakeavira ora tavariopape vo reerei. Viapau rutu. Aue iava uvare Pauto viapau rutu oiso uvuiparoi ra vo reerei iava oreo-ia kuvvu reoa vai purareve. Uva oisi-a eisi osa taraipaoro rera-ia ro vigei reraaro uvuipaviei ra ora vigei iava sopaura goru piepape. Osa iava uvuipaviei ra vo vovou pitupaoro Pauto vaarore viraakoa tuepavio, vigei vao vigoa rera iare ikauepa, oiso ra vigei utoreve. <sup>19-20</sup> ✧ Uva oisi tupaoro uvuipaviei ra ora vigei iava sopaura tupapaoro goruvira rutu toupape. Ra voava viapau oiso ora virupape. Viapau. Ari vigei uvuipaviei ra oriruvira rutu toupape. Ra va iava Pauto vigei sopaura sisiropaoro Tugoropa Tavuki Rutu-ia toupaveve vo uva koataroepa Jisas vigei tauvaoro. Uva va-a eva oa vituaro iava Jisas oiso rutu toupaveveira opesi asavira eera vigei reraaro Rovopato Pristo Pauto vo tauvaoro oupato vigeipa. Ari ita, eera Jisas Rovopato rutu Pristo aue Melkisedek saratoaoro.

✧ 6:10: Mt 10:42, 25:40 ✧ 6:13: Jen 22:16-17 ✧ 6:16: Ga 3:15; Eks 22:11 ✧ 6:17: Sam 110:4

✧ 6:19-20: Lev 16:2; Hi 9:7

## 7

*Ro-ia Melkisedek Iravu Rovopato Pristo*

1 ✧ Oire rera ro-ia Melkisedek reitota rutu turaro voea reraaro Selem vata. Ira oiso toupaooro pris kovo tapo purareva ro iavirava Reitota Rutu Pauto Rovopatoa Rutu. Ari ita, vo tuariri rutu Ebrahim oearovu turaro irara uporeva voea kopii piepaoro. Uva oupovu iava karepaoro rera tapo ro-ia Melkisedek aivaroreva raivaaro vo uva Ebrahim viraakoreva rera Melkisedek. 2 Oa iava Ebrahim Melkisedek vatereva varao oara gogireva evoea upopaoro. Oire vosa rera ruvara-ia Ebrahim katai tau (10) rutu aue golaru tupaiva, oa iava vara iava oavu gororeva kataia rerapa ro Melkisedek turaro va vatesa. Uva oisi raga ita aue vievieoro sipsip tau (10) iriavu voea iava gororeva ita rerapa oira vatesa. Oire uva oisi raga oiso osa orekerovu rutu iava piepaoro va purareva rerapa. [Oire rovopa vao porearo rutu oiso toupaveira rera iava ro-ia Melkisedek ro-ia king ira torevokovira rutu toupaveira. Ira-ia viapau oisoa vuria vai toupave. Eisi osa toupai rera vo vaisiario-ia, Ro-ia reitota rutu king ira gavaure vovouva toupaveira voea reraaro Selem vata.] 3 Ira-a ro viapau aitetoa vai ora viapau aakovaa vai. Ora viapau aao iraraa vai rera oeaiaro. Ora oiso tapo osa viapau oisoa taraipaave, Aa vo vokie-ia puraro viropa. Ora aa vo vokie-ia vorevira kopiioepa. Uva eisi osa vo tou puraoro Pauto Oviitoaaro vo touaro ovoovooro toureva. Uvare Rovopatoa rutu Pristo vo kovoaro-a oa-ia oisoa pitupareve vokiara rutu-ia.

4 ✧ E apeisi-a? Oearovu rutu-ia oirara oisoa putepareve ro-ia Melkisedek? Ari, oiraopavira rutu. Ira-ia taraipaviei rutu oiso-ia, Ro-ia Melkisedek irapa vatevateara rutu vatereva aue Ebrahim oira vasitota rutu vo tauro iava oara gogireva oearovu turaro irara upopaoro. 5 ✧ Oire ro-ia Melkisedek viapau oiso Livai vase vo saraaro iava rera-a, evoea oea oisoa pris vo kovoaro-ia tuariri rutu pitupave. Uva auea vao-ia Reo Taisi oa-ia oisoa oiso toupave evoea vo kovoaro iava. Vosa katakataivira tauara toupave, oire ra voava katakataivira oaravu oupave kataipara voea ruvara iava voea Isrel-pa irara. Ari ita, evoea ruvara-ia oisoa vara oisi oupave oea tapo oisoa ora araokopaave rutu. Aue iava uvare kataitota rutu-a voea rutu aotoaaro ro-ia Ebrahim. 6 ✧ Viapau oiso Livai vase iava rera-a Melkisedek. Ro reito ira oisi katakataivira vara oureva eera ruvara-ia Ebrahim rera viraakooro. Ro Ebrahim irapa Reo Ovoi vatereva Pauto. 7 Oire vigei taraipavio ro-ia ira oiraopavira rutu oisoa voeaopa viraakoara veapara vatereve. Eva oa vituaro iava oisoa oearovu vaisiario-ia putepareve rutu reipaoro. 8 ✧ Voea Livai vase oisoa katakataivira orekerovu oupave tautauara rutu iava. Uva oisoa kopiipaave oiso raga osa oirara. Ari ro-ia Melkisedek ira iava oiso vo reo toupaveira, oisoa tootoovira rutu toupave. Viapau oiso kopiioepa. 9 Uva uvuipaviei ra oiso purapavio, Iu, Ebrahim ira katakataivira orekerovu rutu vatereva tautauara rutu iava. Osa oisi raga ita piereva Livai katakataivira rera varaaro iava tautauara vatevateoro. Ari ita, voea-a evoea Livai vase oea oisoa oisi katakataivira oisoa oupaave. Eake iava? Uvare voea ita oisoa vo kovo eva pris kovo purapave. 10 Oire uva apeisi-a? Vo uvare Livai kavau asavira rutu toureva vo osa oisoa Ebrahim voari rutu tou rovopareve tuariri. Uva oiraopavira oiso-ia uvare eisi vo tou-ia eera Livai rera aotoaaro sopaaro-ia tovira toupave aue Ebrahim, vo osa rera raga Ebrahim rovovira rutu Melkisedek-va aivaroreva raivaaro.

✧ 7:1: Jen 14:18-20 ✧ 7:4: Jen 14:20 ✧ 7:5: Nam 18:21, 26 ✧ 7:6: Jen 14:19; Ro 4:13

✧ 7:8: Hi 5:6, 6:20



*Vo Airepato Pristo Tuariripa Pristo Tavarioeva*

11 Vo tuariri Livai vase oisoa pris kovo-ia pitupaive. Uva va-a eva voea vaoro pris kovo oa vearovira oirara kareke piepaivori. Ra va iava vearovira rutu karekepaave. Oa-a eva vituaro iava Reo Taisi vatereva Jiupa irarapa Pauto. Uva eakere iravu pristo utupaua uvuipa ra karekero ro ira Melkisedek-va areiipareve, osa aueva Eron Rovopato Pristo viapau areiipareve? 12-14 ✧ Oire vosa Pauto iravu roporeve pisato pristo voeao rovopa irara pris tavariosa rera-ia, uva va sirova eisi uvui iraopaai ra vao tapo Reo Taisi tavario iraoive. Oire ro-ia taraipavioveira oiso-ia, Viapau oiso Kraisa Livai vase vo saraaro iava voeao pris irara. Viapau. Ari Juda vo saraaro iava rera-a. Ari ita, viapau irai voea iava Juda-pa irara pristo vai, uvare vo sarapa viapau oiso Moses pris kovo vatereva.

*Jisas Oiso Toupaveira Osa Ro Melkisedek Ira Oisoa Toupave*

15 Oire ra evo reo iava vearovira rutu oiso aviavipavio osa rore rugoopavio ira pisavira rutu karekeroepa Melkisedek-va areiisa. 16 Oiraopavira rutu ira prisvira rutu karekeroepa pisavira. Uvare viapau oiso Reo Taisi sirova uturoepa. Ora aue tapo viapau oiso voea iava-a eera oea oisoa kopiipaave. Viapau. Ari vao-a oa vituaro iava evo kovo-ia pitupaveira, uvare vao Tootoo Ovoi rera vaoro rerapa gorua vatepaiveira. 17 ✧ Oa iava Pauto vo reoro-ia oiso purapapeira, 'Vii vo kovoaro vao pris kovo opesi asa rutu. Oa purapariverea oiso osa ro Melkisedek oa oisoa purapave.'

18-19 Oire uva oisi-a eisi osa pieoro vao tuariripa Reo Taisi ora tavarioepa. Uvare oisi va sirova utupaoro oirara rutu oisoa viapau Pautoa iare tutuu piepaive. Oa iava oisoa akukuvira rutu tou ragapaive Reo Taisi. Uva va-a vao oa iava Pauto oraivavu raga purareva vao-ia airepa raiva. Oa iava uvuipaviei ra Pautoa iare tutuu piepape rutu.

20 Oire uva Pauto oiraopa reo purareva oiso puraoro, Eera pristo ira ovoivira toupaveirea opesi asavira. Uva viapau rutu oiso uvuiparoi ra evo reo tavarioeve. Ari ita, viapau oiso iraire oiso oreoi purareva vo pris kovo tototovopaoro oiso osa vo reo vao purareva Pauto. 21 Viapau. Asi Pautoa raga oiso Jisas-ia vo vaisio tovoreva oiso, Pristo vo osa vao oirao pie reo purareva oiso, 'Turaro oirao pie reo purarevora. Orugooa vao-ia rera vaoro oa-ia viapau uvuiparoi ra osi ragavira va tavarioeve vo reo-ia oa oiso purapai, Vii vao-ia viigoa vokiara rutu-ia prisvira toupaviverea opesi asavira rutu.'

22 ✧ Eva-a oa iava uvuipaviei ra vearovira rutu oiso taraipavio, Ro-ia Jisas ira Airepa Reo Ovoi oirao pierava rutu vo reoa vao oa iavirava Pauto vo siraooro karekepa oirara rutupa. Vo reo oa vearovira rutu toupaveira vao-ia tuariripa Reo Ovoi putepaoro rutu, oreoa vatereva Pauto Moses-pa.

23 Uva oavu-a vao-ia oiso-ia. Riro irara rutu voari tuariri pris kovo oisoa purapaive. Eake iava? Uvare kopiipaoro oisoa oearovupa vo kovo kavupaive. 24 Ari ro-ia Jisas ira ovoievira rutu totoovira raga toupaveira. Oa iava rera raga vo kovo-ia vao-ia pris kovo pitupaveirea vokiara rutu-ia. 25 ✧ Uva va-a eva oa vituaro iava uvuiparoi ra vo vokio ora vo vokirori-ia oearovu oupareve Pautoa iare, vo rara Jisas oirao piepaoro rutu rera iare uriopaave. Aue sirova uvare Jisas ovoievira rutu totooparoveira Pauto arepaoro voea oupasa.

✧ 7:12-14: Ais 11:1; Mt 1:3; Lu 3:33; Ro 1:3; Re 5:5 ✧ 7:17: Sam 110:4; Hi 5:6 ✧ 7:22: Hi 8:6, 9:15, 12:24 ✧ 7:25: Ro 8:34; Hi 9:24

*Rovopato Pristo Ira Uvui Iraoparoveira Oiso Ra Vigei Tauvapareve*

26 ✧ Oiraopavira rutu. Aue-ia Jisas Rovopatoa rutu Pristo ira uvui iraoparoveira rutu vigei tauvapasa. Ro ira-ia toupaveira vao torevoko vovou rutu, uvare roroio vovouvira rutu oisoa toupave. Ora aue tapo viapau rera-ia oisoa vurua vai toupave, ora oisoa airereivira toupave vuri vovou irara vo rugooroaropa. Oa iava eva Pauto rera kae piereva rutu vuvuiua-ia pute pievira rutu. 27 ✧ Viapau oiso toupaveira osa oearovu voea rovopa pris irara. Uvare viapau oiso koruouara vai purapaveira vo vokiara rutu-ia, oiso ra Pauto rera varaaro vurua verapave ora oearovu iava tapo oirara. Viapau, ari katai vuuta rutu-a vao oa iare ora rera iava vasereva rutu aue iare evao parikou. Oa iava vao ora rera-ia katai koruou rutu purareva. 28 Oire uva Reo Taisi-a vao sirova utuoro ora voea raga-ia pris vaisi oisoa tovapaive, voea oea-ia oisoa viapau goru vovou vai toupave forevoko pitupitu purapasa. Ari ita, Reo Taisi vo vuutaoro isivaaro iava Pauto ora rera vaaro Reo Ovoi oirao piereva. Osa iava Oviito oiso vaisireva ro-ia, Rovopatoa rutu Pristo. Ira uvui iraopa ra vigei tauvapareve vokiara rutu-ia.

## 8

*Jisas Vigei Reraaro Rutu Rovopato Vo Vuvuiua-ia*

1 Evo reo aviavi pie reo vituaro-a vao-ia oare eisi puraepa oiso, Krais-a Rovopatoa rutu Pristo vigei reraaro. Ira oirapapa varata-ia paupa-ia Pauto vaaro pauparoveira vuvuiua-ia. 2 Uva pris irara vo kovoaro purapaveira evoa tupaoro oiraopa Tugoropa Tapi. Oa oiso rutu toupaveira osa vao Tugoropa Kepa lotupa kepa. Uva viapau oiso irai vo kepa eva Lotupa Kepa paureva. Viapau. Ari Pautoa raga.

3 Voea-a evoea rovopa pris irara oea oisoa evo kovo purapaive varaovatepasa orekerovu vatevateara ora koruouro aue-ia varuer kare. Uva oisi-a eisi osa tapo Jisas uvui iraoroepa okoruovu vateoro Pautoa-pa. 4 Vosa touvira vo rasio-ia tou rovopaveva, uva viapau oiso uvuiparoepa oiso ra vao pris kovo-ia pitupave. Eake iava? Uvare viapau oiso Livai vase iava rera-a. Voea oea iava Reo Taisi oiso tavipapeira. Voeao raga oea oisoa pris kovo-ia pitupave vao tauo vatepa kovo. 5 ✧ Ari voea vo kovoaro oa-ia oisoa ovoovovira vo toupave, vo osa oiraopa kovo vo toupave vuvuiua-ia. Uva oiso rutu ovoovovira toupaveira osa Moses vatatoporoepa, oiso ra varo kepa paureva vao oa sovara-ia lotupa kovo purasa aueparoea. Osa iava Pauto rera tavireva oiso, "Oiso ragavira varaovatepasa rutu purarivere vo kepa pauoro osa vo ovoovo oa-ia vii keke pieavora vo Sinai pukui-ia." 6 ✧ Oiraopavira rutu Krais-ei vo vuvuiua-ia vo vuutaovao-ia oa vao. Ira vo kovoaro pris kovo voeao vo kovoroaro-ia vo rasitoo-ia putepaveira pris irara. Oa vituaro iava vao-ia Airepa Reo Ovoi. Evo reo oa purareva Pauto, oiso ra rera tapo oirara ora agiagiave. Oiraopavira rutu uvare vao Airepa Reo Ovoi vao-ia tuariripa putepaveira rutu, uvare va-a vao oa taru orekerovu rutu vearovara karekevereava rara.

*Airepa Reo Ovoi Oa Tuariripa-ia Putepaveira*

7 Ari ita, vo osa tuariripa rutu vao-ia Reo Ovoi vearovira tou rovova, uva eakere ita utupavira va isivaaro-ia airepa purareva ita? Ari ita, uvare vao tuariripa oisoa potepave oa-ia viapau oisoa Pauto sirova utupaave. 8 ✧ Oire uva eisi osa pievoiva, Pauto ora rera voeaoro togareva vo reo-ia oa oiso purapai,

✧ 7:26: Hi 4:15, 8:1 ✧ 7:27: Hi 5:1, 3; Ef 5:2 ✧ 8:5: Kl 2:17; Hi 9:23; Eks 25:40 ✧ 8:6: 1 Ti 2:5; Hi 7:22 ✧ 8:8: Jer 31:31-34

“Turaro oiso puraparoi, Ovokirovu epao oara uriopapere. Oara-ia oavu Reo Ovoi puraaverea voea tapo Isrel-pa irara ora voea tapo vova Juda.

9 ✧ Uva va vao-ia Airepa Reo Ovoi oa pisavira rutu toupaveira. Oa viapau oiso vaova arelipaveira oa puraava Isip iava voea tuveteveoro voea-ia pitupaoro. Uva reasi irapaaepa vao Reo Ovoi sirova utu arapa ragai vaaro. Osa iava voea iava vaseava, oiso ra ora voea raga vo taraiaro sirova utuave.

10 ✧ Oire uva Turaro tapo ita vo reo-ia vao oisi ita puraroepa oiso, Va vao-ia Reo Ovoi oa puraaverea voeao tapo Isrel-pa irara oa oiso purapai, Varao-ia ragai varaaro reo goruro oara tovoavere rara voea vo rugorugooroaro-ia, oiso ra vao vara-ia taraiave. Ora vara rigatoavere vo voea sopaaro-ia, oiso ra vao vara eveipave vara sirova utupasa. Ragai oiso toupaveira, Ragai vao voea reraaro Pauto. Ora voea oiso toupaveira, Ragai voeaaro oirara.

11 ✧ Viapau oiso irai epao voea iava ira voea siposipopavere voeao oea rera tapo toupaveira oiso voeare purapaoro, Turaro oavisii-ia vearovira rutu tarai irapata. Ora tapo viapau oiso ra oearovivu rutu tapo oisi voea iava oearoi tavitavipave rera iava Turaro voeoro oearoa voea vo taerearo-ia toupaveira. Eake iava? Uvare voea rutu ragai-ia taraiavere. Oiso-ia voeavio tapo oea kakae visivi toupaveira, ora voeao oea rei vaisi-ia toupaveira.

12 Ari ita, siraoravere voea kekeoro vo osa vuri pitupitu puraive. Oire ra voea iava vara vera ovoipaoro viapau oiso varare rugorugopara ita vorerivira.’

13 Uva va-va o Airepa Reo Ovoi oa iava reoreoroepa Pauto. Uva vo reoreoa vao oa-ia reoreopaoro vaore tuariripa Reo Ovoi oiso puraroepa, “Rutapa raga eva. Tuariripa.” Oire orekerovu-ia taraiavio oiso, Vosa eake tou ragapave vao oa-ia viapau kovoa vai, oire ra oisi raga ora opesi pie ragape va.

## 9

### *Ro Rovopato Pristo Ira Tuariri Rutu Oisoa Varuere Kare Revasiaro-ia Tauparo*

1 ✧ Oire va vao-ia tuariripa Reo Ovoi oa sovara-ia oisoa reo goruro toupave. Vo reoro oara sirova Jiu oisoa Pautoa-ia vuurapa vaisi purapave. Oara varao sirova tapo kepa pauiva Pauto iavirava. 2 ✧ Oisi-a oiso osa vituaro iava rakari kepa pauiva vao oa-ia oisoa vo tugirei toupave oiso, rataupa tugia vao oa oisoa vaisipave oiso Tugoropa Tavuki. Oa-ia varao rutu tugoropara tovoiva oiso vara, vuravua o, ora tebol ro-ia, ora brete-a vao-ia oa-ia oisoa tauopaave Pautoa-pa. 3 ✧ Ari vo tugio vao-ia atoaropa tugi otugia-a vao-ia varoa isivaaro-ia oisoa toupave. Vouao oua tovoiva vuvuvuru-ia kovovovira. Oire uva vo tugia vao oa oisoa oiso vaisipave, Tugoropa Tavuki Rutu. 4 ✧ Vo tugio oa oisoa atoaro rutu toupave, oa sovara-ia oisoa varao rutu toupave oiso-ia, gol alta vao-ia oa oisoa ivara-ia orekerovu kasipave vara-ia veoro riipu geesi purapaoro. Ora aue bokis o iria oisoa vaisipave oiso, Aak. O iria sovara-ia oisoa vukua toupave vao oa-ia Reo Ovoi rigatoiva. O bokis iria tavuruoro aue gol oa puraiva. O iria sovara-ia oisoa oavu gol tou toupave. Vo touo oa sovara-ia oisoa aiao toupave vao oa vatereva Pauto. Oa oisoa vaisipave oiso, Mana. Ora ro tooroto Eron reraaro ira-ia airepa sipukao kova oisoa toupave. Ora

✧ 8:9: Eks 19:5-6 ✧ 8:10: Hi 10:16; 2 Ko 3:3; Sek 8:8 ✧ 8:11: Ais 54:13 ✧ 9:1: Eks 25:8  
 ✧ 9:2: Eks 25:8-9, 23-39 ✧ 9:3: Eks 26:31-33 ✧ 9:4: Eks 30:1-5, 25:10-16

vareo aveke perorei oarea-ia Reo Taisi rigatoreva Pauto. <sup>5</sup> Oire uva oira-a bokis iria ivara-ia aitereivu uvarutoarei oisoa toupasi toa pievira. Vaitereo aiterea ovoovovira oisoa kekepasi viro oiso, Tugoropotoarei vuvuiua iava vaiterei. Aiterea oiso putae parakarova oovovira toupasi vo uva oisoa vaiterei vuutaaro-ia varuere kare revasiaro petopareve Rovopato Pristo, oiso ra oira-ia Pauto oirara iava vuriara verapareve. Oire uva viapau oiso vuutaa vai ei vaviopavira oiso ra oai-ia vara iava varao visii aviavi piea.

<sup>6</sup> Uva oisi-a eisi osa oisoa toupave voa vo vara vo tavukiaro-ia. Uva voea rutu pris irara oisoa koatapaave vokiara rutu-ia va iare rataupa tugi va iava vao vo tugi rakari kepa voa voea vo kovoaro purapasa. <sup>7</sup> Ari ro raga Rovopatoa Rutu iravu Pristo ira oisoa koataparo vao iare rovopa tugi rutu atoaropa. Uva va eva Tugoropa Tavuki Rutu oa iare oisoa koataparo kataipa vokiro raga-ia vo vokiro katakataivira ivara iava vo vokiro. Ovokiroa-ia oisoa revasi rovurova koataparo vara-ia koruoua purapasa Pautoa-pa, ora rera iavirava, ora voea tapo oirara voeao oea rutu oisoa vuriara purapaive ruruvutuvira vo osa viapau vara-ia taraipaave. <sup>8</sup> ✧ Oire uva vo vokio-ia rera ro Tugoropato Uraurato vara iava evara vigei siposipopareveira aviavi pievira. Uvare va vao-ia Rovopa Kepa rutu voea Jiu vaaro okepa iava vo tugio rataupa voeaopa Jiu-pa irara oisoa reipape rutu. Uva vo vuuta-a eva ovuuta-ia oisoa voea asavira atoaropa tugi tupapa piro rutu vaopa oiso, teapi voare koatapaave voeoro oira akukuro. <sup>9</sup> Oire vo kepa vao Rovopa Kepa rutu oa ovoovovira toupaveira vao oa-ia uvuipaai pris irara ra vatevateara vatepaive ora tauo vatero tapo purapaive voa. Ari ita, oiraopavira evara iava viapau oiso uvuipaai ra Pautoa iare tutuu piepaive, uvare oaravupa aia potepaveira rutu. <sup>10</sup> Uvare vo kovoa vao-ia Pautoa-ia vuurapa vaisi purapa kovo oa oisoa purapaive varao raga-ia aio tauoro ora ukaiopata tauoro, ora osasararovu rutu oiso osa varao sisupa pitiputuro. Oire vo reo goruro-a evara oara raga oisoa sirova utupaave vo rasio iava vara. Oa iava oisi eisi oirarapa reipapeira vo vuutao-ia rekasisa oa-ia orekerovu rutu torevokopareveira Pauto vo osa vara rutu tavariopareve.

### *Ro Krai Ira Ora Rera Raga Revasiaro-ia Taurora*

<sup>11</sup> ✧ Ari ita, evara isivaoro iava Krai pouro virora vao-ia airepa vuuta vo vokio. Uva oiso tourevora Rovopato Pristo, ira airepa kovo purapare. Oa iava avaroepa vo kepa vao Rovopa Kepa sovara-ia koatasa, okepa tuariripa kepa-ia vao rakari kepa putepaveira rutu. Vao vituaro iava uvare viapau oiratoa vai vo kepa paureva vo rasio iava orekerovu avu vai-ia. <sup>12</sup> Oire vosa Krai va-ia rataupa tugi puteoro rutu atoaropa tugi iare va vo Tugoropa Tavuki Rutu koata ovoiroepa, uva viapau oiso revasi rovu vaiva voare koataroepa aue iava meme ora bulmakau kakae vai oa-ia tauoa vai purasa. Viapau. Ari ora rera raga oiraarova revasiva katai vuuta raga-ia koata ovoiroepa vo raivao purasa, oa-ia uvuiparoi Pauto ra va iava vigei vorevira oureve ora rera iare. Vo raivao oa-ia viapau opesia vai ei. <sup>13</sup> ✧ Vao-ia revasi rovuro aue iava meme ora bulmakau ora oavu bulmakau kakae iava gavuta oara rutu rororeva pristo vo oirara rutu ariaraaro. Eake iava? Uvare vuivuijavira rutu tupaoro pris irara oisoa voea piepaive, oisore ra oiso voea vaisipaive, Eveoa sisigarue irara rutu oea Reo Taisi sirova utupaoro. <sup>14</sup> ✧ Iu. Oiraopavira rutu ita osa oisi eisi vara puraiva. Uva apeisi-a o-ia Krai iava revasiva? Ari ita, riroa rutu vao-ia oa pute pievira rutu pura piropa rera iava revasiva-ia. Oa-a vao oa-ia riroa rutu kovoa ora puraepa. Vao vituaro iava uvare ora rera raga iava oira-ia revasiva koruoua purareva, rera iavirava Tugoropato-ia Uraurato, ro ira viapau opesia vai ei. Oa iava

✧ 9:8: Hi 10:19-20; Jo 14:6 ✧ 9:11: Hi 2:17, 10:1, 8:2 ✧ 9:13: Nam 19:9, 17-18 ✧ 9:14: 1 Jo 1:7; 1 Pi 3:18; Ta 2:14

uvuivira rutu Pautoa-pa vo korusu vao purareva. Ari ita, rera oiraaro revasiva iria vigei iava sopaura sisigarue pieeva rutu, oiso ra viapau oiso akukuivira Pautoa-pa kovopape. Viapau. Ari vaore-a ra oiso rutu toupape, Oiraopa kovo irara rutu Pautoa-pa, ro ira tootooparoveira vokiara rutu-ia.

### *Jisas Revasiario-ia Airepa Reo Ovoi Goru Pierevora Rutu*

<sup>15</sup> ✧ Oa vituaro-a vao oiraopa oa Kraisi-ia pura piropa Airepa Reo Ovoi, oiso ra voeao oea vaisipareveira Pauto oiso, Ora rera voearo evoea oea viraakoara ouivere, varao oara viapau opesia vai. Oara iavirava Reo Ovoi purareva. Eake-a va vituaro? Ari vao uvare kopiropapa Kraisi. Ora vao uvare rera vo kopiropapa iavirava oirara roroioaepa voea vo vovouoroa iava vuriara, oara oiso purapaive vo osa oisoa tuariripa Reo Ovoi rei piepaive.

<sup>16</sup> Vo osa oavu reoa toupave auepa ovii irara aitetu vaaro vao oreo-ia oisoa voea tavipareve aitetu, oiso ra orekerovu rutu ouive varao rera varaaro vo rara kopiropapa. Uva viapau oiso irai vo reo oisoa oiraopapaive vo orekerovi vateoro, vo rara viapau oiso aitetu oave kopiropapa rutu oiraopavira. <sup>17</sup> Uvare viapau oiso vo reo-ia kovoa vai toupavoi vo osa toupave vo oiraopapa aitetu. Ari vo raga vo osa kopii rovoru rutu. <sup>18</sup> Oa vituaro-a vao-ia oiso toupai vao-ia roropa Reo Ovoi. Vosa viapau revasiva vai toupave va oiraopapa rutu, ra viapau oiso kovoa vai va-ia. <sup>19</sup> ✧ Ari ita, voari rovoru rutu vava Moses oiraopapa rutu tavitavireva varao rutu iava oara oisoa Reo Taisi sirovavi toupave. Oa iava revasiva karareva bulmakau kakae iava uukoa tapo. Uva vo uvare rutu-ia vao oa-ia oiraopapa sisureva ora vo vuku vo oa-ia oisoa toupave Reo Taisi. Uva va purasa evaoa kairi oureva vo evao va vaisipaveira oiso, Hisop. Oa iava va kukuearo-ia sipsip oru tuukereva. Ra va-ia revasi uvare kae piepaoro voea iare oiraopapa sipsiputapareva, vo osa vo oru oisoa roko piepareve revasi rovu-ia. <sup>20</sup> ✧ Uva oiso puraroepa,

‘O-ia revasiva iria Reo Ovoi oiraopapa pieeva. Oa iava visii goruvira rutu tavireva Pauto, oisi ra va sirova utu iraota.’

<sup>21</sup> Oire vava oisi ragavira-a eisi ita osa Moses oisoa revasiva sipsiputapareve rakari kepa sisupaoro, ora varao tugoropapa rutu oara-ia oisoa lotua purapaive vo kepa sovara-ia. <sup>22</sup> ✧ Oiraopavira vosa Reo Taisi sirova rutu goruvira utupaave, oa iava uvuipapa evara iava oaravivu roroara sisigaruevira toupave o iavirava revasiva. Ora tapo varao vuri vovouro, vo rara eira revasiva peto rovoreve oira-ia tauoa puraoro vuri vovouro verapasa.

### *Kraisi Ora Rera Raga-ia Tauoa Purareva Vuri Vovouro Oavi Verasa*

<sup>23</sup> Uva oisi-a eisi osa torevokopapeira osa varao vo rasio-ia touaro oisoa sisigarue piepaive varaooro ovoovovira oara vuvuiua-ia toupaveira. Ari oiraopapa rutu vuvuiua-ia toupaveira. Oara viapau oiso uvuipai ra va sisigarue piepaive, vo rara viapau otuorovu pute pievira rutu purapaive veoropapa rutu. <sup>24</sup> ✧ Osa iava Kraisi viapau vore koataroepa Tugoropa Tapi oiraopapa raga oa puraiva ovoovovira vaore oiraopapa vuvuiua-ia toua. Viapau. Ari vuvuiua rutu iare kaero virova vo vava toupaveira Pauto ruvara-ia tauava oupaoro vigeipa.

<sup>25</sup> Uva rera ro Jiu reraaro Rovopatoa rutu Pristo ira oisoa koataro vore Tugoropa Tavuki Rutu-ia aueva varuere kare iava revasiva katakataivira vokiara-ia vo ivara rutu-ia. Ari Kraisi viapau oiso vorevorovira koataroepa okoruoi ita purasa ora rera-ia. <sup>26</sup> Vosa rerapa torevokopaperi ra oisi eisi

✧ 9:15: 1 Ti 2:5; Hi 3:1 ✧ 9:19: Eks 24:6-8; Lev 14:4, 6-7 ✧ 9:20: Eks 24:8; Mt 26:28 ✧ 9:22: Lev 17:11; Ef 1:7 ✧ 9:24: Hi 6:20; 1 Jo 2:1

pieveve, oire ra va iava vorevoreripavira siitoka vo siraoaro oureve voariva rovooro uva vo rasio rovoepa. Ari ita, uva viapau oisi eisi torevokopapeira. Uvare katai vuuta rutu-a vao-ia oa-ia vo rasio iare urio ovoiroepa, vo uva vo vuutao tutuu pieva oiso ra opesipe. Eva-a oa sirovava ora rera iava vasereva koruoua puraoro. Oa iavirava vuri vovou vo varivariaro opesi ovoiepa. <sup>27</sup> ✧ Ari ita, oirara rutu katai kopii raga rutu purapaive. Osa iava taru Pauto voea vo vovouroaro rovirieireverea rara. <sup>28</sup> ✧ Uva oisi-a eisi osa va puraoro Krai ita katai kopii raga purareva ora rera-ia tauoa puraoro, oiso ra oirara rutu iava vuriara vera uvirope. Ari ita, vorevira voreroverea rara. Ra viapau oiso vorerivira vuri vovouro vai verasa-a. Viapau. Ari voea kae pie ragasa-a voea oriruoro, voea raga oea rerare tuevira toupaveira.

## 10

### *Tuariripa Taou Viapau Oiso Uvuipape Vuriara Verapasa*

<sup>1</sup> Varao Reo Taisi iava Jiu vaaro oara oiraopavira varao oiraopara oisoa ovoovopaive vara uraurapaoro oara utupauavi uroiepe. Oiraopavira rutu otaurora evara oisoa vorevoreripavira rutu purapaive ivara rutu-ia. Oire uva apeisi-a? Vosa vara varao oisi vorevoreripavira purapaiveira, oara uvuipai ra voeao iava vuriara verapaive, oea tutuu pie ragapaiveira Pauto iare, eke? Viapau. Viapau oiso eva Reo Taisi uvuipapeira rutu.

<sup>2</sup> Ari ita, vosa Reo Taisi uvuipaeri rutu, ra va sirova utupaoro tauoara purapaoro oirara iava sopaura sisigaruevira raga toupaviri. Oire ra va iava viapau voreripavira ora sovopaoro oiso purapaive, “Ragaivi-a vao-ia vuri vovouto.” Ra va iava koruouara pura arapa eakaave, vo rara sisigaruevira rutu toupave. <sup>3</sup> Ari oiraopavira evo koruouro voea oisoa rugorugoo piepaive rutu evarare vuri vovouro, vo rara ivara rutu-ia voea iava sopaura-ia toupave vuriara. <sup>4</sup> ✧ Oa vituaro vao oiso toupavoi, O-ia bulmakau vairei ora meme airea revasiario-ia Pauto viapau uvuiparoi ra vuriara verareve oirara iava.

<sup>5</sup> ✧ Oire vosa varasa vore rasitoo-ia Jisas aueparoepa, oa iava Pautoa-re oiso puraroepa,

*‘Ari ita, varaopa tauoara viapau ruipapaveira ora vatevateara. Oa iava ragaipa ouavu varaua ravaariva.*

<sup>6</sup> Vo kareo okarea rutupavira kasipaiveira oirara eravaoara ivara-ia, okarea-ia viapau oiso vii roru piepaiveira. Ora tapo vo koruouropa reasipaveira vuriara verapa koruouro.

<sup>7</sup> ✧ *Eva-a oa iavirava oiso puraarepa viire Pauto, Toupavoi ragai vii vo ruiparo sirova utusa. Eisi osa va iava ragai iava vo reoro toupaveira vo vukuo-ia oa-ia Reo Taisi toupaveira.’*

<sup>8</sup> ✧ Oire uva rovvira Krai oiso puraroepa, *‘Varaopa reasipaveira,’* ora *‘Varao oara-ia viapau vii roru piepaiveira oiso osa varao koruouara ora varao vatevateara vatepa, ora vo karero varuere karero oea kasipaiveira vo eravaoara ivara-ia, ora varao oaravu koruouara vuri vovouro verapasa.’* Ari ita, oisi eisi osa puraroepa varao rutu iava oara oisoa purapaive torevokovira Reo Taisi sirova utupaoro. <sup>9</sup> Eva-a oa iava oiso puraroepa Krai, *‘Ragai toupavoi Pauto vii vo ruiparo sirova utusa.’* Oire uva vo reoa vao oa iava Pauto tuariripa koruouro veepereva, oiso ra rera vo koruouaro vara vo tavukiaro ouve vao oa purareva Krai ora rera-ia. <sup>10</sup> ✧ Eake iava?

✧ 9:27: Jen 3:19; 2 Ko 5:10 ✧ 9:28: Ro 6:10; 1 Pi 2:24; Ta 2:13 ✧ 10:4: Mai 6:6-7 ✧ 10:5: Sam 40:6-8; 1 Pi 2:24 ✧ 10:7: Jer 36:2 ✧ 10:8: Mk 12:33 ✧ 10:10: Jo 17:19; Hi 7:27

Uvare rera Jisas Krai ira Pauto vo ruipaaro sirova utu ovoiroepa oisi va pura ovoiro. Vao oa vituaro iava vigei iava sopaura rutu sisigarue ovoiepa vo korusua-ia oa purareva ora rera-ia katai vuuta-ia.

### *Jisas Ora Rera-ia Tauoroera Vuriara Verasa*

<sup>11</sup> Voeao pris irara Jiu iava oea oisoa katakataivira ora voea vo kovoaro purapaaro torepave katakataipavira vokiara rutu-ia. Oa-a vao oa-ia oisoa voreripavira vo korusua purapaive. Ari vo korusua-a evara oara viapau oisoa uvuipape oiso ra vara-ia voea iava vuriara verapave Pauto. <sup>12</sup> ✧ Ari ro Krai katai korusua raga pura ovoireva vuri vovouro vera ovoiro. Eva katai korusua oa uvuiepa vokiara rutu iare. Oa isivaaro iava pau ovoiroepa Pauto vo varata iava oirapapa. <sup>13</sup> Evoa uva tuepaaro toupaveira vo vuutaere oa-ia rerava keripa irara tovorevea Pauto vo rera kokotoaro reroaro oiso osa orekevu rerapa tasipa. <sup>14</sup> Oire uva katai korusua raga pura ovoireva. Oa-ia voea rutu uvui pie ovoireva. Oa iava uvuipaai ra Pautoa iare tutuu piepaive voea sisigarue vovou irara.

<sup>15</sup> ✧ Ari ita, uva ro tapo Tugoropato Uraurato oisi vo reo eva oirao piepareveira rutu oiso osa pura rovroepa rutu Tugoropa Vuku sovara-ia, <sup>16</sup> ✧ 'Vao-ia Reo Ovoi ragai oa puraaverea oirara rutu tapo vo utupau. Vo uva ragai varaaro reo goruro tovoaverea voea rutu iava sopaura-ia. Ora vara rigatoaverea voea vo rugorugooroaro-ia, eisi osa puraroepa Turaro.'

<sup>17</sup> ✧ Oire evo reo isivaaro iava ita rera raga Uraurato oiso puraroepa, 'Ragai varaore ita vuri vovouro viapau oiso rugooraverea vorerivira ora varao vuri pitupituro.'

<sup>18</sup> Uva oiraopavira rutu vara varao vuri vovouro vera ovoireva oirara iava. Uva apeisi-a? E uvuipai ra okorusua ita vorerivira ora purape, oiso ra oai iava vuriara vorerivira ita vera piro? Viapau rutu.

### *Uvuipaviei Ra Oirao Piepe Rutu, Ra Va Iava Pautoa Iare Tutuu Piepape*

<sup>19</sup> Araoko irara oaa, uva oisi-a eisi osa iava viapau oiso oai epao oa uvuipai ra vigeire korokorupape vore koatapa arapa Tugoropa Tavuki Rutu-ia. Viapau. Ari uvuipaviei vao iavirava Jisas vaaro kopiia. <sup>20</sup> Oa-a vao oa-ia airepa raiva karureva tootoo vatepa vigeipa. Oraiva-a vao oa iava uvuipaviei ra varo kovovo-ia putepape koatapaaro. Vao varoa oa oisoa ovoovovira tupaive oiso osa rera iava varaua. <sup>21</sup> Iu. Rovopato Prito toupave vigei rutu reraaro ira Pauto ovii iraraaro oirara tokipareveira. <sup>22</sup> ✧ Uva uvui irapaviei rutu ra Pautoa iare tutuu piepe rutu oiraopa vovou rutuva oiso ora vigei-ia taraipaaro, O ita, torevokovira tupaavo oiso, Ragai-a Pauto reraaro. Vao vituaro iava uvare vigei iava sopaura sisu piropa. Oa iava vo rugooro vigei iava opesiepa ora eveipa rugooro oiso, Vuri irara-a vigei. Ora vao iava tapo osa vigei iava varaura sisigaruepa vearoa-ia uukoa. <sup>23</sup> ✧ Oisi-a eisi osa iava uvuipaviei ra goruvira rutu oirao pie vovou purapape vao oa iava oearovu tavitavipape va oirao piepaaro. Eake iava? Uvare uvuipaviei ra Pauto-ia raripavio auere, ra ora rera vaaro Reo Ovoi oirao piepareve. <sup>24</sup> Oa iava uvuipaviei ra oearovivu vo siitokoroaro sovo irapape. Ora oearovivu vo vigei iava tavupape oiso ra ora vigei voea vovouroaro oisi iava sirao vovouro kosi piepape oearovivu-ia vereopa vovou rutu purapaaro. <sup>25</sup> ✧ Ari vao raga osa vigei viapau uvuipaviei ra vao kavupape ora gurupa pitupitu lotupasa oiso osa oearovu

✧ **10:12:** Hi 1:3 ✧ **10:15:** Hi 3:7 ✧ **10:16:** Jer 31:33-34 ✧ **10:17:** Hi 8:12 ✧ **10:22:** Hi 4:16; Ef 3:12; Esi 36:25 ✧ **10:23:** Hi 4:14; 1 Ko 1:9 ✧ **10:25:** Ap 2:42; Hi 3:13; Fl 4:5

piepaiveira. Viapau. Easi vigei uvuipaviei ra oearovu vo vovouroaro tore piepape. Vao iava uvare Turaro vo vokiario, vorevira vorepa voki tutuu piepaivoi rutu.

*Opeita Isivapavio Pauto Oviitoaarore*

<sup>26</sup> ✧ Vosa vigei vo siposipo-ia oiraopa tarai ovoí rovvio rutu, oire ra va isivaaro iava vuri vovou ita purasa ruipavio ita. Uva apeisi-a? E oai epao voreri tauro vai oa uvuipai vigei iava vuriara ita vorerivira verave? Easi viapau rutu! <sup>27</sup> ✧ Uva vo uririo raga oava uvuipaviei toupape varao iavirava vuriara oavi vigei varaaro. Oiso varapa-ia osa varao-ia oiso, Rovirieia vao-ia ora riro goru kasia vao-ia oa voeao aiopaiveira oea Pautoare isivapaiveira. <sup>28</sup> ✧ Vosa irai oiratoa vai oisoa Moses vaaro Reo Taisi gasipareve, ra irai tovopaive kopii-ia. Viapau iraiapa siraoave, vo osa vaiterei ora vo peva oea oisoa oiso purapaave iraire, “Oiraopavira rutu uvare vuria vao oa purarivo.” Oa iava oisoa voea vo reoaro oirao piepaive. <sup>29</sup> Oire uva eake vori rutu ouparevarea ro ira Pauto Oviitoaarore isivaparo? Eera ira oiso puraparo, “Revasiva akuku raga-a,” iria rera sisigarue pieeva rutu Pauto vaaro sirovava Reo Ovoí. Ora apeisi-a ropa oirato ira Tugoropato Uraurato tovipareve, ro Uraurato ira Pauto vo siraoaro kareke piepareveira rerapa oirato? Oire uva apeisi-a rerapa eera? Siravovira rutu! Uvare rera varaaro iava vuri vovouro vo voriaro ouparevarea vao-ia pute pievira rutu oa toupai vo Reo Taisi-ia. <sup>30</sup> ✧ Uvare rera-a eera ira-ia taraipavioveira ira oiso puraroepa, ‘Ragai auereo vao vuri vovou vo voriaro vatepasa. Oa tuuavere rutu rerapa.’ Ora oreovu ita vao oa purareva oiso, ‘Turaro ora rera voeaaro varaaro vuri vovouro rovirieirevarea rara.’ <sup>31</sup> Ari ita, siravovira rutu voeavipa voeao oea vo vovouro vuriara puraparo Pauto vavaeoro-ia kovepaaverea vara voriaro oupasa rera ruvara-ia pauaka tootooa rutu Pauto.

*Goruvira Rutu Torepau Oirao Pie Vovou Oara-ia*

<sup>32</sup> Vore rugorugoo iraopata visii vo touaro vao oa oisoa purapata tuariri. Ovuuta-a eva oa-ia Pauto vaaro aviavia visii sopaaro soporeva ora rera iava. Oa isivaaro iava riroaravi rutu tavaka vovouro outava oearovuvia. Osa viapau oisoa visii kove piepaive. <sup>33</sup> Ari ita, vuvivira rutu visii api pievira karekeiva oirara oearovu osireiario-ia. Oa iava visiivi oisoa agesipaive visii tovipaaro. Ora ovokirovu-ia oevu tapo ora tavosipasa oisoa ruipapata voeao oea oisi vo tavakaaro oisoa oupaive. <sup>34</sup> Ora voeao tapo vo vavataroaro sovopata ora visii-ia oea oisoa tuukepa keparo-ia tuukepaave. Oa iava voeapa oisoa siraopata. Ora oiso osa oearovu tapo oisoa uriopaave visii varaaro-ia orekerovu pitupasa. Uva viapau oisoa evarare rugorugooapaaro siraopata. Viapau. Ari visii oisoa roru iraopata rutu, uvare oisoa taraipata oiso, Oaravu epao visii varaaro oara visiipa tuevira toupai, oara varao-ia putepaiveira rutu vo rasio iava vara.

<sup>35</sup> ✧ Opeita oearovupa uriripaaro ora visii iava goru vovouro oavisii rutu akukupavira viki ragapata. Uvare vo vovouro raga uvuipai ra visiipa vearo vori sipove. <sup>36</sup> ✧ Ari ita, vosa kave vovou rutu sirova utu rovopata, oa vituaro iava uvuipatai rutu ra oiraopa vovou rutu Pauto vaaro sirova utupata. Oa iavirava uvuipatai ra vearopara outa, varao oara iava Reo Ovoí purareva Pauto. <sup>37</sup> ✧ Aue iava uvare Tugoropa Vuku oiso purapai, ‘Tou visivi taru voreroverea. Viapau oiso ateate pie ragapaaro voa toupave. <sup>38</sup> ✧ Uva ragai voeaaro-a oirara oea-ia torevoko vovou toupaveira oea

✧ 10:26: Nam 15:30; 2 Pi 2:20 ✧ 10:27: Ais 26:11 ✧ 10:28: Diu 17:2-6 ✧ 10:30: Diu 32:35-36; Ro 12:19 ✧ 10:35: Hi 2:2 ✧ 10:36: Lu 21:19; Kl 3:24 ✧ 10:37: Hab 2:3-4; Lu 18:8 ✧ 10:38: Ro 1:17; Ga 3:11



taru tootoopaave oirao pie vovou rutu purapaoro. Ari vosa irouto ro ira voea iava ragai arova porero viroverea, ira-a eera viapau oiso ragai roru piereverea ora rera-ia.'

39 ✧ Oire uva viapau oiso vigei-a vao voea iava voeao oea oisoa pore uviropaave rera arova opesi ovoipaoro vo vuri tapi-ia. Viapau. Ari vigei-a vao vigoa oirao pie vovou rutu purapaoro oriruvira rutu toupapeira.

## 11

### *Vo Toupai Oirao Pie Vovou Vo Pitupituario Vituario*

1 ✧ Oire uva eakea rutu-a vao oirao pie vovou? Oa vao-ia oiso toupaveira, Varao oara-ia oiso tarai ovoipavioveira oara varao oiraopavira karekepapearea vo utupaua, oarare tuevira toupaooro oirao piepapeira. Ora tapo vosa oiso ragavira ora sovopavio, O ari oiraopara-a, oara viapau kekepapeira. 2 Uva vo vovou-a eva oa purapaoro voeari tuariripa irara oisoa Pauto roru piepaive ora voea-ia. 3 ✧ Oirao pie vovou rutu purapaoro tarai ovoipavio oiso, O ari Pauto orekerovu rutu purareva varao oara kekepai ora rera vo Reoaro iavirava. Uva viapau oiso orekerovu avu vai iava vara purareva. Viapau.

### *Vo Toupai Ebel Vase Iava Ora Inok ora Noa*

4 ✧ Oire uva oirao piepaoro Ebel korooua purareva Pautoa-pa, vo koroouo oa Ken vo koroouaro-ia puteva. Ooirao piea iavirava Pauto rerare oiso puraroepa, "Torevokotoa rutu vii." Aue vituario iava uvare va-a vao vatevatea koroouo oa-ia Pauto roru pierewa ora rera-ia Ebel. Uva vo vovoua vao rera vaaro Ebel ira kopiioepa, oa vigei siposipopavioi vo vokio-ia touvira.

5 ✧ Oire ro vo oirao piearo-a vao-ia Inok oa iavirava viapau oiso kopiioepa. Ira tootoovira raga kae pierewa Pauto. Oa iava oirara oisoa rerare taraa ragapaive, uvare Pauto ora rera iare rera oureva. Ari ita, Tugoropa Vuku oiso purapai, 'Kae pie asavira oisoa vo rasio-ia toupave Pauto roru piepaoro ora rera-ia rutu.' 6 ✧ Ari ita, viapau irai oiratoa vai uvuiparoi ra oisi Pauto roru piepareve, vo rara viapau oirao pie vovou vai pura rovopareve. Uva va-a vao vituario oiso toupaveira, Ro ira ruipaparo oiso ra Pautoa iare tutuu piepareve, ira-a eera uvuiparoi ra Pauto vo touaro oirao pie rovopareve rutu. Ora aue tapo oirao piepareve oiso, Pautoa iare tutuu pierewa, ra vao vearo vori oureva rera ruvara-ia.

7 ✧ Oire iravu-a ro-ia Noa ira ora rera vo oirao piearo iava Pauto vo reoaro vo vovou reo uvureva uriripaoro. Oreoa-ia rera vosioro tavitavireva varaore oara kekereverea utupaua. Oreoa vao sirova utuoro aak uvuo purareva Noa. Oa iava vao avoi avao orirureva rutu vo tuukoo vo vuutaaro-ia. Uva oisi-a eisi osa pierewoiva, Noa oirara rutu karekereva vo rasio-ia vuri irara. Oa iava Pauto rera raga roro pierewa oiso, Vearoto. Eake iava? Uvare oirao pie vovou rutu-a vao oa oisoa purapareve.

### *Ebrahim Iava Vo Reoro*

8 ✧ Vo oisoa Ebrahim oirao pie vovou purapareve. Oa purapaoro Pauto uvureva ovusa rerare keearoepa. Oa iava rera vo reoaro sirova utuoro ora vaseroepa, oiso ra rera vo taerearo kavuoro avaro vore avaro uvare Reo Ovoi purareva Pauto rerapa. Ari ita, rera vo taerearo rutu kavuoro gaururoepa. Oire voava avapaoro viapau oiso taraiparoepa oiso, Ovu iare avaparai. 9 ✧ Uva va-a vao osa rera vo vovouaro oirao pie vovou sirova

✧ 10:39: 2 Pi 2:20 ✧ 11:1: Ro 8:24; 2 Ko 4:18 ✧ 11:3: Jen 1:1; Jo 1:3; Hi 6:5 ✧ 11:4: Jen 4:4, 10; 1 Jo 3:12 ✧ 11:5: Jen 5:21-24 ✧ 11:6: Hi 7:19 ✧ 11:7: Jen 6:13-22 ✧ 11:8: Jen 12:1-4 ✧ 11:9: Jen 12:8

oisoa toupareve vo taereo-ia oa iare rerapa Reo Ovoi purareva Pauto. Uva voa oiso rutu oisoa toupareve osa ro ira vegoparo rakari keparo raga-ia. Ora vo araoero tapo ovitoarei Aisak vaio ora Jekop aiterea tapo oisoa vo keparo-ia evara rakari keparo toupasi, aitereapa Pauto Reo Ovoi vatereva.

<sup>10</sup> Vao vituaro iava Ebrahim vokiara rutu-ia rera vo oirao piearo-ia oisoa tuevira raga toupareve, oiso ra vo uruio kekereve ouruia paureva Pauto ora rera vo ruipaaro-ia. Oa pauakavira rutu toupaveira.

<sup>11</sup> ✧ Uva va-a vao oirao pie vovou oa vituaro Ebrahim uvuiparoi ra oiso toupareve, Aite. Ari ita, eagara vosa avukaroepa rutu, ora vao tapo osa vatuvava Sera oisoa kakae kavau asavira toupave. Vo osa touvira rutu Pautoa-ia oisoa rariparo, oisore ra oiraopavira rutu karekepe rerapa Reo Ovoi Pauto vaaro. <sup>12</sup> Oiraopavira rutu ita, uvare kopiisa tutuu piereva, vo osa rera raga aao iraraaro-a voeao riro irara rutu oea karekeaepa. Oea vieiario oiso rutu pura viropo osa aaviikoara vieiario, ora oiso osa rogara vao oa avakava sirova toupaveira viei asavira.

<sup>13</sup> Oire uva oisi raga touvira rutu oirao piepaoro oisoa kopiipaave varao ou asavira oara iava Pauto Reo Ovoi purareva. Uva oiso ora voea-ia taraiaepa, Akoea, igeivi vao sopaipa irara. Vigoa tavete visivi raga toupapeira vo rasio-ia, oa iava vara eveipaioveira varao veorapara oara tauai rutu vo utupaua vigeipa toupaveira Pauto ruvara-ia va iava vearo vaisi purapaoro vara-ia evara. <sup>14</sup> Ari ita, oearovu oirara evo reo purapaiveira. Uva vigei uvuipaviei ra oisi ragavira taraipavio voea-ia oiso, O ari touvira ora voea voaaro ruture taraapaivoi. <sup>15</sup> Uva viapau vorerivira voare rugoava voea vo taereo-ia vao oa iava gauruava oiso ra voare vorevira kareave. Oiraopavira rutu oiso uvuipaai ra vore kareave, vo rara oisi ruipapaave vore karesa. <sup>16</sup> Ari oisoa oiso ruipapaave ra uvavure avaave, vo uva vearovira rutu toupave. Otaerei-ia vao oa oiso rutu toupave osa vuvuiua. Oa-a eva oa vituaro iava oisoa Pauto viapau ariiparo voea uvupaoro, vo rara rera vaisiario vaisipaive oiso purapaoro, “Igei reraaro Pauto.” Eake iava? Uvare oiraopavira rutu riro urui voeapa ravaareva va pauoro.

<sup>17</sup> Va vao oirao pie vovou oa oisoa purapareve Ebrahim oa iavirava oiso vovouroepa ra ovitoo-ia koruoua purareve Aisak, vo uvare Pauto rera-ia kokararoepa. Ari ita, oiraopavira uvare Ebrahim-pa Reo Ovoi pura rovoreva Pauto, oiso ra riro irara rutu oirara aao keeraave rerare Ebrahim. Uva va-a vao oa-ia tarai rovoroiava, vatatopoa purareva, oiso ra ovitoo-ia kataito koruoua purareve. <sup>18</sup> Uva rovvira rutu Pauto rerare oiso puraroepa, ‘Rera-a eera Aisak ira iavirava riro irara rutu viire aiteavereva.’

<sup>19</sup> Va-a vao osa Ebrahim tarai ovoiroepa oiso osa ragavira uvuiparoi ra Pauto Aisak tore piereve vorevira kopiia iava. Ari ita, oiso osa ovoovovira kopii tapiva vorevira toreroepa Aisak rera ruvara-ia Ebrahim toupasa.

### *Vo Toupai Aisak Vase Iava Ora Jekop Ora Josep*

<sup>20</sup> Oire uva Aisak oirao pie vovou sirovava reo ovoi purareva auere viraakoa, oiso ra vo araorei-ia karekepe Jekop vaio ora Iso. <sup>21</sup> ✧ Oa isivaoro-ia Jekop Josep ovii iraraaro katakataivira viraakoreva ora rera vaaro oirao pie vovou vituaro iavirava, vo osa rerapa tutuu piepa oiso ra kopiiri. Ari ita, takuvira oisoa tupaoro tooroto riara-ia Pautoa-ia oisoa vuurapa vaisi purapareve. <sup>22</sup> ✧ Ora ro tapo Josep ora rera vo oirao piearo vituaro iava vo reo purareva vo vuutao iava oa-ia Isip-ia kavuivere Jiu-pa irara. Oreoa

isivaaro iava oreovua vao oa iava voea tavireva ora rera iava oiso, “Vosa ragai iava varaua kopiipe ra voua tovota oiso.” Uvare rera vaaro kopiia tutuu pieva.

### *Moses Iava Vo Reoreoro-ia*

<sup>23</sup> ✧ Va-a vao oirao pie vovou oa oisoa purapasi vaitereo Moses aiteoareiaro. Oa sirovava rera kavausivoiva, vo kakae oisoa vataupasiva vo peva rutu sovara-ia kekira peva. Vo rara rera-ia vearovira rutu taraipasi oiso, Vearo keketoa rutu ro-ia. Oa vituaro iava ro king vo reoaro gasisiva tuuvu vovouvira rutu vo reo oa purareva kakae vurerore.

<sup>24</sup> ✧ Oa iava riroroiva Moses, vaopa oisoa reasiparo oiso teapi oiso rera vaisipaive, Pero ro reito oviivaaro oviitoaaro. <sup>25</sup> Ari ita, oisoa oisi vo vaisi veripaoro oiso vovouroepa rutu ra Pauto voeaaro tapo oirara ora tavosiro rutu, vo osa riroa rutu tavaka oisoa oupaive. Oa iava oisoa vaopa reasiparo, teapi vuri vovou vai purareve gare vuutavi raga-ia. <sup>26</sup> Uvare varao rutu-ia taraiparoepa oara-ia oša tavaka vo siraoroaro oisoa oupareve oiso rutu osa vo tavaka oureva ro ira roporeva Pauto. Varao oara oiso oaravu rutu-ia pute iraopaive rutu varao veaopara rera varaaro oara oisoa Isip-ia toupave. Eake iava? Uvare oisoa tuevira vaore vearo vori toupave vao oa ourevera vovio utupauavi rera vo tavakoroaro iavirava.

<sup>27</sup> ✧ Oire uva oirao pie vovou vituaro sirovava Isip-ia kavureva. Oa raga iavirava viapau oiso kingto vaaropa kasipu vovou uririparoepa Moses. Viapau. Ari oisoa topararo viro rutu avapaoro. Eake iava? Uvare rera-a eera ira oiso rutu toupaveva, Ira eera Pauto kekereva ora rera-ia, ro ira viapau uvuiparoi irai ra rera kekereve. <sup>28</sup> ✧ Uva oirao pie vovou purarevoiva, va sirovava oirara rutu tavireva, oiso ra Tagausapa Vurei Pasova puraive. Vo vuutao-ia oa-ia voea rutu tavitavireva, oiso ra revasiva-ia rataoara rutu riaro kipuive. Vo kipuro oara kekepaoro uvuiparoi ra vo keparo reesiparo Jiu-pa irara ovii kakaeroaro voeao avaiopa kakaero tagaupaoro okakaerovu raga avaiopa kakaero kopii piereve enselto. Uvare rera vaaro-a voea upopasa.

### *Riro Irara Rutu Jiu-pa Irara Goruvira Rutu Oirao Pieiva*

<sup>29</sup> ✧ Oisi-a oiso osa vo vovouro iava varao oirao pie vovouro Jiu-pa irara Ret Si avakava iviroiva ovusa voeapa raakaopa. Oa iava Isip-pa irara voea tariopaoro iviropaoro utupaaepa, ovusa voea ururao ora aivaro pieopa. Oa iava voa kopii ovioaepa.

<sup>30</sup> ✧ Ora tapo oiso osa vo oirao pieroa varao oara iava kasuraara varao Jeriko-ia kururu piropa, vo osa Jiu-pa irara vo urui taripaoro riro goruvira rutu viri rovopaiva erao vatara (7) vokiro rutu-ia. <sup>31</sup> ✧ Ora o tapo riakova Rehap riro otopava iria ruvara iava voeao rutu kopiiaepa oea oisoa Pautoare isivapaave, ovusa oira viapau kopiopa. Eake iava? Uvare voeao oea vo rasi vagogo rovosa urioaepa vao oa-ia oisoa toupave. Oa iava voa oira raga voea tokieva oira vo kepaoro-ia oira vaaro iavirava oirao pie vovou.

<sup>32</sup> ✧ Oire uva visii akepaavoi, E uvuiparoi oei iava ita visii tavitavia, eke? Oiraopavira, viapau oiso vuutaa vai ei ragaipa ra Gidion vase iava visii siposipoa ora Barak, ora Samson, ora Jepta, ora Devit, ora Samyuel, ora voea rutu voeao profet irara oea oisoa Pauto vo reoaro kosi piepaive. <sup>33</sup> ✧ Oiraopavira rutu oiso osa oisoa oirao pie vovouro purapaoro riro irara rutu upopaive uvarovu rutu voea-ia putepaoro. Ari ita, torevoko pitupitu rutu sirova oisoa utupaave, oa iava vao ouiva oea re voeapa Pauto Reo Ovoi

✧ 11:23: Eks 2:2, 1:16 ✧ 11:24: Eks 2:10 ✧ 11:27: Eks 12:50-51 ✧ 11:28: Eks 12:21

✧ 11:29: Eks 14:21-31 ✧ 11:30: Jos 6:12-21 ✧ 11:31: Jos 2:1-21, 6:21-25 ✧ 11:33: 2 Sml

purareva. Voeao oea laion kare iava gisipo kapu pieiva. Oa iava viapau oiso voea aioiva. <sup>34</sup> Ora voeao oea riro kasi rutu tuituia roko pieiva. Ora oiso oia virivarivira rutu toripaiva voea asavira oea toorioara-ia voea upopasa aue ragapaaeapa. Uva va-a vao osa raveraveaeapa. Uva vorerivira ita ora voea iava varaura-ia gorua ouiva. Osa iava tuuvu vovouvira rutu upoara puraiva oearovu tapo uvarovu rutuva voea voea-ia putepaoro rutu. <sup>35</sup> ✧ Ora oearovu tapo voea iava oea oisoa kopii rovopaaera, vorevira torepave. Eake iava? Uvare airorovu voea iava vairoro airoa oisi oiso oirao piepaiva oiso puraoro, “Oiraopavira uvuipaa ra vorevira toreaive vigei voeaaro.” Ora oiso tapo osa oearovu vuri irara oea voeare oiso puraara, “Uvuipatai ra vova kosita viro vosa visii varaaro oirao pie vovouro kavu rovota.” Uva viapau kosia viropa, uvare oiso ruipapaeapa ra voea varaaro oirao pie vovouro kareke piepaive. Oa iava oisoa voea vuri piepaive rutu voea upopaoro. Vo rara oiso ruipapaave ra eisi voea piepaivora, vorevira torepave vearo tootoo rutu oupasa.

<sup>36</sup> Uva oearovu oisoa voea tovipaive tapo voea ragipaoro viripa iroro-ia. Ovusa oearovu oisoa voea tuukepaive iroara-ia tuukepa keparo-ia voea tovopasa. <sup>37</sup> Ari oearovu oisoa voea vurokopaive aue-ia aveke, ovusa oearovu raga ita voea iava varaura koripaive. Ora vo osa oearovu oisoa upopaive aue-ia toorioara. Ora tapo oisoa taririvira toupave apotavira rutu toupaooro sipsip rakariro-ia kuvupaoro ora meme rakariro, ovusa oearovu voeao oisoa vuri piepaive rutu. <sup>38</sup> Oiraopavira rutu oiso osa voeao rasio-ia tou irara oisoa viapau voea eveipaive ra va iava oiso puraapaave, “O asi vearo vovou irara vai-a voeao-ia.” Voea raga ita voeao-ia oea oisoa viripaive voraro raaka tapiro, ora voraro pukuara-ia, ora tarieara-ia, ora rikuara tapo.

<sup>39</sup> Uva oiraopavira rutu-a oiso osa vo siposiporo toupaveira voeao iava oea oisoa Pauto roru piepaive rutu. Eake iava? Uvare eisi oisoa piepaive voea vo vovouroaro oirao pie vovouro rutu purapaoro. Uva viapau varao veaopara ouiva oara iava voeapa Reo Ovoï purareva Pauto. <sup>40</sup> Uvare Pauto orugoovu raga-a vao oa purareva vigeipa. Oiso rugooro ra vao-ia airepa rugoo voea tapo tuariripa irara vigei rutu takuvuoro vigei uvui pie ovoireverea voari ruture utupaa.

## 12

### *Vigei Uvuipaviei Ra Jisas-ia Vurapaoro Rera Oirao Piepape*

<sup>1</sup> ✧ Ari ita, vo vokie-ia vearovira rutu taraipaviera voeao iava tuariripa irara, uvare oisi eisi oisoa piepaive voea vo pitupituroaro evara oirao pie pitupituro oiraopavira kareke piepaoro. Uva vigei tapo ita uvui irapaviei ra oisi eisi piepape. Oa iava uvuipaviei ra varao vuri pitupituro kavupape vo pitupituro oara vigei-ia goruvira rutu pitupaiveira, ora varao rutu tapo oara vigeire korukorupapeira torevoko pitupitu purapa arapa. Uva uvuipaviei ra vara rutu evara kavuera, vo paupauo purape reasi asavira oaravu-ia pute irapasa vuriara. <sup>2</sup> ✧ Uva oisi eisi piepaoro uvuipaviei ra goruvira rutu Jisas-ia vurapape. Vao iava uvare rera raga vigei varaaro oirao pie vovouro vituaro vo rutuva rovopaooro rovoa-ia vo rekasisa opesipa tapi. Oiraopavira rutu ita, uvare viapau oiso torireva vao asavira evao parikou vo siitokaaro. Viapau. Ari ora rera iava vasereva voare, oiso ra vao kopiioro ariia oureve evao parikou-ia. Uvare vao ragare rugorugooeapa riroa rorua oa rerapa oisoa tuevira toupave. Ari ita, uvare vo vokie rera epao reia-ia pauparoi paupa vo oirapapa varata-ia vao Pauto vaoro.

*Pauto Vigeipa Siraopa Vatereva Vigei Torevokopasa*

<sup>3</sup> ✱ Rerare ro Jisas rugorugoo iraopata. Opeita rera vaarore riroa goru vovou ovaupata. Vao oava toupaooro kasipu vovou oureva vuri irara ruvara-ia. Uva oisi-a eisi osa visii tapo ita viapau uvuipatai ra visii vo vovouoaro goru vovouo viki ragapata visii vo oirao pieroaro kavupaoro. <sup>4</sup> Vao iava uvare vo paupau-a eva purapaoro vuri vovouva ora upopatai oa-ia revasiva visii iava touvira parupaevere pasi. <sup>5</sup> ✱ E vo reorore vai ovautaepa oara Pauto vatereva visiipa vao rera ovii iraraaro, oisore ra ora visii iava vovouisi oavisii goru pie iraopata? Uvare oiso puraroepa, 'Oviitoa oaa, vaore rugorugoo iraopau vo osa Turaro Pauto viipa vavata vatepareve, oiso ra va kaeri. Ora tapo oiso-ia ra opeita raveravepau vo osa viipa goru reoro rutu vatepareve varao vii torevokopasa.

<sup>6</sup> ✱ Uvare ro ira kaviko iraopareveira Pauto, ira raga ita-a eera irapa uvuiparoi Pauto ra rera vatepareve vavata oiso ra va kaepareve. Ora voeao tapo oea oiso vaisipareveira, Rera ovii iraraaro, oeapa voea vo vuriaro vo voriaro vatepareveira voea torevokopao.'

<sup>7</sup> Oire uva uvui iraopatai ra goruvira rutu vovou iraota vo osa vo vavata eva oupata. Vo uvare taraipatai oiso, Aite ruvara iava va vao-ia. Ari ita, visii vo vavataaro vao karekepaiveira rutu visiipa, oire ra va iava oiso purapata, "Oiraopavira rutu Pauto osa oiso igei piepareveira oiso, Rera ovii iraraaro." Uva ragai tavita oiso, E irai aitetoa vai viapau iraipa oviitoa vai goru reo vai viapau vatereva vaore irai torevokopasa oai-ia, eke? <sup>8</sup> ✱ Vosa viapau Pauto vaoro vavata kaepata oiso osa oearovu rera ovii iraraaro vo vavata kaepaiveira, oa iava uvuipatai ra ora visii-ia taraipata oiso, O ita, viapau oiso vigei-a Pauto ovii iraraaro rutu. Ari iravu raga ovii iraraaro-a vigei. <sup>9</sup> Ari ita, voeao aite irara oavi vo rasio-ia vigei torevokopaiveira varao vuri pitupituro asavira. Oa-a eva oa iava voeapa avivikepavioveira. Uva va-a eva osa vituaro iava uvuipaviei ra pute pie visivi rutu ora vigei iava vasipape rera iare. Oa iava uvuipaviei ra Tootoo Ovoi oupape rera ruvara-ia Aite Pauto ro vova vuvuiua. <sup>10</sup> Uva aite irara oavi vigei oisoa torevokopaive potekupa vuutarovi raga-ia voea vo rugorugoooroaro sirova utupasa. Ari Pauto vigeire rugorugooopaveira rutu oiso vigei torevokopaooro. Oa iava uvuipaviei ra torevoko vovou rutu purapape ora airerepaoro, oiso rutu osa rera vo vovouaro vuri asa vovou rutu. <sup>11</sup> ✱ Vosa goru reo rutu oupaive vao voea torevokopa reo vuri pitupituro iavirava, oa iava uvuipaai ra ora voeapa siraopaave oiso purapaoro, "Siraovira rutu vigeivipa vao-ia, vigoa viapau oiso vo reo-ia vao-ia rorupapeira." Viapau. Ari oiraopavira uvare oearovu voea iava vao goru reo uvuivoiva, oa iava torevoko vovou ouiva. Uva vo utupaua voea vo voriaro ouiva vao gavaure vovou.

*Reo Ravaa Iava Vao Oisore Ra Goruvira Toreta*

<sup>12</sup> ✱ Oisi-a eisi osa ragavira uvui iraopatai toupaooro ora visii iava vavaeara goruvira rutu kae pieta varao oara raveravepaoro eoropapeira. Ora oiso ra goruvira rutu kotupiara itotou piepaoro tore iraota. <sup>13</sup> ✱ Ra oisi iava topa pievira voka iraooro avata vao-ia torevoko raiva. Visii vao veoro kokoto irara voea tapo vokapata voea goru piepaoro voeao vuri kokoto irara. Teapi raiva tasi arova piropaave.

<sup>14</sup> ✱ Ora visii iava vovouisiro oavisii rutu tovo iraota. Oa iava uvuipatai ra gavaure vovou rutuva oearovu tapo toupata oirara. Ora visii iava

✱ 12:3: Mt 10:24; Ga 6:9 ✱ 12:5: Pro 3:11-12 ✱ 12:6: Sam 94:12; Je 1:12 ✱ 12:8: 1 Pi 5:9

✱ 12:11: 1 Pi 1:6; Je 3:17-18 ✱ 12:12: Ais 35:3 ✱ 12:13: Pro 4:26; Ga 6:1 ✱ 12:14: Mt 5:8

vovouisiro oavisii rutu tovo iraopata, ra ora airereipaoro viapau rutu vuri pitupituro vai sirova utupatavere. Eake iava? Uvare viapau oiso irai oiratoa vai Turaro Pauto kekereverea vo rara viapau eisi piepareve. <sup>15</sup> Ora vaopa tapo ora vatatopo iraopata. Teapi irai visii iava vaore isivaparo Pauto vaaro kavikopa vovou oa purapareveira visiipa. Ora vao tapopa ora vatatopo iraopata. Teapi oiso rutu toupata osa okuerovu varao itakopa kuero. Aue vituaro, teapi oirara rutu vuri piepata visii vo pitupituroaro raga-ia. Oiso rutu osa itako ovi gare ovivi raga oa aioara rutu vuri pievo vara sovara-ia vaoro. <sup>16</sup> ✧ Ra vaopa tapo ora vatatopo iraopata. Teapi irai visii iava otopa vovou vai purareve. Ora tapo teapi irai Pautoa-re isivapaoro oiso piepareve osa ro Iso. Ira katai vuutavi raga-ia gareavi raga aioa ouoro araokoto ruvara-ia kikotoo ira reo ovoi purareva kokotoa aropa oiso puraoro, Ragai varaoro rutu ouriverea rara varao aite ruvara iava. <sup>17</sup> ✧ Ari ita, rera-ia taraipataveira, uvare va isivaoro iava oiso ruipa ragaroepa ra aiteto ruvara-ia viraakoa oureve. Vo osa viapau uvuiroepa. Eake iava? Uvare viapau oiso uvuiaroepa ra evo vovou tavariorereve oa-ia tuutuua pura rovoreva kikotoopa. Uva gau ragapaoro rirovira rutu akeake ragapareva. Vo osa viapau.

### *Vigei Pou Viroviei Vo Vearo Pukui-ia Vao Vo Saion*

<sup>18</sup> ✧ Viapau oiso pou virotaepa vo pukuio-ia Sinai, oiso osa voeari Jiu voari tuariri. Vo pukuio oa oisoa uvuiapaave ra va kekeive ora voea osireiario iava. Opukuio eva oa-ia oisoa riro kasi rutu eto kasi karekepape ovokirovu-ia, vo osa Pauto reo vateparo. Ora vao tapo osa voa oisoa ruupa rutu karekepape ora purepato kiuvu. <sup>19</sup> Opukuia raga ita-a eva oa-ia utave guruko karekepa ora reoreoa. Ari ita, oreoreoa eva uvuiva, oa iava vare oisoa riro goruvira rutu arepaave oirara, oiso ra opesipe vo reoreo voea arova. <sup>20</sup> ✧ Eake iava? Uvare Pauto vo reoreoro uvupaoro rirovira rutu uriri iraopaaepa. Oreoa-ia voeare Pauto oiso puraroepa, 'Vosa irai oiratoa vai, eke irai varueretoa vai vo pukuio-ia tasiashireve, ira-ia eera ira-ia uvuiapaai rera vurokoive rera kopii pieoro.'

<sup>21</sup> ✧ Iu. Oiraopavira rutu uvare vo pukuia-a eva oava vurapaoro oisoa rirovira rutu uriripaave. Osa iava Moses ora rerere oiso puraroepa, 'Ragai-a vao ragoa rirovira rutu rikerikeparai uriri iraopaooro.'

<sup>22</sup> ✧ Oire uva visii ita vao-ia viapau oiso vo pukuia eva pouta viropa. Viapau. Ari opukuivu raga vao oa-ia pouta viropa oa vaisipaiveira oiso, Saion. Vo uva Pauto vo uruiaro toupaveira ro Tootoopatoa Rutu. Vo uruiua ouruia epao tupaivoi oiso osa raga toupaveira voari rutu utupaua vo vuvuiua-ia. Vao oa vaisipaiveira, Jerusalem. Oa sovara-ia riro tukuro (tausen tausent) rutu enselpa irara rorupaoro toupaveira. Voea raga ita oea vo uvuruo iare pouta virora. <sup>23</sup> ✧ Oa-ia toupaveira voeao Pauto ovii iraraoro avao irara. Voea ita oea vaisiuro rigatoreva vukua-ia vao oa epao vuvuiua-ia. Ari ita, kareta virora rera iare ro Pauto ira oirara rutu vo vovouroaro rovirieipareveira. Ora voeao iare tapo uraura irara torevoko vovou irara voearo Pauto oea uvuvira ovoi piereva rutu. <sup>24</sup> Oiraopavira rutu ita, vo uvare kareta virora Jisas iare. Ro ira-ia oiraopaaepa oa pura piropa Airepa Reo Ovoi. Oire ra oisi iavirava ora rera iava revasiva petoreve va eva Reo Ovoi goru pieoro. Eira revasiva iria vo kovoaro Ebel revasiario-ia putepaveira rutu. Uvare Krai revasivaoro-a iria vearopara rutu kareke piepaveira.

✧ **12:16:** Jen 25:33 ✧ **12:17:** Jen 27:30-40 ✧ **12:18:** Eks 19:12-22; Diu 4:11 ✧ **12:20:** Eks 19:12-13 ✧ **12:21:** Eks 19:16 ✧ **12:22:** Fl 3:20 ✧ **12:23:** Lu 10:20; Fl 3:12

### *Vigei Uvui Iraopaviei Ra Ora Vatatopo Iraopavio Vearovira*

<sup>25</sup> Ora vatatopo iraopata vaopa oiso, Opeita siposipopato vo reoroaro veripata, oiso osa voeao oea viapau oiso oisi rera vo reoroaro uvupaive, eera ira tugoropa siposiporo oisoa vatepareve vo rasio-ia vo tuariri rutu. Uva voea-a evoea oea viapau oiso voea vo voriaro vuria vatavataiva. Oire uva apeisi-a vigeipa vao? E uvuipaviei ra oisi va vuria vo voriaro vatavatapape, vo rara oisi rera vo reoroaro veripape ro ira vo reoro kosi piepareve vuvuiua iavapara? <sup>26</sup> ✧ Oiraopavira rutu ira-a ro ira vo gurukoaro voari tuariri rutu vo rasio rikerike pieeva. Oa iava Reo Ovoi purareva oiso puraoro, 'Ragai taru vorerivira vo rasio ita rikerike piea. Uva viapau oiso vo rasio raga-a, ari vuvuiua rutu tapo-a.'

<sup>27</sup> Oire uva vo reoa vao-ia oa oiso purapai, Vorerivira, oa porearo oiso roroi ovira rutu toupai oiso-ia, Vara rutu orekerovu Pauto oara purareva voari rutu rovoa-ia, oara rutu opesiperea rikerikeoro. Ari varao oara viapau oiso rikerikeperea, oara raga-a evara oara perea.

<sup>28</sup> ✧ Oire uva rorupata, uvare vao oupapeira Pauto vo Saraaro oa viapau opesia vai vo oea rikerikepe. Osa iava vigei uvuipaviei ra Pauto vaisiaro-ia vuurapa vaisi purapaoro rerapa avivike iraopavio rera vaisiaro kae piepaoro rutu. <sup>29</sup> ✧ Uvare Pauto riro kasiva eto kasi toupaveira. Oa uvuipai ra orekerovu rutu rova pieve vara rutu opesi pie ovoiro.

## 13

### *Uvuipaviei Ra Ora Vigei Araoko Iraraaropa Sirao Vovou Vatepape*

<sup>1</sup> ✧ Vokiara rutu-ia uvui iraopatai ra oearovivupa siraopata, voeao araoko irara oavi oea Kraisi vaisiaro-ia toupaveira. <sup>2</sup> ✧ Opeita vaore ovau iraopata oiso osa uvuipatai ra oearovivure aapaapaupa irara keerapata vorarore visii vo keparoaro-ia voea koata piepasa. Ari ita, oearovu oisoa oisi eisi oearovu piepaive voari. Uva viapau oisoa voea eveipaoro voea koata piepaive ora voea vo keparoaro iare, vo osa voeavi uvuiaro ita enselpa irara oea oisoa koata piepaive.

<sup>3</sup> ✧ Ora voeaviore tapo rugorugoopata oearoa tuukepa keparo-ia toupaveira vo Jisasi iavirava. Ra ora visii-ia voea sovopaoro oiso taraipata, Visii uvuiaro eva visii goa ita tuukepa kepa-ia toupatavoi. Ora ra voeaviore tapo rugorugoo iraopata oearovia tavaka vo vavataaro kaepaveira. Vo vavataaro uvuipatai ra ora visii-ia va sovopata oiso rutu ita, ovavata-a eva voea vaoro oa visii-ia ita toupavoi.

<sup>4</sup> ✧ Opeita vo pitupituore ora oupa pitupitu oiso rugorugoopata, Akukupapa raga. Viapau rutu. Ari ro oirato ora o riakova oavukarea raga uvuipasiei ra ora vaiterei raga rutu toupasi. Vao vituaro iava vosa viapau oisi eisi toupasi, oa-a eva oapa Pauto vaiterei ora oearovu rutu rovirieireverea vapa vao ora voeava otopa vovou, vo osa vo pitupitu vo voriaro vuri vori vateveve voeapa.

<sup>5</sup> ✧ Ora opeita vo vovouova toupata tapo moniara riiriipa vovou. Ari uvuipatai ra varavio-ia roru iraopata oara-ia pitupataveira oiso purapaoro, "Ari uvuipai varao." Eake iava? Uvare Pauto vao-ia oiso puraroepa, 'Viapau oiso visii kavuaverea. Ora viapau oiso visiire ovauraverea.'

<sup>6</sup> Oreoare vao rugorugopaoro uvui iraopaviei ra goru vovouvira rutu oiso purapavio,

✧ 12:26: Eks 19:18; Hag 2:6 ✧ 12:28: Dan 2:44; Hi 13:15 ✧ 12:29: Diu 4:24 ✧ 13:1: Ro 12:10; 1 Te 4:9 ✧ 13:2: 1 Pi 4:9 ✧ 13:3: Mt 25:36; Kl 4:18 ✧ 13:4: 1 Ko 6:9 ✧ 13:5: Fl 4:11; Diu 31:6, 8; Jos 1:5

'Ragai reraaro tauvapato Turaro Pauto. Osa iava viapau uvuiparai ra orekerovu avu vaipa uriripara. Oiraopavira rutu. Eake vai-a vao oai uvuiparoi irai ra oai purareve ragai vuri piesa? Viapau oiso oaiiei.'

*Vigei Uvuipaviei Ra Oiso Rutu Utupavio Osa Voeao Turaro Irara Tuariripa Irara*

<sup>7</sup> ✧ Ora voeaore rugorugoo iraopata tuariripa irara oea oisoa visii tuvetuvepaive Pauto vo reoaro iava siposipopaoro. Ora voea vo pitupituroarore tapo rugoopata oiso osa ragavira oisoa toupave tootoopaoro ora kopiipaoro. Uva vo pitupiturei-a evarei oarea-ia visii ita uvuipatai ra oisi voea vioepata voea vo vovouroaro oirao pieara sirova utupaoro.

<sup>8</sup> ✧ Jisas Kraiss viapau oiso tavarioa vaiei. Ira vo vokie touparevoi oisi raga ita osa tuariri oisoa toupareve. Osa raga ita eisi osa voari utupaua toupareverea taru. <sup>9</sup> ✧ Opeita osiposiporovu raga pisaara uvupata vaopa, teapi visii iuveive vao arova torevoko raiva Pauto vaaro. Vosa vigei iava sopaura sirao vovou vo goruaro ove Pauto ruvara-ia, osa vearopai. Oa iava vigei iava sopaura viapau uvuipai ra osasararovu rutu aue reo goruro vo goruaro ove varaore alopara. Oara vo pitupituario viapau oirara oisoa tauvapaive vo osa va-ia vokapaive.

*Vo Toupai Vao Iava Koruoua Oa-ia Rorupare Pauto*

<sup>10</sup> ✧ Ovoovova eravao vigei oiraaro toupai oira-ia koruoua toupai. Vo koruouo oa iava viapau rutu uvuipai Jiu-pa irara pris ra oai puraive va-ia. Uvare viapau voea vaaro-a. Ari vigeipa oirao pie vovou irara. <sup>11</sup> ✧ Ari ita, ro Rovopatoa rutu Pristo Jiu iava ira oisoa Tugoropa Tavuki Rutu iare oisoa koataparou varuere kare iava revasi rovurova vara-ia koruouapasa vuriara verapaoro. Vo karero okarea oisoa kasipaive vo uva sel urui-ia toupave vaturo. <sup>12</sup> ✧ Uva oisi-a eisi osa vituaro iava Jisas ita kopiioepa oisi ratu vo riro urui iava rataoa riaro vaturo-ia. Oa iava voa rera iava reasiva parueva oirara rutu sisigarue pieoro vuri vovouro iava. <sup>13</sup> ✧ Uva vigei tapo ita uvuipaviei ra oisi uruia vaturo iare kosi viropavio varao kavuoro Jiu varaaro, oiso ra rera sirova utupavio. Ra va iava ora vigei-ia rera vaaro ariia sovopape va vao siitoka vavataaro kaepaoro. <sup>14</sup> Oiraopavira ita, viapau oiso pauaka urui-a vao oa oiso vaisipapeira, Vigei vo uruiaro va vo rasio-ia. Viapau. Ari touvira rutu tuevira tupaoro vo uruire taraapapeira vao oa rutu-ia toupaperea voari utupaua. <sup>15</sup> Eisi osa iava uvuipaviei ra Pautoa-ia vuurapa vaisi purapape Jisas vaisiaro iavirava. Vo vaisio vuurapa vaisi oa oiso toupai, Vigei vaaro koruoua vova vigei iava gisipoara-ia. Uvare rera vaisiaro rei piepapeira oisi va iava tavitavipaoro. <sup>16</sup> Ora opeita tapo vo vovoureore tapo ovaupata vearoa purapa, ora aue vao tauvaa oearovu tauvapasa. Eake iava? Uvare evo vovourei oarea-ia uvuipatai ra Pauto roru piepata ora visii-ia.

<sup>17</sup> ✧ Voeao oea visiipa irapaaveira vo reoroviaro tapo uvu iraopata, ora voea vo vovouroaro tapo sirova utupata. Uvare vuutara visii iava sopaura oavisii tokipaiveira vaopa, teapi oearovu visii piro piepaive. Oa iava voea voea tokipa irara Pauto tavitavipaaveira ora voea vo kovouaro iava. Vosa voea vo reoroaro oisi purapata, oa iava uvuipai ra visii-ia kovopaive roruvira. Ari vosa oisipa eisi viapape, oire ra sirao va vavataaro kaepaive oisi eisi kovopaoro. Ra oisi vo vavata iava viapau oiso ra tauvaa vai outavere.

*Vo Toupai Tauvaa Oupa Iava Variria*

✧ **13:7:** Hi 6:12 ✧ **13:8:** Hi 1:12 ✧ **13:9:** Ef 4:14; Kl 2:7, 16 ✧ **13:10:** 1 Ko 9:13, 10:18  
 ✧ **13:11:** Eks 29:14; Lev 16:27 ✧ **13:12:** Jo 19:17 ✧ **13:13:** Hi 11:26 ✧ **13:17:** Ais 62:6; Ap 20:28



<sup>18</sup> Visii vo variroaro topa piepata, ra Pauto igei tauvapareve. Oa iava ora igei-ia tarai ovoipaiveira oiso, Igei iava sopaura sisigaruepapeira vo Pauto osirearo-ia. Uvare igei vo ruipaaro rutu-a va vao-ia torevoko vovou purapaoro vokiara rutu-ia. <sup>19</sup> Uva vorerivira ita visii arepaavoi goruvira rutu oiso ra variripata. Oa iava Pauto visii iare ragai vore pierere rara.

<sup>20</sup> ✧ Pauto vigei Turaroaro Jisas kopiia iava vorevira tore piereva rera ro vigei Tokipatoa Rutu Vearoto. Ira sipsip ragui tokipareveira, oraguia-a vao vigei raga ita. Ari ita, rera vaaro iava kopiia vao Reo Ovoi Pauto vaaro, oa oiraoepa vo reo oreoa-ia viapau opesia vaiei. <sup>21</sup> ✧ Uva Pauto arepaaveira ro gavaurepa vovouto, oisore ra vearopara vatepareve visiipa, vaore, oiso ra oisi vara iava rera vo ruipaaro sirova utu iraopata. Ora vaore tapo, oisore ra oisi vigei pieparevora, uvuipaviei ra rera roru piepape vao iavirava Jisas Krai vo goruaro. Oire uva uvuipaviei ra Krai vaiiario kae piepape vokiara rutu-ia. Ovoiei.

### *Ovoioipa Reo-a Vao-ia*

<sup>22</sup> Goru visivi rutu visii araoko irara oaa tavipaavoi auere ra ragai vo reoaro uvu iraota. Oreoa purapaavoi visii iava sopaura oavisii goru piepaoro. Oa oisivio rutu toupai gareavi pasia. <sup>23</sup> ✧ Uva oiso ruipaparai ra visii tavia ro iava Timoti vigei araokotoaaro. Ira kosi pieivorao vova tuukepa kepa iava. Oire vosa ikauvira raga kareroera ragai iare, oa iava uvuipaveiei ra vegei rutu uriove visii kekesa.

<sup>24</sup> Igei vo reoaro topa piepaoro vearo voki purata voeaova visii voeaaro turaro irara ora oearovuva Pauto voeaaro. Voearo visii araoko iraraaro vo taereo iava Itali oea tapo visii-ia ita vearo voki purapaivoi.

<sup>25</sup> ✧ Uva visiipa Pauto arepaavoi, oisore ra visiipa vereopa vovou rutu purareve visii tauvapasa.  
Eisivi raga ra opesipe.

## JEMS

### Irapa Reoro Vo Vukuo Iava

Oeavu tarai irara oiso rugorugooapaaveira, Ro Jems ira raga ita Jisas araokotoaaro (Mt 13:55; Mk 6:3). Uva ora vaisiparoepa oiso, Kraispakovopato (Je 1:1), ora tisato (Je 3:1). Vo pasio rigatoreva voeaopa oea vaisireva oiso, Katai tau erao (12) sara oea sikasikavira toupaveira voraro rutu. Uva taraipavio voea-ia Kristen irara oea tapo sikasikavira oisoa toupave vo vuuta-ia eva. Aue iava uvare oearovu vuri vovou irara vuri pitupituro oisoa purapaive voea vo touaro vuri piepaoro.

Jems varao-ia reoreoparoi vao iava osa ragavira uvuipa Kristento ra toupaveve oiso-ia, teapi kasipu vovouva ro kaekaevira toupaveve (Je 1:19-21), ora uvui iraoapa ra vearovira ora rera iava arevuoto tokipareve (Je 3:1-12), teapi oearovu raga vo pitupituroaro roviriee ragapareve, (Je 4:11-12), ora teapi goruvira varao-ia pitupareve varao vo rasio iava (Je 5:1-3). Ari uvui iraoaparoi ra Pauto ruvara-ia tutuu pievira toupaveve (Je 4:7-8), ora uvui iraoapa ra rera vaaro rari vuku oirao pierere varao iavirava kovoara oara purapareve Pautoa-pa ora oearovivupa oirara tapo taupapaoro.

1. Ora rera iava aviavi pie reoro vatereva Jems, 1:1.
2. Oiraoapa lotu vo pitupituro iava oa kareke piepareve ro ira Pauto vo reoro uvupaoro va sirova utuparo, 1:2-27.
3. Oirato vaaro oirao pie vovou oa oirao piepareve kovopaoro, ora arevuoto tokipaoro, ora vo osa viapau oearovu tovipareve, 2:1-3:12.
4. Oiraoapa tarai iava vo reoro, ora vao iava variria upiapa irara taupapasa, 3:13-5:18.
5. Ovoiofa reoro varao-ia vo iravivu taupapasa vuriara iava, oiso ra porero viro, 5:19-20.

<sup>1</sup> Ragai-a vao Jems ragoa-a Pautoa-pa kovopato ora Turaro Jisas Kraisp. Ragoa vo pasio rigatoavoi visiipa Isrel-pa irara katai tau erao (12) saraaro visigoa Isrel-ia oisoa tou rovopata. Oa iava voava sikasikataepa orasirovu raga-ia toupasa. Uva ragai visiiva veoro vokiavoi.

#### *Kokarapa Iava Vao Oa Uvuipai Ra Vigei Goru Piepaive*

<sup>2</sup> ✧ Araoko irara oaa, vosa oaravu rutu kokaraara visii-ia karekepape, oa iava uvuipatai ra oiso rugoopata, Rorupasapara varao-ia. <sup>3</sup> ✧ Uvare taraipatai varao-ia oara karekepape visii varaooro oirao pie vovouro-ia kokarapasa, oara uvuipai ra visii-ia poupa piro, ra vara iava keevoisivira torepata varao kaepaoro tavaka vovouro, vo rara kokaraara-ia putepata. <sup>4</sup> ✧ Vokiara rutu-ia goruvira rutu tore iraoapata tavaka vo siraooro kae iraoapaoro. Oa iava vo pitupitu eva uvuipai ra vearovira rutu kareke iraope visii-ia. Osa iava uvuipatai ra vearovira rutu touta. Ra oisi iava viapau oiso opitupituipa apotata oai ou arapa Pauto ruvara-ia. Viapau. Ari eisi iava visii uvuipatai ra uvui iraoa rara.

#### *Ro Ira Veoro Rugorugooa Ruipaparo Ra Vare Variriro*

<sup>5</sup> ✧ Vosa irai visii vuruvuru-ia ro iava veoro rugorugoo vaipa apotaparo, oire Pautoa iare variriro, oiso ra rerapa rugorugoo vatero. Ra va iava Pauto rera vatereve. Ari ita, ro Pauto ira veoro rugooro rutu vatepareveira oirara rutupa. Uva viapau voeoro kasipuparoveira oearo veoro rugooropa

✧ **1:2:** Ro 5:1-6; Mt 5:12; Hi 10:34    ✧ **1:3:** Ro 5:3    ✧ **1:4:** Kl 4:12; 1 Te 5:23    ✧ **1:5:** Pro 2:1-9; 1 Jo 5:14

apotapaave vo osa varare arepaave. <sup>6</sup> ✧ Ari vosa rera eera oirao pie rovo iraopareve ra va iava Pautoa iare variriro, viapau uvuiparoi ra gare visivi rera vaaro oirao pie vovou kavureve oiso rugoopaoro, Esa pasi, Pauto ragaipa vao vaterevere, eke viapau. Eake iava? Uvare rera-ia vo rugorugooarei toupaivoi. Uvare oiso touparevoi osa avakava iria torupaoro ora vurevurepaoveira. <sup>7-8</sup> ✧ Osa voeoro eisi viapau uvuipaai ra oiso rugoopaave, Turaro irapa oavu avu vai vaterevere. Viapau rutu. Eake iava? Uvare rera vo rugooro avavaiapai ora sikasikapaoro. Oa iava vo vovouro evara rera varaaroro rera oiso piepai, oa iava viapau uvuiparoi ra katai raiva vai raga sirova utuparo.

### *Apotatoa Iava Ora Ro Riro Kotokoto Guruto*

<sup>9</sup> Vosa aa ro avuo araokotoa oavi apotato ro oirao pie vovouto, ira uvuiparoi ra rorupareve, uvare Pauto rera kae pieparevere ora rera osireiaro iare. <sup>10</sup> ✧ Ora vosa aa ro avuo ro araokotoa oavi ira riroara rutu kotokotoarava toupareve, ira tapo ita uvuiparoi ra Pautoa-ia rorupareve vo rara rera apota pierave. Eake iava? Uvare oisi voea riro kotokoto guru irara akukuvira rutu kopii ragaaverea rara, oiso rutu osa isiso kokookoro oara kopiipapeira. <sup>11</sup> ✧ Taraipavio vosa ravireo kaeparo viroveira, oire ra kasiraoparo rutu. Oa-ia isiso kouro erakopapeira rutu. Ra vo kou kokookoaro kovepe. Oire ra voava oritoara vuripe. Eisi raga ita osa ro riro kotokoto guruto ira rataa pievira kopii ovoirovere vo osa tovira kovopareve orekerovu gurupaoro ora rerapa.

### *Vo Toupai Varao Iava Orekerovu Oara Oiratoa-ia Kokarape*

<sup>12</sup> Ari ro oirato ira goruvira rutu tore iraoparo tavaka vo siraooro kaeparo vokiara rutu-ia, ira uvuiparoi ra rorupareve, vo rara varava ora keevoisiparo. Irapa Pauto Tootoo Ovoi vaterevere oiso rutu osa rera vo voriaro, vao Pauto ovoria iava reo ovoi purareva vo vori vatesa oirarapa voeao oea ora voea iava sopaura oaive vatepaive rerapa. <sup>13</sup> ✧ Vosa orekevu iravu sita pieve rera rata pieoro, oire voava rera ivuve ra vuria purareve. Uva viapau uvuiparoi ra oiso puraro, “Pauto ragai ivurevoi vao vuria purasa.” Viapau. Uvare vuria viapau uvuipai ra Pauto ivuve. Ora Pauto viapau oiso oirato ivuparevira vuri vovouro purapasa. <sup>14</sup> Ari ita, vigei iava katakataivira sopaura toupaveira oura ora sitapapeira ra vigei ivupaive. Va raga vao vuri ruipa vigei vaoro oa raga vigei aroviakupaiveira vigei-ia kokarapaoro. Oa iava vigei ivupaiveira vuri vovouro purapasa. <sup>15</sup> ✧ Uva vo pitupitu-a vao oa-ia sopaura ora sitapapeira. Oire voava vuri vovou kova pieve, ra oisi raga ora rigapaoro kae piro va ragava vuri vovou. Vo vovou vao vuria kakaearo. Ra voava utupavira rirovira rutu karekepe. Oa-ia oisoa kopiia purapave oiratoapa.

<sup>16</sup> Araoko irara oaa rutu. Teapi vao kokarapa pitupitu eaka ragapata oa visii keakeapaiveira. <sup>17</sup> ✧ Vo pitupituro rutu varao veaopara vate ragapa pitupituro ora varao vatevateara vigei tauvapara, oara rutu vuvuiua iava uriopapeira vova Pauto ruvara-ia ro ira aviaviara rutu purareva, varao oara roropaoro vuvuiua-ia toupaveira. Ari ita, ovuutarovu-ia viapau vaeavira roropaiveira vo rara rukuta vara utopaave. Ari Pauto viapau oisi eisi toupaveira, aue iava uvare viapau oavu avu vai epao oa uvuipai Pauto vaoro veoro vovou utopasa. <sup>18</sup> ✧ Viapau. Ari eera ora rera raga vo ruipaoro sirova utuparoveira. Oa-ia vigei Aitearo puraparo viroveira vao

✧ **1:6:** Mk 11:24 ✧ **1:7-8:** Pro 3:5-6; Je 4:8 ✧ **1:10:** 1 Ko 7:31; 1 Pi 1:24 ✧ **1:11:** Ais 40:6-8; Sam 102:4, 11 ✧ **1:13:** 1 Ko 10:11-13 ✧ **1:15:** Sam 7:11-17; Ro 6:21 ✧ **1:17:** Jo 3:27; Mal 3:6 ✧ **1:18:** Jo 1:13; Ef 1:12; Re 14:4

iava vo rara rera vaaro Oiraopa Reo rutu oirao piepape. Uvare rera-a ro ira vigei karekereva aue sirova Oiraopa Reo rutu rera vaaro vaore, ra oiso toupape, Avaio kakaero orekerovu rutupa ira pievira varao oara purareva Pauto.

### *Uvuipatai Ra Reo Uvu Iraopata Vara Sirova Utu Iraopaoro*

19 ✧ Araoko irara oaa rutu, va-ia tarai iraota ra visii rutu vatatopopata ikauvira reo uvusa. Ari ita, ra viapau oiso vagevagepavira reo purapata. Ora viapau oiso ra ikaupavira kasipupata. 20 Eake iava? Uvare kasipu vovou-a oirato vaaro oa viapau oiso torevoko vovou vai kareke piepaiveira Pauto oaiaro. 21 Osa-a eisi osa iava vao vuivui pa vovou ora vao vuri pitupitu rirovira rutu karekepapeira. Evara ovovouroa veri rovopata. Ra fapo ora visii vo rugugooaro eaka pie rovota, ra vo reo outa oa tovoreva Pauto vo visii sopaaro-ia. Evo reo oa iavirava uvuipatai ra vorevira voreta oriruvira rutu toupasa vo Pauto ruvara-ia.

22 ✧ Ari ita, vo osa oisi vo reo sirova utu iraota oisi va purasa. Viapau uvuipatai ra va uvu ragapata. Viapau. Vosa va uvu ragapata, uva oisi-a eisi osa iava uvuipatai ra visii raga ora keakea ragapata. 23 Vosa irai Pauto vo reoaro uvupareve vo osa viapau va sirova utuparo, ira-a eera oiso rutu toupape, ira ora rera iava puaua raga vuraparevoi sisiro-ia. 24 Vo osa ora rera iava puaua vura rovoreve, ra voava ikauvira avaro vo puare ovausa. Ra oiso aueparo, Apeisi ragavira pavira toupaveira? 25 Ari ita, Pauto vaaro reo goru oiraopa oa vigei ariarava vuri vovou vo tuukearo karupaiveira. Oa torevokopai rutu vosa irai vearovira rutu va vituaro vao reo goru kekereve, ra va iava va sirova uturo. Uva vosa viapau vo reo uvu ragapareve ra ikauvira akukuvira raga vo reore ovauparo, oire uva rera-a eera ira uvuiparoi rorupareve Pauto vaaro-ia viraakoa.

26 ✧ Ari vosa irai oiratoa vai oiso rugooparo, Ragai-a vearoto lotupato ragoa Pautoa-pa lotu iraoparaveira rutu, vo osa viapau oiso ora rera iava arevuoto vearovira tokipareve, oire uva rera-a eera ira kuvuparoveira vo ora rera raga sopaaro-ia. Eva-a oa iava rera vaaro oirao piea ora lotua oiso rutu toupaveira, Oavu avu raga. 27 ✧ Ari lotupato vo vovouaro-a sisigaruea rutu vo Pauto Aite osireitoaaro-ia vo rara vearo vovou purapareve oiso-ia, vo osa virakoi kakaero ora raroe riako tauvapareve voea vo vavataaro kaepaoro.

## 2

### *Uvuipaviei Ra Oirara Rutupa Vaea Kaevira Raga Siraopavio*

1 ✧ Araoko irara oaa, vigei reraaro Turaro Jisas Kraisi oirao pie iraopata ro ira kerariava toupaveira. Oa vituaro iava eva viapau uvuipatai ra ro raga vearopata ira rei vaisiva toupaveve roviore isivapaoro akaipatoavi. 2-3 Easi pasi irai vearotoa vai-ia kuvutoa vai oisoa ora kuvuparo ora riro voripara-ia ora oritooro. Ra va iava koataro visii okepaiaro-ia lotupa kepa vai. Ovusa apotatoa vai pasi oisoa vuritoa-ia kuvupato kuvuparo, oire ra rera rapo ita koataro voare vo visii vo kepaaro-ia lotupa kepa. Uva pasi oisoa ro vaio raga vearopata ira vearotoa-ia kuvupato oisoa ora kuvuparo. Oa vai iava oiso oisoa rera tavipata, “Vao-ia paupa pauu.” Uva pasi oiso ro apotato oisoa tavipata, “Vao-ia vii torepau,” eke “Vo pauu rakorako uru-ia vovio ragai kokotoaro ruvara-ia.” 4 Vosa oiso vo vovouro purapata, oire uva vo vovouro evara oara-ia araoko irara oavisii rovirieipataveira vo ora

✧ 1:19: Pro 5:1, 2, 10:19, 16:32 ✧ 1:22: Mt 7:21-29; 1 Jo 3:7 ✧ 1:26: Sam 34:13 ✧ 1:27: 1 Jo 2:15-17 ✧ 2:1: Ap 10:34-35; Ro 10:9-13

visii raga vo rugorugooroaro iava. Viapau vaea kaevira torevokovira voea rovirieipataveira. Ari oiso rutu piepataveira osa voeao oirara rovirieipa irara ora voea vo rugooroaro raga vuriara sirova.

5 ✨ Araoko irara oaa, visii uvu iraota! Voeao oea oiso apotavira toupaveira oirara rutu osireiario-ia voea vo rasio-ia, oea eveoa reesireva Pauto oiso puraoro, “Ragai ovii iraraaro. Visii tauvapaavere oiso ra goruvira oirao pie vovouro oavisii purapata ragai-ia. Ora vao tapo osa vo koatataverea ragai vo Saraaro-ia toupasa.” Vo uvare voari tuariri Pauto reo ovoi purareva voeare oisi eisi piesa voeaoa oea rerapa siraopaave.

6 Ari visii voeavi voeao apota irara arii piepataveira. Taraipatai ita voeao-ia riro moni irara oea visii vara piepaiveira rutu visiipa tavaka vo siraoro vatepaoro. Oea raga ita eveoa oea visii iava gasipaiveira kortuara iare tavaara. 7 Uva Pauto vearo vaisi tovoreva visii-ia vao-ia vo vaisio-ia oiso, Krai voeao. Oa-a eva oa iava vo vaisiva visii tovipaiveira voea eveoa riro moni irara.

8 ✨ Oire uva torevokopai rutu visiipa vosa rovopa rutu reo goru sirova ututa vao oa Tugoropa Vuku-ia toupaveira oiso purapaoro, ‘Vosa ora viipa siraopaiveira, osa raga ita eisi osa uvuipauei ra roviopa siraopau ira vii ruvara-iavi toupaveve.’ 9 Ari vosa oearovu raga vearopaoro oearovivure isivapata, uva va-a eva oa-ia vuria purapataveira. Oa iava vao Pauto vaoro reo goru visii sopaoro togapaivoi. Osa iava va sovo irapatavoi rutu, Visii vao-ia riro reo goruro-ia gasi irara. 10 ✨ Vosa irai vearovira rutu Reo Taisi rutu sirova utupaoro oavivu-ia reo goru gasireve, oa-a eva oa-ia Reo Taisi rutu-ia gasipareveira. 11 ✨ Vigei taraipavioveira oiso, Pauto oiso puraroepa, ‘Opeita vii vaoro ora oua puteri.’ Uva rera raga ita oiso tapo puraroepa, ‘Opeita oirato upooro rera kopii pieri.’ Oire vosa viapau ora oua puteri ra ita oirato upooro rera kopii pieri, oa ita-a eva oa-ia Reo Taisi-ia gasirivoi. 12 Vare vao-ia rugoo irapatata, uvare Pauto visii rovirieirevereava vao reo goru sirova utuoro, oreoa vao oiso toupaveira vigei tauvapasa, oiso ra vearovira toupape. 13 Vosa oiraopavira rutu irai viapau iravipa siraoparo oiratoa vai, irai ita-a eera vo vovouaro rovirieirevereava Pauto. Eisi osa iava viapau gare visii rerapa siraorovereava Pauto. Ari vosa ro ira iravivupa siraoparo, ira ita-a eera Pauto irapa siraorovereava.

### *Oirao Piea Vao Oa Viapau Vearo Kovo Vaiva Toupave Oa Kopii Ovoiperea*

14 ✨ Araoko irara oaa. Vosa irai oiratoa vai oiso puraro, “Ragai Krai oirao piepaavo,” vo osa viapau vearo kovo purapaveve rutu, oire va iava rera vaoro oirao piea akukupapa raga purave. E pasi eisi vo oirao pie vai iava Pauto uvuiparoi ra rera vai vorereve ora rera iare? Easi viapau. 15 Easi pasi oearoi araoko irara oavi ora taataa riako oavi oea vai-ia vuriara vaiva varoara toupavoi. Ora auepa tapo viapau voeapa aioara vai. 16 Easi pasi irai epao visii vuutaaro iava ira vai-a uvuiparoi ra oiso voea tavireve, “Pauto visii tauvaveve ra avata varoara vai-ia tuusa. Oire ra va iava aiooro kovuara oavisii vuku pieta.” Ari ita, vo osa oisi eisi pura ragaparo osa viapau oiso voeapa oarai varoara vai vatepare ora aioara vai voea iava varaura tauvapaoro. Ra apeisi ragavira vo reo eva voea tauvave? 17 Oire uva aue oirao piea oisi raga ita eisi toupavoi. Vosa oisi tou ragapaive, ra viapau vearo kovo vai karekepaive. Ra oisi raga ita akukupavira toupave vao oirao piea oa kopiiiepa.

18 ✨ Uva iravu oiso puraparoveira, “Iravu uvuiparoi ra oirao pie vovou rutu purapaveve, vo ovusa iravu vearo kovo purapaveve.” Oa iava ragai

✨ 2:5: 1 Ko 1:26-31 ✨ 2:8: Lev 19:18 ✨ 2:10: Ga 3:10-12 ✨ 2:11: Eks 20:13-14; Diu 5:17-18

✨ 2:14: Ef 2:8-10; Mt 7:26 ✨ 2:18: Je 3:13

oiso puraparai rerare, “Oire ragai kareke pieri vii vo oirao piearo iava vao oa viapau vearoa vaiva tapo karekepapeira.” Uva vearo kovo-a vao purapaavoi vaore, oiso ra vii kareke piea ragai vo oirao piearo iava. <sup>19</sup> E oiso oirao piepariveira, Kataitao raga Pauto touparevoui? Uva oisi vearpai. Uva ita, vuri irara tapo uraura irara tugara oisi eisi oirao piepaiveira rirovira rutu rikerikepaoro uriria iava. <sup>20</sup> Vii-a kokoropatoa rutu! Ari ita, vosa oisi oirao pie ragapari vo osa viapau vearo kovo vai tapo purapari, oire ra va iava vii vaaro oirao pie vovou akukupavira ita oisi toupave. Easi pasi va vai vao vituaro iava tarai ruipapaei, raa?

<sup>21</sup> ✧ Voari tuariri rutu uva vigei aaotoaaro Ebrahim oviito Aisak tovoreva eravao-ia, oiso ra rera vatereve Pautoa-pa oiso osa tauoa vo Pauto vo ruipaaro sirova utupaoro. Oire uva vo vokia-a eva oa-ia Pauto rera vo vovouaro kekereva. Oa iava oiso rera vaisireva, Torevokoto oirato. <sup>22</sup> Taraipatai eera vaaro-ia oirao pie vovou ora vearo pitupitu tapo oarea oisoa kovopaive. Oa iava rera vaaro oirao pie vovou oisoa uvui piepaive rutu Pauto osireiario-ia oisi iava. <sup>23</sup> ✧ Voari tuariri rutu Tugoropa Vuku-ia oiso puraroepa Moses, ‘Ebrahim oisoa Pauto oirao piepareve.’ Oa vituaro iava oiso puraroepa Pauto, ‘Torevoko vovou rutu vii vaaro Ebrahim.’ Eva-a oa iava Ebrahim oisoa oiso rutu toupave, Pauto vatetoaaro. <sup>24</sup> Oire uva vo vokio va-ia taraitai auepa vao akukupapa oirao pie raga, viapau oiso va iava uvuiparoi ra iraire oiso puraro, “Torevokoto vii.” Viapau. Ari rore rugoiparoi ira vearo kovo rutu purapareveira aue-ia oirao piea. Oa-a eva oa iava oiso rera vaisirevere, “Torevokotoa rutu vii oirato.”

<sup>25</sup> Oiso raga ita osa o otopava Rehap iria voeao tokieva Josua oea arureva. Uva voa-a evoa uvava oraivavu raga-ia voea vorevira kare pieeva voea virivarioro keripa irara asavira. Oa iava Pauto oirare Rehap oiso puraroepa, “Torevokova.”

<sup>26</sup> Vigei taraipavio oiso, Varaua-ia viapau urauratoa vai oua kopii ovoiepa rutu. Osa raga ita oiso, vosa ro ira oirao pie ragapareve vo osa viapau vearo kovo vai tapo karekepave, oire uva oisi-a eisi osa iava rera vo oirao piearo-a eva oisi eisi toupai oiso, Kopiiiepa.

### 3

#### *Uvui Iraopaviei Ra Ora Vigei Iava Arevuoaara Vearovira Rutu Tokipape*

<sup>1</sup> Araoko irara oaa. Teapi riro irara vai visii iava ora tisa vaisi piepaave. Taraipaviei oiso uvare utupaua Pauto goruvira rutu kovorevere vigei tisa irara rovirieipaoro, vo osa garevira kovorevere oearovu oirao pie vovou irara rovirieipaoro. <sup>2</sup> Vigei rutu rirovira ora piro piepavioveira vuriara purapaoro. Ari ro ira uvuiparo ra ora rera iava gisipo eaka piepareve vuri reoro pura arapa, ira ita-a eera uvuiparoi ra ora rera iava varaua rutu vearovira airereipareve vuri pitupituro purapa arapa. <sup>3</sup> ✧ Vigei hos gisipoaro tuukepapeira aue-ia ain, auere ra vigei raga vo ruipaaro sirova utuparo vokapaoro. Oa iava rera iava varaua porepapeira vo oraivavu iare. <sup>4</sup> Ora auere tapo selpa uvuo rugoopata oavu eva riroa rutu. Vosa riroto kiuvu va peopareve ovusa avapape avakava-ia, oire uva va iava stia gareavi rutu. Ari ita, vosa kepten uvavure ava vovouaro, ra va iava vo uvuo porepaoro avaro. <sup>5</sup> Eisi raga ita osa arevutoa garetoavi raga varaua iava. Ari ira uvuiparoi ra oaravu rutu karekepave reoreopaoro.

E taraipataveira aue-ia tuituia oa uvuipai ra riro kasi rutu poko pieve vegoa-ia? Oire ra va iava evaooara rutu rovape. <sup>6</sup> ✧ Arevuotoa tapo osa

✧ 2:21: Jen 22:1-14 ✧ 2:23: Jen 15:6; Ro 4:3; Ais 41:8 ✧ 3:3: Sam 32:9-11 ✧ 3:6: Pro 12:17-18

toupare oiso osa tuituia, ira varaua rutu vuruvuruaro-ia toupareveira. Uva voava ovovourovu rutu vuriara kosikosi piepareveira. Oa iava vara-ia evara orekerovu rutu varaua rutu vuivui piepareveira. Uva eisi osa varaua vo ruipaaro kosi piepareveira oiso rutu osa riro kasirao kasi rutu eto kasi. Opeši tapi rutu vituaro okasia vao kasipaiveira eto kasi. <sup>7</sup> Oirara okarerovu rutu varuere kare oupaiveira vavarai kare oiso, kokio kare, ora rakoru kare, ora oaravu rutu avakava sovara-ia touara. Oa iava vo karepa reipaaveira voea raguipaaro. Osa raga ita eisi uvuipaai oirara oisi eisi piepaive vo vokio. <sup>8</sup> \* Ari ita, uva viapau irai oiratoa vai uvuiparoi ra arevuotoapa reiparo, oiso ra oisi rera reoroarovi toupareve. Viapau rutu. Uvare vokiara rutu-ia arevuoto toreparoveira vuri reoro rutu purapasa. Ro ira-ia vuri raviraviro toupaveira kavokavo oirara kopii piepasa. <sup>9</sup> Ro-ia arevuoto ira iava Turaro-ia vuurapa vaisi purapapeira ora Pauto vigei Aitearo. Ira raga ita ro arevuoto ira iava oearovivu vivivira takaupapeira oirara voeao oea purareva Pauto oisi raga ita oiso osa rera. <sup>10</sup> Vao Pauto vaisiaro kae piepa reo ora vao takau reo oreorea rutu kataiva raga iava gisipo kosipa piroveira. Araoko irara oaa. Teapi vigei tapo oisi eisi opitupituroi purapape oiso. <sup>11</sup> Viapau uvuipai ra oai tuputupue riku vai vearoa vai uukoa vai kareke piepaive ora avakava tapo ita. <sup>12</sup> \* Araoko irara oaa. E pasi fik ova uvuipai ra oliv kue vai kareke pievee, raa? Ora pasi wain ova vai uvuipai ra fik kue vai kareke pieve? Eisi raga ita osa avakava viapau uvuipaai ra vearoa vai uukoa vai kareke piepaive.

### *Vao Vearo Tarai Oa Pautoa Iava Uriopapeira*

<sup>13</sup> \* Easi pasi irai visi iava ira-ia vearo rugorugoo vai ei ora taraia vai, raa? Vosa irai oisito oiso, oire ra ora rera vo touaro oirao pievira rutu kareke piepareve rera vaaro-ia vearo kovo. Oire ra oisi iava va-ia vearo rugorugoo oaro oearovupa oirara kareke piepareve. <sup>14</sup> Easi visii vai pasi oearovivure vuri vovoupataveira oiso vo vovouro-ia, ora visii raga vaisiaro kae piepa vovou, ora oearovivu tovipa vovou, ari iirukopa vovoua vao-ia. Oire vosa oiso vo vovouro purapata, ra opeita ora visii vo tarairoaro-ia rorupaaro oiraopa reoro rutu reoroaropata kuuvu reoro raga purapaaro vara-ia. <sup>15</sup> \* Otaraia eva viapau oiso vuvuiua iava varaepa. Viapau. Ari rasito raga iava va-a, varaua raga vo ruipaaro. Oa iava Seten-a vara rutu aitearo. <sup>16</sup> Oire vosa oearoi oearoire oirara vai vuri vovoupaave, ora vosa ora voea raga oiso vo pitupituroaro purapaive vare vao ora voea raga-ia vaisiaro kae piepasa, osa vearo eisi viapau oiso vearovira paupaaveira. Vo uvare ovovourovu rutu vuriara purapaiveira. <sup>17</sup> \* Ari oirara uvuipaai ra otarairovu raga oupaive varao oara vova uriopapeira Pauto. Varao oara iava uvuipaai ra oiso vo vovouro purapaive, rovopa vao-ia vo rara roroio vovou rutu sirova utupaave. Ari eraopa vao-ia vo rara oearovivu tapo gavaurevira toupave vo rara voeavi kavepaive rutu. Ora vo rara oearovu vo reoroaro tapo uvupaive vara arovipaaro. Ora vo rara oearovu kavikopaive vearo kovo purapaaro. Oire uva oisi-a eisi osa iava uvuipaai ra vearo kovo raga vaeavira rutu katai rugoo-ia purapaive oirara rutu-ia. Osa iava viapau uvuipaai ra oiso toupave, Kuuvu oirao pie vovou irara. <sup>18</sup> Ari ita, vosa kave vovou raga-ia toupape, oa-a eva uvuipai oiso toupai, Aio kokookoro pauparivoi. Oire ra va-ia vao kave vovou forevoko vovou rutu karekepe oiso, Vearoa rutu kua.

\* 3:8: Sam 140:1-3; Mt 15:10-20 \* 3:12: Mt 7:16 \* 3:13: Ga 6:4; Je 2:18 \* 3:15: Je 1:17; 1 Ti 4:1 \* 3:17: 1 Ko 2:6; Ro 12:9; 1 Pi 1:22

## 4

*Ro Oirato Ira Rasito Vo Vovouaropa Ruipaparo Ira Ita-a Eera Ira Pautoa-va Ora Keriparoveira*

1 ✧ Eake rutu-a oreorovu ora kaureopa reoro vituaro, ora oreorovu kasipuara varao oara visii vuutaaro-ia toupaveira, raa? Vo uvare riiriipa vovouro visii-ia toupaveira. Oa iava visii iava sopaura-ia ora upopapeira, oiso ra ovovourovu varaua raga vo ruipaaro sirova utupape. 2 Orekerovu rutupa ruipapataveira, ra viapau oiso vara oupata. Uva va-a eva oa iava oira upo vovoupataveira. Visii vao-ia riro orekerovu riirii irara, oa iava viapau oiso vara oupataveira. Osa iava kasipu iraopaoro upoara kosi piepataveira. Vao iava uvare viapau oiso Pautoa iare variripataveira vo orekerovu oupasa. Uva va-a eva oa iava viapau oarai oupataveira. 3 Variripataveira orekerovu oupasa. Uva viapau oiso vara oupataveira. Eake iava? Uvare viapau torevoko rugooro-a visii varaaro oara iava Pautoa iare variripataveira. Ora vo osa ora visii vo ruiparoaro raga-ia rugorugopaoro orekerovure arepataveira variripaoro Pautoa iare. 4 ✧ Visii vao visiigoa oiso rutu toupataveira osa voeao oea ora oua vuri piepaveira. Vosa ro ira vo rasio vo vovouaropa ruipaparo, eera-a ira Pautoa-va ora keriparoveira. Easi pasi viapau vao-ia taraipataveira, raa? Oire vosa irouto vo rasiova ora vate vovoupari, eera-a ira karekerovere, Pautoa-va keripato. 5 ✧ Tugoropa Vuku oiso purapapeira, 'Ro-ia Uraurato Pauto ira tovoreva vigei sopaaro-ia ira vigei kasivarivira rutu tokipareveira vaopa oiso, teapi Pautoa-re ovauvio.' Esa pasi vo reo vaiore oiso rugoopatai, Akuku reo raga-a, raa?

6 ✧ Ari Pauto riroa rutu siraoa vate iraopareveira vigeipa. Oa iava Tugoropa Vuku oiso purapaveira, 'Pauto voea riro kaureo irara uvu ragapareveira, voeao ragapa rirovira rutu sirao iraopaoro oea ora voea iava vaisiario oave gare piepaveira.'

7 ✧ Avoeao! Ora visii iava vasepata Pautoa-pa vo osa ora visii iava sopaura vatepata rerapa. Ra Seten-pa tapo ora vairu iraopata, ra oisi iava visii arova toripareve. 8 Oa iava Pautoa iare tutuu piepata rutu. Osa iava uvuiparoi ra visii iare tutuu piepareve. Visii vuri vovou irara visiigoa iava sopaura oavisii sisigaruepe oiso rutu osa ro ira ora rera iava vavaea sisureve. Oire ra va iava rera iava sisigaruepa vo vavae. Visii vao visiigoa-ia vo rugorugooeiva toupataveira. Visiigoa ora visii iava vo rugorugoo eva vuria ora visii sopaaro iava vera iraota. 9 Visiigoa ora visiipa sirao iraota ora tapo gau iraota rirovira rutu. Agei vovou tavariooro vorevira gau iraota. Ora uvui iraopatai ra rorupa vovouro oavisii tavariota, ra sirao vovou raga-ia toupata. 10 Ora visii raga oisivi ora gare piepata vo Turaro osireiario-ia. Vosa oisi piepata oiso, oa iava Turaro uvuiparoi visii vaisiario kae piereverea.

*Vigei Viapau Uvuipaviei Ra Araokotoa Oavi Togapape Reoara-ia*

11 ✧ Araoko irara oaa, viapau uvuipatai ra ora visii araoko iraraaro takaupata. Ro ira iravu araokoto takaupareve eke rera araokotoaro togapareve oreorovu-ia, ira-a eera Pauto vaaro reo goru takauparevoi ita vo osa va tekiparevoi reoara-ia. Oire vosa reo goru togapari, uva viapau oiso vii-a reo goru sirova utupato. Viapau. Ari vii oiso toupai, Reo goru rovirieipato. 12 ✧ Kataitoo raga Pauto toupate ira reo goru kareke

✧ 4:1: Ro 7:15-25 ✧ 4:4: 1 Jo 2:15-17 ✧ 4:5: Jen 6:5; Nam 11:29 ✧ 4:6: Sam 138:6 ✧ 4:7: Mt 4:1-11 ✧ 4:11: Mt 7:1-5; 1 Pi 2:1 ✧ 4:12: Mt 10:28; Ro 14:4



piepareveira. Uva rera raga reo rovirieipavira toupaveira. Uvare rera raga Kataito ira uvuiparoi oirara rutu vorevira vorepareve, ora voea tapo oirara opesi piepareve. Uva oisi-a oiso osa iava, irouto-a vii viigoa iravivu togapari oreovu-ia ro ira vii ruvara-iavi tutuu pievira toupaveira, raa?

### *Viapau Uvuipaviei Ra Pautoa-re Kaureopavio*

13-14 ✧ ✧ Visii oearovu visiigoa oiso purapataveira, “Vo vokio eke vokipavira uva avaviovere riro urui iare sara kovoro vai purasa katai iva rutu uvuiaro-ia. Oa iava uvuipaviei riroara vai moniara vai oupe.” Uva oiso visii tavipaavoi, Viapau oiso taraipataveira oiso, Eake karekepere evoa vokipavira. Visii iava tootoora apeisi ragavira toupaveira? Visii eva visiigoa oiso rutu toupataveira osa kupareto. Ro ira karekeparoveira, oire voava gare visivi toureve, ra va iava opesi ovoiro. <sup>15</sup> Ari torevokopai vosa oiso purata, “Vosa Turaro oisi ruiparo, osa iava uvuipaviei ra tootoovira toupape, ora vo kovo purapape, eke viapau okovovu raga.” <sup>16</sup> Ari ita, visii raga riro gisipo iraopataveira rutu ora visii raga iava vaisiara oavisii kae piepaoro. Ovovouroa rutu-a varao-ia kaureo vovouro vuriara. <sup>17</sup> ✧ Vearovira rutu rugoo iraopata. Ro ira vearo vovou purasa taraiparo ra viapau vo vovou purareve, ira ita-a eera ira vuri vovou puraveoi.

## 5

### *Ro Ira Riroara Rutu-ia Orekerovu Pitupare*

1 ✧ Ragai-a vao vaviopavira visii rutu tavipaavoi oiso-ia, Visii riroara rutuva orekerovu rutu toupataveira. Visiigoa vo tavakaore rugorugoo iraopata oa karekesa auepai visii-ia. Oa iava uvui iraopatai ra gau iraopata oivepaoro rutu. <sup>2</sup> Kotokotoara ora oritoara varao visii varaaro oara rutu eruera, ora varoara tapo varao visii varaaro atarike kare oara rutu aio ovoivora. <sup>3</sup> ✧ Varao golara ora silvaara visii varaaro oara rutu vuri ovoiera. Ovuria eva oa visiipa vuri vovou puravere, ra oisi iava viaevira visii vo vuri vovouroaro karekepere. Uva visii vo ruiparoaro auepa moni oara raga visii kasipaivere oiso rutu osa eto kasi. Visii vao visiigoa riroara rutu orekerovu oisoa gurupata kotokotoara ora moni vo vuuta-o-ia ovoiopa voki iarepa. <sup>4</sup> Vearovira rutu uvu iraota voeao iava kovopa irara oea aio kovo aioaro eriva varuparo vo visii vo kovoaro-ia. Oire uva voeavi keatava vorevira voea vo voriaro-ia pituoro ita. Vo vorio oa ora visii iare vorevira rukurutava. Oa-a vao oare voeavi oisoa rirovira rutu visii are ragapaive. Uva vo area vao voea vaaro oa Pauto kokiaro-ia pou piropa ro ira oirara rutupa ora purapurapa irara ensel turaroparoveira. <sup>5</sup> ✧ Vokiara rutu-ia vo rasio-ia toupataveira veaopara rutu oupaoro. Oa iava vara-ia roroparo toupataveira. Ari ita, rirovira rutu aio iraopataveira, oa iava taoropataveira. Oire uva visii uposapa vokia-a eva oa pou piroi oa-ia visii koriivere oiso osa okarerovu koripaive. <sup>6</sup> Visiigoa torevokotoa eva gasitava rera uposa. Oa iava visii eaka ragareva. Viapau oiso visii tapo vorevira ora uporoepa.

### *Uvuipaviei Ra Sopaura Oavi Goru Piepaoro Siraoa Karekepape Rerare Turaro Tuepaoro*

7 ✧ Uva oisi-a oiso-ia araoko irara oaa visii vao oirao pie vovou irara osa ora visii iava sopaura oavisii goru piepaoro sirao vovouro rutu kaepata rerare Turaro tuepaoro, ovusa vorevira urioro. Ari ita, tarai iraopataveira

✧ 4:13-14: Pro 27:1 ✧ 4:13-14: Lu 12:16-21; Jop 7:7; Sam 102:3 ✧ 4:17: Lu 12:47; Jo 9:41

✧ 5:1: Lu 16:19-31 ✧ 5:3: 1 Ti 6:6-11 ✧ 5:5: Amo 6:1; Jer 12:3, 25:34 ✧ 5:7: 1 Ko 7:29-31;

Diu 11:14

ro-ia ira vaaro-a kovoa, ira veaoparare aioara tueparoveira, auere ra aio purape. Uva ora rera iava oisoa sopaua goru piepareve auere tapo kokeva ora ravireo tuepaoro, oisore ra varei rutu uvuivira kovovora, va iava taru aio ouro. <sup>8</sup> Oire uva visii tapo uvuipatai ra oisi ora visii iava sopaura oavisii goru piepata tavaka oupaoro. Uvare vao Turaro vo vuutaaro futuuvui rutu oa-ia vorerovere. Uva va-a eva oa iava sopaura oavisii uvuipai ra tuvuuvira rutu toupaive raripaoro.

<sup>9</sup> ✧ Araoko irara oaa. Opeita oearovure araoko irara oavisii kasipupata, ora voeare tapo isivavira reopata. Teapi rovirieipato visiire va voriaro vorekuoverevea vurivira ita. Uvu iraopatavoi. Rovirieipato rataoa riaaroria toreparoveira Pauto Ovoioipa Vokire tuevira toupaooro. <sup>10</sup> ✧ Araoko irara oaa, uvuipatai ra voeare profet irara rugoo iraopata oea tuariri Turaro vaisiario iava tavitavi rovoaepa. Keripa irara oevia-ia vuria puraiva. Ari ita, uva oisoa ora voea iava sopaura rutu goru pie iraopaive vo tavaka eva vo siraoaro kaepaoro. Uva visii uvuipatai ita ra voea vo pitupituroaro sirova ovoovovira oisi rutu utu iraopata. <sup>11</sup> ✧ Uvuta! Vigei oiso purapavioveira, Ora voea iava vovouisiro oaive rutu goru pieiva tavaka vo siraoaro kaesa. Oa-ia uvuipaa ra rorupaive. Ari ita, Jop vo siposipoaro uvutava oa toupaiveira Tugoropa Vuku-ia. Vo uvare ora rera iava sopaua rutu goru piereva otavakarovu rutu vo siraoaro kaesa. Uva va-a eva isivaoro iava Turaro vearo vovou rutu karekereva rera-ia. Oa-ia tapo vao-ia taraipavioveira. Iu, osa taraipaviei ita, Turaro vigeipa rirovira rutu siraoparoveira vo rara vokiara rutu-ia vigei karekopareve.

### *Viapau Uvuipaviei Ra Oiraopa Reo Rutu Purapape Viara Iare*

<sup>12</sup> ✧ Ari ita, araoko irara oaa, rovopa rutu-a vao-ia oa-ia uvuipatai ra va purapata. Oa oiso toupai, Opeita vuvuiua vaisipata, eke eake rasito, eke orekerovu vo osa oiraopa reo ovoi rutu purapata viara iare. Ari vosa oiso purapata, “Iu” vo oreovu-ia vearo reo, oire oiso purata “Iu” raga. Eisi osa uvuiei. Ari vosa oiso purata, “Viapau,” oire “Viapau ita” osa ovoiei eisi. Teapi oisi iava eisi Pauto visiipa vuria vo voriaro vore piererevea.

### *Ro Torevokoto Vo Variriaro Oa-ia Gorua Toupai*

<sup>13</sup> ✧ E irai vai visii iava araokoto oavisii tavaka vo siraoaro vai kaeparevoi, eke? Oire uva uvui iraoparoi ra Pautoa iare variriro. Easi pasi irai vai araokoto oavisii iava sopaua vai rorupaivoi. Oire uva uvuiparoi ra erava vai-ia eraro Pauto vaisiario kae pieoro. <sup>14</sup> ✧ Irai pasi visii iava araokoto oavisii ira upiaparoi vai pasi, raa? Uva uvuiparoi ra lotupa irarapa reipa irarare tuvutuvepa irara keearo. Ra va iava rera iava varaua-ia korovo ovi tovoive Turaro vaisiario-ia variria puraoro. <sup>15</sup> Vosa Pauto oirao pie rovopaoro rerare variriave, oire ra Pauto rera upiapato vorevira porete piereve. Oa iava vorevira ora veaoro ita. Ora vosa vuri vovuara vai pura rovorevora, oara-ia uvuiparoi Turaro ra vara rutu veraveve. <sup>16</sup> ✧ Uva oisi-a eisi osa iava uvuipatai ra ora visii iava vuriara oavisii kosi pie iraopata oearovupa araoko irara oavisii. Oa iava uvuipatai ra Pautoa iare variri iraopata, ra voea araoko irara oavisii tavapareve. Oa iava Pauto uvuiparoi ra visii vorevira porete piepareve. Vo variriro torevokoto oirato vaaro oa-ia gorua toupaiveira. Oa uvui iraopai ra oiratoapa tauva ouve Pauto ruvara-ia. <sup>17</sup> Ilaija oiso raga-a rera osa vigei. Ira Pautoa iare goruvira rutu variriroepa auere kokeva, oiso ra viapau koveo. Oa iava kokeva viapau koveopa vo rasitoa-ia vo peva rutu uvuiaro-ia aue iva peva ora katai vatara

✧ 5:9: Je 4:11-12 ✧ 5:10: Mt 5:12 ✧ 5:11: Jop 1:21-22, 42:10; Nam 14:18 ✧ 5:12: Mt 5:34-37  
✧ 5:13: Sam 50:15 ✧ 5:14: Mk 6:13 ✧ 5:16: Mt 3:6; 1 Pi 2:24; Jo 9:31

aue kekira. <sup>18</sup> ✧ Uva vorevira variriroiva, vuvuiua kokeva ita vara pieeva. Oa iava aioara vorevira poretepa vo rasitua-ia.

*Ro Ira Raiva Kavureve Ira Uvuipai Ra Rera Vorevira Vorepe*

<sup>19</sup> ✧ Araoko irara oaa, vosa irai visii iava Oiraopa Reo rutu vo pitupituario kavureve, oa iava irai vorevira rera vorereve. <sup>20</sup> ✧ Oire ra rera-ia eera oiso ragavira taraipatai, Vosa vuri vovoutoa vai tauvarevora, vuri raiva kavuoro vorevira vorero Pautoa iare, oire ra oisi iavirava rera-a eera rera iava sopaua oureve, osa iava viapau uvuipai ra opesi ovoipe opesipa tapi. Uva vo pitupitu-a eva oa iavirava Pauto uvuiparoi ra rera iava riroara rutu vuriara verapareve.

Evavi raga osa vo pasio purapaavo.

Ragai-a vao, Jems.

## 1 PITA

### Irapa Reoro Vo Vukuo Iava

Pita vo pasio rigatoreva 62 o 64 yia Jisas vo kavauaro isivaaro iava. Uva voeapa rigatoreva oea voraro oisoa toupave Rom gavman vo tokiaro sovara-ia. Oire oa iava Pita vo vaisio-ia Rom urui vaisireva ovoovovira oiso, Babilon urui.

Uva reoreoroepa Pita vo pasio-ia vao iava uvare oisoa voea upopaive voea vuri piepaoro vo teki-ia. Uva oiso puraroepa, Vearopai vosa visii vuri piepaive visii-ia vuri vavataaro tovopaoro. Vearopai ra vara kaepata.

Oreorovu tapo purareva riro goru reoro oreoroa toupai Papara 3. Uva tarai irara viapau taraipaai evo reoro vituaro-ia (1 Pi 3:18-21).

Pita vo touoro Rom-ia vao rigatoreva vo osa oisoa Rom reraaro rovopato Niro voea vuri piepareve. Uva tutuupaiva oiso ra Pita kopiuro. Oa iava vao rigatoreva vo osa Niro rera uposa aueparoepa.

1. Aviavi pie reoro vo pasio iava, 1:1-2.

2. Oirao pie vovou irara uvui iraopaai ra airerei vovouvira toupave vearopa viraakoro oupaoro Pauto ruvara-ia, 1:3-2:10.

3. Oirao pie vovouto vo pitupituroaro oara-ia uvui iraopa ra Pauto roru piepareve, 2:11-4:11.

4. Pauto rera orirureve ro ira tuuvu vovouvira toupave vuri pitupituro purapa arapa, 4:12-5:11.

5. Ovoviopa reoro varao, 5:12-14.

1\* Ragai-a vao Pita Jisas Kraiis reraaro aposelto. Ragoa vo pasio rigatoavoi visii rutupa visiiigoa roporeva Pauto ora rera iare. Visiiigoa voraro rutu sikasikavira toupataveira vo distrikro-ia voraro oiso-ia, Pontas-ia vo, ora Galesia-ia vo, ari Kapadosia-ia, ora Esia-ia, ora Bitinia-ia. Uvaroare gaurutaepa visii voaoro rutu kavuoro. 2\* Pauto Aite visiiigoa roporeva ora rera vo vovouaro sirova utuoro, oiso ra oisi eisi touta oiso, Rera voeoro rera ro iavirava Tugoropato Uraurato. Osa iava uvuipatai ra Jisas Kraiis vo reoro uvupaoro va purapata. Eisi osa iava Jisas Kraiis iava revasiva uvuipaori ra visii iava sopaura sisigarue pieeve rutu. Uva ragai-a vao variriparai Pautoa iare, oisore ra visii rirovira rutu vatereve vereopa vovou ora gavaure vovou visii taupapaoro.

#### *Veoro Rutu Tootooa Oa Vigeire Tuepapeira Vuvuiua-ia*

3\* Vigei rutu vuurapa vaisi purape Pautoa-ia ro vigei reraaro Turaro Jisas Kraiis Aitearo. Osa iava rirovira rutu vigeipa siraooro Airepa Tootoo vatereva. Ootootoa eva vituaro vo goruo oa-ia Jisas Kraiis vorevira tore piereva kopii tapi iava. Osa iava ita eisi uvuipaviei ra vigei tapo oisi tootoopaoro rutu tuevira raripavio vore utupaua. 4\* Vo uva vearopara ouperea taru Pauto ruvara-ia varao viraakoara oara orirupareveira Pauto voeapa oea rera vo reoro-ia pitupaive. Oara-a evara vuvuiua sovara-ia viapau uvuipai ra erupape, ora vuripape, ora voa opesipape. 5 Uva toupaveira visii pa ovusa Pauto visii va vurapaoro visii virivaripareveira, vo osa rera vo goruaro-ia raripataveira. Osa iava utupaua Ovoiopa Vuuta-ia viaevira rutu visii ourevere ora rera iare.

6\* Oare eva rugoo iraopaoro roru iraopata. Uvare taraipatai vai pasi oiso, Rovovira vai pasi oiso oaravu tavakaara ou rovota. Osa-a eisi

osa siraoa vo vavataaro kae rovtovavea. <sup>7</sup> Ari ita, otavakaroa evara oiso toupaveira, Visii varaaro rari vovouro akeakepara vaore, oiso ra oiraopavira rutu karekepape. Uva gol-ia taraipataveira oa opesipapeira. Uva vosa va kasipaive tuitui kasi-ia, ra oisi iava rogetara uvuipai ra va iava opesipape vao gol. Ra gol viratoaro raga roroioaro toupave. Osa-a eisi osa ragavira visii varaaro oirao pie vovouro goruvira toupaveira. Vo uvare evo tavakaro visii vo vovouroaro oirao pie vovouro goru pie rovoverea. Ovovouroa evara oirao pie vovouro vo voriaro gol vo voriaro-ia pute iraopaiveira rutu. Uvare vo vokia eva Jisas Kraiss ora karekeroverea visii vaisiaro kae piesa visii vo vovouroaro oirao pie vovouro kekeoro. Ora visii vatereverea keraria ora rei vaisi. <sup>8</sup> ✧ Oiraopavira, uvare rerapa siraopataveira ro ira viapau oiso kekepata. Uva viapau rera kekepaoro rera oirao piepatavoi vo vokia. Osa iava uvuipatai ra roru iraopata va-ia vao riroa rutu rorua. Uva viapau uvuipatai ra ora visii sopaaro iava va kosi piepaoro va iava roroiovira tavitavipata, uvare riroa rutu-a. <sup>9</sup> Ororu vituaro oiso toupaveira, uvare Pauto visii iava sopaura virivaripaveira rutu, vo rara visii varaaro oirao pie vovouro Jisas Kraiss-ia eiveipare.

<sup>10</sup> Oiraopavira rutu, uvare va-a eva oa vituarore oisoa kasivarivira taraapaive profet irara. Oa-a eva isivaaro iava va iava reo ravaa puraiva oiso puraoro, “Vo vatevateo Pauto oa visiipa vatereverea.” <sup>11</sup> ✧ Osa eisi taraapaoro rirovira rutu oisoa akeakepaive oiso purapaoro, “Aa vo vuuta rutu-a vao oa-ia uvuipai ra karekepe?” Ora, “Uva apeisi ragavira va purareverea Pauto?” Uva oisi-a eisi osa rirovira rutu oisoa piepaive. Uva vo vuutaore utupa rugorugooapa, ovusa Kraiss reraaro Uraurato voea sopaaro-ia toupaveira. Uva va iava voea tavitavireva oiso, “Ovuuta-a eva utupa oa-ia Kraiss riro tavakaro oureverea. Oire ra va isivaaro iava Pauto rera vatereve keraria vorevira rera kae pieoro.” <sup>12</sup> Uva Pauto profet irara tavioro oiso puraroepa, “Viapau oiso ora visii tauvasa vao-ia reo ravaa ora vatepatai. Viapau. Ari voeaopa va-a utupaua.” Uva ita visii raga-a ita voea evoea. Uva oiraopavira rutu ita oiso profet irara vo reoroaro uvupataveira voeao ruvara-ia oea Vearo Siposipo iava tavitavipaoro vara iava siposipopaiveira, vo rara vo reoro evara kosi piepaive Tugoropato Uraurato vo goruaro iavirava, ro ira Pauto siporeva vuvuiua iava. Ari ita, vo taraio-ia oa oupataveira oiraopa reo rutu vaoro otaraiapa purapurapa irara voeao ensel rirovira rutu ruipa ragaapaiveira.

### *Pauto Vigeire Keeraproveira Oisore Ra Ora Airereipavio Vuria Pura Arapa*

<sup>13</sup> ✧ Osa-a eisi osa uvui iraopatai ra ora visii vo rugorugooaro ravaapaoro tuevira toupata. Viapau uvuipatai ra vovouisiro oavisii iava uusipata. Viapau. Ari kaiporivira rutu varare evara rugorugoo iraopata Pauto oara visiipa vatereverea vo osa Jisas Kraiss ora karekero. <sup>14</sup> ✧ Goruvira rutu Pauto vo reoroaro sirova utupata. Opeita ora visii iava vasepata opitupiturovupa, oisore ra visii ivupaive. Vo pitupituro oara oisoa pura rovopata voari tuariri vo osa rupa vovou-ia oisoa toupata. <sup>15</sup> Viapau. Ari Pauto vo vovouro vao tugoropa vioe iraopata oa sisigaruevira toupaveira. Oa iava uvui iraopatai ra oisi airereivira rutu toupata. Opeita okovorovu vuriara purapata. <sup>16</sup> ✧ Ari ita, Tugoropa Vuku oiso purapaveira, ‘Ora airerei iraopata vo rara viapau vuriara vai purapata, uvare ragai-a sisigaruetoa rutu.’

### *Riroa Voria Oa Vatereva Pauto Vigei Vorevira Ousa Ora Rera Iare*

✧ **1:8:** Jo 20:24-31; 1 Jo 4:20 ✧ **1:11:** Ais 53:1-12 ✧ **1:13:** Ef 6:14; 1 Te 5:6 ✧ **1:14:** Ro 12:1-2  
 ✧ **1:16:** Lev 11:44

17 ✧ Vo osa Pautoa iare variripaoro oiso rera vaisipata, Igei Aitearo. Osa eisi piepaoro uvuipatai ra visii vo touaro-ia vo rasio-ia vao tavete tou rerapa avivikevira rutu toupata. Eake iava? Uvare rera raga ira vaeavira rutu oirara rovirieireverea voea vo pitupituroaro sirova katakataivira. 18 Ari ita, vo vorii-ia eva taraipataveira oa iavirava visii oureva Pauto ora rera iare. Uva visiiipa vo vorii vatereva, oisore ra va iavirava tuariripa pitupituro oavisii akukupapara kavuta varao oara oisoa oupata visii aao iraraaro ruvara-ia. Ovorii-a eva oa viapau uvuipai ra opesipe oiso osa vareo golarei oarea opesiperea ora silva. 19 ✧ Viapau. Uvare vao vituaro iava reipai rutu vo vorii eva oa purareva vigei ousa. Oiso osa vao-ia osa ragavira Krai viapau vurivira toureva. Ira sisigaruevira rutu touoro ora rera-ia tauoa purareva oiso rutu osa sipsip kakaero oisoa piepaive Jiu-pa irara voari tuariri. Oa-ia visii rutupa ovoova purareva, oisore ra va iavirava vuri pitupituro tuariripara kavuta. 20 ✧ Pauto rera roporeva ovusa vo rasio kareke asavira touva voari tuariri rutu. Uva va-a eva isivaaro iava Pauto rera karekereva vao iava ovoioapa vuuta vaore, oiso ra visii tavareve. 21 Ra Krai vo kovoaro-ia taraipaoro Pauto oirao piepata ro ira rera vorevira tore piereva kopii iava rera vateoro keraria. Oa-a eva oa iava uvuipatai ra goruvira rutu oirao pie vovou purapata rera raga-ia rari irapaoro ro-ia Pauto.

### *Uvui Iraopavio Ra Araoko Irapa Siraopavio*

22 ✧ Oisi-a eisi osa oiraopa reo rutu sirova utupataiva, visii iava sopaura sisigaruevira toupaveira. Oa iava uvuipatai ra oiraopavira rutu sirao irapata oearovivupa ora visii iava voea oirao pie vovou irara. Uva oisi piepatavira, uvui irapatai ra vearovira rutu sopaura oavisii rutu iava oearovivu taupapata voeo ora visii iava voea. 23 Uvare Airepa Tootoo outavorao vao oa pauakavira toupaveira. Ootootoa vituaro-a Pauto vo reoro ro Aite ira tootovira toupaveira. Ira viapau opesia vaiaro. Oa iava uvuipatai ra oiso rutu toupata, Visii-a ita Pauto ovii iraraaro rutu, visiigoa viapau opesia vai. 24 ✧ Tugoropa Vuku iava vo siposipo oiso purapapeira,

‘Ari ita, voeo raga oirara oea oiso rutu toupaveira osa isiso kou. Ora varao oritoara oarapa ruipapaaveira oara oiso rutu toupaveira osa isiso kouro kokookoaro. Ari ita, isiso kouro vokiara rutu-ia kopiipapeira. Ra vo kouro kokookoaro tapo erakopaoro opesipape kopii ovoipaoro.

25 ✧ Ari Turaro vo reoro-ia viapau opesia vai.’

Evo reo raga ita oa visii-ia karekeepa vo uva oisoa Vearo Siposipo uvupata oearovu ruvara-ia.

## 2

### *Jisas Oiso Toupate Osa Aveke O Iria-ia Tootooa Toupai*

1 Oire uva uvui irapatai ra vuri vovouro oavisii kavuta. Opeita kuuvu reoro raga purapata ora opitupiturovu kuuvuara. Opeita oearovu varaaro riiriipata orekerovu. Opeita oearovivu takaupata vuri reoro-ia. 2 ✧ Uvui irapatai ra vaopa vearo aio ogoepata Pauto vo reoro, ra va iava vearoa taraia outa Pauto ruvara-ia. Oa iava uvuipai ra visii varaaro oirao pie vovouro oavisii goruvira torepe tauva oupaoro vo Pauto ruvara-ia. Oiso rutu osa kakae vure vokiara rutu-ia roroa ruipapaaveira aako riakoro-ia

goruvira riropaoro. <sup>3</sup> \* Aue iava uvare Tugoropa Vuku-ia oiso purapapeira, 'Vereopa vovou oisoa sovopata vao Turaro oa purapareva visii-ia.'

<sup>4</sup> \* Turaro iare uriopata ro-ia kataitooa raga. Ira oiso rutu toupaveira osa aveke o iria-ia tootooa toupaveira. Ari ita, oearovu iria o aveke verioro oiso vovouaepa ra oira viki ragaive oiso rutu osa aveke turi raga. Vo osa Pauto oira eira roporeva, oiso ra rera vo kovoaro pureave. <sup>5</sup> Osa ita eisi osa visii toupataveira oiso osa avekeara oara-ia tootooa toupaveira. Ari ita, Pauto uvuiparoi ra visii-ia tugoropa kepa paureve vo rara ora visii iava vasepata rerapa. Vo osa vo kepa opesirevora, uvuipatai ra voa pris kovoro purapata tauro purapaoro vo kepa sovara-ia. Varao oara-ia uvuipatai ra Pauto roru piepata vo rara vara purapata Jisas Krai vo tauvaoro-ia.

<sup>6</sup> \* Uvare Tugoropa Vuku-ia oiso purapapeira Krai iava, 'O ropoava aveke iria-ia riroa voria toupaveira. Uva oira tovoava. Oa iava oiso toupaveira osa kuuuvu tuuta vo Kepao vaaro oa pauava Saion taere-ia vo Jerusalem urui vaore oiso, Irouto ro ira Krai oirao pierve ro rera raga ita aveke, ira viapau uvuiparoi ra ariia vai oureve vo rara oisi pierve eisi.'

<sup>7</sup> Uva rera iavirava riro tauva rutu visii toupaveira visii oira oira piepata rutu. Ari vosa aa voeao oea viapau rera oirao piepaive, Tugoropa Vuku-ia oiso purapapeira oere evoea, 'Oire aveke kepa paupa irara iria oisoa veripaive. Uva oira raga ita eira iria vo utupau oiso rutu karekeoverea, rovopa tuuta rutu kuuuvu tuuta va iava Kapa.'

<sup>8</sup> \* Ora oreoreovu ita Tugoropa Vuku iava oiso purapapeira, 'Triavu aveke iria iava tuipaoro oirara posipaiveira kovepasa.' Voeao oea Pauto vo rearova kaureopaave osa toupai vo reo ovoovovira. Eira aveke iria ovoovovira toupaveira oiso osa Pauto vo rearo. Uvare oirara vo reo iava posipaiveira kovepaoro vo rara vava reasipaave. Uvare Pauto vare oiraopavira oisi puraroepa.

### *Vigei Oiso Toupapeira Pauto Voeaaro Oirara*

<sup>9</sup> \* Ari Pauto visii reesireva oa iava oiso toupataveira, Visii-a rera voearo. Visii oiso toupataveira, Pris irara rera voearo ro King visii oiso sisigaruevira rutu toupataveira. Oa-a eva vituaro iava oiso toupataveira, Visii Pauto voearo torevokoaro rutu. Oa iava uvuipatai ra ovovourovu rutu iava siposipopata varao vearopara rutu oara oisoa purapareve visii pa. Osa raga ita oiso osa visii keararoepa ora rera iare. Oa iava rupa vovou kavutava, ovusa visii oureva vore avia-ia rera vaaro vearo avia-ia rutu. <sup>10</sup> \* Ari ita, tuariri oiso oiso rutu toupata, Oira turiro raga. Uva vo vokio oiso toupatavoi, Pauto voearo rutu visii. Ari ita, voari tuariri viapau oiso siraoa vai oupata Pauto ruvara-ia. Ari vo vokio-ia vo sirao outavoi rera ruvara iava.

### *Vigei Uvui Iraopaviei Ra Oiso Toupape, Pautoa-pa Kovopa Irara*

<sup>11</sup> \* Vate irara oaa, visii oiso rutu toupataveira vo rasio-ia osa sopaipa irara oea tavetevira toupaveira. Eva vituaro iava visii tavipaavoi oiso ra visii vo vovouroaro poretava vo vovouro iava vo rasio varaaro, oara visii iava sopaura vuri piepaiveira. Evo vovouro vuriara oara vearo vovourova ora upopapeira vo visii iava sopaura-ia. <sup>12</sup> Torevoko vovou raga purapata oirao pie vovou asa irara vuutaaro-ia toupao. Eagara vosa vuvivira visii vaisipaive kuuuvivira, vo osa voeava torevoko vovou raga purapata. Osa iava eisi uvuipai ra visii siituepaoro oisi iava taraia oupaive. Oa vai

iava uvuipaaí vai ra utupauavi Pauto vaisiario kae pieve vo vokiri-ia oa-ia vovevira voreroverea Turaro.

<sup>13</sup> ✧ Gavman irara vo reoroaro rutu sirova utu iraopata reo goru, vo uvare Turaro Pauto vo ruipaaro-a visiipa. Ora Praim Minista vo reoroaro tapo uvupata vara purapasa. <sup>14</sup> Ora turaro irara tapo vo reoroaro uvu iraopata. Voeao oearopa vo kovo vaterevora rovopato Gavman, oiso ra vuri irara vo voriaro vateive. Ora vearo irara vaisiario kae pieve. <sup>15</sup> Uva eake-a vao oare uvui iraopataí ra voea vo reoroaro reipa irara sirova utu iraopata? Aue iava uvare Pauto vo ruipaaro visiipa oisi oiso toupaveira vaore, oiso ra va-ia torevoko vovou rutu purapata. Osa iava eisi roruko irara viapau uvuipaaí ra visii togapaive oreoro-ia, evoearo oearoa oearovivu takaupaveira vuri reoro-ia. <sup>16</sup> ✧ Ari ita, uvuipataí ra oiso rutu toupata osa voearo oearoa viapau tokipareve irai voea vo kovoroaro-ia voea siituepaoro vo rasio-ia. Uva oiso rutu toupata osa voea kovopa irara oea tokipareveira Pauto ora rera osireiario-ia. Uva oisi-a eisi osa iava viapau akeakevira raga vuri vovouro purapata vatauvira. <sup>17</sup> ✧ Oearovu rutu-ia vearo rugorugooro purapaoro voea vaisiario rei piepata. Ora oirao pie vovou iraravi oearoviapa tapo sirao iraopata voea visii iavapa irara. Pautoa-pa avivikepata. Ora visii reraaro reito gavman vo reoroaro uvu iraopata.

### *Uvui Iraopaviei Ra Kraís Vaaro Ovoovoa Sirova Utu Iraopavio Siitoka Oupaoro*

<sup>18</sup> Visii kovopa irara arovi iraopata voearopa oearoa visiipa reipaoro visii tokipaveira kave vovou rutu purapaoro visiipa. Voea vo reoroaro uvuta. Eagra vosa visiiire kasipuvira reopaave oearovu raga reipa irara, oearoa tapo vo reoroaro-ia uvuipataí ra vara uvu iraopata. <sup>19</sup> ✧ Osa-a eisi osa iava uvuipataí ora visii vo voriaro outaverea vo Pauto ruvara-ia, vo rara viapau vearovira visii vo kovoroaro eveipaive. Eake iava? Uvare Pauto vo vovouaro-ia tarai rovopaooro eva kasipua oupataveira voea ruvara-ia oea visii vurivira tokipaveira. Vo ovusa viapau oiso vuri pitupituro vai purapataveira. <sup>20</sup> ✧ Ari ita, vosa vuria purata, ra va-ia tavaka outa vo osa viapau kasipupata. Uva apeisi-a? E ovoriei va iavirava visiipa? Viapau rutu. Ari vosa veaoro raga purapata, ra va iavirava tavaka outa vo osa viapau kasipupata, osa iava eisi Pauto uvuiparoi ra visiipa vearo vori vatereve. <sup>21</sup> ✧ Eva-a Pauto vo ruipaaro visiipa. Aue iava uvare Kraís vo ovoovo purareva visiipa riroa rutu upia ouoro evao parikou-ia visii tauvaoro. Osa eisi vo ovoovo eva vioepata. <sup>22</sup> Oiraopavira rutu uvare eera Kraís viapau oisao vuriara vai purapareve. Ora viapau kuuvu reoro vai oisao purapareve rera oiraaro iava gisipo irai keakeapasa. <sup>23</sup> Ari vosa irai rera takaupareve, uva viapau Kraís uvuiparoi ra oisi eisi irai otakuiaro pukooro irai tovireve. Ora vosa tavaka vai oureve irai ruvara-ia, ra viapau oiso iraire oiso puraro, “Vii vuri pieavere rara.” Viapau. Ari Pautoa raga-ia oisao rariparo oiso, Ira raga rerapa va voriaro eva vuria vatereve. Uvare Pauto ora rera raga torevokovira rutu oirara rutu rovirieireverea voea vo voriroaro voeapa vateoro. <sup>24</sup> ✧ Ari ita, Kraís kopiioeapa evao parikou-ia vo uva ora rera iava varaua-ia vigei vo vuriroaro vo voriaro oureva. Uva vigeipa kopiioeapa, uvare oiso ruipaparoveira ra vuri pitupituro kavupape. Oa iava eva uvuipaviei ra tootoovira toupape torevoko vovou raga purapaoro. Oiraopavira uvare vara-a evara rera vo viuparoaro oara iavirava uvuipaviei ra poretevira rutu tootoovira toupape. <sup>25</sup> Voari

✧ 2:13: Ro 13:1-10 ✧ 2:16: Ga 5:1; 1 Ko 7:22 ✧ 2:17: Ro 12:10; Hi 13:1 ✧ 2:19: Ro 13:5

✧ 2:20: 1 Pi 3:17 ✧ 2:21: Ais 53:1-9 ✧ 2:24: Hi 1:1-4; Ro 6:2



rovovira rutu uva oisoa virivira raga toupata oiso osa sipsip ragui viri ragapaiveira. Oa isivaaro iava poretá virora visii Tokipatoaaro sirova utusa ro-ia Pauto. Ro ira uvuiparoi ra visii iava sopaura oavisii utopareve vuri vovouro asavira.

### 3

#### *Vo Toupai Ora Oupa Irarare Vo Reoreo*

<sup>1</sup> Visii oirapa riako visiigoa arovi iraopata vatua irara oavisii pa voea vo reoroaro sirova utupasa. Ari ita, vosa oearovu voea iava viapau Pauto vo rearo oirao piepaive, oea uvuipaai ra visii vo vovouroaro veoroara kekepaoro ora voea iava vovouisiro oai vea porepaoro Pauto oirao pieve, vao iava rara viapau va iava oisi eisi voea tavitavipata. <sup>2</sup> Uva ita, uvuipaai ra visii vo vovouroaro sisigarue vovouro eveive vo osa voeapa avivikepata. Oire ra va iava oiso puraave, “O ari oiraopatoa rutu-a Pauto.” <sup>3</sup> Visii riakora viapau uvuipatai ra varaura raga ratauva oritopata vo pitupituroaro sirova utupaoro oruara oritopa gol oritoro tovopaoro, ora ooritorovu rutu veoro kekeara varoara, ora aasiara oara-ia riro moni viki ragapataveira. <sup>4</sup> Viapau. Asi vearopai vosa sopaura oavisii iava oritopata vao-ia oritopa oia viapau uvuipai ra opesipe. Eva ita kave vovou vo osa ora visii vo pitupituroaro raga sirova veoro vovouro purapataveira. Ooritoa-a eva reia rutu rovopa vo Pauto osireiara-ia. <sup>5</sup> Airovu vairo airoa oisoa tuariri rutu riro goruvira rutu Pauto sirova oiso utupaave rera oirao piepaoro, evairo airoava ovoovovira vairo oiso vearovira vo oritoro purapaiveira ora vairo sopaaoro-ia vo osa vatua irara oai vea vo reoroaro uvupaoro vara purapaiveira. <sup>6</sup> Iriavu-a o-ia vairo iava Sera, iria vatua ro Ebrahim vo reoroaró oiso rera vaisieva, “Ragai reraaro reito.” Uva vo vokio-ia visii riako oiso toupatavoi, Oira ovii riakoaro visii, vo rara oira vo vovouro rutu sirova vearovira utupata, ora vosa viapau uriripata orekerovu avu vaipa.

<sup>7</sup> Visii vatua irara visiigoa oiso tavipaavo, Ora visii vatua riakoroarova tupaoro oiso rutu rugoopata vairore, Oiraopavira rutu, uvare viapau oiso goruvira rutu tupaiveira oiso osa oirara. Ra oisi eisi rugorugoo iraopaoro vearovira vairo fokipata rutu. Eake iava? Uvare Pauto vaeavira vei avukarei rutu tootoo piepareveira vao-ia rera vo vatevatearo. Ari ita, uvui iraopatai ra vokiaara rutu-ia veoro vovou rutu pura iraopata vatua riakoro oavisii-ia. Teapi vuriara vai purapata vairo-ia, ra oisi iavirava eisi Pauto viapau visii uvupareve vo osa rera iare variripata.

#### *Uvuipaviei Ra Katai Vovou Rutu-ia Toupape*

<sup>8</sup> Oire uva oaravu varao oara iava oiso visii tavipaavo, Katai vovou rutu purapata ora visii rutuva vaeavira oearovivupa siraopaoro, oiso rutu osa ora visii araoko irararo rutupa siraopataveira. Vereopa vovou rutu purapata oearovivupa ora visii iava. Ra opeita oiso vovoupata ra oearovupa reipata. <sup>9</sup> Vosa oearoi visii vuri piepaive, opeita voea vo pitupituroaro tuupata. Ora vosa oearoi visii takaupaive, ra opeita voea vo takauroaro pukopata ita voeare vorevira. Viapau. Ari uvuipatai ra vereopa vovou raga purapaoro voeapa voea vo pitupituroaro pukopata voeapa siraopaoro rutu. Eake iava? Uvare Pauto visii reesireva oearovupa vereopa vovou vatepasa voea tauvapaoro. Ra oisi iavirava uvuipatai ra vorerivira vereopa vovou oupata vo Pauto ruvara-ia.

<sup>10</sup> Aue iava uvare Tugoropa Vuku oiso purapapeira va iava vao oiso,

'Ro oirato ira oiso ruipaparo ra rera vo touaro vearovira karekepape. Ora ro ira oiso ruipaparo ra vearo vuutaro rutu-ia toupaveve. Ira uvui iraoparoi ra ora rera iava gisipo tupa rovopareve vuri reoro pura arapa. Ora ira uvui iraoparoi ra kuuvu reoro kosi pie arapa eaka rovoru.

<sup>11</sup> Ira-a eera uvui iraopa ra vuri vovouro arova ora pore rovoru torevoko vovou raga purasa. Ira uvuipa ra akeakevira kave vovoure taraapareve. Oa iava uvuiparoi ra kasivarivira vo vovou sirova gavaurevira oearovu tapo toupaveve.

<sup>12</sup> Eake iava? Uvare Turaro oiso voearo siituepareveira voearo oearoa torevoko vovou purapaiveira. Ra oisi iava voea vo variriroaro uvupareve. Ari ita, voeare kasipupaoro voeare isivaparoveira oearoa vuri vovouro purapaiveira.'

### *Tavaka Ouoro Uvui Iraopavio Ra Va Iava Rorupape*

<sup>13</sup> ✧ Vosa vearo vovou raga purapasa ruipa iraopata, uva iroutoa vai uvuiparoi ra oisi eisi oai iava visii vuri piereve? Eake iava? Uvare viapau oeai oiso eisi piepaiveira voeao vearo irara vuri piepaoro. <sup>14</sup> Ari vosa tavaka outa vearo vovou raga purapaoro, eagara. Oa-ia uvui iraopatai ra oisi va iavirava roru iraopata. Opeita uriripata voeaoropa evoea. Ora opeita rirovira rutu oisi voeare eisi rugorugoo iraopata oearoa visii vuri piepaiveira. <sup>15</sup> Ari Krai vaisiaro kae piepata ora visii vo rugorugooaro-ia. Ora vo osa oiraopavira rutu rerare oiso purapata, "Ragaipa turaro iraoparoi rutu." Ora vaopa tapo vatatopo iraopata vo osa oearoi oiso purapaave visiire, "Igeipa visii vo oirao pieroaro aviavi piepata. Uva eake rutu-a vao oare tuepataveira?" Ari ita, vosa ora visii vo rugorugooaro ravaa rovopata, osa iavirava uvuipatai ra voea vo reoroaro pukopata aviavi pievira. <sup>16</sup> ✧ Uva oisi-a eisi osa voea vo reoroaro pukopaoro uvui iraopatai ra kave vovou rutu purapata voeapa. Opeita voearovi akaipa piepata. Ora opeita orekerovu vuriara purapata ora visii-ia, ra vara sovopaoro ora visii iava sopaura-ia oiso purapata, "Ae, vuria puraavoi." Oapa eva vatatopopaoro airereivira rutu torevoko vovou raga purapata voeapa. Oa iava uvuipaai ra oisi vo vovouro eveipaoro ariipaave ora voea raga, voearo oearoa vuri takauro-ia visii vaisiaro takaupaiveira oiso purapaoro, "Vuri kovo raga eva akukua," vo osa vearo kovo raga Krai vaaro purapataveira. <sup>17</sup> ✧ Oiraopavira rutu, uvare vearopai rutu vo rara tavaka oupata vearo kovo purapaoro vo osa Pauto vo ruipaoro oisi eisi toupave visiipa. Ari vosa vuriara purapaoro tavaka oupata, oire uva visii raga auearo-a.

### *Krais Kopiiroera Vigei Varaaro Vuriara Veraoro*

<sup>18</sup> ✧ Oa eva vituaro-a vao oiso, Rera raga ita Krai ira kopiiroepa visii tauvaoro. Ira oiso eisi kopii ovoiroepa vigei varaaro-ia vuriara vo voriaro ouoro ovoievira rutu. Ari ita, uvare rera raga-a vearotoa rutu ira kopiiroepa oirara tauvasa vuri irara. Osa-a eisi osa iavirava vigei vore piereva Pautoa iare. Oiraopavira rutu oiso osa rera iava varaua kopii ovoiepa, ovusa rera iava urationo tootoovira raga toureva. <sup>19</sup> ✧ Osa eisi urauravira toupaooro avaroepa voearopa uraura irara siposipopasa oearoa tuukea-ia toupaveira. <sup>20</sup> ✧ Voea urauraaro oea rerare Pauto isivaiepa kaureopaoro voari tuariri rutu vo vuutao-ia oa-ia Noa ateate piepareva Pauto, ovusa aak uvuo purapareva. Uva oisi-a oiso osa iava kataipa irara raga virivirireva rera Pauto vo peva vatara raga, vo osa pirutu paitu raga

✧ **3:13:** Pro 16:7 ✧ **3:16:** Hi 13:18; 1 Pi 2:12, 15 ✧ **3:17:** Mt 5:10-12; 1 Pi 2:15, 20 ✧ **3:18:** 1 Pi 2:21; 2 Ko 13:4 ✧ **3:19:** 1 Pi 4:6 ✧ **3:20:** Jen 6:1-13

ivara-ia toupai va-ia uvua aak. <sup>21</sup> ✧ Oire uva voari tuariri eva paitu rovu uuko rovu Noa aao kaeva voea tovosa vo oriru tapi. Uva oisi raga ita uuoka-ia Tugoropa Sisu oupape oa vigei kaepaveira vigei tovopasa vo uva oriruvira toupapeira. Aue iavirava rera vo goruaro vao oa Jisas Krai tore pieva vova kopii tapi. Osisua-a eva oa viapau oiso toupai ra va-ia vuvui verapape ora vigei iava varaura oavi iava. Viapau. Ari vigei uvuipaviei ra oisi eisi va purapaoro ora vigei vo ruiparoaro reesipape, vo rera oiso ruipapavio ra vigei iava sopaura oavi sisigaruevira ruti toupave Pauto osireiara-ia vo rara evo gorua ita oupape rera vaaro. <sup>22</sup> ✧ Rera raga Krai ira iparoepa vuvuiua iare vo uva Pauto ruvara-ia oirapapa varata-ia toupaveira. Uva voa-a evoa uva tupaoro voea rutupa enselpa irara reiparaveira ora voeao oearoa reipaaveira vuvuiua-ia.

## 4

### *Uvuipaviei Ra Tavaka Vo Upiaaro Oupe Toua Oavi Tavariooro*

<sup>1</sup> ✧ Oire uva vo osa oearovu Krai iava varaua vuri pieiva rerapa riroa upia vateoro, taraipatai vai pasi osa vai-a eisi oearoi visii vuri piepaivere. Uva vare eva rugorugoopaoro oisi eisi uvuipatai ra ora visii iava sopaura oavisii goru piepata rutu vaore, vosa vuria outa oearovu ruvara-ia. Uvare ro ira upia ouveve ora rera iava varaua-ia vo rara oearovu rera vuri pieive, ira-a eera ira vuri vovou tokorevere oisi eisi pieoro. <sup>2</sup> ✧ Uva eisi piepaoro uvuipatai ra vo ruti tugurata vo vokie-ia oa-ia kopiitavere. Uva vo vuutaro evara oara-ia viapau uvuipatai ra ora visii vo vovouroaro sirova utupata vuri vovouro purapaoro. Viapau. Ari uvui iraopatai ra Pautoa iare ora visii iava vase iraopata rera raga vo vovouroaro sirova utupasa. <sup>3</sup> Ari ita, rovvira ruti oiso oisoa piepata osa voeao oea rupa vovovira toupaveira, opitupitua eva uvuipai ra opesipe. Osa-a eisi osa tupaoro oisoa rirovira ruti vuri vovouro purapata vao opitupiturovu ruti otopa pitupituro purapaoro. Ora vo osa oisoa spakpasa ruipa iraopata oiso vovoupaoro ra vara iava kokoropaoro opitupiturovu ruti vuriara purapata. Ora oiso osa tokarasi irara-ia oisoa vuurapa vaisi purapata, vao oarare kasipuparaveira Pauto. <sup>4</sup> Uva vo vokie opeita voea tapo ora tavosipata oearoa ora voea iava varaura oave vo ruiparoaro sirova utupaaveira oisi eisi vo vovouro vuriara purapaoro. Oa vituaro iava visii vo pitupituroaro-ia tavetave iraopaiveira. Oa iava visii tovipaiveira vuri reoro raga-ia visii takaupaoro. <sup>5</sup> ✧ Oea-a evoea voari utupaua Pauto osireiara-ia torevarea rerapa tavitavisa vo pitupituro iava evara voea varaaro. Oire ra evo vuuta raga-ia voea vo vovouroaro rovirieirevarea rera ro Pauto ira tuevira toupaveira voea rovirieisa kortua-ia, voeoro oearoa tootovira toupaveira ora voeoro oearoa kopiipaaveira. <sup>6</sup> ✧ Oa eva vituaro iava voeao oisoa Vearo Sipoipo iava siposipopaive voearopa oearoa tuariri ruti oisoa kopiipaave. Osa iava evoea rovirieireva osa vigei vao rovirieirevarea vigoa tootovira toupai vo vokie-ia. Uva vosa vearovira ruti Vearo Sipoipo oisoa uvupaivori voeao oea kopiiaepa tuariri, ra oisi iavirava voea vo uruaroaro tootoo ovoivira ruti toupave oiso osa rera Pauto toupaveira.

### *Vearoto Kovopata Ira Pauto Vo Siraoaro Roo Piepareveira Oearovivupa*

<sup>7</sup> ✧ Tutuuvui vuuta vao oa-ia orekerovu ruti opesipere. Oa-ia uvui iraopatai ra ora vatatopo iraopata ora kaipori piepaoro variripasa. <sup>8</sup> ✧ Ari

✧ 3:21: Ta 3:5; Hi 9:14; 1 Pi 1:3 ✧ 3:22: Ap 1:10-11 ✧ 4:1: 1 Pi 3:18; Ga 5:24 ✧ 4:2: Ga 2:20; Ro 6:11 ✧ 4:5: Ap 10:42; 2 Ti 4:1 ✧ 4:6: 1 Pi 3:19 ✧ 4:7: Je 5:7-10; Ro 13:11 ✧ 4:8: 1 Ko 13:7

rovopa rutu-a vao-ia vo osa oearovivupa siraopaoro voea-ia kaviko vovou rutu purapata. Eake iava? Uvare oearovivupa siraopaoro uvuipaviei ra vuriarare ovaupavio evara oara vigei vuri piepaiveira. <sup>9</sup> Vosa oearovivu visii iava visii iare karepaa viro, osa iava uvuipatai ora visii vo keparooiare iare voearovi koata piepata. Uva viapau uvuipatai ra voearovire orugorugoorovu purapata oisi iavirava. <sup>10</sup> ✧ Pauto ora rera varaaro vatevateara vatepareveira visii rutupa katakataivira vaore, oiso ra vearovira rutu vara tokipaoro vara kovo piepata. Oa iava uvuipatai ra vara-ia oearovivu araoko irara oavisii vara-ia taupapata. <sup>11</sup> ✧ Oiso osa vo vatevatearo-a varao-ia ropa ira Pauto vo reoaro iava siposipopareve. Osa siposipopaooro uvui iraoparoi ra torevokovira rutu Pauto rera iava reoreoparo. Ari vo vatevateao-a vao-ia ropa ira oearovu rutu taupapareve. Ira uvui iraoparoi ra oisi eisi vo vatevatea eva kovo piepaoro oirara taupapareve vo goru iavirava eva oa oupareveira Pauto ruvara-ia. Oire uva oisi-a eisi osa okovorovu rutu purapataveira evara oara rutu iavirava Pauto vaisiario kae pieiverea oearovu Jisas Kraiss vaisiario iavirava. Vao iava uvare Pauto vareiaro-a vareo keraria ora gorua oarea viapau opesia vai. Ovoiei.

### *Tavaka Kaepa Vo Vououaro Kraiss Tapo*

<sup>12</sup> ✧ Vate irara oaa, vokiara rutu-ia tavakaara oupataveira. Uva viapau uvuipatai ra vara-ia tavetave iraopata oiso rugoopaoro, Ae pisaara rutu varao oara vigei-ia karekepapeira. <sup>13</sup> Viapau. Ari roru iraopata vara-ia. Uvare vo tavakaro-a evara oara vaeapaiveira vo tavakaova Kraiss oa oureva vo osa rera-ia vuria puraiva. Vosa oisi eisi piepatavora, uvuipatai ra oiraopa roru outa vo osa Kraiss ora karekeroverea kerariava viaevira rera vaoro. <sup>14</sup> ✧ Visii rutu oisi eisi touta Kraiss vaisiario-ia. Ra oisi visii-ia taraipaoro visii takaupaive. Osa iava uvuipatai ra rorupata. Uvare vo vuria eva oupaoro uvuipatai ra ora visii-ia taraipata oiso, Oiraopavira rutu, Pauto reraaro Uraurato vigei sopaaro-ia toupaveira. Ro Tugoropato Uraurato ira-ia riroa rutu keraria aue gorua touveira. <sup>15</sup> Teapi oearovu kopii piepata. Ora teapi orekerovu avu vai kavirupata. Ora reo goruro opeita putepata. Ora opeita voraro vokapata oearovu vo rugorugooroaro torevoko ragapasa ora visii vo ruiparoaro raga-ia. Vosa oisi eisi piepata, osa ita torevokopai visiipa ra oisi iavirava tavaka oupata. <sup>16</sup> Ari vosa tavaka oupata vo ovusa oearovu visii vaisipaive oiso, Kristento, oire oisi iavirava viapau oiso ariipata. Viapau. Ari uvuipatai ra Pautoa-ia vuurapa vaisi purapata. Eake iava? Uvare eisi visii vaisipaoro Kraiss vaisiario tovopaiivoi visii-ia.

<sup>17</sup> ✧ Oire vo vuuta-a vao-ia oa pou piroi oa-ia Pauto rovroi rovirieia purapaoro. Oa-ia ora rera voeaaro rorovira roviriei rovo parevoi rutu. Oire vosa vigei oirao pie vovou irara rovo rovo pavio, ra apeisi voeao oirao pie vovou asa irara oea viapau Pauto vo reoaro oirao piepaiveira vo reo sirova utupasa? Uva siraovira rutu-a voeavipa! <sup>18</sup> ✧ Aue iava uvare Tugoropa Vuku oiso purapapeira voeare, 'Viapau oiso avekatapai rerapa ro vearo vovouto, ra ora rera iava sopaua porereve, oiso ra oisi iava Pauto rera orirureve ora rerapa. Uva apeisi-a? Uva aa vao-a opesia evoa vaoro oearoa vuri vovou purapaiveira, voeao oea Pauto vo reoaro uvu viapau oiso ruipapaaveira.'

<sup>19</sup> Osa ragavira-a eisi osa Pauto ora rera vo ruipaoro sirova rera voeaaro iava vasepareveira, oisore ra oisi iavirava tavakaara oupaive. Osa iava

✧ 4:10: Ro 12:6-8 ✧ 4:11: Ef 6:10, 5:20; 1 Ti 6:16 ✧ 4:12: 2 Ti 2:11-13 ✧ 4:14: Mt 5:10-12

✧ 4:17: 2 Kro 7:14 ✧ 4:18: Pro 11:31; Ro 10:9-17

uvuipaaí rutu ra torevoko vovou rutu purapaoro ora voea tootooro rutu tovopaive Pauto vavaeoro-ia. Uvare Pauto vigei rutu purareva ora ragai. Osa iavirava uvuiparoi rutu ra vigei iava sopaura tokipaoro voura orirupareve rutu.

## 5

### *Visii Kovopa Irara Uvui Iraopatai Ra Pauto Vo Raguiaro Sipsip Raguiro Toki Iraopata*

<sup>1</sup> ✧ Goruvira rutu voeare visii tuvetuvepa irara lotupa irara reoparaí. Uvare ragai tapo ita iravu tuvetuvepato. Vo uvare ora ragai osireiario iava Kraís kekeava vo osa tavaka vo siraoro oureva oearovu ruvara-ia. Osa iava eisi ragai tapo va vao keraria ouaverea vo rara vigei iare viaevira rutu pou piro. <sup>2</sup> ✧ Uva goruvira rutu visii tavipaavoi oiso, Oiso rutu toupata osa sipsip tokipa irara oirara rutu Pauto voeaaro tauvapaoro. Oisi eisi vo kovo purapaoro rorupata, uvare Pauto vo ruipaaro-a oisi visiipa. Opeita reasipata oisi pie arapa. Ora opeita oisi eisi vo kovo purapaoro voria ragare rugoopata. Viapau. Ari visii uvuipatai ra evo kovo purapata vo rara visii iava sopaura vo ruiparoaro oisi toupaveve oisi vara purapaoro. <sup>3</sup> Opeita oiso vovoupata ra voearoviopa reipata oearoa tokipataveira. Viapau. Uvare uvuipatai ra ora visii-ia ovoovoa purapata. Osa iava visii vo touoro vurapaoro vara sirova vearovira rutu utupaavere. <sup>4</sup> ✧ Vosa oisi eisi piepatavõra, voari utupaua Rovopatoa rutu Sipsip Tokipato ora karekeroverea ro raga ita Kraís. Uva vo vuuta-a eva oa-ia ora visii vo voriaro outaverea vao oa sisikorevira roroverea kerariava, vao oa viapau opeia vai.

### *Ora Vigei Vo Rugooroaro Rere Pie Rovopape Ra Torevokovira Rugorugoopavio*

<sup>5</sup> ✧ Osa ragavira eisi osa visii viovoko irara uvui iraopatai ra oira vasi irarapa avivikepata voea vo reoroaro uvupaoro. Ra ora visii raga ora vara piepataera, oisi toupaooro oearovivu tauvapata. Uvare Tugoropa Vuku oiso purapapeira, 'Pauto voeaopa vairuparoveira oearoa ora voea ragare oiso purapaaveira, Vearotoa rutu-a ragai. Vo osa voeoro oearoa ora vara piepaave, oea-a evoea oepa vereopa vovou rutu vatepareveira.'

<sup>6</sup> ✧ Uva oisi-a eisi osa ragavira uvuipatai ra Pauto vavaeoro reoroaro vao riro gorua takuvira toupata. Auere ra vo vavae iava eva oa-ia utupaua oiso visii kae piereverea rara vo vokio-ia oa rera raga reesireva. <sup>7</sup> Opeita tavaka vo siraoroaro kaepata ora visii raga. Viapau. Vara tovopata vo Pauto vavaeoro-ia. Eake iava? Uvare rera raga-a ira visii kavikopareveira visii tauvapaoro.

<sup>8</sup> Ora vatatopo iraopata kaiporivira rutu uutupaoro rerare ro Seten visiiva keripatoa rutu. Ira voraro rutu viripareveira oiso rutu osa aakauto ro ira okareroavu ruture taraapaoro viripareveira voea aiopasa. <sup>9</sup> Goruvira rutu tore iraopata oirao piepaoro, ra rerare korupaoro isivapata. Uvare taraipatai araoko irara oavisii-ia oirao pie vovou irara voeao oea uvarovu rutu voraro toupaveira. Oea oisi eisi vo tavakaro oupaiveira osa vo tavakaroa varao oupataveira visii. <sup>10</sup> Ari ita, Pauto visii reesireva ro ira vereopa vovou rutu purapareveira oearovu rutupa vaore, oiso ra

vo reesiva Kraís tapo ora tavosipaoro rerava reipata, vo uvare rera-a Kraís ira orekerovu rutupa reiparoverea pauakavira rutu. Osa-a eisi osa iava uvuipatai ra Pauto vaarore vereopa vovou rugoopata, vao oa-ia visii tauvapaereve, vo osa gare vuutavi raga-ia otavakarovu vo siraoroaro oupata oearovu ruvara-ia. Oara isivaaro iava evara Pauto visii vorevira vearo pierevere vo osa visii iava sopaura goru piereve oiso rutu tore pieoro osa kukuuvu tuuta. <sup>11</sup> Ira-a ro riro gorutoa rutu Turaro. Ira vo goruaro viapau opesia vaiei. Ovoiei.

### *Vo Toupai Ovoioa Reo*

<sup>12</sup> ✧ Ragai-a vao ragoa vavio poteku pasi puraavoi visiipa osa Sailas va rigatoparevoi ragai tauvapaoro. Rerare rugooperai oiso, Ira ita vigei araokotoaaro. Ira goruvira rutu Pauto vo reoaro-ia pitupaoro vearovira kovopareveira. Uva vo pasi-a vao oa-ia oiso ruipaparai ra goruvira rutu visii iava sopaura varaata pieoro voura goru piea rutu. Ora oiso osa oiso ruipaparai ra ora ragai vo reoaro oirao piea rutu visiipa oiso ragavira. Pauto visiipa vereopa vovou rutu oisoa purapareve. Ovovoua eva oiraopai rutu. Osa iava uvui iraopatai ra va iavirava goruvira rutu torepata.

<sup>13</sup> ✧ Ari ita, Pauto visii reeresireva ora rerapa ora voeao lotupa irara oea vo Babilon urui-ia toupaveira uvava visiipa vearo voki purapaivoi. Uva Mak tapo ragai oviitoaaro vearo voki puraparevoi. <sup>14</sup> Oire uva visii rutu sekanta oearovu tapo sirao vovou puraoro.

Uva visiipa Pauto arepaavoi ra gavaure vovou vatereve visiipa visiigoa Kraís tapo ora tavosipataveira.

Eisivi raga osa vo pasio purapaavoi.

Ragai-a vao, Pita.

## 2 PITA

### Irapa Reoro Vo Vukuo Iava

Viapau taraipaviei aa vo iva-ia vo pasio rigatoreva Pita, ora irou irara rutupa. Ari taraipavio oiso, Kristen irara varaaro oirao pie vovouo tore piesa vo rigato purareva. Voea tavireva oiso ra vorerivira Vearo Sipoipo-ia rugorugooapaave vao oiraopa reo rutu (2 Pi 1:12, 3:1-2), ora rera iava Turaro Pauto ira vo reoroaro oiraopara purapareverea taru vo utupaua voeaopa vearo vovou irara ora voeaopa tapo vuri vovou irara (2 Pi 3:10-13), ora aue iava tapo rigatoreva kuuvu irara tisa irara oiso ra voeapa vatatopopaave voea vo siposipoaro uvu arapa, ora Kraiss vo vorearo iava voea Kristen irara tavireva. Teapi urioparo osá viapau vatatopopaave rerare Turaro (2 Pi 3:8-13).

1. Aviavi pie reoro vo pasio iava, 1:1-2.
2. Oiraopa taraia vao vova vituaro iava, 1:3-21.
3. Kuuvu irara iava oea ora voea vo voriaro vuri vori oa ouiverea rara, 2:1-22.
4. Voea tavireva oiso ra tuevira toupave Kraiss vo vokiareo vao vorepa voki, 3:1-18.

<sup>1</sup> ✧ Ragai-a vao Saimon Pita Jisas Kraiss-pa kovopato. Ragoa roporeva Pauto, oiso ra rera vo kovoaro aposel kovo kaepaa. Ragoa vo pasio visiipa rigatoavoi. Visiigoa oirao pie vovou rutu purapaoro roru iraopataveira, oiso rutu osa igei vao rorupaioveira. Ari ita, vigei rutu katai vovou raga oirao pie vovou rutu pura iraopape vaitereo vo vovouaro iavirava torevokoa Pauto vaio ora Jisas Kraiss vigei Kae Pietoaaoro.

<sup>2</sup> Visii vaoro taraia aue-ia vereopa vovou ora gavaurea oa uvuipai kaepa piro riropaoro, vo osa topa pievira rutu Pautoa-ia ora Jisas vigei Turaroa-ia vearo tarai oupata rufu.

#### *Pauto Vigei Reesireva Ora Rerapa*

<sup>3</sup> ✧ Ari ita, Pauto ora rera vaoro iavirava riroa gorua vigei vatereva orekerovu rutu vigei vo touaro uvui piesa, oiso ra uvuipaviei ra torevoko vovou rutu sirova utupavio vao Pauto vaoro. Aue iava uvare rera-ia taraipaviei ro ira vigei reesireva rera tapo ora tavosipasa vao keraria oupaoro ora vearo vovouoro. <sup>4</sup> ✧ Osa ita-a eisi osa vara vaaro riropa vatevatearo oupapeira vearopara rutu vaoro oarare reo ovoi purareva vigeipa. Ovatevatearo-a evara vearopara oupaoro tauva oupapeira ora vigei raga vo opesiario-ia rugorugooapaoro, ra va vatavatape. Vao oa vigei-ia poupa pirovere vosa vuri vovouoro purapape vo rasio raga iava vara. Ari vosa vatevateara kovo piepape rera varaaro, oa iava uvuipaviei taru ra torevoko vovou rutu purapape rera tapo rera vo rugorugooaro sirova.

<sup>5</sup> Uva va-a eva oa vituaro iava uvuipata ra oirao pie vovou rutu purapaoro vearo pitupitu tapo pura iraopata. Osa iava eisi visii vo vovouoro vearopara-ia uvuipatai ra vara tapo vao takuvu iraopata vearo tarai rutu oupa vovou. <sup>6</sup> Vo osa vo vovou eva vearo tarai rutu oupa tapo takuvupataavora, oisi iavirava uvui iraopatai ra ora airereipaoro ora visii iava varaura vo ruiparoaro tokipata. Osa iavirava uvui iraopatai ra evo vovou tapo takuvupata vaova raverave asa vovou. Ora vo vovouo tapo oisi iavirava takuvupata Pauto vo vovouaro sirova utupa. <sup>7</sup> Osa iava evo vovou

uvuipai ra siraopa vovouva ora takuvupe vao oa purapataveira ora visii araoko iraraaropa, ora vo vovouo oearovu kavikopa vovou.

<sup>8</sup> Oire uva uvui iraopatai ra evo vovouo rutuva vearopara oisi eisi toupata pute pievira rutu vokiara rutu-ia. Eake iava? Uvare oearovu-ia oisi eisi vo vovouo purapataveira, osa iava uvuipatai ra visii vo tarairoaro oirao pievira rutu kareke iraopata ro iava vigei reraaro Turaro Jisas Krai. Osa-a eisi osa iava uvuipatai ra tauvavuvira otarairovu oupata rera iava ita. <sup>9</sup> \* Ari ro ira viapau oisi vo vovouo vearopara purapareve, ira oiso rutu toupaveira, Voosifo. Oa-a eva oiso toupai, Ira ikaupavira rutu Krai vo kovoarore ovauparoveira vo kovo oa iavirava rera varaaro vuriara riga piropa varao tuariri oara oisoa pura rovopareve. <sup>10</sup> Araoko irara oaa, oisi eisi kasivarivira rutu vearo vovou purapata. Osa iava vara iavirava uvuipatai ra ora visii-ia vearovira rutu taraipata oiso, O ari oiraopavira rutu Pauto vigei reesireva. Oa iava ita ora rerapa vigei roporeva. Osa iava uvuipatai ra oisi eisi piepatavora, viapau Pautoa-re isivapatavere kove ovoipaoro. <sup>11</sup> Osa torevokopai rutu eisi visiipa koatasa Jisas Krai vo Saraaro sovara-ia, ro vigei reraaro Turaro ora vigei Kae Pietoaro tapo, ira vo Saraaro viapau opesia vai.

<sup>12</sup> Osa-a eisi osa vituaro iava vorevoreripavira rutu visii rugoo pie iraopaavere evara iava vearopa vovouo sirova. Ari ita, vara-ia taraítai vo osa Pauto vo rearo oiraopa visii sopaaro-ia goruvira toupaveira. <sup>13</sup> Oiso rugoopaari osa torevokopai ragaipa eisi osa visii piepaavere vao iava vo rara tootoovira toupaa vo rasio-ia. Oire ra oisi iavirava visii vo rugorugooroaro tore piepaa vara-ia evara vorevoreripavira vearo vovou purapasa. <sup>14</sup> \* Uva oiso taraiparai ora ragai-ia, Utupaua ora ragai iava varaua kavuaverea, osa ragai tavireva vigei Turaroaro Jisas Krai aviavi pievira. <sup>15</sup> Osa-a eisi osare akeakepaavo rutu oai-ia, oiso ra oisi oai iava varare evara vearo vovouo rugoopataverea ragai vo kopiiaro isivaaro iava.

### *Igei Krai Vaaro Keraria Kekeiova*

<sup>16</sup> Uva oisi-a eisi osa visii tavitavipaio vigei reraaro iava Turaro Jisas Krai ira vorevira voreroverea rera vaarova riroa gorua. Uva viapau rutu vo siposiporo iava oisoa osiposiporo kosi piepaio varao iava oara oirara raga oisoa purapaive voari tuariri rutu. Viapau. Uvare ora igei varaaro iava osireiara oisoa rera siituepaio ovusa ora rera vo goruaro rutu kareke piepareve riroa. <sup>17-18</sup> \* Uva evo vuuta raga-ia rera tapo touiova vo pukuio-ia oa tugaropapeira oearovu rutupa, oa-ia Pauto Aite rera vatereva keraria rera vaisiaro rei pieoro. Uva oiso puraroepa, “Rera ro-ia Oviitoa oaa rutu. Ira-ia rirovira rutu roru iraopaavo rera kaviko iraopaoro.” Uva oisi-a eisi osa puraroepa rera vaaro-ia reoreoa vao oa varaepa vuvuiua iava riroara keraria aviaviaro-ia. Ari ita, igei tapo vo reo eva gurukoaro uvuiova vo osa vuvuiua iava varapaepa.

<sup>19</sup> Uva evo reo iavirava tarai ovoliiepa oiso, Oreoa-a ita eva profet irara vaaro oreoa oiraopai rutu. Oa iava visiipa vearopai, ra goruvira rutu vo reo-ia pitu iraopata. Eake iava? Uvare oiso rutu toupavoi osa vuravu rooroaro oa roropai aviavi piepaoro vore rupa tapi vo tugarasa uva ravireo karo virovere ora aviva aviiiko o-ia iria oiso rutu toupaveira osa Jisas ira visii sopaaro iare aviavia vatepareveira. <sup>20</sup> \* Oire uva vare rugoo iraopata rovopa rutu oiso-ia, Vosa kataitoa raga-a, viapau uvuiparoi ra rera raga oearovupa oreorovu rutu aviavi piepareve varao profet irara vo

\* 1:9: 1 Jo 2:7-11    \* 1:14: 2 Ti 4:6-8; Jo 21:18-23    \* 1:17-18: Mt 3:13-17, 17:1-13    \* 1:20: 2 Ti 3:16-17; Ro 12:6



reoroaro oara Tugoropa Vuku-ia toupaveira. <sup>21</sup> ✧ Viapau. Uvare profet irara viapau oiso ora voea raga vo rugooaro iava oiso vo reo karekeiva. Viapau. Ari Tugoropatoa raga Uraurato ira voea soporeva roroio pievira vo reore rugoosa oreoa vatevea Pauto voeapa, oisore ra oisi iavirava torevokovira rutu vo reo kosi piepaive.

## 2

### *Vuri Vovou Voeao Vaaro Profet Irara Riro Kuuvu Irara*

<sup>1</sup> Ari voari rutu tuariri uva riro kuuvu irara oisoa profet irara karekepaave tuariripa irara vuutaaro-ia. Uva oisi raga oiso osa katai raiva-ia oearovu riro kuuvu irara otarairovu vatepa irara karekepaave vo voki visii iare vatauvira. Varao iava visii tarai piepaasa oara uvuipai ra visii kove piepaive vo siposiporo-ia kuuvuara. Oara iava Turaro vo kovoarore oiso puraavere, “Kuuvu kovo vao,” ro Turaro ira raiva purarevora voeapa Pauto ruvara iare. Uva oisi eisi piepaoro ikauvira rutu vara-ia ora opesi pie ovoipaavere. <sup>2</sup> Ari ita, oearovu siposipopaive, ra va iava oearovu riro irara voea vo pitupituroaro vuriara rutu otopa pitupituro sirova utupaave. Osa-a eisi osa iava oearovu voeava vurapaoro evoea voare oiraopa lotu vo pitupituro vuri takauro rutu purapaive va roeroaropaoro. <sup>3</sup> Ari ita, uva moni ou ruipa-ia riro kuuvu irara visiipa oiso ora voea raga vo siposiporoaro vatepaive vaore, oiso ra vara-ia oisi iavirava riro oupaave ora voeapa. Ari tuariri rutu voea vo voriaro reesireva. Oa iava voea ateate piepaoro voeare tuevira toupaveira Pauto uusi asavira rutu. Oa-a eva oa iava voea rovirieipaoro vo voea tovoparevere uva siitokavira toupaveira voea varaaro-ia vuriara.

<sup>4</sup> Ari ita, Pauto viapau oiso voea vura ragapaveira evoea profet irara kuuvu irara. Uvare turariripa irara-ia taraipavio oea ita viapau vura ragareva. Oiraopavira rutu, uvare Pauto viapau oiso voeao enselpa irara vura ragareva oea vuri vovou puraiva. Viapau. Oea evoea tovevea vo eto kasi-ia opesi tapi rutu. Vo rupa tapi uva vo tuukero toupaveira sen iroro-ia vo rutu tugurasa uva taru Pauto voea rovirieirevere. <sup>5</sup> ✧ Eisi osa Pauto viapau oiso veari vura ragareva tuariripa irara. Viapau. Ari pirutu rovu paitua purareva voea opesi piesa voeao oea viapau oisoa Pauto oirao piepaive. Uva Noa aao raga orirureva vo peva vatara (8) rutu evoea oirara, eera Noa ira torevoko vovou rutu sirovava oisoa siposipopareve. <sup>6</sup> ✧ Oire uva ouruireivu-a vareo Pauto oareare oiso puraroepa, “Vuri uruirei rutu vareo Sodom uruirei ora vao Gomora urui.” Osa iava vo uruirei opesi pie ovoireva varei kasioro riro kasi rutu-ia eto kasi. Osa-a eisi osa evara piepaoro ovoovoa purareva oearovu rutu-ia. Osa ita uvuipai ra voeao vaaro-ia opesia taraipaave oea viapau Pauto oirao piepaive. <sup>7</sup> ✧ Oire Lot raga ro vearo vovouto virivarireva evo uruirei rutu kasioro. Ari ita, rera iava sopauaaro rirovira rutu vavataepa vuri irarapa rirovira rutu siraooro. Vao vituaro iava uvare voea vo pitupituroaro raga-a ita vuriara oara-ia oisoa otopa pitupituro purapaive Reo Taisi gasipaoro. <sup>8</sup> Eera Lot vearoto ira oisoa voea vo vuutaaro-ia vokiara rutu-ia toupavevo vo osa rova asavira vo uruirei evarei oisoa toupave. Uva oisoa voea siituepareve ora voea uvupareve tapo. Uva va eva vituaro iava rera vo vovouaro vearo vovou rerare riro vavataepa rutu sirao iraopaoro voea vaaro iavirava riroa rutu vuria. <sup>9</sup> Vosa kokarapa vovou karekepe voeao-ia oea Pauto sirova utupaaveira, uva oisi-a eisi osa iava Turaro oiso taraipaveira. Ra va iava voea vorereve vova kokarapa vovou voea virivaripaoro. Ora oiso

taraiparoveira Turaro voea vo pitupituroaro-ia vuri irara, oisore ra voea vo voriroaro vuriara vatereve voeapa, varao vo vokio iarepara ora vo vokiri iare ovokia-ia oirara rutu rovirieireverea Pauto. <sup>10</sup> Ari ita, oearovu voea iava vuri irara ora voea vo voriroaro pute pievira rutu oupaiveira, voearoa oearoa rirovira rutu vuri vovouro purapaoro ora voea vo ruiparoaro sirova utupaaveira Pauto vaisiaro rei vaisi rutu takau ragapaoro. Voeao-ia riro kuuvu irara oirara tuvutuvepa irara oea oearovivu vaisiaro vara piepaiveira vo rara kaureovira rutu ora voea raga vo rugooroaro iava voeapa siposipopaive. Oa-a eva vituaro iava enselpa irara-ia tapo viapau rei vaisi vai purapaiveira voeao oea vuvuiua-ia reipaaveira. Viapau. Ari uriri asavira rutu voea takau ragapaiveira voeavi akaipa piepaoro. <sup>11</sup> ✧ Oiraopavira rutu, uvare oearovu voeao iava enselpa irara oea vo goruaro riro kuuvu irara vo guaro-ia pute iraopaiveira, uvare riroa rutu. Osa eisi piepaoro reipa irara enselpa irara viapau oiso takaupaiveira vuri reoro vai-ia vo Turaro osireiaro-ia.

<sup>12</sup> Evoea riro kuuvu irara oea oiso rutu toupaveira osa vavarai kare, uvare ora voea raga vo rugooroaro sirova utupaaveira varao voea iava varaura vo ruiparoaro. Evo kare vavarai kare oirara okareroa upopaiveira vo kare aiopaoro voea opesi pie ovoipasa. Osa eisi piepaoro vo reoro-ia vuri reoro takau purapaaveira oreoroa vituaro-ia viapau taraipaave. Oa iava oearovu voea voeao riro kuuvu irara upopaoro voea opesi pie ovoipaiveira oiso rutu osa vo karero vavarai karero opesi piepaiveira.

<sup>13</sup> Oea-a evoea varaaro vuriara voriaro-a vao-ia riroa tavaka, oa oiso toupai osa va vatepaiveira oearovivupa. Vao-ia osa oiraopavira rutu roruvira vuri vovouro purapaiveira oirara rutu osireiaro-ia ravireo vuutaaro-ia varao-ia vuri vovouro voea iava varaura vo ruiparoaro raga. Oara-ia visiipa ariia vatepaiveira. Oara oiso rutu toupaveira osa vuuvui o iria sisigaruea-ia varoa toupae. Vao vituaro uvare visii rutu tapo aiopaoro ora voea raga vo rugooroaro vuriara sirova utupaaveira visii keakeapaoro. <sup>14</sup> Vao-ia osa vuravurapaoro otopa riakorore taraapaoro viripaiveira. Osa eisi piepaoro viapau voea iava osireiara reareapapeira vuri pitupiturore vuravurapaoro. Uvare voea tuvutuvepaiveira voeao oearoa-ia viapau riro goru oirao piero vai toupaveira. Vao-ia osa voea kuverapaiveira voea kove piepaoro, oa iava vuri pitupituro purapaiveira. Osa eisi piepaoro ora voea raga iava sopaura tarai piepaiveira oearovu varaaro riiriipasa. Oiraopavira rutu, uvare voea vaaro vuria voriaro epao Pauto oa vatereverea voeapa taru.

<sup>15</sup> ✧ Ari ita, oea-a evoea torevoko raiva iava piroaepa. Uva eisi pieivoiva, opesikoapea rutu. Oisi-a eisi osa piepaoro vo raivao sirova utupaaveira oa-ia Belam ro Bio oviitoaaro avaroepa. Ira-a ro ira vo moniro ragare rugooroepa oa uvuiparoi oupareve vuri vovou purapaoro. <sup>16</sup> Uva va-a vao oa iava iriavu donki rera vo vuriaro roroio pievira rutu karekeeva rera Belam tavitavioero. Eira donki iriavu reo asa kare iava oira okareroa viapau reoreopaave. Ari eira iriavu vo kare iava iria rerare korooupa oiravira rutu reoreoro, vo ovusa vuria pura rovosa aueparoepa kokoropa rugorugoo raga sirova.

<sup>17</sup> Voeao riro kuuvu irara, oirara tuvutuvepa irara oea oiso rutu toupaveira osa tuputupue riku vao oa-ia viapau uucoa vai kaepa piro. Ora oiso tapo toupaveira osa tuputupue riku vao oa-ia viapau uucoa vai kaepa piro. Ora oiso tapo toupaveira osa rukuta o iria peopareveira kiuvu. Oa iava viri ragapaaveira. Ra va iava kokeva viapau kovepao rasito kave piepaoro rera tauvapasa. Ari ita, oepa evoea Pauto ouruivu reesireva tauai rutu vo rupa tapi rutu uva voea tovopareverea. <sup>18</sup> Voeao-

ia oirara riro reo pura irara kokoropavira oea vuri rugorugooro raga-ia reopaaveira. Oa-ia oaravu rutu vuri vovouro otopara purapaaveira varao oara iare oirara ivupaiveira vaore, oiso ra voea sirova utupaave voeoro oea airepavira rupa vovouro kavu ragapaaveira. <sup>19</sup> Voea-a voeao vuri irara oea oiso voea tavipaaveira, “Viapau oiso oavu avu vaieli, ra visii vo ruiparoore korupape.” Eisi osa purapaaveira. Oa iava ora voea vo vovouroaro vuriara oara-ia voea raga tuukepaiveira rutu. Uva oisi-a eisi osa vara-ia evara ora opesi pie ovoipaaveira. Ari ita, varao vuriara oara oirato tuukepaive, vo rara rera-ia putepaive rutu vo vovouro evara. <sup>20</sup> Oiraopavira rutu, vo osa vuri vovouro oaive vo rasio iava oara isivaaro iava oisoa Jisas Kraisi-ia tarai rovopaave ro Turaro vigei Kae Piepatoaaro. Eva-a oa-ia oisoa ora voea varaaro vuri vovouro asavira toripaive, varao ovovouroa uvuipai ra voea iava sopaura oaive vuri piepaive. Oire ra ita va isivaaro iava vorerivira ita aia vo vovouro evara vuriara voea tuukeve ita voea-ia puteoro rutu. Uva siraovira rutu-a oisi voeavipa eisi. Ari ita, voari vuriara oaive rovoaro-ia ovuria-ia puteverea vo vurio voea vo opesiaro. <sup>21</sup> ✧ Osa ita eisi vearopai voeapa oiso vo osa viapau torevoko vovou vo pitupituro-ia viapau tarai rovopaaeri. Eake iava? Uvare oisoa-ia Pauto vaaro-ia Reo Taisi rovovira tarai rovoae, oreoa ouiva rera ruvara-ia. Oire uva vare ita vorevira isivaae. Uva va-a eva vituaro iava ora voea vo vuriaro voriaro oupaivera riroa rutu pute pievira rutu. <sup>22</sup> ✧ Oa-a vao vuri pitupitu oa vo ovoovo oirao piepaiveira rutu. Oa oiso purapapeira, ‘Kaakau vorevira vo aio aiopaaveira oa oe rovopaeveira.’ Ora vo reo oa oiso purapapeira, Koie oisoa sisu rovopaora uuko ovi-ia, vorevira ita sikupasa tuuvua-ia vorepao. Oisi raga ita osa voeao oirara oea vorevira vorepaave ora voea raga vo pitupituroaro vuriara purapasa ita.

### 3

#### *Oiraopavira Rutu Turaro Voreroverea Taru*

<sup>1</sup> Vate irara oaa, vo pasio-ia eraopa pasi oa rigatoavoi visiiipa. Vao iava osa vo pasirei rutu-ia vareo-ia vo reo puraavo visii vo rugorugooroaro tore piesa airerei rugorugooro vo osa vearo vovou ruture visii rugoo piepaavoi. <sup>2</sup> Uva oiso ruipaparai ra vo reore rugeopata profet irara oa vateiva visiiipa Pauto voeaaro. Ora vao riro goru reo rutu Turaro vaaro vigei Kae Piepato oreoa vatereva visii voeaaro aposel irara gisipoaro-ia. Oreoare tapo eva rugoo iraopata.

<sup>3-4</sup> ✧ Vearovira tarai iraopata vao-ia, uvare voari ovoioipa vuutaro iava vo vokiro-ia uva oearovu karekeavereva voeao oea ora voea raga vo vovouroaro sirova vuriara utupaavereva. Oa iava visii tovipaoro agesi pievira oiso purapaavereva, “Oiso puraroepe Jisas, *Vorevira voreravereva vuvuiua iava*. Uva apeisi-a? Uva ovu rutu-a vo uva touparevoii vo rasio-ia? Uvare viapau oiso oavu avu vai vo rasio iava ora tavariopaooro voari rutuva rovooro tuariripa vuuta-ia urioepa, uva kopiiiaepa vigei avu iraraaro vo vokio-ia rekasisa ovokia vao-ia. Oiraopavira rutu, uvare orekerovu rutu areivira toupai voari rutuva rovopaoro uva rasito rovoroepe.” <sup>5</sup> ✧ Uva eisi purapaoro oiso ruipapaaveira ra vaore ovauave Pauto vaaro vo osa reoreoroepa voari tuariri. Vao osa iavirava vuvuiuaerei ora rasia karekepa, vo rasio-a oa purareva uuko ovi iava, oa iava vo rasiro avakava vuvuutaaro-ia toupaveira oiso. <sup>6</sup> ✧ Ari ita, voari tuariri vo rasi vao opesi piereva uuko ovi raga-ia vo uva pirutu rovu-ia paitua purareva voari

tuariri. <sup>7</sup> Ari vo vokio vuvuiareia ora rasito Pauto virivaripareveira rera vo reoaro iavirava. Uva ita, ovokivu epao vo utupavira ovoki-ia rasia opesi piereverea aue-ia eto kasi vo rasi kasioro. Iu. Varei evarei virivaripareveira vo vokio rutu iare oa-ia oearovu rovirieireveera rara voea opesi pie ovoiooro, voeao oea viapau Pauto vo vovouaro sirova utupaave.

<sup>8</sup> ✱ Vate irara oaa, viapau uvuipatai ra ovaupata vaore tarai reo oa oiso purapapeira, “Turaro katai voki ovoovopareveira aue-ia, katai tuku (1,000) ivaro. Oiso osa katai tuku (1,000) ivaro ovoovopareveira oiso, katai voki raga. Varei vo vuutareiara rutu areiivira vaeapaoro.” <sup>9</sup> ✱ Osa-a eisi osa Turaro viapau oiso garutuvira varao oirao piepareveira oarare vigeipa reo ovoi purareva. Ari ita, oearovu rerare oiso purapaaveira, “Riro garututo eera,” osa viapau. Vo osa visii ateate piepareveira. Eake iava? Uvare vaopa reasiparoi ra irai oirara rutu iava opesikoro. Ari oiso rutu ruipaparoveira ra oirara rutu voea vo vovouaro iava vuriara vovevira poreia viro. Eisi osa vituaro iava ateate piepareveira.

### *Rasito Ora Vuvuiua Opesi Ovoiperea Rara*

<sup>10</sup> ✱ Oiraopavira rutu ita, uvare Turaro vo vokiara-a oa kaviruvira karekeperea oiso osa kavirupato karekeparoveira. Ovoki-a eva oa-ia vuvuiua opesi ovoiperea vo osa riroa rutu gurukoa pura piro. Oa-a vao oa-ia aaviikoara ora orekerovu rutu vuvuiua-ia touara rova ovoiperea opesi ovoiooro. Osa raga ita vo rasio tapo pieveera ora orekerovu rutu vara oara voa toupaveira. <sup>11</sup> ✱ Oire vosa vara rutu evara oisi eisi pieve, uva apeisi-a oiso osa uvuipatai ra toupata vo vokiara-ia? Uvui iraopatai ra torevoko vovou rutu airereia purapata ora visii iava vearovira sopaura rutu tovopaoro Pauto vo ruipaoro rutu sirova utupasa. <sup>12</sup> Oisi eisi piepata vo vokire tuepaoro Pauto vo vokiara, vo osa Pauto vo kovoaro tapo vearovira rutu pura iraopata. Oa iava uvuipai vo voki eva vagevagevira rutu tutuu pievira karekepe. Uva vo voki-a eva oa-ia vuvuiua rutu rovaoro opesiperea, ovusa riro kasi rutu tuituia karekepe, vao oa vara rutu orekerovu kasivera, osa vara rutu kasiraopavira paruverea. <sup>13</sup> ✱ Ari vare voari tuepavioveira Pauto oare vigeipa reo ovoi purareva oiso-ia, ‘Airepaua perea vuvuiua ora airepato rasito vo uva torevoko vovouo raga purapaiveera vokiara rutu-ia.’

### *Uvui Iraopavio Ra Tuevira Touavio*

<sup>14</sup> ✱ Osa-a eisi osa visii vate irara oaa tuevira toupata aireparare kasi-variavira rutu sisigaruevira raga toupaooro Pauto osireiara-ia, vo rara viapau vuriara vai purapata. Osa iava uvuiparo Pauto visii tapo ora agiagipaoro vokiara rutu-ia toupave. <sup>15</sup> Ari ita, taraipataveira oiso osa Turaro visii ateate piepareveira. Uva vo raiva-a eva rera vaoro visiire oa iavirava uvuipatai ra vovevira rera iare ora visii iava sopaura porepata. Oiso osa visiipa vo rigato purareva oisi iavirava ro vigei araokotoaoro rutu Pol. Vo uvare Pauto rera vatereva taraia va iava. <sup>16</sup> Uvare tavitaviroepa vo raiva iava oisi eisi ora rera vo pasiroaro rutu-ia. Ari ita, oreorovuei vo pasiro sovara-ia evara oreoroa viapau roroiavira tavitavipai. Oreoroa oearovu tarai asa irara ruruvutu vovouvira raga pisavira aviavi pie ragapaiveira. Osa rutu ita-a eisi oreorovu vuri piepaiveira oearovu voea iava vo Tugoropa Vuku sovara-ia. Vo osa oearovivu piro piepaoro ora vuri pie ovoipaaveira voea raga.

✱ **3:8:** Sam 90:4 ✱ **3:9:** Ais 30:18; 1 Pi 3:20 ✱ **3:10:** Mt 24:42-51; 1 Te 5:2; Re 21:1 ✱ **3:11:** Re 20:11-15 ✱ **3:13:** Ais 65:17-25 ✱ **3:14:** 2 Pi 1:10; 1 Ko 15:58; Fl 2:15

17 ✧ Vate irara oaa, eva-ia ravaa reo taraitaera. Uva oisi-a eisi osa iava uvuipatai ra ora vatatopo iraopata vaopa, teapi voea evoea vuri irara visii ivupaivere ora voea vo vovouroaro raga sirova utupasa. Ari ita, oea-a evoea oea vokiara rutu-ia reo goru putepaiveira. Vosa voea vo pitupituroaro vioepaoro oiso vara purapata, oa-ia uvuipatai ra ora vavagisi piepata ora piro piepaoro. 18 ✧ Ari uvui iraopatai ra vereopa vovou raga vearo pitupitu rutu-ia purapata, ra oisi iava kovapape. Osa iava visii vo tarairoaro uvuipai ra riropape rutu ro iava Jisas Krai vigei reraaro Turaro ora vigei Kae Pietoaaro. Ira vaisiara kae piepaoro uvuipaviei ra rera-ia vuurapa vaisi purapape vo vokio ora vokiara rutu-ia opesi asavira. Ovoiei.

Eisivi raga osa vo pasio purapaavo.

Ragai-a vao, Pita.

## 1 JON

### Iraba Reoro Vo Vukuo Iava

Vo pasio rigatoreva Efesas urui-ia toupaooro aue 90 yia Jisas vaaro isivaaro iava kavaua. Uva voea rutupa oirao pie vovou irara vo rigato purareva. Ira varao iava siposipoara rigatoreva oara viapau vaeavira toupaveira oiso-ia, aviavia vao ora rupa (1 Jo 1:6-7, 2:8-11), rasito varaaropa ruipapaoro ora Pauto varaaropa ruipapaoro (1 Jo 2:15-17), Pauto voeaoro ovii irara ora Seten voeaoro ovii irara (1 Jo 3:4-10), siraoapa vovou ora kasipupa vovou (1 Jo 3:11-18, 4:7-12, 16-21), Pauto reraaro Uraurato ora Krai-va keripato reraaro uraurato (1 Jo 4:1-3).

Goruvira rutu oirao pie vovou irara tavireva oiso ra viapau uvuipai ra kuuvu irara tisa irara vo siposiporoaro uvupaive. Voeao oea kuuvu-vira siposiporo raga purapaveira oiso, Viapau uvuipa Krai ra varaua-ia kavauo, uvare vo varaua oua-ia toupaveira oa agasipaveira aue-ia vuri pitupituro. Uva vo siposiporopa Jon goruvira oirao pie vovou irara tavireva, oiso ra viapau vara oirao piepaive voea oirao pie vovou irara (1 Jo 4:1-3).

1. Aviavi pie reoro vo pasio iava uvare oiraopa reo rutu oreoroa iava rigatoreva, 1:1-4.
2. Aviavia-ia vokapaoro uvuipa Kristento ra ora rera vo vovouaro-ia oirao pie vovou taraiparo, 1:5–2:29.
3. Pauto vo vovouaro-ia kaviko vovou toupaooro uvuipa Kristento ra ora rera vo vovouaro-ia oirao pie vovou taraiparo, 3:1–4:21.
4. Uvuipa Kristento orekerovu vuriara-ia putepasa vo osa goruvira Krai-ia rari iraoapo, 5:1-12.
5. Pauto Oviitoaaro-ia taraipavio ira uvuipa vigei orirupasa vuri vovouro purapa arapa, 5:13-21.

#### *Tootoa Vatepa Reoro Iava Ro-ia Jisas Krai*

<sup>1</sup> Vao-ia oa oiso ragavira touva voari tuariri rutu rovoa-ia vo uva vo rasio pura asavira touva. Oa iava igei va uvuiovora, ora va kekeiovora vo ora igei osireiaro iava. Ora va vuravuraiovora, ora va-ia tapo pitupituiovora ora igei vavaeoro iava vao-ia Tootooa Vatepa Reo. <sup>2</sup> Oire uva va-a vao Tootooa oa poeravira ora karekeepa, oa iava igei va kekeiovora. Uva oiraopavira va iava siposipopaiovora visiipa va iava vao-ia Tootooa Ovoi rutu. Oa-a vao oa tuariri rutu Aite tapo touva, oa iava poeravira ora karekeera uva va kekeiovora igei. <sup>3</sup> Uva igei va kekeiovora ora va uvuiovora. Oa-a eva oa iava visii siposipopaiovoi, oisore ra va iava vigei rutu uvuipavie ra katai vovou raga purape Aite tapo ora rera Oviitoaaro Jisas Krai. <sup>4</sup> Uva vo reoa vao-ia oa rigatopaiovoi, oisore ra va-ia vigei rutu vukupavio rutu vao-ia rorua.

#### *Uvuipavie Ra Aviavia-ia Vokape*

<sup>5</sup> Vao reo-a vao-ia oa uvuiovora oreoa igeipa vaterevora ro Pauto Oviitoaaro. Oa iava visiipa siposipopaiovoi oiso-ia, Pauto-a aviavia ira-ia viapau rutu rupaa vai toupaveira. <sup>6</sup> Vosa vigei oiso puravio, “Ragai katai vovou rutu purapaavoi rera tapo,” vo osa rupa vovou vo pitupituaro-ia vokapape, oire ra oisi iava vo reo oiso pura piro, Kuuvu reo. Ra viapau oiraopa reo vo pitupituaro-ia vokapape. <sup>7</sup> Ari vosa rera vo aviaviaro-ia

vokapape vo aviavio oa-ia toupaveira Pauto, eva oa iava vigei rutu katai vovou purapape oarovu rutu tapo araoko irara oavi, voeao oirao pie vovou irara. Oire ra va iava revasiva o Jisas iava Pauto Oviitoaaro vigei iava vuriara oavi verapaeve. Ra va iava sisigaruepavio.

8 ✧ Vosa oiso puravio, “Ragai viapau vuria vaiei,” oire uva vigei raga ora vigei iava sopaaro oavi keakeapai. Ra oisi iava viapau oiso Pauto vaaro oiraopa reo vigei sopaaro-ia toupave. 9 Ari vosa vigei vuri vovouro oavi kosi piepe vara iava Pautoa-pa tavitavio, eisi osare reo ovoi purareva oiso ra oisi iava oiraopavira oisi piereve vigei-ia. Osa iava uvuiparoi ra vigei iava vuriara oavi verapareve vigei-ia rera vaaro torevoko vovou rutu purapaoro. Eisi osa iava uvuipaviei ra sisigaruevira rutu toupape. 10 ✧ Vosa oiso puravio, “Viapau oiso ragai vuria vai oiraopavira puraavorao,” uva vo reo-a eva oa-ia Pauto oiso pie ragapai, Kuuvuto, uvare oiso puraroepa, “Oirara rutu vuri vovou purapaiveira.” Ra oisi iava viapau oiso rera vo reoaro oiraopa reo vigei sopaaro-ia toupave.

## 2

### *Krais-a Vigei Tauvapato*

1 ✧ Vo rigato puraavoí visiipa kakae vure oaa, auere ra viapau vuri vovou purapata. Oire vosa irai vuria vai purapareve, uva toupape Jisas Krais vigei tauvapatoaaro eera torevoko vovouro rutu, ira Aite arepareveira vigei iavirava. 2 Aue vituaro iava uvare Krais raga-a ira raiva purareva vigei vo vuri vovouro oavi vo voriaro opesi pieoro vaore, oiso ra vuriara rutu vera ovoireve vigei iava. Ari ita, uva viapau oiso vigei raga varaaro-a vuriara. Ari oarovu rutu vo vovouroaro-a vuri vovouro vearo voraro rutu.

3 Vosa oiraopavira rutu Pauto vo reoaro goru reo rutu sirova vearovira rutu utupavio, oire ra va iava oiso taraipavio, O ari, oiraopavira rutu Pautoa-ia taraipaviei. 4 Ari vosa irai oiratoa vai oiso puraro, “Ira-ia Pauto taraiparai,” vo osa viapau vearovira rutu Pauto vaaro goru reo sirova viapau utuparo, oire uva rera-a eera riro kuuvuto. Ra viapau oiraopa reo sirova utuparo va-ia taraipasa. 5 Ari ro ira Pauto vo reoaro uvuparo va purapareve, eera-a ira vuku iraparoveira rerapa siraopaoro. Oire uva apeisi ragavira uvuipaviei ra vao-ia taraipavio oiso, Ora tavosiviei rutu Pautoa tapo, eke? 6 ✧ Eisi osa-a oiso-ia vosa irai oiso puraro, “Ragai Pautoa tapo tavosivira toupavaoí,” uva rera-a eera torevoko pitupitu puraparevoí oiso rutu osa Jisas Krais oisoa va purapaoro toupave vo rasio-ia.

### *Ro Oirato Ira Araokotoapa Ora Rera Iava Sopaua Rutu Vatepareve, Eera Ira Aviavia-ia Toupape*

7 ✧ Vate irara oaa, riro goru reo rutu vao-ia oa rigatoavoí visiipa. Uva viapau oiso airepa reoa. Viapau. Ari tuariripa reo rutu-a vao-ia vo reo oa oisoa visii-ia toupave vo osa oirao pie vovouro oavisii rovoera. Oreoa raga vao-ia oreoa vo siposipoaro-a vao oa uvutava voari tuariri rutu. 8 ✧ Uva vo reo raga-a vao-ia goru reo oare oiso puraparai, Airepa reo. Eake iava? Uvare tutuu pievoí auere ra rupa vuuta opesipe. Uvare oiraopa aviavi rutu voare kaviko vovou vo pitupituaro roroparevoí aviavipaoro. Vao vituaro osa ragavira oirara uvuipaai ra goru reo eveipaive oiso puraoro, “Akoea, oiraopa reo rutu-a vao,” vo aue iavirava Krais vo touaro ora visii vo touaro tapo.

✧ 1:8: Jop 15:14; Pro 20:9; Je 3:2 ✧ 1:10: 1 Jo 5:10; Ro 3:21-25 ✧ 2:1: Ro 8:31-39; Jo 14:15-26; Hi 7:25 ✧ 2:6: Jo 15:10-14; 1 Pi 2:21 ✧ 2:7: 1 Jo 3:2, 11 ✧ 2:8: Ef 5:8; 1 Te 5:5; Jo 1:9

<sup>9</sup> Ari ita, vosa irai ita oiso puraro, “Ragai aviavia-ia vokapaavo,” vo osa kasipuparo ora rera araokotoarore, ira-a eera ira touvira rutu rupa-ia toupaveira vo rutu vo vuutao rutu-ia rekasisa vo vokio. <sup>10</sup> Ari ro ira araokotoapa siraoparo, ira-a eera ira aviavia-ia vokapaveira. Eisi osa iava viapau oiso vuria vai rera-ia toupaveira vao oa iava viapau uvuiparoi ra irai vovouaro piro pierëve. <sup>11</sup> ✧ Ari ro ira araokotoare kasipuparo, ira-a eera touvira rutu rupa-ia toupaveoi. Orupaa-a eva oa sovara-ia viri ragapaveira torevo ko rugoo arova. Eake iava? Uvare rera osireiario voosi pieva vuri rugoo.

<sup>12</sup> Kakae vure oaa, vo rigato puraavoisi visiipa, uvare vuri vovouaro oavisi rutu vera ovoireva Kraisi visiia iava rera vo raivaaro iavirava. <sup>13</sup> Aite irara, vo rigato puraavoisi visiipa, uvare rera-ia taraipatai ro ira oiso toupaveira voari rutu rovoa-ia ora vo vokio. Uva visiia tapopa viovoko irara vo rigato puraavoisi. Vao vituaro iava uvare ro-ia putefavorao rutu tugara kare reitooaro ro-ia Seten rera vo varivariaro tokooro.

<sup>14</sup> ✧ Oire ragai-a vao vo rigato puraavoisi visiipa kakae vure oaa, uvare taraipatai ro-ia vigei Aitearo. Uva vo rigato puraavoisi visiipa aite irara, uvare taraipatai rera-ia ro ira voari rutu oiso toupaveira rovoa rutu-ia ora vo vokio. Ora visiia vao viovoko irara visiigoapa tapo vo rigato vao-ia puraavoisi, uvare goru vovouira rutu toupaveira, vo osa Pauto vo reoaro kovopaveira visiia iava sopaura sovara-ia. Ora vao tapo iava osa rera-ia ro Seten-ia putetavora rutu rera vo varivariaro tokooro.

### *Viapau Uvuia Iraopavie Ra Ora Vigei Iava Sopaura Oavi Vatepape Rasito Vo Pitupituaropa*

<sup>15</sup> ✧ Opeita varao riiriipata oara rasitoa-ia toupaveira, ora varao oara rasitoa iava ora karekepapeira. Vosa oisi eisi piepata vara ragare rugorugopao rasitoa iava vara, vao viapau uvuipai ra visiia toupaveira vao Aite tapo ora tavosipa vovou. <sup>16</sup> Eake iava? Uvare varao oara vova rasitoa-ia ora karekepapeira oiso-ia osa varao oarapa ruipa irapaaveira oirara vuri vovouaro rutu purapao. Ora oiso osa vara kekepaoro vara riiriipaveira. Ora oiso osa vara iavirava oirara ora voea-ia rei vaisi purapaveira. Ari ita, viapau oiso varao iava oisi oai kareke piepareveira Aite. Ari rasitoa raga aueroaro-a evara. <sup>17</sup> ✧ Oire uva rera ro-ia rasito ora vara rutu varao oara riiriipaveira ovatakoroa rutu opesiperea. Ari ro ira Pauto vo vovouaro sirova vearovira rutu utuparo, eera-a ira Opeisi Asa Tootoo rutuva toupaveira.

### *Keripa Irara Kraisi-va Kareia Viroi*

<sup>18</sup> ✧ Kakae vure oaa, vigei-a vao ovoioapa vuuta-ia toupai. Oire uva vo vuuta eveipai rutu vao-ia. Eake iava? Uvare riro irara rutu-a Kraisi-va ora keripa irara oea karekepapea viroi. Ari ita, tuariri voea iava vuvu ro votava oiso, “Ro Kraisi-va ora keripato ira tapo epao vo vuuta-ia eva uriosa aue-ia ovoioapa vuuta. <sup>19</sup> Oire uva voea-a evoea keripa irara oea viapau oiso vigei tapo ora tavosiaepa. Eisi osa vituaro iava vigei kavuiva. Vosa oiraopavira rutu vigei tapo ora tavosiaepa, osa iava uvuipai ra touvira rutu vigei tapo toupaveira. Ari vigei arova vaaepa. Oa iava uvuipavie ra vearovira rutu taraipavio oiso, Asi viapau oiso voea vigei tapo ora tavosiaepa.

<sup>20</sup> ✧ Ari ro raga Tugoropato Uraurato ira visiia toupaveira, Kraisi ira vara pierëve visiipa, eera ira iava oiraopa reo rutu-ia vearovira taraipaveira. <sup>21</sup> Oire uva vo rigato puraavoisi visiipa, aue iava uvare

✧ **2:11:** Jo 12:35 ✧ **2:14:** 1 Jo 1:1; Ef 6:10; Jo 5:38 ✧ **2:15:** Ro 12:1-2; Mt 6:24; Je 4:4 ✧ **2:17:** 1 Ko 7:31 ✧ **2:18:** 1 Pi 4:7-8; 1 Jo 4:1, 3 ✧ **2:20:** 1 Ko 2:9-16; 2 Ko 1:21



oiraopa reo rutu-ia taraipataveira. Ari ita, viapau vao-ia oiraopa reo rutu tarai asavira toupataveira. Ora vao-ia tapo oiso taraipataveira, Viapau oiso vao kuuvu reo vova oiraopa reo rutu-ia karekepapeira.

<sup>22</sup> ✧ Oire uva iroutoa rutu-a rera ro riro kuuvuto? Ari ro raga ira oiso puraproveira, “Viapau oiso Jisas-a ro Krai ro ira arureva Pauto vo rasio iare. Uva rera raga-a eera Krai-va keripato. Ira vo aorei rutu ora Aiteto ora Oviito akaipa piepareveira vo aoreire isivapaoro. <sup>23</sup> Uvare ro oirato ira oiso Oviitoare isivaparo, eera ira Aitetoare tapo isivaparo. Ari vosa irouto ro ira Oviito vaisipaoro oearovupa tavitaviparo oiso, “Jisas-a Pauto Oviitoaaro,” eera ira-ia toupaveira Aite.

### *Tugoropato Uraurato Ira Vigei Tarai Piepareveira Oiraopa Reo Rutu-ia*

<sup>24</sup> Ora vatatopo iraopata, ra vo siposipo oriru iraopata oa uvutava voari rovoa-ia. Ra goruvira rutu vo siposipo-ia pitupata. Ra va-ia tupaoro uvuipatai ra Oviito tapo ora tavosivira rutu toupata ora Pauto Aite. <sup>25</sup> ✧ Krai ro ovoi rutu vatereva, oisore ra va iavirava Tootoo Ovoi rutu oupape rera ruvara-ia.

<sup>26</sup> Ari ita, vo rigato puraavo visiipa voeao iava oea oiso ruipapaaveira rutu ra visii-ia kokarapaave voeao vo reoroaro-ia kuuvuara. <sup>27</sup> ✧ Uva viapau oiso torevokopapeira voeapora oearovu, oiso ra visii tarai piepaive vo reo iava oiraopa reo o vo reo iava kuuvu reo. Eake iava? Uvare Tugoropato Uraurato visii-ia toupaveira ro ira vara piereva Krai visiipa. Rera-a Tugoropato Uraurato ira visii tarai piepareveira orekerovu rutu iava, uvare rera vo siposipoaro-a oiraopa rutu. Viapau oiso keakeapavira oirara tarai piepareveira. Oa iava uvui iraopatai ra rera vaaro oiraopa reo rutu sirova utupata vo osa Krai tapo tavosivira toupata.

<sup>28</sup> Ari ita, kakae vure oaa Krai tapo tou iraopata vo vokio iare oa-ia oiso vorevira karekeroverea ita. Uva eisi tuuvu vovouvira tupaoro viapau oiso ra ora vataupavio rerapa ariipaoro vo vokio-ia oa-ia vorevira ora karekeroverea vigei iare. <sup>29</sup> ✧ Oire uva oiso ragavira taraipata, Krai torevoko vovouvira rutu toupaveira oa-ia viapau vurua vai. Oisi eisi ragavira rera-ia taraipaoro uvuipatai ra vao-ia tapo vearovira taraipata ro iava oirato ira torevoko vovou purapave, ira raga ita-a eera Pauto oviitoaaro.

## 3

### *Oiso Toupapeira, Vigei Pauto Ovii Iraraaro*

<sup>1</sup> ✧ Oiraopavira rutu Aiteto-a ira vigei kaviko iraopaveira rutu. Uva pute pie sirao rutu-a rera vaaro oa-ia vigeipa toupaveira. Oa-a vao vituaro iava vo vaisio vigei-ia tupaiveira oiso, Vigei-a Pauto ovii iraraaro. Uva ita, oiraopavira rutu uvare oisi ragavira toupapeira. Eva-a oa vituaro iava voeao voeao vo rasio-ia viapau oiso vigei-ia taraipaaveira vo osa oisi eisi toupape. Uvare viapau oiso Pautoa-ia taraipaaveira. <sup>2</sup> ✧ Kakae vure oaa, oiraopavira rutu osa oiso toupapeira, Vigei vao-ia Pauto ovii iraraaro. Uva tou visivi roroio pievira rutu ora vigei vo touaro-ia taraipavioverea, otoua pura piroverea vovio Pauto vo urularo-ia utupa visivi. Ari vo vokio oiso taraipaviei, Oiraopavira Krai vore vorevira karekeroverea vigei iare. Oa iava rera kekepera oiso osa oiraopavira rutu toupaveira. Vo osa rera-ia oiso taraioro oisi rutu karekevioverea osa rera. <sup>3</sup> Eva-a oa iava voeao oea Krai-ia rariipaoro tupaiveira tuevira vo vuutaore oa-ia vaeavira

✧ 2:22: Re 21:8 ✧ 2:25: Jo 3:16-21, 17:3 ✧ 2:27: Jo 16:7-13 ✧ 2:29: 1 Jo 3:7, 9, 4:7 ✧ 3:1: Ef 2:1-7; Jo 1:12 ✧ 3:2: 1 Ko 13:9-13; Ro 8:15; 2 Ko 4:17

toupaiverea oiso osa rera, vo rara ora voea iava sopaura oaive tokipaive oiso ra roroiovira toupaive. Osa iava viapau vuria vai voea-ia, oiso rutu osa Kraís ro ira-ia viapau vuria vai.

<sup>4</sup> Ari ro oirato ira vuri vovou purapareve, eera-a ira Pauto vaaro reo goru gasipareveira. Eva vituaro-a vao-ia uvare va eva vuri vovou oa sirova reo goru gasipaiveira. <sup>5</sup> Oire uva taraipata oiso, Kraís oiravira karekeroera vo rasitóa-ia, oisore ra raiva purareve oirara rutu varaaro vuri vovouro verapa raiva. Ora aue tapo taraipata oiso, Viapau rutu vuri vovou oisoa purapareve Kraís vo osa oisoa vo rasitóa-ia toupareve. <sup>6</sup> Oire uva voeao oea oiso Kraís-va ora tavosipaaveira, oea viapau oiso vorevoreripavira vuri vovouro purapaiveira. Ari ro ira vuri vovou purapareve vorevoreripavira, eera-a ira viapau oiso Kraís vo touaro vituaro eveirevora. Ora viapau oiso Kraís-ia tarairoera.

<sup>7</sup> ✧ Kakae vure oaa, viapau rutu oiso ra iravupa ora visii iava vasepata, ro ira uvuiparoi oiso ra visii keakeapareve. Vao vituaro iava oiso-ia vo osa ro ira torevoko vovou rutu purapareve, ira-a eera ira-ia torevoko vovou rutu toupaiveira oiso rutu osa Kraís vo vovouaro. <sup>8</sup> Ari ro ira vorevoreripavira vuri vovouro purapareve, ira-a eera Seten reraaro. Uvare Seten vo pitupituaro sirova utuparoveira. Evo vovou vuria rutu Seten oa oisoa purapareve voari rutu rovoa iava, vo osa vo rasio pura asavira touva. Oire uva Pauto Oviitoaro karekeroepa va vao Seten vo kovoaro opesi piesa. <sup>9</sup> Ari ro oirato Pauto reraaro ira viapau oiso vorevoreripavira vuri vovouro vai purapareve. Eake iava? Uvare Pauto-a Tootooa rutu vituaro. Ovituaroo-a vao rera vaaro oa rera sopaaro-ia oirato toupaiveira. Ari ita, Pauto-a eera oirato aitetooaro. Oa iava viapau uvuiparoi oirato ra vorevoreripavira vuri vovouro vai purapareve. <sup>10</sup> Oire ra oiso ragavira taraipavio, Pauto ovii iraraaro pisa visiví rutu toupaiveira voeapa Seten ovii iraraaro. Vao vituaro iava vosa ro ira viapau torevoko pitupitu purapareve, ora viapau oiso ora rera sopaaro vatepare araokotoapa siraopaaro, ira-a eera ira oiso toupare, Viapau oiso rera-a Pauto oviitoaro.

### *Oiraopa Vovou Rutu Sopaua Rutu Vatepasa Araokotoa Oviipai*

<sup>11</sup> Vo tavitavia-a vao-ia oa iava uvutava voari rovoa-ia oa oiso purapai, Vigei uvui irapaviei ra oearovivupa siraopavio ora vigei iava voea. <sup>12</sup> ✧ Uva viapau rutu oiso uvuipaviei ra oiso piepape osa ro-ia Adam oviitoaro Ken Seten reraaro. Ira araokoto uporeva rera kopii pieoro. Oire uva eake-a vao oare araokoto upoora rera kopii piereva? Oa-a vao vituaro oiso toupaivoi-ia, uvare rera oisoa vuri pitupituro purapareve, ovusa eera araokoto torevoko pitupituro oisoa purapareve.

<sup>13</sup> ✧ Araoko irara oaa, opeita oearovu vo vovouaro-ia tavetave iraopata voearo vo rasio-ia vo rara visiire kasipu iraopaave. <sup>14</sup> Ari vigei-a vao vigoa ora vigei araoko iraraaropa sirao iraopavioveira. Eva-a oa iava uvuipaviei ra taraipavio oiso, Va vao kopiipa vovou oa iava iviropaviera vore tootoopa vovou-ia. Uva ro oirato ira viapau siraopa vovou purapareve, eera-a ira touvira touparevoi kopii vovou raga-ia. <sup>15</sup> ✧ Ro ira touvira kasipu vovou purapareve ora rera araokotoaarore, ira ita oiso touparevoi osa riro oira upoto. Oa iava rera-ia taraipatai oiso, Viapau oiso ro-ia Tootoo Ovoi vai toupaiveira. <sup>16</sup> ✧ Oire uva apeisi ragavira uvuipaviei ra rearovira rutu va-ia vao sirao vovou taraipavio? Ari oiso-ia, Kraís ora rera iava vasereva oearovupa, oiso ra rera kopii pieive vigei iavirava. Oa iava uvui irapaviei ra ora vigei iava tootooara oavi rutu vatepape oearovivu araoko

✧ 3:7: 1 Jo 2:1, 26, 29; Hi 6:1-9 ✧ 3:12: Jen 4:1-15 ✧ 3:13: Jo 15:18-27 ✧ 3:15: Mt 5:21-26  
✧ 3:16: Ro 16:1-4

irara oavi tauvapaoro. <sup>17</sup> ✧ Vosa irouto ro ira riroara rutu-ia orekerovu rutu pitupareve, ra varava reasiparo iravivu araokotoaaro tauvapa arapa, vosa eisi piepareve, ra eake iava oiso puraparo, “Ragai Pautoa-pa siraoparai rutu ora ragai sopaaro rutu iava?” Viapau oiso uvuiparoi rutu ra oisi pierveve. <sup>18</sup> Kakae vure oaa, vigei viapau rutu uvuipavie ra sirao reo purapape vo ragava gisipoara iava. Viapau. Ari vosa sirao vovou rutu purapape, oa iava uvuipapai oearovu va eveipasa, vo rara sirao vovou rutuva kovopaoro oearovivu tauvapape.

### *Ro Riro Rarito Viapau Uvuipa Ra Uririparo Pautoa-pa*

<sup>19</sup> ✧ Uva oisi eisi oearovupa siraopaoro uvuipavie ra oiso taraipavio ora vigei-ia, Oiraopa vovou purapai va vao Pauto vo vovou rutu. Osa iava uvuipavie ra Pauto osireiario-ia rasivauru vovouvira rutu toupape. <sup>20</sup> ✧ Vao rutu vituaro iava vosa ora vigei iava sopaura oavi rutu-ia sovopape oiso, O ari vuri pitupitu purapai. Oire uva uvuipavie ra oiso ragavira taraipavio, Pauto vo taraloro vigei vo vovouroaro-ia putepaiveira rutu. Uvare orekerovu rutu-ia taraiparoveira rera Pauto. Eva oa-ia uvuipavie ra Pauto osireiario-ia uriri asavira toupape. <sup>21</sup> ✧ Oire vate irara oaa, vosa ora vigei iava sopaura oavi sovopaoro oiso purapavio, Asi vigei viapau oiso vuria vai purai, eisi osa iava uvuipavie ra Pauto osireiario-ia uriri asavira rutu toupe. <sup>22</sup> ✧ Uva varao oupapeira rera ruvara-ia oare rera arepapeira. Eake iava? Uvare rera vaoro goru reo uvupapeira oisi va purapasa. Uva va-a eva oa-ia rera roru piepapeira ora vigei-ia. <sup>23</sup> Uva va-a vao oare vigei tavitavipareveira rera vo reoaro-ia gorua oiso-ia, Rera vaisiario oirao piepape rutu rera Oviitoaaro Jisas Krais. Ra oeavivupa va iava siraopavio voeao vigei iava voea oiso osa Pauto goruvira rutu vigei tavireva. <sup>24</sup> ✧ Oire ro ira Pauto vo reoaro sirova utuparo va purapaoro, Pautoa-va ora tavosiroi, vo osa Pauto rerava ita ora tavosiroi vo rera sopaaro-ia. Uva apeisi ragavira uvuipavie ra Pautoa-ia taraipavio vo osa toupareve vo vigei iava sopaura-ia? Ari ro raga iavirava ita ro-ia Tugoropato Uraurato Pauto ira vatereva vigeipa.

## 4

### *Pauto Reraaro Uraurato Ora Vurito Iravu Uraurato*

<sup>1</sup> ✧ Avoeao vate irara oaa, opeita oevu oirara vo reoaro oirao pie ragapata voeao oea oiso purapaaveira, “Ragai-ia Tugoropato Uraurato touparevoi.” Viapau. Ari uvuipatai ra voea kerisi irapata rerere ro uraurato vo osa voea rovirieipata oiso, Ro Pauto reraaro, ari vo urauraaro vo rasio iava. Aue vituaro iava uvare riro irara rutu profet irara voeao reo topa piepa irara oea vokapaiveira voraro rutu. Oea kuuvuvira Pauto vo kovoaro purapaiveira. <sup>2</sup> ✧ Uva uvuipatai ra vearovira Pauto reraaro evei irapata, uvare Pauto reraaro Uraurato ro-ia toupareveira ira oirara oiso tavitavipareveira, “Jisas Krais oiravira urioroepa vo rasio iare.” <sup>3</sup> Ari ro ira oiso puraparoveira, “Viapau oiso Jisas Krais-a Pauto Oviitoaaro,” eera-a irara viapau toupareveira Pauto reraaro Uraurato. Viapau. Ari iravu raga-a uraurato ira Krais-va ora keriparoveira. Ari ita, rera iava uvu rovtava ira iava oiso puraaepa, “Urioroverea.” Uva rera epao ira touparevoi vo rasio-ia.

<sup>4</sup> ✧ Oire uva visii-a vao ovii irara oaa Pauto voeaaro visiigoa voeao-ia kuuvu irara profeta irara putetavora, voeao oea visii varaaro oirao pie vovouro oavisii piro pie ragapaivora, osa viapau uvuipaaera. Eake iava?

✧ 3:17: Je 1:22-27 ✧ 3:19: 1 Jo 2:21 ✧ 3:20: 1 Ko 4:4 ✧ 3:21: 1 Jo 5:14 ✧ 3:22: Mt 7:7, 21:22; 1 Jo 2:3 ✧ 3:24: Ro 8:9 ✧ 4:1: 2 Ko 11:13-15 ✧ 4:2: Ro 10:8-13 ✧ 4:4: Ro 8:31-39; 1 Jo 5:4

Uvare Tugoropato Uraurato vo varivariaro visii sopaaro-ia toupaveira, ro ira vurito vo varivariaro-ia putepareveira rutu. Ro vurito ira voeaopa reiparoveira vo rasio-ia. <sup>5</sup> Voea kuuvu irara profet irara oea vo reoro kosi piepaiveira varao iava orekerovu rasito aueroaro. Oa iava oearovu voearo vo rasio iava oearoa voea vo reoroaro uvupaoro oisi vara purapaiveira, uvare voeao tapo ita profet irara vo rasio-ia tou irara. <sup>6</sup> ✱ Ari vigei-a Pauto voeao. Uva ro ira Pautoa-ia taraiparoveira, ira ita vigei vo reoroaro uvupareveira. Ari ro ira viapau Pautoa-ia taraiparo, eera-a ira vigei vo reoroaro reasiparoveira. Eva-a oa iava uvuipavieira ra urauratoarei vearovira rovirieipape oisi va iava vaiterei eveipaoro oiso, Irvu-a ro oiraopa rutu vituaro. Ari ro-a ro ira oirara piro piepareveira voea keakeapaoro.

### *Pauto-a Vereopa Vovou Rutu Vituaro*

<sup>7</sup> Vate irara oaa, uvui iraopavieira ra ora vigei iava oearovivupa siraopavio, uvare vereopa vovou rutu vituaro-a vao-ia ro-ia Pauto. Uva aa ro-a ro-ia oearovu kavikopareveira? Eera oirato Pauto reraaro ira Pautoa-ia taraiparoveira rutu. <sup>8</sup> Ari ro ira viapau kaviko vovou purapaveira, eera ira viapau oiso Pautoa-ia taraiparoi. Eake iava? Uvare Pauto-a kaviko vovou rutu vituaro. <sup>9</sup> ✱ Uva Pauto ora rera vaoro kaviko vovou karekereva, vo uvare ora rera Oviitoaro Kataito arureva vo rasio iare. Oa iava uvuipavieira ra oiraopa tootoo rutu Tootoo Ovoi oupape vao iava Oviito vo kovoaro. <sup>10</sup> Oire uva eake rutu-a vao kaviko vovou rutu vituaro? E oiso toupavioi pasi ra Pautoa-pa sirao rovpavio, eke? Viapau. Easi vao-ia uvare Pauto vigei sirao rovoroea rutu. Oa iava Oviito arureva vo rasio iare raiva purasa, oraiva-ia vigei vo vuri vovouro oavi vo voriaro opesi pierera.

<sup>11</sup> Vate irara oaa, vosa Pauto oiraopavira rutu eisi vigeipa siraoarpa, uva vigei ita uvui iraopavieira ra oisi oearovivupa sirao iraopavio. <sup>12</sup> ✱ Ari ita, viapau oiso iraierei ro ira Pauto kekereva. Ari vosa oiraopavira rutu ora vigei iava oearovivupa siraopavio, eisi osa iava uvuiparoi Pauto ra vo toupave vigei iava sopaura-ia. Eva-a oa iava uvuipai ra rera vo kavikoaro kovopaive riropaoro vo vigei iava sopaura-ia.

<sup>13</sup> Uva uvuipavieira ra oiso taraipavio, O ari, Pautoa tapo tavosivira toupapeira. Ora aue-ia tapo osa vigei tavosivira toupaveira, uvare vigeipa Tugoropato Uraurato vatereva. <sup>14</sup> Ora oiso tapo osa va vao kekeerao ora vigei varaaro iava osireiara. Oa iava uvuipavieira ra oearovivu oiraopavira tavitavipape oiso-ia, Aiteto Oviito arureva, auere ra oiso rasio-ia tou irara vorevira oureva ora rerapa voea varaaro tootooara oaive orirusa. <sup>15</sup> Ari ro ira oirara tavitavipareveira oiso, "Jisas-a Pauto Oviitoaro," eera-a ira sopaaro-ia Pauto toupaveira, ovusa rera ita Pautoa-va tavosivira toupaveira. <sup>16</sup> Uva vigei tapo ita vo vovou-ia taraipavioveira oa purareva Pauto vigeipa. Ora rera vaoro kaviko vovou oa oirao piepapeira tapo.

Iu, Pauto-a kaviko vovou vituaro. Vosa irouto ro ira vo vovou vituaro sovara-ia toupaveira vo vovou purapaoro, eera-a ira Pauto tapo tavosivira toupaveira, ovusa ita Pauto rerava ora tavosiparo. <sup>17</sup> Oire uva eake-a vao oare vo kaviko vovou eva kovopaoro riropapeira sopaura oavi-ia? Auere ra va iava tuuvu vovouvira rutu toupape vo vokio-ia oa-ia Pauto oirara rutu rovirieireverea. Rara vearovira rutu ora vigei-ia taraipavio oiso, Akoea, ari vigei vo touaro vo rasio-ia oiso rutu toupai osa Krai vo touaro toupaveira. <sup>18</sup> Vosa kaviko vovou toupaveira vo vigei iava sopaura-ia, oa iava viapau uvuipai ra uriri vovou otavukiaro toupaveira vo ora vigei

✱ 4:6: 1 Ko 2:9-16; Jo 8:47; 1 Ti 4:1 ✱ 4:9: Jo 3:16; 1 Jo 5:11; Ais 9:6-7 ✱ 4:12: Jo 1:18; 1 Ti 6:16

iava sopaura-ia. Viapau. Aue vituaro iava uvare kaviko vovou rutu-a vao oa uririara rutu kosi piepaiveira. Oire vosa uriri vovou vai toupave vo irai iava sopaua vai-ia, ra va iava taraipaave oiso, Asi ro vuria vo voriarore rugorugooapaari. Oire va-a eva uriri vovou oa vituaro iava kaviko vovou viapau uvuipai oiso ra rirope rutu rera-ia.

19 ✧ Siraopavio. Eake iava? Uvare Pauto vigeipa sirao rovoroeapa. 20 Oire vosa irai oiratoa vai oiso puraro, “Ragai Pautoa-pa siraoparai,” vo osa araokotoaarore kasipua rera-ia toupave, oire uva rera-a eera riro kuuvutoa rutu. Oa vituaro iava oiso toupai, Vosa viapau araokotoaaropa sirao rovoparo, ro ira uvuiparoi rera kekepareve, oire uva apeisi ragavira oiso osa iava uvuipa ra Pautoa-pa siraoparo, ro ira viapau uvuiparoi ra Pauto kekepareve? 21 Riro goru reo rutu vatereva Pauto vigeipa oiso-ia, “Ro ira Pautoa-pa siraoparo, eera-a ira uvui iraoparoi ora rera araokotoaaropa tapo sirao iraoparo.”

## 5

### *Riro Oirao Pie Vovouto Ira Rasito Vo Pitupituaro-ia Putepareveira*

1 ✧ Vosa irouto oiso oirao piepareve, Pauto Jisas roporevoiva, rera-ia vo vaisio tovoreva, Krai vigei tuvetuvepatoaaro, ira ita-a eera oirato Pauto oviitoaaro. Uva ro ira Aitepa siraoparo, ira ita ovii irarapa tapo siraoparoveira. 2 ✧ Eisi osa iava uvuipaviei ra taraipavio oiso, Vigei-a vao Pauto ovii iraraaropa siraopavioveira, uvare Pauto Aite irapa siraopavioveira. Ora rera vo rearo tapo sirova utupavioveira vao goru reo rutu. 3 Vosa vo reo riro goru reo sirova utupavio vo reo orirupaaro vo vigei varaaro-ia sopaura oavi-ia, ra oiso toupape, Vigei ita Pautoa-pa siraopavioveira. Ora vao rera vaaro riro goru reo rutu vao oa viapau oiso vavagisipapeira vigeipa vo osa va purapape. 4 ✧ Aue iava uvare voveo oea oiso toupaveira Pauto voveaaro rera vo rearo purapaaro, oea uvuipaaveira rutu oiso ra rasito vo pitupituaro vo goruaro-ia putepave. Uva vo goruo-ia putepa vituaro oiso toupai, Eva vigei vaaro oirao pie vovou rutu. 5 Ari ita, irouto-a ro ira uvuiparoi vo goru-ia vao rasito vaaro putepave? Ari ro raga ira oiso purapaveira oirao piepaaro, “Jisas-a Pauto Oviitoaaro.”

### *Pauto Roroiovira Taviroepa Oviitoa Iava*

6 ✧ Jisas Krai ira raga vo rasio iare urioroeapa. Oa iava baptaisa oureva uuko ovi-ia. Ora oiso osa ora rera iava revasiva vatereva evao parikou-ia kopiioro. Ari ita, uva viapau oiso vao ragava urioroeapa baptaisa vo pitupituaro aue-ia uukoa. Viapau. Ari varei rutu-a oiso-ia, uukoa vao-ia ari revasiva o. Oarea rutu oirao piepareveira Tugoropato Uraurato, uvare rera raga oiraopatoa rutu. 7 Oire uva vo peva rutu-a varao-ia oara oiraopavira rutu tavitavipapeira Krai iava oiso-ia, 8 ✧ Tugoropato Uraurato-a ro-ia, ari uuko-a vao-ia, ari revasiva-a o-ia. Opevaa rutu kataivira rera iava oiraopa reo rutu kosi piepaiveira. 9 ✧ Oire uvuipaviei ra vo reoro oirao piepape oara oiraopavira purapaveira oearovu oirara orekerovu iava. Oiso osa Pauto va vao oirao pie reo purapaveira Oviitoa iava. Oreoa-a eva oiraopa reo oa oirara vo reoroaro-ia oiraopa reoro putepaveira rutu. 10 Uva ro ira Pauto Oviitoaaro oirao piepareveira, eera-a ira sopaaro-ia Pauto vo reoro oiraopa reo rutu toupaveira. Ari ro ira viapau Pauto vo reoro oirao piepareve, eera-a ita ira Pauto oiso piepare, Riro kuuvuto. Eake iava? Uvare

✧ 4:19: 2 Ko 5:14-17 ✧ 5:1: 1 Ko 15:1-11; Jo 1:12 ✧ 5:2: 1 Jo 2:5 ✧ 5:4: Hi 11:1-6; Jo 16:33

✧ 5:6: Mt 3:13-17; Jo 19:34 ✧ 5:8: Jo 19:31-37; Mt 18:16 ✧ 5:9: Jo 8:17-18; Mt 3:16-17

viapau oiso vao oiraopa reo oirao piepareveira rutu vo reo oa purareva Pauto ora rera Oviitoaaro iava tavitavipaoro. <sup>11</sup> Oreoa vao oiso purapai, “Pauto vigei vatereva Tootoo Ovoi vo tootoo-ia oa-ia vituparoveira rera raga Oviito.” <sup>12</sup> ✧ Ari ita, ro ira Oviitoava ora tavosivira rutu toupaveve, eera ita ira-ia Oiraopa Tootoo rutu toupaveira. Ari vosa irouto-a ro ira viapau Oviitoava ora tavosivira toupaveve, uva rera-ia viapau oiso Oiraopa Tootoo toupavoi.

*Vigei Uvuipaviei Ra Taraipavio Oiso, Vigei Tootoo Ovoiva Toupai*

<sup>13</sup> ✧ Vo rigato puraavoi visiipa oisore ra vearovira rutu taraipata oiso, Tootoo Ovoiva toupatavoi visii vao-ia visiigoa vo Pauto Oviitoaaro vaisiario oirao piepataveira. <sup>14</sup> ✧ Oire uva uvuipaviei ra tuuvu vovouvira toupape vo Pauto osireiario-ia, uvare taraipaviei oiso, Vigei varaaro variriara uvupareveira, vo osa rera arepapeira rera raga vo ruipaaro sirova utupaoro. <sup>15</sup> Ari ita, vigei vo reoroaro uvupareveira, vo osa variripavioveira rera akepaoro. Oa-ia oiraopavira rutu taraipavio. Oire uva va-a eva oa vituaro iava uvuipaviei ra oiso ragavira taraipavio, Varao epao oara vateparevere vigei vo ruipaaro uvui ovoipaoro.

<sup>16</sup> ✧ Oire vosa irai ro ira araokotoaarova siitueparo, ovusa vuria vai purapareve ro oirao pie vovouto, ovuriava eva viapau oiso opesiroverea Tootoo Ovoi ou asavira, uva uvuiparoi ra Pauto arereve rerapa araokoto. Oa iava uvuiparoi ra tootoo vatereva araokotoaropa rera vo rugoaro torevokopaoro. Uva voeaore reoreoparai oea oiso varao vuriara purapaive oarava viapau oiso opesiaverea Tootoo Ovoi ou asavira. Ari oavuei tovura vuria, ovuria vo vovouaro sirova utupaoro uvuipaai oirao pie vovou irara ra vo vovou iava opesiave Tootoo Ovoi ou asavira. Uva viapau oiso visii tavitavipaavoi oiso ra rerapa Pauto aketa eera ira eisi vo vuri eva purarevora. Viapau. <sup>17</sup> Oaravu rutu vuri pitupituro oara purapaoro vuri vovou purapapeira. Ari oaravuei varao oara viapau oiso visii oiso piepaiveira ra vara iava opesipata Tootoo Ovoi ou asavira.

<sup>18</sup> Vigei taraipaviei rera-ia oirato Pauto reraoro ira viapau vorevoreri-pavira vuriara purapareveira, uvare Pauto Oviitoaaro Jisas rera utopareveira. Eva-a oa vituaro iava viapau uvuiparoi Vuritoa rutu Seten oiso ra rera vuri pieveve eera oirato.

<sup>19</sup> Oire uva uvuipaviei ra ora vigei-ia taraipavio oiso, Vigei-a vao-ia Pauto voeaaro, vo ovusa riro irara rutu voeaao oearovu oea toupai vo rasio-ia, oeapa reiparoveira ro-ia Seten.

<sup>20</sup> Uva Pauto Oviitoaaro-ia taraipavio oiso-ia, Ira urioroepa vigei vo rugorugooroaro aviavi piesa, oisore ra va iava aviavi pievira rutu taraipavio Oiraopatoa-ia Pauto. Uvare vigei varaaro tootooara toupaveira rera raga-ia Oiraopatoa rutu Pauto ro raga ita Oviito Jisas Krai. Eera raga Oiraopatoa rutu Pauto ira raga ita Tootoo Ovoi rutu vituaro.

<sup>21</sup> Kakaevure oaa, ora vatatopo iraopata voeaopa riro kuuvu irara pau irara ora varao kuuvu siposiporo. Oara evara uvuipai ra Pauto vo tavukiario ouve vo visii iava sopaura oavisii-ia.

Eisivi raga osa vo pasio purapaavoi visiipa. Ra opesipe.

## 2 JON

### Irapa Reoro Vo Vukuo Iava

Ro ira vo pasio rigatoreva ira ita opa riakova reesireva ora voeao oira voeaaro ovii irara oiso ra vo reoro vieiive. Ari tarai irara oiso ruguru-goopaaveira, Ira ovoovovira oevu lotupa irara reesireva oira vaisipaoro o riakova. Uva goruvira vo pasio-ia rigatoreva oiso ra oirao pie vovou irara siraopa vovou pura iraopaive oearovivuvpa siraopaoro, vo osa Pauto vo reoaro vearovira uvupaive (2 Jo 5-6). Uva ita, voea tavireva oiso, Teapi oevu kuvuu irara vo siposiporoaro uvupata, voeao oea oiso purapaaveira, Krai viapau oiravira urioroepa vo rasioa-ia toupasa.

1. Aviavi pie reoro vo pasio iava, 1-3.
2. Rovopa reo goru vao oa oiso purapai, Iravivupa sirao iraopau, 4-6.
3. Vatatopo pie reo voeao iava riro kuvuu irara tisa irara, 7-11.
4. Ovoioapa reoro varao, 12-13.

<sup>1</sup> Ragai-a vao-ia reito ragoa vo rigato puraavoi viipa oira vasiva rutu riakova vearovira rutu. Viigoa roporeva Pauto ora vo vureo tapo kakae vure vii voeaaro. Visii rutu eva visiigoa kaviko iraopaaveira. Uva viapau oiso ragai raga-a, ari oearovu tapo-a voeao oearoa Oiraopa Reo-ia tarai iraopaaveira rutu. <sup>2</sup> ✧ Ore-a vao Oiraopa Reo oa vigei sopaaro-ia toupavoi ora toupaveira vokiara rutu-ia. <sup>3</sup> Oire uva Pauto arepaavoi ro Aite ora Jisas Krai Aiteto Oviitoaro, auere ra tauva vatesi vigeipa, ora sirao vovou, ora gavaure vovou viigoa oiraopa vovou-ia tarapavioveira, ora vao-ia kaviko vovou.

#### *Uvui Iraopaviei Ra Kaviko Vovou Rutu Purape*

<sup>4</sup> ✧ Roru iraopaavoi rutu oearovu vii ovii iraraaro iava kekepaoro voeao oea oiraopa reo rutu sirova utupaaveira, oiso rutu osa evo reo iava vigeipa goru reo vatereva Aite. <sup>5</sup> ✧ Oire uva vearovira riakova vii tavipaavoi oiso, Vigei tapo ita uvui iraopaviei ra oearovivu ita kaviko iraopape ora vigei iava voea. Uva viapau oiso airepa reo-a vao-ia oa rigatoavoi viipa. Viapau. Ari aue raga iava-a uvare riro goru reo rutu-a vao oa uvuepa voari rovoa-ia vo uva oirao pie vovou rovoepa. <sup>6</sup> ✧ Oire va vao-ia ora kavikopa vovou oa iava reoreoparai oa oiso ragavira toupaveira, Uvui iraopaviei ra Pauto vo ruipaaro sirova utupavio. Oiso osa vao riro goru reo oa uvutava voari rovoa-ia oa oiso purapapeira, Uvui iraopatai ra oiso toupata kaviko vovou rutu purapaoro.

#### *Uvui Iraopaviei Ra Goruvira Rutu Krai Vo Reoaro-ia Pitupape*

<sup>7</sup> ✧ ✧ Ari ita, riro irara rutu oirara oea sikasikaaepa uvarovu ruture vo rasio-ia, voeao oea oirara keakeapaiveira oiso purapaoro, "Jisas Krai viapau oiso oiravira urioroepa." Uvare voea-a riro kuvuu irara voeao oea Krai-va ora keripaaveira. Oea oiso rutu toupaveira osa ro Vurito Krai-va Keripato. <sup>8</sup> ✧ Ora vatatopo iraopata auepa, teapi viapau voria vai oavisii outa vao oare kovopataveira Pauto vo kovoaro purapaoro. Ari vosa ora utopata, oa iava uvupatai ra ora visii vo voriaro rutu outa vo Pauto ruvara-ia. <sup>9</sup> Oearovu viapau oiso Krai vo taraiaro raga sirova utupaaveira. Viapau. Ari osiposiporovu raga oupaoro vara-ia oirara tuvutuvepaiveira. Uva voea-a evoea oea viapau oiso Pauto tapo ora tavosipaaveira. Ari voea

raga oea Krai vo taraiaro sirova utupaaveira, evoea-a oea Aite vaio tapo ora Oviito ora tivosipaaveira. <sup>10</sup> ✧ Oire vosa irai vii iare karero viro ro ira viapau oiso Krai vo taraiaro ragava urioro, ra viapau oiso rera koata pieri vii vo kepaaro-ia voa rera pau piesa. Viapau. Ari ita, opeita rerava oiso purau, “Vearo voki rutu.” <sup>11</sup> Aue vituaro iava vosa ro ira rerava eera vearo vokireve, ira-a rera vo kovoaro ita eva vuri kovo purareve rerava ora tivosioro.

*Ovoioa Reo Vao-ia*

<sup>12</sup> Ari ita, riroara reoreoara rutu epao ragai varaaro touvira. Uva reasiparai vara iava visii tavitavi arapa vao-ia pepa ora ing. Viapau. Ari ragai oiso raga rugorugoparai rutu raripaoro, oiso ra visii kekea rutu. Oa iava vigei rutu uvuipaviei ra ora reoreovio. Ra va iava uvuipaviei ra rorupape rutu.

<sup>13</sup> Oeavu visiiva vearo voki puraivoi, voeao vii taataavaaro ovii iraraaro o iria roporeva Pauto.

Eisivi raga, ra opesipe.



## 3 JON

### Irapa Reoro Vo Vukuo Iava

Jon vao rigatoreva vo pevapa pasi rerapa Gaias. Uva oreoreorovu tapo vatereva Gaias vaaro oirao pie vovou goru piesa. Ora Gaias tapo tavireva ra iravu ro Daiotrefis verareve lotua iava, uvare vuri pitupituro oisoa purapareve, ora oisoa ora rera raga ora ira pieparo rutu.

1. Aviavi pie reoro vo pasio iava, 1-4.
2. Gaias-ia rorureva Jon rera vaaro-ia vearo kovo, 5-8.
3. Daiotrefis vo pitupituroaro iava vuriara rera tavireva, 9-10.
4. Demitrias ira vearo kovo purareva, 11-12.
5. Ovoioapa reoro varao, 13-15.

<sup>1</sup> Ragai-a vao-ia reito ragoa vo rigato puraavoi viipa Gaias viigoa oiraopavira rutu kaviro iraopaaveira. <sup>2</sup> Vatetoa oaa, variriparai oisore ra vearovira rutu toupari. Vao oa iava viapau oiso oavu avu vai vii iare uriopere oiso osa upiara. Ari ita, vearovira taraiparai vii-ia, uvare viapau oiso vuria vaiei vii iava sopau oara-ia. <sup>3</sup> \* Ragai roruavora rutu vo reo uvuoro araoko irara oavi gisipoaro iava. Uvare pou virooro vii iava ragai tavitaviivora oiso-ia, “Viapau oiso raveraveparoi vao oiraopa reo sirova utupaoro.” Ari ita, vii-a taraiparaveira, vo uvare oiraopavira rutu vokiara rutu-ia riro goru reo sirova utupaveira. <sup>4</sup> \* Uva viapau oiso oaei oa uvuipai ra vao-ia putepaive oiso osa ovii irara oaa iava uvupaoro rorupaaveira, vao iava uvare oiraopa reo sirova utupaveira rutu.

#### *Gaias Veoro Kovo Oiso Purapareve*

<sup>5</sup> \* Vatetoa oaa, kasivarivira araoko irara oave taupava kovo purapari. Ari ita, vosa oearovu araoko irara oara oea aapaapavira uriopaave vii iare, uva voea tapo ita tovira tauparaveira. <sup>6</sup> Uva evoea araoko irara oave evoava kareaiva, voeao lotupa irara tavitaviivora vova vii vaaro iava vereopa vovou. Uva vii tavipaavoi oiso ra tovira voeavi taupapari. Ra oisi iavirava topa pievira ita vokapaivere oearovupa siposipopasa Pautoa iava. Oa iava rera roru pierivere ora vii vaaro iavirava tauva. <sup>7</sup> \* Aue iava uvare voea vaaro voka rovoepa Krai-va kovopaoro voraro rutu. Uva vao viapau oiso oearoi oisoa ora voeapa arepaive orekerovu avu vaire voeao ruvara-ia oea oisoa viapau Krai oirao piepaive. <sup>8</sup> Eva-a oa vituaro iava uvui iroapaviei ra voea taupavave evoea araoko irara oave. Oa iava uvuipaveiei voea tapo kovopasa oiraopa reo kosi piepaoro oearovupa ita.

#### *Daiotrefis Vuri Pitupitu Purareva*

<sup>9</sup> Voviri tuaririvi oavivu gareavi pasia rigatoava voeapa lotupa irara. Uva viapau oisoa ragai vo reoroaro sirova utuparo Daiotrefis. Uva oiso raga vovouparaveira ra ora rera raga ora rei vaisi pieparo lotupa irara tuvetu-vepaoro. <sup>10</sup> \* Oire vosa poua viro, ra rera vaaro vuria poeraavere oiso vara varao-ia, kiuvu reoa vao-ia oa viapavira rutu akukuvira raga purapareveira vigei toga ragapaoro, ora kuvu reoro tapo purapareveira vigeire, osa viapau vara evoa rekasipareve. Vo osa oaravu tapo varao-ia oara purapareveira oiso-ia, Viapau oiso araoko irara oave koata piepareveira vo ora rera vo kepaoro-ia paupasa. Uva ita, oearovivure koruparaveira vo osa

\* 1:3: 2 Jo 4    \* 1:4: 1 Ko 4:15; Fm 10    \* 1:5: 1 Ti 3:1-2; Ro 12:13; Hi 13:2    \* 1:7: 1 Ko 9:15-18; Ap 5:41, 20:33-35    \* 1:10: Pro 10:8-10; 2 Jo 12

eisi ruipa ragapaave oearovivu araoko irara koata piepasa. Uva rera vo ruipaaro oiso toupaveira ra voea kosi piepareve lotupa irara arova.

<sup>11</sup> ✧ Vatetoa oaa, opeita voeao vioepari oea vuriara purapaiveira. Ari uvuipau ra voea raga vioepari oea veaopara purapaiveira. Uvare ro ira veaora purapareve, ira-a eera Pauto reraaro. Ari vosa ro ira vuria purapareve, eera-a ira viapau oiso Pauto vo vovouaro eveipareveira, oisore ra oisi va purapareve.

### *Demitrias Vearo Vovou Oisoa Purapareve*

<sup>12</sup> ✧ Riro irara rutu Demitrias-ia oisoa egaegapaive rutu. Uva oiraopavira oisoa vearo kovo rutu purapareve. Eva-a oa vituaro iava uvuipaveiei ra vegei tapo voea vo reoroaro oirao pieve. Oire ra ragai tapo ita rera iava oiraopavira tavitavipara. Ari ita, taraipavei ragai vo reoro-ia vao oiraopa.

### *Ovoioa Reoreo Vao-ia*

<sup>13</sup> Riroara rutu epao reoreoara ragai varaaro. Uva viapau oiso uvuiparai viipa vara rigatoa aue-ia pentoa vai ora ing. <sup>14</sup> Ari rirovira rutu oiso ruipaparai ra vii kekea utupa visivi. Oa iava uvuipaveiei vegei rutu ra ora reoreove.

<sup>15</sup> Oire uva Pauto arepaavoi oiso ra gavaure vovou vatereve viipa. Uva vate irara oara rutu vo reo viipa sipopaivoi oiso purapaoro viire, “Vearo voki rutu.” Ora vii tapo ita osa varirivira purauverē voeore igei vate iraraaro katakataivira oiso, “Vearo voki rutu visiipa.”

Evavi raga osa vo pasio opesi piea.

## JUT

### Irapa Reoro Vo Vukuo Iava

Oearovu oiso purapaaveira, Ro Jut ira Jisas araorei ora Jems kokoratoaaro (Mk 6:3; Mt 13:55), vo osa oearovu tarai irara oea oiso purapaaveira, Iravu raga Jut.

Uva vo reoreoro oara toupai vo pasio-ia oreoa vaeapai ora vo reoreoro oara rigatoreva Pita eraopa pasi oaro-ia. Riro goru reo rutu vatereva Kristen irarapa, uvare oearovu vuri vovou irara oea oisoa voea tavitavipaive oiso ra vuri pitupituro purapaive akukuvira raga. Ari ita, kuuvu reoro raga varao-ia. Jut oiso puraroepa, Voeao kuuvu irara oea oiso rutu toupaivoi osa oearovu riro kuuvu irara tuariripa irara (Ju 5-16). Uva voea vaisipaoro ovaisirovu oureva vova Jiu-pa irara vo vukuroaro iava, varao oara viapau toupaveira vao-ia vigei vaaro Tugoropa Vuku oa-ia pitupai vigei Kristen irara vo vokio (Ju 9, 14-15).

1. Aviavi pie reoro vo pasio iava, 1-2.
2. Tuariripa irara riro kuuvu irara vaisireva voea vo vuriroaro iava tavitavipaoro, 3-16.
3. Uvui iraopaai Kristen irara ra oirao piea-ia uvisivira pitupaive, 17-23.
4. Vearo vaisi vore Pauto, 24-25.

1 ✨ Ragai-a vao Jut ragoa vo rigato puraavoi Jisas Kraiss kovopatoaaro, ora tapo Jems araokotoaaro. Uva vo rigato puraavoi voeaopa oearo keeraroepa Pauto, oisore ra rera sirova utuave, evoea oea kaviko iraopaveira Pauto Aite. Oea oriruvira rutu toupaveira, uvare Jisas Kraiss tapo ora tavosi iraopaveira. 2 Uva Pauto arepaavoi, oisore ra siraopa vovou rutu vatereve ora gavaurea ora kaviko vovou uvuivira rutu.

#### *Vearo Siposipova Keripa Irara Vo Reoreoroaro Toupai*

3 ✨ Vate irara oaa, oiso ruipa rovoraera ra visiipa vo rigato puraa vo raivao vituaro iava, oa iava Pauto vigei vorevira ourevere ora rera iare. Oire uva evo rugoo isivaaro iava oiso ora sovorai, oa iava oiso vovouparai ra visiipa taru goruvira rutu vao rigatoa visii vo vovouroaro goru piesa rutu. Eisi osa iava uvuipatai ra uriri asavira vo vovouro vituaro iava reoreopata oara oirao piepataveira. Evara raga oara vatereva Pauto voeaopa rera vooaaro, oiso ra vo vovouro-ia taraipaave. 4 Eake iava? Uvare oearovu oirao pie vovou asa irara kaviruvira raga koatapaape visii tapo toupasa. Voeoro oearoa kuuvuvira tavitavipaaveira Pauto vo siraopo iava. Evoea oea oiso purapaaveira, “Eagara, uvuipaiei ra otopa pitupituro purapaio. Oa-ia Pauto uvuiparoi ra igei vura ragapareve igeipa siraopaoro.” Uva oisi-a eisi osa piepaoro Jisas Kraiss-re isivapaaveira ro Reito ora Turaro. Vo osa voari tuariri aue-ia Tugoropa Vuku oiso puraepa, “Voea vo voriaro oa ouivereva eva-ia vuria raga.”

5 ✨ Oiraopavira rutu vao-ia taraipataveira. Ari visii rugorugoo piepaavoi, oiso ra vearovira rutu vare rugoopata vao-ia oiso osa ro Turaro voea Jiu-pa irara oureva Isip iava voea orirusa. Oa isivaaro iava oearovu voea iava opesi pie ovoireva, oea viapau oisoa rera oirao piepaive. 6 ✨ Ora vo tapore rugoopata osa voea enselpa irara ora voea vaisiaro raga rei pieoro ora voea vo tavukiroaro kavuiva. Oire uva oisi-a eisi osa pieoro ora voea vova avaaepa. Uva va-a eva oa vituaro iava voeaei, oea tuukepaai vo vokio sen iro-ia pupuru sovara-ia. Evoa-a uva voea tovo pierevã Pauto vore

tuepaoro uva ora voea vo voriaro vuri vori ouiverea rara vo Rei Voki-ia. 7 Uva oiso tapo visii rugoo piepaavo ra vo uruireore tapo rugoo iraopata Sodom uruirei ora Gomora urui, vo uruiro tapo ouruiroa oisoa vo uruirei ruvara-iavi toupave. Uvare evo uruiro rutu-ia tou irara eisi vo pitupituro oisoa purapaive otopa pitupituro ora opitupiturovuvu, oara tapo viapau oisoa forevokopape, vo rara ora voea ragava oirara toupave otopaoro. Oa-ia ora voea vo voriaro ouiva vao-ia tuitui kasi. Oire uva oisi-a eisi osa pieoro vigeipa vo ovoovo rutu puraiva vo vokio iare vao iava eto kasi oa viapau opesia vai.

8 Oiso osa vo vokio-ia oa-ia oearovu oirao pie vovou asa irara vuri urusiro-ia orekerovu oupaoro vara sirova ora voea iava varaura vuri piepaiveira vo pitupituro-ia, oara-ia Pauto vo goruarore isivapaaveira. Oa iava voeao takaupaoro oiso purapaaveira, “Voeao reipa irara vuvuiua iava voea-akuku irara raga.” 9 ✧ Ari ita, ro-ia rovopato enselto Maikel ira viapau oiso eisi oai purareva. Ari vo osa ora uporoepa aueva Seten, vo osa ora kaureosiepa Moses kopii-ia vo rera ousa oiso, “Aa ro-a ro ira rera ouparevoi.” Oire uva Maikel avivikevira rutu rerava ora kaureoparoepa oiso rugoopaoro, Teapi vuri reoreo vai-ia Seten togareve. Oa-a vao oa iava rerare oiso puraroepa, “Reitoa raga Turaro uvuiparoi ra vii torevokoreve. Ra eakau.” 10 Uva vo vokio-ia voeao vuri irara varao tovipaiveira, oara-ia viapau oiso roroiovira rutu rugorugooapaaveira. Ari vo vovouro vuri vovouro oara sovopaiveira vo ora voea sopaura raga-ia. Oiso rutu osa vo karero kaakau kare oisi piepaiveira. Oara-a evara uvuipai ra voea opesi pie ovoipaive.

11 ✧ Siraovira rutu voeavipa. Uvare vuri pitupitu sirova oisoa utupaave oa purareva Ken. Oire uva va vao osa moni ou ragare oisoa ruipapaave. Eva vituaro oa iava vuri pitupitu sirova utusa oisoa arovipaave, vao oa oisoa purapareve Belam. Ora kaureo vovouro rutu tapo oisoa purapaive, oiso rutu osa ro Kora ira Moses-va ora kaureoroepa. Oa iava voea rutu opesi pie ovoireva Pauto, oiso osa Kora opesi pie rovoreva.

12 Oea oiso rutu toupaveira osa varao avekeara oara vatauvira rutu toupaveira vo uva takuvuvira aiopataveira katai vovou raga-ia. Eake iava? Uvare voa-a evoa uva oirara kove piepaiveira aue-ia vuri pitupitu, vo osa visii tapo aiopaive. Oire uva oisi-a eisi osa piepaiveira ora voea raga-ia rugorugooapaoro arii asavira rutu. Oea evoea oiso rutu toupaveira osa o rukuta iria-ia viapau kokeva vai oirara tauvapasa. Uvare kiuvu oira pupipareveira uvarovu ruture. Ora tapo uvare oiso rutu toupaveira osa oearovu evaovaro varao oara viapau kuepapeira ora vo evaro vo vuutaroaro-ia. Uva va-a eva oa iava oisoa tate ovoi piropa erako ovoisa kopii ovoioro vavurupa kaviro rutu tapo. 13 Oea oiso rutu tapo toupaveira osa riroa toru kou vo avakava-ia, uvare vuriara purapaiveira vuivuiara. Oa iava ruiruisovira oisoa karekepape vao toru kou vo viara-ia. Ora oiso rutu tapo toupaveira osa varao ruuso aaviikoro oara viripaiveira voraro rutu. Vo osa Pauto varapa uvavu reesireva vara voaoro. Uva uvuipai ra tauai rutuva roropaive rupa rutu-ia tupaoro. Vo uva viapau opesia vai.

### *Vuri Irara Oiso Voea Vo Voriaro Ouiverea*

14 ✧ Voari tuariri rutu uva ro oirato Inok oavu ravaa reo ravaavira purareva voeaore vuri irara. Uvare rera ro Inok ira Adam sirova uturoepa katai vatarapa aao puraoro. Ira-a ro ira oiso puraroepa, ‘Keketa. Turaro taru urioroverea riro ipuro (tausen) rutuva enselpa irara tugoropa irara.

✧ 1:9: Sek 3:1-10; Dan 10:13 ✧ 1:11: Jen 4:1-15; Nam 22:1-24:25 ✧ 1:14: Jen 5:18-24; Diu 33:2; Dan 7:10

<sup>15</sup> Oisore ra oirara rutupa voea vo voriaro vatereve. Uva va-a vao oia voea vuri irara togarevea, oea viapau oiso Pauto oirao piepaiveira. Voea raga ita evoa oea vuri vovouro purapaiveira. Oiso vara tovi reoro-a varao oara tu purapaiveira Pauto tovipaoro. Oara vituaro iava voeare oiso purarovea, “Visii raga ita vao visii goa vuri vovou purapataveira.” <sup>16</sup> ✧ Ari ita, voea vuri irara rirovira kaureopaoro oearovivu toga ragapaiveira oirara kuuvu reoro-ia. Vo ovusa ora voea vo vovouroaro vuriara raga sirova utupaaveira. Vo vovouro oara iava ora voea vaisiara raga riro piepaiveira. Ora oiso tapo osa oearovivu tapo agoagoto iraopaiveira, oisore ra va iava voea vo vovouroaro pura uviropape.

### *Oirao Pie Vovouro Oavisii-ia Goruvira Pitu Iraopata*

<sup>17</sup> Ari visii vate irara oaa, opeita vo reore ovau iraopata. Orea visii pa vateiva aposel irara ro iava vigei reraaro Turaro Jisas Krai voari tuariri. <sup>18</sup> Uva oiso puraaepa visii taviaro, “Vosa ovoio pa vuutaro pou pirovea, uva oearovu oirara karea virovea, voea oea oearovu agei piepaiveira visii iavirava visii tovipaoro. Uva voea raga-a evoa oea ora voea vo ruiparoaro sirova utupaaveira Pautoa-re isivapaoro.” <sup>19</sup> Evoa raga ita oea lotupa irara roo piepaiveira voepa orugoorovu rutu vatepaoro. Vo osa oirara raga vo rugooroaro sirova utupaaveira. Uva va-a eva oa vituaro iava viapau oiso voea sopoaro-ia toupaveira ro Tugoropato Uraurato.

<sup>20</sup> ✧ Uva visii-a vao vate irara oaa, viapau uvuipatai ra eisi piepata osa evoa. Ari uvuipatai ra ora visii raga ora tore pie iraopata vao-ia goruvira rutu pitupaoro visii vaaro oirao pie vovou vo Pautoa-ia, vo osa variripata Pautoa-re Tugoropato Uraurato vo goruaro iavirava. <sup>21</sup> Ora oiso osa uvuipatai ra vo tou rutu purata, oa iava uvuipatai ra ora sovota oiso puraoro, “Oiraopavira rutu. Uva Pauto vo siraoaro vigei-ia toupavoi.” Uva oisi-a eisi osa tupaoro uvuipatai ra vaore tuevira tupaoro Tootoo Ovoi oupata, oa vaterevea visii pa Turaro Jisas Krai visii pa siraoaro rutu. <sup>22</sup> Sirao vovou rutu kareke pie iraopata voeaopa oea vo vovouroaro avavaivira tupaiveira oiso puraoro, “Aa vao-a vao oa veorapai? Ari aa vao-a vao oa vuripai?” <sup>23</sup> ✧ Oearovu airerei iraopata voea vorevira kae piepaoro vova tuituia vaopa, teapi rovaave vo vuri tapi. Ora vo osa oearovivupa sirao iraopata vaopa uriripaoro vuri vovou oa purapaiveira. Ari ita, oiraopavira uvuipatai ra voea varaaro varoara veripata, varao oara vuivupaiveira vuriara puraoro.

### *Pautoa-ia Vuurapa Vaisi Purapaa*

<sup>24</sup> ✧ Ari Pauto uvuiparoi ra visii utopareve vaopa, teapi koveta. Oa iava eva visii vorevira ourevere ora rera iare, vo rara viapau vuri vovouro vai oavisii visii-ia touve roruvira raga tupaoro. Ari ita, visii tovorevea vo ora rera rutu puaro-ia, vo uva rera vo kerariaro vo aviaviaro roropaiveira vokiara rutu-ia. <sup>25</sup> ✧ Vearovira rutu Pautoa-ia Kataitao rutu. Ro ira vigei kae piepareveira ro vo kovoaro iavirava Jisas Krai vigei reraaro Turaro. Oirara rutu uvui iraopaai ra rera-ia vuurapa vaisi purapaive. Oiraopavira rutu oiso osa Pauto rei iraoparoveira oirara rutupa. Ira riroparoi rutu oirara rutupa. Ira-a ro Pauto oirara rutupa vurapareveira voea tokipaoro rera vo goruaro iava riroa rutu. Ira oisi raga oisoa toupareve voari tuariri rutu rova-ia. Uva vo vokio tapo ita oisi raga toupavei. Ora voari tapo utupaua uva taru oisi raga ita toupavevea. Ovoi ei.

Ragai-a vao, jut.

## REVELESEN

### Irapa Reoro Vo Vukuo Iava

Jon toupaveva tuukepa kepa-ia vo Patmos Toko-ia uva voa rigato purareva. Uva 95 o 96 yia puteva Jisas vo kavauaro isivaaro iava. Uva vo vuuta-a eva oa-ia Rom gavman vuri pitupituro rutu oisoa purapareva Kristen irara opesi pie ovoipaoro. Eva-a oa iava Jon goru reo vatereva voeapa oiso ra tuuvu vovouvira rutu toupave uriri asavira. Ari ita, viapau oiso rera vo reoroaro rutu-a vara varao. Viapau. Ari Jisas raga ita vo reoro vatereva Jon-pa aue-ia areo uusi. Oa vaisipaiveira popotepa irara vo reoro-ia oiso, Revelesen.

Uva oreorovu oureva ita varao oara-ia reoreoaepa profet irara voeao-ia, Esikiel, Danyel, ora Sekaraia. Varao oara epao vo vukuo-ia oara poupa pirovere. Ari oaravu karekeperea vo osa voroverea Oirato Oviitoaoro Jisas. Uvare Jisas-a ro ira oearovu rerava keripa irara opesi pie ovoirevere, ora vao Seten vo goruaro tapo. Osa iava uvuipaviei vigei oirao pie vovou irara ra goruvira toupape rerare tuepaoro Jisas.

1. Aviavi pie reoro vo pasio iava, 1:1-8.
2. Tavitaviara varao voeao-ia erao vatara (7) sios oara epao erao vatara uruiro-ia, 1:9-3:22.
3. Varao iava oara karekeperea vo utupaua oara kekereva Jon aue-ia areo uusi, 4:1-22:5.
  - a. Vuurapa vaisi puraiverea Pautoa-ia vo vuvuiua-ia, 4:1-11.
  - b. Vuku viko karurevere Sipsip Kakae, 5:1-14.
  - c. Erao vatara tuukeara kekereva areo uusi-ia, 6:1-8:6.
  - d. Erao vatara utave iava vo reoro, 8:7-11:19.
  - e. Erao vatara karero pisa karero rutu, 12:1-14:20.
  - f. Erao vatara orekerovu vuriara rutu iava varao Pauto vo kasipuroaro, 15:1-16:21.
  - g. Voeao Babilon oea voea vo voriaro vuri vori ouiverea, 17:1-19:10.
  - h. Vaiterei kove ovoisiverea vavaraito vaio ora profetato riro kuuvuto, 19:11-21.
  - i. Seten iava vo reoro vo osa rera tuukeiverea, 20:1-3.
  - j. Krai turarovira toupavevere reipaoro katai tuku ivaro (1,000 yia) sovara-ia, 20:4-6.
  - k. Vorevira Seten karuiverea, 20:7-10.
  - l. Oira rovirieipa voki iava vao rei voki rutu, 20:11-15.
  - m. Airepaua vuvuiua vouao ora airepa rasi, 21:1-8.
  - n. Airepa urui Jerusalem urui iava, 21:9-22:5.
4. Ovoiopa reoro vo vukuo iava, ora vo osa Krai oiso puraroepa, Oiraopavira rutu, ikauvira urioravere taru, 22:6-21.

1 ✨ Vo reo tuariri rutu oisoa kareke asavira rutu toupave. Oa iava Pauto Jisas Krai-pa poeravira rutu vo reo kareke rovereva vaore, oiso ra ora rera voearopa kovopa irara vo reo roroiovira kareke pierve. Orekerovu rutu iava vo reo varao oarapa tutuu piepai ra karekepape. Uva vara-a varao oara iava Krai ragai soporeve, ragai rerapa kovopato tarai pieoro. Vao-ia osa ragai iare iravu purapurapato ensel arureva ragaipa vo reo vatepasa.

2 Uva ragai-a vao Jon ragoa vara rutu varao kekeava. Oa iava roroiovira rutu siposipopaa Pauto vo tavitaviaro iava, ora vo reo vao Jisas Krai vo reoro oa oiraopavira karekereva.

3 ✧ Uva voeao oea ora voea gisipoara oaive iava vo reo vieipaiverea Pauto vo reoaro vo vukuo iava, oea roruiverea rara. Ora voeao oea vo reo uvupaiverea ra vo reo sirova utupaave, oearoa tapo roruiverea. Oea rutu evoea uvuipaai ra vo reo sirova utupaave rutu. Eake iava? Uvare vuuta-a vao oapa tutuuvui ra karekepe. Ovuuta-ia vara rutu karekepere varao oarare taviroiva Jisas, vo reo rigatoavora vo vukuo-ia.

### *Vo Toupai Vo Reo Iava Vao Oa Rigatoreva Jon Erao Vatarapa (7) Gururo*

4 ✧ Ragai-a vao Jon ragoa vo reo rigatopaavoi visiipa erao vatara (7) lotupa gururo. Visiigoa evoa toupataveira Esia Provins-ia. Ari ita, Pauto toupaveira oiso osa raga tuariri rutu oisoo toupaveve. Osa raga-a ita eisi osa utupavira urioroverea. Ira raga uvuiparoi ra visi rutupa kave vovou rutu vateveve ora gavaure vovou. Ora erao vatara tapo aue uraura irara voeao oea paupa vao Pauto vaaro ruvara—ia toupaveira, oea uvuipaai ra kave vovou vateveve ora gavaure vovou visiipa. 5 ✧ Ari ita, ro Jisas Krai torevokovira Pauto vo reoaro rutu Vatepato. Eera-a avaiotoa rutu Oviito. Ira vorevira toreroepa kopii tapi iava. Reitoa rutu-a turaro voea rutupa king irara vo rasio-ia tou irara. Ira tapo ita uvuiparoi ra kave vovou vatepareve visiipa.

Eera ira vigeipa siraoparoveira. Oa vituaro iava vigei iava vuriara oavi verareva ora rera iava revasiva-ia. 6 Ira oiso vigei piereva ra oiso karekevio, Vigei-a rera vaaro sara, pris irara Pautoa-pa kovopa irara eera rera Aitetoaaro. Ira Jisas Krai kerariava ora gorua toupaveira vao vokiara rutu iarepa. Ovoieia.

7 ✧ Vurata! Ira-a eera rukuta vuutaaro-ia uriosa aueparoi. Oa iava oirara rutu ora voea osireiario-ia rera kekeiverea. Ora voeao oea rera togaiva, oea tapo rera kekeiverea rara. Osa-a eisi osa iava oirara rutu vo osararovu rutu iava vo rasio-ia rirovira rutu rera-ia rugorugooaaro gaupaiverea. Oiraopavira ita. Osa eisi vara rutu evara taru karekeperea. Ovoiei.

8 ✧ Uva Turaro Pauto oiso puraroepa, “*Ragai-a orekerovu rutu vituaro. Ora ragai-a orekerovu rutu opesiaro.*” Ira raga ita eera Pauto, ira vo vokie toupaveivoi oiso osa raga ita tuariri rutu oisoo toupaveve. Uva oisi raga ita eisi osa utupaua urioroverea. Uvare rera raga-a goruara rutu vituaro.

### *Jon Oirato Oviitoaaro Ro Ropoto Kekereva*

9 Ragai-a Jon visi araokotoaaro. Uva ita, vigei rutu-a Jisas voeaaaro. Uvare visi tapo ora tavosipaoro upiara vo vataraoro oupaaveira. Ora vo osa Pauto vo tokiaro-ia toupaveira visi tapo, osa iava vigei rutu tuvuuvovouvira rutu torepavioveira siraoa oupaoro. Ari ita, ragai oisoo Pauto vo reoaro iava siposipopaa ora varao iava oiraopara oara kareke piereva Jisas. Osa-a eisi osa iava ragai siguivora vo toko-ia ragai tovosa oa vaisipaiveira oiso, Patmos Toko. 10 Vo Turaro vo vokiario-ia Tugoropato Uraurato ragai iava sopaua-ia ora karekeroepe rutu. Uva ora ragai isivaaro-ia ogurukovu riroa rutu uvuavorao oiso rorovira osa utave. 11 Oreoa vao oiso puraerao, “*Auero rutu kekepariveira oara rutu-ia uvuipauei ra vara rigatori vukua-ia. Oire ra vo vuku sipori evoeapa erao vatara gururo oiso, evo Sios Efesas-ia oa toupaveira, ora varaopa oara Smena-ia toupaveira, ora Pegamam-ia, ora Taiataira-ia, ora Sadis-ia, ora Filadelfia-ia, ora Leodisia-ia.*”

✧ 1:3: 1 Te 5:27; Re 22:6-7; Lu 11:28 ✧ 1:4: Jo 1:1; Eks 3:14 ✧ 1:5: Re 3:14; Sam 89:27; Pro 14:5 ✧ 1:7: Sek 12:10 ✧ 1:8: Ais 9:6-7; Re 21:6

12 ✨ Oire uva ora poreraerao rera kekesa ro ira ragai tavitaviparevorao. Uva ora pore ovoiraiva, erao vatara (7) aue vuravu kekeavorao oara pu-raiva aue iava gol. 13 ✨ Uva iravu kekeavorao osa vara vuvuvuruaro-ia varao vuruvuara toupavevorao. Irapa oiso paerao Oiratoaro Ro Ropoto. Ira riro kaekaetoa-ia kuvupato kuvupaoro rera rutu tavuruparevorao kokotoarei rutu-ia rekasipaoro. Ora gol iro-ia takipa iro takiparoerao ora rera kopukopuaro rutu-ia vo iro tavurupaoro. 14 Uva rera kukuearo-ia orui popoteparoerao rutu oiso osa sipsip oruaro. Uva oiso tapo popoteparoerao osa popotepava rutu rukuta. Ora osireitoarei aiterea rera iava aroropavira roropasivorao oiso rutu osa tuituia vuvuaro. 15 Kokotoarei tapo rera iava sisikorevira rutu roropaivorao oiso osa bras kasi roropaiveira tuituia-ia, ra utupavira va tuiave va rekorekooro. Ora rera tapo iava okoe uvuavorao iria rera iava rirovira pokoo viro oiso osa riroa uuko sirisiri oa pokopi. 16 Uva erao vatara-ia aaviiko pituparevorao oirapapa vavae iava, ora toorio ira-ia varei avuavuarei toupaveira. Ira avuparevorao pitupa iava ora rera iava gisipo-ia. Ovusa rera iava tapo puaua roro irapaivorao oiso osa ravireo goruvira roro irapaveira.

17 ✨ Uva rera kekeoro koveraerao rera kokotoaro ruvara-ia. Uva ragaipa oiso paerao rutu kopiito. Oa iava ragai-ia ora rera iava oirapapa vavae tovooro oiso puraroerao, “*Opeita uriripau. Ragai-a irapatoa rutu. Ora ragai-a ovoikutoa rutu.*” 18 ✨ Ragai-a vao tootoovira toupaa ragoa tuariri kopiiraera. Ari ita, ragai kekerivoi ovusa vo tootoo-ia toupaaivoi Opesi Asa Tootoo, ragoa gorua rutuva toupaaivoi vao kopii va goruaro vituaro. Osa iava vuiparai voea tore piepasa vova kopii iava, ora oearovu tovopasa vo ovoiei kopii-ia. 19 Osa-a eisi osa iavirava vo reo rigatori vara rutu iava varao oara kekerivoi vo vokio iava vara, ora varao tapo oara karekepaperea voari utupaua. 20 Aue erao vatara aaviikoara kekerivo ovusa ragai iava oirapapa vavae-ia toupai, ora varao erao vatara aue vuravu golara. Oara evara oiso toupai, Reo ruu. Oara porearo vituaro oiso toupai. Vao-ia erao vatara aue aaviikoara oara oiso toupai, Evoea purapurapa irara ensel erao vatara Siosro voeaaro. Ora varao vuruvuara erao vatara, oara oisi raga ita toupai oiso, Erao vatara aue Siosara.

## 2

### *Jisas Jon Tavireva Efesas-pa Irara Iava*

1 “Reoara rigatori enseltoa iare, ro ira Efesas-ia lotupa irara tokipaveira vo reo iavirava oiso-ia. Ragai erao (7) vatara-ia aaviiko pitupaaveira ora ragai iava oirapapa vavae iava. Ora erao vatara vuvuvuruaro-ia aue vuruvuara golara vokapaaveira viipa vo reo vao sipopasa.

2 ✨ “Ragai vii-ia taraiparai vo vovouro rutu iavirava oara puraparaveira ora vii vaoro tapo kasivari kovo. Uva taraiparai oiso, Goruvira rutu torepavei raverave asavira vuri irarapa reasipaoro rutu. Voaea oea oiso vii tupaivora, Igei tapo-a aposel irara. Vo osa viapau. Vo uvare voea vo reoroaro tapo roviriteirivora. Oa iava voea vo pitupituroaro iava taraia ourivora oiso, Voaea-ri riro kuuva irara raga. 3 ✨ Uvare voea-a evoea oea vii kekeivora vo osa ragai vaisiara-ia pituparivora. Oa iava vii vuri pievora. Ari goruvira rutu torepaveira vo sirao vavataaro kaepaoro. Uva viapau oiso reasiuera tuuvuvira rutu kovo arapa. Oiso osa vii-ia taraiparai. 4 Ari

✨ 1:12: Eks 25:27; Sek 4:2 ✨ 1:13: Esi 1:26; Dan 7:9-13, 10:5-6 ✨ 1:17: Esi 1:28; Dan 8:18, 10:10 ✨ 1:18: Lu 16:19-31 ✨ 2:2: 1 Jo 4:1-6; 2 Ko 11:13 ✨ 2:3: Hi 12:1-3; Ga 6:7-9



ita, oavivu oa iava vii tavipaavoi. Voari tuariri osa airepavira rutu oisoa oirao piepari, ovuuta-a eva oa-ia oisoa ragai kavikopari rutu. Ari vo vokio, viapau. <sup>5</sup> Voari tuariri uva oisoa vearo vovou rutu purapari. Uva ita, va arova koveuerao. Uva oisi-a eisi osa iava oiso vovouparai ra vovevira ora rugoo pieu vo vovoure eva oa oisoa pura rovopari voari tuariri. Oire uva uvuipauvei ra sopaua poreri, ra vo vovou eva purari oa oisoa purapari voari rovovira rutu. Ari vosa viapau ora vii iava sopaua poreri, oire uva voo-a evoa uva urioravere vii arova vuravu verasa vova oira vo tavukiaro iava. <sup>6</sup> Ari ita, tovaira vo vovou eva vii-ia toupavoi, vo uvare keripauveira Nikolas-pa irara vo vovouarova. Uva ragai tapo ita voea vo vovouroaro-pa oisi reasi iraoparaveira.

<sup>7</sup> ✧ “Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoro. Oiso-ia vosa ro ira upoava ora keevoisiro, eera-a irapa uvuiparai ra vagaavora, aio ouro vo evaova iava Tootoo Vatepa Ova. Oeva eva Pauto vo kovoaro-ia toupaveira.

### *Jisas Jon Tavireva Smena-pa Irara Iava*

<sup>8</sup> ✧ “Reoara vai rigatori enseltoa iare, ro ira Smena-ia lotupa irara tokipareveira vo reo iavirava oiso-ia. Ragai-a Irapatoa rutu ora ragai-a Ovoiookuto rutu. Ragoa tuariri kopiiraepa. Uva vaviopavira tootoovira tapoavoi. Oa iava vo reo sipoavoi vii iare.

<sup>9</sup> ✧ “Taraiparai vii vo siraroaro-ia ora upiara varao oara vii-ia karekepa-peira. Osa iava vii-ia taraiparai oiso, Apotavira rutu toupavoi varaoa vo rasio iava. Vo osa vo vuvuiua-ia uva vii varao rutuei oara toupavoi. Ora vao-ia osa taraiparai vo reo-ia oa-ia oearovu vii tovipaoro oiso purapaaveira, Igei-a Jiu iava voea. Ari ita, osa viapau oiso Jiu iava voea-a. Viapau. Easi, Seten voeaaro evoa. <sup>10</sup> ✧ Utupauavi upiara ourivere. Uva viapau oiso uvuipau ra uriripau vava eva. Uvuri! Seten visii iava oearoi tuukerevere rara oeari-ia kokarapasa. Oire ra upia oupave oearoi katai tau [10] rutu-ia aue vokiara. Uva uvui iraopau ra goruvira rutu oirao piea-ia pitupari vo vuutari rutu-ia tugurasa uva kopiiuvere. Osa iava vii vateaverea voria vao Tootoo Ovoi rutu.

<sup>11</sup> “Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoro. Oiso-ia vosa ro ira upoava ora keevoisiro, osa iava eraopa kopii viapau uvuipai ra rera vuri pieve. Viapau rutu.

### *Jisas Jon Tavireva Pegamam-pa Irara Iava*

<sup>12</sup> “Reoara vai rigatori enseltoa iare, ro ira Pegamam-ia lotupa irara tokipareveira vo reo iavirava oiso-ia. Riro kaekaetoa-ia toorio pitupaavoi riro avuavuto. Ira-ia varei avuavuarei toupai. Oa iava vii iare vo reo sipoavoi.

<sup>13</sup> “Ragai taraiparai vii vo uruiaro-ia ouruia-ia Seten turarovira rutu toupavevo. Ari ita, vo osa goruvira rutu ragai vaisiario-ia pitupariveira ora ragai oirao piepariveira tapo. Uva viapau vo oirao pie eva kavurivora. Ari ita, tuariri ro-ia Antipas eera ragai iava siposipopato visii tapo oisoa tupaoro vearovira rutu ragai gisipoaro oisova utuparo. Oa iava rera upoiva visii vuutaaro-ia vo urui-ia eva oa-ia Seten toupaveveira. Uva vo vuuta-a eva oa-ia tapo viapau oisova ragai vaisiario vataupata. <sup>14</sup> ✧ Ari ita, ragai oreorovuva

toupaa viire. Uvare oearovuei vii voeaaro vo Pegamam oea goruvira rutu Belam vo vovouo-ia pitupaiveira. Vo vovouo-ia Belam vaaro oiso-ia, Voari tuariri uva Belak tarai pieveva vo vovouo iava oirara keakeapa voea Isrel. Oa-ia voea kove pieveva vuri vovou iare. Oire uva Belak vo siposipoaro iavirava Isrel-pa irara oisoa vuri vovouro purapaive vo osa tauopa varuerero aiopaive, varao oara oisoa tauopaive kuuvu irarapa pau irara. Ora vo osa vao tapo otopa pitupitu oisoa purapaive. <sup>15</sup> Eisi ita osa raga oearovu epao vii ruvara-ia voeao oea goruvira rutu oearovu vo siposipoaro varao vuri siposiporo sirova utupaaveira voearo Nikolas iavapa irara. <sup>16</sup> Osa-a eisi osa iavirava ora vii iava sopaua pore iraori. Ari vosa viapau oisi eisi pieri, uva tutuu piepai ra vii iare uriora voea tapo evoea ora uposa rera-ia ro toorio ira ragai gisipoaro-ia toupaveoi.

<sup>17</sup> ✧ “Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi. Oiso-ia vosa ro ira upoava ora kevoisiro, uva rera-a eera irapa aioara vai vateaverea vuvuiua iava varao oara vatauvira toupaveoi. Ora irapa tapo eera popotepava aveke vateaverea, iria-ia airepa vaisi rigatoavere. Vo vaisio oa-ia viapau irai uvuiparoi ra tarairo. Ari ro raga ira oira eira aveke oureve, ira raga taraiparoverea.

### *Jisas Jon Tavireva Taiataira-pa Irara Iava*

<sup>18</sup> “Reoara vai rigatori enseltoa iare ro ira Taiataira-ia lotupa irara tokipaveira vo reo iavirava oiso-ia. Ragai-a Pauto Oviitoaaro ragoa iava osireito oiso toupaveveira osa aroropa tuituia. Oa goruvira rutu roropaoro vuvupai. Ora ragoa iava kokotoa oiso rutu sisikorepaiveira osa bras. Ragoa vo reo sipaovi vii iare.

<sup>19</sup> “Ragai vii-ia taraiparaveira rutu vo vovouro rutu-ia oara puraparaveira. Taraiparai vii-ia viigoa oirarapa siraopaiveira ragai oirao piepaoro. Ora vo osa okovorovu rutu puraparaveira oirara tauvapaoro. Taraiparai vo uvare goruvira rutu torepaiveira otavakarovuva ora kevoisipaoro varao oara vii-ia karekepapeira. Ora oiso taraiparai ovovourovu rutu varari oara oisoa pura rovopari vearovara. Oire uva vo utupavira pute pievira rutu okovorovu ita aia vearo pievira puraparivorao. <sup>20</sup> ✧ Ari ita, ragai-a vao oreovuva viire, uvare o eaka ragaparaveira riakova Jesebel iria vii tapo toupaveira. Eira iria oiso purapaaveira, Ragai-a profetava, ovusa ragai voeaaro kovopa irara tarai piepaveira otopa pitupituro sirova utupasa, ora tauopara varuara aiopasa varao oara tauopaiveira kuuvu irarapa pau irara. Uva vo vovouroa evara oara-ia voea keakeapaiveira. <sup>21</sup> Oiso ruipaparai oirapa ra ora oira iava sopaua poreeve. Eisi osa iava oira aate piepaaveira, oisore ra ovuutaroo-ia tou rovoeve. Ari ita, osa viapau ora oira iava sopaua porepaaveira, oisore ra oisi iavirava otopa pitupiturore oira varaaro eakaeve. <sup>22</sup> Oire uvuri! Ragai riroa siitoka ora upia vateavere oirapa eira. Ora evoea oea oirava vo pitupituro otopara purapaiveira, vosa oisi iavirava viapau ora voea iava sopaura oaive porepaive vo pitupitureva isivapasa, osa iavirava riroa siitoka voeapa vatepaavere taru. <sup>23</sup> ✧ Ora oira ovii iraraaro tapo kopii pie ovoiavere. Osa iava eisi lotupa gururo rutu uvuipaai ra taraiave oiso, Ragai vearovira rutu rugorugooara rovirieipaaveira ora oirara rutu iava sopaura. Osa iavirava vara voriaro visiipa katakataivira kare pieaverea visii vo vovouroarova uvuvira varao oara purapataveira.

✧ 2:17: Jo 6:49-50; Ais 62:2 ✧ 2:20: 1 Kin 16:31-32, 21:25; 2 Kin 9:7 ✧ 2:23: Jer 11:20, 17:9-10

24 ✧ “Uva vaviopavira visii tavipaavo, Oearovu visiigoa evoa Taiataira-ia toupataveira visiigoa viapau oiso vo siposipo sirova utupataveira vao vuria rutu. Ora viapau oiso vo vovou iava vao-ia taraia vai outava oa vaisipaiveira oiso, Seten vaaro vatao reo rutu vituaro. Uva ragai oiso visii tavipaavo, Viapau oiso visiipa ovavatai vateaverea ita. 25 ✧ Ari ita, ovovourovu rutu vearovara oiso purapataveira, evara oara goruvira rutu pura iraopatavere vo rekasisa ovuuta-ia voreraverea. 26 Ari ita, vosa ro ira upoava ora keevoisi iraoro, eera ita ira ragai vo vovouaro rutu sirova utuparoi vo rekasisa uva rera vo vuutaaro opesiperea. Osa iavirava eisi ragai rera rei vaisi pieaverea, ra oirara rutupa reiparo. 27 Uva aintoa-ia tooro pitureve oirara tokipasa rerava. Oiso rutu osa ro ira pitokava raioro oira garepa visivi kikiakireve. Vo kovo rerapa vateavere oa vaeapai vo kovova Aite ragaipa oa vatereva oirara rutu tokipaoro voeapa reipasa. 28 Ora tapo vo osa rerapa aviva vateaverea aaviiko. 29 Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoro.

### 3

#### *Jisas Jon Tavireva Sadis-pa Irara Iava*

1 “Reoara vai rigatori enseltoa iare ro ira Sadis-ia lotupa irara tokipaveira vo reo iavirava oiso-ia. Ragai erao vatarava (7) toupavaoivogoropa urauraro Pauto voveaaro. Ora varao-ia tapo erao vatara (7) aue aaviiko pitupaavoivogoropa. Ragoa ita vo reo sipoavoivogoropa vii iare.

“Uva taraiparoi vo vovouro-ia oara purapariveira. Oiso purapaaveira oearovu viire, Vo guruo lotupa irara tootoovira toupaveira. Vo osa viapau, uvare kopiuepa. 2 Erao iraou uusua kavuoro. Vii vo vovouoro rutu epao tovuvira raga oara kopiisa auepai. Evara oara vorevira goru pie iraroi. Eake iava? Uvare vo vovouro rutu oara oisoa purapari, viapau oiso oai kekepaavoivogoropa torevokoa vai ragai reraaro Pauto osireiaro-ia. 3 ✧ Tuariri vao uvuoro Vearo Siposipo va ouriva. Oire vorevira vare rugoo iraou! Ra oisi iavirava va vearovira rutu tokiri ora vii iava sopaua poreoro. Vosa viapau uusua kavuoro torevokoa, oire uva oisi-a eisi osa iava vii iare karera virovore oiso rutu osa kavirupato. Ovusa viapau taraiu vo vuutao-ia oa-ia vii iare poura viro. 4 ✧ Ari oearovuei vii iava oea Sadis-ia tovuvira toupai. Oea viapau oiso ora vovea varaaro varoara vuuvuipaive vuri pitupituro vai-ia. Oea-a evoea oea popotepara-ia varoara tuuoro ragai tapo vokapaiverea oea vaova uvuipaai. 5 Ari ita, vosa ro ira upoava ora keevoisiro, uva rera-a eera ira tuavereva rara popotepa-ia varoa. Ora ira tapo vaisiaro viapau oiso veraaverea vukua iava vari Tootoopa. Viapau. Ari ira vaisiaro kosi pieaverea Aite oaa puaro-ia ora enselpa irara puaro-ia voeari Pauto voveaaro.

6 “Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoro.

#### *Jisas Jon Tavireva Filadelfia-pa Irara Iava*

7 ✧ “Reoara vai rigatori enseltoa iare ro ira Filadelfia-ia lotupa irara tokipaveira vo reo iavirava oiso-ia. Ragai-a Tugoropatoa Rutu ora ragai-a Oiraopa Vovou Rutu Vituaro. Ragoa kii-ia pitupaavoivogoropa Devit oiraaro ro ira oisoa turaroparo tuariri. Vosa rataoa karua, ra irai viapau uvuipa ra

vorevira va tupareve. Ora vosa vo ratao tupaa, ra viapau oiso irai raga vo ratao ita karureve. Uva ragai raga ita vo reo vii iare sipopaavo.

8 ✨ “Ovovourovu rutu-ia taraiparai oara purapariveira. Oire vurari! Rataoa vao viipa karuavo. Uva viapau irai uvuiparoi ita ra va tupareve. Taraiparai vii-ia gareaviei gorua touvira toupavo. Ari ita, ragai vo rearo sirova utupaaveira. Osa iavirava viapau oiso ragai vaisiara taeapariveira. 9 ✨ Taraipauveira voearo-ia voeao iava Seten voearo oea oiso purapaaveira, Igei-a Jiu iava voea. Oea ita-a evoea riro kuuvu irara. Oire uvuri! Oea-a evoea oiso pieaverea, ra rekusa urioave vii kokotoaro ruvara-ia. Ra oisi iavirava taraiave oiso, Ragai vii kavikopaaveira rutu. 10 ✨ Vii ita viigoa ragai vo rearo sirova utupaaveira. Oa iava goruvira rutu torepauveira tavakaara rutu-ia varao oara vii-ia karekepapeira. Eisi osa iavirava uvuiparai ra vii virivaria vaopa kokara oa karekepe oirara rutu-ia kokarasa. Ra oisi iavirava viapau oiso vii-ia karekepe vii vuri piesa. 11 Ari ita, ragai vii iare ikauvira rutu poua virovere. Vao oa-ia pitupari oa-ia eva uvuipauei ra oriruvira va-ia pitu iraopari. Teapi irai vii vo voriaro veraverareve va kaviruoro. 12 ✨ Ari vosa ro ira upoava ora keevoisiro, ira-a eera tore pieaverea oiso rutu osa tuuta vo kepa-ia toupasa Tugoropa Pauto vaaro ro ragai reraaro. Ra viapau oiso vorevira vo kepa kavureve Tugoropa Kepa. Viapau rutu. Ira-ia Pauto vaisiara rigatoaveira ora riro urui vaisiara tapo vao ragai reraaro Pauto vo uruiaro. Vo urui airepa urui riroa Jerusalem, ouruia vuvuiua iava varaperea Pauto ruvara iava. Ora ragai iava vaisia airepa oa tapo rigatoaveira rera-ia.

13 ✨ “Oire vosa ro ira-ia kokito toupareve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi.

### *Jisas Jon Tavireva Leodisia-pa Irara Iava*

14 ✨ “Reoara vai rigatori enseltoa iare ro ira Leodisia-ia lotupa irara tokipareveira vo reo iavirava oiso-ia. Ragai-a Oiraopa Reo Rutu Vituaro. Ragoa torevokovira Pauto vo reoroaro rutu kosi piepaaveira. Vokiara rutu-ia oiraopa reo raga kosi piepaaveira, ragai orekerovu rutu vituaro Pauto oara purareva. Ragoa vo reo sipoavo vii iare.

15 ✨ “Taraiparai ovovourovu rutu-ia oara purapariveira. Taraiparai vii-ia viigoa viapau oiso toupaveira osa vukusi ovi ragaipa reasipaoro. Ora vo osa viapau oiso toupaveira osa kasirao ovi ragaipa ruipa iraoapaoro. Uva oiso ruipaparai ra vukusivira touri, eke kasiraovira touri auepa, teapi avavaiapau vo rugoorei-ia. 16 Ari ita, vo osa viapau. Uva gare visivi raga kasirao visivi toupaveira. Viapau oiso ra kasiraopau rutu. Ora viapau oiso ra vukusipau rutu. Osa-a eisi osa iavirava ora ragai gisipoaro iava vii rui iraoavere vii kosi pieoro. 17 ✨ Viigoa oiso purapaaveira, Ragai-a riro monito, ragoava riroara rutu epao. Viapau oiso oavu avu vaipa apotaparaveira. Ari ita, osa viapau, uvare vurivira rutu toupari. Viigoapa uvuipaai oirara ra viipa siraoapaave, uvare apotavira rutu toupaveira Pauto vo rugoaroapa. Ora uvare voosi osireivira toupaveira. Ora gapuvira toupaveira ovusa vii raga viigoa vao-ia viapau taraipauveira. 18 ✨ Eisi osa iava vo rugorugoo vateavo viipa. Ragai vaaro gol roroio oa-ia uvuipauei ra va voriri eva gol ragai ruvara-ia, ra oisi iavirava riro moniu. Oa iava uvuipauei ra popotepara varoara voriri ora vii iava varaua rakurakupasa. Ra oisi iavirava viapau oiso oirara uvuipaave ra gapuvira vii kekepaive, ra oisi iava ariipau. Osa iava uvuipauei ra ruvarupara vai marasinara vai voriri ora

✨ 3:8: Jen 3:1 ✨ 3:9: Ais 49:23, 43:4 ✨ 3:10: 1 Ko 10:12-13 ✨ 3:12: Ga 2:9; Re 22:4, 21:2

✨ 3:17: Hos 12:8; Sek 11:5; 1 Ko 4:8 ✨ 3:18: Ais 55:1; Mt 13:44

vii osireiario-ia oarai tovopasa, ra vuravurari ita. <sup>19</sup> ✧ Ari ita, kasivarivira ragai voeaaro *torevokopaaveira vo osa ora voea vaaro raga-ia vuria voea togapaa. Eake iava? Uvare voea kaviko iraopaaveira rutu. Eisi osa iava uvuipauei ra rugorugoo iraopau ora vii vo vovouroarore. Ra ora vii iava sopaua pore ovoiri.* <sup>20</sup> Keker! Rataoa-ia torepapai va totopaoro. Vosa ro ira ragai gisipoaro eveireve ra vo ratao karureve, oire ra oisi iava koatara rera tapo aiosa. Ra rera ita ragai tapo aioreve. <sup>21</sup> Ari ita, vosa aa ro avu ro ira upoava ora keevoisiro, irapa eera vagagaavora, ragai tapo pauro paupai-ia ragai vaaro. Eisi osa ita ragai tuariri vo upova ora keevoisiraepa. Oa iava Aite tapo pauraepa rera vaaro-ia reia paupa.

<sup>22</sup> “Ro ira-ia kokito toupaveve, ira uvuiparoi ra vearovira rutu vo reo uvu iraoreve Tugoropato Uraurato oreoa-ia lotupa gururore reoreoroi.”

## 4

### *Vuvuiua-ia Tou Irara Pautoa-ia Vuurapa Vaisi Purapaiveira*

<sup>1</sup> ✧ Evo reo opesieiva, urusia-ia vuvuiua kekeavorao uva rataoa karuvira touvoroa. Ora oreovu gurukoaro tuariri ogurukoa uvu rovoavorao oa ragai tavipaivorao oiso gurukopaoro osa utave. Uva vo vokio oiso purae, “Vore ipau, ra vii kareke piea orekerovu rutu iava varao oara utupaua kareke iraopaperea.” <sup>2</sup> ✧ Uva ikauvira raga Tugoropato Uraurato goruvira rutu ragai-ia kareke ovoiroi. Oa iava rera vo goruaro iavirava voa vuvuiua-ia paupa reito vaaro kekeavorao ovusa iravu va-ia pauparoerao. <sup>3</sup> Uva ro ira pauparoerao paupa-ia ira kekeavorao osa roroparevoroa sisikorepaoro oiso rutu osa aveke o jaspava ora revasipava iriavu aveke konilianva. Uva iravu govogovuto paupa reito vaaro kovokovoparevoroa. Uva ragai rera kekeavorao kokovaravira vo osa oiso roroparevoroa osa aveke emeral. <sup>4</sup> Uva erao tau vo resura rutu (24) paupara oara reito vaaro paupa kovokovopaivorao. Ora erao tau vo resura (24) turaro irara oea vara-ia paupaaerao. Uva voea evoea turaro irara oea popotepara-ia kuvupaaerao. Ora kukuvaiparava toupaiivorao golara. <sup>5</sup> Uva reito vaaro iava paupa varakeoto parakauparevoroa. Uva gurukoa karekeerao oa iava varakeoto pokoro virora. Uva paupa ruvara-ia erao vatara (7) ao touro roropaoro toupaiivorao. Uva vo touro-a evara ao touro uraura irara Pauto voeaaro erao vatara. <sup>6</sup> ✧ Uva voa vo paupa ruvara-ia oavu avu epao oa oiso toupaiivorao osa rirova avakava. Oa oiso rutu toupaiivorao osa sisiro roroiava rutu.

Uva okarevu avu vo resura tootoopaoro paupa reito vaaro kovokovopaivorao uva torepaaerao. Uva vo resura eva okarea-ia riroara rutu osireiara toupaiivorao kopukopuara rutu vo kare iava uvui piepaoro ora oisova vo kare isivaaro-ia. <sup>7</sup> ✧ Uva rovopatoa rutu-a ro ira tootoovira toupaveveira oiso rera osa laion. Ari eraopatoa-a ro iravu oiso rera osa bulmakau kakae. Uva vo pevapato-a ro iravu oiso puavira touparevoroa osa oiratoa iava puaua. Uva vo resurapato-a ro ira oisi touparevoroa osa iravu riroto keravo. Ira viara-ia papapaveveira. <sup>8</sup> Uva vo resura vao tootoovira toupaveveira, oresura rutu-ia katakataivira katai vatara aue putaera toupaiivorao. Ora riroara osireiara oara voea rutu iava varaura rutu-ia uvui pievira toupaiivorao ora putaera roaro tapo. Uva ravireoura rutu-ia ora vokiararo erapaaveira opesi asavira oiso purapaoro,

✧ 3:19: Pro 3:11; Hi 12:5-8 ✧ 4:1: Esi 1:1 ✧ 4:2: Esi 1:26-28; Dan 7:9 ✧ 4:6: Re 15:2; Esi 1:5 ✧ 4:7: Esi 1:10, 10:8-22

“Turaro Pauto ira-ia goruara rutu toupaveira, eera Tugoropato, eera Tugoropato, eera Tugoropato. Ira tuariri rutu oisoa toupareve. Uva vo vokio tapo toupaveira. Uva uriosa aueparoi.”

9 ✧ Uva vo kare eva Pauto vaaro iava keraria tavitavipaaveira ira pauparoveira reipa paupa-ia tootoovira raga tupaoro vokiara rutu-ia. Oa iava rera vaisiario-ia vuurapa vaisi purapaaveira. Ora rera-ia vearo vaisi purapaaveira. Uva vuutara rutu-ia vo resura eva tootoovira tupaoro oisi raga piepaaveira eisi. 10 Ovuutaroa-ia voea evoea erao tau vo resura (24) turaro irara rekupaaveira rera ruvara-ia ira paupa-ia pauparoi reito vaaro. Uva rerapa vuurapa vaisi purapaaveira ovusa tootoovira raga toupareve vokiara rutu-ia. Uva kukuvaipara golara ora voea varaaro vikipaaveira, ra vo kovepasa avapape paupa ruvara-ia rera vaaro. Uva oiso purapaaveira, 11 “Turaro. Vii-a igei reraaro Pauto. Viigoa uvuipaaveira rutu ra oirara rutu vii vaaro iava keraria tavitavipaave vii vaisiario kae piepaoro, ora vii vo goruaro tapo reroarovi tupaoro. Uvare vii raga orekerovu rutu purariva ora vii raga vo ruipaaro-ia. Uva vara purarivoiva, karekeepa. Uva vo vokio vara rutu varao toupaveira.”

## 5

### *Jon Oavu Vuku Viko Kekereva Oa Tuukeiva*

1 ✧ Uva Pauto rera vaaro-ia paupa pauparo oirapapa vavae iava oavu-ia vuku viko pituparevorao oa kekeavorao. Oa-ia rigatoo tupaivorao sovara-ia ora vova va varaaro-ia. Uva vo viko tuuke-ia erao vatara-ia tep tuukero oara-ia reesiara tupaivorao. 2 ✧ Ora iravu purapurapao ensel gorutoa rutu kekeavorao ovusa pauparo rirovira takataparerao oiso akepaoro, “Irouto-a vearoto ira-ia reesia tupaivoi oa iava uvuiparoi ra tep tuukero tokoreve, oiso ra vuku viko vao karureve?” 3 Ari ita, viapau oiso vuvuiua-ia irai epao, ora vo rasitoo-ia, ora vo rasito reroaro irai epao ira uvuiparoi ra vo viko vao vukua karureve va sovara-ia vuravurasa. 4 Ari ita, viapau oiso irai kekeavorao ro ira uvuiparoi ra vao vukua karuoro va sovara-ia vuravurareve. Osa-a eisi osa iavirava gau irapaaavorao. 5 ✧ Uva iravu voea iava turaro irara ira ragai tavirevorao oiso, “Opeita gaupari. Keker! Laion-a ro-ia Juda sara iava rera oirato. Devit aao iraraaro iava rera. Ira viapau vuri vovov vai, uvare upoava ora kevoisiroepa rutu. Osa iavirava eisi uvuiparoi ra vo vukuo iava tep tuukero toko rovorevora, vo viko karureve.”

### *Sipsip Kakae Kekereva Jon*

6 ✧ Uva urusia-ia oavu Sipsip Kakae [aue Jisas] oa kekeavorao ovusa torepaerao oiso osa va ipoivoiva, kopiiepa. Oa reito vaaro-ia paupa vuutaarovi-ia torepaerao ora vo resurao vuruvuruaro-ia, okarea tootoovira toupaveira turaro irara tapo. Okakaea erao vatarava ketaara tupaivorao, ora erao vatara aue osireiara. Evoa ita-a erao vatara uraura irara Pauto voeaaro. Pauto oea arureva voraro ruture rasitoo rutu-ia. 7 Uva Sipsip Kakae avaerao vo vuku ousa ovusa Pautoa iava oirapapa vavae-ia tupaivorao. Vo osa rei-ia paupa pauparoerao rera vaaro. 8 Uva vo vuku ouvoro vo kakae ovusa vo resura eva, okarea tootoovira toupaveira, ora erao tau vo resura turaro irara oea rutu rekuivorao vo Sipsip kakae ruvara-ia. Uva voea rutu turaro irara katakataivira orekerovu-ia pitupaivorao, oiso roroara osa gita, ora oaravu disara golara, ora akoroa riro geesia, oa kasipaaveira ra geesipape, oa iava disara agasipaerao. Oara-a evara

✧ 4:9: Sam 47:8 ✧ 5:1: Esi 2:9-10; Ais 29:11; Dan 12:4 ✧ 5:2: Ais 63:4-6; Re 10:1 ✧ 5:5: Jen 49:8-12; Ais 11:1, 10 ✧ 5:6: Re 4:6; Ais 53:7; Sek 3:8-10, 4:10

variriara oirara rutu Pauto voeaaro reesipaivorao. <sup>9</sup> ✧ Uva iriavu-ia erava airepava eraaerao. Iria oiso purapaoi, “Vii-ia reesia toupaivoi. Uvu iraopauei ra vukua ouri, ra va iava tuukeara tokori. Uvare vii upoiva oa iava kopiiuepa. Oa iava ora vii iava revasiva-ia oirara rutu vorevira voririva Pautoa-pa voea vatesa. Iu. Oirara rutu osararovu rutu iava voririvora, ora oreovu rutu iava, ora ovararovu rutu, ora okantrirovu rutu iava. <sup>10</sup> Voega oiso pieriva, ra oiso toupaive king irara prispaoro Pautoa-pa kovopa irara ro vigei reraaro. Ra oisi iavirava oiso toupaive, Voega oirara rutupa reipa irara voeao oea vo rasio-ia toupaiveira.”

### *Sipsip Kakae Vaisiaro Kae Pieiva*

<sup>11</sup> ✧ ✧ Oire uva vorerivira ita oavu kekeavorao. Uva riro irara rutu enselpa irara gisipoaro uvuavorao oea uvuiaro rutu-a voeao oiso uvuipaaerao riroara rutu ipuipuaa (handet milion) ora riroara rutu tukuara (tausen tausen). Oea rutu torepaaerao Pauto vaaro paupa kovokovopaoro, ora vo kareo tapo oea tootoovira toupaiveira, ora voeao tapo turaro irara. <sup>12</sup> ✧ Oiso erapaoro rirovira rutu raga piepaivorao,

“Vo kakaego-ia Sipsip Kakae tuariri oa upoivoiva, oa kopiiuepa. Ira uvuiparoi rutu ra gorua oueve, ora orekerovu rutu vearopara, ora vearopa tarairo, ora riroa rutu varivaria. Ira uvuiparoi rutu ra oirara rutu rera vaisiaro kae pie iraopaive. Ora rera vaaro iava keraria tavitavi iraopaave rera-ia vearo vaisi purapaoro.”

<sup>13</sup> ✧ Oire uva orekerovu rutu reorearo uvuavorao Pauto oara puraeva, varao oara vuvuiua-ia toupaiveira, ora varao oara rasito reoroaro toupaiveira, ora varao oara avakava-ia toupaiveira. Iu. Evara rutu oara uvarovu rutu toupaiveira ragai oara rutu vo reoroaro uvuavorao osa oiso puraerao,

“Pauto rei-ia paupa rera vaaro pauparoveira ora Sipsip Kakae aiterea rutu uvuipasiei ra vuurapa vaisiro rutu ora rei vaisiro ousi, ora keraria, ora varivaria varao vokiara rutu iarepara!”

<sup>14</sup> Oire uva evo reo isivaoro iava vo resurao okarea tootoovira toupaiveira okarea oiso puraerao, “Ovoiei.” Oa iava turaro irara vaierei-ia vuurapa vaisi purapaoro rekupaivorao.

## 6

### *Sipsip Kakae Katai Vatara (6) Tep Iroa Vukua Iava Tokova*

<sup>1</sup> Oire uva Sipsip Kakae kekeavorao ovusa vo vuku-ia eva pitupaivorao oa-ia erao vatara tep tuukero toupaiveira. Uva rovo tuuke toko rovorao. Oa iava ragai oavu uvuavorao vo kareo iava okarea tootoovira toupaiveira. Oa reorearo gurukoaro oiso rutu poko virorao osa varakeoto. Oa oiso puraerao, “Uriou.” <sup>2</sup> Oire uva vorerivira ita vuraavorao. Oa iava iriavu pipotepava hos kekeavorao ora ro ira oira ivara-ia paupaoro koetava-ia pituparevorao. Uva rerapa kukuvaipa vateivorao. Oa oiso rutu toupai oia vao oa vatepaiveira ropa ira upoava ora keevoisiro. Oire ra vava avaroera upoara purapasa. Oiso ra voega-ia keripa irara putereve upoa-ia.

<sup>3</sup> Uva Sipsip Kakae eraopa tuukea vukua iava tokovorao. Uva eraopa uvuavorao vo kareo iava okarea tootoovira toupaiveira. Oa oiso puraerao, “Uriou.” <sup>4</sup> ✧ Uva iriavu revasipava rutu hos kosi virooro karekeorao. Uva ro oira-ia pauparoerao ira gorua oueva upoa kareke piesa oirara-ia voeao vo rasio-ia tou irara. Ra oisi iavirava ora upoaporo ora kopii piepaave oearovu

✧ 5:9: Sam 40:3; 1 Ko 6:20 ✧ 5:11: Dan 7:10; Hi 12:22 ✧ 5:11: Dan 7:10 ✧ 5:12: Fl 2:9-11

✧ 5:13: 1 Ti 6:16; Re 1:6, 6:16, 7:10 ✧ 6:4: Nea 2:1-3

tapo. Osa-a eisi osa iava rera vateivorao iravu riroto toorio vo kovo vao purasa.

<sup>5</sup> ✧ Uva Sipsip Kakae vo pevapa tuuke vukua iava tokovorao. Uva vo pevapa uvuavorao vo kareo iava okarea tootoovira toupaveira. Oa oiso puraerao, “Uriou.” Oire uva iriavu rupava hos kekeavorao. Iria ivara-ia iravu pauparoerao. Ira skel-ia pitupavevorao orekerovu atepato ora rera iava vavaea-ia. <sup>6</sup> Uva ogurukovu uvuavorao oapa oiso paierao oavu reoreoa oa uriopaerao vo resurao vuutaaro-ia okarea tootoovira toupaveira. Oire uva vo reo-a eva oiso puraerao, “Gare pitokavi vai wit ateri aue uvuiaro-ia katai voki voriaro. Ora opevavi rutu gare peva vai rais pitokaro vai ateri katai voki voriaro, uvare viapau riroara aioara epao. Ari opeita oliv ovi korovoaro vuri pieri ora aue tapo wain-ia.”

<sup>7</sup> Uva Sipsip Kakae vo resurapa tuuke vukua iava tokovorao. Uva vo resurapa uvuavorao vo kareo iava okarea tootoovira toupaveira. Oa oiso puraerao, “Uriou.” <sup>8</sup> Oire uva vorerivira ita vuraavorao. Oa iava iriavu keseva hos kekeavorao ora ro ira oira ivara-ia pauparoerao. Rera vaisiaro ro-ia, Kopii. Ora ro turaroto kopii urui iava rera ira tapo urioroerao. Aiterea rutu-a evaiterei oirara rutu voeao vo rasio-ia vo resurara sara uvuiaro iare voea roo piesiva. Oa iava vo resura iava osaravupa reipasiveira. Oire uva gorua ousiva evo sara kopii piepasa aue-ia toorio upo purapato, ora ogoeto, ora oaravu rutu upiara, ora vo kareo-ia vavarai kare vo rasio iava voea.

<sup>9</sup> ✧ Uva Sipsip Kakae vo vavaepa tuukea vukua iava tokovorao. Oire uva oearovu kopii irara urauraaro kekeavorao ovusa eravao alta roeroaro toupavorao. Tuariri rutu oea Pauto vo reoaro-ia goruvira rutu pituiva. Oa iava oisoa vo reo iava sipsisopaive. Uva va-a eva vituaro iava keripa irara voea kopii pieiva. <sup>10</sup> ✧ Uva voea evoea uraura irara oea rirovira rutu keerapaero arepaerao oiso purapaoro, “O Reito Turaro King. Orekerovu rutupa tugorovira toupaveira. Ora vo osa vii vovouaro-a oiraopa rutu. Ovirovu rutu vuuta pute rovoorea, ra tavaa purari kort voeaova oirara oea rasitoo-ia toupaveira. Ra igei revasiaro kare pieri, raa?” <sup>11</sup> Oire uva voeapa potepa kuvuro vateiva katakataivira oiso voea tavioro, “Rearea rovota. Visii tapo kovopa irara ora voeao araoko irara oavisii oea upoiverea keripa irara oisi ita osa visii upo rovoiva. Oire ra oisi iavirava visii rutu vieiario uvuivira karekeperea vo vieio oa reesi rovoreva Pauto.”

<sup>12</sup> ✧ Oire uva Sipsip Kakae kekeavorao ovusa katai vatarapa tuukea vukua iava tokovorao. Uva vuvuraavorao ita. Oa iava riroto ravurike kekeavorao ira rasitoo rutu-ia karekeroerao. Ovusa ravireo ora poreroerao rupaoro oiso rorovira osa pupurua varoa. Ovusa kekira rutu revasiro vioroaro rutu oiso rutu osa revasiva. <sup>13</sup> Uva aaviikoara rutu vuvuiua iava kovekoveerao rasitoo iare oiso rutu osa fik kue vao oa viapau viorope. Ra kiuvu va kuki ragareve. Ra oisi iava kovepe. <sup>14</sup> Ora vuvuiua tapo oua vera pirorao oiso rorovira rutu osa urupava mat vikopaveira. Ovusa pukuiara ora tokotokoara ora vara vo tavukiroaro rutu kavupaivorao ora virupaoro. <sup>15</sup> Oire uva king irara voea vo rasio-ia, ora rei vaisi irara, ora viurupa irara voearo kepten irara, ora voeao riro moni irara, ora riro varivari irara, ora oirara rutu voeao oea akukupavira kovo ragapaveira, ora voeao oea evoeapa reipaveira. Evoea rutu oearoa vataupaerao aveke kakiro sovara-ia vo rasitoo-ia ora oaravu riropara aveke tokutokuro roeroaro vagapara-ia. <sup>16</sup> Uva keerapaerao pukuiara ruture ora avekeara oiso purapaoro, “Igei ivara-ia kovekoveta igei utopaoro Pauto osireiario asavira ira pauparoi



rera vaoro-ia reipa paupa ora Sipsip Kakae tapo vo kasipuario asavira. <sup>17</sup> Uvare rei voki rutu-a vaiterei vaoro oa-ia riroa kasipua toupaivoi vuri vovouro voeapa voriaro tuusa. Ovokia-a vao pou piroi. Uva iroutoa vaiiei ira uvuiparoi ra vaitereire korusa keevoisivira torepa, raa? Easi viapau iraiiei.”

## 7

### *Uva Oiso Uvui Irara Isrel Pauto Vo Reesiaro Ouiva 144,000*

<sup>1</sup> ✧ Vara rutu-a varao oara opesieiva, vo resura purapurapa irara ensel kekeavorao ovusa torepaaerao vo resura rutu roopavira vo rasito vatuaru iava. Oea vo resurare kiuvu korupaaerao. Ra oisi iava kiuvuara viapau oiso rasito pupive, ora avakava, ora evaoara. <sup>2</sup> Oire uva iravu kekeavora enselto osa vova kaero virorao uvava ravireo kaeparo viroveira. Ira Pauto vo reesiarova toupavevorao, ro Pauto ira tootoovira raga toupaveveira. Ira rirovira rutu keeraparaoerao evo resurare enselpa irara, oea gorua ouiva Pauto ruvara-ia rasito vuri piesa ora avakava. <sup>3</sup> Ira oiso puraroerao, “Opeita vagevagepata rasito vuri piepaoro ora avakava ora vegoara. Igei oiso vovoupaiei ra vo reesio tovo rovoio Pauto vaoro rera voeaoro kagavearo-ia kovopa irara. Osa iava taru utupaua orekerovu rutu vuri pietaverea!” <sup>4</sup> ✧ Oire uva voea uvuiaro vaisipaivora voea oea-ia vo reesi toupave. Voea uvuiaro 144,000 voea iava voea Isrel-pa irara. <sup>5</sup> Uva oisi-a eisi osa iava 12,000 Juda sara iava vo reesi ouivora. Ora voea Ruben sara iraraoro iava voea 12,000. Ora voea Gat sara iraraoro iava voea 12,000. <sup>6</sup> Ora voea Asa sara iraraoro iava voea 12,000. Ora voea Naptalai sara iraraoro iava voea 12,000. Ora voea Manasa sara iraraoro iava voea 12,000. <sup>7</sup> Ora voea Simion sara iraraoro iava voea 12,000. Ora voea Livai sara iraraoro iava voea 12,000. Ora voea Isaka sara iraraoro iava voea 12,000. <sup>8</sup> Ora voea Sebyulan sara iraraoro iava voea 12,000. Ora voea Josep sara iraraoro iava voea 12,000. Ora voea Bensamin sara iraraoro iava voea 12,000. Oea-a evoea vo reesi ouivora va vao Pauto vaoro.

### *Riro Irara Rutu Lotupaaveira Pautoa-pa*

<sup>9</sup> ✧ Vara rutu opesieiva, urusia-ia vuvuravaavorao ita. Oa iava riro irara rutu kekeavorao ouvuru toupavora. Uva viapau irai uvuiparoi ra voea uvuiaro vieireve. Voea rutu-a evoea osararovu rutu iava vo uvuru, ora okantrirovu rutu iava voea, ora ovararovu rutu iava voea, ora oreorovu rutu iava voea, oea torepaaerao reito vaoro paupa ruvara-ia ora Sipsip Kakae ruvara-ia. Oea riro kaekaepa kuvuro-ia kuvupaaerao vao popotepa varo. Ora sorapita raoro-ia pitupaivora ora voea iava vavaeara-ia. <sup>10</sup> Rirovira rutu raga piepaivora oiso purapaoro, “Vigei reraoro Pauto ira rera vaoro-ia paupa pauparoi ora Sipsip Kakae tapo aiterea vigei vorevira oisiva. Oa iava oriruvira toupai.”

<sup>11</sup> Uva enselpa irara rutu paupaoro kovokovopaoro torepaaerao turaro irara tapo ora vo resurao okarea tootoovira toupaveira. Uva voea rutu enselpa irara rekupaivora taku viropaoro Pauto vaisiaro-ia vuurapa vaisi purapaoro. <sup>12</sup> ✧ Oiso purapaerao, “Oiraopavira rutu. Roru irapai vigei reraoro-ia Pauto. Ora tavitavipaviei rera vaoro iava keraria. Ira-ia veaopara rutu rugorugooara toupaveira. Osa iava rera-ia veaoro vaisi purapai rera vaisiaro kae piepaoro ira riroava gorua toupavevoi rutu. Iu. Ira-ia riroa rutu

varivaria toupaivoi. Ari ita, vara rutu-a evara rera raga varaaro vokiara rutu iarepara.”

### *Siitoka Opesiepa Voeao Iava Vearo Vovou Irara*

<sup>13</sup> Uva iravu turaroto voea iava erao tau vo resura (24) ira oiso ragai akerevora, “Ovu iava evoea oea riro kaekaepara-ia kuvuparo popotepara kuvupapai? Irou irara-a, raa?”

<sup>14</sup> ✧ Uva rera vo rearo pukooro oiso puraraerao, “Auoro, vii raga oisi voea-ia taraipaei evoea.” Uva ragaire oiso puraroerao, “Oea-a voeao riroa rutu siitoka ouiva ora upiara keripa irara vavaeoro-ia vo vuutao-ia vuri vuuta rutu. Oiso osa iava ora voea varaaro kuvupara sisuiva Sipsip Kakae revasiaro-ia. Oa iava kuvupara popotevira karekepa. <sup>15</sup> ✧ Eva-a oa vituoro iava torepaveira paupa ruvara-ia Pauto vaaro. Uva voa-a evoa uva ravireoura rutu-ia ora rupa vokiara rutu-ia Pautoa-pa kovopaiveira rera vo kepaoro-ia Tugoropa Kepa. Uva rera Pauto voa paupaoro uvuipa ra voea tokipaoro voea virivaripareve. <sup>16</sup> Uva viapau uvuipai ra vorerivira ogoeave. Ora viapau uvuipai ra vorerivira uuko regaave. Ora viapau uvuipai ra ravireo voea kaukau piepaoro voea-ia roropareve. Ora viapau oavu avu vai uvuipai voea iava varaura oaive kasikasi piepaive. <sup>17</sup> ✧ Eake iava? Uvare Sipsip Kakae paupa vuutaarovi-ia toupaveira. Eera ira voeapa oiso toupaveireva, Voea tokipato. Ira taru voea tuvetevaveireva tuputupue rikuro iare uva Tootoopa Uukoara kosipa piroveira. Ora vo osa Pauto voea osireiara iava gau oviro posiposi piereveira. Ra viapau oiso vorerivira gaupaive ita.

## 8

### *Sipsip Kakae Erao Vatarapa Tuuke Tokova Vuku Viko Iava*

<sup>1</sup> Uva Sipsip Kakae erao vatarapa (7) tuuke vuku tuukepa tokovora. Oire uva viapau oavu avu vai gurukoa vai purapaivora. Ora viapau reoreoa vai voa vuvuiua-ia katai vuutavi rutu uvuiaro-ia (hap aua). <sup>2</sup> ✧ Uva eva isivaoro iava erao vatara enselpa irara kekeavorao oea Pauto ruvara-ia torepaveira, vo uva rera ruvara iava erao vatara utaveara ouivora.

<sup>3</sup> Uva iravu enselto eravao ruvara-ia toesa urioroerao plet-ia golava pitupaoro, iria-ia akoroa-ia riipu kupare purapaiveira geesipa. Uva rera vateivoraoro riroara rutu akoroara riipu kupare geesi purapa vaore, oiso ra va tapo uverereve oirara rutu vo variriroarova voeao Pauto voeao. Osa iava tauoa purarevere Pautoa-pa oira-ia eira eravao golava iria torepaveira reito paupaoro ruvara-ia Pauto vaaro. <sup>4</sup> ✧ Uva vo kupare-a vao akoroa vaaro riipu geesi purapa ora variriara oirara varaaro Pauto voeao ovatakoa rutu eva enselto vavaeoro iava ipaerao Pauto ruvara-ia pou virosa. <sup>5</sup> ✧ Oire uva enselto plet ouevoraoro riipu kupare geesi purapava, ora tuituia tapo ouevoraoro eravao iava. Oa iava vara rutu-ia plet agasi pierevoraoro. Uva va tuitui kasi vikirevoraoro rasitua iare. Uva va vikirevoiva, varakeoto pokoro viroraoro. Vo osa gurukoa karekeerao. Oa iava rera varakeoto parakauoro rororevoraoro. Uva va-a eva oa iava rasito ravurikeroerao.

### *Vo Resura Purapurapa Irara Ensel Utaveara Vuvurepaiva*

<sup>6</sup> Uva voea-a voeao erao vatara enselpa irara oea erao vatara-ia pitupaivoraoro utaveara vatatopopaoro, oiso ra vara-ia utaveave.

✧ 7:14: Mt 24:21-31; Sek 3:3-5; Hi 9:14 ✧ 7:15: Ais 4:5-6; Re 21:3 ✧ 7:17: Sam 23:1; Jo 10:11, 14; Esi 34:23-31 ✧ 8:2: 1 Te 4:16; 1 Ko 15:52 ✧ 8:4: Eks 30:7-8; Sam 141:2 ✧ 8:5: Sam 97:1-6; Lev 16:12

7 ✧ Uva rovoto enselto rera oiraaro utave vuvurerevorao. Oa iava ais uvere ora tuituia ora revasiva karekeerao rasitoo iare kovesa. Oa-ia rasito reesiivorao rera roo piesa vo peva uvuiaro iare. Oa iava tuitui kasi oavu uvavua aiovorao vo peva iava va rasia, ora vegoa, osa kokopa kouro rutu varao oara tootoopapeira oara rovaerao.

8 ✧ Uva eraopato enselto rera oiraaro utave vuvurerevorao. Oire uva orekevu vikiivorao oiso roroa osa pukuia riroa opukuia rovapaerao. Uva avakava-ia kovesa varaerao. Oa-ia eva avakava reesivorao ita oira roo pieoro vo peva uvuiaro rutu iare. Oa iava orovuvu vo peva iava revasivira pore pirorao. 9 Uva oisi-a oiso osa okarerovu rutu voeao okarea tootoopaaveira avakava-ia, oea reesireesiivorao vo kare rutu roo pieoro vo peva sara uvuiaro iare oiso, Osaravu kopiiera vo peva iava. Ora uvuora tapo uvuiaro roo pieivorao vo peva sararo uvuiaro iare aue selpa uvuoro. Uva vo peva iava osaravu uvuo sip vuriera.

10 ✧ Uva vo pevapato enselto rera oiraaro utave vuvurerevorao. Ovusa iravu rirova aaviiko rovaorao rutu oiso osa aoa oa vuvuiua iava koveerao. Uva uukoara rutu roo pieivorao vo peva sararo uvuiaro iare aue uuko. Uva aaviiko koveorao osaravu-ia vo peva iava aue uuko ora vara rutu-ia tuputupue uukoro. 11 ✧ Uva oira vaisiara-a o-ia aaviiko, Itakova iria itakopaoveira. Iria-ia uuko oviro vieiara roo pieivorao vo peva rutu uuko sararo uvuiaro iare. Uva vo peva iava osaravu uuko itakovira ora pore ovoiera. Oa iava riro irara rutu vo oviro-ia ukaiopaava, itakopaoro kopii ovoipaaerao.

12 ✧ Uva vo resurapato enselto rera oiraaro utave vuvurerevorao. Oa iava ravireo, ora kekira, ora aaviikoara rutu roo pierovorao vo peva sara rutu uvuiaro iare. Oa iava vo peva iava ovarurovu vuriera oiso, ravireo varu, ora kekira varu, ora ovarurovu aaviikoara rutu iava. Osa- a eisi osa iava vara rutu rooara iava varao aviavipara ovarurovu rupavira karekeerao. Eisi osa iava vo ravireopa vuuta-ia uva vo resura vuutaro rutu-ia rupaerao. Ora vokiara tapo ita uva viapau aviavia vai vo kekira iava oai ora aaviikoara rutu iava aviaivi vo vo resura vuuta rutu sovara-ia.

13 Uva riroto keravo kekeavorao osa papapaoro vuvuiua-ia avaparoerao. Oire uva rera uvuavorao osa rirovira rutu gauparo oiso puraparoerao, “Siraovira! Siraovira! Siraovira rutu oiraravipa voeao oea touvira vo rasio-ia toupaveira. Uvare vo peva enselpa irara oiso vovoupaai ra utaveara oaive vuvureive. Ra oisi iavirava riro tavaka rutu voea-ia oirara karekepe.”

## 9

### *Vo Vavaepato Purapurapato Ensel Utave Vuvurerevorao*

1 Uva vo vavaepato enselto rera oiraaro utave vuvurerevorao. Oa iava iriavu aaviiko kekeavorao iria vuvuiua iava koveorao vore rasitoo-ia. Uva oira vateivorao kii vaore oira googagare riku oa vituaro-ia viapau rekasia vai. 2 ✧ Uva vo riku karuevoiva, kupareto voava vusivusiparevorao riro kasi iava tuituia. Okuparea eva ravireo tavurupaivorao ora vuvuiua. Oa iava ravireo vaio ora vuvuiua rupapasiera. 3 Uva riro kare rutu tutuvake kare vo kupare iava varapaaerao rasitoo iare. Okarea-ia toupaiivo riroa rutu avuavua oiso osa siikopi ro ira oirara upia piepareveira. 4 Oire uva oiso oavu vosi reo uvuavorao vo kareo iava tutuvake kare. Oa oiso puraerao, “Opeita isiso kouro vuri piepata eke orekerovu rutu kokopa kouro ora evaoara. Ari visii uvuipatai ra oirara avupata voeao oea kagavearo-ia Pauto

✧ 8:7: Esi 38:22; Re 9:4 ✧ 8:8: Jer 51:25 ✧ 8:10: Ais 14:12-17 ✧ 8:11: Jer 9:15, 23:15

✧ 8:12: Re 6:12-13 ✧ 9:2: Jen 19:28; Eks 19:18; Joe 2:2, 10

vo reesiaro viapau toupave. <sup>5</sup> Uvuipatai ra voeapa upia vatepata vo vavae rutu kekira uvuiaro-ia. Ari opeita voea kopii piepata rutu! Viapau.” Eisi osa iava vo kare eva tutuvake kare vuri upiario vatepaivora oirarapa oiso rutu osa siikopi oirara avupaoro voea upia piepareveira. <sup>6</sup> ☆ Uva vo vuuta vao vo vavae iava vao kekira oa-ia oirara kopiipa raivare taraa ragapaiverea. Ari ita, ra viapau oiso va kekepaive. Iu. Ruipa irao ragapaaverea oiso ra kopiiaive vo osa kopiia voea asavira toripaive.

<sup>7</sup> ☆ Uva ragai vo kare eva tutuvake kare kekeavorao oiso osa hos kare upo purapasa auepaaveira. Uva vo kare kukuearo-ia kukuvaipara golara toupavora. Ovusa vo kare iava puaura oiso toupavoraosa oirara puaro. <sup>8</sup> Ora vo osa voea iava oruara oiso toupavorao osa gegeru, oiso osa riakora oruaro. Ovusa voea iava reuriara oiso toupavorao osa laion reuriaro. <sup>9</sup> Uva vo kare kopukopuaro-ia oaravu oiso rutu kekevira toupavorao osa kaapara kuvupara voea utopasa. Ora vo kare putaeoro putaputapaoro pokopa viroro oiso osa riroara rutu karis ururo hos kare ivupaoro ikaupaiveira upoa iare avapaoro, ovusa vara karisara ragaragavaopaive pokopoko uviropaoro. <sup>10</sup> Kookoopiara vo kare iava toupavorao oiso osa siikopi, ora rokarokara varao oara-ia kuuva ovi roko piepaiveira avu vuuro iare vituara pukopao oirarapa upia vatepasa vo vavae rutu uvuiaro iare kekira. <sup>11</sup> Uva iravu voea reraoro king toupaveira ro-ia enselto, ira googagare rikui-ia tou irarapa reiparoerao o iria-ia viapau rekasia vai. Ira vaisipaiveira Hibru reo-ia oiso, Abadon. Ari Grik reo-ia oiso rera vaisipaiveira, Apolian. Oa porearo-a vao oiso, Orekerovu Rutu Vuri Piepato.

<sup>12</sup> Ari ita, rovo tavaka rutu opesi rovoerao. Oire uvuta! Touvira otavakareivu epao oarea taru utupaua karekeperea.

### *Katai Vatarapato (6) Purapurapato Utave Vuvurevora*

<sup>13</sup> Oire uva katai vatarapato enselto rera oiraoro utave vuvurevora. Uva oreovu uvuavorao vatu resura vuvuvuaro-ia aue eravao golava vatuaoro iria Pauto ruvara-ia toupaveira. <sup>14</sup> ☆ Oa-ia oiso puraero katai vatarapatoare enselto ira utave-ia pitupare, “Vo resura enselto irara oea tuukepaaveira riro kara-ia uuko kara Yufretis. Voea iava vase iraori voea tuukearo karuoro, ra avaave.” <sup>15</sup> Oire uva vo resura evoea enselto irara vatatopo ovoiaero vo vuuta ragare tuepaoro, ora vo vokie raga, ora vo kekira raga, ora vo ivao raga-ia vo kovo vao purasa. Oa iava vo kovo purasa voea karurevora, oiso ra oirara rutu reereesiive voea roo pieoro vo peva uvuiaro rutu iare sara. Ra osaravu vo peva iava upoive. <sup>16</sup> Uva viurupa irara uvuiaro rutu-a voeao oea hos kare-ia paupaaero oiso voea 200 milion. Voea uvuiaro rutu reesiaro iava uvuavorao. <sup>17</sup> Uva areo uusia vo kare kekeavorao hos kare ovusa vo kare-ia paupaaero. Uva voea oirara kaapa kuvuparo-ia kuvupaaveira. Uva vara siroviearo revasipavira toupaveira, ora kuuva siroviero, ora kese siroviero. Ovusa hos kare kukueoro oiso osa laion kukueoro. Oire uva tuituiara, ora kupareara, ora aveke viitavokoro solfaara oara rutu vo kare gisipoaro iava kosikosipa piroaro tuituvira pigigiopaoro. <sup>18</sup> Uva oirara roo pievora vo peva rutu uvuiaro iare sara. Oa iava vo peva iava osaravu kopiierao, vo uvare vao tuituiara, ora kupareara, ora aveke viitavokoro solfaara oara rutu vo kare gisipoaro iava hos kare pigigovira kosikosi piroiva, kopii ovoiaero. <sup>19</sup> Vo kare vo varivariaro hos kare oa gisipo-ia toupaveira ora vo kookoopi-ia.

Okarea iava kookoopi oiso toupaveira osa rakoru, iria porikearo kukuearo-ia gisipo toupaveira. Iria-ia oirara vuri piepaveira.

<sup>20</sup> ✧ Oire uva oearovu rutu oirara viapau oiso kopiiaepa vo peva-ia eva vuri peva, oea viapau ora voea iava sopaura porepaveira, ra varaore ovaupaave oara purapaveira vurira ora voea raga vavaearo iava. Iu ita, uvare viapau oiso vuri urauraro tugara vuura vaisi purapa vovouro viapau kavupaveira, ora pau irara tokarasi irara voea oea purapaveira aue-ia gol, ora silva, ora bras, ora aveke, ora evaoara. Oara-a rutu evara viapau uvuipaveira ra vuravurapaive, ora viapau uvupaive, ora viapau vokapaive.

<sup>21</sup> ✧ Oiso osa oearovu voea iava oira popaveira, ora kavokavopaaveira, ora otopa pitupituro purapaveira, ora orekerovu kavirupaveira. Ari ita, osa viapau oiso ora voea iava sopaura porepaveira, ra vo vovouore evara ovaupaave.

## 10

### *Purapurapato Ensel Jon-pa Vukua Vatorevoiva, Va Aioreva*

<sup>1</sup> ✧ Vao opesierao, oa iava iravu riro varivarito purapurapato ensel kekeavorao ovusa vuvuiua iava vararoerao aue-ia rukuta kuvupaoro. Ovusa govugovuto rera kukuearo-ia toupaveira, vo osa rera iava puaua sisikorevira roropaivora oiso osa ravireo. Vo osa rera iava kokotoa tuituvira toupavora vuvupaoro. <sup>2</sup> Uva oavivu-ia gare viko vukua pituparevora ovusa karuvira toupavora vo vuku. Uva oirapapa kokoto iava avakava ivara-ia tasiparevora ovusa koike kokoto iava rasitoa-ia tasiparevora. <sup>3</sup> ✧ Oire uva rirovira rutu keeraparoerao, oiso rutu osa laion gaupaveira. Uva oisi-a eisi osa keeraparoerao uva erao vatara (7) varakeora rera vo keeraoro pukovora poka virooro oiso reoreoro. <sup>4</sup> ✧ Uva erao vatara varakeo poka virooro reoreoro. Uva oiso ruipaparai ra vao rigatoa. Ari ita, ragai oreovu uvuavorao oa vuvuiua iava urioerao oiso puraoro, “Evo reo erao vatara varakeora vaoro oa oriru iraori ora vii iava rugurugooa-ia. Viapau uvuipauei ra va rigatori.”

<sup>5</sup> Uva ro enselto ira keke rovoavorao ovusa avakava ivara-ia tasipaoro ora rasito ora rera vaoro oirapapa vavae kae pievora vuvuiua iare. <sup>6</sup> Uva oiso puraroerao, “Oiraopavira rutu vavo oiso viara-ia Pauto vaisiaro-ia ro ira tootovira toupaveira vokiara rutu-ia. Ro Pauto ira vuvuiua purareva ora orekerovu rutu varao oara voa toupaveira. Ira raga rasito purareva ora orekerovu rutu varao voa toupaveira. Ora avakava iria purareva, ora orekerovu rutu varao oara voa toupaveira.” Oire uva enselto oiso puraroerao, “Vuuta opesisa tutuuvo, ra Pauto viapau tovira aate piepareve. <sup>7</sup> Viapau. Ari utupa visivi erao vatarapato enselto utave vuvurevere rara. Ra oira gurukoaro karekeo. Ovuufa raga-a eva oa-ia Pauto va vao purarevere oa iava tavitaviroepa vatauvira vo osa profet irara tavitavireva voeri rerapa kovopa irara.”

<sup>8</sup> Uva vo reo-a vao voviri uvu rovoavora oa vuvuiua iava urioerao oa ragai tavivora ita oiso puraoro, “Vuku viko ousa avau eva oa karuvira toupavoi enselto vavaearo-ia, eera ira avakava ivara-ia tasipaoro torepai ora rasitoa-ia.” <sup>9</sup> ✧ Uva enselto iare avaraerao. Oa iava rerare oiso puraraerao. “Ragai vateri eva gareavi vuku viko.” Oire uva ragai tavioro oiso puraroerao, “Va ouri. Ra va aiori. Ra vii sarearo uureo pieve. Ari ita, vo osa vii iava gisipo-ia oiso rutu gavaupavira vuta rovo pirovere oiso rutu

osa koisiva.” <sup>10</sup> ✧ Uva oisi-a oiso osa puraroiva, va eva gare vukuvi ouavorao rera vavaearo iava va aiosa. Uva ragai iava gisipo-ia gavaurepavira rutu vutapa pirorao oiso osa koisiva. Uva va kopa ovoivoiva, ragai sarearo uutepo pievorao.

<sup>11</sup> Oire uva ragai taviivorao oiso puraoro, “Siposipo iraorivere ita Pauto varaaro rutu iava, varao oara oirara rutu-ia karekeperea uvarovu rutu okantrirovu-ia, ora oreorovu-ia, ora oearovu-ia tapo riro irara king irara.”

## 11

### *Vo Toupai Oiratoarei Iava Siposipopatoarei*

<sup>1</sup> Uva ragai vateivorao oavu uvuia orekerovu uvuipasa oiso roroa rutu osa vokatapo tooro. Uva ragai taviivorao oiso, “Toreu, ra Pauto vo kepaaro aue Tempel uvuiri ora eravao vao alta. Ra oirara vieiario tapo vieiri voeao oea Pautoa-pa vuurapa vaisi purapaiveira Tugoropa Kepa-ia. <sup>2</sup> Ari opeita uru uvuiri eva ratao Tugoropa Kepa riaaro-ia. Oa-ia uvuipau ra va kavu iraori. Uvare vo uru-a eva sopaipa irara rupa vovou irara vaaro, oea uriopaavere Jerusalem urui vao-ia Tugoropa Urui tasiapaoro va vuri piepasa vo resura tau erao (42) kekiraro rutu uvuiario-ia. <sup>3</sup> ✧ Uva ragai vaitereipa vaitereo gorua vateavere aiterea ragai vo reoaro iava siposipopasivere bek karipareivi raga-ia tuupaoro varovira, oiso ra vaiterei vo siraoaro karekepasi. Osa eisi piesivere a oiso vo vokiro rutu uvuiario-ia 1,260 vokiro.”

<sup>4</sup> ✧ Aiterea oiso toupasiveira osa oliv ovarei, ora vuravurirei vaireo airea Turaro ruvara-ia toupaeveira ro rasito rutupa reipato. Oara rutu iava rigatoreva Sekaraia. <sup>5</sup> ✧ Uva vosa oearoi vaiterei vuri piesa auepaave, osa iava tuitui kasi vaiterei gisipoaro iava kosikosipa pirovorea voea evoea vaitereiva keripa irara kasi ovoisa. Iu. Oiraopavira rutu, ro ira vaiterei vuri piesa aueparo, ovovoua raga-a eva oa sirova uvuiparoi ra kopii ovoiro. <sup>6</sup> ✧ Aiterea goruava toupasivoi vuvuiare korupasa. Ra viapau rutu oiso aue kokeva vai vo vutaro rutu-ia kovepao, varao oara-ia Pauto vo reoaro-ia siposipopaoro vokatapi. Ora goruava tapo toupasivoi oa iavarava uvuipasi ra uuiko kararo tuputupueara revasivira poresi. Ora oirara rutu vuri piesi voeao vo rasio-ia orekerovu rutu iavirava vuriara. Ari ita, ovuutarao-a evara oara-ia oisi eisi piepasiveira ora vaiterei vo vovoueiario raga sirova utupaoro.

<sup>7</sup> Uva ora vaiterei vo kovoaro opesi pie rovosiverea vao Pauto vo reoaro iava siposipopa. Oire ro vavaraito googagare rikui iava kosiro viro vaiterei tapo ora uposa. Eera ira vaiterei-ia pute ovoireverea vaiterei kopii pie ovoioro. <sup>8</sup> ✧ Oa iava vo kopiirei riro raiva-ia toupaverea vo raivao vore riro urui-ia Jerusalem vao ouruia-ia Turaro vaiterei reraaro kopiiopea evao parikou-ia. Ouruia vaisiario ovoovovira oiso vaisipaiveira, Sodoma urui, eke vao Isip-ia. <sup>9</sup> Uva oearovu ovararovu rutu iava, ora okantrirovu rutu iava, ora oreorovu rutu iava, ora osararovu rutu iava voeoro vo kopiirei keke ragapaiverea rutu varei vura ragapaoro vo peva rutu uvuiario-ia voki ora ovokipavu. Uva ora voeaire korupaaverea vaiterei tova arapa. <sup>10</sup> Uva voeao oirara vo rasio iava rorupaiverea vo rara kopiisi. Uva pupipaiverea egaegapaoro, ora aiopaiverea oearovupa vate irara oaive orekerovu vatevateara vatepaoro. Eake iava? Uvare vaiterei-a evaiterei profetatoarei, aiterea upiara vuriara oisoa vatepasi oirarapa voeao vo rasio-ia. <sup>11</sup> Oire uva vo peva voki ora ovokipavu opesi rovoerao. Oa iava

✧ **10:10:** Esi 3:3 ✧ **11:3:** Dan 7:24-28; Re 19:10 ✧ **11:4:** Sek 4:1-14; Sam 52:8 ✧ **11:5:** 2 Kin 1:9-12 ✧ **11:6:** 1 Kin 17:1-7 ✧ **11:8:** Ais 1:9-10; Hi 13:12

Pauto rera vaaro vovoua vovoueva tootoopa vaiterei sopaaro iare vaiterei tootoo piesa. Uva oisi iavirava toresierao. Oa iava voeao rutu vaiterei kekepaoro uriri iraoppaerao rutu. <sup>12</sup> Uva oreovu uvusivoroa oa vuvuiua iava urioerao vaitereiva rirovira rutu keerapaoro. Oiso puraerao “Vore ipasi!” Oire uva ipa ovoisierao vuvuiua iare rukuta sovara-ia ovusa keripa irara voeao vaitereiva vaiterei siituepaivoroa. <sup>13</sup> Uva vo vuutavi raga-ia riroto ravurike vusi ovoirevorao. Oa iava uvavuva oavu riro urui iava urui varu vuri pierevorao ovusa vo resura vatara karutu raga kavu pirorao. Uva voea 7,000 rutu-a oirara oea voa kopiiara rera-ia eera ravurike. Uva oavu kavua virorao oea rirovira rutu uriri iraoppaerao. Osa-a eisi osa iava Pauto vaisiaro kae pie iraoppaivoroa ro oisova vuvuiua-ia.

<sup>14</sup> Oire uva va-a vao erao pie tavaka oa oiso opesierao. Uvu iraota! Gareavi raga, ra vo pevapa tavaka karekepe ita.

### *Erao Vatarapato Ensel Utave Vuvurevorao*

<sup>15</sup> ☆ Uva erao vatarapato purapurapato ensel rera oiraaro utave vuvurevorao, ovusa oreorovu vuvuiua iava rirovira rutu keerapaoro oiso purapaerao, “Turaro oavi vaiterei ora Krai rera reraora ira oiso karekeroi, Rasitoa rutu reraora King. Ira touvira rutu turarovira opesi asavira toupavevea!” <sup>16</sup> Oa iava voeao erao tau vo resura (24) turaro oea paupaaveira voea varaaro-ia paupara vo Pauto ruvara-ia oea takupaa virorao Pautoa-ia vuurapa vaisi purapaoro. <sup>17</sup> Uva oiso purapaerao, “O Turaro Pauto goruara rutuva toupaveira. Viigoa vo vokio toupari, ora tuariri rutu tapo oisova toupari. Viigoa riroa rutu varivariva ouriva oa iava turarovira toupari

orekerovu rutupa reipaoro. Eisi osa iava vii-ia vearo vaisi purapaiovoi.

<sup>18</sup> ☆ Rupa vovou irara kasipu iraoppai vo osa vii vo kasipuaro kareke ovoiei. Uva vo vuuta-a vao-ia oa-ia kopii irara rovirieia iare kort karekepaai ovuuta vao-ia vearoa voria vatesapa vii voeaaropa kovopa irara. Evoea ita profet irara, ora voea oirara vii voeaaro, ora voeoro oearoa viipa avivikepaoro vii reroarovi toupaveira, ora voeao oea rei vaisirova toupaveira, ora voeao rei vaisi asa irara, oea rutu-a ovuuta vao-ia voeao vuri piesapa oea rasito oiso vuri piepaaveira.”

<sup>19</sup> ☆ Oire uva oisi-a oiso osa reo rovoaiva, Tugoropa Kepa vao Tempel karuivoroa Pauto vaaro oa vuvuiua-ia toupaveira. Uva bokis o iria-ia Reo Ovoi purareva Pauto iria viaevira toupavevorao Tempel sovara-ia. Uva varakeoto parakauoro voare pigigiovira avaparoerao, ovusa gurukoto karekeparaoerao ora varakeoto pokoparo virorao. Uva rasito ravurikerorao ovusa riroara kokeara ora ais koveerao.

## 12

### *Riakova Vaio Iava Ora Dragon*

<sup>1</sup> ☆ Uva oavu riroa reesia karekeerao vuvuiua iava oiso rorovira osa riakova iria ravireo-ia ora tavurupaoro oiso osa varaoa toupavevorao. Ovusa kekira oira kokotoaro reroaro toupavevorao. Uva oira iava kukue-ia katai tau erao (12) toupavevorao aaviiko oiso osa kukuvaipa. <sup>2</sup> ☆ Iria kakae kovuva touevoroa, ora upiaora kakaeto kavausa. Uva vo upia eva vuria rutu oa iava rirovira rutu oivepaoro kakaeto kavausa auepaoroa.

<sup>3</sup> Oire uva oreesivu ita voava vuvuiua-ia karekeerao, oreesia oiso toupavorao, Iravu riroto dragon. Ira toupavorao revasipato ira-ia erao vatara kukue toupavorao ora katai tau keta. Ovusa erao vatara king varaaro kukuvaipara vo kukuvero-ia toupavorao. <sup>4</sup> Uva rera iava kookoopi osaravu rutu aaviiko guruevorao vara vikisa rasiuaarore, vo uva koveerao ovusa vo sararei raga kavu pirorao vuvuiua-ia. Uva rera-a eera dragon ira riakova ruvara-ia toreparoerao ovusa kakaeto kavausa aupeoraao. Ira oira aate pieparevorao, oiso ra rera aioreve oira reraaro kakaeto. <sup>5</sup> Uva o riakova oira kakae kavavevorao. Uva rera kakaeto ira utupau ain tooro-ia pitureverea vava oirara rutu tokipasa osararovu rutu iava voea. Oire uva riakova kakaeto kavau ovoievorao. Oa iava ikauvira rera ouivorao viara iare Pauto-a iare rera siposa vo uva pauparoerao rera vaaro-ia paupa. <sup>6</sup> Uva eira riakova torioro avaoarao uvavure kuvau tapi uva viapau oirara vai toupave, vo uva Pauto ora rera vo uruiaro ravaareva oirapa. Oisore ra voa oira vearovira rutu tokipaive oirapa aio vatepaoro vo vokiro rutu uvuiaro-ia 1,260 vokiro.

<sup>7</sup> Uva vo vokio riroa upoa rovoei vuvuiua-ia. Oa-ia Maikel ora rera voeaaro enselpa irara dragonva riroto ora upopaai. Ovusa ro dragon ora rera voeaaro enselpa irara oea voeava ita ora upopaai. <sup>8</sup> Ari ita, osa viapau varivaria vai ei voeapa upoava ora poesisa. Osa-a eisi osa iava viapau uvuipaai ra tovira toupave vuvuiua-ia evoea dragon vase. <sup>9</sup> Uva purapurapa irara ensel Pauto voeaaro rera-ia dragon vikiaerao rera kosi pieoro rutu. Eera dragon tuaripatoa rutu ira vaisipaiveira oiso, Seten. Ira oirara rutu iava gasipareveira, ora oirara rutu keakeapareveira voea vo rasio-ia. Ira vikiivorao rasiuaarore rera voeaaro tapo purapurapa irara.

<sup>10</sup> Uva oreovu uvuavorao vuvuiua iava oa rirovira rutu oiso puraerao, "Vo vokio-ia vigei reraaro Pauto vigei vorevira ou ovoirevoi. Ora vo osa rera vo varivariaro viaevira rutu ora karekei. Oa iava kingvira toure ora rera reraaro Krai, ira tapo ora rerapa riroa turaro vaisi ourevoi. Eake iava? Uvare ro Seten ira vigei araoko iraraaro iava gasi iraopareveira Pauto osireiario-ia vo ravireoura rutu-ia ora voki ruparo rutu. Uva vo vokio enselpa irara rera kosi pieovi vuvuiua iava. <sup>11</sup> Voeao araoko irara oavi oea varivaria ouiva ora gorua Sipsip Kakae revasiario-ia, varei ora vo oiraopa vovou rutu oa iavirava rera vo reoaro iava oisoa siposipopaive. Oire uva vo pitupitu-a eva oa sirova upoava ora poesiai keripatoa-ia puteoro rutu. Uvare viapau oiso ora voea vo touroarore veapara oisoa rugorugooapaave varao vo rasio-ia ora voea raga ora orirupasa. Viapau. Ari oisoa ora eaka ragapaave, ra kopiipaave. <sup>12</sup> Osa-a eisi osa iava vii vuvuiua ora visii rutu visiigoa voa toupataveira evoa vuvuiua-ia visiigoa roru iraopata. Ari ita, vo osa visii vao vo rasio-ia tou irara ora vii akavava visiigoa rutu eva vatatopo iraopata. Uva siravira rutu visiivipa, uvare riro siitoka rutu visii-ia karekesa auapai. Aue iava uvare Seten epao ira visii iare vararoi. Ira riroava toupavevoi kasipua, uvare taraiparoi oiso, Rera vaaro epao poteku vuutavi raga."

<sup>13</sup> Uva dragon ora rera-ia tarairoerao oiso, Eari, ragai-ia vikiaera vo rasitao iare. Oire oa iava voa o riakova tarioparevorao iria kakaeto kavavevorao. <sup>14</sup> Ari ita, uva oirapa riakova vearovarei rutu putaeuarei vateivorao riroto keravo putaearo. Ourea iava uvuipaai ra papapaoro avao oira voaarore vo rasitao-ia kuvau tapi uva viapau oirara vai toupave. Uva uvuipaai ra toripaoro voa toupave riroto asavira dragon. Ra voa oira vearovira rutu tokipaive aioara vai-ia vo peva ivaro rutu uvuiaro iare ora



okurovu. <sup>15</sup> Uva rera dragon uukoa oerevorao ora rera gisipoaro iava oiso rutu osa uukova iria pirutuvira paruevorao. Oa iava oira tariopaoro utuerao o riakova, uvare dragon oiso vovouparoaeroa ra oira turove vo pirutu. Ra opesi ovoio. <sup>16</sup> Ari ita, vo osa rasia riakova tauvavorao akaoro. Uva vo rasi eva vo pirutu kopavorao oa oe ragerevorao dragon ora rera gisipoaro iava. <sup>17</sup> ✧ Uva rera-a eera dragon riroto ira kasipu irapaoroerao oirare o riakova. Oa iava avaroerao, oiso ra okakaeroi oira ovii kakaero vaiaro uporeve ita voearo oearoa Pauto vo reoroaro varao reo goruro sirova utupaaveira, ora Jisas vo reoaro iava siposipopaoro rera tapo sirova utupaaveira. <sup>18</sup> Uva rera eera dragon rogaraua-ia avakava-ia toreparaeroa.

## 13

### *Vaiterei Vavaraitoarei Aiterea Karekesierao*

<sup>1</sup> Uva iravu vavaraito varuereto kekeavorao, ovusa kosiro virorao avakava iava. Ira-ia katai tau keta toupavorao, ora erao vatara aue kukue. Uva rera iava keta tau kukuearo-ia king vo kukuvaoroaro toupavorao voa. Uva rera iava erao vatara-ia kukue oaravu vaisiario toupavorao, vo vaisiro otakaurovu rutu vaisiario varao oara-ia Pauto tovipaoro rera takaupaaveira. <sup>2</sup> ✧ Uva rera vavaraito ira kekeavorao ira oiso toupaveira osa lepat laion rooto. Uva rera iava kokotoara oiso toupavorao osa bea kokotoaro. Ari rera iava gisipo oiso osa laion gisipoaro. Uva rera-a eera dragon ira ora rera vo varivariaro vaterevorao rerapa eera vavaraito. Oa iava oiso rera tovevorao rera reraaro king oiso raga ita osa rera. Osa iavirava eisi rerapa riroa rutu gorua vaterevorao orekerovupa reipasa. <sup>3</sup> Uva iriavu kukue rera iava vavaraito oiso toupavevorao, Iria togaiva oira kopii pieoro. Ari ita, uva kapua viupa rera kukuearo-ia vasavava. Oa iava vorevira kukue vearooa ita. Uva oisi-a eisi osa iava oirara rutu vo rasio iava oea rera-ia tavetave irapaavorao eera vavaraito. Oa iava rera sirova utupaerao. <sup>4</sup> Uva rera reito dragon ira rerapa ro vavaraito gorua vaterevoiva ora rera vaaro, oirara rera-ia dragon vuurapa vaisi purapaavorao. Uva rera tapo-ia eera vavaraito vuurapa vaisi purapaavorao oiso purapaoro, "Iroutoa vai rova vavaraito vaeapare? Iroutoa vai uvuiparoi ra rera tapo ora uporo? Easi viapau iraei?"

<sup>5</sup> Uva iravu rerapa eera vavaraito vaserevorao ovusa rirovira takatoporoerao Pauto takaupaoro. Ari ita, goruava toupavevorao vo pitupitu eva purasa vo resura tau erao (42) rutu uvuiaro-ia kekira. <sup>6</sup> Uva ora rera iava gisipo aka pieoro rutu Pauto tovipaoro rera takauparevorao, ora rera vaisiario Pauto, ora rera vo ruuiaro Pauto, ora rera vo saraaro Pauto voeao oea vuvuiua-ia tupaaveira. Oara-a varao oara rutu tovipaoro vara takauparevorao vavaraito. <sup>7</sup> ✧ Uva iravu rerapa vaserevorao. Oa iava upoa kareke pierevorao Pauto voeavora. Uva upoava ora poesiroerao. Oa iava voea kove pierevorao, uvare gorua oureva vao oa iavirava uvuiparoi ra reiparo asararovu rutupa, ora okantrirovu rutupa, ora oreorovu rutupa, ora ovararovu rutupa. <sup>8</sup> ✧ Oirara rutu voeao vo rasio-ia oea vaisiario viapau toupavorao Tootopa Vuku-ia vo vuutao-ia oa-ia Pauto rasiito purareva, oea rera-ia vuurapa vaisi purapaivere eera vavaraito. Ari ita, vuku-a eva Sipsip Kakae vaaro vo kakaero tuariri oa upoivoiva, kopiiepa.

<sup>9</sup> Ro ira-ia kokito toupere ira uvuiparoi ra vearovira rutu vo reo uvu iraoreve. <sup>10</sup> Vosa Pauto vo ruipaaro sirova iravu ouive tuukea iare, oire avaro tuukesa. Ora vosa Pauto vo ruipaaro-ia irai upoive toorio vai-ia, oire

ra oisi rera upo iraoive rera-ia toorio. Ari ita, vo osa vo pitupitu eva oisi eisi karekepe voea-ia osa iava Pauto voeaaro uvuipaai ra goruvira rutu ora voea vo oirao pie vovouroaro-ia uvisi iraoive.

<sup>11</sup> Uva iravu eraopato vavaraito kekeavorao ovusa rasito sovara iava vsirevorao. Ira-ia vaiterei ketatoarei toupasivorao oiso osa sipsip kakae ketaaro. Ira reoropa oiso paerao dragon rearo. <sup>12</sup> Uva rera ro rovopato ira ruvara-ia oisi raga ita vo gorua oureva vavaraito ro eraopato. Oa iava rera vo goruaro iavirava okovorovu rutu purareva rovopato vavaraito sirovavi. Ira oirara rutu oiso piereva ora rasito, ra rera raga-ia eera vavaraito rovopato vuurapa vaisi purapaive. Ira-ia tuariri kapua viupa pura piroiva, vasavava. <sup>13</sup> Uva rera ro eraopato vavaraito oaravu rutu ravotoara puraparevorao oravotovu-a vao-ia oiso, vo uvare oirara rutu osireiario-ia tuituia vara pieravorao vuvuiua iava vore rasitoa-ia. <sup>14</sup> ✧ Osa iravu rerapa vaserevorao vo osa vo ravotoro rutu evara puraparevorao rovopato vavaraito osireiario-ia. Oire uva vo pitupitu eva oa-ia oirara rutu voea vo rasio-ia keakearevorao eraopato vavaraito oiso voea tavioro, “Ro rovopato vavaraito ira urauraaro purata evaoo vai-ia tokarasivira. Ra rera vaisiario kae piepata ro vavaraito tuariri toorio ira uporeva. Ari ita, uva tootoovira raga rera toupave.” <sup>15</sup> Uva iravu rerapa vaserevoiva, tokarasi-ia tootoo pieravorao eraopato vavaraito rera iare vavauoro. Oa iava rera eera tokarasi reoreoroerao. Oire vosa viapau oearoi ro-ia tokarasi vuurapa vaisi purapaive, ra rera raga ita voea uporeve.

<sup>16</sup> Uva eera eraopato vavaraito oiso taviroerao. Oa iava oresivu tovoivorao oirapapa vavae-ia, eke vo kagaveara-ia oirara rutu-ia voea oira akukuro raga, ora voea oea rei vaisivira toupaveira, ora voea monipa irara, ora apota irara, ora voea oea akukupavira kovo ragapaiveira, ora voea oea evoeapa reipaaveira. <sup>17</sup> Osa-a eisi oiso vosa ro ira-ia viapau vo reesi eva viapau toupave vavaraito vaisiario iavirava vo reesi, ora rera vaaro iava vieia vo reesi tapo, ra viapau oaravu avu vai voripareve oearovu ruvara-ia. Ra ita oisi oearovu viapau oaravu avu vai ita voripaive rera ruvara-ia ita ro ira-ia viapau vo reesi toupave. <sup>18</sup> ✧ Vigei uvui irapaviei ra vaore veavoriva rutu rugurugoo irapavio, Ro ira veavoriva rutu taraiparo ira uvuiparoi ra veavoriva rutu vo reesi vituaro rutu-ia vao vavaraito iava roroiovira taraiparo. Uvare vo reesia vao-ia iravu oirato vaisiario iavirava vo reesi vao, 666.

## 14

### *Voeao Uvuiaro Oiso-ia 144,000 Airepava-ia Eraeapa Erava*

<sup>1</sup> Uva vorerivira ita vuravuraavorao. Oa iava Sipsip Kakae kekeavorao Saion Pukui-ia, ovusa voea 144,000 oirara rera tapo voa torepaaerao oea kagavearo-ia Sipsip Kakae vaisiario toupavivoroa ora Aiteto vaisiario. Vo vaisio oa rigatoreva Pauto voea iava kagavearo-ia. <sup>2</sup> Uva oreovu uvuavorao vuvuiua iava oa oiso rutu gurukovorao osa uuko sirisiri gurukoaro. Ora oiso tapo osa riro guruko varakeo vo osa pokoro viro. Uva vo guruko eva uvuavorao oiso osa riro irara revae pievira gitara toipaivorao. <sup>3</sup> Uva iriavu-ia erava eraerao airepava Pauto vaaro paupa ruvara-ia, ora vo resurao ruvara-ia okarea tootoovira toupaveira, ora turaro irara ruvara-ia. Uva voea voea 144,000 oirara Pauto oea vorireva oirara rutu iava voea vo rasio-ia. Ari ita, voea raga uvuipaai ra taraipaave oira-ia eira erava. Uva viapau oiso irai raga ita uvuiparoi ra oira-ia tarairo. <sup>4</sup> ✧

✧ **13:14:** 2 Te 2:9-12; Mt 24:23-25 ✧ **13:18:** Sam 9:15-20 ✧ **14:4:** 2 Ko 11:2; Re 3:4, 5:9; Je 1:18

Voea-a evoea oirara oea viapau vuriara vai oisoa purapaive riakora tapo. Viapau. Ari sisigaruevira rutu oisoa toupave. Ari ita, uvarovu ruture Sipsip Kakaie oisoa avapape, uva voea evoea oisoa rera sirova utupaave Pauto oea vovevira ora rerapa vorireva oirara rutu iava voea vo rasio-ia. Oea oiso rutu toupaveira, Rovopa sara rutu Pauto oea vovevira vorereva ora vaitereipa ora Sipsip Kakaie. <sup>5</sup> ✧ Oea viapau oisoa kuuvu reoro vai purapaive. Ora viapau vuria vai oavu avu vai-ia voea oaiaro.

### *Vo Peva Purapurapa Irara Ensel Reoa Puraiva*

<sup>6</sup> ✧ Uva iravu raga kekeavorao enselto ovusa vuvuiua vuvuvuaro-ia papapaoro avaparoerao Vearo Sipsipova vao oa-ia viapau opesia vaiiei. Uvare vo kovova toupavevoro vao va iava Vearo Sipsipo sipsipopa kovo oirara rutupa voea vo rasio-ia toupaveira. Uva va iava sipsipopavevoro osararovu rutupa voraro rutu okantrirovu rutu-ia, ora voraro oreorovu rutu-ia, ora voraro ovararovu rutu iava. <sup>7</sup> Uva rirovira rutu takatopaoro oiso puraparoerao, “Vuuta vao pou piroi oa-ia Pauto oirara rutu rovirieirevere kortua-ia. Eisi osa iavirava uvuipatai ra rerapa uriripaoro rera vaisiara rei pie iraopata. Ra rera-ia Pauto vuurapa vaisi pura iraopata ira vuvuiua puravea, ora rasito, ora avakava, ora tuputupue rikuro rutu uukoara.”

<sup>8</sup> Uva iravu raga purapurapato ensel rovoto purapurapato sirova utuoro urioerao. Uva eera eraopato ira oiso puraroerao, “Rei urui rutu Babilon urui oa vuri ovoiooro koveei. Iu, vuri ovoiei. Uvare vo uruia vao Babilon-ia oa raga osararovu rutu oirara oiso pieva, ra va raga vo vovouaro goruvira sirova utupaave vao oitpa pitupitu vo urui vaoro. Oa-a eva oiso toupai, Riro goru ovi wain, oovi-ia oisoa voea ukaiopiepaevae, oa iava oira vo pitupituaro otopa pitupitu puraiva. Uva Pauto vo kasipuarova voea-ia pou piropa.”

<sup>9-10</sup> ✧ Uva iravu purapurapato ensel vaiterei sirova uturoerao uriooro. Uva rera eera vo pevapato rirovira rutu keerapaoro oiso puraparoerao, “Vosa oeai ro-ia vavaraito vuurapa vaisi purapaive ora rera tokarasiaro-ia tapo, ora reesia oureve vao kagave iare, eke vavaea iare tapo ora voea iava, oire ra voea evoea iriavu-ia ukaiove wain vo waino Pauto vo kasipuarova. O wain iria viapau uvare rovoreve Pauto uuko vaiva tapo oira vo goruaro kopii pieoro. Viapau. Ari eera vo kasipu rutu petorevarea kap iare vuria vo voriaro kare piesa. Ra voea evoea oirara oira-ia ukaiopiepaevae. Ra oisi iavirava vuvivira rutu upiaave riro kasirao kasi-ia tuitui kasi oa vuvupaiveira solfa viitavokoaro-ia vo enselpa irara osireiara-ia voeao tugoropa irara ora vo Sipsip Kakaie osireiara-ia. <sup>11</sup> ✧ Uva kupareto kosiparoverea vo kasi-ia eva oa voea upia piepaiverea, eera ira kaeparo viro rutu vokiara rutu-ia. Ra voeao oea rera-ia vavaraito vuurapa vaisi purapaive ora rera iava tokarasi-ia ora vo rara rera vo reesiara oupaive rera vaisiara-ia, oea-a evoea viapau oiso reareaa vai oupaiverea vo ravireoura rutu-ia ora vokiaraoro.”

<sup>12</sup> Vo osa vo pitupitu eva karekepaperea osa iavirava uvui iraopaai Pauto voeaaoro ra goruvira rutu torepaaverea voeao oea Pauto vo reoroaro reo goruro sirova utupaaveira, ora Jisas oirao piea-ia tapo uvisivira rutu pitu iraopaiverea.

<sup>13</sup> ✧ Uva oreovu uvuavora oa vuvuiua iava urioerao oiso puraoro, “Vo reoro rigatori, Oirara Turaro oirao piepaoro kopiipaaveira vo vokiara ora ovuutarovu rutu-ia varari utupaua, oea evoea kopii irara uvuipaai ra roru

✧ 14:5: Sam 32:2; Ef 5:27 ✧ 14:6: 1 Ko 1:18-25; Ro 1:15-18 ✧ 14:9-10: Re 13:14-16; Jer 25:15-17

✧ 14:11: Ais 34:10 ✧ 14:13: 1 Ko 15:51-58; Sam 116:15

iraioive.” Uva Uraurato-a ro ira tapo oiso puraroerao, “Oiraopavira! Ra vao virikasi kovo kavuive oa oisoa purapaive, ra reareaave. Rara viapau oiso ava ragaave. Viapau. Ari vearo vovouro oisoa purapaive evara oara voriaro-a ovoriroa voea tapo avaperea.”

### *Aio Oupa Vuuta Vo Rasito*

14 ✧ Oire uva vorerivira ita vuravuraavorao. Oa iava iriavu raga popotepava rukuta kekeavorao osa toupaveorao. Uva iravu pauparoerao oira-ia rukuta oiso rera osa Oirato Oviitoaaro Ro Ropoto. Ira kukuvaipava gol toupaveorao ora rera iava kukue-ia ora sigoa-ia porokoa pitupaveorao riro avuavua rutu. 15 Uva iravu purapurapato ensel kosi viorooro urioroerao Rovopa Kepa Tempel iava roarire rirovira rutu keerasa ira rukuta ivara-ia pauparoerao oiso puraoro, “Aio tokopauei vii vaaro-ia sigoa, uvare aioara rutu varao vo rasio-ia vioroerao. Uva oisi-a eisi osa iava vo voki-a vao vo aioro varao oupasa. 16 ✧ Oire uva ro ira rukuta ivara-ia pauparoerao ira ora rera vaaro-ia sigoa pitupaoro va-ia tosipaveorao rasitoa-ia aioara tosipaoro varao oara vioroerao.

17 Uva iravu ita enselto Rovopa Kepa Tempel iava kosi vioroerao vuvuiua-ia. Ira tapo ita eera oavu-ia sigo poroko riro avuavua pitupaveorao. 18 ✧ Ari iravu raga purapurapato eravao arova urioroerao. Eera purapurapato ensel ira vo kovoaro-a, Pauto vo kasiaro eto kasi tokipato. Ira roarire enselto rirovira keeraparoerao ira sigo poroko-ia riro avuavua pitupaveorao oiso purapaoro, “Sigoava uriou eva oa-ia pituparivoi vii vaoro riro avuavua. Ra va-ia aio kuero rutu roturoturi wain iro iava vo rasio-ia. Ra vara gururi, uvare evara aio kuero vioroerao.” 19 Oire uva rera enselto ira sigoa-ia pitupaoro va-ia tosipaveorao vo rasio-ia aio kuero rutu rotupaoro wain iro kuearo. Oa iava vo kuero guru ovoirevorao. Vo kuero evara rokoroko pieparevorao riro rikui-ia avekea vao wain pigipigipa riku. Oa-a eva oiso toupai, Pauto vo kasipuario voeare vuri irara. 20 ✧ Oire uva wain iro kuearo pigipigipaoro va-ia tasiyasiavorao riro rikui-ia avekea oa riro urui vatuarovi-ia toupaveira. Oa iava vo tatu uukoaro revasiaro oiso rutu parupaivorao osa oiratoa iava revasiva. Uva aue rutu uvuiaro-ia parupaoro avapaerao 300 kilomita. Uva vorevira vo rovu oiso rutu uvuivira vo rovu toearo kaepa piroara osa oirato toearo uvuiaro rutu.

## 15

### *Erao Vatara Purapurapa Irara Ensel Vuriara Rutu-ia Orekerovu Oisoa Pitupaive*

1 Oire uva oavu kekeavorao reia rutu reesia pisa oa karekeerao vuvuiua-ia vao erao vatara (7) enselpa irara va eva reesia. Uva rirovira rutu vare rugurugoo iraparaerao, uvare voeao enselpa irara kekeavorao ovusa vao tupaivorao erao vatara-ia orekerovu vuriara rutu pitupaoro oira vuri piepara. Uva vara-a evara ovoiokuara rutu. Ra viapau ita vara isivaaro iava oai ita karekepe. Uva vara-a evara vuriara oiso toupai, Pauto vo kasipuario ovoiaro rutu.

2 Uva oavu kekeavorao oapa oiso paerao avakava. Oa oiso tupaivorao osa sisiro roroiava rutu. Iria uvereiva tuituia tapo vaore, oiso ra oisi iavirava sisikorepaeve. Oire uva voeao tapo voa kekeavorao oea vaitereiriva ora keevoisiaera upoa-ia vavaraito vaio ora rera tokarasiaro, ora vo osa rera vo reesiaro vo goruaro opesierao voea-ia. Uva voea evoea torepaaerao vo avakava vatuaro-ia oea vaitereiva ora keevoisiaera. Uva Pauto voa

✧ 14:14: Dan 7:13; Re 1:13 ✧ 14:16: Mt 13:36-43 ✧ 14:18: Joe 3:13 ✧ 14:20: Ais 63:1-6; Hi 13:12; Re 11:8

voeapa oaravu vate ovoirevorao oara oiso toupaveira osa gitara. Oa iava voa vara-ia pitupaivorao. <sup>3</sup> ✱ Uva iriavu-ia erava eraerao Moses oiraaro ro Pautoa-pa kovopato, ora Sipsip Kakae oiraaro tapo iriavu erava o-ia oiso purapaai,

“Turaro Pauto vii goruara rutuva toupaveira. Ora okovorovu rutu varao oara purariva reipara. Oa iava vara kekepaoro vara-ia rirovira rutu tavetave iraopaiveira. King Reitoa rutu vii osararovu rutu oirara reraaro. Vii vo vovouroaro torevokoara rutu ora oiraopara rutu.

<sup>4</sup> Turaro vii-a kataitoa raga viigoa tugaropavira toupaveira. Osa iava iroutoa vai uvuipa ra viapau viipa avivikeparo? Ora iroutoa vai viapau uvuipa ra vii vaisiara kae piepareve? Viapau. Ari osararovu rutu uvui iraopaai ra vii-ia vuurapa vaisi purapasa uriopaaave. Eake iava? Uvare torevoko vovoutoa rutu-a vii vo vovouo oa poeravira rutu ora karekeerao.”

<sup>5</sup> Uva eva isivaaro iava vuravuraavorao ita vorerivira vo uva Tugoropa Kepa Tempel sovara-ia toupavorao vuvuiua-ia oa karu pirorao. Eva Lotupa Kepa sel-a Pauto vaaro. Oa-ia Oiraopa Reo rutu karekereva rera vaaro.

<sup>6</sup> Uvava voeao erao vatara enselpa irara kosia viroiva, erao vatara-ia orekerovu vuriara rutu pitupaivorao varao oira vuri piepara rutu. Uva voea-a evoea oea vearopara rutu-ia varoara tuupaaerao sisigarueara rutu, ora sisikorepara, ora gol iroro-ia takipa iroro ora takipaoro ora voea iava kopokopuara-ia vo iroro tavurupaivorao. <sup>7</sup> ✱ Oire uva iravu vo kareo iava rera oresura tootoovira toupaveira erao vatara (7) dis golaro vateravorao voeapa voeao erao vatara enselpa irara, ora Pauto vo kasipuaro ro ira tootoovira toupaveira vokiara rutu-ia, okasipu-a eva oa iava evara erao vatara dis agasi iraoerao. <sup>8</sup> Oire uva keraria iava ora Pauto vo goruaro oa iava kupareto kosiro viroro Tempel agasi piesa. Ra viapau oiso irai uvuiparo oiso ra voeare koataro Tugoropa Kepa-ia. Viapau. Ari uvui iraopaai ra evoeare erao vatara enselpa irara tue rovopaave ovusa vo kovo opesi pie rovoive evara-ia vuriara rutu.

## 16

### *Erao Vatara (7) Aue Dis Oara-ia Kasipu Koko Toupai Pauto Vaaro*

<sup>1</sup> Uva oreovu uvuavorao oa kosi pirorao Rovopa Kepa Tempel iava. Oa voeaore erao vatara keerapaoro goruvira rutu oiso puraerao, “Ava iraopatai eva erao vatara kasipu kokoro Pauto varaaro petosa. Ra varape rasitoo iare koveoro.”

<sup>2</sup> ✱ Oire uva rovoto purapurapato ensel ora rera vo kokoarova kasipua avaroerao dis-ia rasitoo iare va petopaoro. Oa iava osararovu rutu goru kapuaro karekeerao oirara-ia voeao oea vavaraito vo reesiarova toupaveira, oea raga ita tokarasipa vuurapa vaisi purapaveira.

<sup>3</sup> ✱ Uva eraopato ita purapurapato ensel ora rera vo kokoaro kasipua petorevorao avakava-ia. Oa iava avakava revasivira ora poreoro oiso osa kopii irara revasiaro. Oa iava vo karero rutu eva avakava sovara-ia tootoopaaveira kopii ovoiaerao.

<sup>4</sup> ✱ Uva ita vo pevapato purapurapato ensel ora rera vo kokoaro kasipua petorevorao riropa ukoro-ia ora tuputupue ukoro-ia tapo. Oa iava vara rutu revasivira ora pore ovoiera. <sup>5</sup> Uva ragai ro uvuavorao purapurapato uukoara reraaro ira oiso puraroerao,

“Toupari oiso osa oisoa toupari tuariri rutu. Tugoropatoa Rutu-a vii. Vo vii vaaro-ia tavaa kort oa-ia oirara rovirieirivere rutu torevokovira voeao vuri irara.

6 ✧ Voeao oea vii voeaaro oisoa upopaive ora profet irara tapo. Oa iava voea iava revasiara oisoa petopa piro. Eisi osa iava revasiva vateparivoi voeapa evoea vuri irara, ra oisi iavirava oira-ia ukaioave. Ra torevokovira voea vaaro vuri vovou vo voriaro ouive.”

7 Uva oreovu uvuavorao eravao iava oa oiso puraero,

“Iu. Oiraopavira rutu, Turaro Pauto vii-ia goruara rutu toupaveira. Vao oa iavirava oirara rovirieipaveira kortua-ia oiraopa vovou rutu sirova vao torevokoa rutu.”

8-9 Oire uva vo resurapato purapurapato ensel ora rera vo kokoaro kasipua petorevorao ravireo-ia. Uva oisi-a eisi osa iava Pauto ravireo eakarevoiva, oirara rutu kasirevorao va-ia vao riroa tuitui kasi ravireo vaaro. Oa-ia vurivira rutu voea evoea kasirevorao. Osa iavirava eisi rera tovipaoro Pauto rera takaupaivorao ro ira-ia gorua toupaveira vara rutu evara vuriara kareke piepasa. Uva viapau oiso ora voea iava sopaura oaive prepaivora rera vaisiaro kae piepasa.

10 Uva vo vavaepato ita purapurapato ensel ora rera vo kokoaro kasipua petorevorao rei-ia paupa vavaraito vaaro. Oa iava rupaerao vo sararore oirara oea vavaraito reroarovi toupaveira. Uva rirovira rutu siitoka iraopaerao upiapaoro. Uva oisi-a eisi osa iava ora voea iava arevuora oaive kotukotupaivorao vara gatagatapaoro. 11 Uva ora voea vo upiaroarore rugorugoopaoro ora kapuara Pauto tovi iraopaivorao rera takaupaoro ro vuvuuua iava. Ari ita, vo osa viapau oiso ora voea iava sopaura oaive porepaivorao vo vovouore evara ovaupaoro oara oisoa purapaive.

12 Uva katai vatarapato purapurapato ensel ora rera vo kokoaro kasipua petorevorao riro kara-ia uuko kara vao-ia Yufretis. Oa iava voava vo kara raaka ovoierao raiva pura ovoioro turaro irarapa king irara, oisore ra voa urioave oisiriva uva ravireo kaeparo viroveira. 13 ✧ Uva vo peva tugara peva kekeavorao oiso rorovira osa rokoroko kare. Oea dragon gisipoaro iava riroto kosa virorao ora vavaraito tapo gisipoaro iava, ora profetato gisipoaro iava tapo ro riro kuuvuto. 14 Opevaa eva uraura peva vuri irara rutu oea oaravu rutu ravotoara purapaiveira. Uva avapaaveira voea iare oirara rutu voeaaro king irara voeao vo rasitoo-ia, voea guru rovopaoro upoa kosi piepasa vo vokio-ia rei voki Pauto vaaro ro ira-ia ogorurovu rutu toupaveira.

15 ✧ “Uvu iraopata! Ragai oiso visii iare sita pievira poua viroverea osa kavirupato! Ra rorupareve ro ira uutupaoro viapau uusiparo. Osa iava uvuipa ra vearovira ora rera vaaro-ia varoa tuuro, ra viapau gapuvira vokareve. Ra oisi iava oirara viapau rera iava ariipa tavuki kekeive. Osa iava uvuiparoi ra roru iraoreve.”

16 Uva voea vuri irara tugara uraura irara king irara guruivoroa voa evoa oea Hibru reo-ia vaisipaiveira oiso, Amagedon.

17 Uva erao vatarapato purapurapato ensel ora rera vo kokoaro kasipua petorevorao aue-ia kiuvu. Oa iava Rovopa Kepa Tempel sovara iava ora paupa iava Pauto vaaro oreovu rirovira rutu keeraoro oiso puraerao, “Ovoiei rutu.” 18 Uva varakeoto parakauoro roropaoro avaparoerao, ovusa rera vo gurukoaro karekepavorao, ovusa rera varakeoto pokoparo virorao. Oa iava riroto ravurike karekeroerao. Uva rera-a eera ravurike rirotoa

rutu. Ira oravurikerovu rutu-ia puteparevoi varao oara ovuutarovu rutu-ia oisoa karekepape vo osa oirara vo rasio-ia toupave. Viapau oiso oravurikei oisi rora-ia vai oisi eisi karekepa tuariri osa ro-ia. <sup>19</sup> Uva va vao riro urui oa rero-ia vo peva puravorao kaku virooro, ovusa otaererovu rutu iava ouruivovu rutu varao rirova uruivo oara opesi ovoipaerao vuri ovoipaoro. Uva Pauto riroa uruire vao Babilon urui rugorugooroerao. Oa iava vo urui ukaio pierevorao o-ia kap iria-ia wain ovi toupaveira. Wain eva-a riroa rutu kasipua Pauto vaaro. <sup>20</sup> Uva tokotokoara rutu rokovorao opesi ovoiro. Oa iava viapau oiso opukui touvorao vorerivira. <sup>21</sup> Uva rirova rutu kokeva ais koveora. Uva ogagatarovu rutu aisiara riro vavatapara aue-ia uvuipai 50 kilos vara vavataaro katakataivira. Evaisiro aisiroa vuvuiua iava kovekovepaerao oirara-ia. Oa iava oira-ia ais vuri iraoaerao. Uva oisi-a eisi osa iavirava Pauto takau iraoaivora oirava eira ais iria voea vuri pieevora.

## 17

*Reiva Turarova Riakova Otopava Iria Vuria Voria Oueva. Oira Vaisiaro, Babilon O Vaisia Porearo, Oloturovu Raga Purapa Irara*

<sup>1</sup> Uva iravu purapurapato ensel erao vatara iava oea erao vatara-ia aue dis pitupaivora iri urioroerao ragai tavisa oiso, “Uriou o tuesa reiva riakova otopava iria uuko karaaro rutu sirova toupaveoi. Iria oira vaoro vuri vori oupae. Uva oiso vovouparai ra oira-ia vii kareke piea. <sup>2</sup> Turaro irara king irara voeao vo rasio-ia oea oisoa riro pitupituro rutu purapaive otopara oira tapo riakova. Ora oirara voeao vo rasio-ia oea oirava va vao otopa pitupitu purapaiveira. Oa iava kokoropaaveira oiso rutu osa ro ira spakpaoro kokoroparo.”

<sup>3</sup> Oire uva Tugoropato Uraurato ragai-ia riro varivarivira rutu karekerovira, eera enselto ragai kaerevorao orasivu iare vo uva viapau oiratoa vai toupaveve kuvau tapi. Uva-a eva uva iriavu kekeavorao riakova iria revasipato vavaraito ivara-ia paupaora. Uva rera-a eera vavaraito ira iava varaua agasi iraoaerao riro vaisiro iava Pauto tovipa vaisiro. Uva rera raga vavaraito ira erao vatarava kukue tourevora, ora katai tau aue keta. <sup>4</sup> Uva oira-ia riakova aitereivu revasipatoarei kuvutoarei toupasivora, ora ooritorovu rutu golaro, ora oaravu oritopara oara oisoa purapaive vearopara iava avekeara, ora aasi iroro varao pute pie voriaro rutu. Uva ora oira iava vavaea-ia kap-ia golava pitupaevora o iria agasiorao aue-ia opitupiturovu rutu eruara Pauto osireiario-ia, ora opitupiturovu rutu vuvuipara otopa pitupituro varao oara oisoa purapaive. <sup>5</sup> Uva rigatoa oira vaisiaro iava oira kagavearo-ia toupavora, vo vaisio oa porearo vituaro vatauvira toupai oiso, “Rei Urui Babilon-ia. Oriakorovu rutu otopa riako aakoaro-a vii ora opitupiturovu rutu vuriara varao vo rasio-ia.” <sup>6</sup> Iria eira riakova Pauto vooaero oisoa upopaoro voea kopii piepaeve ora voeao oea oisoa Jisas oirao piepave rera vaisiaro iava siposipopaoro. Uva ragai oira kekeavorao osa voea revasiaro-ia ukaioora. Oa iava kokorovira karekeora. Oire uva va eva kekeavoiva, rirovira rutu tavetave iraoapaoro va-ia eva rirovira rugorugooroerao.

<sup>7</sup> Uva purapurapato ensel ragaire oiso puraroerao, “Eakere rirovira rutu rugorugoo iraoapau? Uvuiparai vii soporepaa vatao reo rutu vituaro iava o riakova vaoro ora ro vavaraito ira-ia erao vatara kukue toupaveira ora katai tau keta, ira ivara-ia paupaoveira voraro avapaoro. <sup>8</sup> Rera kekerivora ro-ia vavaraito tuariri ira oisoa tootovira toupaveve. Uva vo

vokio viapau oiso rera epao. Ari ita, uva utupavira vo riku eva kavureverea oa viapau rekasia vai voava kae virooro. Ra oisi iavirava opesiko ovoiro. Ora oearoi oirara vai vo rasio iava voearo oearoa Pauto viapau vaiisiro rigatoreva Vukua-ia Tootoopa vo vuutari-ia oa-ia rasito purareva. Oea-a evoea oea rera vavaraito kekepaoro rirovira rutu tavetave iraopaivera. Eake iava? Uvare tuariri oisoa tootoovira tou rovopareve. Uva vo vokio viapau rera epao ita. Ari vo utupavira ita karekeroverea.

<sup>9</sup> “Ro ira vearo rugorugoo rutuva toupaveve ira uvuiparoi ra vearovira rutu taraiparo va-ia vao oiso-ia, Varao-ia erao vatara kukuero oara oiso toupai erao vatara pukuiara, oara varaaro-ia riakova paupaoveira voa erao vatara pukuiara. <sup>10</sup> Uva vara-a varao erao vatara kukue oara erao vatara king irara reipa irara reesipaiveira, oiso vo vavae opesi ovoiaepa osa iravuei katai-ia ira vo vokio toupavevoi ovusa iravu tovira reipaoro karekerovere. Oire ra utupavira karekero viro, ra oisi iavirava gare vuutavi raga-ia toureve. <sup>11</sup> Uva rera eera vavaraito tuariri rutu ira oisoa tootoovira toupaveve. Uva vaviopavira viapau rera epao ira oiso toupave, Era vo peva vatarapato reito. Ari ita, uva rera-a voea saratoaaro erao vatara (7) reipa irara ira ita eera opesi ovoiroverea.

<sup>12</sup> ✧ “Ari ita, katai tau kekerivorao keta oara katai tau reipa irara reesipaivoi oea tovira gorua oupaivera ro ruvara-ia vavaraito. Oire ra reipaoro toupave vavaraitoa tapo katai vuutavi raga uvuiaro-ia. <sup>13</sup> Uva voea-a evoea reipa irara oea katai rugorugoo ragava toupaveira. Oa iava varivariara ora goruara varao oara voea-ia toupaveira evara rutu oiso vateivera rerapa ro vavaraito. <sup>14</sup> ✧ Uva Sipsip Kakaeva ora upoaverea. Ra oisi iavirava Sipsip kakae voeava ora keevoisiro voea-ia puteve rutu. Eake iava? Uvare rera ira turaroparoi rutu oearovu rutupa turaro irara, ora uvare rera-a king irara rutupa king. Ra oirara voea oea rera tapo toupaveira rera vo keeraaro sirova utupaave voea oea ora rerapa reesireva. Oa iava rera vo reoroaro vearovira rutu sirova oisoa utupaave oea-a evoea uvuipai ra vo upova ora keevoisiave rera tapo ro-ia Sipsip Kaka.”

<sup>15</sup> Uva ragai tavirevorao oiso, “Vo kararo ita kekerivorao riropa kararo uukoara ooviroa sirova paupaoveira oira o otopava. Okararoa osasararo rutu reesipaiveira ora aue oirara rutu vo okantrirovu rutu-ia, ora ovararovu rutu, ora oreorovu rutu. <sup>16</sup> Ora evara katai tau keta oara tapo ita keke ovoirivorao oara voea reesipai king irara oea rutu evoea ora rera ro vavaraito oirava eira otopava ora keriaverea. Ra oira vuri pieive rutu oira iava varoara rutu veraoro. Vo osa oira iava tapo varaua iava sopena aioive oira kasi ovoiro tuitui kasi-ia. <sup>17</sup> Iu, Pauto voea iava sopaura-ia rugorugoara tovo rovereverea, ra oisi iavirava va vao puraoro oisi va karekeive. Ari ita, katai rugorugoo ragava toupaveira ora vao gorua oara ouivera, ra vara iavirava oiso touive osa king. Oara rutu evara vateivera vavaraitoapa. Uva oisi-a eisi osa piepaiveira vo rutu rekasisa ovuuta-ia Pauto vo reoroaro oiraopavira rutu karekeperea varao iava oara iavirava oisi eisi puraoepa. <sup>18</sup> Uva eira riakova iria kekerivoi, o-ia vao-ia rei urui oa oiso toupai, Reipa irara rutu iava kukue voea vo rasio-ia.”

## 18

### *Babilon Urui Ovoiepa Vurioro*

<sup>1</sup> Uva vao isivaaro iava iravu raga purapurapato ensel kekeavorao urusia-ia ira vuvuiua iava vararoerao. Ira-ia riroa rutu gorua tovoroa ora riroa



keraria rera vaaro. Oa iavirava rasito aviavirevorao rirovira rutu. 2 ✧ Ira rirovira rutu takatooro oiso puraroerao,

“Reiva Babilon urui iria opesi ovoioi. Iria opesi ovoioi vurioro. Iria oiso karekeoi vo vokie, Oira-a vuri tugaraaro vo uruiaro. Oa-ia toupaveira vuri irara tugara ora vuri kare kokio kare. Oea rutu tapo oira-ia toupaveira.

3 Eake iava? Uvare osararovu rutu oirara oisoa oirava opitupiturovu rutu otopara purapaive. Uvare oiso toupai, Oira ruvara-ia riro gorupa wainro-ia oisoa ukaiopaave. Osa raga ita reipa irara voeao vo rasio iava oirava otopa pitupituro purapaiveira. Ora voeao oirara oea vo rasio-ia sara kovoro purapaiveira riroara oara purapaoro vara-ia riroara rutu moniara oupaiveira ovovourovu rutu sirova riropara kaureo vovouro oira varaaro.”

4 ✧ Uva oreovu uvuavorao oreoa vuvuiua iava uriooro oiso puraerao, “Oirara oaa evo urui iava kosita viro. Teapi oira tapo ora taveopata oira vovouaro-ia vuria. Teapi oira tapo ora taveopata vuri vovou vo voriaro oira vaaro ousa.

5 Oira vaaro vuria oa oiso rutu ora gurupapeira osa oavu toreao pukuia oa ipaepa rutu vuvuiua iare rekasisa. Uva Pauto vo vovouro ruture evara vuriara rugooparoveira vo urui eva varaaro.

6 Rugoo iraopata vo vovoure eva oira otopava oa purapaeveira. Ra oisi uvuivira rutu oira-ia oisi piepata oiso osa visii piepaeveira. Uvare ora oira vo vovouroaro

vuriara tavosipaiveira, oa iava rirovira rutu karekepapeira. Eisi raga ita osa uvuipatai ra oira vo voriaro vuria vao eraopa vori tapokopata vo vorirei rutu purapaoro oira-ia. Iria eira riro gorupa uukoro porepaeveira kap-ia. Osa ita uvuipatai ra oira vo goruaro vao eraopa goru tapokopata oira vatepasa voreripavira ita. Ra vara-ia ukaiopao varao-ia vuriara.

7 Iria oisoa ora oira raga vaisiaro kae piepaeve opitupiturovu rutu pura- paoro ora oira raga vo ruiparoaro uvui piepasa. Eisi osa iavirava uvui iraopatai ra oirapa riro upiaro vai rutu vatepata oira vo kaureoroarova uvuipaoro. Ora oira tapo rirovira rutu gau pie iraopata vova oira iava sopaua-ia uvava oiso purapaoveira, Ragai oiso toupaa Kwin. Ragoa pauparai Kwin vaaro-ia paupa. Viapau oiso ragai-a raroeva. Siraoa viapau uvuipai ra ragai-ia karekepe, ra oisi iava gaupaa. Viapau rutu.

8 Uva oisi-a eisi osa iava osasararovu rutu vuriara oira-ia karekeperea katai voki raga-ia. Riro irara upiapaoro kopiipaaverea. Uva riro irara rutu vurivira gaupaiverea ora riroto ogoeto ira tapo karekeroverea. Uva riroa tuitui kasi Babilon urui rutu kasi ovoiverea. Iu. Reito Pauto oira vo vovouroaro rovirieireverea rutu oira vaaro vuria vo voriaro kare pieoro oirapa, eera Turaro Pauto riro gorutoa rutu.”

Eisi osa puraepa vo reo vuvuiua iava va.

9 ✧ Uva voeao reipa irara vo rasio-ia oea oirava otopa pitupituro oisoa purapaive ora oaravu tapo riroara kaureo vovouro rutu oisoa purapaive oira tapo ora voea raga-ia rugorugooapaoro. Eisi osa iava voea reipa irara kupareto tueiverea ovusa kaero viro, vo rara tuitui kasi oira kasiive. Ra oisi iavirava rirovira rutu gaupaive siraopaoro. 10 Uva uririaverea rutu vaopa vuria rutu upia oa taru oira-ia karekeperea. Ra oisi iavirava oira asavira tauaivi toupave oiso purapaoro, “Siraovira! Siraovira rutu vii-ia Babilon! Uvare vii-a rei urui rutu. Ora vo uvare riro varivari urui rutu-a

vii. Vakoravira raga katai vuuta raga-ia vii vo vuriaro voriaro vii-ia kareke ovoiei.”

11 ✧ Ra voeao oea vo rasio-ia sara kovoro purapaiveira oea vo uruire vao rugurugooapaaverea. Ra oisi iavirava vo uruipa gaupaive rirovira rutu siraopaoro. Eake iava? Uvare viapau ita irai epao ira uvuiparoi ra voea ruvara-ia kotokoto voriparo vorerivira. 12 Vo kotokotoro-ia aue gol, ora silva, ora vearopara avekeara, ora aue aasi riro voriaro rutu, ora vearopara rutu popotepa varoro, ora osasarovu rutu revasipa varoro, ora gausisi varoro, ora oaravu rutu evaoara vearopa geesiara. Ora orekerovu rutu oara purapaiveira elephant iava ketaara-ia. Ora orekerovu rutu oara purapaiveira oevaovu-ia evaova riro voria rutu, ora aue bras, ora ainara, ora aveke korikoripara. 13 Ora orekerovu rutu varao oiso, vasirere, ora tagotago o aiopava, ora akoroara geesipa kupare purapara, ora osasarovu rutu tugara geesipara, ora vearopa sandaro, ora aue wain, ora korovo, ora vearopara aue plaua, ora aue wit, ora bulmakau, ora sipsip, ora hos, ora karis-ara, ora voeao akuku kovo irara, ora oirara tootooroaro tapo ita. Evara rutu voea vo kotokotoroaro oara-ia sara kovoro oisao purapaive osa viapau oea vo vara voripasa. 14 Oea-a voeao oea sara kovoro oisao purapaive oea oiso puraaerao oirare, “Varao rutu oarapa vii iava sopauā riiriipapeira rutu vara oupasa oara rutu vii kavuvorao. Oaravu rutu vearopara aioara, ora orekerovu riropa voriaro, ora orekerovu rutu vearopa oritoro vii varaaro oara rutu evara vii kavu ovoivorao. Oire uva oirara viapau oiso orekerovu avu vai vearopara vai vii-ia vorerivira kekepaiverea.”

15 Uva voeao oea sara kovoro purapaiveira vara-ia rirovira moni oupasa vo urui-ia eva, oea rirovira rutu uriripaaverea vaopa vuri upia oa ouvoi vo urui eva. Osa iavirava vo urui asavira tauaivi oga pievira toupaveira gaupaoro rirovira rutu siraopaoro. 16 Uva oiso purapaaverea, “Siraovira! Siraovira rutu vo uruivipa vao riro urui! Ouruia oisao tuariri vearopa varoro popotepara-ia tuupape ora osasarovu rutu revasipa varoro. Ora oiso osa ora vō urui iava varaua oisao oritopaive aue-ia gol, ora vearopa avekero, ora aasi iroro riro voripara. 17 Ari ita, vakoravira raga oara rutu evara moniara ora oritoara rutu opesi ovoiei.”

Oire uva kepten irara rutu selpa uvuoro-ia tou irara, ora voea rutu voeao oearoa uvuoaara-ia voripaoro uvarovure avapaaveira, ora kovopa irara uvuoa-ia, ora oearovu rutu voeao oea sara kovo purapaiveira avakava-ia oea rutu Babilon urui siituepaoro tauai torepaaaverea. 18 Oea kupareto kekeivere ovusa tuitui kasi vo urui kasive. Ra rirovira keerapaoro oiso purapaave, “Aa vo urui va vai epao oa vo uruiova vaeavira toupai rei urui, raa?” 19 Uva ora voea kukuearo-ia rasito poupouaro vikipaiveira gaupaoro siraopaoro rutu. Ra oiso purapaoro rirovira rutu gaupaive, “Siraovira rutu! Siraovira rutu rei uruipa, oa-ia moni oupaioveira igei vao igoa torevokoaraaro-a uvuoaara. Siraovira rutu! Vakoravira raga opesi ovoiei.” Eisi osa puraepa selpa uvuoaara-ia kovopa irara.

20 “Vii vuvuiua, ora oirara rutu Pauto voeaaoro, ora visii aposel irara, ora profet irara visigoo rutu uvuipatai ra roru iraota va-ia vao oa vo vokio karekei vo uruia vao riro urui. Ouruia rovirieirevoi Pauto vo uruipa vuri vovou vo urui vaaro kare pieoro ovovoua eva oisao purapaive visii-ia.”

21 Oire uva vo reo opesieiva, iravu riro varivarito enselto iriavu aveke ourevorao rirova rutu wit tatupava. Uva oira kae pieoro oira-ia vikiroerao avakava sovara iare. Uva oiso puraroerao, “Osa oiso vo urui vao rei urui kae pieivere Babilon-ia va-ia riro varivarivira rutu vikisa. Ra oisi iavirava oirara viapau vo urui vorerivira kekepaive. 22 Osa-a eisi osa iavirava gita

guruko ora osararovu rutu pupipara, ora rivu, ora utave ogurukoa rutu evara viapau uvuipai ra vorevira varao uvuive vii iava riro urui. Ora voeao oearoa tarai oupaiveira okovorovu rutu purapasa, oearoa-a voeao viapau uvuipaai ra voea vorerivira kekepaive vii-ia. O wit tatupava aveke iria gurukoaro-ia viapau uvuipai ra vorerivira oira gurukoaro uvupaive ita vii-ia. <sup>23</sup> Ora vuravu aviaviaro viapau uvuipaai ra viire aviavieve vorerivira. Ora ro vo rearo ira airepavira riako oupa, ora o rera oiraaro riakova. Oara rutu-ia evara viapau uvuipai ra vara uvuive vorerivira vii sovara-ia. Voari tuariri vii voeaaro oirara sara kovorova oisoa toupave oiso rutu varava tupaoro reipa irara rutu oirara vo rasio iava voea. Ora oiso osa oisoa oirara rutu osararovu rutu iava oisoa keakeapari oaravu rutu-ia kavokavoara.”

<sup>24</sup> ✧ Uva Pauto vo urui eva kekerevora o ouruia vuriava toupaveira profet irara upopa, ora oirara rutu voeao rera voeaaro oeva oisoa oirara rutu voeao vo rasio-ia keripaave voea kopii pie ovoipasa. Ovuria tapo eva oa voa raga toupavoi vo-ia Babilon urui raga-ia.”

## 19

### *Oirara Rutu Rorupaiva Uvare Babilon Urui Vuriepa*

<sup>1</sup> ✧ Vao isivaaro iava ragai oavu riro takato gurukoaro uvuavorao oiso rutu osa riro takato riro irara rutu oirara vaaro voeao oea vuvuiua-ia toupaveira. Oea oiso puraaerao, “Pauto vaisiario kae piepe vigei reraaro Pauto. Eera-a kataitao raga ira vorevira vigei ourevoi, rei vaisitao rutu, ora riro varivarito. <sup>2</sup> ✧ Ira kortua-ia oirara rovirieipareveira oiraopavira rutu torevoko vovou sirova. Uva o otopava riakova oira vaaro-ia otopa pitupitu oirara rutu vuri pieeva voeao vo rasio-ia. Eisi osa iavirava Pauto oira vo vuriaro voriaro vorevira kare pierivoi oirapa. Eira riakova iria Pauto kovopa iraraaro upopaoro oisoa voea kopii piepaeve.”

<sup>3</sup> Oire uva vorerivira ita oiso kearaoro oiso puraaerao, “Pauto vaisiario kae piepe! Uvare tuitui kasi kuparearo riro urui kasivoi vao oa vokiara rutu-ia ipapapeira!” <sup>4</sup> Oire uva oisi-a eisi osa iava erao tau vo resura (24) turaro irara ora vo resura vo kareo oea tootovira toupaveira oea rutu takua virorao kokoto rekuoro Pautoa-ia vuurapa vaisi purao, ira paupaveira rera vaaro-ia paupa. Uva oiso puraaerao, “Oiraopavira rutu Pauto vaisiario kae pie iraope. Vigei reraaro!” <sup>5</sup> ✧ Uva voava vo paupa Pauto vaaro oreovu kearaoro oiso puraaerao, “Visii Pautoa-pa kovopa irara, visiigoa rerapa Pauto avivikepataveira visii oira akukuro, ora visii visiigoa oearovu rei vaisirova toupaveira. Visiigoa rutu Pauto vaisiario kae pie iraoa.”

### *Riako Oupa Vurei Puraiva Sipsip Kakaepa*

<sup>6</sup> Oire uva oreovu uvuavorao oa karekeero riro irara rutu iava oirara oea ora guruaerao. Ogurukoa oiso rutu poko pirorao osa riroa uuko sirisiri gurukoaro, ora oiso osa riroto varakeoto poko piearo gurukoaro. Ogurukoa eva oiso puraaerao, “Pauto vaisiario kae piepe. Reitoa rutu Turaro eera vigei reraaro Pauto. Ira-ia goruara rutu toupaveira. Ira vo vokie kingvira rutu toupaveivoi. <sup>7</sup> ✧ Uva uvuipavie ra vo vokie-ia vearo vovou iraoivo rera vaisiario kae pieoro. Eake iava? Uvare vuuta karekei Sipsip Kakaeva vaaro oa-ia riako oupai. Uvare riakova ora vatatoporo tuepaai, voea raga ita Pauto voeaaro. <sup>8</sup> Uva Pauto oirapa popotea varoa vatereivoi vearoa rutu,

✧ **18:24:** Hi 11:32-40; Jer 51:49 ✧ **19:1:** Sam 118:22-29 ✧ **19:2:** Diu 32:43; Re 6:10 ✧ **19:5:** Sam 134:1 ✧ **19:7:** Mt 22:1-10; 2 Ko 11:2; Ef 5:32; Re 21:2, 9

ora riro aviavia rutu, ora sisigaruea rutu. Uva va-ia tuuoi va vao popotea varoa.” Oa-ia torevoko vovou rutu reesievoi vo vovou oa purapaiveira Pauto voeaoro.

<sup>9</sup> ✧ Uva purapurapato ensel ragai tavirevora oiso, “Vo reo rigatori oiso, Pauto oevure keeraroi riroa iare ora oupa aio Sipsip Kakae vaoro. Oa-ia uvuipaai ra roru irapaive.” Uva oiso ragai tavirevora, “Oreoa vao-ia oiraopa reo rutu Pauto vaoro.” <sup>10</sup> Uva takura virora enselto kokotoaro ruvara-ia rera-ia vuurapa vaisi purasa. Uva ragai tavioro oiso puraroerao, “Opeita eisi ragaire pieri. Uvare ragai-ia vii tapo kovopato, ora araoko irara oara tapo. Visigoa rutu Jisas oirao piepataveira rera vaisiara iava siposipopaoro. Uvuipauei ra Pautoa-ia vuurapa vaisi pura iraori kataitao raga. Ari ita, taraipaviei oiso, Tugoropato Uraurato profet irara vo rugorugooroaro oisao toretore piepareve Pauto vaisiara iava siposipopasa. Eera ira voeao oirara tauvapareveira oea Jisas vaisiara iava siposipopaveira.”

### *Oirato Popotepava Kaare Hos Ivara-ia Pauparoepa*

<sup>11</sup> ✧ Uva vuvuiua kekeavorao urusia-ia ovusa karu pirora. Uva toupaveora kaare hos iria-ia pauparoerao oirato. Ira vaisiara oiso toupave, Eera oirato ira rera vo kovoaro vearovira rutu tokipareveira. Ora, Eera oirato ira ora rera vo pitupituaoro oiraopa rutu purapareveira. Vosa oirara rovirieireve kortua-ia, ora vosa upoa tore piereve, oire uva oisi-a eisi osa torevoko vovou raga sirova utuparoi vara purapaoro. <sup>12</sup> Ira iava osireito oiso roroparevora osa tuituia vuvuaro, ora riroara kukuvaipara reito varaaro rera kukuearo-ia toupavira. Osa oavu rigatoa rera iava varaua-ia toupavira eva rera vaisiara. Eera kataitao raga ira raga vo vaisi-ia taraipareveira vo osa oearovu, viapau. <sup>13</sup> ✧ Uva revasiva varoa veuvevora vao oa-ia tuupareveira. Oa iava oiso rera vaisiivora, Pauto Vo Reoaro. <sup>14</sup> Uva viurupa irara voeao vuvuiua iava hos kare-ia pauparaero kaare kare voea voeaoro. Uva popotepa varoro raga-ia tuoro veapara sisigarueara rutu rera sirova utuaerao. <sup>15</sup> ✧ Uva ro irapato voea reraaro tooriova toupavevora riro avuavuto ira rera gisipoaro iava kosiparo virora, oiso ra oearoi uporeve oirara vai rera ro-ia toorio. Ora kakuto ainto kaeparevora rera oirara rutupa reipasa eera kakuto. Ra wain pigireve aveke rikui-ia wain pigipa oa-a eva riroa kasipua Pauto vaoro ro ira ogorurovu rutuva toupaveveira. <sup>16</sup> Ira-ia rigatoa toupavira rera vaisiara iava oa varoa-ia toupavira ora rera kokotoaro-ia tapo. Vo vaisio oiso-ia, Kingpa irara rutu reraoro King, ora Turaro irara rutu reraoro Turaro.

<sup>17</sup> ✧ Uva iravu ita purapurapato ensel kekeavorao ovusa ravireo osireiara-ia torepaveora kokio kare ruture rirovira keepaoro ovusa vuvuiua vuutaaro-ia papavira. Uva oiso puraroerao, “Uriota vo ora gurusa riroa-ia aioa Pauto vaoro. <sup>18</sup> Visigoa uvuipatai ra kingpa irara varuaro aiota, ora kepten irara tapo varuaro, ora voeao viurupa irara varuaro voeao riro varivaripa irara. Ora hos kare tapo varuaro, ora voea oea vo kare ivara-ia paupaveira hos kare. Ora uvuipatai ra oirara rutu varuaro aiota voeao akuku kovo irara, ora voeao oea evoea tokipaveira, ora voeao oea rei vaisirova toupaveira, ora oira akukuro.”

<sup>19</sup> Oire uva rera vavaraito kekeavorao, ora kingpa irara voeao vo rasio iava, ora voea voeaaro viurupa irara oea ora guru ovoiaerao, oiso ra rera tapo ora upoave ro ira hos ivara-ia pauparoerao. Ora vo osa rera voeaaro tapo viurupa irara ora uposa auparaero. <sup>20</sup> ✧ Ari ita, vo osa

✧ 19:9: Lu 14:15-17 ✧ 19:11: Sam 9:1-8; Ais 11:4 ✧ 19:13: Jo 1:14; Ais 63:2-3 ✧ 19:15: Ais 11:1-5 ✧ 19:17: Jop 3:9-17; Sek 14:1-7 ✧ 19:20: Dan 7:24-26

vavaraito piturevorao, ora profetato riro kuuvuto ira oisoa riroara rutu ravotoara purapareve vavaraito osireiaro-ia. Opitupitu-a eva oa-ia oisoa oirara keakeapareve, oiso ra vo reesi ouive eva vavaraito vaaro. Ora oiso ra tokarasipa tapo vuurapa vaisi purapaive. Uva vavaraito vaiiterei rutu ora riro kuuvuto profetato aiterea touvira tootoopasiveira aiterea vikiiva rirova-ia rikui, iria-ia riro kasirao kasi tuituia vuvupaiveira solfa-ia aveke viitavoko. <sup>21</sup> Uva rera roari ira hos ivara-ia pauparoerao oearovu uporevorao viurupa irara vaiiterei voeaaro rera-ia toorio riro kaekaeto ro ira kosiparo virorao rera gisipoara iava. Oa iava vo kare rutu kokio kare urioaerao voea varuaro evoea oirara aiosa. Oa iava vo kare iava kovuara vukuerao rutu.

## 20

### *Seten Ira 1,000 Ivaro Rutu-ia Tuukeparoverea*

<sup>1</sup> Oire uva iravu raga purapurapato ensel kekeavorao urusia-ia ovusa vuvuiua iava vararoerao kii-ia pitupaoro rikui karupava, o iria-ia viapau rekasia vai toupaveira. Uva riroa-ia tapo sen iro pituparevorao. <sup>2</sup> ✧ Uva rera ro riroto dragon raurevorao eera dragon tuariripatoa rutu ira oirara rutu iava gasipareveira, ro-ia Seten. Uva oisi-a eisi osa iava rera tuukerevorao sen iroro-ia, oiso ra vo tuukeva toupave 1,000 ivara rutu uvuiaro-ia. <sup>3</sup> ✧ Uva enselto rera vikioro rera roko pierevorao rikui-ia o iria-ia viapau rekasia vai. Oa iava voa rera ururao tupa ovoirevorao goruvira rutu. Osa iava viapau uvuipa ra rera Seten vorerivira oirara vai keakeapareve vo vuuta-ia vao. Uva evoa uvuiparo ra 1,000 ivaro rerare pute roveve. Oire ra utupavira voava rerare karuive. Ra va iava uvarovu vokareve poteku vuutavi raga-ia oisivi raga.

### *Jisas Ira 1,000 Ivaro Rutu-ia Turaroparoverea*

<sup>4</sup> ✧ Uva oaravu kekeavorao reipa irara paupara oara-ia paupaaerao oearovu osa Pauto voeapa kovoara vateparevorao oirara vo vovouroaro rovirieipasa kortua-ia. Uva riro irara tapo urauraaro oirara kekeavorao voeao oea Jisas oisoa oirao piepaive rera vaisiara iava siposipopaoro. Ora oisoa goruvira rutu Pauto vo reoaro-ia tapo pitupaive. Oa raga-a eva oapa oisoa keripa irara voea okoearo tokopaive, ra oisi iavirava kopiipaave. Uva tapo voeao urauraaro kekeavorao oea viapau vavaraitoa-ia vuurapa vaisi viapau oisoa purapaive ora rera tapo iava tokarasi. Vo rara viapau rera vo reesiaro tapo oupaive ora voea kagavearo iare ora vavaeara. Oea-a evoea oea Tootoo Ovoi ouiva. Oa iava reipaoro Krai tapo toupaveira 1,000 ivaro rutu uvuiaro iare. <sup>5</sup> ✧ Eva-a rovopa vuuta rutu oa-ia oirara tova urui iava vorevira toereavea. Uva oearovu kopii irara viapau oiso Tootoo Ovoi ouiva vo vuuta-ia eva. Oea vaore 1,000 ivaro tuepaaveira, oiso ra opesi rovepe. <sup>6</sup> ✧ Uva voea-a voeari oea vorevira tore rovoeapa rovopa vuuta-ia, oea uvuipaa ra roru iraopaive ora airereipaoro. Osa iavirava eraopa kopii viapau uvuipai gorua vai-ia voea kove pieve. Viapau. Ari evoea taru pris kovo-ia pitupaivera Pauto vaaro ora Krai, ora tapo reipaoro toupave rera tapo vo ivaro rutu uvuiaro-ia 1,000 ivaro.

### *Seten Ira Vuri Iraoroepa Rutu*

<sup>7</sup> Utupaua varao 1,000 ivaro opesiperea taru. Ra vara isivaaro iava tuukepa kepa karuive. Ra va iava Seten rera vaaro iava kosiro viro tuukea. <sup>8</sup> ✧ Uva voava kosiro viroverea oirara rutu keakeapasa voeao oea vo resura

rasito vatuaro-ia toupaveira aue vo saraaro Gok vaiterei ora Megok. Voea rutu voraro rutuva gurureverea Seten upoa purasa. Oea vieiario uvuiaro oiso toupai osa rogaraara vieiario. <sup>9</sup> ✧ Uva ora sikasikapaaerao voraro uvarovo rasittoa-ia Pauto voearo vo uruiaro kovokovopaoro ora vao rei urui Pauto oapa siraoparoveira rutu. Ari ita, tuituia vuvuiua iava varaperea voea evoea viurupa irara kasi iraosa. <sup>10</sup> Oisi-a eisi Seten voea kea rovorevoiva, Pauto rera vikirevoraoro rirova sovara-ia gogagare rikui, o iria-ia riro kasirao vuvu toupaveira tuituia aue-ia avekea solfa viitavokoaro, vo uva toupaveira vavaraito vaio ora profetato riro kuuvuto. Uva vo peva rutu evoea vuri upia rutu siitoka oupaveira ravireoura rutu-ia ora vokiario rutu vo uva viapau opesia vai.

### *Riroa Tavaa Kort Oa Karekeperea*

<sup>11</sup> ✧ Oire uva oavu reia paupa popotea turaro vaaro kekeavorao urusia-ia osa voa toupavorao oa-ia pauparoraoro Pauto. Uva rasiarei ora vuvuiua rera asavira toripaivorao. Eisi osa iavirava viapau oarei varei iava voveira kekeivorao. <sup>12</sup> ✧ Uva kopii irara kekeavorao osa voa toupavorao voeao rei vaisi irara ora voeao akaipa irara oea Pauto vaaro paupa ruvara-ia torepaaerao. Ovusa roari ira va-ia paupa pauparora vukuara karukaruparevorao. Uva ovukuvu tapo ita karurevoraoro eva Tootoopa Vuku. Oa iavirava kopii irara rovirieparevorao, uvare rigatara kekeparevorao oara vo vukuro-ia toupavorao. Oa iava voea kopii irara rovirieparevorao voea vo vovouroaro uvuiarova varari oara oisoa purapave. <sup>13</sup> ✧ Uva avakava voea rutu voveira kopii irara kosi pieevoraoro voeao oea oira-ia toupaveira. Ovusa Kopii ora vo uva kopii irara toupaveira oa voare voveira voea rutu kopii irara kosi pievoraoro. Osa-a oiso osa iava roviriepatato jas voa voea rutu kafakataivira rovirieparevorao voea vo pitupituroarova uvuivira oiso osa vara oisoa purapave. <sup>14</sup> ✧ Uva Kopii vikirevoraoro varei ora vo uva kopii irara toupaveira, oarea rutu vikirevoraoro rirova-ia rikui iria-ia tuituia toupaveira. Uva oira-a eira rikui iria-ia eraopa kopii toupaveira. <sup>15</sup> Vosa oirara roviriepatato viapau irai vaisiario oiratoa vai kekereve vukua-ia vao Tootoopa, oire ra rera vikireve oira-ia eira rirova rikui iria-ia tuitui kasi toupaveira.

## 21

### *Vo Toupai Airepaua Iava Vuvuiua Ora Airepatato Rasito*

<sup>1</sup> ✧ Oire uva airepaua vuvuiua kekeavorao urusia-ia ora airepatato rasito. Uvare rovopaua vuvuiua ora rovopato rasito oarea opesi rovoepa. Uva avakava tapo viapau toupavevorao. <sup>2</sup> ✧ Uva vao Tugoropa Urui airepa Jerusalem urui kekeavorao oa Pauto ruvara iava varapaerao vuvuiua iava. Ouruia veoro orito rutuva touvoraoro oiso rutu osa riakova veoropa orito vatatopovira oisoa purapave vatuato ousa, oira reraaro. <sup>3</sup> Uva oreovu uvuavorao reito vaaro iava oa paupa urioeraoro rirovira rutu oiso puraoro, “Kekeri! Vo vokie Pauto vo kepaaro toupai oirara tapo. Oa voea vuvuvuaro-ia toupaveira, ra oisi iavirava oiso toupave, Rera voearo oirara. Iu. Pautoa raga ita ira pere voea tapo, ra oiso toupaveverea, Voea reraaro rutu. <sup>4</sup> ✧ Ira voea iava gau oviro rutu posiposi piereverea. Ora viapau oiso ra vorerivira ita kopiiave. Ora viapau oiso ita ra vorerivira

✧ 20:9: Esi 38:9, 22, 39:6 ✧ 20:11: Dan 2:35; Re 12:8 ✧ 20:12: Lu 10:20 ✧ 20:13: Re 6:8; Ais 26:19; Re 2:23 ✧ 20:14: 1 Ko 15:26; Re 6:8 ✧ 21:1: Ais 65:17; 2 Pi 3:13 ✧ 21:2: Hi 11:10-16 ✧ 21:4: 1 Ko 15:26; Ais 35:10, 65:19

tavaka vo siraoaro vai oupaive. Ora viapau oiso ra vorerivira gaupaive. Ora viapau vorerivira upiaave. Evara rutu tuariripara oara opesi ovoiei.”

<sup>5</sup> Uva ro ira reito vaaro-ia paupa paupaoro oiso puraroerao, “Keker! Ragai orekerovu rutu airepavira kareke pieavo.” Uva oiso ita puraroerao, “Vo reoa vao rigatori oiraopa reo rutu, oa-ia uvuipai oirara rutu ra va oirao pie iraoive rutu.” <sup>6</sup> Uva ragai ita tavirevorao oiso puraoro vorerivira, “Orekerovu rutu varao kareke ovoiei! Uva ragai raga-a, Irapatoa rutu. Ora ragai raga-a, Ovoiohoto. Ragai-a orekerovu rutu vituaro, ora okovorovu rutu opesiara. Vosa ro ira uuko regaparo, irapa eera ragai vagavaave, ra ukaioro tuputupue ovi-ia uukoa Tootopa. Oa eva vate ragaavere rerapa vatevateavira. <sup>7</sup> Vosa ro ira upoava ora keevoisiro, ira uvuiparoi ra evara rutu varao viraakoara oureve ragai varaaro. Ra oisi iavirava ragai oiso rerapa toupaa, Ragai-a rera reraaro Pauto. Vo osa rera oiso toupaveve, Rera ita-a oviitoa oaa.

<sup>8</sup> ✧ “Ari ita, vosa voeao oea uriripaaveira vorevira ora ruvupaoro, ora voeao tapo oea viapau oirao piepaiveira, ora voeao oea kaakau kare vo pitupituaru rutu purapaiveira, ora voeao oira upopa irara, ora otopa pitupituro purapa irara, ora kavokavoara purapa irara, ora voeao oea kuuvu irara tokarasi irara-ia vuurapa vaisi purapaiveira, ora kuuvu reoro raga purapaiveira, oearoa rutu-a evoea oea ora voea vo uruiaro oivireva vo rirova-ia rikui uva riro kasi vuvupaoro toupaveira aue-ia solfa viitarokoaro-ia. Uva va vao-ia eraopa kopii voea vaaro.”

### *Airepa Urui Iava Jerusalem Urui*

<sup>9</sup> Uva iravu raga ita purapurapato ensel ragai iare urioroerao. Eera-ia iravu voeao iava erao vatara enselpa irara oea disara-ia pitupaivorao, varao oara-ia vuriara rutu ovoipara toupavorao oirara vuri piepasa. Uva rera enselto oiso ragai tavirevorao, “Uriou! Ra vii kareke piea riakova-ia o Sipsip Kakae oiraoro eira iria ourevo.” <sup>10</sup> Oire uva Tugoropato Uraurato ragai-ia goruvira rutu ora karekeroroerao. Oa iava enselto ragai kaeoro avaroroerao oavu iare riro pukui riro torea rutu. Uva vo pukui kukuearo-ia tupaoro voava ragai kareke pieparevorao vare vao rei urui Tugoropa Jerusalem urui oa Pauto ruvara iava varapaerao vuvuiua iava. <sup>11</sup> Uva Pauto vaaro aua sisikorevira roropavo rutu vo urui-ia eva rei urui. Ororoa aviaviaro pisavira rutu tupaivorao oiso rutu osa aveke o riro voriva rutu. Iu. Eisi osa aveke jaspaa iria oiso rutu roropaveira osa sisiro. <sup>12</sup> ✧ Uva vo urui eva oa-ia rirova kasura tupaivorao riro torea rutu, okasura-ia katai tau erao (12) rataoara tupaivorao. Uva katai tau erao (12) enselpa irara vara riaaro-ia rataoara rutu uutupaoro torepaaerao. Uva katai tau erao (12) sara Isrel-pa irara vaisiara voa tupaivorao rataoaro rutu riaaro-ia. <sup>13</sup> Uva kasura iava oiso va uvava ravireo kaeparo viroveira uvava opevavu ratao tupaivorao. Osa opevavu ratao oisova oirapapa varata-ia, ari opevavu oisova koike varata-ia, ari opevavu oisova uva ravireo rokopaveira. <sup>14</sup> ✧ Uva vo kasura vao rei urui iava va oa-ia katai tau erao (12) tupaivorao avekeara vo kasura vituaro goru piepasa. Oavekeroa-ia vo vaisiro katai tau erao (12) aposel tupaivorao Sipsip Kakae voeaaro vaisiara.

<sup>15</sup> Uva rera raga ita eera purapurapato ensel ragai tapo ora reoporoerao ira uvuiua pitupavevo gol vo urui vao rei urui uvuipasa, ora vo urui iava rataoara, ora vo urui kasuraaro. <sup>16</sup> Uva rera purapurapato vo urui uvuiparevorao rera vaaro-ia uvuiua. Oa iava vo urui uvuiaro vao-ia uvuipai, 2,400 vuutaro (kilomita) va kaekaearo-ia, ora vo urui kasuraaro parakaaro-ia, ora vo urui toreaoro uvuiaro oara rutu vaeapaivorao katai uvui raga-ia.

<sup>17</sup> Uva vo urui kasuraaro tapo uvuirevorao, uvare kasura tapo-a riro toрева. Iria aue uvuipaai 60 mita. Oa-a vao-ia mita oa-ia oirara oiso orekerovu uvuipaive. Uva purapurapato ensel va-ia eva kasura uvuirevorao mita.

<sup>18</sup> ✧ Uva vo kasura eva rei urui iava Pauto oa purareva avekeara-ia varao jaspa. Ora vo urui tapo purareva aue raga-ia gol. Oa iava oiso rutu aviavipaiveira roroiovira roropaoro oiso osa sisiro. <sup>19</sup> Uva vo urui kasuraaro vituaro oritoreva Pauto osararovu rutu-ia avekeara riro voripara. Uva rovova rutu vearovava aveke vo kasura rutu vituaro-ia toupaveira o-ia jaspa. Ari eraopava kuuvava iriavu aveke sapaia. Ari vo pevapava popoteva aget. Ari vo resurapava kokovarava emeral. <sup>20</sup> Ari vo vavaepava sadonikis eira revasiva ora popote vatakopava. Ari katai vatarapava revasipava konillian. Ari erao vatarapava keseva krisolait. Ari vo peva vatarapava iriavu kokovarava beril. Ari vo resura vatarapava iriavu keseva topas. Ari katai taipava krisopres iria kokovara vatakovira toupaveira ora kesevira. Ari katai tau kataipava o-ia iriavu kuuvava haiasin. Ari katai tau eraopava o-ia iriavu revasipava ametis. <sup>21</sup> Varao-ia katai tau erao (12) rataoara evara aasiara popotepara riro voriara rutu. Orataoyu purareva aisivu iava katai isi riro isi aasi isi. Ora gol raiva raga vo urui sovara-ia, oa oiso rutu roropaiveira osa sisiro roroiovira rutu.

<sup>22</sup> Uva viapau oiso Tugoropa Kepa kekeavorao voa vo uruia oa tavar-iorevorao Turaro raga Pauto ira-ia goruara rutu toupaveira ora Sipsip Kakae. Aue iava uvare vaierei raga oiso toupasivorao Tugoropa Kepa ora vaierei raga-ia. <sup>23</sup> ✧ Uva vo uruia-a eva oa-ia viapau ravireo roro vai ora kekira roro vai. Viapau. Ari Pauto raga vaoro-a aua, oa raga sisikorepaoro voare roropaiveira. Ora vo uvare Sipsip Kakae-a vuravu vo urui oiraaro.

<sup>24</sup> Oirara rutu vokapaiveira vo urui raga aviaviaro-ia. Ora reipa irara voeao vo rasio iava oea ora voea varaarova oritoara uriopaave voare riro voripara rutu vo urui-ia. <sup>25</sup> ✧ Uva ravireo-ia viapau uvuipaai ra rataoara tupapaive varao vo urui kasuraaro-ia vo rataoro. Aue iava uvare viapau rutu rupaa vai karekepape vo urui-ia vao. <sup>26</sup> Orekerovu rutu rirova voriara okantrirovu rutu iava oarava koataaverea rera vaisiario-ia vuurapa vaisi purapasa. <sup>27</sup> Ari varao uvuipara, ora voeoro oirara oearoa opitupiturovu rutu purapaiveira vuriara, ora voeao oea kuuvu reoro raga purapaiveira, oearo-a evoea viapau oiso koataaverea voare. Viapau rutu. Uvare Sipsip Kakae oearovu raga vaisiario rigatova Tootopa Vuku-ia. Oea raga-a evoea vo urui-ia koataaverea.

## 22

### *Tootoopa Uukoa Ora Tootopa Ova Evaova*

<sup>1-2</sup> ✧ Uva rera ro purapurapato ensel ragai kareke pierevorao okaravure uuko kara eva Tootopa Kara uukoa oa oiso rutu roropaiveira osa sisiro. Okara paupa iava Pauto vaoro parupaiveira vaierei ora Sipsip Kakae raiva rutu vuutaaro-ia vao rei urui sovara-ia tou raiva. Uva uuko kara vaturo-ia oisova ora oisiriva uvareava Tootopa Ova toupaveira. Oeva kuepapeira kekiraara rutu-ia katakataivira katai tau erao (12) vuutaro-ia katai iva rutu sovara-ia. Uva vo eva iava guruvara oirara veoro piepaoro voea ruvarupara. <sup>3</sup> ✧ Ari orekerovu rutu varao oarare oiso purapoveira, "Vuriara" varapa reasipaoro, oara viapau uvuipai ra voa toupaveira.

Ari paupa raga Pauto vaoro ora Sipsip Kakae oa uvuipai ra vo urui-ia toupaveira. Uva Pauto voearo kovopa irara voa rera-ia vuurapa vaisi

✧ **21:18:** 2 Kro 3:3-10 ✧ **21:23:** Ais 24:23, 60:19-20 ✧ **21:25:** Ais 60:1-11 ✧ **22:1-2:** Esi 47:1-12; Sek 14:8; Re 4:6 ✧ **22:3:** Jen 3:17-19; Sek 14:11



purapaiverea. <sup>4</sup> ✧ Ora rera tapo puaaro vurapaiverea ira ora rera iava vaisia rigatoreverea voea iava kagaveara-ia. <sup>5</sup> ✧ Uva viapau oiso rupa vai karekepaperea. Osa iava viapau vuravu aviaviaropa ruipapaaverea ora ravireo vai aviaviaro tapopa. Viapau. Ari Turaro raga Pauto voeare aviavipareverea. Ra turarovira rutu reipaaro toupaverea opesi asavira.

### *Jisas Ikauvira Raga Urioroverea*

<sup>6</sup> Uva purapurapato ensel ragai tavirevorao oiso puraoro, “Oiraopa reo rutu-a vao-ia. Oreoa-ia uvuipaai oirara rutu ra va oirao pie iraoive. Turaro Pauto oisoa Tugoropato Uraurato topatopapareve profet irara sopaaro-ia. Oa iava oisoa rera vo reoaro iava siposipopaive. Ira purapurapato rera reraaro arureva rera voeaaru rutu kovopa irara roroi piepasa orekerovu rutu iava varao oara ikauvira rutu karekepasa auepaperea.” <sup>7</sup> ✧ “*Uvu iraori!*” Jisas oiso puraroerao. “*Urioparai ikauvira. Vosa irai Pauto vo reoaro sirova utuparo vo vuku vao iava oreoa karekepapere utupaua, oire uva oisi-a eisi osa iavirava eera oirato uvuiparoi ra rorureve.*”

<sup>8</sup> Ragai-a vao-ia Jon ragoa vo reo uvuavoiva, vara rutu varao keke ovoiavorao. Oa iava purapurapato ensel kokotoaro ruvara-ia takura viro, ro ira ragai kareke pierevorao vara ruture evara. Osa iava rera-ia vuurapa vaisi purasa aueparaerao. <sup>9</sup> Ari ragaire oiso puraroerao, “Opeita eisi ragai piepari, uvare ragai-a vii tapo kovopato, ora araoko irara oaro tapo voeao profet irara. Ora ragai-a voeao tapo kovopato oea vo reo sirova utupaaveira oreoa vo vukuo-ia toupaveira. Ari Pautoa raga-ia kataito vuurapa vaisi pura iraori.” <sup>10</sup> Uva ragai taviro oiso puraroerao, “Vo reo-a vao-ia Pauto vo reoaro oreoa vo vukuo-ia toupaveira, oreoa-ia viapau uvuipauei ra vo reo rukuri. Viapau rutu. Eake iava? Uvare Pauto vo vuutaaro-a vao vara rutu evara purapasa oa tutuuvui. <sup>11</sup> Osa iava ro ira vuria purapare, osa raga ita vara purapareverea vuriara. Ari ro ira rupa vovou purapareve, ira ita vo vovou rupa vovou purapareverea. Ari ro ira torevoko vovou purapareve, ira oisi raga vo vovou purapareverea. Ora ro ira airerei vovouvira toupareve, eera ita oisi raga airerei vovouvira toupareverea.”

<sup>12</sup> ✧ Jisas oiso puraroerao, “*Uvu iraori! Ikauvira poua virovere rara oirara rutu vo voriroaro vatesa katakataivira, vo vovouro voriaro uvuiaro oara oisoa purapaive.*” <sup>13</sup> Uvare ragai raga-a, Irapatoa rutu ora Ovoikutoa rutu. Ora ragai raga-a, Avaioto ora Utupatoa rutu. Ora ragai raga-a, orekerovu rutu Vituaro ora Opesiaro.”

<sup>14</sup> ✧ Voeao oea varoara oaive sisupaive oea uvuipaai roru iraoipaive. Vo uvare voea-a evoea oea uvuipaai ra aio oupaave vo evao iava Tootoopa Ova. Ora oea uvuipaai ra rei urui iava vo rataoro-ia koataave. <sup>15</sup> Ari voeao oea kaakau kare vo pitupituaro purapaiveira, ora voeao oea kavokavo purapaiveira, ora voeao oea otopa pitupituro purapaiveira, ora oirara upopaiveira, ora tokarasipa kuuvuto vuurapa vaisi purapaiveira, ora kuuvu vovoupa ruipapaaveira va sirova utupasa, oea rutu-a evoea oea rei uruipa ratau toupaverea Pauto vo uruiaro.

<sup>16</sup> “*Ragai-a Jisas ragoa purapurapato ensel aruavora visii iare. Oa iava visiipa vo reo vao siposiporevora visii lotupa uvururo. Ari ita, uvare ragai-a Ikoto Devit aaotoaro. Ora vo osa ragai-a, o aaviiko aviva iria sisikorevira roropaiveira.*” Osa oiso puraroepa Jisas.

<sup>17</sup> Tugoropato Uraurato vaiterei ora Sipsip Kakae vatuaavaaro aiterea oiso purasiei, “Uriota!” Ra ro ira vo reo eva uvureve ira tapo ita uvui iraoaroi

ra oisi raga ita puraro oiso, “Uriota!” Osa iava ro ira uuko regaparo, ira uvuipa ra urioro. Ora ro ira ita ukaio ruipaparo, ira uvuipa ra urioro uukoa Tootoopa ousa oa oiso toupai, Vate raga siraoa Pauto vaaro.

*Ovoioa Reo Vao-ia*

<sup>18</sup> ☆ Ragai-a vao Jon gору reo rutu vate iraopaavoі oirara rutupa voeao oea Pauto vo rearo uvupaiveira vo vukuo iava. Vosa irai oiratoa vai vo reo siguvareve oreoi raga tapo vo reova vao-ia, oire uva vara rutu-a evara vuriara oarare Pauto oiso reoroepa vo vukuo-ia, rera Pauto orekerovu takutakuvureveea rerapa eera oirato. Ra vara iavirava vurivira rutu siitoka iraoparo. <sup>19</sup> Ora vosa irai oreoroі verareve vo vuku iava vao, Pauto ira ita taru oisi verareve. Ra viapau oiso aio ouro vo evao iava Tootoopa Ova. Ora viapau oiso vao-ia rei urui tapo toupareveea ouruia iava vo vukuo oiso purapai.

<sup>20</sup> ☆ Oire uva Jisas oiso puraroі, “*Oiraopavira rutu, ikauvira urioravere taru.*” Ira-a ro ira varao rutu iava siposiporevora oara vo vukuo-ia toupai. Ari ita, Turaro Jisas uriou!

<sup>21</sup> Vereopa vovou Turaro Jisas vaaro uvuipai ra visii rutu tapo toupavereea visii tauvapasa vokiara rutu-ia. Ovoiei.

## Read the New Testament daily

### *January*

date	Scripture
1	Matyu 1:1–2:12
2	Matyu 2:13–3:6
3	Matyu 3:7–4:11
4	Matyu 4:12–25
5	Matyu 5:1–26
6	Matyu 5:27–48
7	Matyu 6:1–24
8	Matyu 6:25–7:14
9	Matyu 7:15–29
10	Matyu 8:1–17
11	Matyu 8:18–34
12	Matyu 9:1–17
13	Matyu 9:18–38
14	Matyu 10:1–23
15	Matyu 10:24–11:6
16	Matyu 11:7–30
17	Matyu 12:1–21
18	Matyu 12:22–45
19	Matyu 12:46–13:23
20	Matyu 13:24–46
21	Matyu 13:47–14:12
22	Matyu 14:13–36
23	Matyu 15:1–28
24	Matyu 15:29–16:12
25	Matyu 16:13–17:9
26	Matyu 17:10–27
27	Matyu 18:1–22
28	Matyu 18:23–19:12
29	Matyu 19:13–30
30	Matyu 20:1–28
31	Matyu 20:29–21:22

### *February*

date	Scripture
1	Matyu 21:23-46
2	Matyu 22:1-33
3	Matyu 22:34-23:12
4	Matyu 23:13-39
5	Matyu 24:1-28
6	Matyu 24:29-51
7	Matyu 25:1-30
8	Matyu 25:31-26:13
9	Matyu 26:14-46
10	Matyu 26:47-68
11	Matyu 26:69-27:14
12	Matyu 27:15-31
13	Matyu 27:32-66
14	Matyu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Jon 1:1-28

date	Scripture
1	Jon 1:29-51
2	Jon 2:1-25
3	Jon 3:1-21
4	Jon 3:22-4:3
5	Jon 4:4-42
6	Jon 4:43-54
7	Jon 5:1-23
8	Jon 5:24-47
9	Jon 6:1-21
10	Jon 6:22-40
11	Jon 6:41-71
12	Jon 7:1-29
13	Jon 7:30-52
14	Jon 7:53-8:20
15	Jon 8:21-30
16	Jon 8:31-59
17	Jon 9:1-41
18	Jon 10:1-21
19	Jon 10:22-42
20	Jon 11:1-53
21	Jon 11:54-12:19
22	Jon 12:20-50
23	Jon 13:1-30
24	Jon 13:31-14:14
25	Jon 14:15-31
26	Jon 15:1-27
27	Jon 16:1-33
28	Jon 17:1-26
29	Jon 18:1-24
30	Jon 18:25-19:22
31	Jon 19:23-42

date	Scripture
1	Jon 20:1-31
2	Jon 21:1-25
3	Aposel 1:1-26
4	Aposel 2:1-47
5	Aposel 3:1-26
6	Aposel 4:1-37
7	Aposel 5:1-42
8	Aposel 6:1-15
9	Aposel 7:1-29
10	Aposel 7:30-50
11	Aposel 7:51-8:13
12	Aposel 8:14-40
13	Aposel 9:1-25
14	Aposel 9:26-43
15	Aposel 10:1-33
16	Aposel 10:34-48
17	Aposel 11:1-30
18	Aposel 12:1-23
19	Aposel 12:24-13:12
20	Aposel 13:13-41
21	Aposel 13:42-14:7
22	Aposel 14:8-28
23	Aposel 15:1-35
24	Aposel 15:36-16:15
25	Aposel 16:16-40
26	Aposel 17:1-34
27	Aposel 18:1-21
28	Aposel 18:22-19:12
29	Aposel 19:13-41
30	Aposel 20:1-38



date	Scripture
1	Aposel 21:1-16
2	Aposel 21:17-36
3	Aposel 21:37-22:16
4	Aposel 22:17-23:10
5	Aposel 23:11-35
6	Aposel 24:1-27
7	Aposel 25:1-27
8	Aposel 26:1-32
9	Aposel 27:1-20
10	Aposel 27:21-44
11	Aposel 28:1-31
12	Rom 1:1-17
13	Rom 1:18-32
14	Rom 2:1-24
15	Rom 2:25-3:8
16	Rom 3:9-31
17	Rom 4:1-12
18	Rom 4:13-5:5
19	Rom 5:6-21
20	Rom 6:1-23
21	Rom 7:1-14
22	Rom 7:15-8:6
23	Rom 8:7-21
24	Rom 8:22-39
25	Rom 9:1-21
26	Rom 9:22-10:13
27	Rom 10:14-11:12
28	Rom 11:13-36
29	Rom 12:1-21
30	Rom 13:1-14
31	Rom 14:1-23

date	Scripture
1	Rom 15:1-21
2	Rom 15:22-16:7
3	Rom 16:8-27
4	1 Korin 1:1-17
5	1 Korin 1:18-2:5
6	1 Korin 2:6-3:4
7	1 Korin 3:5-23
8	1 Korin 4:1-21
9	1 Korin 5:1-13
10	1 Korin 6:1-20
11	1 Korin 7:1-24
12	1 Korin 7:25-40
13	1 Korin 8:1-13
14	1 Korin 9:1-18
15	1 Korin 9:19-10:13
16	1 Korin 10:14-11:1
17	1 Korin 11:2-16
18	1 Korin 11:17-34
19	1 Korin 12:1-26
20	1 Korin 12:27-13:13
21	1 Korin 14:1-17
22	1 Korin 14:18-40
23	1 Korin 15:1-28
24	1 Korin 15:29-58
25	1 Korin 16:1-24
26	2 Korin 1:1-11
27	2 Korin 1:12-2:11
28	2 Korin 2:12-17
29	2 Korin 3:1-18
30	2 Korin 4:1-12
31	2 Korin 4:13-5:10

date	Scripture
1	2 Korin 5:11-21
2	2 Korin 6:1-13
3	2 Korin 6:14-7:7
4	2 Korin 7:8-16
5	2 Korin 8:1-15
6	2 Korin 8:16-24
7	2 Korin 9:1-15
8	2 Korin 10:1-18
9	2 Korin 11:1-15
10	2 Korin 11:16-33
11	2 Korin 12:1-10
12	2 Korin 12:11-21
13	2 Korin 13:1-14
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Efesas 1:1-23
23	Efesas 2:1-22
24	Efesas 3:1-21
25	Efesas 4:1-16
26	Efesas 4:17-5:2
27	Efesas 5:3-33
28	Efesas 6:1-24
29	Filipai 1:1-26
30	Filipai 1:27-2:18

date	Scripture
1	Filipai 2:19–3:6
2	Filipai 3:7–4:1
3	Filipai 4:2-23
4	Kolosi 1:1-20
5	Kolosi 1:21–2:7
6	Kolosi 2:8-23
7	Kolosi 3:1-17
8	Kolosi 3:18–4:18
9	1 Tesalonaika 1:1–2:9
10	1 Tesalonaika 2:10–3:13
11	1 Tesalonaika 4:1–5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22–3:17
25	2 Timoti 4:1-22
26	Taitas 1:1-16
27	Taitas 2:1-14
28	Taitas 2:15–3:15
29	Failimon 1:1-25
30	Hibru 1:1-14
31	Hibru 2:1-18

date	Scripture
1	Hibru 3:1-19
2	Hibru 4:1-13
3	Hibru 4:14-5:14
4	Hibru 6:1-20
5	Hibru 7:1-19
6	Hibru 7:20-28
7	Hibru 8:1-13
8	Hibru 9:1-10
9	Hibru 9:11-28
10	Hibru 10:1-18
11	Hibru 10:19-39
12	Hibru 11:1-16
13	Hibru 11:17-31
14	Hibru 11:32-12:13
15	Hibru 12:14-29
16	Hibru 13:1-25
17	Jems 1:1-18
18	Jems 1:19-2:17
19	Jems 2:18-3:18
20	Jems 4:1-17
21	Jems 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Jon 1:1-10

date	Scripture
1	1 Jon 2:1-17
2	1 Jon 2:18-3:2
3	1 Jon 3:3-24
4	1 Jon 4:1-21
5	1 Jon 5:1-21
6	2 Jon 1:1-13
7	3 Jon 1:1-14
8	Jut 1:1-25
9	Revelesen 1:1-20
10	Revelesen 2:1-17
11	Revelesen 2:18-3:6
12	Revelesen 3:7-22
13	Revelesen 4:1-11
14	Revelesen 5:1-14
15	Revelesen 6:1-17
16	Revelesen 7:1-17
17	Revelesen 8:1-13
18	Revelesen 9:1-21
19	Revelesen 10:1-11
20	Revelesen 11:1-19
21	Revelesen 12:1-18
22	Revelesen 13:1-18
23	Revelesen 14:1-20
24	Revelesen 15:1-8
25	Revelesen 16:1-21
26	Revelesen 17:1-18
27	Revelesen 18:1-24
28	Revelesen 19:1-21
29	Revelesen 20:1-15
30	Revelesen 21:1-27
31	Revelesen 22:1-21

## REOARA VITUARO IAVA

**aposel** (aposel/apostle)

Aposel vaisi oa vituaro oiso toupaveira, reo kaepa irara. Ovaisi-ia Jisas voeaaro oisoa toupave katai tau erao (12).

**areo uusi** (samting olsem driman/vision, revelation)

Pauto areo uusi vatepareveira oiratoapa vo osa rataa pievira uusiparo. Uva va-a vao oa-ia Pauto vaaro kekereve oiso osa Pita vaio (Aposel 10:3) ora Pol (Aposel 16:9), vo uvare Pauto vo tavitaviaro ravotovira ousiva areo uusi-ia, vo osa orekerovu kekesiva rataa pievira uusipaoro.

**aveke pero** (hap ston/stone tablets, Ten Commandments)

Oa-ia Reo Taisi rigatoreva Pauto Moses vatesa Sinai Pukui-ia (Eksodas 24:12; 2 Korin 3:3).

**disaipel** (disaipel/disciple)

Disaipel vaisi oa vituaro oiso toupaveira, vo osa iravu reito oaive vo taraiaro sirova utupaave. Ovaisi-ia Jisas voeaaro oisoa toupave katai tau erao (12) (Luk 14:33; Jon 8:31).

**eravao** (alta/altar of sacrifice)

Oira o eravao iria ivara-ia oisoa koruou raro purapaive voeao Jiu Pauto roru piepasa. Uva Jisas ovoioapa tauo (offering) purarevora ora rera-ia oirara rutupa vuriaraaro oaive-ia koruoua puraoro vo evao parikou-ia (Jenesis 8:20; Matyu 23:19; Luk 1:11).

**keraria Vo vaisio keraria oa-ia toupavoi vo peva porearo** (minning) oiso,

1. Rovopa vao-ia varao rutu iava oara purareva Pauto oara kekepai vo rasio-ia ora vo vuvuiua-ia (olgeta samting God i bin wokim/creation).
2. Eraopa vao-ia vo osa Jisas pukuia-ia toupaveva Moses vaio tapo ora Ilaija. Uva riroa sovara-ia aviavia toupaveira oa rirovira rutu siskorepaiva voea iava. Oavua vao eraopa oa vaisipaiveira, keraria (lait/light, glory) (Luk 9:31).
3. Vo pevapa vao vo osa Jisas riroa rutuva keraria toupaveira aue vituaro iava uvare rei vaisitoa rutu rera vao iava rera vo kovoaro (biknem, bikpela namba/glory, honor) (Revelesen 5:12).

**keri vaeapai aue tapo** kegi.

**kori** (kilim/slaughter)

Vo vaisio kori vaisi oa-ia reoreoroepa Jems vao-ia rugoopaoro oirara vo kasipuaroo oa purapaivere oirara tekipaoro, voeao oea ora voea ragare rugorugooapaaveira (Jems 5:5).

**koruou** (ofa/sacrifice)

vaeapai aue tapo tauo (1 Korin 5:7).

**kukuvaipa** (hat kapa/helmet) (Efesas 6:17).

**moni** (mani/money)

Voea vaaro Rom-pa irara tuariri (Mak 12:14).

**meme rakariaro** (skin meme/wineskin)

Vao-ia oa-ia wain ovi kuvuive (Matyu 9:17).

**Oirato Oviitoaaro** (Pikinini Bilong Man/Son of Man)

Uva rera ora vaisiroepa Jisas oiso, Oirato Oviitoaaro, uvare rera raga Jisas vo vaisi vituaro-ia taraiaroepa. Aue iava uvare Pauto rera roporeva rera aruoro vo rasio iare. Oa iava oiravira kavaroepa, Pauto vo siraoaro kareke piesa oirara rutupa, voeao vo rasio-ia tou irara (Jon 9:35-37).

**Onisimas** (Onisimas/Onesimus)

Onisimas-pa vaisi-a vao ovaisi porearo oiso toupaivoi, Kovo purato. Ovaisi vituaro-ia rugoopaoro rera-ia rugorugooapaoro Pol reoreoroepa Failimon iare, oreoreoro epao vo Failimon vo pasiaro sovara-ia (Failimon 10).

**ora utopa pero** (siot kapa/breastplate) (Efesas 6:13).

**purapurapa irara** (ol ensel/angels)

Purapurapa irara voeao oea vuvuiua-ia toupaveira Pauto ruvara-ia. Oea rerapa kovopaveira rera vo reoroaro iava tavitavipaoro (Luk 1:26-38), ora rera-ia vuurapa vaisi purapaveira rorupaoro (Luk 2:9-14), ora rera vo ruipaoro sirova utupaai rutu. Vo utupaua uva Pauto vo kasipuaro kareke pievereava voeao-ia vuri irara oea viapau Pauto oirao piepaveira vo vokiö (Revelen 15:1).

Ari iravu-a ro enselto Seten ira oisoa vearovira toupaveve vo vuvuiua-ia. Oire uva voava koveroepa Pauto ruvara iava rara ora vaisiaro rei pieparo ora rera raga vo ruipaoro sirova utupaoro (Luk 10:18).

Uva Pol voea iava enselpa irara rigatoreva rara voeao Jiu-pa irara voe-ia rirovira rugorugooapaoro ora voea vo lotuaro sirova oisoa utupaave (Kolosi 2:18).

**rakari verapa pitupitu** (katim skin/circumcision)

Rakari verapa pitupitu oa oisoa toupave voea ruvara-ia Jiu-pa irara. Uva vo vokiö oearovu tapo va purapai kakae vure-ia (Jenesis 17:10-14; Aposel 15:24).

**ratau tou irara** (ol arapela lain, jentael/gentiles)

Vigei vaisipaveira oiso, ratau tou irara, aue iava uvare viapau oiso Jiu vo saraaro iava vigei. Ari ratau tou irara voeao oea vaisipaveira Jentael (Rom 4:11, 9:30).

**ravoto kovoro** (ol mirakol/miracle)

Okovoroa oisoa purapaveve Jisas oirara tauvapaoro. Jisas ravotovira vo kovoro purapaveve Pauto vo goruaro iava. Oisi raga aposel irara ravotovira oisoa oirara tauvapaive Pauto vo goruaro kareke piepaoro. Ari ita, uvuipai ra oearovu Seten vo goruaro iava oaravu purapaveve ravoto kovoro tapo (Eksodas 7:8-12; Jon 2:1-11; Aposel 4:30).

**reo goruro** (ol lo/man's laws)

Oirara rutu reo goruro purapaveira varao oara-ia uvuipaii vara sirova vearo tou purapaveve. Osa oisoa Jiu-pa irara oaravu purapaveve Reo Taisiva vara takuvupasa (Jems 2:8).

**reo ovoi** (tok promis, kontrak/promise)

Vosa aitereivu ora reosi ra reo ovoi purasi. Aue iava uvare ovoiei reo rutu purasivoi, oiso rutu osa voari tuariri oisoa Rotokasipa irara reo ovoiei purapaveve aveke taku pieri ivara iare aasi ruipaoro (Hibru 6:16).

**Reo Taisi** (lo bilong Moses/Moses' Law, Ten Commandments)

Reo Taisi vaisi kekeri, ra taraiu oiso, Pauto vaaro oa vatoreva Moses-pa vo Sinai Pukuia-ia (Matyu 22:40).

**Rovopa Kepa Tugoropa Kepa** (tempel/temple)

Vo kepa oa Jerusalem-ia touva Rovopa Kepa rutu (Matyu 26:61; Mak 11:11).

**ruu reo** (tok bokis/parable)

Jisas rirovira ruu reoro-ia reoreoroepa rera vo rugorugoooroaro vatau-paoro voeoro asavira oearoa rera vo kovoaro ora rera vo siposipoaro viapau oisoa oirao piepaveve (Luk 8:11).

**Sara Pauto Vaaro** (kingdom bilong God/kingdom of God)

1. Oire va vao-ia Pauto vaaro Sara oa iava rirovira ovoovo reoro pureva Jisas (Mak 1:15).



2. Oirao pie vovou irara Pauto vo Saraaro-ia toupaveira, aue iava uvare Pauto vaisipaveira oiso, Aite rera vo ruiapaaro sirova utupaoro (Matyu 7:21).
3. Vosa Jisas voreroverea torevoko vovou irara ousa ra koataaverea rera vo tokiaro-ia tousa, vo tokio oa viapau opesia vai, va vao airepa sara voeao vo saraaro oirao pie vovou irara (2 Timoti 4:18).

**sisikore vaeapai aue tapo** sirusiru.

**sopaua Vo peva toupaveira oiratoa-ia oiso-ia,**

1. **varaua** (bodi/body) Rovopa vao varaua oiratoa iava oua uvuipaai ra va kekepaive oirara (Rom 7:25).
2. **sopaua** (bel, tewel/soul) Eraopa vao oirato sopaaro-ia oa toupaveira vovou vo uva rugorugooara poupa piroveira, vao oa kovopaiveira vokiara rutu-ia oirato sopaaro-ia. Ora vao oa-ia Pauto vo rugooaro poupa viroveira oirara tavitavipasa vao iava vearoa ora vuria, oiso ra viapau vuria purapareve (Mak 14:34; Luk 1:46).
3. **uraurato** (spirit/spirit) Uraurato oirara-ia ora riakora-ia toupaveira ira tootooa vatepareveira varauapa (Jon 6:63). Vareo uraurato ora vovoua oarea kataivira toupaveira.

**Tagausapa Vurei** (Pasova/Passover)

Rovopa vurei vao Jiu vaaro oa oisoa purapaive voari tuariri ora vo vokie-ia tapo. Oa purapaiveira oovapaoro vo osa voea oureva Pauto Isip iava. Uva Pauto enselto arureva kakae vure avao kakae rutu uposa vo Isip-ia. Oire voeao oea vo kepararo-ia revasi kipuro kekepareva varao reesiara, oea-ia tagaupareva putepaoro voeao raga upopaoro Isip-ia ora oearovu oea viapau Pauto vo reorearo ira pie reoro oirao piepaiva (Eksodas 12:21-30; Mak 14:12; Hibru 11:28).

**Tugoropato Uraurato** (Holi Spirit/Holy Spirit)

Jisas ro iava Uraurato tavireva oiso, Visii iare rera aruavere visii tapo toupasa visii tokipaoro. Uva rera vo kovoaro-a vao ro-ia Tugoropato Uraurato, oirara tauvapaasa, ora Pauto vo reorearo aviavi piepasa torevokovira, ora Jisas vo kovoaro oirao piepareveira oirara sopaaro-ia.

**uraurato (aviavi pie reoro kekeri vo vaisio iava vao** sopaua vaisi).

**utave** (biugel/trumpet) (1 Korin 15:52)

**utuuva geesi** (sayor, ofa i gat gutpela switpela smel/herb)

(Matyu 23:23; Efesas 5:2).

**uvaruto** (ensel/seraphim)

(Hibru 9:5)

**varaua (aviavi pie reoro kekeri vo vaisio iava vao** sopaua vaisi).

**variria** (beten, prayer)

Variripaai oirara ora riakora Pautoa tapo ora reopaoro. (Vaeapai aue tapo purea.) (Luk 11:1)

**varo kepa** (haus lotu sel/tabernacle)

Oa-ia tuariri oisoa lotupaave tariripaoro Jiu-pa irara (Hibru 8:5).

**vereopa vovou** (marimari/grace)

Pauto vaaro siraoa oa vatepareveira oirarapa akukuvira raga. Oire uva vo sirao-a eva oa purapaveira vereopa vovou akukuvira rutu ora rera vo ruiapaaro sirova voea tauvapaoro (Rom 5:21).

**voru ou asa kovopa irara** (ol wokboi nating/slaves)

Voari tuariri uva oisoa riro moni irara oearovu kovo pieragapaive. Viapau oiso voea voripaive vo kovoro-ia oara oisoa purapaive voeapa. Ari aue raga-ia voea oisoa tokipaive varo, aio, ora oisoa voea tokipaive voea uusi piepaoro kepaara oaive-ia. Viapau oiso uvuipai ra ora voea vo rugorugooaro sirova utupaave uvarovu avapaoro. Ari oiso rutu oisoa

toupaive, tuukepa irara. Oiso rutu osa vuria oirara tuukepaiveira vearo rugooro purapa arapa (1 Korin 12:13).

**vuku viko** (buk/scroll)

Tuariri oa-ia oisoa Pauto vo reoroaro rigatopaive (Revelesen 5:1-5).

**wit** (wit/wheat)

Vao oa oiso rutu toupaiveira osa isiso kou (Matyu 13:3).

**yis** (yis/yeast)

Yis uverepaiveira oirara aue tapo plaua, ra riropape. Uva yis ora rigapaoro avapapeira vo plaua rufu sovara-ia. Oa-ia reoreoroepa Jisas vuri rugorugooro reesipaoro. Oara uvuipai ra oirara rutu sopaaro vuri piepaoro avapape (Luk 13:21).